


Tuhun cha sañahá ra
Jesucristo chi yo



New Testament in Mixtec, Jamiltepec (MX:mxt:Mixtec,
Jamiltepec)

Tuhun cha sañahá ra Jesucristo chi yo
New Testament in Mixtec, Jamiltepec (MX:mxt:Mixtec, Jamiltepec)

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
7411d349-0f34-5963-987e-74457a7bad38

Contents

| | |
|----------------------------|-----|
| San Mateo | 1 |
| San Marcos | 57 |
| San Lucas | 91 |
| San Juan | 151 |
| Hechos | 193 |
| Romanos | 246 |
| 1 Corintios | 269 |
| 2 Corintios | 290 |
| Gálatas | 305 |
| Efesios | 313 |
| Filipenses | 321 |
| Colosenses | 327 |
| 1 Tesalonicenses | 333 |
| 2 Tesalonicenses | 338 |
| 1 Timoteo | 341 |
| 2 Timoteo | 347 |
| Tito | 352 |
| Filemón | 355 |
| Hebreos | 357 |
| Santiago | 374 |
| 1 Pedro | 380 |
| 2 Pedro | 387 |
| 1 Juan | 391 |
| 2 Juan | 397 |
| 3 Juan | 398 |
| Judas | 399 |
| Apocalipsis | 402 |

Tuhun Nyoo Cha Tyaa San Mateo

*Ñáyivi vachi ra Jesucristo tata
(Lc. 3.23-38)*

¹ Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

² Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra. ³ Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram. ⁴ Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón. ⁵ Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isaí. ⁶ Ta sehe ra Isaí cuví chi rey David. Ta sehe rey David chihin ñaha cha cuví ñasihí ra Uriás cuví chi ra Salomón.

⁷ Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza. ⁸ Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías. ⁹ Sehe ra Uzías cuví chi ra Jotam, sutu ra Acáz. Ta sehe ra Acáz cuví chi ra Ezequías. ¹⁰ Sehe ra Ezequías cuví chi ra Manasés, sutu ra Amón. Sehe ra Amón cuví chi ra Josías. ¹¹ Sehe ra Josías cuví chi ra Jeconías ta yañi ra. Cacacu ra quívi catiñ ra ñuu Babilonia chi ñu Israel, cuahan coyo ñu cua sacuvi ñu tyiño nuu ñu.

¹² Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel. ¹³ Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor. ¹⁴ Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud. ¹⁵ Ta sehe ra Eliud cuví chi ra Eleazar sutu ra Matán. Ta sehe ra Matán cuví chi ra Jacob. ¹⁶ Ta ra Jacob cuví sutu ra José yí cu María. Ican ña cuví sivi ra Jesús ra cuví Cristo, o cuñí chi catyí, ra cha saquichi Nyoo vatyi cuví ra rey cuenda yo.

¹⁷ Ra Abraham chicoo uchi cumi tahan tata ra nyacua nya cacu ra David. Ta ra David chicoo uchi cumi tahan tata ra nyacua nya quívi tiñ ñu Babilonia chi ñu Israel. Ta nyacua nya quívi cuan chicoo uchi cumi ca tahan tata ñu nyacua nya quívi cacu ra Cristo.

*Nu cacu ra Jesucristo
(Lc. 2.1-7)*

¹⁸ Tyehe caa cacu ra Jesucristo: Cha yaha cundaa tyiño cha cutandaha cu María, sivi ra Jesús, chihin ra José. Ta cha ni cumañi ca coo ñu chihin tahan ñu, chicohon sehe ña, soco cha cuenda maa Tatyí Ii Nyoo. ¹⁹ Ta ra José ra cua cuví yí ña, cuví ra noo ra vaha. Ta ña cuñí ra cuhva ra ticahan nuu chi ña, yucuan chaha tyaa ra cuhva cha sandoo xehe ra chi ña. ²⁰ Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixí ra. Ta nyehe ra ñumahna ta catyí ángel cuan chi ra tyehe caa:

—Yoho José, tata ra David cuvún. Ma caca iñun quehun chi cu María cuví ña ñasihun, vatyi sehe ña cha cua cacu, cuenda Tatyí Ii Nyoo cuví. ²¹ Ta cha yaha cacu cha lee cuan, cusacunañun chi cue: Jesús. Tyicuan caa cunañi ra vatyi cusacacu ra chi ñáyivi chihin cuatyí ñu.

²² Tandihí ihya cuví tacuhva nachino cava tuhun cha cahan Sutu Mañi yo chihin yuhu ra cacuvi profeta ra ta cha naha, ra cachahá cuenda tuhun cahan ra.

²³ Ta catyí ra tyehe caa:

Ñaha tyivaa cha ta coo ca rayí chi, cucohon sehe ña.

Ta coo noo sehe ña. Ta cunañi cue: Emanuel.

Ta sivi cuan cuñí chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

²⁴ Cuhva cha nducachí iñi ra José, sacuvi ra tari cuhva catyí ángel cuan chi ra. Ta quehen ra chi cu María vatyi cuví ña ñasihí ra. ²⁵ Soco ña chiyo ra chihin ña cha numi ri. Nyacua nya cha yaha cacu sehe ña. Ta sacunañi ra chi cue: Jesús.

2

Nu cuahan coyo ra chiñi tuñi cua nyehe ra nu cacu ra Jesús

¹ Cacū ra Jesús noo ñuu cha nañi Belén. Ta ñuu cuan nyaá chi nu cuvī Judea. Ta rey Judea cuan nañi ra Herodes. Tyicuan ta chaā coyo suhva ra nya ñuu Jerusalén. Quichī coyo ra ityi nu caña ñanyii. Ta ra cachiñi tuñi xaan cacuvī ra. ² Ta candacā tuhun ra chi ñáyivi tyehe caa:

—¿Nya nyaá ra cuvī rey cuenda ñu Israel? Vatyī ityi nu caña ñanyii nyehe ndi tiñoō cha chahā cuenda tyi cacū ra ityi ihya. Ta vachi ndi vachi sacahnu ndi chi ra —cacatyī ra.

³ Ta quivi cha chito rey Herodes tuhun cuan cutyoño cuñi ra. Ta tyicuan caa tucu tandihī ñáyivi ñuu Jerusalén cuan. ⁴ Tyicuan ta canā ra Herodes chi tandihī ra cacuvī nuu chi tata sutu ta ra casacuahá ley vehe ñuhu. Ta ndacā tuhun ra chi ra, nya maa maa tahán chi cacu ra Cristo. ⁵ Ta canacahān ra cuan ta cacatyī ra tyehe caa:

—Ñuu Belén ityi Judea, yucuan tahán chi cacu ra vatyī tyehe caa catyaa ra profeta Nyoo nu tutu ta cha naha:

⁶ Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnu ca cucuvun vatyī Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende.

Tyicuan caa catyī nu tutu Nyoo, —cacatyī ra cuan chi ra Herodes.

⁷ Tyicuan ta canā xehe ra Herodes chi ra chiñi tuñi cuan, ta ndacā tuhun ra chi ra ñáá cuhva ta ñáá quivi caña tiñoō cuan. ⁸ Tyicuan ta tachī ra chi ra nya ñuu Belén, ta catyī ra chi ra:

—Cuahan ndo, ta nducu tuhun vaha ndo tuhun cha lee cuan. Ta tatu nañihi ndo chi cue, ta quichi catyi ndo chii, tacuhva vatyī cuhun tucu yuhu cusacahni chi cue —catyī ra Herodes chi ra.

⁹ Cha yaha cachiñi ra chiñi tuñi cuan cha catyi ra Herodes, caquehen ra ityi ta cuahan coyo ra. Ta tiñoō cha canyehe ra ityi nu caña ñanyii cuan, cuahan ti ityi nuu ra. Ta chicuiñi ti maa maa siqui nu catuvī cha lee cuan. ¹⁰ Ta cuhva cha canyehe ra chiñi tuñi cuan tyi chicuiñi tiñoō cuan, sii xaan cacuñi ra. ¹¹ Ta caquihvi ra chichi vehe nu catuvī cha lee cuan. Ta cananyehe ra chi cue chihin cu María sihi cue. Ta chicuiñi chiti ra vatyī sacahnu ra chi cue. Tyicuan ta canuñā ra yuhu caja cha canyisó ra. Ta catavā ra regalo cha cuvī xuhun cuaan, ta cutu vixi chahán, ta ndutya vixi chahán cha nañi mirra. Ta cachahā ra chi cue. ¹² Yaha cuan ta catahān ra ñumahna ta cutuñi iñi ra vatyī ña tahán chi canayaha ra ityi nu nyaá ra Herodes, yucuan chaha siñ ca ityi cuanuhu coyo ra.

Nu chino xehe ra José ta cu María chihin cha lee nya Egipto

¹³ Cha yaha cuahan coyo ra chiñi tuñi cuan, tyicuan ta noo ángel Sutu Mañi yo tuvī nuu ra José chichi ñumahna. Ta catyī ra chi ra:

—Ndicuita, quehen chi ra lee ihya, ta chi sihi ra, ta cuhun ndo nya Egipto. Ta yucuan cunyaa ndo nyacua nya sacote chi ndo. Vatyī ra Herodes cunanducu ra chi cha lee ihya vatyī cahñi ra chi cue.

¹⁴ Tyicuan ta ndicuitā ra José cha cuaa cuan. Ta quehen ra chi cha lee cuan ta chi sihi cue. Ta cuahan ñu nya Egipto. ¹⁵ Ta yucuan chinyaa ñu nyacua nya cha chihī ra Herodes. Tyehe caa cuvī tacuhva na chino cava tuhun cahán Nyoo cha tyaa ra profeta ta cha naha. Tyehe caa catyī ra: “Nya ñuu Egipto canē chi Sehi”, catyī ra.

Nu tachī ra Herodes na cahñi ra chi ra cuatyaa

¹⁶ Cha tuvī iñi ra Herodes vatyī ra cachiñi tuñi cuan sandavi ñaha ra chi ra, nduxaan vavaha ra. Ta tachī ra tyiño na cacahñi ra chi ra cuatyaa cha iyó ñuu Belén cuan ta ndaha ñuu ñandihī, ra cuatyaa cha ni cacu nyacua nya cha uvi cuiya. Tyicuan

caa sacuv̄i ra vatyi nandich̄i xiñi ra vatyi tyicuan tahan cuiya ra Jesús tari cuhva catȳi ra chiñi tuñi cuan chi ra. ¹⁷ Tyicuan caa chinq̄ cava tuhun cahán Nyoo cha tyāa ra Jeremías profeta Nyoo ta cha naha, ta catȳi ra tyehe caa:

¹⁸ Tyacú noo ndusu ñuu Ramá, cha chacú chaa ñáyiv̄i, ta iyo tahan ñu.

Ta ican cuv̄i ñáyiv̄i tata cu Raquel, ñáyiv̄i Israel, chacú chaa ñu cha cuenda sehe ñu.

Soco ña cuñí ñu cha naquehen ndahvi ñu chi ñu cha cuenda cha cachih̄i sehe ñu, catȳi chi nuu tutu Nyoo.

¹⁹ Soco cha yaha cha chih̄i ra Herodes, tyicuan ta tuv̄i tucu noo ángel cha tach̄i Sutu Mañi yo nuu ra José nu quixí ra ñuu Egipto. Ta catȳi ra chi ra:

²⁰ —Nd̄icuita ta quehen chi cha lee chiña, ta chi sihi cue. Ta cuanuhu ndo nya ñuu Israel, vatyi cha chih̄i ra nducu cahñi chi cue.

²¹ Tyicuan ta ndicuita ra José, ta quehen ra chi cha lee cuan ta chi sihi cue. Ta cuanuhu coyo ñu nya Israel.

²² Soco quiv̄i chito ra José vatyi ra Arquelaο cuv̄i ra rey tyiño nuu sutu ra, ra Herodes, nya Judea, nayuhvi ra ta ña cuñí ra cuhun ra yucuan. Ta vatyi sacoto Nyoo chi ra chichi ñumahna, yucuan chaha cuanuhu ñu nya Galilea. ²³ Cha chāa ñu yucuan, cuahan ñu nya ñuu Nazaret, cua coo ñu. Ta yucuan chiȳo ñu. Tyehe caa cuv̄i tacuhva chino cava tuhun cha cahán Nyoo, cha catyāa ra profeta ta cha naha. Vatyi catȳi ra tyi ra Jesús ra ñuu Nazaret cucunañi ra.

3

Ra Juan ra sacondutȳa chi ñáyiv̄i cahán ra tuhun Nyoo chihin ñu

(Mt. 1.1-8; Lc. 3.1-9, 15-17; Jn. 1.19-28)

¹ Quiv̄i cuan ra Juan ra sacondutȳa chi ñáyiv̄i cuahan ra noo chiqui nd̄i ityi Judea. Ta quichaha cahan ra tuhun Nyoo chihin ñu. ² Ta catȳi ra:

—Ndu uvi iñi ndo cuatyi ndo vatyi cha yatyin nyaá Nyoo ra cua cunyaca ñaha añima yo.

³ Ican tuhun ra Juan ihya cuv̄i cha tyāa ra Isaías ra cuv̄i profeta Nyoo ta cha naha. Tyehe caa tyāa ra:

Chiñí yo cha caná chaa noo ra noo nu chiqui nd̄i ta catȳi ra:

“Tari sanduvahá ndo noo ityi, tyicuan caa sanduvaha ndo añima ndo, vatyi cua quichi Sutu Mañi yo.

Nuña ndo noo ityi ndoo chi ra naquihvi ra añima ndo.”

⁴ Ta ra Juan ñihnó ra sahma chinq̄ chihin ixi camellu. Ta sincho ra, ñ̄i cuv̄i. Ta maa maa ri pinchi chachí ra ta tyañuñu cuhu chih̄i ra. ⁵ Ñáyiv̄i ñuu Jerusalén ta tandih̄i ñu ñuu cha nyicú Judea, ta ñu ca iyó yatyin ri ityi yuvi cahnu Jordán cuan, quichi coyo ñu, quich̄i tyasoho ñu tuhun cahán ra.

⁶ Ta cha yaha nahma ñu cuatyi ñu, ra Juan sacondutȳa ra chi ñu yuvi cahnu Jordán cuan.

⁷ Soco ra Juan nyehe ra vatyi cuaha xaan ra fariseo, ra quichahá xaan ley vehe ñuhu, ta cuaha xaan ra saduceo, caquich̄i coyo ra vatyi condutya ra. Ta catȳi ra chi ra:

—¡Nyoho, tari noo tata coo xaan cuv̄i ndo! ¿Yóo cha sacoto chi ndo vatyi chihin cha condutya ri ndo ta ma tachi tuñi ca Nyoo chi ndo? Ña ndicha. ⁸ Coo ndo noo cha quetuv̄i vaha tyi ndicha cha ndu uvi iñi ndo cuatyi ndo. ⁹ Ta ma cuyaa ndo catȳi ndo vatyi tata ra Abraham vachi ndo. Vatyi nyacua nya chihin yuu ihya ta cuv̄i savaha Nyoo ñáyiv̄i tata ra Abraham. ¹⁰ Tari yutun cha ña chahá ch̄iti, tyicuan caa cuv̄i ndo. Vatyi ña sacuv̄i ndo tari cuhva cuñí Nyoo. Ta yutun cha ña chahá ch̄iti, cahnya ñáyiv̄i chi tun. Ta cahmi ñu chi tun. Tyicuan caa tucu nyoho, cuhun ndo nu cayú ñuhu.

¹¹ Cha ndicha vatyi yuhu sacondutȳe chi ñáyiv̄i chihin ndutya, tari noo seña vatyi cha ndu uvi iñi ñu cuatyi ñu. Soco cha yaha sacondutya yuhu

chihin ndutya, vachi inga ra cusacondutya chi ñáyiví chihin Tatyí Ii Nyoo ta chihin ñuhú ihñi. Iyó ca tunyee iñi chi maa ra ta ñima ca yuhu. Ta ni cha cuise ndichan ra ta ña nañe, vatyí cahnu xaan ca ra cuví ra. ¹² Tari noo ra cha cua naquehen vaha trigo ta natyihí vaha ra chichi yaca ta mihin cahmi ra, tyicuan caa cuví maa Sutu Mañi yo chihin yo. Tatu chinó iñi yo chi ra cunaquehen vaha ra chi yo. Ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhú cha ma ndahva ca maa —catyí ra Juan.

*Nu condutya ra Jesús
(Mr. 1.9-11; Lc. 3.21-22)*

¹³ Tyicuan ta quita ra Jesús Galilea ta chaá ra yuvi cahnu Jordán nu ñohó ra Juan, vatyí cuñí ra cha sacondutya ra Juan chi ra. ¹⁴ Cha xihna ri ña cuñi ra Juan sacondutya ra chi ra, ta quichaha catyí ra chi ra Jesús tyehe caa:

—Yoho cuñún cha sacondutye chuun, soco ña tahán chi cha sacondutya yuhu chuun. Maun tahán chi sacondutyon chii —catyí ra.

¹⁵ Soco ra Jesús catyí ra chi ra:

—Cha vityin, na cuví chi cuhva catyí yuhu chuun. Vatyí cuñí chi cha sacuvi yo tandihí cha cuñí Nyoo —catyí ra chi ra Juan. Tyicuan ta ndoo ra Juan vaha.

¹⁶ Cha yaha ri condutya ra Jesús ta quita ra chichi ndutya. Ta nuña ri andiví, ta ra Jesús nyehe ra yoso caa vachi noó Tatyí Ii Nyoo, tari noo paloma, ta chaá chi síqui ra. ¹⁷ Tyicuan ta tyacu noo ndusu ityí andiví, ta catyí chi tyehe caa:

—Ican ra ihya cuví Sehi, ra cuñí xain chi. Ta síi xaan cuñí chihin ra —catyí ndusu cuan.

4

*Nu nducú nyehe cuihna chi ra Jesús
(Mr. 1.12-13; Lc. 4.1-13)*

¹ Tyicuan ta Tatyí Ii Nyoo chinyaca chi ra Jesús noo chiqui ndii, tacuhva nducu nyehe cuihna chi ra.

² Ña chachi ra uvi xico quiví ta uvi xico ñuu. Ta yaha cuan ta chaá soco chi ra. ³ Tyicuan ta tuhva cuihna chi ra, vatyí cuñí ra nducu nyehe ra chi ra. Ta catyí ra chi ra:

—Tatu ndicha cha Sehe Nyoo cuví chuun, sananduvi pan yuu ihya —catyí cuihna chi ra Jesús.

⁴ Soco ra Jesús nacahan ra ta catyí ra:

—Tuhun Nyoo catyí chi tyehe caa: “Ñima chihin cha cachi ri ñáyiví ta conyito ñu. Conyito tucu añima ñu chihin tuhun cahán Nyoo” —catyí ra Jesús chi cuihna cuan.

⁵ Tyicuan ta chinyaca cuihna cuan chi ra Jesús nya ñuu Jerusalén. Ta sandaa cuan chi ra xiñi vehe ñuhu cahnu cuan. ⁶ Ta catyí cuan chi ra:

—Tatu ndicha cha Sehe Nyoo cuvún, sandupehla nyacua nya nu sucun ihya ta nyacua nya nu ñuhú. Vatyí nyaá nu catyí chi nu tutu Nyoo tyehe caa: “Nyoo cusaquichi ra ángel, quichi saha cuenda chuun. Cunaquehen ra chuun chihin ndaha ra ta ma cuhva ra cha taxin chahun chihin yuu” —catyí cuihna cuan chi ra.

⁷ Ta nacahan ra Jesús ta catyí ra:

—Soco catyí tucu chi nu tutu Nyoo tyehe caa: “Ma nducu nyehun chi Sutu Mañi yo Nyoo” —catyí ra Jesús chi cuihna.

⁸ Tyicuan ta chinyaca tucu cuihna cuan chi ra noo yucu sucun. Ta sañaha cuan tandihí cha cahnu cuví nu nyacá ñaha rey ta ra cuví tyiño chi ñáyiví iyó síqui ñuhu ñáyiví. ⁹ Ta catyí cuihna cuan chi ra tyehe caa:

—Yuhu cuhve tandihí maa ihya chuun, tatu yoho ta cuiñi chitun nui ta sacahnun chii —catyí cuan chi ra.

¹⁰ Tyicuan ta nacahan ra Jesús ta catyí ra chi cuihna cuan:

—Canyaha chuun nui, yoho cuihna. Vatyí tuhun cahán Nyoo nyaá chi nu tutu ta catyí chi tyehe caa: “Noo ri chi maa Nyoo sacahnu yo. Ta ñin ri chi maa ra quichaha yo.”

¹¹ Tyicuan ta cuahan cuihna cuan, ta ndoo ra Jesús, ta chaꝥ coyo ángel ta tyinyee ra chi ra.

Nu quichaha saha tyiño ra Jesús ñuu cha nyicú ityi Galilea

(Mr. 1.14-15; Lc. 4.14-15)

¹² Quiꝑi cha chito ra Jesús vatyí ra Juan ñohó ra vehe caa, cuahan ra nya Galilea. ¹³ Soco ña ndoo ra ñuu Nazaret, nu chahnu ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí. ¹⁴ Tyehe caa cuví tacuhva chino cava tuhun cha tyaa ra Isaías nu tutu Nyoo ta cha naha. Catyí chi tyehe caa:

¹⁵ Ñuhú ra Zabulón ta ñuhú ra Neftalí cha nyaá yuhu miñi inga chiyo yuvi cahnu Jordán, cha cuví Galilea nu iyó ñu ñima ñu Israel cuví.

¹⁶ Chinyicu añima ñu nu ñaa iñi vatyí chinyaca ñaha ra ña vaha chi ñu chihin tuhun chihi, soco sandundichín ñuhu Sutu Mañi yo añima ñu nu nyicú ñu, catyí ra Isaías.

¹⁷ Nyacua nya quiꝑi cuan, ta quichaha cahan ra Jesús tuhun Nyoo chihin ñáyivi, ta catyí ra chi ñu:

—Ndu uvi iñi ndo cuatyí ndo vatyí yatyin ri nyaá Nyoo ra cua cunyaca ñaha añima ndo —catyí ra Jesús chi ñáyivi.

Nu cana ra Jesús chi cumi tahan ra catín tiyaca

(Mr. 1.16-20; Lc. 5.1-11)

¹⁸ Ra Jesús chicá noo ra yuhu miñi cha nañi Tyañuhu Galilea cuan. Ta nanyehe ra chi uvi tahan ra chihin yañi ra, ra Simón cha nañi tucu Pedro, ta ra Andrés. Ra catín tiyaca cacuví ra. Ta cacañi ra yuhva ra nu ndutya. ¹⁹ Tyicuan ta quichaha catyí ra Jesús chi nanduvi ra tyehe caa:

—Cunyicon ndo chii. Ta yuhu cusacuví vatyí tari ñihí ndo tiyaca, tyicuan caa cuñihi ndo anima ñáyivi (ta cutava ndo chi ñu nu quiñi caa

na quiñvi ñu cuenda Nyoo) —catyí ra Jesús chi ra.

²⁰ Caa cuhva ri cuan casandoo ra yuhva ra ta cuahan coyo ra chihin ra Jesús.

²¹ Chiin ri ca chica ra Jesús ityi nuu ca ta nanyehe ra chi uvi ca ra chihin yañi ra, ra Jacobo ta ra Juan. Sehe ra Zebedeo cacuví chi ra. Canyicú ra chichi noo canoa chihin sutu ra canaquicú ra yuhva ra. Ta cana ra Jesús chi ra. ²² Ta caa cuhva ri cuan casandoo ra canoa cuan ta chi sutu ra, ta cuahan coyo ra chihin ra.

Nu sañahá ra Jesús chi cuaha ñáyivi (Lc. 6.17-19)

²³ Cuahan ra Jesús chicá noo ra tandihí ñuu cha nyicú Galilea sañahá ra chichi vehe ñuhu tahan tahan ñuu. Cahán ra tuhun vaha yoso caa nyacá ñaha Nyoo añima yo. Ta sanduvaha ra chi ñu cuhví chihin tandihí ri nuu cuehe cha iyó chi ñu. ²⁴ Cachitó tandihí ñáyivi ñuu cha nyicú Siria tuhun ra Jesús. Ta quichi nyaca ñu tandihí ñu cuhví chi ra: tandihí ñu siin siin cuehe tahán. Ta suhva ñu yihí tatyí ña vaha chi ñu. Ta yihí ñu, yihí cuehe chihi tañi chi ñu. Ta yihí ñu ña cuví nacanda ñu. Ta ra Jesús sanduvaha ra chi tandihí ñu. ²⁵ Cuaha xaan ñáyivi nyicón chi ra Jesús: ñáyivi iyó ñuu cha nyicú Galilea, ñáyivi iyó ndi uchi ñuu Decápolis, ñáyivi iyó ñuu cha nyicú Judea, ta ñáyivi iyó inga chiyo yuvi cahnu Jordán ñandihí.

5

Nu cahán ra Jesús nuu ñáyivi nu chiqui

(Lc. 6.20-23)

¹ Cuhva cha nyehe ra Jesús tyi cuaha xaan ñáyivi, ndaa ra noo nuu yucu. Ta chicunyaꝥ ra yucuan. Tyicuan ta ñu nyicón chi ra chicunyicu ñu nicachico nu nyaá ra. ² Tyicuan ta quichaha sañaha ra Jesús chi ñu tyehe caa:

³ —Tandihí ri ñu cha chitó vatyí chiñuhú Nyoo chi ñu, si xaan cucuvi chi ñu, vatyí tahán chi vatyí cunyaca ñaha Nyoo añima ñu.

4 'Ta tandihí ri ñu nducuihya iñi vityin cha catyi cuatyí ñu, sîi xaan cucuvi chi ñu. Vatyí cusanaa Nyoo cha cuihya iñi ñu.

5 'Tandihí ri ñu cha ña cahnu sahá chi, sîi xaan cucuvi chi ñu, vatyí cuquehen cuenda ñu ñuhu ñáyiví cha catyi Nyoo tyi cuhva ra chi ñu.

6 'Ta tandihí ri ñu cuñí xaan sacuvi cuhva catyi Nyoo, sîi xaan cucuvi chi ñu, vatyí Nyoo cutyinyee ra chi ñu tacuhva cuvi sacuvi ñu.

7 'Ta tandihí ri ñu cha iyó tucahnu iñi chi, sîi xaan cucuvi chi ñu, vatyí Nyoo, cucoo tîcahnu iñi chi ra chihin ñu.

8 'Ta tandihí maa ñu ndundiñi añañima saha Nyoo, sîi xaan cucuvi chi ñu, vatyí ñu cuan, cunyehe ñu chi Nyoo.

9 'Ta ñu nducú cuhva cha coo taxi ri ñáyiví chihin Nyoo sîi xaan cucuvi chi ñu, vatyí Nyoo, cucatyí ra tyi sehe ra cuví chi ñu.

10 'Ta tandihí ñu cha tasi cuñí nyehe ñáyiví chi ñu cha catyi cha sacuví ñu tari cuhva catyi Nyoo, sîi xaan cuvi chi ñu, vatyí nyacá ñaha Nyoo añañima ñu.

11 'Na cusîi cuñi ndo tatu cahán ña vaha ñáyiví síqui ndo. Ta sanyehé ñu tîndoho chi ndo. Ta tavá ñu cuaha cuendu síqui ndo cha catyi yuhu.

12 Na cusîi cuñi ndo vatyí tatu tyehe caa sacuví ñu chihin ndo, sîi xaan cucuvi chi ndo, vatyí cahnu xaan ta tyaqui xaan cha cutahan chi chi ndo, nachaa ndo andiví. Vatyí suri tyicuan caa chinyacuví tucu ñu cha ña vaha chihin ra cacuví profeta cuenda Nyoo ta cha naha.

Tatu sandihí yo cha chinó iñi yo chi Nyoo cuví yo tari ñîi cha ndihí cha uhva (Mr. 9.50; Lc. 14.34-35)

13 'Nyoho cha chinó iñi ndo chii, tari ñîi vaha cuví ndo. Soco tatu ñîi, ta ndihí cha uhva, ma sacu uhva ca chi cha cachi yo. Ña vaha ca ñîi cuan. Tyicuan ta sacuita yo. Ta cuañi ñáyiví síqui chi.

Tatu vaha quichahá yo tuhun cahán Nyoo, cuví yo tari ñuhu cha sandundichín nu cuahan ñáyiví nu ñaa iñi

14 'Nyoho cuví ndo tari ñuhu cha sandundichín nu cuahan ñáyiví. Noo ñuu cha nyaá xiñi noo yucu, ma cuvi quihí xehe. Tyicuan caa tahán chi cuvi ndo. 15 Ta yori yo cha tyaa yo noo ñuhu tima, ta tixehe yo chichi noo caja. Soco tyiso yo noo nu sucun vatyí sandichin chi chichi vehe tatu cua quihví ñáyiví, soco ndichin. 16 Ta tyicuan caa tahán chi sandundichin tucu nyoho chihin ñuhu Nyoo cha iyó añañima ndo nu cuahan ñáyiví. Tyicuan ta nanyehe ñu cha vaha cha nyacuví ndo, ta sacahnu ñu chi Sutu yo Nyoo ra nyaá andiví.

Sañahá ra Jesús vatyí niñi xaan sacuvi yo ta sañaha yo tandihí tuhun cha tachí Nyoo chi yo

17 'Ma cuñi ndo vatyí yuhu vachi sanai ley cha tachí Nyoo chi ra Moisés vatyí tyaa ra. Ta ni ri ña vachi sanai tuhun cha tyaa ra cacuví profeta cuenda Nyoo ta cha naha. Yuhu ña vachi vatyí sanai yucuan. Soco vachi quichahi tandihí cha catyi tuhun cuan, ta sañahí ñáa cha cuñí chi catyi.

18 Cha ndicha catyi chi ndo vatyí cha ni ri ca cha iyó ca andiví chihin ñuhu ñáyiví ma naa ni chiin cha tyaa ra Moisés ta ra cacuví profeta Nyoo ta cha naha, nyacua nya yaha cuvi tandihí tari cuhva nyaá cha catyaa ra. 19 Yucuan chaha, tatu ña quichahá ñáyiví tuhun cha tachí Nyoo chi ñu, vasi noo tuhun luhlu ri cuví, ta tatu chasi ñu nu quichaha inga ñáyiví, luhlu xaan cucuvi ñu nu nyacá ñaha Nyoo. Soco ñu cha quichahá tandihí, ta sañahá tucu ñu chí inga ñáyiví. Ican ñu cuan cahnu xaan cucuvi ñu nu nyacá ñaha Nyoo. 20 Vatyí cuñí chi cha quichahá vaha ca ndo chi Nyoo ican saha ra sacuahá cuenda ley vehe ñuhu, ta ra cacuví fariseo. Yucuan ta cuvi quihví ndo nu nyacá ñaha Nyoo.

Nu sañahá ra Jesús chi yo vatyí ma cuxaan yo chi ñáyiví

21 'Nyoho cha cuaha chaha chiñi ndo tuhun cha catyi Nyoo chi ñu chiyo ta cha naha. Catyi ra: "Ma cahñi ndo chi ñáyiví, vatyí tatu cahñi

ndo ñáyiví, tahán chi cutuñi chi ndo.”
²² Soco yuhu, catyí chi ndo, vatyí vasi cha cuxaan ri ndo chi noo ñáyiví, o vasi cha cahán uhvi ri ndo chi ñáyiví, o vasi cha cahán nyaa ri ndo chi ñáyiví, tahán chi cutuñi chi ndo. Ta sñn ri saha cuenda ndo chi ndo coto cuhun ndo anyaya chihin cuatyí cuan.

²³ "Ta yucuan chaha quiví cuahun vehe ñuhu, ta nyisón cha cucuhvon chi Nyoo, ta tatu cha nanyaun cha cua cuhvon ta nicohon iñun vatyí ña vaha iyó noo yañun chuhun.

²⁴ Sandoo cha cua cuhvon chi Nyoo yucuan. Ta cuhun vatyí na coo vahun chihin yañun. Tyicuan ta ndichun nya vehe ñuhu, ta cuhva cuendon cha cua cuhvon chi Nyoo.

Sañahá ra Jesús vatyí cacan yo ticahnu iñi cuatyí yo coto cuhun yo anyaya

(Lc. 12.57-59)

²⁵ "Tatu yóo ra chicán cuatyí chahun, ta cuahan ra chuhun nya nuu ra cuví tyiño, nandacan ticahnu iñi chi ra ityí cuahun, coto cuhva cuenda ra chuun chi ra cuví tyiño. Ta ra cuví tyiño cua cuhva cuenda ra chuun chí policia. Ta policia cuan cutyihí ra chuun vehe caa. ²⁶ Soco catyí chuun vatyí ma cuví quiton vehe caa cuan nyacua nya tyiyahvun tandihí cha tahán chi tyiyahvun.

Sañahá ra Jesús vatyí ni cha ndichí xiñi yo cha coo nonga ñusihí, o nonga rayí chi yo, ta ña vaha

²⁷ "Nyoho chiñi ndo tuhun vatyí catyí Nyoo ta cha naha vatyí nyoho cha iyó ñasihí ndo, ma coo inga ñusihí chi ndo. ²⁸ Soco yuhu catyí chi ndo, vatyí nya nyoho cha nyehé ndo chi noo ñusihí ta quihví iñi ndo chi ñu, catyí chi ndo vatyí chihin yucuan ri ta cha chicoo cuatyí ndo.

²⁹⁻³⁰ "Vatyí tatu chiti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu nyacá ñaha Nyoo chihin noo chiti nuun, ta ñima ca chihin cha ninduvi chiti nuun ta cuhun nu cayu ñuhu chichi

anyaya. O tatu ndahun sanacavá chuun nu cuatyí, vaha taxin ca cahnya ta sacuiton cañi. Vatyí vaha ca cha quihvun nu nyacá ñaha Nyoo chihin cha luu ndahun, ta ñima ca cha naniun ta cuhun nu cayu ñuhu chichi anyaya.

Nu sañahá ra Jesús siqui ra sandoo ñasihí

(Mt. 19.9; Mr. 10.11-12; Lc. 16.18)

³¹ "Ta suri catyí tucu Nyoo chi ñáyiví chiyó ta cha naha vatyí yóo ra sandoo ñasihí, cuñi chi cuhva ra noo tutu cuenda cha sandoo ra chi ña. ³² Soco catyí yuhu chi ndo, ñahri ityí iyó chi noo ra cha sandoo ra chi ñasihí ra tatu ña natuvi ña chihin inga rayí. Vatyí tatu sandoo ra chi ña, ta ñima cha catyí cuatyí cuan, chicoo cuatyí ra nuu Nyoo. Ta sñn ri saccoo ra cuatyí ña vatyí tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chi ña cuan.

Ma catyí yo "chito vaha maa Nyoo" tacuhva chino iñi ñáyiví vatyí ndicha cha cahán yo

³³ "Ta chiñi tucu ndo, vatyí catyí tucu Nyoo chi ñu chiyó ta cha naha tyehe caa: "Tatu tyanaha ndo Nyoo tyi cusacuvi ndo noo cha cusacuvi ndo, tahan chi cha sacuvi ndo."

³⁴ Soco yuhu catyí chi ndo vatyí ma tyanaha ndo Nyoo tacuhva chino iñi ñáyiví vatyí ndicha cha cahán ndo. Ta ma tyanaha ndo ni tuhun andiví, vatyí yucuan nu nyaá maa Nyoo cuví.

³⁵ Ta ni ri tuhun ñuhu ñáyiví ihya ma tyanaha ndo, vatyí yucuan cuví nu chañi Nyoo. Ta ni ri tuhun ñuu Jerusalén, ta ma tyanaha ndo, vatyí yucuan cuví ñuu Nyoo ra cuví Rey cha cahnu ca. ³⁶ Ta ni ri tuhun xiñi ndo, ta ma tyanaha ndo, vatyí ma cuví sanducuichin ndo ni noo ixi xiñi ndo. Ta ni ma cuví sandutoon tucu ndo.

³⁷ "Ican" catyí ndo, tatu ican. Soco tatu ñima, "ñima", catyí ndo. Ta ma tyanaha ndo Nyoo vatyí ra ña vaha tyiyuhú chi ndo cuví cuan.

Nu sañahá ra Jesús vatyi tatu sacuvi ñáyivi cha ña vaha chihin yo, na sacuvi yo cha vaha chihin ñu

(Lc. 6.29-30)

³⁸ 'Ta chiñi tucu ndo cha catyi tuhun cha tyaa ra Moisés ta cha naha: "Vatyi tatu noo ñáyivi cañi ñu nuu ndo, ta tahvi noo noho ndo, o tivivi noo chitivi nuu ndo, o nya chi ndo sañicuehe ñu, tahán chi vatyi sañicuehe tucu ñáyivi chi maa ñu, tari cuhva cha sañicuehe ñu chi ndo." ³⁹ Soco yuhu catyi chi ndo, vatyi ma nasacuvi ndo cha ña vaha cha nyacuvi ñu tasi iñi chi ndo. Vatyi tatu yóo cha cañi ñin chiyo xitín ndo, ma nduxaan ndo chi ñu. Soco cuhva tucu ndo inga chiyo xitín ndo na cañi ñu. ⁴⁰ O tatu chicán ñu cuatyí chaha ndo, ta cuñi ñu tinyaa ñu noo camisa ndo, ma cuxaan ndo chi ñu. Soco cuhva ndihí ndo chaqueta ndo chi ñu. ⁴¹ O tatu yóo cha catyi chi ndo na cuiso ndo cha chii ñu noo kilómetro, cuiso ndo uvi kilómetro. ⁴² Tatu yóo ñu chicán tumañi iñi chi ndo, cuhva ndo chi ñu. Ma catyi ndo cha ma saha ndo tumañi iñi cuan.

Na cuñi yo chi ñu xaan iñi chi yo
(Lc. 6.27-28, 32-36)

⁴³ 'Ta chiñi tucu ndo tuhun cha catyi ñu chiyo ta cha naha vatyi cuñi ndo chi ra tahan ndo. Ta chi ra xaan iñi chi ndo quihí tisihi iñi ndo chi ra. ⁴⁴ Soco yuhu catyi chi ndo, cuñi ndo chi ñáyivi xaan iñi chi ndo. Ta sacuvi ndo cha vaha chihin ñáyivi cahan chi ndo, ta chi ñu ña cuñi nyehe chi ndo. Ta cacán tahvi ndo chaha ñu quiñi nyacuvi chihin ndo ta sanyehé tindocho chi ndo. ⁴⁵ Ta tyicuan caa sacuvi ndo tacuhva coto ñáyivi vatyi cuví ndo sehe Sutu yo ra nyaá andivi. Vatyi maa ra sacañá ra ñanyii, ta sacoon ra savi siqui tyiño sahá ñáyivi vaha ta ñáyivi ña vaha ñandihí. ⁴⁶ Tatu nyoho ta cuñi ndo chi ñáyivi cha vaha iyó chihin ndo ta ña cuñi nyehe ndo chi ñáyivi xaan iñi chi ndo, ñahri cha vaha cuñihi ndo. Vatyi suri tyicuan caa nyacuvi tucu ra catavá xuhun cuenda gobiernu ñuu Roma. Ta quiñi

ca iyó ra cuan cuñi maa ndo. ⁴⁷ O tatu chahá ndo nocumi chi ra tahan ri ndo, ñahri cha vaha xaan nyacuvi ndo. Vatyi suri tyicuan caa sacuvi tucu ñáyivi ña ñohó nuu Nyoo. ⁴⁸ Tari Sutu yo cha nyaá andivi maa maa ri cha vaha sacuvi ra, tyicuan caa nyoho maa maa ri cha vaha sacuvi ndo.

6

Nu sañahá ra Jesús yoso caa sacuvi yo tumañi iñi

¹ 'Saha ndo cuenda ta ma cuyaa ndo ñáá tumañi iñi sacuvi ndo chi ñáyivi. Vatyi tatu cuyaa ndo nuu ñáyivi, ñahri cuñihi ndo nuu Sutu yo ra nyaá andivi. ² Cuhva cha sahá ndo tumañi iñi, ma sacoto ndo chi inga ñáyivi vatyi sahá ndo tumañi iñi. Ma sacuvi ndo tari sacuvi ra sahá tyi vaha ta chicá noo ra nuyahvi ta chichi vehe ñuhu. Sahá ra tumañi iñi tacuhva na catyi ñáyivi vatyi vaha xaan ñáyivi cuví ra. Soco yucuan ri ñihí ra cuan ta ñahri ca cuñihi ra nuu Nyoo. ³ Soco nya quivi sahá ndo tumañi iñi chi ñu ndahvi, ma sacoto ndo ni chi ra tahan cahnu ndo. ⁴ Xehe ri sacuvi ndo, tacuhva cha ma coto ñáyivi. Tyicuan ta Sutu yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chi ndo.

Nu sañahá ra Jesús yoso caa cahan yo chihin Sutu yo Nyoo
(Lc. 11.2-4)

⁵ 'Ta cuhva cha chicán tahvi ndo chi Nyoo, ma cacán tahvi ndo tari cuhva sacuvi ñu savahá chii. Vatyi ñu cuan tahán iñi ñu cacán tahvi ñu chi Nyoo nu tui ñáyivi, tacuhva catyi ñáyivi vatyi vaha xaan ñáyivi cuví ñu, vaha xaan chinó iñi ñu chi Nyoo. Soco catyi chi ndo cha ndicha vatyi ñahri ca cuñihi ñu nuu Nyoo. Vatyi ñima cha ndicha sacuvi ñu. ⁶ Soco nyoho ñáá quivi cacán tahvi ndo chi Nyoo, ma cacán tahvi ndo tacuhva nyehe ri ñáyivi chi ndo. Soco quihvi ndo chichi vehe ndo ta nacasi ndo yuvehe ta cacán tahvi ndo chihin tandihí aña ndo. Ta noo tuhun ri maa Nyoo Sutu yo nyehe ra cha sacuvi ndo tyicuan

caa vatyi nuu maa ra chicán tahvi ndo, ta ñima nuu ñáyiví. Ta cuaha ca cha vaha cucuhva ra chi ndo.

⁷ 'Cuhva cha cahán ndo chihin Nyoo ñima susuri tuhun cha ñima ri tuhun çahan ndo. Vatyi tyicuan caa sacuví ñu cha ñahri tuhun Nyoo caá aña. Cuñí maa ñu vatyi tyicuan caa ta cuiñi Nyoo cha cahán ñu. Vatyi cuaha xaan chaha cahán ñu susuri maa tuhun cuan. ⁸ Ma sacuvi ndo tyicuan caa. Vatyi Nyoo cha chitó ra ñáa cha chiñuhú chi ndo, cha ni ri ca cha cumañi ca cacan ndo chi ra. ⁹ Yucuan chaha nyoho, tatu cua cacan tahvi ndo chi Nyoo, tyehe caa catyi ndo:

Sutu Mañi yuhu, yoho cha nyaún andiví. Sacahnú xaan ndi chuun.

¹⁰ Na quichi quiví cha nyaca ñahun ihya siqui ñuhu ñayiví, tari nyacá ñahun andiví.

Na sacuvi ñáyiví ihya siqui ñuhu ñayiví tandihí cuhva cuñí maun, tari cuhva cuví gloria.

¹¹ Cuhva cha cachi ndi tacuhva cha yaha ndi noo noo quiví.

¹² Saha tucahnu iñi chi ndi ñáa ndihí cha ña vaha nyacuví ndi, tari maa ndi sahá ndi ticahnu iñi chi ñu sataší iñi chi ndi.

¹³ Ma cuhvon cha nducu nyehe ra ña vaha chi ndi, tacuhva ma sacuvi ndi cuatyí nuun. Soco maun cuví ra sacacú chi ndi ndaha ra ña vaha.

Vatyi maun cuví ra nyacá ñaha tandihí. Ta maun cuaha xaan ca tunyee iñi iyó chuun. Ta tahán chi vatyi sacahnu tandihí ñáyiví chuun tyicuan ri maa. Ta na cuví chi tyicuan caa.

Tyicuan caa cuhva tahán chi cacan tahvi ndo chi Nyoo.

¹⁴ 'Vatyi tatu nyoho ta sahá ndo ticahnu iñi chi ñu nyacuví cha ña vaha chihin ndo, tyicuan caa ta Sutuyo ra nyaá andiví, cusaha ra ticahnu iñi chi maa ndo. ¹⁵ Vatyi tatu ma saha ndo ticahnu iñi chi ñu nyacuví cha ña vaha chihin ndo, tyicuan caa tucu

Sutuyo, ma saha ra ticahnu iñi cuatyí maa ndo —catyí ra Jesús.

Ñáa quiví ña chachí yo ta nanducú yo chi Nyoo, ma sacoto yo chi inga ñáyiví

¹⁶ Ta catyí tucu ra Jesús chi ñu chicá noo chihin ra:

—Quiví cha ña chachí ndo ta nanducú ndo chi Nyoo, ma cuihya nyehe ndo, tari ñu savahá chii. Vatyi cuñí ñu cha coto ñáyiví vatyi ña chachí ñu ta nanducú ñu chi Nyoo. Soco catyí chi ndo vatyi yucuan ri ñihi ñu. Ñahri ca cuiñihi ñu nuu Nyoo.

¹⁷ Soco tatu nya quiví ña chachí ndo ta nanducú ndo chi Nyoo, nacatya ndo nuu ndo. Ta nacuaca ndo cuca xiñi ndo, ¹⁸ tacuhva vatyi ma tuvi iñi ñáyiví vatyi ña chachí ndo ta nanducú ndo chi Nyoo. Tyicuan ta noo tuhun maa Nyoo nyehe ra cha sacuví ndo cha xehe ri cuan. Ta cuaha ca cha vaha cua cuhva ra chi ndo chihin nuu ñáyiví.

Nu sañahá ra Jesus vatyi ma sacaya yo cha iyó siqui ñuhu ñayiví (Lc. 12.33-34)

¹⁹ 'Ma sacaya ndo cha tyayí ihya ñayiví. Vatyi coto tiví cha tyayí cuan. O cuví tucu quihví ra suhu, ta suhu ra tandihí cha tyayí ndo. ²⁰ Vaha taxin ca sacaya ndo cha vaha chi ndo nu nyaá Nyoo gloria. Vatyi nuu Nyoo ña ndihí cha vaha cuan. Vatyi ni ri ra suhu, ni quití, yori cha sativí iyó yucuan. ²¹ Ta catyí chi ndo vatyi nu nyaá cha tyayí ndo, yucuan cuví nu nyaá xiñi ndo. Ta yucuan cunyaa aña ndo.

Tari sandichín chiti nuu yo chi yo tacuhva nyehe yo nu cuahan yo, tyicuan caa tucu sandundichín tuhun Nyoo aña yo (Lc. 11.34-36)

²² 'Chiti nuu ndo noo cha sandundichin ityi cuahan ndo cuví. Ta tyicuan caa tucu aña ndo, tatu iyó cha ndichin Nyoo, vaha ñáyiví cuví ndo. ²³ Soco tatu ña vaha chiti nuu ndo, ña ndichin nyehe ndo nu cuahan ndo. Tandihí ri ta ñaa iñi. Ta tyicuan

caa tucu tatu ñahri cha ndichin Nyoo nyaá añima ndo, tari noo ra cuaa cuví ndo. Ña cuví nyehe ndo ityi vaha cha cuahan nu nyaá Nyoo.

Sañahá ra Jesús vatyi ma cuvi quichaha yo chi Nyoo tatu cuñi xaan ca yo cha tyayii
(Lc. 16.13)

²⁴ 'Noo musu ma cuvi coo uvi chitoho ra. Vatyi musu cuan cuñi ca ra chi noo ra ta ñima ca chi inga ra. Ta quichahá ra chi noo ra, ta chi inga ra ma quichaha ra. Ta tyicuan caa tucu nyoho, ma cuvi cuñi ndo chi Nyoo, ta suri cuhva cuan cuñi ndo cha tyayii.

Sañahá ra Jesús vatyi ma caca xaan iñi yo ñáá ndihi cha chiñuhú chi yo
(Lc. 12.22-31)

²⁵ 'Yucuan chaha catyí chi ndo vatyi ma caca xaan iñi ndo yoso caa ñihi ndo cha cachi ndo ta cha coho ndo. Ni ma caca iñi ndo ñáá cha cuihno ndo. Vatyi yahvi ca nyaá añima ndo ta coño ñuhu ndo nuu Nyoo, ican saha cha cachi ndo ta cha cuihno ndo. Vatyi maa ra chahá ra ñayivi coo ndo. Ta ña yii cuhva ra inga cha chiñuhú chi ndo ñandihí. ²⁶ Saha ndo cuenda chi saa. Ña savahá ti itu. Ta ña sahá tyiño ti. Ni ri ña naquehén vaha ti tyiño sahá ti chichi yaca. Soco Sutu yo Nyoo chahá ra cha cachi ti. ¿Atu ña yahvi ca nyaá nyoho nuu Nyoo ta ñima ca saa cuan? ²⁷ Ni ri maa chicá xaan xiñi ndo ma cuvi sandusucun ndo ni chiin ca chi ndo.

²⁸ 'Ta tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun sahma ndo? Saha ndo cuenda yoso caa iyó tu ita nu chiqui. Vatyi ña taví tun. Ta ni ña conó tun isa. ²⁹ Soco catyí chi ndo vatyi ni rey Salomón cha tyayii xaan cuví ra, soco ña cuví cuihno ra cha tyaqui, tari cha sacuihnó Nyoo chi tu ita cuan. ³⁰ Ta tu ita cuan tyaqui xaan ñihno tun suhva ri quivi ta yaha cuan ta cuna ityi tun ta cucayu tun chichi horno. Ta nyoho, vaha ca cusacuihno Nyoo chi ndo. Soco chiin xaan chinó iñi ndo chi ra. ³¹ Yucuan chaha ma caca xaan xiñi ndo ta catyí ndo: "¿Ñáá cha cachi ndi, o ñáá cha coho ndi, o ñáá

cha cuihno ndi?" ³² Vatyi ñáyivi cha ñahri tuhun Nyoo caá añima, chicá xaan xiñi ñu tuhun ihya. Soco nyoho ma caca iñi ndo tuhun cuan vatyi iyó noo Sutu ndo, ra nyaá andivi. Ta chitó ra ñáá ndihí cha chiñuhu chi ndo. ³³ Yucuan chaha, cunyaa xiñi ndo maa maa ri maa tuhun maa Nyoo. Ta nducu ndo cuhva cunyaca ñaha ra añima ndo. Ta sacuvi ndo tari cuhva cuñi maa ra. Ta tyicuan caa ñihi ndo tandihí cuvi maa cha chiñuhú chi ndo. ³⁴ Tandihí quivi ta iyó tndoho chi ndo. Ma caca xiñi ndo tuhun tndoho cha vachi. Vatyi Nyoo nyaá ra chihin ndo.

7

Ma cahan yo cha caá inga ñáyivi
(Lc. 6.37-38, 41-42)

¹ 'Ma cahan ndo cha caá inga ñáyivi. Tyicuan caa ta ma tñin Nyoo cuenda cha caá ndo. ² Vatyi tari cuhva cahán ndo cha caá inga ñu, tyicuan caa cuhva cutachi tuñi Nyoo chi ndo. ³ ¿Yoso caa cha cuví nyehun cuatyí luhlu ra yañun ta ña cuví nyehún cuatyí cahnu cha iyó chi maun? ⁴ Tatu chiti nuu maun yihí noo vitu cahnu, ¿yoso caa cuví catyun chi ra yañun: "Nyaca, na tave mihin lee cha yihí chiti nuun"? ⁵ Yoho cha savahún chuun, tava xihna vitu cahnu cha yihí chiti nuu maun, tyicuan ta cuví nyehe vahun mihin lee cha cutavon chiti nuu ra yañun.

⁶ 'Ma sañihi ndo cahan ndo tuhun Nyoo chihin ñu ña cuñi coto, vatyi coto cañi ñu chi ndo. Tari ina cha tñin vavaha chi ndo, tyicuan caa cuví ñu. Ta tari quini cha chaca chaha ti cha yahvi nyaá, tyicuan caa cahán ña vaha ñu siqui tuhun Nyoo.

Ma cundihñi yo cacan yo chi Nyoo, tyicuan ta cuhva ra chi yo
(Lc. 11.9-13; 6.31)

⁷ 'Cacan ndo cha chiñuhú chi ndo chi Nyoo. Ta cuhva ra chi ndo. Nanducu ndo, ta nañihi ndo. Sacachan ndo yuvehe, ta nuña. ⁸ Vatyi tandihí ndo cha chicán ndo, ñihi ndo. Tatu nanducú ndo, nañihi

ndo. Ta tatu sacachán ndo yuvehe, cunuña yuvehe.

⁹ 'Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chaha ndo noo yuu chi sehe ndo, tatu chicán ndotyín pan chi ndo. ¹⁰ Ta ña tuhvá ndo chaha ndo noo coo chi sehe ndo tatu chicán ndotyín noo tiyaca chi ndo. ¹¹ Nyoho cha quiñi iyó ndo soco chitó ndo yoso caa cuhva ndo cha vaha chi sehe ndo. Ta vihi ca Sutu yo, ra nyaá andívi. Cuaha ca cha vaha cuhva ra chi ndo tatu cacán ndo chi ra.

¹² 'Tari cuñi maa ndo cha cunyacuvi ñáyivi cha vaha chihin ndo, tyicuan caa cunyacuvi tucu maa ndo cha vaha chihin ñu. Vatyí tyicuan caa catyí tuhun cha tachí Nyoo, cha tyaa ra Moisés ta ra cacuví profeta Nyoo ta cha naha.

Tihin yuvehe ta cuiñi ityi cha cuahan nu nyaá Nyoo
(Lc. 13.24)

¹³ 'Nducu ndo cuhva quihvi ndo yuvehe tihin. Vatyí quehen yuvehe, ta quehen ityi cha cuahan nya nu cunaa ñáyivi anyaya. Ta cuaha xaan ñu cuahan ityi cuan. ¹⁴ Soco tihin yuvehe ta cuiñi ityi cha cuahan ñáyivi cha ma naa ca maa nu cucoo ñáyivi vaha. Soco suhva ri ñáyivi nañihí ityi cuan.

Chihin cha sacuví ri ñáyivi, ta nicohón nuu yo chi ñu tatu ñu vaha o ñu ña vaha cuví ñu
(Lc. 6.43-44)

¹⁵ 'Saha ndo cuenda chi ra cuendu. Vatyí cacatyí ra vatyí cuenda Nyoo cahán ra. Soco ña ndicha. Vatyí vachi coyo ra tari noo mbee nu nyicú ndo. Sahá ra tyi ra vaha cacuví ra. Soco tari noo ñaña xaan cacuví ra. ¹⁶ Nyoho cuví nicohón nuu ndo chi ra chihin cha nyacuvi ra. Tari noo yutun ña vaha, tyicuan caa cacuví ra. Vatyí noo tuñiyaca ma cuhva tun mango, ta ni ri noo iñu nduhva ma cuví cuhva chi tichaha ndívi. ¹⁷ Ta tyicuan caa tucu tandihí yutun vaha. Chahá tun chiti vaha. Ta tandihí yutun ña vaha, chahá tun chiti ña vaha.

¹⁸ Ta yutun vaha, ma cuví cuhva tun chiti ña vaha. Ta ni ri yutun ña vaha ma cuví cuhva tun chiti vaha. ¹⁹ Ta tandihí yutun cha ña chahá chiti vaha, cahnya yo chi tun. Ta cahmi yo chi tun. ²⁰ Ta tyicuan caa, chihin cha nyacuvi ñáyivi cuví nicohón nuu ndo chi ñu tatu ñu vaha cuví ñu, o ñu ña vaha cuví ñu.

Nu catyí ra Jesús vatyí ña tandihí ñáyivi quihvi ñu nu nyacá ñaha Nyoo
(Lc. 13.25-27)

²¹ 'Ma tandihí ñu cha catyí chii: "Sutu Mañi yuhu, Sutu Mañi yuhu", cuquihvi ñu nu nyacá ñaha Nyoo gloria. Ñu sacuví tandihí cha catyí maa Nyoo Suti, ican ñu cuan cuquihvi nu nyacá ñaha ra. ²² Quivi cha cucutuñi chi ñáyivi, cuaha xaan ñu cucatyí ñu chii tyehe caa: "Sutu Mañi yuhu. Yuhu cahin tuhun maun chihin ñáyivi. Ta chihin sivun tave tatyí ña vaha cha yihí añima ñáyivi. Ta cuaha xaan milagru savahí chihin sivun", cucatyí ñu chii.

²³ 'Tyicuan ta yuhu cucatyí chi ñu: "Ña ñohó nui chi nyoho. Canyaha ndo nu nyaí. Vatyí nyoho sacuví ndo maa maa ri cha ña vaha."

Nu sañahá ra Jesús yoso caa cucuví chi ñu quichahá ta ñu ña quichahá tuhun cahán ra
(Lc. 6.47-49; Mr. 1.22)

²⁴ 'Ihya catyí chi ndo, yóo cha chiñi tuhun cahín ta sacuví tari cuhva catyí; cuví ra tari noo ra chiñi tuñi cha savaha ra vehe ra siqui cava. ²⁵ Ta quichaha coon savi. Ta cama xaan yuvi ndutya yaha. Ta ñihi xaan caa tatyí. Soco ña cuví sanduva chi vehe cuan. Vatyí ñihi nanyaá siqui cava cuan. ²⁶ Soco yóo cha chiñi tuhun cahín, ta ña sacuví ra tari cuhva catyí; cuví ra tari noo ra tondo, cha savaha ra vehe ra nu ñiti. ²⁷ Ta chaa savi. Ta cama xaan yuvi ndutya yaha. Ta ñihi xaan caa tatyí. Ta vehe cuan tañi tyehe ri nduva —catyí ra Jesús chi ñu.

²⁸ Cuhva cha ndihí cahan ra Jesús chihin ñáyivi, iyo xaan cuiñi ñu tuhun cha sañahá ra. ²⁹ Vatyí sañahá ra tari

noo ra cha nyacá ñaha. Ta ña sañahá ra tari ra sacuahá cuenda ley vehe ñuhu.

8

Nu sanduvahá ra Jesús chi noo ra cuhvi cha tyahyú coño

(Mr. 1.40-45; Lc. 5.12-16)

¹ Cuhva cha noo ra Jesús yucu cuan, cuaha ñáyiví nyicón chi ra. ² Ta chaa noo ra cha tyahyú coño, ta chicuiñi chiti ra nuu ra, ta catyí ra chi ra:

—Sutu Mañi yuhu, tatu yoho ta cuñún, cuví sanduvahun chii —catyí ra chi ra.

³ Tyicuan ta sanacaá ra Jesús ndaha ra ta tñin ra chi ra, ta catyí ra:

—Cuñí sanduvahi chuun. Ta na nduvahun vityin ri —catyí ra.

Ta caa cuhva ri cuan ta nduvahá nu tyahyú cuan. ⁴ Tyicuan ta quichaha catyí ra Jesús chi ra:

—Nyehe, yori chihin cahun tuhun. Soco cuahan, ta sañahun chuun chi tata sutu, ta cuhva cuendon ofrenda cha catyí ra Moisés nu ley chahnu vatyí tacuhva coto ñu vatyí cha nduvahun.

Nu sanduvahá ra Jesús chi musu noo ra capitán

(Lc. 7.1-10)

⁵ Cuhva cha chaá ra Jesús Capernaum, noo capitán, ra ñuu Roma, chaá ra nu nyaá ra Jesús ta chacu ndahvi ra nuu ra, ⁶ ta catyí ra:

—Sutu Mañi yuhu, musi catuví ra nu cama. Cuhví ra. Ña cuví nducuita ra vatyí ñihi xaan tahán ra.

⁷ Ta catyí ra Jesús chi ra:

—Cuhun mai ta cusanduvahi chi ra —catyí ra chi ra.

⁸ Nacahan capitán cuan ta catyí ra:

—Sutu Mañi yuhu, ña nañé cha cuhun vehi; soco tacuhva catyí run, ta musi nduvaha ra. ⁹ Vatyí suri iyó ra nyacá ñaha chi mai. Ta iyó sindaro nyacá ñaha tucu mai. Ta tatu cha tave tyiño chi noo ra, cuhun ra. Ta tatu cane chi inga ra, quichi ra. Ta tatu cha tave tyiño chi musi, sacuvi ra.

¹⁰ Ta cha chiñi ra Jesús cha cahan ra, iyo xaan cuñi ra. Ta catyí ra chi ñu nyicón chi ra:

—Cha ndicha catyí chi ndo, vatyí ñuu cha nyicú nicahnu Israel, ta nañihi que ni noo ñáyiví cha chinó xaan iñi ñu tari chinó iñi ra ihya.

¹¹ Ta catyí chi ndo vatyí cuaha ñu inga ñuu cuquichi coyo ityi nu caña ñanyii, ta ityi nu quee ñanyii, ta cunyicu ñu cachi ñu chihin ra Abraham ta ra Isaac ta ra Jacob nya andivi. ¹² Ta ñu Israel cha tahán chi cuhun andivi, yihí ñu, ma cuhun ñu, vatyí cuhun ñu nu ñaa iñi ityi chata. Ta yucuan cucuacu chaa ñu ta cucahni noho ñu —catyí ra Jesús chi ñu.

¹³ Tyicuan ta quichaha catyí ra chi capitán cuan tyehe caa:

—Cuahan, ta na cuví chi tari cuhva catyún vatyí chinó xaan iñun chii —catyí ra.

Ta suri cuhva cuan nduvahá musu ra.

Nu sanduvahá ra Jesús chi maha tyiso ra Pedro

(Mr. 1.29-31; Lc. 4.38-39)

¹⁴ Ta cha yahá cuan, chaá ra Jesús vehe ra Pedro. Ta nanyehe ra chi maha tyiso ra Pedro, catuví ña nu chito chihin cahni. ¹⁵ Ta tñin ra ndaha ña, ta quitá cahni cuan chi ña. Ta ndicuitá ña, ta quichahá tyiñuhu ña chi ra.

Nu sanduvahá ra Jesús cuaha ñu cuhvi

(Mr. 1.32-34; Lc. 4.40-41)

¹⁶ Ta cuhva cha cuaa cuan, quichi nyaca ñu cuaha xaan ñáyiví yihí tatyí ña vaha chi chi ra Jesús. Ta chihin noo ri tuhun cahan ra, tava ñehe ra chi tatyí ña vaha cuan, ta sanduvahá ra chi tandihí ñu cuhvi. ¹⁷ Tyicuan caa cuví tacuhva vatyí na chino cava tari cuhva catyí ra profeta Isaías, quivi catyí ra tyehe caa: “Maa ra quehen ra cuehe cha yihí chi yo, ta tinyaa ra cha uhvi chi yo.”

¿Yoso chiquihí chi yo tatu cuñi yo cunyicon yo chi ra Jesús?

(Lc. 9.57-62)

18 Tyicuan ta nyehe ra Jesús vatyí nicachico nu nyaá ra nyicú ñáyívi. Ta catyí ra chi ñu vatyí cuyaha ra inga chiyo miñi. 19 Tyicuan ta chaá noo ra sacuahá ley vehe ñuhu ta catyí ra chi ra:

—Maestro, cuñi cunyiquen chuun tandihí ri ityí nu cahun —catyí ra.

20 Ta ra Jesús catyí ra chi ra:

—Ñaña, iyó vehe ti, ta saa cha chico nu tatyí, iyó taca ti. Soco yuhu Rayíi cha quichi nya gloria, ñahri vehi ta ni ri nu cava xiñi ta ñahri —catyí ra.

21 Inga tucu ra chicá noo chihin ra catyí ra chi ra:

—Tata, cuhva na cahun xihne cuyihi chi suti chichi ñuhú, tyicuan ta quichi ta cunyiquen chuun —catyí ra.

22 Ta catyí ra Jesús chi ra:

—Ñaha yoho vatyí cunyiicon chii. Saña chi ñu ña ñohó nuu chi Nyoo, na tyihi maa ñu chi tahan ñu chichi ñuhú —catyí ra.

Nu sacutaxín ra Jesús tatyí xaan

(Mr. 4.35-41; Lc. 8.22-25)

23 Tyicuan ta quihví ra chichi canoa, ta ra cachicá noo chihin ra, cuahan coyo ra chihin ra. 24 Ta chaá noo tatyí ñihi xaan nu miñi cuan, ta nyacua chasí ndutya cuan canoa ra soco maa ra Jesús quixí ra. 25 Ta ra cachicá noo chihin ra sandoyo ra chi ra, ta cacatyí ra:

—¡Sutu Mañi yuhu, sacacu chi yo, vatyí cuñi cunaa yo!

26 Ta catyí ra Jesús chi ra:

—¿Ñáa tuhun cha yuhví xaan ndo? ¡Nyoho chiin xaan chinó iñi ndo chii!

Tyicuan ta nacanda ra ta sacutaxín ra tatyí nu miñi cuan, ta tandihí cutaxín. 27 Ta iyo xaan cacuñí ra cuan ta cacatyí ra:

—¿Yóo ra cuví ra ihya? Vatyí nyacua nya tatyí ta nyacua nya ndutya ta quichahá chi ra —catyí ra.

Nu nduvahá uvi ra ñuu Gadara ra cayihí tatyí ña vaha chi

(Mr. 5.1-20; Lc. 8.26-39)

28 Tyicuan ta chaá coyo ra inga chiyo miñi cha nyaá ñuhú cha nañi

Gadara. Ta chaá coyo uvi tahan ra yihí tatyí ña vaha chii. Ta nu ñaña caquita coyo ra cuan. Xaan vavaha ra, ta yori maa cuví yaha ityí cuan.

29 Ta canachaá ra, ta cacatyí ra:

—¿Ñáa cha cuñun chihin ndi, yoho Jesús Sehe Nyoo? ¿Atu vachun vachi sanyehun tindoho chi ndi cha ni cumañi ca chaá quivi? —cacatyí ra cuan.

30 Ta yatyin ri cuan nyicú cuaha quini cachachí ti. 31 Ta catyí tatyí ña vaha cuan chi ra Jesús:

—Tatu cuatava ñehun chi ndi, cuhva cha quihví ndi chichi quini cuan —cacatyí tatyí ña vaha cuan.

32 —Vaha. Quihví ndo —catyí ra Jesús.

Ta caquita coyo tatyí ña vaha cuan, ta quihví coyo chichi tandihí quini canyicú cuan. Ta tandihí quini cuan cachino ti ta canacoyo ti noo xahva yuhu miñi cuan, ta chihí ti chihin ndutya cuan.

33 Tyicuan ta ra casaha cumi chi ti cuan, cachinó vavaha ra cuahan coyo ra chichi ñuu, ta canacatyí ra tandihí cha cuví chi ra cayihí tatyí ña vaha cuan chi. 34 Ta tandihí ñáyívi ñuu, chahan ñu chinyehe ñu chi ra Jesús, ta chacu ndahvi ñu nuu ra na quita ra yucuan.

9

Nu sanduvahá ra Jesús chi noo ra cuhví cha ña cuví nacanda

(Mr. 2.1-12; Lc. 5.17-26)

1 Tyicuan ta quihví ra Jesús chichi canoa ta yaha sava ra inga chiyo miñi, ta nachaa ra nya ñuu nu iyó ra.

2 Nu nyaá ra yucuan chinyaca ñáyívi chi noo ra cuhví cha ña cuví nacanda catuví ra nu chito. Ta cha nyehe ra Jesús vatyí chinó xaan iñi ñu chi ra, quichaha catyí ra chi ra cuhví cuan:

—Saníi iñun, suti vatyí cha chicoo ticahnu iñi cuatyun —catyí ra chi ra.

3 Tyicuan ta quichaha chica xiñi suhva ra sacuahá ley vehe ñuhu cha nyicú yucuan tyehe caa: “Ra ihya chicoo cuatyí ra nu Nyoo chihin tuhun cahán ra”, cachicá xiñi ra.

⁴ Soco ra Jesús chitó ri ra ñáá cha cachicá xiñi ra, ta catyí ra chi ra:

—¿Ñáá tuhun cha ña vaha maa chicá xiñi ndo? ⁵ Vatyí ¿nya cha yñi ca catyí yo: atu yñi ca catyí yo “Cuatyun cha yaha ndachi”, o yñi ca catyí yo: “Ndicuita ta cacon”? ⁶ Vaha. Cuasañahi chi ndo vatyí yuhu Rayñi cha quichi nya gloria, iyó ityi chii siqui ñuhu ñayivi ihya vatyí sahi tìcahnu iñi cuatyí —catyí ra Jesús.

Tyicuan ta catyí ra chi ra cuhví cuan:

—Ndicuita, naquehen chiton ta cuanuhu nya vehun —catyí ra.

⁷ Tyicuan ta ndicuita ra cuhví cuan ta cuanuhu ra nya vehe ra.

⁸ Cuhva cha nyehē ñáyivi tuhun ihya, canayuhví ñu. Ta casacahnú ñu chi Nyoo vatyí chaha ra tunyee iñi cuan chi ñáyivi.

*Nu caná ra Jesús chi ra Mateo
(Mr. 2.13-17; Lc. 5.27-32)*

⁹ Quita ra Jesús yucuan, ta nanyehe ra chi noo ra cha nañi Mateo, nyaá ra quehen ra xuhun cha tyiyahví ñu Israel chi gobiernu ñuu Roma. Ta catyí ra chi ra:

—Coho chihin.

Tyicuan ta ndicuita ra Mateo ta tyinyicon ra chi ra.

¹⁰ Tyicuan ta cuví chi noo chaha ra Jesús nyaá ra nya vehe ra Mateo, chachí ra. Ta cachaá coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí. Ta cachicunyicú tucu ra yucuan nu mesa ñn ri chihin ra Jesús ta ra cachicá noo chihin ra. ¹¹ Soco cha canyehē ra fariseo cha tyicuan caa, candaca tuhun ra chi ra cachicá noo chihin ra Jesús, ta cacatyí ra:

—¿Ñáá tuhun cha vatyí ra sacuahá chi nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —cacatyí ra.

¹² Chiñi ra Jesús cha cahan ra, ta catyí ra chi ra:

—Ña chiñuhú doctor chi ñu iyó vaha, ñu ña cuhví, soco chi ñu cuhví

chiñuhú ra. ¹³ Cuahan ndo ta cutuhva ndo cha cuñi chi catyí nu tutu Nyoo, nu catyí ra tyehe caa: “Yuhu cuñi vatyí cundahvi cuñi ndo chi ñáyivi, ta ñima ca cha cahñi ndo quiti ta cuhva cuenda ndo chii.” Ña vachi na cane chi ñu vaha, soco chi ñu iyó cuatyí, tacuhva na nasama ñu cuhva iyó ñu.

Nu catyí ra Jesús vatyí cha ni ri ca cha nyaá ca ra chihin ra cachicá noo chihin ra ña tahán chi cha saha ra ayunar

(Mr. 2.18-20; Lc. 5.33-35)

¹⁴ Tyicuan ta ra canyicón chi ra Juan, ra sacondutya chi ñáyivi, catuhva ra chi ra Jesús ta candaca tuhun ra chi ra ta cacatyí ra:

—¿Ñáá tuhun cha nyuhu ta ra cacuví fariseo, cuaha xaan chaha savaha ndi ayuno, ña chachí ndi ta nanducú ndi chi Nyoo? ¿Ta ra cachicá noo chihin yoho ñima tyicuan caa sacuvi ra? —cacatyí ra nyicón chi ra Juan.

¹⁵ Ta nacahan ra Jesús ta catyí ra:

—¿Atu cuví cunyaa cuihya ñu nyicú vico cha ni ri ca cha nyaá ra cua tandaha chihin ñu? Soco vachi quivi vatyí cucuachiyo ra nu nyicú ñu, tyicuan ndicha ta cusavaha ñu ayuno.

Nu sañahá ra Jesús vatyí ña chachí tahan tuhun chahnu cha iyó ñu chihin tuhun chaa cha sañahá ra chi ñu

(Mr. 2.21-22; Lc. 5.36-39)

¹⁶ Yori naquicú noo vestido chahnu chihin noo sahma chaa vatyí coto cundiyi nu naquicu ñu chihin cha chaa cuan, ta cahnya chi cha chahnu cuan, ta nu tahnya cuan nducahnu ca. ¹⁷ Ta ni ña tyihí yo vinu chaa chichi ññi chahnu vatyí tatu sacuvi yo tyicuan caa, tahnya ññi cuan, ta tari cunaa vinu, ta cunaa ññi cuan. Yucuan chaha cuñi chi tyihi yo vinu chaa chichi ññi chaa, ta tyicuan ta ninduvi ta cusaha cuenda chi chi tahan chi.

Sehe ra Jairo, ta ñaha cha tñn sahma ra Jesús

(Mr. 5.21-43; Lc. 8.40-56)

¹⁸ Cha ni ri ca cha catyí ra Jesús tuhun ihya, chaá noo ra cuví nuu chi

ñu Judea ta chicuiñi chiti ra nuu ra Jesús, ta catyí ra:

—Ni chihí sehi, soco tatu yoho quichun ta tyison ndahun siqui ña, cunandoto ña —catyí ra chi ra Jesús.

¹⁹ Ndicuita ra Jesús ta cuahan ra in ri chihin ra ta ra cachicá noo chihin ra ñandihí.

²⁰ Tyicuan ta noo ñaha, cuhví ña chihin cha chati niñi ña. Ta cha uchi uvi cuiya cuhví ña. Ta tuhva ña chi ra Jesús ityi chata ra, ta tin ña yuhu sahma ra, ²¹ vatyí tyehe caa chicá xiñi ña: “Ma chihin cha tin ri sahma ra ta nduvahi”, chicá xiñi ña.

²² Soco ra Jesús nanyocava ra nanyehe ra chi ña, ta catyí ra chi ña:

—Nduní inun sihi, cha nduvahun vatyí chinó inun —catyí ra.

Ta caa cuhva ri cuan ta nduvaha ña.

²³ Yaha cuan ta cha ra Jesús vehe ra cuví nuu cuan, ta nyehe ra vatyí ra música canyatú tuhva ra cha cuhun coyo ra nu quihvi cue chichi ñuhú. Ta ñáyivi cha nyicú cuan chacú cha ñu.

²⁴ Ta catyí ra chi ñu:

—Quita ndo ihya. Ñaha tyivaa ihya, ña chihí ña, soco quixí ña —catyí ra.

Ta chacú cuehe ri ñáyivi nyehe ñu chi ra. ²⁵ Soco ra Jesús tava ra chi ñu ityi chata vehe, tyicuan ta quihvi ra ta tin ra ndaha ñaha tyivaa cuan, ta maa ña ndicuita ña. ²⁶ Ta tandihí ityi cuan chitya tuhun cha cuvi yucuan.

Nu sanduvaha ra Jesús chi uvi ra cuaa

²⁷ Cuhva cha quita ra Jesús yucuan, uvi tahan ra cuaa canyicón chi ra suri caná cha ra ta cacatyí ra:

—¿Cundahvi cuñi chi ndi, yoho ra vachi tata ra David! —cacatyí ra.

²⁸ Ta cuhva cha quihvi ra Jesús chichi vehe, ra cuaa cuan, catuhva ra chi ra, ta maa ra Jesús quichaha ndaca tuhun ra chi ra:

—¿Atu chinó iní nyoho vatyí cuvi sanduvahi chi ndo? —catyí ra.

Ta canacahan ra ta catyí ra:

—Ay, chinó iní ndi chuun, Sutú Mañi yuhu —cacatyí ra.

²⁹ Tyicuan ta tin ra Jesús chiti nuu ra ta catyí ra chi ra:

—Na cuvi maa yoso cuhva chinó iní ndo —catyí ra.

³⁰ Ta canduvaha chiti nuu ra. Ta catyí vaha ra Jesús chi ra tyehe caa:

—Nducu ndo cuhva cha yori coto.

³¹ Soco quita coyo cuiri ra ta quichaha canacatyí ra cha sacuvi ra Jesús chihin ra chi ñáyivi tandihí ityi yucuan.

Nu sanduvaha ra Jesús chi noo ra ñihí

³² Cha ni ri ca cha caquita coyo ra cucuaa cuan, suhva ñáyivi quichi nyaca ñu chi noo ra ñihí cha yihí noo tatyí ña vaha chi nu nyaá ra Jesús.

³³ Ta caa cuhva ri cha tava ñehe ra Jesús tatyí ña vaha cuan, quichaha cuvi cahan ra cuan. Ta iyo xaan cuñi ñáyivi, ta catyí ñu:

—Ni noo chaha ta cuvi ca cha tyehe caa Israel Ihya —catyí ñu.

³⁴ Soco ra cacuvi fariseo, cacatyí ra:

—Ra ihya tava ñehe ra tatyí ña vaha chihin tunyee iní chi cuhna ra cuví nuu —catyí ra.

Nu catyí ra Jesús vatyí ña cuaha maa ñu sahá tyiño cuenda Nyoo iyó

³⁵ Ra Jesús chahan ra tandihí ñuu sañahá ra chi ñáyivi chichi vehe ñuhu tahan tahan ñuu. Cahán ra tuhun Nyoo yoso caa nyacá ñaha Nyoo aña ñáyivi. Ta sanduvahá ra tandihí nuu cuehe cha yihí ñu. ³⁶ Ta cha nanyehé ra chi ñáyivi, cundahvi cuñi ra nyehé ra chi ñu, vatyí nyehé ñu tindoho ta cuhya cuñi ñu, tari mbee quiti cha yori sahá cumi chi. ³⁷ Tyicuan ta catyí ra chi ra cachicá noo chihin ra tyehe caa:

—Cha ndicha, cuaha tyiño iyó, soco ra sahá tyiño, ña cuaha ra. ³⁸ Yucuan chaha, cacan ndo chi chitoho tyiño yucuan, na tachi ra chi ra saha tyiño na sataca ra tyiño cuan.

10

Nu cachí ra Jesús chi ndi uchi uvi ra caca tyiño ra

(Mr. 3.13-19; Lc. 6.12-16)

¹ Tyicuan ta cana ra Jesús chi ndi uchi uvi ra chicá noo chihin ra ta

chaha ra ityi chi ra vatyi tava ñehe ra chi tatyí ña vaha cha yihí aña ñáyivi, ta sanduvaha ra ndihí nuu cuehe ta cha uhvi ñandihí.

² Ican ihya cuví sivi ndi uchi uvi ra chicá tyiño ra: xihna ca, ra Simón, cha nañi tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuví chi ra; ³ ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañi tucu Tadeo, ⁴ ta ra Simón cha yihí cuenda ityi ra cacuñi cahun cuatyí siqui gobiernu ñuu Roma cha nyacá ñaha chi ñu, ta ra Judas Iscariote, ra cha naxico tuhun chi ra Jesús.

Nu tachí ra Jesús chi ra cachicá noo chihin ra, na cucahan ra tuhun Nyoo (Mr. 6.7-13; Lc. 9.1-6)

⁵ Ta tyehe caa tachí ra Jesús chi uchi uvi tahan ra cuan, ta catyí ra:

—Ma cahun ndo nu iyó ñu cha ñima ñu Israel cuví, ta ni ma quihvi ndo ñuu cha nyicú Samaria. ⁶ Cuahan ndo, soco nu nyicú mbee cha cuanaa cha cuví ñu ñuu Israel. ⁷ Cuahan ndo cuacahan ndo tuhun vatyi cha cha cha cunyaca ñaha Nyoo aña ñáyivi. ⁸ Sanduvaha ndo chi ñu cuhvi ñu tyahyú coño, ta ñu yihí inga cuehe chii. Sanandoto ndo ndiyi, tava ñehe ndo chi tatyí ña vaha cha yihí chi ñu. Nyoho, naquehén cuenda ndo tunyee iñi ihya chihin cha ñahri yahvi, ta cotyiño ndo soco ma quehen ndo yahvi.

⁹ 'Ma cuiso ndo ni noo xuhun, ni xuhun cuaan ni xuhun cuichin, ni xuhun cuaha. ¹⁰ Ma cuiso ndo ni yono cha cuenda cha caca ityi ndo. Noo ri camisa cha ñihnó ndo cahun chihin ndo. Ta ma cuiso ndo inga ityi ndichan, ni yutun ma tuvi ndo, vatyi ra sahá tyiño, iyó ityi chi ra cha coo yahvi ra.

¹¹ 'Cuhva cha cha ndo noo ñuu, nducu ndo noo ñáyivi cachi iyó, ta ndo ndo vehe ñu nyacua nya quita ndo ñuu cuan. ¹² Cuhva cha cua quihvi ndo noo vehe, cuhva ndo

nocumi chi ñáyivi iyó vehe cuan. Ta catyí ndo chi ñu: Na coo cha taxi Nyoo aña ndo, catyí ndo chi ñu. ¹³ Ta tatu ñu ñuu cuan ta nacotó ñu tyi chiñuhú cha taxi ri cuan chi ñu, cundoo cuan chihin ñu. Soco tatu ña nacotó ñu vatyi chiñuhú cuan chi ñu, ma ndoo cuan chihin ñu. ¹⁴ Ta tatu ña cuñi ñu quehen cuenda ñu chi ndo, ta ni ña cuñi ñu cuiñi ñu tuhun cahán ndo, tyicuan ta quita ndo vehe yucuan, o ñuu yucuan, ta naquisi ndo ñiyaca chaha ndo. ¹⁵ Cha ndicha catyí chi ndo vatyi quivi cutuñi chi ñáyivi, ñihi ca cutachi tuñi Nyoo chi ñu cuan, ta ñima ca ñáyivi ñuu Sodoma ta ñuu Gomorra.

Nu sañahá chi ñáá ndihí tindoho cunyehe ñu chicá tyiño Nyoo

¹⁶ 'Nyehé ndo! Yuhu tachí chi ndo, tari mbee mahñu lobo. Quiyi saha ndo chi ndo, tari coo, soco masu saha ndo chi ndo tari paloma. ¹⁷ Saha ndo cuenda chi ndo vatyi ñáyivi cucuhva cuenda ñu chi ndo chi ra cuví tyiño, ta chichi vehe ñuhu cucañi ñu chi ndo. ¹⁸ Ta cha cuenda yuhu, nyacua cunyaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhun nuu ra ta nuu ñu cha ñima ñu Israel cuví. ¹⁹ Soco tatu nacuhva cuenda ñu chi ndo chi ra cuví tyiño, ma caca xiñi ndo yoso caa cucahan ndo, vatyi tatu cha cuhva cha cahan ndo, Nyoo cucuhva ra tuhun cha cucahan ndo. ²⁰ Vatyi ñima maa ndo cucahan, soco maa Tatyí Ii Sutu yo Nyoo cusacahan chi ndo.

²¹ 'Rayi cunaxico tuhun ra suri chi yañi ra tacuhva na cacahñi ra chi ra. Ta yihí ra cunaxico tuhun ra chi sehe ra. Ta yihí ñáyivi cunanuhu ñu siqui sutu ñu ta sihi ñu, ta cusacuvi ñu, na cúvi ñu. ²² Tandihí ñáyivi, cucutasi cuñi nyehe ñu chi ndo cha catyí yuhu. Soco tatu ña ndu uvi iñi ndo chino iñi ndo chii, tyicuan ta cucacu aña ndo. ²³ Tatu chica nyicon ñu chi ndo noo ñuu, cono ri ndo inga ñuu. Vatyi cha ndicha catyí chi ndo ni cha ta ndihí ca cahan ndo tuhun

Nyoo tandihí ñuu nu nyicu ñáyiví Israel ta yuhu Rayi cha quichi nya gloria cuquichi inga chaha.

²⁴ 'Ni noo ra cutuhvá, ña cahnu ca ra cuví ra ican saha ra sacuahá chi ra. Ta ni noo musu, ña cahnu ca cuví ra ican saha chitoho ra. ²⁵ Ra cutuhva, cuñí chi ndoo ra vaha chá chaa ra cuví ra tari ra sacuahá chi ra, ta musu tari chitoho ra. Tatu yuhu ra cuví chitoho vehe, catyí ñu chíi vatyí Beelzebú, cuihna ra cuví nuu, cuví, suri tyicuan caa cucatyí tucu ñu chí ñáyiví cuende.

Yóo chí tahán chí cuyuhví yo
(Lc. 12.2-7)

²⁶ 'Yucuan chaha ma yuhví ndo chí ñáyiví, vatyí ni noo tuhun xehe ta cuñun, tyí ma natuvi. Ta ni ñahri chá ñohó xehe, ta cuñún tyí ma coto tandihí ñáyiví. ²⁷ Tandihí chá catyí chí ndo nu ñaa iñi, catyí nyoho nu ndichin. Ta tandihí chá catyí chí ndo nu xehe, cána cháa ndo nya xiñi vehe, na coto tandihí ñáyiví. ²⁸ Ma yuhví ndo chí ñu chahñi coño ñuhu yo, vatyí ma cuví cahñi ñu añima yo. Soco yuhví ndo chí ra cuví sanaa coño ñuhu yo ta añima yo chichi anyaya ñandihí.

²⁹ '¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyí maa Nyoo Sutu yo. ³⁰ Vatyí nyacua nya ixi xiñi nyoho ta chitó Nyoo yoso tahan nyaá. ³¹ Ma yuhví ndo. Nyoho, yahví ca nyaá ndo ta ñima ca ticuítí saa.

Ma yuhví yo cahan yo tuhun ra Jesucristo nuu ñáyiví
(Lc. 12.8-9)

³² 'Tandihí ñu chá cahán vaha tuhun nuu ñáyiví, yuhu tucu cucahan vahi cuenda ñu nuu Suti ra nyaá andiví. ³³ Soco ñu cahán nuu cahan tuhun, yuhu tucu ma cahin tuhun ñu nuu Suti ra nyaá andiví.

Cha cuenda ra Jesús cusin ñáyiví
(Lc. 12.51-53; 14.26-27)

³⁴ 'Ma cuñi ndo vatyí yuhu vachi cuhve chá taxi ri coo ndo siqui ñuhu ñáyiví ihya. Ña vachi cuhve chá taxi

ri, soco chá cañi tahan ñáyiví. ³⁵ Vatyí sasiñ chí ndo. Vatyí noo ra cuhun ra siqui sutu ra. Ta noo ña cuhun ña siqui sihi ña. Ta ñu cuví chono cucañi tahan ñu chihin tyiso ñu. ³⁶ Ta tyicuan caa suri ñáyiví chí ndo cucuvi ñu ñu xaan iñi chí ndo.

³⁷ 'Ñu chá cuñi ca chí sutu o chí sihi ican saha chí yuhu, ña tahán chí cuví ñu ñu cuende. Ta ñu cuñi ca chí sehe, ican saha chí yuhu, ña tahán chí cuví ñu ñu cuende. ³⁸ Ta ñu chá ña cuñi nyehe tindoho ta cunyicon ñu chíi, ña tahán chí cuví ñu ñu cuende. ³⁹ Vatyí ñu ña cuñi nyehe tindoho chá cuenda yuhu, cunyehe ñu tindoho anyaya, soco ñu nyehé tindoho ta chahá ñáyiví chá catyí yuhu, cucacu añima ñu.

Yahví chá tahán chí chí yo
(Mr. 9.41)

⁴⁰ 'Ñu quehén cuenda chí ndo, chí yuhu quehén cuenda ñu, ta ñu quehén cuenda chí yuhu, quehén cuenda ñu chí ra chá tachí chíi. ⁴¹ Ñu quehén cuenda noo ra profeta Nyoo chá cuenda vatyí cuenda Nyoo cahán ra, cuñihi ñu suri tahan yahví chá cuñihi profeta cuan. Ta ñu quehén cuenda chí noo ra vaha chá cuenda tyí ra vaha cuví ra, suri tahán yahví chá cuñihi ra vaha cuan cuñihi ñu. ⁴² Ta savahri ñu chá cuhva vasi noo vasu ndutya vichin coho ñu nyihi ihya chá cuenda chá nyicón ñu chíi, cuñihi ñu chá cucuhva Nyoo chí ñu —catyí ra Jesús.

11

Ra chá tachí ra Juan nu nyaá ra Jesús
(Lc. 7.18-35)

¹ Ndihi cháha ra Jesús tuhun chí uchi uvi ra chicá noo chihin ra, tyicuan ta quita ra yucuan, vatyí cucahan ra tuhun Nyoo chihin ñáyiví chá iyó ñuu chá nyicú ityí cuan.

² Ta ra Juan nu ñohó ra vehe caa, ñihi ra tuhun chá sacuví ra Cristo. Tyicuan ta tachí ra chí uvi ra nyicón chí ra, cundaca tuhun ra noo tuhun chí ra Jesús. Ta cachaa coyo ra nu nyaá ra ³ ta cacatyí ra chí ra:

—¿Atu yoho cuvún ra Cristo cha tahán chi quichi sacacu chi ndi, o cuñí chi cha cuatu ndi chi inga ra? —cacatyí ra chi ra.

⁴ Nacahan ra Jesús ta catyí ra:

—Cuahan ndo ta catyí ndo chi ra Juan cha nyehé ndo, ta cha chiñí ndo. ⁵ Nacatyí ndo chi ra yoso caa nanyehé ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa nacuiñí ñu soho, ta ñu ndiyí nandoto ñu, ta chihin ñu ndahví cahán ndi tuhun Nyoo yoso caa sacacu ra añima ñu.

⁶ 'Sii xaan cuñí ñu ña chicá uvi iñi nyicón chii.

⁷ Cuhva cha cuahan coyo ra, ra Jesús quichaha cahan ra tuhun ra Juan chihin ñáyivi, ta catyí ra:

—¿Ñáá cha chahan nyoho chinyehe ndo chiqui ndii cuan? ¿Atu chinyehé ndo noo ndoo cha naquisí tatyí? ¿Ñáá cha nyehé ndo? ⁸ ¿Atu nyehé ndo noo ra vaha ñihnó? Ñima. Nyoho chitó ndo vatyí ra ñihnó vaha, nyaá ra vehe rey. ⁹ Tu tyicuan caa, ¿ñáá cha chahan ndo chi nyehé ndo? ¿Atu noo ra cuví profeta? Ican. Soco noo ra cha cahnu ca cuví ican saha noo profeta cuenda Nyoo. ¹⁰ Vatyí ican ra Juan ihya, cuví cha cahán tuhun nu tutu Nyoo tyehe caa:

Yuhu cuví Nyoo ta tachí chi noo ra cahan tuhun ityi nuu nu cuhun.

Vatyí cucahan ra tuhun chihin ñáyivi nanasama ñu cuhva iyo ñu ta cuatu tuhva ñu quivi quichun.

¹¹ 'Cha ndicha catyí chi ndo, vatyí chichi cha tandihí ñáyivi, ni noo chaha ta coo ca noo ra cahnu ca cuví ican saha ra Juan ra sacondutyá chi ñáyivi. Soco ra cha nyacá ñaha Nyoo añima, vasi cuví ra noo ra luhlu ca, soco cahnu ca ra ta ñima ca ra Juan. ¹² Nyacua nya quivi cha chaá ra Juan ta nya vityin, cuaha ñu ndachan sahá chii nducú sativi ñu tuhun Nyoo, ña cuñí ñu cha cunyacá ñaha Nyoo añima ñáyivi. ¹³ Ra

Moisés cahan ra tuhun yoso caa nyacá ñaha Nyoo añima ñáyivi, ta tyicuan caa tucu tandihí ra profeta nyacua nya quivi quichi ra Juan. ¹⁴ Ta tatu cuñí nyoho chino iñi ndo tuhun cahín, catyí chi ndo vatyí profeta Elías cha tahán chi quichi, ra Juan cuví ra. ¹⁵ Yóo ñu cha cutuñi iñi, na tyasoho ñu tuhun cahín.

¹⁶ '¿Yóo chihin sandu inuu ri chi ñáyivi cha iyó tyembu ihya? Tari ra cuatyaa cuví ñu, vatyí chicunyaa ndotyin nuyahvi nyasiqui ndotyin, ta canachaa ndotyin chi ra tahan ndotyin, ta catyí ndotyin tyehe caa: ¹⁷ "Tivi ndi flauta, soco ña chita chaha ndo. Chita ndi yaa cuihya soco ña chacu ndo." Tyicuan caa tucu nyoho, ni noo cuhva ña tahán iñi ndo. ¹⁸ Vatyí quichi ra Juan, cha ña chachi ra ta ña chihí ra, ta nyoho catyí ndo vatyí noo tatyí ña vaha yihí chi ra. ¹⁹ Yahá cuan ta quichi tucu yuhu Rayi cha quichi nya gloria. Ta yuhu chachí ta chihí tandihí, ta catyí ndo tyi ra cuahyi ra tuhvá chihí cuví. Ta ña tahán iñi ndo cha cutahín chihin ra iyó cuatyí ta ra tavá xuhun. Soco vasi ni noo ndi ña naquehén cuenda ndo tuhun cahán ndi, soco Nyoo chahá ra cha chiñi tuñi ra chi ñu naquehén tuhun cahín ta tuhun cahan ra Juan, ta maa ñu cusañaha chi ndo vatyí vaha cha chiñi tuñi Nyoo —catyí ra Jesús.

Uvi ñuu nu ña tyasohó ñáyivi tuhun Nyoo

(Lc. 10.13-15)

²⁰ Tyicuan ta quichaha cahan ra Jesús chi ñu ñuu nu sacuvi ra cuaha milagru, vatyí ñáyivi cuan ña canasama maa ñu cuhva iyó ñu, ta catyí ra:

²¹ —¡Ndahvi nyoho, ñu ñuu Corazin! ¡Ndahvi nyoho ñu ñuu Betsaida! Vatyí nyehé ndo nyatu cahnu ta ña nasama ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu ñahri nyatu cahnu nyehé ñu. Soco tyehe ta nyehé ñu nyatu cahnu quivi cuan tari cha nyehé nyoho vityin, tañi tyehe ri ndihvi noo ñu sahna

tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyi ndu uvi iñi ñu cuaryi ñu cuví cuan. ²² Soco caryí chi ndo vatyi quivi cutuñi chi nyoho nuu Nyoo, cahnu ca cha uhvi cunyehe ndo ta ñima ca ñáyivi Tiro ta Sidón. ²³ Ta nyoho ñu ñuu Capernaum, cuñi maa ndo tyi cundaa ndo nya andivi, soco cunoo ndo nya nu nyicú ñu ndiyi. Vatyi tyehe ta cuví milagru ñuu Sodoma cuan, tahán cha cuví ñuu ndo, ñuu cuan coo ca nyacua nya vityin. ²⁴ Soco caryí chi ndo vatyi quivi cutuñi chi nyoho, yaha ca cunyehe ndo tindoho, ta ñima ca ñu ityi ñuu Sodoma cuan.

Cuhva ndo chi ndo chii, ta cuhve cha nyitatu ndo, caryí ra Jesucristo (Lc. 10.21-22)

²⁵ Tyembu cuan caryi ra Jesús chi Nyoo tyehe caa:

—Sutu Mañi yuhu, Nyoo, ra nyacá ñaha andivi ta ñuhu ñáyivi. Sacahní chuun vatyi sañahun tuhun maun chi ñu ñahri maa chitó. Ta tixehun tuhun maun chi ñu cha sahá tuhun tyi chitó xaan ta ñu chiñi tuñi ñandihí. ²⁶ Ndicha Sutu Mañi yuhu, vatyi tyicuan caa cuñi maun.

²⁷ Tyicuan ta caryí tucu ra:

—Suti nacuhva cuenda ra tandihí chii. Yori maa ñohó nuu noo cha ndicha chii, soco noo tuhun ri maa Suti ñohó nuu ra chii. Ta yori ñohó nuu noo cha ndicha chi Suti, soco noo tuhun ri mai, cha cuví Sehe ra chii, ñohó nui chi ra. Ta ñáyivi cha cuñi mai cha cohon nuu chi ra, ican ñu cuan cua cohon nuu chi ra. ²⁸ Tandihí nyoho cha chitatu ndo cha sahá tyiño ndo, ta chihin carga cha nyisó ndo, quichi ndo nu nyaí, ta yuhu cuhve cha nyitatu ndo. ²⁹ Cuhva ndo cha cunyaca ñahi chi ndo ta cutuhva ndo cuhva iyó yuhu. Vatyi yuhu masu iñi ta cama iñi. Tyicuan caa ta ñihi ndo nu nyitatu aña ndo. ³⁰ Ña yí cha cuhva ndo chi ndo cha cunyaca ñahi. Ta carga cha chahí chi ndo, ñahma.

12

Nu tohón ra cachicá noo chihin ra Jesús yoco trigu quivi nyitatu ñáyivi (Mr. 2.23-28; Lc. 6.1-5)

¹ Noo quivi nyitatu ñáyivi, yaha ra Jesús mahñu nu iyó cha tachí ñu. Ta chaa soco chi ra cachicá noo chihin ra. Ta quichaha catohon ra yoco trigu cuan ta quichaha cachachi ra chiti yoco cuan. ² Cuhva cha cananyehé ra fariseo cha tyicuan caa, cacatyí ra chi ra Jesús:

—Nyehe, ra cachicá noo chuhun sacuví ra noo cha ña tahán chi sacuví yo quivi nyitatu yo —caryí ra chi ra.

³ Soco maa ra Jesús caryí ra chi ra:

—¿Atu ta sacuaha ca nyoho cha sacuví ra David chihin ra tahan ra quivi cha chisoco ra? ⁴ Quihvi ra chichi vehe Nyoo. Ta quehen ra pan ii cha cha yaha catuvi nuu Nyoo. Ta chachi ra ta ña tahán chi cachi ra, ni maa ra ni ra ndihí chihin ra, vatyi maa ri maa tata sutu tahán chi cachi pan cuan. ⁵ ¿O ta sacuaha ca ndo nu ley cha chaha Nyoo chi ra Moisés nu caryí chi vatyi ra cacuví sutu, ña canyitatu ra quivi nyitatu yo, soco sahá tyiño ra chichi vehe ñuhu? Yucuan nyehé yo vatyi ñima cuaryi cuví cuan. ⁶ Ta caryí chi ndo, vatyi ihya nyaá yuhu cha cuví noo ra cahnu ca ican saha vehe ñuhu. ⁷ Nyoho, ta cutuñi ca iñi ndo nu caryí chi tyehe caa nu tuhun Nyoo: “Cha cuñi yuhu, cha cundahvi cuñi ndo nyehe ndo chi tahan ndo, ta ñima ca cha cahni ndo quití ta cuhva cuenda ndo chii.” Tyehe ta cutuñi iñi ndo tuhun ihya, ma tyaa ndo cuaryi siqui ñáyivi cha ñahri sacuvi. ⁸ Yuhu cuví Rayí cha quichi nya gloria. Ta iyó ityi chii vatyi caryí chi noo noo ndo ñáa cha sacuvi ndo quivi nyitatu yo —caryí ra Jesús.

Nu nduvaha ra cha ityi ndaha (Mr. 3.1-6; Lc. 6.6-11)

⁹ Tyicuan ta quitá ra Jesús yucuan, ta cuahan ra vehe ñuhu. ¹⁰ Ta yucuan ñohó noo ra ityi inchiyo ndaha. Ta nyicú tucu suhva ra nducu cuhva yoso caa ta caryaa ra cuaryi siqui ra Jesús.

Yucuan chaha candacā tuhun ra chi ra ta catyí ra:

—¿Atu cuví sanduvaha yo chi noo ñu cuhví quiví nyitatu yo? —cacatyí ra chi ra Jesús.

¹¹ Ta nacahan ra Jesús ta catyí ra:

—¿Nya noo nyoho, tatu canacava noo mbee sana ndo chichi noo yavi quiví nyitatu yo, atu ma cuhun ndo ta tava ndo chi tí? ¹² Ta ¿atu ña yahvi ca nyaá noo ñáyiví ta ñima ca noo mbee? Yucuan chaha vatyi tahanan chi sacuvi yo cha vaha quiví nyitatu yo —catyí ra.

¹³ Tyicuan ta catyí ra chi ra cha ityi ndaha cuan:

—Sanacaa ndahun —catyí ra.

Ta cuhva cha sanacaa ra, nduvaha ri ndaha ra tari inga chiyo cuan.

¹⁴ Tyicuan ta caquitā coyo ra fariseo cuandatum tahanan ra yoso caa cacahñi ra chi ra Jesús.

Noo profeta, ra chahá cuenda tuhun cahan Nyoo, cahan ra tuhun ra Jesús cha ni cumañi ca cacu ra

¹⁵ Cha chito ra Jesús tuhun tyi canducú ra chi ra, quita ra yucuan ta cuaha ñáyiví chinyicon chi ra. Ta maa ra sanduvaha ra chi tandihí ñu cuhví.

¹⁶ Ta catyí ra chi ñu tyi ma cahan ñu tuhun vatyi ican ra sanduvaha chi ñu.

¹⁷ Tyicuan caa cuví tacuhva nachino cava tuhun cha tyaá ra Isaías ra cuví profeta Nyoo ta cha naha. Tyehe caa tyaa ra:

¹⁸ Ican ra ihya cuví ra sacuvi tyiño nui, ra cha nacachi vahi.

Cuñí xain chi ra, ta sñi cuñí chihin ra. Cusacuti chi ra chihin Tatyí Ii cha iyó chii.

Ta cusacoto ra chi ñáyiví cha ñima ñu Israel cuví yoso caa sacuvahi chi ñu nui.

¹⁹ Ta ma xaan cahan ra ta ni ma cana chaa ra, ta ni yori cuiñi ndusu ra ityi cahnu.

²⁰ Ta ni noo ndoo yacua, ta ma cahnu ndihí ra.

Ta ni ma ndahva ndihí ra mecha cha caña ñuhma.

Nyacua nya cha sanicoo vaha ra chi ñáyiví chihin ra ta cunyaca ñaha vaha ra añima ñu.

²¹ Ta tandihí ñáyiví, ta chi ra cuquihi iñi ñu.

Nu catyí ñáyiví vatyi ra Jesús, tunyee iñi ra ña vaha iyó chi ra

(Mr. 3.20-30; Lc. 11.14-23; 12.10)

²² Tyicuan ta nu nyaá ra Jesús chinyaca ñu chi noo ra yihí tatyí ña vaha chí, cuaa ra ta ñihí ra. Ta ra Jesús sanduvaha ra chi ra. Ta cuví nacahan ra, ta cuví nanyehe ra. ²³ Iyo xaan cuñí tandihí ñáyiví, ta catyí ñu:

—¿Vasi ra vachi tata rey David cuví chi ra ihya? —catyí ñu.

²⁴ Soco cuhva cha cachiñi ra fariseo tuhun cuan, cacatyí ra:

—Chihin fuerza ra Beelzebú, ra cuví nuu chi cuihna, tavá ra ihya tatyí ña vaha —catyí ra.

²⁵ Soco ra Jesús chitó ra cha cachicá xiñi ra, yucuan chaha catyí ra chi ra:

—Tatu noo gobiernu ta cacusiin ra, cuaha ri ityi nanduvi ra, cucañi tahanan ra chihin tahanan ra, ta cundihi tuhun cha canyacá ñaha ra. O tatu noo ñuu o tandihí ñáyiví noo vehe cacusiin ñu chihin tahanan ñu, cutiví nu nyicú ñu.

²⁶ Ta tyicuan caa tucu, tatu cuihna ta tava ra suri ra tahanan maa ra, cuñí chi catyí vatyi ña iin ri cacuví ra, ta cundihi fuerza cha iyó chi ra. ²⁷ Ta nyoho catyí ndo vatyi yuhu tavé tatyí ña vaha chihin fuerza ra Beelzebú. Tu tyicuan caa, ra nyicú chihin maa ndo, ¿yóo cha chaha fuerza vatyi tavá ra tatyí ña vaha? Maa ra na sacoto ra chí ndo cha ndicha, vatyi nyoho tondo ri chicá xiñi ndo. ²⁸ Yucuan chaha catyí chí ndo, vatyi yuhu tave tatyí ña vaha chihin fuerza Tatyí Ii Nyoo. Ta cuñí chi catyí vatyi ndicha cuii Nyoo ra nyacá ñaha añima ñáyiví cha chaá ra nu canyicú ndo.

²⁹ 'Chichi vehe noo ra ñihi xaan, tari cuihna, ma cuví quihvi noo ra ta quehen ra tandihí cha chii ra, soco tatu cuhñi xihna ra chi ra tyicuan caa ta cuví tinyaa ra tandihí cha chii ra.

³⁰ 'Ñáyiví cha ña nyaá tumañi iñi chii, ñáyiví xaan iñi chii cuví ñu. Ta tatu ña tyinyeé ndo chii cha cahan ndo tuhun nuu ñáyiví, cuñí chi catyí

vatyí ña chahá ndo cha coto ñáyiví tuhun cahín.

³¹ 'Yucuan chaha catyí chi ndo vatyí Nyoo sahá ra tıcahnu iñi cuatyí ñáyiví, ta ñáá cha ña vaha cahán ñu ñandihí, soco cha cahan ña vaha ñu síqui Tatyí Ii Nyoo, yucuan ndicha, ma coo tıcahnu iñi cha cuenda ñu. ³² Ta yóo ri ñu cha cahán ña vaha síqui yuhu Rayıi cha quichı nya gloria, coo tıcahnu iñi chi ñu cha cuenda cuan. Soco ñu cahán ña vaha síqui Tatyí Ii Nyoo, ma coo maa tıcahnu iñi chi ñu cha cuenda cuatyí cuan, niri ihya ñayivı, ta niri inga ñayivı ñandihı.

Chihin cha sacuvi ri ñáyivı ta nicohon nuu ri yo chi ñu tatu ñu vaha o ñu ña vaha cuvı ñu
(Lc. 6.43-45)

³³ 'Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. Nicohón nuu ri yo tatu yutun vaha cuvı tun chihin chiti cha chahá tun. ³⁴ ¡Nyoho, ñu quiñi iyó, tari tata coo xaan cuvı ndo! ¿Yoso caa cuvı quitá tuhun vaha yuhu ndo, ta ñáyivı quiñi caa añima cuvı ndo? Vatyí cha quitá chichi añima yo ıcan cuan cahán yo. ³⁵ Noo ra vaha cahán ra tuhun vaha vatyí ñohó cha vaha añima ra. Ta ra quiñi iyó, maa maa ri tuhun quiñi caa cahán ra, vatyí cha quiñi caa ñohó añima ra. ³⁶ Ta yuhu catyí chi ndo vatyí quivı cutuñi chi tandihı ñáyivı, cucuhva ñu cuenda tandihı tuhun cha ña saha ñu cuenda ta cahan ñu. ³⁷ Vatyí yoso cuhva cahún, yucuan cuhva cucutuñi chuun, tatu iyó o ñahri cuatyun.

Ñu quiñi iyó cuñı ñu nyehe ñu seña milagru
(Mr. 8.12; Lc. 11.29-32)

³⁸ Tyicuan ta suhva ra fariseo ta ra sacuahá ley vehe ñuhu cacatyí ra chi ra Jesús tyehe caa:

—Maestro, cuñı ndi vatyí sacuvun noo seña milagru vatyí nyehe ndi.

³⁹ Ta nacahan ra Jesús ta catyí ra:

—Ñu quiñi iyó ta ñu nyicón inga nyoo cuñı ñu nyehe ñu seña milagru. Soco ma nyehe ca ñu inga seña,

noo ri seña ra Jonás ra profeta Nyoo, yucuan ri cunyehe ñu. ⁴⁰ Vatyí tari ñohó ra Jonás chichi tiyaca cahnucuan uñi quivı ta uñi ñuu, tyicuan caa cucohon yuhu Rayıi cha quichı nya gloria chichi ñuhú uñi quivı ta uñi ñuu. ⁴¹ Ta quivı cucutuñi chi tandihı ñáyivı, cundıcuıta ñu chiyo ñuu Ninive ta cha naha ta cucatyí ñu na tachi tuñi Nyoo chi nyoho ñáyivı cha iyó vityin, ta cucatyí ñu vatyí cucunaa ndo, vatyí maa ñu cha cuvı ñu ñuu Nıñive, canasama ñu cuhva iyó ñu quivı cahan ra Jonás tuhun Nyoo chihin ñu. Ta ihya nyaá ra cahnucua cuvı ta ñima ca ra Jonás. ⁴² Vatyí tyicuan caa tucu ñaha cha cuvı reina ityi Sur, cundıcuıta ña quivı cucutuñi chi ñáyivı ta cucatyí ña vatyí cucunaa nyoho ñu iyó vityin, vatyí maa ña, vasi cañi ñuu ña soco quichı ña, quichı tyasoho ña tuhun cha chiñi tuñi ra Salomón. Ta ihya cahnucua cuvı ra cha cahán chihin ndo vityin ta ñima ca ra Salomón.

Yoso caa ndichi tucu tatyí ña vaha inga chaha añima ñáyivı tatu naa iñi ñu chi Nyoo

(Lc. 11.24-26)

⁴³ 'Tatu noo tatyí ña vaha quita chi añima noo rayıi, chicá noo chi noo nu ityi, nanducú chi noo nu nyitatu chi, soco ña nañihi chi nu nyitatu chi. Tyicuan ta ndichi xiñi chi: ⁴⁴ "Cunuhu tiquı nya vehı nu quite." Yucuan ta nachaa chi añima ra nu quitá chi. Ta nanyehe chi vatyí ndı xaan, ta yori nyaá. ⁴⁵ Tyicuan ta cuanaquehen chi ucha ca tahan tatyí ña vaha, cha yaha ca cuhva ıcan saha maa chi. Tyicuan ta quihvi tandihı tatyí ña vaha cuan añima ra cuan. Yucuan chaha, quiñi ca cunıcoo ra ta ñima ca cuhva chiyo maa ra. Ta tyicuan caa cucuvi chi ñáyivı quiñi iyó ihya —catyí ra Jesús.

Tari yañi ra Jesús ta tari sihi ra cuvı chi ñáyivı sacuvı cuhva catyí Nyoo
(Mr. 3.31-35; Lc. 8.19-21)

⁴⁶ Ni cahán ca ra Jesús chihin ñáyivı, ta chaá sihi ra ta yañi ra, ta ndoo ñu chata vehe, ta cuñı ñu cahan ñu

chihin ra. ⁴⁷ Tyicuan ta sacoto noo ñáyiví nyaá cuan chi ra Jesús, ta catyí ñu:

—Sihun ta yañun nyicú ñu chata vehe. Ta cuñí ñu cahan ñu chuhun.

⁴⁸ Tyicuan ta nacahan ra Jesús ta catyí ra chi ñu:

—¿Yóó cha cuví sihi ta yañi? —catyí ra.

⁴⁹ Tyicuan ta sañaha ndaha ra chi ra cachicá noo chihin ra, ta catyí ra:

—Ican ra ihya cuví sihi ta yañi.

⁵⁰ Vatyí tandihí ñáyiví cha sacuvi cuhva cuñí Suti ra nyaá andiví, ican ñu cuan cuví yañi, ta cuhve, ta sihi —catyí ra Jesús.

13

Tari noo ra chicá noo tachí, tyicuan caa cuví ra cahán tuhun Nyoo chihin ñáyiví

(Mr. 4.1-9; Lc. 8.4-8)

¹ Quiví cuan quitá ra Jesús vehe ra ta chicunyaá ra yuhu miñi. ² Ta chaha cha cuaha ñáyiví natacá nu nyaá ra, quihví ra chichi noo canoa ta chicunyaá ra. Ta tandihí ñáyiví ndoo ñu nyicú ñu nu ñiti cuan. ³ Tyicuan ta cuaha ri cha quichaha sañahá ra chi ñu chihin noo cuhva ta catyí ra:

—Noo chaha quitá noo ra, tachí ra chiti trigu. ⁴ Ta nu cuahan ra quití ra chiti cuan, canacoyo suhva chiti cuan yuhu ityi. Ta quichí coyo saa ta cachachí ti. ⁵ Ta suhva ca canacoyo ticu yuu, nu ña cuaha ñuhú yihí. Ta yucuan cañá chiti cuan cha numi ri vatyí ña cuaha ñuhú yihí chaha. ⁶ Soco cuhva cha cañá ñanyii ñn na ityi ri tun, vatyí ña cono yihí yoho tun. ⁷ Suhva ca chiti canacoyo ticu iñu. Ta chahnu iñu cuan. Ta chasi chi nuu tun. Yucuan chaha ña chiyó chiti tun. ⁸ Soco suhva ca canacoyo nu ñuhú vaha. Ta quiví cachahnu tun, vaha xaan cachaha tun chiti, vatyí yihí tun noo cientu chiti chaha tun cha noo ri maa tun. Ta inga tun uñi xico, ta inga tun oco uchi chiti chaha tun. ⁹ ¡Tatu cutuñi iñi ndo, tyasoho ndo!

Nu sacoto ra Jesús ñáá tuhun cha chihin cuhva ri cahan ra ta ña cahán cachi ra

(Mr. 4.10-12; Lc. 8.9-10)

¹⁰ Tyicuan ta tuhva ra cachicá noo chihin ra Jesús, ta candacá tuhun ra chi ra, ta catyí ra:

—¿Ñáá tuhun cha chihin cuhva ri cahún chihin ñáyiví, ta ña cahán cachun chihin ñu? —cacatyí ra.

¹¹ Ta nacahan ra Jesús ta catyí ra:

—Chi nyoho sacotó Nyoo tuhun xehe, yoso caa nyacá ñaha ra, soco chi maa ñu ña chahá ra cha coto ñu.

¹² Vatyí ñáyiví cutuñi iñi tuhun cahín ta sacuví ñu, cuaha ca cucutuñi iñi ñu. Ta ñáyiví cha chiin ri cutuñi iñi, ta ña cuñí ñu sacuvi ñu, cutinyaa ndihí cha cutuñi iñi ñu. ¹³ Yucuan chaha vatyí chihin cuhva ri cahín chihin ñu, tacuhva nyehe ñu ta cuví chi tari cha ña ndichin nyehe ñu. Ta cuiñi ñu soco ma cutuñi iñi ñu, tari cha ña chiñi ñu cuví cuan. ¹⁴ Ta tyicuan caa ta chinó cava tuhun cha cahan ra Isaías ra profeta Nyoo ta cha naña, ta catyí ra:

Cha ndicha vatyí nyoho cuiñi ndo tuhun, soco ma cutuñi iñi ndo.

Ta cunyehe ndo cha sacuví, ta ma cutuñi iñi ndo.

¹⁵ Vatyí cha ndundavañá ña ñáyiví ihya, ta ña cachi vaha chiñi ñu.

Ta tahán nuu ñu,

Tacuhva cha ma nyehe ñu chihin chiti nuu ñu.

Ta ma cuiñi ñu chihin soho ñu.

Ta ni ma cutuñi iñi ñu chihin añima ñu.

Ta ni ma nanducu ñu chii, tacuhva sanduvahi chi ñu.

¹⁶ 'Soco siñ xaan cuví chi nyoho, vatyí nyehé ndo chihin chiti nuu ndo, ta chiñi ndo chihin soho ndo. ¹⁷ Cha ndicha catyí chi ndo, vatyí cuaha ra cacuví profeta Nyoo ta cuaha ñáyiví vaha, cacuñi ñu nyehe ñu cha nyehé nyoho cha sacuví, soco ña nyehe ñu. Cuñi ñu cuiñi ñu tandihí tuhun cha chiñi nyoho vityin, soco ña chiñi ñu.

Nu catyí ra Jesús ñáá cha cuñi chi catyí cuhva cha cahán ra

(Mr. 4.13-20; Lc. 8.11-15)

18 'Tyasoho ndo ñáá cha cuñí chi catyi noo cuhva cha catyi chi ndo tuhun ra cha tachí chiti trigu cuan: 19 Ñáyivi cha chiñí tuhun yoso caa cuñí Nyoo cunyaca ñaha ra añima ñu, ta ña cutuñí iñi ñu, tari nu canacoyo chiti yuhu ityi, tyicuan caa cuví ñu. Vatyí quichí cuihna ta tava ra tuhun Nyoo cha caa añima ñu. 20 Ta tari nu canacoyo chiti ticu yuu cuan, tyicuan caa cuví tucu ñáyivi cha chiñí tuhun Nyoo, ta sii xaan cuví chi ñu naquehen cuenda ñu noo ri cuhva. 21 Vatyí nu caña chiti ticu yuu cuan, chiin ri ñuhú yihí chaha. Yucuan chaha caña soco ña cuví tyihi yoho chi. Ta tyicuan caa ñu cuan. Suhva ri quivi chinó iñi ñu. Soco quivi cha quichaha nyehe ñu tindoho, ta satasi iñi ñáyivi chi ñu cha cuenda tuhun Nyoo ta sandihí ri ñu tuhun cha chinó iñi ñu. 22 Ta tari nu canacoyo chiti chichi iñu cuan, tyicuan caa cuví tucu inga ñu cha chiñí tuhun Nyoo. Chiñí ñu, soco ña cuñí ñu sacuvi ñu tari cuhva chiñí ñu. Vatyí nyaá xaan ca xiñi ñu tuhun tindoho ñáyivi ican saha tuhun Nyoo. Ta nyiyo ca iñi ñu cha tyayii. Ta tandihí tuhun cuan sayanga chi chi ñu, ta ña chahá nanducu vaha ñu chi Nyoo. 23 Soco tari nu canacava chiti nu ñuhu vaha, tyicuan caa cuví ñu chiñí tuhun Nyoo, ta cutuñí iñi ñu, ta sacuvi ñu tandihí tuhun cahán ra. Yihí ñu cuví ñu tari yutun cha chaha noo cientu chiti, ta inga ñu tari yutun cha chaha uñi xico, o tari yutun cha chahá oco uchi chiti noo noo tun.

Nu catyí ra Jesús yoso caa cuahan tuhun trigu ta cuhu ña vaha

24 Ta chaha tucu ra Jesús inga cuhva ihya chi ñu; ta catyí ra:

—Cha nyacá ñaha Nyoo añima ñáyivi cuví chi tari noo ra cha tachí chiti trigu nu noo ñuhú. 25 Soco cuhva cha caquixí tandihí ra casahá tyiño cuan, quihvi noo ra xaan iñi chi ra, ta tachí ra chiti cuhu ña vaha, ta cuahan ra. 26 Ta quivi caña chiti trigu cuan, ta caña yoco chi, ta yucuan na tuvi tucu cuhu ña vaha cuan. 27 Tyicuan ta ra

cacuví musu, cachahan ra chicatyí ra chi chitoho ra: “Tata, tatu maa maa ri maa chiti trigu tachun, ¿nya quita cuhu ña vaha cuan?” cacatyí ra. 28 Ta nacahan ra cuan ta catyí ra: “Iyó noo ra xaan iñi chi yo tachí.” Tyicuan ta musu cuan, catyí ra chi chitoho ra: “¿Atu cuñún cha cuhun ndi ta tohon ndi cuhu ña vaha cuan?” 29 Soco chitoho ra catyí ra: “Ma tohon ndo, coto cuhva cha tohon ndo cuhu ña vaha cuan, ta coyo ndihí trigu cuan. 30 Saña ndo, na cuahnu maa chi ñn ri chihin trigu cuan, tyicuan ta quivi cunicoñehi tyiño sahí, cutachi chi ra casaha tyiño cutohon xihna ca ra cuhu ña vaha cuan ta cuhñi ra cuenda sucun, vatyí cahmi ra. Ta yaha cuan ta canaquehen vaha ra cha vaha cuan chichi yaque.”

Nu catyí ra Jesús vatyí tari chiti mostaza cuví cha nyacá ñaha Nyoo añima yo

(Mr. 4.30-32; Lc. 13.18-19)

31 Tyicuan ta catyí tucu ra Jesús inga cuhva ihya chi ñu:

—Cha nyacá ñaha Nyoo añima ñáyivi cuví chi tari noo chiti yutun cha nañí mostaza cha tachí noo ra nu ñuhú ra. 32 Vatyí ican chiti cuan cuví cha luhlu ca ican saha tandihí ca chiti. Soco quivi chahnu tun cuví tun noo yutun cahnu vavaha. Ta quichí coyo saa, ta casavahá ti taca ti nuu tun —catyí ra Jesús.

Nu catyí ra Jesús vatyí tari yuchan iya cuví cha nyacá ñaha Nyoo añima ñáyivi

(Lc. 13.20-21)

33 Ta catyí tucu ra Jesús inga cuhva ihya:

—Cha nyacá ñaha Nyoo añima ñáyivi cuví chi tari yuchan iya cha nasaca noo ñaha chihin uñi cuhva yutyi pan. Vatyí tari ndaa tandihí pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo añima —catyí ra.

Yoso caa chotyíño ra Jesús noo cuhva cha cahán ra
(Mr. 4.33-34)

³⁴ Tandihí tuhun ihya cahan ra Jesús chihin ñáyiví chihin cuhva ri. Ta tandihí tuhun cha catyí ra chi ñu soco maa maa ri chihin noo cuhva ri. ³⁵ Tyehe caa sacuví ra tacuhva chino cava tuhun cha cahán ra profeta ta cha naha ta tyaá ra tyehe caa: Chihin cuhva ri cucahin chihin ñáyiví.

Cucatyí chi ñu tuhun cha ñohó xehe nyata savahá Nyoo ñuhu ñáyiví.

Nu catyí ra Jesús ñáá cha cuñí chi catyí tuhun cuhu ña vaha cha cañ mahñu chiti trigu cuan

³⁶ Tyicuan ta sacunuhu ra Jesús chi ñáyiví, ta ndihví ra chichi vehe. Ta catuhva ra cachicá noo chihin ra chi ra, ta catyí ra chi ra:

—Nacatyí chi ndi ñáá cha cuñí chi catyí tuhun cha cañ cuhu ña vaha cuan nu ñuhu cuan.

³⁷ Tyicuan ta quichaha catyí ra Jesús chi ra:

—Ra cha tachí chiti trigu cuan ican cuví yuhu Rayíi cha quichí nya gloria. ³⁸ Ta ñuhú cuan, ican cuví añima ñáyiví iyó síqui ñuhu ñáyiví. Ta chiti trigu cuan ican cuñí chi catyí ñáyiví cha nyicón chi Nyoo, ta chiti cuhu ña vaha cuan cuñí chi catyí ñáyiví cha nyacuví cuhva cuñí ra ña vaha.

³⁹ Ra cha tachí cuhu ña vaha cuan, ican cuví cuihna ra xaan iñi chi Nyoo. Ta quiví cunacoñehe ra tyiño saha ra, ican cuví quiví cucunaa ñuhu ñáyiví. Ta ra cha cunacoñehe chiti cuan, ican cuví ra cacuví ángel. ⁴⁰ Tari nasataca ra cuhu ña vaha cuan vatyí cayu chí, tyicuan caa cucuví quiví naa ñáyiví. ⁴¹ Yuhu Rayíi cha quichi nya gloria cutachi chí ángel cunasataca ra chí ñu sacoo cuatyí inga ñu, ta ñu cha sacuví cha ña vaha. ⁴² Ta cutyihí ra chí ñu chichi horno nu cayú ñuhu. Ta cucuacu ñu ta cusacahñi ñu noho ñu. ⁴³ Ta ñu cha sacuví cuhva cuñí Nyoo cutuví ñu nuu Nyoo Sutu yo. Ta tari cha ndichin ñanyii, tyicuan caa cucuví ñu. Tatu cutuñí iñi ndo, tyasoho ndo tuhun cahín.

Noo xuhun cuaan cha ñohó xehe

⁴⁴ 'Cha nyacá ñaha Nyoo añima ñáyiví cuví chí tari noo xuhun cuaan ñohó xehe chichi ñuhú. Ta noo ra nañihí xuhun cuaan cuan, soco natyihí xehe tucu ra inga chaha ta si xaan cuñí ra cuanuhu ra ta xico ra tandihí cha iyó chí ra, ta sata ra ñuhu nu ñohó xehe xuhun cuaan cuan.

Noo cuhva cha cahan ra Jesús cuenda noo perla cha yahvi xaan nyaá

⁴⁵ 'Ta cha nyacá ñaha Nyoo añima ñáyiví, cuví tucu chí tari noo ra satá ta naxicó perla finu. ⁴⁶ Ta cuhva cha ñihí ra noo cha yahví vavaha nyaá, ta xico ra ndi maa cha cumí ra, ta sata ra perla vaha cuan.

Nu sañahá ra Jesús noo cuhva cuenda tarraya

⁴⁷ 'Ta suri cuví tucu cha nyacá ñaha Nyoo añima ñáyiví tari tarraya cha cañí ra nu tyañuhu, ta ñihí ra ndihí nuu tiyaca chihin. ⁴⁸ Ta cuhva cha chitu tarraya cuan chihin tiyaca, catava ra ityí nu ñiti, ta yucuan canacachí ra chí ti, canaquehen vaha ra chí quití vaha chichi noo tica, ta sacuita ra chí quití ña vaha cuan. ⁴⁹ Ta tyicuan caa cucuví quiví naa ñáyiví, cuquichi coyo ángel, quichi tava sin ra chí ñu vaha ta ñu ña vaha. ⁵⁰ Ta cutyihí ra chí ñu ña vaha cuan chichi anyaya nu cayú ñuhu, nu cucuacu ñu ta cusacahñi ñu noho ñu.

Nu sañahá chí vatyí vaha tuhun chahnu ta tuhun chaa Nyoo

⁵¹ Tyicuan ta ra Jesús ndaca tuhun ra chí ra cachicá noo chihin ra, ta catyí ra:

—¿Atu cutuñí iñi ndo tandihí tuhun ihya?

Ta nacahan ra ta cacatyí ra:

—Ay, Sutu Mañi yuhu. Cutuñí iñi ndi.

⁵² Tyicuan ta catyí ra Jesús chí ra:

—Tatu noo ra sacuahá cuenda ley vehe ñuhu, ta cutuhva ra tuhun yoso caa nyacá naha Nyoo añima ñáyiví, cumí ra cha vaha tuhun chahnu Nyoo, ta cumí tucu ra tuhun chaa cha sañahí. Ta cuví ra tari noo ra cuví nuu, ra chitó ta sañahá ra tuhun

chahnu ta tuhun chaa cha sañahi
—catyí ra Jesús.

*Nu ñohó ra Jesús Nazaret ñuu nu
chahnu ra*

(Mr. 6.1-6; Lc. 4.16-30)

⁵³ Ndihi cahan ra Jesús cuhva ihya
ta cuahan ra. ⁵⁴ Ta nachaa ra ñuu
ra. Ta yucuan quichaha sañaha ra
chichi vehe ñuhu ñuu cuan. Ta iyo
cuñi ñáyivi ta catyí ñu:

—¿Nya maa maa cutuhva ra ihya
cha chiñi tuñi xaan ra? ¿Ta yoso caa
cuví sacuvi ra milagru? ⁵⁵ Vatyí sehe
ra satyá vitu cuan cuví chi ra. Ta cu
María cuví sihi ra. Ta yañi ra cuví chi
ra Jacobo, ta ra José, ta ra Simón ta ra
Judas. ⁵⁶ Ta cuhva ra ñandihí, iyó ñu
ityi nu iyó yo. Tu tyicuan caa, ¿nya
maa maa cutuhva ra tandihí tuhun
ihya? —catyí ñu.

⁵⁷ Ta yucuan chaha ña cuñi ñu
quichaha ñu chi ra. Soco ra Jesús
catyí ra chi ñu:

—Tandihí ñáyivi tandihí ri ityi sahá
ñu ñáyivi chi ra profeta. Soco ña
quichahá ñu chi ra tatu ra ñuu ñu, o
ra vehe ñu cuví chi ra —catyí ra.

⁵⁸ Ta ña cuaha milagru sacuvi ra
yucuan cha cuenda vatyí ña chinó iñi
ñu chi ra.

14

*Nu catyí chi yoso caa chihí ra Juan
ra sacondutyá*

(Mr. 6.14-29; Lc. 9.7-9)

¹ Quivi cuan ra Herodes, ra cuví go-
biernu nicahnu nu cuví Galilea, ñihí
ra tuhun ra Jesús. ² Ta catyí ra chi ra
nyicú chihin ra:

—Ican ra cuan cuví ra Juan ra
sacondutyá chi ñáyivi, ra cha chihí
ta vityin nandoto ra. Yucuan chaha
iyó tunyee iñi chi ra cha sacuví ra
milagru.

³⁻⁴ Tyicuan caa catyí ra vatyí suri
maa ra tyihí tyiño ta catin ra chi
ra Juan. Ta chahñi ra chi ra chihin
cadena, ta tyihí ra chi ra vehe caa.
Tyicuan caa sacuvi ra tyi xaan cuñi
ra tyi catyí ra Juan tyi ña vaha cha
nyaá ra chihin cu Herodías cha cuví
ña ñasihí yañi ra ra Felipe.

⁵ Ta yucuan chaha, ra Herodes,
cuñi ra cahñi ra chi ra Juan, soco
yuhvi ra chi ñáyivi, vatyí tandihí ñu
chinó iñi ñu tyi ra Juan cuenda Nyoo
cahán ra. ⁶ Soco noo quivi cha vico
ra Herodes, ta quichahá chita chaha
sehe cu Herodías nu nyicú ñu vico
cuan. Ta tahañ xaan iñi ra Herodes.
⁷ Ta tyaa ra cuhva vatyí cuhva ra
ñáá ri cha cacán ñaha tyivaa cuan,
ta ma nacahnu ra tuhun cahan ra.
⁸ Tyicuan ta tyiyuhu sihi ña chi ña, na
catyí ña chi ra Herodes tyehe caa:

—Cuhva xiñi ra Juan ra sacondutyá
ñáyivi chii nu noo coho —catyí ña.

⁹ Cha chiñi rey Herodes tuhun
cahán ña, nducuihya cuñi ra. Soco
cha cuenda cha tyaa ra cuhva vatyí
cuhva ra ñáá ri cha cacán ña nuu
ñu canyicú vico cuan ta ma cuví
nacahnu ra, yucuan chaha tachí ra
nacuhva ra xiñi ra Juan chi ña. ¹⁰ Ta
tachí ra tyiño na cutahnya sucun ra
Juan nu ñohó ra vehe caa. ¹¹ Tyicuan
ta caquichí nyaca ra xiñi ra, yihí noo
nu coho. Ta cachaha ra chi ñaha tyi-
vaa cuan. Ta maa ña nacuhva cuenda
ña chi sihi ña.

¹² Tyicuan ta chaá coyo ra canyicon
chi ra Juan ta canaquehen ra coño
ñuhu ra, ta catyihí ra chichi ñuhu.
Ta yaha cuan ta chahañ coyo ra
chisacoto ra chi ra Jesús.

*Nu chahá ra Jesús cha cachi ohon
mil rayi*

*(Mr. 6.30-44; Lc. 9.10-17; Jn. 6.1-
14)*

¹³ Cha chito ra Jesús tuhun ihya,
quehen ra noo canoa, ta cuahan noo
tuhun ri maa ra noo nu taxi ri iyó.
Soco chito ri ñáyivi, ta quita coyo ñu
ñuu ñu, ta cuahan coyo ñu chata ra
ityi nu ñuhú. ¹⁴ Cha quita ra Jesús
chichi canoa cuan, nanyehé ra cuaha
xaan ñáyivi. Ta cundahvi xaan cuñi
ra nyehé ra chi ñu. Ta sanduvaha ra
chi ñu cuhvi cha chaá chihin ñu. ¹⁵ Ta
vatyí cha cua cuaá, ra cachicá noo
chihin ra Jesús chaa coyo ra, ta catyí
ra chi ra:

—Cha iñi xaan, ta yori ñáyivi
iyó yatyin ri ihya. Yucuan cuenda

natachi chi ñáyiví ihya na cunuhu coyo ñu nya ñuu cusata ñu cha cachi ñu —cacatyí ra chi ra Jesús.

¹⁶ Ta ra Jesús catyí ra:

—Ña tahán chi cuhun ñu. Cuhva maa ndo cha cachi ñu.

¹⁷ Ta nacahan ra ta cacatyí ra:

—Noo tuhun ohon tahan s̄in pan ta uvi tahan s̄in tiyaca cumí ndi.

¹⁸ Ta catyí ra Jesús:

—Nyaca ndo chii.

¹⁹ Tyicuan ta tachi ra tyiño na cuny-icu ñáyiví nu cuhu cuan. Yahá cuan ta quehen ra ohon tahan pan cuan, ta ni nduvi tiyaca cuan. Ta nanyehē ndaa ra andiví, ta nacuhvā ra tyahví nyoo chi Nyoo ta tahví ra pan cuan. Ta chahā ra chi ra cachicá noo chihin ra, na casacha ra chi ñáyiví cuan. ²⁰ Ta tandihí ñu cachachi ñu ta ndaha iñi ñu. Yahá cuan ta canasatacā ra yiquin cha ndoo. Ta quitā uchi uvi tahan tica. ²¹ Ta cha tandihí ñu cachachi cuan, quitā ta cha ohon mil cha maa ri maa rayi. Ta ña quihví cuenda ñusihí ni ra cuatyaa.

*Nu chicá ra Jesús nu ndutya
(Mr. 6.45-52; Jn. 6.16-21)*

²² Ta cha yaha tuhun cuan ta catyí ra Jesús chi ra cachicá noo chihin ra, na quihví coyo ra chichi canoa, vatyi cayaha sava ra miñi cuan ta cuhun coyo ra inga chiyo. Ta niri ca cha cuahan coyo ra cuan, ra Jesús ndoo ra natachi ra chi ñáyiví na cuhun coyo ñu. ²³ Cha yahā cha natachi ra chi ñu cuan, ta ndaa ra yucu cuan cua cacan tahvi noo tuhun ri maa ra chi Nyoo. Ta yucuan ñohó ra ta cuaa ndihí. ²⁴ Ta cha ni ri ca cha chicán tahvi ra cha cuahan vavaha canoa cuan nya mahñu miñi. Ta ndutya miñi cuan cañí chi chi canoa cuan cha cuenda vatyi ñihi xaan caá tatyí nu cuahan coyo ra. ²⁵ Ta cuhva cha ñaa ca cuan cua tuhva ra Jesús nu cuahan coyo ra chihin canoa cuan suri chicá ra nu ndutya. ²⁶ Ta cuhva cha cananyehē ra chi ra, chicá ra nu ndutya cuan, canayuhví xaan ra. Ta cacana chaa vavaha ra, ta catyí ra:

—¡Noo cha sayuhvi cuví!

²⁷ Soco nacahan ra Jesús chihin ra, ta catyí ra:

—¡San̄i ndo iñi ndo, yuhu cuví, ma yuhvi ndo! —catyí ra.

²⁸ Tyicuan ta nacahan ra Pedro ta catyí ra:

—Sutu Mañi yuhu, tatu icon cuvún, catyi na quichi yuhu nu ndutya chiña nyacua nya nu vachun.

²⁹ Ta ra Jesús catyí ra chi ra:

—Ñaha.

Tyicuan ta noo ra Pedro nu canoa cuan, ta quichahā chica ra nu ndutya vatyi cuhun ra nu vachi ra Jesús. ³⁰ Soco cuhva cha tuví iñi ra tyi ñihi xaan fuerza tatyí cuan, nayuhví ra ta quichaha nducu nyee ra, ta quichaha cana chaa ra ta catyí ra:

—¡Sacacu chii, Sutu Mañi yuhu!

³¹ Ta caa cuhva ri cuan, ta t̄in ra Jesús ndaha ra, ta catyí ra chi ra:

—¡Chiin xaan chinó iñun chii! ¿Ñáá tuhun cha nacaca uvi iñun? —catyí ra Jesús chi ra.

³² Ta cuhva cha ndaa coyo ra nu canoa cuan, cutaxin ri tatyí cuan.

³³ Tyicuan ta ra cañohó chichi canoa cuan cachicuiñi chiti ra nuu ra Jesús, ta cacatyí ra chi ra:

—Ndicha ndicha cuii vatyi Sehe Nyoo cuví chuun —cacatyí ra.

*Nu sanduvahā ra Jesús chi ñu cuhví
ñuu cha nyicú nicacahnu Genesaret
(Mr. 6.53-56)*

³⁴ Cha cayahā sava ra miñi cuan, cachaa coyo ra nu cuví Genesaret.

³⁵ Ta cuhva cha canicohon nuu ñáyiví iyó yucuan chi ra Jesús, sacoto ñu chi tandihí ñáyiví ityi cuan. Ta quichí nyaca ñu tandihí ñu cuhví nu nyaá ra. ³⁶ Ta chacú ndahví ñu nuu ra, na cuhva ra t̄in ñu vasi chiin sahma ra. Ta tandihí ñu t̄in sahma ra, nduvahā ñu.

15

*Nu sañahá chi ñáá cha sativí chi
ñáyiví
(Mr. 7.1-23)*

¹ Tyicuan ta suhva ra cacuví fariseo ta ra casacuaha ley vehe ñuhu quitā coyo ra Jerusalén. Ta chaa coyo ra nu

nyaá ra Jesús ta candacá tuhun ra chi ra, ta catyí ra:

² —¿Ñáá tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyí ña canacatyá ra ndaha ra tari cuhva cha tahán chi, tatu cuacachi ra xita —cacatyí ra.

³ Soco ndaca tuhun ra Jesús chi ra, ta catyí ra:

—¿Ñáá tuhun cha ña quichahá tucu nyoho tuhun cahán Nyoo ta ñihi xaan ca quichaha ndo costumbre maa ndo? ⁴ Vatyí Nyoo catyí ra: “Saha ndo ñáyivi chi sutu ndo ta chi sihi ndo. Ta tandihi ñu cha cahán ña vaha chi sutu o chi sihi, na cúvi ñu”, catyí Nyoo. ⁵ Soco nyoho catyí ndo tyi noo ñáyivi cuví catyí ñu chi sutu ñu o chi sihi ñu tyehe caa: “Ma cuvi tyinyei chuun vatyí tandihi cha iyó chii cha yaha chaha cuende chi Nyoo.” ⁶ Ta tatu cha catyí ndo tyicuan caa, ña cuñi ca chi cha tyinyee ca ndo chi sutu ndo o chi sihi ndo, catyí ndo. Ta tyicuan caa sacuachiyó xiin ndo tuhun cha catyí Nyoo tyi sacuvi ndo, vatyí cuñi ndo sacuvi maa ndo cuhva costumbre maa ndo. ⁷ ¡Nyoho cha sahá ndo tyi vaha ndo! Ndicha vaha tuhun cha tyaá ra Isaías, ra profeta Nyoo ta cha naha nu catyí Nyoo tuhun ndo tyehe caa:

⁸ Ñáyivi ihya, chihin yuhu ri ñu catyí ñu tyi cuñi ñu chii.

Soco ñima chihin tandihi aña ñu, tyi siin nu nyaá xiñi ñu.

⁹ Ta ñahri maa tuhun cha sacahnú ñu chii.

Vatyí cha sañahá ñu maa maa ri cuhva sañahá ñáyivi ri cuví, tyehe caa tyaá ra Isaías tuhun ndo, catyí ra Jesús.

¹⁰ Tyicuan ta cana ra chi ñáyivi ta catyí ra chi ñu:

—Tyasoho ndo, ta cutuñi iñi ndo tuhun cahín. ¹¹ Vatyí cha quihvi yuhu ñáyivi, ñima cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

¹² Tyicuan ta catuhva ra cachicá noo chihin ra Jesús ta candaca tuhun ra chi ra, ta catyí ra:

—¿Atu chitón vatyí ra fariseo quiñi xaan cuñi ra cha cachiñi ra tuhun cahún?

¹³ Soco maa ra Jesús nacahan ra:

—Tandihí yutun cha ña tachí Suti, ra nyaá andivi, cucoyo tun nya yoho tun. ¹⁴ Saña ndo chi ra vatyí ra cuaa cacuví ra, ta casañahá ra ityi chi inga ra cuaa. Ta tatu noo ra cuaa ta sañahá ra ityi chi inga ra cuaa, ni nduvi ra cucanacoyo ra chichi noo yavi.

¹⁵ Tyicuan ta quichaha catyí ra Pedro chi ra Jesús:

—Nacatyí chi ndi ñáá cha cuñi chi catyí cuhva cha cahún cuan.

¹⁶ Tyicuan ta ra Jesús catyí ra chi ra:

—¿Atu ni nyoho ta ña cutuñi iñi ndo? ¹⁷ ¿Atu ña cutuñi iñi ndo vatyí cha quihvi ityi yuhu yo, chichi yo cuahan? Yaha cuan ta quita tucu. ¹⁸ Soco tuhun cha quitá yuhu yo, chichi aña yo quitá, ta ican cuan cuví cha sativí chi ñáyivi nuu Nyoo. ¹⁹ Vatyí nya chichi aña ñu quitá cha quiñi caá chicá xiñi ñu. Ta cuñun, cha chahni ñu chi ñáyivi, cha quichi cuvi iñi ñu coo ñu chihin inga ñu cha ñima ñasihí ñu cuví. Ta tandihí ca cha quiñi caa cha sacuvi ñu chihin coño ñuhu ñu. O yihí ñu cha suhu ñu cha chii ñáyivi. O sandaví ñaha ñu. O cahán ndasi ñu. ²⁰ Ican cuan cuví cha sativí chi ñáyivi. Soco cha ma sacuvi ñu costumbre cha nacatyá xaan ñu ndaha ñu cha ni cumañi ca cachi ñu, ña sativí cuan chi ñu —catyí ra Jesús.

Nu nachino iñi noo ñaha inga ñuu chi ra Jesús

(Mr. 7.24-30)

²¹ Quita ra Jesús ñuu cuan ta cuahan ra ityi ñuu Tiro ta ñuu Sidón. ²² Ta noo ñaha ñuu Canaan iyó ña ityi cuan, suri caná chaa ña vachi ña nu vachi ra Jesús, ta catyí ña:

—Sutu Mañi yuhu, ra vachi tata rey David cuvún. Cundahvi cuñi nyehun chii, vatyí sehi yihí noo tatyí ña

vaha chi ña, ta nyehé xaan ña tindoho —catyí ña.

²³ Soco ra Jesús ña nacahan ra nu cahán ña. Tyicuan ta tuhva ra cachicá noo chihin ra chi ra ta cachacu ndahvi ra nuu ra ta catyí ra chi ra:

—Catyí chi ña na cunuhu ña vatyí caná chaa xaan ña vachi ña chata yo.

²⁴ Tyicuan ta catyí ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

²⁵ Soco ñaha cuan tuhva ña ta chicuñi chiti ña nuu ra ta catyí ña chi ra:

—Sutu Mañi yuhu, ¡tyinyee chii!

²⁶ Ta ra Jesús catyí ra chi ña:

—Ña vaha cha tinyaa yo pan yuhu sehe yo ta cuhva yo cachi ina —catyí ra chi ña.

²⁷ Soco maa ña ña quichaha ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachí ti yiquin cha canacoyo nu mesa chitoho ti —catyí ña.

²⁸ Tyicuan ta catyí ra Jesús chi ña:

—Sihi ¡ñana cha chinó xaan iñun chii! Cua sacuvi tari cuhva cuñún.

Ta caa cuhva ri cuan ta nduvaha sehe ña.

Nu sanduvaha ra Jesús cuaha ñu cuhvi

²⁹ Quita ra Jesús yucuan ta yaha ra yuhu miñi Galilea, ta ndaa ra noo yucu ta chicunyaá ra yucuan. ³⁰ Ta cuaha ñáyivi chaá coyo nu nyaá ra ta quichi nyaca ñu cuaha ñu cuhvi: ñu coxo, ñu cuaa, ñu luu, ñu ñihi. Ta cuaha ca ñu cuhvi quichi nyaca ñu nu nyaá ra. Ta chacun ñu chi ñu nuu ra, ta maa ra sanduvaha ra chi ñu. ³¹ Ta iyo cuñi ñáyivi nyehé ñu yoso caa nacahan ñu ñihi ta yoso caa nduvaha ñu luu, ta yoso caa nacacá ñu coxo, ta yoso caa nanyehé ñu cuaa. Ta quichaha casacahnu ñu chi ra cuví Nyoo cuenda ñu, ñu Israel.

Nu chahá ra Jesús cha cachi cumi mil rayi

(Mr. 8.1-10)

³² Tyicuan ta cana ra Jesús chi ra cachicá noo chihin ra, ta catyí ra chi ra:

—Ndahvi xaan cuñi nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu nyisó ñu. Ta ña cuñi natachi chi ñu nya vehe ñu vatyí ta cachi ca ñu, coto coña ñu ityi cunuhu ñu —catyí ra Jesús.

³³ Tyicuan ta ra cachicá noo chihin ra cacatyí ra chi ra:

—Soco ¿nya cuquehen yo cha cachi ñáyivi cuaha ihya, nu yori maa ñáyivi iyó ihya?

³⁴ Tyicuan ta ra Jesús ndaca tuhun ra chi ra:

—¿Yoso tahan pan cumí ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

³⁵ Tyicuan ta tachí ra na cunyicu ñáyivi cuan nu ñuhú. ³⁶ Tyicuan ta quehen ra ndi ucha pan cuan ta tiyaca cuan, ta nacuhva ra tyahvi nyoo chi Nyoo. Tyicuan ta tahvi ra ta chaha ra chi ra cachicá noo chihin ra, ta maa ra cachicá noo chihin ra canasacha ra chi ñáyivi. ³⁷ Tandihí ñu chachi ñu, ta chitu chichi ñu. Ta yaha cuan casacutu ra ucha tica chihin yiquin cha ndoo cuan. ³⁸ Cumi mil rayi cachachi, ta ña quihvi cuenda ñusihi ni ri ra cuatyaa. ³⁹ Yaha cuan ta sacunuhu ra chi ñáyivi, ta quihvi ra nu canoa, ta cuahan ra ityi nu cuví Magdala.

16

Ra fariseo ta ra saduceo cachicán ra chi ra Jesús na sacuvi ra noo milagru

(Mr. 8.11-13; Lc. 12.54-56)

¹ Tyicuan ta ra fariseo ta ra saduceo chahan coyo ra nu nyaá ra Jesús. Vatyí cacuñi ra nducu nyehe ra chi ra yucuan chaha chicán ra na sacuvi ra noo milagru chihin tunyee iñi Nyoo.

² Soco nacahan ra Jesús ta catyí ra chi ra:

—Cha cha iñi cuhva cha cuaa quee ñanyii, tuhvá ndo catyí ndo: “Vaha

xaan cucuvi quiví tyaan, vatyí tyaqui xaan cuaha andiví.”³ Ta cha ñaha ri catyí ndo: “Vityin ña tyaqui maa cucuvi quiví vatyí cuaha ta ñi ñaa xaan andiví”, catyí ndo. Nyoho vaha xaan chitó ndo ¿yoso caa nacotó ndo tuhun vico andiví soco ña cuví nacoto ndo yoso caa cuahan tuhun cha sañahá Nyoo chi ndo vityin? ⁴ Ñáyiví iyó vityin, quiñi iyó ñu ta ña chinó ñi ñu chi Nyoo. Cuñí ñu nyehe ñu noo cha iyo. Soco ma cuhve nyehe ñu vatyí cha yahá sañahá Nyoo cha iyó cha sacuví ra chihin ra Jonás —catyí ra Jesús chi ra, ta sandoq ra chi ra, ta cuahan ra.

Tuhun cahán ra fariseo cuví chi tari yuchan iya

(Mr. 8.14-21)

⁵ Cuhva cha cayahá ra cachicá noo chihin ra Jesús inga chiyo miñi cuan, canaa ñi ra cacuiso ra pan. ⁶ Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra saduceo —catyí ra Jesús chi ra.

⁷ Tyicuan ta quichahá candatuhun ra chihin ra tahan ra ta catyí ra:

—Cha cuenda vatyí ñahri pan nyisó yo vachi, yucuan chaha catyí ra tyicuan caa chi yo —catyí ra.

⁸ Ta tuví ñi ra Jesús tuhun candatuhún ra, ta catyí ra chi ra:

—Nyoho, chiin xaan chinó ñi ndo chii. ¿Ñáá tuhun cha catyí ndo vatyí ñahri pan nyisó ndo? ⁹ ¿Atu ta cutuñi ca ñi ndo? ¿Atu ña nicohón ñi ndo quiví sacachi chi ndi ohon mil rayí chihin ohon tahan ri pan? Ta ¿yoso tahan tica sacutu ndo chihin yiquin cuan? ¹⁰ ¿Atu ña nicohón ñi ndo quiví sacachi chi cumi mil ca ra chihin ucha tahan pan? Ta ¿yoso tahan tica sacutu ndo chihin yiquin cuan?

¹¹ ¿Yoso caa cha ña tuví ñi nyoho vatyí ñima tuhun pan cahín, cuhva cha catyí vatyí na saha ndo cuenda chi ndo chihin yuchan iya ra fariseo ta ra saduceo? —catyí ra Jesús chi ra.

¹² Tyicuan ta cacutuñí ñi ra vatyí ñima tuhun yuchan iya pan cuan

cahán ra, soco na casaha ra cuenda chi ra chihin tuhun cha casañahá ra fariseo ta ra saduceo.

Nu catyí cachi ra Pedro vatyí ra Jesús cuví Cristo ra cha quitá nu nyaá Nyoo

(Mr. 8.27-30; Lc. 9.18-21)

¹³ Cuhva cha chaá ra Jesús ityi ñuu Cesarea Filipino, ndacá tuhun ra chi ra cachicá noo chihin ra ta catyí ra:

—¿Ñáá catyí ñáyiví? ¿Yóó ra cuví Rayí cha quichi nya gloria? —catyí ra.

¹⁴ Ta canacahan ra ta catyí ra:

—Yihí ñu catyí ñu tyi ra Juan ra sacondutya chi ñáyiví cuvún. Ta inga ñu catyí ñu tyi ra Elías, ta yihí tucu ñu catyí ñu tyi ra Jeremías, o inga ra cuví profeta Nyoo ta cha naha.

¹⁵ Tyicuan ta catyí ra chi ra:

—Ta cha cuenda chi nyoho, ¿Yóó ra cuví yuhu?

¹⁶ Tyicuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyí ra.

¹⁷ Ta nacahan ra Jesús ta catyí ra:

—Sii xaan cuví chi yoho, Simón sehe ra Jonás, vatyí ni noo rayí ña sañahá ra chuun tuhun ihya, soco maa Suti ra nyaá andiví sañahá chuun. ¹⁸ Ta yuhu catyí chuun tyi yoho cuvún ra Pedro. Ta siqui cava ihya, savahí vehe ñuhi. Ta ma cuví chasaha tuhun chihi chi chi. ¹⁹ Yuhu cuhve ndaha ticu andiví nu nyacá ñaha Nyoo chuun. Ta cha cuhñun ihya siqui ñuhu ñáyiví, cha nuhñi saha maa Nyoo nya andiví. Ta tandihí cha ndachun ihya siqui ñuhu ñáyiví, cha ndachi maa Nyoo nya andiví.

²⁰ Tyicuan ta catyí ra Jesús chi ra cachicá noo chihin ra tyi yori chihin cacahan ra tuhun vatyí ican ra cuví Cristo cha quitá nu nyaá Nyoo.

Nu sacotó ra Jesús tyi cucúvi ra

(Mr. 8.31—9.1; Lc. 9.22-27)

²¹ Nya ndaha quiví cuan quichahá catyí ra Jesús chi ra cachicá noo chihin ra, vatyí cuñí chi cha cuhun ra ñuu Jerusalén. Ta ra cacuví mandoñi,

ta ra cacuví nuu chi tata sutu, ta ra sacuahā ley vehe ñuhu, cucasanyehe xaan ra tindocho chi ra. Ta catyí tucu ra vatyi cucahñi ra chi ra soco nu cu uñi quivi ta cunandoto ra. ²² Tyicuan ta quehen ra Pedro chi ra ta quita sin ra chihin ra ta quichahā catyí ra chi ra Jesús vatyi ña vaha cha cahán ra ta catyí ra:

—Ña cuñi Nyoo ta cuvi chuun tyehe caa, Sutu Mañi yuhu.

²³ Soco nanyocava ra Jesús, ta quichahā catyí ra chi ra Pedro:

—¡Canyaha chuun nui, cuihna! Vatyi cha cahún tyiña caa nducú sanacavon chii. Vatyi ña chicá xiñun cuhva chicá xiñi Nyoo. Soco cuhva chicá xiñi ñayivi chicá xiñun —catyí ra.

²⁴ Tyicuan ta ra Jesús catyi ra chi ra cachicá noo chihin ra:

—Tatu nya nyoho cuñi ndo cunyon ndo chii, cuñi chi sanaa ndo iñi ndo tuhun maa ndo. Ta ma ndu uvi iñi ndo cha nyicón ndo chii, vasi nyehe ndo tindocho cha cuende vatyi yucuan cuví cruzi cha tahán chi cuiso ndo. ²⁵ Vatyi nya nyoho ña cuñi ndo nyehe ndo tindocho cha cuenda yuhu, cucúvi ndo ta cuhun ndo anyaya. Soco nya ndo cuhva ndo ñayivi ndo cha cuende, cucacu aña ndo. ²⁶ Vatyi ñáá ri tuhun cha saha ganaa ndo tandihi cha tyayhi cha iyó siqui ñuhu ñayivi tatu cunaa aña ndo. Vatyi ñahri chihin cutiyahvi ndo ta cacu aña ndo. ²⁷ Vatyi yuhu Rayhi cha quichi nya gloria, cuquichi tiqui soco chihin cha cahnu cuví Suti, ta cuquichi coyo ángel chihin. Tyicuan ta cutiyahvi chi noo noo ndo yoso cuhva sacuvi ndo. ²⁸ Cha ndicha catyí chi ndo, vatyi yihí nyoho cha nyicú ndo ihya cha ma cúvi ñaha ndo nyacua nya nyehe ndo chi yuhu Rayhi cha quichi nya gloria, cunyehe ndo yoso caa vachi cunyaca ñahi chi ndo —catyí ra Jesús.

17

Nu sañahá Nyoo yoso caa ra Jesús

noo cha ndicha nu nyacá ñaha ra
(Mr. 9.2-13; Lc. 9.28-36)

¹ Iñu quivi cha yaha, ta quehen ra Jesús chi ra Pedro ta ra Jacobo, ta ra Juan yañi ra Jacobo. Ta cuahan coyo ra noo yucu sucun xaan chihin ra. ² Ta yucuan nasama cuhva caa ra Jesús nuu ra ndihi chihin ra. Ta xiño vavaha nanduvi nuu ra tari ñanyii. Ta sahma ra cuichin xaan nanduvi tari maa ñuhú cuichin. ³ Tyicuan ta cananyehe ra chi ra Moisés ta ra Elías, candatuhún ra chihin ra. ⁴ Ta quichahā catyí ra Pedro chi ra Jesús:

—Sutu Mañi yuhu, vaha xaan cha nyicú ndi ihya. Tatu cuñun na savaha ndi uñi tahan vehe. Noo chuun, noo chi ra Moisés, ta nonga chi ra Elías —catyí ra Pedro chi ra Jesús.

⁵ Cha ni ri ca cha cahán ra Pedro, quichi ri noo vico cha xiño vavaha siqui ra. Ta sahvi cuan chi ra. Ta chichi vico cuan quita noo ndusu cha catyí chi tyehe caa:

—Ican ra ihya cuví Sehi, ta cuñi xain chi ra. Ta si xaan cuñi chihin ra. Tyasoho ndo tuhun cahán ra —catyí ndusu cuan.

⁶ Cha cachiñi ra cachicá noo chihin ra Jesús tuhun cuan, cachicava ra nya ñuhu, ta cayuhvi xaan ra. ⁷ Tyicuan ta tuhva ra Jesús nu cayucú ra, ta tin ra chi ra, ta catyí ra:

—Ndicuita ndo. Ma yuhvi ndo.

⁸ Ta cuhva cha cananyehe ra, noo tuhun ri ca ra Jesús nanyaá, ta uvi ca ra cuan, yori ca ra.

⁹ Ta cuhva cha vachi noo coyo ra yucu cuan, catyí ra Jesús chi ra:

—Yori chihin cahan ndo tuhun cha nyehe ndo ihya. Cahán ndo tuhun soco nya yaha cúvi ta nandoto yuhu Rayhi cha quichi nya gloria —catyí ra.

¹⁰ Tyicuan ta candaca tuhun ra cachicá noo chihin ra chi ra,

—¿Ñáá tuhun cha catyí ra casacuahá ley vehe ñuhu vatyi xihna ca ra Elías tahán chi quichi?

¹¹ Ta nacahan ra Jesús ta catyí ra:

—Cha ndicha vatyi xihna ca ra Elías quichi ta cusanduvaha ra tandihi.

¹² Soco yuhu catyí chi ndo vatyi cha

yaha quichi ra Elías, soco ña nichon nuu ñáyivi chi ra, ta casacuvi ñu chihin ra tandihi cuhva cuñi maa ñu. Ta tyicuan caa tucu yuhu Rayii cha quichi nya gloria, cusanyehe ñu tindoho chii —catyí ra.

¹³ Tyicuan ta cacutuñi ñi ra vatyí tuhun ra Juan ra sacondutya cahán ra Jesús.

Nu sanduvaha ra Jesús chi noo ra tyivaa cha yihí noo tatyí ña vaha chi (Mr. 9.14-29; Lc. 9.37-43)

¹⁴ Cuhva cha cachaa coyo ra nu nyicú ñáyivi, tuhva noo ra ta chicuiñi chiti ra nuu ra Jesús, ta catyí ra chi ra:

¹⁵ —Tata, cundahvi cuñi nyehun chi sehi, vatyí yihí noo cuehe chihi tañi chi ra, ta cuaha xaan tindoho nyehé ra chihin cuehe cuan. Ta cuaha xaan chaha nduva ra nu ñuhu ta cayu ra, ta nduva ra nu ndutya ñandihí. ¹⁶ Ta quichi nyaque chi ra chi ra cachicá noo chuhun, soco ña cuvi sanduvaha ra chi ra —catyí ra.

¹⁷ Ta nacahan ra Jesús ta catyí ra:

—¡Nyoho, ñu ña chinó ñi cuví ndo! ¡Ta nicaa ni quiñi iyó ndo! ¿Yoso tahan ca quivi cunyai chihin ndo ta cunyei tisihi ndo nyacua nya cutuhva ndo ta chino ñi ndo chii? Nyaca ndo chi ra tyivaa chiña tyehe —catyí ra.

¹⁸ Tyicuan ta tava ñehe ra Jesús chi tatyí ña vaha cuan, ta quitá cuan chi ra tyivaa cuan. Ta caa cuhva ri cuan ta nduvaha ra.

¹⁹ Cha yaha cuan ta ndaca tuhun sin ra chicá noo chihin ra Jesús chi ra ta catyí ra:

—¿Ñáá tuhun cha ña cuvi tava nyuhu chi tatyí ña vaha cuan?

²⁰ Ta ra Jesús nacahan ra ta catyí ra:

—Cha cuenda cha chiin xaan chinó ñi ndo chii. Cha ndicha catyí chi ndo vatyí tyehe ta chinó ñi ndo chii, tari cuhva cha cahnu noo chiti mostaza, cuví catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuvi sacuvi ndo tatu ndicha cha chinó ñi ndo chii. ²¹ Soco tahan tatyí ña vaha cuan, quita chi

chihin cha ma cachi yo ta cacan tahvi yo —catyí ra Jesús chi ra.

Inga tucu chaha cahán ra Jesús tuhun yoso caa cucahñi ñáyivi chi ra (Mr. 9.30-32; Lc. 9.43-45)

²² Cha ni ri ca cha in ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayii cha quichi nya gloria, cucuhva cuenda ñu chii chichi ndaha ra xaan ñi chii. Ta cucahñi ra chii. ²³ Soco nu cu uñi quivi ta cunandote —catyí ra.

Ta canducuihya xaan ñi ra cachicá noo chihin ra cha cachiñi ra tuhun cuan.

Nu catyiyahví ra cuenda vehe ñuhu cahnu

²⁴ Cuhva cha chaá ra Jesús ta ra cachicá noo chihin ra ñuu Capernaum, ra catavá xuhun cuenda vehe ñuhu cuan, chahan coyo ra chinyehe ra nu nyaá ra Pedro ta candaca tuhun ra chi ra:

—¿Atu ña tyiyahví ra sacuaha chi nyoho xuhun cha tahán chi cuenda vehe ñuhu cahnu? —cacatyí ra chi ra Pedro.

²⁵ Ta nacahan ra Pedro ta catyí ra:

—Tyiyahví ra.

Cuhva cha quihvi ra Pedro chichi vehe nu ca iyó ra, xihna ca ra Jesús nacahan ra ta catyí ra:

—¿Yoso caa catyí tucu yoho vityin Simón? Ra cuví tyiño siqui ñuhu ñáyivi ihya, ¿yóó chi caquehen ra yahvi? ¿Atu chi ñu ñuu maa ra o chi ñu inga ñuu?

²⁶ Nacahan ra Pedro ta catyí ra:

—Chi ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahán chi tyiyahvi ñu. ²⁷ Soco tacuhva vatyí ma cuhva yo tisihi chi ni noo ra, cuahan miñi cuan, ta tyihun anzuelo, ta tiyaca cha tavon cha xihna ri, chichi yuhu ti cunañihun noo xuhun. Ta ñihi tyiyahvun cha cuende ta cha cuenda maun. Quehun ta cutyiyahvun —catyí ra Jesús chi ra Pedro.

18

Nu sañahá ra Jesús yóo ra cha cahnu ca cucuvi nu nyacá ñaha Nyoo (Mr. 9.33-37; Lc. 9.46-48)

¹ Quiví cuan catuhva ra cachicá noo chihin ra Jesús chi ra, ta candaca tuhun ra chi ra:

—¿Nya ndi cahnu ca cuví nu nyacá ñaha Nyoo?

² Tyicuan ta ra Jesús cana ra chi noo ra cuehe luhlu, ta chinanya ra chi cue mahñu ra. ³ Ta catyí ra:

—Cha ndicha catyí chi ndo, vatyí tatu nyoho ta ma nasama ndo cuhva iyó ndo, ta tatu ma cuví ndo tari ra cutayaa, ma cuví quihví ndo nu nyacá ñaha Nyoo. Vatyí ra cuatyaa chahá ndotyín cunyaca ñaha sutu ndotyín chi ndotyín, ta tyicuan caa cuhva ndo chi ndo cunyaca ñaha Nyoo chi ndo.

⁴ Ta tyicuan caa ra cahnu ca cuví nuu Nyoo, ican cuví ñu ña cahnu sahá chi, ta cuví ñu tari ra cuehe luhlu ihya.

⁵ Ta ñáyívi cha natín cuenda chihin sívi chi noo ra ña cahnu sahá chi, tari ra cuehe luhlu ihya, chi yuhu natín cuenda ñu.

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha

(Mt. 5.29-30; Mr. 9.42-48; Lc. 17.1-2)

⁶ 'Tatu yóo ñu sanacavá nu cuatyí chi noo ra nachinó iñi chii ta cuví ra tari minoo ra luhlu, vaha taxin ca, cuhñi ñu noo yuu vee sucun ñu ta tuchi ñu chi ñu nu cono tyañuhu.

⁷ ¡Ñana cha ña vaha cha cuenda ñáyívi iyó siqui ñuhu ñayívi, vatyí iyó tuhun cha sacoo ñu cuatyí tahan ñu! Ta tyicuan ri coo tuhun cuan, soco ñdahví ñu ndahví cha sanacava nu cuatyí chi inga ñu!

⁸ 'Yucuan chaha tatu ndahun o tatu chahun sanacava chuun nu cuatyí, vaha taxin ca cahnya ta sacuiton cañi. Vatyí vaha ca quihvun nu coun chihin Nyoo chihin cha luu ndahun o luu chahun, ta ñima ca cha nanñun ta tuchi Nyoo chuun nu cayú ñuhu cha ma ndahva ca maa. ⁹ Ta tatu noo chiti nuun sanacavá chuun nu

cuatyí, vaha taxin ca tava ta sacuiton cañi. Vatyí vaha ca quihvun nu coun chihin Nyoo chihin noo chiti nuun, ta ñima ca chihin cha ninduvi chiti nuun ta tuchi Nyoo chuun nu cayú ñuhu chichi anyaya.

Nu sañahá ra Jesús tyi tari noo mbee cha cuanaa, tyicuan caa cuví yo (Lc. 15.3-7)

¹⁰ 'Ma tava xiin ndo chi ni noo ra cha cuví tari noo ra luhlu, vatyí catyí chi ndo tyi ángel cha sahá cuenda chi ra, tyicuan ri sacuví ra tyiño nuu Suti, ra nyaá andívi. ¹¹ Vatyí yuhu Rayíi cha quichí nya gloria, vachi sacaqui chi ñáyívi cha cuanaa chihin cuatyí ñu.

¹² ¿Yoso caa catyí nyoho? Tatu noo ra cumí ra noo cientu mbee, ta cuanaa noo ti, ¿atu ma sandoo ra ndi cumi xico chahun cumi tahan ca ti cuan yucu cuan, ta cuhun ra cunanducu ra chi quití cha cuanaa cuan? Yuhu catyí tyi sandoo ra ta cuhun ra. ¹³ Ta tatu nañihi ra chi ti, cha ndicha vatyí cusí ca cuñí ra chihin quití cuan, ta ñima ca chihin cumi xico chahun cumi ca quití cha ña chinaa cuan. ¹⁴ Ta tyicuan caa tucu, Sutu ndo ra nyaá andívi ña cuñí ra cha cunaa ni noo ñu cuví tari noo ra luhlu.

Yoso caa tahán chi saha yo ticahnu iñi chi tahan yo (Lc. 17.3)

¹⁵ 'Tatu ra yañun ta sacuví ra cha ña vaha chuhun, cahan chihin noo tuhun ri maa ra ta catyun chi ra tyi ña vaha cuhva sacuví ra. Ta tatu quichaha ra tuhun cañun, cha saha ganaun chi ra cuví cuan. ¹⁶ Soco tatu ña quichahá ra chuun, tyicuan ta canon chi uvi o uñi ra, tacuhva tandíhi cha chahun cucuvi ra testigu. ¹⁷ Tatu ña quichaha ra ni chi ra cha chahan coyo chuhun cuan, tyicuan ta cahan chihin ra chihin nuu ñáyívi nyicú vehe ñuhu. Ta tatu ña quichaha ra chi ñu vehe ñuhu, tyicuan ta cuví saha ndo tuhun tyi tari noo ra ña chinó iñi chi Nyoo cuví ra, o tari ra catavá xuhun cuenda gobiernu ñuu Roma.

18 'Cha ndicha catyí chi ndo, vatyí tandihí cha cuhñi ndo ihya siqui ñuhu ñayiví, ta cha nuhñi saha maa Nyoo nya andiví. Ta tandihí cha ndachi ndo ihya siqui ñuhu ñayiví, cha ndachi maa Nyoo nya andiví.

19 'Ta suri catyí tiqui chi ndo, vatyí tatu uvi nyoho ihya siqui ñuhu ñayiví, ndu ñin ri ndo ta cacan tahvi ndo cuenda ñáá noo cha cuñí ndo cacan ndo, Suti, ra nyaá andiví cuhva ra chi ndo. 20 Vatyí nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

21 Tyicuan ta chahan ra Pedro chin-daca tuhun ra chi ra Jesús ta catyí ra:

—Sutu Mañi yuhu, tatu ra tahn ta sacuvi ra ñáá noo cha ña vaha chihin, ¿yoso tahan chaha tahn chi sahi ticahnu iñi chi ra? ¿Atu ucha tahan chaha?

22 Ta nacahan ra Jesús ta catyí ra:

—Catyí chuun vatyí ñima ucha tahan ri chaha, soco tandihí ri chaha.

Nu cahán ra Jesús noo cuhva cuenda noo ra cha ña cuñi saha ticahnu iñi

23 'Yucuan chaha cha nyacá ñaha Nyoo añima ñáyiví cuví chi tari noo rey cha nacana chi tandihí musu vatyí cuanyehe ra yoso yosó yíca ñu chi ra. 24 Ta cuhva cha quichaha natava ra cuenda, ta quichí nyaca ñu chi noo musu cha cuaha millón pesu yosó yíca chi ra. 25 Ta musu cuan ñahri maa chihin tyiyahvi ra chi chitoho ra, ta chitoho ra catyí ra: “Cuaxico ndo chi ra ñin cuenda ri chihin ñasihí ra, ta chihin sehe ra ta tandihí cha iyó chi ra tacuhva vatyí chihin xuhun cuan cunatyiyahvi ra cha yosó yíca ra chii.” 26 Tyicuan ta musu cuan chicuiñi chiti ra nuu chitoho ra, ta chacu ndahvi ra nuu ra, ta catyí ra: “Tata, cuatu noo chiin chii, ta tyiyahvi mai tandihí chuun”, catyí ra. 27 Ta cundahvi cuñi chitoho ra chi ra, ta saha ra ticahnu iñi chi ra, ta sanaa ra tandihí cha yoso yíca ra, ta saña ra chi ra. 28 Soco cuhva cha quitá musu cuan, nañihí ra chi noo ra tahan ra cha cuví musu tari maa ra. Ta ra cuan yosó yíca ra chiin

ri chi ra. Ta tñin ra chi ra cuan, ta quichaha quitu ra sucun ra, ta catyí ra chi ra: “Tyiyahvi cha yosó yicon chii.” 29 Tyicuan ta chicuiñi chiti ra cuan nuu ra, ta chacu ndahvi ra nuu ra ta catyí ra: “Cuatu noo chiin chii, ta tyiyahvi mai tandihí chuun”, catyí ra. 30 Soco maa ra ña cuñi ra, ta chahan ra ta tyihí ra chi ra vehé caa nyacua nya cha tyiyahvi ra cha yosó yíca ra chi ra. 31 Cha canyehe inga ca musu cha sacuvi ra, uhvi xaan cacuví chi ra, ta chahan coyo ra chinacatyí ra chi chitoho ra cha sacuvi ra cuan. 32 Tyicuan ta chitoho ra cuan tachi ra tyiño na quichi ra ta catyí ra chi ra: “Musu ña vaha cuvún. Yuhu sahi ticahnu iñi tandihí cha yosó yicon chii, vatyí chacu ndahvun nui. 33 Tyicuan caa tucu cuñi chi cundahvi cuñun chi ra tahun cuan tari cundahvi cuñi nyehi chuun”, catyí ra chi ra. 34 Ta cuxaan xaan chitoho ra, ta tachi ra tyiño na tachi tuñi ñu chi ra, nyacua nya cha tyiyahvi ra tandihí cha yosó yíca ra.

35 Ta nu ndihí cahan ra Jesús, ta catyí ra tyehe caa:

—Tyicuan caa tucu cusacuvi Suti, ra nyaá andiví, chihin ndo tatu ma saha ndo ticahnu iñi chihin cha tandihí añima ndo chi tahan ndo.

19

Nu sañahá ra Jesús tyi ña vaha sandoo ñáyiví chi ñasihí ñu o yñi ñu (Mr. 10.1-12; Lc. 16.18)

1 Cha yaha cha catyí ra Jesús tuhun ihya, ta quitá ra Galilea cuan, ta cuahan ra ityi Judea cha nyaá inga chiyo yuvi cahnu Jordán, ityi nu caña ñanyii.

2 Cuaha ñáyiví chinyicon chi ra, ta yucuan sanduvaha ra chi ñu cuhvi.

3 Tyicuan ta suhva ra fariseo catuhva ra chi ra Jesús, vatyí cacuñí ra nducu ra cuhva tyaa ra cuatyí siqui ra. Ta candaca tuhun ra chi ra ta catyí ra:

—¿Atu vaha cha sandoo rayñi chi ñasihí ra cha cuenda ñáá ri tisihi luhlu chaha ña chi ra?

4 Ta nacahan ra ta catyí ra:

—¿Atu ta sacuha ca nyoho nu tutu Nyoo nu catyí chi vatyí ra cha savaha

chi ndo nya quivi xihna ri, savaha ra rayi ta ñaha sihi? ⁵ Ta catyí tucu chi tyehe caa: “Tahán chi sandoo rayi chi sutu ra ta chi sihi ra, ta ndu in ri ra chihin ñasihi ra. Ta chichi cha ninduvi ñu, cucuvi ñu tari cha noo ri ñáyivi.” ⁶ Yucuan chaha, ñima ca uvi tahan cuví ñu, soco cha nanduvi ñu noo ri ñáyivi. Yucuan chaha, cha sandu in ri Nyoo ña tahan chi cha sasiin ñáyivi —catyí ra.

⁷ Tyicuan ta candaca tuhun ra chi ra Jesús ta cacatyí ra:

—¿Ñáá tuhun cha tyaa ra Moisés vatyí cuví cahnya noo rayi tutu chihin ñasihi ra ta sandoo ra chi ña?

⁸ Ta ra Jesús catyí ra chi ra:

—Cha cuenda cha ndavá ñima ndo, yucuan chaha, chaha ra Moisés cha sandoo ra ñasihi ra. Soco quivi xihna ri ñima tyicuan caa cuvi. ⁹ Yuhu catyí chi ndo tyehe caa: Ra cha sandoo ñasihi, ta ñima cha cuenda cha natuvi ña chihin inga ra, ta tandaha ra chihin inga ñu, chicoo cuatyí ra nuu Nyoo. Ta ra cha tandaha chihin noo ñaha sihi cha sandoo yi chi, suri chicoo tucu cuatyí ra cuan —catyí ra.

¹⁰ Tyicuan ta ra cachicá noo chihin ra, cacatyí ra chi ra:

—Tatu tyicuan caa tahan chi coo rayi chihin ñasihi ra, vaha taxin ca ma tandaha yo.

¹¹ Ta ra Jesús catyí ra chi ra:

—Soco ña tandihi ñáyivi cuví cutuñi iñi ñu tuhun ihya. Soco ñu cha chaha Nyoo cha cutuñi iñi, ican ñu cua cutuñi iñi. ¹² Cha ña tandaha ñáyivi, cuaha ri cuenda cuví. Yihí ñu ña quichi cuví iñi ñu tandaha ñu vatyí in caa maa ñu cacu ñu. Ta inga ñu ña quichi cuví iñi ñu tandaha ñu vatyí cha yaha tava ñáyivi ñi ñu. Ta yihí ñu ña tandaha ñu cha cuenda cha cuñi ñu sacuvi ñu tyiño nuu Nyoo, na nducuaha ñima cha nyacá ñaha Nyoo. Tandihi ñu cuví sacuvi tyehe caa, na sacuvi ñu —catyí ra Jesús.

Nu nasocó ra Jesús chi ra cuatyaa (Mr. 10.13-16; Lc. 18.15-17)

¹³ Tyicuan ta quichi nyaca ñu suhva ra cuatyaa chi ra Jesús tacuhva na

tyiso ra ndaha ra siqui ndotyin, ta cacan tahvi ra chaha ndotyin. Soco ra cachicá noo chihin ra quichaha cacahan ra chi ñu quichi nyaca chi ndotyin. ¹⁴ Soco ra Jesús catyí ra:

—Saña ndo chi ra cuatyaa, na quichi maa ndotyin nu nyaí. Ta ma casi ndo. Vatyí ñu nyacá ñaha Nyoo ñima, cuví ñu tari ra cuatyaa ihya —catyí ra.

¹⁵ Tyicuan ta tyiso ra ndaha ra siqui ndotyin. Yaha cuan ta cuahan ra.

Nu cahán noo ra tyivaa tyayí chihin ra Jesús

(Mr. 10.17-31; Lc. 18.18-30)

¹⁶ Noo ra tyivaa chahan ra chindaca tuhun ra chi ra Jesús ta catyí ra:

—Maestro vaha xaun. ¿Ñáá cha vaha tahan chi sacuvi ta ñihi ñáyivi cha ma naa ca maa coi?

¹⁷ Ta ra Jesús catyí ra chi ra:

—¿Ñáá tuhun cha catyun tyi vaha yuhu? Noo ri ra vaha iyó ta ican ra cuan cuví Nyoo. [Ta cha catyun tyi vahi, nacotón tyi Nyoo cuvi.] Soco tatu cuñún quihvun ñáyivi cha ma naa ca maa, sacuvun tandihi tuhun cha tachí Nyoo tyi sacuvi yo —catyí ra chi ra.

¹⁸ Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chi ra:

—Ma cahñun chi ñáyivi. Ma coo inga ñusihi chuun. Ma suhun cha chii ñáyivi. Ma cahun cuendu siqui ñu.

¹⁹ Saha ñáyivi chi sutun ta chi sihun. Ta cuñun chi ñáyivi, tari cha cuñún chi maun.

²⁰ Ta ra tyivaa cuan, catyí ra chi ra:

—Tandihi tuhun ihya ta quichahí nyata luhli ta nya vityin. ¿Ñáá ca cha cumañi chii?

²¹ Ta ra Jesús catyí ra chi ra:

—Tatu cuñún cuvun noo ra cuiñi nuu Nyoo, cuahan ta xicon cha iyó chuun, ta cuhvon chi ñu ndahvi, ta cunyicon chii. Tyicuan ta coo cha tyayí chuun nya gloria —catyí ra.

²² Soco cuhva cha chiñi ra tyivaa cuan cha cahan ra Jesús tyehe caa, cuihya xaan cuanuhu ra vatyí tyayí xaan ra.

²³ Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí y#i xaan cuhva ra tyay#i cha cunyaca ñaha Nyoo añima ra. ²⁴ Catyí chi ndo inga chaha, vatyí numi ca yaha noo camellu xiyu noo yiqui ticu, ta ñima ca noo ra tyay#i ta cuhva ra chi ra cha cunyaca ñaha Nyoo —catyí ra Jesús.

²⁵ Cha cachiñi ra cachicá noo chihin ra tuhun ihya, iyo xaan cacuñi ra, ta quichahā candaca tuhun ra chi ra tahan ra, ta cacatyí ra:

—Tu tyicuan caa, ¿yóo cha cuví cacu vii?

²⁶ Tyicuan ta nanyehe ra Jesús nu nyicú ra ta catyí ra:

—Ñáyivi ma cuví sacuvi ñu tyehe caa, soco Nyoo cuví sacuvi ra tandihi.

²⁷ Tyicuan ta quichahā catyí ra Pedro chi ra:

—Sutu Mañi yuhu, nyuhu tandihi maa cha iyó chi ndi sandoo ndi ta nyicón ndi chuun. ¿Ñáa cha cuñihi ndi? —catyí ra chi ra.

²⁸ Ta nacahan ra Jesús ta catyí ra:

—Cha ndicha catyí chi ndo, vatyí quivi cha cunduchaa tandihi, yucuan quivi yuhu Ray#i cha quichi nya gloria cucunyai ta cunyaca ñahi, ta nyoho cha nyicón ndo chii, cunyaa tucu nyoho nu uchi uvi tahan tyayu tyaqui. Ta cunyaca ñaha ndo chi ndi uchi uvi tahan ityi ñáyivi Israel. ²⁹ Ta tandihi ndo cha sandoo ndo vehe ndo, o yañi ndo, o cuhva ndo, o sutu ndo, o sihi ndo, o ñasihí ndo o sehe ndo, o ñuhú ndo cha catyí yuhu, cunañihi ndo noo cientu ca chaha siqui cuan, ta cunañihi tucu ndo ñáyivi cha ma naa ca maa coo ndo. ³⁰ Cuaha xaan ñu cuahan ityi nuu vityin, ican ñu cuan, cuhun nya nu ndihi. Ta cuaha xaan ñu cuahan nu ndihi vityin, ican ñu cuhun ñu ityi nuu.

20

Nu sañahá ra Jesús noo cuhva cuenda ra casahá tyiño

¹ 'Cha nyacá ñaha Nyoo añima ñáyivi, cuví chi tari noo chitoho chacu yoho tichaha ndivi. Ta chitoho

chacu cuan ñaha cui ri quita ra cuanducu ra cuaha ri musu cusaha tyiño nu tyiño saha ra. ² Ta sandaā ra tyiño chihin musu cuan vatyí cutiyahvi ra yahvi cha tahán chi chi ra cha noo quivi, ta tachi ra chi ra cusaha tyiño ra nu iyó tyiño sahá ra.

³ Yahā cuan ta quita tucu ra cuhva cha caa #n cha ñaha ri. Ta nanyehe ra chi suhva ca ra canyicú ri maa nuyahvi cuan. ⁴ Ta catyí ra chi ra: “Cuahan tucu nyoho cua saha tyiño ndo nu iyó tyiño sahí, ta tyiyahvi mai yahvi cha tahán chi chi ndo.” Tyicuan ta cuahan coyo tucu ra cuan.

⁵ Tyicuan ta chitoho chacu cuan quita tucu ra inga chaha cuhva cha ora. Yucuan ta quita tucu ra cuhva cha caa uñi cha cha iñi. ⁶ Ta yahā cuan ta quita tucu ra cuhva cha caa ohon cha cha iñi ta nanyehe ra canyicú ri maa suhva ca ra nuyahvi cuan.

Ta catyí ra chi ra: “¿Ñáa tuhun cha canyicú ri maa nyoho ndiyaca ihya, ta ña sahá tyiño ndo?” ⁷ Ta canacahan ra cuan ta catyí ra: “Yori maa cahan chihin ndi cha cusaha tyiño ndi.” Tyicuan ta catyí ra chi ra: “Cuahan tucu nyoho cua saha tyiño ndo nu iyó tyiño sahí. Ta tyiyahvi mai chi ndo yoso cuhva cha tahán chi chi ndo”,

catyí ra. ⁸ Ta cuhva cha cuaa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihvi nu ndihi, ta nu ndihi ta tyiyahvun chi ra cha caquihvi cha xihna ri”, catyí ra. ⁹ Tyicuan ta chaā coyo ra cha caquihvi cuhva cha caa ohon cha cha iñi cuan. Ta tahan tahan ra quehen ra yahvi nani noo quivi. ¹⁰ Yahā cuan, ta cuhva cha tahán chi chi ra cha caquihvi coyo cha xihna ri cuan, cacuñi maa ra vatyí cuaha ca cutiyahvi ra chi ra. Soco suri #n ri yahvi noo quivi caquehen ra. ¹¹ Ta cuhva cha caquehen ra, quichahā cacahan ra chi chitoho tyiño cuan.

¹² Ta catyí ra: “Ra cha cachaa coyo nu ndihi ihya, noo tuhun hora casahā tyiño ra. Ta #n ri cuhva tyiyahvun chi

ra chihin nyuhu cha saha tyiño ndi nu cahñi ndiyaca”, cacatyí ra. ¹³ Soco nacahan chitoho tyiño cuan, ta catyí ra chi noo ra cuan: “Amigo, ñahri cha ña vaha sacuví chuhun. ¿Atu ñima yahvi cha noo quívi catyí vatyí tyiyahvi chuun? ¹⁴ Quehen yahvun, ta cuanuhu. ¿Atu ñahri ityi iyó chii cha tyiyahvi chi ra cha quihvi nu ndihi ñin ri cuhva cha tyiyahvi chi yoho? ¹⁵ ¿Atu ñahri ityi iyó chii cha sacuvi cha cuñí mai chihin xuhin? ¿Atu quiñi cuñún tyi vaha ñáyivi cuví chihin inga ra cuan?” catyí ra. ¹⁶ Ta tyicuan caa ñu quihvi nu ndihi, cuhun ñu ityi nuu. Ta ñu cuahan ityi nuu, nya nu ndihi cuhun ñu. Vatyí cuaha xaan ñu nacaná Nyoo chi. Soco chiin xaan ri ñu nacachí ra.

Inga chaha sacotó ra Jesús yoso caa cucahñi ñáyivi chi ra

(Mr. 10.32-34; Lc. 18.31-34)

¹⁷ Cuhva cha cuñí cuhun ra Jesús nya Jerusalén, cana sijn ra chi ndi uchi uvi ra cachicá noo chihin ra ta catyí ra chi ra:

¹⁸ —Ta cha nyehe maa ndo vatyí cuahan yo Jerusalén vityin. Ta yucuan cucuhva cuenda ñu chi yuhu Rayi cha quichi nya gloria chi ra cacuví nuu chi tata sutu, ta chi ra casacuaha ley vehe ñuhu, ta cucatyí ra tyi tahán chi cúvi. ¹⁹ Ta cucuhva cuenda ra chii chi ra ñuu Roma, ta cucuacu nyaa ra chii, ta cucahñi ra chii, ta cucahñi ra chii nu cruzi. Soco nu cu uñi quívi cunandote —catyí ra Jesús chi ra.

Nu chicán sihi ra Jacobo ta ra Juan noo tumañi iñi chi ra Jesús

(Mr. 10.35-45)

²⁰ Tyicuan ta sihi ra Jacobo ta ra Juan sehe ra Zebedeo tuhva ña nu nyaá ra Jesús chihin ninduvi sehe ña. Ta chicuiñi chiti ña nuu ra vatyí cacan ña noo tumañi iñi chi ra. ²¹ Ta quichaha ndaca tuhun ra Jesús chi ña:

—¿Ñáá cha cuñún?

Ta catyí ña:

—Quívi cha cunyaun nu nyacá ñahun nya andivi, cuhva cha cunyaa ninduvi sehi xiun. Na cunyaa noo

ra chiyo vahun, ta inga ra cunyaa ra chiyo satyun.

²² Soco nacahan ra Jesús ta catyí ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cunyehe yuhu? ¿Atu cuví cuhun ndo tuhun chihí tari cuhva cuhun yuhu? —catyí ra.

Ta canacahan ra ta catyí ra:

—Cuví chi ndi.

²³ Ta catyí ra Jesús chi ra:

—Cha ndicha vatyí cunyehe ndo tindoho, ta cuhun ndo tuhun chihí tari cuhun yuhu tuhun chihí. Soco tuhun cha cunyaa ndo chiyo vahi ta chiyo satyin, ñima yuhu tahán chi cuhve chi ndo, soco maa Suti cucatyí ra yóó cha cuñihi nyatu cuan —catyí ra Jesús chi ra.

²⁴ Ta cha cachiñi uchi ca ra cachicá noo chihin ra Jesús tuhun cuan cacuxaan ra chihin ninduvi ra cuan. ²⁵ Soco cana ra Jesús chi ra ta catyí ra chi ra:

—Cha chitó maa ndo, vatyí ra nyacá ñaha chi ñáyivi iyó siqui ñuhu ñáyivi ihya, ñihi xaan nyacá ñaha ra chi ñu tari nyaca ñaha ra musu ra.

²⁶ Soco ñima tyicuan caa tahán chi sacuvi nyoho. Vatyí ra cha cuñí cucahnu ca nu Nyoo, cuñí chi cuví ra musu tandihí ca ndo. ²⁷ Ta nya nyoho cha cuñí ndo cuví ndo nuu, cuñí chi cuví ndo musu tandihí ca ñu. ²⁸ Tari yuhu Rayi cha quichi nya gloria, ña vachi vatyí sacuvi ndo tyiño nui, soco vachi sacuvi tyiño nuu ndo, ta cuhve ñáyivi. Vatyí chihin cuan ta cuvi sacaqui cuaha ñáyivi.

Nu sanduvahá ra Jesús chi uvi ra cuaa

(Mr. 10.46-52; Lc. 18.35-43)

²⁹ Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús. ³⁰ Ta yuhu ityi cuan canyicú uvi tahan ra cuaa. Ta cuhva cha cachiñi ra vatyí cua yaha ra Jesús, quichaha canachaa ra. Ta catyí ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi! —cacatyí ra.

³¹ Ta ñáyiví quichaha cahan ñu chi ra na cacasi ra yuhu ra. Soco maa ra ñihi ca cacana chaa ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi!

³² Tyicuan ta chicuñi ra Jesús ta cana ra chi ñinduvi tahan ra cuaa cuan, ta ndaca tuhun ra chi ra:

—¿Ñáa cha cuñi ndo cha sacuvi chihin ndo?

³³ Ta canacahan ra ta catyí ra:

—Sutu Mañi yuhu, cuñi ndi nyehe ndi.

³⁴ Tyicuan ta cundahvi cuñi ra Jesús nyehe ra chi ra, ta tñn ra chiti nuu ra. Ta caa cuhva ri cuan cananyehē ra, ta cananyicon ra chi ra Jesús.

21

Nu quihvi ra Jesús Jerusalén

(Mr. 11.1-11; Lc. 19.28-40; Jn. 12.12-19)

¹ Cuhva cha cua chaa coyo ra ñuu Jerusalén, ta cachaa ra ñuu Betfagé, yatyin ri nu cuví yucu yutun Olivo. Tyicuan ta tachi ra Jesús tyiño chi uvi ra chicá noo chihin ra. ² Ta catyí ra chi ra:

—Cuahan ndo ñuu cha nyaá ityi nuu ihya. Ta yucuan cunañihi ndo noo burru sihi, nuhñi ti. Ta nyacá ti noo burru luhlu. Ndachi ndo chi ti, ta quichi nyaca ndo chi ti chii. ³ Ta tatu yóo cha catyí ñáa cha catyí chi ndo, catyi ndo chi ñu: “Vatyí chihuhú ti chi maa ra nyacá ñaha, soco numi ri quichi nanyaca ndi chi ti”, catyi ndo chi ñu —catyí ra.

⁴ Tyehe caa cuví tacuhva na chino cava tuhun cha catyí ra profeta nu tyaa ra tyehe caa:

⁵ Catyi ndo chi ñu ñuu Sión:

“Nyehe ndo, vachi rey maa ndo nu nyaá ndo.

Ndahvi ri vachi ra yosó ra noo burru luhlu, sehe noo quití cha tuhvá nyisó carga”, catyí ra profeta.

⁶ Tyicuan ta cuahan coyo ra cachicá noo chihin ra, ta casacuvi ra tari cuhva catyi ra Jesús chi ra. ⁷ Caquichi

nyaca ra chi ti chihin sihi ti. Ta catyiso ra sahma ra siqui ti, ta ndaa ra Jesús chi ti. ⁸ Ta cuaha xaan ñáyiví candica ñu sahma ñu ityi nu cuahan ra, ta inga ñu catohon ñu numa yutun ta cachacun ñu ityi. ⁹ Ta ñáyiví cha cuahan ityi nuu ta ityi chata, quichaha cana chaa ñu ta catyí ñu:

—¡Cahnu xaan cuví ra vachi tata rey David! ¡Cahnu xaan cuví ra vachi cuenda Sutu yo Nyoo! ¡Ta sacahnú xaan yo chi Nyoo nu nyaá ra ityi andivi! —catyí ñu.

¹⁰ Cuhva cha chaa ra Jesús ñuu Jerusalén cuan, tandihi maa ñáyiví ñuu naquiqui, ta cuaha xaan ñu candacá tuhun ñu chi tahan ñu, ta catyí ñu:

—¿Yóo ra cuví ra ihya?

¹¹ Ta ñáyiví catyí ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuví Galilea cuví ra —catyí ñu.

Nu tava ñehe ra Jesús chi ra caxicó chichi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹² Yaha cuan ta quihvi ra Jesús chichi vehe ñuhu cahnu Nyoo. Ta tava ñehe ra chi tandihi ra casatá ta ra caxicó yucuan. Ta sanduva ra mesa ra canasamá xuhun chi ñáyiví yucuan. Ta sanduva ra tyayu ra caxicó paloma. ¹³ Ta catyí ra:

—Nu tutu Nyoo catyí chi tyehe caa: “Vehi, vehe nu chicán tahvi ñáyiví chii cuví, ta tyicuan caa cucunañi chi. Soco nyoho cha nasaha ndo vehe nu nyicú ra suhu” —catyí ra.

¹⁴ Chichi vehe ñuhu cuan catuhva suhva ra cuaa ta ra coxo chi ra Jesús. Ta maa ra sanduvaha ra chi ra.

¹⁵ Soco canyehē ra cacuví nuu chi tata sutu ta ra casacuahá ley vehe ñuhu cuan vatyí savaha ra Jesús milagru, ta canachaa ra cuatyaa chichi vehe ñuhu, ta catyí ndotyin:

—¡Cahnu xaan cuví ra vachi tata rey David! —catyí ndotyin.

Tyicuan ta cacuxaan tata sutu ta inga ra cuan cha canyehē ra ta cha

cachiñi ra. ¹⁶ Ta cacatyí ra chi ra Jesús tyehe caa:

—¿Atu chiñún cha cahán ndotyín?

Ta nacahan ra Jesús ta catyí ra:

—Chiñí. Soco ¿atu ta sacuaaha cando nu tutu Nyoo nu catyí chi tyehe caa?

Sutu Mañi yuhu, sacuvun vatyí ra cuatyaa nyihi cata ndotyín.

Ta ra cuatyaa lee cha chaxín sacahnú ndotyín chuun, catyí chi,

—catyí ra Jesús.

¹⁷ Tyicuan ta sandoo ra chi ra, ta quita ra ñuu cuan ta cuahan ra ñuu Betania. Ta yucuan ndoo ra cha cuaa cuan.

Nu tyanahá ra Jesús chi tu higo vatyí ñahri higo iñi nuu tun

(Mr. 11.12-14, 20-26)

¹⁸ Tuvi inga quivi. Ta cha ñaha ri, cua ndichi ra Jesús nya Jerusalén, ta chaá soco chi ra. ¹⁹ Ta nanyehe ra noo tu higo yatyín ri yuhu ityi cuan. Ta tuhva ra nu nanyaá tun, soco ñahri maa nañihi ra nuu tun. Maa maa ri maa numa ri iñi nuu tun. Tyicuan ta catyí ra chi tun tyehe caa:

—¡Ni nonga chaha ma cuhva con chiti!

Ta caa cuhva ri cuan ta na ityi tun.

²⁰ Ta cha nyehe ra cachicá noo chihin ra cha sacuvi ra, iyo cacuñi ra, ta ndaca tuhun ra chi ra ta catyí ra:

—¿Ñáá tuhun cha numi xaan na ityi tu higo cuan?

²¹ Ta nacahan ra Jesús ta catyí ra:

—Cha ndicha catyí chi ndo, vatyí tatu chinó iñi ndo ta ma nacaca uvi iñi ndo, ñima ihya ri cha sacuvi chi tu higo ihya cuví sacuvi ndo, soco cuví catyí ndo chi yucu ihya tyehe caa: “Canyaha chuun ihya ta cuahan nya chichi tyañuhu.” Ta tyicuan caa cucuvi. ²² Ta tandihi cha cacán ndo nu chicán tahvi ndo, tatu chinó iñi ndo tyi cucuhva Nyoo, cuñihi ndo —catyí ra Jesús.

Nu sañahá chi yóó ra chaha tyiño chi ra Jesús

(Mr. 11.27-33; Lc. 20.1-8)

²³ Yaha cuan ta quihvi ra Jesús chichi vehe ñuhu cahnu, ta cha ni ri

ca cha sañahá ra yucuan, tuhva ra cacuvi nuu chi tata sutu chi ra, ta ra cacuvi mandoñi ñu ñuu Israel, ta candaca tuhun ra chi ra:

—¿Yóó cha tyaa tyiño vatyí sacuvun tyehe caa, ta yóó cha chaha tyiño cuan chuun?

²⁴⁻²⁵ Ta nacahan ra Jesús ta catyí ra:

—Yuhu tucu cua ndaca tuhun noo tuhun chi ndo. ¿Yóó cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, cucatyí tucu yuhu chi ndo yóó cha tyaa tyiño ihya chii —catyí ra Jesús chi ra.

Tyicuan ta quichaha cacuvi yuhu ra chihin ra tahan ra, ta cacatyí ra:

—Tatu catyí yo tyi Nyoo tachí chi ra, cucatyí ra chi yo: “Tu tyicuan caa, ¿ñáá tuhun ña chinó iñi ndo chi ra?” ²⁶ Ta tatu catyí yo tyi ñáyivi, ñáyivi cuví nacanda ñu siqui yo, vatyí tandihi ñu chinó iñi ñu tyi ra Juan, cuenda Nyoo cahan ra —catyí ra chi ra tahan ra.

²⁷ Tyicuan ta quichaha cacatyí ra chi ra Jesús tyehe caa:

—Ña chitó ndi.

Tyicuan ta ra Jesús catyí ra chi ra:

—Ni yuhu, ta ma catyí chi ndo yóó cha tyaa tyiño ihya chii.

Nu cahán ra Jesús noo cuhva cuenda uvi tahan sehe noo ra

²⁸ Ra Jesús catyí ra chi ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chi noo sehe ra: “Cuahan cua saha tyiño nu iyó tyiño sahí.” ²⁹ Ta nacahan sehe ra ta catyí ra: “¡Ma cuhin!” Soco yaha cuan ta nasama cuhva chicá xiñi ra ta chahan ra chisaha tyiño ra. ³⁰ Yaha cuan ta sutu ra chahan ra nu nyaá inga sehe ra. Ta catyí tucu ra chi ra na cuhun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahan ra. ³¹ Chichi cha ninduvi tahan ra, ¿nya ra sacuvi ra cha catyí sutu ra? —catyí ra Jesús.

Ta nacahan ra ta cacatyí ra:

—Ra cha caḥan ra chihin cha xihna ri.

Ta catyí ra Jesús chi ra:

—Cha ndicha catyí chi ndo, vatyí xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho. ³² Vatyí ra Juan ra sacondutya quichi ra, quichi sañaha ra chi ndo yoso caa tahán chi coo ndo, soco nyoho ña chino iñi ndo chi ra, soco ra catavá xuhun ta ñu cata iñi cachino iñi ñu chi ra. Ta nyoho vasi nyehe ndo ihya, soco ña nasama ndo cuhva iyó ndo, tacuhva chino iñi ndo chi ra.

Nu catyí ra Jesús vatyí ra cacahñi chi ra cuví ra tari ra sahá tyiño ña vaha (Mr. 12.1-12; Lc. 20.9-19)

³³ Tyasoho ndo inga cuhva ihya: Chiyó noo chitoho noo ñuhú, ta tachi ra yoho tichaha ndivi, ta tyihí ra noo chacu. Ta savaha ra noo nu cuhñi ra tichaha ndivi cuan ta tava ra ndutya chi. Ta savaha tucu ra noo vehe sucun tacuhva vatyí cuvi saha ra cuenda tandihí.

Yaha cuan ta chaha noo ra ñuhú cuan chi suhva ra casahá tyiño, ta cuahan ra inga ñuu. ³⁴ Ta cha cha quivi cha iyó tichaha ndivi cuan, tachi ra chi suhva musu, na cucacan ra chi ra casahá tyiño cuan, na cuhva ra suhva tichaha ndivi cha tahán chi chi ra. ³⁵ Soco ra casaha tyiño cuan, catiñ ra chi musu cuan, ta cacahñi ra chi noo ra. Ta chi inga ra cachahñi ra, ta catuchí ra yuu chi inga ra. ³⁶ Tyicuan ta cha inga chaha, cuaha ca musu tachi chitoho chacu cuan ta ñima ca cha xihna ri. Soco tari casacuví ra chi ra cha xihna ri, sacuví tucu ra chi ra ihya.

³⁷ Nu ndihí tachi ra chi maa maa sehe ra, vatyí cuñi maa ra vatyí cusaha ra ñáyivi chi sehe ra. ³⁸ Soco cuhva cha cananyehe ra casahá tyiño cuan chi sehe ra, catyí ra chi ra tahan ra tyehe caa: “Ican ra ihya cundoo chihin tandihí ihya. Na cahñi yo chi ra tacuhva ndoo maa yo chihin”, cacatyí ra. ³⁹ Tyicuan ta catiñ ra chi ra, ta catava ra chi ra ityi chata chacu, ta cachahñi ra chi ra —catyí ra Jesús.

⁴⁰ Tyicuan ta ndaca tuhun ra Jesús chi ñu:

—Quivi quichi chitoho ñuhú cuan, ¿ñáá cha cusacuvi ra chihin ra casahá tyiño quiñi iyó cuan?

⁴¹ Ta nacahan ra ta cacatyí ra:

—Ma cuatu ra, soco cahñi ra chi ra caquiñi iyó cuan. Ta cuhva ra ñuhú cuan chi inga ra casahá tyiño. Ta quivi coo tichaha ndivi, cunacuhva cuenda ra chi chitoho chacu cuan cha tahán chi chi ra.

⁴² Tyicuan ta quichaha catyí ra Jesús chi ñu:

—¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cuñi ra casavahá vehe cotyiño ra,

ican cuan cuví yuu cha ñiñi ca.

Ican ihya cuví cha sacuví Sutu yo Nyoo.

Ta tyaqui xaan tuhun cuan cha cuenda chi yo, catyí chi.

⁴³ Yucuan chaha catyí chi ndo vatyí ma cuhva ca Nyoo cuhun ndo nu nyacá ñaha ra, ta cucuhva ra chi ñu cha ndicha nyacá ñaha ra ñima. Vatyí maa ñu cunacuhva cuenda ñu cha vaha cha tahán chi chi ra. ⁴⁴ Ta cha cuenda yuu cuan, yóo ñu cha nduva siqui chi, yiquin maa cucuvi ñu. Ta tatu yuu cuan ta canacava siqui yóo ñu, cutaxin nyihi maa ñu —catyí ra Jesús.

⁴⁵ Cuhva cha catuví iñi ra cacuví nuu chi tata sutu cuan ta ra fariseo vatyí cuenda ra caḥan ra Jesús cuhva ihya, ⁴⁶ cacuñi ra catiñ ra chi ra, soco cayuhvi ra chi ñáyivi vatyí ñáyivi, chitó ñu vatyí ra Jesús cuenda Nyoo cahán ra.

22

Nu chahá ra Jesús noo cuhva cuenda vico tandaha (Lc. 14.15-24)

¹ Quichaha cahan tucu ra Jesús chihin ñu inga chaha chihin cuhva, ta catyí ra:

² —Cha nyacá ñaha Nyoo ñima ñáyivi cuví chi tari noo rey cha savaha noo vico cha cuenda cha cua tandaha sehe ra. ³ Ta tachi ra chi

musu ra na cuhun ra cucana ra chi ñu cha nacatyí tuhun ra, soco ñu cuan, ña cacuñí ñu quichi coyo ñu. ⁴Tachí ra inga chaha chí inga musu, ta catyí ra chí ra tyehe caa: “Çatyí ndo chí ñu cha nacatyí tuhin, vatyí cha yaha chahñí sindiquí sane, ta inga quíti cha xahan ñandihí, ta cha nyaá vaha nyayu, ta tandihí cha nyatú tuhva. Na quichi ñu vico tandaha”, catyí ra. ⁵Soco ñu nacatyí tuhun ra, ña caquichaha ñu chí ra. Noo ñu chahan coyo ñu nu iyó chacu ñu, inga ñu chahan ñu nu tyiño sahá ñu. ⁶Ta inga ñu tñin ñu chí musu rey cuan ta cañí vavaha ñu chí ra nyacua chahñí ñu chí ra. ⁷Tyicuan ta rey cuan cuxaan vavaha ra, ta tachí ra chí sindaro ra, cucahñí ra chí ra cachahñí cuan, ta cahmí ra ñuu ra. ⁸Tyicuan ta quichaha catyí ra chí musu ra: “Tandihí ta cha iyó vaha cha cuenda vico tandaha, soco ñu nacatyí tuhin cuan, ña tahán chí cha quichi coyo ñu. ⁹Cuahan ndo tandihí calle ta nacatyí tuhun ndo chí tandihí ri ñu cha nañihi ndo na quichi coyo ñu vico tandaha”, catyí rey cuan. ¹⁰Musu cuan cuahan coyo ra tandihí calle, ta casandu ñin ri ra chí tandihí ñu canañihí ra: ñu quiñi iyó, ta ñu vaha. Ta tyicuan caa chitu chichi vehe ra chihin ñáyivi.

¹¹ Tyicuan ta quihví rey cuan cua nyehe ra chí ñáyivi cha canacatyí tuhun musu cuan. Ta nanyehe ra chí noo ra ñohó yucuan, soco ñahri sahma vico tandaha ñihnó ra. ¹²Ta catyí rey chí ra: “Amigo, ¿yoso caa cha quihvun ihya ta ñahri sahma vico tandaha ñihnón?” Soco ra cuan ña na cahan maa ra. ¹³Tyicuan ta catyí rey cuan chí ra catyihí mesa cuan: “Cuhñi ndo chaha ra ta ndaha ra, ta tuchi ndo chí ra nu ñaa iñi ityi chata vehe, ta yucuan cucuacu ra, ta cusacahñi ra noho ra”, catyí ra. ¹⁴Vatyí cuaha xaan ñu nacana Nyoo chii, soco chiin xaan ñu nacachí ra —catyí ra Jesús.

Nu candacá tuhun ra cuenda xuhun cha tavá gobiernu
(Mr. 12.13-17; Lc. 20.20-26)

¹⁵ Tyicuan ta catyihí tahan ra fariseo tuhun chihin tahan ra vatyí cusacahan ra chí ra Jesús noo cuhva cha ña tahán chí, vatyí tyicuan caa ta coo cuatyí catyaa ra siqui ra. ¹⁶Ta tachí ra chí suhva ra cuenda ra, ñin ri chihin suhva ra cuenda ra Herodes. Ta cacatyí ra chí ra Jesús tyehe caa:

—Maestro, chitó ndi vatyí cha ndicha cahún. Ta chihin cha ndicha sañahún ityi Nyoo. Ta ña quichahún cha cahán ñáyivi, vatyí ña tñin cuendon cuhva caá ri ñu. ¹⁷Çatyí chí ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chí yo, o ma tyiyahvi yo?

¹⁸ Soco tuví iñi ra Jesús vatyí ña vaha cuhva cachicá xiñi ra, ta catyí ra chí ra:

—Nyoho sahá ndo tyi vaha ndo, soco ña ndicha ndo. ¿Ñáá tuhun cha nducu nyehe ndo chii? ¹⁹Sañaha ndo xuhun cha tuhva ndo tyiyahvi ndo chí gobiernu —catyí ra.

Ta caquichí nyaca ra noo xuhun cha nañí denariu chí ra. ²⁰Ta cuhva cha nanyehe ra Jesús, ta quichaha ndaca tuhun ra chí ra:

—¿Yóó chí nuu ta yóó chí sivi nyaá ihya?

²¹ Ta nacahan ra ta cacatyí ra:

—Chí ra nyacá ñaha.

Tyicuan ta catyí ra Jesús chí ra:

—Cuhva ndo chí ra nyaca ñaha cha tahán chí chí ra, ta cuhva tucu ndo chí Nyoo cha tahán chí chí Nyoo —catyí ra.

²² Cuhva cha cachiñi ra cha cahan ra Jesús, iyo xaan cacuñi ra. Ta cuahan coyo ra.

Nu canducú tuhun ra saduceo siqui tuhun cha nandotó ndiyi

(Mr. 12.18-27; Lc. 20.27-40)

²³ Suri quivi cuan suhva ra saduceo chahan coyo ra nu nyaá ra Jesús. Ta ra saduceo cuan ña cachino iñi ra cha cunandoto ndiyi quivi cu naa ñáyivi. Yucuan chaha candaca tuhun ra chí ra Jesús, ta catyí ra:

²⁴ —Maestro, ra Moisés catyí ra vatyí tatu noo ra tandaha ta chíhi ra ta ña chiyo sehe ra, tahán chí cha

tandaha yañi ra chihin ñaha chih̄i ȳi cuan. Tyicuan ta coo sehe ra chihin ña cha cuenda yañi ra cha chih̄i. ²⁵ Vaha. Vityin tyehe caa cuv̄i chi noo ra chiyo ucha tahan ra chihin yañi ra. Ra cha xihna ri tandaha ra. Yaha cuan ta chih̄i ra. Soco vatȳi ña chiyo sehe ra, ndoo ñasih̄i ra chi yañi cu uvi ra. ²⁶ Ta suri tyicuan caa cuv̄i chi yañi ra ra cu uvi. Ta yaha cuan, ta ra cu uñi quehen ra chi ña, ta suri chih̄i tucu ra. Ta tyicuan caa cuv̄i chi ndi ucha ra. ²⁷ Ta cha yaha cuan nu ndih̄i tuhun chih̄i ndih̄i maa ña cuan. ²⁸ Ta cha tyicuan caa, quiv̄i cunandoto ñu, chichi cha ucha ra chihin yañi ra, ¿nya ra cucuvi ñasih̄i chi ñaha cuan? ¿Vatȳi tandih̄i ra tandaha ra chihin ña? —ca-catȳi ra.

²⁹ Nacahan ra Jesús ta catȳi ra:

—Nyoho, cahán tondo ri maa ndo, cha cuenda vatȳi ña chitó ndo cha nyaá nu tutu Nyoo, ni tunyee iñi Nyoo, ta ña chitó ndo. ³⁰ Vatȳi quiv̄i cunandoto ndiȳi, ni ma tandaha ñu, ta ni ma cuhva ñu sehe ñu tandaha, vatȳi tari ángel Nyoo ra nyaá andiv̄i cucuvi ñu. ³¹ Soco tuhun cha nandotó ñu ndiȳi, ¿atu ta sacuahá ca ndo tuhun cha catȳi maa Nyoo chi ndo? Catȳi ra tyehe caa:

³² “Yuhu cuv̄i Nyoo cuenda ra Abraham, ta ra Isaac ta ra Jacob.”

Ihya nyehé yo vatȳi canyito añima ra cuan, vasi cha naha chih̄i ra vatȳi Nyoo ñima Nyoo cuenda ñu ndiȳi cuv̄i ra, soco Nyoo cuenda ñu nyitó cuv̄i ra —catȳi ra.

³³ Iyo cuñi ñáyiv̄i cha chiñi ñu tuhun sañahá ra Jesús.

Ley cha ñiñi ca cha chaha Nyoo
(Mr. 12.28-34)

³⁴ Cha cachito ra fariseo vatȳi ra Jesús chasi ra yuhu ra saduceo, candu ñin ri ra. ³⁵ Ta noo ra cha cuv̄i ra sacuahá ley vehe ñuhu, cuñi ra nducu nyehe ra chi ra Jesús. Ta quichaha ndaca tuhun ra chi ra, ta catȳi ra:

³⁶ —Maestro, ¿nya mandamiento cha nyaa nu ley cuv̄i cha ñiñi ca?

³⁷ Ta catȳi ra Jesús chi ra:

—“Cuñun chi Sutu Mañi yo Nyoo chihin cha ñi iñun ta chihin cha tandih̄i añimon, ta chihin cha tandih̄i cha chiñi tuñi xiñun.” ³⁸ Ican ihya mandamiento cha ñiñi ca, ta cha xihna ri ñandih̄i. ³⁹ Ta cha cu uvi cha yatyin ri tyicuan caa, ta catȳi chi: “Cuñun chi ñáyiv̄i tahun tari cuñun chi maun.” ⁴⁰ Ican uvi tahan mandamiento ihya cuv̄i cha nyisó chi ley cha chaha Nyoo chi ra Moisés ta tandih̄i tuhun cha casañaha ra profeta Nyoo ta cha naha.

Ra Cristo quich̄i ra tata ra David, ta suri cuv̄i ra Sehe Nyoo

(Mr. 12.35-37; Lc. 20.41-44)

⁴¹ Cha ñi ri ca cha canyicú ñin ri ca ra fariseo, ⁴² ra Jesús ndaca tuhun ra chi ra, ta catȳi ra:

—¿Yoso caa chicá xiñi nyoho cuenda ra cuv̄i Cristo? ¿Yóo chi tata vachi ra cuñi maa ndo?

Ta canacahan ra ta catȳi ra:

—Tata ra David cuv̄i chi ra.

⁴³ Tyicuan ta ra Jesús catȳi ra chi ra:

—¿Ta yoso caa cha vatȳi ra David cuan, maa Tatȳi li Nyoo chotyñ̄o chi ra? ta catȳi ra vatȳi ra cuv̄i Cristo, ra nyacá ñaha chi ra cuv̄i ra, vatȳi catȳi ra tyehe caa:

⁴⁴ Cahan Suti Nyoo chihin Suti ra Cristo, ta catȳi ra chi ra:

“Cunyaa chiyo vahi nyacua nya quiv̄i cuhve chi ra xaan iñi chuun vatȳi cuaca chahun siqui ra” tyaa ra David.

⁴⁵ ¿Yoso caa cha ra vachi tata ra David cuv̄i chi ra Cristo, tatu suri maa ra David catȳi ra vatȳi ra Cristo Sutu ra cuv̄i chi ra? —catȳi ra Jesús.

⁴⁶ Ta yori maa cuv̄i nacahan ni noo tuhun. Ta nya ndaha quiv̄i cuan, yori ca maa caña iñi candaca tuhun ñáa ca cha candaca tuhun chi ra.

23

Nu cahán ra Jesús chi ra sacuahá ley vehe ñuhu ta ra fariseo

(Mr. 12.38-40; Lc. 11.37-54; 20.45-47)

¹ Tyicuan ta ra Jesús catȳi ra chi ñáyiv̄i, ta chi ra cachicá noo chihin ra tyehe caa:

2 —Ra sacuahá ley ta ra fariseo nyicú ra tyiño cha sañahá ra ley cha tyaá ra Moisés. 3 Ta cha tyicuan caa, quichaha ndo cha cahán ra ta sacuvi ndo tandihí cha cacatyí ra chi ndo. Soco ma quehen ndo cuhva iyó ra, vatyí maa ra, siin cha sañaha ra, ta siin cha sacuví ra. 4 Vatyí yori ndoyo carga cha tyaá ra siqui ñáyivi. Ta saniñi ra chi ñu na cuiño ñu, ta maa ra ni chiin nundaha ra ña nañi chata carga cuan. 5 Tandihí cha casacuví ra, cha cuñi ra na nyehe ñáyivi. Vatyí tahán iñi ra catyaa ra tuhun Nyoo tyaan ra ta soco ra chihin letra nahnu. Ta tahán iñi ra cacuihno ra sahma chihin adorno nañi. 6 Ta nu vaha ca, cuñi ra cunyicu ra vico, ta cachi ra. Ta nu vaha ca cuñi ra cunyicu ra chichi vehe ñuhu. 7 Ta nu chicá noo ra cacuñi ra vatyí cuhva ñáyivi nocumi chi ra chihin cha sahá xaan ñu ñáyivi chi ra. Ta cuñi tucu ra cha catyí ñu chi ra vatyí chito xaan ra. 8 Soco nyoho, ma cuhva ndo ityi cha catyí ñáyivi vatyí chitó xaan ndo. Vatyí tandihí nyoho, yañi ndo cuví. Ta noo ri ra chitó iyó, ta ican ra cuví Cristo. 9 Ta ma catyí ndo Sutu ndo chi ninoo ra ñuhu ñáyivi ihya, vatyí iyó noo Sutu ndo, ta nyaá ra andivi. 10 Ta ma catyí ndo vatyí ra cuví nuu cuví ndo, vatyí noo ri maa ra Cristo cuví nuu. 11 Ra cha sacuví tyiño nuu tandihí ca ra, ican ra cuan cuví ra cahnu ca nu nyicú ndo. 12 Vatyí ra cahnu sahá chii, cunocuee ra. Ta ra ña cahnu sahá chii cucucahnu ra.

13 'iNdahvi nyoho ra sacuahá ley vehe ñuhu, ta ra fariseo! 'iNdahvi nyoho cha sahá ndo tyi vaha ndo! Vatyí chasí ndo yuvehe nu nyacá ñaha Nyoo, tacuhva ma cuví quihvi ñáyivi. Ta ni ri maa ndo ña quihví ndo ta ni ña chahá ndo cha quihvi ñáyivi, ñu cuñi quihvi.

14 'iNdahvi nyoho ra sacuahá ley ta ra fariseo, nyoho cha sahá ndo tyi vahá ndo! Vatyí tinyaá ndo vehe ñu chihí yí, tyi ña cuví tyiyahvi ñu ñaá xuhun tavá ndo siqui ñu. Ta yahá cuan, ta naha chicán tahvi ndo

nu tuvi vatyí sahá ndo tyi vaha ndo. Ta cuenda cha sacuví ndo tyehe caa, cahnu ca tindoho cunyehe ndo.

15 'Ndahvi nyoho ra sacuahá ley vehe ñuhu, ta ra fariseo. ¡Sahá ndo tyi vaha ndo, soco ña ndicha ndo! Vatyí nducú xaan ndo cuhva na cunyicon ñáyivi chi ndo. Ta tatu cha nandihvi ñu cuenda ndo, quiñi caa nicoo ñu saha ndo, ta ñima ca maa ndo. Ta cha tyicuan caa nyacuví ndo, ñihi ca sacuhún ndo chi ñu anyaya cha nuu maa ndo.

16 'iNdahvi nyoho ra ndahvi! Vatyí cuñi ndo saquehen ityi ndo chi ñáyivi, ¡soco cuaa ndo! Vatyí catyí ndo tatu noo ñu catyí ñu cha cusacuvi ñu noo cha cusacuvi ñu, ta tyanaha ñu chihin sivi vehe ñuhu, yucuan ña niñi cha sacuvi ñu. Soco tatu xuhun cuaan cha iyó vehe ñuhu cuan tyanaha ñu, yucuan ndicha, niñi cuñi chi cha sacuvi ñu, catyí ndo. 17 ¡Tondo xaan ndo ta cuaa ndo! ¿Nya cha niñi ca? ¿Atu niñi ca xuhun cuaan cuan, o vehe ñuhu cha sacu ii chi xuhun cuaan cuan? 18 Ta suri catyí tucu ndo: “Tatu yihí ñu catyí ñu cha cusacuvi ñu cha cusacuvi ñu, ta tyanaha ñu cuenda arta cha yoso cha chahá cuenda ñu chi Nyoo, ña niñi cha sacuvi ñu. Soco tatu tyanaha ñu cuenda ofrenda cha yosó siqui arta cuan, yucuan ndicha niñi cuñi chi sacuvi ñu, catyí ndo.” 19 ¡Tondo xaan ndo ta cuaa ndo! ¿Nya cha niñi ca? ¿Atu niñi ca ofrenda o arta cuan cha sacu ii chi ofrenda cuan? 20 Vatyí ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihí cha yosó nuu ñandihí. 21 Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyí iyó ra yucuan. 22 Ta tyicuan caa tucu ñu tyanahá cuenda andivi, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

23 'iNdahvi nyoho ra sacuahá ley vehe ñuhu ta ra fariseo! sahá ndo

tyi vaha ndo vatyi chahá ndo diesmo chi Nyoo cha cuví menta, ta añii, ta comino. Soco ña quichahá ndo tuhun cha ñiñi ca cha nyaá nu ley cha tahán chi sacuvi yo. Ta cuñun, cha sacuvi yo cha vaha chihin tandihí ñáyivi, cha cundahvi cuñi yo chi ñu, cha chinó iñi yo chi Nyoo ta ma sandoo yo chi ra. Ican ihya cuñi chi sacuvi ndo, ta ma sandihí ndo cha cuhva ndo diesmo cuan ñandihí. ²⁴ Nyoho cuñi ndo casaquehen ityi ndo chi ñáyivi, soco cuaa ndo. Vatyi sacuita ndo noo tiyucun luhlu, soco coco ndo noo camellu. Cuatyi luhlu ri nyehe ndo ta ña sahá ndo cuenda cuatyi cahnu cuví cuan.

²⁵ ¡Ndahvi nyoho ra sacuahá ley vehe ñuhu ta ra fariseo, ra casaha tyi vaha! Vatyi ityi chata ri vasu ta ityi chata ri coho sanduvií ndo, soco ityi chichi ña sanduvií ndo. Vatyi chichi añima ndo tyitu ñohó cha quiñi caa. Chicá xiñi ndo cha ñihi ndo nu cusuhu ndo, ta ña cuví chasaha ndo cha quiñi caa cha quichi cuvi xaan iñi ndo. ²⁶ ¡Ra fariseo cuaa cuví ndo! Sanduvii xihna ndo ityi chichi vasu ta coho, tyicuan ta cuvii tucu ityi chata.

²⁷ ¡Ndahvi nyoho ra sacuahá ley vehe ñuhu ta ra fariseo, ra casavaha chii! Vatyi cuví ndo tari noo ñaña ndiyi cha nacahyu, vatyi ityi chata chi tyaqui xaan, soco ityi chichi tyitu ñohó yiqui ndiyi, ta tandihí nuu cha quiñi caa. ²⁸ Tyicuan caa cuví nyoho. Vatyi ityi chata tari maa tyi vaha xaan ndo nuu ñáyivi, soco ityi chichi, tyitú ñohó cha cuendu ndo, ta cha quiñi caa.

²⁹ ¡Ndahvi nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyó ta cha naha. Ta nyoho nacahyu ndo ñaña ñáyivi vaha ñu chiyo ta cha naha. ³⁰ Ta yucuan ta catyí ndo! “Tyehe ta chiyó ndi quivi chiyo ñáyivi chahnu ndi, ma tyinyee ndi chi ra chahñi chi ra profeta Nyoo”, catyí ndo. ³¹ ¡Ma chihin yucuan ri! Suri maa ndo nacotó ndo vatyi vachi ndo tata ñu cachahñi chi profeta

Nyoo. ³² ¡Vaha vityin, chaha chi cuhva savaha ndihí ndo cha quiñi caa cha quichaha savaha sutu chahnu ndo!

³³ ¡Nyoho ñu quiñi iyó, ñu vachi tata coo! ¿Yoso caa cucacu nyoho tacuhva ma cuhun ndo anyaya? Ma cuvi. ³⁴ Yucuan chaha cutachi chi ra profeta Nyoo nu nyicú ndo, cutachi tiqui chi ra chiñi tuñi, ta ra sacuahá nu nyicú ndo. Soco nyoho cucahñi ndo chi ra ta cutyaa ndo chi suhva ra nu cruzi. Ta chi inga ra cucañi ndo chi ra chichi vehe ñuhu. Ta cacanyicon ndo chi ra tahan tahan ñuu. ³⁵ Yucuan chaha, siqui ndo cucunyaa cuatyi cha cuenda cha cachihí tandihí ra vaha cha cachahñi ñu nyacua nya ra Abel ta nyacua nya ra Zacarías sehe ra Berequías ra cha chahñi ndo chichi vehe ñuhu yatyin nu nyaá arta cha yosó cha chahá cuenda yo chi Nyoo. ³⁶ Cha ndicha catyí chi ndo, vatyi tandihí cuatyi ihya cucoso siqui ñáyivi cha iyó vityin —catyí ra Jesús chi ra.

Nu nducuihya iñi ra Jesús nyehe ra chi ñuu Jerusalén ta chacu ra
(Lc. 13.34-35)

³⁷ ¡Jerusalén, Jerusalén! ¡Ndahvi nyoho ñu iyó ñuu chiña! Vatyi chahñi ndo chi ra profeta Nyoo. Ta tuchi ndo yuu chi tandihí ra cha saquichi Nyoo nu nyicú ndo. Cuaha xaan chaha cuñi saha cuende chi ndo, tari noo ndivi cha sahá cuenda ti chi sehe ti, ta naquehén ndahvi ti chi ti chichi ndichin ti, soco ña cuñi ndo. ³⁸ Nyehe ndo vityin, vatyi cha sandoo ndahvi chi ndo. ³⁹ Vatyi catyí chi ndo, vatyi ma nyehe ca ndo chii nyacua nya chaa chi quivi cucatyi ndo tyehe caa: “Cahnu xaan ra cuví ra vachi chihin tunyee iñi sivi Sutu yo Nyoo”, cucatyi ndo —catyí ra Jesús.

24

Nu catyí ra Jesús vatyi cutani vehe ñuhu cahnu
(Mr. 13.1-2; Lc. 21.5-6)

¹ Quita ra Jesús chichi vehe ñuhu cahnu cuan, ta cha cuñi cuhun ra, ta catuhva ra cachicá noo chihin ra chi

ra, ta quichaha casañaha ra vehe ñuhu cuan chi ra. ² Soco nacahan ra Jesús ta catyí ra:

—¿Atu nyehé ndo tandihi ihya? Chandraicha catyí chi ndo, vatyi ihya ni noo yuu ta ma ndoo coso nyitahan. Tandihí ta cutani —catyí ra.

Nu catyí ra Jesús ñáá ndihí seña cucuvi cha ni cumañi ca naa ñayivi

(Mr. 13.3-23; Lc. 21.7-24; 17.22-24)

³ Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichí coyo ra ta catyí xehe ra chi ra tyehe caa:

—Cuñí ndi cha catyun chi ndi, ama cucuvi tuhun cuan. ¿Ñáá seña cucuvi cha cuquichun inga chaha ta cha cunaa ñayivi?

⁴ Tyicuan ta nacahan ra Jesús:

—Saha ndo cuenda chi ndo coto yóo cha sandahvi ñaha chi ndo.

⁵ Vatyi cuaha xaan ra cuquichi, ta cotyiño ra sivi, ta cucatyí ra tyehe caa: “Yuhu cuví Cristo ra cha saquichi Nyoo.” Ta cuaha ñu cusandavi ñaha ra. ⁶ Nyoho cuñihi ndo tuhun tyi iyó cuatyí ta cañí tahan ñáyivi ityi cuan ityi ihya. Soco ma nayuhvi ndo, vatyi tyicuan caa tahan maa chi cuví. Soco ta chaa ca quivi cunaa ñayivi. ⁷ Vatyi ñáyivi noo ñuu cahnu, cucañi tahan ñu chihin ñáyivi inga ñuu cahnu. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi. ⁸ Tandihí ihya ta nu cua quichaha ñáyivi nyehe ñu tindoho cuví.

⁹ Tyicuan ta cucuhva cuenda ñu chi nyoho vatyi sanyehe ra tindoho chi ndo. Ta cacahñi ra chi ndo. Ta tandihí ñu iyó siqui ñuhu ñayivi cutasi cuñi nyehe ñu chi ndo cha cuenda yuhu. ¹⁰ Quivi cuan cuaha xaan ñu cusandihí ñu cha chino iñi ñu chii, ta cutasi cuñi ñu nyehe ñu chi tahan ñu. Ta cunaxico tuhun ñu chi tahan ñu. ¹¹ Cuaha xaan ra cuendu cunatuvi, ta cucatyí ra vatyi cuenda Nyoo cacahan ra. Ta cuaha xaan ñáyivi cucasandavi ñaha ra. ¹² Ta cuaha xaan cha quiñi caa cucoo. Yucuan chaha

cuaha xaan ñu cusandihí ñu cha cuñi ñu chi tahan ñu. ¹³ Soco ñu cha ña ndu uvi iñi chino iñi chii nyacua nya nu ndihí, cucacu añima ñu. ¹⁴ Ta cucutya nicahnu ñayivi tuhun vaha cha nyacá ñaha Nyoo añima ndo, tacuhva coto tandihí ñáyivi iyó siqui ñuhu ñayivi, tyicuan ta cunaa ñayivi.

¹⁵ Tandihí nyoho cha sacuahá ndo ihya, na cutuñi iñi ndo tuhun ihya: Ra Daniel, ra profeta Nyoo ta cha naha, tyaa ra tuhun noo cha sacuquiñi caa, noo cha sativi. Ta quivi nyehe ndo vatyi chaa ihya Nu li, ¹⁶ tyicuan ta ñu ñohó Judea, cuñí chi cono ñu ityi yucu. ¹⁷ Ta ñu yosó xiñi vehe, noo ñu, soco ma quihvi ñu chichi vehe ñu tava ñu cha iyó chichi vehe cuan. ¹⁸ Ta ñu ñohó nu chiqui, ni ma cunuhu ca ñu cunaquehen ñu ni sahma ñu. ¹⁹ ¡Ndahvi ñusihí cha cañohó sehe quivi cuan! O tatu iyó sehe ñu cha chaxín, ¡ndahvi ñu cuan! ²⁰ Cacan ndo chi Nyoo tacuhva cha ma tahan chi caca cono ndo quivi vichin, ni quivi nyitatu yo. ²¹ Vatyi cuaha xaan tindoho cucoo quivi cuan, noo tindoho cha ta coo ca maa nyata chingo ñuhu ñayivi, ta ni ma coo ca cha yaha tuhun cuan. ²² Soco tatu Nyoo, ta ma sanducuti ra quivi cuan, yori maa cacu. Soco cusanducuti ra cha cuenda cha cuñí ra chi ñu nacachi maa ra.

²³ Ta tatu yóo cha catyí chi nyoho: “Nyehe ndo, ma ra Cristo ihya” o “Nyehe ndo ma ra nyaá yucuan”, ma chino iñi ndo. ²⁴ Vatyi cuquichi coyo ra casandavi ñaha ta cucatyí ra vatyi ra Cristo cacuví ra. Ta cucatyí ra vatyi ra profeta Nyoo cacuví ra. Ta cusavaha ra seña ta milagru nahnu tacuhva casandavi ñaha ra. Nyacua nya ñu cha nacachi maa Nyoo ta cusandavi ñaha ra tatu cuví chi ra. ²⁵ Saha ndo cuenda vatyi cha yaha catyí chi nyoho cha ni cumañi ca cuví. ²⁶ Yucuan chaha tatu catyí ñu chi ndo tyehe caa: “Nyehe ndo, ma ra Cristo nyaá nu chiqui ndi cuan”, catyí ñu chi ndo, ma cuhun ndo. O tatu catyí ñu chi ndo: “Nyehe ndo, ma ra nyaá chichi quartu ihya”, ma chino iñi ndo.

27 Vatyí tari noo cha quihvi tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuvi quivi quichi yuhu Rayi cha quichi nya gloria. 28 Nu caá coño chihí, yucuan cuchaa coyo chii.

Yoso caa cuquichi ra Cristo inga chaha

(Mr. 13.24-37; Lc. 21.25-33; 17.26-30, 34-36)

29 'Ta cha yahá ri cha nyehé ñu tindoho, ta cunduña ñanyii, ta yoo ma sacundichin ca chi. Ta tiñoo cucanacoyo ti andivi, ta nyacua nya cha iyó andivi cunacanda. 30 Tyicuan ta cuquetuvi noo seña ityi andivi nu vachi yuhu Rayi cha quichi nya gloria. Cuquichi nu vico ityi andivi chihin tunyee iñi cahnu ta chihin cha cahnu cuví Nyoo. Ta tandihí ñáyivi iyó siqui ñuhu ñayivi, cucuacu chaa xaan ñu cha nanyehe ñu chii. 31 Ta cutachi ángel cuende tacuhva vatyí chihin cha ñihí tiví ra cutu ra ta cusandu in ri ra chi ñu nacachi maa Nyoo chí, cuquita ñu nicacahnu nu ñuhu ñayivi, nyacua nya nu ndihí ñuhu ñayivi ta nyacua nya nu ndihí andivi.

32 'Cutuñi iñi ndo noo cuhva yutun cha nañi higo: Tatu cha yutya soco tun, ta caña ndaha tun, nyoho cha chitó ndo vatyí cha vachi vico savi. 33 Ta suri tyicuan caa, tatu cha nyehé ndo tandihí maa cha cucuvi ihya, coto ndo vatyí cha cuyatyin quichi. Cha nyañaí yuvehe cuví chi cuan. 34 Cha ndicha catyí chi ndo vatyí tandihí tuhun ihya, cucuvi cha ni ri ca cha iyó ñáyivi. 35 Andivi ta ñuhu ñayivi cundihí chi, soco tuhun cahán yuhu, ma ndihí chí. Ta cuchino cava tandihí tuhun cahin chihin ndo ihya.

36 'Soco quivi ta cuhva cha cucuvi cuan, yori chitó, ni ángel andivi ta ña chitó ra. Ni yuhu Rayi cha quichi nya gloria ta ña chité. Noo tuhun ri maa Nyoo Suti chitó ra.

37 'Tari cuví quivi chiyo ra Noé, tyicuan caa cucuvi quivi quichi tucu yuhu Rayi cha quichi nya gloria.

38 Quivi ta ni cumañi ca coon savi xaan, ñáyivi cuan, chachí ñu, ta chihí

ñu, tandahá ñu, ta chahá ñu chi sehe ñu tandaha nyacua nya quivi quihvi ra Noé chichi barcu cuan. 39 Ta sana iñi ñu ta chaa savi ta tyañi tandihí ñu. Ta tyicuan caa cucuvi tucu quivi quichi tucu yuhu Rayi cha quichi nya gloria. 40 Quivi cuan, tu uvi ra ñohó ra nu chiqui. Noo ra cunaquehin, ta noo ra ndoo ra. 41 Tu uvi ñusihi nyicó ñu molinu. Noo ña cunaquehin, ta noo ña ndoo ña. 42 Cuatu tuhva vaha ndo vatyí ña chitó ndo ñáá cuhva cuquichi ra nyacá ñaha chi ndo. 43 Soco coto ndo tuhun ihya vatyí tatu noo chitoho vehe ta chitó ra ñáá cuhva cuquihvi ra suhu chichi vehe ra, cuatu tuhva vaha ra ta ma cuhva ra cha quihvi ra suhu cuan. 44 Yucuan chaha nyoho, cuatu tuhva ndo. Vatyí sana ri iñi ndo, ta cuquichi yuhu Rayi cha quichi nya gloria.

Ñu cha nyatú tuhva na ndichi ra Cristo, ican ñu cuví musu vaha ra

(Lc. 12.41-48)

45 'Noo musu cha tyasohó tuhun cahán chitoho, ta tyicuan ri sacuvi ra tyiño tyaá ra chí ra, yucuan cuví noo musu vaha. Ta sahá cuenda ra vehe chitoho ra. Ta chahá ra cha cachi inga musu cha vahri cuhva. 46 Ta sii xaan chí musu cuan tatu cuhva cha sahá tyiño ra ta nachaa chitoho ra. Vatyí quichahá ra tandihí cha tahán chí sacuvi ra. 47 Ta cha ndicha catyí chí ndo, vatyí chitoho ra cunatyaa ra tandihí cha cumí ra ndaha ra, vatyí vaha quichahá ra chihin tyiño sahá ra. 48 Soco tatu noo musu quiñi iyó ta chicá xiñi ra vatyí naha cuahan chitoho ra, 49 ta quichaha nyacuvi ra cha ña vaha chihin inga musu cuan, ta quichaha chachi ra ta chihí ra ndixi chihin ra chiñi, 50 tyicuan ta sana iñi ra ta ndichi chitoho ra quivi cha ña nyatú ra chí ra. 51 Tyicuan ta chitoho ra ñihí xaan cutachi tuñi ra chí ra chihin ñáyivi quiñi iyó cha savaha chii soco ña ndicha. Tyicuan ta cucuacu ra ta cusacahñi ra noho ra.

25

Nu chahá ra Jesús noo cuhva

cuenda uchi tahan ñu tyivaa

¹Cha nyacá ñaha Nyoo añima ñáyivi cuví chi tari uchi tahan ñu tyivaa cha quehen ñu lámpara cha yihí acetye ta cuahan coyo ñu noo vico tandaha cua quehen cuenda ñu chi ra cha cua tandaha. ²Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu. ³Ñu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyi natyihí ñu chichi lampara ñu tatu ndihi. ⁴Soco ñu cachi ñohó iñi cuan, canyisó sijn ñu yutyi acetye chihin lámpara ñu. ⁵Ta vatyi cucuee ca chaa ra cha cua tandaha cuan, catijn ñumahna chi tandihi ñu, ta caquixí ñu. ⁶Tyicuan ta ñáá cuhva ñuu, ta chiñi ñu noo ndusu cha catyí tyehe caa: “¡Cha vachi ra cha cua tandaha! ¡Quita ndo, quehen cuenda ndo chi ra!” catyí ndusu cuan. ⁷Tandihí ñu tyivaa cuan canducuita coyo ñu ta quichaha casanduvaha ñu lámpara ñu. ⁸Tyicuan ta quichaha catyí ohon ñu tondo ñohó iñi cuan chi inga ohon ñu cuan: “Cuhva ndo suhva acetye ndo chi ndi, vatyi cuñí ndahva lámpara ndi”, catyí ñu. ⁹Soco ñu tyivaa cha cachi ñohó iñi cuan nacahan ñu tyehe caa: “Ma cuhva ndi vatyi coto ma ñihi, ni cha cuenda maa ndi ta ni cha cuenda maa ndo. Cuahan taxi ndo nya nu quiyahví chi, ta sata ndo cha cuenda ndo.” ¹⁰Soco cha ni ri ca cha cuahan coyo ndi ohon ñu cha tondo ñohó iñi cuan, cua sata ñu acetye, ta chaa ra cha cua tandahá cuan. Ta ñu tyivaa cha nyatú tuhva cuan, quihví coyo ñu chihin ra chichi vehe nu cuaco vico tandaha cuan. Ta nicunyasí ri yuvehe. ¹¹Yaha cuan ta cachaa coyo tucu ñu chisatá acetye cuan, ta catyí ñu: “¡Tata! ¡Tata! ¡Nuña yuvehe naquihví ndi!” ¹²Soco maa ra nacahan ra, ta catyí ra: “Cha ndicha vatyi ña ñohó nui chi nyoho.”

¹³Tyicuan ta quichaha catyí ra Jesús:

—Cuatu tuhva ri nyoho, vatyi ña chitó ndo nya quivi ta ñáá cuhva cuquichi yuhu Rayi cha quichi Nya gloria.

Noo cuhva cuenda xuhun (Lc. 19.11-27)

¹⁴Cha nyacá ñaha Nyoo añima ñáyivi cuví chi tari noo ra cha cha nyaá cha cua quita cuhun inga ñuu. Ta cana ra chi musu ra, ta chaha cuenda ra xuhun chi ra.

¹⁵Chi noo ra chaha ra ta cha ohon mil xuhun, ta chi inga ra chaha ra ta cha uvi mil, ta chi inga ra tari noo mil. Chaha ra chi noo noo ra yoso cuhva cha cuví saha tyiño ra chihin. Tyicuan ta cuahan ra. ¹⁶Musu cha quehen cuenda ohon mil xuhun cuan, saha ra lucha chihin xuhun cuan, ta saha ganaa ra nonga ohon ca mil chihin xuhun cuan. ¹⁷Ta suri tyicuan caa tucu ra cha quehen cuenda uvi mil cuan, saha ganaa ra uvi ca mil chihin xuhun cuan. ¹⁸Soco ra cha quehen cuenda noo ri mil cuan, chahan ra ta chatya ra noo yavi chichi ñuhú ta tixehe ra xuhun chitoho ra.

¹⁹Cuaha quivi yaha ta nachaa chitoho musu cuan. Ta quichaha natava ra cuenda chihin noo noo ra. ²⁰Xihna ca ra cha quehen cuenda ohon mil xuhun cuan chaa, ta nacuhva cuenda ra ohon ca mil siqui cuan, ta catyí ra: “Tata, ohon mil chahun chii, ma inga ohon mil ihya cha saha ganai.” ²¹Ta chitoho ra catyí ra chi ra: “Vaha. Noo musu vaha xaan cuvún. Ta sacuvun tandihí cha catyí. Ta vasi chiin ri xuhun chahi chuun soco vaha xaan chotyion chi chi. Vityin cuaha ca cucuhva cuende chuun. Quihví nu vaha ihya, ta cusii cuñun chihin.”

²²Yaha cuan ta chaa tucu musu cha quehen cuenda uvi mil xuhun cuan, ta catyí ra: “Tata, uvi mil chahun chii, ma uvi ca mil ihya cha saha ganai siqui.” ²³Ta catyí chitoho ra chi ra: “Vaha. Noo musu vaha xaan cuvún, ta sacuvun cha catyí. Vasi chiin ri xuhun chahi chuun soco vaha xaan chotyion chi chi. Vityin cuaha ca cucuhva cuende chuun. Quihví nu vaha ihya, ta cusii cuñun chihin”, catyí ra. ²⁴Soco cuhva cha chaa musu cha quehen cuenda noo mil ri xuhun cuan, catyí ra chi chitoho ra: “Tata,

yuhu chité vatyí cuvún noo ra xaan ta cuñún naquehún xuhun noo nu ña sahá tyiñon, ta cuñun naquehun cosecha noo nu ña tachun. ²⁵ Yucuan chaha nayuhví ta चाहिन ta tyihí xehi xuhun chichi ñuhú. Soco ma xuhun ihya cha चाहun chii”, catyí ra. ²⁶ Tyicuan ta nacahan chitoho ra, ta catyí ra chi ra: “Musu quiñi iyó ta musu suchan cuví yoho. Tatu chitón vatyí cuñi naquehín nu ña sahá tyiñe, ta quehín cosecha noo nu ña tachí, ²⁷ ¿ñáá tuhun ña chityihun xuhin banco? Ta cha ndichi ta, cunaquehin xuhun cuan chihin xuhun siqui cha sahá ganaa chi”, catyí ra. ²⁸ Tyicuan ta quichaha catyí ra chi ñu nyicú cuan: “Tinyaa ndo noo mil xuhun cha nyisó ra, ta cuhva ndo chi ra cha nyisó uchi mil. ²⁹ Vatyí ñu iyó chii, cuhva que chi ñu, ta coo cuaha chi ñu, nyacua ndoo ca. Soco ñu ñahri chii, nyacua nya cha chiin cha cumí ñu, cutinyaa ndihi chi ñu. ³⁰ Ta musu cha ña chiñuhú ihya, tuchi ndo chi ra nu ñaa iñi ityi chata, ta yucuan cuacu chaa ra, ta cusacahñi ra noho ra chihin cha nyehe ra tindoho.”

Nu catyí ra Jesús vatyí cucutuñi chi tandihi ñáyivi

³¹ 'Quiví cuquichi yuhu Rayi cha quichi nya gloria, cuquichi chihin cuaha ángel cuende, ta cucunyai tyayu tyaqui ta cunyaca ñahi. ³² Ñáyivi tandihi ri ñuu cundu in ri ñu nui. Ta cusasiin chi noo noo ñu, tari ra sahá cumi mbee tavá siin ra chi mbee ta tava siin ra ndixihyu. ³³ Ta cucuatyai chi mbee cuan chiyo vahi, ta chi ndixihyu cuan, chiyo satyin. ³⁴ Tyicuan ta yuhu cha cuví Rey cucatyí chi ñu nyicú chiyo vahi: “Ñaha nyoho vatyí nyoho ñáyivi cha nasocó Suti cuví ndo. Quehen cuenda ndo nu cuacunyaa ndo nu nyacá ñaha Nyoo, vatyí cha cuenda maa ndo chinó ihya nyata quiví savaha Nyoo ñuhu ñáyivi. ³⁵ Vatyí quiví chisoque, ta nyoho chaha ndo cha cachi. Quiví cu ityi ndutya ta chaha ndo cohi. Ta quiví chica noi

tari ra inga ñuu ta nyoho chaha ndo vehe coi. ³⁶ Quiví cumañi sahme, ta nyoho chaha ndo sahme. Quiví cuhvi ta nyoho chahan ndo chinyehe ndo chii. Ta quiví ñohi vehe caa, ta quichi nyehe ndo nu ñohi.” ³⁷ Ta ñu cha vaha cuan cundaca tuhun ñu chii, ta catyí ñu: “Sutu Mañi yuhu, ¿ama nyehe ndi chisocon, ta chaha ndi cha cachun? ¿Ama nyehe ndi ityun ndutya ta chaha ndi cohun? ³⁸ ¿Ama nyehe ndi chuun chicá noun tari ra inga ñuu ta chaha ndi vehe coun? ¿Ama cumañi sahmon, ta chaha ndi chuun? ³⁹ ¿Ama nyehe ndi cuhvún, o ñohún vehe caa, ta chahan ndi chinyehe ndi chuun?” cucatyí ñu. ⁴⁰ Ta yuhu cha cuví Rey cucatyí chi ñu: “Cha ndicha catyí chi ndo, vatyí tandihi tumañi iñi sacuvi ndo chihin ra ndahvi, ra yañi ihya, chi yuhu sacuvi ndo tumañi iñi cuan.” Tyicuan caa cucatyí yuhu chi ñu. ⁴¹ Tyicuan ta yuhu cha cuví Rey cucatyí tiqui chi ñu nyicú chiyo satyin tyehe caa: “Canyaha ndo nui, nyoho ñu tahán chi cuhún anyaya. Cuahan ndo nu ñuhú cha ma ndahva ca maa. Vatyí yucuan cuví nu chinó cha cuenda cuihna ta cha cuenda tatyí ña vaha cuenda ra. ⁴² Vatyí chisoque, ta nyoho ña chaha ndo cha cachi. Cu ityi ndutya, ta ña chaha ndo ndutya cohi. ⁴³ Chica noi tari chicá noo ra inga ñuu, ta ña chaha ndo nu coi. Cumañi sahme ta ña chaha ndo sahma cuihne. Cuhvi ta ñohi vehe caa, soco ña chahan ndo chinyehe ndo chii nu ñohi”, cucatyí chi ñu. ⁴⁴ Tyicuan ta cucatyí ñu chii tyehe caa: “Sutu Mañi yuhu, ¿ama nyehe ndi chisocon, o ityun ndutya, o chicán noun tari ra inga ñuu, o ñahri sahmon, o cuhvún, o ñohún vehe caa, ta ña tyinyee ndi chuun?” cucatyí ñu. ⁴⁵ Ta yuhu cha cuví Rey cucatyí chi ñu tyehe caa: “Cha ndicha catyí chi ndo vatyí tandihi maa cha ña sacuvi ndo chi ñáyivi ndahvi ihya, suri ña sacuvi tucu ndo chi yuhu cuví cuan”, cucatyí yuhu chi ñu. ⁴⁶ Tyicuan ta ñu cuan cuhun coyo ñu nu cayú ñuhú cha ma ndahva ca maa. Ta ñáyivi vaha cuan

cuhun ñu cucoo ñu noo ñayiví cha ma naa ca maa.

26

Nu canducu ra cuhva yoso caa catin ra chi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva cha ndihí catyí ra Jesús tuhun ihya, ta quichahá catyí ra chi ra cachicá noo chihin ra tyehe caa:

² —Nyoho chitó ndo vatyí uvi ca quiví ta sanducahnu yo vico pascua. Ta yuhu Rayíi cha quichí nya gloria cucuhva cuenda ñu chii vatyí tyaa ñu chii nu cruzi —catyí ra.

³ Quiví cuan ra cacuví nuu chi tata sutu, ta ra casacuahá ley vehe ñuhu, ta ra cacuví mandoñi ñu Israel, candu in ri ra nuquehe vehe tyiño ra Caifás, ra cuví nuu chi tata sutu. ⁴ Yucuan casandaá ra tyiño yoso caa ta sandavi ñaha ra chi ra Jesús ta catin ra chi ra ta cacahni ra chi ra. ⁵ Soco cacatyí ra:

—Ma cahni yo chi ra cha ni ri ca cha chichi vico, tacuhva cha ma naquiqui xaan ñáyiví —catyí ra.

Nu chosó noo ñaha sihi ndutya vixi chahan xiñi ra Jesús

(Mr. 14.3-9; Jn. 12.1-8)

⁶ Ra Jesús ñohó ra ñuu Betania, vehe ra Simón, cha catyí ñu Ra Tyahyu Coño chi, sivi saca ra cuví cuan. ⁷ Ta tuhva noo ñaha nu nyaá ra Jesús, nyisó ña noo yutyí tyitú yihí ndutya vixi chahan. Ta yahvi xaan nyaá ndutya cuan. Ta ra Jesús nyaá ra yuhu mesa ta choso ña ndutya cuan xiñi ra. ⁸ Cuhva cha cananyehe ra chicá noo chihin ra cacuxaan ra ta quichahá catyí ra:

—¿Ñáá tuhun cha sativí ña ndutya vixi chahan cuan? ⁹ Vaha ca tyehe ta xico ña, ta ñihi ña cuaha xuhun chihin ta tyinyee ña chi ñu ndahvi chihin xuhun cuan —catyí ra.

¹⁰ Tyicuan ta chiñi ra Jesús, ta catyí ra chi ra:

—¿Ñáá tuhun cha sayangá ndo chi ñaha ihya? Vatyí cha sacuví ña chihin, noo cha vaha cuví. ¹¹ Vatyí ñu ndahvi tyicuan ri cunyaa ñu chihin ndo, soco

yuhu, ñima tyicuan ri cua cunyai chihin ndo. ¹² Choso ña ndutya vixi chahan siqui coño ñuhi, vatyí sanduvaha ña cuenda cha cohin chichi ñuhú. ¹³ Cha ndicha catyí chi ndo, vatyí tandihí ri nu cahan ñu tuhun Nyoo nicañu ñayiví, cunacatyí tucu ñu cha sacuví ñaha ihya, tacuhva nicohon iñi ñáyiví chi ña —catyí ra Jesús.

Nu naxico tuhun ra Judas Iscariote chi ra Jesús

(Mr. 14.10-11; Lc. 22.3-6)

¹⁴ Tyicuan ta noo ra chicá noo chihin ra Jesús, ra cha nañi Judas Iscariote, chahan ra chicahan ra chihin ra cacuví nuu chi tata sutu. ¹⁵ Ta catyí ra chi ra:

—¿Yoso cuhva ndo chii tatu cuhva cuende chi ra Jesús chi ndo?

Tyicuan ta ra cacuví nuu cuan cacatyí ra vatyí oco uchi tahan xuhun cuichin. ¹⁶ Ta nya cuhva cuan ta quichahá nducu ra Judas ñáá noo cuhva cuvi nacuhva cuenda ra chi ra Jesús chi ra cacuví nuu chi tata sutu cuan.

Nu cuxiñi ra Jesús chihin ra cachicá noo chihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Quiví xihna ri cha quichahá vico ta chachí ñu pan cha ñahri yuchan iya yihí chihin, ra cachicá noo chihin ra Jesús tuhva ra chi ra ta quichahá candaca tuhun ra chi ra:

—¿Nya cuñun cha sanduvaha ndi cha cuxiñun cuenda vico pascua ihya?

¹⁸ Ta catyí ra Jesús chi ra:

—Cuahan ndo chichi ñuu ta chaa ndo vehe noo ra cuan. Ta catyí ndo chi ra: “Ra Sacuaha catyí ra vatyí cha cuyatyin cua cúvi ra, ta vehun cusanducahnu ndi vico pascua”, catyí ndo chi ra —catyí ra Jesús.

¹⁹ Tyicuan ta casacuví ra tari cuhva catyí ra Jesús chi ra. Yahá cuan ta casanduvahá ra cha cacuxiñi ra cha vico pascua cuan.

²⁰ Cuhva cha cuaa, chicunyaá ra Jesús nu mesa chihin ndi uchi uvi ra

chicá noo chihin ra. ²¹ Ta cha ni ri ca cha cachachí ra, catyí ra Jesús chi ra:

—Cha ndicha catyí chi ndo vatyí noo nyoho cucuhva cuenda ndo chii chi ra xaan iñi chii.

²² Ta canducuihya xaan iñi ra, ta quichaha candaca tuhun ñin ñin ra chi ra ta cacatyí ra:

—Sutu Mañi yuhu, ¿atu yuhu cuví?

²³ Ta nacahan ra Jesús ta catyí ra:

—Ra cha chachí ñin ri coho chihin, ican ra cuan cua na cuhva cuenda chii. ²⁴ Yuhu Rayi cha quichi nya gloria, cuahin ityi cha catyí nu tutu tuhun Nyoo. Soco ndahvi ra ndahvi cha cunacuhva cuenda chii. Quitá vihi ca cuenda chi ra, tyehe ta ña cacu taxin ra —catyí ra Jesús.

²⁵ Tyicuan ta nacahan ra Judas, ra cha cua cuhva cuenda chi ra, ta catyí ra:

—Maestro, ¿atu yuhu cuví?

Ta nacahan ra Jesús, ta catyí ra:

—Ican yoho cuvún.

²⁶ Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo, ta cha yaha tahvi sava ra, ta chaha ra chi ra cachicá noo chihin ra, ta catyí ra:

—Cachi ndo. Ican ihya cuví coñe.

²⁷ Yaha cuan ta quehen tucu ra copa, ta nacuhva ra tyahvi nyoo chi Nyoo, ta sayaha ra chi tandihi ra ta catyí ra:

—Coho tandihi ndo ihya. ²⁸ Vatyí ican ihya cuví niñi. Ta chihin niñi natyihí tahan Nyoo tuhun chaa chihin ndo, vatyí cucati niñi cha catyí cha vaha chi cuaha ñu, vatyí chihin niñi coo ticahnu iñi cuatyí ñu. ²⁹ Soco catyí chi ndo, vatyí ma coho que tahan vinu tichaha ndivi ihya, nyacua nya cha cohi vinu chaa chihin ndo nya nu nyacá ñaha Suti andivi —catyí ra.

Nu catyí ra Jesús vatyí cucatyí ra Pedro vatyí ña ñohó nuu ra chi ra

(Mr. 14.26-31; Lc. 22.31-34; Jn. 13.36-38)

³⁰ Cha yaha cha cachita ra yaa chi Nyoo, ta cuahan coyo ra yucu yutun

Olivo cuan. ³¹ Tyicuan ta quichaha catyí ra Jesús chi ra:

—Tandihí nyoho ta cucaca uvi iñi ndo cha nyicón ndo chii vityin cha cuaa. Vatyí nu tutu Nyoo catyí chi tyehe caa: “Cucahñi chi ra sahá cumi mbee, ta mbee cuquiti cuatyí ti”, catyí chi. ³² Soco cha yaha nandote, xihna que cuhin Galilea, ican saha nyoho.

³³ Tyicuan ta nacahan ra Pedro ta catyí ra:

—Vasi tandihí ra ndu uvi iñi ra cha nyicón ra chuun, soco yuhu ma ndu uvi iñi.

³⁴ Tyicuan ta quichaha catyí ra Jesús chi ra:

—Cha ndicha catyí chuun vatyí suri maa cha cuaa ihya, cha ni cumañi ca cuacu loho, yoho cucatyun uñi chaha vatyí ña ñohó nuun chii —catyí ra.

³⁵ Ta ra Pedro catyí ra:

—Vasi cúvi chuhun, soco ma catyí cha ña ñohó nui chuun —catyí ra.

Ta suri tyicuan caa catyí tandihí ra chicá noo chihin ra.

Nu chicán tahvi ra Jesús chi Nyoo nu cuví Getsemaní

(Mr. 14.32-42; Lc. 22.39-46)

³⁶ Tyicuan ta chaa ra Jesús chihin ra cachicá noo chihin ra noo nu nañi Getsemaní, ta catyí ra chi ra:

—Cunyicu ndo ihya, cha niri ca cha cuahin yucuan, cua cacan tahvi.

³⁷ Ta quehen ra chi ra Pedro ta chi ni nduvi sehe ra Zebedeo, cuahan coyo chihin ra. Ta quichaha nducuihya cuñi ra, ta tyoño xaan cuñi ra.

³⁸ Tyicuan ta catyí ra chi ra:

—Cahnu xaan tucuihya iñi nyaá añime. Nyacua cuñi chi cahñi chi chii. Ndo ndo ihya ri ta conyito ndo chihin —catyí ra.

³⁹ Tyicuan ta cuahan ra Jesús chiin ca ityi nuu ca ta chicuiñi chiti ra ta chacun ra nuu ra nu ñuhú, ta chican tahvi ra chi Nyoo ta catyí ra:

—Sutu Mañi yuhu, tu yoho ta cuñun, cuhva cha ma nyehi tindoho ihya. Soco ma cuvi tari cuhva cha cuñi mai, soco tari cuhva cuñi maun na cuvi —catyí ra.

⁴⁰ Tyicuan ta nachaa ra nu nyicú ra cachica noo chihin ra, ta nyehe ra vatyí caquixí ra. Ta catyí ra chí ra Pedro tyehe caa:

—¿Atu ni minoo hora ña cuví conyito ndo chihin? ⁴¹ Conyito ndo, ta cacán tahvi ndo tacuhva cha ma cuvi chasaha cuihna chi ndo. Cha ndicha vatyí añima ndo, cuñí xaan chí nanducu chí Nyoo, soco coño ñuhu ndo vita cuñí chí —catyí ra Jesús chí ra.

⁴² Nu cu uvi chaha chahan ra, ta chicán tahvi ra tyehe caa:

—Sutu Mañi yuhu, tatu ma cuvi cha ma nyehi tindoho ihya, tu tyicuan caa, na cuvi maa cuhva cuñún —catyí ra.

⁴³ Tyicuan ta nachaa ra inga chaha ta caquixí tucu ra cachicá noo chihin ra, vatyí nicunyasi maa chiti nuu ra chihin cha cacuñí ra cusu ra. ⁴⁴ Tyicuan ta sandoo ra chí ra, ta cuahan ra cha cu uñi chaha cua cacán tahvi ra. Ta catyí ra suri maa tuhun cha yahá cahán ra cha chicán tahvi ra chí Nyoo.

⁴⁵ Tyicuan ta nachaa ra nu canyicu ra cachicá noo chihin ra, ta catyí ra chí ra:

—Vityin ndicha, cusu ndo ta nyitatu ndo. Vatyí cha chaá cuhva cha cua nacuhva cuenda ra chii chí ra quiñi iyó, ta Rayi cha quichi nya gloria cuví. ⁴⁶ Ndícuita ndo, ta coho ndo. Vatyí cha vachi ra cha cunacuhva cuenda chii —catyí ra Jesús.

Nu catin ra xaan ini chi ra Jesús cuahan ra vehe caa

(Mr. 14.43-50; Lc. 22.47-53; Jn. 18.2-11)

⁴⁷ Ni cahán ca ra Jesús tuhun ihya, ta chaá ra Judas, ta ra Judas cuví noo ra chicá noo chihin ra Jesús. Ta cuaha ra vachi coyo chihin ra, canyisó ra mityi ta yutun. Ra cuví nuu chí tata sutu, ta ra cacuví mandoñi ñu Israel, ican tachí chí ra. ⁴⁸ Ra Judas, ra cha chahá cuenda chí ra Jesús, cha yahá chahá ra noo seña chí ra cuan, tacuhva coto ra yóo chí tin ra. Ta catyí ra:

—Ra cha cutyayuhi chí, ican ra cuan cuví. Tin ndo chí ra.

⁴⁹ Tyicuan ta tuhva ra chí ra Jesús ta catyí ra:

—Nocumi chuun, Maestro.

Ta tyayuhu ra chí ra.

⁵⁰ Tyicuan ta nacahan ra Jesús ta catyí ra chí ra:

—Amigo, sacuvi ñáá tyiño vachun.

Tyicuan ta catuhva ra ta catin ra chí ra Jesús.

⁵¹ Tyicuan ta noo ra ndihi chihin ra Jesús, tava ra mityi ra ta chahnya ra soho noo musu ra cuví nuu chí tata sutu cuan. ⁵² Ta catyí ra Jesús chí ra:

—Natyihi mityun chichi vena. Vatyí tandihi ñu cacañi tahan chihin mityi, suri chihin mityi cúvi ñu. ⁵³ ¿Atu ña chitón vatyí tatu yuhu ta cuñí, cuví caquen chí Suti, ta maa ra cutachi ra vityin vityin yaha ca uñi xico uchi mil ángel, ta sacacu ra chii? ⁵⁴ Soco tatu tyicuan caa, ¿yoso caa chino cava cuhva nyaá nu tutu Nyoo? Vatyí catyí chí tyi tahn maa chí cuví chí yuhu tyehe caa —catyí ra.

⁵⁵ Ta catyí tucu ra Jesús chí ñáyivi:

—¿Atu vachi coyo nyoho vachi tin ndo chii chihin cha xaan ta chihin yutun? Tari cha noo ra suhu cuví yuhu sahá ndo. Ndiquivi chinyaí sañahi nu nyicú ndo chichi vehe ñuhu cahnu, soco ña tin ndo chii cha cuhin vehe caa. ⁵⁶ Vatyí tandihi cha cuví chii vityin, ta chicunyaá nu tutu Nyoo, cha catyaa ra profeta Nyoo ta cha naha.

Tyicuan ta ndi ra cachicá noo chihin ra, cachino ra. Noo tuhun ca maa ra Jesús casandoo ra.

Nu cutuñi chira Jesús nuu ra cacuvi tyiño cuenda ñu Israel

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ta ra cha catin chí ra Jesús cuan, chinyaca ra chí ra nuu ra Caifás, ra cuví nuu chí tata sutu. Suri yucuan canyicú in ri ra sacuha ley vehe ñuhu ta ra cacuví mandoñi. ⁵⁸ Soco ra Pedro cuahan ra chata ra, nya sava ri nya nuquehe vehe ra cuví nuu chí tata sutu cuan. Ta quihvi ra ta ndoo

ra nyaá ra chihin policia cuan, vatyí nyehe ra yoso caa quita tuhun cuan.

⁵⁹ Ra cacuví nuu chi tata sutu, ta ra cacuví mandoñi, ta tandihí ra cuví tyiño, canducu ra noo cuatyí catyaa ra siqui ra Jesús, vasi ña ndicha, tacuhva vatyí chihin cuatyí cuan ta cuví cahñi ra chi ra. ⁶⁰ Soco ña cañihí maa ra cuatyí ra, vasi cuaha ñáyivi chahan ñu chicatyí ñu cuendu siqui ra. Soco nu ndihí tuhun, chaá coyo uvi ca testigu cuendu. ⁶¹ Ta cacatyí ra:

—Ra ihya, catyí ra vatyí cuví satani ra vehe ñuhu cahnu Nyoo, ta chichi cha uñi quivi cunacananyaa ra inga chaha, na —cacatyí ra.

⁶² Tyicuan ta ra cuví nuu chi tata sutu cuan, ndicuita ra, ta catyí ra chi ra Jesús:

—¿Atu ña nacahun nu cahan ra ihya? ¿Ñáa cha cuví cha cacatyí ra ihya sicun?

⁶³ Soco ra Jesús taxi ri nanyaá ra. Tyicuan ta quichaha catyí ra cuví nuu chi tata sutu cuan chi ra:

—Chihin sivi Nyoo nyitó, catyí chuun vatyí catyun cha ndicha vaha. ¿Atu ra Cristo Sehe Nyoo nyitó cuví chuun? —catyí ra.

⁶⁴ Ta catyí ra Jesús chi ra:

—Ican cuví, tari cuhva catyí maun. Ta suri catyí chi ndo, vatyí cunyehe ndo chi yuhu Rayi cha quichi nya gloria, cunyai chiyo vaha Nyoo ra iyó tandihí tunyee iñi chii, ta cunyehe ndo nu quichi tiqui nu vico ityi andivi —catyí ra.

⁶⁵ Tyicuan ta ra cuví nuu chi tata sutu cuan chahnya ra sahma ra tari noo seña tyi cuñi maa ra tyi ña vaha cha cahan ra Jesús, ta catyí ra:

—Ra ihya chicoo cuatyí ra nuu Nyoo chihin tuhun cahán ra. ¡Nyehe ndo vityin! Ña niñi cha tava yo cha ndaa. Nyoho cha chiñi ndo tuhun ña vaha cahan ra. ⁶⁶ ¿Ñáa catyí ndo vityin?

Ta canacahan ra ta cacatyí ra:

—Iyó cuatyí ra, ta cuñi chi cha cúvi ra.

⁶⁷ Tyicuan ta catyicusii ra nuu ra ta cacañi ra chi ra. Inga ra cacatu ra nuu

ra chihin chiqui ra. ⁶⁸ Ta cacatyí ra chi ra:

—Yoho, cha sahún Cristo chuun. ¡Nacoto yóo cha cañi chuun!

Nu catyí ra Pedro vatyí ña ñohó nuu ra chi ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Cha niri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyí ña chi ra:

—Yoho tucu chica noun chihin ra Jesús, ra Galilea cuan.

⁷⁰ Ta ra Pedro catyí ra vatyí ña ñohó nuu ra chi ra nuu tandihí ñu nyicú cuan, ta catyí ra:

—Ña chité ñáa tuhun cahún.

⁷¹ Tyicuan ta cuahan ra Pedro ityi yuvehe, ta nyehe inga ña chi ra, ta catyí ña chi ra nyicú cuan:

—Suri chica noo tucu ra ihya chihin ra Jesús, ra ñuu Nazaret cuan —catyí ña.

⁷² Ta inga chaha tucu tixehe ra Pedro cha ñohó nuu ra chi ra ta catyí ra:

—Cha ndicha vaha tyi ña ñohó nui chi ra cuan.

⁷³ Suhva ri ca cuhva cuan, ta ra canyicú cuan catuhva ra nu nyaá ra Pedro ta cacatyí ra chi ra:

—Ra tahan ra cuan cuví chi yoho, ndicha. Vatyí quetuvi nyacua nya cuhva cahún.

⁷⁴ Tyicuan ta iyo xaan tyanaha ra ta catyí ra:

—Chitó vaha Nyoo tyi ña ñohó nui chi ra cuan, ta nacahñi Nyoo chii tatu ña ndicha cha cahín —catyí ra.

Ta suri cuhva cuan nacua cuhva cha noo loho. ⁷⁵ Tyicuan ta nicohon iñi ra Pedro tuhun cha catyí ra Jesús chi ra: “Cha ni cumañi ca cuacu loho, yoho cha yaha catyun uñi chaha vatyí ña ñohó nuun chii.” Tyicuan ta quita ra Pedro yucuan, ta chacu vavaha ra cha cuihya iñi ra cha sacuvi ra tyicuan caa.

27

Nu cachahá cuenda ra chi ra Jesús chi ra Pilato

(Mr. 15.1; Lc. 23.1-2; Jn. 18.28-32)

¹ Cuhva cha cundichin, tandihí ra cacuví nuu chi tata sutu ta ra cacuví mandoñi ñuu cuan, catyihí tahan ra tuhun vatyí cacahñi ra chi ra Jesús.

² Ta nuhñí ra. Ta chahan coyo ra chicuhva cuenda ra chi ra chi ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

Nu chihí ra Judas

³ Cha nyehe ra Judas, ra cha naxico tuhun chi ra Jesús, vatyí cuacúvi ra, ta ndu uví iñi ra cha sacuví ra, ta nacuhva ra ndi oco uchi xuhun cuichin cuan chi ra cacuví nuu chi tata sutu cuan, ta chi ra cacuví mandoñi ñuu cuan. ⁴ Ta catyí ra:

—Chicoo cuatyí yuhu, vatyí chaha cuende chí noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ¿ñáá cuenda nyuhu? ¡Nyehe maa yoho!

⁵ Tyicuan ta tuchí ra Judas xuhun cuan chichi vehe ñuhu cahnu, ta chahan ra ta chicuhñi ra yoho sucun ra ta suri maa ra chitacaá ra chi ra. Ta chihí ra.

⁶ Ra cacuví nuu chi tata sutu cuan canaquehen ra xuhun cuan ta cacatyí ra:

—Ma cuví tyihí yo xuhun ihya chichi caja ofrenda vatyí yahvi cha chahñi ñu noo ñáyivi cuví.

⁷ Tyicuan ta catyihí tahan ra tuhun, ta chihin xuhun cuan casata ra noo ñuhú cha nañi Ñuhú Ra Savahá Quisi. Vatyí coo nu cuchi ra chi ñu inga ñuu tu chihí ñu. ⁸ Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chihí Ñáyivi. ⁹ Ta tyicuan caa chino cava cha tyaa ra Jeremías profeta Nyoo ta cha naha. Catyí chi tyehe caa: “Quehen ra ndi oco uchi xuhun cuichin, yahvi cha tyaa ñu Israel chi ra. ¹⁰ Ta chihin cuan, casata ra Ñuhú

Ra Savahá Quisi, tari cuhva catyí Sutú Mañi yo chí”, catyí chí.

Nu nyehe ra Pilato vatyí ñahri maa cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹ Cachinyaca ra chi ra Jesús nuu gobiernu, ta ra cuan ndaca tuhun ra chí ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chí ra:

—Ican, yuhu cuví. Ndicha cha cahún.

¹² Ta cuhva cha catyaa ra cacuví nuu chí tata sutu cuan ta mandoñi cuatyí síqui ra, ra Jesús ña nacahan maa ra. ¹³ Tyicuan ta quichaha catyí ra Pilato chí ra:

—¿Atu ña chíñún tandihí cha cacahan ra sícun?

¹⁴ Soco ra Jesús ña nacahan ra. Ta nyacua iyo cuñi gobiernu cuan vatyí ña nacahan ra. Ta ña chitó ra ñáá cunyacuví ra.

Nu cutuñí chí ra Jesús ta cacatyí ñu vatyí cucúvi ra

(Mr. 15.6-20; Lc. 23.13-25; Jn. 18.38—19.16)

¹⁵ Soco cha vico pascua cuan, iyó noo tuhun chí ñu vatyí tuhva ra gobiernu saña ra noo ra ñohó vehe caa, nya ra cachi maa ñáyivi. ¹⁶ Ta quívi cuan ñohó noo ra cha nañi Barrabás vehe caa. Ta chitó tandihí ñáyivi tuhun ra. ¹⁷ Ta cuhva cha canyicú ñn ri ñu, ra Pilato ndaca tuhun ra chí ñu, ta catyí ra:

—¿Yóó chí cuñi nyoho cha sañe? ¿Atu chí ra Barrabás o chí ra Jesús, ra nañi Cristo? —catyí ra.

¹⁸ Vatyí chitó ra vatyí cha cuenda cha tasi cuñi nyehe ñu chí ra Jesús, yucuan cuenda chaha cuenda ñu chí ra.

¹⁹ Cha ni ri ca cha nyaá ra Pilato nu tyayu ra, nu cuví ra tyiño, tachí ñasihí ra noo tyiño chí ra ta catyí ña: “Ma tyihun chuun chihin ra vaha chíña. Vatyí cuñi tahin noo ñumahna cha cuenda ra. Ta quiñi xaan tahin chihin”, catyí ña.

20 Soco ra cacuví nuu chi sutu ta mandoñi ñuu cuan, cacuñihi ra catyiyuhu ra chi ñáyivi na cacan ñu cha saña ra Pilato chi ra Barrabás, ta na cúvi ra Jesús. 21 Ta gobiernu cuan cahan ra chihin ñu inga chaha, ta catyí ra:

—Chichi cha ninduvi ra, ¿nya ra cuñí ndo cha sañe?

Ta maa ñu nacahan ñu, ta catyí ñu:

—Chi ra Barrabás.

22 Ta ra Pilato ndaca tuhun ra chi ñu, ta catyí ra:

—¿Ta ñáa cha cusacuvi chihin ra Jesús cha nañí Cristo ihya?

Tandihí ñu nacahan ñu ta catyí ñu:

—¡Na cúvi ra nu cruzi!

23 Tyicuan ta quichaha catyí ra Pilato chi ñu:

—Soco ¿ñáa cha ña vaha sacuvi ra?

Soco maa ñu nacana chaa tucu ñu inga chaha ta catyí ñu:

—¡Cahñi chi ra nu cruzi!

24 Cuhva cha nyehe ra Pilato vatyí ñahri maa cha cuví sacuvi ra, vatyí quiñi xaan cacuví ñu, chican ra ndutya, ta nacatya ra ndaha ra chihin nuu ñáyivi cuan, ta catyí ra:

—Yuhu ñahri cuatyí cha cua cúvi ra ñahri cuatyí ihya. Na ndoo siqui maa ndo.

25 Ta tandihí ñáyivi canacahan ñu, ta catyí ñu:

—Na ndoo chi siqui maa ndi ta siqui sehe ndi.

26 Tyicuan ta ra Pilato saña ra chi ra Barrabás, ta tachí ra na ndoho ra Jesús, ta nacuhva cuenda ra chi ra na cúvi ra nu cruzi.

27 Tyicuan ta sindaro cuenda gobiernu cuan chinyaca ra chi ra Jesús nya vehe tyiño, ta casandu ñin ri ra chi tandihí sindaro cuan nicachico.

28 Tyicuan ta catava ra sahma ra ta casacuihno ra noo sahma cuaha chi ra. 29 Ta catyihí ra noo corona cha chingo chihin iñu xiñi ra. Ta chaha ra noo yutun na quindaha ra chihin chiyo vaha ra. Tyicuan ta cachicuiñi chiti ra nuu ra, ta cachacu nyaa ra chi ra ta catyí ra:

—¡Nocumi chuun, yoho Rey cuenda ñu Israel!

30 Ta catyicu sii ra chi ra ñandihí. Ta quehen ra yutun cuan ta cañi ra xiñi ra. 31 Cha yaha cha cachacu nyaa ra chi ra ta catava ra sahma cuaha cuan chi ra ta sandihvi noo tucu ra sahma maa ra chi ra. Tyicuan ta quehen ra chi ra cua cahñi ra chi ra nu cruzi.

Nu catyaa ra chi ra Jesús nu cruzi
(Mr. 15.21-32; Lc. 23.26-43; Jn. 19.17-27)

32 Cuhva cha caquita coyo ra yucuan, catahan ra chi noo ra ñuu Cirene, nañi ra Simón. Ta casaniñi ra chi ra na cuiso ra cruzi ra Jesús.

33 Ta cachaa coyo ra noo nu nañi Gólgota, ta cuñi chi catyí Nu Cuví Yiqui Xiñi Ndiyí. 34 Ta yucuan cachaha ra vinu nasaca chihin cava uva coho ra Jesús. Soco cha yaha cha chihí ra chiin, ña cuñi ca ra coho.

35 Ta cha yaha cha catyaa ra chi ra nu cruzi, tyicuan ta sindaro cuan caquehen ra sahma ra ta chahan ra noo sihva chihin. Ta nya ra saha ganaa, ñihí ra sahma cuan. Ta tyicuan caa chingo cava tuhun cha tyaa noo profeta Nyoo ta cha naha nu catyí chi tyehe caa: “Casacha ra sahme chihin cha chahan ra sihva”, catyí chi. 36 Tyicuan ta cachicunyicu ra yucuan vatyí saha cuenda ra chí ra. 37 Ta ityi xiñi ra catyaa ra noo letra cha catyí ñáa tuhun cua cahñi ra chi ra. Ta catyí chi tyehe caa: “Ican ra ihya cuví ra Jesús, rey cuenda ñu ñuu Israel.”

38 Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyin ra.

39 Ta ñu yahá coyo cuan, cacahan ñu chi ra, ta quisí xiñi ñu, 40 ta catyí ñu chi ra:

—¡Yoho cha catyun tyi cusanduvon vehe ñuhu cahnu, ta chichi cha uñi quivi ta nacananyaa tucun! ¡Saca chuun vityin! ¡Tatu Sehe Nyoo cuví chuun, noo nu cruzi chiña! —catyí ñu chi ra.

41 Ta suri tyicuan caa cachacú nyaa tucu ra cacuví nuu chi tata sutu chi ra, ta ra sacuahá ley vehe ñuhu, ta mandoñi ñuu ñandihí. Ta cacatyí ra chi tahan ra tyehe caa:

⁴² —Sacacu ra chi inga ñu, soco ña cuví sacacu ra chi maa ra. Tatu Rey cuenda ñu Israel cuví ra, na noo ra nu cruzi cuan, tacuhva chino iñi yo chi ra. ⁴³ Itá iñi ra chi Nyoo, vityin na sacacu Nyoo chi ra, tatu ndicha cuñi ra chi ra. Vatyí catyí ra chi yo vatyí Sehe Nyoo cuví chi ra.

⁴⁴ Ta nyacua nya ra suhu cha tacaá nu cruzi xiin ra ta cacahan ra chi ra ñandihí.

Nu chihí ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tyicuan ta tandihí siqui ñuhu ñáyiví nduñaa iñi, nyacua nya ora ta nyacua nya ca uñi cha cha iñi. ⁴⁶ Ta suri cuhva cuan, cana chaa ra Jesús chihin cha chaa ndusu ra. Ta catyí ra tyehé caa:

—Elí, Elí, ¿lama sabactani? —ta cuñí chi catyí: Nyoo Suti, Nyoo Suti, ¿ñáá tuhun cha sandoó ñihnon noo tuhun mai?

⁴⁷ Suhva ra canyicú cuan, cachiñi ra cha cahan ra, ta cacatyí ra:

—Chi ra Elías, ra profeta Nyoo ta cha naha, ican cana chaa ra.

⁴⁸ Ta caa cuhva ri cuan, cuahan vavaha noo ra cua quehen ra noo xixan, ta satyí ra chihin vinu iya, ta tyaa ra noo nu yutun, ta satuhva ra yuhu ra Jesús tacuhva na coho ra.

⁴⁹ Soco inga ra cacatyí ra:

—Saña chi ra. Na nyehe yo tatu quichi sacacu ra Elías chi ra.

⁵⁰ Inga tucu chaha cana chaa ñihí ra Jesús, tyicuan ta chihí ra. ⁵¹ Ta caa cuhva ri cuan ndata sava sahma cha tacaá chichi vehe ñuhu cahnu cuan, nyacua nya siqui ta nyacua nya yuvi ndata. Ta taan. Ta ndata yuu. ⁵² Ta nuña yuhu ñaña. Ta nyacua canandoto cuaha ñu chinó iñi chi Nyoo, ñu cachihí. ⁵³ Ta cha yaha nandoto ra Jesús caquita coyo ñu nu ñaña ta quihví coyo ñu chichi ñuu Jerusalén, ta cuaha ñáyiví nyehe chi ñu. ⁵⁴ Tyicuan ta capitán ta sindaro cha casahá cumi chi ra Jesús, cayuhvi xaan ra cuhva cha taan. Ta cha

canyehe ra inga ca cha cuví, ta cacatyí ra:

—Ndicha ndicha cuii, vatyí Sehe Nyoo cuví chi ra ihya.

⁵⁵ Cuaha ñusihí cha chinyicon chi ra Jesús nya Galilea ta tyinyee ñu chi ra, nyicú ñu canyehé ñu nya sava ri yucuan. ⁵⁶ Ta ican suhva ñu ihya cuví cu María ñaha Magdala, ta cu María sihi ra Jacobo ta ra José, ta sihi sehe ra Zebedeo.

Nu cua cuhí ra chi ra Jesús

(Mr. 15.42-47; Lc. 23.50-56; Jn. 19.38-42)

⁵⁷ Cuhva cha cua cuaa, quichi noo ra tyayí cha nañí José. Ra ñuu Arimatea. Ta suri chinó iñi ra chi ra Jesús. ⁵⁸ Ta chahan ra chinyehé ra nu nyaá ra Pilato, ta chican ra coño ñuhu ra Jesús. Tyicuan ta tyihí ra Pilato tyiño na cuhva ra coño ñuhu ra chi ra. ⁵⁹ Tyicuan ta quehen ra José coño ñuhu ra, tyihí ra chichi noo sinduhu ndí. ⁶⁰ Ta tyihí ra chi ra chichi noo ñaña nicaa chaa cha cuví noo yavi yuu cha tyihí ra tyiño cachatya ra. Ta cha yaha cha nacasi ra yuhu ñaña cuan chihin noo yuu cahnu, ta cuahan ra. ⁶¹ Soco cu María ñaha Magdala, ta inga cu María, ndoo ñu nyicú ñu yuhu ñaña cuan.

Nu casahá cumi sindaro ñaña ra Jesús

⁶² Ta cha inga quiví, quiví nyitatu ñu cuví, ta ra cacuví nuu chi tata sutu, ta ra fariseo chahan coyo ra chinyehé ra nu nyaá ra Pilato. ⁶³ Ta catyí ra chi ra:

—Tata, nicohón iñi ndi vatyí ra cuendu cuan, catyí ra ta nyitó ca ra vatyí cha yaha cha uñi quiví cunandoto ra. ⁶⁴ Yucuan chaha tyihí tyiño na casaha cumi vaha ra ñaña cuan, nya yaha cha uñi quiví, coto quichi coyo ra cachica noo chihin ra cha cha cuaa, ta casuhu ra coño ñuhu ra. Yaha cuan ta cucatyí ra chi ñáyiví vatyí cha nandoto ra. Ta cha tyicuan caa nu ndihí tuhun ihya, yaha ca cuhva cucuvi —catyí ra.

⁶⁵ Ta ra Pilato catyí ra chi ra:

—Ma suhva sindaro chiña. Cuahan ndo, ta saha cumi vaha ndo ñaña cuan, yoso cuhva cha vaha cuví saha cumi ndo —catyí ra.

⁶⁶ Tyicuan ta cuahan coyo ra, ta casaha cumi vaha ra ñaña cuan, ta catyaā ra noo sellu chata yuu cha chasí cuan. Ta casandoq ra chi sindaro sahá cumi yucuan.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

¹ Cha yaha quivi cha nyitatu ñu, cuhva cha vachi cundichin, nu quichaha vitya cuví. Ta cu María ñaha Magdala cuan, ta inga cu María chahan coyo ñu nu ñaña. ² Ta quichi minoo cha taan vatyi quichi ángel Sutu Mañi yo noo ra nya ityi andivi, ta chaā ra nu ñaña cuan. Ta sacanyaha ra yuu cha nyasi yuhu cuan, ta chicunyaa ra siqui. ³ Ta xiño vavaha ra, tari cha quihvi tacha. Ta sahama ra cuichin vavaha. ⁴ Cuhva cha cananyehē sindaro cuan chi ra, canayuhvi vavaha ra nyacua nihí ra, ta nyacua coña ra chihin cha yuhvi ra. ⁵ Tyicuan ta quichaha catyí ángel cuan chi ñusihí cuan:

—Ma yuhvi ndo. Yuhu chité vatyi chi ra Jesús cha chihí nu cruzi nanducú ndo. ⁶ Yori ca ra ñohó ihya, vatyi cha nandoto ra, tari catyi ra. Ñaha ndo ta nyehe ndo nu catuvi ra. ⁷ Ta cūhun ndo numi ri, ta catyi ndo chi ra cachica noo chihin ra vatyi cha nandoto ra, ta cha cuahan ra Galilea, nyatú ra chi ra yucuan. Ican ihya cuví cha nyaa catyi chi ndo —catyí ángel cuan chi ñu.

⁸ Tyicuan ta numi ri quita coyo ñu nu ñaña cuan. Suhva ri yuhvi ñu, ta suhva ri si vavaha cuñí ñu. Ta chinō vavaha ñu cua catyi ñu chi ra cachica noo chihin ra Jesús. ⁹ Ta cuhva cuan tui ra Jesús nuu ñu ta chaha ra nocumi chi ñu. Tyicuan ta catuhva ñu chi ra ta chicuiñi chiti ñu nuu ra ta casacahnu ñu chi ra, ta suri

numi ñu chaha ra. ¹⁰ Ta catyí ra chi ñu:

—Ma yuhvi ndo. Cuahan ndo cua sacoto ndo chi yañi vatyi na cūhun coyo ra Galilea, ta nyicuan cuñihi tahan ndi —catyí ra chi ñu.

Tuhun cha canacatyí sindaro

¹¹ Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyí ra cha cuvi cuan chi ra cacuvi nuu chi sutu. ¹² Tyicuan ta ra cacuvi nuu cuan chahan coyo ra chicahan ra chihin ra mandoñi ñuu vatyi catyihí tahan ra tuhun yoso caa casacuvi ra. Tyicuan ta cuaha xuhun cachaha ra chi sindaro cuan. ¹³ Ta cacatyí ra chi ra:

—Nyoho, catyi ndo vatyi cha cha cuaa cha ni ri ca cha quixí ndo, chahan coyo ra cachica noo chihin ra Jesús ta chिकासuhū ra coño ñuhu ra. ¹⁴ Ta tatu chito gobiernu tuhun ihya, cua nyehe maa ndi yoso caa catyi ndi chi ra, ta nyoho ma caca iñi ndo. Ñahri cucuvi chi ndo.

¹⁵ Tyicuan ta caquehen sindaro cuan xuhun, ta cuahan coyo ra cua casacuvi ra cha cacatyí ra chi ra. Ta nya vityin ta tyicuan caa catyí ñayivi ñuu Israel.

Nu tyaa ra Jesús tyiño chi ra cachica tyiño ra

(Mr. 16.14-18; Lc. 24.36-49; Jn. 20.19-23)

¹⁶ Ta tyicuan caa, ndi uchi ñn ra cachica noo chihin ra, cuahan coyo ra nya Galilea nya yucu nu catyi maa ra Jesús chi ra vatyi cūhun coyo ra. ¹⁷ Ta cuhva cha cananyehē ra chi ra Jesús, casacahnu ra chi ra soco suhva ra chica uvi iñi ra. ¹⁸ Tyicuan ta tuhva ra Jesús chi ra ta catyí ra chi ra:

—Nyoo chaha ra cha cunyaca ñaha yuhu tandihí andivi ta siqui ñuhu ñayivi. ¹⁹ Yucuan chaha, cuahan ndo tandihí nu nyicú ñayivi, tandihí ri ñuu, ta catyi ndo chi ñu na nanyicon ñu chii. Ta sacondutya ndo chi ñu chihin sivi Sutu yo Nyoo ta chihin sivi yuhu Sehe Nyoo, ta chihin sivi Tatyí Ii Nyoo. ²⁰ Ta sañaha ndo chi ñu

na naquichaha ñu tandihí cha catyí yuhu tyi sacuvi ñu. Ta coto ndo vatyí yuhu cunyai chihin ndo tandihí quivi nyacua nya naa ñayivi —catyí ra Jesu-cristo chí ra cachicá tyiño ra.

Tuhun Nyoo Cha Tyaa San Marcos

Nu sacondutyá ra Juan chi ñáyivi ta cahán ra tuhun Nyoo chihin ñu
(Mt. 3.1-12; Lc. 3.1-9, 15-17; Jn. 1.19-28)

¹ Tyehe caa quichaha tuhun vaha ra Jesuscristo Sehe Nyoo. ² Ra Isaías profeta Nyoo tyaa ra tuhun ra Cristo ta tuhun ra Juan. Tyehe caa catyí Nyoo chi ra Cristo:

Cumañi ca cuhun siqui ñuhu ñáyivi ta cutachi chi noo ra cusacoto chi ñáyivi vatyí nyaá cuhun nu nyicú ñu, catyí Nyoo chi ra Cristo.

³ Chiñi yo ndusu noo ra cha canachaá nu chiqui ndi,

ta catyí ra: “Tari sanduvahá ndo noo ityi, tyicuan caa sanduvaha ndo aña ndo vatyí cua quichi Sutu Mañi yo.

Nuña ndo noo ityi ndoo chi ra na quihvi ra aña ndo.”

Tyicuan caa tyaa ra profeta Isaías nu tutu Nyoo ta cha naha.

⁴ Ta tyicuan caa quichi ra Juan sacondutyá ra chi ñáyivi nu chiqui ndi cuan. Ta catyí ra chi ñu na ndu uvi iñi ñu cuatyí ñu, ta na condutyá ñu tari noo seña tyi nasama ñu cuhva iyó ñu, ta tyicuan caa ta Nyoo cusaha ra ticahnu iñi cuatyí ñu. ⁵ Ta tandihi ñáyivi ityi Judea quichi coyo ñu tyasoho ñu tuhun cahán ra, ta ñu ñuu Jerusalén ñandihi. Ta cha yaha nahma ñu cuatyí ñu, sacondutyá ra Juan chi ñu yuvi cahnu Jordán.

⁶ Ta sahna cha ñihno ra Juan cuan chihin ixi camellu chino chi. Ta ñií cuví sinchu ra. Ta pinchi tuhvá ra chachí. Ta tyañuñu cuhu tuhvá ra chihí. ⁷ Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee iñi chi ican saha yuhu. Ta ña nañé ni cha ndachi ñií xityin ndichan ra. ⁸ Yuhu sacondutyé chi ndo chihin ndutyá. Soco maa ra

cusacondutyá ra chi ndo chihin Tatyí Ii Nyoo —catyí ra Juan.

Nu condutyá ra Jesús
(Mt. 3.13-17; Lc. 3.21-22)

⁹ Quivi cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnu Jordán. Ta yucuan sacondutyá ra Juan chi ra.

¹⁰ Ta cha yaha condutyá ra Jesús, ta cuhva cha cua quita ra chichi ndutyá, ta nanyehe ra andivi cuahan nuña. Ta nyehe ra Tatyí Ii Nyoo tari noo paloma, vachi noó siqui ra. ¹¹ Ta tyacú noo ndusu ityi andivi ta catyí ndusu cuan tyehe caa:

—Yoho cuvún Sehi ta cuñi xain chuun. Ta sií xaan cuñi chuhun —catyí ndusu cuan.

Nu nducú nyehe ra ña vaha chi ra Jesús

(Mt. 4.1-11; Lc. 4.1-13)

¹² Yaha cuan ta sacuhun Tatyí Ii Nyoo chi ra Jesús noo nu chiqui ndi.

¹³ Ta yucuan chinyaa ra uvi xico quiivi nu chiqui ndi cuan, nu yori ñáyivi iyó, maa ri quití iyó. Ta nducu nyehe cuihna chi ra. Ta yaha cuan ta cha coyo ángel ta catyíñuhu ra chi ra.

Nu quichaha saha tyiño ra Jesús ityi Galilea

(Mt. 4.12-17; Lc. 4.14-15)

¹⁴ Cha yaha catyihí ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyivi. ¹⁵ Ta catyí ra:

—Cha cha cuhva cha cua cunyaca ñaha Nyoo aña ndo. Yatyin ri nyaá ra chihin ndo. Ndu uvi iñi ndo cuatyí ndo, ta chino iñi ndo tuhun Nyoo cha sacacu aña ndo —catyí ra Jesús.

Nu cana ra Jesús chi cumi tahan ra catín tiyaca

(Mt. 4.18-22; Lc. 5.1-11)

¹⁶ Chicá noo ra Jesús yuhu miñi cha nañi Tyañuhu Galilea. Ta nanyehe ra chi ra Simón ta chi yañi ra, ra Andrés, cacañi ra yuhva ra nu ndutyá, vatyí ra catín tiyaca cacuví ra. ¹⁷ Ta catyí ra Jesús chi ra:

—Cunyicon ndo chii, ta yuhu cusacuvi vatyí tari ñihí ndo tiyaca, tyicuan caa cuñihi ndo añima ñáyivi, tava ndo chi ñu nu quiñi caa, na quihvi ñu cuenda Nyoo —catyí ra Jesús chi ra Simón ta chi ra Andrés cuan.

¹⁸ Caa cuhva ri cuan casandoꝝ ra yuhva ra, ta cuahan coyo ra chihin ra.

¹⁹ Yahá cuan ta chiin ri ca chica ra Jesús, ta nanyehę ra chi ra Jacobo, sehe ra Zebedeo, ta chi yañi ra, ra Juan. Cañohó ra chichi noo canoa canaquicú ra yuhva ra. ²⁰ Caná ra Jesús chi ra. Ta ninduvi tahan ra casandoꝝ ra sutu ra, ra Zebedeo, chichi canoa chihin ra catyinyeé chi ra. Ta cuahan coyo ra chihin ra Jesús.

Nu nduvahá noo ra yihí tatyí ña vaha añima
(Lc. 4.31-37)

²¹ Ta chaá coyo ra ñuu Capernaum. Ta cuví chi noo quiivi nyitatu ñáyivi, ta quihvi ra Jesús chichi vehe ñuhu, ta quichahá sañaha ra tuhun Nyoo chi ñáyivi. ²² Ta iyo cuñi ñu tuhun cahán ra, vatyí sañahá ra tari noo ra iyó vaha ityi chii cha cahán. Ña cahán ra cuhva cahán ra casacuahá cuenda ley vehe ñuhu. ²³ Chichi vehe ñuhu cuan ñohó noo ra yihí tatyí ña vaha añima. Ta caná cha ra ta catyí ra:

²⁴ —¿Ñáá tuhun cha tyihún chuun chihin ndi, yoho Jesús ra ñuu Nazaret? ¿Atu vachun vatyí sanaun chi ndi? Yuhu ñohó nui chuun, ta chité vatyí Sehe li Nyoo cuví chuun —catyí ra yihí tatyí ña vaha cuan chi ra Jesús.

²⁵ Nacahan ra Jesús ta catyí ra chi tatyí ña vaha cuan:

—¡Taxi ri! ¡Saña chi ra ndahvi chiña! —catyí ra.

²⁶ Ta tatyí ña vaha cuan, chihí tañi ra cuhvi cuan sahá chi, ta iyo canachaa tatyí cuan quita chi ra. ²⁷ Tandihí ñáyivi yuhvi xaan ñu cuví, ta candaca tuhun ñu chi tahan ñu, ta catyí ñu:

—¿Ñáá cha cuví ihya? ¿Ñana vaha tuhun cha sañahá ra ihya? ¡Vatyí

iyo vaha tunyee iñi chi ra, nyacua nya tatyí ña vaha, ta quichahá chi ra! —catyí ñu.

²⁸ Ta numi ri cachito ñáyivi tandihí ñuu cha iyó Galilea cuan tuhun ra Jesús.

Nu sanduvahá ra Jesús chi maha tyiso ra Simón Pedro

(Mt. 8.14-15; Lc. 4.38-39)

²⁹ Cuhva cha quita coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra. ³⁰ Ta maha tyiso ra Simón catuví ña nu chito, cuhvi ña chihin cahñi. Ta catyí ñu chi ra Jesús tyi cuhvi ña. ³¹ Tyicuan ta tuhva ra Jesús, ta tin ra ndaha ña. Ta nacoñehę ra chi ña. Ta caa cuhva ri cuan, tinyaá cahñi chi ña. Ta quichaha tyiñuhu ña chi ra.

Nu sanduvahá ra Jesús chi cuaha ñu cuhvi

(Mt. 8.16-17; Lc. 4.40-41)

³² Cuhva cha quee ñanyii ta cha cua cuaa, quichi nyaca ñu tandihí ñu cuhvi ta ñu yihí tatyí ña vaha nu nyaá ra Jesús. ³³ Ta tandihí ñáyivi ñuu cuan candu in ri ñu yuvehe cuan. ³⁴ Ta cuaha ñu cuhvi cha sin sin cuehe sanduvahá ra. Ta tava ñehe ra chi cuaha tatyí ña vaha, soco ña chahá ra cha cahan tatyí cuan, vatyí chitó cuan yóo ra cuví ra.

Nu cahán ra Jesús tuhun Nyoo ityi Galilea

(Lc. 4.42-44)

³⁵ Ta cha inga quiivi cuhva cha ni ñaa ca, ndicuita ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chi Nyoo. ³⁶ Ta ra Simón ta ra tahan ra cuahan coyo ra cua nanducu ra chi ra. ³⁷ Ta cuhva cha canañihí ra chi ra cacatyí ra chi ra:

—Tandihí ñáyivi nanducú ñu chuun —cacatyí ra chi ra Jesús.

³⁸ Soco maa ra catyí ra chi ra:

—Coho ndo inga ñuu cha nyicú yatyin ri ihya, vatyí cahan tiqui tuhun Nyoo yucuan, vatyí yucuan tyiño vachi —catyí ra Jesús chi ra.

³⁹ Yucuan chaha chica noo ra Jesús tandihí ri ñuu cha iyó Galilea, cahan ra tuhun Nyoo chichi vehe ñuhu tahan tahan ñuu. Ta tava ñehe ra tatyí ña vaha cha yihí aña ñáyivi.

Nu sanduvaha ra Jesús chi noo ra cha tyahyu coño

(Mt. 8.1-4; Lc. 5.12-16)

⁴⁰ Noo chaha tuhva noo ra cuhví cha tyahyu coño nu nyaá ra Jesús. Ta chicuiñi chiti ra nuu ra, ta catyí ra chi ra:

—Tatu cuñún, cuví sanduvahun chii —catyí ra.

⁴¹ Ta cundahvi cuñí ra Jesús nyehé ra chi ra, ta tyiso ra ndaha ra siqui ra, ta catyí ra:

—Cuñí sanduvahi chuun. Ta na nduvahun vityin ri —catyí ra chi ra.

⁴² Caa cuhva ri cha catyí ra tyehe caa, tinyaa cuehe cuan chi ra, ta nduvaha ra. ⁴³ Tyicuan ta catyí ra Jesús vatyí cha cuví cuhun ra, soco catyí xaan ra chi ra na sacuvi ra tyehe caa:

⁴⁴ —Nyehe. Yori chihin cahun tuhun. Soco cuahan nu nyaá tata sutu. Ta sañahan chuun chi ra, ta cuhvon cha tahan chi cuhvon na ndundiun nu Nyoo tari cuhva catyí nu ley cha tyaa ra Moisés, vatyí tacuhva coto tandihí ñáyivi tyi cha nduvahun chihin cuehe cuan —catyí ra Jesús chi ra.

⁴⁵ Soco ra cuan chahan ra, ta quichaha nacatyí ra chi tandihí ñáyivi. Yucuan chaha ña cuví ca quihvi ndichin ra Jesús chichi ni noo ñuu. Ta ityi chata ri ñuu chicá noo ra nu yori ñáyivi iyó, soco tandihí ri ityi quita coyo ñu, quichí nyehe ñu chi ra.

2

Nu sanduvaha ra Jesús chi noo ra cuhvi cha ña cuví nacanda

(Mt. 9.1-8; Lc. 5.17-26)

¹ Suhva quivi yaha ta quihvi ra Jesús inga chaha chichi ñuu Capernaum. Ta cachito ñáyivi tyi nyaá ra vehe. ² Ta numi ri candu in ri cuaha ñáyivi. Ta nyacua ña chitahan ñu, ni yuvehe. Ta maa ra Jesús cahan ra tuhun Nyoo chihin ñu. ³ Tyicuan

ta cumi tahan ra canyiso chi noo ra cuhví cha ña cuví nacanda, caquichí nyaca ra chi ra nu nyaá ra Jesús.

⁴ Soco ña cuví caquihvi ra nya nu nyaá ra Jesús cha cuenda vatyí tuvi xaan ñáyivi. Tyicuan ta candaa ra ityi xiñi vehe. Ta sacuachiyó ra suhva tyiyo. Ta sanoo ra chi ra cuhví cuan chihin chito. ⁵ Nyehe ra Jesús vatyí cachinó xaan iñi ra cuan. Ta catyí ra chi ra cuhví cuan:

—Cha ndachí cuatyun, suti —catyí ra Jesús chi ra.

⁶ Soco suhva ra sacuahá cuenda ley vehe ñuhu nyicú ra cuan, ta cachicá xiñi ra tyehe caa: ⁷ “¿Ñáá tuhun cha cañá iñi ra ihya cahan ra tyehe caa? Chicoo cuatyí ra nuu Nyoo chihin tuhun cahan ra vatyí yori cuví sandachi cuatyí, noo tuhun ri maa Nyoo cuví sandachi ra cuatyí”, cachicá xiñi ra. ⁸ Soco ra Jesús chitó ra cha cachicá xiñi ra. Ta catyí ra chi ra:

—¿Ñáá tuhun cha chicá xiñi nyoho tyicuan caa? ⁹ ¿Ñáá cha yí ca, cha catyí yo chi ra cuhví ihya vatyí cuatyí ra cha yaha ndachi, o cha catyí yo chi ra vatyí nducuita ra ta naquehen ra chito ra ta caca ra? ¹⁰ Vaha, vityin chihin cha sanduvahi chi ra ihya, cusañahi chi ndo vatyí yuhu ra cuví Rayí cha quichí nya gloria, iyó ityi chii cha sandachi cuatyí ñáyivi —catyí ra Jesús chi ra.

Tyicuan ta quichaha catyí ra chi ra cuhví cuan:

¹¹ —Catyí chi yoho, ndicuita, naquehen chiton, ta cuanuhu nya vehun —catyí ra Jesús chi ra.

¹² Ta ra cuhví cuan ndicuita ra. Naquehen ra chito ra, ta cuanuhu ra. Ta tandihí ñu nyehe ñu, ta iyo cuñí ñu, ta sacahnú ñu chi Nyoo, ta catyí ñu:

—Ni noo chaha ta nyehe ca yo cha tyehe caa —catyí ñu.

Nu cana ra Jesús chi ra Leví

(Mt. 9.9-13; Lc. 5.27-32)

¹³ Yaha cuan ta cuahan tucu ra Jesús inga chaha yuhu miñi cuan. Ta cuhva cha nataca ñáyivi nu nyaá ra, quichaha cahan ra nuu ñu.

¹⁴ Tyicuan ta cuahan ra ta nu yaha ra nanyehe ra chi ra Leví sehe ra Alfeo, nyaá ra nu sahá tyiño ra, tavá ra xuhun cuenda gobiernu ñuu Roma. Ta catyí ra Jesús chi ra:

—Coho chihin.

Tyicuan ta nducuita ra Leví, ta cuahan ra chihin ra.

¹⁵ Yaha cuan ta tahan chi nyaá ra Jesús chihin ra cachicá noo chihin ra cachachí ra nu mesa vehe ra Leví. Ta nyicú tucu cuaha ra catavá xuhun chihin inga ñáyivi iyó cuatyí. Vatyí cuaha xaan ñu nyicón chi ra. ¹⁶ Soco ra casacuahá cuenda ley vehe ñuhu, ta ra cacuví fariseo, ra cha quichahá xaan ley vehe ñuhu, cha canyehe ra vatyí chachí ra Jesús chihin ra catavá xuhun, ta ñu iyó cuatyí, ta cacatyí ra chi ra cachicá noo chihin ra Jesús:

—¿Yoso caa cha ra sacuaaha chi nyoho chachí ra ta chihí ra chihin ra catavá xuhun ta ñu iyó cuatyí?

¹⁷ Chiñi ra Jesús cha cacahan ra ta catyí ra:

—Ña chiñuhú doctor chi ñu ña cuhví, soco chiñuhú ra chi ñu cuhví. Vachi yuhu soco ñima cha cuenda cha vaha chi ñu vaha, soco cha cuenda cha vaha chi ñu iyó cuatyí —catyí ra Jesús chi ra.

Nu sañahá ra Jesús vatyí nya cha yaha canyaha ra chi ñu nyicón chi ra, tyicuan ta cutahan chi savaha ñu ayuno

(Mt. 9.14-15; Lc. 5.33-35)

¹⁸ Noo chaha, ra canyicón chi ra Juan ta ra canyicón chi ra fariseo, ña chachí ra ta nanducú ra chi Nyoo. Ta suhva ñáyivi quichí coyo ñu nu nyaá ra Jesús, ta ndaca tuhun ñu chi ra, ta catyí ñu chi ra:

—¿Ñáá tuhun cha ra canyicón chi ra Juan ta ra canyicón chi ra fariseo tuhvá ra savaha ra ayuno, ta ra cachicá noo chuhun ña tuhvá ra? —catyí ñu.

¹⁹ Ta nacahan ra Jesús ta catyí ra:

—Noo vico tandaha, ¿atu cuví cha ma cachi ra ñohó vico cha ñi ri ca cha nyaá ra cha cua tandaha cuan chihin ra? Tatu nyaá ca ra cua tandaha cuan

chihin ra, ma cuví cha ma cachi ra.

²⁰ Soco vachi chi quivi cha cutinyaa ra chi ra tandaha cuan nu nyicú ra tahan ra. Yucuan ndicha quivi coo cuhva cha ma cachi ra ta nanducu ra chi Nyoo —catyí ra Jesús chi ñu.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra
(Mt. 9.16-17; Lc. 5.36-39)

²¹ Catyí ra Jesús:

—Yori naquicu noo sahma chahnu chihin noo sahma chaa, vatyí cha chaa cuan nandiyí ta cahnya chi sahma chahnu, ta nu tahnya cuan cunducahnu ca. ²² Ta ñi ri ña tuhvá yo tyihi yo vinu chaa chichi ñi chahnu, vatyí vinu chaa chahnyá chi ñi, ta chati vinu, ta tiví ñi. Yucuan chaha cuñí chi cha tyihi yo vinu chaa chichi ñi chaa —catyí ra Jesús.

Nu catohon ra cachicá noo chihin ra Jesús yoco trigu quivi nyitatu ñáyivi
(Mt. 12.1-8; Lc. 6.1-5)

²³ Noo quivi cha tuhvá ñáyivi nyitatu, cuahan ra Jesús chicá ra mahñu nu iyó cha tachí ñáyivi. Ta ra cachicá noo chihin ra quichaha catohon ra yoco trigo cuan cuhva cha yahá coyo ra. ²⁴ Tyicuan ta quichaha cacatyí ra fariseo chi ra Jesús:

—¿Nyehe xihna! ¿Ñáá tuhun cha sacuví ra cachicá noo chuhun tyiño cha ña tahán chi sacuví yo quivi nyitatu yo? —cacatyí ra.

²⁵ Soco maa ra Jesús catyí ra chi ra:

—¿Atu ni noo chaha ta sacuaaha ca nyoho cha sacuví ra David chihin ra tahan ra noo quivi cha cachisoco vavaha ra? ²⁶ Quivi cha cuví ra Abiatar tyiño cha cuví ra nuu chi tata sutu, quihví ra David chichi vehe Nyoo. Ta chachí ra pan ii, cha tahán chi cachi maa ri maa ra cuví sutu. Ta chaha tucu ra cachi ra ndihi chihin ra —catyí ra Jesús.

²⁷ Ta catyí tucu ra Jesús chi ra:

—Chicoo quivi nyitatu yo, cuenda cha vaha chi ñáyivi, soco ñáyivi ña chicoo ñu cha cuenda cha vaha chi quivi nyitatu yo. ²⁸ Yucuan chaha yuhu Rayi cha quichí nya gloria, iyó

ityi chii cha catyi chi noo noo ndo ñáá cha sacuvi ndo quivi nyitatu yo —catyi ra Jesús.

3

Nu nduvaha noo ra na ityi inchiyo ndaha

(Mt. 12.9-14; Lc. 6.6-11)

¹ Quihvi ra Jesús inga chaha chichi noo vehe ñuhu. Ta yucuan nyaá noo ra na ityi inchiyo ndaha. ² Ta cañañi ra fariseo chi ra Jesús nyehé ra tatu sanduvaha ra chi ra quivi nyitatu ñu, vatyí tacuhva coo cuatyí tyaa ra siqui ra. ³ Tyicuan ta ra Jesús catyi ra chi ra na ityi ndaha cuan:

—Ndicuita ta cuinanyaa mahñu ihya.

⁴ Yahá cuan ta ndaca tuhun ra chi inga ñu cha tayucú cuan, ta catyi ra:

—¿Ñáá cha tahán chi sacuvi yo quivi nyitatu yo? ¿Atu sacuvi yo cha vaha o cha ña vaha? ¿Atu tahán chi sanduvaha yo ñáyivi o cha cahñi yo? —catyi ra Jesús.

Tyicuan ta taxi taxi maa candoo ñu cuan. ⁵ Tyicuan ta xaan nanyehe ra Jesús chi ñu, ta cuihya cuñi ra vatyí ña cuñi ñu cutuñi iñi ñu. Ta catyi ra chi ra cuan:

—Sanacaa ndahun.

Ta sanacaa ra, ta nduvaha ndaha ra. ⁶ Tyicuan ta quitá coyo ra fariseo, ta quichaha catyihí tahan ra tuhun chihin ra cuenda ra Herodes, yoso caa cacahñi ra chi ra Jesús.

Nu nyicú cuaha ñáyivi yuhu miñi

⁷ Soco ra Jesús cuahan ra chihin ra cachicá noo chihin ra yuhu miñi, ta cuaha ñáyivi ityi Galilea canyicón chi ra. ⁸ Ta cha chito ñáyivi tuhun nahnu cha sacuvi ra, cuaha xaan ñu quichi coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyo yuvi cahnu Jordán, ta ñuu Tiro ta ñuu Sidón ñandihí, vatyí cuñi ñu nyehe ñu chi ra. ⁹ Yucuan chaha catyi ra Jesús chi ra cachicá noo chihin ra na casanduvaha ra noo canoa, tacuhva vatyí tatu ndutihin xaan chihin ñáyivi, cuví quihvi ra chichi canoa cuan. ¹⁰ Vatyí cuaha

xaan ñu cha yahá sanduvaha ra, ta yucuan chaha tandihí ñu cuhvi cuahan ñu nu nyaá ra vatyí cuñi ñu tñin ñu chi ra tacuhva nduvaha ñu. ¹¹ Ta ñu yihí tatyí ña vaha añima, chicuiñi chiti ri ñu nuu ra, ta canachaa tatyí ña vaha cuan, ta catyi chi tyehe caa:

—¡Yoho cuvún Sehe Nyoo!

¹² Soco ra Jesús chasi ra yuhu tatyí cuan vatyí ma catyi ca chi yóo ra cuví ra.

Nu nacachi ra Jesús chi uchi uvi apóstol vatyí cacaca ra tyiño ra

(Mt. 10.1-4; Lc. 6.12-16)

¹³ Yahá cuan ta ndaa ra Jesús noo yucu ta cana ra chi ra cuñi maa ra nacachi ra. Ta quichi coyo ra nu nyaá ra. ¹⁴ Ta tyiso ra chi uchi uvi tahan ra vatyí cundihí ra chihin ra, ta vatyí tyatyíño ra chi ra na cucahan ra tuhun Nyoo. ¹⁵ Ta chaha ra ityi chi ra vatyí sanduvaha ra chi ñu cuhvi, ta tava ñehe ra chi tatyí ña vaha. ¹⁶ Ta ican ra ihya cacuvi ndi uchi uvi tahan ra: ra Simón cha sacunañi ra Jesús Pedro chi; ¹⁷ ra Jacobo ta yañi ra ra Juan, sehe ra Zebedeo. Ta Boanerges sacunañi ra chi ninduvi tahan ra ta cuñi chi catyi: ra ñihi cahán tari cahán savi, ¹⁸ ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihí cuenda ityi ra cuñi cahun cuatyí siqui gobiernu ñuu Roma cha nyacá ñaha chi ñu, ¹⁹ ta ra Judas Iscariote, ra cha naxico tuhun chi ra Jesús.

Nu tyaá ñáyivi cuatyí siqui ra Jesús, ta catyi ñu vatyí tunyee iñi cuihna iyó chi ra

(Mt. 12.22-32; Lc. 11.14-23; 12.10)

Yahá cuan ta quihvi ra Jesús noo vehe chihin ra cachicá noo chihin ra. ²⁰ Ta inga chaha nataca cuaha ñáyivi, ta nyacua ni ña cuví ca cachi ra. ²¹ Cha cachito ñáyivi chi ra Jesús vatyí nyaá ra yucuan, quichi coyo ñu vatyí cunuhun ra chihin ñu, vatyí catyi ñáyivi chi ñu tyi nduloco ra.

²² Ta suhva ra casacuahá cuenda ley vehe ñuhu Jerusalén cha quichi coyo suri tyicuan caa cacatyí ra:

—Ra ihya, ra Beelzebú ra cuví nuu chi cuihna yihí chi ra. Ta chihin tun-yeé iñi cuihna tava ñehe ra tatyí ña vaha —cacatyí ra.

²³ Tyicuan ta cana ra Jesús chi ra, ta catyí ra chi ra:

—¿Yoso caa, atu tavá ñehe cuihna suri chi ra tahan maa ra? Ma sacuvi cuihna tyicuan caa. ²⁴ Tatu noo gobiernu cacusiin ra, ta cacañí tahan ra chihin tahan ra, gobiernu cuan ña naha cuacunyaca ñaha ra. ²⁵ O tatu ñáyivi noo vehe, ña in ri cuví ñu chihin tahan ñu ta cañi tahan ñu, cutivi nu nyicú ñu. ²⁶ Ta tatu cuihna cacusiin ra ta canducuita ra siqui tahan ra, ¿yoso caa cucuvi chi ra? Cundihi tuhun ra.

²⁷ Yori cuví quihvi chichi vehe noo ra ñihi tari cuihna ta tinyaa ra cha chii ra, tatu ma cuhñi xihna ra chi ra. Yucuan ndicha ta cuví tinyaa yo cha chii ra.

²⁸ 'Cha ndicha catyí chi ndo vatyi cuví coo ticahnu iñi tandihi nuu catyí ñáyivi, ta tandihi cha quiñi caa cha cahán ñu. ²⁹ Soco ñu cahán ña vaha siqui Tatyí Ii Nyoo, ma cuví maa coo ticahnu iñi cuenda cuan, soco tyicuan ri maa coo cuatyí ñu —catyí ra Jesús.

³⁰ Tyicuan caa catyí ra Jesús chi ra casacuahá cuenda ley vehe ñuhu, vatyi maa ra cacatyí ra vatyi ñohó noo tatyí ña vaha chi ra.

Yóo ñu cuví sihi ra Jesús ta yañi ra
(Mt. 12.46-50; Lc. 8.19-21)

³¹ Tyicuan ta chaq coyo sihi ra Jesús ta yañi ra, soco ndoo ñu ityi chata vehe, ta tachí ñu cucana chi ra. ³² Ta ra nyicú nicachico nu nyaá ra Jesús cacatyí ra chi ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyí ra chi ra.

³³ Soco maa ra catyí ra:

—¿Yóo ñu cuví sihi ta yañi? —catyí ra.

³⁴ Tyicuan ta nanyehę ra chi ñu nyicú nicachico, ta catyí ra:

—Ican ñu ihya cuví sihi ta yañi.

³⁵ Vatyi savahri ñu sacuvi cuhva cuñi

Nyoo, ican ñu cuan cuví yañi, ta cuhve, ta sihi —catyí ra Jesús.

4

Tari noo ra chicá noo tachí, tyicuan caa cuví ra cahán tuhun Nyoo
(Mt. 13.1-9; Lc. 8.4-8)

¹ Inga chaha quichaha sañaha ra Jesús yuhu miñi, ta ndu in ri cuaha ñáyivi nu nyaá ra. Yucuan chaha quihvi ra chichi noo canoa cha tacaá nu ndutya yuhu miñi cuan. Ta chicunyaá ra, ta tandihi ñáyivi ndoo ñu nu ñiti. ² Tyicuan ta cuaha cha sañaha ra chi ñu chihin cuhva ri. Ta nu sañahá ra chi ñu, ta catyí ra chi ñu:

³ —Tyasoho ndo tuhun ihya. Minoo ra quitá ra vehe ra, cuahan ra nu iyó tyiño sahá ra. Ta quichaha quití ra chiti trigu nu ñuhú ra. ⁴ Ta ityi cuahan ra quití ra, suhva chiti cuan canacooyo yuhu ityi, ta quichí coyo saa ta cachachí ti. ⁵ Suhva ca chiti canacooyo ticu yuu nu ña cuaha ñuhú yihí. Ta chiti cuan numi ri caña, vatyi ña cono xaan yihí ñuhú cuan. ⁶ Soco cuhva cha caña ñanyii, na ityi chi vatyi ña cono yihí yoho chi. ⁷ Ta suhva ca chiti canacooyo chichi tu iñu. Ta chahnu tu iñu cuan, ta chasi tun nuu trigo cuan. Yucuan chaha ña chiyo chiti tun. ⁸ Soco suhva chiti cha canacooyo nu ñuhú vaha. Ta caña ta chahnu. Ta vaha chahá tun chiti. Suhva tun chahá tun oco uchi chiti cha noo noo tun. Inga tun chaha tun uñi xico chiti. Ta inga tun chahá ciento chiti —catyí ra Jesús chi ñu.

⁹ Ta catyí tucu ra chi ñu:

—Tatu cutuñi iñi ndo, tyasoho ndo tuhun cahín.

Nu sacotó ra Jesús ñáá cuenda sañahá ra chihin cuhva ri chi ñáyivi
(Mt. 13.10-17; Lc. 8.9-10)

¹⁰ Yaha cuan ta ndoo maa ri maa ra Jesús chihin ñu nyicón chi ra ta ndi uchi uvi tahan ra chicá noo chihin ra. Ta candacá tuhun ñu chi ra ñáá cha cuñi chi catyí tuhun cuan. ¹¹ Ta catyí ra chi ñu:

—Chi nyoho sacotó Nyoo tuhun xehe yoso caa nyacá ñaha ra añima ñáyivi. Soco chi ñu cha ña chinó iñi chi ra, maa maa ri chihin cuhva ri sañahí chi ñu. ¹² Vatyí tatu nyehé ñu soco cuví chi tari cha ña nyehé ñu, ta tatu chiñí ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyí ñu —catyí ra Jesús chi ñu.

Nu chaha ra Jesús cuenda yoso caa cuahan tuhun ra tachí chiti cuan
(Mt. 13.18-23; Lc. 8.11-15)

¹³ Ta catyí tucu ra chi ñu:

—¿Atu ña cutuñi iñi nyoho tuhun ihya? Tatu tyicuan caa ña cutuñi iñi ndo, ¿yoso caa cuví cutuñi ini ndo tandihí inga tuhun sañahí chi ndo?

¹⁴ Ra cha tachí chiti trigu cuan cuví ra tari noo ra cahán tuhun Nyoo.

¹⁵ Yihí ñáyivi cuví ñu tari nu canacoyo chiti yuhu ityi: chiñí ñu tuhun Nyoo, soco cha yaha chiñi ñu, quichi cuihna ta tinyaa ra tuhun Nyoo cha tachí ra añima ñu. ¹⁶ Inga ñáyivi cuví ñu tari nu canacoyo chiti ticu yuu: chiñí ñu tuhun Nyoo ta si cuñi ñu natiin cuenda ñu noo ri cuhva. ¹⁷ Vatyí nu caña chiti ticu yuu cuan, chiin ri ñuhú yihí chaha, yucuan chaha caña soco ña cuví tyihí yoho vaha chi. Ta tyicuan caa ñu cuan, suhva ri quivi chino iñi ñu. Soco quivi vachi tindoho siqui ñu, o satasi iñi ñáyivi chi ñu cha cuenda tuhun Nyoo, sandihí ri ñu tuhun cha chinó iñi ñu. ¹⁸ Ta inga ñu cuví ñu tari nu canacoyo chiti chichi tu iñu: chiñí ñu tuhun Nyoo, ¹⁹ soco cutyoño ca iñi ñu cha cuenda tindoho cha iyó siqui ñuhu ñáyivi ihya. Cha tyayí sandaví ñaha chi ñu, ta cuñi ñu tandihí ri nuu cha iyó. Tandihí ihya quihví xiñi ñu ta ña nyaá ca xiñi ñu tuhun Nyoo, ta ña chahá chi sacuvi ñu cha vaha cha cuenda cuan. ²⁰ Soco yihí ñu cha chiñí ñu tuhun Nyoo ta naquehén cuenda ñu, ta vaha sacuvi ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha caña ta chaha tun oco uchi tahan chiti tahan tahan tun. Ta inga

ñu cuví ñu tari yutun cha chaha uñi xico. Ta inga ñu tari yutun cha chaha ciento.

Ma tyihi xehe yo ñuhu cha sandundichin Nyoo añima yo coto tinyaa ra

(Lc. 8.16-18)

²¹ Ta catyí tucu ra chi ñu:

—¿Atu quichi nyaca yo noo tima vatyí cananyaa yo chichi noo cajón o xiu chito? Ñima. Tima cuan cuñi chi tyiso yo noo nu sucun vatyí na sacundichin chi chichi vehe. ²² Ta tyicuan caa tucu, ñahri cha ñohó xehe, ta cuñun, tyi ma natuvi. Ta ñahri noo tuhun xehe, ta cuñun, tyi ma coto yo.

²³ Nyoho cha cutuñi iñi ndo, tyasoho ndo tuhun cahín —catyí ra Jesús chi ñu.

²⁴ Catyí tucu ra tyehe caa:

—Tyasoho vaha ndo tuhun cahín. Yoso cuhva sacuví ndo chi ñáyivi, yucuan cuhva sacuvi Nyoo chihin ndo. Ta cuaha ca cucuhva ra chi ndo tatu tyasohó ndo cha cahán ra. ²⁵ Vatyí ñu tyasohó cha cahín, cuaha ca cuhva Nyoo chi ñu. Soco ñu ña tyasohó, cutinyaa ndihí ra cha chiin cha cha yaha chaha ra chi ñu.

Nu sañahá ra Jesús cuhva chahnu noo chiti yutun

²⁶ Catyí tucu ra Jesús tyehe caa:

—Cha nyacá ñaha Nyoo añima ñáyivi cuví chi tari noo ra tachí noo chiti chichi ñuhú. ²⁷ Ta cuahan ra cua cusu ra. Yaha cuan ta ndicuita ra. Ta cuaha quivi yaha. Ta caña chiti cuan, ta chahnu yutun. Soco maa ra ña chitó ra yoso caa chahnu tun. ²⁸ Cha cuenda vatyí maa ñuhú cuan sacuvahá chi tun tyicuan ri caa. Xihna ca quitá xityin tun, ta yaha cuan yoco tun, yaha cuan ta quitá chiti nu yoco cuan. ²⁹ Ta tatu cha chityi chiti cuan, cutohon ra vatyí cha cha quivi cha coyo —catyí ra Jesús.

Nu sañahá ra Jesús vatyí tari chahnu noo chiti mostaza, tyicuan caa nducuaaha nu nyacá ñaha Nyoo

(Mt. 13.31-32; Lc. 13.18-19)

³⁰ Ta catyí tucu ra Jesús:

—¿Ñáá chihin sanandiqui tahir cha nyacá ñaha Nyoo añima yo? ¿Ñáá chihin sandu inuu ri yo? ³¹ Cuví chi tari noo chiti mostaza cha tachi yo nu ñuhú. Ican chiti cuan, lee ca cha nuu tandihi chiti iyó siqui ñuhu ñayivi. ³² Soco tatu tachi yo, caña ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chicó nu tatyí cuví nyitatu ti nu vati tun.

Yoso caa sañahá ra Jesús chihin cuhva ri chi ñáyivi
(Mt. 13.34-35)

³³ Tyehe caa sañahá ra Jesús chi ñu, chihin cuaha cuhva, nyacua nya nu cuví cutuñi ñi ñu. ³⁴ Ñahri maa cha catyí ra chi ñu tatu ñima chihin noo cuhva. Soco chi ra cachicá noo chihin ra, nacatyí vaha ra chi ra.

Nu sacutaxín ra Jesús tatyí ta miñi
(Mt. 8.23-27; Lc. 8.22-25)

³⁵ Suri maa quivi cuan, cuhva cha cuaa, catyí ra chi ra cachicá noo chihin ra:

—Coho ndo inga chiyo miñi cuan.

³⁶ Tyicuan ta casandoo ra chi ñáyivi. Ta cuahan ra Jesús chihin ra chichi canoa cha catuvi cuan. Ta cuahan tucu inga canoa chihin ra.

³⁷ Ta quichaha caa noo tatyí ñihi xaan, ta quichaha quihvi ndutya chichi canoa cuan, ta quichaha chitu.

³⁸ Ta ra Jesús quixí ra siqui noo cabecera cha nyaá inchiyo xiin canoa cuan. Ta casandoyo ra chi ra, ta cacatyí ra:

—¡Maestro! ¿atu ñahri cuendon cha cuñi nyee yo?

³⁹ Tyicuan ta ndicuita ra Jesús ta cahan ra chi tatyí cuan na cutaxin. Ta catyí ra chi ndutya miñi cuan tyehe caa:

—¡Taxi ri! ¡Taxi cunyaun! —catyí ra.

Ta tatyí cuan cutaxin, ta taxi taxi cuví. ⁴⁰ Tyicuan ta catyí ra Jesús chi ra cachicá noo chihin ra:

—¿Ñáá tuhun cha yuhví xaan ndo? ¿Atu ta chino ca ñi ndo? —catyí ra chi ra.

⁴¹ Soco maa ra cayuhví xaan ra cha cuví cuan. Ta cacatyí ra chi ra tahan ra:

—¿Yóó ra cuví ra ihya, vatyí nyacua nya tatyí ta miñi quichahá chi ra? —cacatyí ra.

5

Nu nduvaha ra yihí tatyí ña vaha chii ñuu Gadara
(Mt. 8.28-34; Lc. 8.26-39)

¹ Chaá coyo ra yuhu miñi, inga chiyo nu nyaá ñuu Gadara. ² Ta quita ri ra Jesús chichi canoa, ta quita noo ra nu ñaña cuan ta chaá ra nu nanyaá ra Jesús. Ta yihí noo tatyí ña vaha añima ra. ³ Ta nu ñaña cuan iyó maa ra cuan. Ta yori maa cuví chasaha chi ra, ni ri chihin cadena. ⁴ Cuaha xaan chaha chahñi ñu chaha ra ta ndaha ra chihin cadena, soco chahnya ra. Yiquin maa sacuvi ra. Ta yori maa cuví chasaha chi ra. ⁵ Ñicahñu ta cha cuaa chicá noo ra canachaá ra nya nu yucu ta nya nu ñaña. Ta sañicuehé ra suri chi maa ra chihin yuu. ⁶ Soco cañi ca nanyehé ra chi ra Jesús, ta chino vavaha ra cha ra. Ta chicuñi chiti ra nuu ra. ⁷ Ta cana cha ra ta catyí ra:

—¿Ñáá tuhun cha tyihún chuun chihin yuhu, yoho Jesús, Sehe Nyoo ra cuví nuu? Chacú ndahvi nuun chihin sivi Nyoo, ma sanyehun tindocho chii.

⁸ Catyí tatyí cuan tyehe caa vatyí ra Jesús cha catyí ra chi ra:

—¡Saña chi ra chiña, yoho tatyí ña vaha! —catyí ra.

⁹ Ta ra Jesús ndaca tuhun ra chi ra, ta catyí ra:

—¿Ñáá nañún?

Ta nacahan tatyí ña vaha cuan:

—Legión nañi, vatyí cuaha xaan ndi —catyí chi chi ra Jesús.

¹⁰ Ta chacu ndahvi tatyí ña vaha cuan nuu ra Jesús tacuhva cha ma tachi ra chi chi nu cañi. ¹¹ Ta yatyin ri yucu cuan nyicú cuaha xaan quini cachachí ti. ¹² Yucuan chaha catyí tatyí ña vaha cuan chi ra Jesús tyehe caa:

—Tachi chi ndi na quihvi ndi quini cuan —catyí tatyí cuan.

¹³ Tyicuan ta chaha ra Jesús, ta tatyí cuan quita coyo chi ra cuan, ta quihví chi quini cuan. Ta cha uvi mil quini nyicú cuan, cachino ti, ta canacoyo ti chichi noo xahva yuhu miñi cuan, ta cachihí ti chichi ndutya cuan.

¹⁴ Tyicuan ta ra sahá cumi quini cuan, chino xaan ra chihin cha yuhví ra, ta chinacatyí ra chi ñáyivi ñuu cuan ta ñu ñohó nu chiqui. Ta quichí coyo ñáyivi, quichí nyehe ñu ñáá cha cuví. ¹⁵ Cuhva cha cha coyo ñu nu nyaá ra Jesús, nanyehe ñu chi ra cha yihí tatyí ña vaha cuan chi. Ta vityin nyaá ra ñihnó ra sahma, ta cachi vaha iyó xiñi ra. Ta yuhví xaan ñu cuví. ¹⁶ Ta ñu cha nyehe cha cuví chi ra cuan ta chi quini cuan, canacatyí ñu chi tandihí ca ñu. ¹⁷ Tyicuan ta quichaha chacu ndahvi ñu nuu ra Jesús, na quita ra ñuu ñu.

¹⁸ Ta kuhva cha cua quihví ra Jesús chichi canoa, ra cha yihí tatyí ña vaha cuan chi chacu ndahvi ra nuu ra Jesús na kuhva ra cuhun ra chihin ra. ¹⁹ Soco ra Jesús ña chaha ra cuhun ra, ta catyí ra chi ra:

—Cuanuhu nya vehun, nu nyaá ñáyivi chuun, ta nacatyun chi ñu tandihí cha sacuví Sutu yo Nyoo chuhun, ta yoso caa cundahví cuñi ra nyehe ra chuun. ²⁰ Ta ra cuan cuahan ra ta quichaha nacatyí ra chi ñáyivi tandihí ñuu Decápolis tandihí cha sacuví ra Jesús chihin ra. Ta tandihí ñu, iyo cuñi ñu.

Nu nduvaha sehe ra Jairo ta ñaha sihi cha tñin sahma ra Jesús (Mt. 9.18-26; Lc. 8.40-56)

²¹ Ta kuhva cha nachaa ra Jesús chihin canoa nya inga chiyo miñi cuan, cha coyo cuaha ñáyivi nu nyaá ra. Ta ndoo ra yuhu miñi cuan. ²² Tyicuan ta cha noo ra cuví nuu vehe ñuhu. Nañi ra Jairo. Ta kuhva cha nanyehe ra chi ra Jesús, chicuiñi chiti ra nuu ra. ²³ Ta chacu ndahvi ra nuu ra ta catyí ra:

—Cha cuñi cúvi sehi. Coho chihin ta tyison ndahun siqui ña na nduvaha ña ta ma cúvi ña.

²⁴ Tyicuan ta cuahan ra Jesús chihin ra, soco cuaha ñáyivi nyicón chi ra, ta nyacua nañi tahan ri ca maa ñu. ²⁵ Ta mahñu ñáyivi cuan ñohó noo ñaha cha cuhví. Cha quita uchi uvi cuiya ndoho ña cuehe cha chatí niñi ña. ²⁶ Ta cuaha tindoho nyehe ña cha cuaha xaan doctor nyehe chi ña. Ta cha sanaa ña tandihí maa cha iyó chi ña, soco ñahri maa tyinyee chi chi ña. Soco ñihi ndihí ca nanduvi. ²⁷ Cuhva cha chitó ña tuhun milagru cha sacuví ra Jesús, tuhva ña ityi chata ra ta tñin ña sahma ra. ²⁸ Vatyí chicá xiñi ña: “Ma chihin cha tñin ri sahma ra, ta nduvahi”, chicá xiñi ña. ²⁹ Ta caa kuhva ri cha tñin ña sahma ra ta cha chatí niñi ña cutaxin. Ta tuví iñi coño ñuhu ña tyi cha nduvaha ña chihin cuehe cuan. ³⁰ Tyicuan ta tuví iñi ra Jesús vatyí nduvaha noo ñáyivi chihin suhva tunyee iñi cha quita chi ra. Tyicuan ta nanyehe ra ityi chata ra ta quichaha ndaca tuhun ra:

—¿Yóo cha tñin sahme? —catyí ra.

³¹ Tyicuan ta ra cachicá noo chihin ra quichaha catyí ra chi ra:

—Cha nyehun vatyí ñáyivi tyan-dahá chuun tyi tñin xaan. ¿Yoso caa cha ndaca tuhun: “Yóo cha tñin chii”? —cacatyí ra chi ra.

³² Soco ra Jesús nyehe ra ityi cuan ityi ihya, vatyí cuñi ra nyehe ra yóo cha tñin chi ra. ³³ Tyicuan ta ñaha cuan niñi ña chihin cha yuhví ña vatyí chitó ña ñáá cha cuví chi ña. Ta chahan ña chicuiñi chiti ña nuu ra. Ta nacatyí ña tandihí cha ndicha chi ra. ³⁴ Ta catyí ra Jesús chi ña:

—Cha nduvahun, Sihi, vatyí chinó iñun. Cuahan, ta ma caca xiñun, vatyí cha nduvahun chihin cuehe cha ndohun —catyí ra Jesús chi ña.

³⁵ Ni cahán ca ra Jesús ta cha coyo ñu vehe ra cuví nuu cuan, ta catyí ñu chi ra cha cuví sutu cha luhlu cuan:

—Sehun, cha chihí ña. Náá ri ca tuhun cha sayangon chí Ra Sacuaha chiña —catyí ñu.

³⁶ Soco ra Jesús ña quichaha ra cha cahan ñu, ta catyí ra chi ra cuví nuu vehe ñuhu cuan:

—Ma yuhvun. Chino iñun —catyí ra chi ra.

³⁷ Ta ña chaha ra yóo ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo. ³⁸ Ta cuhva cha cachaa coyo ra vehe ra cuví nuu vehe ñuhu, nyehe ra cha chacú chaa ñáyivi ta caná chaa ñu. ³⁹ Quihvi ra ta catyí ra chi ñu:

—¿Ñáa tuhun cha iyo xaan cuví ndo, ta chacú ndo tyiña caa? Cuehe luhlu ihya, ña chihí cue, quixí cue —catyí ra chi ñu.

⁴⁰ Soco chacú cuehe ri ñu nyehe ñu chi ra. Tyicuan ta ra Jesús tava ra chi tandihí ñu, ta quehen ra chi sutu cue ta sihi cue ta chi ra cha cha coyo chihin ra, ta quihvi coyo ra nu catuvi cue. ⁴¹ Ta tñin ra ndaha cue, ta catyí ra chi cue:

—Talita cumi —ta cuñí chi catyí cuan: Catyí chuun, yoho cuehe luhlu, jndicuita!

⁴² Ta caa cuhva ri cua ndicuita cuehe luhlu cuan. Iyó uchi uvi cuiya cue. Ta cuví nacaca cue. Ta ñáyivi iyó xaan cuñí ñu. ⁴³ Soco ra Jesús ñihi chaha ra tuhun chi ñu, tyi ma cahan maa ñu tuhun, ta catyí ra chi ñu na cuhva ñu cha cachi cue.

6

Nu ñoho ra Jesús ñuu Nazaret (Mt. 13.53-58; Lc. 4.16-30)

¹ Tyicuan caa cuví ta quita ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra. ² Ta cha quivi nyitatu ñáyivi, ta quichaha sañaha ra chichi vehe ñuhu. Ta cuaha ñáyivi chiñi tuhun cahan ra, ta iyo cuñí ñu, ta catyí ñu:

—¿Nya cutuhva ra ihya tandihí tuhun ihya? ¿Yóo cha chaha cha chiñi tuñi ihya chi ra? ¿Yoso caa cha cuví sacuvi ra milagru nahnu xaan ihya? ³ ¿Atu ñima ra satyá vitu cuan cuví ra? Sehe cu María cuví chi ra. Ta yañi ra Jacobo, ta ra José, ta ra Judas, ta ra Simón, ta cuhva ra iyó tucu ñu chihin yo ihya —catyí ñu.

Ta quiñi cuñí ñu nyehe ñu chi ra. ⁴ Soco catyí ra Jesús chi ñu:

—Tandihí ñu inga ñuu sahá ñu ñáyivi chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyivi chi ra —catyí ra Jesús.

⁵ Ta ña cuví sacuvi ra ni noo milagru yucuan, soco tyiso ra ndaha ra siqui suhva ri ñu cuhvi, ta sanduvaha ra chi ñu. ⁶ Ta iyo cuñí ra vatyí ñu ñuu ra ña chinó iñi ñu chi ra. Ta chahan ra tandihí ñuu nyihi cha nyicú yatyin ri cuan, ta sañaha ra.

Nu tyatyíño ra Jesús chi ra cachicá noo chihin ra nu cucahan ra tuhun Nyoo

(Mt. 10.5-15; Lc. 9.1-6)

⁷ Yaha cuan ta cana ra chi ndi uchi uvi ra chicá noo chihin ra, ta quichaha tachi ra chi uvi uvi ra. Ta chaha ra ityi chi ra vatyí tava ñehe ra chi tatyí ña vaha yihí añima ñáyivi. ⁸ Ta catyí ra chi ra vatyí ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tuvi ra cuiso ra. ⁹ Ndichan ri quihí chaha ra. Ta noo ri sahma cuihno ra, ñima uvi tahan. ¹⁰ Ta catyí ra chi ra:

—Cuhva cha chaa ndo noo ñuu ta quihvi ndo noo vehe, ndoo ndo yucuan ri nyacua nya cha quita ndo ñuu cuan. ¹¹ Ta tatu ñáyivi iyó noo ñuu, ña cuñí ñu tñin cuenda ñu chi ndo, ta ña cuñí ñu tyasoho ñu tuhun cahan ndo, quita ndo yucuan ta naquisi ndo ñiyaca chaha ndo tari noo seña vatyí ña vaha sacuvi ñu. Cha ndicha catyí chi ndo, vatyí quivi cucutuñi chi ñáyivi iyó siqui ñuhu ñáyivi, ñu cha ma cuñi tñin cuenda tuhun cahan ndo, cuaha ca tindoho cunyehe ñu, ta ñima ca ñu ñuu Sodoma ta ñuu Gomorra —catyí ra Jesús chi ra.

¹² Tyicuan ta quita coyo ra ta chichahan ra tuhun Nyoo chihin ñáyivi na ndu uvi iñi ñu cuatyí ñu, ta na nanducu ñu chi Nyoo. ¹³ Ta catava ñehe ra cuaha tatyí ña vaha añima ñáyivi. Ta cahyu ra acetye chi cuaha ñu cuhvi ta casanduvaha ra chi ñu.

Nu catyí chi yoso caa chihí ra Juan ra sacondutyá chi ñáyivi

(Mt. 14.1-12; Lc. 9.7-9)

¹⁴ Chito rey Herodes tuhun ra Jesús vatyí tandihí ñáyivi cahán ñu tuhun cha sacuví ra, ta chicá xiñi ra tyehe caa:

—Ra Juan ra sacondutyá chi ñáyivi cuví ra cuan. Nandoto ra cha yaha chihí ra, yucuan chaha iyó tunyee iñi chi ra —chicá iñi ra.

¹⁵ Inga ñu catyí ñu:

—Ra Elías profeta Nyoo ta cha naha cuví ra ihya —catyí ñu.

Ta inga ñu catyí ñu:

—Inga profeta Nyoo cuví ra, tari ra profeta Nyoo ra chiyó ta cha naha.

¹⁶ Cuhva cha chiñi ra Herodes tuhun ihya, catyí ra:

—Ican ra cuan cuví ra Juan cha tyihí tyiño tahnya sucun, ta vityin nandoto ra —catyí ra Herodes.

¹⁷ Tyicuan caa catyí ra Herodes vatyí cha catyí cu Herodías, ta tyihí ra chi ra Juan vehe caa ta chahñi ra chi ra chihin cadena. Cu Herodías cuan, ñasihí ra Felipe, yañi ra Herodes, cuví chi ña. Soco ra Herodes quehen ra chi ña vatyí cuví ña ñasihí ra. ¹⁸ Ta ra Juan catyí ra chi ra Herodes vatyí ña vaha cha cunyaa ra chihin ñasihí yañi ra.

¹⁹ Yucuan chaha cu Herodías tasi xaan cuñi ña nyehe ña chi ra Juan, ta cuñi ña cahñi ña chi ra, soco ña cuví.

²⁰ Vatyí ra Herodes chitó ra vatyí ra Juan cuví ra noo ra vaha, ra ii, ta yuhví ra chi ra. Yucuan chaha sahá cuenda vaha ra chi ra, ña chaha ra cha sacuvi ña cha cuñi maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñi ra chiñi ra cha cahán ra. ²¹ Soco cu Herodías ñihí ña noo cuhva nu ndihí ra Herodes cuiya, vatyí sacco ra noo vico cha cuenda ra cacuví tyiño, ta comandante cuenda sindaro, ta ra nahnu ca ityi Galilea cuan. ²²⁻²³ Ta quihví sehe cu Herodías vico cuan, ta quichaha chita chaha ña. Ta tahañ xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyí cuhva ra ñáa cha cacan ña chi ra. Ta catyí ra chi ña:

—Çacan ñáa cha cuñún chii, ta cuhve chuun —catyí ra chi ña.

Ta catyí ra vatyí cuhva ra ñáa ri cha cacan ña, vasi sava ñuhú ñuu nu nyacá ñaha ra. ²⁴ Quita ña ta catyí ña chi sihi ña:

—¿Ñáa cha caquen chi ra? —catyí ña.

Ta catyí sihi ña:

—Çacan xiñi ra Juan ra sacondutyá —catyí ña chi sehe ña.

²⁵ Ta numi ri ndihví ñaha tyivaa cuan nu nyaá rey Herodes, ta catyí ña chi ra:

—Cuñi vatyí cahnyon xiñi ra Juan ra sacondutyá ta tyihun nuu noo coho ta cuhvon chii vityin vityin —catyí ña chi ra.

²⁶ Tyicuan ta nducuihya xaan iñi rey cuan. Soco cha tyaa ra cuhva vatyí cuhva ra chi ña, ta sün ri cachiñi ra canyicú chihin ra, ta ña cuñi ra nacahnu ra cha catyí ra chi ña.

²⁷ Numi ri tachí rey cuan tyiño chi noo sindaro na quichi nyaca ra xiñi ra Juan. ²⁸ Chahan sindaro cuan chichi vehe caa cuan, ta chahnya ra xiñi ra Juan. Ta quichí nyaca ra, yihí nu noo coho. Tyicuan ta chaha ra chi ñaha tyivaa cuan, ta maa ña nacuhva ña chi sihi ña.

²⁹ Cha chito ra canyicón chi ra Juan, chahan coyo ra chinaquehen ra coño ñuhu ra, ta cachityihí ra chichi ñuhú.

Nu chaha ra Jesús cha cachi ohon mil rayi

(Mt. 14.13-21; Lc. 9.10-17; Jn. 6.1-14)

³⁰ Yaha cuan ta ndu ñin ri ra cha tyatyíño ra Jesús chi chihin ra, ta canacatyí ra tandihí cha casacuví ra, ta cha casañaha ra nu chahan ra chichahan ra tuhun Nyoo. ³¹ Ta catyí ra Jesús chi ra:

—Ñaha ndo, na nyitatu yo chiin noo nu taxi ri iyó —catyí ra chi ra.

Tyicuan caa catyí ra vatyí cuaha ñáyivi cuahan ta vachi ñu, ta nyacua ña cacuyatyí ra cha cacachi ra.

³² Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu

yorí maa ñáyiví nyicú, minoo nu taxi ri. ³³ Soco cuaha ñu nyehe nu quitá ra. Ta canicohon nuu ñu chi ra. Ta cuahan coyo vavaha ñu chihin chaha ñu, quitá ñu tandihí ñuu ta xihna ca maa ñu chaá coyo. ³⁴ Cuhva cha chaá ra Jesús, quitá ra chichi canoa ta nanyehe ra tyí cuaha xaan ñu nyicú yucuan. Ta cundahví cuñí ra nyehé ra chí ñu, vatyi nyicú ñu tari mbee cha yori ra sahá cumi chí tí. Ta quichaha sañaha ra cuaha tuhun chí ñu. ³⁵ Cha cua íñi xaan, ta ra cachicá noo chihin ra catuhvá ra ta catyí ra chí ra:

—Cha íñi xaan, ta yucu taxin cuví ihya. ³⁶ Catyí chí ñu, na cuhun ñu ñuu cha nyicú yatyin ihya, ta sata ñu pan, vatyi ñahri cha cachi ñu iyó ihya —cacatyí ra chí ra.

³⁷ Soco nacahan ra Jesús, ta catyí ra:

—Cuhva maa ndo cha cachi ñu.

Canacahan ra ta catyí ra:

—Vasi saha tyiño ndi íñu yoo, soco ma caña xuhun cha cusata ndi pan cachi tandihí ñu ihya.

³⁸ Ta catyí ra Jesús chí ra:

—¿Yoso tahan pan nyisó ndo? Cuahan ndo cua nyehe ndo.

Ta cuhva cha cachito ra yoso tahan, cacatyí ra chí ra:

—Ohon tahan pan ta uvi tiyaca.

³⁹ Tyicuan ta catyí ra na cunyicú noo noo ticuítí ñu nu cuhu cuí cuan. ⁴⁰ Ta chicunyicú ñu cuenda ciento ta cuenda uvi xico uchi ñu. ⁴¹ Tyicuan ta quehen ra Jesús ndi ohon tahan pan cuan ta ninduvi tiyaca cuan. Ta nanyehe ndaa ra andiví, ta nacuhvá ra tyahví nyoo chí Nyoo, ta tahví ra pan cuan, ta chaha ra chí ra cachicá noo chihin ra na casacha ra. Tyicuan ta casacha ra chí ñáyiví cuan. Yaha cuan ta casacha tucu ra ninduvi tiyaca cuan chí ñu. ⁴² Tandihí ñu cachachí ta ndaha íñi ñu. ⁴³ Ta nyacua ndoo ca ta casacutu ra uchi uvi tica chihin yiquin pan ta tiyaca. ⁴⁴ Ta ohon mil rayí cachachí pan cuan.

*Nu chicá ra Jesús nu miñi
(Mt. 14.22-27; Jn. 6.16-21)*

⁴⁵ Tyicuan ta catyí ra Jesús chí ra cachicá noo chihin ra na quihví coyo

ra chichi canoa vatyi cuhun coyo ra ityi nuu nya inga chiyo miñi cuan ñuu Betsaida. Vatyi maa ra Jesús cunasacha xihna ra ñáyiví, tyicuan ta cuhun ra catyí ra. ⁴⁶ Ta cha yaha cuahan coyo ra, ra Jesús cuahan ra nu yucu, cua cacan tahví ra. ⁴⁷ Ta cuhva cha cuaa, canoa nu ñohó ra cachicá noo chihin ra cha cuahan nya mahñu miñi cuan, ta ndoo noo tuhun ri maa ra. ⁴⁸ Ta nyehe ra vatyi ña cacuví vaha casacaca ra canoa cuan vatyi ñihi xaan tatyí. Ta cha ñaa ca cuan tuhvá ra Jesús chicá ra nu ndutyá cuan. Ta saha ri ra cha cua yaha ra nu canoa cuan. ⁴⁹ Soco cananyehe ra chí ra, chicá ra nu ndutyá. Ta cacuñi maa ra vatyi noo cha sayuhví cuví, ta cacana cha ra. ⁵⁰ Vatyi tandihí ra canyehe ra chí ra ta cayuhví ra. Soco maa ra cahan ra chihin ra ta catyí ra:

—¡Sanyee ndo íñi ndo! ¡Yuhu cuví! ¡Ma yuhví ndo! —catyí ra.

⁵¹ Quihví ra chichi canoa nu canyicú ra, ta cutaxin tatyí cuan. Ta iyo xaan cacuñí ra ⁵² cha cuenda vatyi ta cutuñi ca íñi ra milagru cha sacuví ra chihin pan, vatyi ni ndava ca añima ra.

*Nu sanduvaha ra Jesús chí ñu cuhví
ñuu Genesaret
(Mt. 14.34-36)*

⁵³ Cayaha sava ra miñi cuan ta cachaá coyo ra ñuu Genesaret, ta cachahñi ra canoa cuan yuhu ndutyá ri cuan. ⁵⁴ Ta cha quitá coyo ri ra chichi canoa cuan, nicohon nuu ri ñáyiví chí ra Jesús. ⁵⁵ Ta cachino vavaha ñu nicahnu ityi cuan sacotó ñu vatyi chaá ra. Ta quichí coyo ñu tandihí ri ñuu, quichí nyaca ñu chí ñu cuhví chihin chito nya nu nyaá ra Jesús. ⁵⁶ Ta tandihí ri ityi nu quihví ra chichi ñuu luhlu o chichi ñuu nahnu, o chichi cuhu, chacun ñu chí ñu cuhví yuhu ityi. Ta chacu ndahví ñu nuu ra na cuhva ra cha tin ñu vasi chiin yuhu sahma ra. Ta tandihí ri ñu tin chí ra, nduvaha ñu.

7

*Nu sañahá ra Jesús ñáá cha sativí
chi ñáyiví
(Mt. 15.1-20)*

¹ Yaha cuan ta ra fariseo ta suhva ra sacuahá cuenda ley vehe ñuhu quichí coyo ra nya ñuu Jerusalén, ta catuhva ra chi ra Jesús. ² Ta canyehe ra vatyi yihí ra cachicá noo chihin ra Jesús cachachí ra ta ña nacatya ra ndaha ra tari cuhva cha tahán chi cha costumbre. Yucuan chaha cacahan nyaa ra chi ra. ³ Vatyi ra fariseo ta tandihí ñu Israel cuan nyicón ca ñu costumbre sutu chahnu ñu, vatyi ma cachi ra tatu ma ndoo ndaha ra cuaha chaha tari cuhva costumbre iyó chi ñu. ⁴ Ta tatu nachaa coyo ñu cha chahan ñu nuyahvi, ma cachi ñu tatu ma sacuvi ñu cuhva cuan cha canacatya xaan ñu ndaha ñu. Ta iyó cuaha ca costumbre cha canyicón ñu. Iyó noo cuhva cha tahán chi nacatya ñu vasu, jarra, ta tandihí ndaha tyiño caa cha iyó chi ñu ta cama ñu ñandihí. ⁵ Tyicuan ta ra fariseo ta ra sacuahá cuenda ley cuan candaca tuhun ra chi ra Jesús, ta catyí ra:

—¿Ñáá tuhun ña sacuví ra nyicón chuon cuhva costumbre sutu chahnu yo? Vatyi ña nacatya ra ndaha ra tari cuhva tahán chi tatu cuacachi ra xita —catyí ra chi ra.

⁶ Ta nacahan ra Jesús, ta catyí ra:

—Ndicha cha cahan ra Isaías tuhun ndo vatyi sahá ndo tyi vaha ndo ta ña ndicha ndo. Catyí ra tyehe caa:

Ñáyiví ihya, chihin yuhu ri ñu catyí ñu tyi cuñí ñu chii.

Soco ñima chihin cha tandihí ñima ñu, tyi sñn nu nyaá xiñi ñu.

⁷ Ñahri maa tuhun cha sacahnú ñu chii,

vatyí cha sañahá ñu chi tahan ñu, maa maa ri maa cuhva sañahá ñáyiví ri cuví, tyaá ra Isaías tuhun ndo.

⁸ Vatyi nyoho sandoó ndo cuhva catyí Nyoo, ta nanyicón ndo cuhva costumbre ñáyiví ri, tuhun cha nacatya xaan ndo ndaha tyiño ndo, ta cuaha cha tyicuan caa sacuví ndo. ⁹ Nyoho sanducaxiñ ndo tuhun cha catyí Nyoo tyi

sacuvi ndo, tacuhva vatyi cuvi sacuvi ndo costumbre cha iyó ndo. ¹⁰ Soco ra Moisés catyí ra nu ley cha tyaá ra: “Saha ndo ñáyiví chi sutu ndo ta chi sihi ndo.” Ta catyí tucu ra: “Tandihí ñu cha cahan ña vaha chi sutu o chi sihi ñu, tahán chi cuví ñu.” catyí ra Moisés nu ley Nyoo. ¹¹ Soco nyoho catyí ndo tyi noo ñáyiví cuví catyí ñu chi sutu ñu o chi sihi ñu tyi ma cuvi tyinyee ñu chi ñu vatyi tandihí cha iyó chi ñu Corbán cuví. (Cuñí chi catyí: “Cha chahí chi Nyoo cuví.”) ¹² Ta tatu catyí ñu tyicuan caa, ña cuñí ca chi cha tyinyee ñu chi sutu ñu o chi sihi ñu catyí ndo. ¹³ Ta tyicuan caa sacuachiyó ndo tuhun cha catyí Nyoo tyi sacuvi ndo, vatyi cuñí ndo sacuvi ri maa ndo tuhun cha iyó ndo. Ta cuaha ca cha inuu ri caa sacuví ndo —catyí ra Jesús.

¹⁴ Tyicuan ta cana tucu ra Jesús chi ñáyiví ta catyí ra chi ñu:

¹⁵ —Tyasoho vaha tandihí ndo tuhun cahín, ta natyihí tuñi iñi ndo. Cha quihví yuhu ñáyiví ta chachí ñu, ña cuví sativí chi chi ñu. Soco cha quitá ñima ñu, ican cuan sativí chi ñu. ¹⁶ Nyoho cha cutuñí iñi ndo, tyasoho ndo tuhun cahín —catyí ra Jesús chi ñu.

¹⁷ Tyicuan ta sandoo ra Jesús chi ñáyiví cuan, ta quihví ra chichi vehe. Ta ra cachicá noo chihin ra candaca tuhun ra chi ra ñáá cha cuñí chi catyí tuhun cuan. ¹⁸ Ta catyí ra Jesús chi ra:

—Tu tyicuan caa, ni nyoho, ña cutuñí iñi ndo. ¿Atu ña cutuñí iñi ndo vatyi cha quihví chichi yuhu yo ña sativí chi chi yo? ¹⁹ Vatyi ñima ñima yo quihví chi, soco chichi yo. Ta yaha cuan ta quita chi chichi coño ñuhu yo —catyí ra Jesús.

Chihin cuan cuñí ra catyí ra vatyi tandihí nyayu ta vaha cachi yo. ²⁰ Ta catyí tucu ra:

—Cha quitá ñima ñáyiví, ican cuan sativí chi ñu. ²¹ Vatyi ñima ñu quitá cha ña vaha chicá xiñi ñu, ta sacuví ñu cha ña vaha. Yihí ñu iyó ñu chihin rayi o chihin ñusihí ta ñima ñasihí ra

cuví, ta ñima yíi ñu cuví. Yihí ñu casuhú ñu. Yihí ñu cachahñí ñu. ²² Yihí ra iyó ñasihí ra ta chicá noo ra chihin inga ñu. Yihí ñu quichi cuvi iñi ñu cha chii inga ñáyivi. Yihí ñu sacuví ñu cha quiñi caa. Yihí ñu sandaví ñaha ñu. Yihí ñu iyó viciu chi ñu. Yihí ñu nyiyo iñi ñu. Yihí ñu ñii ñu cuendu. Yihí ñu cahnu sahá ñu chi ñu. Yihí ñu ña chaa cha chiñi tuñi xiñi ñu. ²³ Tandihí tuhun ña vaha ihya, quitá chi ityi chichi aña ñáyivi, ta sativí chi chi ñu —catyí ra chi ra.

Noo ñaha inga ñuu cha chino iñi chi ra Jesús

(Mt. 15.21-28)

²⁴ Yaha cuan ta quitá ra Jesús yucuan, ta cuahan ra ityi ñuu Tiro ta Sidón. Quihvi ra chichi noo vehe ta ña cuñí ra cha coto ni noo ñáyivi, soco ña cuví tixehe nuu ra. ²⁵ Ta sihi noo ñaha tyivaa cha yihí noo tatyí ña vaha aña, numi ri chito ña tuhun ra Jesús. Ta chaa ña ta chicuiñi chiti ña nuu ra. ²⁶ Ñaha cuan, ñaha inga ñuu cuví ña, ñaha ñuu Sirofenicia cuví ña. Quichi ña ta chacú ndahvi ña nuu ra Jesús na tava ra tatyí ña vaha cha yihí aña sehe ña. ²⁷ Soco catyí ra Jesús chi ña:

—Saña, nacachi xihna ca ñu Israel ñu cuví sehe Nyoo, vatyí ña vaha cha tinyaa yo pan chi sehe yo ta cuhva yo cachi ina —catyí ra Jesús chi ña.

²⁸ Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

²⁹ Tyicuan ta catyí ra Jesús chi ña:

—Vaha nacahun. Ta cha cuenda cuan cuví cuhun, vatyí tatyí ña vaha cha yaha quitá chi aña sehe ña —catyí ra chi ña.

³⁰ Ta cuhva cha nachaa ña vehe ña, catuví sehe ña nu chito, ta tatyí ña vaha cuan cha yaha quitá chi cue.

Nu sanduvaha ra Jesús chi noo ra soho ta ñihi

³¹ Ta quitá tucu ra Jesús ñuu Tiro, ta yaha ra ñuu Sidón, ta cuahan ra ityi ñuu cha canañí Decápolis, ta nachaa

ra miñi Galilea. ³² Nu nyaá ra Jesús yucuan, quichi nyaca ñu chi noo ra soho ta ña cuví vaha cahán ra. Ta chacú ndahvi ñu nuu ra Jesús na tyiso ra ndaha ra siqui ra. ³³ Tava siin ra Jesús chi ra in chiyo xiin, nu yori ñáyivi, ta tyihí ra nundaha ra chichi soho ra, ta tyaa si ra nu yaa ra. ³⁴ Yucuan ta nanyehe ndaa ra andivi. Ta naxita ra tatyí ra, ta catyí ra:

—¡Efata! —ta cuñí chi catyí: ¡Nuña! —catyí ra.

³⁵ Ta chihin cuan nuña soho ra soho cuan, ta nduvaha yaa ra, ta nacahan vaha ra. ³⁶ Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihi ca canacatyí ñu. ³⁷ Ta iyo cuñí ñu ta catyí ñu:

—Tandihí ta vaha sacuví ra. Nyacua cuvi nacuiñi ñáyivi soho sahá ra ta cuví tucu nacahan ñáyivi ñihí ñandihí.

8

Nu chaha ra Jesús cha cachi cumi mil ñáyivi

(Mt. 15.32-39)

¹ Quivi cuan nataca tucu cuaha xaan ñáyivi. Ta ñahri maa cha cachi ñu iyó. Tyicuan ta cana ra Jesús chi ra cachicá noo chihin ra, ta catyí ra:

² —Cundahvi cuñí nyehi chi ñáyivi ihya, vatyí cha uñi quiñi nyicú ñu ihya chihin, ta ñahri maa cha cachi ñu iyó.

³ Tatu natachi chi ñu nya vehe ñu cucachi ñu, coto coña ñu ityi, vatyí yihí ñu cañi quichi coyo ñu —catyí ra Jesús chi ra.

⁴ Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáyivi iyó ta xico ñu chi yo?

⁵ Ta ndaca tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

⁶ Ta catyí ra na cunyicu ñáyivi cuan nu ñuhú. Ta quehen ra ucha pan cuan, ta nacuhva ra tyahvi nyoo chi

Nyoo. Yaha cuan ta tahvi sava ra pan cuan, ta chaha ra chi ra cachicá noo chihin ra, na casacha ra chi ñáyivi cuan. ⁷ Ta canyisó tucu ra suhva tiyaca nyihi. Ta nacuhva tucu ra Jesús tyahvi nyoo chi Nyoo, ta chaha ra chi ra na casacha ra. ⁸ Tandihí ñu cachachí ñu, ta cachitu chichi ñu. Ta casacutu ra ucha tahan tica chihin yiquin cha ndoo ca. ⁹ Ta cha cumi mil tahan ñu cachachí. Yaha cuan ta catyí ra Jesús chi ñu na cunuhu coyo ñu. ¹⁰ Ta quihvi ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

Nu cacatyí ra fariseo chi ra Jesús na sacuvi ra noo milagru

(Mt. 16.1-4; Lc. 12.54-56)

¹¹ Tyicuan ta cachaa coyo ra fariseo, ta quichaha cuvi yuhu ra chihin ra Jesus. Ta cacatyí ra chi ra na sacuvi ra noo milagru tatu ndicha cha Nyoo tachí chi ra. Tyicuan caa catyí ra vatyí cuñí ra nducu nyehe ra chi ra. ¹² Ta ra Jesús uhvi uhvi naxita ra tatyí ra, ta catyí ra:

—¿Ñáá tuhun cha chicán ñáyivi iyó vityin milagru? Cha ndicha catyí chi ndo vatyí ma sacuvi ni noo milagru nyehe ndo —catyí ra chi ra.

¹³ Tyicuan ta sandoo ra chi ra, ta nandihvi ra chichi canoa ta cuahan ra inga chiyo miñi.

Cuhva iyó ra fariseo tari yuchan iya cuvi, catyí ra Jesús

(Mt. 16.5-12)

¹⁴ Naa iñi ra cachicá noo chihin ra Jesús cacuiso ra cha cacachi ra. Ta noo pan ri ñohó chihin ra chichi canoa cuan. ¹⁵ Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra Herodes —catyí ra chi ra.

¹⁶ Ta ra cachicá noo chihin ra quichaha cacatyí ra chi ra tahan ra:

—Cha cuenda vatyí ñahri pan nyisó yo, yucuan cuenda cahan ra tuhun cuan —catyí ra chi ra tahan ra.

¹⁷ Tuví iñi ra Jesús cha ndatuhún ra, ta catyí ra chi ra:

—¿Ñáá tuhun cha catyí ndo tyi ñahri pan nyisó ndo? ¿Atu ta cutuñi ca iñi nyoho? ¿Atu ta coto ca ndo? ¿Atu ni ndava xaan aña ndo? ¹⁸ Nyaá chiti nuu ndo, ¿atu ña nyehe ndo? Nyaá soho ndo. ¿Atu ña chiñí ndo? ¿Atu ña nicohon iñi ndo? ¹⁹ quivi cha sache ohon tahan pan cuan chi ndi ohon mil rayhi? ¿Yoso tahan tica yiquin naquehen ndo? —catyí ra Jesús, ndacá tuhun ra chi ra cachicá noo chihin ra.

Ta maa ra cacatyí ra:

—Uchi uvi.

²⁰ Ta catyí tucu ra Jesús chi ra:

—Ta quivi sache ucha tahan pan chi cumi mil ñu, ¿yoso tahan tica tyitu nacoñehe ndo?

Ta cacatyí ra:

—Ucha tahan.

²¹ Tyicuan ta catyí ra Jesús chi ra:

—¿Atu ta cutuñi ca iñi ndo? —catyí ra chi ra cachicá noo chihin ra.

Nu sanduvaha ra Jesús chi noo ra cuaa ñuu Betsaida

²² Yaha cuan ta chaa ra Jesús chihin ra cachicá noo chihin ra nya ñuu Betsaida. Ta quichi nyaca ñu chi noo ra cuaa. Ta cachacu ndahvi ñu nuu ra na tñin ra chi ra. ²³ Tyicuan ta tñin ra ndaha ra cuaa cuan, ta cuahan ra chihin ra ityi chata ñuu. Ta tyaa sii ra chiti nuu ra, ta tyiso ra ndaha ra siqui ra, ta ndaca tuhun ra chi ra tatu cuví nyehe ra chiin. ²⁴ Ra cuaa cuan nanyehe ra ta catyí ra:

—Nyehe in cahnu ri maa chi ñáyivi. Cuhva caa yutun caa ñu cahvi iñi, soco chicá ñu —catyí ra.

²⁵ Tyicuan ta tñin tucu ra Jesús chiti nuu ra inga chaha, ta maa ra nanyehe vaha ra ta nduvaha ra. Nanyehe cachi vaha ra tandihí. ²⁶ Tyicuan ta natachi ra Jesús chi ra ta catyí ra chi ra:

—Ma quihvun chichi ñuu ta ni yori chihin cahun tuhun.

Nu catyí ra Pedro vatyí ra Jesús cuvi Cristo

(Mt. 16.13-20; Lc. 9.18-21)

²⁷ Yaha cuan ta chahan ra Jesús chihin ra cachicá noo chihin ra ñuu cha ca iyó Cesarea Filipino. Ta ityi cuahan

ra, ta ndacá tuhun ra chi ra cachicá noo chihin ra, ta catyí ra:

—¿Ñáá catyí ñáyivi? ¿Yóó ra cuví yuhu? —catyí ra chi ra.

²⁸ Ta canacahan ra ta catyí ra:

—Yihí ñu catyí ñu tyi ra Juan ra sacondutyá chi ñáyivi cuvún. Inga ñu catyí ñu tyi ra Elías cuvún. Ta inga ñu catyí ñu tyi inga ra profeta Nyoo cuvún —cacatyí ra chi ra.

²⁹ Tyicuan ta ndacá tuhun ra chi ra, ta catyí ra:

—¿Ta nyoho, yóó ra cuví yuhu, cuñi tucu nyoho?

Ra Pedro catyí ra chi ra:

—Yoho cuví Cristo.

³⁰ Soco catyí ra Jesús chi tandihi ra tyi yori chihin cacahan ra tuhun cuan.

Nu cahan ra Jesus tuhun tyi cucúvi ra

(Mt. 16.21-28; Lc. 9.22-27)

³¹ Tyicuan ta quichaha sañaha ra vatyi Rayi cha quichi nya gloria cunyehe ra cuaha xaan tindoho. Ta ra mandoñi ta ra cacuvi nuu chi tata sutu ta ra casacuahá cuenda ley vehe ñuhu ma cuñi ra natin cuenda ra chi ra. Catyi ra Jesús chi ra vatyi cucahni ñu chi ra soco chichi cha cu uñi quivi cunandoto ra. ³² Catyi cachi ra chi ra tuhun ihya. Tyicuan ta tava sin ra Pedro chi ra ta quichaha catyi ra tyi ña vaha cha cahan ra cha tyicuan caa. ³³ Soco ra Jesús nanyocava ra, ta nanyehē ra chi inga ra cachicá noo chihin ra. Ta quichaha cahan ra chi ra Pedro ta catyí ra:

—¡Cuachiyo chuun nui, cuihna! Vatyi yoho ña chicá xiñun tari cuhva chicá xiñi Nyoo, soco tari chicá xiñi ñáyivi, chicá xiñun —catyí ra Jesús chi ra Pedro.

³⁴ Tyicuan ta cana ra Jesús chi ñáyivi ta chi ra cachicá noo chihin ra ta catyí ra chi ñu:

—Tatu nya ndo cuñi ndo cunyicon ndo chii, cuñi chi cahnya ndo ñi ndo tuhun maa ndo. Ta ma ndu uvi ñi ndo cha yihí ndo cuende vasi nyehe ndo tindoho cha cuende. Vatyi yucuan cuví cruzi cha tahán chi cuiso

ndo. ³⁵ Vatyi nya ndo ña cuñi ndo cúvi ndo cha cuende, suri cha cúvi maa ndo cuví, ta cuhun ndihi ndo anyaya. Soco nya ndo cuhva ndo ñáyivi ndo cha cuende ta cha cuenda tuhun Nyoo, cucacu añima ndo. ³⁶ Tatu sacunaa ndo añima ndo anyaya, ¿ñáá ri tuhun cha saha ganaa ndo tandihi cha tyayii cha iyó siqui ñuhu ñáyivi? ³⁷ Vatyi tatu sacunaa ndo añima ndo, ñahri maa cha iyó cha cuví cuhva ndo ta sacacu ndo añima ndo. ³⁸ Tatu nya noo ndo cucahan nuu ndo nyehe ndo chii, ta cucahan nuu ndo tuhun cahín nuu ñáyivi cha iyó cuatyí ta ña quichahá tuhun Nyoo, yuhu Rayi cha quichi nya gloria cucahan tucu nuu mai nyehi chi ndo quivi quichi tiqui chihin ángel cuenda Nyoo. Vatyi cuquichi chihin cha tyaqui maa Suti.

9

¹ 'Cha ndicha catyí chi ndo, vatyi yihí ndo cha nyicú ndo ihya, ma cúvi ñaha ndo nyacua nya nyehe ndo yoso caa nyacá ñaha Nyoo. Vatyi cuquichi chihin tunyee ñi ra —catyí ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra
(Mt. 17.1-13; Lc. 9.28-36)

² Ñu quivi yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chihin ra. Ta yucuan nasama cuhva caa nuu ra Jesús. ³ Nduxiño xaan sahna ra ta cuichin xaan nanduvi. Yori maa siqui ñuhu ñáyivi ihya cuví nacatya ta nducuichin tyicuan caa. ⁴ Ta cananyehē ra tyi nanyaá ra Elías ta ra Moisés, candatuhún ra chihin ra Jesús. ⁵ Tyicuan ta ra Pedro catyí ra chi ra Jesús:

—Maestro, ¡vaha xaan cha nyicú ndi ihya! Na savaha ndi uñi tahan tiyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyí ra Pedro, ⁶ vatyi ña chitó ra ñáá tuhun cahán ra. Vatyi maa ra ta inga ra cayuhví ra.

⁷ Tyicuan ta noo xica noo vico siqui ra ta sahvi chi ra. Ta chichi vico cuan tyacu noo ndusu cha catyí:

—Ican ihya cuví Sehi, ta cuñí xain chi ra. Tyasoho ndo tuhun cahan ra —catyí ndusu cuan.

⁸ Ta cuhva cha cananyehe ra, yori ca ra tayucú chihin ra, noo ri ca maa ra Jesús.

⁹ Cuhva cha cuanoo coyo ra yucu cuan, catyí ra Jesús chi ra tyi ma cacahan ra tuhun cha canyehe ra yucuan, soco nya yaha cha nandoto Rayi cha quichi nya gloria, tyicuan ta cuvi cahan ra tuhun. ¹⁰ Yucuan chaha ña cacahan maa ra tuhun, vasi cacatyí ra chi tahan ra ñana vaha tuhun cuví cha cunandoto ra. ¹¹ Tyicuan ta quichaha candaca tuhun ra chi ra Jesús:

—¿Ñáá tuhun cha catyí ra casacuahá cuenda ley vehe ñuhu vatyí cuquichi xihna ca ra Elías?

¹² Ta nacahan ra, ta catyí ra:

—Cha ndicha vatyí xihna ca ra Elías nyaá quichi ta sanduvaha ra tandihi. ¿Ta yoso caa catyí tuhun Nyoo cuenda Rayi cha quichi nya gloria? Catyí chi tyi cunyehe ra tindoho, ta ma cuñi nyehe ñáyivi chi ra. ¹³ Soco yuhu catyí chi ndo tyi cha yaha quichi ra Elías. Ta sacuvi maa ñáyivi cha cuñi ñu chihin ra, tari cuhva catyí nu tutu Nyoo cha cucuvi chi ra —catyí ra Jesús chi ra.

Nu sanduvaha ra Jesús chi noo ra tyivaa cha yihí noo tatyí ña vaha chi (Mt. 17.14-21; Lc. 9.37-43)

¹⁴ Yaha cuan ta nachaa coyo ra nu nyicú inga ra cachicá noo chihin ra Jesús. Ta canyehe ra tyi cuaha ñáyivi tayucú nicachico. Ta nyicú tucu ra sacuahá cuenda ley yucuan, ta cacuvi yuhu ra chihin ra. ¹⁵ Tyicuan ta cha nanyehe ñu chi ra Jesús, tandihi ñu iyo cuñí ñu, ta cachino ñu chicuhva ñu nocumi chi ra. ¹⁶ Tyicuan ta ndaca tuhun ra Jesús chi ra cacuvi yuhu cuan ta catyí ra:

—¿Ñáá cuenda cuví yuhu xaan ndo? —catyí ra chi ra.

¹⁷ Ta noo ra nanyaá chichi cha cuaha ñáyivi yucuan, nacahan ra ta catyí ra:

—Maestro, ihya vachi nyaque chi sehi. Yihí noo tatyí ña vaha chi cue ta sacuihi chi cue. ¹⁸ Vatyí tandihi ri nu tin tatyí cuan chi cue, sanduva chi cue nu ñuhú, ta yucuan quita tiñi yuhu cue ta cahñi noho cue. Ta ndundava cue. Cha catyí chi ra cachicá noo chuhun na tava ra tatyí ña vaha cuan, soco ña cacuvi chi ra —catyí ra cuan chi ra Jesús.

¹⁹ Nacahan ra Jesús ta catyí ra:

—¿Nyoho ñu ña chinó iñi cuví ndo! ¿Yoso tahan ca quivi cunyai chihin ndo ta cunyei tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi ra luhlu chiña tyehe —catyí ra.

²⁰ Quichi nyaca ra chi ra luhlu cuan. Ta cuhva cha nanyehe tatyí cuan chi ra Jesús, quehen tatyí cuan chi cue. Ta nduva cue nu ñuhú, sacañuhú cue chi cue, ta quita tiñi yuhu cue. ²¹ Tyicuan ta ndaca tuhun ra Jesús chi sutu cue:

—¿Ama quichaha cuvi chi ra tyehe caa? —catyí ra chi ra.

Ta nacahan sutu cue, ta catyí ra:

—Nyata luhlu ra. ²² Ta cuaha chaha tyihí tatyí ña vaha ihya chi cue nu cayú ñuhu, o nu ndutya. Cuñi chi cahñi chi chi cue. Soco tatu cuví chuun, cundahvi cuñi nyehun chi ndi, ta tyinyeun chi ndi —catyí sutu cue chi ra Jesús.

²³ Ta catyí ra Jesús chi ra:

—Tatu chinó iñun, tandihi ta cuví cha cuenda ñu chino iñi —catyí ra Jesús.

²⁴ Tyicuan ta sutu cue canachaa ra ta catyí ra:

—¿Chinó iñi! ¡Tyinyee chii na chino ca iñi! —catyí ra chi ra Jesús.

²⁵ Cuhva cha nyehe ra Jesús tyi cuaha ñáyivi candu in ri, ta tava ñehe ra chi tatyí ña vaha cuan, ta catyí ra:

—Yoho tatyí ña vaha cha sañihí ta sasohó chi cue ihya, catyí chuun, na quiton. Saña chi ra luhlu ihya, ta ma ndihvi con chi ra —catyí ra Jesús chi tatyí ña vaha cuan.

26 Ta tatyí cuan quiñi xaan canachaa ta na quisi chi chi cue inga chaha ta quita. Ta sandoo tatyí cuan chi cue tari noo ndiyi. Ta cuaha ñu catyí vatyí cha chihí cue. 27 Soco tiñ ra Jesús ndaha cue, ta nacoñehé ra chi cue, ta nicuinanyaa cue.

28 Tyicuan ta quihvi ra Jesús noo vehe, ta ra cachicá noo chihin ra can-daca tuhun ra chi ra ta catyí ra:

—¿Ñáá tuhun ña cuvi tava ndi chi tatyí ña vaha cuan?

29 Ta catyí ra Jesús:

—Cha cuenda vatyí tahan tatyí ña vaha ihya, quitá, soco chihin cha ma cachi yo ta cacan tahvi yo chi Nyoo —catyí ra chi ra.

Nu cahán ra Jesús tuhun inga chaha vatyí cucúvi ra

(Mt. 17.22-23; Lc. 9.43-45)

30 Quivi cha quita coyo ra yucuan, yahá coyo ra ityi Galilea. Ta ña cuñí ra Jesús cha coto ñáyivi. 31 Vatyí sañahá ra chi ra cachicá noo chihin ra. Ta catyí ra chi ra vatyí Rayí cha quichi nya gloria cunacuhva cuenda ñu chi ra ndaha ñáyivi. Ta cucahñi ñu chi ra, soco cha cu uñi quivi cunandoto ra. 32 Soco ña cacutuñi ñi ra tuhun cahán ra chihin ra. Ta cayuhvi ra candaca tuhun ra chi ra.

¿Yóó ra cahnu ca?

(Mt. 18.1-5; Lc. 9.46-48)

33 Tyicuan ta cacha coyo ra ñuu Capernaum. Ta cuhva cha nyicú ra nya vehe, ra Jesús ndaca tuhun ra chi ra ta catyí ra:

—¿Ñáá tuhun cuvi xaan yuhu nyoho ityi vachi yo? —catyí ra ndaca tuhun ra.

34 Taxi taxi cacuvi ra, vatyí ityi vachi coyo ra, ta cacuvi yuhu ra nya ra cuví ra ra cahnu ca. 35 Tyicuan ta chicunya ra Jesús ta cana ra chi ndi uchi uvi ra chicá noo chihin ra, ta catyí ra chi ra:

—¿Nya ndo cuñi ndo cuvi ndo nuu, cuñi chi cha cuví ndo ra nu ndihi cha nuu tandihi ra, ta sacuvi ndo tyiño nuu tandihi ra? —catyí ra Jesús chi ra.

36 Tyicuan ta quehen ra chi noo ra cuehe luhlu ta chinanyaa ra chi cue

mahñu ra. Ta tyihí sucun ndaha ra chi cue, ta catyí ra:

37 —Ñáyivi cha natín cuenda chi noo ra cuehe luhlu chihin sivi, chi yuhu natín cuenda ñu. Ta ñu natín cuenda chii, ñima chi yuhu ri natín cuenda ñu, soco chi ra cha tachí chii ñandihí.

Tatu ña cuahan ñáyivi siqui yo, tumañi ñi chi yo cuahan ñu

(Mt. 10.42; Lc. 9.49-50)

38 Tyicuan ta catyí ra Juan chi ra Jesús:

—Maestro, nyehe ndi chi noo ra cuan ta chihin sivun tavá ñehe ra chi tatyí ña vaha. Soco vatyí ñima chihin yo chicá noo ra, catyí ndi chi ra tyi ma sacuvi ca ra —catyí ra Juan chi ra Jesús.

39 Soco catyí ra Jesús chi ra:

—Ma casi ndo. Vatyí ni noo ra cha casacuvi milagru chihin sivi ta yaha cuan ta caña ñi ra cahan ña vaha ra siqui. 40 Vatyí ñu cha ña cuahan siqui yo, tumañi ñi chi yo cuahan ñu. 41 Tatu cuhva noo ñu, vasi noo vasu ndutya coho ndo chihin sivi, cha cuenda vatyí ñu cuenda yuhu ra Cristo cuví ndo, cha ndicha vatyí cuñihi ñu cha cuacuhva Nyoo chi ñu.

Yica xaan cha sanacava yo chi noo yañi yo nu cuatyí

(Mt. 18.6-9; Lc. 17.1-2)

42 Tatu yóó ñu sanacava nu cuatyí chi noo ñu chinó ñi chii, vaha taxin ca cuhñi ñáyivi noo yuu sucun ñu ta tuchi ñu chi ñu cuan nu tyañuhu.

43 Tatu ndahun sanacavá chuun nu cuatyí, vaha taxin ca cahnya. Vatyí vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhú cha ma ndahva ca maa. 44 Ta yucuan ña chihí tindacu chachí chi ñu, ta ñuhú ña ndahva maa ni noo chaha. 45 Ta tatu chahun ta sanacavá chuun nu cuatyí, vaha taxin ca cahnya. Vatyí vaha ca cuhun nu coun chihin Nyoo chihin cha luu chahun ta ñima ca chihin cha ninduvi chahun ta tuchi Nyoo chuun anyaya. Vatyí yucuan

ma ndahva ca maa ñuhu. ⁴⁶ Ta ña chihí tindacu chachí chi ñu, ta ñuhu ni noo chaha ña ndahva. ⁴⁷ Ta tatu noo chiti nuu sanacavá chuun nu cuaryi, vaha taxin ca tava. Vatyí vaha ca cha quihvun nu nyacá ñaha Nyoo chihin noo chiti nuu ta ñima ca chihin ninduvi chiti nuun ta tuchi Nyoo chuun anyaya. ⁴⁸ Vatyí yucuan ña chihí tindacu chachí chi ñu, ta ni noo chaha ña ndahva ñuhu.

⁴⁹ 'Soco tandihí ñu nyicon chii, tari cha cayú ñu chihin ñuhu tatu nyehe ñu tindoho cha cuende, vatyí chihin cuan cua sanduvaha Nyoo chi ñu, tari nduvaha nyayu chihin ñi. ⁵⁰ Ñi vaha xaan. Soco tatu ndihí cha uhva, ¿yoso caa cuví cotyiño yo inga chaha? Tyicuan caa tucu nyoho, ma sandihí ndo cha coo tuhun Nyoo añima ndo cha cuví tari ñi vaha. Tyicuan caa ta coo taxi ri ndo chihin tahan ndo.

10

Nu sañahá ra Jesús tyi ña vaha sandoo rayi chi ñasihí ra

(Mt. 19.1-12; Lc. 16.18)

¹ Quita ra Jesús Capernaum ta cuahan ra ityi Judea nya inga chiyo yutya Jordán. Yucuan candu in ri ñáyivi inga chaha nu nyaá ra, ta quichaha sañaha tucu ra chi ñu tari tuhvá maa ra. ² Tyicuan ta suhva ra fariseo catuhva ra nu nyaá ra Jesús, vatyí nducu ra cuhva tyaa ra cuatyí siqui ra. Ta candaca tuhun ra chi ra tatu vaha cha sandoo noo rayi chi ñasihí ra. ³ Tyicuan ta nacahan ra Jesús ta catyí ra:

—¿Ñáa cha catyí ra Moisés tyi sacuví ndo?

⁴ Ta canacahan ra ta cacatyí ra:

—Ra Moisés chaha ra cha cuví cahnya noo ra tutu cha tandaha ra tyicuan ta cuví sandoo ra chi ñasihí ra —catyí ra chi ra.

⁵ Tyicuan ta catyí ra Jesús chi ra:

—Catyí ra Moisés cha sacuvi ndo tyicuan caa soco cha cuenda cha ndava añima ndo. ⁶ Soco quivi xihna ri, quivi savaha Nyoo tandihí maa, savaha ra rayi ta ñaha sihi. ⁷ “Yucuan cuenda sandoo rayi chi sutu ra ta chi sihi

ra vatyí ndu in ri ra chihin ñasihí ra. ⁸ Ta chichi cha ninduvi tahan ñu cucuvi ñu tari cha noo ri ñáyivi.” Yucuan chaha ñima ca uvi tahan cuví ñu, soco cha nanduvi ñu noo ri ñáyivi. ⁹ Yucuan chaha, ña tahan chi cha sasiin ñáyivi cha sandu in ri Nyoo —catyí ra Jesús chi ra.

¹⁰ Yaha cuan ta nachaa coyo ra nya vehe, ta quichaha ndaca tuhun ra cachicá noo chihin ra inga chaha siqui tuhun cuan. ¹¹ Ta catyí ra Jesús chi ra:

—Ra cha sandoó ñasihí ta tandaha ra chihin inga ñu, chicoó cuatyí ra vatyí ña vaha sacuvi ra chihin ñasihí ra, ñaha cha xihna ri cuan. ¹² Ta tyicuan caa tucu ñusihí. Tatu sandoó ñu chi yí ñu ta tandaha ñu chihin inga ra suri chicoo tucu cuatyí ñu —catyí ra Jesús.

Nu nasoco ra Jesús chi ra cuatyaa
(Mt. 19.13-15; Lc. 18.15-17)

¹³ Tyicuan ta quichi nyaca ñu suhva ra cuatyaa chi ra Jesús tacuhva natyiso ra ndaha ra siqui ndotyin. Soco ra cachicá noo chihin ra ña chahá ca ra cha quichi nyaca ñu chi ndotyin. ¹⁴ Soco cuhva cha nanyehe ra Jesús, cuxaan ra. Ta catyí ra chi ra:

—Saña ndo. Na quichi nyaca ñu chi ra cuatyaa nu nyaí. Ta ma casi ndo. Vatyí ñu nyacá ñaha Nyoo añima, cuví ñu chinó iñi chi Nyoo tari chinó iñi ra cuatyaa ihya. ¹⁵ Cha ndicha catyí chi ndo vatyí tatu ma nacuhva cuenda ndo chi ndo chi Nyoo tari noo ra cuatyaa chihin sutu ndotyin, ma cuví quihvi ndo nu nyacá ñaha Nyoo —catyí ra Jesús chi ra.

¹⁶ Ta quehen ra chi noo noo ndotyin ta tyihí sucun ndaha ra. Ta tyiso ra ndaha ra siqui ndotyin, ta chican tahvi ra chaha ndotyin.

Nu ndatuhún minoo ra tyivaa tyayí chihin ra Jesús

(Mt. 19.16-30; Lc. 18.18-30)

¹⁷ Yaha cuan ta cuahan ra Jesús. Ta chino vavaha noo ra cuan chata ra ta chicuiñi chiti ra nuu ra, ta ndaca tuhun ra chi ra, ta catyí ra:

—Maestro, ra vaha cuvún. ¿Yoso caa sacuvi ta ñihi ñáyiví cha ma naa ca maa coi? —catyí ra chí ra Jesús.

¹⁸ Ta catyí ra Jesús chi ra:

—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyún tyi vahi, nacotón tyi Nyoo cuví.) ¹⁹ Yoho cha chitón cha catyí Nyoo cha sacuvi yo: “Ma coun chihin inga ñusihi tatu ñima ñasihun cuví. Ma cahñun. Ma suhun. Ma cahun cuendu síqui ni noo ñu. Ma sandavi ñahun. Sahun ñáyiví chi sutun ta chi síhun” —catyí ra Jesús chi ra.

²⁰ Ta nacahan ra cuan ta catyí ra:

—Maestro, tandihi ihya cha sacuvi nyata luhli —catyí ra.

²¹ Tyicuan ta cusii cuñí ra Jesús nanyehé ra chi ra. Ta catyí ra chí ra:

—Cumañi noo ri ca cha cumañi chuun. Cuahan ta xicon tandihi cha iyó chuun ta cuhvon chi ñu ndahvi. Tyicuan ta coo cha tyayíun nya andiví. Yaha cuan ta quichun cunyicon chii vasi nyehún tindoho —catyí ra Jesús chi ra.

²² Soco cha chiñi ra tuhun cahan ra Jesús tyehe caa, nducuihya iñi ra, ta cuihya xaan cuanuhu ra vatyí tyayí xaan ra.

²³ Tyicuan ta nanyehé ra Jesús nicachico chata ra, ta catyí ra chí ra cachicá noo chihin ra:

—¡Ñana cha yí ta cuvi nacuhva cuenda ñu tyayí chi ñu na cunyaca ñaha Nyoo chí ñu! —catyí ra chí ra.

²⁴ Iyo cacuñí ra cachicá noo chihin ra tuhun cahán ra. Soco catyí ra Jesús chí ra inga chaha:

—Sehi, ñu cha tyaa xaan xiñi cha tyayí, ¡yí xaan quihvi ñu nu nyacá ñaha Nyoo! ²⁵ Tañi tyehe yaha noo camellu xiu noo yíqui tícu, ta ñima ca cha cuhva noo ñu tyayí cunyacá ñaha Nyoo chí ñu —catyí ra Jesús.

²⁶ Cha cachiñi ra tuhun ihya, iyo xaan cacuñí ra, ta candaca tuhun ra chí ra tahan ra, ta catyí ra:

—Tu tyicuan caa, ¿yóo cha cuví cacu añima? —catyí ra.

²⁷ Nanyehé ra Jesús chí ra ta catyí ra chí ra:

—Ñáyiví ña cuví sacuvi ñu ihya. Soco Nyoo cuví chí ra. Vatyí cha cuenda Nyoo ñahri cha yí sacuvi ra.

²⁸ Tyicuan ta catyí ra Pedro chí ra:

—Sutu Mañi yuhu, nyuhu sandoo ndi tandihi cha iyó chí ndi, ta vityin nyicón ndi chuun.

²⁹ Nacahan ra Jesús ta catyí ra:

—Cha ndicha catyí chí ndo vatyí tandihi ñu sandoo vehe, o yañi, o cuhva, o sutu, o sihi, o ñasihi, o sehe, o ñuhú, cha cuenda yuhu ta cha cuenda cha sacoto ñu chí ñáyiví tyi cuñí Nyoo sacacu ra chí ñu, ³⁰ cuañihi ñu ciento chaha síqui cha sandoo ñu ihya ñuhu ñáyiví. Cuañihi ñu vehe ta yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehe ñáyiví tindoho chí ñu. Soco inga ñáyiví cha vachi, cuñihi ñu ñáyiví cha ma naa ca maa. ³¹ Soco cuaha xaan ñu cha cuvi nuu vityin, ñu nu ndihi cucuvi ñu. Ta cuaha xaan ñu cuví ñu nu ndihi vityin, ican ñu cucuvi nuu —catyí ra Jesús.

Nu cahán ra Jesús inga chaha tyi cucúvi ra

(Mt. 20.17-19; Lc. 18.31-34)

³² Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chí ra. Ta maa ñu iyo cuñí ñu ta chihin cha yuhví ñu cuahan coyo ñu chata ra. Tyicuan ta cana sijn ra chí ndi uchi uvi ra cachicá noo chihin ra. Ta quichaha catyí ra cha cucuvi chí ra. ³³ Ta catyí ra:

—Tari cuhva nyehé ndo vityin, cuanda yo ityi cuahan ñuu Jerusalén nu cucuhva cuenda ñu chí yuhu Rayí cha quichi nya gloria chí ra cuví nuu chí tata sutu, ta chí ra sacuahá cuenda ley vehe ñuhu. Ta cucatyí ra tyi cucúvi ta cucuhva cuenda ra chii chí ra inga ñuu. ³⁴ Ta cucuacu nyaa ra chii, cucañi ra chii, cutyicu sii ra chii. Ta cucahñi ra chii. Soco cha cu uñi quiví cunandote cha yaha cúvi —catyí ra Jesús.

Nu cachican ra Jacobo ta ra Juan noo tumañi iñi chí ra Jesús

(Mt. 20.20-28)

³⁵ Tyicuan ta ra Jacobo ta ra Juan, ra cacuví sehe ra Zebedeo, catuhva ra nu nyaá ra Jesús, ta catyí ra chi ra:

—Maestro, cuñí ndi cha sahun noo tumañi iñi chi ndi —catyí ra.

³⁶ Ta ndaca tuhun ra Jesús chi ra:

—¿Ñáá cha cuñí ndo cha sacuvi cha cuenda ndo?

³⁷ Ta canacahan ra ta catyí ra:

—Cuhva cha cunyaa ndi chuhun nu nyacá ñahun, noo ndi chiyo vahun, ta inga ndi chiyo satyun —catyí ra chi ra Jesús.

³⁸ Tyicuan ta catyí ra Jesús chi ra:

—Nyoho ña chitó ndo cha chicán ndo. ¿Atu cuví nyehe nyoho tindocho cha cuanyehe yuhu? ¿Atu cuví cahun ndo tuhun chihi tari cahun yuhu? —catyí ra chi ra.

³⁹ Ta canacahan ra:

—Cuví chi ndi.

Ta ra Jesús catyí ra:

—Cha ndicha vatyí cunyehe ndo tindocho ta cahun ndo tuhun chihi tari cahun yuhu. ⁴⁰ Soco tuhun cha cunyaa ndo chiyo vahi ta chiyo satyin, ñima yuhu tahan chi cuhve chi ndo, soco maa Nyoo cucatyí yóó cha cuñihi nyatu cuan —catyí ra Jesús chi ra.

⁴¹ Cha cachiñi uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan. ⁴² Soco cana ra Jesús chi ra ta catyí ra chi ra:

—Chitó nyoho vatyí ra canyacá ñaha chi ñáyivi siqui ñuhu ñáyivi, ñihi xaan yosó ra siqui ñu. ⁴³ Soco ñima tyicuan caa tahan chi sacuvi nyoho. Vatyí ra cuñí cucahnu ca, cuñí chi cuví ra musu tandihi ca ndo. ⁴⁴ Ta nya nyoho cha cuñí ndo cuví ndo nuu, cuñí chi cuví ndo musu tandihi ca ñu.

⁴⁵ Vatyí ni ri yuhu Rayi cha quichi nya gloria ta ña vachi vatyí sacuvi ñáyivi tyiño nui. Soco vachi vatyí sacuvi tyiño nuu ndo. Ta vachi vatyí cuhve ñáyivi tari noo cha cutiyahvi ta cusacaqui cuaha ñáyivi —catyí ra Jesús.

Nu sanduvaha ra Jesús chi ra Bartimeo ra cha cuaa

(Mt. 20.29-34; Lc. 18.35-43)

⁴⁶ Tyicuan ta cachaa coyo ra ñuu Jericó. Ta cua yaha ri ra ñuu cuan. Ta cuhva cha quita ra Jesús ñuu cuan cuaha xaan ñáyivi cuahan chata ra, ñin ri chihin ra cachicá noo chihin ra. Ta yucuan nyaá noo ra cuaa cha nañi Bartimeo. Sehe ra Timeo cuví chi ra. Nyaá ra cuan yatyin ri yuhu ityi cuan, chicán ra caridaa. ⁴⁷ Ta cha chiñi ra cuaa cuan tyi cua yaha ra Jesús ra ñuu Nazaret, quichaha cana chaa ra, ta catyí ra:

—¡Yoho Jesús, ra vachi tata ra David, cundahvi cuñi chii! —catyí ra canachaá ra.

⁴⁸ Cuaha ñu chasi yuhu ra na cuxatin ra, soco maa ra ñihi ca cana chaa ra ta catyí ra:

—¡Yoho ra vachi tata ra David, cundahvi cuñi chii! —catyí ra.

⁴⁹ Tyicuan ta chicuiñi ra Jesús ta catyí ra:

—Cana ndo chi ra.

Ta cacana ra chi ra cuaa cuan ta catyí ra chi ra:

—Sani iñun. Nducuita, vatyí caná ra chuun —cacatyí ra chi ra.

⁵⁰ Tyicuan ta tuchi ñihno ra sahman dichí ra. Ta ndava ra noo ta tuhva ra nuu nyaá ra Jesús. ⁵¹ Tyicuan ta quichaha ndaca tuhun ra Jesús chi ra:

—¿Ñáá cha cuñún cha sacuvi chuhun?

Ta nacahan ra cuaa cuan ta catyí ra:

—Maestro, cuñí cha sanduvahun chiti nui —catyí ra.

⁵² Ta catyí ra Jesús chi ra:

—Cuahan. Cha nduvahun vatyí chinó iñun chii.

Ta caa cuhva ri cuan cuví nanyehe ra cuaa cuan. Ta cuahan ra chata ra Jesús ityi cuahan ra.

11

Nu quihvi ra Jesús ñuu Jerusalén
(Mt. 21.1-11; Lc. 19.28-40; Jn. 12.12-19)

¹ Cachaa coyo ra yatyin ri ñuu Jerusalén, nu nyaá ñuu Betfagé ta ñuu

Betania. Ta yucu yutun Olivo nyaá ityi nuu chiin ca. Tyicuan ta catyí ra Jesús chi uvi ra chicá noo chihin ra:

² —Cuahan ndo chichi ñuu cha nyaá ityi nuu chiña. Ta nu cua chaa ndo cunañihi ndo noo burru chaa nuhñi ti, quiñi ta quiñi ca tyayu cuví ti. Ndachi ndo chi ti, ta quichi nyaca ndo chi ti. ³ Ta tatu yóo cha ndaca tuhun ñáa tuhun sacuví ndo tyicuan caa, catyí ndo chi ñu vatyí chiñuhú ti chi ra nyacá ñaha, ta numi ri cunanyaca ndo chi ti, catyí ndo chi ñu —catyí ra Jesús chi ra.

⁴ Tyicuan ta cuahan coyo ra, ta canañihi ra burru cuan nuhñi ti ityi cahnu yatyin ri noo yuvehe, ta candachi ra chi ti. ⁵ Ta suhva ra canyicú cuan catyí ra chi ra:

—¿Ñáa cha nyacuvi ndo? ¿Ñáa tuhun cha ndachí ndo burru chiña? —catyí ra chi ra.

⁶ Tyicuan ta canacahan ra tari cuhva cha catyí ra Jesús chi ra. Ta cachaha ra cuhun coyo ra. ⁷ Tyicuan ta caquehen ra burru cuan ta chinyaca ra chi ra Jesús. Ta catyiso ra sahna ra siqui ti, ta ndaa ra Jesús chi ti. ⁸ Ta cuaha ñu ndica ñu sahna ñu ityi cuahan ra, ta inga ñu chahnu ñu soco numa ta cachacun ñu.

⁹ Tyicuan ta ñu cha cuahan ityi nuu ra ta ñu cha cuahan ityi chata, quichaha cana chaa ñu ta catyí ñu:

—¡Cahnu xaan cuví Nyoo! ¡Na sacahnu yo chi ra vachi cuenda Sutu yo Nyoo! ¹⁰ ¡Sacahnu yo chi ra vachi nyacá ñaha tari chinyaca ñaha sutu chahnu yo ra David! ¡Cahnu xaan ca cuví ra nyaá andivi! —catyí ñu.

¹¹ Tyicuan ta quiñvi ra Jesús chichi ñuu Jerusalén, ta cuahan ra vehe ñuhu cahnu. Ta cha yahá nanyehé ra ityi cuan ityi ihya, ndaca chata ra ñuu Betania chihin ndi uchi uvi ra chicá noo chihin ra vatyí cha ñi.

Nu soco ra Jesús chi yutun higo cha ñahri chiti ñi nuu tun
(Mt. 21.18-19)

¹² Cha inga quiñvi quita coyo ra ñuu Betania cuan, ta cha ni ri ca cha cuahan ra chicá ityi ra chaa noo soco chi

ra Jesús. ¹³ Ta nysava ri nanyehé ra noo tu higo cha nyaá numa. Ta chahan ra chinyehé ra tatu ñi chiti nuu tun, soco maa maa ri numa ri ñi, vatyí ta chaa ca quiñvi quita chiti tun.

¹⁴ Tyicuan ta cahan ra Jesús chihin tun, ta catyí ra chi tun tyehe caa:

—Ma coo ca chiti cachi ñayivi nuun —catyí ra chi tun.

Ta ra cachicá noo chihin ra cachiñi ra cha cahan ra.

Nu tava ñehé ra Jesús chi ra caxicó chichi vehe ñuhu cahnu
(Mt. 21.12-17; Lc. 19.45-48; Jn. 2.13-22)

¹⁵ Yahá cuan ta nachaa coyo ra Jerusalén. Ta quiñvi tucu ra Jesús chichi vehe ñuhu cahnu. Ta quichaha tava ñehé ra chi ra caxicó ta ra casatá yucuan. Sanduva ra mesa ñu canasamá xuhun chi ñayivi. Ta suri tyicuan caa sacuvi ra chihin tyayu ra caxicó paloma. ¹⁶ Ta ña chaha ca ra ca cuiso ñu ñáa cha cuiso ñu ityi chichi vehe ñuhu cuan. ¹⁷ Ta quichaha sañaha ra chi ñu, ta catyí ra:

—Nu tutu Nyoo catyí chi: “Vehi, vehe nu chicán tahvi tandihí ñayivi iyó siqui ñuhu ñayivi cuví”, catyí Nyoo. ¡Soco nyoho nasahá ndo vehe nu nyicú ra suhu! —catyí ra Jesús.

¹⁸ Ta ra cacuví nuu chi tata sutu ta ra casacuahá cuenda ley vehe ñuhu cachiñi ra cha cahan ra, ta quichaha canducu ra cuhva cha cacahni ra chi ra vatyí cayuhvi ra chi ra tyi cha tandihí ñayivi iyo cuñi ñu cha sañahá ra. ¹⁹ Soco cuhva cha cua cuaa ra Jesús quita ri ra ñuu cuan chihin ra cachicá noo chihin ra.

Nu na ityi tu higo cha soco ra Jesús
(Mt. 21.20-22)

²⁰ Cha ñaha ri cha inga quiñvi cuan, nayaha coyo ra nu nanyaá tu higo cuan. Ta cananyehé ra vatyí na ityi nyacua nya yoho tun. ²¹ Tyicuan ta nicohon ñi ra Pedro vatyí soco ra Jesús chi tun ta catyí ra chi ra Jesús:

—Maestro, nyehé tu higo cha soco, cha na ityi tun —catyí ra.

²² Nacahan ra Jesús, ta catyí ra:

—Chino iñi ndo chi Nyoo. ²³ Vatyí cha ndicha catyí chi ndo vatyí nya nyoho catyí ndo chi yucu ihya, “Na canyaha ta cuhun nu tyañuhu”, ta tatu ña chicá uvi iñi ndo, ta chinó iñi ndo, tuhun cahan ndo cua cuvi. ²⁴ Yucuan chaha catyí chi ndo vatyí tandihí cha chicán tahvi ndo, ta tatu chinó iñi ndo tyi cha naquehen ndo, tyicuan caa cucuvi. ²⁵ Ta tatu chicán tahvi ndo chi Nyoo ta cuxaán ndo chi inga ñu, saha ndo ticahnu iñi chi ñu, tacuhva vatyí Sutu ndo, ra nyaá andiví, saha tucu maa ra ticahnu iñi cuatyí ndo. ²⁶ Soco tatu ña sahá ndo ticahnu iñi chi ñu, ni ri Sutu ndo, ra nyaá andiví, ma saha ra ticahnu iñi cuatyí maa ndo.

Yóo cha chaha ityi chi ra Jesús vatyí sacuvi ra cha sacuví ra
(Mt. 21.23-27; Lc. 20.1-8)

²⁷ Tyicuan ta nachaa coyo ra Jerusalén. Ta cha niri ca cha chicá noo ra Jesús chichi vehe ñuhu cahnu cuan, catuhva ra cacuví nuu chi tata sutu, ta ra sacuahá cuenda ley, ta ra cacuví mandoñi nu nyaá ra. ²⁸ Ta candaca tuhun ra chi ra.

—¿Yóo cha tyaá tyiño chuun vatyí sacuvun tyehe caa? ¿Yóo cha chaha ityi chuun vatyí sacuvun? —cacatyí ra.

²⁹⁻³⁰ Ta nacahan ra Jesús, ta catyí ra:

—Cua ndaca tuhun tucu yuhu noo tuhun chi ndo. ¿Yóo cha tachí chi ra Juan vatyí sacondutya ra chi ñáyiví? ¿Atu Nyoo tachí chi ra, o ñáyiví? Tatu catyí ndo chii, tyicuan ta cua catyí tucu yuhu chi ndo yóo cha tyatyíño ihya chii —catyí ra Jesús chi ra.

³¹ Tyicuan ta quichaha cacuvi yuhu maa ra chihin tahan ra ta cacatyí ra:

—Tatu catyí yo tyi Nyoo tachí chi ra Juan, cucatyí ra chi yo: “Tu tyicuan caa, ¿ñáá tuhun ña chino iñi ndo chi ra?” ³² ¿Ta yoso caa catyí yo tyi ñáyiví tachí chi ra? Ma cuvi —cacatyí ra, vatyí cayuhví ra chi ñáyiví, vatyí tandihí ñu cachinó iñi ñu vatyí cha ndicha cuenda Nyoo cahan ra Juan.

³³ Tyicuan ta quichaha cacatyí ra chi ra Jesús:

—Ña chitó ndi.

Tyicuan ta ra Jesús catyí ra chi ra:

—Ni yuhu ma catyí chi ndo yóo cha tyaá tyiño chii tyi sacuvi cha sacuví —catyí ra Jesús chi ra.

12

Nu chaha ra Jesús noo cuhva yoso caa cucahñi ñu chi ra
(Mt. 21.33-46; Lc. 20.9-19)

¹ Tyicuan ta chihin cuhva ihya quichaha cahan ra Jesús chihin ra, ta catyí ra chi ra:

—Chiyó noo ra cha tachí ra yoho tichaha ndiví. Ta chasí ra chaha. Ta savaha ra noo nu cuhñi ra tichaha ndiví. Ta savaha ra noo vehe sucun tacuhva vatyí cuví saha ra cuenda tandihí.

’Yaha cuan ta chaha noo ra ñuhú cuan chi suhva ra casahá tyiño. Ta cuahan ra inga ñuu. ² Ta cha cha quiví iyó chiti yoho cuan, chitoho ñuhú cuan tachí ra noo musu nu nyicú ra casahá tyiño cuan vatyí cacan ra suhva chiti cha tahan chi chi ra. ³ Soco catiñ ra chi ra. Ta cacañi ra chi ra. Ta canatachí ra chi ra chihin nu ndaha nu ndi ra. ⁴ Tyicuan ta chitoho ñuhú cuan tachí ra chi inga musu, soco chi ra ihya catuchí ra yuu chi ra, catahví ra xiñi ra, ta cacahan uhvi ra chi ra. ⁵ Ta inga tucu musu tachí chitoho ñuhú cuan. Ta chi ra cuan cachahñi ra. Yaha cuan ta tachí ra cuaha ca ra. Soco cacañi ra chi suhva ra. Ta chi suhva ca ra cachahñi ra. ⁶ Ta ndoo noo ri ca ra cha cuví tachi chitoho ñuhú cuan. Ican cuví sehe ra cha cuñi xaan ra. Ta nu ndihí tachí ra chi sehe ra vatyí cuñi maa ra chicá xiñi ra: “Cucasaha ra ñáyiví chi sehi”, cuñi ra chicá xiñi ra. ⁷ Soco nu chaá sehe ra, ra casahá tyiño cuan catyí ra chi tahan ra: “Ican ra ihya cundoo chihin tandihí ihya. Na cahñi yo chi ra, ta ndoo maa yo chihin”, catyí ra. ⁸ Ta tyicuan caa catiñ ra chi ra ta cachahñi ra chi ra. Tyicuan ta cachituchí ra coño ñuhu ra ityi chata chacu cuan —tyicuan caa cuhva cahan ra Jesús chihin ra cuan.

⁹ Tyicuan ta ndac̄a tuhun ra Jesús chi ra ta catyí ra:

—¿Ñáá cha cusacuvi ra cuví chitoho ñuhú cuan? Cuquichi ra ta cacahñi ra chi ra casahá tyiño cuan. Ta cuhva ra ñuhú cuan chi inga ra.
¹⁰ ¿Atu ta sacuahā ca nyoho nu tutu Nyoo nu catyí chi tyehe caa? Yuu cha ña cacuñi ra casavaha vehe cotyiño ra, ican cuan cuví yuu cha ñiñi ca.

¹¹ Ican ihya cuví cha sacuvi Sutu yo Nyoo.

Ta tyaqui xaan tuhun cha cuenda chi yo, catyí chi nu tutu Nyoo —catyí ra Jesús chi ra cacuvi nuu chi tata sutu cuan.

¹² Tyicuan ta canducu ra cuhva cha tyihi ra chi ra Jesús vehe caa vatyí cachitó ra vatyí cahan ra cuhva ihya soco cha cuenda maa ra. Soco vatyí cayuhví ra chi ñáyivi, casandoq̄ ra chi ra, ta cuahan coyo ra.

Nu ndac̄a tuhun ra chi ra Jesús cha cuenda xuhun cha tavá gobiernu ñuu Roma

(Mt. 22.15-22; Lc. 20.20-26)

¹³ Tyicuan ta catachi ra suhva ra cuenda ra Herodes ta suhva ra fariseo nu nyaá ra Jesús vatyí casacahan ra chi ra ta coo cuatyí catyaa ra siqui ra. ¹⁴ Chaa coyo ra ihya ta quichaha catyí ra chi ra Jesús:

—Maestro, chitó ndi vatyí cahún cha ndicha, ta ña quichahún cha cahán ñáyivi, ta ña natín cuendon cuhva caa ri ñu. Ta ndicha sañahún ityi Nyoo. Yucuan chaha cuñi ndi coto ndi, ¿atu vaha cha tyiyahvi yo cha chicán gobiernu ñuu Roma chi yo, o ña vaha? ¿Atu tahán chi cha tyiyahvi yo, o ña tahán chi? —cacatyí ra chi ra Jesús.

¹⁵ Soco ra Jesús chitó ra vatyí ñima cha vaha chicá xiñi ra, ta catyí ra chi ra:

—¿Ñáá tuhun cha cuñi ndo sandavi ñaha ndo chii? Nyaca ndo noo xuhun chii, na nyehi —catyí ra.

¹⁶ Caquichi nyaca ra chi ra. Ta cuhva cha nanyehē ra ta ndac̄a tuhun ra chi ra, ta catyí ra:

—¿Yóó chi nuu ihya, ta yóó chi sivi nyaá ihya? —catyí ra chi ra.

Ta canacahan ra ta cacatyí ra:

—Chi gobiernu.

¹⁷ Tyicuan ta catyí ra Jesús chi ra:

—Cuhva ndo chi gobiernu cha tahán chi chi ra. Ta cuhva tucu ndo chi Nyoo cha tahán chi Nyoo —catyí ra Jesús chi ra.

Ta iyo cacuñi ra tuhun cha nacahan ra.

Nu canducu tuhun ra saduceo siqui tuhun cha nandotó ndiyi

(Mt. 22.23-33; Lc. 20.27-40)

¹⁸ Tyicuan ta cuahan coyo suhva ra saduceo nu nyaá ra Jesús. Ican ra saduceo ihya catyí ra vatyí ña nandotó ndiyi. Yucuan chaha cacahan ra tyehe caa ta catyí ra chi ra Jesús:

¹⁹ —Maestro, tyaa ra Moisés tuhun yoso caa tahán chi sacuvi yo tatu noo rayi ta chihí ra ta ndoq̄ ñasihí ra soco ña chicoq̄ sehe ra chihin ña. Catyí ra vatyí tahán chi tandaha yañi ra chihin ñaha cha chihí yí cuan, tacuhva vatyí coo sehe ña cha cuenda ndi yañi ra. ²⁰ Noo chaha chiyo ucha tahan ra chihin yañi ra. Ra cha xihna ri tandaha ra chihin noo ña, ta yori sehe ra chicoq̄. ²¹ Ta ra cu uvi tandaha ra chihin ñaha cha ndoq̄ cuan. Ta suri chihí ra. Ta suri yori sehe ra chicoq̄. Ta tyicuan caa tucu cuví chihin ra cu uñi cuan. ²² Ta tyicuan caa ndi ucha tahan ra tandaha chihin ña. Ta ni noo ra ña cachiyō sehe ra chihin ña. Ta nu ndihí tuhun, chihí ndihí maa ña. ²³ Ta vityin, quivi cunandoto ñáyivi, ¿nya ra cucuvi yí ña? Vatyí ndi ucha tahan ra cuan chiyo chihin ña —cacatyí ra chi ra Jesús.

²⁴ Tyicuan ta nacahan ra Jesús ta catyí ra chi ra:

—Nyoho cahán tondo ri maa ndo, vatyí ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo. ²⁵ Vatyí quivi cunandoto ndiyi, ni ma tandaha ñu ta ni ma cuhva ñu sehe ñu tandaha, vatyí tari ángel cha nyaá andivi tyicuan caa cucuvi ñu. ²⁶ Ta tuhun cha nandotó ndiyi cuan, ¿atu ta sacuahā

ca ndo nu libru ra Moisés yoso caa cahān Nyoo chihin ra nu cayú taca iñu cuan? Ta tyehe caa catyí ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyí Nyoo chi ra Moisés. ²⁷ Ta cha catyí Nyoo tyicuan caa cuñí chi catyí vatyí vasi cha naha cachihí ra, soco canyitó añima ra vatyí Nyoo ñima Nyoo cuenda ñu ndiyí cuví ra, soco Nyoo cuenda ñu nyitó cuví ra. Yucuan chaha catyí vatyí nyoho cahán tondo ri ndo —catyí ra Jesús chi ra.

Ley cha niñi ca cha chahā Nyoo
(Mt. 22.34-40)

²⁸ Chaa tucu noo ra sacuahá cuenda ley vehe ñuhu cuan, ta chiñi ra cacuví yuhu ra. Ta vatyí chitó ra vatyí ra Jesús vaha nacahān ra nu cacahan ra yucuan, ta ndaca tuhun ra chi ra ta catyí ra:

—Chichi cha tandihí ley, ¿nya cha niñi ca sacuvi yo? —catyí ra.

²⁹ Ta nacahān ra Jesús ta catyí ra:

—Cha xihna ca sacuví yo cha nuu tandihí, ican cuví ihya: “Cuñi ndo ñu Israel. Sutu yo Nyoo, noo ri maa ra iyó. ³⁰ Cuñun chi Sutu yo Nyoo chihin cha ñi iñun ta chihin cha tandihí añimon, ta chihin cha tandihí cha chiñi tuñi xiñun, ta chihin cha tandihí tunyee iñun.” Ican ihya cuví cha xihna ca cha tahán chi sacuvi yo.

³¹ Ta cha cu uvi catyí chi: “Cuñun chi tahun tari cuñun chi maun.” Ñahri ca tuhun cha niñi ca ican saha nduvi tahan ihya —catyí ra Jesús.

³² Tyicuan ta ra sacuahá cuenda ley cuan catyí ra chi ra:

—Vaha xaan nacahun, Maestro. Ndicha cha catyún vatyí noo ri Nyoo iyó, ta yori ca Nyoo iyó, noo tuhun ri maa ra. ³³ Ta cha cuñí yo chi Nyoo chihin cha ñi iñi yo ta chihin cha tandihí cha chiñi tuñi xiñi yo, ta chihin cha tandihí añima yo, ta chihin cha tandihí fuerza yo, ta cuñi yo chi tahan yo tari cha cuñí yo chi maa yo, vale ca cuan ta ñima ca tandihí quití cha chahá yo chi Nyoo cha chahñi yo ta chahmi yo —catyí ra sacuahā cuenda ley cuan chi ra Jesús.

³⁴ Nyehe ra Jesús vatyí vaha nacahān ra chihin cha cachi xiñi ra. Ta catyí ra chi ra:

—Chiin ri ca cuñí chi ta ñihún cuhva yoso caa nacuhvon añimon chi Nyoo na cunyaca ñaha ra —catyí ra Jesús chi ra.

Ta ni noo ca ñu ña cañá ca iñi ñu candaca tuhun ñu ñáá cha ndaca tuhun ñu chi ra Jesús.

¿Yóo chi tata vachi ra Cristo?

(Mt. 22.41-46; Lc. 20.41-44)

³⁵ Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyí ra Cristo vachi ra tata ra David? ³⁶ Vatyí suri maa ra David chotyíño Tatyí li chi ra ta catyí ra:

Cahān Suti Nyoo chihin Suti ra Cristo, ta catyí ra:

“Cunyaa chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

³⁷ ¿Yoso caa cha ra vachi tata ra David cuví chi ra Cristo, ta suri maa ra David catyí ra vatyí ra Cristo cuví Sutu ra? —catyí ra Jesús.

Ta cuaha xaan ñáyivi nyicú yucuan si xaan cacuñí ñu chiñi ñu tuhun cahán ra.

Nu catyí ra Jesús vatyí iyó cuatyí ra casacuahá cuenda ley vehe ñuhu

(Mt. 23.1-36; Lc. 11.37-54; 20.45-47)

³⁸ Nu sañahá ra Jesús ta catyí ra tyehe caa:

—Saha ndo cuenda chi ndo chihin ra casacuahá cuenda ley vehe ñuhu, vatyí tahán iñi ra cacuihno ra sahmanañi ta chicá noo ra nuyahvi tacuhva saha ndo ñáyivi chi ra, ta cuhva ndo nocumi chi ra. ³⁹ Maa ra cananducú ra nu vaha ca cunyicu ra chichi vehe ñuhu. Ta nu vaha ca cacuñí ra cachi ra nyayu nu iyó vico. ⁴⁰ Ta ican ra catinyaá vehe ñu chihí yí, vatyí ña cuví tyiyahvi ñu ñáá xuhun tava ra siqui ñu. Ta cuñí ra sacuvaha ra chi ra nuu ñáyivi. Yucuan chaha naha chicán tahvi ra nu tuvi. Maa ra cuví

cha cutachi tuñi ca Nyoo chii —catyí ra Jesús.

Noo cha chahá noo ñaha chihí yí
(Lc. 21.1-4)

⁴¹ Noo chaha nyaá ra Jesús chichi vehe ñuhu cahnu yatyin ri nu nyaá chatun nu cumí ñu xuhun cha chahá ñáyiví chi Nyoo. Ta nyehe ra yoso caa tyihí ñáyiví xuhun yucuan. Ta cuaha ñu tyayí chahá ñu cuaha xaan xuhun. ⁴² Tyicuan ta chaá tucu noo ñaha ndahví chihí yí, ta tyihí ña uvi tahan xuhun cuatyí cha caha xaan nyaá. ⁴³ Tyicuan ta caná ra Jesús chi ra cachicá noo chihin ra, ta catyí ra chi ra:

—Cha ndicha catyí chi ndo vatyí ñaha ndahví chihí yí ihya, cuaha ca chahá ña ta ñima ca inga ñu catyihí xuhun chiña. ⁴⁴ Vatyí tandihí ñu cachahá ñu cha ndoo ri ca chi ñu. Soco maa ña chihin cha ndahví ña chahá ña tandihí cha cumí ña —catyí ra Jesús.

13

Nu catyí ra Jesús vatyí cutani vehe ñuhu cahnu
(Mt. 24.1-2; Lc. 21.5-6)

¹ Cuhva cha cua quita ra Jesús chichi vehe ñuhu cahnu cuan, noo ra chicá noo chihin ra catyí ra chi ra:

—¡Maestro, nyehe ñana cha tyaquí yuu yihí vehe ihya! ¡Ñana cha nahnu vehe ihya! —catyí ra chi ra Jesús.

² Soco nacahan ra Jesús, ta catyí ra chi ra:

—¿Atu nyehún vehe nahnu ihya? Soco catyí chuun vatyí ma ndoo ni noo yuu coso síqui tahan, vatyí tandihí cutani —catyí ra Jesús.

Seña cha cucuvi cha ni cumañi ca naa ñáyiví

(Mt. 24.3-28; Lc. 21.7-24; 17.22-24)

³ Tyicuan ta cuahan coyo ra nya yucu yutun Olivo cha nyaá inga chiyo xahva ityi nuu vehe ñuhu cahnu. Ta cuhva cha nyaá ra Jesús yucuan, ra Pedro, ra Jacobo, ra Juan, ta ra Andrés candaca tuhun xehe ra chi ra:

⁴ —Cumañi ndi cha çatyun chi ndi ama cucuvi tandihí tuhun cha cahun

tuhun. ¿Ñáa seña cucuvi tatu cha cua cuvi? —cacatyí ra.

⁵ Nacahan ra Jesús ta catyí ra:

—Saha ndo cuenda chi ndo tacuhva yori sandavi ñaha chi ndo. ⁶ Vatyí cuaha xaan ra cuquichi coyo ra, ta cucotyíño ra sívi ta cucatyí ra: “Yuhu cuví ra Cristo.” Ta cusandavi ñaha ra chi cuaha xaan ñáyiví.

⁷ ‘Soco tatu chiñí ndo tuhun tyi iyó cuatyí ta cañí tahan ñáyiví, ma nayuhvi ndo. Vatyí tyicuan caa tahan chí cucuvi, soco ta chaa ca quiví cuna ñáyiví. ⁸ Vatyí noo ñuu cucañi tahan chí chihin inga ñuu, ta ñáyiví cuenda noo gobiernu cucañi tahan ñu chihin ñáyiví cuenda inga gobiernu. Ta cucoo cha taan nahnu cuaha ri ityi. Ta cucoo tama. Ta cunaquiqui ñáyiví. Ta tyehe caa cua quichaha cha nyehe ñáyiví tindoho.

⁹ Soco saha ndo cuenda chí ndo. Vatyí cucuhva cuenda ñu chí ndo chí ra cacuví tyiño. Ta cucañi ñu chí ndo chichi vehe ñuhu. Cucuhva cuenda ñu chí ndo nuu gobernador ta nuu rey cha cuenda yuhu. Ta tyicuan caa cuví cahan ndo tuhun nuu ra. ¹⁰ Vatyí cha ni cumañi ca naa ñáyiví, cumañi chí cucutya tuhun Nyoo yoso caa sacacú ra aña ñáyiví tandihí ñuu. ¹¹ Ta cuhva cha cunyaca ñu chí ndo nuu ra cacuví tyiño, ma caca xiñi ndo ñáa tuhun cucahan ndo, ni ma ndichi xiñi ndo. Çahan ndo cha catyí Nyoo chí ndo cha cahan ndo cuhva cuan. Vatyí ñima nyoho cucahan, soco maa Tatyí Ii Nyoo. ¹² Yihí ra cunacuhva cuenda ra nyacua nya chí yañi maa maa ra. Ta çacuvi ra na cacahñi ñu chí ra. Ta yihí ñáyiví cunacuhva cuenda ñu chí sehe ñu. Ta yihí ñu cunaquiqui ñu síqui sutu ñu ta síhi ñu. Ta cunacuhva cuenda ñu chí ñu na cahñi ra chí ñu. ¹³ Tandihí ñáyiví cutasi cumañi nyehe ñu chí ndo cha cuenda yuhu. Soco tatu cunyehe iñi ndo nyacua nya nu ndihí, cucacu ndo.

¹⁴ ‘Ra Daniel, ra profeta Nyoo ta cha naha, tyaá ra yoso caa cuahan tuhun noo cha cusacaquini nu ii xaan. Ta cusativí chí tandihí. Tatu nyehé

ndo nanyaá yucuan nu ña tahán chi cuinanyaa, (nyoho cha sacuahá ndo ihya na cutuñi iñi ndo) cuñi chi cha cono tandihí ñu iyó Judea nya ityi yucu. ¹⁵ Ta ñu ñohó xiñi vehe quivi cuan, noo ñu, soco ma quihvi ñu chichi vehe ñu tava ñu ñáa cha tava ñu. ¹⁶ Ta ñu ñohó nu chiqui, ma cunuhu ñu nya vehe ñu cha cunaquehen ñu sahma ñu. ¹⁷ ¡Ndahvi ñusihí cha cañohó sehe quivi cuan! ¡Ndahvi tucu cuvi ñusihí cha chaxín sehe quivi cuan! ¹⁸ Caçan ndo chi Nyoo tacuhva cha ma tahan chi caca cono ndo quivi vichin. ¹⁹ Vatyí quivi tindocho cucuvi. Ta ni noo chaha ta cuvi ca tyicuan caa nyata quivi chinqo ñuhu ñayivi nyacua nya vityin. Ta ni ma coo ca tindocho tahán ihya nu cuahan ca chi. ²⁰ Tyehe ta ma sanducuiti Sutu Mañi yo tyembu cuan, yori maa cucacu. Soco cusanducuiti ra cha cuenda cha cuñi ra chi ñu cuenda ra, ñu cha nacachi maa ra.

²¹ 'Tatu yóo cha catyí chi ndo: "Nyehe ndo, ma ra Cristo ihya" o "Nyehe, ma ra nyaá yucuan", ma chino iñi ndo. ²² Vatyí cuquichi ra casandavi ñaha, cucatyí ra tyi ra Cristo cuví ra. Ta yihí ra cucatyí ra vatyí profeta Nyoo cacuví ra. Ta cucasavaha ra seña, milagru, vatyí canducú ra cuhva sandavi ñaha ra nyacua nya chi ñu cha nacachi maa Nyoo tatu cuví chi ra. ²³ Soco saha vaha ndo cuenda vatyí yuhu cha sacote chi ndo cha ni cumañi ca cuvi tyicuan caa —catyí ra Jesús.

Nu sacoto ra Jesús yoso caa cuquichi tucu ra inga chaha

(Mt. 24.29-35, 42-44; Lc. 21.25-36)

²⁴ Ta catyí tucu ra Jesús tyehe caa:

—Soco quivi cha yaha tindocho, cunduñaa ñanyii. Ma cundichin ca yoo. ²⁵ Tiño cunacoyo andivi. Ta nyacua nya tandihí cha iyó andivi ta cunacanda. ²⁶ Tyicuan ta cunyehe ndo chi yuhu Rayi cha quichi nya gloria inga chaha, vachi nu vico chihin cha ndicha ñuhu Nyoo, ta chihin cha cahnu cuví ra. ²⁷ Tyicuan ta cutachi chi ángel ta cusandu ñin ri

chi ñu nacachi ñicahnu siqui ñuhu ñayivi, nyacua nya nu ndihí ñuhu ñayivi ta nyacua nya nu ndihí andivi.

²⁸ 'Cutuñi iñi ndo cuhva tu higo ihya: Tatu nduyutya soco tun ta caña numa tun cha chitó ndo vatyí cha cuñi chaa quivi coo chiti, cha vachi vico savi. ²⁹ Ta suri tyicuan caa tatu cha nyehe ndo tuhun ihya, coto ndo tyi cha nyaña yatyin quivi quichi tiqui. Cha nyañai yuvehe cuví cuan. ³⁰ Cha ndicha catyí chi ndo vatyí tandihí ihya cucuvi cha ni ri ca cha iyó ñáyivi. ³¹ Tyicuan ta cunaa andivi ta ñuhu ñayivi cha iyó cha vityin. Soco tuhun cahín tyicuan ri cucuvi tari cuhva catyí.

³² 'Soco yori chitó ñáa quivi ta ñáa cuhva cucuvi tandihí ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

³³ 'Yucuan chaha conyito vaha ndo, ta saha ndo cuenda ta caçan tahvi ndo, vatyí ña chitó ndo ñáa quivi cuchaa cuhva. ³⁴ Tari noo ra cha cua cuhun nu cañi. Ta cha ni cumañi ca cuhun ra, chaha cuenda ra vehe ra chi musu ra. Ta chaha ra tyiño chi noo noo ra. Ta tachí ra chi ra sahá cumi yuvehe cuan na saha ra cuenda. ³⁵ Yucuan chaha nyoho conyito ndo vatyí ña chitó ndo ñáa cuhva cuquichi ra cha cuví tari chitoho vehe cuan, an cha ni cua cuaa, an ñuu, an cuhva cha chacú chaa loho, an cha ñaha ri. ³⁶ Conyito ndo coto sana iñi ndo ta quichi ra, ta nañihi ra chi ndo quixí ndo. ³⁷ Cha catyí chi nyoho, catyí tiqui chi tandihí ñáyivi ñandihí. Na conyito ñu.

14

Nu canducu ra cuhva catin ra chi ra Jesús

(Mt. 26.1-5; Lc. 22.1-2; Jn. 11.45-53)

¹ Uvi ca quivi cumañi ta cua tahan chi vico cha nañi pascua ta vico cha tuhva ñu chachi ñu pan cha ñahri yuchan iya yihí. Ta ra cacuví nuu chi tata sutu ta ra casacuahá cuenda ley vehe ñuhu canducú ra cuhva catin

xehe ra chi ra Jesús ta cacahñi ra chi ra. ² Soco cacatyí ra chi ra tahan ra:

—Ma tñin yo chi ra cha chichi vico vityin coto naquiqui ñáyivi —cacatyí ra.

Nu chosoq noo ñaha sihi ndutya vixi chahán chi ra Jesús

(Mt. 26.6-13; Jn. 12.1-8)

³ Ñohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra mesa, chaq noo ñaha sihi ndaha ña noo yutyi cha chinó chihin noo yuu cha nañi alabastro. Tyitu yihí chihin ndutya vixi chahán cha nañi nardo. Ta yahvi vavaha nyaá. Ta tahvi ña yutyi cuan ta chosoq ña ndutya vixi chahán cuan xiñi ra Jesús. ⁴ Soco suhva ra canyicú yucuan cacuxaan ra ta cacatyí ra chi tahan ra:

—¿Ñáá tuhun sativi ña ndutya vixi chahán cuan? ⁵ Tyehe ta quiyahvi cuan, cuenda mil cuñihi yo chihin chi, ta tyinyee chi chi ñu ndahvi —catyí ra.

Ta cahan ra chi ña.

⁶ Soco ra Jesús catyí ra:

—¡Saña ndo chi ña! ¿Ñáá tuhun cha sayangá ndo chi ña? Cha chosoq ña chii tyehe caa, cha vaha cuví. ⁷ Vatyí ñu ndahvi tyicuan ri cua cunyaa ñu chihin ndo, ta cuví sacuvi maa ndo cha vaha chihin ñu ñáá ri quivi cuñi ndo. Soco yuhu ñima tyicuan ri cua cunyai chihin ndo. ⁸ Ñaha sihi ihya sacuvi ña yoso cuhva cha cuví chi ña. Chosoq ña ndutya vixi chahán coño ñuhi, cha ni cumañi ca cucúvi ta quihvi chichi ñuhu. ⁹ Cha ndicha catyí chi ndo, vatyí tandihí ri nicahnu ñuhu ñáyivi nu cahan ñu tuhun Nyoo, cunacatyí tucu ñu tuhun cha sacuvi ñaha ihya, tacuhva nicohon iñi ñáyivi tuhun ña —catyí ra Jesús.

Nu nacuhva cuenda ra Judas chi ra Jesús chi ra xaan iñi chi ra

(Mt. 26.14-16; Lc. 22.3-6)

¹⁰ Yahá cuan ta ra Judas Iscariote, noo ra chichi cha uchi uvi tahan ra cachicá noo chihin ra Jesús, cahan ra chindatuhun ra chihin ra cacuvi

nuu chi tata sutu, vatyí casandaa ra noo tyiño ta nacuhva cuenda ra chi ra Jesús chichi ndaha ra. ¹¹ Cuhva cha cachiñi ra ihya, cusii xaan cacuñi ra, ta catyí ra vatyí cuhva ra xuhun chi ra. Tyicuan ta quichaha nducu ra Judas cuhva nacuhva cuenda ra chi ra Jesús.

Nu cuxiñi ra Jesús chihin ra cachicá noo chihin ra

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Cuví chi quivi quichaha vico cha chachí ñu pan cha ñahri yuchan iya yihí. Yucuan quivi cha vico pascua tuhvá ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candacaq tuhun ra chi ra, ta cacatyí ra:

—¿Nya maa maa cuñún cha sanduvaha ndi cha cuxiñun cha vico ihya?

¹³ Tyicuan ta tachí ra chi uvi tahan ra ta catyí ra chi ra:

—Cuahan ndo chichi ñuu, ta yucuan cunañihi ndo chi noo ra cha nyisó noo quiyi ndutya. Cuahan ndo chata ra. ¹⁴ Ta nu quihvi ra, catyí ndo chi ra cuví chitoho vehe yucuan tyehe caa: “Ra Sacuaha cuñi ra coto ra nya nyaá cuarto nu cusanducahnu ra vico chihin ra cachicá noo chihin ra”, catyí ndo chi ra. ¹⁵ Ta maa ra cusañaha ra noo cuarto cahnu nu piso sucun chi ndo. Cha yahá nduvi, ta yucuan cusanduvaha ndo cha cuxiñi yo —catyí ra Jesús chi ra.

¹⁶ Cuahan coyo ra. Ta chaq coyo ra chichi ñuu. Canañihí ra tari cuhva catyí ra Jesús chi ra, ta casanduvaha ra cha cuxiñi ra cha vico pascua cuan. ¹⁷ Ta cha cuaa cuan chaq ra Jesús chihin ndi uchi uvi ra chicá noo chihin ra. ¹⁸ Ta cuhva cha canyicú ra nu mesa cachachí ra, ra Jesús catyí ra:

—Cha ndicha catyí chi ndo vatyí noo nyoho cha chachí ndo chihin cunaxico tuhun ndo chii.

¹⁹ Tyicuan ta canducuihya iñi ra ta quichaha candacaq tuhun tahan tahan ri ra chi ra, ta cacatyí ra:

—¿Atu yuhu?

²⁰ Ta nacahan ra Jesús ta catyí ra:

—Noo ra chichi cha uchi uvi ndo. Ra cha satyí pan ñin ri nu coho chihin, ican ra cuan cuví. ²¹ Vatyí yuhu Rayñi cha quichí nya gloria cucuvi chii tari cuhva catyí nu tutu tuhun Nyoo. Soco ñndahvi ra ndahvi ra naxicó tuhun chii! Vaha taxin ca cha cuenda ra, tyehe ta ña cacu ra —catyí ra Jesús.

²² Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo. Ta tahvi ra ta chaha ra chi tandiñi ca ra, ta catyí ra:

—Quehen ndo. Ican ihya cuví coñe —catyí ra chi ra.

²³ Yaha cuan ta quehen ra vaso vinu. Ta cha yaha cha nacuhva ra tyahvi nyoo chi Nyoo, chaha ra chi ra. Ta tandiñi ra cachihí ra cha ñohó chichi vaso cuan. ²⁴ Ta catyí ra chi ra:

—Vinu cha yihí chichi vasu ihya tari ñiñi cuví. Ta chihin ñiñi tyihí tahan Nyoo tuhun chaa chihin ndo vatyí cucati cha cuenda cha vaha chi cuaha ñáyivi. ²⁵ Cha ndicha catyí chi ndo vatyí ma coho que vinu nyacua nya quivi nachai nu nyacá ñaha Nyoo ta cohi vinu chaa —catyí ra Jesús chi ra.

Nu catyí ra Jesús tyi cucatyí ra Pedro tyi ña ñohó nuu ra chi ra

(Mt. 26.30-35; Lc. 22.31-34; Jn. 13.36-38)

²⁶ Cha yaha cha cachita ra yaa, ta caquita ra cuahan coyo ra nya yucu yutun Olivo. ²⁷ Tyicuan ta catyí ra chi tandiñi ra:

—Tandiñi nyoho cusandoo no-tuhun maa ndo chii vityin cha cuaa. Vatyí catyí chi nu tutu tuhun Nyoo tyehe caa: “Cucahñi chi ra sahá cumi mbee, ta mbee cacacono ti ityi cuan ityi ihya”, catyí chi. ²⁸ Soco cha yaha cha nandote, xihna que cuhun ityi Galilea ican saha nyoho —catyí ra Jesús chi ra.

²⁹ Tyicuan ta quichaha catyí ra Pedro chi ra:

—Vasi tandiñi ra sandoo ra chuun, soco yuhu ma sandoi chuun —catyí ra chi ra Jesús.

³⁰ Soco ra Jesús catyí ra chi ra:

—Cha ndicha catyí chuun, vatyí suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chii uñi chaha —catyí ra Jesús chi ra Pedro.

³¹ Soco saniñi ra Pedro ta catyí ra:

—Vasi cúvi chuhun, soco ma tixehi cha ñohó nui chuun —catyí ra Pedro.

Ta tandiñi ra cacatyí ra tyicuan caa.

Nu chicán tahvi ra Jesús nu cuví Getsemaní

(Mt. 26.36-46; Lc. 22.39-46)

³² Tyicuan ta cachaꝥ coyo ra noo nu nañi Getsemaní. Ta ra Jesús catyí ra chi ra cachicá noo chihin ra:

—Cunyicu ndo ihya ni ri cuhin cucacan tahvi —catyí ra Jesús.

³³ Ta quehen ra chi ra Pedro, ta ra Jacobo ta ra Juan cuahan chihin ra. Ta quichaha chica xaan iñi ra ta cutyoño cuñi ra. ³⁴ Ta catyí ra chi ra:

—Tuví iñi añime noo tucuihya iñi, ta cuñi cahñi chi chii. Ndoꝥ nyoho ihya, ta conyito ndo —catyí ra.

³⁵ Tyicuan ta cuahan ra chiin ca ityi nuu ca. Ta chicuiñi chiti ra nu ñuhú. Ta chicán ra chi Nyoo tatu cuvi cha ma nyehe ra tindoho cha cua cuvi chi ra cuhva cuan, catyí ra chicán tahvi ra.

³⁶ Ta nu chicán tahvi ra, ta catyí ra:

—Sutu Mañi yuhu, cha cuenda yoho ñahri cha ma cuvi chuun. Tu yoho ta cuñún na canyaha tindoho ihya chii. Soco ma cuvi tari cuhva cha cuñi mai, soco cuhva cha cuñi maun na cuvi —catyí ra Jesús chicán tahvi ra.

³⁷ Yaha cuan ta nachaꝥ ra nu nyicú ra. Ta nyehe ra tyi caquixí ra. Ta catyí ra chi ra Pedro:

—Yoho Simón, ¿atu quixún? ¿Atu ña cuví conyiton ni noo hora? ³⁸ Conyito ndo ta çacan tahvi ndo tacuhva cha ma sanacava ra ña vaha chi ndo nu cuatyí. Cha ndicha, cuñi ñanima ndo sacuvi ndo cha vaha, soco coño ñuhu ndo vita xaan cuñi chi —catyí ra Jesús chi ra.

³⁹ Tyicuan ta cuahan ra inga chaha. Ta chicán tahvi ra suri maa cha chicán ra cha xihna ri. ⁴⁰ Tyicuan ta

nachaa tucu ra inga chaha, nyehe ra tyi caquixí ra. Vatyí nicunyasi maa chiti nuu ra chihin cha cacuñi xaan ra cusu ra. Ta ña cachitó ra ñáá cha nahan ra chihin ra Jesús. ⁴¹ Ta chahan ra cha cu ñi chaha, ta nachaa ra, ta catyí ra:

—Vityin ndicha cusu ndo, nyitatu ndo. Cha iyó vaha ri vityin, cha cha cuhva cha cucuhva cuenda ra chi yuhu Rayi cha quichi nya gloria ndaha ra ca iyó cuatyí. ⁴² Ndicuita ndo, cõho ndo. Cha vachi ra naxicó tuhun chii —catyí ra Jesús chi ra.

Nu catin ra chi ra Jesús

(Mt. 26.47-56; Lc. 22.47-53; Jn. 18.2-11)

⁴³ Ni cahán ca ra Jesús ta cha ra Judas, noo ra chichi cha uchi uvi tahan ra chicá noo chihin ra. Ta cuaha sindaro ta policia vachi coyo chihin ra canyisó ra mityi ta yutun. Vachi coyo ra cuenda ra cacuví nuu chi tata sutu, ta ra casacuaha cuenda ley vehe ñuhu, ta cuenda ra mandoñi. ⁴⁴ Cha ni cumañi ca cachaa coyo ra, ra Judas, ra cha naxicó tuhun chi ra, chaha ra noo seña chi ra ta catyí ra:

—Ra cha tyayuhi, ican ra cuan cuví. Tin vaha ndo chi ra na cuhun ra chihin ndo.

⁴⁵ Ta cuhva cha cha ra tuhva ra nu nyaá ra Jesús ta catyí ra chi ra:

—Maestro.

Ta tyayuhu ra xitin ra. ⁴⁶ Tyicuan ta catin ra chi ra Jesús ta cuahan ra vehe caa.

⁴⁷ Soco noo ra cha nyaá yucuan tava ra mityi ra ta chahnya ra soho musu ra cuví nuu chi tata sutu.

⁴⁸ Tyicuan ta ra Jesús catyí ra chi ra cachaa coyo cuan:

—¿Atu vachi tin ndo chii chihin mityi ta chihin yutun, tari cha vatyí cuví yuhu noo ra suhu? ⁴⁹ Ndi quivi chinyai chihin ndo sañahi chichi vehe ñuhu cahnu cuan. Ta ni noo chaha ña tin ndo chii. Soco cuví chi tyehe caa vityin, tacuhva chino cava tari cuhva catyí nu tutu tuhun Nyoo —catyí ra Jesús chi ra.

⁵⁰ Tyicuan ta tandihi ra cachicá noo chihin ra, cachino ra ta casandoo noo

tuhun maa ra chi ra Jesús. ⁵¹ Soco noo ri ca ra tyivaa nyicón ra chi ra, ndichí ra noo sinduhu ta catin tucu ra chi ra. ⁵² Soco sandoo ra sinduhu cuan ta cuahan vavaha ra vityiaa vityi cañi ra.

Nu cutuñi chi ra Jesús nuu ra cuví tyiño

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tyicuan ta cachinyaca ra chi ra Jesús nuu ra cuví nuu chi tata sutu, ta candu in ri tandihi ra chihin ra cacuví mandoñi, ta ra casacuaha cuenda ley vehe ñuhu. ⁵⁴ Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoo ra nyaá ra chihin policia sanasaá ra chi ra yatyin yunuhu.

⁵⁵ Ra cacuví nuu chi tata sutu, ta tandihi ra cuví tyiño canducu ra ñáá noo cuatyí tyaa ra siqui ra Jesús, tacuhva cuví cacahñi ra chi ra soco ña cañihí maa ra. ⁵⁶ Vasi cuaha ñayivi cahán ñu cuendu siqui ra, soco ña nacachí tahan tuhun cahán ñu. ⁵⁷ Yihí ñu candicuita ñu ta catyaa ri maa ñu cuendu siqui ra, ta cacatyí ñu:

⁵⁸ —Nyuhu chiñi ndi cha cahán ra vatyí cusatani ra vehe ñuhu cahnu cha savaha ñayivi. Ta chichi cha ñi quivi cunacananyaa ra inga vehe ñuhu cha ñima ñayivi savaha, na —catyí ñu.

⁵⁹ Soco ni tyicuan caa ña nacachí tahan cha catyí ñu. ⁶⁰ Tyicuan ta ra cuví nuu chi tata sutu ndicuita ra mahñu nu nyicú tandihi ra yucuan, ta quichaha ndaca tuhun ra chi ra Jesús, ta catyí ra:

—¿Atu ña nacahan maun? ¿Ñáá cha cuví ihya cha cacahán ra sicun? —catyí ra chi ra.

⁶¹ Soco ra Jesús taxi ri nanyaá ra, ta ña nacahan maa ra. Ta ra cuví nuu chi tata sutu cuan ndaca tuhun ra chi ra inga chaha, ta catyí ra:

—¿Atu yoho cuvún Cristo, Sehe Nyoo ra cha iyó cha vaha chi?

⁶² Ra Jesús catyí ra chi ra:

—Ican, yuhu cuví. Ta nyoho cunyehe ndo chi yuhu Rayi cha quichi nya gloria, cucunyai chiyo vaha Nyoo ra cha iyó tandihi tunyee iñi chi. Ta cunyehe ndo chii quivi quichi nu vico andivi —catyí ra chi ra.

⁶³ Tyicuan ta ra cuví nuu chi tata sutu cuan, chahnya ra sahma ra tari noo seña vatyi ña tahán iñi ra, ta catyí ra:

—¿Ñáá ca cha ndaa cuñi yo?

⁶⁴ Nyoho cha chini ndo vatyi chicoo cuatyí ra nuu Nyoo chihin tuhun cahán ra. ¿Yoso caa cuñi nyoho? —catyí ra.

Ta tandihi ra cacatyí ra vatyi tahán chi cúvi ra.

⁶⁵ Tyicuan ta suhva ra quichaha tyicu si ra chi ra. Ta chasi ra nuu ra, ta cañi ra chi ra chihin chiqui ra ta cacatyí ra chi ra:

—¡Nacoto yóo cha cañi chuun! —cacatyí ra chi ra.

Ta policia cacatu ra nuu ra.

Nu catyí ra Pedro vatyi ña ñohó nuu ra chi ra Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ra Pedro nyaá ra ityi yuvi nuquehe. Tyicuan ta cha noo ñaha sahá tyiño chihin ra cuví nuu chi tata sutu cuan. ⁶⁷ Ta cuhva cha nanyehe ña chi ra Pedro vatyi sanasaá ra chi ra yunuhu cuan, ndoo ña nyehé vavaha ña chi ra, ta catyí ña chi ra:

—Yoho ñandihi, chica noun chihin ra Jesús ra ñuu Nazaret cuan —catyí ña chi ra.

⁶⁸ Soco ra Pedro tixehe ra, ta catyí ra:

—Ña ñohó nui chi ra, ña chité ñáá tuhun cahún —catyí ra chi ña.

Tyicuan ta quitá ra ityi yuvehe. Tyicuan ta chacu noo loho. ⁶⁹ Tyicuan ta ñaha cha nyaá tyiño yoo cuan, nanyehe tucu ña chi ra inga chaha ta quichaha catyí ña chi ra canyicú yucuan:

—Noo ra tahan ra cuan cuví ra ihya —catyí ña.

⁷⁰ Soco tixehe ra inga chaha. Ta yaha suhva ri ca cuhva ta ra canyicú

yucuan cacatyí tucu ra inga chaha chi ra Pedro:

—Cha ndicha vatyi noo ra yucuan cuví yoho, vatyi ra Galilea cuvún, vatyi tari cahán ñu, cahún —catyí ra chi ra.

⁷¹ Tyicuan ta iyo xaan tyanaha ra Pedro, ta catyí ra:

—¡Chitó vaha Nyoo tyi ña ñohó nui chi ra cha cahán nyoho tuhun! ¡Na cahñi Nyoo chii tatu ña ndicha cha cahín! —catyí ra.

⁷² Ta caa cuhva ri cuan chacu ri loho cha cu uvi chaha. Tyicuan ta nicohon iñi ra Pedro tuhun cha cahan ra Jesús chihin ra: “Cha ni cumañi ca cuacu loho uvi chaha, yoho cucatyun vatyi ña ñohó nuun chi yuhu uñi tahan chaha.” Nicohon iñi ra Pedro ta quichaha chacu chaa ra.

15

Nu nanyaá ra Jesús nuu ra Pilato
(Mt. 27.1-2, 11-14; Lc. 23.1-5; Jn. 18.28-38)

¹ Cuhva cha cundichin candu in ri ra cacuví nuu chi tata sutu chihin ra cacuví mandoñi ta chihin ra casacuahá cuenda ley vehe ñuhu ta tandihi ra cuví tyiño ñu Israel. Ta ra Jesús nuhñi ra, chinacuhva cuenda ra chi ra chi ra Pilato. ² Ta ndaca tuhun ra Pilato chi ra, ta catyí ra:

—¿Atu rey cuenda ñu Israel cuví yoho?

Ta nacahan ra Jesús ta catyí ra:

—Ican, yuhu cuví. Ndicha cha cahún.

³ Ta ra cacuví nuu chi tata sutu cuaha xaan cha catyaa ra siqui ra.

⁴ Tyicuan ta quichaha ndaca tuhun tucu ra Pilato inga chaha chi ra, ta catyí ra:

—¿Atu ña nacahan maun? Nyehé yoso cha cuaha cha tyaá ra sicun.

⁵ Soco ra Jesús ña nacahan maa ra. Yucuan chaha ña chitó ra Pilato ñáá cha caca xiñi ra.

Nu cutuñi chi ra Jesús vatyi cucúvi ra
(Mt. 27.15-31; Lc. 23.13-25; Jn. 18.38—19.16)

⁶ Ta vico cuan tuhvá ra Pilato saña ra chi noo ra ñohó vehe caa, noo ra cha cacán maa ñáyivi. ⁷ Ta ñohó noo ra nañí Barrabás vehe caa cuan, ñn ri chihin inga ra cha cachahñi chi ñáyivi noo nu naquiqui ñáyivi siqui gobiernu. ⁸ Ta quichí coyo ñáyivi quichaha chican ñu chi ra Pilato na saña ra chi noo ra tari tuhvá maa ra. ⁹ Ta nacahan ra Pilato, ta catyí ra:

—¿Atu cuñí nyoho cha sañe chi Rey cuenda ñu Israel?

¹⁰ Tyicuan caa catyí ra vatyí tuví iñi ra vatyí ra cacuví nuu chi tata sutu cuan tasi cuñí ra chi ra Jesús tyi cuaha ñáyivi nyicón chi ra, yucuan chaha nacuhva cuenda ra chi ra. ¹¹ Soco ra cacuví nuu chi tata sutu cuan catyiyuhú ra chi ñáyivi na catyí ñu na saña ra chi ra Barrabás. ¹² Tyicuan ta ndaca tuhun ra Pilato chi ñu, ta catyí ra:

—¿Ta ñáá cha cuñí ndo sacuvi chihin ra cha catyí nyoho Rey cuenda ñu Israel chi? —catyí ra chi ñu.

¹³ Tyicuan ta nacanachaa ñu, ta catyí ñu:

—¡Na cúvi ra nu cruzi! —catyí ñu, canachaá ñu.

¹⁴ Ta catyí ra Pilato chi ñu:

—Soco ¿ñáá cha ña vaha sacuvi ra? —catyí ra.

Soco canachaa ca ñu ta catyí ñu:

—¡Na cúvi ra nu cruzi! —catyí ñu.

¹⁵ Tyicuan ta vatyí cuñí ra Pilato cuvaha ra nuu ñu, saña ra chi ra Barrabás. Tyicuan ta tyihí ra tyiño na ndoho ra Jesús, ta cha yaha cuan chaha cuenda ra chi ra vatyí cúvi ra nu cruzi.

¹⁶ Tyicuan ta chinyaca sindaro chi ra nuquehe vehe tyiño cuan. Ta casandu ñn ri ra tandihí sindaro. ¹⁷ Ta casacuihño ra noo sahma tyacu nyaa chi ra. Ta caquicu ra noo corona chihin iñu. Ta catyihí ra xiñi ra. ¹⁸ Yaha cuan ta quichaha cacana chaa ra siqui ra chacú nyaa ra chi ra, ta catyí ra:

—¡Nocumi chuun, yoho Rey cuenda ñu Israel! —catyí ra.

¹⁹ Ta cacañi ra xiñi ra chihin noo yutun, ta tyicú sñ ra chi ra. Ta

cachicuiñi chiti ra casaha ra tyi sacahnu ra chi ra. ²⁰ Cha yaha cha chacu nyaa ra chi ra tyicuan caa, tinyaa ra sahma nyaa cuan chi ra, ta sandihvi noo ra sahma maa ra chi ra. Yaha cuan ta cuahan ra chihin ra vatyí cuatyaa ra chi ra nu cruzi.

Nu cuacúvi ra Jesús nu cruzi

(Mt. 27.32-44; Lc. 23.26-43; Jn. 19.17-27)

²¹ Yaha noo ra ñuu Cirene, nañí ra Simón. Sutu ra Alejandro ta ra Rufo cuví chi ra. Ni cua nachaa ra cha chahan ra nu chiquí. Ta cuhva cha cua yaha ra ityí cuan, casaniñi sindaro chi ra na cuiso ra cruzi ra Jesús.

²² Ta cachinyaca ra chi ra Jesús noo nu nañí Gólgota. Ta cuñí chi catyí: Nu Cuví Yiquí Xiñi Ndiyí. ²³ Ta cachaha ra vinu nasaca chihin noo tatan cha nañí mirra coho ra. Soco ra Jesús ña chihí ra. ²⁴ Cha yaha catyaa sindaro chi ra nu cruzi, cachahan ra sihva chihin sahma ra ta nya ra saha ganaa caquehen ra sahma ra.

²⁵ Caa ñn cha ñaha ri catyaa ra chi ra nu cruzi. ²⁶ Ta letra cha catyaa ra xiñi cruzi cuan, catyí chi ñáá cuatyí ra. Ta catyí chi tyehe caa: “Ican ra ihya cuví Rey cuenda ñu ñuu Israel.” ²⁷ Ta chinanyaa ra uvi ca cruzi nu chitaca ra uvi tahan ra suhu, noo ra chiyo vaha ra, ta inga ra chiyo satyín ra. ²⁸ Ta tyicuan caa quita chi tari cuhva catyí nu tutu tuhun Nyoo tyehe caa: “Sahá ñu tuhun tyi cuví ra noo ra quiñi iyó.” ²⁹ Ta ñu yaha coyo chacú nyaa ñu chi ra. Ta quisí xiñi ñu, ta catyí ñu chi ra:

—¡Jaan! ¡Yoho cha catyún tyi cusatanun vehe ñuhu cahnu, ta chichi cha uñi quivi cunacoñehun inga chaha! ³⁰ ¡Sacacu maun chuun ta ñoo nu cruzi chiña! —catyí ñu.

³¹ Ta tyicuan caa tucu ra cacuví nuu chi tata sutu ta ra casacuahá cuenda ley vehe ñuhu, cachacú nyaa ra chi ra, ta catyí ra chi tahan ra:

—¡Chi inga ñu sacacu ra, soco ña cuví sacacu ra chi maa ra! ³² Na noo ra nu cruzi vityin, na nyehe yo ta

chino ñi yo tyi Cristo Rey cuenda ñu Israel cuví ra —catyí ra.

Ta nyacua nya ra tacaá inga cruzi inchiyo inchiyo xiin ra ta cacahán ra chi ra.

Nu chihí ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva cha cua cu hora, tandihí ñuhu ñayiví nduñaa, nyacua nya caa uñi cha cha ñi. ³⁴ Ta suri cuhva cuan canachaa ra Jesús chihin tandihí fuerza ra, ta catyí ra:

—Eloi, Eloi, ¿lama sabactani? —ta cuñí chi catyí: Nyoo Suti, Nyoo Suti, ¿ñáá tuhun sandoo noo tuhun maun chii? —catyí ra.

³⁵ Suhva ra tayucu yucuan cachiñí ra ta catyí ra:

—¡Xihna! Caná chaa ra chi ra profeta Elías —catyí ra.

³⁶ Tyicuan ta chinq noo ra yucuan chiquehen ra noo tari caa xixan ta satyí ra chihin vinu iya. Ta tyaa ra noo nu yutun ta satuhva ra yuhu ra na coho ra, ta catyí ra:

—Cuatu ndo. Na nyehe yo tatu quichi ra Elías sanoo ra chi ra —catyí ra cuan.

³⁷ Tyicuan ta ñihi xaan canachaa ra Jesús, ta chihí ra. ³⁸ Ta sahma cha tacaá chichi vehe ñuhu cahnu ndata sava maa chi, nya síqui ta nyacua nya ityi yuvi. ³⁹ Ta noo capitán cuenda sindaro Roma nanyaá ra yatyin nuu ra Jesús cuan. Cha nyehe ra yoso caa cana chaa ra, ta yoso caa chihí ra, ta catyí ra:

—Cha ndicha ndicha cuii vatyí Sehe Nyoo cuví chi ra ihya —catyí ra.

⁴⁰ Ta nya sava ri tayucú tucu suhva ñusihí canyehé ñu. Ta mahñu ñu cuan nanyaá cu María ñaha Magdala, ta cu María síhi ra José ta ra Jacobo ra tyivaa ca. Ta nanyaá tucu cu Salomé.

⁴¹ Ican ñusihí ihya cachinyicon chi ra Jesús, ta tyinyeé ñu chi ra quivi chica noo ra ityi Galilea. Ta sin ri nyicú cuaha ca ñu cha chaa coyo chihin ra Jerusalén cuan.

Nu chicuchi ñu chi ra Jesús

(Mt. 27.57-61; Lc. 23.50-56; Jn. 19.38-42)

⁴² Cuví chi quivi cha sanduvaha ñu cha cachi ñu vatyí inga quivi tuhvá ñu nyitatu. ⁴³ Ta cha cuaa cuan chaa ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñí ra ta quihví ra nu nyaá ra Pilato, ta chican ra coño ñuhu ra Jesús chi ra. ⁴⁴ Iyo cuñí ra Pilato cha nacoto ra vatyí cha chihí ra Jesús. Ta cana ra chi capitán vatyí ndaca tuhun ra tatu cha yaha chihí ra. ⁴⁵ Ta cha catyí capitán vatyí cha yaha chihí ra, ra Pilato chaha ra coño ñuhu ra chi ra José. ⁴⁶ Tyicuan ta sata ra José noo sinduhu cha chinq chihin sahma finu cha nañi lino, ta sanoo ra coño ñuhu ra. Ta síqui noo ra chihin sinduhu cuan. Yaha cuan ta chityihí ra chi ra noo chichi ñaña cha cachatya ra chichi noo yuu. Ta chasi ra yuhu ñaña cuan chihin noo yuu cahnu. ⁴⁷ Ta cu María ñaha Magdala cuan ta cu María síhi ra José, chaa coyo ñu nyehe ñu nu tyihí ra chi ra.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Yaha quivi nyitatu ñu. Tyicuan ta cu María ñaha Magdala ta cu María síhi ra Jacobo, ta cu Salomé sata ñu ndutya vixi chahán ta cuahan coyo ñu cua tyihi ñu coño ñuhu ra Jesús.

² Ta timingu cuví, quivi quichaha vitya, ñaha cuii ri cuhva cha vachi cundichin cuhva cha ni cua caña ñanyii, chaa coyo ñu nu ñaña. ³ Ta catyí ñu chi tahan ñu:

—¿Yóo cha cusacanyaha yuu yuhu ñaña cuan? —catyí ñu chi tahan ñu.

⁴ Soco cuhva cha nanyehe ñu, yuu cahnu cha nyasi yuhu ñaña cuan cha cuachiyó chi nya sava. ⁵ Quihví coyo ñu chichi ñaña yucuan. Ta nanyehe ñu chi noo ángel tari caa noo ra tyivaa, nyaá ra chiyo vaha. Ta ñihnó ra sahma cañi ta cuichin. Ta canayuhví ñu. ⁶ Soco catyí ra chi ñu:

—Ma yuhvi ndo. Nyoho nanducú ndo chi ra Jesús ra ñuu Nazaret, ra cha chihí nu cruzi. Soco cha nandoto ra. Ña ñohó ca ra ihya. Nyehe ndo nu chacun ra chi ra. ⁷ Cuahan ndo cua sacoto ndo chi ra Pedro ta chi inga ra cachica noo chihin ra. Catyi ndo chi ra vatyí na cuhun coyo ra ityi Galilea vatyí yucuan nyatú ra Jesús chi ra, tari cuhva catyi ra chi ra. Vatyí ra Jesús cha cuahan ra ityi nuu —tyicuan caa catyi ángel cuan chi ñu.

⁸ Tyicuan ta cuahan coyo vavaha ñu, vatyí suri canihí ñu cha cuenda cha yuhví ñu. Ta yori maa chihin cahán ñu tuhun cha cuenda cha yuhví ñu.

Nu tuví ra Jesús nuu cu María ñaha Magdala
(Jn. 20.11-18)

⁹ Cuví chi timingu quivi quichaha vitya cha nandoto ra Jesús. Yaha cuan ta xihna ca nuu cu María ñaha Magdala tuví ra. Maa ña cuví ñaha cha tava ñehe ra ucha tahan tatyí ña vaha. ¹⁰ Ta chahan ña chisacoto ña chi ra cachica noo chihin ra, vatyí canyicú cuihya ra ta cachacú cha ra. ¹¹ Soco cuhva cha cachiñi ra vatyí iyó ra Jesús ta vatyí nyehe ña chi ra, ña cachino ñi ra.

Nu tuví ra Jesús nuu uvi tahan ra chica noo chihin ra
(Lc. 24.13-35)

¹² Cha yaha cuan, ra Jesús tuví ra nuu uvi tahan ra cha cuahan coyo chica ityi ityi nu chiqui. Soco sin caa cuhva caá ra cananyehe ra chi ra. ¹³ Ta cuanuhu coyo ra ta sacoto ra chi tandihi ca ra. Soco suri ña cachino ñi ra cha cacahan ra cuan.

Tuhun cha chahara Jesús chira cha tyatyíño ra chi
(Mt. 28.16-20; Lc. 24.36-49; Jn. 20.19-23)

¹⁴ Ta cuee ca ta tuví ra Jesús nuu ndi uchi in ra cha cachica noo chihin ra, cha ni ri ca cha canyicú ra nu mesa. Ta cahan ra chi ra cha cuenda cha ña cachino ñi ra, ta cha cuenda cha candava ñi ra vatyí ña cachino ñi ra

ra tuhun cahan ñu nyehe tyi nandoto ra. ¹⁵ Ta catyi ra chi ra:

—Cuahan ndo nicacahnu ñuhu ñayivi, ta cahan ndo chihin tandihi ñayivi, ta catyi ndo chi ñu yoso caa sacacú Nyoo ñi ra. ¹⁶ Ta ñu cha chinó ñi ta condutya ñu, cucacu ñi ra. Soco ñu cha ña chinó ñi cundoo cuatyí ñu siqui ñu ta cunaa ñu. ¹⁷ Ta tandihi seña ihya cusacuvi ñu cha chinó ñi chii: Chihin siivi cutava ñehe ñu tatyí ña vaha. Cucahan ñu inga sahan cha ña chitó ñu. ¹⁸ Cutin ñu coo, ta tatu coho ñu cha yihí venenu, ma saha cuehe chi ñu. Ta sin ri cutyiso ñu ndaha ñu siqui ñu cuhvi, ta cunduvaha ñu.

Nu nandaq xica ra Jesús andivi
(Lc. 24.50-53)

¹⁹ Nu ndihi cahan Sutu Mañi yo Jesús chihin ra, ta nandaq xica ra andivi, ta chicunyaq ra chiyo vaha Nyoo. ²⁰ Tyicuan ta ra cachica noo chihin ra quita ra ta chahan coyo ra chichahan ra tuhun Nyoo yoso caa sacacú ra ñi ra yo tandihi ri ityi. Suri maa Sutu Mañi yo tyinyee chi ra vatyí chaha ra cha sacuvi ra cuaha milagru. Ta tyicuan caa nyehé ñayivi tyi ndicha tuhun cacahan ra.

Tuhun Nyoo Cha Tyaa San Lucas

Nu sacuhun ra Lucas noo tuhun chi ra Teófilo

¹⁻³ Cha chitón yoho Tata Teófilo, vatyi cha cuaha ñáyiví nducú ñu cuhva ta tyaa ñu nuu tutu tuhun cha cuví nu nyicú ndi. Tyaa ñu tari maa cuhva nacatyí ñáyiví chí yo, ñáyiví cha nyehe ta cahán tuhun ra Jesús nya quiví xihna ri. Ta vityin tahán tucu chí chí yuhu tyi sacote tuhun ra chuun. Vatyi cha yahá sacuahí ta nyehe vahi tandihí nya nu quichahá. Ta vityin ñañi ñañi ri cuatyai tuhun ra. ⁴ Vatyi coto vahun tyi ndicha cha sacoto ñáyiví chuun.

Nu sacoto noo ángel chí ra Zacarías ama cucacu ra Juan ra sacondutyá chí ñáyiví

⁵ Quiví cha cuví ra Herodes rey nicañu Judea, chiyo noo tata sutu, chinañi ra Zacarías. Ta yihí ra cuenda ityi tata sutu cha chinañi Abías. Ta ñasihi ra chinañi ña Elisabet. Ta vachi ñu tata ra Aarón, ra chiyo ta cha naha. ⁶ Ta ñahri maa cuatyí ñu iyó nuu Nyoo. Vatyi vaha xaan quichahá ñu tuhun cahán Nyoo. Ta yori maa cuví tyaa cuatyí siqui ñu. ⁷ Soco yori maa sehe ñu chicoo. Vatyi cu Elisabet, ña cuví coo sehe ña. Ta sijn ri ninduvi tahan ñu chahnu xaan ñu.

⁸ Ta noo quiví tahan chí ityi cuenda ra Zacarías cha sacuvi ra tyiño nuu Nyoo. ⁹ Tari cuhva costumbre maa tata sutu, nyehe ra nya ra tahan chí nyatu chí. Ta tahan chí nyatu chí ra Zacarías cha quihví ra chichi vehe ñuhu, vatyi cahmi ra cutu. ¹⁰ Cha ni ri ca cha ñohó ra chahmí ra cutu cuan, cuaha xaan ñáyiví chicán tahvi ñu ityi chata vehe. ¹¹ Yucuan ta tuví noo ángel cuenda Nyoo nuu ra Zacarías. Ta chicuinanyaá ra chiyo vaha arta nu chahmí ra cutu. ¹² Ta cha nanyehe ra Zacarías chí ángel cuan, iyo xaan

cuñí ra. Ta yuhví xaan ra. ¹³ Soco ángel cuan catyí ra chí ra:

—Zacarías, ma yuhvun. Vatyi Nyoo chiñí ra tuhun cahún. Ta ñasihun cu Elisabet cucoo noo sehe ña. Ta Juan cusacunañun chí cue. ¹⁴ Sii xaan cucuvi chuun. Ta cuaha xaan ñu, cusii cuñi quiví cacu cue. ¹⁵ Vatyi sehun, cahnu xaan ra cucuví ra nuu Nyoo. Ma coho ra vinu ta ni ndixi. Ta ñihi xaan cuquihí Tatyí li Nyoo chí ra nyata cumañi cacu ra ta tandihí tyembu cha coo ra. ¹⁶ Ta cuaha xaan ñáyiví Israel cunyicon chí Sutu yo Nyoo cha cuenda ra. ¹⁷ Ta cucoo tunyee iñi Nyoo chí ra. Ta cuquihí xaan Tatyí li Nyoo chí ra. Vatyi cucuvi ra tari ra Elías, ra cuví profeta Nyoo ta cha naha. Ta cusanicoo vaha ra chí ñáyiví chihin sehe ñu. Ta cusañaha ra chí ñáyiví quiñi iyó na quichaha ñu tuhun cahán Nyoo. Tyicuan caa cusanduvaha ra chí ñáyiví ta cuatu tuhva ñu chí Nyoo —catyí ángel chí ra Zacarías.

¹⁸ Ta ndaca tuhun ra Zacarías chí ángel, ta catyí ra:

—¿Yoso caa ta cote noo cha ndicha vaha? Vatyi yuhu cha chahnu xain. Ta ñasihi cha chahnu xaan ña ñandihí —catyí ra.

¹⁹ Ta ángel cuan quichahá catyí ra:

—Yuhu Gabriel nañi. Ta chique tyiño Nyoo. Maa ra tachí chii vatyi cahin nuun ta sacote tuhun vaha ihya chuun. ²⁰ Ta vityin nduñihun. Vatyi ña chinó iñun tuhun cahín. Ta ma cuví cahun nyacua nya chino cava tuhun cahin chuhun —catyí ángel cuan chí ra.

²¹ Ta ñáyiví cha nyatú chí ra Zacarías ityi chata vehe, iyo xaan cuñí ñu ñáá tuhun cha cucuee xaan ra chichi vehe ñuhu. ²² Soco cuhva cha quita ra Zacarías, ña cuví maa cahan ra chihin ñu. Tyicuan ta tuví iñi ñu vatyi iyó cha nyehe ra chichi vehe ñuhu cuan. Ta quichahá cahan ra chihin ñu chihin seña ri. Vatyi ña cuví cahan ra.

²³ Ta quiví cha ndihí tyiño saha ra Zacarías vehe ñuhu cuan, ta cuanuhu ra nya vehe ra. ²⁴ Ta cha yahá tuhun

cuan chichon sehe ñasihí ra, cu Elisabet. Ta ña quitá maa ña chata vehe cha ní ri ca cha ohon yoo. Ta chicá xiñi ña: ²⁵ “Tyehe caa sacuví Sutu Mañi yuhu chihin, tacuhva ma cahan cuehe ca ñáyiví chii”, chicá xiñi ña.

Nu sacoto noo ángel chi cu María vatyí cucacu ra Jesús

²⁶ Nu cu iñu yoo cha ñohó sehe cu Elisabet, tachí Nyoo chi ángel Gabriel ñuu Nazaret ityi Galilea. ²⁷ Vatyí cucahan ra chihin noo ñaha tyivaa cha nañi María. Ta cha nyaña cha tandaha ña chihin noo ra nañi José. Ta ra José cuan vachi ra tata rey David. ²⁸ Ta tuví ángel cuan nu nyaá ña. Ta quichaha catyí ra chi ña:

—Nocumi chuun, María. Ñihun tumañi iñi nuu Nyoo. Vatyí maa ra nyaá chuhun. Ta chi yoho nasocó xaan ca Nyoo nuu tandihí ca ñusihí —catyí ángel cuan chi ña.

²⁹ Ta cuhva cha chiñi ña cha cahan ra, iyo xaan cuñi ña tuhun cahan ra. Ta ndichí xiñi ña: “¿Ñáá tuhun cha chaha ra ihya nocumi chi yo tyicuan caa?” ndichí xiñi ña.

³⁰ Ta catyí ángel cuan:

—Ma yuhvun, María, vatyí ñihún tumañi iñi nuu Nyoo. ³¹ Vatyí cuacohon noo sehun. Ta sacunañun Jesús chi ra. ³² Cahnu xaan ra cuacuvi ra. Ta cunañi ra Sehe Nyoo ra cuví nuu. Ta Nyoo Sutu Mañi yo cusacuvi ra rey chi ra. Tari cuví ra David, ra vachi ra tata. ³³ Vatyí cunyaca ñaha ra chi ñáyiví Israel tandihí maa tyembu. Ta ma ndihí maa cha cunyaca ñaha ra —catyí ángel cuan chi ña.

³⁴ Yucuan ta ndaca tuhun cu María chi ángel, ta catyí ña:

—¿Yoso caa cuahan tuhun ihya? Vatyí yuhu, ta coo ca yí.

³⁵ Ta nacahan ángel ta catyí ra:

—Maa Tatyí Ii Nyoo cuquichi sicun. Ta tunyee iñi Nyoo cahnu cuquichi tari noo vico ta casi chi sicun. Yucuan chaha ra ii cha cucacu cunañi ra Sehe Nyoo. ³⁶ Tyicuan caa tucu cu Elisabet ñáyiví chuun. Cucacu noo sehe ña vasi cha chahnu ña. Ñaha cha catyí ñáyiví vatyí ña cuví maa coo sehe.

Soco vityin cha ñohó sehe ña. Cha iñu yoo ñohó. ³⁷ Vatyí Nyoo ñahri cha ma cuvi sacuvi ra —catyí ángel chi ña.

³⁸ Ta quichaha catyí cu María:

—Yuhu cuví musu Sutu yo Nyoo. Na sacuvi maa ra yoso cuhva catyún —catyí ña.

Yucuan ta cuahan ángel cuan.

Cuahan cu María cuanyehe ña chi cu Elisabet

³⁹ Cuví noo quiví cuan, numi xaan cuahan cu María noo ñuu ityi Judea nu maa ri maa yucu cuví. ⁴⁰ Ta quihví ña chichi vehe ra Zacarías. Ta chaha ña nocumi chi cu Elisabet. ⁴¹ Cuhva cha chiñi cu Elisabet tuhun cahan cu María, natyoño cha lee cha ñohó chichi ña. Ta chitu ña chihin Tatyí Ii Nyoo. ⁴² Ta chaa nacahan ña, ta catyí ña:

—Nyoo sahá ra tumañi iñi chuun cha nuu tandihí ñusihí. Ta nasocó ra chi sehun. ⁴³ ¿Ta yóo ñaha cuví yuhu? Vatyí quichi síhi Sutu Mañi yo quichí nyehe ña nu nyai. ⁴⁴ Cuhva cha chiñi tuhun cahun, ta natyoño sehi cha ñohó chichi. Vatyí síi xaan cuví chi ra. ⁴⁵ Ta síi xaan cuñi añimon vatyí chinó iñun cha cuacuvi tuhun cahan Nyoo chuhun —catyí cu Elisabet.

⁴⁶ Ta quichaha catyí cu María:

—Sacahní chi Nyoo chihin tandihí añime.

⁴⁷ Ta síi xaan cuví chii vatyí sacacú Nyoo añime.

⁴⁸ Vatyí cuví yuhu noo ñaha ndahvi ta Nyoo tñn cuenda ra chii. Ta vityin tandihí quiví cucatyí ñáyiví chii vatyí cahnu xaan tumañi iñi ñihí.

⁴⁹ Vatyí Nyoo, cahnu xaan cuví ra. Ta cahnu cha sacuví ra chihin. Ta ii xaan síví ra.

⁵⁰ Ta tyicuan ri ndahvi cuñi ra chi tandihí ñáyiví cha sahá ñáyiví chi ra.

⁵¹ Cahnu xaan cha sacuví ra chihin tunyee iñi iyó chi ra.

Sanaá ra cuhva chicá xiñi ñu cahnu sahá chi.

⁵² Sanocueé ra chi ñu sacahnú chii. Ta ra cha ña cahnu sahá chii, sacacahnú ra chi ra.

53 Chahá Nyoo cha vaha chi ñu cuñi coto cha vaha, ñu chitó vatyi chiñuhú Nyoo chi. Soco ñu tyayhi cha cuñi maa tyi ñahri chiñuhu chi, chihin nundaha nu ndhi ñu, sacuhún ra chi ñu.

54 Tyinyeé ra chi ñáyivi Israel cha cuví musu ra.

Ta ña naá iñi ra chi ñu. Nyehé ndahvi ra chi ñu.

55 Tari cuhva catyí Nyoo chi ra Abraham, sutu yo, ta chi sehe ra, tyicuan caa sacuví Nyoo tyicuan ri maa —catyí cu María.

56 Ta cu María ndoo ña chihin cu Elisabet uñi yoo. Ta cha yahá uñi yoo cuan ta cuanuhu ña nya vehe ña.

Quivi cacu ra Juan, ra cha sacondutya

57 Ta chaá quivi cha cuacacu cha lee sehe cu Elisabet. Cacu cue ta rayhi cuví cue. 58 Ta cha chiñi ñáyivi cha nyicú yatyin yuvehe ña ta ñáyivi chi ña cha tyicuan caa, sii xaan cuví chi ñu. Ta sii xaan cuñi tucu maa ña. Vatyi vaha xaan cha sacuvi Nyoo chihin ña. 59 Ta nu cu uña quivi cha cacu cue, chahan ñu chihin cue vehe ñuhu. Vatyi cuhva cuenda ñu chi cue chi Nyoo. Ta sahá ñu circuncidar chi cue tari cuhva iyó maa ñu. Chahnya ñu chiin ñhi cue nu cuví cue rayhi. Ta cuñi ñu sacunañi ñu Zacarías chi cue tari sutu cue. 60 Soco sihi cue catyí ña:

—Ma cuví. Juan, cunañi cue.

61 Ta quichaha catyí ñu:

—¿Ñáá tuhun sacunañún Juan chi cue? Yori ñáyivi chi ndo cha nañi tyicuan caa —catyí ñu.

62 Ta quichaha ndaca tuhun ñu chihin seña ri chi sutu cue. Vatyi coto ñu ñáá sivi cuñi ra cha cunañi cue. 63 Ta chican sutu cue noo vitu, ta nuu vitu cuan tyaá ra tyehe caa: “Juan cuví sivi cue”, tyaá ra.

Ta tandihi maa ñu cuan iyo xaan cuñi ñu tuhun cuan. 64 Ta nahan ra Zacarías caa cuhva ri cuan. Ta quichahá sacahnu ra chi Nyoo.

65 Tandihi maa ñu iyó yatyin ri yuvehe ñu, yuhví xaan ñu tuhun ihya. Ta tandihi maa ñáyivi cha iyó yucu ityi Judea cuan nacatyí ñu chi tahan

ñu tuhun ihya. 66 Ta tandihi maa ñáyivi cha chitó tuhun cuan, ndichi xiñi ñu, ta ndaca tuhun ñu chi tahan ñu:

—¿Yóó ra cuví cha lee cuan? —catyí ñu.

Vatyi ndicha, Nyoo nasoco xaan ra chi cue.

Nu sacahnú ra Zacarías chi Nyoo

67 Sutu cue, ra Zacarías, tyitú ra chihin Tatyí Ii Nyoo. Tyicuan ta quichahá cahan ra tuhun cha chahá Nyoo chi ra, ta catyí ra:

68 —Cahnu xaan ra cuví Sutu Mañi yo Nyoo cuenda yo ñu Israel.

Vatyi quichi ra nu nyicú yo, cha cuví yo ñáyivi chi ra.

Ta sacacu ra chi yo.

69 Ta chahá ra noo ra cahnu chi yo, cha cusacacu chi yo.

Tata ra David ra cha sacuvi tyiño nuu Nyoo vachi ra.

70 Tyicuan caa cahan Nyoo chihin yuhu ra cacuví profeta cuenda ra ta cha naha.

71 Vatyi tyicuan caa cusacacu ra chi yo ndaha ra xaan iñi chi yo, ra cha tasi cuñi nyehé chi yo.

72 Tyicuan caa cundahvi cuñi nyehé ra chi ñáyivi chi yo ta cha naha.

Ta ma sanaa ra iñi ra tuhun cahan ra.

73 Ican ihya tuhun cahan Nyoo chihin ra Abraham sutu yo.

74 Catyí ra vatyi cusacacu ra chi yo ndaha ra xaan iñi chi yo.

Vatyi ma yuhvi ca yo sacahnu yo chi ra.

75 Ta maa ra sanducachi ra iyó yo nuu ra.

Ta vaha coo yo nuu ra tandihi quivi cha cuacoo yo ñáyivi —catyí ra Zacarías.

76 Ta catyí ra Zacarías chi cha lee cuan tyehe caa:

—Ta yoho sehi, profeta Nyoo cahnu cucatyí ñáyivi chuun.

Vatyi cuhun ityi nuu Sutu Mañi yo. ta cucahun tuhun ra chihin ñáyivi vatyi cha cuñi quichi ra.

77 Ta cusacoton chi ñáyivi vatyi cunasaha Nyoo tucahnu iñi cuatyi ñu.

Ta tyicuan caa ta cacu aña ñu.

78 Vatyí Sutu yo Nyoo cuñí ra chi yo.
Ta cundahví cuñí ra chi yo.

Ta saquichí ra noo ra tyinyeé chi yo.
Tari noo ñuhu ñanyii cucuvi ra.

79 Vatyí chihin cha sañahá ra chi yo
sacundichín ra nu nyicú yo nu
ñaa iñi cha catyi cuatyí yo.

Ta cusañaha ra chi yo yoso caa quihví
yo ityi vaha —catyí ra Zacarías.

80 Ta cha luhlu cuan cuahan
chahnu ra. Nyee cuñí ra chihin Tatyí
li Nyoo. Ta chicoo ra noo chiqui ndi
nyacua nya quivi cha chicohon nuu
ñayivi Israel chi ra.

2

Quivi cacu ra Jesús (Mt. 1.18-25)

1 Ta quivi cuan iyó noo ra nyacá
ñaha, nañí ra Augusto. Tachi ra tyiño
natyaa ra sivi tandihi ñayivi nicahnu
ñuhu ñayivi. 2 Ta quivi cuan ra Cirenio
cuví ra ra nyacá ñaha tandihi ñuu ityi
Siria. 3 Ta tahn chi cuhun tandihi
ñayivi nya ñuu ñu. Vatyí cuhva ñu
sivi ñu yucuan. 4 Yucuan chaha quita
ra José ñuu Nazaret ityi Galilea. Ta
chahan ra ityi Judea ñuu Belén nu
cacu ra David. Yucuan chahan ra
vatyi tata ra David vachi ra. 5 Ta
chahan ra chi cuhva ra sivi ra chihin
cu María. Ta cha cuñí tandaha ña
chihin ra. Ta ñohó sehe ña. 6 Ta
chiquitahan chaa quivi cha cacu sehe
ña cha ni ri ca cha ñohó ñu Belén cuan.
7 Ta yucuan cacu sehe nuu ña. Ta
natyihí ña chi cue chichi sahma. Ta
nandacun ña chi cue chichi noo nu
chachí quití. Vatyí cuaha xaan ñayivi
chaa coyo ñuu cuan. Ta ña nuña ca ni
minoo vehe nu cunyaa ñu.

Nu cahn ángel chihin ra sahá cumi mbee

8 Yatyin ñuu Belén cuan nyicú
suhva ra casahá cumi mbee sana
ra cha cha cuaa cuan. 9 Ta sana
iñi ra ta tuví noo ángel Nyoo. Ta
cha ndichin Nyoo Sutu Mañi yo
ndundichin nicachico ri nu canyicú
ra. Ta nayuhví xaan ra. 10 Ta
quichaha cahn ángel cuan, ta catyí
ra tyehe caa:

—Ma yuhvi ndo. Vatyí cuacatyí
mai noo tuhun chi ndo. Noo tuhun
cha sii xaan cuacuvi chi tandihi
ñayivi. 11 Vatyí vityin cacu ra sacacú
añima ndo ñuu ra David. Noo ra
cuví Cristo, ra cuví Sutu Mañi yo.
12 Ta ihya cuví seña chahi chi ndo,
cunyehe ndo chi cha lee cuan, siqui
noo cue sahma. Catuví cue chichi
noo nu chachí quití —catyí ángel chi
ra casahá cumi mbee cuan.

13 Ta caa cuhva ri cuan chaa coyo
cuaha xaan ca ángel casacahnú ra chi
Nyoo, ta cacatyí ra:

14 Sacahnu yo chi Nyoo nu nyaá ra
gloria.

Ta ñayivi iyó siqui ñuhu ñayivi cha ñihi
tumañi iñi ra, na coo taxi añima
ñu, catyí ángel cuan.

15 Yucuan ta cuanuhu coyo ángel
cuan gloria. Tyicuan ta ra casahá
cumi mbee quichaha catyi ra chi ra
tahan ra:

—Coho ndo Belén. Cunyehe yo ñáa
cha cuví. Vatyí maa Sutu yo Nyoo
sacoto chi yo.

16 Tyicuan ta numi xaan cuahan
coyo ra Belén. Ta nañihí ra chi cue
chihin cu María ta ra José. Ta catuví
cue noo nu chachí quití. 17 Ta yaha
cha canyehe ra chi cue, ta canacatyí
ra chi ñu ñáa ndihi tuhun cahn ángel
chihin ra cuenda cha lee cuan. 18 Ta
tandihí ñu chiñi tuhun cahn ra, iyo
xaan cuñí ñu. 19 Soco cu María ta
cuhva chicá ri xiñi ña tuhun cuan.
20 Ta ra sahá cumi chi mbee cuan
cuanuhu coyo ra. Ta casacahnú ra
chi Nyoo cha cuenda cha cachiñi ra ta
canyehe ra. Vatyí chinó cava tandihí
cha catyí ángel chi ra.

Nu cuacuhva cuenda ñu chi ra Jesús chi Nyoo vehe ñuhu cahnú

21 Ta nu cu uña quivi, saha ñu cir-
cuncidar chi cue, tari cuhva tuhva
maa ñu. Ta sacunañi ñu chi cue,
Jesús. Suri maa sivi cha catyí ángel chi
cu María quivi cha cumañi ca cohon
sehe ña.

22 Ta cha yaha quivi cha tahan
chi vatyí ndundi ñu nuu Nyoo, tari
cuhva catyí maa ley Nyoo cha tyaa
ra Moisés, tyicuan ta cuahan ñu

Jerusalén. Vatyí cuacuhva cuenda ñu chi cue chi Nyoo. ²³ Sacuvi ñu tyicuan caa vatyí ñin caa maa catyí ley tyehe caa: “Tandihí rayíi cha cuví sehe nuu ñu, cucuhva cuenda ñu chi Nyoo”, catyí ley cuan. ²⁴ Ta chahan ñu chicuhva cuenda ñu uvi tahan quití tari cuhva catyí maa ley Sutu yo Nyoo nu catyí chi tyehe caa: “Cuhva ndo uvi tahan cucu o uvi tahan ndicuiya”, catyí ley cuan.

²⁵ Ta quivi cuan iyó noo ra ñuu Jerusalén cha nañí Simeón. Ta cuví ra noo ra vaha, ra sacahnú chi Nyoo. Ta nyatú tuhva ra nya quivi cusacacu Nyoo chi ñáyivi Israel. Ta yihí ra Tatyí Ii Nyoo. ²⁶ Ta sacoto Tatyí Ii Nyoo chi ra vatyí ma cuví ra cha ni ri ca cha ta nyehe ca ra chi ra sacacú chi ñu Israel, ra cuví Cristo, ra cha cusaquichi Sutu yo Nyoo. ²⁷ Ta ra cuan chahan ra vehe ñuhu cuhva catyí maa Tatyí Ii Nyoo chi ra. Cuhva cuan chahan tucu sutu ta sihi cha lee cuan chinyaca ñu chi cue vehe ñuhu cahnu, vatyí sacuvi ñu tari cuhva catyí maa ley. ²⁸ Ta quehen ra Simeón chi ra Jesús. Ta tyihí sucun ndaha ra chi ra. Ta quichaha sacahnu ra chi Nyoo. Ta catyí ra:

²⁹ —Sutu Mañi yuhu. Na cuví mai vityin chihin cha vaha.

Vatyí cha sacuvun cha catyvun chi yuhu cha cuví sehn.

³⁰ Vatyí cha nyehi chihin nui chi ra cusacacu chi ndi.

³¹ Vatyí sañahun chi ra nuu tandihí ñáyivi.

³² Cha catyí ra ta cucahnu ñáyivi Israel nuu inga ñáyivi.

Ta ican ra cuví ra cha sacundichín añima tandihí inga ñáyivi cha ñima ñu Israel cuví. Vatyí cusacuvi ra na cutuñi iñi ñu tuhun Nyoo —catyí ra Simeón.

³³ Ta ra José chihin sihi ra Jesús, iyo xaan cuñi ñu cha cahan ra Simeón tuhun cha lee cuan. ³⁴ Yucuan ta chican tahvi ra Simeón chi Nyoo chaha ñu. Ta catyí ra chi cu María sihi ra Jesús:

—Nyehe chi cha lee ihya. Vatyí cuaha xaan ñáyivi cuchino iñi ñu chi ra quivi coto ñu tuhun ra, ta cucacu añima ñu. Soco cuaha ñu ma chino iñi ñu chi ra, ta cunaa ñu. Ta cucahan ñu chi ra. ³⁵ Ta cha tyicuan caa cusanatuvi ra cha caa añima noo noo ñáyivi. Soco cha cuenda yoho, María. tari cha uhvi cha yahá sava noo tyicaa añima ñáyivi, tyicuan caa cha uhvi cunyhún cha catyí cha lee ihya —catyí ra Simeón.

³⁶ Ta yucuan ñohó tucu noo ñaha cha cuví profeta Nyoo. Ta cha chahnu xaan ña. Nañí ña Ana. Ta sehe ra Fanuel noo ra vachi tata ra Aser cuví chi ña. Luhlu xaan ña ta tandaha ña, ta ucha ri cuiya chiyo ña chihin yi ña ta chihí ri ra. ³⁷ Ta cha cumi xico cumi cuiya chihí yi ña. Ta vehe ñuhu cahnu ña quitá ña, vatyí ndiyaca ta ñiyaca chicán tahvi ña chi Nyoo. Ta iyó cuhva cha ña chachi ña cha ni ri ca cha chicán tahvi ña. ³⁸ Ta cuhva cha ñohó ra José ta cu María chihin cha lee, cha ña nu canyicú ñu. Ta nacuhva ña tyahvi nyoo chi Nyoo. Ta quichaha cahan ña tuhun ra Jesús chihin tandihí ñáyivi cha nyatú tuhva cha quita ñuu Jerusalén chichi ndaha ra ñuu Roma.

Nu cuanuhu ñu nya Nazaret

³⁹ Cha yaha cha sacuvi ñu tandihí maa yoso caa catyí ley Sutu yo Nyoo, ta cuanuhu ñu nya Galilea nya ñuu ñu nu nañí Nazaret. ⁴⁰ Ta ra Jesús cuahan chahnu ca ra. Ta cuahan ndunye ca ra ta cuahan chicoo ca cha chiñi tuñi Nyoo. Vatyí nasoco Nyoo chi ra.

Nu ñohó ra Jesús chichi vehe ñuhu

⁴¹ Ra José chihin sihi ra Jesús ndihí cuiya ri tuhva ñu chahán nya Jerusalén cha vico pascua. ⁴² Ta quivi ndihí ra Jesús uchi uvi cuiya, chahan tandihí ñu Jerusalén tari tuhva maa ñu chahán cha vico. ⁴³ Ta quivi ndihí vico ta cuandichi ñu, ta ra Jesús ndoo ra Jerusalén. Ta ña saha ñu cuenda. ⁴⁴ Cuñi maa ñu vatyí cuandichi ra mahñu nu tuvi ñáyivi cuan. Yucuan chaha ñahri chicá iñi ñu chicá ityi ñu

noo quiví. Tyicuan ta nanducu ñu chi ra chichi nu tuvi ñáyiví cuan, ⁴⁵ ta ña nañihí ñu chi ra. Tyicuan ta cuanuhu chata ñu cuananducu ñu chi ra nya Jerusalén.

⁴⁶ Cha yaha cha uñi quiví ta nañihí ñu chi ra chichi vehe ñuhu cahnu cuan. Nyaá ra chihin ra sacuahá cuenda ley vehe ñuhu. Ta tyasohó ra cuan tuhun cahán ra. Ta ndacá tuhun ra tuhun chi ra. ⁴⁷ Ta tandihí ñu chiñí tuhun cahán ra, iyo xaan cuñí ñu chihin cha chiñi tuñi ra, ta chihin tuhun cha nacahán ra. ⁴⁸ Cuhva cha nanyehé sutu ra ta sihi ra chi ra, iyo xaan cuñí ñu. Ta sihi ra catyí ña chi ra:

—Sehe luhli. ¿Ñáá tuhun cha sacuvun chi ndi tyehe caa? Sutun ta yuhu chica xaan iñi ndi ta nanducu xaan ndi chuun —catyí ña.

⁴⁹ Tyicuan ta catyí ra Jesús:

—¿Ñáá tuhun cha nanducu ndo chii? ¿Atu ña chito ndo vatyí niñi cuñí chí cha cahin tuhun Suti chihin ñáyiví? —catyí ra.

⁵⁰ Soco ña cutuñí iñi ñu tuhun cahán ra.

⁵¹ Tyicuan ta cuanuhu ra chihin ñu nya Nazaret. Ta quichahá ra tuhun cahán ñu. Ta sihi ra naquehen vaha ña tandihí tuhun ihya chíchi añima ña.

⁵² Yucuan cuví nu cuacuahnu ca ra Jesús. Ta cuahan chaa ca cha chiñi tuñi xiñi ra. Ta sii xaan cuví chi Nyoo chihin ra ta ñáyiví ñandihí.

3

Ra Juan, ra sacondutya, cahán ra tuhun Nyoo nuu ñáyiví

(Mt. 3.1-12; Mr. 1.1-8; Jn. 1.19-28)

¹ Nu ndihí chahun cuiya cha cuví ra Tiberio rey cahnu ñuu Roma, ta ityi Judea nyacá ñaha ra Poncio Pilato. Ta ra Herodes nyacá ñaha ra Galilea. Ta yañi ra, ra Felipe nyacá ñaha ra Iturea chihin Traconite. Ta ra Lisantias nyacá ñaha ra Abilinia quiví cuan. ² Ta ra Anás chihin ra Caifás, ican ra cuví ra ra cacuví nuu chi tandihí tata sutu. Ta quiví cuan cahán Nyoo chihin ra Juan sehe ra Zacarías noo nu chiqui ndii. ³ Ta ra Juan chicá noo ra tandihí

ñuu cha nyaá yatyin ri nu nyaá noo yuvi cahnu cha nañi Jordán cahán ra tuhun Nyoo chihin ñáyiví. Ta catyí ra chi ñu na ndu uvi iñi ñu cuatyí ñu ta na condutya ñu. Tyicuan caa ta Nyoo saha ra tucahnu iñi chi ñu, catyí ra.

⁴ Tyehe caa cuvi tari cuhva catyí nu libru cha tyaa ra Isaías profeta Nyoo ta cha naha. Ta catyí ra:

Chiñí yo cha caná chaa noo ra noo nu chiqui ndii, ta catyí ra:

“Tari sanduvahá ndo noo ityi, tyicuan caa sanduvaha ndo añima ndo vatyí cuaquichi Sutu Mañi yo.

Nuña ndo noo ityi ndoo chi ra na quihví ra añima ndo.

⁵ Tari cha sanandutú ndo noo ticoho, ta tari sandundaá ndo noo yucu cahnu,

ta tari sandundoó ndo cha yacua, ta tari sanduvií ndo nu quiñi caa, tyicuan caa nasama ndo cuhva iyó ndo.

⁶ Tyicuan caa ta tandihí ñáyiví ta nyehe ñu vatyí Nyoo chaha ra cha cacú añima ñu.”

⁷ Ta tyicuan caa cahán ra Juan chihin ñáyiví. Yucuan ta cuhva cha chiñí ñu tuhun cahán ra, ta catyí ñu chi ra vatyí na sacondutya ra chi ñu. Yucuan ta quichaha catyí ra chi ñu:

—¡Nyoho tari noo tata coo xaan cuví ndo! ¿Yóo cha sañaha chi ndo vatyí chihin cha condutya ri ndo ta ma tachi tuñi ca Nyoo chi ndo? ⁸ Nasama ndo cuhva iyó ndo, na nyehe ñáyiví vatyí cha ndu uvi iñi ndo cuatyí ndo. Ta ma catyí ndo vatyí tata ra Abraham vachi ndo. Vatyí nyacua nya noo yuu ihya, Nyoo cuví sananduvi ra noo ñáyiví chi ra Abraham. ⁹ Tari yutun cha ña chahá chiti, tyicuan caa cuvi ndo. Vatyí ña sacuví ndo tari cuhva cuñí Nyoo. Ta yutun cha ña chaha chiti, cahnya ñáyiví chi tun. Ta cahmi ñu chi tun. Tyicuan caa tucu nyoho cha cuñí cuirí cahun ndo nu cayu ñuhu —catyí ra Juan.

¹⁰ Yucuan ta quichaha ndaca tuhun ñáyiví chi ra:

—¿Yoso caa sacuvi ndi, cuñí yoho?
—catyí ñu.

¹¹ Ta nacahan ra Juan, ta catyí ra:

—Yóo ra cha iyó uvi tahan camisa, tahan chi cuhva ra noo chi ra cha ñahri chi. Ta yóo ñu cha iyó cha cachi, tahan chi cuhva ñu cha cachi ñu ñahri chi —catyí ra.

¹² Ta chaꝥ coyo tucu suhva ra catavá xuhun cuenda gobiernu Roma, ta cuñí ra condutya ra. Ta candaca tuhun ra chi ra Juan:

—Maestro, ¿yoso caa sacuvi tucu nyuhu? —catyí ra.

¹³ Ta catyí ra Juan chi ra:

—Tari cuhva catyí ley tava ndo xuhun. Ta ma tava ndo cuaha ca.

¹⁴ Yucuan ta quichaha candaca tuhun tucu suhva sindaro chi ra, ta catyí ra:

—Ta nyuhu tucu, ¿yoso caa sacuvi ndi? —catyí ra.

Ta nacahan ra Juan ta catyí ra:

—Ma tinyaa ca ndo cha chii ñáyivi. Ta ma tyanaha ndo chi ñu. Ma tyaa ndo cuatyí siqui ñu tatu ñahri cuatyí ñu. Ta ndoꝥ ndo vaha yoso cuhva yahvi ndo —catyí ra Juan.

¹⁵ Iyo cuñí ñáyivi tuhun cahán ra Juan. Ta cuñí ñu tyi ican ra cuví Cristo, ra cha sacacú chi yo. ¹⁶ Soco ra Juan catyí ra chi tandihi ñu:

—Cha ndicha vatyi sacondutyé chi ndo chihin ndutya. Soco cha yaha yuhu chihin cuquichi inga ra cusacondutya chi ndo chihin Tatyí Ii Nyoo ta chihin ñuhú. Iyó ca tunyee iñi chi maa ra, ta ñima ca yuhu. Vatyi ña ñané cha cuví musu ra ta niri cha ndachi ñi xityin ndichan ra. ¹⁷ Tari noo ra cha cuanaquehen vaha ñiñi, ta natyihí vaha ra chichi yaca. Ta cahmi ra mihin. Tyicuan caa cuví maa Sutu Mañi yo chihin yo. Tatu chinó iñi yo chi ra, cunaquehen vaha ra chi yo, ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhú cha ma ndahva ca maa —catyí ra Juan.

¹⁸ Ta tyehe caa cahan ra Juan chihin ñu. Ta cuaha xaan ca tuhun cahan ra nuu ñu tyi cuaquichi Sehe

Nyoo ta cua sacacu ra chi yo. ¹⁹ Ta cahán ra Juan chi ra Herodes cha cuenda tandihi cuii cha ña vaha nyacuví ra. Vatyi naquehen ra chi cu Herodías, ñasihí ra Felipe yañi ra. Ta cuaha ca cha ña vaha nyacuví ra. ²⁰ Soco ra Herodes tahan chi cha tya-soho ra tuhun ihya soco ña cuñí ra. Nu ndihi tuhun tyihí ndihi ra chi ra Juan vehe caa.

*Quivi cua condutya ra Jesucristo
(Mt. 3.13-17; Mr. 1.9-11)*

²¹ Cumañi ca cha cohon ra Juan vehe caa sacondutya ra chi tandihi ñáyivi. Ta sacondutya tucu ra chi ra Jesús. Ta cha niri ca cha chicán tahvi ra Jesús chi Nyoo ta nuña andivi. ²² Ta nyehe ra Tatyí Ii Nyoo quichi siqui ra tari noo paloma. Ta tyacu noo ndusu andivi cha catyí tyehe caa:

—Yoho cuvún Sehi cha cuñí. Ta sii xaan cuñí chuhun —catyí ndusu cuan.

*Ñáyivi vachi ra Jesucristo tata
(Mt. 1.1-17)*

²³ Oco uchi cuiya ra Jesús ta quichaha saha tyiño ra tyiño Nyoo. Ta tandihi ñáyivi cuñí maa ñu vatyi sehe ra José cuví chi ra. Ta ra José, sehe ra Elí cuví chi ra. ²⁴ Ta ra Elí, sehe ra Matat cuví chi ra. Ta ra Matat, sehe ra Leví cuví chi ra. Ta ra Leví, sehe ra Melqui cuví chi ra. Ta ra Melqui, sehe ra Jana cuví chi ra. Ta ra Jana, sehe ra José cuví chi ra. ²⁵ Ta ra José, sehe ra Matatías cuví chi ra. Ta ra Matatías, sehe ra Amós cuví chi ra. Ta ra Amós sehe ra Nahum cuví chi ra. Ta ra Nahum, sehe ra Esli cuví chi ra. Ta ra Esli, sehe ra Nagai cuví chi ra. ²⁶ Ta ra Nagai, sehe ra Maat cuví chi ra. Ta ra Maat, sehe ra Matatías cuví chi ra. Ta ra Matatías sehe ra Semei cuví chi ra. Ta ra Semei, sehe ra José cuví chi ra. Ta ra José, sehe ra Judá cuví chi ra. ²⁷ Ta ra Judá, sehe ra Joana cuví chi ra. Ta ra Joana sehe ra Resa cuví chi ra. Ta ra Resa, sehe ra Zorobabel cuví chi ra. Ta ra Zorobabel, sehe ra Salatiel cuví chi ra. Ta ra Salatiel, sehe ra Neri cuví chi ra. ²⁸ Ta ra Neri, sehe ra Melqui cuví

chi ra. Ta ra Melqui, sehe ra Adi cuví chi ra. Ta ra Adi, sehe ra Cosam cuví chi ra. Ta ra Cosam, sehe ra Elmodam cuví chi ra. Ta ra Elmodam, sehe ra Er cuví chi ra. ²⁹ Ta ra Er, sehe ra Josué, cuví chi ra. Ta ra Josué, sehe ra Eliezer cuví chi ra. Ta ra Eliezer, sehe ra Jorim cuví chi ra. Ta ra Jorim, sehe ra Matat cuví chi ra. ³⁰ Ta ra Matat, sehe ra Leví cuví chi ra. Ta ra Leví, sehe ra Simeón cuví chi ra. Ta ra Simeón, sehe ra Judá cuví chi ra. Ta ra Judá, sehe ra José cuví chi ra. Ta ra José sehe ra Jonán cuví chi ra. Ta ra Jonán, sehe ra Eliaquim cuví chi ra. ³¹ Ta ra Eliaquim, sehe ra Melea, cuví chi ra. Ta ra Melea, sehe ra Mainán cuví chi ra. Ta ra Mainán, sehe ra Matata cuví chi ra. Ta ra Matata, sehe ra Natán cuví chi ra. ³² Ta ra Natán, sehe ra David, cuví chi ra. Ta ra David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra. ³³ Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra. ³⁴ Ta ra Judá, sehe ra Jacob cuví chi ra. Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham sehe ra Taré cuví chi ra. Ta ra Taré, sehe ra Nacor cuví chi ra. ³⁵ Ta ra Nacor, sehe ra Serug cuví chi ra. Ta ra Serug, sehe ra Ragau cuví chi ra. Ta ra Ragau, sehe ra Peleg cuví chi ra. Ta ra Peleg, sehe ra Heber cuví chi ra. Ta ra Heber, sehe ra Sala cuví chi ra. ³⁶ Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra. ³⁷ Ta ra Lamec, sehe ra Matusalén cuví chi ra. Ta ra Matusalén sehe ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra. ³⁸ Ta ra Cainán, sehe ra Enós cuví chi ra. Ta ra Enós,

sehe ra Set cuví chi ra. Ta ra Set, sehe ra Adán cuví chi ra. Ta ra Adán, sehe Nyoo cuví chi ra.

4

Nu nducú nyehe cuihna chi ra Jesús (Mt. 4.1-11; Mr. 1.12-13)

¹ Ta chitú ra Jesús chihin Tatyí Ii Nyoo cha yaha condutya ra. Yucuan ta quitá ra nu cuví yuvi cahnu Jordán ta cuanuhu ra. Ta Tatyí Ii Nyoo chinyaca chi ra noo nu chiqui ndi. ² Yucuan chinyaa ra uvi xico quivi. Ta nducú nyehe cuihna chi ra. Ña chachi maa ra quivi cuan. Yaha cuan ta quichaha chisoco ra. ³ Yucuan ta quichaha catyí cuihna chi ra:

—Tatu ndicha cha Sehe Nyoo cuví chuun, catyí chi yuu cha catuví ihya, na nanduvi pan.

⁴ Ta ra Jesús nacahan ra, ta catyí ra:

—Catyí tuhun Nyoo tyi ñima chihin cha cachi ri ñayivi ta conyito ñu. Soco conyitó tucu añima ñu chihin tandihí tuhun cahán Nyoo —catyí ra Jesús chi cuihna.

⁵ Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañaha ra tandihí nu nyacá ñaha ñayivi siqui ñuhu ñayivi. ⁶ Ta cuihna catyí ra chi ra Jesús:

—Ndaha yuhu nyaá tandihí ñayivi ihya. Vatyí chaha Nyoo cha cunyaca ñahi tandihí ihya siqui ñuhu ñayivi. Ta cuví cuhve yóo chí cuñí mai cuhve. ⁷ Cuhve tandihí ñayivi cuan chuun tatu yoho ta cuiñi chitun nui, ta sacahnun chii —catyí cuihna cuan chi ra Jesús.

⁸ Soco ra Jesús catyí ra chi cuihna:

—Canyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri chí maa Nyoo sacahnu yo. Ta ñn ri chí maa ra quichaha yo.”

⁹ Yaha cuan ta quehen tucu cuihna cuan chi ra Jesús. Ta chinyaca ra chi ra nya ñuu Jerusalén. Ta sandaa ra chi ra xiñi vehe ñuhu cahnu. Ta quichaha catyí ra chi ra Jesús:

—Tatu ndicha cha Sehe Nyoo cuví chuun, sandupehla nyacua nya nu ñuhú. ¹⁰ Vatyí nyaá nu catyí chi nu tutu Nyoo tyehe caa:

Nyoo cusaquichi ra ángel, quichi saha cuenda chuun.

¹¹ Cunaquehen ra chuun chihin ndaha ra. Ta ma cuhva ra cha taxin chahun chihin yuu —catyí ra chi ra.

¹² Tyicuan ta nacahan ra Jesús, ta catyí ra:

—Soco catyí tucu nu tutu Nyoo tyehe caa: “Ma nducu nyehun chi Sutu Mañi yo Nyoo”, —catyí ra.

¹³ Ta cuihna ña cuví sandahvi ñaha ra chi ra Jesús. Ta cuahan ra suhva quívi.

Nu quichaha ra Jesús cahan ra tuhun Nyoo chihin ñáyivi

(Mt. 4.12-17; Mr. 1.14-15)

¹⁴ Cha yaha tuhun cuan, ta nachaa ra ityi Galilea. Ta tyitú ra yihí chihin tunyee iñi Tatyí li Nyoo. Ta cahán ñáyivi tuhun ra tandihí ri ityi. ¹⁵ Ta sañahá ra chi ñáyivi nu cuví vehe ñuhu tandihí ri ñuu. Ta tandihí ñu sacahnú ñu chi ra.

Nu nyaá ra Jesús Nazaret ñuu nu chahnú ra

(Mt. 13.53-58; Mr. 6.1-6)

¹⁶ Tyicuan ta nachaa ra Jesús nya Nazaret, ñuu nu chahnú ra. Ta noo quívi nyitatú ñáyivi, ta quihvi ra chichí vehe ñuhu, tari tuhva maa ra. Ta chicunanyaa ra vatyí cua sacuahá ra tuhun Nyoo. ¹⁷ Ta chaha ñu noo libru Nyoo chi ra cha tyaa ra Isaías ra profeta Nyoo ta cha naha. Ta cuhva cha nuña ra, nañihí ra noo nu catyí tyehe caa. Ta quichaha sacuahá ra:

¹⁸ Nyaá Tatyí li Nyoo chihin vatyí maa ra tachí chii.

Vatyí nacachí ra chii vatyí sañahi tuhun vaha ra chí tandihí ñáyivi ndahvi.

Tachí ra chii vatyí sanduvahi chí ñu uhvi añima.

Tachí ra chii vatyí sacote tuhun ra chí ñu nyaá ndaha ra ña vaha, vatyí cusacacu Nyoo chí ñu.

Tachí ra chii vatyí sanyehi chí ñáyivi cuaa.

Ta sacote chí ñu nyehe tindoho vatyí cucacu ñu.

¹⁹ Ta sacote chí ñu vatyí cha chaa quívi cha chaha Nyoo tumañi iñi chí ñu.

²⁰ Ndihi sacuahá ra ta nacasi ra nu libru cuan. Ta nacuhva ra chí noo ra cha nyaá vehe ñuhu cuan. Ta chicun-yaá ra. Yucuan ta tandihí ñáyivi cha nyicú cuan ndoo ñu nyehe ñu chí ra.

²¹ Yucuan ta quichaha catyí ra chí ñu:

—Vityin quívi ihya chinó cava tuhun cha nyaá nu libru cha sacuahí nuu ndo —catyí ra Jesús chí ñu.

²² Tandihí ñu, vaha cahán ñu tuhun ra Jesús. Ta iyo cuñi ñu tuhun cha cahán ra vatyí vaha xaan cha cahán ra. Ta quichaha ndaca tuhun ñu chí tahan ñu:

—¿Atu ñima ra ihya cuví sehe ra José?

²³ Ta quichaha catyí ra Jesús chí ñu:

—Chité cha nacacá iñi ndo. Vatyí tyehe caa cua catyí ndo chí: “Tatu ra sanduvahá cuvún, sanduvaha xihna ca chí maun. Tandihí cha chiñi ndi cha sacuvun ñuu Capernaum. Sacuvi tucu ñuu maun vityin.”

²⁴ Ta catyí tucu ra Jesús:

—Cha ndicha vatyí ni noo ra profeta Nyoo, ta ña quichaha ñáyivi ñuu ra chí ra. ²⁵ Ta cha ndicha catyí chí ndo vatyí cuaha xaan ñu chí yí chíyo Israel ihya cuiya cha chica noo ra Elías. Ta cuiya cuan ña coon savi uñi cuiya sisava. Ta cuaha xaan tama chíyo. ²⁶ Soco ña tachí Nyoo chí ra Elías vatyí tyinyee ra chí ni noo ñu chí yí Israel cuan. Soco tachí Nyoo chí ra nu nyaá noo ñaha chí yí ñuu Sarepta cha nyaá yatyin ñuu Sidón.

²⁷ Ta tyicuan caa tucu cuaha ra yihí cuehe cha tyahyu coño chí chíyo Israel quívi chica noo ra Eliseo, profeta Nyoo. Soco ña nduvaha ni noo ra Israel cuiya cuan. Minoo ri ra Naamán ra ñuu Siria nduvaha —catyí ra Jesús.

²⁸ Ta cha chiñi ñáyivi nyicú vehe ñuhu cuan tuhun cuan, cuxaan xaan tandihí cuii ñu. ²⁹ Ta nducuita ñu. Ta tññ ñu chí ra Jesús. Tava ñu chí ra xiñi

noo yucu nya yuhu ñuu, vatyi tuchi ñu chi ra yucuan. ³⁰ Soco ra Jesús yaha ri ra mahñu ñu ta cuahan ra.

Noo ra cha yihí tatyí ña vaha chi
(Mr. 1.21-28)

³¹ Ta cuahan ra Jesús Capernaum cha nyaa Galilea qui^vi nyitatu ñáy^vi. Ta quichaha sañaha ra chi ñáy^vi.

³² Ta iyo cuñí ñu tuhun cahán ra. Vatyi ñihi cahán ra tari noo ra iyó vaha ityi chi cha cahán.

³³ Ta chichi vehe ñuhu cuan nyaá noo ra cha yihí tatyí ña vaha chi. Ta quichaha canachaa ra, ta catyí ra:

³⁴ —Saña chi ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chi ndi? Yuhu, ñohó nui chuun. Ta chité vatyi Sehe Nyoo cuví chuun —catyí tatyí ña vaha cuan sacahan chi chi ra cuan.

³⁵ Ta cahan ra Jesús chihin tatyí ña vaha cuan, ta catyí ra:

—Taxi ri. Saña chi ra ndahvi chiña —catyí ra.

Tyicuan ta tatyí ña vaha cuan sanduva chi ra cuan nu ñuhú. Ta quita tatyí cuan chi ra ta cuahan. Ta ñahri ca sacuvi chi chi ra ndahvi cuan.

³⁶ Tandihí ñáy^vi nayuhvⁱ ñu. Ta quichaha catyí ñu chi tahan ñu:

—¿Ñáá túhun cuví ihya? Ra Jesús ihya chihin cha iyó ityi chi ra ta chihin tunyee iñi ta tachi ra chi tatyí ña vaha cuan na quita. Ta quichaha chi nu cahán ra —catyí ñu.

³⁷ Ta tandihí ri ityi cahán ñáy^vi tuhun ra Jesús.

Nu sanduvaha ra Jesús chi maha tyiso ra Simón Pedro

(Mt. 8.14-15; Mr. 1.29-31)

³⁸ Ta quita ra Jesús chichi vehe ñuhu cuan. Ta chaá ra vehe ra Simón. Ta tyiso ra Simón cuhví ña chihin cahñi. Ta quichaha cahán ñu chihin ra Jesús cha cuenda ña. ³⁹ Ta nanyehé noo ra nu catuví ña. Ta quichaha catyí ra chi cahñi cuan vatyi na quita. Ta caa cuhva ri cuan ta quita cahñi cuan chi ña. Ta nducuita ri ña. Ta quichaha tyiñuhu ña chi ra.

Cuaha xaan ñu cuhví sanduvaha ra Jesús

(Mt. 8.16-17; Mr. 1.32-34)

⁴⁰ Ta cuhva cha quee ñanyii, tandihí maa ñu cha cumí chi ñu cuhví tandihí nuu cuehe, chinyaca ñu chi ra Jesús. Ta tyiso ra ndaha ra siqui noo noo ñu. Ta tyicuan caa ta sanduvaha ra chi ñu. ⁴¹ Ta chichi cha tandihí ñu yihí ñu cha yihí tatyí ña vaha chi, ta quita chi. Ta suri cana chaa chi cuahan coyo chi, ta catyí chi:

—Yoho Sehe Nyoo cuví chuun —catyí chi.

Soco ña chaha ca ra Jesús cha cahan chi. Vatyi chitó chi vatyi ra Cristo, ra cha saquichí Nyoo cuví ra.

Nu cahán ra Jesús tuhun Nyoo nuu tandihí cuii ñáy^vi ñuu cha iyó Galilea

(Mr. 1.35-39)

⁴² Cundichin cuan ta quita ra Jesús ñuu cuan. Ta cuahan ra noo nu taxi ri iyó. Soco ñáy^vi nanducu ñu chi ra. Ta chaá ñu nya nu ñohó ra. Ta ña cuñí ñu cha cuhun ra. ⁴³ Soco catyí ra Jesús chi ñu:

—Cumañi sacote chi ñáy^vi inga ñuu tuhun vaha yoso caa nyacá ñaha Nyoo añima ñu. Vatyi yucuan chaha vachi siqui ñuhu ñay^vi.

⁴⁴ Ta tyicuan caa chicá noo ra Jesús cahán ra tuhun Nyoo vehe ñuhu ityi Galilea.

5

Nu chaha ra Jesús noo nyatu cha ñihi ra cuaha xaan tiyaca

(Mt. 4.18-22; Mr. 1.16-20)

¹ Noo qui^vi nyaá ra Jesús yuhu miñi nu cuví Genesaret. Ta chaá coyo cuaha xaan ñáy^vi, vatyi cuñí ñu cuiñi ñu tuhun Nyoo. Ta tihin xaan ñohó ra Jesús mahñu ñu. ² Ta nanyehé ra uvi tahan canoa yatyin ri yuhu miñi cuan. Yori ñohó chichi. Vatyi cha quita coyo ra catín tiyaca cuan. Ta cha quichaha canacatyá ra yuhva ra. ³ Yucuan ta qui^vi ra Jesús chichi noo canoa cuan. Ta canoa cuan chi ra Simón cuví. Ta catyí ra chi ra vatyi na tyandaha ra suhva ca cuhun

nya mahñu ca cuan. Tyicuan ta chicunyaꝯ ra Jesús chichi canoa cuan. Ta quichaha sañaha ra chi ñáyivi. ⁴ Cuhva cha ndihí cahan ra, catyí ra chi ra Simón:

—Sachun canoa nya nu cama ca ndutya cuan. Ta tuchi ndo yuhva vatyí tñn ndo tiyaca —catyí ra Jesús chi ra.

⁵ Ta nacahan ra Simón ta catyí ra:

—Maestro, cha saha tyiño xaan ndi ñiyaca maa ta ni noo tiyaca ña ñihí ndi. Soco tatu maun catyí, cuatuchi tucu ndi yuhva —catyí ra Simón.

⁶ Cuhva cha cacañi ra yuhva cuan, cuaha xaan tiyaca ñihí ra. Ta nyacua tahnya yuhva ra chihin cha vee ti. ⁷ Tyicuan ta cachaha ra seña chi ra tahan ra, ra cha canyicú chichi inga canoa cuan, na quichi coyo ra ta tyinyee ra chi ra. Yucuan ta chaꝯ coyo ra cuan. Ta casacutu ra nanduvi canoa cuan chihin tiyaca. Ta nyacua cuñi nyee canoa cuan cha tyitu yihí tiyaca. ⁸ Cha nanyehe ra Simón Pedro cha tyicuan caa, ta chicuñi chiti ra nuu ra Jesús. Ta catyí ra chi ra:

—Cuachiyo chuun nui, Sutú Mañi yuhu, vatyí yuhu ra iyó cuatyí cuví —catyí ra.

⁹ Vatyí ra Simón iyo xaan cuñi ra chihin tandihí ra canyicu chihin ra. Vatyí cuaha xaan tiyaca catñn ra. ¹⁰ Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñi ra. Ta catyí ra Jesús chi ra Simón:

—Ma iyo xaan cuñun. Vatyí vityin ta nu cuahan ca chi quivi, ma tñn con tiyaca. Soco cunducun ñáyivi, tavon chi ñu nu quiñi caa na quihvi ñu cuenda Nyoo —catyí ra Jesús chi ra Simón.

¹¹ Yucuan ta casacunuhu ra canoa nya ñuhu ityi. Ta casandoꝯ ra tandihí cha iyó chi ra nyacua nya tiyaca cha tñn ra. Ta cuahan ra chihin ra Jesús.

Nu sanduvaha ra Jesús chi noo ra tyahyu coño

(Mt. 8.1-4; Mr. 1.40-45)

¹² Noo quivi ñohó ra Jesús noo ñuu nu iyo noo ra cuhví. Ta tyahyu xaan

coño ra. Ta cha nanyehe ra chi ra Jesús, ta chicuñi chiti ra nuu ra. Ta nacañinoo ra xiñi ra nya nu ñuhu. Ta chacu ndahvi ra nuu ra, ta catyí ra:

—Sutu Mañi yuhu, tu yoho ta cuñún, cuví sanduvahun chii —catyí ra.

¹³ Tyicuan ta tyisoꝯ ra Jesús ndaha ra siqui ra. Ta catyí ra:

—Cuñi sanduvahi chuun. Ta na nduvahun vityin ri —catyí ra Jesús chi ra.

Ta caa cuhva ri cuan ta nduvaha ra cuan. ¹⁴ Tyicuan ta catyí ra Jesús chi ra:

—Ma nacatyun chi ñáyivi. Noo ri catyí chuun, cuahan nu nyaá tata sutu. Ta sañahun chuun chi ra. Ta cuhva cuendon cha tahan chi cuhvon tari cuhva catyí nu ley ra Moisés tacuhva coto ñáyivi vatyí nduvahun —catyí ra Jesús chi ra.

¹⁵ Vasi ña cuñi ra cha coto ñáyivi, soco cuaha ca ñáyivi ñihi ñu tuhun ra. Ta cuaha xaan ñáyivi ndu tñn ri ñu, vatyí cuñi ñu cuñi ñu tuhun cahan ra. Ta cuñi xaan ñu nduvaha ñu. ¹⁶ Soco ra Jesús, canyaha canyaha ri ra nu iyó ñáyivi. Ta cuahan ra noo nu yori ñáyivi iyó. Ta yucuan chican tahvi ra chi Nyoo.

Nu sanduvaha ra Jesús chi noo ra cuhví cha ña cuví nacanda
(Mt. 9.1-8; Mr. 2.1-12)

¹⁷ Noo quivi sañahá ra Jesús chi ñáyivi. Ta chicunyicú suhva ra fariseo, ra quichahá xaan ley vehe ñuhu cha tyaaꝯ ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichi coyo ra ñuu cha iyó Galilea, ta ñuu Jerusalén, ta tandihí ca ñuu cha iyó Judea. Ta iyó xaan tunyee iñi Nyoo chi ra Jesús, tacuhva vatyí sanduvaha ra chi ñu cuhví. ¹⁸ Yucuan ta chaꝯ coyo ra canyisó chihin noo chito chi noo ra ña cuví nacanda. Ta cuñi ra quihvi ra chichi vehe ta cacun ra chi ra nuu ra Jesús. ¹⁹ Soco ña cuví quihvi ra vatyí tuvi xaan ñáyivi. Tyicuan ta candaa ra ityi xiñi vehe. Ta sacuachiyó ra suhva tyiyo. Tyicuan ta sanoꝯ ra chi ra cuhví cuan maa

maa nuu ra Jesús mahñu nu tuvi ñáyiví cuan. ²⁰ Yucuan cuví nu nyehe ra Jesús vatyí cachinó xaan iñi ra chi ra. Ta quichaha catyí ra chi ra cuan:

—Xaa, cha chicoo ticahnu iñi tandihí cuatyun —catyí ra Jesús.

²¹ Tyicuan ta ra casacuahá cuenda ley vehe ñuhu chihin ra fariseo quichaha nacuaan iñi ra: “¿Yóó ra cuví ra ihya? Vatyí cuñí maa ra vatyí cuví saha ra ticahnu iñi cuatyí yo. Noo ri maa Nyoo cuví saha ra ticahnu iñi cuatyí yo”, ndichi xiñi ra.

²² Soco ra Jesús chitó ra tuhun chicá xiñi ra. Ta quichaha catyí ra chi ra:

—¿Ñáá tuhun chicá xiñi ndo tyehe caa? ²³⁻²⁴ ¿Ñáá cha yñi ca catyí yo? ¿Atu yñi ca catyí yo: “Cuatyun cha yaha ndachi”, o yñi ca catyí yo chi noo ñáyiví: “Ndicuita ta cacon”? Soco vityin cua sañahi chi ndo vatyí iyó ityi chíi cha sahi ticahnu iñi cuatyí. Vatyí yuhu Rayñi cha quichi nya gloria cuví. Ta vityin cua sanduvahi chi ra ña cuví caca ihya —catyí ra Jesús.

Tyicuan ta quichaha catyí ra chi ra cha catuví cuan:

—Catyí chuun, ndicuita. Naquehen chiton ta cuanuhu nya vehun.

²⁵ Ta caa cuhva ri cuan nducuita ra cha cuhví cuan, ta naquehen ra chito ra. Ta cuanuhu ra vehe ra, suri sacahnú ra chi Nyoo. ²⁶ Tandihí ñáyiví iyo xaan cuñí ñu. Ta yuhví xaan ñu. Ta sacahnú ñu chi Nyoo, ta catyí ñu:

—Vityin ndicha nyehé yo minoo tuhun cha iyo caa —catyí ñu.

Nu cana ra Jesús chi ra Leví
(Mt. 9.9-13; Mr. 2.13-17)

²⁷ Yaha cuan ta quita ra Jesús vehe cuan. Ta nanyehe ra chi noo ra cha tavá xuhun cuenda gobiernu ñuu Roma. Ta nañí ra Leví. Ta nyaá ra nu tyiyahví ñáyiví. Ta catyí ra Jesús chi ra:

—Coho chihin —catyí ra.

²⁸ Tyicuan ta nducuita ra Leví. Ta sandoo ra tandihí cha iyó chi ra. Ta cuahan ra chata ra Jesús.

²⁹ Tyicuan ta savaha ra Leví noo vico cahnu vehe ra cuenda ra Jesús.

Ta cuaha vavaha ra catavá xuhun cuenda gobiernu ñuu Roma canyicú ra mesa. Ta canyicú tucu inga ñáyiví. ³⁰ Soco ra fariseo chihin ra sacuahá ley vehe ñuhu quichaha cahan nyaa ra chi ra cachicá noo chihin ra Jesús ta catyí ra:

—¿Ñáá tuhun chachí ndo ta chihí ndo chihin ra catavá xuhun ta chihin ra cahnu cuatyí? —catyí ra.

³¹ Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhví, yucuan ra chiñuhú doctor chi. ³² Yuhu ña vachi tyinyei chi ñu vaha sahá chi, soco vachi tyinyei chi ñu chitó vatyí iyó cuatyí, vatyí tacuhva nasama ñu cuhva iyó ñu —catyí ra Jesús chi ra.

Nu sañahá ra Jesús vatyí cha yaha canyaha ra chi ñu nyicón chi ra, cusavaha ñu ayuno

(Mt. 9.14-15; Mr. 2.18-20)

³³ Tyicuan ta quichaha candaca tuhun ra chi ra Jesús, ta catyí ra:

—Ra canyicón chi ra Juan savahá ra ayuno, ña cachachí ra ta nanducú ra chi Nyoo, ta tyicuan caa tucu ra fariseo. Soco ra cachicá noo chihin yoho, ndi quiví maa chachi ra ta chihi ra. ¿Ñáá tuhun? —catyí ra.

³⁴ Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu nyaá ra cha cua tandaha chihin ñu? Ma cuví. Vatyí sñi cuñí ñu, ta cuñí ñu cachi ñu. ³⁵ Soco cuchaa quiví cuachiyo ra tandaha cuan nu nyicú ñu. Yucuan ndicha quiví, ta cusaha ñu ayunar.

Nu sañahá ra Jesús vatyí ña nacachi tahan tuhun chahnu cha iyó ñáyiví chihin tuhun chaa cha sañahá ra
(Mt. 9.16-17; Mr. 2.21-22)

³⁶ Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyí tatu sacuvi ñu tyicuan caa, cundiyyi sahma chaa cuan. Ta sñin ri ma cuhva chi chihin sahma chahnu cuan. ³⁷ Ta tyicuan caa tucu ma cuví tyihi ñáyiví vinu chaa chichi

ñ# chahnu. Vatyí cutahnya ñ# cuan chihin vinu chaa cuan. Ta tiví vinu cuan ta tiví ñ# chahnu cuan ñandihí. ³⁸ Yucuan chaha tahán chí tyihí yo vinu chaa chichi ñ# chaa. Vatyí tyicuan ta ninduvi ta saha cuenda chí tahan. ³⁹ Ta yori ñu chíhi vinu chahnu, ta cuñí ñu coho ñu cha chaa. Vatyí catyí ñu, vaha ca vinu chahnu. Cuñí ca ñu vinu chahnu cuan vatyí ican cuan cuví costumbre cha iyó maa ñu.

6

Tohon ra cachicá noo chihin ra Jesús yoco trigu quiví nyitatu ñáyiví
(Mt. 12.1-8; Mr. 2.23-28)

¹ Noo quiví cha nyitatu ñáyiví, yahá ra Jesús mahñu cha tachí ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chíti cuan. ² Tyicuan ta catyí suhva ra fariseo chí ra:

—¿Ñáá tuhun cha sacuví ndo noo tyiño cha ña tahán chí sacuvi yo quiví nyitatu yo?

³ Ta nacahan ra Jesús, ta catyí ra:

—¿Atu ta sacuaha ca ndo cha sacuví ra David chihin ra tahan ra quiví cha chisoco ra? ⁴ Quíhví ra chichi vehe Nyoo. Ta quehen ra pan cha chacun ñáyiví nuu Nyoo. Ta chachí ra. Ta chaha ra chí ra candihí chihin ra. Ta maa ri maa tata sutu tahán chí cachí pan cuan —catyí ra Jesús.

⁵ Yucuan ta catyí tucu ra Jesús:

—Yuhu cuví Rayí cha quichí nya gloria. Ta iyó ityi chíi vatyí catyí chí noo noo ndo ñáá cha sacuvi ndo quiví nyitatu yo —catyí ra.

Nu sanduvaha ra Jesús chí noo ra cha ityi ndaha

(Mt. 12.9-14; Mr. 3.1-6)

⁶ Inga quiví cha nyitatu ñáyiví, quíhví ra Jesús chichi vehe ñuhu. Ta quichaha sañaha ra chí ñáyiví. Ta yucuan nanyehé ra chí noo ra cha na ityi chíyo ndaha vaha. ⁷ Ta ra casacuaha cuenda ley chihin ra fariseo, canducú nyehe ra chí ra Jesús, tatu sanduvaha ra chí ra cuhví cuan quiví nyitatu ñu. Tyicuan caa ta

cuví tyaa ra cuatyí síqui ra. ⁸ Soco ra Jesús chitó ra tuhun chicá xiñi ra. Ta catyí ra chí ra cha ityi ndaha cuan:

—Nducuita. Ta cuinanyaun mahñu ihya.

Tyicuan ta ra cha ityi ndaha cuan nducuita ra. Ta chicunanyaá ra mahñu. ⁹ Tyicuan ta catyí ra Jesús chí ra canyicú cuan:

—Cua nducu tuhun noo tuhun chí ndo. ¿Yoso caa cuhva tahán chí cha sacuvi yo quiví nyitatu yo? ¿Atu tahán chí vatyí sacuvi yo cha vaha, o cha ña vaha? ¿Atu tahán chí vatyí sacacu yo chí ñáyiví, o cha cahñi ndihí yo chí ñu?

¹⁰ Tyicuan ta ra Jesús nanyehé ra chí noo noo ra canyicú cuan. Ta quichaha catyí ra chí ra cuhví cuan:

—Sanacaa ndahun.

Tyicuan ta ra cuhví cuan sanacaa ra ndaha ra. Ta nduvaha ndaha ra. ¹¹ Soco suhva ra canyicú cuan, cuxaan xaan ra. Ta quichaha candaca tuhun ra chí ra tahan ra:

—¿Yoso caa sacuví yo tacuhva cha ma cuví ca cahan ra Jesús nuu ñáyiví? —cacatyí ra.

Nacachí ra Jesús ndi uchi uvi tahan ra tyi caca ra tyiño ra

(Mt. 10.1-4; Mr. 3.13-19)

¹² Quiví cuan ndaa ra Jesús noo yucu. Ta ñiyaca maa chicán tahvi ra chí Nyoo. ¹³ Cuhva cha cundichin, cana ra chí tandihí ri ñu nyicón chí ra. Ta nacachí ra uchi uvi tahan ri ra. Ta sacunañi ra chí ra, apóstol ra, ta cuñí chí catyí, ra caca tyiño nuu ra. ¹⁴ Ta ihya nyaá sívii ndi uchi uvi tahan ra: Ra Simón ra cha sacunañi ra Cristo Pedro chí, ta yañi ra, ra Andrés, ta ra Jacobo, ra Juan, ra Felipe, ra Bartolomé, ¹⁵ ra Mateo, ra Tomás, ra Jacobo sehe ra Alfeo, ta ra Simón ra yihí cuenda ityi ra cacuñí cahun cuatyí síqui gobiernu ñuu Roma cha nyacá ñaha chí ñu. ¹⁶ Ta ra Judas, yañi ra Jacobo, ta ra Judas Iscariote, ra cha naxico tuhun chí ra Jesús.

Nu sañahá ra Jesús chí cuaha xaan ñáyiví

(Mt. 4.23-25)

17 Noo ra Jesús yucu cuan chihin ndi uchi uvi tahan ra. Ta chicutayucu ra nu ndaa cuan chihin ñu nyicón chi ra. Ta cuaha ri ityi quita coyo ñáyivi. Quita coyo ñu ñuu Jerusalén ta tandihi ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta cha ñáyivi cuan vatyí cuiñi ñu tuhun cahán ra Jesús. Ta tandihi ñu cuhvi cuñi ñu vatyí sanduvaha ra chi ñu. 18 Ta tandihi ñu cha yihí tatyí ña vaha chi, nduvaha ñu saha ra. 19 Ta tandihi ñu cuñi ñu tñn ñu chi ra. Vatyí nduvaha ñu chihin tunyee iñi Nyoo, vasi tacuhva tñn ri ñu chi ra.

Ñu ñihí tumañi iñi, ta ñu ña ñihí tumañi iñi
(Mt. 5.1-12)

20 Tyicuan ta nanyehe ra Jesús chi ra cachicá noo chihin ra. Ta quichaha catyí ra chi ra:

—Tandihí nyoho cha ndahvi ndo, sñi xaan cuví chi ndo, vatyí tahan chi cha cunyaca ñaha Nyoo añima ndo.

21 'Tandihí nyoho cha chisocó ndo vityin, sñi xaan cuví chi ndo. Vatyí coo quivi cha ma nyehe ca ndo soco. Tandihí nyoho cha chacú chaa ndo cha cuihya iñi ndo, sñi xaan cuví chi ndo vatyí coo quivi ta ñahri ca tucuihya iñi coo chí ndo. Ta cuacu ndo chihin cha sñi cuñi ndo.

22 'Sñi xaan cucuvi chi ndo, quivi cha tasi cuñi ñáyivi nyehé ñu chi ndo, quivi tavá ñehe ñu chi ndo nu nyaá ñu, quivi cahán ñu chi ndo, quivi catyí ñu vatyí ñáyivi ña vaha cuví ndo vatyí chinó iñi ndo chi yuhu Rayñi cha quichí nya gloria. 23 Sñi xaan cucuvi chi ndo quivi nyehe ndo tñdoho cuan vatyí tyicuan caa tucu sacuvi ñáyivi ta cha naha. Cahán vavaha ñu chi ra cacuvi profeta Nyoo. Caña ndava ndo chihin cha sñi cuñi ndo. Vatyí cahnu xaan cha cucuhva Nyoo chi ndo gloria.

24 'Soco ndahvi nyoho, ñu tyayñi. Vatyí vityin sñi xaan cuñi ndo chihin tandihí cha tyayñi ndo. Soco coo quivi maa maa ri tñdoho cunyehe ndo. Vatyí ñahri cuiñi ndo nuu Nyoo.

25 'Ta ndahvi nyoho cha cuñi maa ndo vatyí ñahri cumañi chi ndo cha vityin, vatyí coo quivi cunyehe ndo soco. Nyoho cha sñi cuñi ndo cha vityin, ndahvi nyoho vatyí coo quivi cunyehe ndo tucuihya iñi. Ta cuacu chaa ndo. 26 Ta ndahvi nyoho vatyí vaha cahán ñáyivi siqui ndo. Vatyí tyicuan caa tucu ñáyivi ta cha naha, vaha xaan cahán ñu siqui ra cha cahán cha ña ndicha.

Cuñi ndo chi ñu xaan iñi chi ndo
(Mt. 5.38-48; 7.12)

27 'Tandihí nyoho cha chiñi ndo tuhun cahán, catyí chi ndo tyehe caa: Cuñi ndo chi ñu xaan iñi chi ndo. Sacuvi ndo cha vaha chihin ñu cha tasi cuñi nyehe chi ndo. 28 Cahán ndo cha vaha chihin ñu cha cahán ña vaha siqui ndo. Cacan tahvi ndo chaha ñu cahán chi ndo. 29 Tatu yóo cha cañi inchiyo nuu ndo, cuhva tucu ndo inga chiyo nacañi maa ñu. Tatu yóo cha tinyaa chaqueta ñihno ndo, cuhva ndihí ndo camiseta ndo. 30 Cuhva ndo ñáá ndihí cha chicán ñu chi ndo. Tatu tinyaa ñu ñáá cha iyó chi ndo, ma ndacan ndo chi ñu. 31 Tari cuhva cuñi ndo cha sacuvi ñáyivi cha vaha chihin ndo, tyicuan caa sacuvi ndo cha vaha chihin ñu.

32 'Tatu cuñi ndo chí maa ri maa ñu cha cuñi chi ndo, ñahri cha vaha xaan sacuvi ndo. Vatyí tyicuan caa nyacuví tucu ñu quiñi iyó, cuñi ñu chí ñáyivi ñohó nuu ri ñu. 33 O tatu sacuvi ndo cha vaha chihin ñu cha sacuvi cha vaha chihin ndo, ñahri cha vaha xaan nyacuví ndo. Vatyí tyicuan caa nyacuví tucu ñu quiñi iyó. 34 O tatu sacuvi ndo tumañi iñi chi noo ñáyivi, ta yihí iñi ndo vatyí cusacuvi tucu ñu cuan tumañi iñi chí ndo, ñahri cha vaha nyacuví ndo. Vatyí tyicuan caa nyacuví tucu ñu quiñi iyó. Tatu ñáá noo tumañi iñi sacuvi ñu chí tahan ñu, nyatú ñu cha nacuhva tucu ñu cuan tumañi iñi chí ñu. 35 Soco nyoho, cuñi ndo chí ñu xaan iñi chí ndo. Ta sacuvi ndo cha vaha chí ñu. Ta cuhva noo ndo chí ñu. Soco ma cuatu ndo ñáá tumañi iñi cunacuhva ñu chí ndo. Tyicuan ta cahnu xaan cha cuiñi ndo

nuu Nyoo ta cucuvi ndo sehe vaha Nyoo cahnu. Vatyí Nyoo vaha ñáyiví cuví ra chihin ñu cha ña nacuhva tyahví nyoo chí ra ta chihin ñu quiñi iyó. ³⁶ Vaha ñáyiví cuví ndo chihin ñáyiví, tari maa Nyoo Sutu yo, vaha ñáyiví cuví ra chihin ndo.

Ma cahan yo cha caa inga tahan yo
(Mt. 7.1-5)

³⁷ 'Ma cahan ndo cha caá tahan ndo, tyicuan ta Nyoo ma tñin cuenda ra cha caá maa ndo. Ma soco ndo chí ñáyiví cha cuhun ñu anyaya, tyicuan ta ma sacuhun Nyoo chí ndo anyaya. Saha ndo tucahnu iñi chí ñáyiví. Ta Nyoo cusaha ra tucahnu iñi chí maa ndo. ³⁸ Cuhva ndo cha chiñuhú chí ñáyiví. Tã tyicuan caa cuhva tucu maa Nyoo cha chiñuhú chí maa ndo. Noo ñáyiví vaha, tatu xicó ñu ñáá cha xicó ñu chí ndo, tyitu maa chahá ñu chí ndo, tyicuan caa tucu cuhva Nyoo chí ndo. Vatyí tari cuhva cuhva ndo chí ñáyiví, tyicuan caa cuhva cuhva Nyoo chí ndo —catyí ra Jesús.

³⁹ Ta chahã ra Jesús cuhva ihya chí ñu, ta catyí ra:

—Noo ra cuaa ña cuví sañaha ra ityi chí nonga ra cuaa. Vatyí nĩnduvi ra ña nyehé ra ityi cuahan ra. Ta cuví canaco-yo ra chichi noo xahva. Tyicuan caa tucu noo ra ña chitó ityi Nyoo, vasi cuñí ra, soco ma cuví sañaha ra ityi Nyoo chí nonga ra. ⁴⁰ Ni noo ra cuatyaa sicuela ma cuví coto ra cha chitó ra cha sañaha chí ra. Vatyí nicaa ni quichaha sacuahã ra. Coto ra soco nya ndihí sacuahã ra.

⁴¹ ¿Yoso caa tyi nyehún cuatyí luhlu cha cuví tari mihin lee ri cha yihí chĩti nuu tahun, ta ña sahun cuenda cuatyí cahnu cha iyó chuun cha cuví tari vitu cahnu cha yihí nuu maun? ⁴² Tatu chĩti nuu maun yihí noo vitu cahnu, yoso caa cuví catyun chí ra yañun: “Nyaca, natave mihin lee cha yihí chĩti nuun.” ¿Yoho cha savahún chuun! Tava xihna vitu cahnu cha yihí chĩti nuun. Tyicuan ta cuví nyehe vahun mihin lee cha cutavon chĩti nuu yañun.

Chihin cha sacuví ñáyiví ta nicohon nuu ri yo chí ñu tatu ñu vaha, o ñu ña vaha cuví ñu
(Mt. 7.17-20; 12.34-35)

⁴³ 'Noo yutun vaha chahá tun chĩti vixi, chĩti vaha. Ta noo yutun ña vaha chahá tun chĩti ña vaha. ⁴⁴ Tandihí yutun nicohon nuu yo chí tun chihin chĩti ri tun. Vatyí tuñiyaca, ma cuhva tun mangu. Ta ni ri noo iñu nduhva ma cuhva tun tichaha ndiví. ⁴⁵ Ta tyicuan caa tandihí ñáyiví vaha, tuhun vaha cahán ñu. Vatyí yihí cha vaha añima ñu. Soco ñáyiví ña vaha, maa maa ri maa tuhun ña vaha cahán ñu. Vatyí yihí cha caquiñi añima ñu. Chihin yuhu ñu cahán ñu tandihí cha quiñi caa cha quitá añima ñu.

Cacu añima ñu quichahá tuhun cahán ra Jesús, ta ñu ña quichahá tuhun cahán ra, ma cacu ñu
(Mt. 7.24-27)

⁴⁶ ¿Ñáá tuhun cha catyí ndo chii, “Sutu Mañi yuhu, Sutu Mañi yuhu”, tatu ña sacuví ndo tari cuhva cha catyí chí ndo? ⁴⁷ Ihya cua catyí chí ndo yóo chí ndacu nyoho cha vachi ndo nu nyaí, ta tyasohó ndo cha cahín, ta sacuví ndo cha catyí. ⁴⁸ Tari noo ra chitó vaha savaha vehe cuví ndo. Vatyí xihna ca chatyá ra cono vavaha ta tahan ra yuu. Ta siqui yuu cuan savahá ra vehe ra. Ta quiví coon xaan savi, ta cama xaan ndutyã yahá, ta ña nduva vehe cuan vatyí siqui yuu nanyaá chí. ⁴⁹ Soco ñu cha chĩni tuhun cahín ta ña sacuví ñu tari cuhva catyí, cuví ñu tari minoo ra ña chitó savaha vehe. Vatyí ña chatyá ra nu quihí chaha vehe ra. Ta ñima nu yuu savahã ra vehe ra. Ta chaa quiví cha coon savi. Cama xaan ndutyã yaha. Ta chatyã chí chaha vehe ra vatyí ñuhu ri cuví. Ta nduva vehe ra vatyí ña cunye. (Ta tyicuan caa cuví ñáyiví, tatu sacuví ñu tari cuhva catyí, tyicuan ta cacu ñu. Soco tatu ma sacuví ñu, ma cacu ñu) —catyí ra Jesús.

7

Nu sanduvaha ra Jesús noo musu capitán sindaro (Mt. 8.5-13)

¹ Cuhva cha ndih̄i cahan ra Jesús chihin ñáyiv̄i, ta cuanuhu tucu ra inga chaha nya Capernaum. ² Ta yucuan iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñí vavaha ra. Ta cuhví ra. Ta cha cuñí cúvi ra. ³ Quiví cha chitó capitán cuan tuhun ra Jesús, tach̄i ra chi suhva ra cacuvi mandoñi ñuu Israel na cucahan ra chihin ra Jesús, vatyí na quichi ra vatyí sanduvaha ra chi musu ra. ⁴⁻⁵ Tyicuan ta chaḡ coyo ra mandoñi cuan nu nyaá ra Jesús. Ta quichaha catyí ra chi ra:

—Iyó noo capitán cuenda ñuu Roma. Ta vaha xaan ñáyiv̄i cuví ra chihin yo cha cuví yo ñáyiv̄i Israel. Nyacua savahaḡ ra noo vehe ñuhu yo. Ta tahán chi vatyí tyinyeun chi ra. Vatyí cuhví xaan noo musu ra. Ta cuñí ra vatyí sanduvahun chi ra.

⁶ Tyicuan ta cuahan ra Jesús chihin ra. Soco cuhva cha cumañi ca chaḡ ra nya vehe capitán cuan, capitán cuan tach̄i ra chi suhva ra tahan ra. Ta quichaha catyí ra chi ra Jesús:

—Tata, catyí capitán vatyí ma sayangon chuun cha cuhun nya vehe ra na. Vatyí ña naña ra cha cuhun, na. ⁷ Yucuan chaḡa ña caña iñi ra quichi ra nu nyaún. ¿Atu ma sahn noo tumañi iñi chi ra vatyí noo tuhun cahan run ihya ri, ta nduvaha ri musu ra, na? ⁸ Vatyí maa ra capitán cuví ra. Ta nyacá ñaha rey chi ra. Ta maa ra nyacá ñaha ra chi ra cuatyí ca cha nuu ra. Tatu tava ra tyiño chi noo ra cuatyí cuan, na cuhun ra. Cuhun ra. O tatu catyí ra chi nonga ra na quichi ra, quichi ra. O tatu tach̄i ra chi inga ra na sacuvi ra tyiño, sacuvi ra. Ta tyicuan caa tucu yoho, tatu catyun na nduvaha musu ra, tyicuan ta nduvaha ra na —catyí ra tahan capitán cuan chi ra Jesús.

⁹ Cha chiñi ra Jesús cha catyí ra cuan ta iyo xaan cuñí ra. Ta nanyehe

ra chi ñáyiv̄i cha nyicú chihin ra, ta catyí ra:

—Ndicha ndicha cuii vatyí chinó xaan iñi capitán cuan. Ta nañihi que chi ni noo ra Israel cha chinó xaan iñi tari ra cuan —catyí ra.

¹⁰ Yucuan ta cuanuhu ra tahan capitán cuan. Ta cha nachaḡ coyo ra nya vehe, ta nanyeheḡ ra vatyí cha nduvahaḡ musu cuan.

Nu sanandotoḡ ra Jesús chi sehe noo ñaha ndahvi chih̄i ȳi

¹¹ Cha yahaḡ tuhun cuan ta cuahan ra Jesús noo ñuu cha nañi Naín. Ta cuahan tucu ra cachicá noo chihin ra, ta cuaha xaan ñáyiv̄i ñandih̄i.

¹² Tyicuan ta cuhva cha cua chaḡ ra yatyin ñuu cuan, nanyeheḡ ra cuaha ñáyiv̄i quitá coyo ñuu cuan. Ta canyisó ñu noo ndiyi, cuacuchi ñu sehe noo ñaha ndahvi cha chih̄i ȳi. Ta noo tuhun ri maa ra iyó chi ña, ta chih̄i ra. ¹³ Ta cha nanyeheḡ ra Jesús chi ña, ta cundahvi cuñi nyehe ra chi ña. Ta quichahaḡ catyí ra chi ña:

—Ma cuacun.

¹⁴ Tyicuan ta tuhvaḡ ra ta t̄in ra chatun cha yih̄i ndiyi cuan. Tyicuan ta ra canyisó chi ndiyi cuan chicuitayucu ra. Ta catyí ra Jesús chi ndiyi cuan:

—Nd̄icuita, ra cuehe —catyí ra.

¹⁵ Tyicuan ta nd̄icuitaḡ ndiyi cuan. Ta nicunyaa ra. Tyicuan ta quichaha cahan ra. Ta ra Jesús nacuhva cuenda ra chi ra chi sihi ra. ¹⁶ Cha nanyeheḡ ñu cha tyicuan caa ta yuhvi xaan ñu cuví. Ta quichaha sacahnu ñu chi Nyoo. Ta catyí ñu:

—Cahnu xaan ra profeta Nyoo tuví nu nyicú yo ihya.

Ta catyí tucu ñu:

—Maa Nyoo, ican vachi nu nyicú yo, vachi tyinyee ra chi yo —catyí ñu.

¹⁷ Ta tandih̄i maa ñáyiv̄i nicahnu ityi Judea, chitó ñu cha sacuví ra Jesús.

Nu tach̄i ra Juan uvi tahan ra chicá noo chihin ra nu nyaá ra Jesús (Mt. 11.2-19)

¹⁸ Ta ra cachicá noo chihin ra Juan nacatyí ra tuhun cha sacuví ra Jesús. Tyicuan ta cana ra Juan chi uvi tahan ra. ¹⁹ Ta tachí ra chi ra nu nyaá ra Jesús, vatyí cundaca tuhun ra chi ra tatu ican ra cuví Cristo ra cha cusaquichi Nyoo. Vatyí tatu ñima ra, tyi cuatu ra inga ra. ²⁰ Tyicuan ta ra cha tachí ra Juan, cuahan coyo ra. Ta chaa ra nu nyaá ra Jesús. Ta quichaha catyí ra:

—Ra Juan, ra sacondutyá, tachí ra chi ndi vatyí ndaca tuhun ndi chuun tatu icon cuví Cristo ra cha cusaquichi Nyoo. Vatyí tatu ñimon, cuatu ndi chi inga ra —catyí ra.

²¹ Ta cuhva cha canyicú ra tachí ra Juan cuan, ra Jesús sanduvaha ra cuaha xaan ñu cuhví, ta cuaha xaan ñu yihí tatyí ña vaha chi. Ta sananyehe ra chi ñu cuaa. ²² Tyicuan ta catyí ra Jesús chi ra tachí ra Juan:

—Cuahan ndo. Ta nacatyí ndo chi ra Juan tandihi cha nyehe ndo, ta tandihi cha chiñi ndo. Ta catyí ndo chi ra yoso caa nanyehé ra cuaa, yoso caa nacacá ra coxo, yoso caa nduvahá ra tyahyu coño, yoso caa nacuiñi ra soho, yoso caa nandotó ndiyi, yoso caa cahín tuhun Nyoo chihin ñu ndahvi yoso caa sacacú ra añima ñu. Ta catyí tucu ndo chi ra vatyí ²³ si xaan cuví chi ñu ña chicá uvi iñi nyicón chii —catyí ra Jesús chi ra.

²⁴ Cuhva cha cuahan coyo ra cha tachí ra Juan, ta quichaha cahan ra Jesús tuhun ra Juan chihin ñáyivi. Ta catyí ra:

—¿Ñáa cha chahan ndo chinyehe ndo quivi chahan ndo chiqui ndi cuan? ¿Atu chahan ndo chinyehe ndo noo ndoo cha naquisí tatyí? ²⁵ ¿O noo ra cha ñihnó sahma vaha chinyehe ndo vaha? Ñima. Vatyí chitó ndo vatyí ra ñihnó sahma vaha iyó vaha ra ñayivi ta iyó ra vehe rey. ²⁶ ¿Atu ña chinyehe ndo chi noo profeta Nyoo? Ican. Ta cahnu ca ra cuví ra ican saha noo profeta. ²⁷ Ican tuhun ra Juan nyaá nuu tutu cha tyaa ra Isaías ta cha

naha. Ta catyí Nyoo tuhun ra tyehe caa:

Yuhu tachí chi noo ra cahan tuhun ityi nuu nu cuahun.

Vatyí cucahan ra tuhun chihin ñáyivi na nasama ñu cuhva iyó ñu, ta cuatu tuhva ñu quivi quichun.

²⁸ Ta catyí chi ndo vatyí chichi cha tandihi ra cha cacu, yori profeta cha cahnu ca ican saha ra Juan. Soco ra cha nyacá ñaha Nyoo añima, vasi cuví ra noo ra luhlu ca soco cahnu ca ra ican saha ra Juan ra sacondutyá —catyí ra Jesús.

²⁹ Cha chiñi ñu tuhun ihya, tandihi ñáyivi ta ra catavá xuhun cuenda gobiernu ñuu Roma cha sacondutyá ra Juan nacoto ñu vatyí cuhva sacuví Nyoo vaha xaan. ³⁰ Soco tandihi ra fariseo chihin ra sacuahá cuenda ley vehe ñuhu, maa ra cuví ra ña cuñi cha sacondutyá ra Juan chi ra, vatyí ña cuñi ra quehen ra cha chahá Nyoo.

³¹ Ta catyí ra Jesús:

—¿Ñáa chihin sandu inuu ri chi nyoho, ñu iyó quivi ihya? ¿Yóo cha tari caa caá ndo? ³² Tari ra cuatyaa cuví nyoho. Vatyí ra cuatyaa nyasiquí ndotyin nuyahvi. Ta caná chaa ndotyin chi tahan ndotyin, ta catyí ndotyin: “Tivi ndi tiyoo ta ña chita chaha ndo. Ta chita ndi yaa cuihya, soco ña chacu ndo.” Ta tyicuan caa ni noo cuhva ña tahán iñi ndo. ³³ Vatyí ra Juan ra sacondutyá, quichi ra ta ña chachí vaha ra. Ta ña chihí ra vinu. Ta nyoho catyí ndo vatyí tatyí ña vaha yihí chi ra. ³⁴ Ta quichi tucu yuhu Rayi cha quichi nya gloria. Ta chachí ta chihí. Ta nyoho catyí ndo vatyí ra cuahyi cuví ta cuví noo ra tuhva chihí. Ta ña tahán iñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo, ³⁵ soco catyí chi ndo vatyí cha chiñi tuñi Nyoo, chaha ra chi ñu naquehen tuhun cahín ta tuhun cahán ra Juan. Ta maa ñu cusañaha ñu chi ndo vatyí vaha cha chiñi tuñi Nyoo —catyí ra Jesús.

Nu nyaá ra Jesús vehe ra Simón ra cuví fariseo

³⁶ Noo ra fariseo cha nañi Simón nacatyí tuhun ra chi ra Jesús noo vico vehe ra. Ta chaꝥ ra Jesús vehe ra, ta chicunyaa ra mesa. ³⁷ Tyicuan ta noo ñaha cata iñi ñuu cuan chitó ña vatyi nyaá ra Jesús yucuan. Ta chaꝥ ña chihin noo yutyi alabastro tyitu yihí ndutya vixi chahán. ³⁸ Ta chicunyaa ña yatyin ri chaha ra. Ta quichaha chacu chaꝥ ña vatyi ndu uvi iñi ña cuatyí ña. Ta quitá ndutya nuu ña. Ta chihin ndutya nuu ña nacatyá ña chaha ra. Yahá cuan ta sana ityi ña chaha ra chihin ixi xiñi ña. Ta tyayuhú ña chaha ra. Tyicuan ta choso ña ndutya vixi chahán cuan siqui chaha ra. ³⁹ Cuhva cha nyehe ra fariseo cuan cha tyicuan caa, ndichí xiñi ra: “Tatu ndicha ndicha cha Nyoo saquichi chi ra ihya, coto ra yóo ñaha tñn chaha ra, vatyi ñaha cuan, ñaha iyó cuatyí cuví ña.”

⁴⁰ Tyicuan ta ra Jesús catyí ra chi ra fariseo cuan:

—Yoho Simón, iyó noo tuhun cua catyi chuun —catyí ra chi ra.

Tyicuan ta nacahan ra Simón:

—Vaha, catyi chii, Maestro —catyí ra.

⁴¹ Ta quichaha catyi ra Jesús tyehe caa:

—Uvi tahan ra yosoyicá ra xuhun chi noo ra cha tuhva chahá noo. Ta noo ra cuan yosiyicá ra ohon cientu denario. Ta nonga ra yosiyicá ra uvi xico uchi ri denario (tari ohon cientu ri pesu). ⁴² Ta ninduvi tahan ra ña cuví tyiyahvi ra. Ta ra tuhva chahá noo cuan, saha ra tñcahnu iñi chi ninduvi tahan ra. Ta vityin catyi chii, yoho Simón ¿nya ra cua cuñi ca chi ra cha chahá noo cuan? —catyí ra Jesús.

⁴³ Tyicuan ta nacahan ra Simón, ta catyí ra:

—Ra cha cuaha ca saha ra tucahnu iñi chi —catyí ra.

Tyicuan ta catyí ra Jesús:

—Ndicha cha cahún.

⁴⁴ Tyicuan ta nanyehe ra Jesús chi ñaha sihi cuan, ta catyi ra chi ra Simón:

—¿Nyehún chi ñaha ihya? Yuhu quihvi chichi vehun. Ta ña chahun ndutya cha ndoo chahi tari cuhva costumbre cha iyó chi yo. Ta ñaha ihya nacatyá ña chahi chihin ndutya nuu ña. Ta yahá cuan, ta sana ityi ña chihin ixi xiñi ña. ⁴⁵ Yoho ña tyayuhun ndahi, tari costumbre cha iyó chi yo, soco maa ña nyacua nya cuhva cha quihvi ihya ta ña sandihi ña cha tyayuhú ña chahi. ⁴⁶ Ta yoho ña tyihun aceitye xiñi, soco ñaha ihya tyihí ña ndutya vixi chahán chahi. ⁴⁷ Ta catyí chuun, yoho Simón, vasi cahnu xaan cuatyí ña, soco sahi tñcahnu iñi chi ña. Yucuan chaha cuñi xaan ña chii. Ta ñu sahi tñcahnu iñi chiin ri cuatyí, chiin ri cuñi ñu chii —catyí ra Jesús.

⁴⁸ Tyicuan ta quichaha catyí ra Jesús chi ña:

—Cuatyun cha yahá sandachi. Vatyi cha saha Nyoo tñcahnu iñi chuun —catyí ra chi ña.

⁴⁹ Tyicuan ta ra nyicú chihin ra quichaha ndichí xiñi ra: “¿Yóo ra cuví ra ihya? Vatyi sahá ra tucahnu iñi cuatyí ñáyivi.”

⁵⁰ Tyicuan ta quichaha catyí ra Jesús chi ñaha sihi cuan:

—Cuahan vityin, cha cacun vatyi chinó iñun chii. Cuahan chihin cha vaha —catyí ra chi ña.

8

Ñusihi cha tyinyeé chi ra Jesús

¹ Cha yahá tuhun cuan, ta cuahan ra Jesús chicá noo ra noo noo ñuu cahnu ta noo noo ñuu luhlu. Ta cahan noo ra nuu ñáyivi. Ta sacoto ra chi ñu tuhun vaha yoso cuhva cuñi Nyoo cunyaca ñaha ra chi ñu. Ta ndi uchi uvi tahan apóstol, ra cha tyatyíño ra chi, cuahan coyo ra chihin ra. ² Ta cuahan coyo tucu suhva ñusihi cha sanduvaha ra, ñu cuhvi ta ñu yihí tatyí ña vaha chi. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chi ta nduvaha ña. ³ Ta cuahan tucu cu Juana ñasihi ra Chuza ra cuví tyiño

cuenda ra Herodes, ta cu Susana chihin cuaha xaan ca ñu cha tyinyeé chi ra chihin ñáá cha iyó chi ñu.

Nu sañahá ra Jesús vatyí tari noo ra chicá noo tachí, tyicuan caa cuví ra cahán tuhun Nyoo

(Mt. 13.1-9; Mr. 4.1-9)

⁴ Ta cuaha xaan ñáyivi quitá noo noo ñuu, vatyí cua nyehe ñu nu cahan ra Jesús tuhun Nyoo. Ta tuvi xaan ñu nyicú ñu, ta quichaha catyí ra chi ñu chihin noo cuhva:

⁵—Quitá noo ra vehe ra. Ta cuahan ra nu iyó tyiño sahá ra, vatyí cua quitá ra chiti trigu nu ñuhú ra. Ta cuhva cha quitá ra canacoyo suhva chiti cuan yuhu ityi. Ta chañi ñáyivi siqui. Ta quichi saa ta chachi ti. ⁶ Ta suhva ca chiti cuan canacoyo ticu yuu. Caña chiti cuan. Soco na ityi ri vatyí chiin xaan ñuhu yihí chaha. Ta siin ri ña cachin. ⁷ Ta suhva ca chiti canacoyo chichi chiti iñu, soco quivi caña tun iin ri, tu iñu cuan chahñi chi tun. ⁸ Soco suhva ca chiti canacoyo nu ñuhú vaha ta quivi chahnu tun, vaha xaan chaha tun chiti. Vatyí noo ri chiti cuan, cientu chiti quitá chihin —catyí ra Jesús.

Ta cha yaha catyí ra tuhun cuan. Ta quichaha cana chaa ra vatyí na cuiñi ñáyivi, ta catyí ra:

—Tatu cutuñi iñi ndo, tyasoho ndo tuhun cahín —catyí ra.

Nu sacotó ra Jesús ñáá cuenda sañahá ra chihin cuhva ri

(Mt. 13.10-17; Mr. 4.10-12)

⁹ Yaha cuan ta ra cachicá noo chihin ra, ndaca tuhun ra chi ra ñáá cha cuñi chi catyí tuhun cha nacatyí ra chi ñáyivi. ¹⁰ Tyicuan ta quichaha catyí ra:

—Chi nyoho sacotó Nyoo tuhun xehe, yoso caa nyacá ñaha ra. Soco chi tandihí ca ñu cuan, cuhva ri chahí chi ñu. Tacuhva nyehe ñu ta cuví chi tari cha ña ndichin nyehé ñu, ta cuiñi ñu soco ma cutuñi iñi ñu ñáá tuhun cuví.

Nu sacotó ra Jesús ñáá cha cuñi chi catyí tuhun ra tachí cuan

(Mt. 13.18-23; Mr. 4.13-20)

¹¹ Cuhva cha catyí chi ndo, cuñi chi catyí tyehe caa: chiti cuan tari tuhun Nyoo cuví. ¹² Ta tari nu canacoyo chiti trigu cuan yuhu ityi, tyicuan caa cuví noo ñu chiñi tuhun Nyoo. Soco quichi cuihna ta tinyaa ra tuhun Nyoo chi ñu tacuhva cha ma chino iñi ñu. Ta ma cacu ñu. ¹³ Ta tari nu canacoyo chiti cuan ticu yuu, tyicuan caa tucu inga ñáyivi cha chiñi tuhun Nyoo. Ta sii xaan cuví chi ñu suhva ri quivi. Soco vatyí ña yihí vaha yoho ñu, suhva ri quivi chino iñi ñu, soco quivi cha quichaha nyehe ñu tindoho, ta sandihí ri ñu tuhun cha chinó iñi ñu. ¹⁴ Tari nu canacoyo chiti chichi iñu, tyicuan caa cuví tucu inga ñu chiñi tuhun Nyoo. Chiñi ñu tuhun Nyoo soco ña cuñi ñu sacuvi ñu tari cuhva chiñi ñu. Vatyí yihí ñu, nyaá ca xiñi ñu tuhun tindoho ican saha tuhun Nyoo. Ta nonga ñu nyiyo ca iñi ñu cha tyayii. Ta nonga tucu ñu sii ca cuñi ñu chica noo yanga ri ñu. Ta tari cha ña chicoo chiti nuu ñu cuví cuan. ¹⁵ Soco tari nu canacava chiti nu ñuhú vaha, tyicuan caa cuví noo ñu cha chiñi tuhun Nyoo. Ta vaha aña ñu vatyí chinó iñi ñu chihin tandihí aña ñu. Ta vaha tyasohó ñu tuhun Nyoo, ta ña naa maa iñi ñu tuhun ra. Ta sacuvi ñu tandihí tuhun cahán ra.

Ma tyihi xehe yo ñuhú cha sandundichin Nyoo aña yo coto tinyaa ra

(Mr. 4.21-25)

¹⁶ Yori yo cha natyaa yo ñuhú tima ta tixehe yo xiu chito o nonga nu xehe. Natyaa yo ñuhú tima soco cha cananyaa yo noo nu sucun. Ta cuhva quivi ñáyivi chichi vehe soco ndichin. ¹⁷ Vatyí ñahri noo cha ñohó xehe, ta cuñun, tyi ma natuvi. Ta ni noo tuhun xehe, ta cuñun, tyi ma quita nu ndichin ta coto yo. ¹⁸ Yucuan chaha tyasoho ndo tuhun cahín. Vatyí tatu quichaha ndo tuhun cahín, cuaha ca cusañahi chi ndo. Soco tatu ma tyasoho ndo, tyicuan ta cutinyaa Nyoo tandihí maa chi ndo

nyacua nya cha chiin ri cha cuñí maa ndo tyi cumí ndo.

Tari yañi ra, ta tari sihi ra, tyicuan caa cuví chi ñu quichaha tuhun Nyoo, catyí ra Jesús

(Mt. 12.46-50; Mr. 3. 31-35)

¹⁹ Tyicuan ta chaá sihi ra Jesús chihin yañi ra nu nyaá ra. Soco ña cuví chaá ñu vatyí tuví xaan ñáyiví.

²⁰ Tyicuan ta sacoto ñáyiví canyicú cuan chi ra Jesús, ta catyí ñu:

—Sihun chihin yañun nyicú ñu chata vehe. Ta cuñí ñu cahan ñu chuhun.

²¹ Tyicuan ta nacahan ra Jesús, ta catyí ra:

—Tandihí maa ñáyiví cha chiñí ta sacuví tuhun Nyoo cha cahín, ican ñu cuví sihi, ta ican ñu cuví yañi —catyí ra Jesús.

Nu sacutaxin ra Jesús tatyí ñihi vavaha nu miñi

(Mt. 8.23-27; Mr. 4.35-41)

²² Cuví chi noo quiví cuan quihví ra Jesús chichi noo canoa chihin ra cachicá noo chihin ra. Ta quichaha catyí ra chi ra:

—Coho ndo inga chiyo miñi ihya.

Yucuan ta cuahan coyo ra chihin canoa cuan. ²³ Ta cha ni ri ca cha cuahan ra mahñu miñi cuan, tiñ ñumahna chi ra Jesús. Tyicuan ta sana iñi ra ta chaá noo tatyí ñihi vavaha. Ta quichaha tyihi chi ndutya chichi canoa cuan. Ta quichaha cuñí nyee canoa cuan vatyí cama xaan ndutya quihví. ²⁴ Tyicuan ta casandoyo ra chi ra Jesús. Ta quichaha catyí ra:

—¡Maestro! ¡Maestro! Cha cuñí nyee yo chichi ndutya —catyí ra.

Tyicuan ta nducuita ra Jesús. Ta quichaha catyí ra chí tatyí cuan ta chí ndutya cuan, na cutaxin chí. Ta cutaxin ri. ²⁵ Tyicuan ta quichaha catyí ra chi ra cachicá noo chihin ra:

—¿Ñáá tuhun yuhví ndo? ¿Atu ña chinó iñi ndo vatyí yuhu sahá cuende chi ndo? —catyí ra.

Soco ra cuan, yuhvi xaan ra. Ta iyo xaan cuñí ra. Ta quichaha ndaca tuhun ra chi ra tahan ra:

—¿Yóó ra cuví ra ihya? Vatyí nyacua nya tatyí ta ndutya ta quichaha tuhun cahan ra.

Nu nduvaha noo ra yihí tatyí ña vaha ñuu Gadara

(Mt. 8.28-34; Mr. 5.1-20)

²⁶ Tyicuan ta chaá coyo ra ityi Gadara cha nyaá inga chiyo miñi ityi nuu Galilea. ²⁷ Ta quita ra chichi canoa cuan. Ta yucuan chaá noo ra cha quichi noo ñuu ityi cuan chisatahan ra chi ra. Ta yihí tatyí ña vaha chí ra. Ta cha naha xaan ña ñihnó maa ra sahma. Ni ri ña iyó ra vehe ra. Chicá noo ri maa ra nu ñaña calavari cuan. ²⁸⁻²⁹ Ta tuhvá tatyí ña vaha cuan naquiqui chí ra. Ta yucuan chaha chahñí ñu ndaha ra ta chaha ra chihin cadena. Soco tatyí ña vaha cuan chahá fuerza chí ra cha cahnya ra. Ta sacono chí chí ra. Ta chinyaca chí chí ra noo nu yori maa ñáyiví iyó. Ta cuhva cha nyehe ra chí ra Jesús, chicuñi chíti ra nuu ra. Ta quichaha canachaa ra, ta catyí ra:

—¿Ñáá tuhun tyihún chuun chihin yuhu, yoho Jesús, Sehe Nyoo cahnu? Chiquén chuun vatyí ma sanyehun tundoho chii —catyí ra yihí tatyí ña vaha cuan chí ra Jesús.

Ta catyí ra tyehe caa vatyí ra Jesús tachí ra chí tatyí ña vaha cuan, na quita chí ra ndahvi cuan. ³⁰ Ta quichaha ndaca tuhun ra Jesús chí tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chí ra cuan, ta catyí ra:

—Nyuhu nañi ndi, Legión.

Tyicuan caa catyí ra vatyí cuaha xaan tatyí ña vaha yihí chí ra. Cuenda mil tatyí ña vaha cuan yihí chí ra. ³¹ Tyicuan ta tatyí ña vaha cuan catyí chí ra Jesús vatyí ma tuchi ra chí chí nu tindoho nu ma cuvi maa quita chí. ³² Ta chicán tatyí ña vaha cuan chí ra Jesús nacuhva ra caquihví chí chí chí quini cha canyicú yuhu miñi cuan. Tyicuan ta chaha ra Jesús permiso cha caquihví chí chí chí quini cuan. ³³ Ta quita tatyí ña vaha cuan chí ra

—¿Ñáá nañún?

Ta tatyí ña vaha cuan sacahan chí ra cuan, ta catyí ra:

—Nyuhu nañi ndi, Legión.

Tyicuan caa catyí ra vatyí cuaha xaan tatyí ña vaha yihí chí ra. Cuenda mil tatyí ña vaha cuan yihí chí ra. ³¹ Tyicuan ta tatyí ña vaha cuan catyí chí ra Jesús vatyí ma tuchi ra chí chí nu tindoho nu ma cuvi maa quita chí. ³² Ta chicán tatyí ña vaha cuan chí ra Jesús nacuhva ra caquihví chí chí chí quini cha canyicú yuhu miñi cuan. Tyicuan ta chaha ra Jesús permiso cha caquihví chí chí chí quini cuan. ³³ Ta quita tatyí ña vaha cuan chí ra

—¿Ñáá nañún?

Ta tatyí ña vaha cuan sacahan chí ra cuan, ta catyí ra:

—Nyuhu nañi ndi, Legión.

Tyicuan caa catyí ra vatyí cuaha xaan tatyí ña vaha yihí chí ra. Cuenda mil tatyí ña vaha cuan yihí chí ra. ³¹ Tyicuan ta tatyí ña vaha cuan catyí chí ra Jesús vatyí ma tuchi ra chí chí nu tindoho nu ma cuvi maa quita chí. ³² Ta chicán tatyí ña vaha cuan chí ra Jesús nacuhva ra caquihví chí chí chí quini cha canyicú yuhu miñi cuan. Tyicuan ta chaha ra Jesús permiso cha caquihví chí chí chí quini cuan. ³³ Ta quita tatyí ña vaha cuan chí ra

ndahvi cuan. Ta caqui^hvⁱ chi chichi quini cuan. Tyicuan ta cachino quini cuan. Ta yatyin cuan nyaá noo xahva yuhu miñi cuan. Yucuan canacoyo ti chichi miñi cuan. Ta cachihi ti chihin ndutya cuan.

³⁴ Tyicuan ta ra casahá cumi chi quini cuan, yuhví xaan ra. Ta cuahan coyo vavaha ra cua nacatyí ra chi ñáyiví nya ñuu. Ta tandihí ri ñáyiví cha nyehe ra, ta nacatyí ra tuhun cuan. ³⁵ Tyicuan ta chaá coyo ñáyiví cua nyehe ñu ñáá cha cuví cuan. Tyicuan ta chaá ñu nu nyaá ra Jesús. Ta nañihí ñu chi ra cha yihí tatyí ña vaha cuan chi. Nyaá ra nuu ra Jesús. Ta ñihnó ra sahma ra. Ta vaha cuñí ra. Ta yuhví xaan ñu cuví. ³⁶ Tyicuan ta tandihí ñu cha nyehe cha cuví cuan, nacatyí ñu chi tandihí ca ñáyiví yoso caa quitá tatyí ña vaha chi ra ndahvi cuan, ta nduvahá ra. ³⁷⁻³⁹ Yucuan ta tandihí ñáyiví ityi Gadara cuan quichaha catyí ñu chi ra Jesús na cunuhu ra ityi nu quichi ra. Vatyí yuhví xaan ñu chihin cha sacuví ra chihin tatyí ña vaha cuan. Tyicuan ta ra cha quitá tatyí ña vaha cuan chi, catyí ra chi ra Jesús, na cuhva ra cha cuhun ra chihin ra. Soco catyí ra Jesús chi ra:

—Cu^anuhu nya vehun. Ta na^acuhva cuendon chi ñáyiví chuun ñáá cha sacuví Nyoo chuhun —catyí ra.

Yucuan ta ra Jesús nandihví ra chichi canoa cuan. Ta cuanuhu ra chihin ra cachicá noo chihin ra. Tyicuan ta ra ndahvi cha nduvaha cuan, cuanuhu ra nya ñuu ra. Ta ityi cuahan ra nacatyí ra chi tandihí ñáyiví ñuu cuan yoso caa sanduvaha ra Jesús chi ra.

Nu nduvahá sehe ra Jairo ta ñaha sihi cha tñn sahma ra Jesús (Mt. 9.18-26; Mr. 5.21-43)

⁴⁰ Quiví cha nachaa ra Jesús cha chahan ra inga chiyo miñi cuan, cuaha xaan ñáyiví nyatú ñu chi ra. Ta sii xaan cuñí ñu vatyí nachaa ra. ⁴¹ Tyicuan ta chaá noo ra cha nañí Jairo, ra cuví nuu vehe ñuhu, ta

chicuiñí chiti ra nuu ra. Ta quichaha chacu ndahvi ra nuu ra, na cuhun ra vehe ra. ⁴² Vatyí iyó noo tuhun ri sehe ra, ta iyó uchi uvi cuiya ña. Ta cha cuñí cúvi ña chihin cuehe. Ta cuahan ra Jesús vehe ra. Ta cuaha xaan ñáyiví cuahan chihin ra Jesús, ta tihin xaan cuahan ra mahñu ñu. ⁴³ Ta chihin ñáyiví cuan cuahan noo ñaha cuhví. Cha iyó uchi uvi cuiya ndoho ña noo cuehe niñi. Ta cha ndihí maa xuhun ña sanaa ña, ta ña nduvahá ña. ⁴⁴ Soco chaá ña nu nyaá ra Jesús ityi chata ra. Ta tñn ña sahma ra. Ta caa cuhva ri cuan, ta chicunyasí cha chatí niñi ña.

⁴⁵ Tyicuan ta quichaha catyí ra Jesús:

—¿Yóó cha tñn sahme?

Ta tandihí ñu cuahan chihin ñu catyí ra:

—Yori.

Ta catyí ra Pedro ta ra tahan ra chi ra Jesús:

—Maestro, cuaha xaan ñáyiví cuahan chuhun, ta tihin xaan cuahun. Ta suri maa ñu tyandahá ñu chuun. Ta ndacá tuhun con “¿Yóó cha tñn sahme?” —catyí ra.

⁴⁶ Soco ra Jesús catyí ra:

—Chitó mai vatyí iyó noo cha tñn sahme. Vatyí tuví iñi cuahan suhva tunyee iñi cha iyó chii —catyí ra.

⁴⁷ Tyicuan ta ñaha sihi cuan nyehe ña vatyí cha chitó ra. Ta quichaha nihi ña chihin cha yuhví ña. Ta chicuiñí chiti ña nuu ra. Ta quichaha nacatyí ña chi ra ñáá tuhun cha tñn ña sahma ra, ta yoso caa nduvahá ña caa cuhva ri cuan. Ta chiñí tandihí ñáyiví cuan cha nacatyí ña. ⁴⁸ Yucuan ta catyí ra Jesús chi ña:

—Yoho sihi, cha nduvahun vatyí chinó iñun chii. Cuahan chihin cha vaha —catyí ra.

⁴⁹ Ni cahán ca ra Jesús tuhun ihya, ta chaá noo ra quitá vehe ra cuví nuu vehe ñuhu cuan. Ta quichaha catyí ra chi ra Jairo cuan:

—Sehun cha yahá chihi ña. Ma sayanga con chi Ra Sacuaha chiña —catyí ra.

⁵⁰ Soco cha chiñi ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

⁵¹ Ta cuhva cha chaꝝ ra Jesús vehe ra Jairo, ña chahaꝝ ra quihvi ñáyivi chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñasihí ra, quihvi ñu chichi vehe cuan nu catuví cuehe luhlu cha chihí cuan. ⁵² Ta tandihí ñu chacú chaa ñu cha cuenda vatyí chihí cue. Soco ra Jesús catyí ra chí ñu:

—Ma cuacu ca ndo. Vatyí ña chihí cue. Quixí cue —catyí ra.

⁵³ Soco chacú nyaa ñu tuhun cahan ra. Ta ña chinó iñi ñu. Vatyí chitó ñu tyi cha chihí cue. ⁵⁴ Tyicuan ta tñn ra Jesús ndaha cue. Ta ñihi cahan ra ta catyí ra chí cue:

—Nducuíta, cuehe luhlu —catyí ra.

⁵⁵ Tyicuan ta nandoto cue. Ta caa cuhva ri cuan ndicuita cue. Ta quichaha catyí ra Jesús:

—Cuhva ndo cha cachi cue.

⁵⁶ Ta sutu cue ta síhi cue, iyo xaan cuñi ñu. Soco catyí ra Jesús chí ñu vatyí yori maa chihin cahan ñu tuhun cha cuví cuan.

9

Nu tachi ra Jesús ndi uchi uvi tahan ra cachicá noo chihin ra vatyí cucahan ra tuhun Nyoo

(Mt. 10.5-15; Mr. 6.7-13)

¹ Sandu ñn ri ra Jesús ndi uchi uvi tahan ra cachicá noo chihin ra. Ta chahaꝝ ra tunyee iñi chí ra vatyí cuví tava ra tatyí ña vaha, ta cuví sanduvaha ra chí ñu cuhví.

² Ta tachi ra tyiño chí ra vatyí na sanduvaha ra chí ñu cuhví, ta cahan ra tuhun Nyoo yoso caa nyacá ñaha ra añima ñáyivi. ³ Ta catyí ra chí tandihí ra cuan:

—Ñahri cha cuisón ndo ityi cahun ndo, ni yutun ma tuvi ndo. Ni yitin, ta ni ri cha cachi ndo ta ma cuisón ndo. Ta ni ri xuhun ta ma cuisón ndo. Tacuhva ñihnó ri ndo cahun ndo. ⁴ Ta savaha ri vehe cha chaa ndo, cunyaa ndo yucuan nyacua nya cha chaa quivi cha cahun ndo inga ñuu. ⁵ Ta nu ña cuñi ñu cuiñi ñu tuhun cahan ndo, quita ndo ñuu cuan. Ta

naquisi ndo ñiyaca chaha ndo. Tyehe caa sacuvi ndo na cuvi chí tari minoo seña chí ñu, vatyí ña cuñi ñu tyasoho ñu tuhun Nyoo —catyí ra Jesús chí tandihí ra cuan.

⁶ Tyicuan ta cuahan coyo ra tandihí cuii maa ñuu. Ta cahan ra tuhun vaha Nyoo ta yoso caa cuñi chí ta cacu ñu. Ta sanduvahaꝝ ra chí ñu cuhví.

Nu cuñi ra Herodes coto ra yóo ra chicá noo cahan tuhun Nyoo ta sanduvahá chí ñáyivi

(Mt. 14.1-12; Mr. 6.14-29)

⁷ Ra Herodes ra cuví ra nyacá ñaha ñicahnu ityi Galilea, ñihí ra tuhun cha sacuví ra Jesús. Ta ña ñihí vaha ra cuhva yóo ra cuví ra. Vatyí yihí ñu catyí ñu vatyí ra Juan, ican ra nandoto. ⁸ Ta yihí ñu catyí ñu vatyí ra Elías, ican ra nandoto. Ta yihí ñu catyí ñu vatyí inga ra profeta Nyoo ta cha naha, ican nandoto. ⁹ Soco catyí ra Herodes:

—Maa mai tyihí tyiño chichanya sucun ra Juan. ¿Tu tyicuan caa, yóo ra chíñi xain tuhun ihya? —catyí ra.

Ta ra Herodes cuan nducú xaan ra cuhva yoso caa nyehe ra chí ra cha chicá noo cuan.

Nu chahaꝝ ra Jesús cha cachi ohon mil rayi

(Mt. 14.13-21; Mr. 6.30-44; Jn. 6.1-14)

¹⁰ Ta cuhva cha nachaa coyo ra chicá tyiño nuu ra Jesús, canacatyí ra chí ra Jesús tandihí cuii maa cha cuví nu chahan coyo ra. Tyicuan ta tava sñn ra Jesús chí ra ta cuahan coyo ra yatyin ri noo ñuu cha nañi Betsaida.

¹¹ Soco cuhva cha ñihí ñáyivi tuhun vatyí cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo añima ñáyivi. Ta sanduvahaꝝ ra chí ñu cuhví.

¹² Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chí ra:

—Catyí chí ñáyivi ihya na cunuhu ñu cunyitatu ñu, ta na cunducu ñu noo cha cachi ñu noo ñuu cha nyaá

yatyin ri cuan. Vatyí ihya ñahri maa cha cachi yo iyó —catyí ra.

¹³ Tyicuan ta quichaha catyí ra Jesús chi ndi uchi uvi tahan ra cuan:

—Cuhva ndo cha cachi ñu —catyí ra.

Tyicuan ta quichaha catyí ra chicá noo chihin ra chi ra tahan ra:

—Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihi cha cachi tandihi ñáyivi ihya. Ni ri cusata ndi soco ma ñihi —catyí ra.

¹⁴ Vatyí ohon mil rayi nyicú yucuan. (Ta siin ri nyicú ñusihi chihin sehe ñu.) Yucuan ta ra Jesús catyí ra chi ra cachicá noo chihin ra:

—Na cunyicu ñáyivi cha uvi xico uchi tahan ñu noo noo nu cunyicu ñu.

¹⁵ Tyicuan ta chicunyicu tandihi ñu.

¹⁶ Tyicuan ta quehen ra Jesús ohon tahan pan cuan chihin uvi tahan tiyaca cuan. Ta nanyehē ndaa ra andivi, ta nacuhva ra tyahvi nyoo chi Nyoo. Tyicuan ta tahvi sava ra pan ta tiyaca cuan. Ta chaha ra chi ra cachicá noo chihin ra na casacha ra chi ñáyivi.

¹⁷ Tyicuan ta tandihi ñu chachi ñu. Ta chitu chichi ñu. Yaha cuan ta ndoo ca yiquin ta sacutu ra uchi uvi tahan tica chihin yiquin cuan.

Nu catyí ra Pedro tyi ra Jesús cuví ra Cristo, ra sacacú chi yo

(Mt. 16.13-19; Mr. 8.27-29)

¹⁸ Noo quivi quita siin ra Jesús chihin ra cachicá noo chihin ra. Ta quichaha chicán tahvi ra chi Nyoo. Ta nu ndihi chicán tahvi ra, ta quichaha ndaca tuhun ra chi ra chicá noo chihin ra ta catyí ra:

—¿Ñáá catyí ñáyivi, yóó ra cuví yuhu?

¹⁹ Tyicuan ta nacahan ra cachicá noo chihin ra, ta catyí ra:

—Yihí ñu catyí ñu vatyí ra Juan ra sacondutyá chi ñáyivi cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰ Tyicuan ta ndaca tuhun ra Jesús chi tandihi ra, ta catyí ra:

—Ta nyoho, ¿yóó ra cuví yuhu, cuhva cha cuñi nyoho?

Tyicuan ta nacahan ra Pedro, ta catyí ra:

—Yoho cuví ra Cristo ra cha quita nu nyaá Nyoo.

Nu sacoto ra Jesús yoso caa cuc-ahñi ñáyivi chi ra

(Mt. 16.20-28; Mr. 8.30—9.1)

²¹ Ta catyí ra Jesús chi ra cachicá noo chihin ra vatyí yori maa chihin cahan ra tuhun cuan. ²² Tyicuan ta catyí tucu ra chi ra:

—Yuhu Rayi cha quichi nya gloria cuví. Ta tahan chi vatyí cuaha xaan tundoho cunyehe. Ta ra cacuví mandoñi ta ra cacuví nuu chi tata sutu chihin ra casacuaha cuenda ley, ma chino iñi ra chii. Ta cucahñi ra chii. Soco nu cu uñi quivi cunandote —catyí ra.

²³ Tyicuan ta quichaha catyí tucu ra chi tandihi ra:

—Tatu nya nyoho cuñi ndo cunyon ndo chii, cahnya iñi ndo cha cuñi maa ndo sacuvi ndo, tacuhva cuví sacuvi ndo cha cuñi Nyoo. Ma ndu uvi iñi ndo cha yihí ndo cuende vasi ndiquivi nyehe ndo tundoho. Vatyí yucuan cuví cruzi cha tahan chi cuiso ndo. ²⁴ Ta nya ndo ña cuñi ndo nyehe ndo tundoho cha catyí yuhu, cunyehe ndo tundoho anyaya. Soco nya ndo cuhva ndo ñáyivi ndo cha catyí yuhu, cucacu añima ndo. ²⁵ ¿Ñáá cuenda quita chi ndo cha saha ganaa ndo tandihi cha iyó ñáyivi, tatu cahun añima ndo anyaya? ²⁶ Vatyí tatu cahan nuu ndo cha cahán ñáyivi chi ndo cha catyí yuhu, ta cha catyí tuhun cahín, cucahan tucu nuu mai nyehi chi ndo nachaa quivi quichi inga chaha. Vatyí cuquichi chihin cha cahnu cuví, ta cha cahnu cuví Sutu yo Nyoo ta ángel cuenda ra. Vatyí yuhu cuví Rayi cha quichi nya gloria.

²⁷ Ta catyí chi ndo vatyí yihí ndo cha nyicú ndo ihya vityin, ma cúvi ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo

(Mt. 17.1-8; Mr. 9.2-8)

²⁸ Uña quiví yaha cha catyí ra Jesús tuhun cuan. Ta ndaa ra noo yucu vatyi cua cacan tahvi ra chi Nyoo. Ta cuahan ra Pedro, ra Jacobo ta ra Juan chihin ra. ²⁹ Ta cha ni ri ca cha chicán tahvi ra Jesús, nasama cuhva caá sahma ra ta nuu ra. Tyaqui xaan cuichin nanduvi sahma ra. Ta xiño xaan. ³⁰ Tyicuan ta tuvi uvi tahan ra candatuhún chihin ra, ra Moisés ta ra Elías. ³¹ Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundoho Jerusalén ta cúvi ra. ³² Ta vasi cuñí xaan ra Pedro chihin ra tahan ra cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra. ³³ Cuhva cha cuahan coyo ra tayucú chihin ra Jesús cuan, catyí ra Pedro:

—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra. ³⁴ Ta cha ni ri ca cha cahán ra ta quichí noo vico síqui ra. Ta yuhví xaan ra cacuví cha caquihvi ra chichi vico cuan. ³⁵ Tyicuan ta chichi vico cuan chiñi ra noo ndusu cha catyí:

—Ican ra ihya cuví Sehi, ta cuñí xain chi ra. Tyasoho ndo tuhun cahán ra —catyí ndusu cuan.

³⁶ Ta cha yaha cahán ndusu cuan, nanyehe ra Pedro ta ra ndihi chihin ra vatyi noo ri ca maa ra Jesús nanyaá yucuan. Ta yori maa chihin cacahan ra tuhun cha nyehé ra.

Nu sanduvaha ra Jesús chi noo ra cuehe luhlu cha yihí tatyí ña vaha chii

(Mt. 17.14-21; Mr. 9.14-29)

³⁷ Ta cha inga quiví cha noo ra Jesús yucu cuan, cuaha xaan ñáyivi chisatahan chi ra. ³⁸ Tyicuan ta chichi cha cuaha ñáyivi cuan, noo ra cana chaa xaan ra, ta catyí ra:

—Maestro, saha tumañi iñi chii. Nyehé ndahvi chi sehi. Vatyi noo

tuhun maa ra iyó chii. ³⁹ Ta yihí ndihi tatyí ña vaha chi ra. Ta sacanachaa chi chi ra. Ta tuchí chi chi ra nyasava. Ta quitá tiñi yuhu ra. Ta quiñi xaan nyacuví chi chihin ra. Ta ña cuñi maa tatyí ña vaha cuan saña chi ra. ⁴⁰ Cha cahin chihin ra cachicá noo chuhun na tava ra tatyí ña vaha cuan, soco ña cuví chi ra —catyí ra.

⁴¹ Tyicuan ta nacahan ra Jesús ta catyí ra:

—Nyoho, ñu ña chinó iñi cuví ndo. Ta ni caa ni quiñi iyó ndo. ¿Yoso ca tahan quiví cunyai chihin ndo ta cunyehe iñi tsihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi sehun.

⁴² Ta cuhva cha cua tuhva ra cuehe cuan nu nyaá ra Jesús, ta tuchí tatyí ña vaha cuan chi cue nya sava. Soco ra Jesús tava ra chi tatyí ña vaha cuan. Ta sanduvaha ra chi cue. Tyicuan ta nacuhva cuenda ra chi cue chi sutu cue. ⁴³ Ta tandihi ñáyivi, iyo xaan cuñi ñu cha cahnu cha sacuví Nyoo chihin ñu.

Inga chaha tucu cahán ra Jesús tuhun yoso caa cucahñi ñáyivi chi ra

(Mt. 17.22-23; Mr. 9.30-32)

Cha ni ri ca cha iyo cuñi ñáyivi cha sacuví ra Jesús, ta quichaha catyí ra chi ra cachicá noo chihin ra:

⁴⁴ —Tyasoho vaha ndo tuhun cahín. Ta ma naa iñi ndo. Vatyi yuhu Rayi cha quichí nya gloria, cucuhva cuenda ñu chii ndaha ra xaan iñi chii —catyí ra Jesús.

⁴⁵ Soco ra cachicá noo chihin ra ña cutuñi iñi ra ñáá tuhun cahán ra. Vatyi Nyoo ña chaha ra cha cacutuñi iñi ra. Ta cayuhví ra ndaca tuhun ra chi ra Jesús ñáá cha cuví cuan.

Nu sañaha ra Jesús yoo ra cha cahnu ca cucuvi nu nyacá ñaha Nyoo

(Mt. 18.1-5; Mr. 9.33-37)

⁴⁶ Yucuan ta ra cachicá noo chihin ra quichaha cacuvi yuhu ra tuhun nya ra cahnu ca cuví chichi cha uchi uvi tahan ra. ⁴⁷ Tyicuan ta chitó ra Jesús cha chicá xiñi ra, ta quehen

ra chi noo ra cuehe luhlu. ⁴⁸ Ta quichaha catyí ra chi tandihí ra cuan:

—Tatu chihin sívi natín cuenda ndo chi noo ñáyivi ña cahnu sahá chi tari ra cuehe luhlu ihya, chi yuhu natín cuenda ndo. Ta tatu natín cuenda ndo chii, chi maa Nyoo cha saquichí chii, natín cuenda ndo. Vatyí ra cha ñima ri tuhun sahá maa ndo tuhun, ican ra cuví ra cahnu nuu Nyoo —catyí ra Jesús.

Ñu cha ña cahán chi yo, ican ñu cuan tyinyee chi yo
(Mr. 9.38-40)

⁴⁹ Yucuan ta ra Juan catyí ra chi ra Jesús:

—Maestro, nyehe ndi chi noo ra cuan. Cahán ra sívun ta tavá ra tatyí ña vaha. Soco ña chaha ca ndi. Vatyí ñima chihin yo chicá noo ra —catyí ra.

⁵⁰ Tyicuan ta catyí ra Jesús chi ra:

—Ma casi ndo nu cahan ra. Vatyí yóo ra ña cahán chi yo, tumañi ñi chi yo cuahan ra —catyí ra.

Nu catyí ra Jesús chi ra Juan ta chi ra Jacobo vatyí ña vaha cha chicá xiñi ra

⁵¹ Tuvi ñi ra Jesús vatyí cha nyaña yatyin cha tahán chi cunuhu ra gloria, ta sanduní ra ñi ra. Ta quehen ra ityi ta cuahan ra Jerusalén nu cucuví ra. ⁵² Ta tachí ra tyiño na cuhun coyo ra cachicá noo chihin ra ityi nuu ca noo ñuu ityi Samaria. Vatyí canducu ra nu nyitatu ra. ⁵³ Soco ñu Samaria cuan, ña cuñi ñu cha ndoo ra yucuan, vatyí tuví ñi ñu vatyí Jerusalén cuahan coyo ra, ta ñu Samaria ña cuví nyehe ñu chi ñu Jerusalén. ⁵⁴ Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuvi ra Elías? cacan yo chi Nyoo na saquichí ra ñuhu andivi síqui ñáyivi Samaria cuan, vatyí cayu ñu vatyí ña cuñi ñu cha ndoo yo ñuu ñu —cacatyí ra.

⁵⁵ Tyicuan ta nanyehe ra Jesús chi ra. Ta cahan ra chi ra ta catyí ra:

—Taxi ri ndo. Vatyí ña cutuñi ñi ndo ñáá tyiño vachi yuhu. ⁵⁶ Vatyí yuhu Rayí cha quichí nya gloria, ña vachi vatyí sanai ñima ñáyivi, Soco vachi vatyí sacaqui chi ñu —catyí ra.

Tyicuan ta cuahan coyo ra inga ñuu.

Ñu cha cuñi quihvi cuenda ra Jesús
(Mt. 8.19-22)

⁵⁷ Ta cuhva cha cachica ityi ra, quita noo ra, ta catyí ra chi ra Jesús:

—Sutu Mañi yuhu, cuñi cunyi quen chuun. Ta cuhin chuhun tandihí ri ityi cuahun —catyí ra.

⁵⁸ Yucuan ta catyí ra Jesús chi ra:

—¿Atu ndichon? Vatyí yuhu ñahri maa cha iyó chii. Ñaña iyó vehe ti. Ta saa iyó taca ti. Soco yuhu Rayí cha quichí nya gloria ñahri maa nu cava xiñi iyó —catyí ra chi ra cuan.

⁵⁹ Tyicuan ta catyí ra Jesús chi inga ra:

—Coho chihin.

Tyicuan ta nacahan ra cuan ta catyí ra:

—Tata, cuatu noo chii, na cuhun xihne cucuchi chi suti —catyí ra.

⁶⁰ Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihí maa ñu chi tahan ndiyi ñu chichí ñuhu. Soco yoho cuahan cua cahan tuhun Nyoo chihin ñáyivi nacuhva cuenda ñu chi ñu chi Nyoo na cunyaca ñaha ra chi ñu —catyí ra.

⁶¹ Tyicuan ta quichaha catyí inga ra chi ra Jesús:

—Tata, cuñi cunyi quen chuun. Soco cuhva xihna na cuhin cucahin chihin ñu vehi —catyí ra.

⁶² Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehe chata ra ña quita vaha yucun nu sahá tyiño ra. Ta tyicuan caa cuví noo ra nyicón chii, tatu yihí ñi ra cha sandoo ra, ña yihí vaha ñi ra cha cuví cunyaca ñaha Nyoo chi ra —catyí ra Jesús chi ra.

10

Nu tachi ra Jesús chi uñi xico uchi tahan ra cucahan tuhun Nyoo chihin ñáyivi

¹ Cha yaha tuhun cuan ta nacachi Sutú Mañi yo Jesús chi inga uñi xico uchi tahan ca ra. Ta tachi ra chi uvi uvi ra noo noo ityi cuahan ra tandihi ñuu ta tandihi ityi nu tahan chi cuhun ra Jesús. ² Ta catyí ra chi ra:

—Tari noo itu cahnu vavaha, tyicuan caa nu tyiño sahí. Soco ña cuaha musu. Yucuan chaha çacan ndo chi Nyoo na saquichi ca ra musu. Vatyí tyinyee ra chi ndo cahan ndo tuhun ra chihin ñáyivi. ³ Ta cuahan ndo ta nyehe ndo vatyí cua sacuhin chi ndo tari mbee mahñu lobo. Vatyí lobo tuhvá ti chachí ti chi mbee. Ta tyicuan caa cucuñi ñáyivi satasi ñiñi ñu chi ndo. ⁴ Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun. ⁵ Cuhva cha quihvi ndo chichi vehe noo ñáyivi, cahan vaha ndo chihin ñu. Ta catyí ndo, na coo cha vaha añima ñu. ⁶ Ta tyicuan caa tatu iyó ñáyivi vaha vehe cuan, ndoo cha vaha cuan chihin ñu. Soco tatu yori ñu vaha añima, ma ndoo cha vaha chihin ñu. ⁷ Ta ndoo ndo suri maa vehe cuan. Tatu chaha ñu cha cachi ndo, çachi ndo. Tatu chaha ñu cha coho ndo, coho ndo yucuan. Vatyí ra sahá tyiño, iyó ityi chi ra cha cachi ra cha sahá ganaa ra. ñiñi ri maa vehe cuan cunyaa ndo nyacua nya cha chaa chi quivi cha cuhun ndo inga ñuu. ⁸ Ta nu chaa ndo noo ñuu ta vaha cahan ñu chihin ndo, çachi ndo ta coho ndo tandihi cha cuhva ñu chi ndo. ⁹ Ta sanduvaha ndo chi ñu cuhvi ñuu cuan. Ta catyí ndo chi ñu: “Cha nyaña yatyin Nyoo ra cunyaca ñaha añima ndo.” ¹⁰ Soco tatu chaa ndo noo ñuu ta ña cuñi ñu tyasoho ñu tuhun cahan ndo, quita ndo ityi cahnu. Ta catyí ndo chi ñu: ¹¹ “Nyacua nya ñiyaca ñuu ndo cha ñiñi chaha ndi, ta cunaquisi ndi. Vatyí tari noo seña vatyí ndoo cuatyí ndo siqui ndo. Vatyí Nyoo nyaña yatyin ra chi

ndo ta ña tyasoho ndo tuhun cahán ra yoso caa cuñi ra cunyaca ñaha ra añima ndo.” Tyicuan caa catyí ndo chi ñu —catyí ra Jesús chi ra nyicón chi ra.

¹² Ta quichaha catyí tucu ra chi ra:

—Quivi tachi tuñi Nyoo chi ñáyivi, yaha ca cuhva cunyehe ñáyivi ñuu cuan tundoho, ta ñima ca ñáyivi chiyo ta cha naha ñuu Sodoma, ñu chihí cha catyí cuatyí ñu —catyí ra Jesús.

Ñáyivi ña tyasohó tuhun cahán ra Jesús cunyehe ñu tundoho

(Mt. 11.20-24)

¹³ Ta catyí ra:

—¡Ndahvi nyoho, ñáyivi ñuu Corazín! Ta ¡ndahvi nyoho, ñáyivi ñuu Betsaida! Vatyí nyehé ndo nyatu cahnu, ta ña nasamá ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu, ñahri nyatu cahnu nyehe ñu. Soco tyehe ta nyehe ñu quivi cuan cha nyehé nyoho vityin, tañi tyehe ri ndihvi noo ñu sahma tucuihya ñiñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi ñiñi ñu cuatyí ñu cuví cuan. ¹⁴ Yucuan chaha, nyoho ñuu Corazín chihin ñuu Betsaida, ñiñi ca cutachi tuñi Nyoo chi ndo ícan saha ñáyivi Tiro ta ñáyivi Sidón cuan. ¹⁵ Ta nyoho ñu ñuu Capernaum, cuñi maa ndo vatyí cundaa ndo nyacua nya andivi. Soco cunoo ndo nyacua nya anyaya, vatyí ña quichahá ndo tuhun Nyoo —catyí ra Jesús.

¹⁶ Ta catyí ra chi ndi uñi xico uchi tahan ra cuan:

—Ñáyivi cha tyasohó tuhun cahán nyoho, tuhun cahán yuhu tyasohó ñu cuví cuan. Ta ñu ña quichahá tuhun cahán nyoho, tuhun cahán yuhu ña quichahá ñu cuví cuan. Ta ñu ña quichaha tuhun cahán yuhu, tuhun cahán ra cha saquichi chii, ña quichahá ñu cuví cuan —catyí ra Jesús chi tandihi ra.

Nu nachaa coyo ndi uñi xico uchi tahan ra cha chicahan tuhun Nyoo

17 Yucuan cuví nu nachaa coyo ndi uñi xico uchi ra cha chichahān tuhun Nyoo chihin ñáyiví. Ta sñi xaan cacuví chi ra. Ta cacatyí ra chi ra Jesús:

—Sutu Mañi yuhu, nyacua nya tatyí ña vaha ta quichahá tuhun cahán ndi tatu cahán ndi sivun —catyí ra.

18 Tyicuan ta catyí ra Jesús chi ra:

—Ay, yuhu nyehí andiví nu cana cava cuihna, ra nañi Satanás. Tari noo tacha, tyicuan caa cana cava ra.

19 Ta yuhu, chahí fuerza chi ndo vatyí cuví chasaha ndo chi ra ña vaha cuan. Ta cuví cuaca chaha ndo siqui coo ta tisuhma, ta ñahri cha cuví chi ndo.

20 Soco ma sñi xaan cuví chi ndo vatyí cuví tava ñehe ndo tatyí ña vaha cuan. Sñi ca cuví chi ndo vatyí nyaá siví ndo nu libru Nyoo —catyí ra Jesús.

Nu sacahnú ra Jesús chi Nyoo vatyí sñi cuñí ra vatyí sañahá Nyoo tuhun vaha chi ñu ndahvi

(Mt. 11.25-27; 13.16-17)

21 Cuhva cuan sñi xaan cuñí ra Jesús sahá Tatyí li Nyoo, ta catyí ra:

—Sacahní chuun, Sutu Mañi yuhu, vatyí nyacá ñahun andiví ta ñuhu ñayiví. Vatyí maun sañahún tuhun maun chi ñu ndahvi ihya. Ta ña sañahún chi ra chitó ta ra cha chiñi tuñi. Tyicuan caa Sutu Mañi yuhu vatyí tyicuan caa kuhva cuñún —catyí ra Jesús.

22 Ta catyí ra Jesús chi tandihí ra sacuví tyiño nuu ra:

—Tandihí maa tuhun cuan chaha Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chi Suti, noo tuhun ri mai ñohó nui chi ra. Ta chi ñáyiví cuñí mai sacote tuhun ra, chi ñu cuan cusacote —catyí ra.

23 Tyicuan ta nanyehé ra chi ra cachicá noo chihin ra. Ta catyí ra chi ra:

—Sñi xaan cuñí nyoho ta ñáyiví cha iyó vityin vatyí nyehé ndo cha sacuví.

24 Vatyí cuaha xaan rey ta ra profeta Nyoo ta cha naha cuñi ra nyehé ra cha nyehé nyoho vityin. Soco ña nyehé ra. Ta cuñi ra cuiñi ra tuhun cha chiñi

nyoho vityin. Soco ña chiñi ra —catyí ra Jesús.

Nu sañaha ra Jesús chi yo vatyí tahán chi tyinyee yo chi ñáyiví savaha ri

25 Tyicuan ta chaa noo ra sacuahá cuenda ley vehe ñuhu. Ta quichaha ndaca tuhun ra chi ra Jesús, Vatyí nducu nyehe ra chi ra. Ta catyí ra:

—Maestro, ¿yoso caa cunyacuvi ta cuhin nu coi noo ñayiví cha ma naa ca maa?

26 Tyicuan ta nacahan ra Jesús, ta catyí ra:

—¿Ñáa catyí nu ley? ¿Yoso caa tuhun cha sacuahún?

27 Tyicuan ta nacahan ra sacuha cuenda ley cuan ta catyí ra:

—Catyí ley, cuñi yo chi Nyoo chihin tandihí aña yó ta chihin cha nñi iñi yo, ta chihin tandihí fuerza yo, ta chihin cha tandihí cha chiñi tuñi xiñi yo. Ta cuñi yo chi ñáyiví tahan yo tari cha cuñi yo chi maa yo. Tyicuan caa catyí chi —catyí ra cuan.

28 Tyicuan ta catyí ra Jesús chi ra:

—Ndicha cha cahún. Tyicuan caa sacuvun ta cacu aña yon ta coun ñayiví cha ma naa ca maa —catyí ra Jesús.

29 Soco ra sacuha cuenda ley cuan cuñi ra savaha ra chi ra, ta quichaha catyí tucu ra chi ra Jesús:

—¿Yóo cha cuví ñáyiví tahin? —catyí ra.

30 Tyicuan ta nacahan ra Jesús, ta catyí ra:

—Noo ra quitá ra Jerusalén ta cuahan ra nya ñuu Jericó. Ta tahan ra chi ra suhu. Ta suhu ra tandihí cuii maa cha nyiso ra, nyacua nya sahma ra. Ta cañi ra chi ra nyacua chacun taxin ra chi ra. Ta sandoo maa ra chi ra yucuan. 31 Tyicuan ta yaha noo tata sutu ityi cuan. Soco kuhva cha nanyehé ra chi ra catuví cuan nya sava ri yaha ra. 32 Tyicuan ta yaha tucu nonga

ra cha yihí cuenda vehe ñuhu, cha nañi levita. Soco cha nanyehé ra chi ra catuví cuan suri nya sava ri yaha ra. 33 Tyicuan ta quichi tucu noo ra Samaria. Ta cua yaha tucu ra suri ityi cuan. Ta nanyehé ra chi ra catuví

yucuan, ta quichi nundahvi cuñi ra nyehe ra chi ra. ³⁴ Ta tuhva ra nu catuvi ra, ta quichaha saha ra tatan chi ra. Ta tyih̄i ra aceitye ta vinu nu cahvi chi ra. Ta sahv̄i ra noo sahma chata ra. Yah̄a cuan ta sandaa ra chi ra burru sana ra, ta naquehen ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra. ³⁵ Ta cha inga quiv̄i cha cuñi cuhun ra Samaria cuan. Ta tava ra uvi tahan xuhun. Ta chaha ra chi chitoho vehe cuan. Ta catyí ra chi ra: “Saha cuenda vahun chi ra ihya. Ta cuhv̄on cha cachi ra. Ta sāton tatan chi ra na nduvaha ri ra. Tatu cuñi ca chi xuhun, tyiyahv̄i mai chuun nandichi”, catyí ra. Yucuan ta cuahan ra —catyí ra Jesús.

³⁶ Nu ndih̄i nacatyí ra Jesús tuhun ihya, quichaha ndaca tuhun ra chi ra sacuaaha cuan, ta catyí ra:

—Vaha. ¿Chichi cha uñi tahan ra cuan, nya ra cuví ra tahan ra ndahvi cuan? —catyí ra Jesús.

³⁷ Tyicuan ta quichaha catyí ra sacuaaha cuan:

—Ra cha cundahvi cuñi chi ra —catyí ra.

Tyicuan ta quichaha catyí ra Jesús:

—Cuahan ta sacuvi tucu yoho tyicuan caa chihin ñáyiv̄i cha iyó tundoho chii —catyí ra.

Nu chinyaq̄ ra Jesús vehe cu Marta chihin cu María

³⁸ Ta quehen ra Jesús ityi cuahan ra. Ta chaq̄ ra noo ñuu. Ta yucuan iyó noo ñaha cha nañí Marta. Ta chaq̄ ra vehe ña. ³⁹ Ta cu Marta iyó noo cuhu ña cha nañí María. Ta cu María chicunyaq̄ ña yatyin ri chaha ra Jesús, vatyí cuiñi ña tuhun cahán ra. ⁴⁰ Soco cu Marta cuaha xaan tyiño nyaá sacuvi ña. Ta chaq̄ ña nu nyaá ra Jesús, ta quichaha catyí ña chi ra:

—Tata. ¿Atu ña chicá xiñi yoho vatyí cuhi sandoó maa ña chii chihin tyiño? Catyí chi ña na tyinyee ña chii —catyí ña chi ra.

⁴¹ Soco ra Jesús catyí ra chi ña:

—Marta, Marta, chicá xaan xiñun ta cutyíño xaan cuñún chihin tyiño

chiña. ⁴² Soco iyó noo tuhun cha tahán chi caca xiñi yo. Ta cu María ihya nacach̄i ña tyiño vaha ca sacuvi ña cha tyasohó ña tuhun cahín. Ta yuhu ma cuvi tinyai chi ña —catyí ra Jesús chi cu Marta.

11

Nu sañaha ra Jesús chi ra cachicá noo chihin ra yoso caa cacan tahvi ra chi Nyoo

(Mt. 6.9-15; 7.7-11)

¹ Cuví noo chaha cha chicán tahvi ra Jesús. Ta cuhva cha ndih̄i chican tahvi ra, ta quichaha catyí noo ra chicá noo chihin ra chi ra:

—Sañaha chi ndi yoso caa cacan tahvi ndi chi Nyoo. Tari sañaha ra Juan chi ra chicá noo chihin ra —catyí ra.

² Tyicuan ta catyí ra Jesús chi ra:

—Cua cuhve cuhva chi ndo yoso caa. Tyehe caa cacan tahvi ndo: Sutu Mañi yuhu, yoho cha nyaun andiv̄i. Sacahnu xaan ndi chuun.

Na quichi quiv̄i cha nyaca ñahun ihya siqui ñuhu ñayiv̄i.

Na sacuvi ñáyiv̄i ihya siqui ñuhu ñayiv̄i tandih̄i cuhva cuñi maun, tari cuhva cuví gloria.

³ Cuhva cha cachi ndi tacuhva yoso cuhva yaha ndi noo noo quiv̄i.

⁴ Saha tucahnu iñi chi ndi. Tari maa ndi sahá ndi tucahnu iñi chi ñu tasi iñi chi ndi.

Ma cuhv̄on cha nducu nyehe ra ña vaha chi ndi, soco sacacu chi ndi tacuhva ma sacuvi ndi cuatyí nuun.

Tyicuan caa cacan tahvi ndo —catyí ra Jesús.

⁵ Ta catyí tucu ra ñandih̄i:

—Saha yo tuhun tyi nyoho iyó noo amigon, ta chaa ra vehun cha ñuu ta catyí ra chuun: “Xaa, saha tumañi iñi chii, cuhva noo uñi tahan pan chii.

⁶ Vatyí noo ra tahin nichaaq̄ ra vehi. Ta cañi xaan quichi ra. Ta ñahri maa cha iyó chii cuhve chi ra.”

⁷ Ta yoho cunacahun ta catyun chi ra: “Ma sayan-gon chii, ndee. Vatyí nyasí yuvehi. Ta ñiquixi chihin sehi. Ta ña cuvi

nducuite ta cuhve cha cuhve chuun cha vityin.” Tyicuan caa cucatyun chi ra. ⁸ Ta catyí yuhu chuun. Vasi ra tahun cuví chi ra, ma nducuiton ta cuhvon chi ra cha numi ri. Soco tatu ndoo ra yucuan, ta ma cundihñi ra cacán ra chuun, sacachan ra yuehun ta cana chaa ra chuun tacuhva cha ma cuví cusun, ta cundihñun cha sacachan ra yuehun, tyicuan ta nducuiton ta cuhvon chi ra, tacuhva cha ma sayanga ca ra chuun. ⁹ Ta tyicuan caa tucu nyoho, cacán ndo chi Nyoo. Ta cuhva ra chi ndo. Nanducu ndo ta ñihi ndo. Sacachan ndo yuehe ta nuña. ¹⁰ Vatyí tatu chican ndo, ñihi ndo. Tatu nducu ndo, ñihi ndo. Ta tatu sacachan ndo yuehe, nuña yuehe.

¹¹ Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chahá noo yuu chi sehe ndo tatu chican ndotyín pan. Ta ña tuhvá ndo chaha ndo noo coo chi sehe ndo, tatu chicán ndotyín tiyaca. ¹² Ta ña tuhvá ndo chaha ndo noo tisuhma chi sehe ndo tatu chicán ndotyín ndívi cachi ndotyín. ¹³ Nyoho cha quiñi iyó ndo, soco chitó ndo yoso caa cuhva ndo cha vaha chi sehe ndo. Ta vihi ca Sutu Mañi yo cha nyaá andívi, cuaha ca cha vaha cuhva ra chi ndo tatu cacán ndo chi ra. Ta cuhva ra Tatyí Ii ra cunyaa añima ndo.

Ra xaan iñi chi ra Jesús catyí ra vatyí chihin fuerza cuihna sacuví ra milagru

(Mt. 12.22-30; Mr. 3.20-27)

¹⁴ Ra Jesús tavá ra tatyí ña vaha cha yihí chi noo ra cha ñihi sahá cuihna. Ta cuhva cha quitá tatyí ña vaha cuan chi ra ñihi cuan, nacahan ra. Tyicuan ta ñáyivi, iyo xaan cuñí ñu. ¹⁵ Ta yihí ñu catyí ñu:

—Ra ihya, tavá ra tatyí ña vaha soco chihin fuerza ra Beelzebú ra cuví nuu chi cuihna —catyí ñu.

¹⁶ Ta yihí ñu cuñí ñu nducu nyehe ñu chi ra, ta chican ñu chi ra Jesús na savaha ra noo seña chi ñu chihin tunyee iñi Nyoo. ¹⁷ Soco ra Jesús chitó

ra tuhun chicá xiñi ñu. Ta quichaha catyí ra chi ñu:

—Tatu gobiernu ta cacusiñ ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha cunyaca ñaha ra. Tatu noo vehe ta cacusiñ ñu chihin tahan ñu, cutívi nu nyicú ñu. ¹⁸ Ta tyicuan caa tucu cuihna. Tatu tandihí ra cacusiñ ra chihin tahan ra cundihi fuerza cha iyó chi ra. Ta ihya catyí chi ndo tyehe caa vatyí nyoho catyí ndo vatyí chihin fuerza ra Beelzebú tavé tatyí ña vaha. ¹⁹ Soco tyehe ta tavé tatyí ña vaha tari cuhva catyí ndo, ndaca tuhun ndo chi ra nyicú chihin ndo yóo chi fuerza tavá maa ra tatyí ña vaha. Maa ra sacoto ra chi ndo cha ndicha vatyí nyoho tondo ri chicá xiñi ndo. ²⁰ Soco catyí chi ndo vatyí yuhu tave tatyí ña vaha chihin fuerza Nyoo. Ta cuñí chi catyí cuan vatyí ndicha cuii Nyoo ra nyacá ñaha añima ñáyivi cha chaa ra nu nyicú ndo.

Nu sañahá ra Jesús vatyí ñihi ca fuerza Nyoo ta ñima ca fuerza cuihna

²¹ Tatu noo ra iyó vavaha fuerza chi ra ta nyisó ra mityí ra, ta sahá cumi ra vehe ra. Ñohó xehe vaha ndaha tyiño ra chichi vehe ra tacuhva cha ma cuví tinyaa ra suhu. ²² Soco tatu quichi inga ra cha cuaha ca fuerza iyó chi, ta cañi tahan ra chihin ra, ta cuví chasaha ra chi ra, tyicuan ta tinyaa ra ndaha tyiño ra, ta sachá ra chi ra tahan ra. ²³ Ñáyivi ña sahá tyiño chihin, satívi ñu tyiño sahí. Ta ñu ña tyinyeé chii cha cahán ñu tuhun Nyoo chihin ñáyivi, cuñí chi catyí vatyí ña chahá ñu cha coto ñáyivi tuhun cahín.

Nu sañahá ra Jesús chi yo yoso caa ndichi tucu tatyí ña vaha inga chaha tatu naa iñi yo chi Nyoo

(Mt. 12.43-45)

²⁴ Tatu noo tatyí ña vaha quitá chi noo ñáyivi, chicá noo chi noo ñuhu ityi, nanducú chi noo nu nyitatu chi. Soco ña nañihi maa chi nu nyitatu chi, tyicuan ta ndichi xiñi chi: “Cunuhu tiqui nya vehi nu quite.” ²⁵ Yucuan

ta nachaa chi ańima nu quita chi. Ta nanyehe chi vatyi ndi xaan ta vii xaan. ²⁶ Tyicuan ta cua naquehen chi ucha ca tahan tatyi ńa vaha cha yaha ca cuhva ta ican saha maa chi. Tyicuan ta in ri quihvi tandihi chi ańima ńu cuan. Yucuan chaha yaha ca cuhva nanduvi ńu ican saha cha cuvı maa ńu —catyı ra Jesús.

Ñu cha ndicha iyó vaha ńáyivı

²⁷ Cha ni ri ca cha cahán ra Jesús tuhun cuan, ta cana chaa noo ńaha cha ńohó mahńu ńáyivı cuan. Ta quichaha catyı ńa:

—Ñana cha siı cuví chi ńaha cha sacacu chuun ńaha cha chaha caxun —catyı ńa.

²⁸ Soco ra Jesús catyı ra:

—Siı ca cuńı ńu cha chińı tuhun cahán Nyoo ta quichahá ńu —catyı ra.

Ñáyivı ńa vaha, maa ri maa nyatu cahnu cuńı ńu nyehe ńu

(Mt. 12.38-42; Mr. 8.12)

²⁹ Tyicuan ta chaa coyo ńáyivı nu nyaá ra Jesús. Ta quichaha catyı ra chi ńu:

—Ñáyivı cha iyó vityin quińi xaan iyó ńu. Ta nyiyo ińi ńu. Cuńı ńu nyehe ńu seńa ta cha iyo. Soco noo ri cunyehe ńu, tahan cha sacuvı Nyoo chihin ra Jonás. ³⁰ Tari ra Jonás cuvı ra seńa chi ńáyivı ńuu Nıve ta cha naha, tyicuan caa tucu yuhu Rayıı cha quichi nya gloria, cuvı tari noo seńa chi ńáyivı cha iyó vityin. ³¹ Quiıvı tachi tuńi Nyoo chi ńáyivı cunandoto ńaha cuvı reina ityi sur ta cha naha, ta cucatyı ńa vatyı cahun ndo anyaya, vatyı maa ńa vasi cańi ńuu ńa, soco quichı ńa, quichı tyasoho ńa tuhun cha chińi tuńi cahán ra Salomón. Ta ihya cahnu ca cuvı ra cha cahán chihin ndo vityin ta ńima ca ra Salomón. ³² Ta quıvı cutuńi chi tandihi ńáyivı, cunducuita ńu chiyo ńuu Nıve ta cha naha, ta cucatyı ńu vatyı nyoho ńu cha iyó vityin cahun ndo anyaya, vatyı maa ńu ńu Nıve, canasama ńu cuhva iyó ńu quıvı cahán ra Jonás tuhun Nyoo chihin ńu. Ta vityin yuhu

ra cahnu ca cahán chihin ndo ta ńima ca ra Jonás.

Nu sańaha ra Jesús vatyı na saha yo cuenda ańima yo coto vaha ńahri cha ndichin Nyoo nyaá

(Mt. 5.15; 6.22-23)

³³ Yori ndo tyaa ndo lámpara ta tyihi xehe ndo, o tyihi ndo chichi noo caja. Vatyı ńuhu cuan tahan chi coso minoo nu sucun. Tacuhva quihvi ńáyivı vehe ndo, soco ndichin. ³⁴ Chiti nuu ndo noo cha sandichin chi ndo cuvı. Ta tyicuan caa tucu ańima ndo, tatu iyó cha ndichin Nyoo ańima ndo, vaha ńáyivı cuvı ndo. Tatu ńahri cha ndichin Nyoo nyaá tari noo ra cuaa cuvı ndo, ńa cuvı nyehe ndo ityi vaha cha cuahan nu nyaá Nyoo. ³⁵ Yucuan chaha saha ndo cuenda ańima ndo. Tatu nyaá cha ndichin Nyoo chihin ndo, o nyaá cha ńaa ińi. ³⁶ Tatu tyitu ańima ndo chihin cha ndichin Nyoo ńahri ca maa noo nu ńaa ińi iyó chi ndo, vatyı sandichin chi tandihi ndo. Tari cha nyaá noo lámpara sacatá chi ńuhu chi ndo cuvı cuan —catyı ra Jesús.

Cahán ra Jesús chi ra casacuaha cuenda ley vehe ńuhu ta chi ra fariseo, ra caquichaha xaan ley cuan

(Mt. 23.1-36; Mr. 12.38-40; Lc. 20.45-47)

³⁷ Cuhva cha ndihı cahan ra Jesús nuu ńáyivı, noo ra fariseo, ra quichaha xaan ley vehe ńuhu, catyı ra chi ra Jesús, vatyı na cahun ra cucachi ra nya vehe ra. Ta chaa ra Jesús vehe ra. Ta quihvi ra chicunyaa ra mesa.

³⁸ Tyicuan ta ra fariseo cuan iyo cuńı ra vatyı ńa nacatyı ra Jesús ndaha ra, tari cuhva costumbre maa ńu cha cumańi cachi ńu. ³⁹ Soco ra Jesús catyı ra chi ra:

—Nyoho, ra cacuvı fariseo, tari cha chata ri vaso ta coho sanduvı nyoho. Soco ityi chichi, quińi caa. Vatyı ńa nacatyá ndo. Tyicuan caa nyoho. Vatyı cuńı ńáyivı vatyı vaha ńáyivı cuvı ndo. Soco xehe ri suhu ndo ta ńa sacuvı ndo cha vaha. ⁴⁰ Ndava xaan ińi ndo. ¿Atu ńa chıtó ndo vatyı

ra cha savahá ityi chata vaso, suri maa ra savahá ityi chichi? Vatyí tari vaso cuví ndo. ⁴¹ Tahán chi sahá ndo tumañi iñi chi ñáyivi, ta tyinyee ndo chi ñu. Sacuvi ndo cha vaha chihin ñu, tyicuan ta nduvii tucu ityi chichi ndo.

⁴² ¡Ndahvi nyoho ra fariseo! Vatyí nyoho vasi vaha chaha ndo diesmo chi Nyoo cuenda yucu cha nañi menta ta ruda ta ñáá ndihi ca yucu cha tachí ndo, soco ña quichahá ndo cuhva cha vaha cha cuñi Nyoo sacuvi yo, ta cha cuñi yo chi ra. Ta ican ihya cuví cha tahán chi sacuvi ndo, soco ma sandihi ndo cha cuhva ndo diesmo ñandihí. ⁴³ ¡Ndahvi nyoho cha cuví ndo fariseo! vatyí cuñi ndo cunyaa ndo nu tyayu vaha ca chichi vehe ñuhu. Ta cuñi ndo cha saha ñáyivi ñáyivi chi ndo nuyahvi. ⁴⁴ ¡Ndahvi nyoho ra sacuahá cuenda ley, ta nyoho ra fariseo! Vaha sahá ndo chi ndo, soco cuví ndo tari noo ñaña ndiyi cha ña quetuví. Vatyí yahá ñáyivi siqui soco ña chitó ñu ñáá cha ñohó chichi ñaña cuan. Vatyí ñahri seña catuví nu yihí ndiyi cuan. Cuñi maa ñu vatyí vaha ndo, soco ña chitó ñu vatyí ña vaha ñaña ndo —catyí ra Jesús.

⁴⁵ Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha catyún tyehe caa, nañi tucu chiin chi nyuhu —catyí ra.

⁴⁶ Tyicuan ta quichaha catyí ra Jesús chi ra:

—¡Ndahvi tucu nyoho ra casacuaha cuenda ley vehe ñuhu! Vatyí sanducuaha ca ndo ley cha tachí Nyoo ta cha naha. Ta ña tahán chi. Ta yori ndoyó carga cuan, ta saniñi ndo na sacuvi ñu ta ni maa ndo ni chiin ña tyinyee ndo chi ñáyivi. ⁴⁷ ¡Ndahvi nyoho! Vatyí sanduvahá vaha ndo ñaña nu ñohó yiqui ra profeta Nyoo cha cachahñi sutu chahnu ndo ta cha naha. ⁴⁸ Chihin cuan cuñi chi catyí vatyí ndoó ndo vaha cha sacuvi sutu chahnu ndo ta cha naha. Vatyí sutu ndo cachahñi ra chi ra profeta Nyoo. Ta nyoho sanduvahá ndo ñaña

ra. ⁴⁹ Yucuan chaha catyí Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva ra ta inga ra cusacono ndo chi ra. ⁵⁰ Ta ndicha tyicuan caa sacuví ndo. Nyoo cutachi tuñi ra chi ndo cha cuenda tandihí ra profeta ra cachahñi sutu chahnu ndo nyata chingo ñuhu ñáyivi ta nyacua nya vityin. ⁵¹ Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu yatyin nu nyaa arta. Yucuan chaha catyí Nyoo vatyí cutachi tuñi ra chi ñáyivi cha iyó vityin cha catyí cuatyí ñu chiyó ta cha naha. ⁵² ¡Ndahvi nyoho ra casacuaha cuenda ley vehe ñuhu! Vatyí tari cha tyihí xehe ndo ndaha ticu cuenda yuvehe nu quihvi ñáyivi ityi Nyoo. Ta ni maa ndo ña quihvi ndo nu nyaá Nyoo. Ta ni ri ña chahá ndo cha quihvi inga ñáyivi cha cuñi quihvi —catyí ra Jesús.

⁵³⁻⁵⁴ Ndihi cahan ra Jesús tuhun cuan, ta quitá ra. Soco ra casacuaha ley vehe ñuhu chihin ra fariseo, nduxaan xaan ra ta quichaha cuquiñi cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí siqui ra.

12

Nu sañahá ra Jesús vatyí ma cuvi tixehe yo cuatyí yo

¹ Cuenda mil ñáyivi ndu ñin ri nyacua nañi tahan ñu, vatyí cuaha xaan ñu. Tyicuan ta ra Jesús catyí xihna ca ra chi ra cachicá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyí tari ndaa pan chihin yuchan iya, tyicuan caa cuví cuatyí ra tyi sahá ra tyi vaha ra. Soco ma cuvi tixehe ra cuatyí ra. ² Vatyí ñahri noo cha ñohó xehe ta cuñún, tyi ma natuvi, ta ñahri cha xehe ta cuñun, vatyí ma coto ñáyivi. ³ Yucuan chaha ñáá ndihi tuhun cha cahan ndo nu xehe, cuquita chi nu ndichin. Ta ñáá ndihi tuhun cha cahan ndo chichi

vehe ndo, cucuiñi tandihi ñáyivi noo quiivi.

¿Yóo chi tahán chi cuyuhvi yo, chi ñáyivi o chi Nyoo?

(Mt. 10.28-31)

⁴ 'Ta catyí chi ndo cha cuví ndo ra tahin, vatyí ma yuhvi ndo chi ra chahñi coño ñuhu ri. Vatyí yaha tuhun cuan ta ñahri ca cha cuví sacuvi ra. ⁵ Soco cua catyí chi ndo yóo chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñáyivi ndo. Ta yaha cuan ta cuví tyihi ra ñima ndo anyaya.

⁶ 'Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihi ri ti, Nyoo ña naa iñi ra chi ni noo ti. ⁷ Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixi xiñi ndo ta chitó Nyoo yoso tahan nyaá. Yucuan chaha ma yuhvi ndo.

Ma yuhvi yo cahán yo tuhun ra Jesucristo nuu ñáyivi

(Mt. 10.32-33; 12.32; 10.19-20)

⁸ 'Catyí chi ndo vatyí nya ndo cahán ndo tuhun chihin ñáyivi, tyicuan caa tucu cucahin tuhun ndo nuu ángel Nyoo gloria. Vatyí yuhu Rayi cha quichi nya gloria cuví. ⁹ Soco nya nyoho cha cahán nuu ndo cahán ndo tuhun chihin ñáyivi, tyicuan caa tucu yuhu, ma cahin tuhun ndo nuu ángel cuenda Nyoo. ¹⁰ Ta vasi cahán ñáyivi chi yuhu Rayi cha quichi nya gloria, Nyoo cusaha ra tucahnu iñi chi ñu. Soco yóo cha cahán ña vaha siqui Tatyí li Nyoo ma ñihi ñu tucahnu iñi cuenda cuan.

¹¹ 'Cuhva cha cunyaca ñáyivi chi ndo chichi vehe ñuhu, o nu juez, o nuu ra cuví tyiño, ma caca xiñi ndo ñáá tuhun cunacahan ndo. ¹² Vatyí cuhva cha cua nacahan ndo, yucuan cuhva cuhva maa Tatyí li Nyoo ñáá tuhun tahán chi nacahan ndo —catyí ra Jesús.

Nu chahá ra Jesús cuhva vatyí ña tahán chi cunyicon yo cha tyayii

¹³ Noo ra cha ndihi chihin ñáyivi cuaha cuan, catyí ra chi ra Jesús:

—Maestro, catyí chi yañi vatyí natahvi sava ra cha tyayii cha sandoo sutu ndi chi ndi —catyí ra.

¹⁴ Tyicuan ta catyí ra Jesús chi ra:

—¿Yóo cha tyiso chi yuhu cha cuví juez ta catyí ndo vatyí tahvi sava yuhu cha chii ndo? —catyí ra.

¹⁵ Tyicuan ta quichaha catyí tucu ra:

—Saha ndo cuenda ta ma nyiyo iñi ndo cha tyayii. Vatyí ña chiñuhú ri cha coo cuaha ndaha tyiño yo tacuhva coo vaha yo ñáyivi —catyí ra.

¹⁶ Tyicuan ta chaha ra Jesús noo cuhva ihya chi ñu:

—Chiyó noo ra tyayii. Ta cuaha xaan tyiño sahá ra iyó. ¹⁷ Tyicuan ta ndichi xiñi ra: “¿Yoso caa cusacuvi? Ñahri nu naquehen vahi tandihi tyiño sahi. ¹⁸ Soco cha chité yoso caa cunyacuvi. Cusatani yaca nyihi nu yihí niñi, vatyí nyihi xaan. Ta cusavahi cha nahnu ca. Ta yucuan cunaquehen vahi tandihi maa niñi cha cuquita nu iyó tyiño sahi. ¹⁹ Tyicuan ta cuaha cuiya ma saha tyiño que. Cunyatati ta cusii cuñi. Ta cachi vahi. Ta cucoho vahi”, ndichi xiñi ra. ²⁰ Soco catyí Nyoo chi ra: “Tondo xaan iyón. Vatyí vityin cha cuaa cucúvun. Ta cha cumí vahun ¿yóo chi cua ndoo?” ²¹ Tyicuan caa cuví chi ñáyivi cha sacayá tandihi cha tyayii soco ñahri maa iyó chi ñu nuu Nyoo —catyí ra Jesús.

Ma caca xaan iñi yo ñáá ndihi cha chiñuhú chi yo

(Mt. 6.25-34)

²² Tyicuan ta quichaha catyí ra Jesús chi ra cachicá noo chihin ra:

—Catyí chi ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahna cuihno ndo. ²³ Vatyí yahvi ca nyaá ñáyivi yo ican saha cha cachi yo. Ta yahvi ca nyaá coño ñuhu yo ican saha cha cuihno yo. ²⁴ Saha ndo cuenda saa vatyí ña sahá tyiño ti. Ta ni ri ña naquehén vaha ti cha cachi ti. Soco chachí ti, vatyí Nyoo chahá ra cha cachi ti. Ta nuu Nyoo yahvi ca nyaá nyoho ta ñima ca saa.

25 Ta vasi chicá xaan xiñi ndo soco ma cuví sandusucun ca ndo ni chiin ca chi ndo. 26 Tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun tandihí ca cha chiñuhu chi ndo?

27 Saha ndo cuenda yoso caa iyó tu ita vatyí ña sahá tyiño tun. Soco catyí chi ndo vatyí ni rey Salomón chihin tandihí cha tyayí ra ta ña tyaquí cha ñihno ra tari cha sacuihno Nyoo chi tu ita cuan. 28 Tatu tyicuan caa sacuihno Nyoo chi tun ita cha iyó nu chiqui vityin, ta tyaan cucayu tun chichi horno, ta nyaca cuví chi nyoho ta ma sacuihno ra. Soco maa ndo ña chinó vaha iñi ndo chi ra. 29 Ma caca xaan xiñi ndo tuhun cha cachi ndo ta cha coho ndo. 30 Vatyí ñáyivi cha ña chinó iñi chi Nyoo chicá xiñi ñu tuhun ihya. Soco nyoho chinó iñi ndo chi Sutu yo Nyoo ta maa ra chitó ra ñáá cha chiñuhú chi ndo. 31 Vaha ca cha nanducu ndo yoso caa nacuhva cuenda ndo chi ndo chi Nyoo vatyí cunyaca ñaha ra añima ndo. Ta tyicuan caa ta ñihi ndo tandihí cha chiñuhú chi ndo.

*Cha vaha cha iyó gloria
(Mt. 6.19-21)*

32 Ma yuhvi nyoho, mbee sane. Vasi ña cuaha ndo soco Sutu yo Nyoo cuñí ra chi ndo. Yucuan chaha cucuhva ra quihvi ndo nu nyacá ñaha ra. 33 Xico ndo cha iyó chi ndo. Ta cuhva ndo chi ñu ndahvi. Tatu sacuví ndo tyehe caa, sacayá ndo cha vaha nuu Nyoo cuví cuan. Vatyí nuu Nyoo ña ndihí cha vaha cuan. Vatyí ni ri ra suhu, ni quiti, yori cha sativi iyó yucuan. 34 Vatyí nuu cunyaa cha tyayí ndo, yucuan cuví nu nyaá xiñi ndo. Ta yucuan cucunyaa añima ndo —catyí ra.

Nu sañahá ra Jesús chi yo yoso caa cuatu tuhva yo chi ra quivi quichi ra inga chaha

35 Cuatu tuhva vaha ndo quivi quichi inga chaha. 36 Ta cuví ndo tari musu cha canyatú tuhva chi chitoho ñáá cuhva ndichi ra cha cuahan ra noo vico tandaha. Ta nyatú tuhva ra, vatyí tacuhva tañi tyehe ri nuña ra yuvehe cuhva cha sacachan chitoho

ra cha nachaa ra. 37-38 Ta caa cuhva ri cuan si xaan cuñí ra nyehe ra chi ra. Vatyí nyatú tuhva ra chi ra nyacua nya nachaa ra, vasi cha cuaa, vasi ñaa ca. Ta cuatyaa ra chi musu cuan yuhu mesa ta cacachi ra. Tyicuan ta si xaan cucuñi musu cuan. Vatyí tyicuan caa nyacuví chitoho ra chihin ra. 39 Ta coto ndo tuhun ihya vatyí tatu noo chitoho noo vehe, ta coto ra ñáá cuhva cuquihvi ra suhu vehe ra, saha ra cuenda vehe ra. Ta ma cuhva ra quihvi ra suhu cuan chichi vehe ra. Vatyí coto quehen ra tandihí cha iyó chi ra. 40 Ta tyicuan caa cuví tucu nyoho, cuatu tuhva ri ndo. Vatyí yuhu Rayí cha quichi nya gloria, sana ri iñi ndo ta cuquichi —catyí ra Jesús.

*Musu vaha ta musu ña vaha
(Mt. 24.45-51)*

41 Tyicuan ta quichaha ndaca tuhun ra Pedro chi ra Jesús:

—¿Yóó chi cuenda cahun tuhun ihya? ¿Atu cha cuenda maa ri maa ndi, o cha cuenda tandihí ñáyivi?

42 Tyicuan ta nacahan ra Jesús, ta catyí ra chi ra:

—Musu cha tyasohó tuhun cahán chitoho, yucuan cuví musu vaha. Vatyí sahá cuenda ra vehe chitoho ra. Ta vaha ri cuhva chahá ra cha cachi tandihí ca musu cuan. 43 Ta si xaan cuví chi musu cuan tatu cuhva cha sahá tyiño ra, ta nachaa chitoho ra. Vatyí quichaha ra tandihí cha tahán chi sacuvi ra. 44 Ta catyí chi ndo vatyí cha ndicha cuví. Vatyí chitoho ra cunatyaa ra tandihí cuii cha cumí ra ndaha ra. Vatyí vaha quichahá ra chihin tyiño sahá ra. 45 Soco tatu chicá xiñi musu cuan vatyí naha xaan cuahan chitoho ra, ta quichaha nyacuvi ra cha ña vaha chihin ñu nyaá tyiño yoo, ta chihin ra canyicú tucu sahá tyiño cuan. Ta ña cuñí ra sahá tyiño ra. Tyiño chachí ta tyiño chihí ndixi iyó ra. 46 Tyicuan ta sana iñi ra ta ndichi chitoho ra quivi cha ña nyatú ra chi ra noo cuhva cha ña chito ra. Tyicuan ta cutachi tuñi chitoho ra chi ra, tari tuhva maa ra chihin musu cha ña quichahá tuhun cahán ra.

⁴⁷ 'Ta noo musu cha chitó yoso caa iyó chitoho ta ña sacuvi tari cuhva cuñi chitoho ra, cuaha xaan tundoho cunyehe ra. ⁴⁸ Soco tatu noo musu cha ña chitó ta sacuvi ra cha ña vaha, tachi tuñi chitoho ra chi ra. Soco chiin ri, vatyí ña chitó ra, ta chinyacuvi ra. Tatu noo musu ta cuaha cha chaha chitoho ra chi ra, cuaha tahán chi nacuhva cuenda ra chi chitoho ra. Ta ra cha cuaha xaan nyaá ndaha, cuaha xaan tahán chi nacuhva cuenda ra chi chitoho ra.

Nu catyí ra Jesús vatyí cha catyí ra cucañi tahan ñáyivi chihin tahan ñu
(Mt. 10.34-36)

⁴⁹ 'Tari cha sanatahín ñuhú siqui ñuhu ñayivi, tyicuan caa cuví tyiño vachi. ¡Ñana cha cuñi cha nacayu catyín ri ñuhú ihya! ⁵⁰ Vatyí nyaá yahi noo tundoho cahnu, ta ñana cha nyehí tundoho nyacua nya ndihi tyiño sahi. ⁵¹ Cuñi maa ndo vatyí cha vachi cuhve cha taxi ri coo ndo siqui ñuhu ñayivi ihya. Soco yuhu vachi vatyí sasiin chi ndo. ⁵² Vatyí cha vityin ta ityi nuu ca, ohon ñáyivi noo vehe cucusiin ñu. Uñi ñu cañi tahan chihin uvi ñu. Ta uvi ñu cucañi tahan chihin uñi ñu. ⁵³ Ta ra cuví sutu, cucañi tahan ra chihin sehe ra. Ta ra cuví sehe cucañi tahan ra chihin sutu ra. Ta ñu cuví sihi cucañi tahan ñu chihin sehe ñu. Ta ñu cuví sehe cucañi tahan ñu chihin sihi ñu. Ta ñu cuví tyiso cucañi tahan ñu chihin chono ñu. Ta ñu cuví chono cucañi tahan ñu chihin tyiso ñu —catyí ra Jesús.

Nu catyí ra Jesús chi ñáyivi vatyí ña nacotó ñu vatyí cha chaq quivi cha quichi Sehe Nyoo

(Mt. 16.1-4; Mr. 8.11-13)

⁵⁴ Catyí tucu ra Jesús chi ñáyivi cuaha cha nyicú yucuan:

—Tatu cha nyehe ndo vatyí cha ndihvi vico, catyí ndo vatyí cua coon savi. Ta tyicuan caa cuví. ⁵⁵ Tatu cha nyehe ndo vatyí cha caá tatyí ityi tyañuhu, catyí ndo vatyí cha cha quivi ihñi. Ta tyicuan caa cuví. ⁵⁶ Nyoho sahá ndo tyi chitó ndo, ta nacotó ndo tandihí tuhun andivi, ta

tandihí tuhun ñuhu ñayivi. Soco ¿ñáá tuhun cha ña nacotó ndo ñáá tyembu nyaá ndo vityin?

Nducu yo cuhva yoso caa coo vaha yo chihin ra chicán cuatyí chaha yo coto cuhun yo vehe caa
(Mt. 5.25-26)

⁵⁷ ¿Ñáá tuhun ña sahá ndo cuenda nya cha vaha ta nya cha ña vaha? ⁵⁸ Tatu noo ra chicán cuatyí chahun ta cuahun chihin ra nu nyaá ra cuví tyiño, ityi cuahun nducun cuhva ni coo vahun chihin ra cha cumañi ca chaa ndo nu nyaá ra cuví tyiño. Coto nacuhva cuenda ra chuun chi juez. Ta juez cuan cunacuhva cuenda ra chuun chi policía. Ta policía cuan cutyihí ra chuun chichi vehe caa. ⁵⁹ Tatu tyicuan caa cuví, catyí chuun vatyí ma quiton nyacua nya tyiyahvun tandihí cha tahán chi tyiyahvun —catyí ra Jesús.

13

Cuñi chi cha nasama yo cuhva iyó yo o cunyehe yo tundoho

¹ Tyicuan ta suri quivi cuan canyicu suhva ra. Ta quichaha canacatyí ra chi ra Jesús yoso caa cha nyacuvi ra Pilato chihin suhva ra Galilea. Vatyí tyihí ra tyiño na cucahñi sindaro chi ra Galilea cha cachaha ofrenda chi Nyoo vehe ñuhu. Ta nasaca ra niñi ra cuan chihin niñi quití cha cua cuví ofrenda cuan. ² Ta nacahan ra Jesús ta catyí ra chi ra:

—¿Atu chicá xiñi nyoho vatyí cahnu xaan ca cuatyí ra Galilea cuan cha nuu tandihí ra ityi ñuu ra. Ta yucuan chaha cachihí ra? ³ Ñima. Vatyí tatu nyoho ta ma nasama ndo cuhva iyó ndo, tyicuan caa tucu cunaa nyoho. ⁴ Ta ndi chahun uñi ra cachihí cha canacava torre Siloé cuan siqui ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñi maa ndo? ⁵ Ñima. Vatyí tatu nyoho ta ma nasama ndo cuhva iyó ndo, cunaa tucu nyoho.

Nu catyí ra Jesús noo cuhva yoso caa nyatú Nyoo cha nasama yo cuhva iyó yo

⁶ Tyicuan ta chahā ra Jesús noo cuhva. Ta catyí ra:

—Noo ra iyó yutun cha nañi higo chi ra. Ta nanyaá tun nu ñuhú ra. Ta chahan ra chinyehe ra tatu iñi chiti tun. Ta nanyehe ra vatyí ñahri. ⁷ Ta quichaha catyí ra chi ra sahá cuenda chi tun: “Cha uñi cuiya tyito ri quichi nyehi tatu iyó chiti tun. Ta ñahri maa chiti tun iñi. Na cahnya yo chi tun. Vatyí ¿ñáá ri tuhun sayangá tun nu ñuhú ihya? Vatyí ñahri chiti chahá tun”, catyí ra. ⁸ Soco ra cha sahá cuenda ñuhú cuan quichaha catyí ra: “Tata, ma cahnya yo chi tun vityin. Na cuinanyaa maa tun nonga cuiya ihya. Cusanduvite ñuhú chaha tun ta cutyihí ñuhú tyahyu. ⁹ Vasi tyicuan caa ta cuhva tun chiti. Soco tatu ña chaha tun chiti, tyicuan ta cahnya yo chi tun”, catyí ra.

Quiyivi nyitatú ñáyivi sanduvahā ra Jesús chi noo ñaha tihí chata

¹⁰ Noo quiyivi cha nyitatú ñáyivi sañahá ra Jesús chi ñu chichi vehe ñuhu. ¹¹ Ta yucuan nyaá noo ñaha cha yihí tatyí ña vaha chi. Ta cha chahun uñi cuiya cuhvi ña cha ndutihí chata ña. Ta ña cuví ndundoo ña. ¹² Tyicuan ta nanyehe ra Jesús chi ña. Ta canā ra chi ña. Ta quichaha catyí ra chi ña:

—Cha nduvahun. Ñahri ca cuehe ndohún —catyí ra chi ña.

¹³ Tyicuan ta tyiso ra ndaha ra siqui ña. Ta caa cuhva ri cuan ta ndundoo ña. Tyicuan ta quichaha sacahnu ña chi Nyoo. ¹⁴ Soco ra cuví nuu vehe ñuhu, cuxaan xaan ra. Vatyí quiyivi nyitatú ñáyivi sanduvahā ra Jesús chi ña. Ta quichaha catyí ra chi ñáyivi canyicú cuan:

—Iyó iñu tahan quiyivi tahán chi saha tyiño yo. Yucuan quiyivi quichi ndo quichi cuví tatan chi ndo. Ta ma quichi ndo quiyivi nyitatu yo —catyí ra.

¹⁵ Tyicuan ta ra Jesús quichaha catyí ra chi ra:

—Nyoho cha sahá ndo tyi vaha ndo. ¿Atu ña ndachi tucu nyoho quiyivi sana ndo vatyí sacoho ndo ndutyá chi ti quiyivi nyitatu yo? ¹⁶ Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuhñi ña chihin cuehe ihya sahá ra ña vaha. Ta yori ndachi chi ña. ¿Atu ña tahán chi ndachi yo chi ña vasi quiyivi nyitatu yo? —catyí ra Jesús.

¹⁷ Tyicuan ta cuhva cha catyí ra Jesús tuhun cuan, tandihí maa ra xaan iñi chi ra chahan cuví nuu ra. Soco tandihí maa ñáyivi cusihí cuñi ñu chihin cha cahnu cha sacuví ra Jesús.

Nu catyí ra Jesús vatyí tari noo chiti mostaza cuví cha nyacá ñaha Nyoo añima yo

(Mt. 13.31-32; Mr. 4.30-32)

¹⁸ Tyicuan ta quichaha catyí ra Jesús:

—¿Ñáá chihin sandu quiyivi tahin cha nyacá ñaha Nyoo añima yo? ¿Ñáá chihin sandu inuu ri yo? ¹⁹ Tari noo chiti mostaza, tyicuan caa cuví. Vatyí noo ra tachí ra noo chiti nu ñuhú, ta chahnu tun. Ta cuví tun noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

Nu catyí ra Jesús vatyí tari yuchan iya tyicuan caa cuví cha nyacá ñaha Nyoo añima yo

(Mt. 13.33)

²⁰ Tyicuan ta quichaha catyí ra Jesús inga chaha:

—¿Ñáá ca chihin sandu inuu ri yo yoso caa nyacá ñaha Nyoo añima yo?

²¹ Cuví chi tari noo yuchan iya cha nasacā noo ñaha sihi chihin uñi cuhva yutyí pan. Vatyí tari ndaa pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo añima —catyí ra.

Yuvehe tihin ta ityi cuiñi cha cuahan nu nyaá Nyoo

(Mt. 7.13-14, 21-23)

²² Ityi cuahan ra Jesús Jerusalén cahán ra tuhun Nyoo chihin ñáyivi tandihí ñuu nu yaha ra. ²³ Ta quichaha ndaca tuhun noo ra chi ra:

—¿Atu ña cuaha maa ñáyivi cucacu añima? —catyí ra.

Tyicuan ta nacahan ra Jesús, ta catyí ra:

²⁴ —Nanducu ndo cuhva quihvi ndo yuvehe tihin. Vatyí yíi xaan quihvi ndo nu nyacá ñaha Nyoo. Vatyí cuaha xaan ndo cha cucuñi ndo quihvi ndo yucuan. Ta ma cuví. ²⁵ Vatyí tari chitoho noo vehe tyicuan caa cuví Nyoo. Ta chitoho vehe cuan cunacasi ra yuvehe. Tyicuan ta nyoho cha nyicú ndo ityi chata cusacachan ndo yuvehe, ta cucatyí ndo: “Nuña yuvehe.” Ta ra cuan cucatyí ra chi ndo: “Ña chité nya ityi quichi nyoho.” ²⁶ Tyicuan ta nyoho cucatyí ndo: “Nyuhu chachi ndi ta chihí ndi chuhun. Maun sañahun tuhun Nyoo chi ndi ityi nu nyaá vehe ndi”, cucatyí ndo chi ra cuan. ²⁷ Soco ra cuan cunacahan ra chihin ndo ta cucatyí ra: “Cha catyí chi ndo vatyí ña chité nya ityi quichi nyoho. Canyaha ndo nu nyai, tandihí nyoho ñu nyacuví cha ña vaha”, cucatyí ra chi ndo. ²⁸ Yucuan ta cuacu ndo ta sacahni noho ndo cha nyehe ndo chi ra Abraham ta chi ra Isaac ta chi ra Jacob, ta chi tandihí ra profeta Nyoo cha chiyo ta cha naha. Vatyí canyicú ra nu nyacá ñaha Nyoo. Ta nyoho ndoo ndo ityi chata. ²⁹ Ta cuquichi ñáyivi ityi tyañuhu, ta ityi norte, ta ityi nu caña ñanyii, ta ityi nu quee ñanyii. Ta cunyicu ñu cachi ñu chihin Nyoo nu nyacá ñaha ra. ³⁰ Ta yóo ñu cha cuñí cuhun ityi nuu, ican ñu cuhun nu ndihí. Ta ñu cuahan nu ndihí, ican ñu cuhun ityi nuu —catyí ra.

Nu nducuihya iñi ra Jesús nyehé ra chi ñáyivi ñuu Jerusalén
(Mt. 23.37-39)

³¹ Suri maa quívi cuan chaá coyo suhva ra fariseo. Ta catyí ra chi ra Jesús:

—Qujta ihya vatyí ra Herodes cuñi ra cahni ra chuun —catyí ra.

³² Soco ra Jesús quichaha catyí ra chi ra:

—Cuahan ndo ta catyí ndo chi ra ñucuii quiñi iyó cuan, vatyí nyacua

nya nu chaa maa chi quívi cha ndihí tyiño sahí cha tave tatyí ña vaha ta cha sanduvahi chi ñu cuhví, tyicuan ta cundihí tyiño sahí. ³³ Soco nya tahán chi cha ndihí maa tyiño sahí, tyicuan ta cuhun mai cucúvi nya Jerusalén. Vatyí ma cuví cha cúvi noo ra profeta Nyoo ityi chata Jerusalén.

³⁴ ¡Ndahvi nyoho ñáyivi Jerusalén! vatyí chahni ndo chi ra profeta ra cachahá cuenda tuhun cahán Nyoo chi ndo. Ta tuchi ndo yuu chi tandihí ra cha saquichi Nyoo nu nyicú ndo. Ta yuhu cuaha xaan chaha cuñi saha cuende chi ndo tari noo ndivi cha sahá cuenda ti chi sehe ti, ta naquehen vaha ti chi ti chichi ndichin ti. Soco maa ndo ña cuñi ndo. ³⁵ Nyehe ndo vityin vatyí cha sandoj chi ndo. Ta catyí chi ndo vatyí ma nyehe ca ndo chii nyacua nya chaa chi quívi cuacatyí ndo vatyí cahnu xaan ra vachi chihin sívi Nyoo —catyí ra Jesús.

14

Nu sanduvaha ra Jesús chi noo ra cuhví cha yihí cuiño chi

¹ Cuví chi noo quívi nyitatu ñáyivi. Ta ra Jesús cuahan ra cua cachi ra vehe noo ra cuví nuu chi ra fariseo. Ta suhva ca fariseo cuan cañañi ra chi ra Jesús tatu ñáa cha ña vaha cunyacuvi ra. ² Yucuan ta nuu ra Jesús nyaá noo ra cuhví cha yihí cuiño chii. ³ Tyicuan ta quichaha catyí ra Jesús chi ra casacuaha ley vehe ñuhu ta chi ra fariseo:

—¿Atu vaha sanduvaha yo chi ñáyivi cuhví quívi nyitatu yo? —catyí ra.

⁴ Tyicuan ta tandihí ra cuan, taxi taxi cacuvi ra. Yucuan cuví nu tyiso ra Jesús ndaha ra síqui ra cuhví cuan. Ta sanduvaha ra chi ra. Ta natachi ra chi ra na cunuhu ra. ⁵ Tyicuan ta quichaha catyí ra Jesús chi ra fariseo:

—Tatu canacava noo burru sana ndo, o nonga quiñi sana ndo chichi noo xahva, ¿atu ma cutava ndo chi ti tañi tyehe ri, vasi quívi nyitatu yo cuví? —catyí ra.

⁶ Tyicuan ta inga chaha tucu taxi cuii ri nicunyicu ra fariseo. Vatyí ña ñihi ca ra tuhun nacahan ra.

Nu sañahā ra Jesús chi yo vatyí ma cahnu saha yo chi yo

⁷ Cha nyehe ra Jesús vatyí tandihí ra canyicú vico cuan nacachí ra tyayu vaha ca cunyaa ra. Tyicuan ta quichaha chaha ra tuhun ihya chi ra:

⁸ —Nya quiví cuhun ndo vico tandaha, ma nanducu ndo tyayu vaha ca cunyaa ndo. Vatyí coto quichi inga ra cha cahnu ca cuvi ican saha ndo, ⁹ ta coto quichi ra cha nacatyí tuhun ta catyí ra chuun: “Cuhva tyayu chiña. Vatyí cunyaa ra ihya.” Tyicuan ta yoho chihin cha cahán nuun, ta cuhvon. Yucuan ta cunyaun nu ndihí. ¹⁰ Soco catyí chi ndo, vatyí nya quiví nacatyí tuhun ra chi ndo, cunyaa ndo noo nu ñima ri tuhun. Vatyí quichi maa ra cha nacatyí tuhun chi ndo ta catyí ra chi ndo: “Ra tahin, ñaha, cunyaun nu tyayu vaha tyehe.” Ta tyicuan caa sacucahnu ra chuun nu ñáyiví nyicú yuhu mesa chuhun. ¹¹ Vatyí yóo ra cha cahnu sahá chii, cuquehen ra ticahan nuu. Ta yóo ra cha ndahvi sahá chii, cahnu cucuvi ra —catyí ra Jesús.

¹² Tyicuan ta quichaha catyí tucu ra chi ra nacatyí tuhun chi ra:

—Nya quiví coo vico vehun, ma nacatyí tuhun chi ra tahun, ni chi yañun, ni ri chi ñáyiví chuun, niri chi ñu nyicú yuehun ñu tyayí. Vatyí ñu cuan cuví nacatyí tuhun ñu chuun, na coo tucu vico vehe maa ñu. Tyicuan ta nacahnya ñu cuenda cha chahan ñu vico vehun. ¹³ Soco cua catyí chuun vatyí nya quiví coo vico vehun, nacatyí tuhun chi ñu ndahvi, chi ñu cuhví, chi ñu coxo, ta chi ñu cuaa. ¹⁴ Tyicuan ta sii cuví chuun, vatyí ñu cuan ma cuvi natyiyahvi ñu chuun. Soco cuñihun yahvun quiví cunandoton chihin ñáyiví vaha.

Nu chahā ra Jesús noo cuhva yoso caa nacatyí tuhun ra chi yo vatyí quihví yo nu nyacá ñaha Nyoo
(Mt. 22.1-10)

¹⁵ Ta chiñi noo ra cha nyaá yuhu mesa cuan tuhun cahán ra Jesús. Ta quichaha catyí ra chi ra:

—Sii xaan cuvi chi ñu cachi nu nyacá ñaha Nyoo —catyí ra.

¹⁶ Tyicuan ta catyí ra Jesús:

—Noo ra cuan savahā ra noo vico cahnu vavaha vehe ra. Ta nacatyí tuhun ra chi cuaha xaan ñáyiví.

¹⁷ Tyicuan ta chaā cuhva cha cuxiñi ñu, ta tachi ra chi musu ra nacana ra chi ñu. Vatyí cha chaā cuhva cha cuxiñi ñu. ¹⁸ Soco tandihí ñu cuan quichaha catyí ñu vatyí ma cuhun ñu. Ta noo ra cuan catyí ra: “Ni satē noo ñuhú. Ta cuñí chi cuhin cunyehe. Ican tuhun chiquén na saha ra tucahnu iñi chii vatyí ma cuhin.” ¹⁹ Tyicuan ta inga tucu ra cuan catyí ra: “Ni sata cuiri ohon tahan yunta quití. Ta cuhin cunyehe tatu vaha ti. Ican tuhun chiquén tumañi iñi chi ra na saha ra tucahnu iñi chii, vatyí ma cuvi cuhin.” ²⁰ Tyicuan ta inga tucu ra cuan catyí ra: “Ni ndihí tandahi, ta ma cuvi cuhin”, catyí ra. ²¹ Tyicuan ta musu ra cuan cuanuhu ra. Ta nacatyí ra tandihí tuhun cuan chi ra cha tachi chi ra. Cha chiñi ra savaha vico cuan cha tyicuan caa, ta cuxaan xaan ra. Ta catyí ra chi musu ra: “Cuahan tandihí maa ityi. Ta quichi nyacon chi ñu ndahvi, chi ñu cuhví, ta chi ñu coxó, ta chi ñu cuaa”, catyí ra. ²² Ta cha yahā nachaa musu cuan ta catyí ra chi ra cha tachi chi ra: “Cha sacuví tandihí maa cha catyún. Ta nuñá ca chichi vehe”, catyí ra. ²³ Tyicuan ta chitoho ra catyí ra chi ra: “Cuahan cua nducu ca chi ñu tandihí maa ityi. Ta saníñun chi ñu na quichi coyo ñu, vatyí na cutu chichi vehi. ²⁴ Vatyí catyí chuun vatyí ni minoo ñu cha nacatyí tuhun cha xihna ri, ma cachi ñu chihin” —catyí ra Jesús.

Cuaha xaan tundoho nyehe yo tatu cuenda ra Jesús yihí yo

(Mt. 10.37-38)

²⁵ Cuaha xaan ñáyiví nyicón chi ra Jesús. Tyicuan ta nanyehe ra chi ñu, ta quichaha catyí ra:

26 —Tandihí nyoho cha nyicón ndo chii, tatu cuñí ca ndo chi ñáyivi chi ndo ican saha chi yuhu, ñima cuende yihí ndo. Ta tatu cuñí ca ndo chi maa ndo ican saha chi yuhu, ñima cuende yihí ndo. 27 Vatyí nya nyoho cha ña cuñí ndo nyehe ndo tundocho cha cunyicon ndo chii, ña tahán chi cuví ndo ñu cuende, vatyí cha nyehe ndo tundocho yucuan cuví cruzi cha tahán chi cuiso ndo. 28 Vatyí tatu nya nyoho cuñí ndo savaha ndo noo vehe cahnu, xihna ca cunyaa ndo ta ndichi xiñi ndo tatu caña xuhun ndo cha cananyaa ndo vehe cuan. 29 Vatyí tatu quichaha sacacu ndo vehe cuan, ta quichaha ña cuví sandihí ndo vatyí ñahri ca xuhun ndo, cuacu nyaa ñáyivi chi ndo. 30 Ta cucatyí ñu: “Ra cuan quichaha savaha ra vehe ra, ta ni ña cuví sandihí ra”, cucatyí ñu. 31 O tatu noo rey cha cuñí cañi tahan chihin inga rey ¿atu ña chicunyaa xihna ra ta ndichi xiñi ra tatu ñihi uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan? 32 Tatu chitó ra vatyí ma cuvi chasaha ra chi inga rey cuan, tyicuan ta cañi ca vachi rey cuan, ta tachi ra chi noo musu ra vatyí cucatyí ra chi rey cuan na ndihí tuhun yucuan ri. 33 Ta tyicuan caa cuví chi nyoho. Tatu ma cahnya iñi ndo tandihí maa cha cuñi ndo ta cha cumi ndo, ma cuvi cunyicon ndo chii.

Nu sañahá ra Jesús vatyí tari ñi cha ndihí cha uhva, tyicuan caa cuvi yo tatu ndu uvi iñi yo cha chino iñi yo chi ra

(Mt. 5.13; Mr. 9.50)

34 Vaha ñi vatyí sacu uhva chi cha cachi yo. Soco tatu ndihí cha uhva chi, ña vaha ca chi. 35 Ñahri ca tyiño cuví saha chi. Ta sacuita yo vatyí ña vaha ca. Nya nyoho cha cutuñí iñi ndo, tyasoho ndo tuhun cahín —catyí ra Jesús.

15

Nu sañahá ra Jesús vatyí tari mbee

cha cuanaa tyicuan caa cuví yo (Mt. 18.10-14)

1 Tandihí ra tavá xuhun cuenda gobiernu ñuu Roma, ta ra iyó cuatyí, tuhva ra nu nyaá ra Jesús, tacuhva cuiñi ra tuhun cahán ra. 2 Tyicuan ta ra fariseo ta ra casacuaha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cuatyí. Ta chachí ra chihin ra —cacatyí ra.

3 Tyicuan ta ra Jesús cahán ra noo cuhva ihya, ta catyí ra:

4—Ta nya nyoho cha iyó noo cientu mbee sana ndo, tatu cuanaa noo ti, ¿atu ma sandoo ndo chi tandihí ca ti cuan nu chiqui. Ta cunanducu ndo chi quití cha cuanaa cuan, nyacua nya cha nañihi ndo chi ti? 5 Ta cuhva cha nañihi ndo chi ti, ta natyiso soco ndo chi ti. Ta sii vavaha cuví chi ndo. 6 Ta cuhva cha nachaa ndo vehe ndo, ta ndu ñin ri ndo chihin ra tahan ndo ta chihin ñu nyicú yatyin yuvehe ndo, yucuan ta catyí ndo chi ñu vatyí na cusii cuñi ñu chihin ndo vatyí nañihí ndo chi mbee sana ndo cha chinaa. 7 Ta ihya catyí chi ndo, vatyí sii xaan ca cuvi chi ángel Nyoo andivi cha catyí noo ra cha iyó cuatyí ta nasama cuhva iyó ra, ta ñima ca cha catyí ndi cumi xico chahan cumi tahan ñáyivi cha ñahri cuatyí.

Ñaha sihi cha cuanaa xuhun ta nañihí ña

8 Ta catyí chi ndo, tatu iyó noo ñaha cha iyó uchi tahan xuhun ña, ta tatu cuanaa noo xuhun ña, tyaa ña noo candil. Ta tihvi ña tandihí cuii maa chichi vehe ña. Ta nanducu ña tandihí cuii nyacua nya cha nañihi ña xuhun cuan. 9 Ta cuhva cha yaha nañihí ña, cuahan ña cua nanducu ña chi ñaha tahan ña, ta ñáyivi cha nyicú yuvehe ña, ta catyí ña chi ñu: “Cusii cuñi ndo chihin vatyí cha nañihí xuhin cha chinaa”, catyí ña. 10 Ta catyí chi ndo vatyí tyicuan caa sii cuví chi ángel Nyoo cha catyí noo ra iyó cuatyí ta ndu uvi iñi ra cuatyí ra —catyí ra Jesús.

Nu sañahá ra Jesús yoso caa cuñi Nyoo chi noo ra ndu uvi iñi cuatyí

¹¹ Tyicuan ta quichaha catyí tucu ra Jesús cuhva ihya:

—Noo ra, chiyo uvi tahan sehe ra.

¹² Ta noo chaha, ra luhlu ca cuan catyí ra chi sutu ra vatyí nacuhva ra cha tahán chi chi ra. Tyicuan ta sutu ra chahá ra chi ninduvi sehe ra. ¹³ Ta ña cuaha ri quivi cuan ta ra luhlu ca cuan xico ra tandihí cuii maa cha chahá sutu ra chi ra. Ta sandu ñn ri ra xuhun ra, ta quehen ra ityi ta cuahan ra noo ñuu cañi. Ta yucuan chiyo ra, sanaa ra tandihí maa xuhun ra chihin tusi iñi. Ta quiñi xaan chicá noo ra.

¹⁴ Tyicuan ta chaá noo tama ityi nu iyó ra. Ta quichaha chisoco ra vatyí ndihí xuhun ra sanaa ra. ¹⁵ Tyicuan ta chahan ra chicacán ra tyiño chi noo ra ñuu cuan. Ta ra cuan tachí ra chi ra noo nu iyó quini sana ra, vatyí cusaha cuenda ra chi ti. ¹⁶ Ta cuví noo chaha cuan chisoco xaan ra. Ta ñahri maa cha cachi ra iyó, nyacua quichi cuví iñi ra cachi ra cha cachachí quini cuan soco yori maa chaha cha cachi ra. ¹⁷ Tyicuan ta nichon iñi ra tuhun sutu ra. Ta ndichi xiñi ra: “¿Atu chiin cuaha ra casahá tyiño chihin suti? Soco ñahri maa cha cumañi chi ra. Ta yuhu cuñi cuví soco ihya. ¹⁸ Vityin cunuhin nu nyaá suti. Ta catyí chi ra tyi chicoo cuatyí nuu Nyoo ta nuu maa ra. ¹⁹ Ta ña naña que cha cuví sehe ra chii, ta na saha ra tuhun vatyí noo musu ri ra cuví chii.” Tyicuan caa ndichi xiñi ra.

²⁰ Tyicuan ta quehen ra ityi cuanuhu ra nya vehe sutu ra. Cañi ca vachi ra ta nanyehé sutu ra chi ra, ta cundahví cuñi ra nyehe ra chi ra. Ta chino ra chisatahan ra chi sehe ra. Ta nanumi ra chi ra. ²¹ Tyicuan ta quichaha catyí ra chi sutu ra: “Tata, chicoo cuatyí nuu Nyoo ta chicoo cuatyí nu maun. Ta yucuan chaha ña naña que cha cuví sehun chii”, catyí ra chi sutu ra. ²² Soco sutu ra tyihi ra tyiño, ta catyí ra chi musu ra: “Tava ndo sahna vaha ca ta sacuihno ndo chi ra. Ta tyihi ndo noo xehe nundaha ra. Ta nyaca ndo zapato

quihí chaha ra ñandihí. ²³ Ta siin ri cahñi ndo noo becerru cha xahan ca, vatyí cachi yo chi ti. Vatyí vityin cucoo yo noo vico. ²⁴ Vatyí ra sehi ihya cha chihí ra saha mai tuhun. Cuñi mai vatyí ma nyehe que chi ra, soco natuvi ra”, catyí sutu ra. Tyicuan ta quichaha chicoo ñu vico. Ta si xaan cacuñi ñu vatyí natuvi ra cuan.

²⁵ Tyicuan ta inga sehe ra, ra cha chahnu ca, ñohó ra nu chiqui. Ta cuhva cha cuanachaa ra nya vehe ra, ta quichaha chiñi ra yaa. Ta chiñi ra vatyí si xaan cachitá chaha ñu.

²⁶ Tyicuan ta cuhva cha cuyatyn ra nya vehe ra ta cana ra chi noo musu ra. Ta ndaca tuhun ra ñáá cha cuví cuan. ²⁷ Tyicuan ta musu ra quichaha catyí ra: “Yañun, ican nachaa. Ta yucuan chaha tachí sutun vatyí na cahñi ra chi noo becerru xahan ca. Vatyí vaha ri nachaa yañun, ta ñahri cha cuví chi ra”, catyí ra. ²⁸ Tyicuan ta cuxaan xaan cuñi ra. Ta ña cuñi ra ndihví ra chichi vehe. Soco sutu ra chahan ra chicahan ndahvi ra chihin ra, vatyí na ndihví ra chichi vehe. ²⁹ Tyicuan ta nacahan ra ta catyí ra chi sutu ra: “¿Atu chiin cuiya sahá tyiñe chuhun? Ta tyasohí tuhun cahún. Ta ni noo chaha ta ta nacahnu que nu cahún. Soco ni noo ndixihyu lee ta cuhva con chii vatyí coi vico chihin ra tahin. ³⁰ Soco vityin cha nachaa sehun ihya, ra cha sanaa xuhun chihin ñu cata iñi. Ta vityin chahun noo becerro quití xahan ca chi ra”, catyí ra chi sutu ra. ³¹ Tyicuan ta nacahan sutu ra ta catyí ra chi ra: “Sehi, yoho tyicuan ri nyaún chihin. Ta tandihí cha cumi, chuun cuví. ³² Soco vityin tahán chi sacuvi yo vico ihya. Ta cusí cuñi yo. Vatyí nachaa yañun, ra cha saha mai tuhun vatyí chihí. Tari quivi nandoto ra cuví ihya. Ta chinaa ra, ta nañihí tucu yo chi ra inga chaha”, catyí ra chi sehe ra —catyí ra Jesús.

16

Nu sañahá ra Jesús chi yo yoso caa saha yo tumañi iñi chihin cha iyó chiyo

¹ Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayii vavaha ra. Ta iyó noo ra yindaha tandihi tyiño sahá ra. Ta chahan coyo musu ra canacatyí ra chi ra tyayii cuan, vatyí ra yihí ndaha tyiño cuan, sanaa ra tandihi cha iyó chi ra. ² Tyicuan ta cana ra tyayii cuan chi ra yindaha tyiño cuan, ta catyí ra chi ra: “Cha cuaha xaan cuatyí chahún quichi nu nyaí. Nacuhva cuendon tandihi tyiño cha sacuvun chii. Vatyí ma saha tyiño con chihin”, catyí ra chi ra. ³ Tyicuan ta ra yindaha tyiño cuan ndichi xiñi ra: “¿Yoso caa cunyacuvi vityin? Chitohi ña cuñi ca ra cha sahá tyiñe chihin ra. Ta ñahri fuerza iyó chii cha saha tyiñe nu ñuhú. Ta cahán nui caye chichi ñuu. ⁴ Soco cha chité yoso caa cunyacuvi vityin, ta vaha coo ñáyivi chihin quivi cha ma coo ca tyiño sahi, ta vaha chai vehe ñu”, ndichi xiñi ra. ⁵ Tyicuan ta cana ra chi noo noo ra yosoyicá chi chitoho ra. Ta quichaha catyí ra chi noo ra cuan: “¿Yoso yosoyicón chi chitohi?” catyí ra. ⁶ Tyicuan ta nacahan ra cuan ta catyí ra: “Yuhu yosoyiqué noo cumi mil litru aceitye.” Tyicuan ta ra yindaha tyiño cuan catyí ra chi ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuvi ra. Ta cuahan ra. ⁷ Tyicuan ta cha inga ra. Ta quichaha ndaca tuhun tucu ra chi ra cuan ta catyí ra: “¿Yoso yosoyicá yoho chi chitohi?” Ta nacahan ra cuan ta catyí ra: “Yosoyiqué noo mil arroba trigu”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyaun uña cientu ri arroba. Ta sacuita tutu chahnu chiña”, catyí ra. ⁸ Tyicuan ta chitó chitoho ra cha ña vaha cha chinyacuvi ra. Ta iyo xaan cuñi ra vatyí yatyí xaan saha ra cuan chi ra —catyí ra Jesús.

Ta quichaha catyí tucu ra chi ra cachicá noo chihin ra:

—Ñáyivi ña vaha aña vatyí xaan ca sahá ñu chi ñu ican saha ñáyivi

vaha aña.

⁹ Ta catyí chi ndo, vatyí cotyiño ndo cha tyayii cha iyó siqui ñuhu ñáyivi ihya, ta saha ganaa ndo amigo. Ta quivi cha ndihi cha tyayii cuan, cuñi ndo nu cunyicu ndo nya nu nyaá Nyoo tyicuan ri maa.

¹⁰ Tatu chitó ndo cotyiño ndo chiin cha iyó chi ndo cha cuenda cha vaha, tyicuan caa coto tucu ndo cotyiño ndo tatu cuaha iyó chi ndo. Soco tatu ña chitó ndo cotyiño ndo chiin cha iyó chi ndo, tyicuan caa ma coto tucu ndo cotyiño ndo tatu cuaha coo chi ndo. ¹¹ Ta catyí chi ndo, tatu ña sahá ndo tumañi iñi chihin cha iyó chi ndo siqui ñuhu ñáyivi ihya, Nyoo ma cuhva ra noo cha tyayii cha ndicha chi ndo. ¹² Tandihí cha iyó chi ndo maa Nyoo chaha noo chi ndo. Soco tatu ña sahá ndo tumañi iñi chihin cuan, ma cuhva ra cha tahán chi chi ndo.

¹³ Noo musu ma cuvi coo uvi tahan chitoho ra. Vatyí musu cuan cuñi ca ra chi noo ra, ta ñima ca chi inga ra. O chi noo ra, vaha quichahá ra tuhun cahán ra, ta chi inga ra, ma quichaha ra cha cahán ra. Ma cuvi cuñi ndo chi Nyoo ta suri cuhva cuan cuñi tucu ndo cha tyayii —catyí ra Jesús.

¹⁴ Tyicuan ta cha chiñi ra fariseo tandihi tuhun cahán ra Jesús. Tyicuan ta quichaha chacu cuehe ra nyehe ra chi ra. Vatyí maa ra fariseo cuan cuñi xaan ra chi xuhun. ¹⁵ Tyicuan ta quichaha catyí ra Jesús chi ra:

—Vaha xaan sahá ndo chi ndo nuu ñáyivi. Soco chitó Nyoo vatyí aña ndo ña vaha. Ta tandihi cha catyí ñáyivi vatyí cahnu xaan ihya siqui ñuhu ñáyivi, Nyoo ña cuñi nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo aña yo chi yo

¹⁶ Ley cha tachí Nyoo chi ra Moisés vatyí tyaa ra, ta tuhun cha tyaa ra profeta Nyoo ta cha naha, ican chi cuvi cha saquehen ityi chi ñáyivi nyacua nya quivi cha ra Juan. Ta maa ra Juan quichaha cahan ra tuhun vaha vatyí cha cuñi quichi Nyoo vatyí

cunyaca ñaha ra. Ta tandihí ñáyiví cha nducú cuhva yoso caa cunyaca ñaha Nyoo añima ñu, ican ñu quihví ndaha ra.

¹⁷ 'Soco catyí chi ndo, vasi cunaa andiví ta ñuhu ñayiví, soco cha cuví ley Nyoo cha tyaa ra Moisés, ma naa nyacua nya cha yaha cuvi tandihí.

Sañahá ra Jesús vatyi ña vaha cha sandoo rayí chi ñasihí ra

(Mt. 19.1-12; Mr. 10.1-12)

¹⁸ 'Tatu noo rayí iyó ñasihí ra, ta sanandoo ra chi ña, ta tandaha ra chihin inga ña, iyó cuatyí ra nuu Nyoo. Ta tatu tandaha noo rayí chihin noo ñaha cha sandoo yí chii, coo tucu cuatyí ra nuu Nyoo.

Nu sañahá ra Jesús tuhun noo ra tyayí chihin ra Lázaro

¹⁹ 'Chiyó noo ra tyayí. Ta vaha ñihnó ra. Ta tandihí quiví iyó ra vico ta chachí vaha ra. ²⁰ Ta chiyó tucu noo ra ndahví cha nañí Lázaro. Ta cuaha xaan ndihyí iñi ra. Ta nyaá ra yuvehe ra tyayí cuan. ²¹ Ta ra ndahví cuan, cuñí ra cachi ra, vasi cha canacoyo nu mesa ra tyayí cuan. Ta nyacua nya ina ta chaá ti nu nyaá ra, ta yuyaá ti nu cahví chi ra. ²² Ta noo quiví cuan chihí ra ndahví cuan. Ta ángel Nyoo quehen ra chi ra ta cua nyaca ra chi ra nya nu nyaá ra Abraham gloria. Tyicuan ta chihí tucu ra tyayí cuan. Ta chicuchí ñu chí ra. ²³ Tyicuan ta ra tyayí cuan nyehé xaan ra tundoho nu ñohó ra anyaya. Ta nanyehe ra nu cañi. Ta nanyehe ra chi ra Abraham chihin ra Lázaro, nyaá ra chihin ra yucuan. ²⁴ Tyicuan ta canachaá ra ta catyí ra: "Tata Abraham, cundahví cuñi chii. Tachi chi ra Lázaro na satyí ra chiin nundaha ra. Ta na satoo ra ñin titi ndutya nu yai. Vatyi nyehé xain tundoho nu cayú ñuhu ihya", catyí ra. ²⁵ Soco ra Abraham catyí ra chi ra: "Ñicohon iñun vatyi vaha chiyon ñuhu ñayiví. Ta ra Lázaro, ña vaha chiyó ra. Vityin vaha iyó ra ihya, ta yoho nyehún tundoho. ²⁶ Ta siin ri, mahñu ihya cono xaan. Ta ma cuvi yaha ra iyó tyehe cuhun

ra chiña. Ta ma cuvi yaha ra iyó chiña, quichi ra tyehe", catyí ra Abraham chi ra. ²⁷ Tyicuan ta quichaha catyí ra tyayí cuan: "Tata Abraham, sahun tumañi iñi chii. Ta tachun chí ra Lázaro nya vehe suti. ²⁸ Vatyi iyó ohon tahan yañi. Ta cuñi vatyi nacatyí ra chi ra yoso caa iyé ihya nu nyehí tundoho, coto quichí coyo tucu ra cuan ihya", catyí ra. ²⁹ Tyicuan ta quichaha catyí ra Abraham: "Iyó ley cha tyaa ra Moisés. Ta iyó tuhun cha tyaa ra profeta Nyoo ta cha naha. Na quichaha ra tu cuñi ra", catyí ra Abraham. ³⁰ Tyicuan ta quichaha catyí ra tyayí cuan: "Tata Abraham. Ma quichaha ra. Soco tatu yóo cha nandoto, ta cuhun cucahan chihin ra, yucuan ta tyasoho ra ta nasama ra cuhva iyó ra", catyí ra cuan. ³¹ Soco ra Abraham catyí ra: "Tatu ña cuñi ra quichaha ra tuhun tyaa ra Moisés ta tuhun cha tyaa ra profeta Nyoo ta cha naha, ma chino iñi ra tuhun cahan noo ndiyí tatu nandoto ra ta cahan ra chihin ra."

17

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha

(Mt. 18.6-7, 21-22; Mr. 9.42)

¹ Tyehe caa catyí ra Jesús chi ra cachicá noo chihin ra:

—Tyicuan ri iyó cha quiñi caa cha sativí chi ñáyiví. Soco ndahví ra ndahví ra sativí chi ñáyiví. ² Vaha taxin ca cuhñi ra noo yuu sucun ra. Ta cutuchi ra chi ra nu tyañuhu. Coto sativí ra chi ñu ni nasama cuhva iyó ihya.

³ 'Saha ndo cuenda chi ndo. Tatu noo ra tahan ndo ta sacuvi ra noo cha ña vaha chihin ndo. Catyi ndo chi ra vatyi ña vaha cha sacuvi ra. Tatu nasama ra cuhva iyó ra, saha ndo tucahnu iñi chi ra. ⁴ Ta ni ri maa sacuvi ra cha ña vaha chihin ndo ucha tahan chaha cha noo quiví. Tatu ndi ucha tahan chaha ta catyi ra chi ndo vatyi ndu uvi iñi ra cha sacuví ra

chi ndo, ndi ucha tahan chaha saha ndo tucahnu iñi chi ra.

Nu sañahá ra Jesús chi yo vatyí tatu chinó iñi yo chi ra, cuví sacuvi yo cuaha cha vaha

⁵ Tyicuan ta quichaha catyí ra cachicá tyiño nuu ra Jesús chi ra:

—Cuhva cha chinó ca iñi ndi chuun —catyí ra.

⁶ Tyicuan ta catyí ra Jesús chi ra:

—Tatu chinó iñi ndo chi yuhu vasi chiin ri tari cuhva noo chiti mostaza luhlu, cuví catyí ndo chi yutun sicómoro cha nanyaá ihya nacoyo tun, ta cucuinanyaa tun nu tyañuhu. Ta cucuvi nu cahan ndo —catyí ra Jesús.

Yoso caa tahán chi quichaha yo chi Nyoo

⁷ Ta catyí ra Jesús:

—Tatu noo nyoho ta iyó noo musu ndo. Ta nachaa ra cha chahan ra nu chiqui chi sahatyiño ra, o chi saha cumi ra quití sana ndo, ¿atu catyí ndo chi ra: “Cunyaa ta cachun”? Ña catyí ndo chi ra tyicuan caa. ⁸ Soco tyehe caa catyí ndo chi ra: “Sanduvaha cha cuxiñi. Ta tyihun cha cachi. Cha yaha cha cachi tyicuan ta cachi tucu maun”, catyí ndo chi ra. ⁹ Ni ña tuhvá ndo nacuhva ndo tyahvi nyoo chi ra vatyí sacuvi ra ñáá noo tyiño tava ndo chi ra. ¹⁰ Tyicuan caa tucu nyoho chihin Nyoo. Quivi ndihi sacuvi ndo cha catyí Nyoo chi ndo, tahán chi catyí ndo: “Nyuhu chiin ri cha tachun chi ndi, yucuan ri sacuvi ndi. Ta ña yaha ca.”

Nu sanduvaha ra Jesús chi uchi tahan ra tyahyu coño

¹¹ Ityi cuahan ra Jesús ityi ñuu Jerusalén yaha ra nu cuví xahñi Samaria chihin Galilea. ¹² Nu chaa ra noo ñuu, quita coyo uchi tahan ra cuhvi chihin cha tyahyu coño ra. Ta chicuitayucu ra nyasava ri. ¹³ Ta quichaha cacanchaa ra chi ra Jesús, ta catyí ra:

—Yoho, Maestro Jesús, cundahvi cuñi chi ndi —catyí ra.

¹⁴ Tyicuan ta nanyehe ra Jesús chi ra ta catyí ra chi ra:

—Cuahan ndo. Ta cua sañaha ndo chi ndo chi tata sutu vatyí cha nduvaha ndo.

Tyicuan ta cuahan coyo ra cuan. Ta ityi cuahan coyo ra ta cananyehe ra vatyí nduvaha ra. ¹⁵ Tyicuan ta cuhva cha nanyehe noo ra cuan vatyí nduvaha ra, cuanuhu chata ra nu nyaá ra Jesús. Ta cana chaa ra, ta sacahnu ra chi Nyoo. ¹⁶ Ta chicuñi chiti ra. Ta nacañi noo ra xiñi ra nya nu ñuhu nuu ra Jesús. Ta nacuhva ra tyahvi nyoo chi ra. Ta ra cuan, ra Samaria cuví ra.

¹⁷ Tyicuan ta catyí ra Jesús chi ra:

—¿Atu ñima uchi tahan ndo nduvaha? ¿Nya nyaá inga ñn tahan ca ra?

¹⁸ ¿Ñáá tuhun cha noo tuhun ri maa ra inga ñuu nandichi chata ra ta sacahnu ra chi Nyoo? —catyí ra Jesús.

¹⁹ Tyicuan ta quichaha catyí ra chi ra cuan:

—Nducuita ta cuahan. Nduvahun vatyí chinó iñun —catyí ra Jesús chi ra.

Yoso caa cuquichi Nyoo cunyaca ñaha ra nu iyó yo ihya

(Mt. 24.23-28, 36-41)

²⁰ Candaca tuhun ra fariseo chi ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya siqui ñuhu ñayivi, ñima cha nyehé yo cuví. ²¹ Ma cuví catyí ñáyivi: “Ma ra nyaá ihya, o ma ra nyaá ityi cuan.” Vatyí Nyoo cha chaa ra mahñu ndo, ta nyacá ñaha ra añima ñáyivi cuenda ra —catyí ra chi ra.

²² Yaha cuan ta catyí ra chi ra cachicá noo chihin ra:

—Cuchaa chi quivi vatyí cucuñi ndo nyehe ndo chi yuhu Rayi cha quichi nya gloria. Soco ma nyehe ndo chii. ²³ Cuchaa tucu chi quivi ta cucatyí ñáyivi chi ndo: “Ihya nyaá ra”, o “Yucuan nyaá ra.” Soco ma cuhun ndo cunyehe ndo. Ta ma cunyicon ndo chi ra cuan vatyí ñime cuví. ²⁴ Vatyí tandihi ñáyivi cunyehe

chi yuhu Rayi cha quichi nya gloria quivi quichi inga chaha. Tari nyehé tandihi ñáyivi nu quihvi tacha nichahnu andivi, tyicuan caa cucuvi. ²⁵ Soco cunyehe xihne tundoho. Vatyí ñáyivi cha iyó cha vityin cua cutasi cuñi nyehe ñu chii. ²⁶ Tari cuví quivi ra Noé, tyicuan caa cucuvi quivi quichi yuhu Rayi cha quichi nya gloria inga chaha. ²⁷ Quivi ra Noé, chachí ñu. Chihí ñu. Tandahá ñu. Ta chahá ñu sehe ñu tandaha. Nya quivi quihvi ra Noé chichi barcu ra, ta coon savi xaan. Ta tandihi ñu cachihí ñu. ²⁸ Tyicuan caa tucu cuví quivi ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu. ²⁹ Soco quivi cha quita ra Lot ñuu Sodoma cuan, coon ñuhu chihin azufre andivi. Ta chihí tandihi ñáyivi Sodoma. ³⁰ Ta tyicuan caa cucuvi quivi cha quichi tucu yuhu Rayi cha quichi nya gloria inga chaha.

³¹ 'Ta quivi cuan tatu nyicú ndo nuquehe ndo, ma ndihvi ndo chichi vehe ndo vatyí tava ndo ndaha tyiño ndo. O tatu chicá noo ndo nu chiqui, ma cunuhu ndo nya vehe ndo. ³² Nícohon iñi ndo ñasihí ra Lot, ñáa cha cuví chi ña. ³³ Tandihí ndo cha cuñi ca ndo cha iyó siqui ñuhu ñayivi ihya, cucunaa ndo. Ta tandihí ndo cha ña quichaha ndo cha iyó ñáyivi ihya, cucacu ndo.

³⁴ 'Ta catyí chi ndo vatyí cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra. ³⁵ Ta uvi tahan ñusihí ñn ri cu nyicó ñu quivi cuan. Noo ri ña, cunaquehin. Ta nonga ña cundoo ña. ³⁶ Ta catyí chi ndo vatyí uvi tahan ra cohon nu chiqui. Noo ra cunaquehin, ta nonga ra cundoo ra —catyí ra Jesús.

³⁷ Cuhva cha chihí ñu tuhun ihya, quichaha ndaca tuhun ñu chi ra Jesús.

—¿Nya maa maa cucuvi ihya Tata? —catyí ñu.

Tyicuan ta nacahan ra Jesús ta catyí ra:

—Nu catuví coño ñuhu chihi, yucuan cundu ñn ri chii.

18

Nu sañahá ra Jesús vatyí tari chicán noo ñaha chihí yí chi juez, tyicuan caa tahán chi cacan yo chi Nyoo

¹ Tyicuan ta chaha ra Jesús noo cuhva ihya. Vatyí na cacan tahvi ñu tyicuan ri maa, ta ma cundihñi ñu. ² Ta catyí ra:

—Iyó noo ñuu cha nyaá noo juez. Ta juez cuan ña sahá maa ra ñáyivi chi Nyoo. Ta ni ri ña quichaha maa ra chi ñáyivi. ³ Ta suri ñuu cuan iyó tucu noo ñaha ndahvi cha chihí yí. Ta chahan ña chicahan ña chihin ra, vatyí chicá ña cuatyí chaha noo ra xaan iñi chi ña. ⁴ Ta juez cuan ña quichaha maa ra chi ña. Ña sandaa maa ra tyiño chicá ña. Ta cha naha xaan chicán ña. Tyicuan ta quichaha ndichí xiñi juez cuan: “Vasí ña yuhví chi Nyoo, ta ñahri cuende chi ñáyivi, ⁵ soco ñaha ihya sayangá xaan ña chii. Ta yucuan chaha cua sacaqui chi ña. Vatyí coto quichi ca ña, ta sanaquiqui ña tisihí”, ndichí xiñi ra.

⁶ Tyicuan ta catyí ra Jesús:

—Tyicuan caa catyí juez ña vaha cuan. Tu juez cuan cha quiñi iyó ra ta tyinyee ra chi ñaha ndahvi cuan, ⁷ ta nyaca cuví Nyoo, ¿atu ma tyinyee ra chi ñáyivi cha chicán ndiyaca ta ndiquivi chi ra? ¿Atu cuatu xaan ra cha tyinyee ra chi ñu? ⁸ Catyí chi ndo, vatyí numi ri cutyinyee ra chi ñu. Soco quivi quichi yuhu, Rayi cha quichi nya gloria, inga chaha, chitó Nyoo tatu nañihi que chi ñu cha ndicha chinó iñi chii —catyí ra Jesús.

Noo cuhva cuenda ra tavá xuhun cuenda gobiernu ñuu Roma ta cuenda ra fariseo

⁹ Tyicuan ta chaha ra Jesús nonga cuhva cuenda ra savahá chii, ta ña cuñi nyehe ra chi inga ra. Ta quichaha catyí ra:

¹⁰ —Iyó uvi tahan ra chahan chichi vehe ñuhu chicacan tahvi ra chi Nyoo. Noo ra cuan ra fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra. ¹¹ Ta ra fariseo cuan chicuinanyaa ra, ta

quichaha cahan ra chihin Nyoo. Ta cahnu saha ra chi ra. Ta catyí ra: “Sutu Mañi yuhu, nacuhve tyahvi nyoo chuun vatyí yuhu ñima tari inga ñáyiví cuví. Vatyí suhu ñu. Quiñi iyó ñu. Iyó ñasihí ra ta iyó inga ñusihí chi ra. Ta ni ri ñima tari ra tavá xuhun cuan cuví. ¹² Vaha ca quichahí tuhun maun ta ñima ca inga ñáyiví. Vatyí uvi chaha cha noo vitya ña chachí. Ta chahí uchi síqui noo noo cientu cha sahá ganai chuun”, catyí ra. ¹³ Soco ra tavá xuhun cuenda gobiernu Roma cuan cha cañi ri chiin nanyaá ra. Ta ña caña iñi ra nanyehe ndaa ra. Ta cañi ra ndaha ra añima ra vatyí ndu uvi iñi ra cuatyí ra. Ta catyí ra: “Sutu Mañi yuhu. Nyehé ndahvi chii vatyí iyó xaan cuatyí”, catyí ra —catyí ra Jesús.

¹⁴ Ta catyí tucu ra Jesús tyehe caa:

—Catyí chi ndo vatyí Nyoo sahá ra tucahnu iñi chi ra tavá xuhun cuan. Sanaa Nyoo cuatyí ra ta cuanuhu ra nya vehe ra. Soco ra fariseo cuan, ñahri tucahnu iñi ñihi ra, vatyí yóo ñáyiví cha savahá xaan chi nuu Nyoo, cusanocuee Nyoo chi ñu, ta ñu sanocuee chi, Nyoo cusanducahnu ra chi ñu —catyí ra Jesús.

*Nu nasocó ra Jesús chi ra cuatyaa
(Mt. 19.13-15; Mr. 10.13-16)*

¹⁵ Tyicuan ta quichi nyaca ñáyiví chi ra cuatyaa chi ra Jesús vatyí na tyiso ra ndaha ra xiñi ndotyín. Soco cuhva cha nanyehe ra cachicá noo chihin ra vatyí tyicuan caa, ña chaha ca ra. ¹⁶ Tyicuan ta cana ra Jesús chi ra cachicá noo chihin ra, ta catyí ra chi ra:

—Saña ndo chi ra cuatyaa na quichi maa ndotyín nu nyai. Ta ma casi ndo, vatyí ñu nyacá ñaha Nyoo añima, cuví ñu tari ra cuatyaa ihya. ¹⁷ Ta catyí chi ndo vatyí tatu ña ita iñi ndo chi Nyoo, tari noo ra cuatyaa ita iñi ndotyín chi sutu ndotyín, ma cuvi quihvi ndo nu nyacá ñaha Nyoo.

*Nu chahá ra Jesús tuhun vatyí yíi
xaan nacuhva cuenda noo ra tyayíi chi
ra chi Nyoo*

(Mt. 19.16-30; Mr. 10.17-31)

¹⁸ Tyicuan ta noo ra cha cuví nuu cuenda vehe ñuhu ndacá tuhun ra chi ra Jesús, ta catyí ra:

—Maestro, ra vaha cuvún. ¿Yoso caa cunyacuvi ta ñihi ñáyiví cha ma naa ca maa coi? —catyí ra.

¹⁹ Tyicuan ta catyí ra Jesús chi ra:

—¿Ñáa tuhun catyún vatyí ra vaha cuví? Noo ri maa Nyoo cuví ra ra vaha. (Ta cha catyún tyi vahi, nacotón tyi Nyoo cuví.) ²⁰ Yoho chitón tandihí tuhun cha tachí Nyoo tyi sacuvi yo: “Cha ma coo inga ñusihí chuun. Ma cahñun chi ñáyiví. Ma suhun. Ma cahun cuendu síqui ñáyiví. Ta sahun ñáyiví chi sutun ta chi síhun” —catyí ra Jesús.

²¹ Tyicuan ta ra cuan catyí ra:

—Tandihí ihya ta quichahí nyata luhli ta nyacua nya vityín —catyí ra.

²² Nu chiñi ra Jesús cha catyí ra cuan, tyicuan ta catyí ra chi ra:

—Soco cumañi sacuvun nonga cha sacuvun. Xico tandihí cha iyó chuun. Ta cuhva chi ñu ndahvi. Ta quichun chaté. Tyicuan ta coo cha tyayíi chuun nya gloria —catyí ra.

²³ Soco ra cuan nu chiñi ra tuhun cuan, nducuihya xaan iñi ra, vatyí tyayíi xaan ra. ²⁴ Cha nanyehe ra Jesús vatyí nducuihya iñi ra, ta quichaha catyí ra:

—Yíi xaan ta cuvi nacuhva cuenda ñu tyayíi chi ñu na cunyaca ñaha Nyoo añima ñu. ²⁵ Tañi tyehe yaha noo camello xiu noo yiqui ticu, ta ñima ca cha quihvi noo ñu tyayíi nu nyacá ñaha Nyoo —catyí ra.

²⁶ Ta ñu cha cachiñi tuhun ihya catyí ñu:

—Tatu tyicuan caa, ¿yóo cha cuví cacu vii? —catyí ñu.

²⁷ Tyicuan ta ra Jesús catyí ra:

—Tandihí cha ña cuví sacuvi rayíi, Nyoo cuví sacuvi ra —catyí ra.

²⁸ Tyicuan ta ra Pedro catyí ra:

—Sutu Mañi yuhu, nyuhu tandihi maa cha iyó chi ndi sandoo ndi, ta nyicón ndi chuun —catyí ra.

²⁹ Tyicuan ta catyí ra Jesús chi ra:

—Cha ndicha catyí chi ndo. Vatyí tandihi ndo cha sandoo ndo vehe ndo, o ñasihi ndo, o yañi ndo, o sutu ndo, o sehe ndo cha catyí cha chaha ndo cha cunyaca ñaha Nyoo añima ndo, ³⁰ cuaha xaan cha vaha cunañihi ndo ihya ñayivi ta cunañihi ndo inga ñayivi cha ma naa ca maa —catyí ra Jesús.

Inga chaha sacotó ra Jesús yoso caa cucahñi ñáyivi chi ra

(Mt. 20.17-19; Mr. 10.32-34)

³¹ Ta cana siin ra Jesús chi ndi uchi uvi ra cachicá noo chihin ra, ta catyí ra chi ra:

—Vityin cuhun yo nya Jerusalén. Vatyí yucuan cuchino cava tandihi tuhun cha tyaa ra profeta Nyoo ta cha naha. Vatyí yuhu Rayi cha quichi nya gloria cuví. ³² Vatyí cucuhva cuenda ra chii chi ra inga ñuu, ra cha ñima ra ñuu Israel cuví. Ta cucuacu nyaa ra chii. Ta cucahan ra chii. Ta cutyicusii ra nui. ³³ Ta cucañi ra chii, ta cucahñi ra chii, soco nu cu uñi quivi ta cunan-dote —catyí ra Jesús.

³⁴ Ta ra cachicá noo chihin ra ña cutuñi iñi ra tuhun cuan ni ña cachitó ra ñáa tuhun cahán ra Jesús chihin ra. Vatyí ña chaha Nyoo vatyí cacutuñi iñi ra.

Nu sananyehé ra Jesús chi noo ra caa ñuu Jericó

(Mt. 20.29-34; Mr. 10.46-52)

³⁵ Cuhva cha cua chaa ra Jesús ñuu Jericó. Ta yuhu ityi cuan nyaá noo ra cuaa. Ta chicán ra limuxtan. ³⁶ Tyicuan ta chiñi ra vatyí cuaha xaan ñáyivi cua yaha. Ta ndaca tuhun ra ñáa cha cuví cuan. ³⁷ Ta ñáyivi nacatyí ñu chi ra vatyí ra Jesús, ra ñuu Nazaret, ican cua yaha cuan.

³⁸ Tyicuan ta quichaha cana chaa ra: —¡Yoho Jesús, ra vachi tata rey David! ¡Cundahvi cuñi nyehun chii! —catyí ra.

³⁹ Ta ra cha cuahan coyo ityi nuu cuan, quichaha cacatyí ra chi ra,

nacasi ra yuhu ra. Soco chaa ca caná chaa ra, ta catyí ra:

—¡Yoho, ra vachi tata ra David! ¡Cundahvi cuñi nyehun chii! —catyí ra.

⁴⁰ Tyicuan ta chicuiñi ra Jesús yucuan. Ta tachi ra tyiño na cuquehen chi ra cuaa cuan. Ta cuhva cha chaa ra cuaa cuan nu nanyaá ra Jesús, ta ra Jesús quichaha ndaca tuhun ra chi ra, ta catyí ra:

⁴¹ —¿Ñáa cha cuñún vatyí sacuvi chuun?

Tyicuan ta ra cuaa cuan nacahan ra, ta catyí ra:

—Sutu Mañi yuhu, cuñi nanyehi —catyí ra.

⁴² Tyicuan ta catyí ra Jesús chi ra:

—Nanyehe. Cha nduvaha chiti nuun, vatyí chinó iñun chii —catyí ra.

⁴³ Ta caa cuhva ri cuan, ra cuaa cuan nanyehe ra. Ta cuahan ra chata ra Jesús. Ta sacahnú ra chi Nyoo. Ta tandihi ñáyivi cha nyehe ñu tyicuan caa, sacahnú ñu chi Nyoo.

19

Nu cuahan ra Jesús vehe ra Zaqueo

¹ Yucuan ta quihvi ra Jesús ñuu Jericó cuan. Ta cua yaha ra chichi ñuu cuan. ² Ta yucuan iyó noo ra tyayii vavaha. Nañi ra Zaqueo. Ta ra cuví nuu cuenda ra catava xuhun cuenda gobiernu ñuu Roma cuví ra. ³ Ta cuñi xaan ra cohon nuu ra chi ra Jesús. Ta ña cuví nyehe ra chi ra vatyí cuaha xaan ñáyivi. Ta maa ra tyaha xaan ra. ⁴ Yucuan ta chino vavaha ra cuahan ra ityi nuu, ta ndaa ra nu noo yutun cha nañi sicómoro cha nanyaá yuhu ityi nu cua yaha ra Jesús, tacuhva cuví nyehe ra chi ra. ⁵ Ta cuhva cha yaha ra Jesús nanyehé ndaa ra ityi siqui ta nanyehe ra chi ra Zaqueo. Ta quichaha catyí ra chi ra:

—Zaqueo, sanumi ta noun nu yutun chiña. Vatyí vityin cuhin vehun —catyí ra chi ra.

⁶ Tyicuan ta numi ri noo ra Zaqueo nuu yutun cuan. Ta sii vavaha cuví chi ra. Ta quehen cuenda ra chi ra Jesús. Ta cuahan ra chihin ra nya

vehe ra. ⁷ Ta cha nyehe ñáyiví cha tyicuan caa, ta tandíhi ñu quichaha cahán nyaa ñu chi ra Jesús. Ta catyí ñu vatyí ndoo ra vehe noo ra iyó cuatyí. ⁸ Nu canyicú ra chichi vehe cuan, ra Zaqueo ñicuinyaa ra. Ta quichaha catyí ra chi ra Jesús:

—Sutu Mañi yuhu, yuhu cua cuhve sava cha iyó chii chí ñu ndahvi. O tatu suhi chí ñáyiví chihin cha sandavi ñahi chí ñu, vityin cunacuhva cuende nya cumi ca tahan chaha chí ñu —catyí ra chí ra.

⁹ Tyicuan ta catyí ra Jesús:

—Vityin cacu añimon, ta ñáyiví chí ra Abraham cuvún. Vatyí nacuhva cuendon chuun chí Nyoo tari nacuhva cuenda ra Abraham chí ra chí Nyoo. ¹⁰ Vatyí yuhu Rayíi cha quichí nya gloria vachi nanduqui ta vachi sacaqui chí ñáyiví cha cua naa —catyí ra Jesús.

Nu sañahá ra Jesús na saha tyiño yo chihin cha chahá Nyoo chí yo (Mt. 25.14-30)

¹¹ Ta cha ñi ri ca cha chiñí ñáyiví tuhun cahán ra Jesús, quichaha cahán tucu ra inga cuhva ihya. Vatyí cha cuyatyin chaa ra Jerusalén. Ta ñáyiví cuñí maa ñu vatyí cha cua quichaha ra cunyaca ñaha ra yucuan.

¹² Tyicuan ta catyí ra:

—Chiyo noo ra vaha ta cuñí cahun ra noo ñuu cañi. Vatyí yucuan cunanduvi ra rey tacuhva vatyí ndichí ra ñuu ra, soco cha cuví ra rey. ¹³ Ta cuhva cha cumañi cahun ra, cana ra chí uchi tahan musu ra. Ta chaha cuenda ra noo xuhun chí noo noo ra. Ta catyí ra chí ra: “Saha tyiño ndo chihin xuhun chiña nyacua nya ndichí mai”, catyí ra. ¹⁴ Soco suhva ñáyiví ñuu ra, tasi cuñí ñu nyehe ñu chí ra ta ña cuñí ñu cha cuví ra rey chí ñu. Ta tachí ñu chí suhva ra cahun chata ra, vatyí catyí ra vatyí ña cuñí ñu cha cuví ra rey chí ñu. ¹⁵ Soco ra cuan nduví ra rey. Tyicuan ta nachaa ra nya ñuu ra. Ta quiví cha nachaa ra, cana ra chí musu ra, ra cha sandoo ra xuhun chii. Vatyí coto ra yoso saha ganaa xuhun ra cha ñi ri

ca cha chahan ra. ¹⁶ Ta chaa noo ra cuan. Ta catyí ra: “Tata, saha ganai uchi ca tahan chaha siqui xuhun cha sandoun chii”, catyí ra. ¹⁷ Tyicuan ta quichaha catyí rey cuan chí ra: “Vaha xaan. Yoho vaha musu cuvún. Vatyí vaha saha tyiño chihin chihin xuhun cha chahí chuun. Ta vityin cunyaca ñahun uchi tahan ñuu”, catyí rey cuan chí ra. ¹⁸ Tyicuan ta chaa tucu inga ra cha chaha ra xuhun chii. Ta quichaha catyí ra: “Ma xuhun ihya. Saha ganai ohon tahan ca chaha siqui xuhun cha sandoun chii”, catyí ra. ¹⁹ Tyicuan ta catyí rey chí ra: “Yoho cunyaca ñahun ohon tahan ñuu”, catyí ra. ²⁰ Tyicuan ta chaa tucu inga ra cuan. Ta quichaha catyí ra: “Ma xuhun ihya cha chahun chii. Yuhu chicumí vahi chichi noo pañitu. ²¹ Vatyí yuhví xain chuun, vatyí yoho cuvún noo ra xaan. Vatyí naquehun cha ñima chuun cuví. Ta naquehun tyiño saha inga ñáyiví”, catyí ra cuan. ²² Tyicuan ta rey cuan catyí ra chí ra: “Yoho musu ña vaha cuvún. Vityin suri chihin tuhun cha catyun chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehín cha ña saha tyiño, ²³ ¿ñáá tuhun ña chahun ta chityihun xuhin banco vatyí nachai soco cha nducua ca xuhin?” catyí rey cuan. ²⁴ Ta quichaha catyí ra chí ra canyicú cuan: “Tĩnyaa ndo xuhun cha chahí chí ra, ta cuhva ndo chí ra cha saha ganaa uchi ca tahan cuan”, catyí ra. ²⁵ Tyicuan ta quichaha catyí ra chí rey cuan: “Tata, soco ra cuan, cha iyó uchi tahan chí ra”, catyí ra. ²⁶ Tyicuan ta rey cuan catyí ra: “Soco catyí yuhu chí ndo. Vatyí ra cha vaha ca saha tyiño chihin cha chahí chí, cucuhva que chí ra. Ta ra cha chahí chihin ri, ta ña cuñí ra saha tyiño ra chihin cuan, cutinyaa ndíhi chí ra. ²⁷ Ta tandíhi ñu xaan iñi chii, ñu ña cuñí vatyí cunyaca ñahi chí ñu, nyaca ndo chí ñu tyehe vatyí cahñi ndo chí ñu nui”, catyí rey cuan —catyí ra Jesús.

Nu cua chaa ra Jesús Jerusalén
(Mt. 21.1-11; Mr. 11.1-11; Jn. 12.12-19)

²⁸ Cha yaha cahan ra Jesús cuhva cuan, ta sañihi ra cuahan ra ityi Jerusalén. ²⁹ Yucuan ta cua chaa ra ñuu Betfagé chihin ñuu Betania, yatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tava ra tyiño chi uvi tahan ra cachicá noo chihin ra. ³⁰ Ta catyí ra chi ra:

—Cuahan ndo ñuu cha nyaá yatyin ri cuan. Ta yucuan cunañihi ndo noo burru luhlu, quití ta coto ca tyayu, nuhñí ti. Ndachi ndo chi ti. Ta nyaca ndo chi ti tyehe. ³¹ Tatu yóo cha catyí chi ndo: “¿Ñáá tuhun cha ndachi ndo chi ti?” catyí ndo chi ñu: “Vatyí chiñuhú ti chi maa ra nyaca ñaha chi yo.”

³² Tyicuan ta ra cachicá noo chihin ra, cuahan coyo ra. Ta nañihi ra chi ti tari cuhva catyí maa ra Jesús. ³³ Ta cuhva cha candachi ra chi ti, chaa coyo chitoho ti. Ta candaca tuhun ra chi ra:

—¿Ñáá tuhun cha ndachi ndo chi burru chiña? —catyí ra.

³⁴ Tyicuan ta canacahan ra cuan ta cacatyí ra:

—Ndachí ndi chi ti vatyí chiñuhú ti chi maa ra nyacá ñaha —catyí ra.

³⁵ Tyicuan ta quehen ra chi ti. Ta chinyaca ra chi ti nu nyaá ra Jesús. Ta tyiso ra sahma ra siqui ti. Tyicuan ta casandaa ra chi ra Jesús siqui ti. ³⁶ Tyicuan ta cuahan ra Jesús. Ta cuaha vavaha ñáyivi cachacun ñu sahma ñu ityi nu cua yaha ra, yosó ra burru cuan. ³⁷ Tyicuan ta cha cua cuyatyin tandihi ñu chihin ra Jesús nu iñi noo yucu Olivo cuan. Ta quichaha cana chaa tandihi ñu chinó iñi chi ra chihin cha sií cuví chi ñu. Ta sacahnú ñu chi Nyoo vatyí cuaha xaan cha vaha nyehe ñu cha sacuvi ra. ³⁸ Yucuan chaha catyí ñu:

—¡Na sacahnu yo chi Rey ihya vatyí vachi ra chihin sívi Nyoo! ¡Na coo cha taxi ri andívi! ¡Ta na sacahnu yo chi Nyoo! —catyí ñu.

³⁹ Tyicuan ta suhva ra fariseo cha cuahan coyo chihin ñáyivi cuan quichaha cacatyí ra:

—Maestro, sacutaxin chi ñu nycón chuun —cacatyí ra.

⁴⁰ Nacahan ra Jesús ta catyí ra:

—Tatu ñáyivi ihya ta cu taxin ñu, nyacua nya yuu ta nacana chaa chi, ta sacahnu chi chii —catyí ra Jesús.

⁴¹ Yucuan ta cha cua chaa ra yatyin ri Jerusalén cuan. Ta nanyehe ra Jesús chi ñuu cuan ta quichaha chacu chaa ra vatyí cuihya iñi ra. ⁴² Ta catyí ra:

—Tyehe ta chitó nyoho, ta cutuñi iñi ndo yoso caa cha vaha cha vachi nyaque chi ndo quivi ihya. Soco xehe xaan ñohó cha chiñi tuñi cuan, ta ña nañihí maa ndo. ⁴³ Soco cuchaa quivi ña vaha vatyí ra xaan iñi chi ndo cutyihí chacu ra chi ndo. Vatyí tandihi ri ityi cuquichi coyo ra siqui ndo. Ta cucañi tahan ra chihin ndo. ⁴⁴ Ta cucacun ñuhú ra chi ndo ta cucahñi ra chi ndo. Ta ni noo yuu yoso nyitahan ta ma sandoo ra. Tyicuan caa cucuvi vatyí ña cuñi ndo nacoto ndo cha quichi Nyoo quichi sacacu ra chi ndo.

Nu tava ñehe ra Jesús chi ra caxico chichi vehe ñuhu cahnu
(Mt. 21.12-17; Mr. 11.15-19; Jn. 2.13-22)

⁴⁵ Tyicuan ta ra Jesús quihvi ra chichi nuquehe vehe ñuhu cahnu. Ta quichaha tava ñehe ra tandihi ra caxico ta casatá yucuan. ⁴⁶ Ta catyí ra chi ra:

—Nu tutu Nyoo catyí chi vatyí vehe Nyoo, nu chicán tahvi yo chi ra cuví. Soco nyoho sananduví ndo vehe nu nycícu ra suhu —catyí ra.

⁴⁷ Ta tandihi quivi chahán ra Jesús chisañaha ra chi ñáyivi chichi vehe ñuhu cuan. Soco ra cacuví nuu chi tata sutu, ta ra casacuahá cuenda ley vehe ñuhu, ta ra cacuví nuu chi ñuu cuan, canducú ra cuhva yoso caa ta cahñi ra chi ra. ⁴⁸ Soco ña ñihí maa ra cuhva yoso caa sacuvi ra. Vatyí tandihi ñáyivi ta vaha tyasohó ñu tuhun cahán ra Jesús.

20

Nu ndaca tuhun ra fariseo chi ra Jesús yóo cha tachí chi ra vatyí cahán ra nuu ñáyivi

(Mt. 21.23-27; Mr. 11.27-33)

¹ Noo quivi cuan cha ni ri ca cha sañahá ra Jesús chi ñáyivi chichi vehe ñuhu cahnu, ta cahán ra tuhun yoso caa sacacú Nyoo chi ñu. Ta chaq coyo ra cuví nuu chi tata sutu chihin ra casacuahá cuenda ley vehe ñuhu, in ri chihin ra cacuví mandoñi. ² Ta cacatyí ra chi ra:

—Catyí chi ndi ¿yóo cha tyaq tyiño chuun vatyí sacuvun tyehe caa? —catyí ra.

³ Tyicuan ta ra Jesús quichaha catyí ra chi ra:

—Yuhu tucu cua ndaca tuhun noo tuhun chi ndo. ⁴ ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi?

⁵ Tyicuan ta cacatyí ra cuan chi ra tahan ra:

—Tatu catyí yo vatyí Nyoo tachí chi ra Juan cuan, cucatyí ra chi yo “Ñáa tuhun ña chinó iñi ndo tuhun cahán ra.” ⁶ Ta tatu catyí yo vatyí ñáyivi tachí chi ra, ñáyivi cahñi ñu chi yo chihin yuu. Vatyí tandihí ñu, ta cuñí ñu vatyí Nyoo tachí chi ra —cacatyí ra.

⁷ Tyicuan ta cacatyí ra chi ra Jesús vatyí ña cachitó ra yóo cha tachí chi ra Juan vatyí na sacondutya ra chi ñáyivi. ⁸ Tyicuan ta ra Jesús catyí ra chi ra:

—Ni ri yuhu, ta ma catyí chi ndo yóo cha tachí chii, cha sacuvi tyehe caa.

Nu sañahá ra Jesús vatyí tari ra sahá tyiño ña vaha tyicuan caa cuví ra cha cucahñi chi ra

(Mt. 21.33-44; Mr. 12.1-11)

⁹ Tyicuan ta quichaha catyí ra Jesús noo cuhva ihya chi ñáyivi:

—Noo ra tachí ra cuaha yoho tichaha ndivi nu ñuhú ra. Yaha cuan ta chaha noo ra ñuhú cuan chi suhva ra casaha tyiño. Tyicuan ta naha cuahan ra inga ñuu. ¹⁰ Ta chaq quivi cha iñi chiti cuan. Tyicuan ta tachí ra chi noo musu vatyí cuquehen ra

suhva chiti cha tahán chi chi ra. Soco cacañi xaan ra casahá tyiño cuan chi musu cuan. Ta sacunuhu ra chi ra chihin nu ndaha nu ndi ra. ¹¹ Tyicuan ta chitoho yoho tichaha ndivi cuan tachí tucu ra chi inga musu. Suri cacañi xaan ra chi ra. Ta cacahan uhvi ra chi ra. Ta natachí ra chi ra. Soco suri ñahri cachaha ra cuiso ra cunuhu. ¹² Tyicuan ta chitoho cuan tachí tucu ra chi inga ra. Soco suri tyicuan caa chinyacuvi tucu ra chihin ra. Ta sañicuehe ra chi ra. Ta tava ñehe ra chi ra yucuan.

¹³ Yaha cuan ta quichaha catyí chitoho ñuhu cuan: “¿Yoso caa cunyacuvi vityin? Cua tachi chi sehi, ra cha cuñí vavahi. Ta cha nanyehe ra chi ra, vasi casaha ra ñáyivi chi ra, vatyí sehi cuví chi ra.” ¹⁴ Soco cuhva cha cananyehe ra casahá tyiño cuan chi ra, catyí ra chi ra tahan ra: “Ican ra ihya cundoo chihin ñuhú ihya tatu chihi sutu ra. Soco nacahñi yo chi ra. Vatyí ndoo maa yo chihin ñuhú ihya”, catyí ra. ¹⁵ Tyicuan ta tava ñehe ra chi sehe chitoho ñuhú cuan ityi chata chacu. Ta cachahñi ra chi ra —catyí ra Jesús.

Tyicuan ta catyí ra Jesús chi ñáyivi nyicú cuan:

—¿Ñáa cha cusacuvi chitoho ñuhú cuan chi ra cachahñi chi sehe ra cha cuhva cha cuñí nyoho? ¹⁶ Catyí chi ndo vatyí quichi ra ta cahñi ra chi ra casahá tyiño cuan. Ta cuhva ra ñuhú cuan chi inga ra —catyí ra Jesús.

Ta cuhva cha chiñi ñáyivi tuhun cuan, yuhví xaan ñu cuví. Ta quichaha catyí ñu:

—¿Ña cuñi Nyoo ta cuvi tyicuan caa! —catyí ñu.

¹⁷ Soco ra Jesús nanyehe ra chi ñu ta catyí ra:

—Tyicuan caa cucuvi. Vatyí nyaá nu tutu Nyoo ta catyí chi tuhun tyehe caa: Yuu cha ña cuñí ra casavahá vehe cotyiño ra,

Ican cuan cuví yuu cha niñi ca.

¹⁸ Tari tahnú noo ra cha canacava siqui yuu, tyicuan caa tivi ñu ña cuñí quichaha tuhun cahín. Ta sin ri, tari taxin nyihi noo ra cha canacava

yuu siqui, tyicuan caa cunaa ñu ña cuñi quichaha tuhun cahín —catyí ra Jesús.

¹⁹ Ta ra cacuví nuu chi tata sutu ta ra casacuahá cuenda ley vehe ñuhu catuvi ñi ra vatyí tuhun cha catyí ra Jesús, chi maa ra ñaí cuan. Ta cuñi ra catiín ra chi ra Jesús vatyí cacahñi ra chi ra. Soco ña cachitó maa ra yoso caa. Vatyí yuhví ra chi ñáyivi.

Tuhun cha tyiyahví ñu xuhun chi gobiernu ñuu Roma

(Mt. 22.15-22; Mr. 12.13-17)

²⁰ Tyicuan ta catachi ra chi suhva ra vatyí cunducu nyehe ra chi ra Jesús. Ta casaha ra tyí ra vaha cacuvi ra. Vatyí coto ra ñáá noo tuhun ña vaha cahán ra Jesús tacuhva cuvi catiín ra chi ra. Ta cuhva cuenda ra chi ra chi gobernador. ²¹ Yucuan chaha candaca tuhun ra casavaha chii cuan chi ra Jesús:

—Maestro, chitó ndi vatyí vaha tuhun cahún. Ta sañahún cha vaha chi ñáyivi. Ta ñima cuhva iyó ri ñu nyehun soco aña ñu ñandihí. Ta maa ri maa ityi Nyoo sañahún. ²² Catyí chi ndi ¿atu vaha cha tyiyahví yo cha chicán gobiernu ñuu Roma chi yo, o ña vaha? —catyí ra.

²³ Soco ra Jesús tuví ñi ra vatyí cuñi ra nducu nyehe ra chi ra. Ta catyí ra chi ra:

—¿Ñáá tuhun cuñi ndo nducu nyehe ndo chii? ²⁴ Sañaha ndo noo xuhun chiña chii, na nyehi. ¿Yóó chi nuu ta yóó chi sivi nyaá nu xuhun ihya? —catyí ra.

Tyicuan ta nacahan ra cuan, ta catyí ra:

—Nuu gobiernu, ta sivi ra ñandihí —cacatyí ra.

²⁵ Tyicuan ta catyí ra Jesús:

—Tu tyicuan caa, cuhva ndo xuhun chiña chi ra cuví gobiernu cuan vatyí chi maa ra tahán chi. Ta cuhva tucu ndo chi Nyoo cha tahán chi chi ra —catyí ra Jesús chi ra.

²⁶ Ta ña cuví maa sandahvi ñaha ra chi ra Jesús chihin tuhun cahán ra nuu ñáyivi. Ta iyo xaan cacuñi ra

tuhun cha nacahan ra. Ta taxi ri cuví ra.

Nu cacuñi ra saduceo sandavi ñaha ra chi ra Jesús

(Mt. 22.23-33; Mr. 12.18-27)

²⁷ Cha yaha cuan ta chaa coyo suhva ra saduceo nu nyaá ra Jesús. Maa ra cuví ra casañahá vatyí ña nandotó ndiyi.

²⁸ Tyicuan ta catyí ra chi ra Jesús:

—Maestro, sandoo ra Moisés tuhun ihya vatyí tatu noo ra chihí ra ta ndoo ñasihí ra, tatu yori sehe ra chiyó chihin ña, tahán chi cha tandaha yañi ra chihin ña tacuhva cha ma cunaa tata yañi ra. ²⁹ Soco cuñi ndi coto ndi vatyí chiyó ucha tahan ra chihin yañi ra. Ta ra cha ñihi ca chicoo ñasihí ra, soco yori sehe ñu chiyó, ta chihí ra. ³⁰ Tyicuan ta naquehen ra cha cu uvi suri maa ña cuan. Ta yori tucu sehe ñu chiyó. Ta chihí tucu ra cuan. ³¹ Ta suri tyicuan caa cuví chihin ra cu uñi cuan. Ta suri tyicuan caa cuví chi ndi ucha ra. Ni noo ra ta yori sehe ra chiyó chihin ña. ³² Ta nu ndihí tuhun chihí ndihí maa ña. ³³ Ta cuñi ndi coto ndi yóó ra cuví ñasihí chi ña chichi cha ndi ucha tahan ra cuan nu cunandoto ñu nuu Nyoo —cacatyí ra saduceo cuan.

³⁴ Tyicuan ta nacahan ra Jesús, ta catyí ra:

—Ihya ñáyivi, rayii ta ñusihí tandaha ñu. ³⁵ Soco ñu cha tahán chi nandoto inga ñáyivi nu nyacá ñaha Nyoo, ña tandaha ca ñu ta ni ma cuhva ca ñu sehe ñu tandaha. ³⁶ Ta ñahri tuhun chihí iyó nyicuan. Soco cucuvi ñu tari ángel. Ta cuví ñu sehe Nyoo cha ndicha vaha vatyí nandoto ñu. ³⁷ Cha ndicha cuví vatyí ra Moisés nu sacoto ra tuhun cha cayu taca ñu cuan, yucuan sacotó ra chi yo vatyí ñu chihí nandotó ñu. Vatyí yucuan catyí ra vatyí Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuví chi ra. ³⁸ Vatyí Nyoo ñima Nyoo cuenda ñáyivi chihí cuví ra. Nyoo cuenda ñu nyitó cuví ra. Vatyí cha cuenda Nyoo tandihí yo ta nyitó aña yo vasi chihí coño ñuhu yo —catyí ra Jesús.

³⁹ Tyicuan ta suhva ra casacuahá cuenda ley vehe ñuhu catyí ra:

—Vaha xaan nacahun Maestro —catyí ra.

⁴⁰ Yucuan ta ña caña ca maa iñi ra candaca tuhun ra ñáá ca tuhun chi ra Jesús.

Cristo vachi ra tata ra David, ta suri cuví tucu ra Sehe Nyoo
(Mt. 22.41-46; Mr. 12.35-37)

⁴¹ Tyicuan ta ndaca tuhun ra Jesús chi ñu:

—¿Ñáá tuhun cha catyí ndo vatyí ra Cristo tata ra David vachi ra? ⁴²⁻⁴³ Vatyí suri maa ra David catyí ra nu libru Salmo tyehe caa:

Cahán Suti Nyoo chihin Suti ra Cristo, ta catyí ra chi ra:

“Cunyata chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

⁴⁴ ¿Yoso caa cha ra vachi tata ra David cuví chi ra Cristo, ta suri maa ra David catyí vatyí Suti ra cuví chi ra Cristo? —catyí ra Jesús.

Nu catyí ra Jesús vatyí cuaha xaan cuatyí ra casacuahá cuenda ley vehe ñuhu iyó
(Mt. 23.1-36; Mr. 12.38-40; Lc. 11.37-54)

⁴⁵ Tandihí ñáyivi cachiñí ñu tuhun cahán ra Jesús chihin ra cachicá noo chihin ra nu catyí ra tyehe caa:

⁴⁶ —Saha ndo cuenda chi ndo chihin ra casacuahá ley vehe ñuhu. Tahán xaan iñi ra cuihno ra sahma cañi. Ta cuñí ra vatyí saha ndo ñáyivi chi ra nuyahvi ta cuhva ndo nocumi chi ra. Ta nanducú ra tyayu vaha cunyata ra chichi vehe ñuhu ta nu cuahan ra vico. ⁴⁷ Ta naha chicán tahvi ra chi Nyoo nu tuví, cha cuñí ra cha catyí ñáyivi tyi vaha ñáyivi cuví ra. Soco suri maa ra tinyaá ra vehe ñu ndahvi cha chihí yí vatyí ña cuví tyiyahvi ñu xuhun cha tavá ra siqui ñu. Yucuan chaha ñihi ca cutachi tuñi Nyoo chi ra —catyí ra Jesús.

21

Noo ofrenda cha chaha noo ñaha sihi cha chihí yí
(Mr. 12.41-44)

¹ Ta nyehe ra Jesús vatyí cuaha xaan ñu tyayí catyihí ra xuhun chichi caja cha nanyaá chichi vehe ñuhu cahnu. ² Ta nyehe tucu ra noo ñaha ndahvi cha chihí yí. Ta tyihí ña uvi tahan ri xuhun cuatyí. ³ Ta catyí ra Jesús:

—Cha ndicha catyí chi ndo vatyí nuu Nyoo cuaha ca tyihí ñaha ndahvi ihya ta ñima ca tandihí ñu tyayí cuan. ⁴ Vatyí cha ndoó ri siqui chi ñu catyihí ñu. Soco ñaha ihya tyihí ña tandihí cha iyó chi ña —catyí ra.

Nu catyí ra Jesús vatyí cucani ñáyivi vehe ñuhu cahnu
(Mt. 24.1-2; Mr. 13.1-2)

⁵ Tyicuan ta suhva ñu ndatuhún ñu tuhun vehe ñuhu cahnu cuan. Ta catyí ñu vatyí tyaquí xaan yuu. Tyaquí xaan tacaá cha chaha ñáyivi. Tyicuan ta quichaha catyí ra Jesús:

⁶ —Coo quívi ta tandihí cha nyehé ndo ihya cutani. Ni noo yuu ta ma coso ca siqui tahan. Vatyí cusanacoyo ra xaan iñi chi ndo.

Ñáá ndihí seña cha cucuvi cha ni cumañi ca naa ñáyivi
(Mt. 24.3-28; Mr. 13.3-23)

⁷ Tyicuan ta quichaha candaca tuhun ra chi ra Jesús, ta catyí ra:

—Maestro, ¿ama cucuvi tandihí tuhun cahun ihya? ¿Yoso caa ta coto ndi tatu cha cuyatyin cha naa ñáyivi? —cacatyí ra.

⁸ Tyicuan ta catyí ra Jesús:

—Saha vaha ndo cuenda, coto sandavi ñaha ra chi ndo. Vatyí cuaha xaan ra cuquichi, ta cucotyíño ra sívi, ta cucatyí ra: “Yuhu cuví Cristo ra cha saquichí Nyoo chi. Cha cuñí cunaa ñáyivi”, cucatyí ra. Soco ma cunyicon ndo chi ra. Ta ma chino iñi ndo chi ra. ⁹ Ta quívi ñihi ndo tuhun tyi iyó cuatyí ta cañí tahan ñáyivi, ma nayuhvi ndo. Vatyí tandihí cuan cutahan chi cuví xihna ca. Soco cumañi ca chaa quívi cha naa ñáyivi.

10 Ta catyí tucu ra:

—Ñáyiví iyó noo ñuu cucañi tahan ñu chihin ñáyiví inga ñuu. Ta cucoo cuatyí. 11 Ta cutaan nahnu. Ta cucoo tama. Ta cucoo cuehe tandihí ri ityi. Ta cunyehe ñáyiví cuaha xaan cha yuhví andiví. Cuaha xaan seña nahnu cha ña tuhvá ñu nyehe cunyehe ñu. 12 Soco cha cumañi ca cuví ihya, cutasi iñi ñáyiví chi ndo. Ta cucacan ñu cuatyí chaha ndo. Vatyí cucutuñi chi ndo ta cucuhva cuenda ñu chi ndo chi tata sutu. Ta cutyihí ñu chi ndo chichi vehe caa. Ta cunyaca ñu chi ndo nuu rey ta nuu ra cacuví tyiño cha catyí yuhu. 13 Tyicuan ta cuví cahan ndo tuhin chihin ñu. 14 Soco saha ndo cuenda ta ma caca xiñi ndo ñáá tuhun cunacahan ndo chihin ra cuví tyiño cuan. 15 Vatyí yuhu cucuhve tuhun cunacahan ndo. Ta cucuhve cha chiñi tuñi xiñi ndo. Vatyí ni noo ra xaan iñi chi ndo ta ma cuví chasaha ra chi ndo chihin tuhun cahán ra. 16 Soco ñáyiví cunacuhva cuenda ñu chi ndo nuu ñu xaan iñi chi ndo. Nyacua nya sutu ndo ta sihi ndo, yañi ndo, tahan ndo, ta ra tahan ndo cunacuhva cuenda ra chi ndo chi ñu xaan iñi chi ndo. Ta yihí nyoho cucañi ñu chi ndo. 17 Tandihí ñáyiví ta cutasi cuñí ñu nyehe ñu chi ndo cha catyí yuhu. 18 Soco ni noo ixi xiñi ndo ta ma cunaa. 19 Tatu ma ndu uvi iñi ndo chii, cucacu añima ndo.

20 'Quiví nyehe ndo vatyí nicachico yuhu ñuu Jerusalén ihya nyicú sindaro, coto ndo vatyí cha cuñi chaa quiví cha sanaa ra ñuu ihya. 21 Ta ñáyiví cha nyicú ityi Judea, na cono ñu ta na tixehe nuu ñu ityi yucu. Ta ñu nyicú ñuu Jerusalén ihya, na quita ñu. Ta ñu nyicú nu chiquí, ma ndichi ñu ñuu ihya. 22 Vatyí yucuan quiví cutachi tuñi Nyoo chí ñáyiví ñuu ihya. Vatyí cuchino cava tandihí cuhva catyí maa nu tutu Nyoo. 23 Ta ndahví ñusihí cha ñohó sehe quiví cuan. Ta ndahví ñu cha iyó cha lee sehe cha ni chaxín ca. Vatyí cuaha xaan tindhó cunyehe ñu ta tandihí ñáyiví. Vatyí cuxaan xaan Nyoo chihin ñáyiví ñuu Jerusalén ihya. 24 Sindaro cucañi ra

chi suhva ñáyiví chihin mityi ra. Ta suhva ñu cutiñ ra ta cunyaca ra chi ñu vehe caa inga ñuu. Ta ñáyiví cha ñima ñu Israel cuví, cucuaca chaha ñu Jerusalén nyacua nya quiví cha catyí maa Nyoo.

Yoso caa cuquichi Rayí cha quichi nya gloria inga chaha

(Mt. 24.29-35, 42-44; Mr. 13.24-37)

25 'Tyicuan ta cuaha cha iyo cunyehe ñáyiví nu ñanyii, ta nu yoo, ta nu tiño. Ta ihya siqui ñuhu ñáyiví cunayuhví ñáyiví chihin cha iyo cunacatyin tyañuhu. 26 Ta cucoña ñu chihin cha yuhví ñu cha chicá xiñi ñu ñáá ndihí cha cua cuví ihya siqui ñuhu ñáyiví. Vatyí nyacua nya cha iyó andiví cunacanda. 27 Tyicuan ta cunyehe ñu chi yuhu Rayí cha quichí nya gloria vachi chichi noo vico tyaquí chihin tunyee iñi Nyoo, ta chihin cha cahnu cuví ra. 28 Ta cuhva cha quichaha tuhun ihya, sanduní ndo iñi ndo ta cusí cuñi ndo vatyí numi xaan ta cucacu ndo —catyí ra.

29 Tyicuan ta chaha ra Jesús noo cuhva ihya, ta catyí ra:

—Saha ndo cuenda noo yutun cha nañí higuera, o ñáá nonga yutun. 30 Tatu cha cua cuyatyin cha coon savi cha nduyutya numa tun. 31 Ta tyicuan caa tucu nyoho, tatu cha nyehe ndo vatyí cha quichaha tandihí tuhun cha catyí chi ndo, coto ndo vatyí cha cuyatyin quiví cha cunyaca ñaha Nyoo siqui ñuhu ñáyiví ihya.

32 'Soco catyí chi ndo vatyí tuhun ihya cucuvi cha ni ri ca cha iyó ñáyiví.

33 Ta coo quiví cucunaa andiví ta ñuhu ñáyiví, soco tuhun cahán yuhu, tyicuan ri cucuvi tari cuhva catyí.

34 'Ta saha ndo cuenda chi ndo coto ndundava añima ndo chihin vicio, ta coho xaan ndo ndixi, o caca xaan iñi ndo tuhun tundoho ñáyiví ihya. Ta coto sana iñi ndo ta chaa quiví quichi yuhu ta quichi tundoho siqui ndo. 35 Vatyí tyicuan caa cucuvi chí tandihí ñáyiví iyó siqui ñuhu ñáyiví. Sana iñi ñu ta tari noo cha cua nacasi Nyoo nu ñohó ñu ta ma cuví quita

ñu. ³⁶ Soco nyoho cuatu tuhva ri ndo. Caçan tahvi ndo chi Nyoo tandihî quivî, tacuhva tyinyee ra chi ndo. Ta ma cunaa ndo quivî cuan, tacuhva cuvî chaa vaha ndo nuu yuhu Rayîi cha quichi nya gloria —catyî ra Jesús.

³⁷ Ta cha ñucahñu sañahá ra Jesús chi tandihî ñáyivî chichi vehe ñuhu cahnu. Ta cha cha cuaa chahán ra yucu Olivo. ³⁸ Ta tandihî ñáyivî chaa coyo ñu chichi vehe ñuhu cahnu ndihî ñaha ri. Vatyî cuiñî ñu tuhun cahán ra.

22

Nu cua xico ra Judas Iscariote chi ra Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Ta cha nyaña yatyin quivî cha coo vico pascua vico nu tuhva ñu chachi pan cha ñahri yuchan iya yihî chihin. ² Ta ra cacuvî nuu chi tata sutu chihin ra casacuahá cuenda ley vehe ñuhu, nducú xaan ra cuhva yoso caa ta cacahñî ra chi ra Jesús. Soco cayuhví ra chi ñáyivî.

³ Tyicuan ta quihví cuihna chi ra Judas cha catyî ñáyivî Iscariote chi. Ta maa ra cuvî noo ra cha uchi uvi tahan ra cha nacachî ra Jesús. ⁴ Ta ra cuan, chahan ra chi cahan ra chihin ra cuvî nuu chi tata sutu, ta chihin ra cuvî nuu chi ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chi ra Jesús. ⁵ Ta ra cuan sii xaan cacuvî chi ra. Ta tyaa ra cuhva vatyî cuhva ra xuhun chi ra Judas. ⁶ Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chi ra Jesús chi tata sutu cuan, cuhva cha yori ñáyivî nyicú chihin ra.

Nu cuxiñî ra Jesús chihin ra cachicá noo chihin ra

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ta cha quivî cha cuvî vico nu chachî ñu pan cha ñahri yuchan iya yihî. Ta suri quivî cuan tuhvá ñu chahñî ñu noo mbee luhlu cha vico pascua cuan. Vatyî cachi ñu chi ti. ⁸ Ta

ra Jesús tachî ra chi ra Pedro chihin ra Juan, ta catyî ra chi ra:

—Cuahan ndo cua sanduvaha ndo mbee cha cuxiñî yo —catyî ra.

⁹ Tyicuan ta quichaha ndaca tuhun ra chi ra:

—¿Nya cuñún cha sanduvaha ndi cha cuxiñî yo? —cacatyî ra.

¹⁰ Tyicuan ta catyî ra Jesús chi ra:

—Cuahan ndo chichi ñuu. Ta yucuan cunañihi ndo chi noo ra nyisó noo quiyî ndutya. Ta cuahan ndo chata ra nyacua nya nu quihví ra chichi vehe. ¹¹ Ta catyî ndo chi chitoho vehe cuan: “Ra Sacuaha, cuñî ra coto ra nya nyaá cuarto nu sanduvaha ra cha cuxiñî ra chihin ra cachicá noo chihin ra, vatyî casanducahnu ra vico pascua.” Tyicuan caa catyî ndo chi ra. ¹² Tyicuan ta maa ra cuan cusañaha ra cuarto cahnu ityi siqui nu cu uvi piso chi ndo. Ta cha yahá nduvii. Ta yucuan sanduvaha ndo cha cuxiñî yo —catyî ra chi ra.

¹³ Tyicuan ta cuahan coyo ra. Ta nañihî ra tandihî tari cuhva catyî ra Jesús. Tyicuan ta casanduvahá ra cha cuxiñî ra cha vico pascua cuan.

¹⁴ Yucuan ta cha cha cuhva cha cuxiñî ra Jesús ta tandihî apóstol ra, cachicunyicu ra yuhu mesa. ¹⁵ Tyicuan ta ra Jesús quichaha catyî ra:

—Cuñî xain cuxiñî in caa ri chihin ndo cuenda vico pascua ihya cha ni ri ca cha cumañi ca cunyeñi tundoho ta cúvi. ¹⁶ Vatyî nya ri ca ihya cua cachi ta cucúvi. Yucuan ta cachi tiqui soco nya nu nyacá ñaha Nyoo —catyî ra.

¹⁷ Tyicuan ta quehen ra noo vasu vinu. Ta nacuhvá ra tyiyahvi nyoo chi Nyoo, ta sayahá ra chi tandihî ra nyicú chihin ra. Ta quichaha catyî ra:

—Quehen ndo ihya. Ta coho ndo suhva suhva. ¹⁸ Vatyî catyî chi ndo vatyî ma coho que vinu tichaha ndivî nyacua nya quichi cha nyacá ñaha Nyoo ñáyivî ihya —catyî ra.

¹⁹ Ta yahá cuan ta quehen ra pan. Ta nacuhvá ra tyahvi nyoo chi Nyoo. Ta tahví sava ra. Ta chahá ra chi ra

cachicá noo chihin ra. Ta quichaha catyí ra:

—Ican ihya cuví coñe. Vatyí cha catyí ndo ta cua cuhva cuende chii ta cúvi. Tyicuan ri ñicohon iñi ndo chii ta cuxiñi ndo tyehe caa —catyí ra.

²⁰ Ta cha yahá cuxiñi ra, tyicuan ta quehen tucu ra vaso vinu tichaha ndívi, ta quichaha catyí ra:

—Chihin ihya natyihí tahan Nyoo tuhun chaa chihin ndo vityin. Vatyí vinu cha yihí chichi vaso ihya, tari ñiñi cuví. Ta cha catyí nyoho ta cucati ñiñi. Vatyí cucúvi cha catyí ndo.

²¹ Soco vityin, ra cha cua nacuhva cuenda chii chi ra xaan iñi chii, ñn ri yoso ndaha ra chihin ndahi nu mesa ihya. ²² Vatyí yuhu Rayíi cha quichi nya gloria cua cuvi chii tari cuhva cha nyaá maa tyi cuvi chii. Soco ñdahví ra ndahví, ra cha cunacuhva cuenda chii! —catyí ra Jesús.

²³ Tyicuan ta ra cachicá noo chihin ra Jesús quichaha candaca tuhun ra chi tahan ra, nya ra cuví ra cua nacuhva cuenda chi ra chi ra xaan iñi chi ra.

Nu candatuhún ra cachicá noo chihin ra Jesús yóo ra cahnu ca cuví

²⁴ Yahá cuan ta quichaha candatuhun ra cachicá noo chihin ra Jesús nya ra cahnu ca cuví. ²⁵ Soco ra Jesús catyí ra:

—Chitó nyoho vatyí ra nyacá ñaha chi ñáyivi iyó siqui ñuhu ñáyivi, ñihi xaan yosó ra siqui ñu. Ta cacuñi ra vatyí catyí ñáyivi tyi tyinyee ra chi ñu.

²⁶ Soco nyoho ña tahan chi sacuvi ndo tari sacuví ra cuan. Vatyí tatu cuñi ndo cuvi ndo ra cuví nuu, tahan chi sacuvi ndo tyiño nuu ñáyivi. Vatyí tatu sacuví ndo tyiño nuu ñáyivi, ican ndo cuví ra cuví nuu. ²⁷ Vatyí ihya siqui ñuhu ñáyivi ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuví ra tyiño nuu ra. Soco yuhu ra cuví nuu cuví, ta sacuví tyiño nuu ndo.

²⁸ Soco nyoho tyicuan ri ndíhi ndo chihin, tandíhi chaha cha nyehí tundoho. ²⁹ Yucuan chaha, yuhu चाहí noo nu cunyaca ñaha ndo tari cha

chaha Suti chii cha cunyaca ñahi. ³⁰ Vatyí cucachi ndo cuchoho ndo yuhu mesa chihin nya nu nyacá ñahi. Ta yucuan cunyaa ndo nu tyayu tyaquí. Ta cunyaca ñaha ndo chi ndi uchi uvi tahan ityí ñáyivi vachi tata ra Israel.

Catyí ra Jesús vatyí cua catyí ra Pedro vatyí ña ñohó nuu ra chi ra

(Mt. 26.31-35; Mr. 14.27-31; Jn. 13.36-38)

³¹ Tyicuan ta catyí ra Jesús chi ra Pedro:

—Nyehe vahun, yoho Simón. Vatyí cuihna, ra nañi Satanás, cha chican ra chi Nyoo na cuhva ra ityí chi ra vatyí quisi ñihno ra chi ndo tari naquisi ñihno yo trigo, tacuhva ndu uvi iñi ndo chi Nyoo. ³² Soco chicán xain chi Nyoo cha catyun, vatyí ma ndíhi cha chinó iñun chi ra. Ta quívi ndu uvi iñun cuatyun ta na chino vaha iñun chii cutyinyeun chi ra tahun cha ma sandíhi ra cha cachino iñi ra chii —catyí ra Jesús chi ra Simón.

³³ Ta ra Simón catyí ra chi ra:

—Sutu Mañi yuhu, cha iyó vahi vatyí cuhin chuhun vasi vehe caa, vasi tuhun chihi —catyí ra.

³⁴ Tyicuan ta catyí ra Jesús chi ra:

—Pedro, catyí chuun vatyí vityin cha ñi ri ca cha cumañi ca cuacu chaa loho, yoho cha uñi tahan chaha cucatyun vatyí ña ñohó nuun chii —catyí ra Jesús chi ra.

Nu cha cuñi chaa cuhva cha cunacuhva cuenda ra Judas chi ra Jesús

³⁵ Tyicuan ta ndaca tuhun ra Jesús chi ra cachicá noo chihin ra, ta catyí ra:

—Ñicohon iñi ndo quívi cha tachí chi ndo vatyí cucahan noo ndo nuu ñáyivi ta ñahri nyiso ndo, ñi ri cha cachi ndo, ñi ri xuhun, ñi ri sahman do. ¿Atu chiyo cha cumañi chi ndo quívi cuan? —catyí ra Jesús.

Tyicuan ta canacahan ra, ta catyí ra:

—Ñahri cha cumañi chi ndi.

³⁶ Tyicuan ta quichaha catyí ra Jesús chi ra:

—Soco vityin, tatu iyó cha cachi ndo ta iyó xuhun ndo, cuiso ndo. Ta tatu ñahri mityi ndo, xico ndo noo sahna ndo ta sata ndo. ³⁷ Vatyí catyí chi ndo, vatyí tandihí tuhin cha nyaá nu tutu Nyoo cuchino cava vatyí tyehe caa catyí chi: “Sahá ñu tuhin tyi cuví ra noo ra quiñi iyó.” Tyicuan caa catyí tuhin nu tutu Nyoo. Ta tandihí cuan cuchino cava —catyí ra.

³⁸ Tyicuan ta quichaha catyí ra cachicá noo chihin ra:

—Ihya nyaá uvi tahan mityi —catyí ra.

Tyicuan ta catyí ra Jesús:

—Cha iyó vaha ri —catyí ra.

Nu chicqn tahvi ra Jesús chi Nyoo Getsemaní

(Mt. 26.36-46; Mr. 14.32-42)

³⁹ Tyicuan ta quitá ra Jesús vehe cuan. Ta cuahan ra nya yucu Olivo. Tari cuhva tuhva maa ra chahan. Ta ra cachicá noo chihin ra cuahan coyo ra chata ra. ⁴⁰ Ta cuhva cha chaa ra yucuan, quichaha catyí ra chi ra cachicá noo chihin ra:

—Çacan tahvi ndo chi Nyoo tacuhva ma cuvi chasaha cuihna chi ndo.

⁴¹ Tyicuan ta cuahan ra Jesús cha cañi ca, tari cuhva cha chaa noo yuu tatu tuchi yo. Yucuan ta chicuñi chiti ra. Ta quichaha cahan ra chihin Nyoo, ⁴² ta catyí ra:

—Sutu Mañi yuhu, tu yoho ta cuñún, cuhva cha ma nyehi tundoho ihya. Soco ma cuvi tari cuhva cha cuñí mai. Soco na cuvi tari cuhva cha cuñí maun —catyí ra.

⁴³ Tyicuan ta tuví noo ángel, vatyí cuhva ca ra tunyee iñi chi ra. ⁴⁴ Ta cha ni ri ca cha nyehé xaan ra Jesús tundoho vatyí cuihya vavaha iñi ra, ta ñihi ca chicán tahvi ra chi Nyoo. Ta cuaha xaan tyeen ra quitá ta cana-coyó nu ñuhú, ta tari caa niñi caa.

⁴⁵ Yucuan ta nducuita ra cha ndihí cahan ra chihin Nyoo. Ta cuanuhu ra nu canyicu tandihí ra cachicá noo chihin ra. Ta nyehe ra vatyí caquixí ra, cha cuenda vatyí cacuihya xaan iñi ra, ña cacunyeē ra ñumahna ta caquixi ra.

⁴⁶ Tyicuan ta quichaha catyí ra Jesús chi ra:

—¿Ñáá tuhun cha caquixí ndo? Nducuita ndo. Ta çacan tahvi ndo chi Nyoo, tacuhva cha ma cuvi chasaha cuihna chi ndo.

Nu chaha cuenda ra Judas chi ra Jesús chi ra xaan iñi chi ra

(Mt. 26.47-56; Mr. 14.43-50; Jn. 18.2-11)

⁴⁷ Ni cahán ca ra Jesús tuhun ihya, ta cuaha xaan ra cachaa coyo. Ta ityi nuu vachi ra Judas, noo ra chicá noo chihin ra Jesús cuví ra. Ta tuhva ra chi ra Jesús vatyí cua tyayuhu ra xitin ra. ⁴⁸ Tyicuan ta catyí ra Jesús chi ra:

—Judas, ¿atu chihin cha cua tyayuhun chii, nacuhvá cuendon chi yuhu, Rayi cha quichi nya gloria, chi ra xaan iñi chii? —catyí ra Jesús.

⁴⁹ Ta ra canyicú chihin ra Jesús quichaha ndaca tuhun ra chi ra:

—Sutu Mañi yuhu, ¿atu sañicuehe ndi chi ra chihin mityi? —catyí ra.

⁵⁰ Yucuan ta noo ra, chahnya ra soho chiyo vaha noo ra cha cuví musu ra cuví nuu chi tata sutu.

⁵¹ Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha.

⁵² Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu, chihin ra cacuví mandoñi, ican ra cuví ra quichi coyo vatyí catiñ ra chi ra Jesús. Ta quichaha catyí ra Jesús chi ra:

—¿Atu vachi coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo? ⁵³ Ndiquivi chinyai chichi vehe ñuhu cahnu, ¿ñáá tuhun ña cuví tiñ ndo chii? Soco vityin chaa cuhva cha ñaa iñi vatyí ra ña vaha nyacá ñaha. Yucuan chaha vachi tiñ ndo chii.

Nu catyí ra Pedro vatyí ña ñohó nuu ra chi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tyicuan ta catiñ ra chi ra Jesús. Ta cua nyaca ra chi ra nya vehe ra

cuví nuu chi tata sutu. Ta ra Pedro n yasava ri cuahan ra chata ra.
⁵⁵ Ta cha chaꝯ coyo ra vehe ra cuví nuu chi tata sutu cuan, casanatahan ra ñuhu nuquehe. Ta chicunycú cutya ra nicachico ri nu cayú ñuhu cuan. Ta chicunyaꝯ tucu ra Pedro mahñu ñáyiví cuan. ⁵⁶ Ta cuhva cha ndundichin cha cayu ñuhu cuan, tyicuan ta noo ñaha cha cuví musu tata sutu cuan nanyehé ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

⁵⁷ Soco ra Pedro catyí ra:

—Yuhu ña ñohó nui chi ra cuan.

⁵⁸ Tañi ri cuan ta nyehé tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹ Ta cha yahá noo ora, ta nanyehé tucu inga ra chi ra ta catyí ra chi ra tahan ra:

—Cha ndicha cuii vatyí ican ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰ Tyicuan ta catyí ra Pedro:

—Ña chité ñáá tuhun cahún —catyí ra.

Ta caa cuhva ri cuan, ni cahán ca ra Pedro tuhun cuan, ta chacu chaꝯ ri noo loho.

⁶¹ Tyicuan ta ra Jesús nanyehé ra nuu ra Pedro. Ta ra Pedro nicohon iñi ra tuhun cha catyí ra Jesús chi ra: “Cuhva cha ni cumañi ca cuacu chaꝯ loho, yoho cha catyun tyi ña ñohó nuun chii uñi tahan chaha.”

⁶² Tyicuan ta quitá ra Pedro ityi chata vehe. Ta chacu vavaha ra cha cuihya iñi ra.

Nu cachacú nyaa ra chi ra Jesús ta cacañi ra chi ra

(Mt. 26.67-68; Mr. 14.65)

⁶³ Tyicuan ta ra casahá cuenda chi ra Jesús, quichaha chacu nyaa ra chi ra. Ta cacañi ra chi ra. ⁶⁴ Cachahñi ra sahma nuu ra, ta quichaha cacatu ra nuu ra. Ta cacatyí ra chi ra:

—Nacoto yóo cha cañi chuun —catyí ra chi ra.

⁶⁵ Ta cuaha vavaha ca cha cacahan ra chi ra.

Nu ndacá tuhun ra chi ra Jesús tatu Sehe Nyoo cuví chi ra

(Mt. 26.59-66; Mr. 14.55-64; Jn. 18.19-24)

⁶⁶ Ta cha cundichin inga quivi cuan. Ta candu in ri ra chahnu ñuu cuan chihin ra cuví nuu chi tata sutu, ta ra casacuahá cuenda ley vehe ñuhu. Ta caquehen ra chi ra Jesús. Ta cuahan coyo ra chihin ra nya nu cuví junta cahnu. Ta quichaha candaca tuhun ra chi ra:

⁶⁷ —Catyí chi ndi ¿atu ra Cristo ra cha saquichi Nyoo cuvún? —catyí ra chi ra.

Ta ra Jesús nacahan ra, ta catyí ra:

—Tatu catyi chi ndo vatyí ican, ma chino iñi ndo. ⁶⁸ O tatu ndaca tuhun ñáá cha ndaca tuhun chi ndo, ma nacahan ndo ni ma saña ndo chii. ⁶⁹ Soco vityin ta ityi nuu ca yuhu Rayi cha quichi nya gloria cucunyai chiyo vaha Nyoo ra cha iyó tandihí tunyee iñi chi —catyí ra.

⁷⁰ Tyicuan ta tandihí ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —catyí ra.

Tyicuan ta nacahan ra Jesús ta catyí ra:

—Suri maa ndo catyí tyi ican cuví.

⁷¹ Tyicuan ta quichaha cacatyí ra cuan chi ra tahan ra:

—Nyehe nuu. Yuhu maa ra quitá. Ña niñi ca cha tava yo cha ndaa. Vatyí suri maa yo chiñi —cacatyí ra.

23

Nu nyehé ra Pilato vatyí ñahri cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tyicuan ta tandihí ra nducuitá ra. Ta cua nyaca ra chi ra nya nu nyaá ra Pilato, ra cuví gobernador. ² Tyicuan ta quichaha cacatyí ra chi ra Pilato:

—Ra ihya, sativí ra chi ñáyiví chihin cha cahán ra nuu ñu, ta catyí ra vatyí ña vaha tyiyahvi ndi xuhun chi

gobiernu ñuu Roma. Ta s̄in ri catyí ra vatyí ra Cristo ra cha saquichi Nyoo vatyí cuví ra rey cuví ra —cacatyí ra.

³ Tyicuan ta ra Pilato quichaha ndaca tuhun ra chi ra Jesús, ta catyí ra:

—¿Atu ican yoho cuví Rey cuenda ñu Israel? —catyí ra.

Ta nacahan ra Jesús, ta catyí ra:

—Ican, suri maun catyí.

⁴ Tyicuan ta quichaha catyí ra Pilato chi ra cuví nuu chi tata sutu ta chi ñáyiví:

—Ñahri cuatyí ra ihya —catyí ra chi ñu.

⁵ Soco xaan ca nanduví ñu. Ta quichaha cacatyí ñu:

—Cahnu xaan cuatyí ra. Cuaha xaan tisihi chaha ra, vatyí cahán ra nuu ñáyiví. Cha xihna ri quichaha cahan noo ra nuu ñáyiví ityi Galilea. Ta nicañi maa ityi vachi ra cahán ra chihin ñáyiví nyacua nya chaa ra Judea ihya —catyí ñu.

Nu tachi ra Pilato chi ra Jesús nuu ra Herodes

⁶ Cuhva cha chiñi ra Pilato tuhun ihya, quichaha ndaca tuhun ra tatu ra Galilea cuví ra Jesús. ⁷ Ta catyí ñáyiví chi ra vatyí ican. Tyicuan ta sacuhun ra Pilato chi ra nya nu nyaá ra Herodes. Vatyí ra Herodes cuví ra gobernador nicahnu Galilea. Soco quiví cuan ñohó ra ñuu Jerusalén. ⁸ Ta kuhva cha nanyehe ra Herodes chi ra Jesús, s̄i xaan cuví chi ra. Vatyí cha naha xaan cuñí ra nyehe ra chi ra. Vatyí ñihí ra tuhun vatyí cuaha xaan milagru sacuví ra. Ta cuñí xaan ra nyehe ra noo milagru cha sacuví ra Jesús. ⁹ Ta cuaha xaan tuhun ndaca tuhun ra chi ra. Soco ra Jesús ña nahan maa ra. ¹⁰ Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuatyí siqui ra. ¹¹ Tyicuan ta ra Herodes chihin sindaro cuenda ra chacu nyaa ra chi ra. Ta sandihví noo ra noo sahma yahvi ta tyaqui chi ra, tari cha tuhvá rey ñihnó. Tyicuan ta natachi ra Herodes chi ra inga chaha nuu ra Pilato. ¹² Ta quiví cuan ra

Pilato chihin ra Herodes nduvaha iyó ra chihin tahan ra. Vatyí nu quichi chi, ña cuví canyehe ra chi tahan ra.

Nu cutuñi chi ra Jesús vatyí cucúvi ra

(Mt. 27.15-26; Mr. 15.6:15; Jn. 18.39—19.16)

¹³ Tyicuan ta ra Pilato sandu ñin ri ra chi ra cuví nuu chi tata sutu, ta chi ra cuví tyiño, ta chi ñáyiví ñandihí.

¹⁴ Ta catyí ra chi ñu:

—Nyoho quichi nyaca ndo chi ra ihya chii. Ta catyí ndo vatyí sativí ra chi ñáyiví. Soco yuhu cha sacutuñi chi ra nuu ndo. Ta ñahri cuatyí ra nañihí tari kuhva catyí ndo. ¹⁵ Ta ni ri ra Herodes ña nañihí ra ni noo cuatyí ra. Yucuan chaha sandichí ra chi ra inga chaha nu nyai. Nyehe ndo vatyí ñahri cha sacuví ra, ñahri cuatyí ra. Ta ña tahán chi cha cúvi ra. ¹⁶ Yucuan chaha cua tachi tuñi ri chi ra. Yahá cuan ta sañe chi ra —catyí ra Pilato.

¹⁷ Tyicuan caa catyí ra Pilato vatyí cha ni ri ca cha iyó vico cuan, tahán chi cha saña ra noo ra ñohó vehe caa, tari kuhva cha tuhva maa ra. ¹⁸ Soco tandihí ñu ñin ri nacanachaa ñu, ta catyí ñu:

—Cahñi chi ra Jesús. Ta saña chi ra Barrabás —catyí ñu.

¹⁹ Ta ra Barrabás cuan ñohó ra vehe caa cha cuenda cha cuñi ra nacanda ra siqui ra cuví tyiño. Ta s̄in ri chahñi ra chi ñáyiví. ²⁰ Ta ra Pilato cuñi ra saña ra chi ra Jesús. Ta quichaha catyí ra chi ñáyiví cuan inga chaha vatyí cusaña ra chi ra. ²¹ Soco ñáyiví chaa ca caná chaa ñu, ta catyí ñu:

—Na cúvi ra nu cruzi.

²² Tyicuan ta cha cu uñi chaha catyí ra Pilato chi ñu:

—Soco ¿ñáá cha ña vaha sacuví ra ihya? Nyehí tyi ña tahán chi cúvi ra. Tacuhva cutachi tuñi ri chi ra, ta sañe chi ra —catyí ra Pilato.

²³ Soco ñáyiví caná chaa ca ñu, ta catyí ñu vatyí tyaa ra chi ra nu cruzi. Ta cuví chasaha ñu. Vatyí maa ñu ta ra cacuví nuu chi tata sutu caná chaa ñu. ²⁴ Tyicuan ta sacuví ra Pilato tari kuhva catyí ñu. ²⁵ Ta tari kuhva catyí ñáyiví, saña ra chi ra Barrabás cha

ñohó vehe caa cha cuenda cha cuñí ra nacanda ra siqui ra cuví tyiño ta cha cuenda cha chahñi ra. Ta sacuvi ra chi ra Jesús tari cuhva catyí ñu.

Nu cua cunyaa ra Jesús nu cruzi
(Mt. 27.32-44; Mr. 15.21-32; Jn. 19.17-27)

²⁶ Yucuan ta quehen sindaro chi ra Jesús. Ta cuahan ra chihin ra. Ta catiñ tucu ra chi noo ra Cirene cha nañi Simón. Ra cuan ni cua ndichi ra cha chahan ra nu chiqui. Ta saniñi sindaro chi ra, na cuiso ra cruzi ra Jesús ta cuahan ra chata ra.

²⁷ Ta cuaha xaan ñáyivi cuahan chata ra. Ta cuaha xaan ñusihí chacú chaa ñu cha cuihya iñi ñu cha catyí ra.
²⁸ Soco ra Jesús nanyehe ra chi ñu. Ta quichaha catyi ra chi ñu:

—Tandihí nyoho ñusihí ñuu Jerusalén, ma cuacu ndo cha catyi yuhu. Cuacu ndo, soco cha catyi maa ndo ta cha catyi sehe ndo. ²⁹ Vatyí cuquichi quivi nu cunyehe xaan ndo tundoho. Ta cucahan ñáyivi chihin tandihí ndo cha cuví ndo ñusihí cha yori sehe ndo iyó. Ta cucatyí ñu chi ndo: “Vaha xaan vatyí yori sehe ndo iyó vatyí cuaha xaan tundoho nyehé yo vityin”, cucatyí ñu chi ndo.
³⁰ Vatyí quivi cuan cucuñi ñu vatyí na canacoyo yucu siqui ñu tacuhva sahvi chi chi ñu. ³¹ Vatyí tatu tyehe caa sacuvi ñu chihin yuhu cha ñahri cuatyí. Yaha ca cuhva cunyacuvi tucu ñu chihin maa ndo cha iyó cuatyí ndo —catyí ra Jesús.

³² Ta quehen tucu sindaro cuan chi uvi tahan ra quiñi iyó, vatyí cahñi ra chi ra ñn ri chihin ra Jesús. ³³ Tyicuan ta cachaa ra noo nu nañi Nu Cuví Yiqui Xiñi Ndiyí. Ta yucuan chicatacaá ra chi ra Jesús nu cruzi. Ta tyicuan caa tucu chinyacuvi ra chihin ninduvi tahan ra iyó cuatyí cuan. Noo ra chitacaá ra nuu cruzi chiyo vaha ra Jesús. Ta nonga ra cuan chitacaá ra nuu cruzi chiyo satyin ra. ³⁴ Ta cuhva cha tacaá ra Jesús nu cruzi cuan, quichaha catyi ra:

—Sutu Mañi yuhu, saha tucahnu iñi chi ra. Vatyí ña chitó ra ñáa cha nyacuví ra chihin —catyí ra.

Tyicuan ta sindaro cuan chahan ra noo sihva chihin sahma ra Jesús. Nya ra saha ganaa caquehen ra sahma cuan. ³⁵ Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chi ra Jesús. Ta catyí ra:

—Sacacu ra chi inga ñáyivi. Soco vityin na sacacu tucu ra chi maa ra, tatu ndicha cha Cristo, ra cha saquichi Nyoo, cuví ra —cacatyí ra.

³⁶ Ta suri cahán cuehe tucu sindaro chi ra. Ta catuhva ra chi ra. Ta chaha ra vinu iya coho ra. ³⁷ Ta quichaha cacatyí ra chi ra:

—Tatu rey cuenda ñáyivi Israel cuvún. Sacacu chuun —cacatyí ra.

³⁸ Ta siqui cruzi ityi xiñi ra nyaá noo nu tyaa ra chihin griego, chihin latín, ta chihin hebreo. Tyehe caa quita cahán letra cuan: “Ican ra ihya cuví Rey cuenda ñu ñuu Israel” —catyí nu vitu cuan.

³⁹ Ta noo ra quiñi iyó cha tacaá xiin ra Jesús, quichaha cahan ra chihin ra, ta catyí ra:

—Tatu ndicha cha Cristo cuvún, sacacu chuun. Ta sacacu chi ndi ñandihí —catyí ra.

⁴⁰ Soco inga ra cuan catyí ra chi ra:

—¿Atu ña yuhvún chi Nyoo? Vatyí nyehún suri tundoho cha nyehé maa ra vityin. ⁴¹ Maa yo nyehé yo tundoho ihya vatyí iyó cuatyí yo. Soco ra ihya ñahri cuatyí ra iyó —catyí ra.

⁴² Tyicuan ta quichaha catyí ra chi ra Jesús:

—Yoho Jesús, ñicohon iñun tuhin quivi cunyaca ñahun —catyí ra.

⁴³ Tyicuan ta ra Jesús catyí ra chi ra:

—Cha ndicha catyí chuun vatyí tañi ri vityin ta cunyaun chihin nya paraíso nu nyaá añima ñu chinó iñi chi Nyoo —catyí ra Jesús chi ra.

Nu chihí ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tyicuan ta ñáa cuhva ora quichaha nduñaa ñáyivi, nyacua nya

caa uñi cha cha iñi. ⁴⁵ Vatyí nduñaa ñanyii. Ta sahma cha tacaá chichi vehe ñuhu cahnu cuan, tahnya sava.

⁴⁶ Tyicuan ta quichaha cana chaa ra Jesús:

—Sutu Mañi yuhu, natyaí añime chichi ndahun —catyí ra.

Ta cuhva cha catyí ra tuhun ihya, ta chihí ra.

⁴⁷ Ta ra cuví nuu chi sindaro cuan, nyehe ra tandihí cha cuví cuan. Ta sacahnú ra chi Nyoo, ta catyí ra:

—Ñahri ndicha cuí cuatyí ra iyó —catyí ra.

⁴⁸ Ta tandihí ñáyivi cha canyicú yucuan canyehe ñu cha cuví cuan. Ta cuahan coyo ñu ta suri cacañi ñu ndaha ñu yiqui nyica ñu. Vatyí chitó ñu vatyí ña vaha cha chinyacuví ñu chihin ra Jesús. ⁴⁹ Ta tandihí ñu cha ñohó nuu chi ra Jesús, ta ñusihí cha chinyicon chi ra nya Galilea, canyicú ñu nya sava ri. Ta nyehe ñu tandihí cha cuví yucuan.

Nu cua cuchi ra chi ra Jesús

(Mt. 27.57-61; Mr. 15.42-47; Jn. 19.38-42)

⁵⁰ Ta iyó noo ra vaha, nañi ra José. Ta Arimatea ityi Judea cuví ñuu ra. Ta cuví ra noo ra cuví nuu cuenda Junta Cahnu ñu Israel. ⁵¹ Ta ra José cuan nyatú ra quivi cha cunyaca ñaha Nyoo. Ta ña ndoo ra vaha chihin cha sacuví ra tahan ra, ra cacuví nuu cuenda tata sutu cuan. ⁵² Tyicuan ta chahan ra chicacan ra coño ñuhu ra Jesús chi ra Pilato. ⁵³ Ta yahá cha sanoo ra José cuan coño ñuhu ra Jesús nu cruzi, ta natyihí ra chichi noo sahma cha cuví lino. Ta cuahan ra cua cuchi ra chi ra chichi noo ñaña chaa cha cuví yavi yuu cha savaha ñu. ⁵⁴ Ta viarni cuví, quivi cha sanduvahá ñáyivi cha cachi ñu cha sabarú inga quivi, quivi nyitatu ñu. Ta cha cuñi cuví sabarú.

⁵⁵ Ta tandihí ñusihí cha quichi chihin ra Jesús nya Galilea, cuahan ñu chata ra. Ta nyehe ñu chichi yavi yuu cuan. Ta nyehe ñu yoso caa chicava coño ñuhu ra. ⁵⁶ Ta cuanuhu coyo ñu nya vehe ñu. Ta sanduvahá

ñu ndutya vixi chahán vatyí cutyihí ñu coño ñuhu ra Jesús coto coo xico. Vatyí tyicuan caa cuví costumbre cuiya cuan. Tyicuan ta nyitatu ñu inga quivi cuan tari cuhva catyí maa tuhun cha tachí Nyoo chi yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Cundichin timingu quivi nu quichaha vitya. Ta ñaha cuirí cuahan coyo ñusihí cuan nya nu ñaña ra Jesús. Ta nyisó ñu ndutya vixi chahán cha sanduvahá ñu. ² Ta cuhva cha cha coyo ñu, nanyehe ñu vatyí ña nyasí ca yavi yuu cuan tari cuhva chinyasí maa. ³ Ta quihví ñu chichi, soco ña nañihí ñu coño ñuhu Sutu Mañi yo Jesús. ⁴ Ta yucuan tayucú ñu chihin cha yuhví ñu. Ta ña chitó ñu ñáa cunyacuví ñu. Ta tuví uvi tahan rayí nuu ñu. Ta xiño vavaha sahma cañihnó ra. ⁵ Ta chihin cha yuhví ñu, ta chicuiñi chiti ñu chihin nuu ñu nya nu ñuhú. Tyicuan ta quichaha cacatyí ra cuan chi ñu:

—¿Ñáa tuhun nanducú ndo chi ra Jesús ihya nu ñohó ndiyi? ⁶ Yori ra ñohó ihya, vatyí cha nandoto ra. Nícohon iñi ndo tuhun cha cahan ra chihin ndo quivi chicá noo ra Galilea. ⁷ Catyí ra vatyí tahán chi cucuhva cuenda ñu chi ra ndaha ra iyó cuatyí. Vatyí cuví ra Rayí cha quichi nya gloria. Ta tahán chi cucahñi ra chi ra nu cruzi. Soco nu cu uñi quivi cunandoto ra. Tyicuan caa catyí ra chi ndo —catyí ángel cuan chi ñu.

⁸ Tyicuan ta nícohon iñi ñu tuhun cahan ra Jesús quivi cuan. ⁹ Ta cuanuhu coyo ñu. Ta nacatyí ñu chi ndi uchi ñn tahan ra apóstol ra Jesús chihin tandihí ca ñáyivi. ¹⁰ Ta ñu sacoto tuhun cuan chi ra cuan cuví ñu cu María, ñaha Magdala, ta cu Juana, ta cu María sihi ra Jacobo, ta suhva ca ñusihí. ¹¹ Soco ra cachica noo chihin ra Jesús cuñi maa ra vatyí cahán ri maa ñu. Ta ña chinó iñi ra tuhun cahán ñu.

12 Soco ra Pedro nducuita ra ta chinq vavaha ra cuahan ra cuanyehe ra nya chichi ñaña ra Jesús tatu ndicha. Ta nanyehe ra chichi yavi yuu cuan tyi sahma ri cayucú inchiyo xiin. Tyicuan ta cuanuhu ra nya vehe. Ta iyo cuñi ra vatyí ñahri ca coño ñuhu ra Jesús catuví chichi ñaña cuan.

Noo cha cuví ityi Emaús
(Mr. 16.12-13)

13 Suri maa quivi cuan, uvi tahan ra chicá noo chihin ra Jesús cuahan coyo ra nya ñuu cha nañi Emaús, tari noo cha uchi ñn kilómetro cha quita yo Jerusalén. 14 Ta cuahan coyo ra ta ndatuhún ra tuhun ñáá ndihi cha cuví. 15 Ta cha ni ri ca cha candatuhún ra, ta ra Jesús natahan ra chi ra nu cuahan coyo ra. 16 Soco ni ri maa nyehé ra chi ra Jesús, ña canicohon nuu ra chi ra. Vatyí tari cha iyó noo cha chasi nuu ra tacuhva cha ma canicohon nuu ra chi ra Jesús. 17 Tyicuan ta quichaha ndaca tuhun ra Jesús chi ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan ñni ndo? —catyí ra chi ra.

18 Ta ra cha nañi Cleofas, nacahan ra. Ta catyí ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuví ñuu cuan? —catyí ra.

19 Tyicuan ta catyí ra Jesús chi ra:

—¿Ñáá cha cuví?

Ta quichaha canacatyí ra chi ra:

—Tuhun ra Jesús ra ñuu Nazaret. Vatyí cuví ra noo ra profeta Nyoo. Ta chihin tunyee ñni cahnu Nyoo sacuví ra cha vaha nuu Nyoo ta nuu ñáyivi.

20 Soco ra cacuví nuu chi tata sutu ta ra cacuví nuu cuenda vehe ñuhu, nacuhva cuenda ra chi ra chi sindaro ñuu Roma. Ta cachahñi ra chi ra. Ta chihí ra nu cruzi. 21 Ta cha vityin cha iyó uñi quivi cuví tuhun cuan. Ta nyuhu cuñi maa ndi vatyí ican ra cuví ra cusacacu chi ñáyivi Israel. 22 Soco vityin iyo xaan cuñi ndi cha nacatyí suhva ñusihí chi ndi. Vatyí maa ñu,

ñaha cui ri chahan coyo ñu nu ñaña ra. 23 Ta nacatyí ñu chi ndi vatyí ñahri ca coño ñuhu ra catuví. Ta nacatyí ñu vatyí nyehe ñu uvi tahan ángel. Ta catyí ángel cuan chi ñu vatyí ra Jesús nyitó ra. 24 Yaha cuan ta chahan coyo tucu suhva ra tahan ndi nu ñaña. Ta nyehe ra vatyí cha ndicha cuví tari cuhva catyí ñusihí cuan. Vatyí ñahri ca coño ñuhu ra Jesús catuví —catyí ra chi ra.

25 Tyicuan ta ra Jesús catyí ra chi ra:

—Chiin xaan cutuñi ñni ndo. Ta cuee xaan chinó ñni ndo tuhun tyaa ra profeta Nyoo ta cha naha. 26 ¿Atu ña chitó ndo vatyí tahan chi cha cunyehe xihna ra Cristo tundo? Yaha cuan ta tahan chi cuñihí ra tyiño cha cunyaca ñaha ra —catyí ra Jesús chi ra.

27 Tyicuan ta quichaha nacuhva ra cuenda yoso caa cuahan tuhun ra nu tutu Nyoo. Ta quichaha cahan ra tuhun cha tyaa ra Moisés ta cha naha. Ta yaha cuan ta cahan ra tuhun tandihí libru cha tyaa ra profeta Nyoo.

28 Ta cuhva cha chaa ra nya ñuu Emaús cuan nu cuahan coyo ra, ta saha ra Jesús vatyí cañi ca cuahan ra. 29 Tyicuan ta cacatyí ra chi ra na ndoo ra chihin ra. Ta catyí ra:

—Ndoo chihin ndi vatyí cha cua quee ñanyii —cacatyí ra.

Tyicuan ta cuahan ra Jesús nya vehe ninduvi ra cuan. 30 Ta cuhva cha chicunya ra yuhu mesa chihin ra, quehen ra pan. Ta chaha ra tyahvi nyoo chi Nyoo. Ta chahnu sava ra, ta chaha ra chi ra. 31 Ta caa cuhva ri cuan nuña nuu ra canicohon nuu ra chi ra Jesús. Soco ra Jesús cuanaa ri ra. 32 Tyicuan ta quichaha catyí ra chi ra tahan ra:

—Yucuan chaha vaha xaan cuñi ñanima yo cuhva cha vachi ra chihin yo, ta nacatyí vaha ra yoso caa cuahan tuhun Nyoo cha nyaa nu tutu chi yo, ta nicohon nuu yo chi ra —cacatyí ra.

33 Ñahri ca cha canyatu ra, ta cuanuhu coyo ra nya Jerusalén. Ta yucuan nañihí ra chi ndi uchi ñn ra chicá noo chihin ra Jesús, canyicú ra.

³⁴ Tyicuan ta quichaha canacatyí ndi uchi ñn tahan ra chi ra cha nichaa coyo cuan:

—Ndicha vatyí Sutu Mañi yo, nandoto ra. Vatyí ra Simón nyehē ra chi ra —cacatyí ra.

³⁵ Tyicuan ta ra cha ni nachaa coyo cuan canacatyí tucu ra yoso caa ndatuhun ra Jesús chihin ra ityi cuahan ra ñuu Emaús, ta yoso caa canicohon nuu ra chi ra nu chahnū ra pan.

Nu tuvi ra Jesús nu canyicu ra cachicā noo chihin ra

(Mt. 28.16-20; Mr. 16.14-18; Jn. 20.19-23)

³⁶ Ni cahán ca ra tuhun cuan ta tuvi ra Jesús nu canyicú ra. Ta chahā ra nocumi, ta catyí ra:

—Na coo cha taxi ri añima ndo.

³⁷ Tyicuan ta canayuhví xaan ra. Ta cacuñí maa ra vatyí noo tatyí ri cuví.

³⁸ Tyicuan ta catyí ra Jesús chi ra:

—¿Ñáá tuhun cha nayuhvi ndo? ¿Ñáá tuhun cha chicá uvi ñni ndo?

³⁹ Nyehē ndo ndahi. Ta nyehē ndo chahi. Vatyí suri mai cuví. Tñn ndo chii ta coto ndo. Vatyí tatyí, ñahri coño ñuhu. Ta ñahri yiqui tari cha nyehé ndo tyi yihí chi yuhu —catyí ra Jesús.

⁴⁰ Ta cuhva cha catyí ra tuhun ihya, sañahá ra ndaha ra ta chaha ra.

⁴¹ Soco maa ra chaha cha iyo cacuñí ra ta sií cacuñí ra nyacua ña chinó vaha ñni ra. Tyicuan ta catyí ra Jesús chi ra:

—¿Atu iyo cha cachi? —catyí ra.

⁴² Tyicuan ta chahā ra chiin yuhu tiyaca tyihyo chihin tyañuñu chi ra.

⁴³ Ta quehen ra. Ta quichaha chachi ra. ⁴⁴ Ta catyí ra chi ra:

—Tandihí cha cuví chii, ican ihya cuví cha catyí chi ndo quiví cuan. Ta catyí chi ndo vatyí tyicuan caa cucuví, tari cuhva nyaá tuhun cha tyaa ra Moisés ta ra profeta Nyoo ta cha nyaá nu libru salmo —catyí ra chi ra.

⁴⁵ Tyicuan ta chahā ra Jesús vatyí na cutuñi ñni tandihí ra cuan yoso caa catyí nu tutu Nyoo. ⁴⁶ Tyicuan ta catyí ra Jesús chi ra vatyí tyicuan

caa nyaá nu tutu Nyoo vatyí tahán chi cha cúvi ra Cristo. Ta nu cu ñni quiví nandoto ra. ⁴⁷ Ta tahán chi coto ñáyiví tuhun siví ra Cristo ñuu Jerusalén, ta yaha cuan ta tandihí ñuu nichahnu ñuhu ñayiví. Tacuhva cuví ndu uvi ñni ñu ta ndachi cuatyí ñu.

⁴⁸ —Ta nyoho cuví ndo cha ndaa tandihí tuhun ihya. ⁴⁹ Ta cusaquichi mai Tatyí Ii Nyoo siqui ndo tari catyí Suti tyí cuhva ra chi ndo. Soco cunyicu ndo Jerusalén ihya. Ta ma quita maa ndo nyacua nya quichi tunyee ñni Tatyí Ii Nyoo cuquihí chi ndo —catyí ra Jesús.

Nu nandaq xica ra Jesús andiví

(Mr. 16.19-20)

⁵⁰ Tyicuan ta ra Jesús cuahan ra chihin tandihí ra cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra. ⁵¹ Ta cha ni ri ca cha nasocó ra chi ra, nandaq xica ra andiví. ⁵² Tyicuan ta tandihí ra sacahnú xaan ra chi ra. Ta sií xaan cacuví chi ra, cuanuhu coyo ra Jerusalén. ⁵³ Ta tyicuan ri chinyicú ra chichi vehe ñuhu cahnu cuan, ta sacahnú xaan ra chi Nyoo.

Tuhun Nyoo Cha Tyaa San Juan

Tuhun Cahán Nyoo nanduvi noo rayi, ta ican cuví ra Cristo

¹ Nyata quivi xihna ri, nyata ni cumañi ca coo tandihi cha iyó, ta cha iyó ra cuví Tuhun Cahán Nyoo. Nyaá ra chihin Nyoo. Ta Nyoo cuví ra. ² Ta chicoo ra chihin Nyoo nyata quivi xihna ri. ³ Ta chihin ra, savaha Nyoo tandihi cuui maa cha iyó. Ta ñahri savaha Nyoo cha maa ri maa ra. ⁴ Ta chihin ra cuví Tuhun Cahán Nyoo nyaá ñayivi cha ma naa ca maa. Ta ñayivi cuan, ican cuví cha sacundichín aña ñáyivi. ⁵ Ta cha ndichin ihya, sacundichín chi nu ñaa iñi. Ta cha ñaa iñi ña cuñihi chi ndahva chi cha ndichin cuan.

⁶ Chiyo noo ra cha tachí Nyoo chi. Ta nañi ra Juan. ⁷ Quichi ra cuví ra noo cha ndaa. Vatyí cañan ra tumañi iñi cuenda ra cuví cha ndichin cuan, tacuhva vatyí chino iñi tandihi ñáyivi chi ra. ⁸ Ra Juan, ñima cha ndichin cuan cuví ra. Noo cha ndaa ri cuví ra cha cuenda cha ndichin cuan. ⁹ Vatyí cha ndichin cha ndicha vaha cuan, ni cuachaa chi siqui ñuhu ñayivi, tacuhva vatyí sacundichín chi aña tandihi ñáyivi cha iyó siqui ñuhu ñayivi ihya.

¹⁰ Ra cuví Tuhun Cahán Nyoo quichi ra siqui ñuhu ñayivi. Ta ican ra cuví ra Cristo. Ta suri maa ra savaha ra ñuhu ñayivi. Soco ñáyivi iyó siqui ñuhu ñayivi, ña nicohon nuu ñu chi ra. ¹¹ Quichi ra nu nyicú ñáyivi cha savaha ra, soco ñáyivi cha savaha ra ña natin cuenda ñu chi ra. ¹² Soco tandihi ñu natin cuenda chi ra, ta chinó iñi ñu chi ra, ican chi ñu cuan, chaha ra ityi vatyí nanduvi ñu sehe Nyoo. ¹³ Vatyí nacacu chaa ñu. Soco ñima tari cacu ñu ta lee ñu cuenda coño ñuhu ñu. Ta ni ñima cha cuenda cha quichi cuví iñi noo rayi coo ra chihin noo ñaha sihi. Ñima cha cuenda

cha cuñi ñáyivi coo sehe ñu. Soco maa Nyoo sanacacu chaa chi ñu.

¹⁴ Ta ra cuví Tuhun Cahán Nyoo nanduvi ra noo rayi. Ta chicoo ra chihin yo. Ta nyehe ndi cha cañu cuví ra. Ta cañu cuví ra vatyí Sehe mañi Sutu yo Nyoo cuví chi ra. Tyitu yihí ra chihin cha ndicha ta tumañi iñi cha cua cuhva ra chi yo. ¹⁵ Ta ra Juan cuan cañan ra tumañi iñi cuenda ra, ta catyí ra:

—Ican ra ihya cha cañin tuhun quivi cuan, vatyí ra cha vachi ityi chate, cañu ca ra cuví ra ican saha yuhu. Vatyí nyata tyembu chahnu ta cha iyó maa ra —catyí ra Juan.

¹⁶ Tandihí yo naquehén cuenda yo tumañi iñi cañu cha chaha ra chi yo, vatyí nasocó xaan ra chi yo. ¹⁷ Ra Moisés chaha cuenda ra ley Nyoo chi yo. Soco ra Jesucristo cundahvi iñi ra chi yo ta saha ra ticahnu iñi cuatyí yo. Ta chaha ra cha ndicha coo chi yo. ¹⁸ Ta yori ca maa nyehé chi Nyoo. Notuhun ri maa Sehe mañi ra cha iyó in ri chihin ra. Ican ra cuví ra chaha cha cohon nuu yo chi Sutu ra.

Nu cañan ra Juan, ra sacondutyá, tumañi iñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹ Ra cacuví nuu chi ñu Israel cha iyó ñuu Jerusalén, catachi ra chi tata sutu ta chi ra cacuví levita nu nyaá ra Juan na ndaca tuhun ra chi ra yóo ra cuví ra. ²⁰ Ta maa ra Juan catyí cachi ra:

—Yuhu ñima ra Cristo cuví.

²¹ Tyicuan ta candaca tuhun ra inga chaha chi ra:

—¿Yóo ra cuví yoho? ¿Atu ra Elías, ra cuví profeta Nyoo ta cha naha cuvún? —catyí ra chi ra.

Ta ra Juan nacahan ra:

—Ñima ra cuan cuví.

Ta sañihi ca ra candaca tuhun ra chi ra, ta catyí ra:

—Tu tyicuan caa, ¿atu icon cuví ra profeta Nyoo cha nyaá cha quichi?

Ta nacahan tucu ra Juan ta catyí ra:

—Ñima.

22 Ta inga tucu chaha candaca tuhun ra chi ra:

—¿Yóó ra cuví yoho? Vatyí cuñí chi cuiso ndi tyiño chi ra cha tachí chi ndi. ¿Yóó ra cuví yoho? —catyí ra chi ra.

23 Ta ra Juan nacahan ra:

—Yuhu cuví ra cahán ta canachaa noo nu chiqui ndi, ta catyí: “Nuña ndo noo ityí ndoo chichi aña ndo vatyí cha vachi Sutu Mañi yo.” Tari cuhva cahan ra Isaías profeta Nyoo tuhun ta cha naha —catyí ra Juan chi ra.

24 Ra cha cacahan chihin ra Juan, ra cacuví fariseo tachí chi ra. 25 Ta candaca tuhun tucu ra chi ra:

—Tatu ñima ra Cristo, ni ra Elías, ni ra profeta cuan cuvún, ¿ñaá tuhun cha sacondutyón chi ñáyivi? —catyí ra chi ra Juan.

26 Ta ra Juan catyí ra chi ra:

—Yuhu sacondutyé chihin ndutya. Soco mahñu ndo nanyaá noo ra cha ña ñohó nuu ndo. 27 Ican ra cuví ra vachi chate. Soco cha iyó maa ra ta caqui. Ta ña naña mai ni cha cuví musu ra ta ndachi ñi xityin ndichan ra —catyí ra Juan.

28 Tandihí tuhun ihya cuví noo nu nañí Betábara cha nyaá inga chiyo yuvi cahnu Jordán nu ñohó ra Juan sacondutyá ra.

Ra Jesucristo, Mbee Luhlu sana Nyoo cuví ra

29 Cha inga quivi nanyehe ra Juan chi ra Jesús cuachaa ra nu nyaá ra, ta catyí ra Juan:

—Nyehe ndo, ican ra ihya cuví Mbee Luhlu sana Nyoo vatyí cucuhva ra ñayivi ra tacuhva cahnya ra cuatyí ñáyivi iyó siqui ñuhu ñayivi. 30 Tuhun maa ra cahn quivi cha catyí chi ndo vatyí cha yaha yuhu ta vachi nonga ra cha cahnu ca cuví ta ñima ca yuhu, vatyí nyata tyembu chahnu ta cha iyó ra. 31 Ni yuhu ta ña ñohó nui chi ra quivi cuan. Soco vachi sacondutyé chihin ndutya tacuhva vatyí ñu ñuu Israel cohon nuu ñu chi ra —catyí ra Juan.

32 Ta catyí tucu ra Juan ñandihí:

—Yuhu nyehí chi Tatyí Ii Nyoo quichí ityi andivi vachi chi tari noo paloma, ta ndoo chi siqui ra. 33 Yuhu ta coto que yóó ra cuví ra quivi cuan. Soco Nyoo, ra cha tachí chii na sacondutyé chihin ndutya, catyí ra chii: “Quivi nyehun Tatyí Ii yuhu, vachi noó siqui noo rayi, ican ra cuan cuví ra sacondutyá chihin Tatyí Ii yuhu”, catyí Nyoo chii. 34 Yuhu cha yaha nyehí chi ra. Ta cuví cha ndaa vatyí ican ra cuví Sehe Nyoo —catyí ra Juan.

Ra cha xihna ca nanyicon chi ra Jesús

35 Cha inga quivi, ra Juan nyaá tucu ra yucuan inga chaha, ta nyicú tucu uvi ra nyicón chi ra. 36 Ta cuhva cha nyehe ra, yaha ra Jesús, ta catyí ra:

—Nyehe ndo, ican ra cuan cuví Mbee Luhlu sana Nyoo —catyí ra Juan.

37 Cha chiñí ninduvi ra nyicon chi ra Juan tuhun cahan ra, ta cananyicon ra chi ra Jesús. 38 Tyicuan ta nanyehe ra Jesús ityi chata ra, ta nyehe ra tyi canyicón ra chi ra, ta catyí ra:

—¿Ñáá cha nducú ndo?

Tyicuan ta canacahan ra ta catyí ra:

—Maestro, ¿nya iyón?

39 Ta ra Jesús catyí ra chi ra:

—Coho ndo chihin. ta nyehe ndo —catyí ra chi ra.

Tyicuan ta cuahan coyo ra chihin ra. Ta canyehe ra nu iyó ra. Ta yucuan cuaa ndihí ra vatyí tari cha caa cumi cha cha ñi cuhva cha cha ra yucuan.

40 Chichi cha ninduvi ra cha chiñí tuhun cahan ra Juan ta nanyicon ra chi ra Jesús, noo ra cuví ra ra Andrés yañí ra Simón Pedro. 41 Ta ra Andrés numi ri chinanducu ra chi yañí ra, ra Simón, ta catyí ra chi ra:

—Nañihí ndi chi ra cha cuví Mesías —catyí ra.

Ta tuhun Mesías cuan cuñí chi catyí, ra Cristo, o ra cha nacachí vaha Nyoo, vatyí cuví ra rey chi yo.

⁴² Tyicuan ta ra Andrés chinyaca ra chi ra Simón yañi ra nu nyaá ra Jesús. Ta cuhva cha nyehe ra Jesús chi ra Simón, ta catyí ra chi ra:

—Yoho Simón, sehe ra Jonás cuví chuun. Soco cunañun Cefas. —catyí ra chi ra.

Ta Cefas cuñi chi catyí Pedro chihin sahan griego, ta ninduvi tahan si vi cuan, cuñi chi catyí “yuu”.

Nu cana ra Jesús chi ra Felipe ta chi ra Natanael

⁴³ Cha inga quivi tyaa ra Jesús cuhva cuhun ra ityi Galilea. Tyicuan ta nañihí ra chi ra Felipe. Ta catyí ra chi ra:

—Cunyicon chii —catyí ra.

⁴⁴ Ra Felipe ihya, ra ñuu Betsaida cuví ra. Ta yucuan iyó tucu ra Andrés ta ra Pedro. ⁴⁵ Tyicuan ta chahan ra Felipe chinanducu ra chi ra Natanael. Ta catyí ra chi ra:

—Nyehe ndi chi ra cha tyaa ra Moisés tuhun nu libru ley, ta suri tuhun ra catyaa tucu ra profeta Nyoo ta cha naha. Jesús nañi ra. Sehe ra José ra ñuu Nazaret cuví chi ra.

⁴⁶ Ta catyí ra Natanael:

—¿Atu cuvi quita cha vaha ñuu Nazaret cuan? —catyí ra chi ra Felipe.

Ta nacahan ra Felipe ta catyí ra:

—Ñaha ta nyehun —catyí ra.

⁴⁷ Yahá cuan ta cuachaa ra Natanael nu nyaá ra Jesús. Ta cuhva cha nanyehe ra Jesús tyi vachi ra, ta quichaha catyí ra:

—Ihya vachi noo ra cha ndicha ndicha ra ñuu Israel cuví. Ta ña tuhvá ra sandaví ñaha —catyí ra Jesús tuhun ra Natanael.

⁴⁸ Tyicuan ta ra Natanael ndaca tuhun ra chi ra:

—¿Yoso caa cha ñohó nuun chii?

Ta ra Jesús nacahan ra ta catyí ra:

—Yuhu nyehi chuun nyata ni cumañi ca cana ra Felipe chuun, cuhva cha nyaún chaha tun higo cuan —catyí ra Jesús chi ra.

⁴⁹ Tyicuan ta quichaha catyí ra Natanael:

—Sutu Mañi yuhu, yoho cuvún Sehe Nyoo. Yoho cuvún rey cuenda ndi ñu Israel.

⁵⁰ Ta ra Jesús catyí ra chi ra Natanael:

—¿Atu chinó iñun chii cha cuenda vatyí catyí tyi nyehi chuun chaha tun higo? Soco nahnu ca cha cunyeahun ican saha cuan —catyí ra chi ra.

⁵¹ Ta catyí tucu ra Jesús:

—Cha ndicha catyí chi ndo vatyí nyoho cunyehe ndo andivi cuitanuña ta cuaha ángel Nyoo cundaa ra, ta cunoo ra siqui yuhu ra cuví Rayi cha quichi nya gloria —catyí ra Jesús chi ra.

2

Noo vico tandaha iyó ñuu Caná ityi Galilea

¹ Yahá uñi quivi ta chicoo noo vico tandaha ñuu Caná ityi Galilea. Ta sihi ra Jesús ñohó ña yucuan. ² Ta suri canacatyí tuhun ñu chi ra Jesús ta chi ra cachicá noo chihin ra cha cuhun coyo ra vico tandaha cuan. ³ Tyicuan ta cuahan coyo ra. Ta nyicú ñu vico, ta ndihi vinu. Tyicuan ta catyí sihi ra Jesús chi ra:

—Ñahri ca vinu ñu —catyí ña.

⁴ Ta catyí ra Jesús chi ña:

—¿Ñáa cha cuñún cha sacuvi yuhu, Maha? Ta chaa ca cuhva cha sañahi chi ndo yóo ra cuví yuhu —catyí ra chi ña.

⁵ Soco sihi ra catyí ña chi ra cha catyinyeé vico cuan:

—Sacuvi ndo tandihi cha catyí ra chi ndo —catyí ña chi ra.

⁶ Ta tayucú iñu tahan quisi yuu nahnu cha quihí ndutya cha catuhvá ra Israel chotyíño nu tuhvá ra canacatyá xaan ra ndaha ra tari cuhva costumbre cha ca iyó maa ra. Ta tahan tahan quisi cuan chitahan tari uvi xico uchi o uñi xico uchi litru ndutya. ⁷ Tyicuan ta catyí ra Jesús chi ra cha catyinyeé vico cuan:

—Sacutu ndo quisi ihya chihin ndutya —catyí ra chi ra.

Tyicuan ta sacuvi ra tari cuhva catyí ra. ⁸ Tyicuan ta catyí ra Jesús chi ra:

—Vityin tava ndo suhva ta cunyaca ndo chi ra cuví nuu cuenda vico ihya —catyí ra Jesús chi ra.

Ta tyicuan caa casacuví ra. ⁹ Ra cuví nuu cuenda vico cuan chihí ra ndutya cha nanduví vinu cuan. Soco ña chitó ra nya quichi. Maa ri maa ra catyinyee vico cuan cachitó ra, vatyí maa ra catavá ndutya cuan. Tyicuan ta ra cuví nuu cuenda vico cuan cana ra chi ra cha tandaha cuan. ¹⁰ Ta catyí ra chi ra:

—Tandihí ñáyívi, xihna ca vinu vaha tuhvá ñu tava. Yaha cuan ta tatu cha cachihí xaan ñu, tyicuan ta tava ñu vinu pehe ca. Soco yoho chicumí vahun vinu vaha. Ta nya vityin tavon —catyí ra chi ra.

¹¹ Cha sacuví ra Jesús ñuu Caná ityí Galilea, ican cuan cuví milagru cha xihna ri savaha ra vatyí sañaha ra cha cahnu cuví ra. Ta ra cachicá noo chihin ra cachino ñi ra chi ra vatyí ican ra cuví ra cha tachí Nyoo.

¹² Cha yaha cuan ta cuahan ra ñuu Capernaum. Ta cuahan sihi ra, yañi ra ta ra cachicá noo chihin ra. Ta yucuan chinyicu ñu suhva quívi.

Nu tava ra Jesús chi ñu caxicó chichi vehe ñuhu cahnu

(Mt. 21.12-13; Mr. 11.15-18; Lc. 19.45-46)

¹³ Cha cuñi chaa quívi vico cha nañi pascua cha sanducahnú ñu Israel. Yucuan chaha cuahan ra Jesús ñuu Jerusalén. ¹⁴ Ta chaá ra ñuu cuan, ta quihví ra nuquehe vehe ñuhu cahnu cuan, ta nanyehé ra chi ra caxicó sindiquí, mbee, ta paloma. Ta na nyehé tucu ra chi ñu nyicú nasama xuhun chi ñáyívi. ¹⁵ Ta cha nyehé ra Jesús cha tyicuan caa, savaha ra noo yoho. Ta chihin yoho cuan tava ñehe ra chi tandihí ñu nuquehe vehe ñuhu in ri chihin mbee ta chihin sindiquí sana ñu. Ta ñu nasamá xuhun cuan, sacuita ra xuhun ñu nu ñuhu ta sanduva ra mesa ñu. ¹⁶ Ta catyí ra chi ñu xicó paloma cuan:

—¡Tava ndo paloma chiña ihya! ¡Ma nasaha ndo vehe Suti tari noo nuyahvi! —catyí ra chi ñu.

¹⁷ Tyicuan ta ra cachicá noo chihin ra, canicohon ñi ra cha catyí nuu tutu Nyoo tyehe caa: “Cuiño xain chihin vehun”, catyí chi, nicohon ñi ra.

¹⁸ Tyicuan ta quichaha candaca tuhun ra cacuví nuu chi ñu Israel chi ra:

—¿Ñáá seña cuhvon chi ndi ta sañahun vatyí chaha Nyoo ityí chuun cha sacuvun tyehe caa? —catyí ra chi ra.

¹⁹ Ta nacahan ra Jesús ta catyí ra:

—Satani ndo vehe ñuhu ihya, ta chichi cha uñi quívi, yuhu cusanandai inga chaha —catyí ra chi ra.

²⁰ Tyicuan ta quichaha cacatyí ra cuan chi ra:

—Uvi xico ñu cuiya cañoho ra casavaha ra vehe ñuhu ihya. Ta yoho catyún tyi chichi cha uñi quívi cusanandaun inga chaha —catyí ra chi ra.

²¹ Soco vehe ñuhu cha cahan ra Jesús tuhun, ican cuví coño ñuhu ra.

²² Yucuan chaha ra cachicá noo chihin ra canicohon ñi ra tuhun ihya quívi nandoto ra Jesús. Ta cutuñi ñi ra vatyí tuhun cha nyaá nuu tutu Nyoo cahán chi cuenda ra Jesús. Ta canachino ñi ra tuhun cahan ra Jesús ta tuhun cha nyaá nuu tutu Nyoo.

Ra Jesús chitó ra cha caá añima ñáyívi

²³ Quívi cha ñohó ra Jesús Jerusalén, quívi vico pascua cuan, cuaha xaan ñu nachino ñi ra chi ra cha cuenda cha cuaha xaan milagru sacuví ra.

²⁴ Soco ra Jesús ña cuní ñi ra nyehé ra chi ñu vatyí chitó ra cha caá añima tandihí ñu. ²⁵ Ña chiñuhú ri cha nacatyí yo chi ra yoso caa ñáyívi, vatyí maa ra chitó ra ñáá cha caá chichi añima ñu.

3

Nu ndatuhún ra Nicodemo chihin ra Jesús

¹ Chiyo noo ra fariseo cha nañi Nicodemo. Ta cuví ra noo ra cuví nuu chi ra ñuu Israel. ² Ra Nicodemo ihya, chahan ra nu nyaá ra Jesús noo cha cuaa. Ta catyí ra chi ra:

—Maestro, chitó ndi vatyí Nyoo tachí chuun quichi sañahun chi ndi. Vatyí yori ñáyiví cuvi sacuvi milagru tahan cha sacuvún, tatu yori Nyoo nyaá chihin ñu —catyí ra chi ra Jesús.

³ Tyicuan ta catyí ra Jesús chi ra:

—Cha ndicha catyí chuun vatyí tatu ma nacacu chaa ñáyiví inga chaha, ma cuvi nyehe ñu nu nyacá ñaha Nyoo —catyí ra.

⁴ Tyicuan ta ndaca tuhun ra Nicodemo ta catyí ra:

—¿Yoso caa cuví cacu noo rayí inga chaha tatu cha chahnu ra? ¿Atu cuvi ndihví ra chíchi síhi ra ta nacacu chaa ra inga chaha? —catyí ra.

⁵ Nacahan ra Jesús ta catyí ra:

—Cha ndicha catyí chuun vatyí ñima chihin cha cacu ri ñáyiví chihin coño ñuhu ñu ta cuví quihví ñu nu nyacá ñaha Nyoo. Soco niñi tucu cuñí chi cha nacacu ñu chihin Tatyí Ii Nyoo. ⁶ Vatyí ñáyiví cha cacu chihin coño ñuhu, coño ñuhu ri nyisó ñu. Ta ñu cha nacacu chaa chihin Tatyí Ii Nyoo, iyó Tatyí Ii Nyoo añima ñu. ⁷ Ma iyo cuñun cha catyí chuun tuhun ihya vatyí tandihí ñu, cuñí chi nacacu chaa ñu. ⁸ Tari caá tatyí tandihí ri ityi nu cuñí chi ta chiñún cayú chi, soco ña chitón nya ityi quichi chi, ni nya ityi cuahan chi; ta tyicuan caa tandihí ñu nacacu chihin Tatyí Ii Nyoo —catyí ra Jesús chi ra.

⁹ Tyicuan ta ndaca tuhun tucu ra Nicodemo inga chaha chi ra:

—¿Yoso caa cuahan tuhun ihya? —catyí ra chi ra.

¹⁰ Nacahan ra Jesús ta catyí ra:

—Yoho cha cuvún noo ra sacuaha cuenda ñu Israel, tahán chi coton tuhun ihya. ¹¹ Cha ndicha catyí chuun vatyí cahín cha chité ta cuví cha ndaa cha nyehí. Soco nyoho ña chinó iñi ndo cha catyí chi ndo. ¹² Tatu ña chinó iñi ndo chíi nu cahín tuhun ñáyiví ihya chihin ndo, ¿yoso caa chino iñi ndo tu cahin tuhun andiví chihin ndo?

¹³ 'Yori chahan andiví chinyehe yoso caa iyó. Noo ri yuhu Rayí cha

quichí nya gloria nyehí, vatyí yucuan iyé. ¹⁴ Tari nacatacaá ra Moisés noo coo cha chino chihin caa nu noo chiquí ndi, tyicuan caa cunacataca tucu ñu chi yuhu Rayí cha quichi nya gloria, ¹⁵ tacuhva vatyí tandihí ñu cha chinó iñi chíi, ma cunaa ñu. Soco coo ñu ñáyiví cha ma naa ca maa.

Nyoo cuñí xaan ra chi ñáyiví

¹⁶ 'Vatyí Nyoo cuñí xaan ra chi tandihí ñáyiví iyó síqui ñuhu ñáyiví. Yucuan cuenda chaha ra vatyí cúvi Sehe mañi ra nu cruzi cha cuenda ñu. Tacuhva vatyí tandihí ñu cha chinó iñi chi Sehe ra, ma cunaa ñu, soco coo ñu noo ñáyiví cha ma naa ca maa. ¹⁷ Nyoo ña tachí ra chí Sehe ra síqui ñuhu ñáyiví vatyí sacunaa ra chí ñáyiví, soco tachí ra chí ra na sacacu ra añima ñu tacuhva ma cuhun ñu anyaya cha catyí cuatyí ñu.

¹⁸ 'Vatyí ñu chinó iñi chí Sehe Nyoo ma cunaa ñu, soco ñu ña chinó iñi chí ra, cha cuanaa ñu cha cuenda cha ña chinó iñi ñu chí noo ri Sehe mañi Nyoo. ¹⁹ Ñu ña chinó iñi, cha cuanaa ñu. Vatyí quiví quichí ra cuví ñuhu ndichin cha sacundichín síqui ñuhu ñáyiví, ña natín cuenda ñu chí ra tyi tahan ca iñi ñu nu ñaa iñi vatyí nyacuví ñu cha ña vaha. ²⁰ Tandihí ñu cha nyacuví cha ña vaha, ña tahan iñi ñu ñuhu ndichin, vatyí coto quetuvi cha ña vaha cha nyacuví ñu. ²¹ Soco ñu nyacuví cha ndicha, nanyitá ñu nu ndichin tacuhva na cundichin nyehe ñáyiví vatyí sacuví ñu cuhva cuñí Nyoo vatyí nyaá ra chihin ñu —catyí ra Jesús.

Nu cahán ra Juan, ra sacondutyá, tuhun ra Jesús inga chaha

²² Cha yaha tuhun ihya, ra Jesús chihin ra cachicá noo chihin ra cuahan coyo ra nu cuví Judea. Ta candoo ra suhva quiví yucuan, vatyí casacondutya ra chí ñáyiví. ²³ Tyicuan caa tucu ra Juan cuan ñohó ra sacondutyá ra chí ñáyiví nu cuví Enón yatyin ri nu cuví Salím, vatyí yucuan ñohó cama ndutya. Ta ñáyiví chaá coyo ñu ta condutya ñu. ²⁴ Tuhun ihya cuví ta ni

cumañi ca catyihí ra chí ra Juan vehe caa.

²⁵ Tyicuan ta suhva ra nyicón chí ra Juan quichaha cuví yuhu ra chihin noo ra ñuu Israel siqui yoso caa sandundi ñáyivi chí ñu nuu Nyoo.

²⁶ Tyicuan ta cuahan coyo ra nu nyaá ra Juan. Ta catyí ra chí ra:

—Maestro, ra cha ñoho chuhun inga chiyo yuvi cahnu Jordán, ra cha cahun tuhun chihin ndi, vityin sacondutyá ra ta tandihí ñu nanyicón ñu chí ra —catyí ra chí ra.

²⁷ Tyicuan ta ra Juan catyí ra chí ra:

—Ni noo yo ta ñahri cha cuví sacuvi yo, tyehe ta ña chahá Nyoo tunyee iñi ra chí yo. ²⁸ Suri maa ndo chiñi vaha ndo cha cahin vatyí yuhu ñima ra Cristo cuví. Noo ra cha tachí ri Nyoo ityi nuu ra cuví yuhu. ²⁹ Vatyí noo vico tandaha, ra nyaá xiin ñaha tyivaa cuan, ican ra cuan cutandaha chihin ña. Ta ra tahan ra nyaá ra yatyin ri cuan. Ta cusí cuñí ra chiñi ra tuhun cahán ra cha cuatandaha. Ta tyicuan caa tucu yuhu, sí cuñi vatyí naquehen ñáyivi tuhun cahán ra Jesús ta nyicón ñu chí ra. ³⁰ Maa ra cahnu ca ra cuacuvi ra. Ta yuhu cunocuee que vatyí tyicuan caa tahan maa chí.

Ra quita nya gloria ta quichi siqui ñuhu ñáyivi

³¹ 'Ra cha quichi nya gloria, cahnu ca ra cuví ra cha nuu tandihí ñáyivi. Vatyí ra iyó siqui ñuhu ñáyivi, cuenda ñuhu ñáyivi cuví ra. Ta cahán ra tuhun ñuhu ñáyivi. Soco ra quichi nya gloria, cahnu ca ra cuví ra. ³² Ta cahán ra cha nyehé ra ta cha chiñi ra, soco yori chinó iñi tuhun cahán ra. ³³ Soco tatu nya noo yo chinó iñi yo chí ra, cuví yo noo cha ndaa vatyí Nyoo ndicha cha cahán ra. ³⁴ Vatyí ra cha tachí Nyoo chii, tuhun Nyoo cahán ra vatyí Nyoo ña tyicuhvá ra Tatyí Ii ra chaha ra chí ra. Chaha ra naní Tatyí Ii ra chí ra.

³⁵ Nyoo Sutu yo cuñi ra chí Sehe ra. Ta natyaa ra tandihí ndaha ra. ³⁶ Ñu cha chinó iñi chí Sehe Nyoo, iyó ñu noo ñáyivi chaa cha ma naa ca maa. Soco ñu ña cuñi chino iñi chí ra, ma coo ñu

ñáyivi cuan. Ta cutachi tuñi Nyoo chí ñu.

4

Nu ndatuhun ra Jesús chihin noo ñaha Samaria

¹ Cachitó ra cuví fariseo vatyí cuaha ca ñáyivi nyicón chí ra Jesús ican saha ra Juan. Ta cuaha ca ñu sacondutyá ra ñandihí. ² Vasi ñima maa ra Jesús sacondutyá, soco ra cachicá noo chihin ra, ican casacondutyá. ³ Ta quivi chito ra Jesús vatyí cachito ra tuhun ihya, ta quita ra Judea cuan ta cuanuhu ra nya Galilea. ⁴ Ta ityi cuanuhu ra, tahan chí yaha ra nu cuví Samaria. ⁵ Yucuan ta chaa ra noo ñuu cha nyaá ityi Samaria cha nañi Sicar yatyin nu nyaá ñuhú ra Jacob nu chaha ra chí ra José sehe ra. ⁶ Ta yucuan nyaá noo yavi ndutyá cha catyí ñu tyi chí ra Jacob cuví. Ta vatyí chitatú xaan ra Jesús cha chica ityi ra, ta chicunya ra yuhu yavi cuan, ñaa cuhva hora cuví. ⁷⁻⁸ Ta ra cachicá noo chihin ra, yori ra canyicú vatyí cuahan coyo ra chichi ñuu, cuasata ra cha cacachi ra. Tyicuan ta chaa noo ñaha Samaria cuatava ña ndutyá chichi yavi cuan. Ta quichaha catyí ra Jesús chí ña:

—Cuhva chiin ndutyá cohi —catyí ra chí ña.

⁹ Tyicuan ta ñaha Samaria cuan catyí ña chí ra Jesús:

—Yoho cha cuvún noo ra ñuu Israel, ¿yoso caa cha chicón ndutyá cohun chí yuhu cha cuví ñaha Samaria? —catyí ña vatyí ñu Israel ña vaha iyó ñu chihin ñu Samaria.

¹⁰ Tyicuan ta ra Jesús nacahan ra ta catyí ra:

—Tyehe ta chitón cha chahá Nyoo, ta chitón yóo cha chicán ndutyá chuun, maun cuacon ndutyá chii. Ta yuhu cuhve ndutyá nyitó chuun —catyí ra chí ña.

¹¹ Tyicuan ta catyí ña chí ra:

—Tata, ni ñahri vihi chihin tavon ndutyá ihya. Vatyí yavi ihya cono xaan. ¿Nya cuquehun ndutyá nyitó cuhvon cohi? ¹² Vatyí sutu chahnu

yo, ra Jacob sandoꝝ ra yavi ihya chi yo. Ta suri ihya chihí tucu maa ra ndutya. Ta suri ihya chihí tucu sehe ra ta quiṭi sana ra. ¿Atu cahnu ca ra cuví yoho ican saha ra cuan? —catyí ña chi ra.

¹³ Tyicuan ta nacahan ra Jesús ta catyí ra chi ña:

—Tandihí ñu chihí ndutya ihya, cu ityi ca ñu ndutya. ¹⁴ Soco ñu chihí ndutya cha chahá yuhu, ma cu ityi ca ñu. Vatyí ndutya cha chahí chi ñu cucaña chi tari noo ndohyo chichi añima ñu tacuhva coo ñu ñayiví cha ma naa ca maa —catyí ra chi ña.

¹⁵ Tyicuan ta quichaha catyí ña chi ra:

—Tata, cuhva ndutya cuan cohí, tacuhva cha ma cu ityi que ndutya, ta ni ma quichi que quichi tave ndutya chichi yavi ihya —catyí ña chi ra.

¹⁶ Tyicuan ta ra Jesús catyí ra chi ña: —Cuahan cuacana chi yíun ta quichun —catyí ra chi ña.

¹⁷ Ta nacahan ña ta catyí ña:

—Yori yí iyó —catyí ña.

Tyicuan ta catyí ra Jesús chi ña:

—Ndicha cha cahun, vatyí yori yíun iyó. ¹⁸ Vatyí cha ohon tahan yíun chiyó, ta ra nyaá chuhun vityin ñima yíun cuví chi ra. Ndicha tuhun cha cahún —catyí ra chi ña.

¹⁹ Cha chiñi ña tuhun cahan ra, quichaha catyí ña chi ra:

—Tata, tuví ñi vatyí noo profeta cuenda Nyoo cuvún. ²⁰ Sutu chahnu ndi, ra Samaria, sacahnu ra chi Nyoo yucu ihya. Soco nyoho ñu Israel catyí ndo vatyí Jerusalén yucuan tahan chi sacahnu yo chi Nyoo —catyí ña chi ra.

²¹ Tyicuan ta ra Jesús nacahan ra ta catyí ra chi ña:

—Chino ñiun tuhun cahín chuhun. Vatyí vachi cuhva vatyí cusacahnu ndo chi Sutu yo Nyoo. Soco ña chiñuhú ri cha quichi ndo yucu ihya o cahun ndo nya Jerusalén. ²² Nyoho ñu Samaria, ña chitó ndo yóo chi sacahnú ndo. Soco nyuhu chitó ndi yóo chi sacahnú ndi. Vatyí chitó ndi vatyí cuenda noo ra Israel cuasacacu Nyoo chi ñayiví. ²³ Soco chaa chi cuhva

ta cuhva cuan nyaa yo vityin vatyí ñayiví cha ndicha sacahnú chi Sutu yo Nyoo, cusacahnu ñu chi ra chihin añima ñu ta cha ndicha. Tari cuhva saquehen ityi Tatyí li Nyoo chi ñu. Vatyí Sutu yo Nyoo tyicuan caa cuñí ra cha sacuvi ñu cha sacahnú chi ra. ²⁴ Vatyí Nyoo Tatyí li cuví ra. Ta ñu sacahnú chi ra cuñí chi sacahnú ñu chi ra chihin cha ndicha tari cuhva saquehen ityi Tatyí li chi ñu —catyí ra chi ña.

²⁵ Ta nacahan ña ta catyí ña chi ra:

—Yuhu chité vatyí cuquichi ra cuví Mesías, ra Cristo, ra cuví rey chi yo. Ta quiṭi quichi ra, maa ra cunacatyí tandihí chi yo —catyí ña chi ra.

²⁶ Tyicuan ta nacahan ra Jesús ta catyí ra chi ña:

—Ra cha cahún tuhun cuan, ican ra cahán chuhun —catyí ra chi ña.

²⁷ Tyicuan ta canachaꝝ coyo ra cachicá noo chihin ra ta iyo cacuñí ra cha ndatuhún ra Jesús chihin noo ñaha sihi. Soco ni noo ra ña caña ñi ra ndaca tuhun ra ñáa cha cuñí ra o ñáa cuenda ndatuhún ra chihin ñaha cuan. ²⁸ Tyicuan ta sandoꝝ ña quiyí ña ta cuanuhu ña chichi ñuu. Ta catyí ña chi ñayiví ñuu ña:

²⁹ —Ñaha ndo cunyehe ndo chi noo ra cha catyí tandihí cha cai. ¿Atu ñima ra Cristo cuví ra? —catyí ña chi ñu.

³⁰ Tyicuan ta quita coyo ñu ñuu cuan ta cuahan coyo ñu nu nyaá ra Jesús. ³¹ Ta cha niri ca cha cumañi chaa ñu nu nyaá ra, ra cachicá noo chihin ra, saniñí ra chi ra na cachi ra chiin. Ta cacatyí ra chi ra:

—Maestro, cachi chiin —catyí ra.

³² Soco catyí ra Jesús chi ra:

—Yuhu iyó noo nyayu cuacachi, ta nyoho ña chitó ndo —catyí ra chi ra.

³³ Tyicuan ta ra cachicá noo chihin ra quichaha candaca tuhun ra chi ra tahan ra, ta catyí ra:

—¿O iyó yóo cha quichi nyaca cha cachi ra, vaha? —cacatyí ra.

³⁴ Soco ra Jesús catyí ra chi ra:

—Cha chachí yuhu ican cuví cha sacuví cuhva cuñí ra cha tachi chii ta sacuví tyiño chaha ra chii. ³⁵ Nyoho catyí ndo: “Soco cumañi ca cumi yoo

ta naquehen yo cha tachí yo.” Soco yuhu catyí chi ndo vatyí nyehe ndo ta saha ndo cuenda cha cuaha ñáyiví cuñí ñu quichi ñu chihin, cuví ñu tari noo itu cha cuaan ta cuñí chi cha cahnu yo ñiñi. ³⁶ Ra cha naquehén ñiñi cuan ñihi ra yahví ra. Ta ñiñi cha naquehen vaha ra cuví ñu cha ñihi noo ñáyiví cha ma naa ca maa. Ta tyicuan caa cuví tacuhva vatyí ra cha tachí, ta ra cha naquehén ñiñi cuan ñin ri cacusiñi cuñi ra. ³⁷ Ta iyó noo tuhun ñáyiví cha catyí vatyí sñin ñu tachí ta sñin ñu naquehén ñiñi. Ta ndicha tuhun cuan. ³⁸ Yuhu sacuhin chi ndo vatyí cucahnu ndo ñiñi cha iyó nu ña saha tyiño ndo. Vatyí inga ra saha tyiño. Ta nyoho nyari cucahnu ndo ta naquehen vaha ndo ñiñi cuan —catyí ra Jesús chi ra.

³⁹ Ta cuaha xaan ñu ñuu Samaria cuan canachino ñiñi ñu chi ra Jesús cha cuenda cha catyí ñaha cuan, vatyí catyí ña: “Catyí ra tandihí cha cai chí”, catyí ña. ⁴⁰ Ta cuhva cha cachaa coyo ñu Samaria nu nyaá ra Jesús, cha cundahví ñu nuu ra nandoo ra chihin ñu. Ta ra Jesús ndoo ra yucuan uvi quiví chihin ñu. ⁴¹ Ta cuaha ca ñu cachino ñiñi ñu cha chiñi ñu tuhun cahán maa ra. ⁴² Tyicuan ta quichaha catyí ñu chi ñaha síhi cuan:

—Vityin chinó ñiñi ndi, ñima cha cuenda vatyí catyun chí ndi, soco vatyí chiñi maa ndi chihin soho ndi tuhun cahán ra, ta chitó vaha ndi vatyí ican ra cuví Cristo ra sacacú chi ñáyiví iyó síqui ñuhu ñáyiví ihya —catyí ñu.

Nu sanduvaha ra Jesús chi sehe noo ra cuví tyiño

⁴³ Cha yaha uvi quiví ta quita ra Jesús ñuu Samaria cuan ta cuahan ra ityi nu cuví Galilea. ⁴⁴ Vatyí suri maa ra Jesús catyí ra vatyí ñáyiví ñuu noo ra cuví profeta, ra chahá cuenda tuhun cahán Nyoo, ña sahá ñu ñáyiví chi ra. ⁴⁵ Tyicuan ta cuhva cha chaá ra Galilea, ñu iyó yucuan vaha tyiñuhu ñu chi ra, vatyí chahan coyo tucu maa ñu Jerusalén vico cuan, ta nyehe ñu cha vaha cha sacuví ra.

⁴⁶ Tyicuan ta cuanuhu tucu ra Jesús nya ñuu Caná nu cuví Galilea nu sananduví ra vinu chihin ndutya. Ta iyó noo ra cuví tyiño cuenda rey, ta iyó noo sehe ra cha cuhví ñuu Capernaum. ⁴⁷ Quiví cha chito ra cuan vatyí nachaa ra Jesús Galilea cha chahan ra Judea, chahan ra chinyehe ra chí ra, ta chican ra tumañi ñiñi chí ra na cuhun ra vehe ra ta sanduvaha ra chí sehe ra, vatyí cha cuñí cuii ri cúvi sehe ra. ⁴⁸ Tyicuan ta ra Jesús catyí ra chí ra:

—Nyoho ma chino ñiñi ndo tatu ma nyehe xihna ndo noo milagru —catyí ra chí ra.

⁴⁹ Soco ra cha vaha cuan catyí ra chí ra Jesús:

—Tata, coho chihin cha numi ri vityin cha ta cúvi ca sehi —catyí ra chí ra.

⁵⁰ Tyicuan ta ra Jesús catyí ra chí ra:

—Cuanuhu nya vehun. Sehun cha nduvaha ra —catyí ra chí ra.

Tyicuan ta ra cha vaha cuan chinó ñiñi ra tuhun cahan ra Jesús ta cuanuhu ra. ⁵¹ Ta cuhva cha cuanachaa ra nya vehe ra, quita coyo musu ra ta cacatyí ra chí ra:

—¡Cha nduvaha sehun!

⁵² Tyicuan ta quichaha ndaca tuhun ra chí ra ñáa cuhva nduvaha ra. Ta cacatyí ra chí ra:

—Icu cuhva ca ñin cha yaha hora tinyaa cahñi chí ra —cacatyí ra.

⁵³ Tyicuan ta tuví ñiñi ra cha vaha cuan, vatyí cuhva cuan catyí ra Jesús chí ra, “Cuanuhu vatyí sehun cha nduvaha ra.” Ta maa ra ta tandihí ñáyiví chí ra nachino ñiñi ñu chí ra Jesús.

⁵⁴ Ican ihya cuví cha cu uvi milagru cha sacuví ra Jesús cha nachaa ra Galilea cha chahan ra Judea.

5

Nu sanduvaha ra Jesús chi noo ra ña cuví caca

¹ Cha yaha tuhun cuan ta ra Jesús cuahan ra Jerusalén inga chaha vatyí ñu ñuu Israel sanducahnu ñu noo vico. ² Ta ñuu cuan iyó noo yuvehe cha nañi Yuvehe Cuenda Mbee. Ta

yatyin ri nyaa noo vehe cahnu. Ta chichi vehe cuan ñohó ndutya. Ta cha chihin sahan hebreo nañí chi Betesda. Ta iyó ohon tahan corredor. ³ Ta yucuan cayucu cuaha ñu cuhví: ñu cuaa, ñu coxo, ta ñu ña cuví nacanda. Canyatú ñu ñáá cuhva nacanda ndutya cuan. ⁴ Vatyí ña naha ña naha ri ta noó noo ángel sanacanda ra ndutya cuan. Ta yóo cha quihví xihna ca cha yaha nacanda ndutya cuan, nduvaha ñu ñiri maa ñáá ca cuehe ndoho ñu. ⁵ Ta yucuan catuví noo ra cuhví cha iyó oco chahun uñi cuiya cuhví ra. ⁶ Cuhva cha nanyehé ra Jesús chi ra catuví ra yucuan, tuví iñi ra vatyí cha cañi xaan cuiya caá ra tyicuan caa. Ta ndaca tuhun ra chi ra, ta catyí ra:

—¿Atu cuñún nduvahun?

⁷ Ta ra cuhví cuan nacahan ra ta catyí ra:

—Tata, yori maa tyihi chii chichi tanque tatu cha nacandá ndutya. Vatyí tahan ri cha cuñí quihví, inga ñu quihví xihna ca —catyí ra cuhví cuan chi ra Jesús.

⁸ Tyicuan ta catyí ra Jesús chi ra:

—Ndícuita ta naquehen yuvun ta cacon —catyí ra chi ra.

⁹ Ta caa cuhva ri cuan nduvaha ra, naquehen ra yuvi ra, ta nacaca ra. Soco vatyí quiví nyitatu ñu cuví, ¹⁰ ra cacuví nuu chi ñu Israel catyí ra chi ra cha nduvaha cuan:

—Quiví nyitatu yo cuví vityin, ña tahan chi cuison yuvun —catyí ra chi ra.

¹¹ Ta ra cha nduvaha cuan nacahan ra ta catyí ra:

—Ra cha sanduvaha chii, ican ra catyí chii: “Naquehen yuvun ta cacon”, catyí ra chii.

¹² Tyicuan ta quichaha candaca tuhun ra chi ra, ta catyí ra:

—¿Yóo ra cha catyí chuun vatyí naquehun yuvun ta cacon?

¹³ Soco ra cha nduvaha cuan ña chitó ra yóo cha sanduvaha chi ra. Vatyí cuaha xaan ñáyiví yucuan, ta ra Jesús yori ca ra vatyí cha cuahan ra.

¹⁴ Yaha cuan ta nañihí ra Jesús chi ra

chichi vehe ñuhu cahnu, ta catyí ra chi ra:

—Nyehe, vityin cha nduvahun, ma sacuví con cuatyí, coto ñáá ca cha cahnu ca cuví chuun —catyí ra chi ra.

¹⁵ Tyicuan ta chahan ra chicatyí ra chi ra Israel cuan vatyí ra Jesús cuví ra cha sanduvaha chi ra. ¹⁶ Ta cha cuenda cha sacuví ra Jesús tyehe caa quiví nyitatu ñu, yucuan chaha cuxaan xaan ra cacuví nuu chi ñu Israel chi ra Jesús. Ta cuñí ra cahñi ra chi ra. ¹⁷ Soco ra Jesús catyí ra chi ra:

—Maa Suti, nya vityin ta sahá tyiño ra. Ta yuhu tucu sahá tyiño —catyí ra.

¹⁸ Ta cha cuenda cha chahan ra tuhun ihya, xaan ca cuñí ra Israel cuan. Ta ñihi ca cuñí ra cahñi ra chi ra vatyí cuñí maa ra vatyí ña sahá ra ñáyiví quiví nyitatu ñu, ta siin rí tyi sahá ra tuhun tyi ñin ri cuví ra chihin Nyoo vatyí catyí ra tyi sutu ra cuví chi Nyoo.

Sehe Nyoo iyó xaan ityi chi ra cha cunyaca ñaha ra

¹⁹ Tyicuan ta ra Jesús catyí ra chi ra:

—Cha ndicha catyí chi ndo vatyí yuhu, cha cuví Sehe Nyoo, ñahri cha savahí cha maa ri mai. Soco sacuví cha nyehí sacuví Suti. Tandihí cha sacuví Suti ta sacuví tucu maí. ²⁰ Vatyí cuñí xaan Suti chii, vatyí Sehe ra cuví chii, yucuan chaha sañahá ra tandihí cha sacuví ra chii. Ta nahnu ca cha cusañaha ra, tacuhva cu iyo cuñi ndo. ²¹ Tari sanandotó Nyoo Suti chi ndiyi, ta chahá ra ñáyiví coo ñu, tyicuan caa tucu yuhu cha cuví Sehe ra, chahí ñáyiví chi ñu cuñí mai cuhve. ²² Ta Suti Nyoo ña sandaa ra cuatyí ni noo ñu, soco chi yuhu cha cuví Sehe ra chaha ra ityi na sandai cuatyí ñáyiví. ²³ Tyicuan caa sacuví Suti Nyoo vatyí cuñí ra tyi sacahnu ñáyiví chi Sehe ra tari sacahnú ñu chi maa ra. Ñu ña sacahnú chi yuhu Sehe Nyoo, ñiri chi Suti ta ña sacahnú ñu. Tyi maa ra tachí ra chi yuhu cha cuví Sehe ra.

²⁴ Ta cha ndicha catyí vatyí ñu tya-sohó tuhun cahín ta chinó iñi ñu chi ra cha tachí chii, iyó ñu noo ñáyiví

chaa cha ma naa ca maa. Ta ma cuhun ca ñu anyaya cha catyi cuatyí ñu vatyí cha sacacū Nyoo añima ñu ndaha tuhun chihi, ta nacuhva ra ñayiví chaa coo ñu. ²⁵ Ñáyiví tari cha ndiyí cuví ñu soco cha ndicha catyí chi ndo vatyí vachi chi quiví vatyí cuiñi ñu ndusu Sehe Nyoo. Ta ñu cha quichahá cha cahán ra, cucoo ñu ñayiví cha ma naa ca maa. Ta vityin cuví quiví cha cahán tuhun. ²⁶ Vatyí Nyoo Suti iyó ra ñayiví cha ma naa ca maa. Ta chahá tucu ra ityi chi yuhu cha cuví Sehe ra vatyí cuhve ñayiví coo ñáyiví. ²⁷ Ta Nyoo chahá ra vatyí sandai cuatyí ñáyiví, vatyí Rayi cha quichi nya gloria cuví yuhu. ²⁸ Ma iyo cuñi ndo tuhun ihya, vatyí cuchaa chi quiví vatyí ñu ndiyí chichi ñaña cucuiñi ñu ndusu Sehe Nyoo. ²⁹ Ta cuquita coyo ñu chichi ñaña. Ta ñu cha sacuví cha vaha cunandoto ñu vatyí coo ñu noo ñayiví chaa. Soco ñu ña sacuví cha vaha cunandoto ñu vatyí cuhun ñu anyaya nu cutachi tuñi Nyoo chi ñu.

Nu sañahá chi vatyí ra Jesús iyó ityi chi ra cha cuhva ra ñayiví chaa coo ñáyiví

³⁰ 'Yuhu ñima noo tuhun ri mai sacuví ñáá noo cha sacuví. Nyehí cha caá añima ñáyiví yoso cuhva catyí Suti. Ta vaha cuhva nyehí vatyí ña sacuví cuhva cuñí mai, soco cuhva cuñí Suti, ra cha tachí chii. ³¹ Ta tatu suri mai cuví cha ndaa chi mai, ñahri yahvi nyaá cha ndaa cuan. ³² Soco iyó inga ra cuví cha ndaa cuenda yuhu. Ta yuhu chité vatyí cha cahán ra cuende yucuan cuví noo cha ndaa ta cha ndicha. ³³ Nyoho chindaca tuhun ndo chi ra Juan. Ta tuhun cha cahán ra, ndicha vaha. ³⁴ Soco yuhu ña chiñuhú cha cuví rayi cha ndaa cuende. Soco catyí tuhun ihya chi ndo cha cuenda cha vaha chi ndo, tacuhva vatyí chino iñi ndo chii ta cacu añima ndo. ³⁵ Ra Juan cuví ra tari noo lámpara cha cayú ta sacundichín. Ta nyoho tahanan iñi ndo cusii iñi ndo nu ndichin ñuhu ra suhva ri quiví. ³⁶ Soco yuhu iyó noo cha ndaa vaha

ca cha nuu cha catyí ra Juan. Vatyí tandihí cha sacuví yuhu, maa Suti catyí chii na sacuvi. Ta ican cuví cha ndaa cha nyehé ndo vatyí ndicha vatyí maa Suti tachí chii. ³⁷ Ta tyicuan caa tucu Suti, ra cha tachí chii, cuví ra cha ndaa cuende. Nyoho ta cuiñi ca ndo ndusu ra. Ta ni ta nyehe ca ndo chi ra. ³⁸ Ta tuhun ra cha cahán nuu ndo, ña ndoó chi añima ndo vatyí ña chinó iñi ndo vatyí Nyoo tachí ra chii. ³⁹ Nyoho chihin cuenda xaan sacuaha ndo nu tutu Nyoo, vatyí cuñí maa ndo vatyí nuu cuan cuanañihi ndo ñayiví chaa cha ma naa ca maa. Soco nu tutu Nyoo cuan, tuhun yuhu cahán chi. ⁴⁰ Ta nyoho ña cuñi ndo quichi ndo nu nyaí tacuhva vatyí cuhve ñayiví chaa cuan coo ndo.

⁴¹ 'Yuhu ña nduqui nu cuvahi nuu ñáyiví. ⁴² Vatyí yuhu ñohó nui chi nyoho ta chité vatyí ña cuñi ndo chi Nyoo. ⁴³ Yuhu vachi cuenda Suti ta nyoho ña naquehén ndo tuhun cahán. Soco tatu inga ra vachi ra cuenda maa ra, chi ra cuan nachino iñi ndo. ⁴⁴ Nyoho ña cuví chino iñi ndo chii vatyí cuñi ndo cuvaha ndo nu tahan ndo. Ta ña nducú ndo nu cuvaha ndo nuu Nyoo cha noo tuhun ri maa iyó. ⁴⁵ Ma cuñi ndo vatyí cutyaa yuhu cuatyí chaha ndo nuu Suti. Ra Moisés cuví ra tyaá cuatyí chaha ndo vatyí ña sacuví ndo ley cha tyaá ra. Ta ley ra cuñi maa ndo vatyí cunyaca chi chi ndo andiví. ⁴⁶ Vatyí tyehe ta chinó iñi ndo tuhun cahán ra Moisés, chinó tucu iñi ndo tuhun cahán yuhu. Vatyí tuhun yuhu ican tyaá ra. ⁴⁷ Soco tatu ña chinó iñi ndo tuhun cha tyaá ra, ¿yoso caa cuchino iñi ndo tuhun cahán yuhu? —catyí ra Jesús chi ra cacuví nuu chi ñu Israel.

6

Nu chahá ra Jesús cha cachi ohon mil rayi

(Mt. 14.13-21; Mr. 6.30-44; Lc. 9.10-17)

¹ Cha yahá cuan, ra Jesús cuahan ra inga chiyo miñi cahnu cha nañi Tyañuhu Galilea. Ta suri miñi cuan

nañi chi Miñi Tiberias. ² Cuaha xaan ñáyivi cuahan nyicon chi ra cha cuenda vaty nyehé ñu milagru cha sacuvi ra vaty sanduvahá ra chi ñu cuhvi. ³ Tyicuan ta ra Jesús ndaa ra noo yucu ta chicunyaá ra yucuan chihin ra cachicá noo chihin ra. ⁴ Ta cha nyaña quivi vico cha nañi pas-cua cha sanducahnú ñu Israel. ⁵ Cha nanyehe ra Jesús vaty cuaha ñáyivi nyicón chi ra, ta quichahá catyí ra chi ra Felipe:

—¿Yoso caa cusata yo cha cachi tandihi ñáyivi cuaha ihya? —catyí ra chi ra.

⁶ Soco catyí ri maa ra chi ra Felipe cha nducú nyehe ra chi ra ñáá catyí ra, vaty ra Jesús chitó vaha ra ñáá cha cuasacuvi ra. ⁷ Tyicuan ta nachan ra Felipe ta catyí ra:

—Yahvi cha quehen yo cha saha tyiño yo ucha tahan yoo ta ma ñihi sata yo cha cachi ñu chiin chiin —catyí ra Felipe.

⁸ Ta ra Andrés nonga ra nyicón chi ra Jesús, ta yañi ra Simón Pedro cuví chi ra, catyí ra chi ra Jesús:

⁹ —Ihya nyaá noo ra cuehe luhlu nyisó cue ohon tahan pan cebada ta uvi tahan tiyaca. Soco ¿nyata cuví ihya ta cuaha ñáyivi ihya? —catyí ra Andrés.

¹⁰ Tyicuan ta ra Jesús catyí ra chi ra:

—Catyí ndo chi tandihi ñu na cunyicu ñu —catyí ra.

Iyó vavaha cuhu yucuan ta chicun-yicu ñu ta cha ohon mil rayi, ta siin ri ñusihi chihin ra cuatyaa. ¹¹ Tyicuan ta quehen ra Jesús pan cuan ta cha yahá nacuhva ra tyahvi nyoo chi Nyoo, chahá ra chi ra cachicá noo chihin ra. Ta ra cachicá noo chihin ra casachá ra chi tandihi ñu canyicú cuan. Suri tyicuan caa sacuvi tucu ra chihin tiyaca cuan, chahá ra cachi ñu nyacua nya cha chitu chi ñu. ¹² Ta cuhva cha ndaha iñi ñu, ra Jesús catyí ra chi ra cachicá noo chihin ra:

—Nacoñehe ndo yiquin cha ndoo tacuhva vaty ñahri cha tivi —catyí ra chi ra.

¹³ Canacoñehe ra, ta casacutu ra uchi uvi tahan tica chihin yiquin

cha ndoo cuan cha cuenda ohon tahan pan cuan. ¹⁴ Tyicuan ta cha yahá nyehe ñáyivi cuan milagru cha savahá ra Jesús, ta catyí ñu:

—Ican ndicha cuii ra ihya cuví profeta, ra chahá cuenda tuhun cahan Nyoo cha nyaá cha quichi siqui ñuhu ñáyivi ihya —catyí ñu.

¹⁵ Soco tuví iñi ra Jesús vaty cuñí ñu quehen ñu chi ra chihin fuerza vaty sacuvi ñu rey chi ra. Ta cuahan ri ra nu sucun yucu cuan inga chaha vaty cunyaa notuhun maa ra.

Nu chicá ra Jesús nu ndutya (Mt. 14.22-27; Mr. 6.45-52)

¹⁶ Ta cha cuaa, ta noo coyo ra cachicá noo chihin ra Jesús yuhu miñi cuan. ¹⁷ Ta quihvi coyo ra chichi canoa ta cuayaha sava ra mahñu miñi cuan vaty cuchaa ra Capernaum. Cha cuña ta ra Jesús suri cha ta ndichi ca ra. ¹⁸ Tyicuan ta chaá noo tatyí ñihi. Ta iyo ndicuita ndutya miñi cuan. ¹⁹ Tyicuan ta cha cayahá ra chihin canoa cuan tari noo cha ohon o iñu kilómetro, ta cananyehe ra chi ra Jesús suri chicá ra nu ndutya cuan cuachaa ra nu nyaá canoa cuan, ta canayuhvi ra. ²⁰ Soco ra Jesús catyí ra chi ra:

—¡Yuhu cuví, ma yuhvi ndo!

²¹ Tyicuan ta chihin cha casi cuñi ra caquehen cuenda ra chi ra Jesús chichi canoa. Tyicuan ta tañi ri ta cachaa ra yuhu miñi nu cuahan coyo ra.

Nu nanducú ñáyivi chi ra Jesús

²² Tuvi inga quivi cuan cha ñaha cuii chitó ñáyivi cha ndoo inga chiyo miñi cuan vaty ra cachicá noo chihin ra Jesús cuahan coyo ra chihin noo canoa cha iyó cuan. Vaty noo ri maa iyó. Ta chitó ñu tyi ña cuahan ra Jesús chihin ra. ²³ Soco chaá coyo ca canoa cha quita coyo ñuu Tiberias. Chaá chi yatyin ri ityi nu cachachi ñu pan, yahá cha nacuhva Sutu Mañi yo tyahvi nyoo chi Nyoo. ²⁴ Tyicuan ta cha nanyehe ñu tyi yori ra Jesús yucuan ta ni ra cachicá noo chihin ra, quihvi coyo ñu chichi inga canoa

cuan ta cuahan ñu nya Capernaum cuananducu ñu chi ra.

Ra Jesús cuví pan cha chahá ñáyiví chaa coo yo

²⁵ Cha chaꞗ coyo ñu inga chiyo miñi cuan, nañihí ñu chi ra Jesús. Ta ndaca tuhun ñu chi ra:

—Maestro, ¿ama chaꞗn ihya? —catyí ñu chi ra.

²⁶ Soco ra Jesús catyí ra chi ñu:

—Cha ndicha catyí chi ndo vatyí nyoho nanducú ndo chii soco cha cuenda vatyí chachí ndo nyacua nya cha chitú chi ndo. Soco ñima vatyí nyehe ndo milagru cha sacuví. ²⁷ Ma saha tyiño ndo cuenda nyayu cha ndihí, soco saha tyiño ndo cuenda nyayu cha ña ndihí ta chahá chi noo ñáyiví chaa cha ma naa ca maa coo ndo. Ican ihya cuví nyayu cha cucuhve chi ndo vatyí Nyoo Suti tyaa tyiño cuan chii vatyí yuhu cuví Rayíi cha quichi nya gloria —catyí ra Jesús.

²⁸ Tyicuan ta quichahá ndaca tuhun ñu chi ra ta catyí ñu:

—¿Ñáá cha cuví sacuvi ndi tacuhva sacuvi ndi cuhva cuñí Nyoo? —catyí ñu.

²⁹ Tyicuan ta ra Jesús catyí ra chi ñu:

—Cha cuñí Nyoo cha sacuvi ndo ican cuví ihya: Cha chino iñi ndo chi yuhu, ra cha tachí ra chi —catyí ra Jesús chi ñu.

³⁰ Ta candaca tuhun tucu ñu chi ra, ta catyí ñu:

—¿Ñáá seña cuhvon chi ndi tacuhva vatyí nyehe ndi ta chino iñi ndi chuun? ¿Ñáá cha cuasacuvun?

³¹ Sutu chahnu ndi chachí ñu maná chiqui ndi nu yori ñáyiví iyó quívi cuan, tari catyí tuhun Nyoo: “Nyoo chahá ra pan cha quichí ityi andívi cachi ñu” —catyí ñu chi ra Jesús.

³² Ta ra Jesús nacahan ra ta catyí ra:

—Cha ndicha catyí chi ndo. Ñima ra Moisés chahá pan cha quichí ityi andívi cachi ñu, soco Nyoo Suti cuví ra chahá pan cha ndicha vaha cha quichí ityi andívi. ³³ Vatyí pan cha chahá Nyoo, ican cuví ra cha noꞗ ityi andívi. Ta ican cuví ra cha chahá

noo ñáyiví chaa coo ñu iyó siqui ñuhu ñáyiví —catyí ra Jesús.

³⁴ Tyicuan ta quichahá cacatyí ñu chi ra:

—Tata, cuhva pan chiña cachi ndi tyicuan ri maa —catyí ñu.

³⁵ Ta nacahan ra Jesús ta catyí ra chi ñu:

—Yuhu cuví pan cha chahá cha conyito aña ndo. Ñu vachi nu nyaí ma cusoco ca aña ñu, ta ñu chino iñi chii ma cu ityi ca maa aña ñu. ³⁶ Soco cha yaha catyí chi ndo vatyí nyoho ña chinó iñi ndo vasi cha nyehé ndo chii. ³⁷ Tandihí ñáyiví cha chahá Nyoo Suti chii, vachí ñu nu nyaí, ta ñu vachi nu nyaí, naquehén cuende chi ñu. ³⁸ Vatyí yuhu quichí ityi andívi soco ñima cha cuenda cha sacuvi cuhva cuñí mai, soco sacuvi cuhva cuñí ra cha tachí chii. ³⁹ Ta cuhva cuñí ra cha tachí chii, ican cuví ihya: cha ma sacunaí ni noo ñu cha chahá ra chii, tacuhva vatyí sanandote chi ñu nu cuandihí quívi. ⁴⁰ Suti, ra cha tachí chii, cuñí ra vatyí tandihí ñáyiví cha nyehe chi yuhu ra cha cuví Sehe Nyoo, ta chino iñi ñu chii, coo ñu noo ñáyiví cha ma naa ca maa. Ta suri yuhu cusanandote chi ñu nu cuandihí quívi —catyí ra Jesús chi ñu.

⁴¹ Cha cuenda cha cahan ra Jesús tyehe caa, ñu Israel quichaha cacahan nyaa ñu chi ra vatyí catyí ra: “Yuhu cuví pan cha quichí ityi andívi”, catyí ra. ⁴² Tyicuan ta quichaha catyí ñu:

—¿Atu ñima ra cuví ra Jesús, sehe ra José vii? Yoó ñohó nuu yo chi sutu ra ta chi sihi ra. ¿Yoso caa cha catyí ra vatyí ityi andívi quichí ra? —catyí ñu.

⁴³ Tyicuan ta ra Jesús catyí ra chi ñu:

—Sandihí ndo tuhun cha cahan nyaa ndo. ⁴⁴ Yori maa ñu quichi nu nyaí tatu ñima Suti, ra cha tachí chii, cana chi ñu. Ta cusanandote chi ñu nu cuandihí quívi. ⁴⁵ Nu libru cha catyaa ra profeta Nyoo ta cha naha catyí chi tyehe caa: “Nyoo cusañaha ra chi tandihí ñáyiví.” Yucuan chaha vatyí ñu cha tyasohó tuhun cahan

Nyoo Suti ta cutuhvá ñu tuhun cahan ra, ican ñu vachi nu nyaí.

⁴⁶ Ñima cha cuenda vatyí nyehé ñu chi Nyoo Suti, vatyí yori nyehé chi ra. Soco noo ri mai nyehé chi ra. Ta iquen cuví ra cha quita nu nyaá ra.

⁴⁷ Cha ndicha catyí chi ndo vatyí ñu chinó iñi chii coo ñu noo ñayiví chaa cha ma naa ca maa. ⁴⁸ Yuhu cuví pan cha chahá cha conyito añima ndo.

⁴⁹ Sutu chahnu ndo chachí ñu maná chiqui ndi cuan, soco suri cachihí ñu.

⁵⁰ Soco yuhu, tuhun pan cha quichí ityi andiví cahín chihin ndo, vatyí nya ñu cachi pan cuan, ma cúvi añima ñu.

⁵¹ Suri mai cuví pan nyitó cha quichí ityi andiví. Yóo cha cachi pan ihya coo ñu tyicuan ri maa. Pan cha cuhva yuhu, ican cuví coño ñuhi. Ta cuhve ñayiví cha cuenda tandihí ñayiví iyó síqui ñuhu ñayiví —catyí ra Jesús chi ñu.

⁵² Tyicuan ta ra Israel cuan quichahá candatuhun ra chihin tahan ra ta cacatyí ra:

—¿Yoso caa cuhva ra cha cachi yo coño ñuhu ra?

⁵³ Ta ra Jesús catyí ra:

—Cha ndicha catyí chi ndo, yuhu cuví Rayí cha quichí nya gloria, ta tatu nyoho ta ma cachi ndo coño ñuhi, ta tatu ma coho ndo niñi, ma cuví coo ndo ñayiví chaa. ⁵⁴ Ñu chachí coño ñuhi ta chihí ñu niñi, iyó ñu noo ñayiví chaa cha ma naa ca maa. Ta yuhu cusanandote chi ñu nu cuandihí quiví.

⁵⁵ Vatyí coño ñuhi ican cuví pan cha ndicha vaha cha tahán chi cachi ndo, ta niñi cuví vinu cha ndicha vaha cha tahán chi coho ndo. ⁵⁶ Ñu chachí coño ñuhi ta chihí niñi, ñn ri cuví ñu chihin. Ta mai ñn ri cuví chihin ñu. ⁵⁷ Suti ra tachí chii, Nyoo nyitó cuví ra. Ta yuhu iyé chihin tunyee iñi ra. Ta suri tyicuan caa tucu ñu chachí coño ñuhi, coo ñu chihin tunyee iñi iyó chii.

⁵⁸ Tuhun pan cha quichí ityi andiví cahín. Pan ihya ñima tari maná cha chachí sutu chahnu ndo, vatyí suri chihí ñu. Ñu chachí pan cha cuví coño ñuhi, coo ñu tyicuan ri maa —catyí ra Jesús.

⁵⁹ Ican tuhun ihya sañaha ra Jesús nu ndu ñn ri ñu chichi vehe ñuhu Capernaum.

⁶⁰ Cuaha xaan ñayiví nyicón chi ra Jesús. Ta cuhva cha chiñi ñu tuhun ihya catyí ñu:

—Tuhun cha cahan ra ihya, yíi xaan cha natí cuenda yo. Yori cuví quichaha tuhun cahan ra —catyí ñu.

⁶¹ Tyicuan ta tuví iñi ra Jesús vatyí ña cuñí ñu naquehen ñu tuhun cuan. Ta ndaca tuhun ra chi ñu:

—¿Atu quiñi cuñí ndo cha cahín tuhun ihya? ⁶² Ta ¿yoso caa sacuvi ndo tatu nyehe ndo chi yuhu Rayí

cha quichí nya gloria nandaa xica tiqui inga chaha ityi nu quite quiví xihna ri? ⁶³ Tatyí li Nyoo ican cuví cha chahá ñayiví chaa. Coño ñuhu,

ña tyinyeé chi coo yo ñayiví cuan. Ta tuhun cha cahín chihin ndo, Tatyí li Nyoo cuví ta chahá chi cha conyito

añima ndo. ⁶⁴ Soco yihí suhva ndo cha ña chinó iñi ndo chii —tyicuan caa catyí ra Jesús.

Vatyí nya quiví xihna ri ta chitó ra yóo cha ña chinó iñi chi ra ta yóo cha cunaxico tuhun chi ra. ⁶⁵ Ta catyí ra:

—Yucuan chaha catyí chi ndo vatyí yori ñu cuví quichí nu nyaí tatu ñima Nyoo Suti cana chi ñu —catyí ra Jesús.

⁶⁶ Nya ndaha quiví cuan cuaha xaan ñu nyicón chi ra Jesús sandoo ñu chi ra. Ta ña chicá noo ca ñu chihin ra.

⁶⁷ Tyicuan ta ra Jesús ndaca tuhun ra chi ndihí uchi uvi tahan ra chicá noo chihin ra, ta catyí ra:

—¿Atu cuñi tucu nyoho cuhun ndo? —catyí ra chi ra.

⁶⁸ Soco nacahan ra Simón Pedro ta catyí ra:

—Sutu Mañi yuhu, ¿yóo chi cunyi-con ndi? Ta noo tuhun yoho cahún tuhun ñayiví cha ma naa ca maa coo ndi. ⁶⁹ Nyuhu chinó iñi ndi, ta ñoho nuu ndi chuun vatyí yoho cuvún ra

cuví Cristo Sehe Nyoo nyitó.

⁷⁰ Ta nacahan ra Jesús ta catyí ra:

—¿Atu ñima yuhu nacachí chi ndi uchi uvi nyoho? Ta noo nyoho cuví cuihna —catyí ra.

⁷¹ Tuhun cha cahán ra Jesús ihya, tuhun ra Judas Iscariote sehe ra Simón cuví. Vatyí ra Judas cuví ra cucuhva cuenda chi ra Jesús chi ra xaan iñi chi ra, vasi noo ra cha uchi uvi cuan cuví ra.

7

Nu ña cachinó iñi yañi ra Jesús chi ra

¹ Cha yaha tuhun ihya, ta ra Jesús chicá noo ra ityi Galilea. Ña cuñi ra cuhun ra Judea vatyí ra cacuví nuu chi ñu Israel cuan cacuñi ra cacahñi ra chi ra. ² Ta cha nyaña quivi vico cha sanducahnu ñu Israel ndi cuiya ri. Ta nañi chi vico Tabernáculo, ³ Yucuan chaha yañi ra Jesús cacatyí ra chi ra:

—Ma ndoun ihya. Cuahan Judea tacuhva vatyí ñu naquehén tuhun cahún cha nyicú yucuan nyehe ñu tyiño cha sacuvún. ⁴ Vatyí tatu cuñi yo cha cohon nuu ñáyivi chi yo, ma xehe ri sacuví yo cha sacuví yo. Ta yoho tatu ndicha cha sacuvún tuhun ihya, sacuvi nuu tandihi ñáyivi —cacatyí yañi ra chi ra.

⁵ Tyicuan caa cacatyí ra vatyí ni yañi ra ta ña chinó iñi ra chi ra.

⁶ Tyicuan ta ra Jesús catyí ra chi ra:

—Ta chaa ca cuhva cha cuhun yuhu. Soco nyoho savahri quivi cuví cuhun ndo. ⁷ Vatyí ñáyivi ña cutasi cuñi ñu nyehé ñu chi ndo, soco chi yuhu tasi cuñi ñu nyehé ñu cha cuenda vatyí cachi ri catyí chi ñu vatyí ña vaha cha nyacuví ñu. ⁸ Cuahan nyoho vico cuan. Yuhu ma cuhin vatyí ta chaa ca cuhva cha tahán chi cuhin —catyí ra.

⁹ Yaha cuan ta ndoq ra nya Galilea.

Nu ñohó ra Jesús vico Tabernáculo

¹⁰ Cha yaha cuahan coyo yañi ra Jesús, cuahan tucu maa ra vico cuan, soco xehe ri. ¹¹ Ta ra cacuví nuu chi ñu Israel cananducú ra chi ra vico cuan, ta cacatyí ra chi ra tahan ra:

—¿Nya nyaá ra cuan? —catyí ra.

¹² Ta ñáyivi ñohó vico cuan cacahán ñu tuhun ra. Ta yihí ñu catyí ñu: “Noo ra vaha cuví ra.” Ta inga ñu catyí

ñu: “Ña vaha ra, sandaví ñaha ra chi ñáyivi”, catyí ñu.

¹³ Soco yori cahán ndichin tuhun ra cha cuenda cha yuhví ñu chi ra cacuví nuu cuan.

¹⁴ Cha cusava iyó vico ta quihvi ra Jesús chichi vehe ñuhu cahnu quichaha cahan ra nuu ñáyivi. ¹⁵ Ta ra cacuví nuu cuan iyó cacuñi ra ta cacatyí ra chi ra tahan ra:

—¿Yoso caa chitó ra ihya ta ña sacuahá ra? —catyí ra.

¹⁶ Ta nacahan ra Jesús ta catyí ra:

—Tuhun cha sañahí, ñima cha cuenda mai cuví, soco cuenda ra cha tachí chii cuví. ¹⁷ Tatu yihí nyoho cha cuñi ndo sacuvi ndo cuhva cuñi Nyoo, cua coto ndo vatyí cuenda Nyoo sacote ta ñima cha cuenda mai. ¹⁸ Ra cha cahán cuenda maa, cahán ra na sacahnu ñáyivi chi ra. Soco ra nanducú cha sacahnu ñu chi Nyoo, ra cha tachí chi ra, ican ra cuan cahán cha ndicha. Ta ñahri cha sandaví ñaha ra.

¹⁹ ¿Atu ña ndicha vatyí ra Moisés chaha ley chi ndo? Soco ni noo nyoho ña quichahá ndo ley cuan. ¿Ñáá tuhun cuñi ndo cahñi ndo chii? —catyí ra.

²⁰ Ta nacahan ñáyivi ta catyí ñu chi ra:

—Noo tatyí ña vaha yihí chi yoho. Yori cuñi cahñi chuun —catyí ñu chi ra.

²¹ Ta catyí ra Jesús:

—Cha catyí noo milagru cha sacuvi quivi nyitatu yo, iyo xaan cuñi nyoho.

²² Soco ra Moisés catyí ra chi ndo vatyí sacuvi ndo costumbre circuncisión. Vasi ñima ra quichaha chihin tuhun cuan, soco ñáyivi chi ra ityi chata, casacuvi tyicuan caa. Yucuan chaha nyoho sacuví ndo costumbre cuan vasi tahán chi quivi nyitatu yo.

²³ Ta vityin, vaha tatu cha cuenda cha ña cuñi ndo nacahnu ndo ley ra Moisés sacuvi ndo tyicuan caa vasi quivi nyitatu yo tahán chi. Soco tatu tyicuan caa sacuvi ndo, ¿ñáá tuhun cha cuxaan ndo chii cha cuenda vatyí sanduvahi naní coño ñuhu noo ra cuan quivi nyitatu yo? ²⁴ Ma tyaa ndo

cuatyí siqui ñáyivi tatu ña chitó vaha ndo ñáá cha sacuvi ñu. Cuatu ndo nya nyehe vaha ndo, tyicuan ta cucoto ndo yoso caa sacutuñi ndo chihin cha ndaa ta chihin cha ndicha vaha.

Nu cahán ra Jesús tuhun maa ra

²⁵ Tyicuan ta suhva ñu iyó Jerusalén, quichaha ndaca tuhun ñu:

—¿Atu ñima chi ra ihya canducu ra cha cahñi ra? ²⁶ Ta maa ra nanyaá cuan cahán ra nuu ñáyivi. Ta yori maa catyi ñáá cha catyi chi ra. ¿O vasi ca chinó tucu iñi ra cacuvi nuu vatyí ra ihya ra Cristo ra cuvi rey cha saquichi Nyoo cuvi ra? ²⁷ Soco yoó chitó yo nya quita ra ihya. Soco quivi quichi ra Cristo yori coto nya ityi quichi ra cuan —catyi ñu.

²⁸ Chitó ra Jesús tuhun cha ndatuhún ñu ihya cuhva cha sañahá ra chichi vehe ñuhu. Ta ñihi cahán ra ta catyi ra:

—¡An ñohó nuu ndo chii ta chitó ndo nya ityi quichi, cuñi maa ndo! Soco yuhu vachí soco ñima cuenda mai. Vachí cuenda ra cha tachí chii, ra cha cuvi cha ndicha. Ta nyoho ña ñohó nuu ndo chi ra. ²⁹ Yuhu ñohó nui chi ra vatyí cuenda ra vachí, ta maa ra tachí chii —catyi ra Jesús.

³⁰ Tyicuan ta cuñi ñu tyihi ñu chi ra chichi vehe caa. Soco ni noo ñu ña tñin ñu chi ra cha cuenda vatyí ta chaa ca quivi cha tahán chi tñin ra chi ra.

³¹ Soco cuaha xaan ñu chinó iñi chi ra. Ta catyi ñu:

—Ican ra ihya cuvi Cristo. ¿Atu cuaha ca milagru sacuvi inga ra tatu quichi ra? —catyi ñu.

Nu tachi ra cuvi fariseo policia cuquehen chi ra Jesús cohon ra vehe caa

³² Cha chiñi ra fariseo cha cahán ñáyivi tuhun ra Jesús, maa ra ta ra cacuvi nuu chi tata sutu catachi ra chi policia cuenda vehe ñuhu cuan cuquehen ra chi ra tyi cohon ra vehe caa. ³³ Tyicuan ta ra Jesús catyi ra:

—Cunyai chihin ndo suhva ri ca quivi. Yahá cuan ta cunuhi nu nyaá ra cha tachí chii. ³⁴ Nyoho cunanducu ndo chii. Soco ma nañihi ndo chii.

Vatyí ma cuvi cuhun ndo nu cuacun-yai —catyi ra Jesús.

³⁵ Tyicuan ta quichaha candaca tuhun ra cacuvi nuu chi ñu Israel chi ra tahan ra:

—¿Nya cuhun ra ihya cha ma nañihi yo chi ra? ¿O cuhun ra nu nyaa ra Israel cha ca iyó ñuu Grecia vatyí sañaha ra chi ñu iyó yucuan, vaha?

³⁶ ¿Ñáá cha cuñi chi catyi tuhun cahan ra chihin yo? Vatyí catyi ra: “Cuananducu ndo chii soco ma nañihi ndo chii. Vatyí ma cuvi cuhun ndo nu cucunyai” —tyicuan caa cacuvi yuhu ra tuhun ra.

Ñu chinó iñi chi Nyoo cuohon Tatyí Ii ra aña ñu

³⁷ Quivi nu ndihi chiyo vico, yucuan quivi cha ñiñi ca. Ta quivi cuan ndicuita ra Jesús ta ñihi cahán ra ta catyi ra:

—Tatu nya noo ndo ityi aña ndo tuhun Nyoo, ñaha ndo ta nachino iñi ndo chii. ³⁸ Ñu cha chinó iñi chii, chichi aña ñu cucono tari noo yuvi ndutya cha nyitó, tari cuhva catyi nu tutu Nyoo —catyi ra Jesús.

³⁹ Soco chihin cuan cuñi ra catyi ra vatyí ñu chinó iñi chi ra cunaquehen ñu Tatyí Ii Nyoo, vatyí quivi cuan ta quichi ca Tatyí Ii Nyoo vatyí ra Jesús, ta cunuhu ca ra nya gloria nu cusac-ahnu Sutú ra chi ra.

Nu cusñin ñáyivi cha ña tahán iñi tuhun cahan ra

⁴⁰ Suhva ñáyivi cha chiñi ñu tuhun ihya, catyi ñu:

—Ndicha vatyí ra ihya profeta Nyoo cha nyaá quichi cuvi ra —catyi ñu.

⁴¹ Ta inga ñu catyi ñu:

—Ican ra cuvi Cristo —catyi ñu.

Soco inga ñu catyi ñu:

—¿Yoso caa cha ra Galilea cuvi ra Cristo? ⁴² Vatyí nu tutu Nyoo catyi chi vatyí ra Cristo cucuvi ra ñáyivi vachi tata rey David ta ra ñuu Belén cucuvi ra tari ra David —catyi ñu.

⁴³ Tyicuan ta ñáyivi cuan canatahvi sava ñu cha cuenda ra Jesús. ⁴⁴ Yihí ñu cuñi ñu quehen ñu chi ra cutyihí ñu

chi ra chichi vehe caa. Soco yori t̄in chi ra.

Ra cacuví nuu vehe ñuhu ña cachinó ñi ra chi ra Jesús

⁴⁵ Tyicuan ta policia vehe ñuhu cahnu cuan, cuanuhu coyo ra nu nyicú ra fariseo ta ra cuví nuu chi tata sutu. Ta candacá tuhun ra chi policia cuan ta cacatyí ra:

—¿Ñáá tuhun ña quehen ndo chi ra?

⁴⁶ Ta policia cuan cacatyí ra:

—¡Ni noo chaha ta ni yori tuhva cahan tari cahan ra cuan! —cacatyí ra.

⁴⁷ Tyicuan ta ra fariseo catyí ra chi policia cuan:

—¿Atu sandaví ñaha ndihi ra chi nyoho ñandihí? ⁴⁸ ¿Nyehe ndo vatyí ni noo ra cuví nuu chi ndi cha cuví ndi fariseo ta ña chinó ñi ra cuan?

⁴⁹ Soco maa ri ñáyivi cha ña chito nyicón chi ra. Soco ña vaha ñu nuu Nyoo —catyí ra.

⁵⁰ Tyicuan ta ra Nicodemo, ra cha chahan nu nyaá ra Jesús cha cha cuaa, cuví ra noo ra fariseo, ta catyí ra chi ra:

⁵¹ —Catyí ley vatyí ma cuvi tachi tuñi yo chi noo ra tatu ma cuiñi xihna yo tuhun cahan ra, tacuhva coto yo ñáá cha sacuvi ra —catyí ra chi ra.

⁵² Tyicuan ta canacahan ra ta cacatyí ra chi ra:

—¿Atu suri ra Galilea cuví tucu yoho? Sacuaha nu tutu Nyoo ta nyehun, vatyí ni noo ra chahá cuenda tuhun cahan Nyoo ta ña nyaá chi cha quichi ra ityi Galilea —cacatyí ra.

Ñaha sihi cha natuvi chihin rayi ta iyó yñi ña

⁵³ Tyicuan ta tahan tahan ra cuanuhu coyo ra vehe ra.

8

¹ Soco ra Jesús cuahan ra yucu cha nañi Olivo. ² Ta cha inga quivi cuhva cha vachi cundichin, cuahan tucu ra inga chaha vehe ñuhu cahnu. Ta tandihí ñáyivi tuhva ñu nu nyaá ra. Ta maa ra chicunyaá ra ta quichaha cahan ra nuu ñu. ³ Tyicuan ta ra

sacuahá cuenda ley ta ra cuví fariseo chaá coyo ra chihin noo ñaha iyó yñi vatyí nat̄in ra chi ña nu cuatyí ña chihin inga rayi. Ta cuatyaa ra chi ña mahñu ñáyivi nyicú cuan. ⁴ Ta quichaha cacatyí ra chi ra Jesús:

—Maestro, ñaha sihi ihya nat̄in ndi chi ña nu cuatyí ña chihin inga rayi. ⁵ Ta ley cha tyaa ra Moisés catyí chi vatyí nacahñi yo chihin yuu chi ñusihí cha sacuví tyehe caa. ¿Ta yoho, yoso caa catyun vityin? —catyí ra chi ra.

⁶ Cacatyí ra tuhun ihya chi ra Jesús cha cuenda cha nducú nyehe ra chi ra tacuhva tyaa ra noo cuatyí siqui ra. Tyicuan ta ra Jesús chicunyaá tyayñi ra nu ñuhú ta quichaha tyaa ra letra nu ñuhú chihin nundaha ra. ⁷ Soco vatyí candacá tuhun ca ra chi ra, tyicuan ta nicuinanyaá ra ta catyí ra chi ra:

—Xihna ca nyoho cha ñahri cuatyí ndo quehen ndo yuu ta cañi ndo chi ña —catyí ra chi ra.

⁸ Ta nicunyaá tucu ra ta quichaha sañihi ra tyaa ra letra nu ñuhú. ⁹ Soco maa ra cha cachiñi ra tuhun ihya, tuví ñi ra tyi iyó tucu cuatyí maa ra. Ta quichaha quita coyo tahan tahan ri ra, quichaha xihna ca ra chahnu. Ta cuhva cha ndihí ra quita coyo ta ndoo noo tuhun ca maa ra Jesús chihin ñaha sihi cuan mahñu nu nyicu ñáyivi. ¹⁰ Tyicuan ta nicuinanyaá ra Jesús ta nyehe ra tyi cha cuahan coyo ra cuan ta ndoo noo tuhun ri ca ñaha. Tyicuan ta catyí ra chi ña:

—¿Nya nyaá ra tyaa cuatyí sicun vityin? ¿Yori ni minoo ca ra cuñi cahñi chuun? —catyí ra chi ña.

¹¹ Ta nacahan ña ta catyí ña:

—Ni nonga ra, Tata.

Tyicuan ta ra Jesús catyí ra chi ña:

—Ni yuhu ta ma cahñi chuun. Cuahan vityin. Ta ma sacuvi con cuatyí —catyí ra chi ña.

Ra Jesús cuví cha ndichin cha sandichin aña ñáyivi

¹² Tyicuan ta cahan tucu ra Jesús nuu ñáyivi inga chaha, ta catyí ra chi ñu:

—Yuhu cuví ra cha sandichin añima ñáyiví iyó síqui ñuhu ñáyiví. Yóó cha nyicón chii, coo ñu noo ñáyiví chaa nu ndichin. Ta ma caca noo maa ñu nu ñaa iñi —catyí ra Jesús chi ñu.

¹³ Tyicuan ta ra cacuví fariseo cacatyí ra chi ra:

—Yoho, cahún tumañi iñi cuenda maun. Ta yucuan ña ndicha —catyí ra chi ra.

¹⁴ Nacahan ra Jesús ta catyí ra:

—Vasi suri mai cahín tumañi iñi cuende, soco ndicha cha cahin vatyi yuhu chité nya ityi quichí ta nya ityi cuahín. Soco nyoho ña chitó ndo nya ityi quichí ni nya ityi cuahín.

¹⁵ Nyoho yatyin xaan cahan ndo cha caa ñáyiví. Soco yuhu, yori chi cahin cha caa. ¹⁶ Soco tatu catyi cha caa ñáyiví, catyí cha ndicha. Vatyi ñima noo ri mai nyehí, soco Suti ra cha tachi chii, ican ra nyehé chihin. ¹⁷ Nu ley nyoho nyaá vatyi tatu uvi ra chaha cha ndaa, cuñi chi chinó iñi yo cha ndaa cuan. ¹⁸ Ta vityin vaha, suri mai cuví cha ndaa cuenda mai. Ta Suti, ra cha tachí chii, cuví inga cha ndaa —catyí ra Jesús chi ra.

¹⁹ Tyicuan ta candacá tuhun ra chi ra:

—¿Nya nyaá sutun?

Ta ra Jesús catyí ra:

—Nyoho ña ñohó nuu ndo chi yuhu. Ta ni chi Suti ña ñohó nuu ndo. Tyehe ta ñohó nuu ndo chii, cohon nuu ndo chi Suti —catyí ra.

²⁰ Tuhun ihya cahan ra Jesús cha ni ri ca cha sañahá ra chichi vehe ñuhu cahu, nu nyaá caja nu tyihí ñáyiví xuhun. Soco yori tyihí chi ra vehe caa, vatyi ta chaa ca quiví cha tahán chi cohon ra.

“Nu cuhun yuhu ma cuvi cuhun ndo”, catyí ra Cristo

²¹ Ra Jesús catyí ra chi ra cacuvi fariseo inga chaha:

—Yuhu cuhin, ta nyoho cunanducu ndo chii, soco cucúvi ndo ta cundoo cuatyí ndo síqui ndo. Nu cuahan yuhu, nyoho ma cuvi cuhun ndo —catyí ra Jesús chi ñu.

²² Tyicuan ta ra cacuví nuu chi ñu Israel cacatyí ra:

—¿Atu cucahñi maa ra chi ra? vatyi catyí ra vatyi ma cuvi cuhun yo nu cuahan ra —cacatyí ra.

²³ Tyicuan ta ra Jesús catyí ra:

—Nyoho ra cuenda ityi yuvi ihya cuví ndo. Soco yuhu ra cuenda ityi síqui cuví. Nyoho ñu ñuhu ñáyiví ihya cuví ndo. Soco yuhu ñima ra ñuhu ñáyiví ihya cuví. ²⁴ Yucuan chaha catyí chi ndo vatyi cucúvi ndo ta cundoo cuatyí ndo síqui ndo. Vatyi tatu ña chinó iñi ndo cha yuhu cuví ra tinyaá cuatyí ndo, cundoo cuatyí ndo síqui ndo quiví cúvi ndo —catyí ra Jesús chi ra.

²⁵ Tyicuan ta quichaha candacá tuhun ra chi ra, ta catyí ra:

—¿Yóó ra cuví yoho?

Ta ra Jesús nacahan ra ta catyí ra:

—Cha yaha catyí chi ndo nyata quiví xihna ri. ²⁶ Cuaha xaan ca cha nyaá cha catyí chi ndo, ta cuaha xaan ca nyaá catyí cha caá ndo. Soco tuhun cha catyí yuhu chi ñáyiví iyó síqui ñuhu ñáyiví, tuhun cha chiñi cha cahán ra cha tachí chii cuví. Ta maa ra cahán ra cha ndicha —catyí ra.

²⁷ Soco maa ra cacuví nuu chi ñu Israel ña cutuñi iñi ra vatyi tuhun Nyoo Sutu yo cahán ra chihin ra. ²⁸ Yucuan chaha catyí ra chi ra:

—Cutyaa ndo chi ra cuví Rayi cha quichi nya gloria nu cruzi. Tyicuan ta cunacoto ndo vatyi yuhu cuví, ta cucoto ndo vatyi tyiño sahí ñima cha cuenda mai sacuví, soco cahín cha sañahá Suti chii. ²⁹ Vatyi Suti, ra cha tachí chii, nyaá ra chihin. Ta ña sandoó ra chii cha maa ri mai. Vatyi yuhu tyicuan ri sacuví cuhva cuñi ra —catyí ra Jesús.

³⁰ Cha cahán ra Jesús tuhun ihya, cuaha ra quichaha chino iñi ra chi ra.

Ñu cha cuví Sehe Nyoo ta ñu cha sacuví cha quiñi caa

³¹ Tyicuan ta catyí ra Jesús chi ra cacuvi nuu chi ñu Israel cha chinó iñi chi ra:

—Tatu nyoho ta sañihi ca ndo sacuvi ndo cuhva sañahí chi ndo, cuchaa ndo cuví ndo noo ñu yihí

cuende. ³² Ta cucoto ndo cha ndicha. Ta chihin cha ndicha cuan cundoo ndo libre —catyí ra.

³³ Ta canacahán ra ta catyí ra:

—Nyuhu ñáyiví vachi tata ra Abraham cuví ndi. Ta ni noo chaha ta cuví ca ndi musu chi ni noo ñáyiví. ¿Yoso caa cha catyí yoho tyi ndoo ndi libre? —catyí ra chi ra.

³⁴ Ta ra Jesús catyí ra:

—Cha ndicha catyí chi ndo vatyí tandihí ñu sacuví cha quiñi caa, musu cuenda cha quiñi caa cuví ñu. ³⁵ Noo musu ña nyaá ra vehe chitoho ra tyicuan ri. Soco noo sehe ra cuví chitoho cuan, nyaá ra tyicuan ri chihin sutu ra. ³⁶ Yucuan chaha tatu yuhu cha cuví Sehe Nyoo ta tave chí ndo ndaha ra ña vaha, ndicha cuii cucoo ndo libre. ³⁷ Cha chité vatyí ñáyiví chi ra Abraham cuví chi ndo. Soco yihí ndo cuñí ndo cahñi ndo chii, vatyí ña tñín cuenda ndo tuhun cahín. ³⁸ Yuhu cahín cha sañaha Suti chii. Ta nyoho sacuví ndo cha catyí sutu ndo chí ndo —catyí ra chi ra.

³⁹ Ta canacahan ra ta catyí ra:

—Sutu ndi cuví chi ra Abraham —catyí ra.

Soco ra Jesús catyí ra chi ra:

—Tyehe ta ndicha cha sehe ra Abraham cuví chi ndo, sacuví ndo cha sacuví ra. ⁴⁰ Soco nyoho, vasi catyí chi ndo cha ndicha cha sañaha Nyoo chii, nyoho cuñí ndo cahñi ndo chii. ¡Ra Abraham ña sacuví ra cha tyicuan caa! ⁴¹ Nyoho tari sacuví sutu ndo, sacuví ndo —catyí ra chi ra.

Tyicuan ta nacahan ra ta catyí ra:

—Nyuhu ñima sehe ndahvi ñu cuví chi ndi. Iyó noo ri sutu ndi ta ican ra cuví Nyoo —catyí ñu.

⁴² Tyicuan ta ra Jesús catyí ra:

—Tyehe ta ndicha cha Nyoo cuví sutu ndo, nyoho cuñí ndo chii. Vatyí yuhu quite nu nyaá ra ta chaj nyehe. Ña vachí cuenda mai, soco Nyoo tachí chii. ⁴³ ¿Ñáá tuhun cha ña cutuñí iñi ndo tuhun cha catyí chi ndo? Cha cuenda tyi ña cuñí ndo tyasohó ndo tuhun cahín. ⁴⁴ Cuihna ican ra cuví sutu ndo. Ta sehe ra cuví chi ndo.

Ta cuñí ndo sacuví ndo cuhva cuñí ra. Ra chahñí ñáyiví cuví cuihna nyata quiví xihna ri. Ni noo chaha ña sacuví ra cha ndicha. Ta ni noo chaha ña cahán ra cha ndicha. Cuhva cha cahán ra cuendu, cahán ra cuhva caá ra, vatyí cuendu ra. Ta sutu ñu cuendu cuví chi ra. ⁴⁵ Ta yuhu vatyí cahín cha ndicha, ña chinó iñi ndo chii. ⁴⁶ ¿Nya noo nyoho cuví catyí ndo vatyí yuhu iyó noo cuatyí? Ni noo ndo. Ta cha tyicuan caa cahín cha ndicha, ¿ñáá tuhun cha ña chinó iñi ndo chii? ⁴⁷ Ñu cuenda Nyoo tyasohó ñu tuhun cahán Nyoo. Soco vatyí nyoho ñima ñu cuenda Nyoo cuví ndo, yucuan chaha ña cuñí ndo tyasoho ndo tuhun cahín —catyí ra Jesús.

Ra Cristo, nyata nicumañi coo ra Abraham, ta cha iyó ra

⁴⁸ Tyicuan ta ra cacuví nuu chi ñu Israel cacatyí ra chi ra:

—¿Atu ña ndicha vatyí yoho ra ñuu Samaria cuvún, ta ñohó noo tatyí ña vaha chuun? —cacatyí ra chi ra.

⁴⁹ Ta nacahan ra Jesús ta catyí ra:

—Ñahri tatyí ña vaha ñohó chi yuhu. Chi Suti sacahní. Ta nyoho cahán ña vaha ndo siqui. ⁵⁰ Yuhu ña nanduquí nu sacahnu ñáyiví chii, soco iyó noo ra nanducú cha sacahnu ñu chii. Ta maa ra cunyehe ra tatu sacahnú ndo chii. ⁵¹ Cha ndicha catyí vatyí ñu quichahá tuhun cahín ma chaa tuhun chihi añima ñu —catyí ra Jesús chi ra.

⁵² Tyicuan ta ra Israel cuan canacahan ra ta catyí ra:

—Vityin chitó vaha ndi vatyí yihí noo tatyí ña vaha chuun. Vatyí ra Abraham ta tandihí ra cuví profeta Nyoo cachihí ra. Ta yoho catyún vatyí ñu quichahá tuhun cahún ma cúvi maa ñu. ⁵³ ¿Atu cahnu ca ra cuví yoho ican saha sutu ndi ra Abraham? Maa ra chihí ra ta ra cuví profeta Nyoo ñandihí. ¿Yóó ra cuví yoho cuñí maun? —catyí ra chi ra.

⁵⁴ Ta nacahan ra Jesús ta catyí ra:

—Tatu suri mai sacahní chii, ñahri maa vale cuan. Soco ra sacahnú chii,

ican cuví Suti. Ta suri maa ra cuví cha catyí nyoho tyi Nyoo cuenda ndo cuví chi ra. ⁵⁵ Soco nyoho ña ñohó nuu ndo chi ra. Yuhu, ñohó nui chi ra. Ta tatu catyí tyi ña ñohó nui chi ra, cuví noo ra cuendu tari nyoho. Soco yuhu ndicha cha ñohó nui chi ra, ta quichahí tuhun cahán ra. ⁵⁶ Ra Abraham sutu chahnu ndo cusii xaan cuñi ra vatyí cunyehe ra quivi quichi yuhu siqui ñuhu ñayivi. Ta nyehé ra ta cusii xaan cuñi ra —catyí ra Jesús chi ñu.

⁵⁷ Tyicuan ta ra Israel cuan cacatyí ra chi ra Jesús:

—Ni uvi xico uchi cuiya ta quita con, ta catyún tyi nyehun chi ra Abraham.

⁵⁸ Ta ra Jesús nacahan ra ta catyí ra:

—Cha ndicha catyí chi ndo vatyí nyata ni cumañi coo ra Abraham ta cha iyó yuhu —catyí ra Jesús chi ra.

⁵⁹ Tyicuan ta quehen ra yuu vatyí cañi ra chi ra Jesús. Soco maa ra quihvi xehe ra, ta quitá ra chichi vehe ñuhu cuan. Ta yahá ra mahñu ra ta cuahan ra.

9

Nu sanduvahá ra Jesús chi noo ra cha cuaa nyata cacu

¹ Cuhva cha yahá ra Jesús noo nu yahá ra, nyehé ra chi noo ra cha cuaa nyata cacu. ² Ta quichahá ndaca tuhun ra cachicá noo chihin ra Jesús chi ra:

—Maestro, ¿ñáá tuhun cha cacu cuaa ra ihya? ¿Atu cha cuenda cuatyí sihi ra ta sutu ra, o cha cuenda cuatyí maa ra? —cacatyí ra chi ra.

³ Ta ra Jesús nacahan ra ta catyí ra:

—Ñima cuatyí maa ra, ta ni ñima cuatyí sihi ra ta sutu ra. Soco cha cuenda vatyí cuví sañaha Nyoo tunyee iñi ra chihin ra. ⁴ Cha ni ri ca cha ñicahñu, cuñi chi cha sacuvi tyiño ra cha tachí chii. Vatyí vachi cha cuaa cha ma cuvi ca saha tyiño yo. ⁵ Cha ni ri ca cha nyaí siqui ñuhu ñayivi ihya, ñuhu ndichin cuenda ñáyivi iyó siqui ñuhu ñayivi cuví.

⁶ Cha yahá cha catyí ra Jesús tuhun ihya, ta tyicu sii ra nu ñuhú. Ta savahá ra chiin nyahyu chihin sii ra ta tyaa ra chiti nuu ra cuaa cuan. ⁷ Tyicuan ta catyí ra chi ra:

—Cuahan cuanacatyá nuun nya tanque Siloé cuan. —Sivi cuan cuñi chi catyí: “Tachí Chuun.”

Tyicuan caa ta ra cuaa cuan chahan ra chinacatyá ra nuu ra. Ta cuhva cha nachaa ra, cha nyehé ra. ⁸ Tyicuan ta ñu nyicú yatyin yuvehe ra, ta ñu cha nyehé chi ra cha cucuaa ra ta caya ra, catyí ñu:

—¿Atu ñima ra ihya cuví cha tuhva chinyaa chican caridaa? —catyí ñu.

⁹ Yihí ñu catyí ñu:

—Ican ra.

Inga ñu catyí ñu:

—Ñima ra cuví ra, soco ndacú xaan ra chi ra.

Soco maa ra catyí ra:

—Ican yuhu cuví —catyí ra.

¹⁰ Tyicuan ta quichaha candaca tuhun ñu chi ra:

—¿Ta yoso caa cha cuví nyehun vityin? —catyí ñu.

¹¹ Ta catyí ra:

—Ra cha nañi Jesús cuan, ican savahá nyahyu ta tyaa ra chiti nui ta catyí ra chii: “Cuahan nya tanque Siloé ta nacatyon nuun.” Tyicuan ta chahin. Ta cha yahá nacatye nui ta nanyehi —catyí ra chi ñu.

¹² Tyicuan ta quichahá ndaca tuhun ñu chi ra:

—¿Nya nyaá ra cuan vityin?

Ta maa ra catyí ra:

—Ña chité —catyí ra chi ñu.

Nu casanahma ra cuví fariseo chi ra cha cucuaq ta nanyehé

¹³ Tyicuan ta chinyaca ñu chi ra cha cucuaa cuan nuu ra cuví fariseo.

¹⁴ Vatyí quivi cha savahá ra Jesús nyahyu ta sanduvahá ra chi ra cha cucuaa cuan, quivi nyitatú yo cuví.

¹⁵ Yucuan chaha ra fariseo candaca tuhun tucu ra chi ra yoso caa cha vatyí nanyehé ra. Ta maa ra catyí ra:

—Tyaa ra nyahyu chiti nui, ta nacatye ta vityin ndichin nyehi —catyí ra chi ra.

16 Tyicuan ta suhva ra fariseo cacatyí ra:

—Ra cha sacuvi tyehe caa ñima ra cuenda Nyoo cuví ra, vatyí ña sahá ra ñáyivi quivi nyitatú yo —cacatyí ra.

Soco inga ra cacatyí ra:

—¿Yoso caa cha cuví sacuvi ra mi-lagru ihya tatu ra iyó cuatyí cuví ra? —catyí ra.

Ta siin siin cha cacahan ra. Ta cacusiin ra. 17 Ta candaca tuhun tucu ra inga chaha chi ra cha cucuaa cuan, ta catyí ra chi ra:

—¿Ta yoho, ñáa catyún cuenda ra cha sanduvaha chiti nuun? —catyí ra.

Ta nacahan ra ta catyí ra:

—Yuhu catyí vatyí noo profeta cuenda Nyoo cuví ra —catyí ra.

18 Soco ra cacuví nuu chi ñu Israel ña cuñí ra chino ñi ra cha cucuaa ra cuan ta vityin nyehé ra. Ta nyacua nya cha cacana ra chi sihi ra ta chi sutu ra cha nduvaha cuan. 19 Ta candaca tuhun ra chi ñu, ta catyí ra:

—¿Atu ican ra ihya cha cuví sehe ndo cha catyí ndo tyi cuaá ra ta cacu ra? ¿Yoso caa cha cuví nyehe ra vityin? —catyí ra.

20 Ta nacahan sutu ra ta sihi ra ta catyí ñu:

—Chitó ndi vatyí ican ra ihya cuví sehe ndi. Ta cuaá ra nyata cacu ra.

21 Soco ña chitó ndi ñáa tuhun cha cuví nyehe ra vityin. Ta ni ña chitó ndi yóo cha sanduvaha chiti nuu ra. Ndaça tuhun ndo chi maa ra. Cha iyó cuiya ra. Ta cuví nacatyí maa ra chi ndo —catyí ñu chi ra.

22 Sututu ra sihi ra catyí ñu tyehe caa cha cuenda cha yuhví ñu chi ra cacuví nuu chi ñu Israel, vatyí cha catyihí tahan ra tuhun vatyí cutava ñehe ra chi ñu vehe ñuhu, yóo ri ñu cha catyí vatyí ra Jesús cuví Cristo. 23 Yucuan chaha catyí ñu: “Cha ñihi ra. Ndaça tuhun ndo chi maa ra.”

24 Tyicuan ta canacana tucu ra chi ra cha cucuaa cuan inga chaha. Ta cacatyí ra chi ra:

—Chihin nuu Nyoo catyí cha ndicha chi ndi. Vatyí nyuhu chitó ndi

tyi rayi cuan, ra iyó cuatyí cuví ra —cacatyí ra.

25 Tyicuan ta nacahan ra cha cucuaa cuan ta catyí ra:

—Yuhu ña chité tatu ra iyó cuatyí cuví ra, o ñima. Soco noo ri cha chité vatyí yuhu cucuai, ta vityin ndichin nyehí —catyí ra.

26 Ta candaca tuhun tucu ra chi ra inga chaha ta catyí ra:

—¿Ñáa cha sacuví ra chuun? ¿Yoso caa sacuvi ra ta nanyehún? —cacatyí ra chi ra.

27 Ta catyí ra:

—Cha catyí chi ndo, ta ña quichahá ndo chii. ¿Ñáa tuhun cha cuñí ndo cha catyí inga chaha? ¿Atu cuñí tucu nyoho cunyicon ndo chi ra?

28 Tyicuan ta cacahan ra chi ra, ta catyí ra:

—Yoho yihún cuenda ra, soco nyuhu cuenda ra Moisés yihí ndi.

29 Nyuhu chitó ndi tyi Nyoo cahan chihin ra Moisés. Soco ra cuan, ña chitó ndi nya quita ra —cacatyí ra.

30 Tyicuan ta nacahan ra cucuaa cuan ta catyí ra:

—¿Ñana vaha cha cuví ihya! Nyoho ña chitó ndo nya quita ra, ta chi yuhu sananyehe ra. 31 Chitó vaha yo vatyí Nyoo ña tyasohó ra nu chicán ra iyó cuatyí. Soco ra cha sacahnú chi ra ta sacuví cuhva cuñí ra, tyasohó Nyoo nu chicán ra cuan. 32 Ni noo chaha ta cuiñi ca yo vatyí iyó noo ra sananyehe chi noo ra cuaá nyata cacu. 33 Tyehe ta ra ihya ta ñima cuenda Nyoo vachí ra, ñahri cha cuví sacuvi ra —catyí ra chi ra.

34 Tyicuan ta cacatyí ra chi ra:

—Yoho ra iyó cuatyí cuvún nyata cacun. ¿Ta cuñún sañahun chi nyuhu? —cacatyí ra.

Ta catava ñehe ra chi ra vehe ñuhu.

Ñu cha ñahri tuhun Nyoo caa aña tari cha cuaa ñu

35 Ra Jesús chitó ra vatyí catava ñehe ra chi ra cucuaa cuan vehe ñuhu. Ta cuhva cha nañihí ra chi ra ta catyí ra chi ra:

—¿Atu chinó ñi yoho chi Rayi cha quichi nya gloria? —catyí ra chi ra.

³⁶ Ta nacahan ra ta catyí ra:

—Tata, catyi chii, yóó ra cuví ra vatyí chino iñi chi ra —catyí ra chi ra.

³⁷ Ta ra Jesús catyí ra:

—Cha nyehun chi ra. Ta ican ra ndatuhún chuhun —catyí ra chi ra.

³⁸ Tyicuan ta chicuiñi chiti ra chaha ra Jesús ta catyí ra chi ra:

—Chinó iñi chuun, Sutu Mañi yuhu —catyí ra chi ra Jesús.

³⁹ Ta ra Jesús catyí ra:

—Yuhu vachí vatyí catyi cha caá añañi ñáyivi iyó síqui ñuhu ñayivi ihya. Vatyí ñu cuaa, ñu ña chitó tuhun Nyoo cunanyehe ñu vatyí cucava tuhun Nyoo añañi ñu. Ta ñu cuñi maa tyi ndichin nyehe tyi catyí ñu tyi chitó ñu tuhun Nyoo, coto ñu tyi cuaa ñu tyi ña chinó iñi ñu chii —catyí ra Jesús.

⁴⁰ Tyicuan ta suhva ra cuví fariseo cha nyicú yucuan chiñi ra cha cahan ra Jesús, ta catyí ra chi ra:

—¿Atu cuaa tucu nyuhu ñandihí? —catyí ra.

⁴¹ Tyicuan ta catyí ra Jesús chi ra:

—Tyehe ta cuaa nyoho, nichón nuu ndo tyi chiñuhú tuhun Nyoo chi ndo, ta ma coo cuatyí ndo. Soco vatyí catyí ndo tyi nyehé ndo ta chitó ndo, yucuan chaha ndoó cuatyí síqui ndo —catyí ra chi ra.

10

Mbee sana Nyoo cuví ñáyivi yihí cuenda ra, ta ñohó nuu ñu chi ra cha tachí Nyoo vatyí sahá cumi ra chi ñu

¹ Cahán ca ra Jesús ta catyí ra:

—Cha ndicha catyí chi ndo, tatu noo ra cuaquihvi chichi noo chacu mbee, ta cha nuu cha quihvi ra yuhu chacu, quihvi ra inga ityi, ra suhu cuví ra. ² Soco ra quihvi ityi yuhu chacu, ra sahá cumi mbee cuan cuví ra. ³ Ra nyaá yuhu chacu cuan nuña ra na quihvi ra sahá cumi mbee cuan. Ta mbee cuan nichón soho ti ndusu ra. Noo noo ti ta iyó sivi ti sahá ra, ta cana ra chi ti ta tavá ra chi ti ityi chata chacu. ⁴ Ta cha yaha tava ra chi ti, ta cuahan ra ityi nuu ti ta nyicón ti

chi ra, vatyí nichón soho ti ndusu ra.

⁵ Soco tatu ña ñohó soho ti ndusu ra, chinó ti chi ra ta ma cunyicon ti chi ra.

⁶ Tyehe caa tuhun cahan ra Jesús chihin ñu. Soco maa ñu ña cutuñi iñi ñu ñaá tuhun cuñi ra cahan ra cha tyicuan caa.

Ra Jesús cuví ra sahá cumi vaha mbee

⁷ Tyicuan ta catyí ra Jesús inga chaha chi ñu:

—Cha ndicha catyí chi ndo vatyí yuhu cuví tari noo yuhu chacu nu quihvi coyo ñáyivi cuende cha cuví ñu tari mbee sane. ⁸ Tandihí ra cha yaha caquichí coyo, ra suhu cacuví ra. Soco mbee ña quichaha ti cha cacahan ra. ⁹ Yuhu cuví yuvehe gloria. Ñu quihvi cuende, cacu ñu cha ma cuhun ñu anyaya. Ta cuví ñu tari noo mbee cha quihvi ta quitá chichi chacu cuan. Ta ñihí ti cuhu cachi ti.

¹⁰ Noo ra suhu vachí ra, soco vachí suhu ra, vachí cahni ra, vachí sativi ra. Soco yuhu vachí vatyí coo ndo noo ñayivi chaa cha ma naa ca maa.

¹¹ Yuhu cuví noo ra vaha sahá cumi mbee. Vatyí ra sahá cumi mbee chahá ra ñayivi ra cuenda sana ra.

¹² Soco ra cuví musu, tatu nyehé ra vachí lobo cha cuví noo quití xaan, sandoo maa ra chi mbee sana chitoho ra. Ta chinó ra. Vatyí ñima sana maa ra cuví ti. Tyicuan ta tin quití xaan chi mbee cuan. Ta saquicono ti chi ti ityi cuan ityi ihya. ¹³ Musu cuan chino ra cha cuenda vatyí cha cuenda xuhun ri sahá tyiño ra. Ta ñahri cuenda ra chi mbee, tyi ñima sana ra cuví.

¹⁴ Yuhu cuví ra sahá cumi vaha mbee sane. Ta ñohó nui chi ti. Ta maa ti ñohó nuu ti chii, ¹⁵ tari ñohó nuu Suti chii, ta yuhu ñohó nui chi ra. Yuhu chahí ñayivi cuenda mbee sane. ¹⁶ Iyó tucu inga mbee sane cha ñima chichi chacu ihya iyó ti. Cuñi chi cha cuhin cunaquehin chi ti. Ta cuquichaha ti chii. Ta coo noo ri nu quihí tandihí ti. Ta noo ri ra sahá cumi chi ti cucoo.

¹⁷ Suti cuñi ra chii vatyí chahí ñayivi cha catyi ñáyivi cuende. Soco

yaha cuan, nacuhva tucu ra ñayiví inga chaha. ¹⁸ Yori tinyaa ñayiví, soco cha iyó vaha iñi mai ta चाहí. Iyó ityi chii cha cuhve ñayiví ta cúvi, ta iyó tucu ityi chii cha naquehen tiqui inga chaha vatyí cunandote. Ican ihya cuví tyiño cha tyaa Suti chii —catyí ra Jesús.

¹⁹ Cha cachiñi tucu ra cacuví nuu chi ñu Israel tuhun cha cahán ra Jesús ihya, cacusiñ tucu ra chihin tahan ra inga chaha. ²⁰ Ta cuaha xaan ra catyí ra:

—¿Ñáá tuhun cha quichaha ndo chi ra chiña? Ta yihí noo tatyí ña vaha chi ra, ta loco ra —cacatyí ra.

²¹ Ta inga ra catyí ra:

—Yori ñu ñohó tatyí ña vaha chi cahán tyehe caa. ¿Atu cuví sananyehe noo tatyí ña vaha chi noo ra cuaa? —catyí ra.

Nu ña cuñi ra cacuví nuu chi ñu Israel chi ra Jesús

²² Nya ñuu Jerusalén yoo vichin cuví. Ta sanducahnú ñu noo vico quiví nanduchin cuiya cha suhñi ñu vehe ñuhu cahnu cuan. ²³ Ta ra Jesús chicá noo ra vehe ñuhu cuan ityi corredor ra Salomón. ²⁴ Ta ra cacuví nuu chi ñu Israel cachicuitayucu cutya ra nuu ra. Ta quichaha ndaca tuhun ra chi ra:

—¿Ama catyí cachun chi ndi tatu icon cuví Cristo? ingaña ri catyí cachi chi ndi.

²⁵ Ta ra Jesús catyí ra:

—Cha yaha catyí chi ndo, ta ña chinó iñi ndo chii. Tyiño sacuví nuu Suti ican cuví cha ndaa cuende. ²⁶ Soco nyoho ña chinó iñi ndo chii vatyí ñima mbee sane cuví chi ndo. Tari cuhva catyí chi ndo ndaa ri. ²⁷ Mbee sane nichón soho ti ndusi, ta yuhu ñohó nui chi ti. Ta maa ti nyicón ti chii. ²⁸ Yuhu चाहí ñayiví cha ma naa ca maa coo ti. Ta ma cunaa ti. Ta ni yori maa cuví tinyaa chi ti chichi ndahi. ²⁹ Maa Suti chaha chi ti chii. Ta cahnu ca cuví maa ra ican saha tandihí ca. Ta yori cuví tinyaa chi ti chichi ndaha ra. ³⁰ Yuhu ta Suti Nyoo, noo ri cuví ndi —catyí ra Jesús.

³¹ Tyicuan ta ra cacuví nuu chi ñu Israel cuan caquehen tucu ra yuu vatyí tuchi ra chi ra. ³² Ta ra Jesús catyí ra chi ra:

—Cuaha xaan cha vaha sacuví yuhu nuu ndo chihin tunyee iñi Suti. ¿Ta nya cuenda cuan cua tuchi ndo yuu chii? —catyí ra Jesús chi ra.

³³ Ta ra cacuví nuu chi ñu Israel cuan cacatyí ra:

—Ñima cha cuenda noo cha vaha sacuvun cutuchi ndi yuu chuun, soco cha cuenda vatyí yahun nuu Nyoo chihin tuhun cahún. Noo rayi ri cuvún, soco sahún tari Nyoo chuun —cacatyí ra chi ra.

³⁴ Tyicuan ta catyí ra Jesús chi ra:

—Nu tutu tuhun Nyoo nyaá vatyí Nyoo catyí ra: “Nyoho cuví ndo nyoo”, catyí Nyoo. ³⁵ Chitó yo vatyí cha cahán tuhun Nyoo, ma cuví catyí yo tyi ña ndicha. Ta Nyoo sacunañi ra nyoo chi ñu naquehen tuhun cahán ra. ³⁶ Ta tatu maa Nyoo nacachi chi yuhu ta tachi ra chii siqui ñuhu ñayiví ihya ¿yoso caa catyí nyoho vatyí yahá yuhu nuu Nyoo nu catyí tyi Sehe Nyoo cuví chii? ³⁷ Tatu ña sacuví cha sacuví Suti, ma chino iñi ndo chii. ³⁸ Soco tatu sacuví, vasi ma chino iñi ndo chii, soco chino iñi ndo tyiño sacuví. Tyicuan ta cucoto cachi ndo vatyí Nyoo Suti in ri cuví ra chihin. Ta yuhu in ri cuví chihin Nyoo Suti —catyí ra Jesús.

³⁹ Inga tucu chaha cacuñi ra catyí ihi ra chi ra vehe caa, soco ra Jesús cuahan ri ra. ⁴⁰ Tyicuan ta cuanuhu ra ityi nu caña ñanyii inga chiyo yuvi cahnu Jordán cuan nu sacondutya ra Juan ta xihna ri. ⁴¹ Cuaha ñayiví chahan chinyehe chi ra, ta catyí ñu:

—Ndicha, vasi ni noo milagru ña sacuví ra Juan, soco tandihí tuhun cha chahan ra cuenda ra ihya ta ndicha —catyí ñu.

⁴² Ta cuaha xaan ñu cachino iñi ñu chi ra Jesús ityi cuan.

11

Nu chihí ra Lázaro

¹ Iyó noo ra cuhví cha nañí Lázaro ñuu Betania nu cuví ñuu cu María ta cu Marta cuhu ña. ² Ta cu María, cuhva ra Lázaro cuan ican ña cuví ñaha cha choso ndutya vixi chahán chaha Sutu Mañi yo, ta chihin ixi xiñi ña nacuhva ña. ³ Ta tyicuan caa ninduvi tahan ñu, cu María chihin cuhu ña, tachí ñu tyiño na cucatyí ra chi ra Jesús tyehe caa;

—Sutu Mañi ndi, amigon cuhví ra —catyí ñu, tachí ñu tyiño.

⁴ Ta cha chiñi ra Jesús tuhun ihya ta catyí ra:

—Cuehe cuan ma cahñi chi chi ra. Cuhví ra tyehe caa tacuhva vatyí quivi nduvaha ra cunyehe ñáyivi tyi cahnu xaan ca ra cuví Nyoo ta tyicuan caa tucu Sehe ra —catyí ra Jesús tuhun maa ra.

⁵ Cuñi vavaha ra Jesús chi cu Marta ta chi cuhu ña, ta chi cuhva ña, ra Lázaro. ⁶ Soco cuhva cha catyí ñu chi ra tyi cuhví ra Lázaro, ndoo ra nu ñohó ra uvi ca quivi. ⁷ Tyicuan ta catyí ra chi ra cachicá noo chihin ra:

—Coho ndo inga chaha nya Judea —catyí ra.

⁸ Tyicuan ta ra cachicá noo chihin ra cacatyí ra chi ra:

—Maestro, ta cunaha ca cha cuñi ra cacuví nuu chi ñu Israel cahñi ra chuun chihin yuu. Ta vityin, ¿inga chaha cuñún cuhun yucuan? ¿Ñáá tuhun?

⁹ Ta catyí ra Jesús:

—¿Atu ñima uchi uvi hora iyó noo quivi? Vatyí tatu cha ñicahñu chicá noo noo ra, ma nduva ra vatyí ndichin nyehé ra ta sacuví ra tyiño nuu Nyoo. ¹⁰ Soco tatu cha cha cuaa chicá noo ra, nduva ra vatyí ñahri ñuhu.

¹¹ Tyicuan ta quichaha catyí tucu ra Jesús:

—Amigo yo, ra Lázaro quixí ra. Soco cuhin cusandoye chi ra —catyí ra chi ra.

¹² Tyicuan ta catyí tucu ra cachicá noo chihin ra:

—Tata, tatu quixí ra, cuñi chi catyí vatyí cuanduvaha ra —cacatyí ra.

¹³ Soco ra Jesús cuñi ra catyí ra vatyí cha chihí ra Lázaro. Ta ra cachicá noo chihin ra, cuñi maa ra vatyí cha ndicha quixí ra cuan. ¹⁴ Tyicuan ta catyí cachi ra Jesús chi ra:

—Ra Lázaro cha chihí ra. ¹⁵ Ta cusii cuñi vatyí yori chinyaa yucuan. Vatyí tyicuan caa vaha ca cha cuenda nyoho, tacuhva chino iñi ndo chii. Coho ndo cunyehe ndo chi ra —catyí ra chi ra.

¹⁶ Tyicuan ta ra Tomás, cha catyí ñu: “ra tinihi cuan”, catyí ra chi inga ra cachicá noo chihin ra Jesús:

—Coho tucu yo vatyí cúvi yo ñin ri chihin ra —catyí ra.

Ra Jesús cuví ra sanandotó chi yo ta chahá ra ñáyivi coo yo

¹⁷ Cha chaá ra Jesús Betania, ñihí ra tuhun vatyí ra Lázaro cha cumi quivi ñohó ra chichi ñuhú. ¹⁸ Ñuu Betania cuan nyaá chi yatyin ri nu nyaá ñuu Jerusalén, tari noo uvi kilómetro sisava. ¹⁹ Ta cuaha ra cacuví nuu chi ñu Israel cuahan ra cuanyehe ra nu nyaá cu Marta ta cu María vatyí chihí cuhva ñu. ²⁰ Ta ñihí cu Marta tuhun vatyí cha cuachaa ra Jesús. Ta cuahan ña cuasatahan ña chi ra. Soco cu María ndoo ña vehe. ²¹ Ta cu Marta catyí ña chi ra Jesús:

—Sutu mañi yuhu, tyehe ta nyaun ihya, ma cúvi cuhve. ²² Soco yuhu chité vatyí Nyoo cusacuvi ra tandihí cha cacon chí ra —catyí ña chi ra.

²³ Ta ra Jesús catyí ra chi ña:

—Cuhvon cunandoto ra.

²⁴ Ta cu Marta catyí ña:

—Ndicha, chité vatyí cunandoto ra quivi nandoto ndiyi nu cuandihí quivi —catyí ña.

²⁵ Tyicuan ta catyí ra Jesús chi ña:

—Yuhu cuví ra sanandotó chí ndiyi. Ta chahí cha conyito ñáyivi. Ñu chinó iñi chii, vasi cha chihí ñu soco coo tucu ñu. ²⁶ Ta tandihí ñu nyitó ca ta chinó iñi ñu chii, ma cúvi maa ñu. ¿Atu chiñó iñun tuhun ihya? —catyí ra chi ña.

²⁷ Ta maa ña catyí ña:

—Chinó iñi, Sutu Mañi yuhu, vatyí yoho cuvún Cristo Sehe Nyoo, ra cha

nyaá cha quichi siqui ñuhu ñayivi ihya
—catyí ña.

Nu chacu ra Jesús nu ñaña ra Lázaro

²⁸ Cha yaha cha catyí cu Marta
tuhun ihya, ta chahan ña chiquehen
ña chi cuhu ña, cu María, ta catyí xehe
ña chi ña:

—Cha chaa Ra Sacuaha. Ta tachí ra
tyiño nacuhun nu nyaá ra —catyí ña.

²⁹ Ta cha chiñi cu María tuhun ihya,
nducuita ri ña, ta cuahan ña nu nyaá
ra Jesús, ³⁰ Ta ra Jesús ta quihvi ca ra
chichi ñuu cuhva cuan, nyaá ra nu
nañihí cu Marta chi ra. ³¹ Ta nya vehe
cu María, nyicú ra cacuví nuu chi ñu
Israel tyinyeé ra chi ñu. Ta nyehe ra
vatyi numi ri quitá ña. Ta cuñí maa
ra tyi cuahan ña nu ñaña cuacuacu ña.
Ta cuahan coyo ra chata ña.

³² Ta cuhva cha chaa cu María nu
nyaá ra Jesús chicuñi chiti ña chaha
ra, ta catyí ña:

—Sutu Mañi yuhu, tyehe ta
chinyaun ihya, cuhve ma cúvi ra
—catyí ña.

³³ Nyehe ra Jesús cha chacú cu
María chihin ra Israel cha vachi coyo
chihin ña, ta nducuihya xaan cuñí
añima ra. ³⁴ Ta ndaca tuhun ra chi ñu:

—¿Nya maa maa tyihí ndo chi ra?
—catyí ra.

Ta catyí ñu:

—Tata, coho ta nyehun —catyí ñu
chi ra.

³⁵ Ta ra Jesús chacu ra.

³⁶ Tyicuan ta catyí ra Israel cuan:

—Nyehe ndo yoso cha cuñí ra chi ra
—catyí ra.

³⁷ Soco suhva ñu catyí ñu:

—Ican ra ihya cha sananyehe chi ra
cuaa cuan. ¿Atu ña cuví sanduvaha
tucu ra chi ra Lázaro ihya? —catyí ñu.

Nu sanandoto ra Jesús chi ra Lázaro

³⁸ Nducuihya cuñí ra Jesús inga
chaha ta tuhva ra nu ñaña cuan. Noo
chichi yuu cuví. Ta nyasí noo yuu
yuhu chi. ³⁹ Ta catyí ra Jesús:

—Sacanyaha ndo yuu chiña —catyí
ra.

Ta cu Marta, cuhva ndiyi cuan,
catyí ña:

—Soco cha caña xico, Sutu Mañi
yuhu, vatyi cha cumi quivi cha chihí
ra —catyí ña.

⁴⁰ Soco ra Jesús catyí ra chi ña:

—¿Atu ña cha catyí chuun vatyi tatu
chinó iñun, cunyahun yoso cha cahnu
cuví Nyoo? —catyí ra chi ña.

⁴¹ Tyicuan ta sacanyaha ñu yuu
cuan. Ta ra Jesús nanyehe ndaa ra ityi
andivi, ta catyí ra:

—Sutu Mañi yuhu, tyahvi nyoo
chuun tyi chiñun cha cahín. ⁴² Yuhu
chité vatyi tyicuan ri chiñun tuhun
cahín. Soco tyehe caa cahín cha
cuenda cha vaha chi ñayivi nyicú
ihya, tacuhva nachino iñi ñu tyi yoho
tachí chii —catyí ra Jesús chi Nyoo.

⁴³ Cha yaha cha catyí ra tuhun ihya,
canachaa ra, ta catyí ra:

—¡Lázaro, quita chiña!

⁴⁴ Ta quita ra cha chihí cuan, nuhñí
ndaha ra ta nuhñí chaha ra chihin
sahma. Ta nuhñí nuu ra chihin noo
sahma. Ta ra Jesús catyí ra chi ñayivi
nyicú yucuan:

—Ndachi ndo chi ra. Ta saña ndo
chi ra nacuhun ra —catyí ra Jesús chi
ñu.

Nu nducú cahñi ñu chi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Ta cuaha xaan ra cacuví nuu chi
ñu Israel cha chahan coyo chihin cu
María nachino iñi ñu cha nyehe ñu
cha sacuvi ra Jesús. ⁴⁶ Soco suhva ra
chahan ra chisacoto ra chi ra fariseo
cha sacuvi ra Jesús. ⁴⁷ Tyicuan ta ra
fariseo ta ra cacuví nuu chi tata sutu
sacoo ra noo junta ta cacatyí ra:

—¿Ñáa cha sacuví yo? Vatyi cuaha
xaan milagru sacuví ra cuan. ⁴⁸ Tatu
cuhva yo cha sacuvi ca ra tyicuan
caa, tandihí ñayivi cuchino iñi ñu chi
ra. Ta ra cacuví tyiño nya ñuu Roma
cuquichi ra ta cusatani ra vehe ñuhu
yo ta ñuu yo —cacatyí ra chi ra tahan
ra.

⁴⁹ Soco ra cuví nuu cahnu ca chi
tata sutu cuiya cuan, ra nañí Caifás
cahan ra ta catyí ra chi ra:

—Nyoho ñahri maa cha chitó ndo.

⁵⁰ Ni ña cutuñí iñi ndo vatyi vaha
ca cha cúvi noo ri rayi cha cuenda

tandihí ñáyiví ñuu, ta ñima ca cha cúvi tandihí yo —catyí ra Caifás.

⁵¹ Soco ra Caifás cuan ñima cha cuñí maa ra ta cahán ra, soco vatyí ra cuví nuu cahnu ca chi tata sutu cuiya cuan cuví ra, yucuan chaha maa Nyoo sacahan chí ra. Vatyí catyí ra vatyí ra Jesús cucúvi ra cha cuenda tandihí ñáyiví ñuu Israel. ⁵² Ta ñima cha cuenda ri ñu cuan, soco vatyí cusandu ñin ri ra chí tandihí ñu cuví sehe Nyoo cha iyó inga ñuu ñandihí. ⁵³ Yucuan ta nyacua nya quívi cuan ta ra cacuví nuu chí ñu Israel cuan, nducu ra cuhva yoso caa cahñi ra chí ra Jesús.

⁵⁴ Yucuan chaha tyi ra Jesús ña chicá noo ndichin ca ra nu nyicú ñu Israel. Ta quita ra ityi Judea cuan. Ta cuahan ra noo ñuu cha nañí Efraín cha nyaá yatyin ri ñuhu ityi. Ta yucuan ndoó ra chihin ra cachicá noo chihin ra.

⁵⁵ Ña cuaha ri ca quívi ta chaa vico cuenda ñu Israel, vico cha nañí pascua. Ta cuaha xaan ñáyiví quita ñu ñuu ñu ta cuahan ñu Jerusalén cuasacuvi ñu cha tuhvá maa ñu sacuví cha sandundí ñu chí ñu nuu Nyoo cha ni cumañi ca chaa quívi vico cuan. ⁵⁶ Nanducú ñu chí ra Jesús. Ta cuhva cha nyicú ñu chichi vehe ñuhu cahnu cuan ta ndaca tuhun ñu chí tahan ñu, ta catyí ñu:

—¿Yoso caa cuñí nyoho? ¿Atu cuquichi ra vico ihya, o ma quichi ra? —catyí ñu chí tahan ñu.

⁵⁷ Ta ra cacuví fariseo ta ra cacuví nuu chí tata sutu, catyí ra vatyí tatu nya noo ñu chitó ñu nya nyaá ra Jesús, nacatyí ñu. Vatyí cutin ra chí ra vatyí cohon ra vehe caa.

12

Nu chosó cu María ndutya vixi chahán chaha ra Jesús

(Mt. 26.6-13; Mr. 14.3-9)

¹ Cumañi iñu ca quívi cha cuatahan chí vico pascua, ta chaa ra Jesús ñuu Betania nu iyó ra Lázaro, ra cha sanandoto ra Jesús chí. ² Yucuan savaha ñu cha cuxiñi ra Jesús. Cu Marta tyihí ña coho nu mesa. Ta

chicunyaá ra Jesús nu mesa. Ta nyaá tucu ra Lázaro chihin ra. ³ Tyicuan ta cu María quehen ña ta cha sava litro ndutya vixi chahán cha chingo chihin maa ri nardo, noo cha yahvi xaan nyaá. Ta cuhví ña chaha ra Jesús chihin ndutya vixi chahán cuan. Yaha cuan ta sana ityi ña chihin ixi xiñi ña. Tandihí chichi vehe cuan chitu chihin xico ndutya vixi chahán cuan. ⁴ Ta yucuan nyaá tucu ra Judas Iscariote, sehe ra Simón. Cuví ra noo ra chicá noo chihin ra Jesús. Ta suri maa ra cuví ra cha naxico tuhun chí ra Jesús nuu ra xaan iñi chí ra. Ta quichaha catyí ra Judas cuan chí ñu cuan:

⁵ —¿Ñáá tuhun ña xico ndo ndutya vixi chahán ihya chí ñáyiví, cuhva ñu cuenda mil chí ndo chihin, ta tyinyee ndo chí ñu ndahvi? —catyí ra.

⁶ Soco ra Judas ña catyí ra tuhun ihya cha cuenda cha ndahvi cuñí ra nyehe ra chí ñu ndahvi, soco vatyí ra suhu cuví ra. Ta vatyí ndaha maa ra nyaá yitin xuhun ta tuhvá ra suhu ra cha tyihí ñu chichi yitin cuan. ⁷ Tyicuan ta catyí ra Jesús chí ra:

—Saña chí ña, vatyí ñaha ihya sacuví ña tyehe caa cha cuenda cha cuquihvi coño ñuhi chichi ñuhu. ⁸ Ñu ndahvi tyicuan ri cu cunyicú ñu chihin ndo, soco yuhu ña tyicuan ri —catyí ra Jesús chí ra Judas cuan.

Nu nducu cahñi ra chí ra Lázaro

⁹ Cuaha xaan ñu Israel ñihí ñu tuhun tyi ra Jesús ñohó ra Betania, ta chahan coyo ñu nyicuan. Ñima cha cuñí ñu nyehe ñu chí ra Jesús ri, soco cuñí tucu ñu nyehe ñu chí ra Lázaro, ra cha sanandoto ra Jesús chí. ¹⁰ Tyicuan ta ra cacuví nuu chí tata sutu catyihí tahan ra tuhun vatyí cucahñi tucu ra chí ra Lázaro ñandihí. ¹¹ Vatyí cha cuenda ra ta cuaha xaan ñu Israel cacusiñ ñu chihin ra ta nachino iñi ñu chí ra Jesús.

Nu quihvi ra Jesús ñuu Jerusalén
(Mt. 21.1-11; Mr. 11.1-11; Lc. 19.28-40)

¹² Cuaha xaan ñáyiví cuahan ñu Jerusalén cha vico pascua. Ta cha

inga quivi cachitó ñu tyi ra Jesús cuachaa ra. ¹³ Tyicuan ta chahnya ñu ndaha tunducaha ta cuahan coyo ñu cuasatahan ñu chi ra Jesús. Ta canachaa ñu, ta catyí ñu:

—¡Cahnu xaan ca cuví maa Nyoo! ¡Nasoco xaan Nyoo chi ra vachi ihya chihin tunyee iñi Nyoo! ¡Nasoco xaan Nyoo chi Rey cuenda yo ñu Israel! —cacatyí ñu, canachaa ñu.

¹⁴ Ta ra Jesús ñihí ra noo burru ta chicoso ra chi ti tari cuhva catyí maa nu tutu Nyoo tyehe caa:

¹⁵ Ma yuhvi ndo ñáyivi ñuu Sión Nyehe ndo, vachi Rey ndo. Yosó ra noo burru —catyí chi nu tutu Nyoo.

¹⁶ Quivi cuan ra cachicá noo chihin ra Jesús, ña cacutuñí iñi ra tuhun cuan cha nyaá nu tutu Nyoo. Soco cha yaha cuanuhu ra Jesús gloria, canicohon iñi ra vatyí tandihí tuhun cuan ta nyaá nu tutu Nyoo tyi tyicuan caa cucuvi chi ra. Ta tyicuan caa cuví chi ra.

¹⁷ Ta ñáyivi cha nyehe quivi cha cana ra Jesús chi ra Lázaro chichi ñaña, quivi sanandoto ra chi ra, nacatyí ñu cha nyehe ñu. ¹⁸ Ta yucuan chaha cuaha xaan ñáyivi chisatahan ñu chi ra Jesús, vatyí chito ñu milagru cha sacuvi ra. ¹⁹ Tyicuan ta ra cuví fariseo cacatyí ra chi ra tahan ra:

—Cha nyehé maa ndo tyi ñahri maa cuví sacuví yo, vatyí tandihí ñáyivi nyicón chi ra —cacatyí ra.

Nu nducú suhva ra ñuu Grecia chi ra Jesús

²⁰ Ñohó tucu suhva ra ñuu Grecia mahñu ñáyivi cha chahan coyo chisacahnu vico ñuu Jerusalén cuan.

²¹ Tyicuan ta catuhva ra ñuu Grecia cuan nu nyaá ra Felipe, ra ñuu Betsaida nu cuví Galilea, ta cachacu ndahvi ra nuu ra ta cacatyí ra:

—Tata, cuñí ndi cahan ndi chihin ra Jesús —cacatyí ra.

²² Ta ra Felipe chahan ra chicatyi ra chi ra Andrés. Ta nanduvi ra chincatyí ra chi ra Jesús vatyí ra Grecia cuan cuñí ra cahan ra chihin ra. ²³ Ta nacahan ra Jesús, ta catyí ra:

—Chaa cuhva vityin vatyí yuhu cha cuví Rayí cha quichi nya gloria, cuananuhu tiqui nya gloria, ta cusacahnu Suti chii. ²⁴ Cha ndicha catyí chi ndo vatyí tatu noo chiti ta ma quihí chichi ñuhú ta ma tyahyu chi, noo ri chiti cucuvi chi tyicuan ri maa. Soco tatu tyahyu chi, nduchaa chi inga chaha ta coo cuaha ca chiti chi. ²⁵ Ñu cuñí xaan ñáyivi iyó ñu, cucunaa ñu. Soco ñu ña cuñí ñáyivi ñuhu ñáyivi ihya, cunañihi ñu noo ñáyivi cha ma naa ca maa cucoo ñu. ²⁶ Tatu yihí ndo cuñí ndo sacuvi ndo tyiño nui, cunyicon ndo chii. Ta nu cuacunyai, yucuan cucunyaa tucu ñu sacuví tyiño nui. Tatu nya nyoho sacuví ndo tyiño nui, Suti cusacahnu ra chi ndo.

Nu cahán ra Jesús tuhun yoso caa cucúvi ra

²⁷ Vityin chicá xaan xiñi. Ta ¿ñáá cha cacatyí? ¿Atu catyí chi Suti na sacanyaha ra tindoho cha nyaá cunyehe vityin? Ma catyí cha tyicuan caa vatyí cha cuenda cuan vachi siqui ñuhu ñáyivi ihya. ²⁸ Vaha ca catyí chi Suti: “Sutu Mañi yuhu, sacahnu sivun” —catyí ra Jesús.

Tyicuan ta cahan noo ndusu ityi andivi ta catyí chi tyehe caa:

—Cha yaha sacahni sivi, ta cusacahni inga chaha —catyí ndusu cuan.

²⁹ Ta ñu nyicú yucuan, chihí ñu ndusu cuan, ta catyí ñu vatyí savi cahan. Ta inga ñu catyí ñu:

—Noo ángel cahan chihin ra.

³⁰ Tyicuan ta ra Jesús catyí ra chi ñu:

—Ñima cha cuenda cha vaha chi yuhu cahan ndusu cuan soco cha cuenda cha vaha chi maa ndo cuví.

³¹ Vityin cuví cuhva cutachi tuñi Nyoo chi ñáyivi iyó siqui ñuhu ñáyivi. Ta vityin cuhva cutava ñehe Nyoo chi ra nyacá ñaha siqui ñuhu ñáyivi ihya.

³² Ta cuhva cha cuitacai nu cruzi, yucuan cuhva cunaxite chi tandihí ñáyivi —catyí ra Jesús.

³³ Cahán ra tyehe caa cha cuñí ra na cutuñi iñi ñu tyi tyicuan caa cuhva cucúvi ra. ³⁴ Ta ñáyivi nacahan ñu ta catyí ñu chi ra:

—Tuhvá ndi chiñi ndi sacuahá ra nu libru ley yo vatyí ra cuví Cristo tyicuan ri maa cucoo ra. ¿Yoso caa cha catyí yoho tyi cusandaa ñu chi Rayñi quichi nya gloria nu cruzi? ¿Yóo ra cuví Rayñi cha quichi nya gloria cha cahún tuhun? —catyí ñu, ndacá tuhun ñu chi ra.

³⁵ Tyicuan ta ra Jesús catyí ra chi ñu:

—Iyó cha ndichin nu nyicu ndo, soco suhva ri ca quiví. Caca ndo ityi nu ndichin cha ni ri ca cha ndichin. Coto sana ri iñi ndo ta nduñaa iñi, vatyí ñu chicá noo nu ñaa iñi ña chitó ñu nya ityi cuahan ñu. ³⁶ Chino iñi ndo chi yuhu ra cuví ñuhu ndichin cuan, cha ni ri ca cha nyaá que chihin ndo. Tyicuan ta cuví ndo ñáyiví iyó nu ndichin.

Cha yaha catyí ra Jesús tuhun ihya tixehe nuu ra chi ñu.

Nu catyí chi ñáá tuhun cha ña cachinó iñi ra cacuvi nuu chi ñu Israel chi ra Jesús

³⁷ Vasi cuaha xaan milagru sacuvi ra Jesús nuu ñu soco ña chinó iñi ñu chi ra. ³⁸ Vatyí tahán chi cha cuví tari catyí ra Isaías profeta Nyoo, nu cahán ra tyehe caa:

Sutu Mañi yuhu, yori cuñí chino iñi tuhun cahán ndi.

Yori cutuñí iñi tunyee iñi iyó chuun, Sutú Mañi yuhu, catyí ra Isaías ta cha naha.

³⁹ Ta cha cuenda tuhun ihya cha nyaá nu tutu, yucuan chaha vatyí ña cuví chino iñi ñu vatyí suri tyaa tucu ra Isaías tyehe caa:

⁴⁰ Nyoo sanducuaa ra chi ñu. Ta sandundava ra ñima ñu, tacuhva cha ma nyehe ñu chihin chiti nuu ñu,

ta ma cutuñi iñi ñima ñu, ta ni ma nacuhva cuenda ñu chi ñu chi ra tacuhva sanduvaha ra chi ñu.

⁴¹ Ra Isaías catyí ra tyehe caa vatyí nyehe ra nu nyacá ñaha Sutú Mañi yo Jesús ta cahán ra tuhun ra.

⁴² Soco cuaha ñu Israel chinó iñi chi ra Jesús, ta nyacua nya suhva ra cacuví nuu, soco ña saquetuví ra nuu ñáyiví vatyí yuhví ra chi ra cacuví

fariseo coto tava ñehe ra chi ra vehe ñuhu. ⁴³ Vatyí cuñí ca ra cuvaha ra nuu ñáyiví ta ñima ca cha cuvaha ra nuu Nyoo.

Tuhun cahán ra Jesús cusacutuñi chi ñáyiví

⁴⁴ Ñihi cahán ra Jesús, ta catyí ra:

—Ñu chinó iñi chii, ñima chi maa ri mai chinó iñi ñu, soco chinó tucu iñi ñu chi ra cha tachí chii. ⁴⁵ Ta ñu nyehé chii, nyehé tucu ñu chi ra cha tachí chii. ⁴⁶ Yuhu cha cuví tari noo cha ndichin vachi ñuhu ñáyiví ihya, vatyí tacuhva vatyí ñu chinó iñi chii ma ndoo ñu nu ñaa iñi. ⁴⁷ Soco tatu yihí ndo chiñí ndo tuhun cahán, ta ña sacuví ndo cha cahán, ñima yuhu tachí tuñi chi ndo. Vatyí ña vachi yuhu ñuhu ñáyiví ihya vatyí tachí tuñi chi ñáyiví. Soco vachi sacaqui ñima ñu. ⁴⁸ Ñu ña cuñí naquehen tuhun cahán ta ña cuñí ñu sacuvi ñu tari cuhva cuñí, iyó cha cutachí tuñi chi ñu. Tuhun cha cahán, ican cuan cutachí tuñi chi ñu nu cundihi quiví. ⁴⁹ Vatyí ñima cuenda mai cahán. Suti ra cha tachí chii, chaha ra tuhun chii ñáá cha cucahin ta ñáá cha cusañahi. ⁵⁰ Ta chité vatyí tuhun cha chaha ra, chahá chi noo ñáyiví cha ma naa ca maa coo ñáyiví. Yucuan chaha, tuhun cha cahán, cahán soco cuhva catyí maa Suti cha cahán cuví.

13

Nu nacatyá ra Jesús chaha ra cachicá noo chihin ra

¹ Nonga quiví cumañi ta chaa vico pascua chitó ra Jesús vatyí cha chaa cuhva cha cuaquita ra ñuhu ñáyiví ihya ta cunuhu ra nu nyaá Sutú ra. Tyicuan ri cuñí xaan ra chi ñu cuenda ra cha iyó siqui ñuhu ñáyiví ihya. Ta vityin cua sañahá ra chi ñu tyi cuñí xaan ra chi ñu vatyí cuacúvi ra cha cuenda ñu.

² Ta cuxiñí ra Jesús chihin ra cachicá noo chihin ra. Ta cha quihví cuihna ñima ra Judas Iscariote sehe ra Simón tyiyuhu ra chi ra, naxico tuhun ra chi ra Jesús ta nacuhva cuenda ra chi ra chi ra xaan iñi chi

ra. ³ Soco ra Jesús chitó ra vatyí chaha cuenda Sutu ra tandihí chi ra vatyí cunyaa ndaha ra. Ta chitó ra vatyí nu nyaá Nyoo quitá ra ta suri yucuan cunanuhu ra. Ta nyaá ra Jesús cuxiñí ra. ⁴ Tyicuan ta nicuinanyaá ra ta tava ra sahma chata ra, ta chahñí ra noo toalla chichi ra. ⁵ Tyicuan ta tyihí ra ndutya chichi noo caa ta quichaha nacatya ra chaha ra cachicá noo chihin ra. Ta quichaha nacuhva ra chihin toalla cuan.

⁶ Ta cha cuanacatya ra chaha ra Simón Pedro ta catyí ra Simón chi ra:

—Sutu Mañi yuhu, ¿atu yoho cuanacatyon chahi?

⁷ Tyicuan ta catyí ra Jesús:

—Vityin ña cutuñí iñun cha sacuvi. Soco cucutuñí maa iñun nu cuahan ca chi.

⁸ Soco ra Pedro catyí ra chi ra:

—Ni noo chaha ta ma nacatyon chaha yuhu.

Ta catyí ra Jesús chi ra:

—Tatu ma nacatye chahun, ñima ra cuende cuvún.

⁹ Tyicuan ta catyí ra Pedro chi ra Jesús:

—Tu tyicuan caa, Sutu Mañi yuhu, ñima chaha ri nacatyon, soco nacatya tucun ndahi ta xiñi ñandihí —catyí ra.

¹⁰ Soco ra Jesús catyí ra chi ra:

—Ñu cha ni chityi, ña cuñí chi cha ndoo tandihí coño ñuhu ñu. Chaha ri ca ñu cuñí chi, vatyí cha ndii maa nanii ñu. Nyoho cha ndii ndo, vasi ña tandihí ndo —catyí ra Jesús.

¹¹ Ta catyí ra vatyí ña tandihí ra ndii ra vatyí chitó ra yóo cha cunaxico tuhun chi ra chi ra xaan iñi chi ra.

¹² Ta cha yahá cha nacatya ra Jesús chaha ra cachicá noo chihin ra, ndihví noo ra sahma ra, ta nicunyaá tucu ra inga chaha nu mesa ta catyí ra chi ra:

—¿Atu cutuñí iñi nyoho cha sacuvi chi ndo? ¹³ Nyoho catyí ndo chii, Maestro ta Sutu mañi yuhu, ta ndicha vatyí ican cuví. ¹⁴ Yuhu cha cuví Ra Sacuaha ta Sutu Mañi ndo, nacatye chaha ndo, tyicuan caa cuñí tucu chi cha nacatya ndo chaha tahan ndo.

¹⁵ Yuhu chahí noo cuhva chi ndo

vatyí sacuvi ndo tari cuhva sacuvi mai. ¹⁶ Cha ndicha catyí chi ndo vatyí ni noo musu ta ña cahnu ca ra ican saha chitoho ra. Ta ni noo ra cha cuahan tyiño, ña cahnu ca ra ican saha ra cha tachí chi ra. ¹⁷ Tatu cutuñí iñi ndo tuhun ihya, ta sacuvi ndo, sii xaan cucuvi chi ndo.

¹⁸ 'Ñima cha cuenda tandihí ndo cahín. Yuhu chité yóo chi nacachí mai. Soco cuñí chi cha cucuvi tari catyí tuhun Nyoo tyehe caa: “Ra cha chachí pan chihin, ican ra cuan cunaxico tuhun chii chi ra xaan iñi chii”, catyí chi nu tutu Nyoo. ¹⁹ Catyí chi ndo tuhun ihya cha ni cumañi ca chino cava tacuhva vatyí quivi nacuvi tyehe caa, chino iñi ndo tyi iguen cuví ra cha tinyaa cuatyí ndo. ²⁰ Cha ndicha catyí chi ndo vatyí ñu tiiñ cuenda chi ñu tachí yuhu chi, chi yuhu tiiñ cuenda ñu cuví cuan. Ta ñu cha tiiñ cuenda chi yuhu, tiiñ cuenda tucu ñu chi ra cha tachí chii —catyí ra Jesús.

Nu sacotó ra Jesús vatyí cunaxico tuhun ra Judas chi ra chi ra xaan iñi chi ra

(Mt. 26.20-25; Mr. 14.17-21; Lc. 22.21-23)

²¹ Cha yahá cha catyí ra Jesús tyehe caa, quichahá nducuihya xaan cuñi añima ra, ta catyí cachi ra:

—Cha ndicha catyí chi ndo, vatyí noo nyoho cunaxico tuhun ndo chii nuu ra xaan iñi chii —catyí ra Jesús.

²² Tyicuan ta ra cachicá noo chihin ra, quichahá canyehe ra nuu tahan ra, ta ña cachitó ra yóo chi tuhun cahán ra Jesús. ²³ Noo ra chicá noo chihin ra nyañaá ra chi ra Jesús nu cuxiñí ra. Ta ican ra cuví ra cha cuñí xaan ra Jesús chi. ²⁴ Ta ra Simón Pedro savahá ra seña chi ra, na ndaca tuhun ra yóo chi tuhun cahán ra.

²⁵ Tyicuan ta nyañaá ra chi ra Jesús, ta ndaca tuhun ra chi ra:

—Sutu Mañi yuhu, ¿yóo ra cuví ra cha cahún tuhun?

²⁶ Ta nacahan ra Jesús ta catyí ra:

—Cuasatyii chiin pan, ta ra cha cuhve chi, ican ra cuan cuví ra —catyí ra.

Tyicuan ta quehen ra chiin pan ta satyij ra, ta chaha ra chi ra Judas Iscariote, sehe ra Simón. ²⁷ Ta cha quehen ra Judas pan cuan ta quihvi ra ña vaha ñima ra. Tyicuan ta ra Jesús catyí ra chi ra:

—Tuhun cha yihí iñun sacuvun, sacuvi cha numi ri —catyí ra Jesús chi ra Judas.

²⁸ Soco ni noo ra canyicú nu mesa cuan, ña cacutuñi iñi ra ñáá tuhun cha catyí ra chi ra tyicuan caa. ²⁹ Soco cha cuenda vatyí ndaha ra Judas nyaá yitin xuhun, yucuan chaha yihí ra cuñi maa ra vatyí cuñi ra Jesús cha cusata ra cha chiñuhú chi ra cha cuenda cha vico cuan, o nacuhva ra suhva xuhun cuan chi ñu ndahvi, cacuñi maa ra. ³⁰ Cha yaha chachí ra Judas pan, tyicuan ta quitá ra. Ta cha cuaa cuví cuan.

Ley cha chaha ra Jesús cha cuñi yo chi tahan yo

³¹ Cha yaha cha cuahan ra Judas, ra Jesús catyí ra:

—Vityin cunyehe ñáyivi yoso cha cahnu yuhu cha cuví Rayi cha quichi nya gloria. Ta cuanyehe ñu yoso cha cahnu Nyoo cha cuende. ³² Ta tatu Rayi cha quichi nya gloria sacahnú ra chi Nyoo, tyicuan ta Nyoo cusacahnú ra chi ra. Ta cha cha quivi cuasacahnú ra chi ra. ³³ Sehe luhli, ña naha ca cuacunyai chihin ndo. Nyoho cunanducu ndo chii, soco tari catyí chi ra cacuví nuu chi ñu Israel cuan, catyí chi ndo vityin, vatyí ma cuvi cuhun ndo nu cuahin. ³⁴ Chahí noo tuhun chaa chi ndo. Cuñi ndo chi tahan ndo. Tari cuñi yuhu chi ndo, tyicuan caa cuñi chi cha cuñi ndo chi tahan ndo. ³⁵ Tatu cuñi ndo chi tahan ndo, tandihí ñáyivi ta coto ñu vatyí ñu nyicón chii cuví ndo.

Nu catyí ra Jesús vatyí ra Pedro cucatyí ra vatyí ña ñohó nuu ra chi ra
(Mt. 26.31-35; Mr. 14.27-31; Lc. 22.31-34)

³⁶ Ra Simón Pedro ndaca tuhun ra chi ra Jesús ta catyí ra:

—Sutu Mañi yuhu, ¿nya cuhun? —catyí ra.

Ta ra Jesús nacahan ra ta catyí ra:

—Nu cuahan yuhu, vityin ma cuvi cunyicon chii. Soco nu cuahan ca chi, ta cunyicon chii —catyí ra Jesús.

³⁷ Tyicuan ta catyí ra Pedro chi ra:

—Sutu Mañi yuhu, ¿ñáá tuhun ma cuvi cunyiquen chuun vityin? Nyái cha cuhve ñáyivi cha cuendon —catyí ra.

³⁸ Ta nacahan ra Jesús ta catyí ra:

—¿Atu ndicha cha cuhvon ñáyivun cha cuende? Cha ndicha catyí chuun, vatyí cha ni cumañi ca cuacu chaa loho, yoho cucatyun uñi chaha tyi ña ñohó nuun chii —catyí ra Jesús chi ra Pedro.

14

Ra Jesús cuví ityi cuhun yo ta chaa yo nu nyá Sutu yo Nyoo

¹ Ta catyí ra Jesús:

—Ma caca xaan xiñi ndo. Chino iñi ndo chi Nyoo, ta chino iñi ndo chii.

² Vehe Suti cuaha xaan nuu coo ndo iyó. Tyehe ta ñima tyicuan caa, cha naha catyí yuhu chi ndo. Ta cuhin cusanduvahi noo nu coo ndo. ³ Ta cha yaha cha cuhin ta sanduvahi nu coo ndo, ta cuquichi inga chaha, quichi naquehin chi ndo. Tacuhva cunyaa ndo nu cuacunyai. ⁴ Nyoho chitó ndo nya cuhin, ta chitó ndo ityi.

⁵ Ta catyí ra Tomás chi ra:

—Tata, ña chitó ndi nya cuhun. Ta ¿yoso caa coto ndi ityi? —catyí ra.

⁶ Ta ra Jesús catyí ra:

—Yuhu cuví ityi cha cuahan gloria. Ta yuhu cuví cha ndicha. Ta suri yuhu cuví ra chahá ñáyivi coo ndo. Noo tuhun ri cha cuenda yuhu, cuvi chaa ndo nu nyaá Suti. ⁷ Ñohó nuu ndo chii, ta cha cuenda cuan ñohó nuu tucu ndo chi Suti. Ta nya vityin ta nu cuahan ca chi, ñohó nuu ndo chi ra, vatyí cha nyehé ndo chi ra —catyí ra Jesús.

⁸ Tyicuan ta catyí ra Felipe chi ra:

—Tata, cuhva cha nyehe ndi chi Sutu yo Nyoo, ta chihin yucuan ri ta ndoo ndi vaha.

⁹ Ta nacahan ra Jesús, ta catyí ra:

—Yoho Felipe, cha naha nyaí chihin ndo, ta ¿yoso caa cha catyún cha ta cohon nuu con chii? Ñu cha nyehé chii, nyehé tucu ñu chi Nyoo Suti. Ta ¿ñáá tuhun catyún chii: “Cuhva cha nyehe ndi chi Sutu yo Nyoo”?¹⁰ ¿Atu ña chinó iñun tyi ñn ri cuví yuhu chihin Suti Nyoo? Ta maa ra ñn ri cuví ra chihin. Tuhun cha catyí chi ndo, ñima yuhu ri catyí, soco Suti cha nyaá chihin, ican ra sacuví tyiño ra chihin.¹¹ Chino iñi ndo chii vatyí ñn ri ra cuví chihin Nyoo Suti. Ta Nyoo Suti ñn ri ra cuví ra chihin. O cuví tucu chino iñi ndo chii cha cuenda tyiño Nyoo Suti cha sacuví.¹² Cha ndicha catyí chi ndo vatyí ñu chinó iñi chii, cusacuvi tucu ñu cha sacuví yuhu. Ta cahnu ca cusacuvi ñu, vatyí yuhu cuhin nu nyaá Nyoo Suti.¹³ Ta tandihí cha cacán ndo chihin sívi, yuhu cusacuvi tacuhva vatyí sacahnu ñáyivi chi Suti Nyoo cha cuenda cha cuví Sehe ra.¹⁴ Yuhu cusacuvi ñáá cha cacán ndo chihin sívi.

Nu catyí ra Jesús vatyí cuhva ra Tatyí li ra chi yo

¹⁵ Tatu cuñí ndo chii, quichaha ndo tuhun cahín.¹⁶⁻¹⁷ Ta cacán tahvi mai chi Nyoo Suti na saquichi ra noo ra naquehen ndahvi chi ndo. Ta ican ra cuan cuví Tatyí li Nyoo, ra cha cahán maa ri cha ndicha. Ta cucunyaa ra chihin ndo tyicuan ri maa. Soco ñáyivi cha tahán ca iñi cha iyó síqui ñuhu ñáyivi ihya ma cuví naquehen ñu Tatyí li Nyoo vatyí ña cuví nyehe ñu chi ra. Ta ni ña caá ra añima ñu. Ta ni ña ñohó nuu ñu chi ra. Soco nyoho ñohó nuu ndo chi ra vatyí nyaá ra chihin ndo ta cuandoo ra chihin ndo.¹⁸ Ma sandoo maa ri mai chi ndo. Quichi tiquí nu nyaá ndo.¹⁹ Chiin ri ca, ta ñáyivi cuenda ñuhu ñáyivi ma nyehe ca ñu chii. Soco nyoho nyehé ndo chii. Vatyí yuhu iyé, yucuan chaha nyoho coo ndo ñandihí.²⁰ Quivi cuan cucoto ndo tyi yuhu ñn ri cuví chihin Suti. Ta nyoho ñn ri cuví ndo chihin. Ta yuhu ñn ri cuví chihin ndo.²¹ Ñu cha cumí vaha tuhun cahín, ta

sacuví ñu cuhva catyí, ican ñu cuan cuví ñu cha cuñí chii. Ta ñu cha cuñí chii, Suti cucuñi ra chi ñu. Ta cuñí tucu yuhu chi ñu ta cusañahi chi ñu yóó ra cuví yuhu —catyí ra Jesús.

²² Ta catyí ra Judas, ñima ra Judas Iscariote, inga ra.

—Sutu Mañi yuhu, ¿yoso caa cha chi nyuhu cusañahun chuun, ta ñima chi ñu cuenda ñuhu ñáyivi?

²³ Nacahan ra Jesús ta catyí ra:

—Ñu cuñí chii, sacuví ñu tuhun cahín. Ta Suti cuñí ra chi ñu. Ta quichi ndi nu nyaá ñu ta coo ndi chihin ñu.²⁴ Ñu ña cuñí chii, ña sacuví ñu cha catyí. Ta tuhun cahín cha chiñi ndo, ñima tuhun mai cuví, tuhun cahán Suti, ra cha tachí chii cuví.

²⁵ Catyí tandihí tuhun ihya chi ndo cha ni ri ca cha nyaí chihin ndo.²⁶ Soco nu cuahan ca chi cutachi Suti Tatyí li ra tyiño nui. Maa ra cuví ra cutyinyee chi ndo ta cunaquehen ndahvi ra chi ndo ta cusañaha ra tandihí chi ndo. Ta cusanicohon ra iñi ndo tuhun cha yaha cahín chihin ndo.

²⁷ Sandoí noo cha taxi coo añima ndo, tari cha taxi cuñí añime. Ican chahí chi ndo. Ñima tari cha taxi cha ñihí ndo síqui ñuhu ñáyivi ihya. Ma caca xaan iñi ndo ta ma yuhvi ndo.

²⁸ Chiñi ndo tuhun cha cahín nu catyí vatyí cuahin ta quichi tiquí nu nyicú ndo. Tatu cuñí ndo chii, cucusi cuñi ndo tyi catyí vatyí cuahin nu nyaá Suti. Vatyí cahnu ca cuví Suti ican saha yuhu.²⁹ Ta vityin catyí tiquí chi ndo cha ni cumañi ca cuhin, tacuhva quivi cuhin, cunachino iñi ndo chii.

³⁰ Ma cahan cuaha que chihin ndo. Vatyí vachi ra nyacá ñaha síqui ñuhu ñáyivi ihya. Vasi ña nyacá ñaha ra chii.

³¹ Soco cuñí chi nacoto ñáyivi iyó síqui ñuhu ñáyivi vatyí yuhu cuñí chi Nyoo Suti, ta sacuví tyiño tyaá ra chii.

’Ndícuíta ndo. Coho ndo, naquita yo ihya.

15

Tari noo yoho tichaha ndivi cha ndicha vaha cuví ra Jesucristo

¹Yuhu cuví yoho tichaha ndiví cha ndicha vaha. Ta Suti cuví ra sahá cumi chi yoho cuan. ²Chahnyá ra soco cha ña chahá chiti. Ta soco cha chahá chiti nacahnyá ra nuu chi, ta sanduvií ra, tacuhva nacuhva ca chi cuaha ca chiti. ³Suti cha sandundií ra chi ndo chihin tuhun cha cahín chihin ndo. ⁴Sañihi ca ndo cu ñn ri ndo chihin, tari yuhu ñn ri cuví chihin ndo. Tari noo soco yoho cuan ma cuvi cuhva chi chiti cha maa ri maa chi tatu ña nyañaá chi chata yoho cahnu, tyicuan caa nyoho, ma cuvi sacuvi ndo cha vaha tatu ña ñn ri cuvi ndo chihin.

⁵Yuhu cuví yoho cahnu cuan. Ta nyoho cuví ndo soco yoho cuan. Ñu cha nyañaá chii, ta yuhu nyañaí chi ñu, cuaha cha vaha sacuví ñu, vatyí ñahri cha cuví sacuvi ndo tatu yori yuhu nyaá chihin ndo. ⁶Ñu cha ña nyañaá chii, cusacuita Suti chi ñu, tari sacuitá yo soco yoho cha chahnyá yo vatyí ña chahá chiti. Ta na ityi ta nasataca yo, ta cucayu nu ñuhu.

⁷Tatu nyoho ta tyicuan ri nyañaá ndo chii, ta ña naa iñi ndo tuhun, cacán ndo ñáá cha cuñí ndo, ta yuhu cuhve. ⁸Tatu cuaha cha vaha sacuví ndo, sacahnú xaan ndo chi Suti. Ta tyicuan caa sañahá ndo tyi cuví ndo noo ñu ndicha cha nyicón chii. ⁹Yuhu cuñí chi ndo, tari cuñí Suti chii. Ma naa iñi ndo cuhva cuñí chi ndo. ¹⁰Tatu quichahá ndo tuhun cahín, cuacuñi que chi ndo. Tari yuhu quichahí nu cahán Suti, ta cuñí xaan ra chii.

¹¹Cahín tyehe caa chihin ndo tacuhva na cusii cuñí ndo chihin. Ta cucusii vavaha cuñi ndo. ¹²Tuhun cha catyí chi ndo, ican cuví ihya: na cuñi ndo chi tahan ndo, tari cuñí yuhu chi ndo. ¹³Tatu yaha xaan cuñí yo chi tahan yo, caña iñi yo cuhva yo nyacua nya ñayiví yo cha cuenda ñu. ¹⁴Nyoho cuví ndo amigue, tatu sacuví ndo cha catyí chi ndo. ¹⁵Ña catyí que vatyí musi cuví chi ndo, vatyí noo musu ña chitó ra ñáá cha sacuví chitoho ra. Amigue, catyí chi ndo vatyí sacote chi ndo tandihí maa

cha catyí Suti chii. ¹⁶Nyoho ña cachi ndo chii. Mai nacachí chi ndo. Ta catyí chi ndo na cuhun ndo ta sacuvi ndo tyiño nui. Ta tyiño sahá ndo cucuvaha xaan tari cuvaha noo itu. Ta cuaha vavaha ñiñi cucoo, ta ma tiví maa chi. Ta tyicuan caa ta Suti cuhva ra tandihí cha cacán ndo chihin sivi. ¹⁷Ican ihya cuví cha catyí chi ndo: Cuñi ndo chi tahan ndo.

Ñáyiví cuenda ñuhu ñayiví tasi cuñí nyehé ñu chi ra Jesús ta chi ñu nyicón chi ra

¹⁸Tatu ñu cuenda ñuhu ñayiví ña cuñí nyehe ñu chi ndo, coto ndo vatyí xihna ca chi yuhu ña cuñí nyehe ñu. ¹⁹Tyehe ta cuví ndo ñu cuenda ñuhu ñayiví, cucuñi ñu chi ndo tari cuñí ñu chi tahan ñu. Soco yuhu nacachí chi ndo mahñu ñu. Ta yucuan chaha tasi cuñí nyehe ñu chi ndo, vatyí ñima ca ñu cuenda ñuhu ñayiví cuví ndo. ²⁰Ñicohon iñi ndo tuhun cha catyí chi ndo, tyi ni noo musu ta ña cahnu ca ra ican saha chitoho ra. Ta tatu quichahá ñu tuhun cahín chihin ñu, tyicuan caa cuquichaha tucu ñu tuhun sañaha ndo chi ñu. Ta tatu satasí iñi ñu chii, cusatasí iñi tucu ñu chi nyoho. ²¹Tandihí ihya cusacuvi ñu chi ndo cha catyí yuhu, vatyí ña ñohó nuu ñu chi ra cha tachí chii.

²²Tyehe ta ña quichí cahin chihin ñu, yucuan ndicha ñahri cuatyí ñu. Soco vityin ñahri siqui tyaa ñu cuenda cuatyí ñu, vatyí cha yaha catyí chi ñu. ²³Ñu cha tasi cuñí nyehé chii, tasi cuñí nyehé ñu chi Suti ñandihí. ²⁴Ñahri cuatyí ñu, tyehe ta ña sacuví milagru cha ni nonga ñáyiví ta sacuvi ca. Soco cha nyehé ñu tandihí ihya. Ta vasi cha nyehé ñu soco tasi cuñí nyehé ñu chii, ta chi Suti ñandihí. ²⁵Soco tandihí tuhun ihya cuví chi tyehe caa, vatyí cuñí chi cha chino cava tari cuhva catyí nu tutu ley cha sacuahá ñu nu catyí chi tyehe caa: “Ñahri vihi tuhun, ta cutasi cuñí ñu nyehe ñu chii”, catyí chi.

²⁶Soco cuquichi Tatyí Ii, ra cha cahán maa ri cha ndicha. Maa ra cuví ra cha naquehen ndahvi chi ndo.

Nachai nu nyaá Suti ta cusaquichi ndi chi ra nu nyicú ndo. Ta quiví quichi ra, cucahan ra tumañi iñi cuende. ²⁷Ta nyoho tucu cucahan ndo tumañi iñi cuende, vatyí nyaá ndo chihin nyata quiví quichahá sahatyiñe.

16

¹'Catyí tuhun ihya chi ndo tacuhva cha ma sandihí ndo cha chinó iñi ndo chii. ²Cutava ñehe ñáyiví chi ndo vehe ñuhu. Ta cuchaa chi quiví vatyí ñu cahñi chi ndo, cucuñi ñu vatyí tyiño nuu Nyoo sacuví ñu. ³Tyehe caa cusacuví ñu cha cuenda vatyí ni chiin maa ta cohon nuu ca ñu ni chi Suti ta ni chi mai. ⁴Catyí tuhun ihya chi ndo tacuhva vatyí quiví chaa chi tari kuhva catyí chi ndo, nicohon iñi ndo vatyí cha yahá catyí chi ndo.

Tyiño sahá Tatyí Ii Nyoo

'Ña catyí tuhun ihya chi ndo quiví xihna ri cha cuenda tyi nyaá que chihin ndo. ⁵Soco vityin cuhin vatyí cunyai chihin ra cha tachí chii. Ta ni noo nyoho ña ndacá tuhun ndo chii nya cuhin. ⁶Soco nducuihya ndihí iñi ndo cha catyí tuhun ihya chi ndo. ⁷Soco catyí cha ndicha chi ndo: vaha ca cha cuhin cha cuenda cha vaha chi ndo. Vatyí tatu ma cuhin, ma quichi Tatyí Ii cha naquehen ndahvi chi ndo. Soco tatu cuhin, cutachi mai chi ra. ⁸Ta quiví quichi ra cusacoto ra chi ñáyiví iyó siqui ñuhu ñáyiví vatyí iyó cuatyí ñu. Ta cusañaha ra chi ñu vatyí iyó noo kuhva vaha tahán chi coo ñu. Ta cusacoto ra chi ñu vatyí cutuñi chi ñu nuu Nyoo. ⁹Cusacoto ra chi ñu tyi iyó cuatyí ñu cha cuenda cha ña chinó iñi ñu chii. ¹⁰Cusacoto ra chi ñu tyi iyó noo kuhva vaha cha tahán chi coo ñu, vatyí yuhu cuhin nu nyaá Suti ta ma nyehe ca ndo chii. ¹¹Ta cu coto ñu tyi cusandaa Nyoo cuatyí ñu vatyí cha yahá cundaá cuatyí ra cuví cuihna, ra nyacá ñaha siqui ñuhu ñáyiví ihya.

¹²'Ta cuaha ca tuhun nyaá catyí chi ndo, soco ma cutuñi iñi ndo vityin. ¹³Soco quiví quichi Tatyí Ii cha cahán maa ri cha ndicha, maa ra cusañaha

tandihí cha ndicha chi ndo. Vatyí ñima cuenda maa ra cucahan ra, soco cucahan ra tandihí cha chiñí ra. Ta cusacoto ra tuhun ñáá cha cucuvi nu cuahan ca chi. ¹⁴Cusacahnu ra chii, vatyí cunaquehen ra tuhun ta cusañaha ra chi ndo. ¹⁵Tandihí cha iyó chi Suti, chi mai cuví ñandihí. Yucuan chaha vatyí Tatyí Ii cuquehen cuenda ra cha iyó chii, ta cusañaha ra chi nyoho.

Ra cha cachicá noo chihin ra Jesús cuihya iñi ra, soco nu cuahan ca chi cucusi cuñi ra, catyí ra Jesús

¹⁶'Ña naha ca ta ma nyehe ca ndo chii, soco yaha cuan ta cunyehe tucu ndo chii, vatyí yuhu cuhin nu nyaá Suti —catyí ra Jesús.

¹⁷Tyicuan ta suhva ra cachicá noo chihin ra, candaca tuhun ra chi tahan ra ta catyí ra:

—¿Ñana vaha tuhun cahán ra ihya? Catyí ra chi yo vatyí ña naha ca ta ma nyehe ca yo chi ra, ta yaha cuan ta cunyehe tucu yo chi ra inga chaha vatyí cuhin ra nu nyaá Sutu ra. ¹⁸¿Ñáá cha cuñí chi catyí cha ña naha ca cuan? Ña cutuñí iñi yo ñáá túhun cahan ra —cacatyí ra.

¹⁹Ra Jesús tuví iñi ra vatyí cacuñí ra candaca tuhun ra chi ra, ta catyí ra:

—Yuhu catyí chi ndo vatyí ña naha ca ta ma nyehe ca ndo chii, soco yaha cuan ta nanyehe tucu ndo chii. ¿Atu ican ihya cuví cha ndacá tuhun ndo chi tahan ndo? ²⁰Cha ndicha catyí chi ndo vatyí nyoho cucuacu ndo ta cunducuihya iñi ndo, soco ñu cuenda ñuhu ñáyiví cusí cuñi ñu. Soco vasi cuihya iñi ndo vityin, tucuihya iñi cha iyó chi ndo cunanduvi chi tusí iñi. ²¹Cuhva cha cuacacu sehe noo ñaha síhí nyehé ña cha uhvi. Soco cha yaha cha cacu cha lee cuan, ni tuhun cha uhvi cuan ña nicohon ca iñi ña cha cuenda cha síhí cuñí ña vatyí cacu noo cha lee sehe ña. ²²Tyicuan caa tucu nyoho vityin, nducuihyá iñi ndo. Soco cunanyehe tiqui chi ndo inga chaha. Tyicuan ta cundusi tucu iñi añima ndo. Ta yori cuví tinyaa tusí iñi cuan chi ndo.

23 'Qui_{iv}i cuan ñahri ca cha cundaca tuhun ndo chii. Cha ndicha catyí chi ndo vatyí Nyoo Suti cucuhva tandihí cha cacán ndo chi ra chihin sívi. 24 Nya vityin ta ta ñaha ca cha cacán ndo chihin sívi yuhu. Cacán ndo ta cuñihi ndo tacuhva na cusii xaan cuñi ndo.

Ra Jesucristo cuví chasaha ra chi cha ña vaha iyó ñayiví

25 'Maa maa ri chihin cuhva ri sañahí chi ndo. Soco nu cuahan ca chi, ñima ca chihin cuhva cuasañahi chi ndo, soco cuacatyí cachi chi ndo tuhun Suti. 26 Qui_{iv}i cuan chihin sívi cucacán ndo cha cacán ndo chi ra. Ta ña chiñuhú ca cha cucuacu ndahvi nuu Suti cha cuenda ndo. 27 Vatyí maa Nyoo Suti suri cuñí ra chi ndo. Cuñí ra chi ndo vatyí nyoho cuñí ndo chii. Ta nachinó iñi ndo vatyí nu nyaá Nyoo quite. 28 Nu nyaá Suti quite vatyí quichi síqui ñuhu ñayiví ihya. Soco vityin cusandoi ñuhu ñayiví ihya vatyí cunuhi nu nyaá ra —catyí ra Jesús.

29 Tyicuan ta ra cachicá noo chihin ra cacatyí ra:

—Vityin ndicha catyí cachun chi ndi. 30 Vityin nyehe ndi vatyí chitón tandihí maa tuhun, ta ña nyatun cha ndaca tuhun ndi chuun, vatyí cha chitón nyacua nya tandihí cha chicá xiñi ndi. Yucuan chaha chinó iñi ndi vatyí nu nyaá Nyoo quiton —cacatyí ra chi ra Jesús.

31 Ta catyí ra Jesús:

—Ta vityin ¿atu chinó iñi ndo chii? 32 Soco catyí chi ndo vatyí cha vachi chi cuhva ta vityin cuví cuhva vatyí nyoho cuquití cuatyí ndo sijn sijn ityi, ta cusandoo ndo notuhun mai. Soco ñima notuhun ri mai nyaá, vatyí nyaá Suti chihin. 33 Catyí tuhun ihya chi ndo tacuhva na coo cha taxi ri añima ndo cha cuenda cha in ri cuví ndo chihin. Ñuhu ñayiví ihya cunyehe ndo tindocho, soco sanyee ndo iñi ndo vatyí yuhu cha cuví chasahi chi cha ña vaha cha iyó ñuhu ñayiví ihya.

17

Nu chicán tahvi ra Jesús cuenda ra cachicá noo chihin ra

1 Cha yaha cha catyí ra Jesús tuhun ihya, nanyehé ndaa ra ityi andiví ta catyí ra:

—Sutu Mañi yuhu, cha chaq cuhva vityin. Sacahnu chi yuhu cha cuví sehun, tacuhva sacahnu tucu yuhu chuun. 2 Vatyí tyaun tyiño chii síqui tandihí ñáyiví, vatyí cuhve ñayiví cha ma naa ca maa chi tandihí ñu chahun chii. 3 Ta ihya cuví cuhva coo ñu ñayiví cha ma naa ca maa: Cha cohon nuu ñu chuun vatyí noo tuhun ri maun cuví Nyoo cha ndicha vaha, ta cohon nuu ñu chi yuhu ra Jesucristo ra cha tachun chi.

4 'Cha sacahní chuun ihya síqui ñuhu ñayiví ta cha sandihí tyiño cha chahun chii. 5 Ta vityin, Sutu Mañi yuhu, cua ndichi nu nyaun, nacuhva cha cahnun cuví maun chii, tari cuhva cha chiyo chii nyata ni cumañi ca chino ñuhu ñayiví.

6 'Tandihí ra cha chahun chii ra cha natava vahun mahñu ñu iyó síqui ñuhu ñayiví ihya sacote chi ra yóo ra cuví yoho. Chi maun cuví chi ra ta chahun chi ra chii. Ta quichahá ra tuhun cahún. 7 Vityin cachitó ra vatyí tandihí cha chahun chii, nu nyaún quita. 8 Vatyí catyí chi ra tuhun cha catyun chii, ta maa ra canatín cuenda ra. Ta tuví iñi ra vatyí ndicha cha quite nu nyaún, ta chinó iñi ra tyi maun tachí chii.

9 'Yuhu chiquén cha cuenda ra chuun. Ña chiquén cha cuenda ñáyiví ña ñohó nuu chuun, soco chiquén cha cuenda ra cha chahun chii, vatyí chi maun cuví chi ra. 10 Tandihí cha iyó chii, chi maun cuví. Ta tandihí cha chuun, chi mai cuví. Ta tandihí cuan sacahnú chii.

11 'Yuhu ma ndoo que ñuhu ñayiví ihya, soco maa ra cundoo ra ñuhu ñayiví ihya. Ta yuhu cuhin tyi cunyai chuhun. Sutu Mañi yuhu, saha cumi chihin cha ndicha ñuhu chi ra cha chahun chii, tacuhva na cu in ri ra chihin ra tahan ra, tari yoho chihin

yuhu, #n ri cuví yo. ¹² Quiví chinyai ñuhu ñayiví ihya chihin ra, saha cumi chi ra cha chahun chii chihin cha ndicha ñuhun. Ta sahi cuenda chi ra. Ta ni noo ra ña cuanaa soco noo tuhun ri ra cha cha nyaá maa cunaa, ican ra cuan cunaa, tacuhva chino cava tari cuhva catyí nu tutu maun.

¹³ Vityin cha vachi nu nyaún, soco cha ni ri ca cha nyaí siqui ñuhu ñayiví ihya, catyí tuhun ihya tacuhva na cusii cuñi ra tari mai. ¹⁴ Yuhu catyí chi ra tuhun cahún, soco ñáyiví cuenda ñuhu ñayiví tasi cuñi nyehe ñu chi ra nyicón chi yo, cha cuenda vatyí ñima ra cuenda ñuhu ñayiví cuví ra, tari yuhu, ñima ra cuenda ñuhu ñayiví cuví. ¹⁵ Ña chiquén chuun cha tavon chi ra nyicón chi yo nu ñuhu ñayiví ihya, soco saha cumun chi ra coto ñáa cha saha ra ña vaha chi ra. ¹⁶ Tari yuhu ñima ra cuenda ñuhu ñayiví cuví, tyicuan caa tucu ra ihya, ñima ra cuenda ñuhu ñayiví cuví ra. ¹⁷ Cuhva cha ndicha chi ra nasacuvi ra maa maa ri cuhva cuñi maun. Tuhun cahún, ican cuví cha ndicha. ¹⁸ Tari tachun chi yuhu nu nyicú ñu iyó siqui ñuhu ñayiví, tyicuan caa tachí tucu yuhu chi maa ra nyicón chi yo nu nyicú ñu iyó siqui ñuhu ñayiví. ¹⁹ Ta cha cuenda cha vaha chi ra, sacuví yuhu maa maa ri cuhva cuñi maun, tacuhva vatyí chihin cha ndicha, cuví sacuvi tucu maa ra maa maa ri cuhva cuñi maun.

²⁰ Soco ñima cha cuenda ri ra ihya chiquén chuun, soco chicán tiqui cha cuenda ñáyiví cha cuchino iñi chii chihin tuhun cahán ra ihya nu cuahan ca chi. ²¹ Chiquén chuun na tandihí ñu ta #n ri na cuví ñu chihin tahan ñu. Ta noo ri na cuví ñu chihin yo, Sutu Mañi yuhu. Tari yoho nyaún chihin ta yuhu nyaí chuhun, na cu #n ri cuví ñu chihin yo, tacuhva vatyí tandihí ñáyiví iyó siqui ñuhu ñayiví chino iñi ñu tyi maun tachí chii. ²² Yuhu चाहि cha ndicha ñuhu chi ñu nyicón chi yo, suri cha ndicha ñuhu cha chahun chii. Vatyí chihin cuan na #n ri cuví ñu tari yoho chihin yuhu noo ri cuví yo. ²³ Yuhu nyaí chihin

ñu ta yoho nyaún chihin, tacuhva na cuví yo noo ri chihin ñu. Tyicuan caa ta coto tandihí ñáyiví iyó siqui ñuhu ñayiví tyi maun tachí chii, ta cuñi xaun chi ñu nyicón chi yo tari cuñún chi yuhu.

²⁴ Sutu Mañi yuhu, maun chahun chi ñu chii. Ta cuñi cha cunyaa ñu chihin nu cuacunyai, tacuhva nanyehe ñu cha ndicha ñuhu cha chahun chii vatyí cuñún chii nyata ni cumañi ca chino ñuhu ñayiví. ²⁵ Sutu Mañi yuhu, ra vaha cuvún, ta ñu cuenda ñuhu ñayiví ña ñohó nuu ñu chuun, soco yuhu ñohó nui chuun. Ta ra nyicón chi yo ihya chitó ra tyi maun tachí chii. ²⁶ Cha catyí chi ra yóo ra cuvún, ta cucatyí tiqui inga chaha, tacuhva vatyí tari cuhva cuñún chii, tyicuan caa cuhva cuacuñi tucu maa ra chi ra tahan ra. Ta yuhu cunyai añima ra.

18

Nu cuahan ra Jesús vehe caa

(Mt. 26.47-56; Mr. 14.43-50; Lc. 22.47-53)

¹ Cha yaha cha catyí ra Jesús tuhun ihya, quitá ra ta cuahan ra chihin ra cachicá noo chihin ra inga chiyo yuhu yuvi Cedrón. Ta yucuan nyaá noo chaco yutun yucu. Ta yucuan quihví ra Jesús chihin ra cachicá noo chihin ra. ² Ta ra Judas, ra cha naxicó tuhun chi ra, chitó ra nu cuahan ra Jesús. Vatyí tuhvá ra Jesús चाहán ra yucuan chihin ra cha cachicá noo chihin ra. ³ Ta yucuan chaa ra Judas chihin cuaha sindaro ta cuaha policia cuenda vehe ñuhu cha tachí ra cuví nuu chi tata sutu ta ra cuví fariseo. Chaa coyo ra yucuan, canyisó ra mityi, ta canyiso ra lámpara ta ñuhu yiti. ⁴ Ta vatyí ra Jesús cha chitó ra tandihí cha cucuvi chi ra, quitá ra ta ndaca tuhun ra chi ra:

—¿Yóo chi nanducú ndo? —catyí ra.

⁵ Ta cacatyí ra chi ra:

—Chi ra Jesús ra ñuu Nazaret.

Ta catyí ra Jesús:

—Yuhu cuví —catyí ra.

Ta ra Judas, ra cha naxicó tuhun chi ra Jesús nuu ra xaan iñi chi ra, nanyaá

ra chihin ra yucuan. ⁶ Ta cuhva cha catyí ra Jesús: “Yuhu cuví”, tandihí ra canandaca chata ra ta canduva ra nu ñuhú. ⁷ Tyicuan ta inga tucu chaha ndaca tuhun ra Jesús chi ra, ta catyí ra:

—¿Yóo chi nanducú ndo?

Ta cacatyí ra:

—Chi ra Jesús ra ñuu Nazaret.

⁸ Ta catyí ra Jesús:

—Cha catyí chi ndo tyi yuhu cuví. Tatu chii nanducú ndo, saña ndo chi ra chica noo chihin na cunuhun coyo ra —catyí ra Jesús chi ra.

⁹ Ican tyehe caa catyí ra Jesús tacuhva na chino cava cha catyí maa ra ta ityi chata ca nu catyí ra: “Ra cha chaha Suti chii, ni noo ra ña cuanaá.”

¹⁰ Tyicuan ta ra Simón Pedro nyisó ra noo mityi. Ta tava ra ta chahnya ra soho chiyo vaha noo ra cha nañí Malco. Cuví ra cuan musu ra cuví nuu chi tandihí tata sutu. ¹¹ Soco ra Jesús catyí ra chi ra Pedro:

—Natyihí mityun chichi veno. Tatu Nyoo Suti ta cuñí ra cha nyehi tindoho, tahán chi cha nyehi —catyí ra Jesús chi ra.

Nu nanyaq ra Jesús nuu ra cuví nuu chi tata sutu

(Mt. 26.57-58; Mr. 14.53-54; Lc. 22.54)

¹² Tyicuan ta sindaro cuan chihin capitán ra, ta policía cuenda vehe ñuhu, catihín ra chi ra Jesús, ta chahñí ra chi ra vatyí cuhun ra vehe caa.

¹³ Tyicuan ta chinyaca ra chi ra vehe ra Anás, vatyí ra Anás cuan tyiso ra Caifás cuví chi ra. Ta cuiya cuan cuví ra Caifás ra cuví nuu chi tata sutu. ¹⁴ Ican ra Caifás ihya cuví ra cha catyí chi ra cacuví nuu chi ñu Israel vatyí vaha ca cha cúvi noo ri rayíi cha cuenda tandihí ñáyivi ñuu.

Nu catyí ra Pedro tyi ña ñohó nuu ra chi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro ta nonga ra cha chica noo chihin ra Jesús, canyicón ra chi ra Jesús nu cuahan ra nuquehe vehe ra Anás cuan. Ta ra cuví nuu

chi tata sutu cuan ñohó nuu ra chi inga ra cuan. Yucuan chaha quihví ra cuan chihin ra Jesús nuquehe ra cuví nuu cuan. ¹⁶ Soco ra Pedro ndoo ra yuvehe chata vehe. Yucuan chaha quita ra cha ñohó nuu chi ra cuví nuu chi tata sutu cuan, ta cahan ra chihin ñaha cha nyaá yuvehe cuan. Ta tyihí ra chi ra Pedro chichi nuquehe cuan. ¹⁷ Tyicuan ta ñaha cha nyaá yuvehe cuan ndaca tuhun ña chi ra Pedro, ta catyí ña:

—¿Atu ñima noo ra chica noo chihin rayíi cuan cuvún?

Ta ra Pedro catyí ra:

—Ñime cuví —catyí ra chi ña.

¹⁸ Tyicuan ta musu ta policía cha tayucú yucuan, casanatahan ra ñuhu vatyí vichin xaan. Ta tayucú ra casanasaá ra chi ra. Ta ñohó tucu ra Pedro cuan yunuhu cuan, sanasaá ra chi ra.

Nu sanahma ra cuví nuu chi tata sutu chi ra Jesús

(Mt. 26.59-66; Mr. 14.55-64; Lc. 22.66-71)

¹⁹ Tyicuan ta ra cuví nuu chi tata sutu quichaha ndaca tuhun ra chi ra Jesús, yóo ra cuví ra cachicá noo chihin ra, ta ñáa cha sañahá ra chi ñáyivi. ²⁰ Ta ra Jesús catyí ra chi ra:

—Yuhu chihin nuu tandihí ñáyivi cahín. Ta sañahí chichi vehe ñuhu tahan tahan ñuu ta chichi vehe ñuhu cahnu ñuu ihya nu ndu ín ri tandihí ñu Israel. Ta ñahri tuhun xehe cahín.

²¹ ¿Ñáa tuhun cha ndaca tuhun chii? Vaha taxin ca ndaca tuhun chi ñu cha chiñí tuhun cahín, ta maa ñu nacatyí ñu ñáa tuhun cahín chihin ñu. Maa ñu chitó ñu ñáa tuhun cahín —catyí ra Jesús chi ra.

²² Cuhva cha catyí ra Jesús tuhun ihya, noo policía vehe ñuhu cha nanyaá cuan, cañí ra noo nuu ra Jesús ta catyí ra:

—¿Atu tyiña caa nacadún nu cahan ra cuví nuu chi tata sutu? —catyí ra chi ra Jesús.

²³ Ta ra Jesús catyí ra:

—Tatu cahín noo tuhun ña vaha, catyí chii nya maa maa ña vaha

cahin. Soco tatu cahin tuhun vaha, ¿ñáá tuhun cha cañun chii? —catyí ra Jesús chi ra cuan.

²⁴ Yaha cuan ta nuhñí ra Jesús, ta tachí ra Anás chi ra nu nyaá ra Caifás, ra cuví nuu chi tata sutu.

Nu catyí ra Pedro inga chaha vatyi ña ñohó nuu ra chi ra Jesús

(Mt. 26.71-75; Mr. 14.66-72; Lc. 22.58-62)

²⁵ Ta ra Pedro nanyaá ca ra yunuhu cuan sanasaá ra chi ra. Ta catyí ñu chi ra:

—¿Atu ñima noo ra chicá noo chihin ra cuan cuví yoho? —catyí ñu chi ra.

Ta ra Pedro tixehe ra, ta catyí ra:

—Ñime.

²⁶ Tyicuan ta noo musu ra cuví nuu chi tata sutu, noo ra cha cuví ñáyivi chi ra cha chahnyá ra Pedro soho, quichahá ndaca tuhun ra ta catyí ra:

—Ta caa cuiri tyi nyehi chuun chihin ra chichi chacu cuan —catyí ra chi ra Pedro.

²⁷ Ta ra Pedro tixehe ra inga chaha, ta caa cuhva ri cuan ta chacu noo loho.

Nu nanyaá ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yaha cuan ta quitá coyo ra chihin ra Jesús vehe ra Caifás ta chinyaca ra chi ra vehe tyiño gobernador. Cha vachi cundichin ta ra Israel ña caquihvi ra chichi vehe tyiño cuan vatyi ñima vehe ñu Israel cuví. Ta vatyi catyí ñu tyi yica cha quihvi ñu vehe savahri vatyi coto ma cuví cuxiñi ñu quivi vico pascua cuan.

²⁹ Yucuan chaha quitá ra Pilato vatyi cahan ra chihin ra, ta catyí ra:

—¿Ñáá cuatyí tyaá ndo siqui ra ihya? —catyí ra Pilato chi ra ñuu Israel.

³⁰ Ta canacahan ra Israel ta catyí ra:

—Tyehe ta ñima noo ra iyó cuatyí cuví ra, ma nacuhva cuenda ndi chi ra chuun —cacatyí ra chi ra Pilato.

³¹ Tyicuan ta ra Pilato catyí ra chi ra:

—Quehen maa ndo chi ra, na cu-tuñi chi ra nuu maa ndo tari cuhva catyí ley maa ndo.

Ta nacahan ra ñuu Israel cuan ta cacatyí ra:

—Soco nyuhu ñu Israel ñahri ityi iyó chi ndi cha cahni ndi chi ni noo ñáyivi —catyí ra.

³² Tyicuan caa chino cava cha catyí ra Jesús yoso caa cucuvi ra. ³³ Tyicuan ta nandihvi tucu ra Pilato chichi vehe tyiño cuan inga chaha. Ta cana ra chi ra Jesús ta ndaca tuhun ra chi ra:

—¿Atu yoho cuvún rey cuenda ñu Israel? —catyí ra chi ra.

³⁴ Ta ra Jesús catyí ra:

—¿Atu cha cuenda maun ndaca tuhun, o inga ñu nacatyí ñu tuhin chuun? —catyí ra Jesús chi ra Pilato.

³⁵ Ta catyí ra Pilato:

—Ñima ra ñuu Israel cuví yuhu. Suri ra ñuu maun ta ra cuví nuu chi tata sutu ñuu maun cuví ra canacuhva cuenda chuun chii. ¿Ñáá cha sacuvun? —catyí ra chi ra Jesús.

³⁶ Tyicuan ta nacahan ra Jesús ta catyí ra:

—Nu nyacá ñahi ñima cuenda ñuhu ñáyivi ihya cuví. Tyehe ta ican, ra nyicón chii cañi tahan ra tacuhva ma cunyai ndaha ra Israel. Soco nu nyacá ñahi, ñima cuenda ihya cuví —catyí ra Jesús chi ra Pilato.

³⁷ Tyicuan ta ra Pilato catyí ra chi ra:

—¿Tu tyicuan caa, rey cuvún vii? —catyí ra Pilato chi ra Jesús.

Ta nacahan ra Jesús ta catyí ra:

—Rey cuví tari catyun chiña. Yucuan cuenda caqui ta vachi ñuhu ñáyivi ihya, vatyi catyí ñáá cha cuví cha ndicha. Tandihí ñu quichaha cha ndicha, tyasohó ñu tuhun cahin —catyí ra Jesús.

³⁸ Ta ra Pilato catyí ra chi ra:

—¿Ta ñáá cha cuví cha ndicha? —catyí ra.

Nu cuacacahni ra chi ra Jesús

(Mt. 27.15-31; Mr. 15.6-20; Lc. 23.13-25)

Cha yaha cha ndaca tuhun ra tuhun ihya, quitá ra Pilato chican

ra chihin ra Israel inga chaha ta catyí ra:

—Yuhu ña nañihi mai ni noo cuatyí ra ihya. ³⁹ Soco nyoho iyó noo costumbre chi ndo cha chican ndo na sañe chi noo ra ñohó vehe caa cha vico pascua ihya. ¿Atu cuñí ndo cha sañe chi ra cha cuví rey cuenda ndo ñu Israel? —catyí ra Pilato chi ra.

⁴⁰ Tyicuan ta tandihí ra quichaha canachaa ra ta catyí ra:

—¡Ma sañon chi ra chiña! ¡Chi ra Barrabás sañon! —catyí ra.

Ta ra Barrabás cuví ra noo ra suhu.

19

¹ Tyicuan ta quehen ra Pilato chi ra Jesús ta tachi ra na cucañi sindaro chi ra. ² Ta sindaro savaha ra noo corona chihin iñu ta catyihí ra xiñi ra Jesús. Ta sacuihno ra chi ra chihin noo sahma tyacu nyaa tari cha tuhvá rey cañihno. ³ Tyicuan ta catuhva ra nu nanyaá ra ta chacú nyaa ra chi ra, ta cacatyí ra:

—¡Nocumi chuun yoho Rey cuenda ñu Israel! —cacatyí ra, ta cacatu ra chi ra.

⁴ Tyicuan ta quita tucu ra Pilato inga chaha ta catyí ra chi ra:

—Nyehe ndo cuatave chi ra ityi nuu ndo tacuhva nanyehe ndo vatyí ni noo cuatyí ra ña nañihi —catyí ra Pilato chi ra.

⁵ Ta quita ra Jesús yihí corona iñu cuan xiñi ra, ta ñihno ra sahma tyacu nyaa cuan. Tyicuan ta ra Pilato catyí ra chi ra:

—¡Ma ra ihya! —catyí ra chi ra.

⁶ Cuhva cha cananyehe ra cacuví nuu chi tata sutu ta policia chi ra, quichaha cacana chaa ra ta catyí ra:

—¡Cahñi chi ra nu cruzi! ¡Cahñi chi ra nu cruzi! —cacatyí ra.

Soco ra Pilato catyí ra chi ra:

—Quehen maa ndo chi ra ta cahñi maa ndo chi ra nu cruzi. Vatyí yuhu ni noo cuatyí ra ña nañihí.

⁷ Soco nacahan ra Israel cuan ta cacatyí ra:

—Iyó noo ley chi ndi, ta cuhva catyí ley ndi, cuñí chi cha cúvi ra vatyí

nasahá ra Sehe Nyoo chi ra —cacatyí ra.

⁸ Cha chiñi ra Pilato tuhun ihya, nayuhví ca ra. ⁹ Ta ndihví tucu ra inga chaha chichi vehe tyiño, ta ndaca tuhun ra chi ra Jesús:

—¿Nya quita yoho? —catyí ra chi ra.

Soco ra Jesús ñahri cha nacahan ra.

¹⁰ Tyicuan ta ra Pilato catyí ra chi ra:

—¿Ñáá tuhun ña nacahún nu cahán yuhu? ¿Atu ña chitón vatyí ra cuví tyiño cuví ta iyó ityi chii cha tyai chuun nu cruzi, ta iyó tucu ityi chii cha sañe chuun? —catyí ra Pilato chi ra Jesús.

¹¹ Ta nacahan ra Jesús ta catyí ra:

—Tyehe ta ña chaha Nyoo tyiño cuan chuun, ñahri ityi iyó chuun cha tachi tuñun chii. Yucuan chaha, ra cha cachaha cuenda chii chuun, cahnu ca cuatyí ra ican saha yoho —catyí ra Jesús chi ra Pilato.

¹² Nya cuhva cuan ta nducu ra Pilato cuhva saña ra chi ra Jesús, soco ra Israel cacana chaa ra siqui ra, ta catyí ra:

—¡Tatu sañon chi ra, ñima amigo rey cahnu cuví chuun! Vatyí tandihí ri ra cha catyí tyi rey cuví ra, ra xaan iñi chi rey cahnu cuví ra —cacatyí ra.

¹³ Tyicuan ta cha chiñi ra Pilato tuhun ihya, tachi ra na quita ra Jesús ityi chata vehe. Ta chicunyaá ra Pilato nu tyayu ra nu tuhvá ra sandaa cuatyí ñáyivi nu nañi chi Gabata chihin sahan hebreo, ta cuñi chi catyí: “Nu yihí yuu”. ¹⁴ Ta cuví chi noo quivi cha ni cumañi ca vico pascua, ñáá cuhva ora. Tyicuan ta ra Pilato catyí ra chi ra Israel cuan:

—¡Ma rey ndo chiña!

¹⁵ Soco maa ra Israel canachaa ra ta cacatyí ra:

—¡Na cúvi ra! ¡Na cúvi ra! ¡Cahñi chi ra nu cruzi! —cacatyí ra.

Ta ra Pilato catyí ra chi ra:

—¿Atu cahñi nu cruzi chi rey ndo?

Soco ra cacuví nuu chi tata sutu cacatyí ra:

—Yori ca rey iyó. Noo tuhun ri ra César, cha cuví rey cahnu —catyí ra.

16 Tyicuan ta ra Pilato chaha cuenda ra chi ra Jesús chi ra na cunyaa ra nu cruzi. Ta quehen sindaro chi ra, ta cuahan ra chihin ra.

Nu chihí ra Jesucristo nu cruzi
(Mt. 27.32-44; Mr. 15.21-32; Lc. 23.26-43)

17 Ta nyisó ra Jesús cruzi ra, cuahan ra noo nu nañi: “Yiqui Xiñi Ndiyí”. Ta chihin sahan hebreo nañi chi Gólgota. 18 Ta yucuan catyaa ra chi ra nu cruzi chihin clavu. Ta ñn ri chihin ra catyaa ra uvi ca ra. Noo ra tacaá ra noo nu cruzi inchiyo xiin ra ta inga ra inga chiyo xiin ra. Ta ra Jesús tacaá ra mahñu. 19 Ta ra Pilato tachí ra tyiño na cunyaa letra xiñi cruzi cuan. Ta catyí chi tyehe caa: “Ra Jesús ra ñuu Nazaret, Rey cuenda ñu ñuu Israel.” 20 Ta cuaha ñu Israel sacuaha ñu tuhun cuan, vatyí yatyin ri ñuu ñu cuví nu chinanyaa ra cruzi ra Jesús. Ta letra cuan nyaá chihin sahan hebreo, ta sahan griego, ta sahan latín. 21 Yucuan chaha ra cacuví nuu chi tata sutu cacatyí ra chi ra Pilato:

—Ma tyaun: “Rey cuenda ñu ñuu Israel”, vaha ca tyaun: “Ican ra ihya cha catyí vatyí rey cuenda ñu ñuu Israel cuví ra” —cacatyí ra.

22 Soco ra Pilato catyí ra:

—Noo cha yaha tyaj, nandoo maa tyicuan caa —catyí ra chi ra.

23 Cha yaha cha catyaa sindaro cuan chi ra Jesús nu cruzi, canaquehen ra sahma ra ta cha cumi tahan ra quehen ra noo noo sahma ra. Ta ndoo nonga sahma ra cha ña quicu ñu. Noo ri savaha ñu nyacua nya siqui ta nya yuvi. 24 Ta sindaro cuan cacatyí ra chi ra tahan ra:

—Ma cahnya yo. Cuhun yo noo sihva, nyehe yo yóo chi tahan chi sahma cuan —cacatyí ra.

Tyicuan caa cuví tari cuhva catyí nu tutu Nyoo nu catyí chi tyehe caa: “Casacha ra sahme ta chahan ra noo sihva chihin chi, nyehe ra yóo ra saha canaa.” Ta ican ihya casacuví sindaro cuan.

25 Ta chaha cruzi ra Jesús nanyaá sihi ra. Ta nanyaá tucu cuhu ña, ta cu María ñasihí ra Cleofas, ta cu María ñaha Magdala. 26 Ta nanyehe ra Jesús chi sihi ra, nanyaá ña yatyin ri. Ta nanyehe tucu ra chi ra cha chica noo chihin ra, ra cha cuñi xaan ra chi. Ta catyí ra chi sihi ra:

—Ma sehun nanyaá chiña —catyí ra.

27 Tyicuan ta catyí ra chi ra cha cuñi xaan ra chi:

—Ma sihun nanyaá chiña —catyí ra chi ra.

Ta nya quivi cuan ta naquehen cuenda ra chi ña cuanuhu ña vehe ra.

Nu chihí ra Jesús
(Mt. 27.45-56; Mr. 15.33-41; Lc. 23.44-49)

28 Cha yaha tuhun ihya, cha nyehe ra Jesús vatyí cha ndihí tyiño saha ra. Tyicuan ta catyí ra:

—Itiyi ndutya —catyí ra.

Ta chihin tuhun cuan nachino cava tuhun cha nyaá nu tutu Nyoo.

29 Ta yucuan nanyaá noo quivi tyitú chihin vinagre. Tyicuan ta casatyí ra chihin noo xixan ndutya iya cuan. Ta tyaa ra noo nu soco yutun cha nañi hisopo, ta catyañaa ra nya yuhu ra. 30 Chihí ra Jesús ndutya cuan ta catyí ra:

—Cha iyó vaha tandihí vityin —catyí ra.

Tyicuan ta nacañi noo ra xiñi ra ta chihí ra.

Nu quiñi lanza yiqui naha ra Jesús

31 Noo ri ca quivi cumañi ta cuví quivi cahnu ca vico pascua cuan, ta ra cacuví nuu chi ñu Israel ña cuñi ra cha ndoo coño ñuhu cuan nu cruzi quivi nyitatu ñu, vatyí quivi nyitatu ñu quivi ii cuví. Yucuan chaha chican ra tumañi iñi chi ra Pilato na tachí ra na cucahnu sindaro sihin ra cha catacoyo nu cruzi cuan tacuhva na cacuvi ra cha numi ri, ta cañehe ra coño ñuhu ra. 32 Tyicuan ta cuahan coyo sindaro nu tayucú cruzi cuan. Ta chahnu ra sihin noo ra cha tacaá yucuan. Tyicuan ta chahnu tucu ra sihin inga ra cha tacaá xiin ra Jesús.

33 Soco cuhva cha cuatuhva ra nu

tacaá ra Jesús, cananyehe ra vatyi cha chihí ra. Ta yucuan chaha ña cachahnú ca ra sihin ra.

³⁴ Soco suvita ri noo sindaro cuan quiñi ra lanza yiqui naha ra Jesús. Ta quita ñiñi ta ndutya. ³⁵ Ra cha nacatyí tuhun ihya, noo ra cha nyehe cuví ra. Ta cha ndicha cahán ra, vatyi maa ra chitó ra vatyi cha ndicha cahán ra, tacuhva nachino tucu iñi nyoho. ³⁶ Vatyi tuhun ihya cuví chi tyehe caa tari cuhva catyí tuhun Nyoo nu catyí chi: “Ni noo yiqui ra ta ma tahnu.” ³⁷ Ta iyó nonga tucu nu catyí chi nu tutu Nyoo tyehe caa: “Cunyehe ñu chi ra cha quiñi ra lanza chi.”

Nu quihvi ra Jesús chichi ñuhú

(Mt. 27.57-61; Mr. 15.42-47; Lc. 23.50-56)

³⁸ Cha yaha tuhun ihya, ra José ra ñuu Arimatea chican ra chi ra Pilato nacuhva ra cha naquehen ra coño ñuhu ra Jesús. Ta ra José cuan cuví ra noo ra yihí cuenda ra Jesús vasi xehe ri cha cuenda cha yuhví ra chi ra cacuví nuu chi ñu Israel. Tyicuan ta chaha ra Pilato permisú chi ra, ta ra José chahan ra chinaquehen ra coño ñuhu cuan. ³⁹ Chahan tucu ra Nicodemo, ra cha chahan chichan chihin ra Jesús cha cha cuaa. Chaa ra chihin ndutya vixi chahán. Ta noo ndutya vixi chahán cha nañí mirra nasaca ñu chihin inga cha nañí áloe. Ta quita chi tari noo oco uchi kilu cha tandihí. ⁴⁰ Yucuan ta ra José ta ra Nicodemo caquehen ra coño ñuhu ra Jesús ta canasiqui noo ra chi ra chihin sahma cuiñi cahyu ra ndutya vixi chahán cuan, tari cuhva noo tuhun cha iyó chi ñu Israel tu cuatyihí ñu noo ndiyi chichi ñuhú. ⁴¹ Yatyin nu cachahñi ra chi ra Jesús nu cruzi nyaá noo chacu yutun yucu vixi. Ta chichi chacu cuan nyaá noo ñaña chaa nu ta cohon ca ni noo ndiyi. ⁴² Yucuan tyihí ra coño ñuhu ra Jesús vatyi yatyin ri cuan nyaá ñaña cuan ta vatyi cha cua quichaha quivi nyitatú ñu Israel.

20

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

¹ Cha timingu cha ñaa ca, cu María ñaha Magdala cuan chahan ña nu ñaña. Ta nyehe ña tyi ñahri ca yuu nyasí yuhu ñaña cuan. ² Tyicuan ta chinó vavaha ña cuahan ña nu nyaá ra Simón Pedro ta inga ra chica noo chihin ra Jesús, ra cha cuñi xaan ra Jesús chi. Ta catyí ña chi ra:

—Quehen ñáyivi coño ñuhu Sutu Mañi yo chichi ñaña, ta ña chitó yo nya chinyaca ñu —catyí cu María chi ra Pedro ta chi inga ra cuan.

³ Tyicuan ta ra Pedro ta inga ra cuan cuahan coyo ra nu ñaña.

⁴ Ninduvi ra ñin ri cuahan coyo ra cachino ra. Soco chino ca inga ra cuan ican saha ra Pedro, ta xihna ca ra chaa nu ñaña. ⁵ Quichaha nyehe ñihñi ra chichi ñaña, ta nyehe ra sahma cuiñi cha yihí coño ñuhu ra Jesús, catuví cuan. Soco ña quihvi ra chichi ñaña. ⁶ Yaha cuan ta chaa ra Simón Pedro chata ra, ta quihvi ra chichi ñaña cuan. Suri nyehe tucu ra cuan sahma cuan catuví. ⁷ Ta suri nyehe tucu ra vatyi sahma cha siquí noo xiñi ra Jesús, ña ñin ri cayucú chihin inga sahma cuan, soco catuví ñin. ⁸ Tyicuan ta quihvi tucu inga ra chica noo chihin ra Jesús cuan, ra cha chaa cha xihna ri nu ñaña cuan. Ta nyehe ra cha cuví cuan, ta chino iñi ra. ⁹ Vatyi cha cuví maa ta cutuñi ca iñi ra cha catyí nu tutu Nyoo, vatyi ra Jesús cuñi chi cha nandoto ra cha yaha chihi ra. ¹⁰ Tyicuan ta ra cachica noo chihin ra Jesús cuanuhu coyo ra nya vehe.

Nu tui ra Jesús nuu cu María ñaha ñuu Magdala

(Mr. 16.9-11)

¹¹ Soco cu María ndoo ña chata yatyin ri yuhu ñaña, chacú chaa ña. Cha ñiri ca cha chacú ña, nyehé ñihñi ña chichi ñaña. ¹² Ta nyehe ña uvi tahan ángel ñihnó ra sahma cuichin, nyicú ra nu catuví coño ñuhu ra Jesús.

Noo ra nyaá ityi nu catuvi xiñi ra, ta nonga ra ityi nu catuvi chaha ra. ¹³ Ta ángel cuan ndaca tuhun ra chi ña ta catyí ra:

—Maha, ¿ñáá tuhun chacú chaun?

Ta catyí ña:

—Vatyí quehen ñu chi Sutu Mañi yuhu, ta ña chité nya tyihí ñu chi ra —catyí ña chi ángel cuan.

¹⁴ Ni cahán ña tuhun ihya ta nanyocava ña ta nanyehé ña chi ra Jesús yucuan. Soco ña chitó ña cha ra Jesús cuví ra. ¹⁵ Tyicuan ta ra Jesús ndaca tuhun ra chi ña:

—¿Ñáá tuhun chacún? ¿Yóó chi nanducún? —catyí ra chi ña.

Cuñí maa ña vatyí ra sahá cumi chacu cuan cuví ra. Ta catyí ña:

—Tata, tatu yoho quehun chi ra Jesús, catyí chii nya sandoun chi ra, vatyí naquehin chi ra —catyí ña chi ra.

¹⁶ Tyicuan ta catyí ra Jesús chi ña:

—¡María! —catyí ra chi ña.

Maa ña nanyehé ña ta cahan ña chihin ra chihin sahan hebreo, ta catyí ña:

—¡Raboni! —Ta cuñí chi catyí: “Maestro”.

¹⁷ Ta catyí ra Jesús chi ña:

—Ma tiun chii, vatyí ta nandaa que nu nyaá Suti. Soco cuahan ta catyun chi tandihí yañi vatyí cuahin nu nyaá Suti, ta suri Sutu ndo cuví chi ra. Cuahin nu nyaá Nyoi, ta suri Nyoo ndo cuví chi ra —catyí ra Jesús chi ña.

¹⁸ Tyicuan ta chahan cu María ñaha Magdala cuan chisacoto ña chi ra cachica noo chihin ra Jesús vatyí nyehe ña chi ra Jesús ta catyí ra tuhun cuan chi ña.

Nu tuví ra Jesús nuu ra cachica noo chihin ra

(Mt. 28.16-20; Mr. 16.14-18; Lc. 24.36-49)

¹⁹ Suri maa quivi cuan cha quichaha vitya, cha cuacuaa ta candu ñin ri ra cachica noo chihin ra Jesús. Ta nyasí vaha yuvehe nu nyicú ra cha cuenda cha yuhví ra chi ra cacuví nuu chi ñu Israel. Ta ra Jesús tuví ra ta chicuinanyaa ra mahñu. Ta chaha ra nocumi chi ra, ta catyí ra:

—Na coo cha taxi ri aña ndo —catyí ra.

²⁰ Cha yaha cha catyí ra tuhun ihya ta sañaha ra ndaha ra ta yiqui naha ra. Ta maa ra cacusii cuñi ra cha nanyehé ra chi Sutu Mañi yo. ²¹ Ta catyí tucu ra Jesús inga chaha chi ra:

—Na coo cha taxi ri aña ndo. Tari tachí Suti tyiño chii, tyicuan caa tachí tyiño chi nyoho —catyí ra chi ra.

²² Tyicuan ta tiví ra siqui ra ta catyí ra chi ra:

—Naquehen ndo Tatyí Ii Nyoo.

²³ Ñu cha sahá ndo tucahnu iñi chi, iyó tucahnu iñi chi ñu. Ta ñu cha ña sahá ndo tucahnu iñi chi, ñahri tucahnu iñi iyó chi ñu —catyí ra Jesús chi ra.

Nu nyehe ra Tomás chi Sutu Mañi yo cha yaha nandoto ra

²⁴ Soco ra Tomás, noo ra chica noo chihin ra Jesús, ra cha catyí ñu: “ra tinihi”, yori ra nyaá chihin ra cuhva cha quichí ra Jesús. ²⁵ Yaha cuan ta canacatyí ra cachica noo chihin ra Jesús chi ra:

—Nyehe ndi chi Sutu Mañi yo —catyí ra chi ra.

Soco ra Tomás catyí ra:

—Tatu ma nyehi ndaha ra nu cahví nu yihí clavu, ta tatu ma tyihi ndahi nu yihí clavu cuan, ta tatu ma tyihi ndahi yiqui naha ra, ma chino iñi —catyí ra Tomás.

²⁶ Uña quivi yaha ta canyicú tucu ra cachica noo chihin ra Jesús noo vehe. Ta nyaá ra Tomás chihin ra. Tyicuan ta vasi nyasí vaha yuvehe soco quihví ra Jesús ta chicuinanyaa ra mahñu ra. Ta chaha ra nocumi ta catyí ra:

—Na coo cha taxi ri aña ndo.

²⁷ Tyicuan ta quichaha catyí ra chi ra Tomás:

—Tyihi nu ndahun nu cahví ndahi. Ta tyihi ndahun yiqui nahi. Ta ma caca uvi iñun, soco chino iñun —catyí ra Jesús chi ra Tomás.

²⁸ Tyicuan ta nacahan ra Tomás ta catyí ra:

—¡Sutu Mañi yuhu! ¡Nyoo Suti cuví chuun! —catyí ra Tomás.

²⁹ Ta catyí ra Jesús chi ra:

—Yoho Tomás, vityin chinó iñun tyi nyehún chi. Sii ca cuñí ñu cha ña nyehe ta chinó iñi ñu —catyí ra Jesús chi ra Tomás.

Nu sacoto ra Juan ñáá cuenda chino libru ihya

³⁰ Ta cuaha ca milagru sacuvi ra Jesús nuu ra cachica noo chihin ra, ta ñahri chicunyaa nu libru ihya. ³¹ Soco chicunyaa tuhun ihya vatyí tacuhva chino iñi ndo vatyí ra Jesús cuví Cristo, ra cuví Sehe Nyoo, ta vatyí coo ndo ñayivi cha ma naa ca maa tatu chinó iñi ndo chi ra.

21

Nu tuví ra Jesús nuu ucha tahan ra cachica noo chihin ra

¹ Cha yaha cuan ta tuví tucu ra Jesús nuu ra cachica noo chihin ra inga chaha. Tyehe caa tuví ra yuhu miñi Tiberias. ² Hin ri nyicú ra Simón Pedro ta ra Tomás cha catyí ñu: “ra tñihi” chi, ta ra Natanael, ra ñuu Caná nu cuví Galilea. Nyicú tucu sehe ra Zebedeo ta uvi ca ra cachica noo chihin ra Jesús. ³ Ta catyí ra Simón Pedro chi ra:

—Cuahin cuatiin tiyaca —catyí ra.

Ta cacatyí ra chi ra:

—Cuhun tucu nyuhu chuhun —cacatyí ra.

Cuahan coyo ra ta quihvi coyo ra chichi noo canoa, soco cha cuaa cuan ni noo tiyaca ña catiin ra. ⁴ Cha vachi cundichin cuan tuví ra Jesús nu ñiti yuhu miñi cuan. Soco ra cachica noo chihin ra, ña canicohón nuu ra chi ra. ⁵ Tyicuan ta catyí ra chi ra:

—Yoho ra tahan yo, ¿atu ta ñihi ca ndo tiyaca?

Ta canacahan ra ta catyí ra:

—Ta ñihi ca ndi.

⁶ Tyicuan ta nacahan ra Jesús ta catyí ra:

—Tyihi ndo tarraya chiyo vaha canoa chiña, ta ñihi ndo —catyí ra Jesús chi ra.

Tyicuan caa casacuvi ra, ta yaha cuan ta nyacua ña cuví tava ra tarraya cuan nu ndutya chaha cha cuaha tiyaca yihí. ⁷ Ta ra cha cuñí

xaan ra Jesús chii catyí ra chi ra Pedro:

—¡Sutu Mañi yo cuví! —catyí ra chi ra Pedro.

Cha chiñi ra Simón Pedro vatyí Sutu Mañi yo cuví, ndihvi noo ra sahma ra, vatyí tava ra cha cuatiin ra tiyaca, ta quiñi ra cuahan ra chichi ndutya cuan. ⁸ Ta inga ra cachica noo chihin ra Jesús cha coyo ra nya yuhu miñi cuan chihin canoa, caxitá ra tarraya cuan tyitú yihí tiyaca, vatyí yatyin ri yuhu miñi cuan cañohó ra ta cha noo cientu metru ri. ⁹ Cuhva cha canoó ra nu ñuhú, cananyehé ra noo nu caá titi ñuhu. Ta catuvi noo tiyaca siqui titi ñuhu cuan, ta pan ñandihí. ¹⁰ Ta ra Jesús catyí ra chi ra:

—Nyaca ndo suhva tiyaca cha ni tiin ndo —catyí ra Jesús chi ra.

¹¹ Ta ra Simón Pedro ndaa ra nu canoa ta quichaha xita quiñoho ra tarraya tyitú yihí tiyaca nahnu. Cientu uvi xico uchi uñi tahan ti ñohó. Ta vasi cuaha ti, ña tahnya tarraya cuan. ¹² Tyicuan ta catyí ra Jesús chi ra:

—Ñaha ndo ta curumusa ndo —catyí ra Jesús chi ra.

Ta ni noo ra cachica noo chihin ra ña cacaña iñi ra candaca tuhun ra yóo ra cuví ra vatyí cachitó ra vatyí Sutu Mañi yo cuví ra. ¹³ Tyicuan ta tuhva ra Jesús ta quehen ra pan, ta chaha ra chi ra. Ta suri tyicuan caa sacuvi ra chihin tiyaca. ¹⁴ Ican ihya cuví chaha cu uñi cha tuví ra Jesús nuu ra cachica noo chihin ra cha yaha cha nandoto ra.

Nu cahán ra Jesús chihin ra Simón Pedro

¹⁵ Cha yaha cha curumusa ra Jesús, ndaca tuhun ra chi ra Simón Pedro:

—Simón, sehe ra Jonás, ¿atu cuñí con chii ican saha ra ihya?

Ta nacahan ra Pedro ta catyí ra:

—Ay, Sutu Mañi yuhu, maun chitón tyi cuñí chuun —catyí ra Pedro.

Ta catyí ra Jesús chi ra:

—Cuhva cha cachi mbee nyihi sane —catyí ra Jesús chi ra Pedro.

¹⁶ Ta ndacā tuhun ra Jesús chi ra inga chaha:

—Simón sehe ra Jonás, ¿atu cuñún chii? —catyí ra Jesús chi ra.

Ta nacahan ra Pedro ta catyí ra:

—Sutu Mañi yuhu, maun chitón tyi cuñí chuun —catyí ra Pedro chi ra.

Ta catyí ra chi ra:

—Saha cumi mbee sane —catyí ra Jesús chi ra Pedro.

¹⁷ Ta chaha cu uñi ndacā tuhun ra chi ra:

—Simón Pedro, sehe ra Jonás, ¿atu cuñun chii? —catyí ra Jesús chi ra.

Cuhva cha ndacā tuhun ra chi ra cha cu uñi chaha tatu cuñí ra chi ra, ra Pedro nducuihya iñi ra, ta catyí ra chi ra:

—Sutu Mañi yuhu, maun chitón yoso caa añime ta maun chitón tyi cuñí chuun —catyí ra Pedro.

Ta ra Jesús catyí ra chi ra:

—Saha cuenda mbee sane. ¹⁸ Cha ndicha catyí chuun vatyí ta tyivaun ndihvī noun sahmon ta chahun nu cuñún. Soco na cuchahnun, cusanacaun ndahun ta inga ra cusandihvī noo chuun. Ta cunyaca ra chuun nu ña cuñún cahun —catyí ra Jesús chi ra Pedro.

¹⁹ Cha catyí ra Jesús tuhun ihya cuñí ra catyí ra yoso caa cucúvi ra Pedro ta cusacahnu ra chi Nyoo cha cuenda cuan. Yahā cuan ta catyí ra Jesús chi ra Pedro:

—¡Cunyicon chii! —catyí ra chi ra.

Nu cahán ra Juan tuhun maa ra

²⁰ Tyicuan ta nyocavā ra Pedro ta nanyehē ra vatyí nyicón inga ra cha chicā noo chihin ra Jesús, ra cha cuñí xaan ra Jesús chi. Suri maa ra chinyañā ra chi ra Jesús cha cuxiñi ra quivī cuan. Ta ndacā tuhun ra ta catyí ra: “Sutu Mañi yuhu, ¿yóó ra cunaxico tuhun chuun?” catyí ra, ndacā tuhun ra quivī cha ni cumañi cúvi ra Jesús. ²¹ Cuhva cha nanyehē ra Pedro chi ra, ndacā tuhun ra chi ra Jesús:

—Sutu Mañi yuhu, ta ra ihya, ¿ñáá cha cucuvi chi ra? —catyí ra chi ra.

²² Nacahan ra Jesús ta catyí ra:

—Tatu cuñí mai cha coo ra nyacua nya ndichi inga chaha, ¿ñáá cha cuenda yoho? Yoho cunyicon chii —catyí ra Jesús chi ra Pedro.

²³ Tyicuan ta chityā tuhun ihya nu canyicú yañi yo vatyí ra cuan, ma cúvi ra. Soco ña catyí ra Jesús cha ma cúvi ra. Catyí ra: “Tatu cuñí yuhu cha coo ra nyacua nya quichi inga chaha, ¿ñáá cha cuenda yoho?”

²⁴ Yuhu cuví ra yucuan, ra cha cahán ra Jesús tuhun. Ta nyehi tandihí cuii maa cha cuví ta tyaī nu libru ihya. Yuhu chite vatyí tandihí cha tyaī, ndicha.

²⁵ Iyó cuaha ca cha sacuvī ra Jesús. Tyehe ta chicunyā tahan tahan tuhun cuan nu libru, cahví iñi tyi naniī ñuhu ñayivī ma cutahan tandihí libru cuan.

Tyiño Cha Casacuvī Ra Apóstol: Ra Cha Tyatyíño Ra Jesucristo Chi

Nu catyí ra Jesús tyi cuaquichi Tatyí Ii Nyoo

¹ Yoho Teófilo, yuhu ra Lucas sacuhin tutu chuun quiví cuan. Ta nu sacuhin tutu cha xihna ri cuan, tyaj tandihí cha quichahā sacuvi ra Jesús ta tandihí cha sañahā ra nya quiví xihna ri ² ta nya quiví nandaā xica ra andiví. Ta cha cumañi ca nandaā ra andiví, nacachí ra chí ra apóstol cuenda ra. Ta tyatyíño ra chí ra chihin Tatyí Ii Nyoo tyi cacaca ra tyiño ra. ³ Ta maa ra Jesús nyehe ra tindoho ta chihí ra. Ta cha yahā cuan, nandoto ra ta tuví ra nu canyicú ra apóstol. Ta chichi cha uvi xico quiví, cuaha xaan chaha tuví ra nu canyicú ra, vatyí na cacoto ra vatyí ndicha cha nyitó ra. Ta cahan ra tuhun yoso caa nyacá ñaha Nyoo chi yo.

⁴ Cuhva cha nyaá ca ra chihin ra, ra Jesús catyí ra chí ra:

—Ma quita ndo Jerusalén ihya, nyacua nya naquehen ndo Tatyí Ii cha catyí Suti tyi cuhva ra chí ndo, tari catyí chi ndo quiví cuan. ⁵ Chihin ndutyā sacondutyā ra Juan chi ñáyiví. Soco nyoho ña cuaha ca quiví ta cucondutyā ndo chihin Tatyí Ii —catyí ra Jesús.

Nu nandaā xica ra Jesús andiví

⁶ Cuhva cha canyicú ra apóstol ñin ri chihin ra Jesús, ta candacā tuhun ra chí ra:

—Sutu Mañi yuhu, ¿atu vityin ri cusacacun chí ñuu yo Israel ihya ndaha ra ñuu Roma? —catyí ra.

⁷ Ta nacahan ra Jesús ta catyí ra:

—Ña tahán chí coto nyoho nya quiví. Noo tuhun ri maa Nyoo Sutu yo cuacatyí ra ama. ⁸ Soco cuhva cha quichí Tatyí Ii siqui ndo cunaquehen ndo tunyee ñi, ta cuquita ndo

vatyí cahan ndo tuhun Jerusalén ihya ta tandihí ñuu cha nyicú Judea ta Samaria, ta nicañu ñuhu ñáyiví.

⁹ Ta cha yahā cha catyí ra Jesús tuhun ihya, ta cha ni ri ca cha canyehé ra chí ra, nandaā xica ra andiví, ta quihví ra chichi noo vico. Ta ña canyehé ca ra chí ra. ¹⁰ Ta cuhva cha canyehé ndaa ra andiví, ta tuví uvi tahan ángel yatyin nu canyicú ra. Ñihnó ra sahma cuichin. ¹¹ Ta cacatyí ra cuan chí ra:

—Nyoho ra Galilea, ¿ñáá tuhun cha ndoo ndo nyehé ndaa ndo andiví? Suri maa ra Jesús cha nyehe ndo nandaā xica ihya, tyehe caa cuquichi tucu ra inga chaha.

Nu canacachí ra apóstol chí ra Matías vatyí ndihví ra tyiño nuu ra Judas

¹² Tyicuan ta quita coyo ra apóstol nu chinyicú ra yucu nu iyó yutun olivo cuan. Ta cuanuhú coyo ra ñuu Jerusalén. Ta yatyin ri nyaá ñuu cuan, tari sava hora ri. Ta sava ri hora cuví caca ñáyiví quiví nyitatu ñu, vatyí tyicuan caa catyí ley cha tyaa ra Moisés. ¹³ Cuhva cha nachaa coyo ra Jerusalén cuan, candaa ra nu cu uvi piso noo vehe nu ca iyó ra. Ta tandihí ra cuan, ican ra cuví, ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, ta ra Simón cuenda ra cacuñi naquiqui siqui gobiernu Roma, ta ra Judas yañi ra Jacobo. ¹⁴ Ta nyita ri ndu ñin ri ra ta ñin ri cuhva cachicá xiñi ra ta cachicán tahví ra chí Nyoo. Ta nyicú tucu yañi ra Jesús ta cu María síhi ra, ta inga ñusihí ñandihí.

¹⁵ Tari noo ciento oco ñáyiví ndu ñin ri ñu quiví cuan. Ta nicuinanyaa ra Pedro. Ta catyí ra chí ñu:

¹⁶ —Nyoho yañi, cuñi chí cha cuví tari cuhva catyí nu tutu Nyoo. Vatyí cahan Tatyí Ii chihin yuhu ra David yoso caa cucuhva cuenda ra Judas chí ra Jesús chí ra xaan ñi chí ra. ¹⁷ Ta ra Judas cuví ra noo ra chindihí chihin yo. Ta ñin ri chica ra tyiño Sutu

Mañi yo chihin yo. ¹⁸ Soco chahan ra, ta sata ra noo ñuhú chihin xuhun cha ñihí ra cha chaha cuenda ra chi ra Jesús. Yaha cuan ta canacava ra chihin xiñi ra, ta ndata chichi ra ta quita tandihí chiti yihví ra. ¹⁹ Ta quivi cha cachito ñu ca iyó Jerusalén ihya cha chihí ra, casacunañi ñu chi ñuhu cuan Acéldama. Ta cha chihin sahan maa ñu cuñi chi catyí Nu Catuvi Niñi. ²⁰ Vatyí nu libru Salmo catyí chi tuhun ra Judas tyehe caa:

Na ndoo maa ri maa vehe ra.

Ta yori coo chichi.

Ta catyí tucu chi:

Inga ra cunanduvi tyiño nuu ra.

²¹⁻²² 'Ta vityin nyicú ra cachica noo chihin yo quivi chinyaa Sutu Mañi yo Jesús chihin yo; nya quivi sacondutya ra Juan chi ra, ta nya quivi nandaa xica ra andivi. Ta vityin cuñi chi cha ndu ñn ri noo ra chihin yo, vatyí cuví ra cha ndaa cha cuenda cha nandoto ra Cristo —catyí ra Pedro.

²³ Tyicuan ta cacana ra chi uvi tahan ra, chi ra José cha nañi Barsabás, ta suri nañi tucu ra Justo; ta cacana tucu ra chi ra Matías. ²⁴ Ta cachican tahvi ra tyehe caa:

—Sutu Mañi yuhu, yoho chitón cha caa añima tandihí ndi. Sañaha chi ndi chichi cha uvi tahan ra ihya, nya ra cha nacachi maun, ²⁵ vatyí sacuvi ra tyiño cha sacunañi ra Judas cha cuenda cuatyí ra, ta cuahan ra nu tahan chi cuhun ra —cacatyí ra, chicán tahvi ra.

²⁶ Tyicuan ta cachahan ra noo sihva, tacuhva nyehe ra nya ra tahan chi nyatu cuan chi. Ta tahan chi chi ra Matías. Ta yucuan cuví nu ndu ñn ri ra chihin ndi uchi ñn apóstol.

2

Nu chaa Tatyí Ii

¹ Ta ñn ri nyicú ñáyivi yihí cuenda ra Jesús ta chaa quivi vico Pentecostés cha sanducahnú ñáyivi Israel. Ta ñn ri cuhva chicá xiñi ñu. ² Ta sana iñi ñu ta nacuiñi ñu noo cha cayu vachi ityi andivi. Tari cha cayu yaha noo tatyí ñihi. Ta iyo cuví tandihí chichí vehe

nu canyicú ñu. ³ Tyicuan ta tuví tari yaa ñuhu quiti cuatyí siqui noo noo ñu. ⁴ Ta tandihí ñu chitu ñu chihin Tatyí Ii. Ta quichaha cahan ñu inga sahan yoso cuhva saquehen ityi maa Tatyí Ii chi ñu.

⁵ Ta quivi cuan cuaha xaan ra Israel ra vaha chicá chihin Nyoo canyicú ra ñuu Jerusalén cuan. Cuaha xaan ra ca iyó inga ityi nicahnu siqui ñuhú ñáyivi chaa coyo vatyí casanducahnu ra vico Pentecostés. ⁶ Ta cha cachiñi ra cuan cha iyo xaan cuví nu canyicú ñu, ta cuahan coyo ra ta nataca ra yatyin ri nu nyicú ñu. Ta ña cutuñi iñi ra ñáá cha cuví cuan, vatyí noo noo ra cachiñi ra cahán ñu cuhva sahan cha cacahán maa ra. ⁷ Iyo cuñi ra ta catyí ra chi ra tahan ra:

—¿Atu ñima ñu Galilea cuví tandihí ñu cha cahán ihya? ⁸ ¿Ñáá tuhun cha chihí yo cahán ñu cuhva sahan noo noo yo? ⁹ Ihya nyicú yo cha cuví yo ñu Partia, ta ñu Media, ta ñu Elam, ta ñu Mesopotamia, ta ñu Judea, ta ñu Capadocia, ta ñu Ponto, ta ñu Asia. ¹⁰ Ta ñu Frigia ta ñu Panfilia, ta ñu Egipto, ta ñu iyó ityi nuu ca Cirene ityi África. Ta nyicú tucu ñu ñuu Roma cha iyó ñuu ihya. Ta suhva ñu cuví ñu ñu Israel nya quivi cacu ñu. Ta inga ñu cuví ñu ñáyivi nanduvi cuenda ñu Israel ta nyicon ñu ley ra Moisés. ¹¹ Iyó tucu ñáyivi ñuhú Creta ta ñu Arabia. Soco tandihí yo ta chihí yo cahán ñu chihin sahan cha cahán yo. Ta nacatyí ñu cha cahnu cha sacuvi Nyoo —cacatyí ra.

¹² Tandihí ra, iyo xaan cacuñi ra, ta yihí ra ndaca tuhun ra chi tahan ra:

—¿Ñáá cha cuñi chi catyí chi tandihí tuhun ihya? —catyí ra.

¹³ Soco inga ra cahán nyaa ra ta cacatyí ra vatyí cachiñi ñu.

Nu cahán noo ra Pedro nuu ñáyivi

¹⁴ Tyicuan ta nicuinanyaa ra Pedro chihin inga uchi ñn tahan apóstol. Ta chihin cha chaa cahan ra ta catyí ra:

—Nyoho yañi, cha cuví ndo ra Israel, ta tandihí nyoho cha iyó ndo Jerusalén ihya. Coto ndo tuhun ihya.

Ta cuiñi vaha ndo tuhun cha cuacatyí chi ndo. ¹⁵ Vatyí cuiñí maa ndo tyi chiñí ndi. Soco ña chiñí ndi, vatyí ña tuhvá ñáyivi chiñi cha cuhva ihya, vatyí ni ca ñn cha ñaha ri cuví. ¹⁶ Soco ihya cuví tuhun cha cahan ra Joel, ra cuví profeta Nyoo ta cha naha. Vatyí catyí ra:

¹⁷ Nu cuandihi ca quivi, catyí Nyoo, cusaquichi Tatyí Ii siqui tandihi ñáyivi. Ta cucahan sehe ndo cuende. Ta ra tyivaa ta ñu tyivaa cunyehe ñu cha sañaha Nyoo chi ñu. Ta ra chahnu cunyehe ra ñumahna.

¹⁸ Cusaquichi Tatyí Ii siqui ñu sacuví tyiño nui. Ta cucahan ñu cuende, catyí Nyoo.

¹⁹ Ta catyí ra vatyí cusañaha ra cha iyo cucuvi ityi andivi. Ta ityi nu ñuhu ñáyivi cusañaha ra seña, seña niñi, seña ñuhu, ta vico ñuhma.

²⁰ Cunduñaa ñanyii. Ta yoo tari caa tyacu niñi cunanduvi. Tyicuan caa cucuvi cha ñiri ca cha chaá quivi quichi Sutu Mañi yo. Ta cucuvi noo quivi cahnu vatyí cucutuñi chi yo nuu ra.

²¹ Ta tandihi ñu chicán tahvi sivi ra cucacu ñu. Tyicuan caa catyí ra Joel.

²² 'Cuiñi ndo nyoho ra Israel. Cuiñi ndo tuhun cha cuacatyí ihya. Ra Jesús ra Nazaret cuví ra noo ra cha cachi Nyoo chi vatyí quichi ra nu nyicu yo. Ta chitó yo vatyí ndicha vatyí cuaha xaan cha iyo, ta cuaha xaan milagru ta seña sacuvi Nyoo nu canyicú yo cha cuenda ra Jesús. Ta nyoho chitó vaha ndo tuhun ihya. ²³ Soco quivi quehen cuenda ndo chi ra, sacuvi ndo tari cuhva tyaa maa Nyoo cuhva nyata quivi xihna ri. Vatyí chaha cuenda ndo chi ra chi ra quiñi iyó. Ta chitacaá ra chi ra nu cruzi. Ta tyicuan caa chahñi ndo chi ra. ²⁴ Soco Nyoo sanandoto ra chi ra vatyí sacacu ra chi ra ndaha tuhun chihi. Vatyí tuhun chihi ña cuví cunyaca ñaha chi ra. ²⁵ Vatyí ra David cahan ra tuhun ra Cristo ta cha naha, ta catyí ra:

Tyicuan ri nyehí chi Sutu Mañi yo ityi nui.

Maa ra nyaá ñn chiyo vahi ta ñahri maa cha cuví sayuhvi chii.

²⁶ Yucuan chaha cusii xaan cuiñí añime. Ta chité yaa chihin cha sii cuiñí.

Ta siin ri coño ñuhi cunyitatu chi vatyí chité tyi cunandote.

²⁷ Vatyí yoho Nyoo Suti, ma sandoun añime nu nyicu ñu chihi, ta ni ma cuhvon cha tyahyu coño ñuhi.

Vatyí sehe iun cuví chii.

²⁸ Sañahún ityi cha cuahán nu coi ñáyivi chaa cha ma naa ca maa. Ta sacutún chii chihin tusii ñni vatyí nyaún chihin, catyí ra David ta cha naha.

²⁹ 'Nyoho yañi, chitó cachi yo vatyí ra David sutu chahnu yo chihi ra ta quihvi ra chichi ñuhu. Ta ñaña ra nyaá ca chi ihya nya vityin. ³⁰ Soco ra David cuví ra noo profeta cuenda Nyoo. Ta chitó ra vatyí Nyoo tyaa ra cuhva ta ñn ri tuhun cahan ra chihin ra vatyí suri tata maa ra ican cuacacu ra Cristo. Ta ra Cristo, ican ra cunyaca ñaha. ³¹ Ta tyicuan caa ra David tari cha vatyí nyehe ra cha cuacuvi nu cuahan ca chi quivi. Ta cahan ra tuhun cha cunandoto ra Cristo. Ta catyí ra vatyí ma ndoo añima ra nu nyicu ñu chihi. Ta ni ma tyahyu coño ñuhu ra, catyí ra. ³² Ta ra Jesús ihya sanandoto Nyoo chi ra. Ta tuhun ihya tandihi maa ndi cuví ndi cha ndaa. ³³ Nyoo sacahnú ra chi ra Jesús, ta cunyatyaá ra chi ra chiyo vaha ra andivi. Ta ra Jesús naquehen cuenda ra Tatyí Ii cha catyí Sutu yo Nyoo ta cha naha vatyí cuhva ra chi yo. Ta ican cuví cha chahá ra chi ndi vityin. Ican cuví nyehé ndo ta chiñí ndo. ³⁴ Vatyí ñima ra David nandaá ra andivi. Vatyí suri maa ra David cahan ra tuhun ra Jesús, ta catyí ra:

Catyí Suti Nyoo chi Suti ra Cristo: "Cunyaa chiyo vahi

³⁵ cha ñiri ca cha caquin chi ra xaan ñni chuun chahun", catyí Nyoo chi ra Cristo chihin yuhu ra David.

³⁶ 'Nyoho ta tandihi ca ñu Israel, coto vaha ndo vatyi tuhun ra Jesús ican cahín ihya. Chitacaḡ ndo chi ra nu cruzi. Soco Nyoo cuatyaḡ ra chi ra tyi cuvi ra Sutu Mañi yo, ra nyaca ñaha chi yo —catyí ra Pedro.

³⁷ Cuhva cha chiñi ñu tuhun cahan ra Pedro ihya, nducuihya iñi ñu. Ta ndaca tuhun ñu chi ra Pedro ta chi tandihi ca ra apóstol, ta catyí ñu:

—Nyoho yañi, ¿yoso caa sacuvi ndi vityin? —catyí ñu chi ra.

³⁸ Yucuan ta catyí ra Pedro chi ñu:

—Noo noo ndo ndu uvi iñi ndo catyi ndo ta ñasama ndo cuhva iyó ndo nuu Nyoo. Ta condutya ndo chihin sivi ra Jesucristo. Tacuhva na saha ra ticahnu iñi cuatyi ndo. Tyicuan caa ta cua cuhva Nyoo Tatyí li ra chi ndo. ³⁹ Vatyí cha naha catyí Nyoo vatyi cuhva ra Tatyí li ra chi maa ndo, ta chi sehe ndo, ta chi ñu cha cañi nyaa ñandihi. Vatyí tandihi ñu cha nacana Sutu Mañi yo Nyoo chii cucuhva ra Tatyí li ra chi ñu.

⁴⁰ Chihin tuhun ihya ta chihin inga tuhun, ra Pedro chahá ra tuhun chi ñu ta catyí ra chi ñu:

—Nducu ndo cuhva na sacacu Nyoo chi ndo, tacuhva cuví sandoo ndo cha caa ñáyivi quiñi iyó ihya —catyí ra chi ñu.

⁴¹ Tyicuan ta tandihi ñu cha natiin cuenda tuhun cahan ra Pedro condutya ñu. Ta quita tari noo uñi mil ñu, ta ndu ñin ri ñu chihin ñu yihí cuenda ra Jesucristo. ⁴² Ta tyicuan ri ndu ñin ri tandihi ñu, ta chihin cha ñi iñi ñu tyasoho ñu cha sañahá ra apóstol chi ñu. Ta ñin ri cuví ñu chihin tahan ñu, ta chicán tahvi ñu ta chachí ñu pan ta chihí ñu vinu vatyi nicohón iñi ñu tyi chihí ra Cristo tyiño nuu ñu.

Cuhva iyó ñu yihí cuenda Sutu Mañi yo Jesucristo quivi cuan

⁴³ Ta cuaha milagru ta seña sacuvi Nyoo chihin ndaha ra apóstol. Ta tandihi maa ñáyivi iyo cuñi ñu.

⁴⁴ Tandihí ñu yihí cuenda ra Cristo ñin ri cacuvi ñu chihin cha iyó chi ñu.

⁴⁵ Xicó ñu cha tyayii ñu ta cha iyó chi

ñu. Ta sachá ñu xuhun ñu chi tahan ñu yoso cuhva cha chiñuhú chi noo noo ñu. ⁴⁶ Ndiquivi ta ndu ñin ri ñu nya vehe ñuhu cahnu. Ta ndu ñin tucu ri ñu noo noo vehe tahan ñu ta chachí ñu pan ta chihí ñu vinu. Ta ñin ri cachachí ñu chihin cha sii cuñi aña ñu. Ta chahá ñu cha cachi tahan ñu chihin cha ñi iñi ñu. ⁴⁷ Ta sacahnú ñu chi Nyoo. Ta vaha cahan tandihi ñáyivi siqui ñu. Ta tahan tahan quivi cuahan sanducuahá ca Sutu Mañi yo chi ñu cha cuahán sacacu ra.

3

Nu nduvaha noo ra coxo

¹ Noo quivi cuahán coyo ra Pedro chihin ra Juan vehe ñuhu cahnu. Cuví chi cuhva caa uñi cha cha iñi, cuhva cha tuhvá ñáyivi Israel cachicán tahvi ñu chi Nyoo. ² Ta ndi quivi maa nyaá noo ra ndahvi, ra coxo nyata cacu, yuvehe ñuhu cahnu cuan. Vatyí chinyacá ñu chi ra na cacan ra limuxtán chi ñáyivi quihvi yuvehe cuan, ta nañi chi: Yuvehe Tyaqui. ³ Tyicuan ta nanyehe ra coxo cuan chi ra Pedro ta chi ra Juan cha cuaquihvi ra chichi vehe ñuhu cahnu. Ta chican ra noo limuxtán chi ra. ⁴ Ta cananyehe ra Pedro ta ra Juan chi ra. Ta ra Pedro catyí ra chi ra:

—Nyehe chi ndi —catyí ra.

⁵ Tyicuan ta quichaha nyehe ra coxo cuan chi ra. Cuñi maa ra vatyi iyó cha cuacuhva ra chi ra. ⁶ Soco ra Pedro catyí ra chi ra:

—Ñahri maa xuhun cuichin ta xuhun cuaan iyó chii, ta cuhve chuun. Soco nonga cha iyó chii cua cuhve chuun. Chihin sivi ra Jesucristo ra Nazaret, catyí chuun, ndicuita ta cacon —catyí ra Pedro chi ra.

⁷ Tyicuan ta tiin ra Pedro ndaha chiyo vaha ra ta nacoñehé ra chi ra. Ta caa cuhva ri cuan nicoo fuerza chaha ra ta tatu chaha ra. ⁸ Tyicuan ta ra coxo cuan ndava ra noo, ta nicuinanyaḡ ra. Ta quichaha chica ra. Ta quihvi ra chihin ra chichi vehe ñuhu. Ta chicá ra. Ta caña ndava ra. Ta sacahnú ra chi Nyoo. ⁹ Tandihí

ñáyiví nyehe ñu chicá ra ta sacahnú ra chi Nyoo. ¹⁰ Ta iyo xaan cuñí ñu ta yuhví ñu cha cuenda cha nduvaha ra cuan. Vatyí nichón nuu ñu chi ra. Ta chitó ñu vatyí suri maa ra cuví cha tuhva chinyaa Yuvehe Tyaquí cuan chican ra limuxtan.

Nu cahán noo ra Pedro tuhun ra Cristo nuu ñáyiví nu cuví corredor ra Salomón

¹¹ Ra coxo cha nduvaha cuan, ña saña maa ra chi ra Pedro ta ra Juan. Ta tandihí ñáyiví iyo cuñí ñu ta chingo ñu nataca ñu nu nyicú ra, nya nu cuví corredor ra Salomón chichi vehe ñuhu. ¹² Cha nanyehé ra Pedro cha tyicuan caa, catyí ra chi ñáyiví:

—Nyoho ra Israel, ¿ñáá tuhun cha iyo xaan cuñí nyoho? ¿Ñáá tuhun cha nyehé xaan ndo chi nyuhu? Tari cha vatyí chihin tunyee iñi maa ndi, o cha cuenda cha cachi iyó ndi nuu Nyoo, sanduvaha ndi chi rayi ihya, cuñí maa ndo. ¹³ Nyuhu ña cuví sanduvaha ndi chi ñáyiví. Nyoo cuenda sutu chahnu yo, ra Abraham, ra Isaac, ta ra Jacob, ícan ra sacahnú xaan ca ra chi Sehe ra, ra Jesús. Ta maa ndo chaha cuenda ndo chi ra chi ra Pilato, ra cuví tyiño. Ta maa ra cuñí ra saña ra chi ra. Soco nyoho ña chaha ndo. ¹⁴ Cha nuu cha cacan ndo cha saña ra chi ra vaha, ra ii cuan, nyoho chican ndo cha saña ra chi noo ra tuhva chahñi ñáyiví. ¹⁵ Tyicuan caa chahñi ndo chi ra cha chahá ñáyiví chaa coo yo chihin Nyoo. Soco Nyoo sanandoto ra chi ra. Ta ña ndoo ra chihin ñu chihí. Ta nyuhu cuví ndi cha ndaa. ¹⁶ Ta suri maa ra Jesús cuví ra chaha fuerza chaha ra coxo ihya. Vatyí chinó iñi ndi tyi iyó tunyee iñi chi ra Jesús. Yucuan chaha ndunyee chaha ra ihya, ta ñohó nuu vaha ndo chi ra ihya. Ta nduvaha ra vatyí chinó iñi ndi chi ra Jesús. Ta tandihí nyoho cha nyehe maa ndo vityin.

¹⁷ 'Chité yañi —catyí ra Pedro— vatyí quiví cha chahñi ndo chi ra Jesús, ña chito ndo tyi ña vaha cha nyacuví ndo. Ta tyicuan caa tucu ra cuví nuu chi ndo, ña cachitó ra.

¹⁸ Soco tyehe caa chingo cava tuhun cahan Nyoo chihin yuhu ra profeta cuenda ra ta cha naha, vatyí catyí ra vatyí ra Cristo cunyehe ra tindoho. ¹⁹ Yucuan chaha ndu uvi iñi ndo cuatyí ndo. Ta nacuhva ndo aña ndo chi Nyoo, tacuhva na ndachi cuatyí ndo. Tyicuan ta Sutu Mañi yo sandunyee ra aña ndo vatyí cohon ra aña ndo. ²⁰ Tyicuan ta cutachi ra chi ra Jesús ra cuví Cristo na quichi ra inga chaha. Vatyí quiví xihna ri tyaa Nyoo cuhva tyi quichi ra cha cuenda ndo. ²¹ Tahán chi cha ndoó ra Jesucristo andiví cha vityin nyacua nya sanduchaa Nyoo tandihí maa. Tari cuhva catyí maa ra chihin yuhu ra profeta cuenda ra ta cha naha. ²² Vatyí tyicuan caa catyí ra Moisés chi sutu chahnu yo: “Cusaquichi Sutu yo Nyoo chi noo ra cahan cuenda ra. Ta suri ñáyiví chi yo cucuvi ra. Ta cuacahan ra tuhun Nyoo chihin ndo tari cahán yuhu. Quichaha ndo tandihí cha catyí ra chi ndo. ²³ Vatyí tandihí ñu cha ma tyasoho tuhun cahan ra, cunaa ñu, vatyí ma cu ñn ri ñu chihin ñáyiví cachi Nyoo chii”, catyí ra Moisés.

²⁴ 'Ta tyicuan caa tucu tandihí profeta cuenda Nyoo nya quiví ra Samuel ta nyacua nya vityin, casacoto ra tuhun cha cuví vityin. ²⁵ Tandihí promesa cha chaha Nyoo cha cahan ra profeta tuhun ta cha naha, chi maa ndo cuví. Ta tuhun cha natyihí tahan Nyoo chihin sutu chahnu yo, chihin ra Abraham, suri cha cuenda maa ndo cuví. Vatyí catyí Nyoo chi ra Abraham: “Tandihí ñáyiví cha iyó siquí ñuhu ñáyiví cunasoque chi ñu cha cuenda ñáyiví chuun.” ²⁶ Ta quiví sanandoto Nyoo chi Sehe ra, xihna ca nu nyicú ndo tachí ra chi ra, vatyí nasoco ra chi ndo. Tacuhva vatyí tahan tahan ndo sandoo ndo cha quiñi caa —catyí ra Pedro chi ñu.

4

Nu catiñ ra cacuví nuu vehe ñuhu cahnu chi ra Pedro ta chi ra Juan

1 Ni cahán ca ra Pedro ta ra Juan chihin ñáyivi, ta chaꝥ coyo tata sutu cuenda ñu Israel chihin ra cuví nuu chi ra sahá cumi vehe ñuhu, ta chihin ra cuví saduceo. 2 Cacuxaan xaan ra vatyí ra Pedro ta ra Juan sañahá ra chi ñáyivi ta catyí ra vatyí ndicha cha nandotó ñu chihí, vatyí ra Jesús nandoto ra. 3 Tyicuan ta catiin ra chi ra. Ta catyihí ra chi ra vehe caa. Ta candoo ra nyacua nya inga quívi vatyí cha iñi xaan cuhva cuan. 4 Soco cuaha ñu cha chiñi tuhun cahán ra Pedro nachinó iñi ñu. Ta candu ñn ri ñu chihin ñu yihí cuenda ra Jesús. Ta cha tandihí ñu vasi quita ohon mil ñu cha maa ri maa rayí ri.

5 Tuvi inga quívi ta candu ñn ri ra cacuví tyiño chi ñu Israel, ra chahnu, ta ra casacuaha cuenda ley cha tyaa ra Moisés, nya Jerusalén cuan. 6 Ta ñohó tucu ra Anás ra cuví nuu chi tata sutu. Ta ra Caifás, ta ra Juan, ta ra Alejandro. Ta nyicú tucu tandihí ñáyivi chi ra cacuví nuu chi tata sutu. 7 Tyicuan ta catachí ra tyiño chiquehen chi ra Pedro ta chi ra Juan. Ta chitayucu ra chi ra mahñu. Ta candaca tuhun ra chi ra:

—¿Yóo cha chahaꝥ ityi chi ndo vatyí sanduvahaꝥ ndo chi ra cuan? ¿Yóo chi cha cuenda nyacuví ndo tyehe caa? —cacatyí ra chi ra.

8 Ta ra Pedro tyitu ra yihí Tatyí li Nyoo. Ta catyí ra chi ra:

—Nyoho ra nyacá ñaha Israel ñuu yo ihya. Ta nyoho ra chahnu. 9 Vityin ndacá tuhun ndo chi ndi tuhun vaha cha cuví chi noo ra coxo ihya, vatyí cuñí ndo coto ndo yoso caa nduvahaꝥ ra. 10 Yucuan chaha cunacatyí ndi chi ndo tacuhva nacoto tandihí ñáyivi Israel. Vatyí ra ihya nanyaá ra nuu tandihí ndo. Vatyí nduvahaꝥ ra chihin tunyee iñi ra Jesucristo ra ñuu Nazaret, ra cha chahaꝥ cuenda ndo vatyí cúvi ra nu cruzí. Soco Nyoo sanandoto ra chi ra. 11 Ta suri ra Jesús ihya cuví yuu cha chiñuhú ca cha ña cuñí ra savahá vehe cotyiño ra, tari cuhva catyí nuu tutu Nyoo. Ta ican ndo cuví tari ra savahá vehe ta ña

cuñí ndo yuu cha chiñuhu ca cuan. 12 Vatyí yori inga ra cuví sacacú chi yo. Vatyí noo tuhun ri maa ra chahaꝥ Nyoo vatyí sacacu ra chi yo. —catyí ra Pedro chi ñu.

13 Tyicuan ta cachiñi ra cacuvi tyiño cuan vatyí ñi xaan iñi ra Pedro ta ra Juan cacahán ra. Ta ñima ra cañoho vaha sicuela cacuví ra. Ta iyo xaan cuñi ra. Tyicuan ta nicohon nuu ra chi ra vatyí ican ra cuví ra cha cachicaꝥ noo chihin ra Jesús. 14 Ta siin ri, ra cha nduvahaꝥ cuan, nanyaá ra chihin ra yucuan. Yucuan chaha ña cuví cahan ña vaha ra cacuvi tyiño cuan siqui ra Pedro ta ra Juan. 15 Tyicuan ta catyí ra chi ra naquita coyo ninduñi ra chata vehe. Ta candoo maa ra cacuví tyiño cuan candatuhun tahan ra. 16 Ta catyí ra:

—¿Yoso caa cunyacuvi yo chihin ra ihya? Vatyí tandihí maa ñu Jerusalén chitó ñu seña cha casacuví ra ihya. Ta ma cuvi catyí yo vatyí ña ndicha. 17 Soco tacuhva cha ma cono tuhun ihya nicahnu chichi ñuu ihya, cutyanaha yo chi ra, tacuhva vatyí ma cahan ca ra tuhun ra Jesús chihin ñáyivi —cacatyí ra.

18 Tyicuan ta cacanaꝥ ra chi ra Pedro ta ra Juan. Ta catyí ra chi ra vatyí ni chiin ca maa ta ma cahan ca ra tuhun ra Jesús. Ta ma sañaha ca ra chi ñáyivi. 19 Soco ra Pedro ta ra Juan canacahan ra ta catyí ra:

—Ndíchi xiñi nyoho ta nyehe ndo tatu vaha ca cha quichaha ndi chi maa ndo o vaha ca cha quichaha ndi chi Nyoo. 20 Vatyí nyuhu ma cuvi cha sandihí ndi cha nacatyí ndi tuhun cha nyehe ndi ta chiñi ndi —cacatyí ra.

21 Tyicuan ta nacatyanahaꝥ tucu ra chi ra. Soco sañaꝥ ra chi ra vatyí ña ñihí ra cuhva tachi tuñi ra chi ra. Vatyí tandihí ñáyivi sacahnú ñu chi Nyoo cha cuenda cha cuví cuan. 22 Vatyí rayí cha nduvahaꝥ cuan, yaha ca uvi xico cuiya ra, ta tyicuan cuiya nyehe ra tindocho ta nduvahaꝥ ra saha Nyoo.

Nu chican ñu yihí cuenda ra Cristo tunyee iñi Nyoo

²³ Ta casaña ra chi ra Pedro ta chi ra Juan. Tyicuan ta cuahan coyo ra nu nyicú ra tahan ra. Ta canacatyí ra tandihí cha cacatyí ra chahnu ta ra cacuví nuu chi tata sutu chi ra. ²⁴ Cuhva cha cachiñi ñu tuhun ihya tandihí ñu ta ñin ri quichaha chican tahvi ñu chi Nyoo. Ta catyí ñu:

—Sutu Mañi yuhu, yoho savahun andivi ta ñuhu ñayivi. Savahun tyañuhu. Ta tandihí ca cha iyó, maun savaha. ²⁵ Ta yoho chihin Tatyí Iun sacahun chi ra David ta cha naha. Ta catyí ra:

¿Ñáá tuhun cha naquiqui ñayivi ña ñohó nuu Nyoo? ¿Ñáá tuhun chicá xiñi ñu cha ñima ri tuhun?

²⁶ Rey ta inga cha nyacá ñaha siqui ñuhu ñayivi ihya candu cuita ra sicun Sutu Mañi yuhu, ta siqui ra Cristo, catyí ra David.

²⁷ Sutu Mañi yuhu, ndicha vatyí ra Herodes, ta ra Poncio Pilato candu ñin ri ra ñuu Jerusalén ihya chihin ra ñuu Roma ta chihin ra Israel vatyí cahñi ra chi ra Jesús Sehe iun cha cachí vahun. ²⁸ Ta tyicuan caa ta casacuví ra, tari cuhva cha catyí maun ta cha naha tyi cucuvi. ²⁹ Ta vityin, Sutu Mañi yuhu, nyehe cha tyanaha ra chi ndi. Ta cuhva cha cuní ca ñi ndi tyi tyiño nuu maun sacuvi ndi, Sutu Mañi yuhu. Ta cuhva cha cahan ndi tuhun chihin cha ña yuhví ndi. ³⁰ Ta chihin fuerza maun ta cunduvaha ñu cuhví, ta cunyehe ndi seña ta milagru cha cuenda tunyee ñi ra Jesús Sehe iun —catyí ñu chicán tahvi ñu.

³¹ Ta cuhva cha ndihí savaha ñu oración ta tañ nu nyicu ñu. Ta tandihí ñu chitú ñu chihin Tatyí Ii ta cahan ñu tuhun Nyoo chihin cha ñi ñi ñu.

Ñahri cha cumañi chi ñu yihí cuenda Nyoo

³² Tandihí ñu cha chinó ñi, ñin ri cuví ñu, ta ñin ri cuhva chicá xiñi ñu. Ni noo ñu ta ña catyí ñu vatyí chi maa ñu cuví cha iyó chi ñu, soco chi tandihí ñu cuví, catyí ñu. Vatyí ñin ri nyicú

ñu. ³³ Ta chihin tunyee ñi cahnu, cacahán ra apóstol tuhun cha nandoto Sutu Mañi yo Jesús. Ta Nyoo nasocó xaan ra chi tandihí ra. ³⁴ Ta ni noo ñu ta ñahri cumañi chi ñu vatyí tandihí ñu cha iyó vehe o ñuhú, xicó ñu. Ta quichi nyacá ñu xuhun, ³⁵ ta chahá cuenda ñu chi ra apóstol. Ta maa ra nasachá ra chi noo noo ñu yoso cuhva cha chiñuhú chi ñu. ³⁶ Tyicuan caa sacuvi noo ra cha nañi José. Ra cuan vachi ra tata ra Levi. Ta cacu ra ñuhú Chipre cha nyaá mahñu tyañuhu. Ta ra apóstol sacunañi ra Bernabé chi ra. Ta cuñi chi catyí sivi cuan: Ra Naquehen Ndahvi. ³⁷ Ta ra Bernabé cuan xico ra ñuhú ra. Ta chaha ra xuhun cuan chi ra apóstol.

5

Cuatyí ra Ananías ta cu Safira

¹ Soco noo ra cha nañi Ananías chihin cu Safira ñasihí ra, xico ñu noo ñuhú. ² Soco tixehe ñu suhva xuhun. Tyicuan ta chinyaca ra Ananías suhva xuhun chi ra apóstol. Ta catyí ra vatyí tandihí xuhun cha quiyahvi ñuhú cuví cuan. ³ Tyicuan ta catyí ra Pedro chi ra:

—Yoho Ananías, ¿ñáá tuhun cha chahun cha quihvi ra ña vaha añimon, vatyí cuñún sandavi ñahun chi Tatyí Ii, ta catyún vatyí tandihí xuhun cha quiyahvi ñuhu cuví ihya ta ndoún chihin suhva? ⁴ Chuun cuví ñuhú, ta chuun cuví xuhun cha ñihun cuenda ñuhú cuan. ¿Ñáá tuhun cha cuñún sandavi ñahun chi Nyoo ta catyún tyi tandihí xuhun chahun? Ñima chi nyuhu sandaví ñahun, chi Nyoo sandaví ñahun —catyí ra Pedro chi ra Ananías.

⁵ Cha chiñi ra Ananías tuhun cha cahan ra Pedro, nduva ra ta chihí ra. Ta quichi noo cha yuhvi cuñi ñayivi cha chito ñu tuhun ihya. ⁶ Tyicuan ta quichi coyo suhva ra tyivaa ta tyihí ra coño ñuhu ra chichi noo sahna. Ta chahan ra chityihí ra chi ra chichi ñuhú. ⁷ Yaha noo uñi hora ta chaa ñasihí ra Ananías ta quihvi ña nu nyicú ra apóstol. Soco ña chitó ña

cha cuvı cuan. ⁸ Ta quichaha ndaca tuhun ra Pedro chi ña ta catyı ra:

—¿Atu tyehe cuvı yahvi cha quiyahvi ñuhú ndo? —catyı ra.

Ta nacahan ña ta catyı ña:

—Ay, tyehe cuvı yahvi chi —catyı ña chi ra.

⁹ Tyicuan ta catyı ra Pedro chi ña:

—¿Ñáá tuhun cha ñoho naha ndo tuhun ta sandavi ñaha ndo chi Tatyı İi Sutu Mañi yo Nyoo? Cha cuandichi coyo ra cha chahan chityihi chi yın chichi ñuhú. Ta vityin cuhun tucu ra cutyihı ra chi yoho —catyı ra Pedro chi ña.

¹⁰ Caa cuhva ri cuan ta nduva ña chaha ra Pedro, ta chihı ña. Ta caquihvi coyo ra tyivaa cuan, ta nyehe ra vatyı chihı ña. Ta cana-coñehe ra chi ña ta chityihi ra chi ña xiın yi ña. ¹¹ Ta tandihı ñáyıvi yihı cuenda ra Cristo, ta tandihı ca ñu chıtó tuhun cuan, canayuhvi xaan ñu.

Cuaha milagru ta seña sacuvi ra apóstol

¹² Cuaha seña ta milagru sacuvi ra apóstol sahá Nyoo nu nyicú ñáyıvi. Ta tandihı ñu yihı cuenda ra Cristo ndu ĩn ri ñu nu cuvı corredor ra Salomón. ¹³ Ta ni nonga ñu cha inga cuenda ta ña caña ĩni ñu cutahan ñu chihin ñu yihı cuenda ra Cristo. Soco vaha cahán ñáyıvi siqui ñu. ¹⁴ Ta cuaha xaan ñáyıvi nachinó ĩni chi Sutu Mañi yo Jesús, tari rayı ta ñusihı. ¹⁵ Ta nyacua tavá ñu chi ñu cuhvı ityı cahnu, chacún ñu chi ñu nu chito. Vatyı tatu yaha ra Pedro soco vasi xiñahñu ra yaha siqui ñu, ta nduvaha ñu. ¹⁶ Tyicuan tucu ñu iyó yatyin ri Jerusalén cuan, quichı nyaca ñu chi ñu cuhvı ta ñu cha yihı tatyı ña vaha chi. Ta nduvaha tandihı ñu.

Nu nyehé ra Pedro ta ra Juan tındoho

¹⁷ Tyicuan ta ra cuvı nuu chi tata sutu, ta ra cayihı cuenda ra cuvı sduceo, quiñi cuñi ra nyehe ra chi ra apóstol cha cuenda cha vaha cha casacuvı ra chihin tunyee ĩni chahá

Nyoo chi ra. ¹⁸ Tyicuan ta catıın ra chi ra apóstol. Ta catyihı ra chi ra vehe caa. ¹⁹ Soco cha cuaa cuan quichı noo ángel cha tachi Sutu Mañi yo, ta nuña ra yuvehe caa cuan. Ta tava ra chi ra. Ta catyı ra chi ra:

²⁰ —Cuahan ndo ta cuınanyaa ndo chichi vehe ñuhu cahnu. Ta nacatyı ndo chi ñáyıvi yoso caa cuvı coo ñu ñayıvi chaa cha iyó ndo —catyı ángel cuan chi ra.

²¹ Cha cachiñı ra tuhun cahan ángel cuan, ta cuahan coyo ra. Ta ñaha cuiı ri quihvi coyo ra chichi vehe ñuhu cahnu. Ta quichaha sañaha ra chi ñáyıvi. Ta cha ni ri ca cha sañahá ra apóstol cuan, ndu ĩn ri ra cuvı nuu chi tata sutu ta ra ndihı chihin ra. Ta cana ra chi ra cacuvı tyiño cuenda ñáyıvi Israel vatyı coo ra junta. Tyicuan ta tachı ra na cuquehen chi ra apóstol nu cañohó ra vehe caa cuan. ²² Soco cuhva cha chaa coyo policia chichi vehe caa cuan, ña nañihı ra chi ra apóstol. Ta cuanuhu coyo ra cuanacatyı ra chi ra cuvı nuu chi tata sutu. ²³ Ta cacatyı ra chi ra:

—Nyasi yuvehe caa cuan ta chaa ndı. Ta sindaro, tayucú ra yuvehe casahá cumı ra. Soco cuhva cha nuña ndı, ña nañihı ndı chi ni noo ra chichi vehe caa cuan —catyı ra chi ra.

²⁴ Cuhva cha cachiñı tata sutu chihin ra cuvı nuu chi ra, ta ra cuvı nuu chi ra casaha cuenda vehe ñuhu tuhun ihya, iyo xaan cuñı ra. Ta candatuhun tahan ra yoso caa sacuvi ra ta cundihı tuhun cuan. ²⁵ Tyicuan ta chaa noo ra ta catyı ra:

—Ra cha tyihı ndo vehe caa cuan, nyicú ra chichi vehe ñuhu sañahá ra chi ñáyıvi —catyı ra.

²⁶ Tyicuan ta ra cuvı nuu chi ra casahá cuenda vehe ñuhu, chahan ra chihin policia, ta chiquehen ra chi ra chihin cha viı ri ta ña cañı ra chi ra, vatyı yuhvi ra chi ñáyıvi coto tuchi ñu yuu chi ra. ²⁷ Chinyaca ra chi ra nuu ra cacuvı tyiño vehe ñuhu cahnu. Ta ra cuvı nuu chi tata sutu catyı ra chi ra:

²⁸ —Nyuhu catyı cachi ndı chi ndo vatyı ma cahan ca ndo tuhun ra Jesús.

Soco nyoho ña tyasohó maa ndo. Cha ndihí maa chichi ñuu Jerusalén sacotó ndo tuhun ra. Ta cuñí ndo natyaa ndo síqui ndi vatyí nyuhu chahñí ndi chi ra cuan —catyí ra cuví nuu chi tata sutu chi ra apóstol.

²⁹ Tyicuan ta nacahan ra Pedro ta inga ra apóstol, ta catyí ra:

—Nyaá síqui ndi cha quichaha xihna ca ndi chi Nyoo ta ñima ca chi rayí. ³⁰ Nyoo cuenda sutu chahnu yo ican sanandotó chi ra Jesús, ra cha chitacaá ndo nu cruzi ta chahñí ndo chi ra. ³¹ Ta ra Jesús ican ra cuví ra cha sacahnú xaan Nyoo chi, ta cuatyaa ra chi ra chiyo vaha ra, vatyí cunyaca ñaha ra tandihí. Ta noo tuhun ri maa ra cuví ra sacacú chi yo. Vatyí tyicuan caa chahá ra cuhva chi yo cha cuví yo ñu Israel na ndu uvi iñi yo cuatyí yo tacuhva saha ra ticahnu iñi cuatyí yo. ³² Ta nyuhu cuví ndi cha ndaa cuenda ihya. Ta tyicuan caa tucu Tatyí Ii cha chahá Nyoo cunyaa añima ñu quichahá chi ra —catyí ra Pedro chi ra.

³³ Ta cha cachiñí ra cha catyí ra Pedro, nduxaan xaan ra. Ta cuñí ra cahñí ra chi ra. ³⁴ Soco mahñu ra cacuví tyiño cuan ñohó noo ra cuví fariseo cha nañi Gamaliel. Ta cuví ra ra sacuahá cuenda ley ra Moisés. Ta ñáyiví sahá xaan ñu ñáyiví chi ra. Ta ra Gamaliel cuan, nicuinanyaa ra. Ta tachí ra naquita coyo ra apóstol cuan noo cuhva ri. Tyicuan ta quita coyo ra. ³⁵ Ta quichahá catyí ra Gamaliel cuan chi inga ra cacuví tyiño:

—Nyoho ra nyacá ñaha ñu Israel, saha ndo cuenda chi ndo chihin cha cua cunyacuví ndo chihin ra chiña. ³⁶ Nícohon iñi ndo vatyí cha iyó suhva quiví ndicuita noo ra cha nañi Teudas. Ta catyí ra vatyí cuví ra noo ra vaha. Ta tari cha cumi cientu rayí chinyicon chi ra. Soco yaha cuan chahñí ñáyiví chi ra. Ta tandihí ra chinyicon chi ra nacutya cuatyí ra. Ta ndihí tuhun. ³⁷ Yaha cuan ta nu cuahan ca chi, quiví nacahvi ra gobiernu chi ñáyiví, ta ndicuita ra Judas ra ityi Galilea cuan. Ta cuaha ñu

chinyicon chi ra. Soco suri chahñí ñáyiví chi ra. Ta tandihí ñu cha chinyicon chi ra chitya cuatyí ñu. ³⁸ Yucuan chaha saña ndo chi ra chiña. Ta ma tyihí ndo chi ndo chihin ra vatyí tatu tuhun ñáyiví ri cuví cha chicá noo ra, cundihí tuhun. ³⁹ Soco tatu ndicha tyi tuhun Nyoo cuví, ma cuví chi nyoho sativí ndo. Saha ndo cuenda chi ndo coto vaha chihin Nyoo cañí tahan ndo —catyí ra Gamaliel chi ra.

⁴⁰ Tandihí ra ndoo ra vaha. Tyicuan ta cana ra chi ra apóstol. Cacañí policia chi ra. Ta chasí ra nu cahan ca ra tuhun ra Jesús. Tyicuan ta saña ra chi ra. ⁴¹ Ta quita coyo ra apóstol nuu ra cuví tyiño. Ta sí xaan cacuñí ra vatyí chahá Nyoo cuhva vatyí nyehé ra tindoho cha cuenda ra Jesús. ⁴² Ta ña casandihí ra cha cacahán ra. Ta ndiquiví ri sañahá ra tuhun ra Jesucristo vehe ñuhu ta vehe ñáyiví ñandihí.

6

Nu nacachí ñu yihí cuenda ra Jesús ucha tahan ra vatyí saha cuenda ra ñáá cha chiñuhu chi ñu

¹ Ta nu cuahan ca chi quiví cuaha xaan nanduví ñáyiví cha yihí cuenda ra Cristo. Tyicuan ta ñu cha cahán sahan griego quichahá cahan ñu síqui ñu cha cahán sahan hebreo cuan. Vatyí catyí ñu tyi ña tyiñuhú vaha ra cha cahán sahan hebreo chi ñu chihí yí cuenda ñu, cuhva cha sachá ra cha cacachi ñu ndiquiví ri. ² Tyicuan ta ndi uchi uvi tahan apóstol sandu in ri ra chi tandihí ñu yihí cuenda ra Cristo. Ta cacatyí ra chi ñu:

—Ña vaha cha sandihí ndi cha cahan ndi tuhun Nyoo ta sachá ndi cha cachí ndo. ³ Yucuan chaha yañi, nanducu ndo ucha tahan ra nu canyicú ndo ihya, ra vaha iyó chihin Nyoo, ra chiñi tuñi, ra tyitú yihí chihin Tatyí Ii. Ta cuhva yo tyiño ihya chi ra. ⁴ Ta nyuhu sañihi ndi cacan tahvi ca ndi. Ta cuasañaha ca ndi tuhun Nyoo —catyí ra apóstol.

⁵ Tandihí ñu ndoo ñu vaha. Ta nacachí ñu chi ra Esteban. Vatyí

chinó xaan iñi ra chi Nyoo. Ta tyitu ra chihin Tatyí Ii. Ta nacachí tucu ra chi ra Felipe, ta chi ra Prócoro, ta chi ra Nicanor, ta chi ra Timón, ta chi ra Parmenas, ta chi ra Nicolás cha cuví ra noo ra ñuu Antioquía, ta nanduví ra noo ra Israel. ⁶ Tyicuan ta quichí nyaca ra chi ra nu nyicu ra apóstol. Tyicuan ta catyiso ra ndaha ra xiñi noo noo ra ta cachican tahvi ra chi Nyoo cha cuenda ra.

⁷ Ta cuahan chitya ca tuhun Nyoo. Ta nducuaḥa ca ñu yihí cuenda ra Cristo ñuu Jerusalén. Ta na chingo iñi tucu cuaha tata sutu cuenda ñu Israel ñandihí.

Nu catyihí ra chi ra Esteban vehe caa

⁸ Ra Esteban cuví ra noo ra cha tyitú chihin tunyee iñi Nyoo. Ta vaha xaan ñáyiví cuví ra vatyí tyitu añima ra chihin cha vaha Nyoo. Ta cuaha xaan milagru ta seña sacuví ra nu nyicú ñáyiví. ⁹ Tyicuan ta suhva ra vehe ñuhu ñuu Israel cha nañi Vehe Ñuhu Cuenda Ñáyiví Ndoo Libre, candu ñin ri ra chihin ra ñuu Cirene, ta ra ñuu Alejandría, ta ra ityi Cilicia, ta ra ityi Asia. Ta quichahá cuví yuhu ra chihin ra Esteban. ¹⁰ Soco ña cacuvi chasaha ra chi ra, vatyí ra Esteban cahán ra chihin cha chiñi tuñi cha chaha Tatyí Ii chi ra. ¹¹ Tyicuan ta catyiyahví ra cuan chi suhva ra vatyí canducu ra cuendu chaha ra Esteban ta catyí ra cuendu cuan vatyí ra Esteban cahán ña vaha ra síqui ra Moisés, ta síqui Nyoo. ¹² Yucuan chaha tandihí ñáyiví cuan naquiquí ñu. Tyicuan ta ra chahnu ta ra sacuaḥa cuenda ley ra Moisés, catiñ ra chi ra Esteban. Ta chahan ra chinyaca ra chi ra nu ndu ñin ri ra cuví tyiño cuenda vehe ñuhu ñu Israel. ¹³ Ta canducu ra chi ra cahan cuendu chaha ra. Ta maa ra catyí ra tyehe caa:

—Ra Esteban ihya, ña sandihí ra cha cahan cuehe ra síqui vehe ñuhu yo ta síqui ley ra Moisés. ¹⁴ Ta chiñi ndi caḥan ra vatyí ra Jesús ra Nazaret cuan cusatani ra vehe ñuhu cahnu ihya. Ta cunasama ra costumbre cha

sandoḡ ra Moisés chi yo na —catyí ra cuendu cuan síqui ra Esteban.

¹⁵ Tyicuan ta ra cacuví tyiño ta ra canyicú yucuan canyehe ra chi ra Esteban vatyí tari maa nuu ángel tyicuan caa nuu ra cuhva cuan.

7

Nu cahán ra Esteban tuhun Nyoo chihin ñáyiví nducú cahñi chi ra

¹ Tyicuan ta ra cuví nuu chi tata sutu ndacá tuhun ra chi ra Esteban, ta catyí ra:

—¿Atu ndicha cha catyí ra ihya?

² Tyicuan ta nacahan ra Esteban ta catyí ra:

—Nyoho yañi, ta nyoho tata, cuiñi ndo tuhun cahín. Sutú yo Nyoo cha cahnu ca tuví ra nuu sutu chahnu yo, ra Abraham quiví nyaá ra ityi Mesopotamia cha niri ca cha cumañi cucoo ra nya ñuu Harán. ³ Ta catyí ra chi ra: “Sandoḡ ñuun, ta chi tandihí ñáyiví chuun. Ta cunuhu inga ñuu cha cusañahi chuun”, catyí Nyoo chi ra Abraham. ⁴ Tyicuan ta ra Abraham quita ra ñuu Caldea ityi Mesopotamia cuan, ta cuanuhu ra nya ñuu Harán. Ta yucuan cuví ra chihí sutu ra. Yaha cuan saquichí Nyoo chi ra ñuhú nu iyó yo vityin. ⁵ Soco ñahri ñuhú chahá Nyoo chi ra quiví cuan. Ni noo nu cuinanyaa chaha ra ta ña chahá ra. Soco catyí Nyoo chi ra vatyí cucuhva ra. Ta cutahan chi chi sehe ra chata cha yaha cúvi ra. Tyicuan caa catyí Nyoo chi ra Abraham, vasi ta coo ca sehe ra quiví cuan. ⁶ Ta siñ ri catyí Nyoo chi ra vatyí ñáyiví chi ra cucoo ñu inga ñuu. Ta cusacuví ñu tyiño nuu ñáyiví ñuu cuan, ta ma tyiyahví ñu chí ñu. Ta cunyehe ñu tindoho cumi cientu cuiya. ⁷ Soco catyí tucu Nyoo chi ra tyehe caa: “Ñáyiví ñuu cuan cusanyehe ñu tindoho chí ñáyiví chuun. Yucuan cuenda cuatachi tuñi yuhu chí ñu. Ta yahá cuan ta cuquita ñáyiví chuun ñuu cuan ta cuquichi ñu ihya. Ta cusacuví ñu tyiño nuu mai ihya”, catyí Nyoo chí ra Abraham.

⁸ Tyicuan caa natyihí tahan Nyoo tuhun chihin ra. Ta chahá Nyoo noo costumbre cha cuasacuvi ñu coto naa iñi ñu. Chahá ra tyi cutahnya chiin ñi xiñi ndivi cha lee sehe ñu, o cha sahá ñu circuncidar chi sehe ñu cuví cuan. Ta cha yahá uña quivi cha cacu ra Isaac sehe ra Abraham, tyicuan caa chinyacuví ra chihin ra. Ta suri tyicuan caa sacuví tucu ra Isaac chihin ra Jacob sehe ra. Ta ra Jacob tucu chihin uchi uvi tahan sehe ra, tyaa ra noo seña cuan chi noo noo sehe ra. Ta ican ra cuan cacuví sutu chahnu yo.

⁹ Ta ican uchi ín tahan ra sehe ra Jacobo ihya catasi cuñí ra nyehe ra chi ra José yañi ra cha cuenda vatyí vaha ca ra nuu sutu ra. Yucuan chaha caxico ra chi ra na cuhun ra Egipto. Soco Nyoo ña sandoó ra chi ra José. ¹⁰ Ta sacacu ra chi ra nu nyehé ra tindoho. Ta chahá ra cha chiñi tuñi ra chi ra. Ta chahá ra cha vaha coo ra nuu ra Faraón, ra cuví rey Egipto. Ta rey cuan chahá ra cha cuví ra José gobiernu Egipto cuan. Ta chinyaca ñaha tucu ra vehe maa rey ñandihí.

¹¹ Tyicuan ta chiyo tama nicahnu ityi Egipto ta ityi Canaán. Ta nyehe xaan ñáyivi tindoho. Ta tandihí sutu chahnu yo cha chicoo tyembu cuan ña cañihí ra cha cachi ra. ¹² Soco quivi chito ra Jacob vatyí iyó trigu nya Egipto, ta tachí ra chi sehe ra na cuquehen ra. Ta chahan coyo ra noo chaha. ¹³ Ta cha cu uvi chaha cha chahan coyo ra, ra José sacoto ra chi ra vatyí yañi ra cuví chi ra. Yucuan quivi chito ra Faraón yóo chi tata vachi ra José. ¹⁴ Tyicuan ta tachí ra José tyiño na quichi sutu ra, ra Jacob, chihin tandihí ñáyivi chi ra, uñi xico chahun tahan ñu. ¹⁵ Ta tyicuan caa cuví cha cuahan ra Jacob cuacoo ra Egipto cuan. Yahá cuan ta chihí ra yucuan. Ta chihí tucu sehe ra, ra cacuví sutu chahnu yo. ¹⁶ Tyicuan ta chaá quivi cha chinanyaca ñu yiquí ra Jacob ta yiquí sehe ra nya Siquem. Ta yucuan quihvi ra chichi ñuhú nu sata ra Abraham noo ñaña chi sehe ra Hamor ta cha naha.

¹⁷ Soco cha ni cumañi ca quita ñu

Egipto, ñáyivi chi ra Abraham cha iyó Egipto cuan cuaha xaan nanduvi ñu. Ta cha nyaña yatyin quivi cha cuacuhva Nyoo ñuhú chi ñu tari cuhva catyi cachi ra chi ra Abraham.

¹⁸ Tyicuan ta quichahá nyaca ñaha noo rey cha ña ñohó nuu chi ra José.

¹⁹ Rey cuan sandavi ñaha ra chi ñáyivi chi yo cuan. Ta sanyehe xaan ra tindoho chi ñu, ta saníñi ra chi ñu na sanandoo ñu chi sehe ñu cha ni cacu vatyí na cúvi ndotyin. ²⁰ Ta suri quivi cuan cacu ra Moisés. Ta tahan xaan iñi Nyoo chi ra lee cuan. Ta uñi yoo sacuahnu sihi ra chi ra nya vehe ña.

²¹ Yaha cuan ña cuví ca tixehe sihi ra chi ra. Ta sandoo ña chi ra chichi noo tica yuhu yutya. Tyicuan ta sehe maa rey Egipto cuan nañihí ña chi ra. Ta naquehen ña chi ra. Ta sacuahnu ña chi ra, tari cha sehe ña cuví chi ra.

²² Yucuan chaha cutuhva ra Moisés tandihí cha chitó ñu Egipto. Ta sin ri nyee xaan cuhva cahan ra, ta cuhva sacuví ra ñandihí.

²³ Ta quivi cha chaá uvi xico cuiya ra Moisés quichi cuví iñi ra cuhun ra cunyehe ra nu nyicú ñu Israel, ñáyivi chi ra. ²⁴ Tyicuan ta noo quivi nyehe ra nu cañi noo ra Egipto cuan chi noo ra Israel cuan. Tyicuan ta chahñi ra Moisés chi ra Egipto cuan vatyí satasi iñi ra chi ra Israel ra ñuu ra. ²⁵ Cuñi maa ra Moisés cuan vatyí ñáyivi Israel cuan cutuñi iñi ñu tyi Nyoo tachí chi ra vatyí cusacacu ra chi ñu. Soco maa ñu ña tuví iñi ñu cha tyicuan caa cucuvi. ²⁶ Tyicuan ta cha inga quivi cuan nyehé ra Moisés chi uvi tahan ra Israel cha cacañi tahan ra.

Ta ra Moisés, cuñi ra cha ma cacañi tahan ca ra, ta quichaha catyi ra: “Ña vaha cha cacañi tahan nyoho, vatyí suri yañi ndo cuví”, catyi ra chi ra.

²⁷ Tyicuan ta ra cha cañi chi tahan cuan tyandahá ra chi ra Moisés, ta catyi ra chi ra: “¿Yóo cha tyatyíño chi yoho vatyí cunyaca ñahun ta cuvun juez chi ndi? ²⁸ ¿Atu cuñun cahñun chii tari chahñun chi ra Egipto cuan icu?” catyi ra chi ra Moisés. ²⁹ Cuhva cha chiñi ra Moisés cha catyi ra, chino

ra. Ta cuahan ra nya ñuu Madián.

Yucuan ñihí ra ñasihí ra. Ta yucuan chiyó uvi tahan sehe ra.

³⁰ 'Yahá uvi xico cuiya. Tyicuan ta noo quívi chicá noo ra Moisés chiqui ndíi yatyin noo yucu cha nañí Sinaí. Ta nyehe ra noo taca iñu cha cayú. Tyicuan ta tuvi noo ángel chichi ñuhu cha cayu cuan. ³¹ Iyo xaan cuñí ra Moisés cha nyehé ra yucuan. Ta cuhva cha tuhva yatyin ca ra vatyí tacuhva nyehe vaha ra, chiñí ra noo ndusu Sutu Mañi yo. Ta catyí ra tyehe caa: ³² "Yuhu cuví Nyoo cuenda sutu chahnun, Nyoo cuenda ra Abraham, ta ra Isaac, ta ra Jacob", catyí Nyoo chi ra. Tyicuan ta ra Moisés quichaha ñihí ra chihin cha yuhvi ra. Ta ña caña iñi ra nanyehe ra. ³³ Ta quichaha catyí tucu Sutu Mañi yo chi ra: "Tava ndichan chahun vatyí ñuhú nu chañun, ñuhú ii cuví. ³⁴ Yuhu nyehí tandihí tindoho cha nyehé ñáyivi cuende ñuu Egipto chiña. Ta chiñí ndusu ñu cha chacú chaa ñu. Yucuan chaha noó xique vityin vatyí sacaqui chi ñu. Ñaha, vatyí cutachi chuun nya Egipto", catyí Nyoo chi ra Moisés.

³⁵ 'Quívi cuan ña cuñí ñáyivi Israel chi ra Moisés cha cunyaca ñaha ra chi ñu, ta catyí ñu chi ra: "¿Yóo cha tyatyíño chí yoho vatyí cunyaca ñahun ta cuvun juez chí ndi?", catyí ñu chi ra. Ta vasi ña cuñí ñu cha cunyaca ñaha ra chí ñu, soco Nyoo tachí chí ra vatyí cuví ra nuu, ta sacacu ra chí ñu. Vatyí tyicuan caa catyí ángel cha tuví nuu ra nu taca iñu cha cayu cuan. ³⁶ Ta ican ra Moisés cuan tava chí ñáyivi Israel Egipto cuan. Ta cha yaha savaha ra milagru ta seña ñuu cuan, ta sacuví tucu ra nu yaha ñu Tyañuhu Cuaha. Ta nu chicá noo ñu ñuhú ityi chichi cha uvi xico cuiya sacuví tucu ra ñandihí. ³⁷ Ta suri maa ra Moisés cuan cuví ra cha catyí chí ñu Israel ta cha naha tyehe caa: "Nyoo cutachi ra noo profeta ra tari tachí ra chí mai. Ta cucuvi ra noo ra Israel tari maa ndo. Quichaha ndo chí ra", catyí ra. ³⁸ Ta suri maa ra Moisés cuan ndihí ra chihin ñáyivi chahnu yo nu chica noo

ñu ñuhú ityi cuan. Ta ican ra cuví ra cha cahan ángel cuan chihin nya yucu Sinaí. Ta ican ra quehen cuenda ra tuhun yoso caa coo ñáyivi ta sañaha ra chí yo.

³⁹ 'Soco ñáyivi chahnu yo ña quichaha ñu chí ra. Tava xiin ñu chí ra. Ta cacuñi ñu cunuhu coyo ñu nya Egipto. ⁴⁰ Yucuan chaha cuhva cha nyaá ca ra Moisés yucu Sinaí ta cahan ñáyivi chihin ra Aarón ta catyí ñu: "Savahun suhva nyoo cha chahun coyo ityi nuu ndi. Vatyí ña chitó ndi ñáá cha cuví chí ra Moisés, ra cha tava chí ndi Egipto", catyí ñu. ⁴¹ Tyicuan ta casavaha ñu noo becerru xuhun cuaan. Tyicuan ta cachahñi ñu quiti vatyí cuhva cuenda ñu chí xitohyo cuan. Ta si xaan cuñi ñu cachiyó ñu vico cuenda xitohyo cha casavaha ñu chihin ndaha ñu. ⁴² Tyicuan ta Nyoo cuachiyó ra chí ñu. Ta saña ndaha ra chí ñu vatyí cusacahnu ñu chí ñanyii, chí yoo, ta ñáá ndihí tiño cha iyó ityi andívi. Vatyí tyehe caa catyaa ra profeta cuenda Nyoo nu libru ta cha naha: Nyoho ñáyivi Israel, ¿atu chahñi ndo quiti vatyí cuhva cuenda ndo chí yuhu chichi cha uvi xico cuiya cha chica noo ndo ñuhu ityi? Ñima.

⁴³ Soco sacahnu ndo chí nyoo cha nañí Moloc, ta sacahnu tucu ndo chí nyoo cha nañí Renfán cha caá tari caá tiño andívi. Suri maa ndo savaha xitohyo cuan, vatyí sacahnu ndo. Yucuan chaha yuhu cuatave chí ndo ñuu ndo, ta cuasacuhin chí ndo noo nu cañi ityi nuu ca Babilonia, catyí Nyoo chí ñu.

⁴⁴ 'Nu chicá noo sutu chahnu yo ñuhú ityi cuan, chicumi ra noo vehe ñuhu cha chingo chihin ñi quiti. Ta chichi vehe cuan chicumi ra tabla yuu cha nyaá ley Nyoo nuu. Ta ra Moisés tachí ra tyiño na savaha ñu vehe ñuhu cuan ta ityi chata ca tari cuhva sañaha maa Nyoo chí ra. ⁴⁵ Yucuan ta ra Josué nanduví ra nuu chí ñu. Ta quehen ñu vehe ñuhu ta

chicoo ñu chihin nu nyaá yo ihya vityin. Vatyí Nyoo tava ñehe ra chi ñáyiví chiyo ñuhu ihya ta nacuhva cuenda ra chi ñu Israel ñáyiví chiyo. Ta chotyíño ñu vehe ñuhu cuan nyacua nya quívi chiyo rey David. ⁴⁶ Ta rey David ñihí ra tumañi ñi nu Nyoo. Ta cuñi ra savaha ra noo vehe vaha nu coo Nyoo. Suri Nyoo ihya sacahnú ra Jacob ta cha naha. ⁴⁷ Soco ra Salomón savaha vehe Nyoo. ⁴⁸ Vasi ña iyó Nyoo chichi vehe ñuhu cha savahá ñáyiví. Tari catyí ra chihin yuhu ra profeta ta cha naha tyehe caa:

⁴⁹ Andívi cuví tyayu nu nyaí ta nyacá ñahi tandíhi. Ta ñuhu ñáyiví, yucuan cuví nu chañí chahi.

¿Atu cuví savaha ndo vehi ta coi chichi, cuñí maa ndo?

¿Ta nya maa maa cuví nyitati, cuñí maa ndo?

⁵⁰ ¿Atu ña chitó ndo vatyí mai savahi andívi ta ñuhu ñáyiví? catyí Nyoo.

⁵¹ 'Soco nyoho —catyí ra Esteban— tyicuan ri tuhvá ndo sandava ndo ñi ndo. Ta ña cuñí ndo naquehen ndo tuhun cahán Nyoo. Tyicuan ri ña quichahá ndo chi Tatyí Íi. Inuu ri caa ndo chihin sutu chahnu ndo. ⁵² Sutu chahnu ndo satañi ñi ra ta cachahñi ra chi tandíhi ra profeta cuenda Nyoo ta cha naha. Ta ican ra cuan cacatyí vatyí cuquichi noo ra vaha. Ta cha quichí ra vityin, nyoho ña cuñí nyehe ndo chi ra, ta cachahñi ndo chi ra. ⁵³ Nyoho naquehen cuenda ndo ley Nyoo cha chahá ángel chi ndo, soco ña cuñí ndo sacuvi ndo cuhva catyí ley cuan —catyí ra Esteban.

Nu chihí ra Esteban

⁵⁴ Cuhva cha chíñi ra cacuví tyiño vehe ñuhu cahnu tuhun ihya, xaan xaan cuñi ra, nyacua casacahñi noho ra nyehé ra chi ra Esteban. ⁵⁵ Soco ra Esteban tyitú cuí maa ra chihin Tatyí Íi ta nanyehé ra ityí andívi. Ta nyehé ra cha cahnu cuví Nyoo. Ta suri nyehe ra chi ra Jesús nanyaá ra chiyo vaha Nyoo. ⁵⁶ Tyicuan ta catyí ra Esteban:

—¡Nyehe ndo! Nyehe tanuña andívi. Ta nyehí chi ra Jesús, Rayí cha quichí nya gloria, nanyaá ra chiyo vaha Nyoo —catyí ra Esteban.

⁵⁷ Soco ra cuan cachasi ra soho ra, cha ma cuiñi ra tuhun cahán ra Esteban. Tyicuan ta vaa ri cananduvi ra. Ta tandíhi ra cuahan coyo ra síqui ra Esteban. ⁵⁸ Tyicuan ta catava ra chi ra yuhu ñuu. Ta ca chahñi ra chi ra chihin yuu. Ta ra cha casacuví cha ña vaha cuan, casando ra sahma cha nya chata ra vatyí sahacumi noo ra tyivaa cha nañi Saulo. ⁵⁹ Cha ñiri ca cha cacañi ra yuu chi ra Esteban, quichahá chican tahvi ra Esteban chi Nyoo, vatyí tuvi ñi ra cuacúvi ra. Ta catyí ra tyehe caa:

—Sutu Mañi yuhu Jesús, naquehen añime —catyí ra.

⁶⁰ Yahá cuan, tyicuan ta chicuiñi chiti ra, ta chaa canachaa ra ta catyí ra:

—Sutu Mañi yuhu, ma tñin cuendon cuatyí cha sacuví ñu —catyí ra.

Ta cha yahá catyí ra tyehe caa, ta chihí ri ra.

8

Nu chicá nyicon ra Saulo chi ñáyiví yihí cuenda ra Cristo

¹ Ta ra Saulo ña chinó ñi ra chi ra Jesús, ta ndoó ra vaha cha chahñi ra chi ra Esteban.

Ta suri quívi cuan quichaha nducu xaan ñáyiví chi ñu yihí cuenda ra Cristo ñuu Jerusalén cuan vatyí cacahñi ñu chi ñu. Soco ra apóstol ña caquita ra. Candoo ra nyicú ra Jerusalén. Ta tandíhi ca ñu cachino ñu, cuahan coyo ñu cuacoo ñu ityí Samaria, ta ityí Judea. ² Ta suhva ra cha nyicón vaha chi Nyoo Jerusalén cuan, catyihí ra coño ñuhu ra Esteban chichi ñuhú. Ta cachacu xaan ra cha cuenda ra. ³ Cha ñiri ca cha tyicuan caa, ra Saulo chicá nyicon vavaha ra chi ñáyiví yihí cuenda Cristo. Ta tahan tahan vehe ñu chahan ra. Ta suri quiñoño ñaa ra chi ñu, ta chahá cuenda ra chi ñu vatyí cohon ñu vehe caa, rayí ta ñusihí.

Nu cacahán ñu tuhun ra Cristo ityi Samaria

⁴ Soco tandihí ñu cha quita ñuu Jerusalén, cahán ñu tuhun yoso caa sacacú ra Cristo añima ñu tandihí ri maa ityi nu chaá coyo ñu. ⁵ Minoo ra cha nañí Felipe chaá ra noo ñuu ityi Samaria. Ta quichaha cahan ra tuhun ra Cristo chihin ñu. ⁶ Ta tandihí ri ñáyivi ta tyasohó ñu tuhun cha cahán ra. Ta nyehé ñu milagru ta seña cha savahá ra. ⁷ Vatyí cuaha vavaha ñáyivi cha yihí tatyí ña vaha chii nduvaha ñu. Vatyí tatyí ña vaha cha yihí chi ñu, quita chi ta suri canachaá chi cuahan chi. Ta cuaha vavaha ñáyivi coxo ta ñáyivi cha ña cuví nacanda, nduvaha ñu. ⁸ Yucuan chaha ñáyivi ñuu cuan, si xaan cacuví chi ñu.

⁹ Soco ñuu Samaria cuan iyó noo ra tasi cha nañí Simón. Ta sandaví ñaha ra chi ñáyivi cuan. Catyí ra vatyí cuví ra noo ra cahnu. ¹⁰ Ndi cuii maa ñáyivi tyasohó ñu tuhun cahan ra, nya ñu tyayí, ta nya ñu ndahvi. Ta cacatyí ñu:

—Ndicha ndicha cuii, vatyí tunyee iñi Nyoo nyaá chihin ra ihya —catyí ñu.

¹¹ Quichahá xaan ñu tuhun cahán ra vatyí cha naha xaan sandaví ñaha ra chi ñu chihin tuhun tasi. ¹² Tyicuan ta quichí ra Felipe. Ta sacoto ra chi ñu yoso caa nyacá ñaha Nyoo añima ñáyivi. Ta yoso cuhva cha cahnu cuví ra Jesucristo. Ta yucuan ta chino iñi ñu chi ra Cristo, rayí ta ñusihí. Ta condutyá ñu. ¹³ Nyacua nya ra Simón cuan, ta nachino iñi ra chi ra Cristo, ta condutyá ra. Ta quichaha chica noo ra chihin ra Felipe. Ta iyo xaan cuñi ra nyehe ra milagru, ta seña cha sacuví ra Felipe cuan.

¹⁴ Tyicuan ta ra apóstol cha canyicú ñuu Jerusalén cuan ñihí ra tuhun cha canachinó iñi ñáyivi ityi Samaria cuan tuhun Nyoo. Ta catachí ra chi ra Pedro ta chi ra Juan. ¹⁵ Cuhva cha chaá coyo ra yucuan, ta chican tahvi ra chaha ñu quihvi cuenda ra Cristo vatyí tacuhva tyi naquehen ñu

Tatyí Ii. ¹⁶ Vatyí ñu cuan, ta naquehen ca ñu Tatyí Ii. Tacuhva condutyá ri ñu chihin sívi Sutu Mañi yo Jesús. ¹⁷ Tyicuan ta ra Pedro ta ra Juan catyisó ra ndaha ra síqui ñu, ta naquehen ñu Tatyí Ii. ¹⁸ Ta ra Simón cuan nyehe ra cuhva cha catyisó ra apóstol ndaha ra síqui ñu cuan, ta naquehen ñu Tatyí Ii. ¹⁹ Ta quichaha catyí ra tyehe caa:

—Yoso xuhun cuñi ndo ta cuhva ndo tunyee iñi chiña chii, vatyí tacuhva cuvi tyise ndahi síqui ñáyivi, ta naquehen tucu ñu cuan Tatyí Ii —catyí ra Simón cuan chi ra apóstol.

²⁰ Tyicuan ta nacahan ra Pedro ta catyí ra:

—Na cunaun in ri chihin xuhun chiña. Vatyí chicá iñun tyi cuví sata yo chihin xuhun nyatu cha chahá maa Nyoo chi yo. ²¹ Yoho, ña tahan chi tyihun chuun chihin tuhun ihya. Vatyí añimon ña vaha nuu Nyoo. ²² Ndu uvi iñun cuhva chicá xiñun chiña, vatyí cahnu cha quiñi caa cuví cuan nuu Nyoo. Ta çacan tahvi chi ra na nyehe yo tatu saha ra ticahnu iñi chuun cha cuenda cha caa chichi añimon. ²³ Vatyí nyehí tyi chichi añimon tyitú maa yihí cha quiñi caa cha cuví tari cha uva. Ta cha quiñi caa cuan, ña chahá coton cha vaha. —catyí ra Pedro chi ra Simón cuan.

²⁴ Tyicuan ta nacahan ra Simón ta catyí ra:

—Çacan tahvi maa ndo cha cuende nuu Nyoo, ta cuhva cha ma quichi tandihí tuhun cha catyún chiña síqui —catyí ra Simón chi ra Pedro.

²⁵ Cha yaha cuan ta ra apóstol nacatyí ra tandihí cha nyehe ra cha sacuví ra Cristo. Ta cahan ra tuhun Nyoo. Tyicuan ta cuanuhú coyo ra nya Jerusalén. Ta suri sacoto ra tuhun yoso caa sacuví yo ta cacu añima yo tandihí ñuu ityi Samaria nu yaha ra.

Nu cahán ra Felipe tuhun Nyoo chihin noo ra Etiopía

²⁶ Cha yaha tuhun cuan tyicuan ta cahan noo ángel Nyoo chihin ra Felipe, ta catyí ra:

—Ndicuita ta cuhun ityi sur, ityi quita nya Jerusalén ta cuahan nya Gaza —catyí ángel cuan chi ra.

Yucuan cuvi ityi cha yahá noo ñuhú ityi. ²⁷ Tyicuan ta ra Felipe ndicuita ra ta cuahan ra. Ta ityi cuahan ra ta ñihi tahan ra chihin noo ra ñuu Etiopía. Ta cuvi ra eunuco. Cuví ra noo ra cuví tyiño cahnú ñuu Etiopía, vatyí sahá cuenda ra xuhun cu Candace, ñaha cha cuví reina ñuu Etiopía cuan. Ta chahan ra Etiopía cuan chisacahnú ra chi Nyoo nya Jerusalén. ²⁸ Ta ityi cuanuhú ra nya ñuu ra nyaá ra siqui carru ra. Ta sacuahá ra libru cha tyaa ra Isaías ra profeta cuenda Nyoo ta cha naha. ²⁹ Tyicuan ta Tatyí li catyí chi ra Felipe:

—Satuhva ca nu cuahan carru cuan.

³⁰ Ta cuhva cha tuhva ra Felipe, chiñi ra vatyí sacuahá ra cuan nu libru cha tyaa ra Isaías. Ta ndaca tuhun ra chi ra:

—¿Atu cutuñi iñun cha sacuahún? —catyí ra.

³¹ Tyicuan ta nacahan ra cuan ta catyí ra:

—¿Yoso caa cutuñi iñi ta yori sañahá chii? —catyí ra chi ra.

Ta chican ra chi ra Felipe na ndaa ra ta cunyaa ra chihin ra.

³² Ta nu cuahan sacuahá ra, catyí chi tyehe caa:

Chahñi ra chi ra tari chahñi ra noo mbee.

Vatyí tari ña chacú mbee tatu cuasatya ra ixí ti, ta tari ña chacú ti tatu chahñi ra chi ti, tyicuan caa cuví ra cuan tyi nyehe ra tindoho ta ñahri maa catyí ra.

³³ Sanocuee ñu chi ra ta yori cuñi sacacu chi ra.

¿Yóo ra cuvi nacatyí tuhun sehe ra cha cuacoo?

Yori, vatyí chihí ra.

Catyí chi nu tutu cha sacuahá ra cuan.

³⁴ Tyicuan ta ra cuan quichaha ndaca tuhun ra chi ra Felipe, ta catyí ra:

—Saha tumañi iñi chii, ta catyun chiin chii yóo chi tuhun cahn ra profeta ihya. ¿Atu tuhun maa ra, o yóo chi tuhun cahn ra? —catyí ra chi ra Felipe.

³⁵ Tyicuan ta ra Felipe quichaha cahan ra siqui tuhun cha cha yaha sacuahá ra cuan, ta nacatyí ra chi ra vatyí tuhun ra Jesús cahn ra cuan. Ta nacatyí ra vatyí ra Jesús cuví ra cha sacacú chi yo. ³⁶ Tyicuan ta cha cuayaha ra noo nu ñohó ndutya. Ta ra cuan quichaha catyí ra chi ra Felipe:

—Ihya ñohó ndutya. ¿Atu ma cuvi condutye vityin? —catyí ra.

³⁷ Tyicuan ta nacahan ra Felipe, ta catyí ra:

—Tatu chinó iñun chihin cha tandihí añimon, cuví condutyon —catyí ra chi ra.

Tyicuan ta nacahan ra cuan, ta catyí ra:

—Chinó iñi yuhu vatyí Sehe Nyoo cuví chi ra Jesucristo —catyí ra.

³⁸ Tyicuan ta ra cuan catyí ra chi musu ra na sacucuiñi ra carru cuan. Tyicuan ta canoo nduvi tahan ra. Ta caquihvi ra chi ndutya. Tyicuan ta sacondutya ra Felipe chi ra. ³⁹ Ta cuhva cha caquita coyo ra chichi ndutya cuan, Tatyí li Sutu Mañi yo naquehen chi chi ra Felipe. Ta ra cuan ña nyehe ca ra chi ra. Soco sii xaan cuví chi ra, cuanuhu ra. ⁴⁰ Ta ra Felipe cha ra ñuu Azoto. Ta cuahan ra tahan tahan ñuu, ta cahan ra tuhun ra Cristo chihin ñáyivi nyacua nya cha cha ra ñuu Cesarea.

9

Nu nachinó iñi ra Saulo chi ra Cristo

(Hch. 22.6-16; 26.12-18)

¹ Cha ni ri ca cha chicá noo ra Felipe cahn ra tuhun ra Cristo chihin ñáyivi, ra Saulo ña sandihí ra tuhun cha nducú cahní ra chi ñu yihí cuenda Sutu Mañi yo. Ta chahan ra nu nyaá ra cuví nuu chi tata sutu, ² chican ra noo tutu chi ra, tacuhva nacuhva ra cuhun ra vehe ñuhu ñuu Damasco, ta tiin ra chi ñu cuahan

ityi ra Cristo, ta quichi nyaca ra chi ñu vehe caa Jerusalén, rayi o ñusihi. ³ Ñihí ra Saulo tutu cuan ta cuahan ra. Ta cuhva cha cuacha ra ñuu Damasco cuan, sana cuii ri ñi ra, ta quichi noo nduva ñuhu ityi andivi, sacundichin nicachico maa nu cuahan ra. ⁴ Tyicuan ta ra Saulo nduva ra nu ñuhú. Ta chiñi ra noo ndusu cha catyí tyehe caa:

—Saulo, Saulo, ¿ñáá tuhun cha chicá nyicon chi yuhu? —catyí ndusu cuan chi ra.

⁵ Tyicuan ta nacahan ra Saulo ta ndaca tuhun ra chi ra ta catyí ra:

—¿Yóó yoho Tata? —catyí ra.

Tyicuan ta nacahan ndusu cuan chihin ra, ta catyí:

—Yuhu cuví ra Jesús, ra chicá nyicon chi. Suri chi maun sañicuehún, tari sañicuehé sindiqui quití tahvi ñuhu chi ti cha chañi nyaa ti nu noo cha xaan cha saquehen ityi ra chi ti —catyí ra Jesús chi ra.

⁶ Tyicuan ta ra Saulo suri ñi ra chihin cha yuhvi ra. Ta catyí ra:

—Sutu Mañi yuhu, ¿ñáá cha cuñun tyi sacuvi? —catyí ra.

Tyicuan ta Sutu Mañi yo catyí ra chi ra tyehe caa:

—Ndicuita ta quihvun chichi ñuu Damasco chiña. Ta yucuan cucatyí noo ra chuun ñáá cha cusacuvun —catyí ra Jesús chi ra Saulo.

⁷ Ra cha candihi chihin ra Saulo, yuhvi xaan ra cacuvi. Ta ña cañihí ra tuhun cahan ra vatyí cachiñi ra ndusu cuan soco yori chi nyehe ra.

⁸ Tyicuan ta ra Saulo ndicuita ra. Soco cuhva cha nuña ra chiti nuu ra, ña cuví ca maa nyehe ra vatyí nducuaa ra. Yucuan chaha, ra tahan ra cayindaha ra ndaha ra ta chinyaca ra chi ra ñuu Damasco cuan. ⁹ Yucuan chinyaa ra uñi tahan quivi. Ta ña cuví nyehe ra. Ta ñiri ña chachi ra, ta ña chihí ra ndutya.

¹⁰ Ñuu Damasco cuan iyó noo ra chinó ñi chi Nyoo. Ta nañi ra Ananías. Ta nyehe ra noo visión nu catyí Sutu Mañi yo chi ra tyehe caa:

—¡Ananías! —catyí ra chi ra.

Tyicuan ta nacahan ra Ananías, ta catyí ra:

—Ma yuhu ihya, Sutu Mañi yuhu —catyí ra chi ra.

¹¹ Tyicuan ta Sutu Mañi yo catyí ra:

—Ndicuita, ta cuhun noo ityi cahnu cha nañi Ndoo. Ta nanducun vehe noo ra cha nañi Judas. Ta ndaca tuhun sivi noo ra cha nañi Saulo, ra ñuu Tarso. Vatyí chicán tahvi ra chi Nyoo. ¹² Ta nyehé ra noo visión, ta nyehé ra chi noo ra nañi Ananías. Ta chaá ra nu nyaá ra, ta tyisó ra ndaha ra siqui ra tacuhva cuví nanyehe ra inga chaha —catyí Sutu Mañi yo chi ra Ananías.

¹³ Tyicuan ta nacahan ra Ananías ta catyí ra:

—Sutu Mañi yuhu, cuaha xaan ñáyivi nacatyí chii vatyí cuaha xaan cha ña vaha chinyacuvi ra Saulo cuan chihin ñu yihí cuendon nya ñuu Jerusalén. ¹⁴ Ta vityin vachi tucu ra ihya vatyí chaha ra cacuvi nuu chi tata sutu ityi chi ra cha tyihi ra chi ñáyivi chicán tahvi chihin sivun vehe caa —catyí ra Ananías chi Sutu Mañi yo.

¹⁵ Soco Sutu Mañi yo catyí ra chi ra:

—Cuahan vatyí yuhu cha nacachi vahi chi ra Saulo cuan, vatyí cahan ra tuhun chihin ñáyivi inga ñuu, ta chihin rey inga ñuu, ta suri cahan tucu ra chihin ñáyivi Israel ñandihí.

¹⁶ Yuhu cusañahi chi ra yoso caa cha cuaha tindoho cunyehe ra cha cuende —catyí Sutu Mañi yo chi ra Ananías.

¹⁷ Tyicuan ta cuahan ra Ananías vehe nu nyaá ra Saulo. Chaa ra vehe cuan ta quihvi ra chichi vehe. Ta tyiso ra ndaha ra siqui ra Saulo, ta catyí ra chi ra tyehe caa:

—Yañi Saulo, Sutu Mañi yo ra Jesús ra tuví nuun ityi vachun, ican ra tachi chii vatyí tacuhva cuvi nanyehun inga chaha. Ta cusacutu ra chuun chihin Tatyí Ii ra —catyí ra Ananías chi ra Saulo.

¹⁸ Caa cuhva ri cuan ta cana coyo noo cha tari caa soo tiyaca cha yihí chiti nuu ra Saulo. Tyicuan ta cuví

nanyehe ra inga chaha. Yahā cuan ta condutyā ra. ¹⁹ Yahā cuan ta chachi ra. Ta ndunyeē coño ñuhu ra inga chaha. Ta ndoo ra suhva quivi chihin ñu yihí cuenda ra Cristo ñuu Damasco cuan.

Nu quichahā cahan ra Saulo tuhun ra Cristo chihin ñáyivi ñuu Damasco

²⁰ Tyicuan ta numi ri quichahā cahan ra Saulo tuhun ra Cristo chihin ñáyivi tandihi vehe ñuhu ñu Israel ñuu Damasco cuan. Ta catyí cachi ra vatyí ra Jesús, Sehe Nyoo cuví chi ra. ²¹ Ndií cuii maa ñáyivi cha chiñi tuhun cahán ra, iyo vavaha cuñi ñu. Ta catyí ñu chi tahan ñu:

—¿Atu ñima ra ihya cuví ra cha chica nyicon chi ñu chicán tahvi chihin sivi ra Jesús ityi ñuu Jerusalén cuan? ¿Atu suri ñima ra cuví cha vachi tñin chi ñu ityi tyehe vatyí cucuhva cuenda ra chí ñu chi ra cacuví nuu chi tata sutu? —catyí ñu.

²² Soco ra Saulo ñihi ca cahán ra tuhun ra Cristo chihin cha ñi ca iñi ra. Ta sañahá ra vatyí ra Jesús cuví ra Cristo, Sehe Nyoo. Nyacua ña cutuñi iñi ra Israel nyicú Damasco cuan nya ityi chino iñi ra.

Nu chino xehe ra Saulo chi ra Israel

²³ Cha yahā suhva quivi, ta ra Israel cha ña chinó iñi chi ra Cristo catyihí tahan ra tuhun cha cahñi ra chí ra Saulo. ²⁴ Ta ndiyaca ta ñiyaca canyatú ra chí ra yuvehe cahnu ñuu cuan. Soco ra Saulo cuan numi ri chito ra tuhun cuan. ²⁵ Tyicuan ta ñáyivi cha chinó iñi chi ra Cristo ñuu cuan catyihí ñu chí ra chichi noo tica cahnu. Ta noo cha cuaa casanoo ñu chí ra ityi ventana noo vehe cha cacú chihin barda cha nyaá nicachico yuhu ñuu cuan. Ta tyicuan caa chino ra cuahan ra.

Nu ñohó ra Saulo Jerusalén

²⁶ Quivi cha chaā ra Saulo Jerusalén, cuñi ra ndu ñin ri ra chihin ñu yihí cuenda ra Cristo. Soco tandihi maa ñu cuan ta yuhvi ñu chí ra. Vatyí ña chinó iñi ñu cha yihí ra cuenda ra Jesús. ²⁷ Soco noo ra cha nañi Bernabé, naquehen ra chí ra.

Ta chahā cuenda ra chí ra chí ra apóstol. Ta nacatyí ra chí ra yoso caa nyehe ra Saulo chí Sutu Mañi yo ra Cristo ityi ñuu Damasco; ta nacatyí ra yoso caa cahān Sutu Mañi yo chihin ra. Ta yoso caa cahān ra tuhun ra Cristo chihin cha ña yuhvi ra nya ñuu Damasco cuan. ²⁸ Tyicuan ta ndoo ra Saulo Jerusalén chihin ñu yihí cuenda ra Cristo. ²⁹ Ta cahan ra tuhun Sutu Mañi yo chihin cha ña yuhvi ra. Ta ndatuhún xaan ra tuhun ra Cristo chihin ra Israel cha cahan sahan griego. Soco ra cuan cananducú ra cuhva yoso caa ta cacahñi ra chí ra. ³⁰ Soco cachitó ra hermano cuan vatyí tyicuan caa yihí iñi ra cuan. Yucuan chaha chinyaca ra chí ra Saulo nya ñuu Cesarea. Ta yucuan ta natachi ra chí ra nya Tarso ñuu ra.

³¹ Tyicuan ta ñu yihí cuenda ra Cristo cha nyicú tandihi ityi Judea, ta ityi Galilea, ta ityi Samaría, vii xaan nyicu ñu vatyí ña cuxaan ca ñáyivi chí ñu. Ta ndunyeē ca iñi ñu chihin fuerza Nyoo vatyí quichahā vaha ñu cuhva catyí Nyoo, vatyí yuhvi ñu coto ma sacuvi ñu cuhva cuñi ra. Iyó ñu chihin cha tyinyeé Tatyí li chí ñu. Ta cuaha xaan ñu cuahan nanduvi.

Nu nduvahā ra Eneas

³² Tyicuan caa cuví ta ra Pedro tuhvá ra chica noo ra nyehe ra yoso caa canyicu hermano noo noo ñuu. Ta chahan tucu ra chinyehe ra nu nyicu ñu yihí cuenda ra Jesucristo noo ñuu cha nañi Lida. ³³ Yucuan nañihí ra chí noo ra cuhvi. Nañi ra Eneas. Ta cha uña cuiya catuví ra ña cuvinacanda ra vatyí ndundava coño ñuhu ra. ³⁴ Soco ra Pedro catyí ra chí ra:

—Yoho Eneas, ra Jesucristo sanduvahā ra chuun. Ndicuita ta natuvi yuvun —catyí ra chí ra.

Tyicuan ta caa cuhva ri cuan ndicuitā ra Eneas. ³⁵ Ta nyehe tandihi ñáyivi ñuu Lida cuan tyi nduvahā ra. Ta ñáyivi ñuu Sarón ñandihí. Tyicuan ta ñu cuan nachino iñi ñu chí Sutu Mañi yo. Ta sandoo ñu tuhun chahnu

cha chinqo ñi ñu ta cumañi ca coto ñu tuhun ra Cristo.

Nu nandoto cu Dorcas

³⁶ Quivi cuan chiyō noo ñaha chinó ñi chi ra Cristo ñuu Jope. Ta nañi ña Tabita, soco chihin sahan griego, Dorcas nañi ña. Ta tyicuan ri sacuvi ña cha vaha chihin ñáyivi. Tyinyee ña chi ñu ndahvi. ³⁷ Ta quivi cuan cu Dorcas quehen noo cuehe chi ña ta chihj ña. Ta cha yahā sacutyi ñu chi ña, chicacun ñu chi ña chichi noo cuarto nu cu uvi piso. ³⁸ Ñuu Jope cuan yatyin ri nyaá chihin ñuu Lida, nu nyaá ra Pedro. Ta ñu cha yihí cuenda ra Cristo ñuu Jope cuan chitó ñu vatyí nyaá ra Pedro ñuu Lida cuan. Tyicuan ta tachj ñu chi uvi tahan ra na cucatyí ra chi ra Pedro vatyí naquichi ra cha numi ri. Cuahan ra cuan ta catyí ra chi ra Pedro:

—Cōho nya Jope. Sanumi ta ma cucueun —catyí ra chi ra.

³⁹ Tyicuan ta ra Pedro ndicuita ra ta cuahan ra chihin ra. Ta cuhva cha chaa ra, chinyaca ra chi ra nya cuarto nu caa ndiyi cuan. Ta tandihí maa ñu chihj yí catuhva ñu nicachico chata ra. Suri chacú chaa ñu. Ta sañahá ñu sahma cha quicu cu Dorcas ta chinyito ña. ⁴⁰ Tyicuan ta ra Pedro tava ra chi tandihí ñáyivi cuarto cuan. Tyicuan ta chicuiñi chiti ra ta quichaha chican tahvi ra chi Nyoo. Tyicuan ta nanyehē ra chi ñaha chihj cuan catuvi ña. Ta quichaha catyí ra chi ña:

—Hermana Tabita, ndicuita —catyí ra chi ña.

Tyicuan ta nandica ña chiti nuu ña. Ta cuhva cha nanyehē ña chi ra Pedro, nicunyaá ña. ⁴¹ Tyicuan ta ra Pedro tñn ra ndaha ña ta sandicuita ra chi ña. Tyicuan ta cana ra chi ra hermano, ta chi ñu chihj yí. Ta nacuhva cuenda ra chi ña chi ñu vatyí nandoto ña. ⁴² Yahā cuan ta ndi cuii maa ñu Jope chitó ñu cha nandoto ña cuan. Ta cuaha vavaha ñu nachino ñi chi Sutu Mañi yo. ⁴³ Ta ra Pedro ndoo ra cuaha ri quiñi ñuu cuan. Nyaá ra vehe noo ra satyahy ñi. Nañi ra Simón.

10

Ra Pedro ta ra Cornelio

¹ Ñuu Cesarea iyó noo ra cha nañi Cornelio. Ta cuví ra capitán cuenda noo ciento sindaro. Ta ityi sindaro cuan, Italia nañi. ² Ta ra Cornelio cuan yuhví ra chi Nyoo ta vaha sacahnú ra chi ra, maa ra ta ñáyivi chi ra ñandihí. Ta sñn ri cuaha vavaha xuhun chahá ra chi ñu ndahvi ñu Israel. Ta tyicuan ri chicán tahvi ra chi Nyoo. ³ Ta cuví noo quiñi cuan cuhva cha caa uñi cha cha ñi, nyehe ra noo visión. Ta yucuan cuví nu cachi xaan nyehe ra vatyí noo ángel cha tachj Nyoo quihví nu nyaá ra, ta catyí ra chi ra:

—¡Yoho Cornelio! —catyí ángel cuan chi ra.

⁴ Tyicuan ta nanyehē ra Cornelio chi ángel cuan. Ta yuhví xaan ra cuví. Ta quichaha ndaca tuhun ra ta catyí ra:

—¿Ñáá cha cuví ihya, Tata? —catyí ra chi ángel cuan.

Tyicuan ta ángel cuan quichaha catyí ra chi ra:

—Nyoo chiñj ra ndi cuii maa cha chicón chi ra. Ta tahán ñi ra vatyí tyinyee xaan chi ñu ndahvi. ⁵ Ta vityin cuñi chi cha tachun tyiño nya ñuu Jope na cuquehen chi noo ra cha nañi Simón Pedro. ⁶ Ta maa ra cuan cucatyí ra chuun ñáá cha tahán chi sacuvun. Ta iyó ra vehe noo ra cha nañi tucu Simón, cuví ra noo ra satyahy ñi. Ta iyó vehe ra yuhu tyañuhu —catyí ángel cuan chi ra Cornelio, ta cuahan ángel cuan.

⁷ Ta cha yahā cuahan ángel cuan, ra Cornelio cana ra chi uvi tahan musu ra, ta chi noo sindaro cha chinó xaan ñi chi Nyoo. Ta cuví tucu ra noo ra sahá cuenda chi ra Cornelio ñandihí. ⁸ Ndi cuii tuhun cañan ángel cuan chihin ra Cornelio ta nacatyí ra chi nduñi tahan ra cuan. Ta tachj ra chi ra ñuu Jope.

⁹ Tuvj inga quiñi ta cuahan coyo ra cuan. Ta cuhva cha cuachaa coyo ra yuhu ñuu Jope cuan, ra Pedro ndaa ra xiñi vehe vatyí cuacacan tahvi ra chi Nyoo, ta cha cuñi hora cuví cuhva

cuan. ¹⁰ Ta chaa noo soco chi ra ta chisocó vavaha ra. Soco cha niri ca cha sanduvahá ñu cha cachi ra, quichahá nyehe ra noo visión. ¹¹ Ta nyehe ra vatyí nicuitacoho andivi. Ta nyehe ra cua noo noo sahma cahnu vavaha ityi andivi. Ta tari quivi nuhñi noo noo tutun sahma cuan ta cuahan noo ityi nu ñuhu. ¹² Ta chichi sahma cuan ñohó tandihí maa nuu quití cha cumi tahan chaha. Ta tandihí nuu coo, ta tandihí nuu saa. ¹³ Tyicuan ta chiñi ra noo ndusu cha catyí chi ra:

—Pedro, ndicuita ta cahñi quití ihya, ta cachun —catyí ndusu cuan chi ra.

¹⁴ Soco ra Pedro nacahan ra ta catyí ra:

—Ma cachi, Sutu Mañi yuhu. Yuhu ña tuhvé chachi quití cha catyí ley tyi yica cha cachi ndi —catyí ra Pedro.

¹⁵ Tyicuan ta quichaha catyí tucu ndusu cuan chi ra inga chaha:

—Ma catyun vatyí yica cha cachun noo cha cha yaha sanduvij yuhu —catyí ndusu cuan chi ra Pedro.

¹⁶ Uñi tahan chaha sañaha Nyoo visión ihya chi ra. Tyicuan ta sahma cahnu cuan nandaá cuanuhu tucu ityi andivi. ¹⁷ Cha niri ca cha chicá xiñi ra Pedro ñáá cha cuñi chi catyí visión cuan, chaa coyo musu cha tachí ra Cornelio. Ta candaca tuhun ra nya nyaá vehe ra Simón. ¹⁸ Ta cha chaa coyo ra ityi yuvehe candaca tuhun ra tatu yucuan iyó noo ra cha nañi Simón Pedro. ¹⁹ Ta ra Pedro suri cha chicá xiñi ra ñáá cha cuñi chi catyí visión cha nyehe ra. Tyicuan ta Tatyí li quichahá catyí chi ra:

—Nyehe Pedro, uñi tahan ra nanducú chuun. ²⁰ Ndicuita ta cuhun chihin ra, ta ma quihí uvi iñun vatyí mai tachí chi ra ihya —catyí Tatyí li chi ra.

²¹ Tyicuan ta ra Pedro noo ra nu canyicu ra cha tachí ra Cornelio, ta catyí ra chi ra:

—Yuhu cuví ra nanducú ndo. ¿Ñáá tyiño vachi ndo?

²² Tyicuan ta canacahan musu ra Cornelio ta catyí ra:

—Ra Cornelio, ra cuví capitán chi ndi ican tachí chi ndi. Noo ra vaha xaan ñáyivi cuví. Ta vaha xaan quichahá ra nu cahán Nyoo. Ta tandihí maa ra Israel ityi Judea ihya cacuñi ra chi ra chaha cha cuenda cha vaha ñáyivi cuví ra. Ta noo ángel Nyoo catyí chi ra vatyí na cana ra chuun, vatyí cuhun vehe ra vatyí tacuhva cuiñi ra tuhun cha cuacahun —cacatyí musu ra Cornelio chi ra Pedro.

²³ Tyicuan ta chaha ra Pedro quihvi coyo ra chichi vehe. Ta candoo ra chihin ra cha cuaa cuan. Ta cha inga quivi cuan ta cuahan ra Pedro chihin ra. Ta cuahan suhva ra hermano cha iyó Jope cuan ñandihí.

²⁴ Cha inga quivi chaa coyo ra nya Cesarea nu nyatú ra Cornelio chi ra chihin ñáyivi chi ra, ta chihin tandihí ra tahan ra. ²⁵ Cuhva cha chaa ra Pedro vehe ra, ra Cornelio quita ra ta cahan ra chihin ra. Ta chicuñi chiti ra nuu ra ta quichaha sacahnu ra chi ra. ²⁶ Soco ra Pedro nacoñehé ra chi ra, ta catyí ra chi ra:

—Ndicuita vatyí noo rayi ri cuví yuhu tari yoho, ta ñima Nyoo cuví —catyí ra chi ra.

²⁷ Ta cha niri ca cha cahán ra chihin ra, quihvi ra ta nanyehe ra cuaha ñáyivi candu ñn ri. ²⁸ Tyicuan ta catyí ra Pedro chi ñu:

—Nyoho chitó ndo vatyí ley nyuhu cha cuví ndi ñu Israel, ña chahá chi cha cu ñn ri ndi chihin ñáyivi inga ñuu. Ta niri chichi vehe ñu ta ma cuví quihvi ndi. Soco Nyoo sañaha ra chii, ta catyí ra: “Yoho, ma catyun chi ni noo ñáyivi tyi ña vaha ñu”, catyí Nyoo chii. ²⁹ Yucuan chaha quivi cha cana ndo chii, numi ri vachi. Ta vityin cuñi cote ñáá cuenda cana ndo chii —catyí ra Pedro chi ra Cornelio.

³⁰ Tyicuan ta nacahan ra Cornelio, ta catyí ra:

—Cha iyó cumi quivi vityin, suri maa cuhva ihya cha nyaí vehi ta ña chachí ta chicán tahvi chi Nyoo cha cha iñi. Ta tuví noo ra nui. Ñihnó ra noo sahma xiño vavaha. ³¹ Ta catyí ra chii: “Yoho Cornelio, Nyoo chiñi

ra cha chicán tahvun. Ta nichón iñi ra cha sacuvún vaty tyinyeún chi ñu ndahvi. ³² Tachi tyiño nya ñuu Jope na quichi ra Simón Pedro. Nyaá ra vehe inga tucu ra cha nañi Simón, noo ra cha satyahu ñi. Ta vehe ra nyaá yatyin ri yuhu tyañuhu. Ta na quichi ra Simón Pedro ta cahan ra chuhun”, catyí ángel cuan chii. ³³ Tyicuan ta numi ri tachi tyiño vaty cuquehen chuun. Ta vaha vaty vachun. Ta vityin tandihi yo nyicú yo nuu Nyoo. Ta cuñi ndi cuiñi ndi tandihi cuii maa cha tachi Sutu Mañi yo chuun vaty nacatyun chi ndi.

Nu cahan ra Pedro tuhun ra Cristo vehe ra Cornelio

³⁴ Tyicuan ta quichaha cahan ra Pedro ta catyí ra:

—Vityin cutuñi iñi vaty Nyoo cuñi ra chi tandihi ñáyivi. Cuví ri yo ñu Israel, o cuví ri yo ñu inga ñuu. ³⁵ Soco naquehen ra chi yo tatu quichaha yo chi ra, ta sacuví yo cha vaha. ³⁶ Cahan ra chihin nyuhu ñu vachi tata ra Israel, ta sacoto ra vaty nduvaha coo yo chihin ra cha cuenda ra Jesucristo. Maa ra nyacá ñaha tandihi maa yo. ³⁷ Nyoho chitó vaha ndo tandihi cha cuví ñuu Israel ñui, yoso caa quichaha chi nu cuví Galilea cha yaha cha cahan noo ra Juan nuu ñáyivi, ta sacondutya ra chi ñu. ³⁸ Chitó ndo yoso caa chaha Nyoo tunyee iñi Tatyí Ii ra chi ra Jesús, ra Nazaret. Ta chica noo ra sacuví ra cha vaha, sanduvaha ra chi tandihi ñu cha nyehé tindoho sahá ra ña vaha. Tyehe caa sacuví ra Jesús vaty Nyoo nyaá ra chihin ra. ³⁹ Nyuhu cuví ndi cha ndaa tandihi cha sacuví ra Jesús nichanu Judea ta ñuu Jerusalén. Yaha cuan ta chahñi ñu chi ra nu cruzi. ⁴⁰ Soco sanandoto Nyoo chi ra nu cu uñi quivi. Ta tuví ra nuu ndi. ⁴¹ Ña tuví ra nuu tandihi ñáyivi. Soco tuví ra nuu nyuhu vaty nacachi ra chi ndi nyata ityi chata ca vatyí cuví ndi cha ndaa cuenda ra. Nyuhu chachi ndi ta chihí ndi chihin ra cha yaha cha nandoto ra. ⁴² Ta tachi ra chi ndi vaty cahan ndi tuhun ra chihin ñáyivi. Ta cuví ndi cha ndaa

vaty Nyoo cuatya ra chi ra Jesús tyi cuví ra juez chi ñu cha nyitó ta ñu cha chihí. ⁴³ Ta tyicuan caa tucu nyata ityi chata ca, cacahan tandihi ra profeta Nyoo tuhun ra Jesús. Ta cacatyí ra vaty tandihi ñu cha chinó iñi chi ra Jesús, cusandachi Nyoo cuatyí ñu cha cuenda maa ra.

Nu naquehén ñu Tatyí Ii ta ñima ñu Israel cuví ñu

⁴⁴ Ni cahan ca ra Pedro ta noo xica ri Tatyí Ii siqui tandihi ñu tyasohó tuhun cahan ra. ⁴⁵ Ta ra Israel cha cayihí cuenda ra Jesús cha cha coo chihin ra Pedro iyo xaan cuñi ra vaty chaha tucu Nyoo Tatyí Ii ra chi ñu cha ñima ñu Israel cuví. ⁴⁶ Chitó ra tyi tyicuan caa cuví vaty chíñi ra cahan ñu inga sahan, ta sacahnú ñu chi Nyoo. ⁴⁷ Tyicuan ta quichaha catyí ra Pedro chi ra cha cha coo chihin ra:

—Ma cuví casi yo nu condutya ñáyivi ihya. Vaty cha naquehen tucu maa ñu Tatyí Ii tari maa yo —catyí ra chi ra.

⁴⁸ Tyicuan ta tachi ra Pedro chi ñu ni ñihí Tatyí Ii na condutya ñu chihin sivi ra Jesucristo. Tyicuan ta chacu ndahvi ñu nuu ra Pedro vaty cuñi ñu cha ndoo ra suhva quivi chihin ñu.

11

Nu nacatyí ra Pedro chi ñu yihí cuenda ra Cristo Jesús nya Jerusalén yoso caa cuahan chitya tuhun ra inga ñuu

¹ Ra apóstol ta inga ra hermano cha nyicú Judea, ñihí ra tuhun vaty nyacua nya ñu cha ñima ñu Israel cuví ta naquehén ñu tuhun Nyoo. ² Tyicuan ta nachaa ra Pedro Jerusalén. Ta ra cha catyí vaty cuñi chi cha sacuvi yo costumbre circuncisión ta cuhva cuví cacu yo, xaan xaan cuñi ra nyehe ra chi ra Pedro. ³ Ta cacatyí ra chi ra tyehe caa:

—¿Ñáá tuhun cha chahun vehe ñu cha ñima ñu Israel cuví ta chachun chihin ñu? —catyí ra.

⁴ Tyicuan ta ra Pedro nacatyí ra nya nu quichaha tandihi cha cuví chi ra ta catyí ra:

5 —Yuhu nyaí ñuu Jope. Ta cuhva cha chicán tahvi chí Nyoo ta nyehi noo visión. Ta nyehi tari noo sahma cahnu cha noó ityi andivi. Tari cha nuhñi noo noo tutun ta cuahan noo ityi nu ñuhú nu nyaí. 6 Ta nanyehe vahi ñáá cha ñohó chichi. Ta nyehi quití cha cumi chaha, quití cuhu, ta coo, ta saa. 7 Ta chiñi noo ndusu cha catyí chii: “Ndicuti Pedro. Cahñi quití ihya ta cachun”, catyí ndusu cuan chii. 8 Ta nacahin ta catyí tyehe caa: “Sutu Mañi yuhu, ma cuvi, vatyí ni noo chaha ta ta cachi que coño quití quiñi caa.” 9 Tyicuan ta ndusu andivi nacahan chi chihin inga chaha, ta catyí chi: “Ma catyí yoho vatyí ma cachun noo cha yaha sanduvii”, catyí ndusu cuan chi. 10 Uñi chaha cuvi tyehe caa. Yaha cuan ta nandaá tandihí chihin sahma cuan ityi andivi. 11 Ta caa cuhva ri cuan chaá coyo uñi tahan ra vehe nu nyaí, quitá ra ñuu Cesarea ta nanducu ra chii. 12 Ta Tatyí li tachí chii na cuhin chihin ra. Ta catyí ra chí tyi ma caca iñi cha ñima ñu Israel cuví ñu. Ta chahan coyo tucu iñu tahan ra yañi yo ihya chihin. Ta cha chaá ndi nya Cesarea quihvi ndi chichi vehe noo ra. 13 Ta nacatyí ra cuan chi ndi yoso caa nyehe ra chí noo ángel chichi vehe ra. Nanyaá ángel cuan ta catyí ra chí ra vatyí na tachí ra musu ra ñuu Jope na cana ra chí noo ra cha nañi Simón Pedro. 14 Vatyí ican ra cucatyí ra chí ra yoso caa cacu añima ra ta añima tandihí ñáyivi chí ra, catyí ángel cuan chí ra cuan na. 15 Ta sacuvi ra cuan tari cuhva catyí ángel cuan chí ra. Ta cuhva cha chají vehe ra quichaha cahín chihin ñu. Ta quichí ri Tatyí li siqui ñu tari quichí siqui yo cha xihna ri. 16 Tyicuan ta nichon iñi cha catyí Sutu Mañi yo quivi cuan. Ta catyí ra tyehe caa: “Ndicha vatyí ra Juan sacondutya ra chí ñáyivi chihin ndutya. Soco nyoho cucondutya ndo chihin Tatyí li”, catyí ra. 17 Nyoo chaha tucu ra Tatyí li ra chí ñu cuan tari chaha ra chí maa yo quivi chino iñi yo chí Sutu Mañi yo Jesucristo. Ta

cha tyicuan caa ¿yóó ra cuvi yuhu vatyí casi cha sacuvi Nyoo? —catyí ra Pedro chí ra.

18 Tyicuan ta cuhva cha cachiñi ra yañi yo ra Jerusalén tuhun cuan ña nacahan ca ra. Ta casacahnu ra chí Nyoo. Ta cacatyí ra:

—Tu tyicuan caa cuvi, cuñi chí catyí vatyí Nyoo chahá tucu ra chí ñu cha ñima ñu Israel cuví vatyí ndu uvi iñi tucu maa ñu cuatyí ñu, ta coo ñu ñayivi cha ma naa ca maa —cacatyí ra.

Ñu yihí cuenda ra Cristo ñuu Antioquía

19 Quivi cha cachahñi ra chí ra Esteban, quichaha chica nyicon ra chí inga ñu yihí cuenda ra Cristo. Ta yihí ñu cachino ñu ta cuahan coyo ñu ityi Fenicia. Ta inga ñu nya noo ñuhú cha nyaá mahñu tyañuhu cha nañi Chipre. Ta yihí ñu chaá coyo ñu ñuu Antioquía. Ta suri cahan ñu tuhun ra Cristo soco in ri maa chihin ñu Israel. 20 Ta chihin ñu cha cuahan coyo cuan, ndihí suhva ñáyivi ñuhú Chipre. Ta yihí tucu suhva ñu ñuu Cirene. Ta cha chaá coyo ñu ñuu Antioquía, ta quichaha cahan tucu ñu cuan chihin ñu cha ñima ñu Israel cuví. Ta sacoto ñu tuhun Sutu Mañi yo Jesús, ra cha sacacu añima yo. 21 Ta tunyee iñi Sutu Mañi yo nyaa chihin ñu. Ta yucuan chaha cuaha ñáyivi casando ñu tuhun chahnu cha chino iñi ñu. Ta nachino iñi ñu chí Sutu Mañi yo. 22 Tyicuan ta chaá tuhun cuan nya Jerusalén. Ta ñu yihí cuenda Cristo tachí ñu chí ra Bernabé na cuhun ra nya Antioquía. 23 Ta cha chaá ra Bernabé Antioquía cuan, nyehe ra yoso caa nasocó Nyoo chí ñu. Ta ndusií xaan cuñi ra. Ta cahan ra nuu ñu na cunyicon ñu chí Sutu Mañi yo chihin cha ñi iñi ñu. 24 Tyicuan caa sacuvi ra Bernabé vatyí cuví ra noo ra vaha. Tyitú ra chihin Tatyí li. Ta chinó xaan iñi ra chí Nyoo. Ta tyicuan caa ta cuaha ñáyivi quihvi ñu cuenda Sutu Mañi yo. 25 Cha yaha cuan ta cuahan ra Bernabé cuananducu ra chí ra Saulo nya ñuu Tarso. Ta cha nañihí ra

chi ra, chinyaca ra chi ra nya ñuu Antioquía. ²⁶ Ta cachinyicu ra chihin ñu yihí cuenda Nyoo ñuu cuan noo cuiya nanii ta sañaha ra tuhun Nyoo chi cuaha ñáyivi. Ta suri ñuu Antioquía cuan cuvi nu quichaha catyi ñáyivi: Cristiano chi ñu, o ñu yihí cuenda ra Cristo cuvi cuan.

²⁷ Ta quivi cuan cha coyo ra cachahá cuenda tuhun cahán Nyoo, ra cacuvi profeta. Quita ra ñuu Jerusalén ta cha coyo ra Antioquía.

²⁸ Ta noo ra cuan nañi ra Agabo chiuinanyaa ra nu nyicu ra yihí cuenda ra Cristo ta cahan ra tuhun cha chaha Tatyí li chi ra. Ta catyí ra vatyí cuquichi noo tama nicacahnu ñáyivi. Ta tyicuan caa cuvi quivi chinyaa ra Claudio cuvi ra rey cahnu.

²⁹ Tyicuan ta ñu yihí cuenda Cristo nya Antioquía tyihí tahan ñu tuhun vatyí cucuhva ñu yoso cuhva cundaa iñi maa noo noo ñu, vatyí cutyinyee ñu chi ñu yihí cuenda Cristo cha iyó ityi Judea. ³⁰ Tyicuan caa sacuvi ñu ta sacuhun ñu xuhun chi ra cuvi nuu chi ñu yihí cuenda Cristo nya Jerusalén. Ta ra Bernabé ta ra Saulo chinyaca ra xuhun cuan.

12

Nu chihí ra Jacobo ta nu quihvi ra Pedro vehe caa

¹ Ta quivi cuan quichaha chica nyicon rey Herodes chi suhva ñu yihí cuenda ra Cristo. ² Ta tachí ra tyiño vatyí na cahñi ra chi ra Jacobo yañi ra Juan chihin mityí. ³ Ta nyehe ra Herodes vatyí tahan xaan iñi ñu Israel cha sacuvi ra tyicuan caa, ta tyihí ra tyiño vatyí tñn ndihí ra chi ra Pedro. Ta cuvi chi noo quivi vico pascua nu tuhva ñu chachi ñu pan cha ñahri yuchan iya yihí chihin. ⁴ Cha yaha cha tñn ra chi ra Pedro, tyihí ra chi ra vehe caa. Ta cumi ityi sindaro sahá cumi chi ra. Ta cumi sindaro cha noo ityi ra ta sahá cuenda ra suhva suhva cuhva chi ra. Ta tyaa ra Herodes cuhva vatyí nayahá vico cuan ta cucuhva cuenda ra chi ra chi ñáyivi. ⁵ Ta

tyicuan caa ñohó ra Pedro vehe caa. Ta sindaro cuan sahá cumi vaha xaan ra chi ra. Soco cha ni ri ca cha ñohó ra yucuan, ñu yihí cuenda ra Cristo chicán tahvi xaan ñu nyita cuii ri maa cha cuenda ra.

Nu sacacu Nyoo chi ra Pedro vehe caa

⁶ Ta tyaá ra Herodes cuhva vatyí cha ñaha ri inga quivi cuan cutava ra chi ra Pedro nuu ñáyivi. Ta suri cha cuaa cuan ra Pedro quixí vavaha ra mahñu uvi sindaro cuan. Ta nuhñi ra chihin uvi cadena. Ta uvi ca sindaro canyicu ra yuvehe casahá cumi ra.

⁷ Ta tañi ri ta tuví noo ángel cha tachí Sutu Mañi yo. Ta ndundichin ri chichi vehe caa cuan. Ta ángel cuan tñn ra xiin ra Pedro. Ta sandoyo ra chi ra. Ta catyí ra chi ra:

—Sanumi. Ndícuíta —catyí ángel cuan chi ra.

Tyicuan ta ndachí cadena cha nuhñi ndaha ra Pedro. ⁸ Ta ángel cuan catyí ra chi ra:

—Nacuhñi vaha chichun ta natyihí ndichan chahun —catyí ángel cuan.

Tyicuan caa sacuvi ra Pedro. Ta catyí ángel chi ra:

—Quehen sahmon ta tyaun chaton ta quichun chate —catyí ángel cuan chi ra Pedro.

⁹ Ta ra Pedro quita ra chata ángel cuan. Soco ña chitó ra tatu cha ndicha o cha ña ndicha cuvi cuan, ta cuñi maa ra vatyí visión nyehé ra. ¹⁰ Soco cuahan ra chata ángel cuan ta cayaha ra noo nu sahá cumi sindaro. Tyicuan ta cayaha ra inga tucu nu casahá cumi sindaro cuan. Yaha cuan ta cha coyo ra yuvehe caa cahnu nu quita ñáyivi ta quihvi ñu chichi ñuu. Ta yuvehe cuan nuña ri maa. Ta quita coyo ra. Ta cha yaha yaha ra noo ityi cahnu, ta sandoy ángel cuan chi ra. ¹¹ Tyicuan ta nacoto ra Pedro vatyí ndicha ta quichaha catyí ra:

—Ndicha, ñima visión cuvi. Soco maa Sutu Mañi yo tachí ra noo ángel vatyí sacacu ra chii ndaha ra Herodes ta ndaha ra Israel —catyí ra Pedro.

¹² Chicá xiñi ra tuhun ihya ityi cuahan ra. Ta chaá ra vehe cu María síhi ra Juan Marcos. Ta cuaha xaan ñu canyicú cuan chicán tahvi ñu chi Nyoo. ¹³ Ta cuhva cha sacachan ra Pedro yuvehe nuquehe, quitá noo ñaha tyivaa cha nañi Rode chinyehe ña yóo cha sacachan cuan. ¹⁴ Soco cuhva cha nichon soho ña ndusu ra Pedro, ña nuña ña yuvehe. Vatyí síi xaan cuñi ña, ta chino ña cua nacatyí ña. Ta catyí ña vatyí ra Pedro nanyaá ra yuvehe. ¹⁵ Tyicuan ta quichaha catyí ñu chi ña:

—Loco yoho —catyí ñu chi ña.

Soco ña cuan catyí ña vatyí ndicha cha cahán ña. Soco ñu cuan catyí ñu tyi ñima ra Pedro cuví ra, soco ángel cuenda ra cuví, catyí ñu.

¹⁶ Ta ra Pedro sañihí ca ra sacachan ra yuvehe. Ta cuhva cha nuña ñu ta nanyehe ñu chi ra, iyo xaan cuñi ñu ta yuhvi ñu cuví. ¹⁷ Soco savahá ra seña chihin ndaha ra nacutaxin ñu. Ta nacatyí ra chi ñu yoso caa tava Sutu Mañi yo chi ra vehe caa. Ta catyí ra chi ñu:

—Nacatyí ndo chi ra Jacobo ta chilinga yañi yo —catyí ra.

Ta quitá ra ta cuahan ra inga ityi.

¹⁸ Cuhva cha cundichin, iyo cacuvi sindaro cha sahá cumi chichi vehe caa cuan, vatyí ña cachitó ra yoso caa quitá ra Pedro. ¹⁹ Tyicuan ta tachí ra Herodes cunanducu chi ra. Ta vatyí ña nañihí ra chi ra, tyicuan ta tachí ra na cacahñi ra chi ra sahá cumi vehe caa cuan. Yahá cuan ta quitá ra Herodes ityi Judea cuan ta cuahan ra ñuu Cesarea cuacoo ra.

Nu chihí ra Herodes

²⁰ Ta ra Herodes cuxaan xaan ra chihin ñáyivi ñuu Tiro ta ñáyivi ñuu Sidón. Soco cuñi ñu cuan nduvaha coo ñu chihin ra vatyí ñuu cha nyacá ñaha ra yucuan quitá cha cachi ñu. Tyicuan ta ndu ñin ri ñu ta cuahan coyo ñu cuacutahan ñu chihin noo ra cha nañi Blasto. Ican ra sahá cuenda chi ra Herodes. Ta chicán ñu cha nduvaha coo ra Herodes chihin ñu. ²¹ Tyicuan ta catyí ra Herodes vatyí cuhun ñu nu nyaá ra noo quívi. Ta chaá quívi cuan ta ndihvi noo ra

sahma tyiño ra. Ta chicunyaa ra nu tyayu cahnu ra. Ta cahán noo ra nuu ñu. ²² Tyicuan ta quichaha canachaa ñáyivi, ta catyí ñu:

—Ra cha cahán ihya ñima noo rayíi ri cuví ra. Nyoo cuví ra —catyí ñu.

²³ Ta caa cuhva ri cuan noo ángel Sutu Mañi yo chahá ra noo cuehe chi ra Herodes vatyí chahá ra cha catyí ñáyivi tyi Nyoo cuví ra. Ta quihvi tindacu chi ra, ta chihí ra.

²⁴ Soco tuhun Nyoo cuahan chityaca. Ta cahán ñu tuhun Nyoo tandihí ri ityi. ²⁵ Quívi cha ndihí tyiño saha ra Bernabé ta ra Saulo nya Jerusalén, cuanuhu coyo ra ñuu Antioquia. Ta cuahan tucu ra Juan Marcos chihin ra.

13

Nu quichaha cachicá ra Saulo ta ra Bernabé tyiño Nyoo

¹ Vehe ñuhu Antioquia cuan iyó ra cacuví profeta Nyoo. Ta iyó tucu ra cha sañahá tuhun Nyoo chi ñáyivi. Ta sívi ra cuan ican cuví ihya: Ra Bernabé, ra Simón Toon, ra Lucio ra ñuu Cirene, ra Manaén cha chahnu ñin ri chihin ra Herodes cha cuví rey ityi Galilea, ta ra Saulo. ² Ta noo quívi nyicú tandihí ra ta casacahnú ra chi Sutu Mañi yo. Ta casahá ra ayunar: ña cachachi ra ta cananducu ra chi Nyoo cuví cuan. Tyicuan ta catyí Tatyí Ii chi ra:

—Tava ñin ndo chi ra Bernabé ta ra Saulo cha cuenda tyiño cha cané chi ra —catyí Tatyí Ii chi ra.

³ Tyicuan ta cha ndihí saha ra ayunar, ta catyiso ra ndaha ra síqui ra, ta cachican tahvi ra chi Nyoo cha cuenda ra. Ta cacahan ra chihin ra tahan ra ta cuahan coyo ra.

Nu cahán ra apóstol tuhun Nyoo ñuhu Chipre

⁴ Yahá cuan tachí Tatyí Ii chi ra Bernabé ta chi ra Saulo noo ñuu cha nañi Seleucia. Tyicuan ta cuahan coyo ra. Ta yucuan caquihvi ra chichi noo barcu ta cuahan ra nya ñuhú Chipre cha nyaa mahñu tyañuhu. ⁵ Yucuan ta cachaa coyo

ra noo ñuu yuhu tyañuhu cha nañí Salamina. Ta quichaha cahan ra tuhun Nyoo vehe ñuhu ra Israel. Cuahan tucu ra Juan chihin ra vatyí tyinyee ra chi ra. ⁶Tyicuan ta cuahan coyo ra cahán ra tuhun Nyoo noo noo ñuu cha nyaa Chipre cuan nyacua nya chaa coyo ra ñuu cha nañí Pafos. Ta yucuan nañihi ra chi noo ra Israel cha nañí Barjesús. Ta chitó ra tuhun tasí. Cuví ra noo ra cuendu vatyí catyí ra vatyí cuenda Nyoo cahán ra. ⁷Ta ra tasí cuan nyaá ra chihin gobernador Sergio Paulo. Ta ra Sergio cuví ra noo ra cachi iñi. Ta cana ra chi ra Bernabé ta chi ra Saulo, vatyí cuñí ra cuiñi ra tuhun Nyoo. ⁸Ta ra tasí cuan nañí tucu ra Elimas, ta chasí ra nu chino iñi gobernador cuan chi ra Cristo. ⁹Tyicuan ta ra Saulo cha nañí tucu Pablo, tyitú ra chihin Tatyí Ii. Ta nyehe vavaha ra chi ra Elimas cuan. ¹⁰Ta catyí ra chi ra:

—Yoho ra sandaví ñaha, cuendu xaun. Sehe cuihna cuví chuun. Ta cuñún sativun tandihí cha vaha. Ta tyicuan ri chasún ityi vaha Sutu Mañi yo. ¹¹Ta vityin Sutu Mañi yo cutachi tuñi ra chuun, vatyí cunducuaun. Ta ma cuvi nyehun ñuhu ñanyii suhva quiví —catyí ra Pablo chi ra Elimas.

Tyicuan ta caa cuhva ri cuan ta nducuaa ra. Ta ndoo ra nu ñaa iñi. Ta nducu ra noo ra tiñ ndaha ra vatyí ña ndichin ca nyehé ra. ¹²Cuhva cha nyehe gobernador cuan cha cuví chi ra Elimas, chino iñi ra chi ra Jesucristo. Vatyí iyo cuñi ra nyehe ra cha sañahá Sutu Mañi yo.

Cuahan ra Pablo ta ra Bernabé nya ñuu Antioquía ityi Pisidia

¹³Ra Pablo ta ra tahan ra quihví ra chichi noo barcu ñuu Pafos. Ta cuahan coyo ra nya ñuu Perge ityi Panfilia. Soco ra Juan Marcos sandoo ra chi ra ta cuanuhu ra nya Jerusalén. ¹⁴Yaha cuan ta caquitá ra Perge cuan, ta cuahan coyo ra ñuu Antioquía cha nyaá ityi Pisidia. Yucuan quihví coyo ra chichi vehe ñuhu ñu Israel ta cuví chi noo quiví nyitatu ñu. Ta chicunycu ra. ¹⁵Tyicuan ta quichaha

sacuaha ñáyiví nu libru ley cha tyaa ra Moisés. Ta sacuaaha tucu ñu libru cha tyaa ra cacuvi profeta Nyoo ta cha naha. Yaha cuan ta ra cacuví nu vehe ñuhu catyí ra chi ra hermano nyicú cuan, vatyí tatu iyó noo tuhun cuñí ra cahan ra chihin ñáyiví, cuví cahan ra. ¹⁶Tyicuan ta ndicuitá ra Pablo ta sacuví ra noo seña chihin ndaha ra vatyí na cutaxin ñu. Ta catyí ra:

—Cuiñi ndo nyoho ra Israel, ta nyoho cha quichahá ndo chi Nyoo. ¹⁷Nyoo cuenda yo, ñu Israel, nacachí vaha ra chi sutu chahnu yo. Ta quiví cha iyó ca ñu ityi Egipto sacuví ra noo ñuu cahnu chi ñu. Vasi ñima ñáyiví ñuu cuan cuví ñu, soco sanducuaaha ra chi ñu. Yaha cuan ta tava ra chi ñu ityi cuan chihin tunyee iñi chi ra. ¹⁸Ta cunyee iñi Nyoo tandihí cuhva chiyo ñu nu chicá noo ñu ñuhú ityi chichi cha uvi xico cuiya. ¹⁹Ta sanaa ra ucha tahan ñuu nahnu cha chiyo nicahnu Canaán, vatyí chaha ra ñuhú cuan chi sutu chahnu yo. ²⁰Yaha cuan ta sacuví Nyoo vatyí cunyaca ñaha maa maa ri juez chi ñáyiví cuan. Tari noo cumi ciento sisava cuiya chinyaca ñaha juez chi ñu nyacua nya quiví chinyaca ñaha ra profeta Samuel chi ñu. ²¹Tyicuan ta maa ñu chican ñu noo rey cha cunyaca ñaha chi ñu. Ta Nyoo chaha ra chi ra Saúl sehe ra Cis chi ñu, vatyí cunyaca ñaha ra chi ñu. Ta ra Saúl vachi ra tata ra Benjamín. Ta uvi xico cuiya chinyaca ñaha ra chi ñu. ²²Yaha cuan ta Nyoo tava ra chi ra Saúl cha cuví ra rey. Ta chaha ra vatyí cuvi ra David rey. Ta catyí ra: “Nyhí vatyí ra David sehe ra Isaí cuví ra noo rayíi cha tahán iñi cuhva iyó. Ta cusacuvi ra tandihí cha cuñí yuhu”, catyí Nyoo tuhun ra David. ²³Ta minoo ra vachi tata ra David cuan ícan cuví ra Jesús. Ta maa Nyoo tachí chi ra vatyí sacacu ra chi yo ñu Israel, tari catyí ra chi sutu chahnu yo. ²⁴Ta cumañi ca quichi ra Jesús, ra Juan ra sacondutya chi ñáyiví cahan ra nuu tandihí ñáyiví Israel. Ta catyí

ra chi ñu vatyí cuñí chi cha ndu uvi iñi ñu cuatyí ñu, ta condutya ñu. ²⁵ Ta cha cuandihí tyiño saha ra Juan ta catyí ra: “¿Atu cuñí maa ndo vatyí yuhu cuví noo ra cahnu cha saquichí Nyoo? Soco ñima yuhu cuví ra cahnu cuan. Vatyí chata cha yahá yuhu ta vachi nonga ra. Ta ni ndichan nyaá chaha ra ta ña nañé cha ndachi. Vatyí cahnu xaan ra cuví ra”, catyí ra Juan.

²⁶ 'Hermano —catyí ra Pablo— nyoho ñu vachi tata ra Abraham, ta nyoho cha quichahá ndo chi Nyoo. Cha cuenda nyoho cuví tuhun ihya tyi sañahá Nyoo chi yo yoso caa cacu añima yo. ²⁷ Ñáyiví ñuu Jerusalén ta ra cuví nuu chi ñu cuan, ña chitó ñu vatyí ra Jesús cuví ra cha sacacú chi yo. Ta ni ña cutuñí iñi ñu tuhun cha catyaa ra profeta Nyoo ta cha naha, vasi sacuaaha vavaha ñu tuhun cuan tandihí quívi cha nyitatu ñu, soco ña cutuñí iñi ñu. Ta quívi chahñi ñu chi ra Jesús chinó cava tari cuhva catyí ra profeta Nyoo cuan. ²⁸ Vatyí vasi ñahri cuatyí ra nañihí ñu, soco chican ñu chi ra Pilato na tyihí ra tyiño cucahñi chi ra. ²⁹ Ta cha yahá sacuví ñu chi ra tari cuhva catyí maa tuhun ra nu libru Nyoo ta chihí ra. Tyicuan ta sanoo ñu chi ra nu cruzi. Ta tyihí ñu chi ra chichi ñuhú. ³⁰ Soco Nyoo sanandoto ra chi ra. ³¹ Ta chichi cha cuaha quívi tuví ra nuu ra cha quichi coyo chihin ra quívi quitá ra ityí Galilea, ta quichi ra Jerusalén. Ta ican ra cuan cacahán tuhun ra chihin ñáyiví vityin. ³² Ta yucuan chaha nyuhu cahán ndi tuhun vaha cha catyí Nyoo chi sutu chahnu yo vatyí cuhva ra chi yo. ³³ Vatyí cha cuenda cha vaha chi maa yo cha cuví yo ñáyiví vachi tata ñu cuan, sacuví maa Nyoo cha catyí ra. Vatyí sanandoto ra chi ra Jesús tari cuhva nyaá nu cu uvi salmo nu catyí Nyoo tyehe caa: “Sehi cuví chuun, ta yuhu chahí ñáyiví coun vityin”, catyí Nyoo. ³⁴ Nyoo tyaá ra cuhva vatyí sanandoto ra chi ra, tacuhva cha ma tyahyu coño ñuhu ra. Vatyí catyí nu tutu Nyoo: “Cuhve chi nyoho cha vaha cha catyí chi ra David.”

³⁵ Yucuan chaha catyí tucu nu inga salmo tyehe caa. “Ma cuhvon cha tyahyu coño ñuhu Sehe iun”, catyí chi.

³⁶ Ra David sacuví ra tyiño nuu ñu cha chiyo quívi chiyo ra, yoso cuhva cha catyí Nyoo chi ra tyi sacuví ra. Yahá cuan ta chihí ra ta chicuchí ñu chi ra tari chicuchí ñu chi sutu ra. Ta tyahyu coño ñuhu ra. ³⁷ Soco ra cha sanandoto Nyoo chi, ña tyahyu coño ñuhu ra. ³⁸ Yañi, cuñí chi coto ndo vatyí cha cuenda cha chihí ra Jesús tyiño nuu yo, Nyoo sahá ra ticahnu iñi cuatyí yo. ³⁹ Ta cha cuenda ra Jesús sahá Nyoo ticahnu iñi chi tandihí ñu cha chinó iñi chi ra, tyi ley ra Moisés ña cuví sacuvaha chi yo nuu Nyoo. ⁴⁰ Saha ndo cuenda coto ndoo siqui ndo cha catyaa ra profeta Nyoo nu catyí ra tyehe caa:

⁴¹ Nyehe nyoho, ra chacú nyaá, tahán chi cha iyo cuñi ndo ta cunaa ndo. Vatyí yuhu cuví Nyoo, ta sacuví minoo cha cahnu quívi cha iyó ndo vityin.

Soco ma chino iñi ndo tandihí cha sacuví yuhu vasi nacatyí ñáyiví chi ndo, catyí Nyoo.

⁴² Ndihi cahan ra Pablo ta cuaquita ra chata vehe ñuhu cuan chihin ra tahan ra. Tyicuan ta ñu cha ñima ñu Israel cuví quichaha catyí ñu chi ra, vatyí na cahan tucu ra tuhun ihya chihin ñu inga vitya quívi cha nyitatu ñu. ⁴³ Cuhva cha ndihí ndu ñn ri ñu, cuaha xaan ñu Israel ta ñu cha yihí cuenda ñu Israel, cachinyicon ñu chi ra Pablo ta chi ra Bernabé. Ta chaha ra tuhun chi ñu vatyí na cahun ca ñu ityí nuu ca chihin Nyoo. Ta naquehen vaha ñu tumañi iñi cha chahá Nyoo chi ñu. ⁴⁴ Cha inga vitya quívi nyitatu ñu, ndu ñn ri ñu. Ta cha vatyin cha tandihí ñáyiví ñuu cuan ndu ñn ri ñu vatyí cuñi ñu tuhun Nyoo. ⁴⁵ Soco cuhva cha canyehe ra Israel, cuxaan ra vatyí nyehe ra vatyí cuaha ñáyiví nyicón chi ra cuan. Ta quichaha cacuví yuhu ra chihin ra Pablo, ta cacahan ra chi ra. ⁴⁶ Soco ña yuhví ra Pablo ta ra Bernabé. Ta quichaha cacatyí ra chi ra:

—Cuñi chi cha cahan xihna ndi tuhun Nyoo chihin nyoho cha cuví ndo ñu Israel. Soco ña cuñi ndo naquehen ndo. Ta cuñi maa ndo vatyí ña naña ndo cha ñihi ndo ñáyivi chaa cha ma naa ca maa. Yucuan chaha cuhun ndi cucahan ndi chihin ñu cha ñima ñu Israel cuví. ⁴⁷ Vatyí tyicuan caa tachí Sutu Mañi yo chi ndi ta catyí ra tyehe caa:

Tyaj chuun tari ñuhu chi ñáyivi nicahnu ñuhu ñáyivi.

Tacuhva vatyí cusañahun ityi chi ñu yoso caa cacu añima ñu, catyí Nyoo.

⁴⁸ Cuhva cha cachiñi ra cha ñima ra Israel cuví, ndusiñi cuñi ra. Ta quichaha catyí ra vatyí tuhun Nyoo vaha xaan. Ta nachino ñi tandihí ñu cha nacachi maa Nyoo chii, vatyí coo ñu ñáyivi chaa cha ma naa ca maa. ⁴⁹ Ta tyicuan caa chitya tuhun Nyoo tandihí ityi ñuu cuan. ⁵⁰ Soco ra Israel cacahan ra chihin suhva ñusiñi tyayí cha nyicón ley ra Moisés. Catyí ra chi ñu vatyí ña vaha tuhun cahan ra Pablo. Ta cahan tucu ra chihin ra cuví nuu chi ñuu cuan. Ta yucuan cuví nu quichaha chica nyicon ñu chi ra Pablo ta chi ra Bernabé, nyacua nya cha tava ñehe ñu chi ra ñuu cuan. ⁵¹ Tyicuan ta canaquisi ra ñiyaca chaha ra tari noo seña vatyí ndoo cuatyí ñáyivi cuan siqui maa ñu. Ta cuahan coyo ra ñuu Iconio. ⁵² Soco ñu yíhi cuenda Nyoo ñuu Antioquia cuan si xaan cacuví chi ñu. Ta tyitu ñu chihin Tatyí Ii.

14

Nu ñohó ra Pablo ta ra Bernabé ñuu Iconio

¹ Ñohó ra Pablo ta ra Bernabé ñuu Iconio. Ta caquiñvi ra chichi vehe ñuhu ñu Israel. Ta vaha xaan cacahan ra tuhun Nyoo chihin ñáyivi. Ta cuaha xaan ñu nachino ñi ñu chi ra Cristo, ñu Israel ta ñu cha ñima ñu Israel cuví ñandihí. ² Soco ra Israel cha ña chinó ñi chi ra Cristo catiyuhú ra chi ñu cha ñima ñu Israel cuví vatyí caca ña vaha ñi ñu nyehe ñu chi ra yíhi cuenda ra Cristo. ³ Yucuan chaha

ra Pablo ta ra Bernabé candoo ra yucuan cuaha quivi. Ta chihin cha ñi ñi ra cacahan ra tuhun ra Cristo. Ta chinó xaan ñi ra chi Sutu Mañi yo. Ta Sutu Mañi yo tyinyee ra chi ra cha cacahan ra tuhun ra yoso caa cuñi ra chi yo. Ta chaha Sutu Mañi yo cha casacuvi ra seña ta milagru tacuhva coto ñáyivi tyi ndicha cha cahan ra. ⁴ Soco ñáyivi ñuu, ña ñi ri cuví ñu. Yíhi ñu cuahan ñu tumañi ñi chi ra Israel. Ta inga tucu ñu cuahan ñu tumañi ñi chi ra apóstol. ⁵ Tyicuan ta ra Israel ta ra cha ñima ra Israel cuví, catyihí tahan ra tuhun chihin ra cuví tyiño, vatyí cahan ña vaha ra siqui ra, ta catuchi ra yuu chi ra. ⁶ Soco ra Pablo ta ra Bernabé ñihí ra tuhun vatyí cusacuvi ra tyicuan caa, ta cuahan coyo ra nya ñuu Listra, ta nya ñuu Derbe ityi Licaonia. Ta cachica noo ra ityi cuan. ⁷ Ta cacahan tucu ra tuhun Nyoo yoso caa sacacu ra añima yo.

Nu cañi ñáyivi yuu chi ra Pablo nya ñuu Listra

⁸ Nya Listra iyó noo rayi cha pehe chaha. Ta nya ndaha cacu ra ta ña cuví caca ra. Vatyí pehe ñanduvi chaha ra. ⁹ Ta suri maa ra pehe chaha cuan tyasohó vavaha ra nu cahan ra Pablo. Ta ra Pablo, tuví ñi ra vatyí chinó ñi ra cuan vatyí cuví nduvaha ra. ¹⁰ Tyicuan ta ra Pablo cahan ra chihin cha chaa ndusu ra, ta catyí ra: —Ñicuinyaa ndoo —catyí ra Pablo chi ra.

Ta ra cuan, noo ri caña ndava ra, ta ñicuinyaa ra. Ta quichaha chica ra. ¹¹ Cha nyehé ñáyivi cha sacuvi ra Pablo, quichaha cana chaa ñu chihin sahan Licaonia, ta catyí ñu:

—Nyoo cha tari caá rayi chaa coyo nu nyicú yo —catyí ñu.

¹² Ta catyí ñu tyi ra Bernabé cuví ra noo nyoo cha nañi Júpter, ta ra Pablo cuví nyoo cha nañi Mercurio, vatyí ican ra cuví ra cahan. ¹³ Ta iyó noo tata sutu cuenda Júpter cuan, saha cumí ra vehe ñuhu cha nyaá yuhu ñuu ri cuan. Ta quichi nyaca ra toro ta ita vatyí maa ra ta ñáyivi cuñi ñu sacahnu ñu chi ra Pablo ta

chi ra Bernabé. Ta cuacahñi ñu toro tyi cuacuhva cuenda ñu chi ra, vatyí cuñi ñu tyi nyoo cacuví ra. ¹⁴ Soco cuhva cha catuví iñi ra apóstol, ra Bernabé ta ra Pablo, cha chicá xiñi ñu, quichahā chahnyā ra sahma ra. Ta casacuví ra tyicuan caa tari noo seña vatyí ña ndoó ra vaha. Ta quihvī coyo ra mahñu nu tuvi ñáyiví, ta cacana chaa ra, ¹⁵ ta catyí ra:

—Nyoho tata, ¿ñáá tuhun cha nyacuví ndo tyehe caa? Nyuhu rayi ri cuví ndi tari maa ndo. Ta vachi ndi vatyí catyí ndi chi ndo vatyí na saña ndo cha sacuvi ndo tyehe caa. Vatyí ña chiñuhu maa cha tyehe caa. Ta na cunyicon ndo chi Nyoo nyitó. Vatyí ican ra savahā andiví ta ñuhu ñáyiví. Ta savahā ra tyañuhu ta tandihí cha iyó chichi tyañuhu cuan. ¹⁶ Ta tyiembu chahnu ta nya vityin, Nyoo saña ndaha ra chi ñáyiví na sacuvi maa ñu yoso cuhva cuñi ñu, ¹⁷ vasi tyicuan ri sañahá ra chi ñu yóo ra cuví ra, chihin cha vaha cha sacuví ra. Maa ra sacoón ra savi nu canyicú yo. Chahá ra cha vaha coo tyiño saha yo quiví tahan chi. Ta chahá ra cachi yo. Ta chahá ra cha cusí cuñi añima yo —catyí ra Pablo chi ñu.

¹⁸ Soco vasi catyí ra tyicuan caa, yíi xaan ta chasi ra cha cahñi ñu toro cuan, vatyí cuñi ñu sacahnu ñu chi ra chihin cuan.

¹⁹ Tyicuan ta chaā coyo suhva ra Israel, ra ña chinó iñi chi ra Cristo, ra ñuu Antioquía, ta ra ñuu Iconio. Ta tyiyuhū ra chi ñáyiví, ta catyí ra vatyí na tuchi ñu yuu chi ra Pablo. Ta tyicuan caa sacuví ñu. Ta cuñi maa ñu vatyí cha chihí ra. Ta xita quiño ho ñu chi ra ityi chata ñuu. ²⁰ Soco candu iñi ri ra cayihí cuenda Nyoo nu catuví ra Pablo. Ta ndicuitā ri ra. Ta quihvī ra inga chaha chichi ñuu. Ta cha inga quiví cuahan ra ñuu cha nañí Derbe ta cuahan ra Bernabé chihin ra.

²¹ Ta cahan tucu ra tuhun Nyoo nya ñuu Derbe yoso caa sacacu Nyoo añima yo. Ta cuaha ñáyiví nacuhva ñu chi ñu chi Nyoo. Yaha cuan ta cuanuhu coyo ra ityi quichi ra. Ta

yahā ra ñuu Listra ta ñuu Iconio inga chaha, ta nachaa ra nya Antioquía. ²² Ta tandihí ñuu cuan sanduní ca ra iñi ñu yihí cuenda Nyoo. Ta catyí ra chi ñu na cuhun ñu ityi nuu ca chihin cha chino iñi ñu Nyoo. Ta catyí tucu ra chi ñu vatyí tatu cuñi yo cha cunyacá ñaha Nyoo chi yo, cuñi chi cha nyehe yo tindoho. ²³ Ta canatyisō ra chi ra ca quihí ndaha chi ñu yihí cuenda Nyoo noo noo vehe ñuhu. Ta cananducu ra Nyoo chihin cha ña chachí ra xita ta cachican tahvi ra chi Nyoo cha cuenda ra. Yaha cuan ta catyí ra chi ra:

—Chino iñi ndo chi Sutu Mañi yo. Maa ra na cocumi ra chi ndo —catyí ra chi ra.

Nu cuanuhu coyo ra Pablo ta ra Bernabé Antioquía ityi Siria

²⁴ Yaha cuan ta yaha coyo ra Pablo ta ra Bernabé ityi Pisidia, ta chaā coyo ra ityi Panfilia. ²⁵ Cacañan ra tuhun Nyoo ñuu Perge. Yaha cuan ta chahan ra ñuu Atalia. ²⁶ Yucuan quihvī coyo ra chichi noo barcu ta cuanuhu coyo ra Antioquía. Yucuan cuví ñuu nu natyaa ñu chi ra ndaha Nyoo tyi cusacuvi ra tyiño nuu ra, ta vityin cha nachaa coyo ra. ²⁷ Cuhva cha nachaa coyo ra Antioquía sandu iñi ri ra chi ñu yihí cuenda Nyoo. Ta nacatyí ra chi ñu tandihí cha sacuví Nyoo chihin ra. Ta yoso caa nuña Sutu Mañi yo ityi vatyí chinó tucu iñi ñu cha ñima ñu Israel cuví. ²⁸ Ta naha xaan ndoō ra Pablo ta ra Bernabé chihin ñu yihí cuenda Nyoo ñuu cuan.

15

Nu casandaa ra apóstol tyiño nya Jerusalén

¹ Nyaá ca ra Pablo ta ra Bernabé Antioquía, ta chaā coyo ra quita coyo ityi Judea. Ta quichahā sañahá ra chi ra yihí cuenda Nyoo. Ta catyí ra vatyí cuñi chi sacuvi ra costumbre circuncisión tari cuhva catyí ra Moisés, tyicuan ta cacu ra. ²⁻³ Ta ñihi xaan cañan ra Pablo ta ra Bernabé

chihin ra cuan cha cuenda cuan. Tyicuan ta catyiso ñu hermano Antioquía cuan chi ra Pablo ta ra Bernabé chihin suhva ca ra vatyí cuhun coyo ra Jerusalén. Vatyí cusandaa ra tyiño ihya chihin ra apóstol ta ra yihí ndaha ñu nyicu vehe ñuhu ñuu Jerusalén cuan. Tyicuan ta cuahan coyo ra. Ta ityi cuahan ra, yaha ra ityi Fenicia ta Samaria. Ta canacatyí ra chi ñu yihí cuenda Nyoo yoso caa saña ñu cha ñima ñu Israel cuví tuhun chahnu cha chingo iñi ñu. Vatyí nacuhvá cuenda ñu chi ñu chi Nyoo. Ta tandihí ñu hermano cusí xaan cuñí ñu cha chitó ñu tuhun cuan.

⁴ Quiví chaa coyo ra Pablo ta ra Bernabé Jerusalén, cuahan ra nu ndu ñin ri ñu yihí cuenda Nyoo. Ta tandihí ñu chihin ra apóstol, ta ra yihí ndaha chi ñu, chaha ñu lugar chi ra. Ta canacatyí ra tandihí cha sacuví Nyoo chihin ra. ⁵ Soco suhva ra fariseo cha cachinó iñi chi ra Cristo, nicuinanyaa ra ta catyí ra:

—Tandihí ra cha ñima ra Israel cuví ta chinó iñi ra chi ra Jesús, niñi cuñí chi cha sacuvi ra costumbre circuncisión. Ta cuñí tucu chi cha sacuví ra cuhva catyí ley cha tyaa ra Moisés —catyí ra.

⁶ Tyicuan ta candu ñin ri apóstol ta ra yihí ndaha chi ñu vehe ñuhu vatyí candatuhun vaha ra tuhun cuan. ⁷ Cha yaha cha cuviyuhu vavaha ra ta ndicuita ra Pedro, ta catyí ra:

—Yañi, chitó ndo vatyí chichi cha tandihí yo cachi Nyoo chi yuhu ra ndahvi quiví cuan, vatyí cahin tuhun yoso caa cacu añima yo chihin ñu cha ñima ñu Israel cuví, vatyí nachino iñi ñu chi Sutu Mañi yo. ⁸ Ta Nyoo, ra chitó añima tandihí ñáyiví, sañaha ra chi yo vatyí cuñí ra chi ñu cuan. Ican tuhun chaha ra Tatyí Ii ra chi ñu, tari chaha ra chi yo. ⁹ Nyoo ña sahá ra tyi vaha ca yoó cha nuu ñu cuan. Soco sanduvií tucu ra añima maa ñu cha cuenda cha chinó iñi ñu chi ra.

¹⁰ Vityin nacaca xiñi yo cuhva cuñí Nyoo. Vatyí ña vaha cha tyisó yo ley ra Moisés siqui ñu. Vatyí niri maa sutu chahnu yo ta niri maa yo ta ña cuví

naquehen vaha yo ley cuan. ¹¹ Ñima tyicuan caa cacú yo. Yoó chitó yo vatyí cacú yo chihin tumañi iñi cha sacuví Sutu Mañi yo Jesús chihin yo. Ta tyicuan caa tucu ñu cuan —catyí ra Pedro chi ra.

¹² Tyicuan ta taxi ri cacuví tandihí ra. Ta tyasohó ra tuhun cahan ra Bernabé ta ra Pablo. Vatyí canacatyí ra seña ta milagru cha sacuví Nyoo nu cacahan ra tuhun Nyoo nu nyicú ñu cha ñima ñu Israel cuví. ¹³ Cuhva cha ndihí cahan ra, quichaha cahan ra Jacobo, ta catyí ra:

—Nyoho yañi, cuiñi ndo tuhun cahín. ¹⁴ Cha nacatyí ra Simón Pedro chi yo yoso caa quichaha chaha Nyoo tumañi iñi chi ñu cha ñima ñu Israel cuví. Vatyí cachi tucu ra chi suhva ñu vatyí cuvi ñu noo ñáyiví cuenda ra. ¹⁵ Ta ñin ri nanduvi tuhun ihya chihin tuhun cha cahan ra profeta cuenda Nyoo ta cha naha, tari cuhva nyaa nu tutu Nyoo tyehe caa:

¹⁶ Yaha tandihí tuhun ihya cuquichi tiqui nu nyaá ndo.

Quiví chiyo ra David, vaha sacahnu ñáyiví chii.

Soco yaha cuan sandihí ñu tuhun cha sacahnu ñu chii.

Soco cuquichi tiqui ta tari cha cuna-coñehi vehe ñuhu ra David inga chaha.

Vatyí cusacahnu tucu ñáyiví chii.

¹⁷ Tacuhva cuví nanducu tandihí ca ñáyiví chii, tandihí ñu cha ñima ñu Israel cuví cha chicán tahvi chihin sívi.

¹⁸ Tyicuan caa catyí Sutu Mañi yo ta sañaha ra tuhun ihya chi ñáyiví chiyo ta cha naha ta chi ñáyiví cha iyó vityin.

¹⁹ Yucuan chaha catyí yuhu vatyí ña vaha sayanga yo chi ñáyiví cha ñima ñu Israel cuví cha sandoo ñu tuhun cha chiyo ñu ta quihvi ñu cuenda ra Cristo. Ña vaha catyí yo tyi cuñí chi cha quichaha ñu ley chahnu.

²⁰ Vaha ri maa chihin cha sacuhun yo tutu chi ñu. Ta catyí yo chi ñu vatyí ma cachi ñu coño cha chaha cuenda ñáyiví chi xitohyo. Ta ni noo ñu ta ma coo ri maa ñusihí o rayí chi ñu,

tatu ñima ñasihí o yíi ñu cuví. Ta ma cachi ñu coño quití chihí cha cava ñu sucun ta ña chatí ñiñi. Ta ma cachi ñu ñiñi. ²¹ Vatyí nyata tyembu ta chiyo ra cha sañahá ley ra Moisés vehe ñuhu ñu Israel ta sañaha ra tuhun cuan tahan tahan ñuu. Ta tahan uña quivi quivi nyitatu ñu, sacuahá ra tuhun cha tyaa ra Moisés —catyí ra Jacobo chi ra.

²² Tyicuan ta ra apóstol ta ra cayihí ndaha chi ñu nyicú vehe ñuhu chihin tandihí ñu yihí cuenda Nyoo nacachí ñu chi suhva ra. Ta yaha cuan ta tachí ñu chi ra vatyí cuhun ra Antioquía chihin ra Pablo ta ra Bernabé. Ta ra cha canatyiso ñu ican cuví ra Judas cha nañí Barsabás, ta ra Silas. Ican ra cacuví ra ra cananyisó tyiño vehe ñuhu ñuu Jerusalén cuan. ²³ Ta chihin ra tachí ñu noo carta. Ta catyí carta cuan tyehe caa:

“Nyuhu ra apóstol, ta ra yihí ndaha chi ñu nyicú vehe ñuhu ta yañi ndo cuenda Nyoo, tandihí ri ndi chahá ndi nocumi chi nyoho cha ñima ra Israel cuví ndo vatyí yañi ndi cuví chi ndo vasi ñima ñu Israel cuví ndo. Tandihí ri ndo cha iyó ndo Antioquía ta nyoho ñu Siria, ta ñu Cilicia ñandihí, sacuhún ndi carta ihya chi tandihí ri ndo. ²⁴ Chitó ndi vatyí quita suhva ra ityi nu nyicú ndi ihya. Ta cuahan ra nu nyicu ndo. Soco ña catyí nyuhu chi ra tyi cuhun ra cusayanga ra chi ndo chihin tuhun cahan ra. Satondo ra cuan xiñi ndo vatyí catyí ra chi ndo tyi cuñí chi cha sacuví ndo costumbre circuncisión ta naquehen vaha ndo ley ra Moisés. Soco ñima nyuhu catyí tyi cuhun ra cucatyí ra chi ndo tyicuan caa. ²⁵ Yucuan chaha ndu ñin ri ndi ta nacachí tahan tuhun cahan ndi ta vaha cuñí ndi cha tachí ndi chi ra hermano ihya chihin ra Pablo ta ra Bernabé nu nyicu ndo. ²⁶ Nduvi tahan ra ihya nyehé xaan ra tindoho cha cuenda Sutu Mañi yo. Ta vasi cuñí ñáyivi cahñi ñu chi ra soco ña sandihí ra tuhun cha sacoto ra tuhun Sutu Mañi yo Jesucristo. ²⁷ Ta yucuan chaha tachí ndi chi ra Judas ta chi ra Silas. Ta maa ra cuahan ra chihin yuhu ra chihin ndo, vatyí nacatyí ra

tandihí cha tyaa ndi nu tutu ihya. ²⁸ Vatyí ñiri Tatyí li ta ñiri nyuhu ta ña cuñí ndi tyiso ca ndi carga siqui ndo, soco ihya ri cha ñiñi ca tahán chi cha naquehen vaha ndo. ²⁹ Ma cachi ndo coño cha chahá cuenda ñu chi xitohyo. Ta suri ma cachi ndo ñiñi, ni coño quití cha chihí ta ña chatí ñiñi ti. Ta ma coo ñusihí o rayíi chi ndo tatu ñima ñasihí ndo o yíi ndo cuví. Tatu ma sacuvi ndo tyicuan caa, vaha xaan cuaco ndo. Ta Nyoo na cocumi ra chi ndo”, catyí ra nu carta cuan.

³⁰ Ta cuahan coyo ra cha catachi ra chi cuan. Ta chaá coyo ra Antioquía. Ta sandu ñin ri ra chi tandihí ñu, ta nacuhva cuenda ra carta cuan. ³¹ Cuhva cha sacuahá ñu carta cuan ndusi xaan cuñí ñu vatyí vaha xaan cahán chi. ³² Ta ra Judas ta ra Silas cuví tucu ra cuan profeta cuenda Nyoo. Ta sandunií ra ñiñi ra hermano chihin tuhun cahan ra. ³³ Ta cha yahá chinyicu ra cuan suhva quivi ta cuanuhu coyo ra nya nu nyicú ñu catachi chi ra. Ta tandihí ñu yihí cuenda ra Cristo catyí ñu vatyí na cuhun vaha ra. ³⁴ Soco ra Silas natyaa ra cuhva vatyí cundoo ra. ³⁵ Ta ra Pablo ta ra Bernabé candoo tucu ra Antioquía yucuan. Ta maa ra chihin cuaha ca ra casañahá ca ra chi ñáyivi. Ta cacahan ca ra tuhun Sutu Mañi yo chihin ñu.

Nu cu uvi chaha cuahan ra Pablo tuhun Nyoo ta nu cusin ra chihin ra Bernabé

³⁶ Ta cha yahá suhva quivi ta catyí ra Pablo chi ra Bernabé:

—Coho inga chaha cunyehe yo nu nyicú ñu yihí cuenda ra Cristo tandihí ri ñuu nu cahan yo tuhun Sutu Mañi yo. Vatyí nyehe yo yoso caa canyicu ñu —catyí ra chi ra.

³⁷ Ta ra Bernabé cuñí ra cha cuhun tucu ra Juan Marcos chihin ra. ³⁸ Soco ra Pablo ña tahán ñiñi ra cha cuhun ra Juan chihin ra, vatyí sandoo ra chi ra nya Panfilia quivi cuan. Ta ña chahan ca ra chisaha tyiño ra chihin ra. ³⁹ Ta ña chitahan ñiñi ni noo ra, ta cacusin ra. Ra Bernabé cuahan ra chihin ra Juan Marcos. Ta quihvi ra

chichi noo barcu ta cuahan coyo ra Chipre. ⁴⁰ Ta ra Pablo cachí ra chi ra Silas. Ta cha yaha chican tahvi ra hermano chi Nyoo na tyinyee ra chi ra, ta cuahan coyo ra. ⁴¹ Ta yaha ra ityi Siria, ta ityi Cilicia, ta sanduní ca ra iñi ñu yihí cuenda Nyoo noo noo ñuu.

16

Nu cuahan ra Timoteo chihin ra Pablo ta ra Silas

¹ Ra Pablo ta ra Silas chaá coyo ra ñuu Derbe, ta ñuu Listra. Ta yucuan nañihí ra chi noo ra yihí cuenda Cristo. Nañí ra Timoteo. Ta sihi ra cuví ña noo ñaha Israel. Ta suri yihí tucu ña cuenda ra Cristo. Soco sutu ra ra Grecia cuví ra. ² Vaha xaan chicá ra Timoteo chihin Nyoo catyí ñu yihí cuenda Cristo ñuu Listra ta ñuu Iconio. ³ Ta ra Pablo cuñí ra cha cuhun ra Timoteo chihin ra. Ta saha ra circuncidar chi ra Timoteo. Vatyí coto ma cuiñi ñu Israel cha iyó ityi cuan tuhun ra Cristo cha cahán ra. Vatyí tandihí ñu chitó ñu vatyí sutu ra cuví ra ra ñuu Grecia. ⁴ Tyicuan ta cuahan coyo ra noo noo ñuu. Ta nacatyí ra chi ñu yihí cuenda ra Cristo tuhun cha chaha ra apóstol ta ra yihí ndaha chi ñu nyicu vehe ñuhu Jerusalén chi ra. ⁵ Ta tyicuan caa ta nduní ca iñi ñu yihí cuenda ra Cristo ta chino ca iñi ñu chi Nyoo. Ta tahan quiví ta cuahan nducuaaha ca ñu.

Nu nyehé ra Pablo noo visión chi noo ra Macedonia

⁶ Ña chaha Tatyí li cha cahan ra tuhun Nyoo ityi Asia. Yucuan chaha yaha sava ra ityi Frigia nu iyó xahñi ñuhu chihin ityi Galacia. ⁷ Ta chaá coyo tucu ra ityi Misia. Ta cuñí tucu ra cuhun coyo ra ityi Bitinia, soco Tatyí li ra Jesucristo ña chaha cuhun coyo ra. ⁸ Tyicuan ta nya sava ri yaha ra ñuu Misia ta cano coyo ra ñuu Troas cha nyaá yuhu tyañuhu. ⁹ Cañohó ra ñuu Troas cuan, ta noo cha cuaa nyehe ra Pablo noo visión. Nyehe ra chi noo rayí ityi Macedonia. Nanyaá ra ta chacú ndahvi ra

nuu ra, ta catyí ra chi ra: “Ñaha, vatyí tyinyeun chi ndi”, catyí ra. ¹⁰ Ta cha nyehe ra Pablo visión cuan, yuhu ra Lucas chihin ra Pablo ta inga ra sanduvaha ndi chi ndi ta cuahan ndi nya Macedonia cuan. Vatyí chitó vaha ndi vatyí Nyoo cana chi ndi, vatyí cahan ndi tuhun ra yoso caa sacacú ra añima yo chihin ñáyiví ityi cuan.

Nu ñohó ra Pablo ta ra Silas ñuu Filipos

¹¹ Quihví ndi noo barcu ñuu Troas. Ta chahan ndoo ityi ri ndi nya Samotracia noo ñuhú luhlu iyó mahñu tyañuhu. Ta cha inga quiví chaá ndi ñuu Neápolis. ¹² Ta yucuan quita ri ndi ta cuahan ndi ñuu Filipos cha cuví noo ñuu cuenda ñu Roma. Ta cuví chi noo ñuu cahnu ca cha nuu tandihí ñuu ityi Macedonia cuan. Ta yucuan chinyicu ndi suhva quiví. ¹³ Noo quiví cha nyitatu ñáyiví ta quita ndi ityi chata ñuu, vatyin noo yutya nu tuhvá ñu chican tahvi ñu chi Nyoo. Chicun-yaá ndi yucuan ta cahan ndi tuhun Nyoo chihin ñusihí cha candu in ri yucuan. ¹⁴ Noo ñaha nañí ña Lidia. Ta ñuu ña cuví Tiatira. Ta tuhvá ña xico ña sahma finu, tyacu nyaa. Yucuan cuví tyiño sahá ña. Ta sacahnú ña chi Nyoo tari ñu Israel. Ta chiñí ña cha cahán ra Pablo. Ta Nyoo nuña ra añima ña na quichaha ña cha cahan ra. ¹⁵ Ta condutyá ña chihin ñáyiví chi ña. Ta yaha cuan ta chacú ndahvi ña nuu ndi, ta catyí ña:

—Tatu nyehé ndo vatyí ndicha cha chinó iñi chi Sutu Mañi yo, ñaha ndo, ço ndo vehi —catyí ña chi ndi.

Ta saniñí ña chi ndi cha ndoo ndi vehe ña.

¹⁶ Ta cuví noo chaha cha cuahan ndi nu chicán tahvi ndi. Ta cha niri ca cha cuahan ndi, tahan ndi chi noo ñaha tyivaa. Yihí noo tatyí ña vaha chi ña. Yucuan chaha cuví nacoto ña ñáá ndihí cha cucuvi ityi nuu. Ta cuví ña noo ñaha iyó chitoho. Ta cuaha xaan xuhun sahá ganaa ña cuenda chitoho ña, vatyí cuví nacotó ña. ¹⁷ Ta ñaha tyivaa cuan quichaha nyicon ña chi

ndi, ta chi ra Pablo ñandihí. Ta cana chaa ña ta catyí ña:

—Rayí ihya ra casacuví tyiño nuu Nyoo cahnu cuví ra. Ta cahán ra tuhun yoso caa cuví cacu añima yo —catyí ña.

¹⁸ Cuaha quiví sacuví ñaha tyivaa cuan tyicuan caa. Tyicuan ta ra Pablo ña cunyeē ca iñi ra, ta nanyocava ra ta catyí ra chi tatyí ña vaha cha yihí chi ña:

—Chihin siví ra Jesucristo catyí chuun vatyí quíton chi ñaha tyivaa ihya —catyí ra.

Ta tatyí ña vaha cuan quita chi chi ña caa cuhva ri cuan.

¹⁹ Soco cuhva cha canyehe chitoho ña vatyí ma cuví ca saha ganaa ra xuhun chihin ña, catiñ ra chi ra Pablo ta ra Silas chinyaca ra chi ra nya vehe tyiño. ²⁰ Ta cachican ra cuatyí chaha ra nuu ra cacuví tyiño. Ta catyí ra:

—Ra Israel ihya sanaquiquí ra chi ñáyiví ñuu yo. ²¹ Ta sañahá ra costumbre cha ña cuví naquehen yo, niri ña cuví sacuvi yo vatyí ñu cuenda ñuu Roma cuví yo —catyí ra.

²² Tyicuan ta nduxaan ñáyiví chi ra Pablo ta ra Silas. Ta ra cacuví tyiño cuan chahnya ra sahma ra Pablo ta ra Silas ta tachí ra tyiño nacañi ra chi ra chihin yutun. ²³ Cha yaha cha cañi vavaha ra chi ra, ta catyihí ra chi ra vehe caa. Ta tachí ra chi ra sahá cumi chi ra na saha vaha ra cuenda chi ra. ²⁴ Cuhva cha quehen ra sahá cumi cuan tuhun, tyihí ra chi ra nya chichi cuii vehe caa. Ta tyihí vaha ra chaha ra ticu vitu. ²⁵ Soco ñáá cuhva hora ñuu cuan cachitá vavaha ra Pablo ta ra Silas. Ta cachicán tahvi ra chi Nyoo. Ta ra cañohó vehe caa cuan catyasohó ra. ²⁶ Ta saná iñi ra ta quichí noo cha taan ñihi vavaha. Ta naquisí chi cimientu vehe caa cuan, ta caa cuhva ri cuan nuña tandihí yuvehe, ta ndachi cadena tandihí ra ñohó vehe caa cuan. ²⁷ Ta cha ndoyo ra sahá cumi cuan, nyehe ra vatyí tacoho yuvehe. Tyicuan ta tava ra mityi ra vatyí cahñi maa ra chi ra. Vatyí chicá xiñi ra vatyí ndihí ra ñohó

vehe caa cuan cachino. ²⁸ Soco ra Pablo cana chaa ra chi ra, ta catyí ra:

—Ma cahñun chuun, vatyí tandihí ndi nyicú ndi ihya —catyí ra chi ra.

²⁹ Tyicuan ta ra sahá cumi cuan chican ra noo ñuhu. Ta quicono ra quihví ra nu cañohó ra. Ta nihí ra chihin cha yuhví ra. Ta chicuiñi chiti ra nuu ra Pablo ta ra Silas. ³⁰ Numi ri tava ra chi ra nu ñohó ra yucuan. Ta ndacá tuhun ra chi ra ta catyí ra:

—¿Nyoho Tata, yoso caa sacuvi ta cacu añime? —catyí ra chi ra.

³¹ Ta ra cuan canacahan ra ta catyí ra:

—Chino iñi chi Sutu Mañi yo Jesucristo ta cacun, maun ta ñáyiví chuun ñandihí —catyí ra.

³² Ta cacahan ra tuhun Sutu Mañi yo chihin ra ta chihin tandihí ñu nyicu vehe ra. ³³ Ta suri maa cha cuaa cuan ra sahá cumi vehe caa cuan nacatya ra nu cahvi chi nduvi tahan ra nu cañi ra chi ra. Yaha cuan ta maa ra ta tandihí ñáyiví chi ra condutya ñu suri cha cuaa cuan. ³⁴ Tyicuan ta chinyaca ra chi ra nya vehe ra. Ta chaha ra cha cachi ra. Ta maa ra chihin ñáyiví chi ra si xaan cuñi ñu vatyí chinó iñi ñu chi Nyoo. [Tyicuan ta cuanuhu coyo ra nya vehe caa cuan coto cuxaan ra cuví tyiño chihin ra saha cumi chi ra.]

³⁵ Tuví inga quiví ta catachí ra cacuví tyiño chi policia nu nyaá ra sahá cumi cuan, ta catyí ra vatyí na saña ra chi ra Pablo. ³⁶ Tyicuan ta ra sahá cumi vehe caa cuan catyí ra chi ra Pablo:

—Chaa tyiño chii saha ra cuví tyiño, vatyí sañe chi ndo. Ican tuhun cha cuví quita ndo vityin —catyí ra chi ra.

³⁷ Soco ra Pablo catyí ra:

—Chi nyuhu cha cuví ndi ra cuenda ñuu Roma ican cañi ra nu tuvi. Ta ni ña cutuñi chi ndi tari cuhva tahán chi. Ta tyihí ra chi ndi vehe caa. Ta vityin cuñi ra saña xehe ra chi ndi. Soco ma cuví. Naquichi tava maa ra chi ndi —catyí ra Pablo chi ra sahá cumi cuan.

³⁸ Ta ra policia nacatya ra chi ra cacuví tyiño. Ta ra cuan cayuhvi ra

cuví cha cachitó ra vatyí ra cuenda ñuu Roma cuví ra Pablo. ³⁹ Ta chahan coyo ra chinandacan ra tichanu iñi chi ra Pablo ta chi ra Silas. Tyicuan ta catava ra chi ra ta cachacu ndahvi ra nuu ra na quita ra ñuu cuan. ⁴⁰ Ta cha quita coyo ra vehe caa, chahan coyo ra vehe cu Lidia. Ta yaha cuan ta chinyehe ra chi ra hermano ta sanduní ra iñi ra ta cuahan coyo ra.

17

Nu naquiqui ñáyivi ñuu Tesalónica

¹ Nu cuahan coyo ra Pablo ta ra Silas, cayaha coyo ra ñuu Anfípolis, ta ñuu Apolonia. Yaha cuan ta cha coyo ra ñuu Tesalónica nu nyaá noo vehe ñuhu ñu Israel. ² Ta chahan ra Pablo vehe ñuhu cuan tari cuhva tuhva maa ra chahan noo noo ñuu. Ta cahan ra tuhun Nyoo chihin ñáyivi chichi vehe ñuhu cuan uñi tahan quivi nyitatu ñu. ³ Quehen ra libru tuhun Nyoo ta sañaha ra tuhun ra Cristo chi ñu yoso caa catyí chi vatyí cunyehe ra tindoho ta cucúvi ra. Yaha cuan cunandoto ra. Ta catyí ra chi ñu vatyí suri maa ra Jesús cha cahan ra tuhun chihin ñu cuví ra Cristo.

⁴ Ta suhva ñáyivi Israel cuan nachino iñi ñu. Ta candu in ri ñu chihin ra Pablo ta ra Silas. Ta cachino tucu iñi cuaha ñu Grecia cha sacahnú chi Nyoo. Ta cuaha ñusihi tyayí ñuu cuan ñandihí. ⁵ Soco ra Israel cha ña chinó iñi, quiñi cacuñi ra cha nyehé ra vatyí nyicón ñáyivi chi ra Pablo. Ta sandu in ri ra chi noo ityi ra quiñi iyó cha cachicá noo yanga ri maa. Ta sanaquiqui ra ñuu cuan. Ta quihvi ra vehe ra Jasón, nanducú ra chi ra Pablo ta chi ra Silas, vatyí tava ra chi ra, ta nacuhva cuenda ra chi ra chi ñáyivi. ⁶ Soco cha cuenda cha ña nañihí ra chi ra Pablo ta ra Silas yucuan, ta quehen ra chi ra Jasón. Ta xita quiñoho ra chi ra ta chi suhva ca ra hermano ta cuahan coyo ra nuu ra cuví tyiño ñuu cuan. Ta cana cha ra ta catyí ra:

—Ra ihya cuví ra cachicá noo satondó chi tandihí ñáyivi nichanu ñuhu ñáyivi. Ta vityin cha coyo tucu

ra ihya. ⁷ Ta ra Jasón chiña chaha ra vehe ra cunyicu ra. Ta tandihí maa ra ña sahá ra ñáyivi chi ra cuví rey cahnu nya Roma. Vatyí catyí ra vatyí iyó nonga rey ta nañi ra Jesús.

⁸ Cha cachiñi ñu tuhun cuan, ñáyivi ta ra cacuví tyiño canaquiqui ñu. ⁹ Soco ra Jasón ta inga ra cachaha ra xuhun ta caquita yica ra.

Nu cuahan coyo ra Pablo ta ra Silas ñuu Berea

¹⁰ Ta suri cha cuaa cuan quivi cui ri casacuhun ra hermano chi ra Pablo ta ra Silas ityi ñuu Berea. Ta cha cha coyo ra yucuan ta chahan coyo ra vehe ñuhu ñu Israel. ¹¹ Ta ra Israel cha iyó ñuu Berea cuan vaha ca ñáyivi cacuví ra ta ñima ca ra Tesalónica. Vatyí chihin cha ñi iñi ra naquehen ra tuhun Nyoo. Ta ndiquivi nanducú ra nuu tutu Nyoo, nyehé ra tatu ndicha cha cacatyí ra Pablo ta ra Silas ta ra Timoteo chi ra. ¹² Yucuan chaha cuaha vavaha ñu nachino iñi ñu chi ra Cristo. Ta ñu Grecia nachino tucu iñi ñu cuan, tari ñusihi tyayí ta rayí ñandihí. ¹³ Soco cha cachito ra Israel cha ca iyó ñuu Tesalónica vatyí ra Pablo ñohó ra Berea cahan ra tuhun Nyoo, ta chahan coyo ra ta sanaquiqui ra chi ñáyivi yucuan. ¹⁴ Soco ra hermano numi cui ri tachí ra chi ra Pablo nya ityi yuhu tyañuhu. Soco ra Silas ta ra Timoteo cando ra Berea. ¹⁵ Ta ra cha cuahan coyo chihin ra Pablo chinyaca ra chi ra nya ñuu Atenas. Tyicuan ta cuanuhu coyo ra nya Berea cuanacuhva ra tyiño cha tachí ra Pablo chi ra Silas ta chi ra Timoteo, na sanumi ra ta cuhun ra nu nyaá ra.

Nu ñohó ra Pablo ñuu Atenas

¹⁶ Cha niri ca cha nyatú ra Pablo chi ra Silas ta ra Timoteo ñuu Atenas cuan quiñi cuñi añima ra cha nyehé ra vatyí cuaha xaan xitohyo iyó ñuu cuan. ¹⁷ Yucuan chaha cahan ra chihin ra Israel, ta chihin inga ra cha tuhva sacahnú chi Nyoo chichi vehe ñuhu cuan. Ta ndi quivi cahan ra chihin ñu cha nyicu nuyahvi ñandihí. ¹⁸ Ta ñihí tahan ra chihin ñu cha

sacuaaha tuhun sañahá noo ityi ñáyiví cha nañí ñu epicúreo. Ta ñihi tahan tucu ra chihin ñu cha sacuaaha tuhun sañahá ñáyiví estoico. Ta cacahan ñu chihin ra. Ta yihí ra catyí ra:

—¿Ñáá tuhun cahan xaan ra ihya? —catyí ra.

Ta inga ra catyí ra:

—Tuhun inga nyoo cahán ra ihya —catyí ra.

Tyehe caa catyí ra vatyí ra Pablo cahán ra tuhun ra Jesús, ta cahán tucu ra tuhun cha nandoto ñáyiví chihí. ¹⁹ Tyicuan ta chinyaca ra chi ra Pablo noo nu nañí Areópago, nu tuhva ra cacuvi tyiño ndu ñin ri ra. Ta cacatyí ra chi ra:

—Cuñí ndi coto ndi tuhun chaa cha vachi sañahún. ²⁰ Vatyí sacotón tuhun cha ña chitó ndi. Ta cuñí ndi coto ndi ñáá cha cuñí chi catyí tandihí tuhun ihya —cacatyí ra chi ra.

²¹ Vatyí tandihí ñu Atenas ta ñu inga ñuu cha iyó yucuan tahán xaan iñi ñu tyasoho ñu ta nacatyí ñu ñáá ndihí tuhun chaa.

²² Tyicuan ta ra Pablo nicuinaryaa ra mahñu nu nyicu ñu yucu Areópago, ta catyí ra:

—Nyoho Tata ñuu Atenas, yuhu nyehí vatyí chinó xaan iñi ndo chi cuaha nyoo. ²³ Vatyí chahin chinyehi nu tuhvá ndo savaha ndo culto. Ta nañihí noo arta nu nyaá letra cha catyí: “Cuenda Nyoo cha ña ñohó nuu yo”, catyí letra cuan. Nyoho sacahnú ndo chi Nyoo cuan vasi ña ñohó nuu ndo chi ra. Ican Nyoo cuan cuví cha cahín tuhun chihin ndo. ²⁴ Nyoo cha savaha ñuhu ñáyiví ta tandihí cha iyó siqui ñuhu ñáyiví. Chi maa ra cuví andiví ta ñuhu ñáyiví. Ta ña iyó ra chichi vehe ñuhu cha savahá ñáyiví. ²⁵ Ta ña itá iñi ra cha tyinyeé ñáyiví chi ra. Vatyí suri maa ra chaha ra ñáyiví coo tandihí yo. Ta chahá ra tatyí cha xitá yo. Maa ra chaha tandihí chi yo.

²⁶ Cha xihna ri savaha Nyoo chi noo tuhun ri rayí. Ta maa ra cuví sutu tandihí yo. Yucuan chaha noo ri niñi nyisó tandihí yo. Ta chaha Nyoo cha coo yo ñicahnu ñuhu ñáyiví. Cha ni

cumañi ca savaha ra chi yo ta catyí ra ñáá cuiya coo noo noo yo siqui ñuhu ñáyiví ihya. Ta catyí tucu ra nya cucoo noo noo yo. ²⁷ Tyicuan caa sacuvi ra vatyí tacuhva quichaha nanducu yo chi ra. Tari nanducú minoo ra cuaa noo cha nanducú ra chihin ndaha ra, vasi tyicuan caa ta cuvi nañihi yo chi ra. Soco cha ndicha, Nyoo ña cañi nyaá ra chihin noo noo yo. ²⁸ Vatyí cha cuenda Nyoo iyó yo ta candá yo. Tari catyí tucu noo ra ñuu ndo, vatyí catyí ra: “Ñáyiví chi Nyoo cuví chi yo”, catyí ra. ²⁹ Tatu ñáyiví chi Nyoo cuví yo, ña tahán chi caca xiñi yo vatyí Nyoo cuví ra noo xitohyo cha chino chihin xuhun cuaan, o xuhun cuichin, o chihin yuu vaha cha savahá ñáyiví cuhva chicá xiñi maa ñu. ³⁰ Nyoo sahá ra ticahnu iñi chi ñu chiyo ta cha naha, vatyí ña chitó ñu. Soco vityin catyí ra chi tandihí ñáyiví tandihí ri ityi vatyí na ndu uvi iñi ñu cuatyí ñu. ³¹ Vatyí Nyoo tyaa ra cuhva vatyí coo noo quiví cha cucutuñi chi ñáyiví iyó siqui ñuhu ñáyiví nuu noo ra cha nacachí vaha maa ra chi. Ta sañaha ra chi tandihí yo vatyí tyicuan caa cuví vatyí sanandoto ra chi ra cuan cha yaha chihí ra —catyí ra Pablo.

³² Cuhva cha chiniñi ñu tuhun cha nandoto ñu chihí, yihí ñu chacu nyaá ñu, ta inga ñu catyí:

—Quichun inga quiví ta cahun tuhun ihya chihin ndi —catyí ñu.

³³ Tyicuan ta cuahan ra Pablo. ³⁴ Soco yihí ñu chinyicon ñu chi ra, ta nachino iñi ñu chi Nyoo. Ta noo ra nañí ra Dionisio, ta cuví ra noo ra cuví tyiño ñuu cha tuhvá ndu ñin nya Areópago cuan. Ta noo ñaha sihi cha nañí Dámaris chino tucu iñi ña, ta inga tucu ñu ñándihí.

18

Nu ñohó ra Pablo ñuu Corinto

¹ Yaha cuan ta quita ra Pablo ñuu Atenas ta cuahan ra ñuu Corinto. ² Ta yucuan nañihí ra chi noo ra Israel tari maa ra. Nañí ra Aquila. Ta ñuu Ponto cacu ra. Ta maa ra chihin ñasihí ra,

cu Priscila quita ñu Italia. vatyi ra Claudio, ra cuví rey cahnu yucuan, tava ra tandihi ra Israel. Catyí ra na quita ra ñuu Roma. Ta ra Pablo cuahan ra nu nyaá ñu ñuu Corinto cuan. ³Ta ñin ri tyiño sacuví ra chihin ñu. Savahá ñu vehe sahma. Ta ndoo ra chihin ñu vatyi sahá tyiño ñu ñin ri. ⁴Ta quivi nyitatu ñu Israel tahan vitya, ra Pablo chahan ra vehe ñuhu ñu. Ta ndatuhun tahan ra chihin ñu Israel ta chihin ñu cha ñima ñu Israel cuví. Vatyi nducú ra cuhva cha chino iñi ñu chi ra Jesucristo.

⁵Ta quivi chaꝓ coyo ra Silas ta ra Timoteo cha quita ra Macedonia, ra Pablo sandoꝓ ra tyiño sahá ra ta ñin ri ca tyiño cha cahán ra tuhun Nyoo nicunyaꝓ ra. Ta catyi cachi ra chí ñu Israel vatyi ra Jesús cuví Cristo ra cha nyatú xaan ñu. ⁶Soco ñu cuan xaan cuñi ñu. Ta quichaha cahan ña vaha ñu siqui Sutu Mañi yo. Tyicuan ta ra Pablo naquisi ra sahma ra tari noo seña vatyi cuandoo cuatyí ñu siqui ñu. Ta catyí ra chi ñu:

—Cuatyí maa ndo cuví tatu cuhun ndo anyaya. Ñahri ca nyaá siqui. Vityin ta ityi nuu ca cuhin cucahin chihin ñu cha ñima ñu Israel cuví —catyí ra chi ñu.

⁷Ta quita ra vehe ñuhu cuan. Ta cuahan ra vehe noo ra cha nañi Justo. Noo ra cha sacahnú chi Nyoo. Ta nyaá vehe ra ityi xiin vehe ñuhu cuan. ⁸Ta noo ra cha nañi Crispo, ra cuví nuu vehe ñuhu cuan nachino iñi ra chí Sutu Mañi yo, ta ñáyivi chí ra ñandihí. Ta cuaha ca ñáyivi iyó Corinto cuan, cha yaha cha chiñi ñu tuhun cahán ra Pablo, nachino tucu iñi ñu chi ra Jesús, ta condutyꝓ ñu. ⁹Tyicuan ta noo cha cuaa nyehe ra Pablo noo visión. Ta cahan Sutu Mañi yo chihin ra, ta catyí ra:

—Ma yuhvun. Cahan ca tuhun ta ma sandihun cha cahun. ¹⁰Vatyi yuhu nyaí chuhun. Ta yori cuví satasi iñi chuun. Vatyi cuaha xaan ñáyivi nyaá sacaqui ñuu ihya —catyí Sutu Mañi yo chí ra Pablo.

¹¹Yucuan chaha ra Pablo ndoo ra noo cuiya sisava ñuu Corinto cuan. Sañahá ra tuhun Nyoo chí ñáyivi.

¹²Soco quivi cha cuví ra Galión gobernador nicahnu ityi Acaya cuan, candu ñin ri ra Israel siqui ra Pablo. Ta cachican ra cuatyí chaha ra nuu ra gobernador. ¹³Ta cacatyí ra chí gobernador cuan:

—Ra ihya tyiyuhú ra chí ñáyivi na sacahnu ñu chí Nyoo noo cuhva cha ñahri nyaá nu ley ndi —cacatyí ra.

¹⁴Tyicuan ta cuhva cha cuanacahan ra Pablo, nacahan ri ra Galión, ta catyí ra chí ra Israel cuan:

—Nyoho ra Israel, tatu cuenda noo cuatyí cahnu o cuatyí ndiyi cuví sandai yoso cuhva tahán chí. ¹⁵Soco maa maa ri tuhun cahán ri cuví ihya. Ta yuhu ña cuñi sandai tyiño ihya, ta ñin ri cuenda ley maa ndo cuví. Nyehe maa ndo. Sandaa ndo tyiño vatyi yuhu ña cuñi cuvi juez cuenda ihya —catyí gobernador cuan.

¹⁶Ta tava ra chí ra nu cuví vehe tyiño ra. ¹⁷Tyicuan ta tandihi ra Grecia catiñ ra chí ra Sóstenes, ra cuví nuu vehe ñuhu ñu Israel. Ta cacañi ra chí ra suri maa nuu ra Galión, ra cuví gobernador cuan. Soco ra Galión cuan ña cahan ri ra.

Nu cuanuhu ra Pablo ñuu Antioquía. Yaha cuan ta cuahan tucu ra tuhun Nyoo, cha cu uñi chaha

¹⁸Ta ra Pablo ndoo ca ra ñuu Corinto cuaha quivi. Yaha cuan ta catyi ra chí ra hermano vatyi cuhun ra. Ta cuahan ra Aquila chihin cu Priscila chihin ra Pablo. Tyicuan ta chaꝓ coyo ñu Cencrea. Ta ra Pablo satya ndi ra xiñi ra vatyi sacuví ra noo cha tyaá ra cuhva tyi sacuvi ra nuu Nyoo. Tyicuan ta caquihvi ñu chichi noo barcu cha cuahan ityi Siria. ¹⁹Ta cha chaꝓ barcu cuan nya ñuu Éfeso, ta caquita ñu. Ta ra Aquila chihin cu Priscila ndoo ñu yucuan. Ta ra Pablo cuahan ra vehe ñuhu ñu Israel. Ta cahan ra chihin ñu Israel cha ndu ñin ri yucuan. ²⁰Ta chacu ndahvi ñu nuu ra na ndoo ra cuaha ca quivi. Soco ña cuñi ra.

21 Ta catyí ra chi ñu vatyí cha cuahan ra, ta catyí tucu ra tyehe caa:

—Cuñí chi cha cuhin ñuu Jerusalén vatyí sanducahni vico cha vachi cutahan. Soco cuquichi inga chaha nu nyicu ndo tatu Nyoo ta cuñí ra —catyí ra chi ñu.

Tyicuan ta cuahan ra quihvı́ ra chichi noo barcu cha cuahan ityi Siria. 22 Quivı́ nachaa ra ñuu Cesarea ityi Siria cuan, chahan ra chicuhva ra nocumi chi ñu yihı́ cuenda Nyoo Jerusalén. Yaha cuan ta cuahan ra Antioquía. 23 Ta cha yaha chinyaa ra suhva quivı́ yucuan, quita ra ta cuahan ra tahan tahan ñuu ityi Galacia ta Frigia. Ta sandunı́ ra iñi tandihı́ ñu yihı́ cuenda Nyoo.

Nu cahán ra Apolos tuhun Nyoo ñuu Éfeso

24 Quivı́ cuan cha noo ra Israel ñuu Éfeso. Nañı́ ra Apolos. Ta ñuu ra cuvi Alejandría. Ta cuví ra minoo ra vaha cahán tuhun Nyoo. Ta chitó xaan ra tuhun Nyoo tuhun chahnu cha nyaá nu libru. 25 Ta vaha xaan cutuhva ra tuhun Sutu Mañi yo. Ta cahán ra chihin cha ñı́ iñi ra. Ta vaha xaan nyicón ra chi Nyoo. Ta cachi xaan sañahá ra tuhun ra Jesús. Vasi cuhva cha sacondutyá ra Juan ri chitó ra. 26 Ta quichaha cahan ra chichi vehe ñuhu chihin cha ñı́ iñi ra. Ta cuhva cha chiñı́ ra Aquila ta cu Priscila, tava sı́n ñu chi ra ta nacatyı́ cachi ca ñu tuhun ityi Nyoo chi ra. 27 Tyicuan ta quichaha cuñı́ ra Apolos cuhun ra ityi Acaya. Ta ra hermano catyinyee ra chi ra. Ta catyaa ra noo carta chi ñu yihı́ cuenda Nyoo ityi cuan, ta catyí ra chi ñu vatyí na vaha cahan ñu chihin ra tatu chaa ra. Tyicuan ta cuahan ra. Ta cuhva cha cha ra Acaya cuan tyinyee xaan ra chí ñu chinó iñi chi Nyoo cha cuenda tumañi iñi cha chaha ra chi ñu. 28 Vatyí nu tuvi sañaha cachi xaan ra yoso caa cuhva ña vaha cha sacuvı́ ñu Israel. Ta sañaha ra cha catyí nu tutu Nyoo vatyí ra Jesús cuví Cristo, ra cha nyatú xaan ñu chi.

19

Nu cuahan tucu ra Pablo ñuu Éfeso

1 Cha ñı́ ri ca cha ñohó ra Apolos ñuu Corinto, ra Pablo yaha ra ityi yucu ta cha ra nya ñuu Éfeso. Ta yucuan nañihı́ ra chi cuaha ri ra yihı́ cuenda Nyoo. 2 Ta ndaca tuhun ra chi ra:

—¿Atu naquehen ndo Tatyí li quivı́ nachinó iñi ndo? —catyí ra Pablo chi ra.

Ta canacahan ra cuan ta catyí ra:

—Ni chiin ña chitó ndi cha iyó Tatyí li.

3 Tyicuan ta ra Pablo ndaca tuhun ra chi ra:

—¿Ñáá chihin condutyá nyoho? —catyí ra.

Ta nacahan ra ta catyí ra:

—Chihin cuhva sacondutyá ra Juan yucuan cuhva condutyá ndi —catyí ra.

4 Tyicuan ta catyí ra Pablo chi ra:

—Ra Juan sacondutyá ra chi ñáyivı́ cha ndu uvi iñi cuatyí. Soco catyí tucu ra chi ñu vatyí cuñı́ chi cha chino iñi ñu chi ra cha cuaquichi ta ican ra cuan cuví ra Cristo Jesús —catyí ra Pablo chi ra.

5 Cuhva cha cachiñı́ ra cha catyı́ ra Pablo tuhun ihya, tyicuan ta nacondutyá ra inga chaha chihin sıvı́ Sutu Mañi yo Jesús. 6 Ta cuhva cha tyiso ra Pablo ndaha ra sıquı́ ra, quichı́ Tatyí li sıquı́ ra. Ta quichaha cahan ra inga sahan. Ta saha ra profetizar, o chaha cuenda ra tuhun chaha Tatyí li Nyoo chi ra cuví cuan. 7 Ta uchi uvi tahan ra cha tandihı́ ra.

8 Tyicuan ri chica ra Pablo vehe ñuhu ñuu cuan chichi cha uñi yoo. Ta cahan ra tuhun Nyoo chihin cha ñı́ iñi ra. Ta ñihi cahán ra chihin ñu yoso caa nyacá ñaha Nyoo aña yo. 9 Soco yihı́ ñu sandava ñu aña ñu. Ta ña cuñı́ ñu chino iñi ñu. Ta cahán ña vaha ñu sıquı́ tuhun ra Cristo nuu ñáyivı́, ta catyí ñu vatyí ña vaha ityi Sutu Mañi yo. Tyicuan ta ra Pablo canyaha ra nu nyicú ñu. Ta chinyaca ra chí ñu chinó iñi chi ra Cristo noo sicuela ra cha nañı́ Tiranno. Ta yucuan cahán ra tuhun ra Cristo chihin ñáyivı́ ndiquivı́

ri. ¹⁰ Ta tyicuan caa chinyacuvĭ ra chichi cha uvi cuiya. Ta tandihĭ ñáyĭvĭ nicahnu ityi Asia cuan chiñĭ ñu tuhun Sutu Mañi yo Jesús, tari ñu Israel ta ñu cha ñima ñu Israel cuvĭ ñándihĭ. ¹¹ Ta nahnu milagru sacuvĭ Nyoo chihin ndaha ra Pablo. ¹² Vatyĭ nyacua nya pañitu ta sahma cha tĭin ra Pablo, ta chinyaca ñu chi ñu cuhvĭ ta nduvaha ñu. Ta ñu yĭhĭ tatyĭ ña vaha chi, quita chi chi ñu.

¹³ Ta iyó suhva ra Israel cha cachica noo tahan tahan ñuu. Catava ra tatyĭ ña vaha chi ñáyĭvĭ. Ta cacuñĭ ra cotyño ra sivĭ Sutu Mañi yo Jesús vatyĭ tava ra chi tatyĭ ña vaha. Ta catyĭ ra chi tatyĭ ña vaha cuan:

—Chihin sivĭ ra Jesús cha cahán ra Pablo tuhun catyĭ chi ndo vatyĭ quita ndo —catyĭ ra.

¹⁴ Tyehe caa chinyacuvĭ ndĭ ucha tahan sehe noo ra Israel cha nañĭ Esceva. Ta ra Esceva cuan cuvĭ ra noo ra cuvĭ nuu chi tata sutu. ¹⁵ Ta cha cacahan ra cuan chihin tatyĭ ña vaha cuan, nacahan tatyĭ ña vaha cuan chihin ra ta catyĭ chi tyehe caa:

—Ñohó nui chi ra Jesús. Ta chité yóo ra cuvĭ ra Pablo. Soco nyoho zyóo ra cuvĭ nyoho? —catyĭ tatyĭ ña vaha cuan chi ra.

¹⁶ Tyicuan ta ra cha yĭhĭ tatyĭ ña vaha cuan chii, ndava ra siqui ra cuan. Ta chihin cha cuaha fuerza ra cuvĭ chasaha ra chi tandihĭ ra. Ta चाहन्या cuatyĭ ra sahma ra. Ta sanduvityaa ra chi ra. Ta sañicuehe ra chi ra. Yucuan ta chihin cha cayuhvi ra ta cachino ra ta cuahan coyo ra.

¹⁷ Tyicuan ta tandihĭ ñu Éfeso, ñu Israel, ta ñu cha ñima ñu Israel cuvĭ ñándihĭ, chito ñu tuhun cuan. Ta yuhvĭ xaan ñu cuvĭ. Ta sacahnú ñu sivĭ Sutu Mañi yo Jesús.

¹⁸ Ta cuaha xaan ñu chinó iñi ñu chi ra. Ta chaa coyo ñu ta nahma ñu cuatyĭ ñu, tandihĭ cha ña vaha cha chinyacuvĭ ñu ta ityi chata ca. ¹⁹ Ta cuaha ñu cha sacuahā tuhun tasi, quichĭ nyaca ñu libru ñu. Ta चाहमि ñu libru cuan nuu tandihĭ ñáyĭvĭ. Ta natava ñu cuenda yoso yahvi libru cuan. Cha tandihĭ quita ta cha uvi

xico uchi mil xuhun cuichin. ²⁰ Ta tyicuan ri ta cuahan chitya ca tuhun Sutu Mañi yo. Ta nducuahā ca ñu yĭhĭ cuenda ra. Ta tyicuan caa nyehé ñáyĭvĭ yoso cha cahnu tunyee iñi iyó chi ra. ²¹ Ta cha yahā tuhun ihya, ra Pablo natyaa ra cuhva cha cuhun ra ityi Macedonia, ta ityi Acaya. Yahā cuan ta cunuhu ra nya Jerusalén tyaá ra cuhva. Ta catyĭ ra vatyĭ yahā cuan ta cuñi chi cha cuhun ra nya ñuu Roma. ²² Tyicuan ta tachĭ ra chi uvi tahan ra tyinyee chi ra nya Macedonia, ra Timoteo ta ra Erasto. Soco ndoo maa ra suhva ca quivĭ ityi Asia cuan.

Nu naquiquĭ ñáyĭvĭ Éfeso siqui tuhun Nyoo

²³ Ta suri quivĭ cuan naquiquĭ ñáyĭvĭ ñuu Éfeso siqui tuhun Nyoo, ²⁴ vatyĭ noo ra cha nañĭ Demetrio sanaquiquĭ. Vatyĭ maa ra tuhvā ra saha tyiño chihin xuhun cuichin. Savahá ra vehe ñuhu nyihi nyoo Diana chihin xuhun cuichin cuan. Ta cuaha sahā ganaa ra chihin ra casahā tyiño chihin ra. ²⁵ Ta cana ra Demetrio cuan chi ra cha sahā tyiño chihin ra. Ta cana tucu ra chi ra cha casahā tyiño ĩin ri tyiño cuan. Ta catyĭ ra chi ra:

—Nyoho ra tahan yo, chitó ndo vatyĭ chihin tyiño ihya iyó cha tyayĭ yo. ²⁶ Soco nyoho nyehé ndo ta chiñĭ ndo yoso caa sacuvĭ ra Pablo ñuu yo Éfeso ihya, ta nicahnu ityi Asia. Vatyĭ catyĭ ra tyi nyoo cha savahá ñáyĭvĭ ñima Nyoo cuvĭ. Ta cuaha xaan ñáyĭvĭ nachino iñi sahā ra. ²⁷ Ta ña vaha cha sacuvĭ ra vatyĭ ma quiyahvi ca xitohyo cha savahá yo. Ta sĭin ri ma sacahnu ca ñáyĭvĭ chi nyoo Diana ta ma saha ca ñu ñáyĭvĭ vehe ñuhu ña, ta ña vaha tyicuan caa, vatyĭ ñaha cuan cahnu xaan cuvĭ ña. Ta tandihĭ ñáyĭvĭ ityi Asia chihin ñu nicahnu ñáyĭvĭ sacahnú ñu chi ña. Ta nu cuahan ca chi quivĭ ma sacahnu ca ñáyĭvĭ chi ña tatu chino iñi ñu cha cahán ra Pablo —catyĭ ra Demetrio.

²⁸ Ta cuhva cha cachiñi ra cha catyí ra, Xaan xaan cacuñí ra. Ta quichaha cacana chaa ra ta cacatyí ra:

—Cahnu xaan cuví cu Diana, nyoo cuenda ñáyivi Éfeso ihya —catyí ra.

²⁹ Ta cutondo xiñi tandihí ñu ñuu cuan. Ta catiñ ñu chi ra Gayo, ta chi ra Aristarco, uvi ra Macedonia cha chicá noo chihin ra Pablo. Ta caxita quiñoho ra chi ra nyacua nya nu tuhva ñu candu ñin ri ñu. ³⁰ Ta ra Pablo cuñí ra quihvi ra nu nataca ñáyivi vatyí cahan ra chihin ñu. Soco ra hermano, ña chaha ra. ³¹ Ta tyicuan caa tucu suhva ra cuví tyiño ityi Asia, ra cuví amigo ra Pablo, tachi ra tyiño vatyí ña tahán chi tyihi ra chi ra yucuan. ³² Ta nu ndu ñin ri ñu yucuan, suhva ñu caná chaa noo tuhun. Ta inga ñu caná chaa ñu inga tuhun. Vatyí naquiquí ñu. Ta cuaha xaan ñu cha ni ña chitó ñu ñáá tuhun cha natacá ñu. ³³ Tyicuan ta ñu Israel, tyatyíño ñu chi noo ra cha nañí Alejandro na quita ra ityi nuu. Ta suhva ñu tayucú yucuan nacatyí ñu chi ra yoso caa cucahan ra. Tyicuan ta sacuvi ra seña chihin ndaha ra vatyí na taxi ri cuví ñu vatyí cuñí ra catyí ra vatyí ñahri cuatyí ñu Israel. ³⁴ Soco cuhva cha chito ñu vatyí ra Israel cuví ra, tandihí maa ñu cana chaa ñu. Ta chichi cha uvi hora caná chaa ñu, ta catyí ñu:

—Cahnu xaan cuví cu Diana nyoo cuenda ñu Éfeso —catyí ñu, caná chaa ñu.

³⁵ Tyicuan ta secretario ñuu cuan cuhva cha cuví sacutaxin ra ñáyivi, ta catyí ra:

—Nyoho tata ñuu Éfeso ihya. Tandihí ñáyivi chitó ñu vatyí nyaá siqui yo ñu Éfeso cha saha cumi yo vehe ñuhu cu Diana tyi cahnu xaan cuví ña. Ta cumí yo xitohyo ña cha cana cava ityi andivi. ³⁶ Ta yori cuví catyí tyi ña ndicha. Taxi ri ndo, ta ma cunyacuvi ri maa ndo tatu ña chitó ndo ñáá cha cuacunyacuvi ndo. ³⁷ Vatyí ra cha quichi nyaca ndo ihya ñahri cha suhu ra vehe ñuhu ndo. Ta ni ña cahán ña vaha ra siqui nyoo

cuenda ndo. ³⁸ Tatu ra Demetrio ta ra cha sahá tyiño chihin ra chicán ra cuatyí chaha noo ra, na cuhun ra nu nyaá juez. Cuví cacana ra cuatyí nuu ra cuan, ta maa ra cusandaa ra cuatyí cuan. ³⁹ Ta tatu inga tuhun chicán ndo, cuñí chi sacuví ndo nu nyicu ra cuví tyiño, tari cuhva catyí ley. ⁴⁰ Vatyí tatu coto gobiernu ta cana ra chi yo cha cuenda cha cuví ihya, ta ma ñihi yo tuhun cahan yo tatu ndacá tuhun ra chi yo ñáá cuenda naquiquí yo —catyí ra cuví secretario cuan.

⁴¹ Ta cha yaha catyí ra tuhun cuan catyí ra vatyí na cunuhu ñu nya vehe ñu.

20

Nuyahá ra Pablo ityi Macedonia ta cuahan ra Grecia

¹ Cha yaha tuhun cha naquiquí ñáyivi ñuu Éfeso cuan, cana ra Pablo chi tandihí ñu yihí cuenda Nyoo, vatyí cahan ra suhva nuu ñu ta cuhva ca ra tunyee iñi chi ñu. Vatyí maa ra cha chi quivi cha cuhun ra inga ityi. Ta cahan ra chihin ñu. Tyicuan ta cuahan ra Macedonia. ² Ta cahan ra tandihí ityi cuan ta sanduní ca ra iñi tandihí ñu yihí cuenda ra Cristo cha iyó ityi cuan chihin tuhun cahan ra. Tyicuan ta cha ra ityi Grecia. ³ Ta yucuan ndo ra uñi yoo. Ta cha nyaá ra cha cuaquehen ra barcu ta cuhun ra Siria, ta chito ra vatyí nducú ñáyivi Israel chi ra vatyí cahni ñu chi ra. Yucuan chaha natyaa ra iñi ra cha cuhun ra chihin chaha ra ityi nu ñuhu ri. Ta nayaha ra inga chaha ityi Macedonia. ⁴ Ta cuahan ra Sópater, ra ñuu Berea chihin ra. Ta cuahan ra Aristarco ta ra Segundo, ta uvi tahan ra ihya, Tesalónica cuví ñuu ra. Ta cuahan ra Gayo, noo ra ñuu Derbe, ta ra Timoteo, ta uvi tahan ra ityi Asia, ra Tíquico ta ra Trófimo. ⁵ Ra hermano ihya cayaha ra ityi nuu ta canyatú ra chi ndi ñuu Troas. ⁶ Ta nyuhu nyatu ndi na yaha vico pascua nu tuhvá ñu Israel chachí ñu pan cha ñahri yuchan

iya yihí. Tyicuan ta quita ndi ñuu Filipo chihin barcu. Ta nu cu ohon quivi ta natahan ndi chi ra cha cuahan ityi nuu nya ñuu Troas. Ta yucuan ndoo ndi ucha quivi.

Nu cahán ra Pablo tuhun Nyoo ñuu Troas

⁷ Ta cha timingu cuan ndu ñn ri ndi chihin ñu yihí cuenda Nyoo ñuu Troas cuan. Ta quivi cuan cuacachi ndi pan ta coho ndi vinu vatyí nicohon iñi ndi tyi chihí ra Cristo cha cuenda cuatyí yo. Ta ra Pablo cahán ra nuu ñu ta cuvi ora ñuu, vatyí cha nyaá cha cuhun ndi inga quivi cuan. ⁸ Canyicú ndi noo cuarto nu cu uñi piso. Ta ndichin xaan nu canyicú ndi chichi vehe cuan vatyí cuaha xaan ñuhu candil cayú. ⁹ Ta noo ra tyivaa cha nañi Eutico nyaá ra ventana tyasohó ra, soco ña cunyeer ñumahna vatyí ra Pablo, cha vehe xaan cahan ra. Quixí ra Eutico, ta ña chito ra canacava ra nya nu ñuhu. Ta nacoñehé ra chí ra soco cha chihí ra. ¹⁰ Tyicuan ta ra Pablo noo ra ta chaá ra nu catuví ra tyivaa cuan. Ta natyihí nundaha ra chí ra tyivaa cuan, ta catyí ra chí ndi hermano:

—Ma yuhvi ndo. Nyitó ra —catyí ra.

¹¹ Tyicuan ta nandaá tucu ra Pablo ta chachí ndi pan ta chihí ndi vinu cha cuenda Sutu Mañi yo. Tyicuan ta cahan ca ra Pablo tuhun Nyoo nyacua nya cundichin. Tyicuan ta cuahan ra. ¹² Ta ra tyivaa cuan nandoto ra ta cuanuhu ra nya vehe ra. Ta sñi xaan nanduví cuñi ñu.

Nu quita ra Pablo ñuu Troas ta cuahan ra nya ñuu Mileto

¹³ Nyuhu yaha ndi ityi nuu ta cuahan ndi chihin barcu nya ñuu Asón. Vatyí yucuan cuñihi tahan ndi chihin ra Pablo, vatyí tyicuan caa sandaa maa ndi tyiño chihin ra. Vatyí maa ra cuñi ra cuhun ra ityi nu ñuhú ri chihin chaha ra. ¹⁴ Ta cuhva cha nañihí tahan ndi chihin ra nya ñuu Asón cuan, quihví ra chichi barcu chihin ndi ta cuahan ndi nya ñuu Mitilene.

¹⁵ Quita ndi yucuan ta yaha ndi ityi nuu noo ñuhú luhlu cha nañi Quío nyaá mahñu tyañuhu. Ta cha inga quivi cuan chaá ndi inga ñuhú luhlu cha nañi Samos. Yaha ndi yucuan ta nyitatu ndi ñuu Trogilio. Ta cha inga quivi chaá ndi nya ñuu Mileto. ¹⁶ Tyicuan caa cuvi vatyí ra Pablo ña cuñi ra cunyaá ca ra cuaha quivi ityi Asia. Ña cuñi ra cuhun ra Éfeso vatyí numi ri cuñi ra chaá ra ñuu Jerusalén, vatyí tatu cuhva chí cuhva cunyaá ra quivi vico Pentecostés cha sandu-cahnú ñu Israel.

Nu cahán ra Pablo chihin ra ñuu Éfeso vatyí cuhun ra ta ma quichi ca ra

¹⁷ Ta cuhva cha nyicu ndi ñuu Mileto, cana ra Pablo chí ra yihí ndaha chí ñu yihí cuenda Nyoo Éfeso. ¹⁸ Ta cuhva cha chaá coyo ra, catyí ra tyehé caa chí ra:

—Maa ndo chitó ndo yoso caa cuhva chica noi nyata quivi xihna ri cha chaj Asia ihya. ¹⁹ Tandihí quivi cha chinyaj chihin ndo ta sacuvi tyiño nuu Sutu Mañi yo chihin cha nduquí cuhva cha ma cahnu sahi chí, vasi cuaha tindoho chihin cha cuaha tucuihya iñi. Ta cuaha tindoho quichi síqui sacuvi ñayivi Israel. ²⁰ Soco ña sandihí cha cahán noi tuhun Nyoo nuu ndo. Vatyí ihya cuví tandihí cha chiñuhú chí ndo tacuhva coo vaha ndo. Ta sañahí tuhun Nyoo chí ndo nu ndu ñn ri ndo ta nya vehe ndo ñandihí. ²¹ Ta sañahí tuhun ihya chí ñu Israel ta chí ñu cha ñima ñu Israel cuví. Sañahí chí ñu na nasama ñu cuhva iyó ñu nuu Nyoo ta nachino iñi ñu chí Sutu Mañi yo Jesucristo. ²² Ta vityin cuhin nya ñuu Jerusalén vatyí maa Tatyí Ii catyí. Ta ña chité ñáá cha cucuvi chí yucuan. ²³ Soco noo ri cha chité vatyí tandihí ri nu cuahín Tatyí Ii catyí chí vatyí nyatú vehe caa chí, ta cuaha tindoho ñandihí. ²⁴ Soco ni noo ihya ta ña chicá xiñi. Ta ni ñayivi ta ña vale cha cuenda mai, tacuhva vatyí chihin tusñi iñi ta cuví sañihí sahatyiñe tyiño cha chaha Sutu Mañi yo Jesús chí,

cha sañahi tuhun vaha yoso cuhva cuñi Nyoo chi yo.

²⁵ Ta vityin chitó vahi vatyi tandihí nyoho cha cahin tuhun Nyoo chihin ndo, ma nyehe ca maa ndo chii. ²⁶ Yucuan chaha cuñi catyi chi ndo vityin vatyi ñahri ca cuatyí yuhu cha cuenda ni noo nyoho. ²⁷ Vatyi chihin cha ñiñi cuñi ta cahin tuhun Nyoo chihin ndo ta ñahri cha tixehi. ²⁸ Yucuan chaha saha ndo cuenda chi ndo. Ta saha tucu ndo cuenda chi tandihí ñu yihí cuenda Nyoo. Vatyi maa Tatyí li tyatyíño chi ndo vatyi saha cuenda ndo chi ñáyivi iyó vehe ñuhu Sutu Mañi yo. Maa ra sata ra chi ñu chihin ñiñi ra. ²⁹ Vatyi chité vatyi quívi cuhin, cuquichi inga ra. Ta cuñi ra satívi ra chi ñu yihí cuenda Sutu Mañi yo. Tari lobo xaan cha chahñi chi mbee, tyicuan caa cuquichi ra cuan satívi ra añima ndo. ³⁰ Ta suri nu nyicu ndo, cundicuita suhva ra. Ta cusañaha ra cha ña ndicha tacuhva cunyicon ndo chi ra. ³¹ Yucuan chaha saha vaha ndo cuenda. Nícohon iñi ndo vatyi chichi cha uñi cuiya ña sandihí cha cahin tuhun Nyoo nuu ndo. Cha ñicahñu ta cha cuaa cahin chihin noo noo nyoho, ta chihin cha cuihya iñi coto sandihí ndo tuhun Nyoo.

³² Ta vityin nyoho yañi, natyaí chi ndo ndaha Nyoo. Saha ndo cuenda ndi tuhun cahan ra chihin yo. Sacotó ra chi yo tyi cuñi xaan ra chi yo. Ta yucuan sandunyeé xaan chi iñi yo tacuhva cuvi yo ñáyivi yihí vaha cuenda ra chihin tandihí inga ñu cha nacuhva cuenda ñu chi ñu chi ra. ³³ Yuhu ña nyiyó iñi ni minoo cha iyó chi ndo. Ni ri xuhun ndo, ni ri sahman do. ³⁴ Nyoho chitó vaha ndo vatyi sahá tyiño xain chihin ndahi tacuhva ñihi cha chiñuhú chii chihin ra chicá noo chihin. ³⁵ Tyicuan ri sañahí chi ndo vatyi cuñi chi cha saha tyiño ndo ta tyinyee ndo chi ñu iyó cha chiñuhu chi. Ta nícohon iñi ndo tuhun cahan Sutu Mañi yo Jesús nu catyi ra tyehe caa: “Si ca cuñi noo ñáyivi ñu chahá, ta ñima ca ñu ita iñi”, catyí Sutu Mañi

yo.

³⁶ Cha yaha cha catyi ra Pablo tuhun ihya, chicuiñi chiti ra. Ta chican tahvi ra chihin tandihí ñu. ³⁷ Ta tandihí ñu cuihya xaan nduvi iñi ñu ta chacu xaan ñu. Ta nanumi ñu chi ra. ³⁸ Vatyi ra Pablo catyi ra tyi cahun ra inga ñuu ta ma cahun ca ra nu nyicu ñu. Tyicuan ta chinyaca ñu chi ra nyacua nya nu quihvi ra chichi barcu.

21

Nu cuahan ra Pablo ñuu Jerusalén

¹ Tyicuan ta sandoo ndi chi ra hermano ta quihvi ndi chichi barcu. Ta cuahan ndi in ndoo ityi ri nya Cos noo ñuhú luhlu mahñu tyañuhu. Ta cha inga quívi cha ndi nya Rodas inga ñuhú luhlu ri. Yucuan ta cuahan ndi nya Pátara. ² Ta ñuu Pátara cuan nañihí ndi nonga barcu cha cuahan nya Fenicia. Ta quihvi ndi chichi inga barcu cuan ta cuahan ndi. ³ Ta cha cuahan ndi nyehe ndi ñuhú Chipre chiyo satyin ndi. Ta yaha ri ndi cuahan ndi ityi nu ca, ityi Siria. Ta cha ndi nya ñuu Tiro vatyi yucuan cuatava ra carga cha nyisó barcu cuan. ⁴ Ta cha nañihí ndi chi ñu yihí cuenda Nyoo ñuu cuan, ndoo ndi chihin ñu ucha quívi. Ta catyí ñu chi ra Pablo vatyi ña tahn chi cha cahun ra Jerusalén vatyi tyicuan caa sañaha Tatyí li chi ñu. ⁵ Soco cha ndihí ucha quívi cuan quita ndi ñuu cuan. Ta nu cuaquita ndi tandihí ra hermano chihin ñasihí ra ta sehe ra chinyaca ñu chi ndi nyacua nya ityi chata ñuu. Ta nu ñiti yuhu tyañuhu cuan nicuiñi chiti ndi, ta chican tahvi ndi chi Nyoo. ⁶ Tyicuan ta nanumi ndi chi tahan ndi. Tyicuan ta quihvi ndi chichi barcu. Ta maa ñu cuanuhu coyo ñu vehe ñu.

⁷ Ta quita ndi ñuu Tiro cuan ta cuahan ndi nya ñuu Tolemaida. Ta yucuan chaha ndi nocumi chi ñu hermano. Ta ndoo ndi chihin ñu noo quívi. ⁸ Ta cha inga quívi quita ndi ta cuahan ndi ñuu Cesarea. Ta yucuan chahan ndi vehe ra Felipe ra

cha sacotó xaan chi ñáyiví yoso caa sacacu Nyoo añima ñu. Cuví ra noo ra chichi cha ucha tahan ra nyisó tyiño vehe ñuhu. Ta yucuan ndoo ndi chihin ra. ⁹ Ra Felipe, iyó cumi tahan ñu tyivaa sehe ra cha ta tandaha ca. Ta tuhvá ñu chahá cuenda ñu tuhun cahán Nyoo. O cuvi chi cuan sahá ñu profetizar. ¹⁰ Ta cha cuaha ri quiví cha chaá ndi yucuan, tyicuan ta chaá noo profeta Nyoo cha nañí Agabo. Quichí ra ityi Judea. ¹¹ Quichí nyehe ra nu nyicu ndi. Ta quehen ra sincho ra Pablo, ta cháhñi ra chaha ra ta ndaha ra, ta catyí ra:

—Tatyí li Nyoo catyí chii vatyí tyehe caa cunuhñi chitoho sincho ihya nya Jerusalén. Ta cucuhva cuenda ñáyiví Israel chi ra chi ra inga ñuu —catyí ra Agabo.

¹² Cha chiñi ndi tuhun ihya, nyuhu ta ra ñuu Cesarea chacú ndahvi ndi nuu ra Pablo vatyí ma cuhun ra Jerusalén. ¹³ Soco ra Pablo catyí ra:

—¿Ñáá tuhun chacú ndo ta sanducuihyá ndo iñi? Yuhu ñahri cuende. Ñima cha cunuhñi ri, vasi cahñi ra chii soco cha cuenda Sutu Mañi yo Jesús —catyí ra chi ndi.

¹⁴ Ta cha nyehe ndi tyi ña cuvi chasaha ndi chi ra, saña ndi. Ta catyí ndi:

—Na cuvi maa cuhva cuñí maa Sutu Mañi yo.

¹⁵ Cha yahá tuhun ihya sanduvahá ndi chi ndi ta cuahan ndi nya Jerusalén. ¹⁶ Ta cuahan suhva ra Cesarea ra yihí cuenda ra Cristo chihin ndi. Ta cuahan tucu noo ra ñuhú Chipre. Mnasón nañí ra. Cuaha xaan cuiya chinó iñi ra chi ra Cristo. Maa ra chinyaca ra chi ndi nya vehe ra cha nyaá Jerusalén vatyí yucuan cunyaa ndi.

Nu cuanyehe ra Pablo nu nyaá ra Jacobo

¹⁷ Cuhva cha chaá ndi Jerusalén, ñu yihí cuenda ra Cristo chihin cha siñi cuñí ñu cahán ñu chihin ndi. ¹⁸ Ta inga quiví cuan cuahan ndi chihin ra Pablo cuanyehe ndi nu nyaá ra Jacobo. Ta yucuan nyicú tucu tandihí

ra yihí ndaha vehe ñuhu. ¹⁹ Chahá ra Pablo nocumi chi ra. Yahá cuan ta nacatyí ra tahan tahan ri tuhun yoso caa chotyíño Nyoo chi ra nu cahan ra tuhun Nyoo chihin ñu cha ñima ñu Israel cuví. ²⁰ Cuhva cha cachiñi ñu tuhun ihya, casacahnu ñu chi Nyoo, ta catyí ñu chi ra Pablo:

—Vaha yañi yo, soco cha nyehun vatyí cuaha xaan mil ñu Israel chinó iñi ñu chi ra Cristo. Ta tandihí ñu catyí ñu vatyí niñi cha cunyicon yo ley ra Moisés. ²¹ Ta ñihí ñu tuhun vatyí yoho sañahún chi tandihí ñu Israel cha iyó inga ñuu vatyí ma quichaha ca ñu ley cha sañahá ra Moisés, ta catyún chi ñu vatyí ña tahán chi sacuví ñu costumbre circuncisión chihin cha lee sehe ñu, ta ni ma sacuví ca ñu costumbre chahnu yo. ²² ¿Yoso caa sacuví yo vityin? Vatyí ñáyiví cuañihi ñu tuhun tyi chaun ihya. ²³ Vaha taxin ca cha sacuvun tyehe caa. Ihya iyó cumi tahan rayi cha nyaá sacuvi ra noo cha tyaa ra cuhva tyi sacuvi ra nuu Nyoo. ²⁴ Cuahan chihin ra na ndundiun nuu Nyoo chihin ra. Ta yoho tyiyahvun cha tahán chi tyiyahvi ra. Tyicuan ta maa ra cuvi satya ndi xiñi ra cuhva catyí ley. Ta cha sacuvun tyicuan caa ta coto tandihí ñáyiví vatyí ña ndicha cha cahán ñu sicun, soco cunyehe ñu vatyí quichahá tucu yoho ley ra Moisés. ²⁵ Ta cha cuenda ñu cha ñima ñu Israel cuví, ta nachinó iñi ñu tuhun Nyoo, cha sacuhun ndi tutu chi ñu, ta catyí ndi chi ñu vatyí ña tahán chi caca xiñi ñu tuhun ihya. Soco noo cha ma cachi ñu coño cha chahá ñáyiví chi xitohyo. Ni ma cachi ñu niñi ni coño quiti cha cava ñu sucun ta ña chati niñi. Ta ni noo ñu ta ma coo ñusihí o rayi chi ñu tatu ñima ñasihí o yí ñu cuví —catyí ra chahnu vehe ñuhu chi ra Pablo.

Nu nacandá ñu Israel siqui ra Pablo

²⁶ Tyicuan ta tuví inga quiví ta cuahan ra Pablo chihin ndi cumi tahan ra cuan. Ta sandundiñi ra chi ra nuu Nyoo ñn ri chihin ra cuan. Tyicuan ta quihvi ra chichi vehe ñuhu cahnu vatyí sacoto ra chi

tata sutu ama cundihi cha ucha quivi cha ndundihi ndi cumi tahan ra cuan, ta cuacuhva ra ofrenda cha cuenda noo noo ra. ²⁷ Soco cha cuñi cuii ri ndihi ucha quivi cuan, ta suhva ra Israel cha quichi nya Asia canyehe ra chi ra Pablo chichi vehe ñuhu. Ta casanaquiqui ra chi tandihi ñáyivi, ta catiin ra chi ra Pablo. ²⁸ Ta canachaá ra ta cacatyí ra:

—Nyoho ñáyivi Israel, tyinyee ndo chi ndi. Ican ra ihya cuví ra cha chicá noo tandihi ri ityi. Ta sañahá ra chi tandihi ñáyivi. Catyí ra vatyí cha ñima ri tuhun cuví yo ñu Israel. Ta catyí ra tyi ña vaha ley cha tyaa ra Moisés, ta ña vaha vehe ñuhu ihya. Ta siin ri vityin tyihí ra chi suhva ra Grecia chichi vehe ñuhu sativi ra nu ii ihya —catyí ra canachaá ra.

²⁹ Tyehe caa cacatyí ra vatyí ta ityi chata ca canyehe ra chi ra Pablo chichi ñuu, chicá noo ra chihin ra Trófimo, noo ra ñuu Éfeso. Ta cacuñi maa ra vatyí ra Pablo chinyaca chi ra chichi vehe ñuhu. ³⁰ Ta tandihi ri ñáyivi ñuu naquiquí ñu. Ta ñáyivi chinó vavaha ñu vachi coyo ñu. Tyicuan ta catiin ñu chi ra Pablo. Ta caxita quiñoho ñu chi ra nya ityi chata vehe ñuhu, ta numi ri nacasi ñu yuvehe. ³¹ Cha cuñi ñu cahñi ñu chi ra, ta cha tyiño chi comandante cuenda sindaro vatyí tandihi ñu Jerusalén iyó xaan naquiquí. ³² Tyicuan ta comandante cuan sandu iin ri ra capitán ta sindaro. Ta cachino ra cuahan coyo ra nu nyicú ñáyivi. Cuhva cha nanyehe ñu chi comandante chihin sindaro, sandihi ñu cha cañi ñu chi ra Pablo. ³³ Tyicuan ta tuhva comandante nu nyaá ra Pablo. Ta tachí ra tyiño natin sindaro chi ra, ta cháhñi ra chi ra chihin uvi tahan cadena. Yahá cuan ta ndaca tuhun ra chi ra yóo ra cuví ra, ta ñáa cha sacuvi ra. ³⁴ Soco ñáyivi siin siin tuhun canachaá ñu. Ta comandante cuan ña cutuñi maa iñi ra cha cuenda cha quiñi cuvaa ñu. Ta tachí ra cha cunyaca sindaro chi ra Pablo nya cuartel. ³⁵ Cuhva cha cachaa ra nu cuayí yuvehe cuartel cuan, quiñi xaan nan-

duví ñáyivi ta ña chahá ca ñu caca ra Pablo. Yucuan chaha catyaa soco sindaro cuan chi ra. ³⁶ Vatyí tandihi ñu nyicón ñu chi ra, ta canachaá ñu ta catyí ñu:

—¡Cahñi ndo chi ra! —cacatyí ñu.

Nu sacacú ra Pablo chi ra nuu ñáyivi

³⁷ Cuhva cha cuatyihí ra chi ra Pablo chichi cuartel, ta quichaha catyí ra chi comandante:

—¿Atu cuhvon cha catyí noo tuhun chuun? —catyí ra chi ra.

Ta comandante cuan catyí ra:

—¿Atu cuví cahún griego? ³⁸ Tu tyicuan caa, ñima yoho cuví ra ñuu Egipto cha quichi quivi cuan ta sacañi tahan ra chi ñáyivi siqui gobiernu ta chinyaca ra chi cumi mil tahan ñáyivi ityi ñuhu ityi —catyí comandante cuan chi ra Pablo.

³⁹ Tyicuan ta ra Pablo catyí ra chi ra:

—Yuhu noo ra Israel cuví ta caqui noo ñuu cha nañi Tarso cha cuví minoo ñuu cahnu ityi Cilicia. Soco saha noo tumañi iñi chii vatyí cuhvon nacin chihin chihin ñáyivi —catyí ra Pablo chi comandante cuan.

⁴⁰ Tyicuan ta chaha comandante cuan permiso chi ra. Tyicuan ta nicuinanyaa ra nu cuayí ta chaha ra noo seña chi ñu na cutaxin ñu. Ta cahán ra chihin sahan hebreo, ta catyí ra:

22

¹—Nyoho tata, ta nyoho yañi, cuiñi ndo cha catyí chi ndo tyi coto ndo vatyí yuhu ñahri cuatyí —catyí ra Pablo chi ñáyivi cuan.

² Cha cachiñi ñu vatyí cahán ra chihin ñu chihin sahan hebreo, taxi ri cacuvi ñu. Ta ra Pablo catyí ra:

³ —Yuhu ra Israel cuví tari maa ndo. Ta caqui ñuu Tarso ityi Cilicia. Soco Jerusalén ihya chahñi. Ta ra Gamaliel sañaha chii tandihi maa cuhva yoso caa quichahi ley sutu chahnu yo. Ta tyicuan ri nduqui cuhva sacuvi tyiño nuu Nyoo chihin cha tandihi añime, tari maa cuhva nyacuví nyoho quivi vityin. ⁴ Yuhu,

nu quichi chi chica nyiquen ta satasi iñi chi ñu yihí cuenda ra Cristo. Ta nacuhva cuende chi ñu na cacahñi ra chi ñu. Ta tyihí chi ñu chichi vehe caa, rayi ta ñusihi. ⁵ Ra cuví nuu chi tata sutu chihin ra cacuví mandoñi, cacuví ra cha ndaa vatyí ican ra chaha tutu vatyí cuvi tiin chi yañi yo, ra yihí cuenda ra Cristo ñuu Damasco. Chahin nyicuan chinanduqui chi ñu chinó iñi chi ra Cristo, vatyí tacuhva cunuhñi ñu chihin cadena, ta quichi nyaque chi ñu nya Jerusalén ihya vatyí cutachi tuñi ra chahnu chi ñu.

Nu nacatyí ra Pablo yoso caa nanduvi ra cuenda ra Cristo
(Hch. 9.1-19; 26.12-18)

⁶ 'Soco cuhva cha cuahin ityi cha cuachaa ndi Damasco, ñáá cuhva ora cuví cuan. Ta sana iñi ta ndundichin nicachico nu cuahin chihin noo nduva ñuhu cha quichi ityi andivi. ⁷ Tyicuan ta nduve nu ñuhú. Yaha cuan ta chiñi noo ndusu cha catyí chii: "Saulo, Saulo, ¿ñáá tuhun cha chicá nyicon chii tyehe caa?" catyí ndusu cuan chii. ⁸ Tyicuan ta ndacá tuhun chi ra ta catyí: "¿Yóó yoho tata?" Ta catyí ra chii: "Yuhu cuví ra Jesús, ra ñuu Nazaret, ra chicá nyicon chi", catyí ra. ⁹ Ndi ra cha cuahan coyo chihin canyehe ra ñuhu cuan, ta nayuhvi ra. Soco ña cachiñi ra ndusu ra cha cahán chihin. ¹⁰ Tyicuan ta quichahá catyí yuhu chi ra: "Sutu Mañi yuhu, ¿ñáá cha tahán chi sacuvi?" Ta catyí ra chii: "Ndicuita ta cuahan nya Damasco. Ta yucuan cucatyí noo ra chuun tandihí cha tahán chi sacuvun", catyí Sutu Mañi yo chii. ¹¹ Ta vatyí nducuai saha ñuhu cuan, ra tahin cayindahá ndahi ta cachinyaca ra chii nya Damasco.

¹² 'Ta yucuan iyó noo ra cha nañi Ananías. Ta sacahnú xaan ra chi Nyoo cuhva catyí ley cha tyaa ra Moisés. Ta tandihí ñu Israel cha iyó Damasco catyí ñu vatyí vaha xaan ñáyivi cuví ra Ananías. ¹³ Quichi nyehe ra cuan chii. Ta cuhva cha cha ra, catyí ra chii: "Yañi Saulo,

nanyehe inga chaha", catyí ra chii. Ta caa cuhva ri cuan nanyehi. Ta cuví nyehi chi ra Ananías cuan. ¹⁴ Ta catyí ra chii: "Nyoo cuenda sutu yo nacachi ra chuun nyata ityi chata ca, vatyí coton cuhva cuñi ra, ta nyehun chi ra Jesucristo vatyí vaha ra, ta cuiñun ndusu ra. ¹⁵ Vatyí yoho cuacahun tuhun ra nuu tandihí ñáyivi. Cuanacatyun cha nyehun ta cha chiñun. ¹⁶ Ta vityin, ma cuatu con. Ndicuita ta condutyon. Ta cacan tahvun chi Sutu Mañi yo tyi cuasandachi ra cuatyun", catyí ra Ananías chii.

Nu nacatyí ra Pablo yoso caa chaha Nyoo tyiño chi ra vatyí cuhun ra inga ñuu cucahan ra tuhun ra Cristo

¹⁷ 'Yaha cuan ta cuanuhin Jerusalén ta cuhva cha nachai, chahin vehe ñuhu cahnu chicacan tahvi. Ta nyehi noo visión. ¹⁸ Nyehi chi Sutu Mañi yo. Ta catyí ra chii: "Sanumi. Quita cha numi ri Jerusalén vatyí ma chino iñi ñu tuhun cha cucahun", catyí ra chii. ¹⁹ Tyicuan ta quichaha catyí yuhu chi ra: "Sutu Mañi yuhu, maa ñu chitó ñu vatyí yuhu chahin tandihí vehe ñuhu. Ta tiin chi ñu chinó iñi chuun, ta tyihí chi ñu vehe caa ta cañi chi ñu. ²⁰ Ta quivi chati niñi ra Esteban ra cha cahan cuendon, yuhu ñandihí nyaí yucuan. Ta ndoi vaha cha chahñi ñu chi ra. Ta sahacumi sahma ra cha cachahñi chi ra", catyí yuhu chi Sutu Mañi yo. ²¹ Tyicuan ta catyí ra chii: "Cuahan, vatyí tachí chuun nu cañi, nu nyicu ñu cha ñima ñu Israel cuví", catyí Sutu Mañi yo chii.

Nu nyaá ra Pablo ndaha ra comandante cuenda ñuu Roma

²² Ihya ri tyasohó ñu tuhun cahán ra Pablo. Tyicuan ta quichahá canachaá ñu ta catyí ñu:

—¡Cahñi ndo chi ra chiña! Ña tahán chi coo ra ñáyivi—catyí ñu.

²³ Ta canachaá ca ñu. Ta sacaa ñu sahma ñu. Ta sacaa ñu ñiyaca nu tatyí cha cuenda cha xaan xaan cuñi ñu. ²⁴ Yucuan chaha comandante

cuan catyí ra na cutyihi sindaro chi ra chichi cuartel. Ta tachí ra tyiño na cañi ra chi ra, vatyí cuñí ra cha quita cha ndaa ñáá tuhun cha canachaá ñáyivi síqui ra cha tyicuan caa. ²⁵ Soco cha yahá cacháhñi ra chi ra ta cuacañi ra chi ra, tyicuan ta ra Pablo nacatyí ra chi capitán cha nanyaá yucuan:

—¿Atu iyó ityi chi nyoho cha cañi ndo chii? Vatyí yuhu ra cuenda ñuu Roma cuví ta sñn ri ta cutuñi ca chii nu juez —catyí ra Pablo chi ra.

²⁶ Cuhva cha chiñi capitán cha cahan ra Pablo, chahan ra chisacoto ra chi comandante. Ta catyí ra chi ra:

—Saha cuenda chuun chihin cha nyacuvún. Vatyí ra cuan, ra cuenda ñuu Roma cuví ra —catyí ra chi ra.

²⁷ Tyicuan ta comandante cuan cuahan ra nu nyaá ra Pablo. Ta ndacá tuhun ra chi ra tatu ndicha vatyí ra cuenda ñuu Roma cuví ra. Ta ra Pablo catyí ra vatyí ican. ²⁸ Tyicuan ta catyí comandante cuan chi ra:

—Yuhu cuaha xaan xuhun tyiyahvi ta nanduví noo ra cuenda Roma.

Ta ra Pablo catyí ra:

—Soco yuhu ra cuenda Roma cuví nyata caqui —catyí ra.

²⁹ Ta tyicuan caa ta sindaro cha cuacañi chi ra canyahá ra ta cuahan coyo ra. Ta nyacua nya comandante ta nayuhvi ra cha cuenda cha cháhñi ra chi ra chihin cadena. [Vatyí cuatyí cuví cha sacuví ra cha tyicuan caa chihin noo ra cuenda ñuu Roma.]

Nu nanyaá ra Pablo nu candu ñn ri ra Israel

³⁰ Tuví inga quivi ta comandante cuan cuñí ra coto ra ñáá cuatyí tyaá ñu Israel chaha ra Pablo. Ta ndachí ra cadena cha nuhñi ra. Ta tachí ra tyiño na ndu ñn ri ra cuví nuu chi tata sutu, ta tandihí ra cuenda junta. Tyicuan ta tavá ra chi ra Pablo vehe caa ta chinyacá ra chi ra nu iyó junta cuan.

23

¹ Ta ra Pablo nyehe ra chi tandihí ra chihin cha ña cahan nuu ra, ta catyí ra chi ra:

—Nyoho ra yañi yo, nyacua nya quivi ihya iyó vahi nuu Nyoo ta ñahri cha ña vaha sacuví nuu ra —catyí ra Pablo.

² Tyicuan ta ra Ananías ra cuví nuu chi tata sutu tachí ra chi ra nyicú yatyin ri nu nyaá ra Pablo, na nacañi ra ndaha yuhu ra. ³ Soco ra Pablo nacahan ra nu cahán ra ta catyí ra:

—¡Xihna ca chi maun cucañi Nyoo, vatyí sahá xaun tyi ra vaha cuvún nyaún chiña! ¿atu cutuñi chii nuun tari cuhva catyí ley? ¿Ñáá tuhun cha tachun nacañi ra chii? ta ñima tyicuan caa catyí ley —catyí ra Pablo.

⁴ Tyicuan ta ra canyicu yucuan catyí ra chi ra:

—Ña vaha cha cahún chi ra cuví nuu chi tata sutu cuenda Nyoo —catyí ra chi ra Pablo.

⁵ Tyicuan ta ra Pablo catyí ra:

—Yañi yuhu, ña chite tatu ra cuví nuu chi tata sutu cuví ra. Vatyí catyí tuhun Nyoo tyi ma cahan ña vaha yo síqui ra cuví tyiño ñuu yo —catyí ra.

⁶ Tyicuan ta tuví iñi ra Pablo vatyí suhva ra cuenda junta cuan, yihí ra cuenda ityi ra cuví saduceo. Ta inga ra yihí ra cuenda ra cuví fariseo. Tyicuan ta cahan ra chihin cha ñihi ndusu ra ta catyí ra:

—Nyoho yañi, yuhu ra fariseo cuví tari suti. Ta cutuñi chi nuu ndo vatyí chinó iñi tyi nandotó ñu chihi —catyí ra Pablo.

⁷ Cuhva cha catyí ra tuhun ihya, ra fariseo ta ra saduceo, quichahá candatuhun tahan ra suri chihin tahan maa ra, ta cacusñn ra. ⁸ Vatyí ra saduceo catyí ra vatyí ña nandotó ndiyi. Ta ni yori ángel ta ni yori tatyí ña vaha iyó catyí ra. Soco ra fariseo chinó iñi ra tandihí ihya. ⁹ Tandihí ra vaa ri ca cananduví ra. Ta ndicuitá ra fariseo, ra sacuahá cuenda ley ra Moisés, ta catyí ra:

—Nyehe xihna ndo, ñahri cha ña vaha sacuví ra ihya. Soco tatu noo ángel cahan chihin ra, saha yo cuenda coto vaha síqui Nyoo cahán ña vaha yo —catyí ra.

¹⁰ Cha chiñi ra tuhun ihya, vaa ri ca cananduví ra. Nyacua nayuhví comandante cuan coto cahnya cuatyí ra chi ra Pablo. Yucuan chaha tachi ra tyiño na tava sindaro chi ra Pablo nu nyicú ra, ta cunanyaca ra chi ra nya cuartel. ¹¹ Ta cha cuaa cuan tuví Sutu Mañi yo nuu ra Pablo ta catyí ra chi ra:

—Sanduní iñun, Pablo. Vatyí tari cahún tuhin Jerusalén ihya, tyicuan caa tucu cucahan tucun nya ñuu Roma —catyí Sutu Mañi yo chi ra Pablo.

Nu tyaa ra Israel cuhva cahñi ra chi ra Pablo

¹² Cha inga quivi, suhva ra Israel catyihí tahan ra tuhun. Catyí ra vatyí ni ma cacachi ra, ni ma coho ra nyacua nya cahñi ra chi ra Pablo. Ta nya noo ra ma sacuvi tyicuan caa na sanaa Nyoo chi ra siqui ñuhu ñáyivi, cacatyí ra. ¹³ Yaha ca uvi xico ra catyihí tahan tuhun ihya nuu Nyoo. ¹⁴ Chahan coyo ra nu nyicu ra cuví nuu chi tata sutu ta ra cacuví mandoñi cuenda ñu Israel. Ta catyí ra chi ra:

—Nyuhu ñin ri tuhun cahan ndi nuu Nyoo vatyí ma cachi ndi ta ni ma coho ndi cha ni ri ca cha ma cahñi ndi chi ra Pablo. Ta na sanaa Nyoo chi ndi tatu ma sacuvi ndi tari cuhva catyí ndi. ¹⁵ Ta vityin nyoho sacuhun ndo tuhun chi comandante. Catyí ndo chi ra na quichi nyaca ra chi ra Pablo nuu ndo ityaan. Saha ndo tuhun vatyí cuasandaa vaha ndo tyiño, ta nyuhu cuatu tuhva ri ndi nu yahá ra ta cucahñi ndi chi ra —catyí ra chi ra.

¹⁶ Soco sehe cuhva ra Pablo chiñi cue cha cahán ra. Ta chahan cue chisacoto cue chi ra Pablo nya cuartel. ¹⁷ Tyicuan ta ra Pablo cana ra chi minoo capitán. Ta catyí ra chi ra:

—Cuanyaca chi ra cuehe luhlu ihya nuu comandante vatyí iyó noo tuhun cuñí cue sacoto cue chi ra —catyí ra Pablo chi ra.

¹⁸ Tyicuan ta chinyaca capitán cuan chi cue nuu comandante. Ta catyí ra chi ra:

—Ra Pablo cha ñohó vehe caa cana ra chii ta catyí ra chii vatyí quichi nyaque chi ra cuehe luhlu ihya vatyí cuñí cue cahan cue chuhun —catyí ra chi ra.

¹⁹ Tyicuan ta tiñ comandante ndaha ra cuehe luhlu cuan ta tava siñ ra chi cue ta catyí ra chi cue:

—¿Ñáá túhun cuñún catyun chii?

²⁰ Ta ra cuehe luhlu cuan catyí cue chi ra:

—Ra Israel catyihí tahan vaha ra tuhun vatyí catyí ra chuun na sacuhun chi ra Pablo nu iyó junta tyaan. Vatyí casaha ri maa ra cha cuñí ra cha cutuñi vaha ca chi ra. ²¹ Soco ma chino iñun chi ra vatyí yaha ca uvi xico tahan ra nyatú xehe chi ra ityi. Ta tyanaha ra chihin nuu Nyoo vatyí ma cachi ra ta ma coho ra nyacua nya cahñi ra chi ra Pablo. Ta tatu ña cuví cahñi ra chi ra, vaha taxín ca nacúvi noo noo maa ra na. Ta vityin nyatú tuhva ra coto ra ñáá cucatyí maun —catyí cue.

²² Tyicuan ta catyí comandante chi ra cuehe luhlu cuan vatyí yori chihin cahán cue tuhun cha catyí cue chi ra. Yaha cuan ta natachi ra chi cue.

Nu cacu ra Pablo ndaha ra Israel ta cuahan ra nuu ra gobernador cha nañi Félix

²³ Tyicuan ta comandante cana ra chi uvi capitán, ta catyí ra chi ra:

—Sanduvaha ndo chi ndo vatyí cuhun ndo Cesarea cuhva caa ñin cha cha cuaa. Cuacuhun uvi ciento sindaro chihin chaha ra, ta uñi xico uchi ra chihin caballo, ta uvi ciento ra cuiso ra lanza. ²⁴ Sanduvaha ndo caballo coso ra Pablo. Ta saha cuenda vaha ndo chi ra ityi cuahan ndo na chaa vaha ra nu nyaa ra Félix gobernador —catyí comandante chi capitán cuan.

²⁵ Tyicuan ta tyaa ra noo tutu quindaha ra cuhun ra. Ta tuhun cha tyaa ra nu carta, ican cuví ihya:

²⁶ “Yuhu ra Claudio Lisias sacuhin noo carta ihya chi yoho, tata gobernador Félix, vatyí vaha ñáyivi cuvun. Ihya vachi nocumi chuun.

27 'Ra Pablo ihya, catiñ ra Israel chi ra. Ta cacuñi ra cacahni ra chi ra. Soco cuhva cha chite vaty ra cuenda ñuu Roma cuví ra, chahin chihin sindaro ta sacaqui chi ra. 28 Ta vaty cuñi cote ñáá cuaty tyaá ñu siqui ra, chinyaque chi ra nu iyó junta ra cacuví mandoñi ñu Israel. 29 Soco cuenda ley ri maa ñu cuví. Ta cha cuenda ley yoó, ñahri cuaty ra ta cahni yo chi ra. Ta ni ri ña tahán chi cohon ra vehe caa. 30 Soco vaty ñihi tuhun vaty ra Israel canducu cahni ra chi ra, yucuan chaha tachi chi ra nuu yoho. Ta catyí tiqui chi ra cha tyaá cuaty siqui ra, na cuhun ra nu nyaun na cacan ra cuaty ra nuu maun", catyí ra Claudio chi ra Félix nu tutu cha tyaá ra.

31 Tyicuan ta quehen sindaro chi ra Pablo tari cuhva catyí ra Claudio chi ra, ta chinyaca ra chi ra nya Antípatris suri maa cha cuaa cuan. 32 Cha inga quivi sindaro cha cuahan chihin chaha, canandichi coyo ra nya cuartel. Ta ra cha cayosó caballo cuahan coyo ca ra chihin ra Pablo. 33 Ta cuhva cha chaá coyo ra ñuu Cesarea, cachaha ra carta cuan chi ra Félix, gobernador, ta cachaha cuenda ra chi ra Pablo chi ra ñandihí. 34 Cha yaha cha sacuaha ra Félix carta cuan, quichaha ndacá tuhun ra chi ra Pablo nya ñuu ra. Ta cha chito ra vaty ra Cilicia cuví ra 35 ta catyí ra chi ra:

—Na quichi xihna ra tyaá cuaty chahun. Tyicuan ta cusandai tyiño —catyí ra chi ra.

Tyicuan ta tachi ra tyiño na casaha cumi sindaro chi ra nya vehe tyiño cha savaha ra Herodes ta cha naha.

24

Nu cutuñi chi ra Pablo nuu ra Félix

1 Yahá ohon quivi ta ra Ananías, ra cuví nuu chi tata sutu, chaá ra ñuu Cesarea cuan chihin suhva ra cacuví mandoñi, ta chihin noo ra cahan chaha ñáyivi cha nañi Tértulo. Chaá coyo ra nuu ra gobernador Félix vaty cacan ra cuaty chaha ra Pablo. 2 Tyicuan ta tachi ra Félix na quichi

nyaca sindaro chi ra Pablo. Tyicuan ta quichaha chican ra Tértulo cuaty chaha ra Pablo. Ta catyí ra chi ra Félix:

—Tyahvi nyoo chuun, tata gobernador. Vaty taxi ri iyó ñuu ndi, ta vaha iyó ndi vaty yindaha vahun ñuu ndi. 3 Nacuhvá xaan ndi tyahvi nyoo chi yoho tata Félix, vaty yoho, vaha ñáyivi cuvún. 4 Soco ña cuñi sayangue chuun chihin cha cuaha tuhun cahin, yucuan chaha chiquén noo tumañi ñhi chuun na cuiñun suhva tuhun cuacahan ndi. 5 Vaty chito ndi tyi rayi ihya ñima ra vaha cuví ra, noo cuehe cuví ra. Ta tandihí ri ityi sanaquiquí ra chi ñu Israel. Ta ican ra cuví xiñi noo ityi ñáyivi nyicón chi ra Jesús ra ñuu Nazaret. 6 Nyacua cuñi ra sacuvi ra noo cha ña tahán chi vaty ña sahá ra ñáyivi vehe ñuhu cahnu. Ta nyuhu tñin ndi chi ra, tacuhva tachi tuñi ndi chi ra tari cuhva ley maa ndi. 7 Soco comandante Licias chasi ri ra ta chihin cuaha fuerza ta tinyaá ra chi ra chi ndi. 8 Ta catyí ra vaty tatu cuñi ndi cacan ndi cuaty chaha ra, cuñi chi cha cacan ndi nuu maun. Nyehe maun. Sanahmon chi ra ta coton tyi ndicha cha catyí ndi —catyí ra Tértulo.

9 Tyicuan caa tucu ra Israel cha canyicu yucuan, catyí ra vaty ndicha tandihí tuhun cahan ra Tértulo. 10 Tyicuan ta ra Félix savaha ra seña chi ra Pablo vaty nacahan ra. Ta ra Pablo quichaha catyí ra:

—Chité tyi cha cuaha xaan cuiya nyacá ñahun ñuu ihya. Ta yucuan chaha sii vavaha cuñi vaty nuu maun cuacutuñi chi yuhu vityin. 11 Tatu ndaca tuhun cuacoton tyi cha iyó ri noo uchi uvi quivi cha chahin Jerusalén. Chahin yucuan vaty sacahni chi Nyoo. 12 Ta yori chihin cuví yuhi. Ni ña sanaquiquí chi ñáyivi chichi vehe ñuhu cahnu. Ñahri maa sacuvi, ni ri chichi vehe ñuhu, ni ri chichi ñuu. 13 Ta cuaty cha tyaá ra ihya siqui, ña ndicha maa. 14 Soco noo cha catyí chi ndo vityin vaty yuhu sacahni chi Nyoo cha sacahnü sutu

chahni. Sacahní chi ra cuhva sañahá ra Jesucristo. Ta catyí maa ra ihya tyi ña vaha. Soco yuhu chinó iñi ndi maa tuhun cha nyaá nu libru ley cha tyaa ra Moisés. Ta chinó iñi tandihi tuhun catyaa ra profeta cuenda Nyoo ñandihí. ¹⁵ Ta suri chinó iñi vatyí Nyoo cusanandoto ra ñáyiví chihí, ñu vaha ta ñu quiñi iyó, tari chinó iñi tucu maa ra ihya. ¹⁶ Ta yucuan chaha tyicuan ri nduquí cuhva cha cachi coí nuu Nyoo, ta nuu ñáyiví ñandihí.

¹⁷ 'Cuaha cuiya chica noí inga ityi. Yaha cuan ta cuanuhi nya Jerusalén ñui vatyí nacuhva cuende xuhun chi ñu ndahvi ñu yihí cuenda Nyoo, ta vatyí cuhve noo cha cuhve chí Nyoo. ¹⁸ Yuhu tyicuan caa sacuví chichi vehe ñuhu cahnu, ta suhva ra Israel ityi Asia, nyehe ra chii yucuan cha yaha cha sandundií chii nuu Nyoo cuhva catyí maa nu ley ndi. Soco ña cuaha ñáyiví nyicu, ta ni ña naquiquí ñu. ¹⁹ Ican ra cha nyehe chii cuan, cuñí chi cha quichi ra ta cuhva ra cuenda tatu iyó cha sacuví. ²⁰ O ñacatyí maa ra cha canyicu ihya tatu ñañihí ra cuatyí yuhu quiví cutuñí chii nuu ra nu chiyo junta ra cacuví nuu chi ñu Israel. ²¹ O vasi cuví chi cha cuenda noo ri tuhun cahin chihin nuu ra nyicú junta cuan tyehe caa: "Nyoho nducú ndo cuatyí chahi cha cuenda tyi chinó iñi cha nandotó ñáyiví chihí" —catyí ra Pablo.

²² Ta ra Félix chitó vaha ra yoso caa cuahan tuhun ñu nyicón chi ra Cristo. Ta catyí ra chi ra canyicu cuan:

—Vaha ri vityin. Na quichi xihna comandante Lisias. Tyicuan ta cusandai tuhun ndo —catyí ra.

²³ Tyicuan ta tachí ra Félix chi capitán na cunatyihí ra chi ra Pablo vehe caa. Soco ma ñihi xaan saha cumi ra chi ra. Ta na cuhva ra cuhun ra tahan ra nu ñohó ra, ta cahan ra chihin ra.

²⁴ Yaha suhva quiví ta nachaa ra Félix inga chaha chihin cu Drusila ñasihí ra. Ta cuví ña ñaha Israel. Ta tachí ra na quichi ra Pablo vatyí cuñí ñu tyasoho ñu yoso caa tuhun cha

chinó iñi ra chi ra Jesucristo. ²⁵ Ta ra Pablo cahan ra tuhun yoso caa tahan chi sacuvi yo cha vaha, yoso caa cunyaca ñaha maa yo chi yo ta ma sacuvi yo cha quiñi caa. Ta cahan tucu ra yoso caa cucutuñi chi yo nuu Nyoo quiví tahan chi. Ta ra Félix yuhví xaan ra cuvi, ta catyí ra chi ra:

—Cuahan vityin. Ta na nanuña xihne, ta cana mai chuun inga chaha —catyí ra chi ra.

²⁶ Ta ra Félix cuñí maa ra tyi ra Pablo cucuhva ra xuhun chí ra, tacuhva vatyí numi ri saña ra chí ra. Yucuan chaha vatyí tyito tyito ri cana ra chí ra, vatyí ndatuhun ra chihin ra. ²⁷ Uvi cuiya yaha, tyicuan ta ñicunyaa ra Porcio Festo cuví ra gobernador tyiño nuu ra Felix. Ta ra Felix cuñí ra cuvaha ra nuu ra Israel ta sandoo ra chí ra Pablo vehe caa.

25

Nu cutuñí chi ra Pablo nuu ra Festo

¹ Tyicuan ta cha cu uñi quiví cha cuví ra Festo tyiño, quita ra ñuu Cesarea cuan ta cuahan ra nya ñuu Jerusalén. ² Chaa ra Jerusalén, tyicuan ta chaa coyo ra cuví nuu chí tata sutu ta ra cuví tyiño ñu Israel ta cachican ra cuatyí chaha ra Pablo. ³ Ta chican ra noo tumañi iñi cahnu chí ra Festo. Cuñí ra vatyí tachi ra Festo tyiño na quichi nyaca sindaro chí ra Pablo nya Jerusalén. Vatyí maa ra cuñí ra cahni ra chí ra ityi vachi ri ra. ⁴ Soco ra Festo nacahan ra, ta catyí ra:

—Ra Pablo ñohó ra vehe caa nya Cesarea. Ta yuhu tyaí cuhva cha cunuhi yucuan cha numi ri. ⁵ Yucuan chaha, nyoho cha cuví ndo tyiño ñuu ihya, cuhun maa ndo chihin. Tyicuan ta cuví cacan ndo cuatyí chaha ra tatu iyó cha sacuví ra —catyí ra Festo chí ra.

⁶ Uña o uchi ri quiví chí nyaa ra Festo Jerusalén, ta cuanuhu ra Cesarea. Ta cha inga quiví chaa ra chichi vehe tyiño ra vatyí cutuñi chí ra ca iyó cuatyí nuu ra. Tyicuan ta cana ra chí ra Pablo. ⁷ Cuhva

cha quihvi ra Pablo, catuhva ra Israel cha quichi coyo nya Jerusalén, ta quichaha catyaa ra cuatyí cahnú síqui ra. Soco ñahri maa cha ndaa catava ra. ⁸Tyicuan ta cahan ra Pablo ta catyí ra:

—Yuhu ni noo cuatyí ta sacuvi que, ni síqui ley ñu Israel, ni síqui vehe ñuhu cahnú Jerusalén, ni síqui rey cahnú Roma —catyí ra.

⁹Soco vatyí cuñí ra Festo ndoo vaha ra chihin ra Israel, ndacá tuhun ra chi ra Pablo:

—¿Atu cuñún cahun Jerusalén vatyí sandaí tyiñon nyicuan? —catyí ra chi ra.

¹⁰Ta ra Pablo catyí ra:

—Cha nyaí nu maun. Ta maun cuví ra cuví tyiño cuenda rey cahnú Roma. Ihya cuví nu tahán chi cutuñi chíí, vatyí ra cuenda ñuu Roma cuví. Ta chitó vahun tyi ñahri maa sacuvi chi ñu Israel. ¹¹Tatu sacuvi noo cuatyí cahnú cha tahán chi cahñi ndo chíí, ma nduqui cuhva caqui. Soco tatu ña ndicha tuhun cha cahan ra Israel ihya, yori cha iyó ityi chíí cha cuhva cuenda chíí chi ra cuñí cahñi chíí. Chiquén vatyí cuhin nuu rey cahnú vatyí cutuñi chíí nuu maa ra —catyí ra Pablo chi ra Festo.

¹²Tyicuan ta ra Festo cha yaha cha cahan tahan ra chihin ra tyinyeé chi ra chihin tyiño, ta catyí ra chi ra Pablo:

—Chicón cha cutuñi chuun nuu rey cahnú. Vaha. Cua cahun nuu maa ra —catyí ra chi ra.

Nu nacatyí ra Festo tuhun ra Pablo chi ra Agripa

¹³Yaha suhva quivi, tyicuan ta chaq rey Agripa chihin cu Berenice nya Cesarea, vatyí cuacuhva ñu nocumi chi ra Festo. ¹⁴Quita suhva quivi chinyicu ñu yucuan, ta nacatyí ra Festo tuhun ra Pablo chi rey. Ta catyí ra:

—Iyó noo rayí ihya cha sandoo ra Félix vehe caa. ¹⁵Ta cha chahin Jerusalén, ra cuví nuu chi tata sutu, ta ra cacuví mandoñi ñu Israel chaha cuenda ra noo tutu cuatyí ra, ta chicán ñu na cúvi ra. ¹⁶Ta catyí yuhu chi tandihí ra vatyí ña tuhvá ra cuví

tyiño cuenda Roma chahñi chi noo ñáyivi tatu ta cahan tahan ca ñu ta nducu ñu cuhva sacacu ñu chi ñu. ¹⁷Yucuan chaha, quivi quichi coyo ra cacuví nuu chi ñu Israel cuan, ña sacunai cuhva. Ta cha inga quivi chahin vehe tyiño vatyí cutuñi chíí ra cha cacahán ra tuhun. Ta tachi tyiño na quichi ra cuan. ¹⁸Soco ra catyaa cuatyí síqui ra, ña cuaha maa tuhun cacahan ra. Ta cuñí maa yuhu vatyí cahnú cuatyí cuatyaa ra síqui ra. ¹⁹Cuñí ra cuan cuatyí chihin ra cha cuenda tuhun costumbre, cuhva chinó iñi ñu Israel. Cahán ra tuhun noo ra cha nañí Jesús cha chíí. Ta ra Pablo catyí ra vatyí iyó ra. ²⁰Ta ña chité yoso caa sacuvi chihin tuhun cha tyicuan caa, ta ndaca tuhun chi ra Pablo tatu cuñí ra cahun ra Jerusalén, vatyí cutuñi chíí ra cuenda tuhun ihya. ²¹Soco maa ra chicán ra cha cutuñi chíí ra nuu rey cahnú Augusto nya Roma. Yucuan chaha ñohó ca ra vehe caa nyacua nya cuví tachi chíí ra nuu ra Augusto —catyí ra Festo chíí rey Agripa.

²²Tyicuan ta ra Agripa catyí ra chi ra Festo:

—Cuñí tucu yuhu cuiñi cha cahan ra cuan —catyí ra.

Ta ra Festo catyí ra chíí ra:

—Tyaan cuiñun cha cahan ra —catyí ra chíí ra.

²³Tuvi inga quivi ta chaq ra Agripa chihin cu Berenice. Iyo xaan caa ñu quihvi coyo ñu chichi vehe vatyí rey cuví ñu. Quihvi tucu comandante ta ra cacuví tyiño ñuu cuan. Tyicuan ta ra Festo catyí ra na quichi ra Pablo.

²⁴Tyicuan ta quichaha catyí ra Festo:

—Yoho Rey Agripa, ta nyoho tata, cha nyicu ndo ihya. Nyehe ndo chíí ra ihya. Tandihí ñu Israel ñuu Jerusalén ta ñu Cesarea cahan ñu síqui ra. Ta ña sandihí ñu cha catyí ñu chíí vatyí tahán chíí cúvi ra. ²⁵Soco cha cuenda yuhu ñahri cuatyí ra cha tahán chíí cúvi ra. Ta suri maa ra chicán cha cutuñi chíí ra nuu ra Augusto. Yucuan chaha cutachi chíí ra. ²⁶Soco vatyí ñahri cuatyí ra ñihí, yucuan

chaha ña ñihí tuhun tyai nu tutu cha cusacuhin chi ra nyacá ñaha chi yo. Yucuan chaha cané chi ra Pablo nuu ndo, ta nuu yoho Rey Agripa, tacuhva tyi ndaca tuhun chi ra ta cote ñáá cha tahán chi sacote chi rey cahnu. ²⁷ Vatyí ña vaha cha sacuhín chi ra tatu ñahri tuhun cahín ñáá cuatyí ra.

26

Nu quichaha cahán ra Pablo nuu rey Agripa

¹ Tyicuan ta ra Agripa catyí ra chi ra Pablo:

—Cuví cahun vityin —catyí ra chi ra.

Ta ra Pablo sandaꝓ ra ndaha ra ta catyí ra tyehé caa:

² —Sií xaan cuñí vatyí cuví cahin nuu yoho, rey Agripa, ta cuví catyí mai chuun yoso caa tandihí cuatyí cha tyaá ra Israel siqui. ³ Vatyí, yoho chitón tandihí costumbre cha iyó chi yo ñu Israel. Ta chitón tuhun tuhva yo cuvi yuhu. Yucuan chaha chiquén chuun nacuíñi vahun cha cahín.

Nu catyí ra Pablo chi ra Agripa yoso caa ñayiví ra cha ni cumañi ca quihví ra cuenda ra Cristo

⁴ Tandihí ñu Israel chitó ñu yoso caa chiye nyata ni luhli nya ñui. Ta chitó ñu cuhva chiye nya Jerusalén. ⁵ Ta suri chitó ñu vatyí nyata luhli cuví noo fariseo. Ta ra fariseo vaha xaan caquichahá ra costumbre yo. Ta na catyí maa ñu tatu ña ndicha cha cahín. ⁶ Ta vityin nanyaí ihya ta cutuñi chii cha cuenda vatyí chinó iñi cha sanandotó Nyoo chi ñáyiví chihí, tari cuhva catyí ra chi sutu chahnu yo ta cha naha. ⁷ Ndi uchi uvi tahan ityi ñáyiví Israel ñu vachi tata sutu chahnu yo nyatú tucu ñu nyehe ñu tyi ndicha cusanandoto Nyoo chi ñáyiví chihí. Ta yucuan chaha nyita ri sacuví ñu tyiño nuu Nyoo sacahnu ñu chi ra ñicahñu ta cha cuaa. Vatyí suri cha cuenda tuhun ihya tyaá ra Israel cuatyí siqui vityin, yoho rey Agripa. ⁸ ¿O ña chinó iñi nyoho vatyí Nyoo sanandotó ra chi ñu chihí?

⁹ 'Ta quiví cuan suri mai chica xiñi vatyí vaha cha tachi tuñi chi ñáyiví chinó iñi chi ra Jesús ra ñuu Nazaret. ¹⁰ Ta tyicuan caa chinyacuví nya Jerusalén chihin ndusu yuhu ra cacuví nuu chi tata sutu. Ta cuaha ñu cha chinó iñi chi ra Cristo tyihí vehe caa. Ta tatu cachahñi ra chi ñu, vaha xaan cuñi. ¹¹ Cuaha chaha sanyehí tindoho chi ñu ta sahi fuerza chi ñu nacahan ña vaha ñu siqui ra Jesús. Tyehé caa chinyacuví tandihí ri vehe ñuhu ñu Israel. Ta xaan xaan cuñi nyehi chi ñu. Ta chica nyiquen chi ñu nyacua nya inga ñuu.

Nu nacatyí tucu ra Pablo yoso caa nanduví ra, ra cuenda ra Cristo (Hch. 9.1-19; 22.6-16)

¹² 'Ta yucuan chaha cuahin quiví cuan nya ñuu Damasco chihin ndusu yuhu ra cuví nuu chi tata sutu. ¹³ Soco yoho Rey, ityi cuahin ñáá cuhva ora, nyehí noo nduva ñuhu quichí andiví, ñihi ca ican saha ñuhu ñanyii. Sandundichin chi nicachico nu cuahin ta ra cuahan coyo chihin. ¹⁴ Tyicuan ta tandihí ndi nduva ndi nu ñuhú. Ta chiñi noo ndusu cha cahán chihin, chihin sahan yo hebreo, ta catyí chi chii: “Saulo, Saulo, ¿ñáá tuhun cha chicá nyicon chii? Tari noo quití chañí nyaa ti chata cha xaan cha saquehén ityi ra chi ti, tyicuan caa cuñún sañicuehun suri chi maun”, catyí ndusu cuan chii. ¹⁵ Tyicuan ta catyí yuhu: “¿Yóó yoho tata?” Ta Sutu Mañi yo catyí ra chii: “Yuhu cuví ra Jesús, ra cha chicá nyicon chi. ¹⁶ Ndicuita ta cuinanyaun, vatyí yuhu tuví nuun tacuhva vatyí cuasacuvun tyiño nui, vatyí cuacuvun cha ndaa cha nyehun vityin. Ta cucuvun cha ndaa cha nyehun chii nu cuahan ca chi. ¹⁷ Cusacaqui chuun ndaha ra Israel, ta ndaha ra cha ñima ra Israel cuví. Nu nyicú ñu tachí chuun vityin. ¹⁸ Vatyí na nuñon nuu ñu, ta sañahun chi ñu cha ndicha, ta ma sacuvi ca ñu cha ña vaha. Soco sacuvi ñu cha vaha nu ndichin Nyoo vatyí quita ñu chichi ndaha ra ña vaha ta ndihví ñu ndaha Nyoo tacuhva vatyí tyicuan

caa cusahi tıcahnu iñi cuatyí ñu ta cunaquehen ñu cha vaha cha chahá Nyoo chi ñáyivı yihı cuenda ra”, catyí Sutu Mañi yo chii.

19 Yucuan chaha rey Agripa, sacuvı cha catyı Sutu Mañi yo ra Jesucristo chii nu sañaha ra chi ra chii. 20 Ta cahın tuhun ra xihna ca chihin ñu nyicu ñuu Damasco. Yaha cuan ta cahın chihin ñu ñuu Jerusalén ta tandıhi ityi Judea. Ta cahın chihin ñu cha ñima ñu Israel cuvı ñandıhi. Sacote chi ñu nandu uvi iñi ñu cuatyı ñu, ta nandıhvi ñu chichi ndaha Nyoo cha ndicha cuı. Na nasama ñu cuhva iyó ñu chihin cha sacuvı ñu cha vaha. 21 Cha cuenda ihya catıın ra Israel chii chichi vehe ñuhu cahnu. Ta cacuñi ra cahñi ra chii. 22 Soco maa Nyoo tyinyeé chii. Ta iyó que nya vityin. Ta cahın tuhun Nyoo chihin tandıhi ñáyivı, ñu ndahvi ta ñu tyayı. Ta ña cahın inga tuhun cha ña catyı ra Moisés ta ra profeta, vatyı cucuvı nu cuahan ca chi. 23 Vatyı catyı ra vatyı tahán chi cha cunyehe ra Cristo tındoho. Ta cha yaha cha cúvi ra, cunandoto ra. Ta ıcan ra cuvı ra cunandoto xihna ca. Ta cusacata ra tari noo ñuhı ityi cuahan ñáyivı vatyı sacotó ra yoso caa cacu añima ñu, ñu Israel ta ñu cha ñima ñu Israel cuvı —catyı ra Pablo.

Ra Pablo cuñı ra cha nachino iñi rey Agripa ta cunyicon ra chi ra Cristo

24 Cuhva cha catyı ra Pablo tuhun ihya, ra Festo canachaa ra, ta catyı ra: —ıLoco yoho Pablo! cha cuenda cha cuaha xaan sacuahún ta nduloc —catyı ra Festo chi ra.

25 Soco ra Pablo catyı ra chi ra:

—Ña loco yuhu, yoho tata Festo. Soco cha cahın, maa maa ri tuhun ndicha cuvı. 26 Ihya nyaá rey Agripa. Ta chıtó vaha ra tuhun ihya. Yucuan chaha cahın chihin cha ña cahán nuı. Vatyı chıté tyı chıtó tucu maa ra tuhun ihya, vatyı ñima tuhun xehe cuvı. 27 Yoho rey Agripa, ¿atu chinó iñun tuhun cha catyaa ra profeta cuenda Nyoo ta cha naha? Yuhu chıté

vatyı chinó iñun —catyı ra Pablo chi ra Agripa.

28 Tyicuan ta ra Agripa catyı ra chi ra:

—Suhva cuiı ri ca ta nachino iñi tuhun cahun ta quıhvi cuenda ra Jesús —catyı rey Agripa chi ra Pablo.

29 Tyicuan ta ra Pablo catyı ra:

—Cuvı ri suhva, o cuvı ri cuaha soco chi Nyoo chiquén vatyı na nduvi ndıhun ñáyivı cuenda ra Jesús tari mai. Ta ñima yoho ri, soco tandıhi ri ñáyivı, ñu chiñı tuhun cahın. Noo ri cha ña cuñı, cha quıhi cadena ndaha ndo tari mai vityin —catyı ra Pablo.

30 Cha yaha cha catyı ra Pablo tuhun ihya, ndıcuita rey ta gobernador ta cu Berenice, ta tandıhi ra canyicú yucuan. 31 Ta cha yaha quita coyo ñu, ta cacatyı ñu chi tahan ñu:

—Ñahri cuatyı ra ihya cha ñihi xaan. Ña tahán chi cúvi ra. Ta ni ña tahán chi cohon ra vehe caa —catyı ñu.

32 Ta ra Agripa catyı ra chi ra Festo:

—Cuvı saña yo chi ra, tyehe ta ñima maa ra chicán cha cutuñi chi ra nuu ra cuvı rey cahnu —catyı ra.

27

Nu tachı ra Festo chi ra Pablo nya ñuu Roma

1 Quıvi cha catyaa ra Festo ta ra Agripa cuhva tyı tachı ra chi ndi nya ñuu Roma ityi Italia, nacuhva cuenda ra chi ra Pablo ta suhva ca ra chi noo capitán cha nañı Julio. Yihı ra noo batallón sindaro, cha nañı Cuenda Ra Augusto. 2 Ta cuahan tucu ra Aristarco chihin ndi ñandıhi. Ra ñuu Tesalónica cha nyaá ityi Macedonia cuvı ra. Tyicuan ta quıhvi ndi chichi noo barcu cha quıchı ityi ñuu Adramitio ta cuhun chi ñuu cha nyicú yuhu tyañuhu ityi Asia. 3 Cha inga quıvi chaa ndi puerto Sidón. Ta ra Julio vaha ñáyivı cuvı ra chihin ra Pablo. Ta chaha ra cha cunyehe ra chi ra tahan ra ñuu cuan. 4 Yaha cuan ta quita ndi Sidón ta casanda ra sahma barcu cuan ta chihin fuerza tatyı ri cuahan ndi. Ta vatyı caa tatyı sıqui ndi yaha ndi chiyo xehe ca ñuhı

Chipre. Vatyí ña ñihi xaan caa tatyí chiyo cuan. ⁵ Yaha sava ndi tyañuhu ityi nuu Cilicia ta Panfilia, ta chaã ndi noo ñuu cha nañi Mira ityi Licia. Ta noo ndi barcu cuan.

⁶ Yucuan nañihí capitán cuenda sindaro nonga barcu cha quichi nya ñuu Alejandría ta cuahan chi Italia. Ta catyí capitán na quihví ndi barcu cuan vatyí cuhun ca ndi nu cuahan ndi. ⁷ Cuaha quiví chica ndi cuee ri. Ta chihin cha cuaha tindoho ta chaã ndi yatyin ri ñuu Gnido. Ta cha cuenda cha ñihi xaan caá tatyí, ña chaha chi cha cuhun ndi ityi nuu, ta yaha ndi yatyin ri ñuu Salmón. Ta nacuico ndi ityi yuhu ñuhú Creta. ⁸ Nducu ndi cuhva cha cuhun ndi yuhu tyañuhu cuan ta chaã ndi nu nañi Buenos Puertos yatyin ri ñuu Lasea.

⁹ Cha cuaha xaan quiví yaha ta cha yíca xaan nanduví cha caca noo ndi ityi nu tyañuhu. Vatyí cha yaha quiví vico ayuno nu ña chachi ñu Israel. Ta cha cuyatyin yoo vichin. Yucuan chaha ra Pablo chaha ra tuhun chi ra sacaca barcu cuan, ¹⁰ ta catyí ra:

—Nyoho ra canyicú ihya, cuñi ndo tuhun cahín. Nyeheí vatyí yíca xaan cuhva cuahan yo. Ta tuví iñi vatyí cuaha xaan cusacunaá yo. Cunaa barcu ta cha nyisó chi ta nyacua nya maa yo ñandihí. Vaha taxin ca nandoo yo ihya —catyí ra chi ra.

¹¹ Soco capitán cuenda sindaro cuan quichaha ca ra chi ra sacaca barcu chihin chitoho barcu ta ñima ca chi ra Pablo. ¹² Ña cuví yaha ndi yoo vichin yucuan tyi ñihi xaan tuhva caa tatyí, ta yíca xaan cuenda barcu. Yucuan chaha tandihí ra ta catyí ra:

—Vaha ca cha quita yo ihya ta nducu yo cuhva chaã yo nya ñuu Fenice suri ñuhú Creta ihya. Yucuan cuví noo nu vaha cunyaa barcu vatyí nyaa ñuu cuan chiyo caña ñanyii —catyí ra.

Nu ñihi xaan caá tatyí nu tyañuhu

¹³ Tyicuan ta quichaha caa chiin tatyí cha quichi ityi sur. Ta cuñi maa ra vatyí vaha xaan vatyí ñima

tatyí ñihi cuví, ta cuví cuhun ra chihin barcu ra nicañi ri yuhu tyañuhu ñuhú Creta cuan. ¹⁴ Ña cuaha ri chicá ra ta quichaha caa noo tatyí xaan cha quichí ityi norte. Ta tyandahá chi barcu inga ityi. ¹⁵ Ta ña cuví ca cuhun ndi ityi nuu ca cha cuenda tatyí cuan. Ta saña ndaha ndi nacuhun maa barcu chihin tatyí nya ityi cuñi maa chi. ¹⁶ Ta tyandahá tatyí chi ndi ityi chiyo satyín noo ñuhú luhlu cha nañi Clauda. Ta chihin cha yí xaan naquehen ndi lancha luhlu cha xitá quiñoho barcu, ta natyihí ndi ityi chichi barcu coto nyee chi. ¹⁷ Ta cha yaha natyihí ra lancha cuan, yucuan ta chahñi vaha ra yoho nicachico barcu vatyí coo fuerza chi. Ta yuhví ra coto tahan ra nu yaxin ndutya ta quihví barcu cuan chichi ñiti vita iyó yuhu tyañuhu nu nañi chi Sirte, yucuan chaha sanoo ra sahma barcu ta chaha ra cha cuhun barcu yoso cuhva tyandahá tatyí. ¹⁸ Ta cha inga quiví suri ñihi xaan caá tatyí. Yucuan chaha quichaha catuchi ra carga nu tyañuhu. ¹⁹ Ta cha cu uñi quiví quehen ndi ndaha tyiño barcu ta tyihí ndi nu tyañuhu. ²⁰ Ta cuaha quiví ña nyehe ndi ni ñanyii ta ni tiño. Ta ñihi tatyí nañi chi ndi. Yucuan chaha ña tyaa ca ndi cuhva cha cacu ndi.

²¹ Cuaha quiví yaha ta ña chachí ndi. Tyicuan ta catyí ra Pablo chi tandihí ra:

—Nyehe ndo, vaha ca tyehe ta quichaha ndo chii quiví cuan, ta ndoo taxin yo Creta cuan. Ta vityin nyehé xaan yo tindoho ihya ta cuaha ndaha tyiño sacunaá yo. ²² Soco vityin ma caca xaan iñi ndo vatyí ni noo yo ta ma cuví yo. Barcu ihya cuví cha cunaa. ²³ Vatyí Nyoo nyacá ñaha ra chii, ta sacuví tyiño nuu ra, sanyehe ra noo visión chii cuñi. Ta tuví noo ángel nui. ²⁴ Ta catyí ángel cuan chii: “Ma yuhvun, Pablo. Vatyí cuñi chi cha cahun tuhun Nyoo nuu rey cahnu Augusto nya Roma. Ta cha cuendon cusacacu Nyoo tandihí ra canyicu chuhun chichi barcu”, catyí

ángel cuan chii. ²⁵ Yucuan chaha nyoho cha ñohó ndo chichi barcu, sanii ndo iñi ndo. Vatyí yuhu chinó iñi chi Nyoo. Ta chitó vahi vatyí cuví tari cuhva catyí ángel cuan chii. ²⁶ Vasi cuanyee barcu soco cuachaa yo noo ñuhú luhlu —catyí ra Pablo chi tandihí ndi.

²⁷ Noo cha cuaa quiví ndihí chahun quiví chicá ityi ndi nu tyañuhu, ñohó ndi nu tyañuhu Adria. Ta chata cuan chata ihya tyandahá tatyí chi barcu ndi nu tyañuhu. Ta vasi ora ñuu cuví cuhva cuan ta tuví iñi ra sacacá barcu cuan tyi cuachaa ndi noo ñuhú.

²⁸ Tyicuan ta tyicuhvā ra cha cono ndutya. Ta nyehe ra tyi oco chahun iñi tahan metro iyó. Cuahan ndi chiin ca ityi nuu ca. Ta tyicuhvā tucu ra inga chaha. Ta iyó oco ucha metro.

²⁹ Ta cayuhví ra coto nañi barcu cuan chata yuu. Yucuan chaha casanoó ra cumi tahan caa vee cha nyaa gancho nuu, ityi chata barcu. Ta ña iñi ca ra cha cundichin. ³⁰ Ta ra sacacá barcu cuan catyā ra cuhva cacono xehe ra. Ta yucuan chaha quichaha casanoó ra lancha cuan nu ndutya ityi nuu barcu cuan. Ta sahá ri maa ra tyi inga caa casanoó ra. ³¹ Soco ra Pablo sacoto ra chi capitán ta chi sindaro ta catyí ra:

—Tatu ma ndoo ra cuan chichi barcu. Nyoho ma cuví cacu ndo —catyí ra chi ra.

³² Tyicuan ta sindaro cachahnyā ra yoho lancha. Ta casanacavā ra nu ndutya. ³³ Ta cha ñaa ca cuan ra Pablo catyí ra chi tandihí ra:

—Cha iyó uchi cumi quiví cha ta cachi ca yo. ³⁴ Catyí chi ndo, na cachi yo vityin. Niñi xaan cuñí chi cha cachi yo ta ndunye coño ñuhu yo. Vatyí cucacu yo ta ni noo ixi xiñi yo ta ma cunaa.

³⁵ Ta cha catyí ra tuhun ihya, ra Pablo quehen ra noo pan ta nacuhvā ra tyahvi nyoo chi Nyoo nuu tandihí ra. Tyicuan ta tahvī ra ta quichaha chachi ra. ³⁶ Tyicuan ta tandihí ca ra candunii ca iñi ra ta cachachi ra ñandihí. ³⁷ Ta cha tandihí ndi cha

ñohó ndi chichi barcu cuan, quita uvi ciento uñi xico chahun iñi tahan ñáyivi. ³⁸ Cuhva cha ndihí ca chachi ra ta tuchi ra yitín cha yihí trigu nu tyañuhu na nduñahma ca barcu.

Nu nyeé barcu

³⁹ Yahā cuan ta cundichin. Ta canyehe ra cha sacacá barcu noo ñuhú, soco ña canicohon nuu ra nya cuví cuan. Nyehe ra noo nu iyó ñiti. Ta catyaa ra cuhva nyehe ra tatu cuví sacahun ra barcu yucuan. ⁴⁰ Cachahnyā ra yoho cha nuhñí caa vee cuan. Ta sandoó ra chichi tyañuhu. Ta casandutayā ra vitu cha sanacuico barcu. Tyicuan ta casandaā ra sahma cha tuhvá chitacaá ityi nuu barcu. Ta quichaha quehen tatyí sahma cuan, ta sacuhún chi barcu nya nu iyó ñiti cuan. ⁴¹ Ta chaā barcu cuan noo nu nañi tahan ndutya. Ta nyee xiñi chi chichi ñiti.

Ta ña cuví ca natava ra. Ta suhva ca cha ña quihvi chichi ñiti, ñihi xaan cañí tyañuhu chi chi, nyacua tahvī cuatyí chi. ⁴² Tyicuan ta sindaro cacuñí ra cahñi ra chi ndii cuii maa ra cuahan cuacutuñi chi nuu ra cuví rey cahnu, coto cacono ra. ⁴³ Soco capitán sindaro cuñí ra sacacu ra chi ra Pablo. Yucuan chaha ña chahā ra cahñi ra chi ra, soco catyí ra vatyí nya ra cachitó sutya, na chun cuee ra nu ndutya ta quita ra nya ñuhú ityi.

⁴⁴ Ta tandihí ca ra cha ña cacuví sutya, na quehen ra vitu cha nyisó barcu, ta suhva ra chihin yiquin vitu barcu cha tahvī tyañuhu. Ta tyicuan caa cacacu tandihí ndi ta quita ndi ñuhú ityi.

28

Nu ñohó ra Pablo ñuhú Malta

¹ Cuhva cha cha yahā cacu ndi ta catyí ñáyivi iyó ñuhú cuan vatyí nu nyaá ndi nañí chi Malta, o Melita.

² Ta vaha xaan tyiñuhu ñu chi ndi. Ta sanatahan ñu ñuhu vatyí coón savi ta vichin xaan. Ta catyí ñu chi tandihí ndi, natuhva ndi yuhu ñuhu cuan natava ndi cha vichin ndi. ³ Tyicuan ta ra Pablo naquehen ra suhva nducu tyihí ra nu ñuhu. Ta noo coo quita

chichi nducu cuan, cha cuenda cha ihñi. Ta chachij yihí ti ndaha ra Pablo ta ndoo ti tacaá ti ndaha ra. ⁴ Cuhva cha canyehe ñáyivi ñuhú cuan tyi tacaá coo cuan ndaha ra, quichaha catyí ñu chi tahan ñu:

—Ra ihya vasi noo ra chahñi ñáyivi cuví ra, vatyí vasi cacu ra nu tyañuhu soco ña chahá Nyoo cha coo ca ra cha cuenda cuatyí ra —catyí ñu.

⁵ Soco ra Pablo naquisi ra chi coo cuan, ta canacava ti nu ñuhú, ta ñahri cuví chi ra. ⁶ Tandihí ñu nyatú ñu ñáá cuhva ndaa nu tyaá ti, o ñáá cuhva cúvi ra. Soco cha yaha nyatu xaan ñu, ta nyehe ñu vatyí ñahri maa cuví chi ra. Tyicuan ta nasama ñu cuhva chicá xiñi ñu, ta quichaha catyí ñu:

—Minoo nyoo cuví ra —catyí ñu.

⁷ Yatyin ri cuan nyaá ñuhú ra cha cuví nuu ñuhú cuan. Publio nañi ra. Ta vaha xaan cahán ra chihin ndi. Ta tyiñuhu xaan ra chi ndi, ndoo ndi vehe ra uñi quivi. ⁸ Ta cuhvi xaan sutu ra chihin cahñi ta cha chiyó ra. Ta ra Pablo chahán ra chinyehe ra nu catuví ra. Ta chican tahvi ra chaha ra. Ta tyiso ra ndaha ra siqui ra ta nduvaha ra. ⁹ Yaha cuan ta quichaha caquichi tucu inga ñu cuhvi cha iyó ñuu cuan. Ta nduvaha tucu ñu. ¹⁰ Ta tandihí ñu tyiñuhu xaan ñu chi ndi. Ta quivi quihvi ndi chichi barcu cha cuacuhun ndi, chaha ñu tandihí cha cuchihuhu chi ndi ityi cahun ndi.

Nu chaq ra Pablo ñuu Roma

¹¹ Uñi yoo ñoho ndi Malta cuan. Tyicuan ta ñihí ndi noo barcu cha quichi nya ñuu Alejandría ityi Egipto. Ta ndoo chi Malta nya yaha yoo vichin. Ta nyaa noo cha natava ñu, noo xiñahñu nyoo Cástor ta nyoo Pólux, xiñi chi. Quihvi ndi barcu cuan ta cuahan ndi. ¹² Ta chaq ndi ñuu Sircusa. Ta yucuan ndoo ndi uñi quivi. ¹³ Ta yucuan ta quitá ndi ta cuahan ndi ityi yuhu tyañuhu nyacua nya chaq ndi ñuu Regio. Ta cha inga quivi cuan caa xaan tatyí cha quichi ityi sur ta chica ndi uvi quivi ta chaq ndi ñuu Puteoli. ¹⁴ Yucuan ñihí tahan ndi chihin suhva ra hermano. Ta catyí ra chi

ndi cha ndoo ndi noo vitya chihin ra. Yaha cuan ta quitá ndi ta cuahan ndi nya ñuu Roma. ¹⁵ Ta ñu yihí cuenda Nyoo ñuu Roma cuan ñihí ñu tuhun tyi cua chaa ndi. Ta chahán coyo ñu chisatahan ñu chi ndi ityi. Suhva ñu nyatú ñu chi ndi Nuyahví Apio. Ta inga ñu ñihí tahan ñu chihin ndi nya nu nañi Tres Tabernas. Ta cha nanyehe ra Pablo chi ñu, nacuhva ra tyahvi nyoo chi Nyoo. Ta nduní ca iñi ra. ¹⁶ Cuhva cha chaq ndi Roma cuan, capitán cuan nacuhva cuenda ra chi ra ca iyó cuatyí cuan chi noo ra cuví nuu chi ra sahá cumi vehe caa. Ta chaha ra cuan cha coo sin ra Pablo. Ta noo ri sindaro sahá cumi chi ra.

Nu cahán ra Pablo tuhun Nyoo ñuu Roma

¹⁷ Uñi quivi cha yaha chaq ndi yucuan. Tyicuan ta tachí ra Pablo tyiño naquichí coyo ra cacuví nuu cuenda ñayivi Israel cha iyó ñuu Roma cuan. Ta cuhva cha ndu in ri ra, quichaha catyí ra chi ra:

—Nyoho yañi, vasi ñahri sacuví chi ñu Israel tahan yo, ta ni ñahri sacuví siqui costumbre sutu chahnu yo, soco chaha cuenda ra Israel chii chi ra ñuu Roma. Ta ñohí vehe caa Jerusalén ndaha ra ñuu Roma. ¹⁸ Ta cha cutuñí chi, ta cuñi ra nyacá ñaha casaña ra chii. Vatyí ñahri cuatyí cha cahnu cha tahán chi cúvi. ¹⁹ Soco cha cuenda cha nduxaán xaan ra Israel siqui, chican taxin cha cutuñi chii nuu maa rey cahnu. Vasi ñahri cuatyí caacacuen siqui ñu ñui nuu ra. ²⁰ Yucuan chaha cané chi nyoho vatyí cohon nui chi ndo, ta sacoté chi ndo vatyí nuhñí yuhu chihin cadena vityin cha cuenda cha yihí iñi yo, ñu Israel, chi Nyoo —catyí ra Pablo.

²¹ Tyicuan ta catyí ra Israel chi ra Pablo:

—Ña chitó maa ndi tuhun yoho. Ta yori casacoto chi ndi, ni chihin carta, ta ni ta yori ca quichi ityi Judea sacoto cha caun, o cahán ña vaha ñu sicun. ²² Soco cuñi ndi cuñi ndi tuhun chicá xiñi yoho. Vatyí chitó ndi vatyí tandihí ri ityi cahán ña vaha

ñáyiví siquí tuhun chaa ihya —catyí ra Israel chi ra Pablo.

²³ Tyicuan ta catyihí tahan ra tuhun nya quiví quichi coyo ra inga chaha. Ta cha chaá quiví cuan, chaá coyo cuaha ñáyiví nu iyó ra Pablo. Ta nya ñaha ri ta nya cha cuaa cahán ra Pablo tuhun yoso caa nyacá ñaha Nyoo aña yoo. Ta chihin ley ra Moisés ta tuhun cha catyaa ra profeta Nyoo ta cha naha, sañahá ra chi ñu vatyí ra Jesús cuví ra cha sacacú chi yo, vatyí cuñi ra tyi nachino iñi ñu chi ra. ²⁴ Yihí ñu chinó iñi ñu cha catyí ra Pablo. Ta inga ñu ña chinó iñi ñu. ²⁵ Ta vatyí ña in ri chino iñi ñu ta siin siin tuhun cahán ñu, ta quichaha cuahan coyo ñu. Ta ra Pablo catyí ra chi ñu:

—Ndicha xaan cha catyí Tatyí li chi sutu chahnu yo chihin yuhu ra profeta Isaías ta cha naha. Vatyí catyí ra tyehe caa:

²⁶ Cuahan ta catyí chi ñáyiví ihya tyehe caa:

Nyoho cucuñi ndo tuhun Nyoo.

Soco ma cutuñi iñi ndo.

Ta cunyehe ndo chihin chiti nuu ndo cha sacuví Nyoo.

Ta ma tuvi iñi ndo.

Tyicuan caa catyí chi ñu.

²⁷ Vatyí aña ñu cha ndundava xaan.

Ta chiñí ri maa ñu tuhun Nyoo.

Ta natahán chiti nuu ñu, tacuhva cha ma cuvi nyehe ñu.

Ta nicunyasí soho ñu.

Yucuan chaha ña chiñí ñu, ta ndundava aña ñu.

Yucuan chaha ña cuñí ñu quihvi ñu chichi ndahi na sanduvahi chi ñu, catyí Tatyí li chihin yuhu ra Isaías ta cha naha.

²⁸ Coto vaha nyoho vatyí vityin ta ityi nuu ca cuhin cusacote chi ñu cha ñima ñu Israel cuví vatyí sacacú Nyoo chi ñu. Ta maa ñu cuatyasoho ñu, —catyí ra Pablo chi ñu.

²⁹ Cuhva cha catyí ra Pablo tyehe caa, ra Israel cuahan coyo ra suri cuví yuhu ra chihin ra tahan ra tuhun cha cahan ra Pablo chihin ra.

³⁰ Uvi cuiya nanñi ndoo ra Pablo vehe nu nyaá ra cuenda yoo ñuu

Roma cuan. Ta vaha cahán ra chihin tandihí ñu chahan vehe ra. ³¹ Ta chihin cha ñi iñi ra ta cahan ra tuhun yoso caa nyacá ñaha Nyoo aña yoo. Ta sañahá ra tuhun Sutú Mañi yo ra Jesucristo. Ta yori chasí cha cahán ra.

Carta Cha Sacuhun Ra Apóstol Pablo Chi Ñáyivi Ñuu Roma Cha Yihí Cuenda Nyoo

Nu sacuhun ra Pablo tutu chi ñu cuenda Nyoo ñu Roma

¹ Yuhu ra Pablo cuví noo ra sacuví tyiño nuu ra Jesucristo. Nacana ra chii, ta nacachi ra chii vatyí cuví apóstol chi ra, tacuhva vatyí sacote chi ñáyivi yoso caa sacacu Nyoo aña yu.

² Ihya cuví tuhun cha catyi Nyoo chi yo tyi cusacuvi ra, ta chicunya nu tutu tuhun ra tandihí cha tyaa ra profeta ta cha naha. ³ Ican ihya cuví tuhun Sutu Mañi yo Jesucristo Sehe Nyoo cha cahán chi tuhun, vatyí quichi ra síqui ñuhu ñáyivi chihin coño ñuhu ra tari coño ñuhu maa yo. Tata rey David cuví chi ra. ⁴ Ta Nyoo chihin Tatyí Ii ra sacoto cachi ra chi yo vatyí Sehe ra cuví chi ra, vatyí sanandoto ra chi ra chihin cha ndicha ñuhu ra. ⁵ Ta cha cuenda maa ra Jesucristo chaha Nyoo tumañi iñi chi nyuhu cha chun ndi cucaca ndi tyiño ra, tacuhva nachino iñi ñáyivi chi ra nicahnu ñuhu ñáyivi, ta quichaha ñu chi ra. ⁶ Ta mahñu ñu cuan, ñohó tucu nyoho vatyí suri nacana tucu ra Jesucristo chi nyoho.

⁷ Sacuhín tutu ihya chi tandihí nyoho cha iyó ndo ñuu Roma. Cuñi Nyoo chi ndo ta nacana ra chi ndo vatyí coo ndo noo ñáyivi cachi cha sacahnu ndo chi ra. Na naquehen ndo cha vaha ta cha taxi ri cuñi aña ndo cha chahá Sutu yo Nyoo ta Sutu Mañi yo Jesucristo chi yo.

Nu catyi ra Pablo vatyí cuñi ra chun ra ñuu Roma

⁸ Cha xihna ri chahí tyahvi nyoo chi Nyoi chihin sívi ra Jesucristo, cha cuenda tandihí nyoho. Vatyí tandihí ri ityi cahán ñu tuhun vatyí chinó xaan iñi ndo chi ra Jesucristo. ⁹ Ta

tyiño nuu Nyoo sacuví yuhu chihin cha tandihí aña yu. Ta cahín tuhun yoso caa sacacu ra chi yo cha cuenda Sehe ra. Ta Nyoo cuví ra testigu vatyí chitó ra tyi tyicuan ri nicohón iñi chi ndo cuhva cha chicán tahvi chi ra. Ta chicán tahvi cha cuenda ndo. ¹⁰ Chiquén chi Nyoo na cuví cuhva cuñi ra, ta cuhin nu nyicú ndo, vatyí cha naha xaan cuñi cuhin. ¹¹ Vatyí cuñi tyinyei chi ndo, ta naquehen ndo cha vaha cha chahá Nyoo ta cuní ca iñi ndo. ¹² O cuñi chi catyi vatyí saní yo iñi tahan yo chihin cha chinó iñi yo, tari chinó iñi nyoho ta yuhu ñandihí.

¹³ Yañi, cuñi tyi coto ndo vatyí cuaha xaan chaha cuñi cunyehe nu nyicú ndo, soco nya vityin ta ña chaha chi cuhva chii. Cuñi vatyí cuní ca iñi ndo tari nduní ca iñi ñu vehe ñuhu inga ñuu nu chahín. Vatyí tatu nduní iñi ndo, nduní tucu iñi yuhu. ¹⁴ Vatyí nyaá síqui cha cahin tuhun Nyoo chihin tandihí ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chiñi tuñi, an cuví ri ñu ña cutuñi iñi. Tahán chi cha cahin chihin tandihí ri ñu. ¹⁵ Yucuan chaha, cha cuenda yuhu, cuñi xain cahan tiqui tuhun Nyoo chihin nyoho cha iyó ndo ñuu Roma chiña.

Tuhun Nyoo iyó xaan cha ndicha ñuhu chi

¹⁶ Yuhu ña cahán nui cahín tuhun Nyoo, vatyí ihya cuví fuerza Nyoo cha sacacú chi tandihí ñáyivi cha chinó iñi chi ra. Ta cha xihna ri chi ñu Israel. Ta cha cu uvi, ñu inga ñuu. ¹⁷ Vatyí tuhun Nyoo ihya, sañahá chi chi yo yoso caa sacuvahá Nyoo chi yo nuu ra chihin cha chinó iñi yo chi ra. Ta suri cha cuenda cha chinó iñi yo, coo yo ñáyivi chaa chihin ra. Tyehe caa nyaá nu tutu tuhun Nyoo: “Ñu cha nduvaha aña saha Nyoo, coo ñu noo ñáyivi chaa chihin cha chinó iñi ñu chi ra.”

Tandihí ñáyivi ta iyó cuatyí ñu

¹⁸ Ta nyehé yo vatyí nya nu nyaá Nyoo nya andivi ta tachí tuñi ra chi ñáyivi quiñi iyó, ñáyivi ña vaha. Ta

cha quiñi iyó ñu, ña chahá chi coto ñu cha ndicha. ¹⁹ Chitó vaha ñu tyi tuhun vaha cuví tuhun Nyoo vatyí suri maa Nyoo sañahá ra chi ñu. ²⁰ Vatyí vasi ña nyehé yo chi ra, cuví coto yo vatyí iyó ra vatyí nyehé yo tandihí cha savaha ra. Nyata chinó ñuhu ñáyiví ta tandihí cha savaha ra ta sañahá chi chi yo vatyí maa ra cuví Nyoo, ta tunyee ñi cha iyó chi ra ma ndihí maa. Yucuan chaha ma cuví catyí ñáyiví tyi yori Nyoo iyó. ²¹ Ta vasi cha chitó ñu tyi iyó noo Nyoo cahnu, soco ña sacahnú ñu chi ra tari cuhva tahán chi cha sacahnú yo chi ra. Ni ña nacuhva ñu tyahvi nyoo chi ra. Soco maa maa ri tuhun cha ñima ri tuhun chicá xiñi ñu. Ta cha cuenda cha ndava añima ñu, cutondó cha chiñi tuñi xiñi ñu ta ndoo ñu nu ñaa ñi. ²² Vasi catyí ñu tyi chitó xaan ñu soco ñu tondo cuví ñu. ²³ Vatyí cha nuu cha sacahnú ñu chi Nyoo ra cahnu ca cuví, ra ña tuhva chihi; sacahnú ñu chi xitohyo cha caá tari caá ñáyiví tuhva chihi. Ta nyacua nya xitohyo cha tari caá saa, ta coo, ta quití cha cumi tahan chaha, ta sacahnú ñu.

²⁴ Yucuan chaha saña ndaha ndihí Nyoo chi ñu na sacuvi ñu tandihí cha quiñi caa cha quichí cuví ñi ñu. Yucuan chaha maa maa ri tuhun cha cahán nuu yo nyacuví ñu chihin tahan ñu. ²⁵ Vatyí ña chinó ñi ñu cha ndicha vaha Nyoo. Vatyí noo cha ña ndicha, yucuan chinó ñi ñu. Ta sacuvahá ca ñu, ta casacahnú ca ñu cha savaha Nyoo ta ña cuñí ñu sacahnú ñu chi maa maa ra. Vatyí chi maa ra tahán chi sacahnú yo tyicuan ri maa. Ta na cuví chi tyicuan caa.

²⁶ Yucuan chaha saña ndaha Nyoo chi ñu na sacuvi ca ñu cha chahá ticahan nuu chi ñu. Vatyí nyacua nya ñusihí nasama ñu cuhva nyacuví ñu, vatyí ca iyó ñu chihin tahan sihi ñu, ta ña tahán chi tyicuan caa. ²⁷ Ta tyicuan caa tucu rayí, casandihí ra cha ca iyó ra chihin ñasihí ra, ta quichí cuví ñi ra cacao ra chihin tahan yí ra. Ta canyacuví ra chihin ra tahan ra, tuhun cha chahá ticahan nuu chi ra. Ta cha cuenda cuan tachí tuñi

Nyoo chi ra ta tiví ra cha cuenda cha quiñi caa cha canyacuví ra. ²⁸ Ta chaha cha ña cuñí ca ñáyiví nacoto nuu ñu chi Nyoo, yucuan chaha saña ndaha ra chi ñu na caca maa xiñi ñu cha quiñi caa, ta sacuvi ñu cha ña tahán chi sacuvi ñu. ²⁹ Vatyí tandihí nuu cha ña vaha sacuvi ñu. Iyó ñu chihin inga rayí ta ñima yí ñu cuví. Ta iyó ra chihin inga ñusihí ta ñima ñasihí ra cuví. Quiñi xaan iyó ñu. Quichi cuví xaan ñi ñu coo ca chi ñu. Nyacuví ñu cha quiñi caa. Nyiyó xaan ñi ñu cha chi inga ñáyiví. Chahñi ñu. Iyó ñu tisihí chihin tahan ñu. Sandaví ñaha ñu chi tahan ñu. Ta quiñi xaan ca iyó ñu. Ta ñi ñu cuendu. ³⁰ Cahán ña vaha ñu siqui inga ñáyiví. Ta tasi cuñí ñu nyehe ñu chi Nyoo. Tyityi ñi ñu. Ta cahnu sahá ñu chi ñu. Casanducuahá ca ñu cha quiñi caa. Ta ña quichahá ñu chi sutu ñu, ta chi sihi ñu. ³¹ Ña cuñí ñu tyasoho ñu tuhun vaha. Ña sacuvi ñu tuhun cahán ñu. Yori maa chi cuñí ñu. Ta ña casahá ñu ticahnu ñi chi tahan ñu. Ña ndahvi cuñí ñu nyehe ñu chi tahan ñu. ³² Maa ñu chitó vaha ñu ñáa cha catyí Nyoo tyi sacuvi ñu, chitó ñu vatyí ñu casacuví cha ña vaha, tahán chi tuhun chihi chi ñu ta cuhun ñu anyaya. Soco maa ñu sañihí ca ñu sacuvi ñu. Ta nyacua si cuñí ñu tatu sacuvi inga ñáyiví cha quiñi caa.

2

Tachí tuñi Nyoo chi ñáyiví soco chihin cha ndicha

¹ Yucuan chaha ñahri siqui tyaá ndo, nyoho ñu cha nyehé cha caá inga ñu ta cahán ndo. Ñahri saha, savahri ñu, yóo ri ñu cuví ndo. Vatyí tatu nyehún cha caá inga ñu ta cahún, suri maun sacouñ cuatyun. Vatyí suri ñi ri cha sacuvún chihin ñu nyehún ta cahún. ² Vatyí chitó yo vatyí Nyoo tachí tuñi ra chi ñu nyacuví tyehe caa, soco chihin cha ndicha ta chihin cha ndaa, tachí tuñi ra. ³ Ta yoho cha cahán nyaun chi inga ñu, suri ñi ri cha sacuvún chihin ñu. Cutachi tuñi Nyoo chuun cha cahún tyehe

caa. ⁴ ¿Ñáá tuhun ña quichahún cha cundahvi cuñí Nyoo nyehé ra chi yo ta cunyeé xaan ra cha sacuví yo? Vaha xaan ñáyiví cuví ra chihin yo. ¿Atu ña tuví iñun vatyí cha cuenda cha cundahvi cuñi ra nyehé ra chuun, ta nyatú ra cha nasamon cuhva iyón? ⁵ Soco yoho ndava xaan añimon. Ta ña cuñún nasamon cuhva iyón. Ican cuan cuví cuatyun cha sacayá xaun, ta cuxaan ca cuñí Nyoo nyehé ra chuun ta ñihi ca cutachi tuñi ra chuun quiví cutachi tuñi ra chi ñáyiví. Ta cunyehe yo tyi chihin cha ndaa ta chihin cha ndicha tachí tuñi ra chi yo. ⁶ Tatu sacuví yo cha ña vaha, cutahan chi cha ña vaha chi yo. Tatu sacuví yo cha vaha cutahan chi cha vaha chi yo quiví cutachi tuñi ra chi yo. ⁷ Ta cuhva ra ñayiví cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandihí cuan chi ñu cha cuenda vatyí sacuví ñu maa maa ri cha vaha chihin cha cama iñi ñu. ⁸ Soco ñihi xaan cutachi tuñi ra chi ñáyiví sacuví cuhva cuñí maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha. ⁹ Cuaha xaan tindocho ta tucuihya iñi cunyehe tandihí ñu casacuví cha ña vaha. Ta cha xihna ri cutachi tuñi ra chi ñu ñuu Israel, ñáyiví cuenda ra. Ta tyicuan caa tucu cutachi tuñi ra chi ñu cha ñima ñu Israel cuví. ¹⁰ Soco chi tandihí ñu cha sacuví cha vaha, Nyoo cucuhva ra cha cucahnu ñu chihin ra, cha xihna ri chi ñu Israel, tyicuan ta chi ñu cha ñima ñu Israel cuví. Ta cucatyí ra tyi sñi cuñi ra chihin ñu. Ta cucuhva ra cha taxi ri coo añima ñu.

¹¹ Vatyí Nyoo ña cachí ra chi yo. Cuví ri yo ñu chitó, o cuví ri yo ñu ña chitó, ñn ri cuhva cuñí maa ra chi yo. ¹² Vatyí tandihí ñu casacuví cuatyí ta ña chitó ñu ley cha chahá Nyoo chi ra Moisés, cunaa ñu nuu Nyoo soco ñima cha cuenda tuhun cha catyí ley cuan. Ta ñu casacuví cuatyí ta chitó vaha ñu ley cha chahá Nyoo chi ra Moisés, cutachi tuñi Nyoo chi ñu yoso cuhva catyí suri maa nuu ley cuan. ¹³ Vatyí

ñu cha chiñí ley, ta ña nyacuví ñu cuhva catyí Nyoo, ñima ñáyiví vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo. ¹⁴ Tatu ñima ñu Israel cuví ñu ta ña chitó ñu ley cuan, soco tuví iñi ñu yoso caa coo ñu; cha tuví iñi ñu chichi añima ñu, ican cuví ley ñu. ¹⁵ Vatyí chihin cuhva iyó ñu, sañahá ñu vatyí añima ñu ñohó ley Nyoo. Cha chiñi tuñi ñu cuví cha ndaa cuenda ñu, vatyí suri maa ñu tuví iñi ñu tatu vaha o ña vaha cha nyacuví ñu. ¹⁶ Cha tyaa Nyoo tyiño chi ra Jesucristo vatyí coo quiví cusandaa ra cuatyí tandihí ñáyiví iyó siqui ñuhu ñayiví cha cuenda tandihí tuhun xehe cha sacuví ñu. Tari cuhva catyí tuhun Nyoo cha cahín chihin ndo, tyicuan caa cusandaa ra cuatyí yo.

Ñu Israel nyicón ñu ley cha chahá Nyoo chi ra Moisés

¹⁷ Soco yoho catyún tyi ra Israel cuvún. Ta catyún tyi sacuvún cuhva catyí ley cha chahá Nyoo chi ra Moisés, ra cuví nuu chi ñu Israel quiví cuan. Ta cahnu sahún chuun tyi catyún tyi caá tuhun Nyoo añimon. ¹⁸ Ta chitón cuhva cuñí Nyoo ta ley cuan sañahá chi chuun cha nacachún cha vaha, catyún. ¹⁹ Ta vaha xaan sañahún ityi chi ñu cuaa, cuñí maun. Vaha xaan sacatón ñuhú chi ñu cuahan nu ñaa iñi, cuñí maun. ²⁰ Ta cuñí maun vatyí chitón saquehen ityun chi ñu cha ña chitó. Ta vatyí chitón tandihí cuii ley ta cha ndicha, chitón yoso caa sañahun chi ñu ña chitó, cuñí maun. ²¹ Tatu tyicuan caa yoho sañahún chi inga ñáyiví, ¿ñáá tuhun ña sañahún chi maun? Tatu suri maun catyún vatyí ña tahán chi suhu yo, ¿ñáá tuhun cha tyi maun suhún? ²² Tatu suri maun catyún vatyí ña tahán chi coo inga ñusihí chi noo rayii, o inga rayii chi noo ñaha sihi, ¿ñáá tuhun cha vatyí maun tyicuan caa sacuvún? Tatu tasi cuñún chi xitohyo, ¿ñáá tuhun cha suhún cha tyayii cha iyó nu nyicú chi chichi vehe ñuhu? ²³ Cahnu sahún chuun vatyí chitón ley Nyoo, soco ticahan nuu chahún

chi Nyoo cha cuenda cha ña sacuvún ley cuan. ²⁴ Yucuan chaha vatyí nu tutu tuhun Nyoo catyí chi tyehe caa: “Ñu cha ñima ñu Israel cuví, cahán ña vaha ñu siqui Nyoo cha catyí nyoho”, catyí chi.

²⁵ Ndicha vatyí cha sacuvi ñu tuhun cha tahnya chiin ñi xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyí ñáyivi chi Nyoo cuvún. Tuhun cuan tyinyeé chi chuun soco tatu quichahún tandihí ley cha chaha Nyoo chi ra Moisés ñandihí. Soco tatu ña sacuvún cha catyí ley cuan, tari quivi cha ña sacuvun costumbre circuncisión cuví cuan. ²⁶ Soco tatu ñu cha ña sacuví tuhun cuan, ta sacuví ñu cuhva catyí ley Nyoo, cusaha Nyoo tari cha sacuvi ñu costumbre circuncisión cuan, vasi ña sacuvi ñu. ²⁷ Ra cha ña sacuvi costumbre cuan, soco quichahá ra cuhva catyí ley, cusanatuví ra chi yoho cha ña quichahún, ta yoho, ra chitó ley ta ra sacuvi costumbre circuncisión cuvún. ²⁸ Vatyí ñima cha cuenda vatyí ñu Israel cuví ndo ta chihin cuan ta cuví ndo ñáyivi chi Nyoo. Ta ni ñima cha cuenda cha sacuvi ndo tuhun circuncisión. ²⁹ Vatyí ñáyivi nyaá ley Nyoo aña, ican ñu cuví ñu ñu Israel cha ndicha vaha. Tari quivi tyaa Tatyí li seña cuan aña ñu, ta ñima ñi ri ñu. Tatyí li Nyoo sacuví cuan, ñima ley cha nyaá nuu tutu. Ta ñáyivi ihya cucuvi ñu ñu vaha nuu Nyoo, ta ñima nuu ñáyivi ri.

3

¹ Tatu tyicuan caa, ¿ñáa cha tyinyeé chi yo cha cuví yo ñu Israel? ¿O atu tyinyeé chi chi yo cha sacuví yo tuhun circuncisión? ² Cuaha cuhva tyinyeé chi. Cha xihna ri, Nyoo chaha ra ley maa ra chi yo ñu Israel. ³ Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuvi ca Nyoo cuhva catyí ra? ⁴ ¡Ñima! Soco na saha yo cuenda vatyí Nyoo ndicha ra. Sacuví

ra tandihí cuhva cha catyí ra. Vasi tandihí ñáyivi cahán ñu cuendu. Vatyí nu tutu Nyoo catyí chi tuhun ra tyehe caa:

Sutu Mañi yuhu, cunyehe ñáyivi vatyí ñahri cuendu cahún.

Ta cunyehe vaha ñu chuun vatyí ndicha cha cahún.

⁵ Chitó yo vatyí vaha ca quetuvi noo cha ndi tatu nyaá noo cha mecu xiin. Ndi xaan ca nyehe cuan. Cha ndicha cuví cuan. Soco catyí ñáyivi vatyí tyicuan caa tucu maa Nyoo chihin yo, ndi xaan ca natuvi ra tatu yoó ta cunyacuvi ca yo cha quiñi caa. Sacahnú yo chi ra cuví cuan, catyí ñu. Tyicuan ta ña tahán chi tachi tuñi ra chi yo, catyí ñu. Soco tatu tachi tuñi ra chi yo, ña vaha ra vatyí yoó sacahnú yo chi ra, catyí ñu. ⁶ Ña vaha cuhva cahán ñu, vatyí tyehe ta ña vaha Nyoo ma cuví tachi tuñi ra chi yo. Soco chitó yo tyi tahán chi tachi tuñi ra chi yo cha cuenda cuatyí yo. ⁷ Tatu nyehé yo tyi vaha Nyoo chihin cuatyí sacuví ñáyivi, ¿atu tahán chi tachi tuñi ra chi ñu? Catyí ñu tyi ña tahán chi, soco ña ndicha. ⁸ Tyehe ta ndicha cha cahán ñu cuan, vaha taxin ca sacuvi yo maa maa ri cha quiñi caa tacuhva nyehe ñáyivi tyi Nyoo vaha ra. Yihí ñu catyí ñu tyi tyicuan caa sañahá ndi. Ta cutachi tuñi Nyoo chi ñu chaha cha catyí tyi cahán ñu cuendu siqui ndi.

Tandihí yo ta iyó cuatyí yo

⁹ Ta yoso caa ¿atu vaha ca yoó ñu Israel ta ñima ca inga ñáyivi? ¡Ñima! Vatyí cha yaha sañahi chi ndo vatyí iyó cuatyí tandihí yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo.

¹⁰ Tyicuan caa catyí nu tutu Nyoo, nu catyí chi tyehe caa:

Yori maa ñáyivi vaha iyó, cha ni ña noo maa.

¹¹ Yori ñu cutuñí iñi tuhun Nyoo.

Yori maa nanducú chi Nyoo.

¹² Tandihí ñu sandoq ñu chi Nyoo, ta tandihí ñu ta sacunaq ñu chi ñu.

Yori maa ñu sacuví cha vaha.

Cha ni ña noo maa.

13 Tari noo ñaña ndiyi cha tacohó yuhu cuví sucun ñu.

Vatyi quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyi cahán uhvi ñu chi tahan ñu.

14 Maa maa ri ca maa cha quiñi caa cahán ñu.

15 Yatyi xaan ñu cha cacahñi ñu chi tahan ñu.

16 Chahá xaan ñu tundoho ta tucuihya iñi chi ñáyivi chihin cuhva iyó ñu.

17 Ta ña chitó ñu yoso caa cuhva coo taxi ri ñu chihin Nyoo, ni chihin tahan ñu.

18 Ni ña chicá iñi ñu tatu tachi tuñi Nyoo chi ñu noo quiñi, catyí chi nu tutu Nyoo.

19 Chitó yo vatyi tandihí cha catyí ley chahnu cha quehen cuenda ra Moisés, catyí chi cha cuenda ñu nyicón ley cuan, tacuhva vatyi ma cuvi catyi ñu tyi ñahri cuatyí ñu. Soco coto ñu vatyi cutahan chi cutachi tuñi Nyoo chi ñu vatyi iyó cuatyí ñu. Ta tyicuan caa tucu tandihí ñáyivi iyó siqui ñuhu ñáyivi. 20 Ni minoo ñáyivi ma cuvi cuvaha ñu nuu Nyoo cha cuenda tyi sacuví ñu cuhva catyí ley. Soco ley cuan nyaá chi cha cuenda vatyi sacotó chi chi yo tyi iyó cuatyí yo.

Cha cuenda cha chinó iñi yo chi Nyoo ta cuvaha yo nuu ra

21 Soco vityin sandoó yo inchiyo xiin ley cuan ta cua nyehe yo vatyi iyó noo cuhva cuvaha yo nuu Nyoo. Suri maa Nyoo sañaha ra chi yo nu tutu tuhun ra cha tyaá profeta ta cha naha. Tatu sacuahá yo yucuan, coto yo noo cha ndicha. 22 Vatyi cha cuenda cha chinó iñi yo chi ra Jesucristo ta cuvaha yo nuu ra, ta sahá ra tuhun tyi ñahri cuatyí yo. Ta ña cachí ra chi yo tatu ñu Israel cuví yo o ñima.

23 Tandihí ri ñáyivi sacuví ñu cuatyí, ta cañi xaan nyaá ñu chihin cuhva cuñi Nyoo, ta cha tyaqui Nyoo ma cuvi cunyaa chihin ñu. 24 Soco cha cuenda cha vaha ñáyivi cuví Nyoo chihin yo, chahá maa ra cha cuvaha yo nuu ra, ta ña tñin cuenda ca ra

cuatyí yo. Vatyi chahnya ra Cristo Jesús cuatyí yo. 25 Nyoo saquichi ra chi ra Cristo vatyi cati ñiñi ra ta cúvi ra nu cruzi cha catyi cuatyí yo. Ta vityin cuví saha Nyoo tucahnu iñi chi yo tatu chinó iñi yo chi ra Cristo. Ta cuví chi tyehe caa, tacuhva nyehe ñáyivi tyi Nyoo vaha ra. Ta tyembu chahnu, Nyoo ña tñin cuenda ra cuatyí ñáyivi cha cuenda vatyi cuchaa chi noo quiñi cha cuquichi ra Cristo ta sanaa ra cuatyí ñu. 26 Ta tyicuan caa cuví tacuhva vatyi nyehé ñáyivi vatyi Nyoo tyicuan ri vaha ra, ta saha ra tuhun tyi vaha tandihí ñu chinó iñi chi ra Jesús.

27 ¿Atu cuví sacahnu yo chi yo vityin? Ma cuvi. ¿Ñáá tuhun? Cha cuenda vatyi ma cuvi catyi yo vatyi sacuví yo cha catyí ley, ta yucuan chaha vaha yo nuu Nyoo. Vatyi cha cuenda cha chinó ri iñi yo chi ra ta cuvaha yo nuu ra. 28 Cha chitó vaha yo vityin vatyi Nyoo sacuvaha ra chi yo nuu ra chihin cha chinó iñi yo chi ra, ta ñima chihin cha sacuví yo cha catyí ley ta cuvaha yo nuu ra.

29 ¿Atu Nyoo cuenda ñu Israel ri cuví ra? ¿Atu ñima suri ra cuví Nyoo ñu cha ñima ñu Israel cuví? Suri Nyoo tucu ñu cuan cuví chi ra. 30 Vatyi noo tuhun ri maa ra iyó. Ta ican ra sacuvaha ra chi yo nuu ra cha cuenda cha chinó iñi yo chi ra. Cuví ri yo ñu sacuví tuhun circuncisión cuan, o cuví ri yo ñu ña sacuví. 31 Tatu tyicuan caa, ¿atu ña vaha ca ley chahnu cuan? ¡Ñima cha ña vaha ca! Vaha. Soco vityin chihin fuerza maa ra Cristo sañahá yo vatyi ndi maa cha catyí ley cuan ta ndicha.

4

Cuhva chiyo ra Abraham sañahá chi chi yo yoso caa cuvaha yo nuu Nyoo

1 ¿Ñáá cha catyí yo cha cuenda ra Abraham sutu chahnu yo? ¿Ñáá cuenda catyí Nyoo vatyi vaha ra?

2 Tyehe ta cuvaha ra nuu Nyoo cha

cuenda cha sacuv̄i ra cha vaha, yucuan ndicha, cuv̄i sacahnu ra chi ra, soco ñima nuu Nyoo. ³ Vatyí ¿ñáá catyí nu tutu tuhun Nyoo? Catyí chi vatyí ra Abraham chinq̄o ñi ra chi Nyoo, ta cha cuenda cha chinó ñi ra chi Nyoo, Nyoo saha ra tuhun tyi vaha ra. ⁴ Vaha, vityin cuacuhve noo cuhva chi ndo: Tatu minoo ra sacuv̄i ra noo tyiño, yahvi cha quehén ra ñima cha ñihi caha ra cuv̄i, soco yahvi tyiño saha ra, ican cuv̄i. ⁵ Soco tatu noo ra cha ña saha tyiño ta ñihi ra cha ñihi ra, noo cha ñihi caha ra cuv̄i. Ta tyicuan caa cuv̄i chihin noo ra cha ña nducu cuhva cacu cha cuenda cha sacuv̄i ra ley, soco chinó ñi ra vatyí Nyoo sahá ra tucahnu ñi chi ñu iyó cuatyí, Nyoo cusaha ra tuhun tyi vaha ra cha cuenda cha chinó ñi ra chi ra. ⁶ Ra David cahan ra tuhun tus̄i ñi cha iyó chi ñáyiv̄i cha saha Nyoo tuhun vatyí vaha ta ña t̄in cuenda ra cuatyí cha sacuv̄i ñu. ⁷ Tyehe caa catyí ra David:

Ñáyiv̄i cha saha Nyoo tucahnu ñi
cuatyí, s̄i xaan cuñí ñu, vatyí
Nyoo ña t̄in cuenda ra cuatyí
ñu.

⁸ S̄i xaan cuñí ñu ña t̄in cuenda Nyoo cuatyí.

⁹ ¿Atu cha cuenda ri ñu sacuv̄i tuhun cha tahnya ñi cuv̄i tus̄i ñi ihya, o cuv̄i tucu chi cha cuenda ñu ña sacuv̄i cuan? Cha yaha sañahi chi ndo vatyí Nyoo saha ra tuhun tyi vaha ra Abraham cha cuenda cha chinó ñi ra chi ra. ¹⁰ Soco ¿ama saha ra tuhun tyi vaha ra? ¿Atu cha ni cumañi ca sacuv̄i ra Abraham tuhun circuncisión cuan, o cha yaha? Ñima nya cha yaha, soco cha ni cumañi ca. ¹¹ Yaha cuan ta sacuv̄i ra Abraham tuhun cuan, tari noo seña ri o sellu vatyí Nyoo cha yaha saha ra tuhun tyi vaha ra cha cuenda cha chinó ñi ra chi ra. Ta cha cuenda ihya cuv̄i ra Abraham tari noo sutu tandih̄i yo ñu chinó ñi Nyoo vasi ña sacuv̄i yo tuhun circuncisión. Ta tyicuan caa, Nyoo sahá ra tuhun vatyí vaha yo.

¹² Ndicha vatyí ra Abraham cuv̄i tucu

ra sutu ñu casacuv̄i tuhun cuan, soco tatu chinó tucu ñi ñu chi Nyoo tari chinó ñi tucu maa ra Abraham sutu chahnu yo, quiv̄i cha ta sacuv̄i ca ra tuhun cuan.

Chihin cha chinó ñi yo ta ñihi yo cha chahá Nyoo chi yo

¹³ Vatyí Nyoo catyí ra chi ra Abraham ta chi sehe ra vatyí cuhva ra cha cunyaca ñaha ñu ñuhu ñáyiv̄i chihin ra. Soco savaha Nyoo promesa cuan, ñima cha cuenda vatyí ra Abraham sacuv̄i ra cha catyí ley, soco cha cuenda vatyí chinó ñi ra chi Nyoo, ta Nyoo saha ra tuhun vatyí vaha ra. ¹⁴ Tyehe ta maa maa ri ñu cha sacuv̄i cuhva catyí ley, cuñihi ñu noo cha cucuhva Nyoo, ñahri yahvi nyaá cha chinó ñi yo chi Nyoo, ta ni ñahri yahvi nyaá cha catyí ra tyi cuhva ra chiyo. ¹⁵ Vatyí ley cuan sañahá chi vatyí tahán chi tachi tuñi Nyoo chi yo tatu ña sacuv̄i yo cuhva catyí chi. Soco tyehe ta ñahri ley iyó, ñahri cuatyí yo coo.

¹⁶ Yucuan chaha cuñihi yo promesa Nyoo cha cuenda cha chinó ñi yo chi ra, tacuhva vatyí cuv̄i chi noo tumañi ñi cha chahá ra chi tandih̄i yo cha cuv̄i yo ñáyiv̄i chi ra Abraham. Ñima ñu chinó ri ñi chi Nyoo ta quichahá ley cuan cuñihi, soco cuñihi tucu ñu cha ña ita ñi ley, soco chi Nyoo ri chinó ñi ñu tari chinó ñi ra Abraham. Ican ra cuv̄i sutu tandih̄i ñáyiv̄i cha chinó ñi chi Nyoo. ¹⁷ Vatyí tari catyí Nyoo nu tutu ra tyehe caa: “¿Yoho cucuvun tari noo sutu cuaha xaan ñáyiv̄i?”, coo siqūi ñuhu ñáyiv̄i”, catyí ra chi ra Abraham. Ta cha catyí ra tyicuan caa, cuñí chi catyí vatyí cuv̄i yo sehe ra Abraham nuu Nyoo. Chinó ñi ra Abraham chi Nyoo, vatyí Nyoo sanandotó ra ndiyi, ta chihin tuhun cahan ra sacoo ra cha cumañi ca coo.

¹⁸ Ra Abraham chinó ñi ra chi Nyoo vasi ma cuv̄i ñihi ra promesa cuan tyaq̄ maa ra cuhva, vatyí cha chahnu xaan ra. Soco yih̄i ñi ra cha cuñihi ra. Ta tyicuan caa, ñihi ra promesa Nyoo ta cuv̄i ra sutu cuaha

ñáyiví, tari cuhva catyí Nyoo chi ra: “Tyehe caa cucucuaha ñáyiví chuun”, catyí ra chi ra. ¹⁹ Ra Abraham ña sandihí ra cha chinó ñi ra, vasi cha noo cientu cuiya ra ta tuví ñi ra vatyí cha cuñí cúvi ra. Tari maa ra ta tari cu Sara ñasihi ra, ma cuví ca coo sehe ñu, tyi cha chahnu xaan ñu. ²⁰ Soco ña ndu uvi ñi ra cha cuñihi ra cha catyí Nyoo tyi cuhva ra chi ra. Soco chinó ñi ra chihin cha ñi ñi ra. Ta yihí ca ñi ra chi Nyoo. Ta sacahnú ra chi ra, ²¹ cha cuenda vatyí chitó vaha ra vatyí Nyoo iyó tunyee ñi chi ra cha cusacuví ra cha catyí ra chi ra. ²² Yucuan chaha Nyoo saha ra tuhun tyi vaha ra cha cuenda cha chinó ñi ra chi ra.

²³ Saha Nyoo tuhun vatyí vaha ra Abraham chaha cha chinó ñi ra chi ra. Na chicunyaá nuu tutu vatyí noo ri ra Abraham cuvaha ra, ²⁴ soco chinyaá tucu nuu tutu cha cuenda yoó. Vatyí sahá Nyoo tuhun tyi vaha tucu yo vatyí chinó ñi yo chi ra, vatyí ican ra sanandotó chi ra Jesús, Sutu Mañi yo. ²⁵ Ta maa ra chaha cuenda chi ra Jesús tyi cúvi ra cha cuenda cuatyí yo, ta nandotó ra tacuhva vatyí cuví cuvaha yo nuu ra.

5

Vityin cha nicoo vaha yo chihin Nyoo, cuaha cha vaha cucuhva ra chi yo

¹ Ta cha yaha nduvaha ñima yo nuu Nyoo cha cuenda cha chinó ñi yo chi ra, nicoo vaha yo chihin ra cha cuenda Sutu Mañi yo Jesucristo. ² Vatyí cha cuenda ra Cristo ñihí yo cha vaha Nyoo cha cuenda cha chinó ñi yo chi ra. Yucuan chaha ñi ñi yo ta si cuñí yo, ta yihí vaha ñi yo vatyí cucuhva ra cha cucahnu cuví yo chihin ra. ³ Ta ñima yucuan ri cusí cuñí yo, tahan tucu chi cusí cuñí yo quiví nyehé yo tindocho. Vatyí chitó yo vatyí cha nyehé yo tindocho cuan cutuhva ca yo coo cha cama ñi yo. ⁴ Ta tatu chihin cha cama ñi yo, yaha yo tindocho, quita vaha yo nuu Nyoo. Ta yucuan ta chitó vaha yo tyi cuñihi

yo ndi maa cha cucuhva ra chi yo. ⁵ Tatu yihí ñi yo chi maa ra, ma cahuan nuu yo nyehé yo chi ra, vatyí cuñí xaan ra chi yo cha cuenda Tatyí Ii ra cha chaha ra cunyaa ñima yo.

⁶ Vatyí quiví cha ña ñihí ca yo yoso caa sacuví yo chihin cha cuaha cuatyí yo, quiví cuan quichí ra Cristo, quichí cúvi ra cha cuenda yo ñu iyó cuatyí. ⁷ Chitó yo vatyí yori caña ñi cúvi tyiño nuu noo ñáyiví. Vasi xityi ri caña ñi ñu cuhva ñu ñayiví ñu cha cuenda noo ñu vaha xaan. ⁸ Soco yucuan cuví nu sañaha Nyoo vatyí cuñí ra chi yo, vatyí quichi cúvi ra Cristo cha cuenda yo vasi iyó xaan cuatyí yo. ⁹ Ta vityin cha cha yaha cuvaha yo nuu Nyoo cuenda cha chihí ra Cristo, yucuan chaha chitó vaha yo tyi ma cahun ca yo anyaya nu cutachi tuñi Nyoo chi ñáyiví ña chinó ñi chi ra. ¹⁰ Quiví cuan xaan cuví ñi yo chi Nyoo, soco sanicoo vaha ra chi yo chihin ra cha cuenda cha chihí Sehe ra. Yucuan chaha chitó vaha yo tyi cusacacu ndihí ra chi yo vatyí iyó ñayiví ra Cristo ñima yo vityin cha iyó vaha yo chihin ra. ¹¹ Ta ñima ihya ri, soco cusí tucu cuñí yo chihin Nyoo cha cuenda Sutu Mañi yo Jesucristo, vatyí cha cuenda ra nicoo vaha yo chihin Nyoo.

Ra Adán ta ra Cristo

¹² Cha cuenda noo rayí quihví cuatyí siqui ñuhu ñayiví ta chicoo tuhun chihi. Ta tuhun chihi cuan chicoo chi siqui tandihí ñáyiví vatyí tandihí ñu sacuví ñu cuatyí cha cuenda ra Adán. ¹³ Nyata ni cumañi ca cuhva Nyoo ley chi ra Moisés ta cha iyó cuatyí siqui ñuhu ñayiví, soco ña tñin Nyoo cuenda cuatyí ñáyiví ta ni cumañi ca cuhva ra ley cuan. ¹⁴ Soco nyacua nya quiví ra Adán ta nyacua nya quiví ra Moisés, chinyaca ñaha tuhun chihi chi ñu cha sacuví cuatyí, vasi ñima tahan cuatyí ra Adán cuví, cha ña quichaha ra chi Nyoo. Ta ra Adán cuví ra tari noo xiñahñu noo ra cha cua quichi.

¹⁵ Soco cuatyí ra Adán ña ndiquí tahan chi chihin tumañi ñi cha

chaha Nyoo chi yo. Vatyí cha cuenda cuatyí noo rayíí cuan, cuaha xaan ñáyiví chihí. Soco sacacú Nyoo chi yo cha caha ri, cha cuenda noo ri rayíí ta ican ra ihya cuví ra Jesucristo. Ta cahnu xaan ca cuví cuan. Ta cha cuenda cha vaha chí cuaha ñáyiví cuví. ¹⁶ Cuatyí noo ri rayíí ra Adán cuan, ma cuví ndíqui tahan chí chihin cha sacacú Nyoo chi yo. Vatyí cha cuenda cuatyí noo ri ra cuan, Nyoo tachí tuñi ra chí ñáyiví. Soco vityin chihin cha ñahri tyiyahví yo, Nyoo sacacú ra chí yo ta sahá ra tuhun tyi vaha yo nuu ra, vasi cuaha xaan cuatyí sacuví yo. ¹⁷ Ndicha vatyí quichaha nyaca ñaha tuhun chíhi síqui ñuhu ñáyiví cha cuenda cuatyí noo ri rayíí. Ta cha tyicuan caa chitó yo vatyí cahnu ca cuví cha vaha cha sacuví nonga ra, ra Jesucristo. Vatyí tandihí ñu cha ñihí cha vaha cha chahá Nyoo, cha cuvaha ñu nuu ra, ta iyó ñu ñáyiví chaa chihin tunyee íñi ra Jesucristo. ¹⁸ Tari cha catyí cuatyí ra Adán ta tachí tuñi Nyoo chí tandihí ñáyiví iyó síqui ñuhu ñáyiví, tyicuan caa tucu cha cuenda cha vaha cha sacuví ra Jesucristo, Nyoo saha ra tuhun tyi vaha ñáyiví nuu ra ta chahá ra noo ñáyiví vaha coo tandihí ñu. ¹⁹ O cuñí chí catyí tyehe caa: Cha cuenda cha ña quichaha ra Adán cuan nu cahán Nyoo, cuaha xaan ñu chicoo cuatyí ñu. Ta suri tyicuan caa tucu cha catyí cha quichaha ra Cristo nu cahán Nyoo, cuaha xaan ñu cucuvaha ñu nuu Nyoo.

²⁰ Vatyí Nyoo chaha cuenda ra ley cuan chí ra Moisés tacuhva nacoto ñáyiví tyi iyó cuatyí ñu. Ta vasi que-tuví xaan cuatyí yo cha cuenda ley cuan, soco Nyoo cahnu ca tucahnu íñi iyó chí ra chihin yo vatyí cuñí xaan ca ra chí yo. ²¹ Tari chinyaca ñaha cuatyí chí yo ta chaha chí tuhun chíhi chí yo, tyicuan caa tucu nyacá ñaha tumañi íñi Nyoo chí yo vityin ta sacuvaha ra chí yo nuu ra vatyí coo yo noo ñáyiví cha ma naa ca maa cha cuenda Sutu Mañi yo Jesucristo.

6

Ma sacuvi ca yo cuatyí soco sacuvi yo cuhva catyí ra Cristo

¹ ¿Yoso caa catyí yo vityin? ¿Atu cusacuvi ca yo cuatyí tacuhva vatyí sañaha Nyoo vatyí cuaha xaan tuc-ahnu íñi iyó chí ra? ² Ma sacuvi ca yo. Yoó cha yaha ndu uvi íñi yo cuatyí yo. Tari quívi chíhi cuatyí yo cuví cuan. Ta ¿yoso caa cuví sacuvi ca yo vityin? Ma cuví ca. ³ ¿Atu ña chitó nyoho vatyí cha ndu ñn ri yo chihin ra Cristo Jesús cha cuenda cha condutya yo? Tari quívi chíhi yo chihin ra cuví cuan. ⁴ Vatyí cha cuenda cha condutya yo, tari quívi cha quíhví yo chíhi ñuhú ñn ri chihin ra Cristo quívi chíhi ra cuví cuan. Ta tari nandoto ra Cristo chihin cha ndicha ñuhu Sutu yo Nyoo, tyicuan caa tucu maa yo, tacuhva vatyí coo yo noo ñáyiví chaa chihin ra.

⁵ Ta ñn ri coño ñuhu nanduví yo chihin ra, tari quívi chíhi yo ñn ri chí- hin ra cuví cuan, ta cha tyicuan caa, cunandoto tucu yo tari nandoto ra. ⁶ Ta chitó yo vatyí tandihí cuhva chíyo yo ta ityi chata ca, cha yaha chíhi chí nu cruzi chihin ra Cristo, tacuhva vatyí coño ñuhu cuatyí yo ma cuví ca cunyaca ñaha chí chí yo. ⁷ Vatyí ñu cha yaha chíhi, ma cuví ca sacuvi ñu cuatyí. ⁸ Ta tatu cha yaha chíhi yo chihin ra Cristo, chinó íñi yo vatyí cucoo tucu yo chihin ra. ⁹ Ta chitó yo vatyí cha yaha chíhi ra Cristo, noo ri chaha nandoto ra, ta ma cuví ca ra. Ñahri ca tunyee íñi iyó chí tuhun chíhi cha cunyaca ñaha ca chí chí ra. ¹⁰ Yaha cha chíhi ra Cristo cha catyí cuatyí ñáyiví, nandoto ra cha ma cuví ca maa ra. Ta vityin iyó ra cha cuenda maa Nyoo. ¹¹ Ta tyicuan caa tucu maa yo, ma sacuvi ca yo cuatyí. Saha yo tuhun tyi cha yaha chíhi yo cha cuenda cuatyí cuan. Soco coo yo cuhva cuñí Nyoo cha cuenda cha ñn ri cuví yo chihin ra Cristo Jesús Sutu Mañi yo.

¹² Yucuan chaha yoó ma cuhva yo ityi cha cunyaca ñaha ca cuatyí chí coño ñuhu yo. Ma cuhva yo ityi chí

coño ñuhu yo cha saniñi chi chi yo cha sacuví yo noo cha ña vaha cha cuñí chi. ¹³ Ma cuhva yo ityi chi coño ñuhu yo cha sacuví chi cha quiñi caa. Soco cuhva cuenda yo chi yo chi Nyoo, tari noo ñáyivi cha chihí ta nandoto. Cuhva cuenda yo coño ñuhu yo chi Nyoo tacuhva vatyí sacuvi yo cha vaha. ¹⁴ Vatyí cuatyí yo ma cuví ca chasaha chi chi yo. Vatyí ley cha tyaa ra Moisés, ña nyacá ñaha ca chi chi yo, soco cha cacu añima yo ta iyó yo cha cuenda tumañi iñi cha chahá Nyoo chi yo.

Cuví yo tari noo musu cha sacuví cha vaha

¹⁵ Iyó yo cha cuenda tumañi iñi cuan, ta vityin ña nyacá ñaha ca ley chi yo. ¿Ta tatu ña nyaca ñaha ca ley chi yo, atu tahán chi sacuvi ca yo cuatyí? Ña tahán chi. ¹⁶ Nyoho chitó vaha ndo vatyí tatu cuví ndo musu noo ra, tahán chi sacuvi ndo cha catyí ra cuan. Ta tyicuan caa cuví yo musu ra cha tuhvá yo quichahá chi. Yucuan chaha tatu quichahá yo cha cuñí cuatyí cha sacuvi yo, tari noo chitoho yo cuví cuatyí cuan, vatyí quichahá yo chi cuan. Ta cunaa yo chihin cuan. Soco tatu quichahá yo chi Nyoo, cusaha ra tuhun tyi vaha yo. ¹⁷ Soco tyahvi nyoo chi Nyoo, tyi nyoho nu quichi chi cuví ndo noo musu chi cuatyí vatyí quichahá ndo chi cuan. Soco vityin chihin cha ñi iñi ndo quichahá ndo tuhun Nyoo cha sañahá ñu chi ndo. ¹⁸ Cha yaha cundaá cuatyí ndo, ta vityin ña nyacá ñaha ca chi chi ndo. Ta vityin cuví ndo noo musu cha cua sacuvi cha vaha. ¹⁹ Cahín noo cuhva cha ña yí ri chihin ndo vatyí ta cutuñi vaha ca iñi ndo tuhun Nyoo. Quiví cuan chahá cuenda ndo coño ñuhu ndo chi cha quiñi caa ta cha ña vaha vatyí sacuvi ndo cha ña vaha. Vityin ñacuhva cuenda ndo coño ñuhu ndo chi Nyoo tacuhva vatyí coo ndo noo ñáyivi cachi, ta maa maa ri cha vaha sacuvi ndo nuu ra.

²⁰ Quiví cuví ndo musu cha quiñi caa, ña cuví sacuvi ndo cha vaha.

²¹ Soco ¿ñáá cha ñihí ndo chihin cuan? Maa ri ticahan nuu chahá cuan chi ndo. Ta ña tuví iñi ndo. Maa ri tuhun chihi ta anyaya nyisó cuan. ²² Soco vityin ña nyacá ñaha ca cuatyí chi ndo. Ta vityin cha sacuví ndo tyiño nuu Nyoo. Ta ihya ndicha tyinyeé chi chi ndo vatyí chihin ihya cuví coo ndo noo ñáyivi cachi. Ta nu ndihí tuhun tyicuan ri maa cucoo ndo chihin Nyoo. ²³ Cha sacuví yo cuatyí, ican cuan chahá tuhun chihi chi yo. Soco tumañi iñi cha chahá Nyoo chi yo, ican cuan cuví ñáyivi cha ma naa ca maa. Ta ican cuan chahá ra ta ñahri tyiyahvi yo, cha cuenda cha ñi ri cuví yo chihin ra Cristo Jesús, Sutu Mañi yo.

7

Ña nyacá ñaha ca ley chahnu chi ñu yihí cuenda ra Cristo

¹ Yañi, nyoho ñu chitó ley cuví ndo, chitó ndo vatyí ley nyacá ñaha chi chi noo ñáyivi cha ñi ri ca cha iyó ñu. ²⁻³ Ta cuñun, noo ñaha tandaha, catyí ley vatyí coo ña chihin yí ña nyacua nya cúvi ra. Ta tatu iyó ña chihin inga rayí cha ñi ri cha iyó yí ña, chicoo cuatyí ña nuu Nyoo. Soco tatu cha yaha chihi yí ña, ña nyacá ñaha ca ley cuenda ñu tandaha chi ña, ta cuví tandaha ña chihin inga ra, ta ma coo cuatyí ña nuu Nyoo.

⁴ Ta tyicuan caa tucu nyoho yañi. Cha chihí ndo cha cuenda ley chahnu ta cuví ndo ñu cuenda ra Cristo vatyí ican ra cuví yí ndo vityin. Ta ican ra cuví ra cha nandoto, tacuhva vatyí cuví cotyíño Nyoo chi yo ta sacuvi yo cha vaha. ⁵ Quiví chiyo yo cuhva cuñí coño ñuhu yo, ley chahnu cha tyaa ra Moisés, tacuhva sanaquiquí ri chi chi yo cha sacuvi yo cha quiñi caa, vatyí catyí chi tyi ma sacuvi yo. Soco sacuvi yo, ta yucuan cuví cha chahá tuhun chihi chi añima yo. ⁶ Soco vityin ña nyacá ñaha ca ley chahnu cuan chi yo, vatyí cha yaha chihi cha quiñi caa yo chihin ra Cristo. Ta vityin cuví sacuvi yo tyiño nuu Nyoo vatyí iyó yo ñáyivi chaa cha chahá Tatyí lí Nyoo chi yo,

ta ña sacuví ca yo tari sacuví yo quiví nyicon xaan yo ley chahnu cuan.

Ley Nyoo, ican sañahá vatyí iyó cuatyí yo

⁷Ta vityin yoso caa, ¿atu ña vaha ley cuan? Ñima cha ña vaha. Vaha. Soco tyehe ta ña tuví ley cuan, ma cote ñáá cha cuví cuatyí. Ni ma cote tyí ña vaha cha quichi cuví ñi cha chí inga ñáyiví, tyehe ta ña catyí ley cuan vatyí ña vaha. ⁸Tyehe ta ñahri ley cuan, ma cote ñáá cha cuví cuatyí, ta ma cuñi xain sacuvi, soco quiví cha chité ñáá cha cuví cuatyí, yucuan quiví quichí cuví xaan ñi sacuvi, vatyí naquiquí cha quiñi caa cha iyó chí. Soco tyehe ta ñahri ley, ma coto yo tyí iyó cuatyí. ⁹Ta quiví cha ña chité ñáá tuhun cahán ley cha chahá Nyoo chí ra Moisés, chica ñi vatyí ñahri cuatyí iyó nuu Nyoo. Soco quiví chité ley cuan, ta chité vatyí tahán chí cunai nuu Nyoo vatyí iyó cuatyí. ¹⁰Catyí ley cuan tyí tatu quichahí chí chí, cucoi tyicuan ri maa. Soco cha nuu cha ñihi tahvi añime chihin ley cuan, cunaa ndihi nuu Nyoo. ¹¹Ta cuatyí cha iyó chí, sandaví ñaha chí chí vatyí chotyíño chí ley chahnu cuan tacuhva vatyí tahán chí cunai nuu Nyoo, vatyí ña quichahí nu cahán ley cuan.

¹²Ley cha chahá Nyoo chí ra Moisés, vaha xaan, vatyí tuhun cha chahá maa Nyoo cuví, ta tandíhi cha catyí ra vatyí sacuvi yo, vaha xaan ta cuiti xaan. ¹³Ta ley vaha cuan, ¿atu ican cuan sativí chí? Ñima. Cuatyí cha sacuvi, ican sativí chí, yucuan chaha tahán chí cunai nuu Nyoo. Vatyí ley vaha cuan, ican cuví cha sañahá chí vatyí cuatyí cuví cha sacuví. Ta cha tyicuan caa, sañahá ley vatyí quiñi xaan caa cha sacuví yo cuatyí.

¹⁴Ta chitó yo vatyí ley cuan, Nyoo chahá. Ta ñahri cuatyí ley cuan. Soco mai iyó cuatyí vatyí sacuví cha quiñi caa ta nyacá ñaha cuatyí cuan chí. ¹⁵Ña cutuñi ñi ñáá cha tahin. Vatyí cuñi sacuvi cha vaha, ta ña cuví

sacuvi. Ta cha ña vaha cha ña cuñi sacuvi, ican cuan sacuví. ¹⁶Cuñi xain sacuvi cha vaha, soco ña cuví sacuvi, ta cha tyicuan caa ñi cuenda vatyí ley chahnu Nyoo, vaha chí. ¹⁷Ñima ca mai sacuví cha ña vaha, soco cuatyí cha iyó chí, ican cuan sacuví cha ña vaha. ¹⁸Vatyí chité vatyí iyó cuatyí cha cuenda coño ñuhi. Yucuan chaha ñahri cha vaha sacuví, vatyí quichí cuví ñi sacuvi cha vaha, soco ña cuví. ¹⁹Cuñi sacuvi cha vaha, soco ña sacuví ta sañihí que sacuvi cha ña vaha. ²⁰Ta tatu sacuví cha ña cuñi sacuvi, ñima ca mai sacuví, soco cuatyí cha iyó chí, ican cuan sacuví.

²¹Ta tyehe caa iyó noo cha tahin, tatu cuñi sacuvi cha vaha, maa ri cha ña vaha sacuví. ²²Vatyí chichi añime tahán xaan ñi ley Nyoo. ²³Soco iyó inga ley chichi coño ñuhi, ta ña tahán ñi chí cuhva cha tahán ñi añime. Ta chahá chí cha cunyaca ñaha cuatyí cha iyó chí coño ñuhi chí. ²⁴¡Ndahvi yuhu ra ndahvi! ¿Yóo ra cusacacu chí tacuhva ma cunai nuu Nyoo chihin cuhva ña vaha cha nyacuví coño ñuhi? ²⁵Noo tuhun ri maa Nyoo sacacú ra chí cha cuenda ra Jesucristo. ¡Tyahvi nyoo chí Nyoo cha cuenda cuan! Ta vityin nyehí vatyí chihin añime cuñi sacuví ley Nyoo, soco coño ñuhi cuñi chí sacuví chí ley cuatyí.

8

Tatyí Ii Nyoo tyinyeé chí chí yo ta cuví coo yo noo ñayiví chaa

¹Soco vityin, Nyoo ma tachi tuñi ca ra chí ñu ndu ñi ri chihin ra Cristo Jesús, ta ña iyó ca ñu cuhva cuñi coño ñuhu ñu, soco iyó ñu cuhva cuñi Tatyí Ii ra. ²Ta tyicuan caa tucu yuhu, Tatyí Ii Nyoo nyacá ñaha chí vityin vatyí ndachí chí chí, ta chahá chí noo ñayiví chaa coi cha cuenda cha ñi ri cuví chihin ra Cristo Jesús. Ta vityin ña nyacá ñaha ca ley cuatyí ta tuhun chí chí. ³Nyoo sacuví ra noo cha ña cuví sacuvi ley cha quehen cuenda ra Moisés, vatyí ña cuví chasaha chí coño ñuhu cuatyí yo cha nyacá ñaha

chi yo. Yucuan chaha Nyoo saquichi ra chi Sehe ra. Quichi ra chihin noo coño ñuhu tari maa yo, ta chihí ra cha cuenda cuatyí yo, ta sandihí ra tuhun cha nyacá ñaha cuatyí chi yo. ⁴ Sacuvi Nyoo tyehe caa tacuhva cuví sacuvi yo cuhva catyí ley ra, vatyí ñima ca cuhva cuñí coño ñuhu yo iyó yo, soco iyó yo cuhva cuñí Tatyí Ii Nyoo.

⁵ Vatyí ñu iyó cuhva cuñí coño ñuhu, cuhva cuñí chi chicá xiñi ñu, soco ñu iyó cuhva cuñí Tatyí Ii Nyoo, cuhva cuñí Tatyí Ii Nyoo chicá xiñi ñu. ⁶ Ta ñu chicá xaan xiñi maa maa ri tuhun cha cuñí coño ñuhu ñu, cunaa ñu nuu Nyoo. Soco ñu chicá xiñi cuhva cuñí Tatyí Ii. Iyó cha taxi ri añima ñu ta cucoo ñu ñayivi tyicuan ri maa chihin Nyoo. ⁷ Ñu cha maa maa ri cuhva cuñí coño ñuhu chicá xiñi, ñu xaan iñi chi Nyoo cuví ñu, vatyí ni ña cuñí ñu ta ni ña cuví sacuvi ñu cha catyí ley ra. ⁸ Yucuan chaha ñu iyó cuhva cuñí coño ñuhu, ña cuví sacuvi ñu cuhva tahán iñi Nyoo. ⁹ Soco nyoho ña iyó ca ndo cuhva cuñí coño ñuhu, vatyí tatu ndicha cha iyó Tatyí Ii Nyoo añima ndo, iyó ndo chihin cha ñin ri cuví ndo chihin Tatyí Ii Nyoo. Ñu cha yori Tatyí Ii ra Cristo ñohó añima, ñima ñu cuenda ra Cristo cuví chi ñu. ¹⁰ Soco ñu iyó ra Cristo añima, nyitó añima ñu vatyí sanduvaha Nyoo. Soco coño ñuhu ñu chihí chi cha catyí cuatyí. ¹¹ Nyoo sanandoto ra chi ra Jesús cha yaha cha chihí ra. Ta tyicuan caa tucu nyoho, tatu iyó Tatyí Ii Nyoo añima ndo, cusanandoto tucu Nyoo chi coño ñuhu ndo chihin Tatyí Ii ra.

¹² Ta tyicuan caa yañi, nyaá noo cha nyaá siqui yo cha sacuvi yo, soco ñima cha sacuvi yo cuhva cuñí coño ñuhu yo. ¹³ Vatyí tatu iyó ndo maa maa ri cuhva cuñí coño ñuhu ndo, cunaa ndo nuu Nyoo. Soco tatu iyó ndo cuhva cuñí Tatyí Ii Nyoo chihin tunyee iñi ra, cuví chasaha ndo chi cha quiñi caa cha cuñí coño ñuhu ndo ta cuconyito ndo cha ndicha cuii.

¹⁴ Vatyí tandihí ñu sacuví cuhva saquehén ityi Tatyí Ii Nyoo, sehe Nyoo cuví chi ñu. ¹⁵ Nya quivi cha tñin

cuenda yo Tatyí Ii Nyoo ta ña yuhví ca yo chi ra, vatyí ñima tari noo ra nyacá ñaha chihin cha xaan cuví ra, ta vityin nanduví yo sehe ra. Tatyí Ii sacahán chi yo na cahan yo chihin Nyoo tyehe caa: “Sutu Mañi yuhu”, catyí yo chi ra.

¹⁶ Ta suri maa Tatyí Ii cuan ndu ñin ri chi chihin cha chiñi tuñi yo ta sacoto chi chi yo vatyí cha cuví yo sehe Nyoo. ¹⁷ Ta cha cuenda cha cuví yo sehe ra, iyó ityi chi yo cha ñihi yo cha vaha cha catyí Nyoo tyi cuhva ra chi yo, ñin ri chihin ra Cristo. Vatyí tatu ñin ri nyehé yo tñdoho chihin ra Cristo, suri ñin ri cucahnu yo chihin ra.

¹⁸ Chité vatyí tñdoho cha nyehé yo vityin, noo cha luhlu ri cuví cha nuu cha tyaqui cha cunyehe yo nachaa yo nuu nyaá Nyoo. ¹⁹ Tandihí cha savaha Nyoo cuñí xaan chi nyehe chi, ta nyatú chi quivi cha cusañaha ra yóo cha cuví tandihí sehe ra. ²⁰ Vatyí tandihí cha savaha Nyoo tiví chi. Vasi ña cuñí chi tiví chi soco Nyoo chaha ra cha tiví chi cha cuenda cuatyí cha sacuvi ñayivi. Soco catyí Nyoo tyi coo quivi ta cunduchaa tucu chi inga chaha. ²¹ Tandihí cha savaha Nyoo ta cunduchaa tucu chi inga chaha, ta ma cutivi ca, quivi cha cunasama Nyoo cuhva iyó chi vityin. Ta cucusi cuñí chi ñin ri chihin tandihí sehe Nyoo vatyí ma tiví ca chi. ²² Chitó yo vatyí tandihí cha savaha Nyoo ta nyehé xaan chi tñdoho. Cahnu xaan tñdoho nyehé chi tari cha uhvi cha nyehé noo ñaha sihi cha cacú sehe ña. ²³ Ta ñima maa ri maa chi nyehé tñdoho, soco nyehé tucu yoó. Vasi cha natñin cuenda yo Tatyí Ii cha chaha quiyi Nyoo chi yo, soco cahnu xaan tñdoho nyehé yo, vatyí cuñí xaan yo cha tahán ri chi quivi cha cunanduvi yo sehe ra. Vatyí cunasama ra cuhva iyó coño ñuhu yo. ²⁴ Vasi ta ñihi ca yo tandihí cuan soco chitó yo tyi cuñihi yo vatyí chino iñi yo ta chihin cuan cacu yo. Tatu nyatú yo cha cutahan chi chi yo, cuñí chi catyí vatyí ta ñihi ca yo. Tatu cha yaha ñihi

yo chi chi, ma cuatu ca yo. ²⁵ Soco tatu yihí iñi yo cha ñihi yo noo cha ta nyehe ca yo, cuñí chi cha cuatu yo chihin cha cama iñi yo. ²⁶ Ta suri tyicuan caa tyinyeé tucu Tatyí li chi yo chihin cha vita cuñí yo vatyí ña chitó yo yoso caa cacán tahvi yo chi Nyoo cuhva tahán chi. Ta Tatyí li cuan chicán tahvi chi chi Nyoo cha cuenda yo chihin noo tuhun cha ña cuví nacatyí yo. ²⁷ Chitó maa Nyoo ñáá cha caá aña yo, ta chitó ra ñáá cha cuñí Tatyí li ra cacán chi, vatyí chicán chi cuhva cuñí maa ra cha cuenda ñáyivi cuenda ra.

²⁸ Chitó yo vatyí ñáyivi, ñu cuñí vavaha chi Nyoo, tandihí cha cuví chi ñu ta tyinyeé chi chi ñu, vatyí maa ñu cuví ñu nacachí ra, tari cuhva tyaa ra cuhva chi ñu. ²⁹ Vatyí nya quivi xihna ri, ta cha ñohó nuu Nyoo yóo cuví ñu cucunyicon chi ra. Ta tyaa ra cuhva chi ñu vatyí cucuvi ñu tari Sehe ra, ra Jesucristo, tacuhva vatyí cucuvi ra ra cha ñihi ca cha nuu tandihí ca yañi ra, ñu yihí tuhun Nyoo. ³⁰ Ta ñu cha tyaa Nyoo cuhva tyí cuví ñu sehe ra, nacana tucu ra chi ñu. Ta ñu cha nacana ra, suri sacuvaha ra chi ñu nuu ra. Ta ñu cha sacuvaha ra chi, chaha ra cha cucahnu cuví ñu chihin ra.

³¹ ¿Ñáá cha catyí yo cha tyicuan caa? Tatu Nyoo ta nyaá ra tumañi iñi chi yo, ¿yóo cha cuví tyaa cuatyí síqui yo? Yori. ³² Nyoo ña catyí ra cha ma cuhva cuenda ra sehe ra, soco chaha cuenda ra chi ra vatyí cúvi ra cha cuenda tandihí yo. Ta tatu tyicuan caa, ¿atu ma cuhva tucu ra tandihí ca cha chiñuhú chi yo in ri chihin Sehe ra? Cuhva ra. ³³ ¿Yóo cha cuví tyaa cuatyí síqui ñu cha nacachí Nyoo? Yori. Vatyí Nyoo ican ra cuví ra saha ra tuhun tyí vaha ñu nuu ra. ³⁴ ¿Yóo cha cuví catyí tyí cuhun yo anyaya? Yori. Vatyí ra Cristo cuví ra chihí cha cuenda cuatyí yo, ta nandotó ra ta vityin nyaá ra chiyo vaha ndaha Nyoo, ta chicán tahvi ra nuu Nyoo cha cuenda yo. ³⁵ Ñahri cha cuví sacuachiyo chi yo chihin cuhva cuñí xaan ra Cristo chi yo. Vatyí vasi nyehé

xaan yo tindocho, vasi iyó tisihi, vasi cahán ñáyivi chi yo cuenda tuhun Nyoo, vasi iyó tama, o ñahri sahma yo, vasi yuhví yo, vasi chihi yo, soco ma cuví sacuachiyo tandihí tindocho cuan chi yo chihin cuhva cuñí ra chi yo. ³⁶ Vatyí tyehe caa cahán chi nuu tutu Nyoo tuhun tindocho cha cunyehe yo: Cha cuendon, Sutu Mañi yuhu, ta cuñí cahñi ñáyivi chi ndi tandihí quivi.

Ta tari noo mbee cha cua cahñi ñu, tyicuan caa sacuví ñu chi ndi, catyí chi.

³⁷ Soco vasi yahá yo tandihí tindocho cuan, soco cucuvi vaha ca chasaha yo cha cuenda ra cha cuñí xaan chi yo. ³⁸ Yucuan chaha chitó vahi vatyí ñahri maa cha cuví sacuachiyo chi yo chihin cuhva cuñí xaan Nyoo chi yo. Ni tuhun chihi, ni ñayivi iyó yo, ni ángel, ni tatyí ña vaha, ni cha cuví vityin, ni cha cucuvi ityi nuu ca, ni noo cuan, ta ma cuví sacusin chi chi yo chihin Nyoo. ³⁹ Ni cha iyó nuu sucun, ni cha iyó nuu cono xaan, ni nonga cha savaha Nyoo, ma cuví sacusin chi chi yo chihin Nyoo, ra cuñí xaan chi yo cha cuenda ra Cristo Jesús Sutu Mañi yo.

9

Nyoo nacachí ra chi ñu ñuu Israel

¹ Cahín cha ndicha, tari tuhvá cahán noo ra chinó iñi chi ra Cristo. Ña sandaví ñahi, vatyí Tatyí li Nyoo ican saquehén ityi cha chiñi tuñi xiñi. Yucuan chaha chitó vahi vatyí cha ndicha cahín nuu catyí tyí ² cuihya xaan cuñí ta tyicuan ri uhvi cuñí añaime ³ cha cuenda ñu ñui ñu Israel. Cuñí xain chi ñu. Ta nyacua cuhve añaime na cuhun maa nu uhvi, tyehe ta cuví cacu añaime ñu cha tyicuan caa. ⁴ Ta maa ñu, tata ra Israel vachi ñu. Ta Nyoo naquehen cuenda ra chi ñu tari cha sehe ra. Ta sañaha ra cuhva caá ra chi ñu, tyí cahnu xaan ra cuví ra, vatyí chinyaa ra chihin ñu. Ta natyihí tahan ra tuhun chihin ñu, ta chaha ra ley ra chi ra Moisés vatyí cuhva ra chi ñu. Ta sañaha ra cuhva cuñí ra

cha sacahnú ñu chi ra. Ta catyí ra chi ñu yoso caa cusacuvi ca ra cha vaha chihin ñu nu cuahan ca chi. ⁵ Tata ñu sutu chahnu yo cuví chi ñu, ta tata ñu, ican cuví chi ra Cristo cuenda coño ñuhu ra. Ican ra cuví Nyoo. Ta ican ra cuví ra nyacá ñaha tandihí cha iyó. ¡Na sacahnu yo chi ra tyicuan ri maa! ¡Ta na cuví chi tyicuan caa!

⁶ ¿Atu catyí vatyí ña sacuvi Nyoo tari cuhva catyí ra chi ñu Israel ta cha naha? Ñima. Soco cuñí chi coto yo tyi ña tandihí ñáyiví Israel cuví ñu ñu Israel cha ndicha. ⁷ Ña tandihí ñu tata ra Abraham ta cuví ñu sehe ra cha ndicha. Vatyí tuhun cha cahán maa Nyoo chihin ra, cahán chi cha cuenda noo ri sehe ra. Vatyí catyí Nyoo chi ra tyehe caa: “Cha cuenda ra Isaac sehun cucoo ñáyiví chuun.” ⁸ Ihya sañahá chi yo vatyí ñima cha cuenda tata cha vachi ñáyiví ta cuví ñu ñáyiví cuenda Nyoo. Soco tandihí ñáyiví chinó iñi tuhun catyí Nyoo tyi cusacuvi ra, ican ñu cuví ñu sehe ra cha ndicha. ⁹ Vatyí cha catyí Nyoo tyi cuhva ra chi ra Abraham, ican cuví ihya: “Quíví cha tahán chí, cuquichi nu nyicú ndo ta cu Sara cucoo noo sehe ña”, catyí Nyoo chi ra.

¹⁰ Ta ñima yucuan ri. Vatyí ni nduvi sehe cu Rebeca, ñn ri sutu ra, sutu chahnu yo, ra Isaac. ¹¹⁻¹² Soco cha ni cumañi ca cacu ndotyín, ta sacuvi ca ndotyín ni cha vaha, ni cha ña vaha, ta catyí Nyoo chi cu Rebeca: “Sehun cha ñihi ca cucuvi ra musu ra cha luhlu ca.” Sacuvi Nyoo tyicuan caa vatyí cachí ra chi ñáyiví cha cuñí maa ra, ta ñima cha cuenda cha sacuvi ñu. ¹³ Tari catyí ra nu tutu ra tyehe caa: “Cuñí que chi ra Jacob, ta chi ra Esaú ña cuñí.”

¹⁴ ¿Tu tyicuan caa ñáa cha cucatyí yo? ¿Atu cuví catyí yo tyi ña vaha cha sacuvi Nyoo? ¡Ma cuví! ¹⁵ Vatyí catyí ra chi ra Moisés tyehe caa: “Cu cundahví cuñi yóo ñáyiví cuñí mai cundahví cuñi.” ¹⁶ Ta tyicuan caa chitó yo vatyí ma cundahví cuñi Nyoo nyehe ra chi ñáyiví cha cuenda cuhva cuñí maa ñu, o cha cuenda cha sacuvi ñu. Soco cuhva cuñí maa Nyoo cucuvi.

Vatyí maa ra cuví ra cundahví iñi yóo chi cuñí maa ra. ¹⁷ Vatyí nu tutu ra, catyí ra chi rey Egipto tyehe caa: “Sacuví rey chuun tacuhva sañahí tunyee iñi cha iyó chíi chi ndo, ta tandihí ñáyiví cucoto ñu yóo ra cuví yuhu”, catyí Nyoo. ¹⁸ Ta tyicuan caa Nyoo cundahví cuñí ra yóo ñáyiví cuñí maa ra. Ta suri sandundavá tucu ra añima ñu cuñí maa ra sandundava ra.

¹⁹ Ta cu catyun chii: “Tatu tyicuan caa, ¿ñáa tuhun cha tyaa Nyoo cuatyí síqui ñáyiví? Vatyí ¿yóo cha cuví nacahnu cuhva cuñí ra? ¡Yori!” ²⁰ Soco ña vaha cuhva chicá iñun cha tyicuan caa. Vatyí yori cuví catyí tyi ña vaha cha sacuvi Nyoo. ¿Yóo ra cuví yoho vatyí nacahun nu cahán Nyoo? ¿Atu cuví catyí quisí ñuhú cuan chi ñu cha savaha chíi chí vatyí ña tahán iñi chíi cuhva cha savaha ñu chíi chí? Ma cuví. ²¹ Vatyí ñu cha savahá ndaha tyiño iyó ityí chíi ñu savahá maa ñu ñáa cha cuñí ñu chihin nyahyu cuan. Chihin nyahyu cuan cuví savaha ñu noo quisí finu xaan. Ta cuví savaha tucu ñu noo cha ndahví ri.

²² Tyicuan caa tucu Nyoo, iyó ityí chíi ra cha tachi tuñi ra chíi ñáyiví quiñi iyó cha cuenda cha sacuvi ñu cha ña vaha. Ta cuví sañaha ra chíi ñu tyi iyó xaan tunyee iñi chíi ra. Soco sanyee xaan ra iñi ra chihin ñáyiví cuan. Ta chíi maa ñu tahán chíi tachi tuñi ra. Ta tahán chíi sanaa ra chíi ñu. ²³ Ta iyó tucu ityí chíi ra cha saha ra tucahnu iñi chíi ñu savaha maa ra vatyí sañahá ra tyi cahnu ra cuví ra. Maa ñu cuví ñu ñu cachí ra vatyí cuñihi ñu tandihí cha vaha, ta cucoo ñu gloria chihin ra. ²⁴ Ta suri maa yo cuví ñu cuan. Vatyí Nyoo cana ra chíi yo. Yihí yo cuví yo ñu Israel, ta yihí yo cha ñima ñu Israel cuví yo. ²⁵ Tari catyí Nyoo nu tutu cha tyaa ra Oseas tyehe caa:

Ñu cha ñima ñu ñui cucatyí yuhu tyi ñáyiví chíi cuví chíi ñu.

Ñu cha ña cuñi, cunacuñi chíi ñu, catyí Nyoo.

26 Ta suri nu catyí Nyoo chi ñu tyehe caa: “Nyoho ñima ñáyivi chii cuví ndo.” Ta suri yucuan cunacatyí tucu ra chi ñu: “Sehe yuhu, ra cuví Nyoo nyito, cuacuvi ndo.” 27 Soco cha cuenda ñu Israel catyí ra Isaías tyehe caa: “Vasi cuaha xaan ñáyivi ñu Israel tari cha cuaha niyiti iyó yuhu tyañuhu, soco suhva ri ñu cucacu. 28 Vatyí Sutu Mañi yo numi ri cusacuvi ra tandihí cha catyí ra tyi cusacuvi ra siqui ñuhu ñáyivi chihin cha cachi.” 29 Tari catyí tucu ra Isaías ta ityi chata ca tyehe caa:

Tyehe ta Sutu Mañi yo ra nyacá ñaha tandihí cha iyó andivi, ta ma sacacu ra chi suhva yo, cunaa tandihí yo,

Tari naa ñáyivi Sodoma ta ñu Gomorra ta cha naha.

Ñu Israel nducú ñu cuhva cuvaha ñu nuu Nyoo soco ña ñihí ñu cuhva

30 ¿Tatu tyicuan caa, ñáa cha catyí yo? Ñáyivi cha ñima ñu Israel cuví, ña nducú ñu cuhva cuvaha ñu nuu Nyoo, ta icán ñu cuví ñu cuvaha nuu ra cha cuenda cha chinó iñi ñu chi ra. 31 Ta ñu Israel nyicón xaan ñu ley, tyi cuñí maa ñu tyi cuvaha ñu nuu Nyoo chihin cuan, soco ña cuví. 32 ¿Ñáa tuhun? Vatyí cuñí ñu cuvaha ñu nuu Nyoo chihin cha sacuví ñu ley cuan, ta ña cuñí ñu cuvaha ñu nuu ra chihin cha chinó iñi ñu chi ra. Yucuan chaha vatyí tari cha catyihí chaha ñu chihin noo yuu cuví chi cuan. 33 Yuu cuan cahán Nyoo tuhun nu tutu ra tyehe caa:

Ñuu Sión, yucuan tyají chi noo rayi cha cuví tari noo yuu.

Noo yuu cha sanduvá chi ñáyivi cuví ra.

Soco ñu chinó iñi chi ra ma cucahan nuu ñu, catyí Nyoo nu tutu ra.

10

1 Yañi, cuñí xain chihin cha tandihí añime cha cacu ñu Israel. Ta cha chicán tahvi xain cha cuenda ñu.

2 Cha ndicha cuví vatyí cuñí xaan ñu sacahnú ñu chi Nyoo, soco ña ñihí ñu cuhva yoso caa tahán chi sacuví

ñu. 3 Vatyí ña chitó ñu yoso caa sacuvahá Nyoo chi ñáyivi nuu ra. Ta nducú ñu cuhva sacuvaha maa ñu chi ñu, ta ña nacuhvá cuenda ñu chi ñu chi ra tacuhva sacuvaha maa ra chi ñu. 4 Vatyí ra Cristo cha quichí ra ta sacuvi ra tandihí cha catyí ley, ta sacuví ra vatyí tandihí ñu chinó iñi chi ra, cuvaha ñu nuu Nyoo.

5 Catyí ra Moisés vatyí cuví cuvaha ñáyivi, soco tatu quichahá ñu cha catyí ley, vatyí catyí ra tyehe caa: “Ñu cha quichahá tandihí cha catyí ley, coo ñu noo ñáyivi cha ma naa ca maa.”

6 Soco cha cuvaha yo nuu Nyoo cha cuenda cha chinó iñi yo chi ra Cristo, catyí nuu tutu Nyoo tyehe caa: “Ma caca xiñun vatyí cuñí chi cha cundaa noo ra andivi ta cusanoo ra chi ra Cristo tacuhva sacacu ra chi yo.” Ma caca xiñun tyicuan caa vatyí cha yaha quichi ra Cristo. 7 Ni ma caca xiñun vatyí cuñí chi cha cunoo noo ra chichi ñuhú vatyí sanandoto ra chi ra Cristo, vatyí cha yaha nandoto ra. 8 Ma caca xiñun tyicuan caa vatyí tyehe caa catyí nu tutu Nyoo: “Tuhun Nyoo yatyin nyaá chi chihin ndo, yuhu ndo ta añima ndo nyaá chi.” Ta suri tuhun cuan sacoto ndi chi ndo, tuhun cha quichí ra Cristo ta nandoto ra. Ican cuví tuhun cha tahán chi chinó iñi yo. 9 Tatu chihin yuhun catyún vatyí ra Jesús cuví Sutu Mañi yo, ta chihin añimon chinó iñun tyi Nyoo sanandoto ra chi ra cha yaha chihí ra, cucacu añimon. 10 Vatyí chihin añima yo cuñí chi chino iñi yo chi ra Cristo tacuhva cuví cuvaha yo nuu Nyoo, ta chihin yuhu yo tahán chi catyí yo tyi chinó iñi yo, tyicuan ta cacu añima yo. 11 Tuhun Nyoo catyí chi: “Ni noo ñu cha chinó iñi chi ra ta ma tahan ñu ticahan nuu.” 12 Vatyí Nyoo ñu ri cuhva nyehé ra chi ñu Israel ta chi ñu inga ñuu. Vatyí suri maa ra cuví ra ra nyacá ñaha chi tandihí yo. Ta nasocó xaan ra chi tandihí yo cha chicán tahvi yo chi ra. 13 Vatyí tyehe caa catyí tuhun Nyoo: “Tandihí ñu cha chicán tahvi chi ra Jesús cucacu añima ñu.” 14 Soco ¿yoso caa cucacan

tahvi ñu chi ra tatu ta chino ca iñi ñu chi ra? Ta ¿yoso caa cuchino iñi ñu chi ra tatu ta cuiñi ca ñu tuhun ra? Ta ¿yoso caa cuiñi ñu tuhun ra tatu ta yori ca cañan tuhun ra chihin ñu?

¹⁵ Ta ¿yoso caa cucahan ñu yihí tuhun Nyoo chihin ñu, tatu yori tachi chi ñu? Tari catyí nu tutu Nyoo: “Ñana cha tyaqui nu chaa ñu cañan tuhun vaha nuu ñáyivi.” ¹⁶ Soco ña tandihi ñu ta quichahá ñu tuhun cha sacacú Nyoo añima yo. Vatyí tyehe caa catyí ra Isaías: “Sutu Mañi yuhu, yori cuñi chino iñi tuhun cañan ndi”, catyí ra. ¹⁷ Yucuan chaha cha chiñi xihna yo tuhun ra Cristo, tyicuan ta chino iñi yo chi ra.

¹⁸ Soco ndacá tuhin ihya: ¿Atu ña chiñi ñu Israel tuhun Nyoo? ¡Chiñi ñu! Vatyí nu tutu Nyoo catyí chi tyehe caa:

Sutu Mañi yuhu, cha sacoto ñáyivi tuhun maun nicahnu siqui ñuhu ñáyivi, catyí chi nu tutu Nyoo.

¹⁹ Soco ndacá tuhin inga chaha tyehe caa: ¿Atu ña chinó iñi ñu Israel cha cuenda tyi ta nacoto ca ñu tuhun Nyoo? ¡Chitó ñu! Vatyí cha xihna ri ra Moisés tyaa ra tuhun cañan Nyoo chihin ñu Israel tyehe caa:

Nyoho, cucuquiñi cuñi ndo vatyí cucuhve cha vaha chi noo ityi ñáyivi cha ñima ri tuhun, ñáyivi cha ña cutuñi iñi.

Ta cunaquiqui tisihi ndo nyehé ndo chi ñu, catyí Nyoo.

²⁰ Ta ra Isaías caña iñi ra catyí ra tyi ñu cha ña nanducú chi Nyoo, nañihí ñu chi ra. Ta sañahá ra chi ra chi ñu cha ña ndaca tuhun tuhun ra. ²¹ Ta tyaa tucu ra Isaías tuhun cañan Nyoo chihin ñu Israel tyehe caa: “Ndiyaca cane chi ñáyivi chii, nacuhva cuenda ñu chi ñu chii, soco ña quichahá ñu. Ndava xaan iñi ñu”, catyí Nyoo.

11

Yihí ñu Israel cha ñihí ñu cuhva cacu añima ñu

¹ ¿Atu ña cuñi ca Nyoo chi ñu Israel? Ñima cha ña cuñi ca ra chi ñu, vatyí

suri ra Israel cuví tucu yuhu. Vatyí tata ra Abraham ta tata ra Benjamín cuví. ² Nyata cha naha cachí Nyoo chi ñu Israel tacuhva cuví ñu ñáyivi chi ra. Ta vityin ñima cha sacuachiyó ndihi ra chi ñu, vatyí chitó ndo cha catyí nu tutu Nyoo nu chicán tahvi ra Elías, profeta Nyoo, ta catyí ra tyi ña vaha sacuví ñu Israel, ta catyí ra tyehe caa: ³ “Sutu Mañi yuhu, chahñi ñu chi ra cuví profeta maun, ta satanñi ñu arta vehe ñuhu maun. Noo tuhun ri ca mai ndoo, ta cuñi ñu cañi ndihi ñu chii”, catyí ra. ⁴ Soco nacahan Nyoo ta catyí ra chi ra Elías: “Ñima maa ri maun ndoo. Ucha ca mil ñáyivi naquehen vahi cha ña chicuñi chiti ñu nuu xitohyo nyoo Baal”, catyí Nyoo chi ra. ⁵ Ta suri tyicuan caa vityin, ndoo suhva ñu sacahnú chi Nyoo. Ican ñu nacachí Nyoo chii tyi cusaha ra tucahnu iñi chi ñu. ⁶ Vatyí cha cuenda cha vaha ñáyivi cuví Nyoo ta sahá ra ticahnu iñi chi yo. Tyehe ta chihin cha vaha ñáyivi cuví maa yo ta sahá Nyoo tucahnu iñi chi yo, cuñi chi catyí tyi ñima ca chihin cha vaha maa ra ta sacacú ra chi yo.

⁷ Ta ¿yoso caa? Ñu Israel nanducú xaan ñu cuhva cuvaha ñu nuu Nyoo soco ña ñihí ñu cuhva. Soco ñu cha nacachí maa Nyoo chii, ñihí ñu cuan cuhva. Ta inga ñu Israel cuan ndundava xaan añima ñu. ⁸ Tari catyí nu tutu Nyoo tyehe caa: “Nyoo chaha ra noo cuhva chi ñu cha ma cutuñi iñi ñu. Ta chaha ra chiti nuu cha ña cutuñi iñi ñu cha nyehe ñu. Ta chaha ra soho ñu soco ña cutuñi iñi ñu cha chiñi ñu, ta nyacua nya vityin ta tyicuan caa ñu.” ⁹ Ta suri catyí tucu ra David tyehe caa:

Sii xaan cuñi ñu chihin vico cha iyó ñu, soco yucuan cuví trampa cha sanacava chi ñu. Ta cha cuenda cuan ta cutachi tuñi Nyoo chi ñu.

¹⁰ Ta tari cha cunducuaa ñu vatyí ma ndichin ca nyehe ñu cha ndicha.

Ta tyicuan ri cucoso cha vee chata ñu, catyí ra David tuhun ñu Israel

cha ña chinó iñi chi Nyoo.

Yoso caa cuvaha ñu cha ñima ñu Israel cuví nuu Nyoo

¹¹ Ta vityin ndaca tuhin ihya: ¿Atu cha cuenda cha ña quichaha ñu Israel cuan nu cahán Nyoo, ta ndoó ri maa ñu cha ma cacu ca aña ñu? Ñima. Vatyí cha cuenda cha ña quichaha ñu chi ra cha saquichi Nyoo, yucuan chaha sacacu Nyoo chi inga ñu cha ñima ñu Israel cuví. Ta tyicuan caa ta cuquiñi cuñi ñu Israel vatyí nachino iñi inga ñáyivi. Ta cha tyicuan caa ta cuquichi cuvi tucu iñi ñu cha cacu aña ñu. ¹² Tatu cha cuenda cha ña quichaha ñáyivi Israel cuhva cha chaha Nyoo chi ñu, cuví chi cha vaha cha cuenda tandihi ca ñáyivi, vatyí chahá chi cuhva, ta cuaha xaan ñu nachino iñi ñu chi ra Cristo, nyaca cuví quivi cundihvi tucu ñu Israel cuenda Nyoo inga chaha. Yucuan quivi, vaha xaan ta tyaqui xaan cucuvi.

¹³ Ta iyó suhva cha cuñi catyi chi nyoho cha ñima ñu Israel cuví ndo, vatyí ra Jesús tyatyíño ra chii cha cuhin nu iyó ñáyivi cha ñima ñu Israel cuví. Ta chité vatyí niñi xaan cuví tyíño cha chaha maa Nyoo chii. ¹⁴ Ta cuñi tiqui vatyí cunyehe ñáyivi Israel ñu ñui cuhva chinó iñi ndo chi Nyoo, ta cuquichi cuvi iñi tucu suhva maa ñu sacuvi ñu tyicuan caa. Ta tyicuan caa ta cacu aña ñu. ¹⁵ Vatyí cha cuenda cha ña natiñ cuenda Nyoo chi ñu Israel cuví cuvaha inga ñáyivi nuu ra. Vaha xaan cha tyicuan caa ta nyaca cuví quivi cunatiñ cuenda tucu ra inga chaha chi ñu Israel, cucuvi tari cha cunandoto ñu nu chihí ñu. ¹⁶ Tatu vaha noo pan cha savaha yo cha xihna ri chihin yuchan pan cuan, vaha tandihi ca yuchan cuan. Ta tatu vaha yoho noo yutun, tandihi ca soto tun, ta vaha. Ta tyicuan caa tucu ñu Israel, cuñi Nyoo chi ñu cha cuenda cha vaha ra cha vachi ñu tata.

¹⁷ Ta ñu Israel cuví ñu tari noo soto noo tu olivo vaha cha cumí Nyoo. Ta chahnya Nyoo chi suhva ñu vatyí ña chinó iñi ñu chi ra. Ta chaha tu

olivo cuan natyaa tahan ra soto noo tu olivo cuhu. Ta maa ndo cuví tari tu olivo cuhu cuan. Ta tari cha natyaa tahan ra chi ndo chaha tu olivo cha xihna ri cuan. Ta tyicuan caa ndu ñin ri ndo chihin tu olivo Nyoo ta naquehén ndo tandihi cha vaha cha iyó chi ra. ¹⁸ Soco ma saha ndo tyi vaha ca ndo ican saha inga ñu cha cuví soto tu olivo cha chahnya Nyoo. Vatyí tatu cuñi maa ndo tyi vaha ca ndo, cuñi chi nicohon iñi ndo vatyí ñima maa ndo nyisó ndo chi yoho yutun cuan, soto maa yoho yutun cuan nyisó chi ndo.

¹⁹ O catyi ndo: “Ican, soto chahnya Nyoo soto yutun cuan tacuhva nicunyaa maa ndi chaha tun.”

²⁰ Vaha. Soco chahnya Nyoo soto cuan cha cuenda tyi ña chinó iñi ñu chi ra. Ta nyoho nicunyaa ndo yucuan, soto cha cuenda cha chinó ri iñi ndo chi ra. Yucuan chaha ma sacahnu ndo chi ndo, soto saha ndo cuenda chi ndo. ²¹ Vatyí tatu ña saha Nyoo ticahnu iñi chi ñu cha cuví soto vaha cuan, ni chi nyoho ta ma saha ra ticahnu iñi tatu ña chinó vaha iñi ndo chi ra. ²² Nyehe yoso cha vaha Nyoo, soto tyicuan tucu xaan ra chihin ñu cha ña natiñ cuenda tumañi iñi chahá ra. Soco chihin nyoho, vaha xaan ñáyivi cuví ra. Soco cuñi chi cha naquehén vaha ndo tumañi iñi cha chahá ra vatyí tatu ña naquehén vaha ndo, cucahnya tucu ra chi nyoho. ²³ Soco tatu nachino tucu iñi ñu Israel inga chaha, cu nicunyaa tucu ñu nu coyo ñu. Vatyí Nyoo iyó tunyee iñi chi ra cha natyatan tucu ra chi ñu cuan inga chaha. ²⁴ Vatyí tatu nyoho cha ñima ñu Israel cuví ndo, ta quehen Nyoo chi ndo cha cuví ndo tari soto noo yutun olivo cuhu, ta natyaa tahan ra chi ndo chihin tu olivo vaha cha cumí ra, ¡ta nyaca cuví ñu Israel cha cuví ñu soto tu olivo vaha! ¡Cunatyaa tahan chaa ra chi ñu inga chaha chaha tu olivo nu coyo ñu!

Nu ndihi ta cucacu tucu ñu Israel

²⁵ Vatyí yañi, cuñi cha coto ndo noo tuhun xehe cha sacuvi Nyoo, tacuhva

vatyí ma caca xiñi ndo vatyí chitó xaan ndo. Vatyí ñu Israel ndundava añima ñu suhva quiví, nyacua nya cha cuví nachino iñi inga ñáyiví chi Nyoo. ²⁶ Ta cha yaha quihví inga ñu cuenda Nyoo, tyicuan ta tandihí ñu Israel cucacu añima ñu, vatyí nu tutu Nyoo catyí chi tyehe caa:

Ra cha cusacacu chi ñáyiví, ityi Sión cuquichi ra.

Ta cusacanyaha ra cuatyí cha iyó chi ñáyiví chi ra Jacob.

²⁷ Ta ihya cuví tuhun cha cunatyíhi tahin chihin ñu, quiví na sacuachiye cuatyí ñu, catyí Nyoo nu tutu ra.

²⁸ Cuxaán xaan ñu Israel chihin Nyoo cha cuenda tuhun vaha ra Cristo cha cacu añima yo. Ta tyicuan ta cuví chino iñi maa ndo. Soco Nyoo tacuhva cuñí ri maa ra chi ñu Israel tata ra Abraham, ta ra Isaac, ta ra Jacob vatyí cachino iñi ra chi ra quiví cachiyó ra, ta yucuan chaha cachí ra chi ra. ²⁹ Vatyí noo cha cha yaha chaha Nyoo ña natinyaá ra. Ni ña ndu uvi iñi ra cha yaha nacana ra chi yo. ³⁰ Nyoho, ta ityi chata ca, nacahnú ndo nu cahán Nyoo. Soco vityin, Nyoo cundahvi cuñí ra nyehé ra chi ndo cha cuenda vatyí ñu Israel nacahnú ñu nu cahán ra. ³¹ Nacahnú ñu nu cahán Nyoo vityin tari nacahnú maa ndo quiví cuan. Ta tari cundahví cuñí Nyoo nyehé ra chi ndo vityin, tyicuan caa tucu cucundahvi cuñi ra nyehe ra chi ñu Israel ñandihí. ³² Vatyí Nyoo chaha ra ityi chi tandihí ñáyiví cha nacahnú ñu nu cahán ra, tacuhva vatyí cundahvi cuñi ra nyehé ra inuu ri chi tandihí yo.

³³ ¡Ñana cha cahnu cuví cha tyayí Nyoo! ¡Ñana cha vaha cha chitó xaan ra, ta cha chiñi tuñi ra! Ma cuví nacatyí yo cuhva chicá iñi ra, ni ma chaa yo cutuñi iñi yo cuhva sacuví ra. ³⁴ Vatyí ¿yóó cha cutuñi iñi cuhva chicá xiñi Sutu Mañi yo? ¿O yóó cha sañahá chi ra? Yori. ³⁵ Vatyí yori cha cuví cuhva xihna ca noo cha vaha chi Nyoo ta cha cuenda cuan ta quihí iñi ñu vatyí na cuhva tucu Nyoo chi

ñu. ³⁶ Vatyí tandihí maa cha iyó, maa Nyoo savaha, ta chino chi ta iyó chi cha cuenda ra. ¡Cahnu xaan ca cuví Nyoo tyicuan ri maa! Ta na cuví chi tyicuan caa.

12

Na coo yo noo ñáyiví cha sacuvi yo cuhva cuñí Nyoo

¹ Yucuan chaha yañi, chacú ndahvi nuu ndo cha cuenda cha ndahvi cuñí Nyoo nyehé ra chi yo, na nacuhva cuenda yo coño ñuhu yo chi ra, tari noo ofrenda cha nyitó, ta cachi coo yo nuu ra, vatyí yucuan cuví cuhva tñn cuenda ra cha sacahnú yo chi ra.

² Ta ma coo ca yo cuhva iyó ñáyiví iyó siqui ñuhu ñáyiví ihya. Soco na nasama yo cuhva iyó yo chihin cha nduchaa cuhva chicá xiñi yo. Ta tyicuan caa ta coto yo yoso cuhva cuñí Nyoo chihin yo vatyí coto yo nya cha vaha, ta nya cha tahán iñi ra. Ta coto yo ñáá ndihí cha tahán chi sacuvi yo.

³ Nyoo, cha catyí cha vaha ñáyiví cuví ra, ta tyatyíño ra chii vatyí cuví apóstol chi ra, yucuan chaha catyí chi tandihí nyoho vatyí ni noo ndo ta ma caca xiñi ndo tyí vaha ca ndo. Soco caca vaha xiñi ndo yoso cuhva iyó ndo chihin yoso cuhva cha vaha chaha Nyoo chi ndo ñn ri chihin cha chinó iñi ndo chi ra. ⁴ Vatyí cha noo coño ñuhu, cuaha xaan cuhva iyó chi, ta ña ñn ri maa tyiño saha chi. Chiti nuu yo, noo tyiño sahá chi, ta soho yo inga tyiño sahá chi. ⁵ Ta tyicuan caa tucu yoó vasi cuaha yo, soco noo ri coño ñuhu ra Cristo cuví yo, cha cuenda cha ñn ri cuví yo chihin ra, ta ñn ri cuví yo chihin tahan yo. Tari cha noo ri coño ñuhu cuví tandihí ri yo.

⁶ Siñ siñ tyiño chaha Nyoo chi yo, yoso cuhva cha cuñí maa ra cuhva ra chi noo noo yo. Ta cuñí chi cotyiño vaha yo cha vaha cuan. Tatu chaha Nyoo cha vaha cha sahá yo profetizar, na chino iñi yo tyi ican cuan chaha ra chi yo, ta na naquehen yo tuhun sacoto ra chi yo ta nacatyí yo chi ñáyiví. ⁷ Tatu chaha ra cha vaha

cha sacuví yo tyiño nuu inga ñu, cuñí chi sacuví vaha yo. Tatu chaha ra cha cuví sañaha yo chi inga ñu, cuñí chi cunyaa yo tyiño cuan. ⁸ Tatu chaha ra cha cuví cuhva yo tuhun chi ñáyivi na ndu nñi ñu, cuñí chi cunyaa yo tyiño cuan. Ta ñu cha chaha Nyoo xuhun chi, cuñí chi cuhva ñu chihin cha nñi ñu. Tatu chaha Nyoo cha saquehen ityun chi ñu yihí cuenda ra, chihin cha nñi ñu sacuvun. Tatu chaha Nyoo cha tyinyeé yo chi ñu chiñuhú cha chiñuhú chii, cuñí chi sacuví yo chihin cha sñi cuñí yo.

Nu catyí ra Pablo yoso caa sacuvi yo cha yihí yo cuenda ra Cristo

⁹ Cuñi ndo chihin cha ndicha chi tahan ndo. Ta cutasi cuñi ndo chi cha ña vaha. Ta cunyicon ndo cha vaha.

¹⁰ Cuñí chi cha cuñí ndo chi tahan ndo cuenda Nyoo tari cha tahan ndo cha ñn ri sihi ñn ri sutu ndo. Ta quichaha ndo chi ñu ta saha ndo ñáyivi chi ñu.

¹¹ Sañihi ndo ñi ndo. Ma cusuchan ndo. Ta sacuvi ndo tyiño nuu Sutu Mañi yo chihin cha nñi ñi ndo.

¹² Sñi cuñi ndo coo ndo ñáyivi, vatyí chitó ndo vatyí cucoo ndo chihin Nyoo nu cuahan ca chi. Sanyee ndo ñi ndo tatu nyehé ndo tindoho. Ta ma sandihi maa ndo cha cacán tahvi ndo chi Nyoo nyita ri.

¹³ Tyinyee ndo chi ñu yihí cuenda Nyoo chihin ñaá cha chiñuhú chi ñu. Vaha tyiñuhu ndo chi ñu chaa vehe ndo.

¹⁴ Vaha cahan ndo siqui ñu cha cahan chi ndo. Ta ma soco ndo chi ñu. Cacán tahvi ndo cha cuenda ñu nuu Nyoo tacuhva na nasoco ra chi ñu.

¹⁵ Cusñi cuñi ndo chihin ñu sñi cuñí, ta cuacu ndo chihin ñu chacú chaa cha cuihya cuñí ñu.

¹⁶ ñn ri cuvi ndo chihin tahan ndo. Ta ma cahnú saha ndo chi ndo. Inuu ri saha ndo chi ndo chihin ñu ndahvi. Ma saha ndo cha chitó xaan ndo.

¹⁷ Ma sacuvi ndo cha ña vaha chihin ñu sacuví cha ña vaha chihin ndo. Soco sañiñi ndo sacuvi ndo cha vaha nuu tandihi ñáyivi. ¹⁸ Sañiñi ndo cha coo taxi ri ndo chihin tandihi ñáyivi.

¹⁹ Yañi luhli, tatu yóo cha sataxi ñi

chi ndo, ma tachi tuñi ri maa ndo chi ñu, soco saña ndo ta natyaa ndo ndaha Nyoo na tachi tuñi maa ra chi ñu. Vatyí nu tutu Nyoo catyí chi tyehe caa: “Yuhu tahán chi tachi tuñi, yuhu cutiyahvi chi ñu”, catyí Sutu Mañi yo. ²⁰ Ta suri catyí tucu ra: “Tatu ra xaan ñi chuun ta chisocó ra, cuhva cha cachi ra, ta tatu ityi ra ndutya, cuhva coho ra. Vatyí cha sacuvún tyehe caa, sacuvún cha nyacua nducua ha soho ra chihin ticañan nuu.” ²¹ Ma cuhvon cha cunyaca ñaha cha ña vaha chuun, soco sañiñun ta cuvi chasahun chi cha ña vaha chihin cha sacuvún cha vaha.

13

¹ Tandihí ñáyivi cuñí chi cha quichaha ñu chi ra cacuví tyiño cuenda gobiernu. Vatyí yori ra cuví tyiño cha ñima Nyoo tyaa tyiño chi ra. Ta ra cuví tyiño cha iyó, maa Nyoo tyiso chi ra. ² Yucuan chaha, ñu cha ña quichahá chi ra cacuví tyiño, cuñí chi catyí vatyí ña quichahá ñu cuhva catyí Nyoo. Ta ñu cha sacuví tyicuan caa, chicoo cuatyí ñu cha cuenda cuan, ta cucutuñi chi ñu. ³ Vatyí ra cacuví gobiernu, ña nyaá ra cha cuenda cha sayuhví ra chi ñu cha sacuví cha vaha, soco nyaá ra vatyí tachi tuñi ra chi ñu sacuví cha ña vaha. ¿Atu cuñún coun chihin cha ña yuhvun chi ra cacuví tyiño? Cachi coun, ta cunyehe ra tyi vaha ñáyivi cuvún. ⁴ Vatyí nyaá ra tyiño vatyí sacuví ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndicha cuñí chi cuyuhvun chi ra. Vatyí ña nyaá ri maa ra, soco nyaá ra vatyí tachi tuñi ra chi ñáyivi cha sacuví cha ña vaha, vatyí tyiño cuan tyaa Nyoo chi ra. ⁵ Yucuan chaha ñiñi cuñí chi cha quichaha ndo chi ra cacuví tyiño, ñima cha cuenda cha yuhvi ndo coto tachi tuñi ra chi ndo, soco cha cuenda vatyí chitó ndo tyi tyicuan caa tahán chi sacuvi ndo. ⁶ Ta sñn ri cha cuenda cuan tyiyahví ndo xuhun cha tava ra cuví tyiño cha cuenda cha sanduvahá ra ñuu ndo. Vatyí yucuan cuví tyiño

tahán chi cunyaa ra, ta cha tyicuan caa tyiño nuu Nyoo sacuví ra.

⁷ Cuhva ndo cha tahán chi chi minoo ñáyivi. Tyiyahvi ndo cha cuenda ñáá cha tahán chi tyiyahvi ndo cha cuenda cha vaha chi ñuu ndo. Ta quichaha ndo chi ñu cha tahán chi quichaha ndo. Ta saha ndo ñáyivi chi ñu cha tahán chi saha ndo ñáyivi. ⁸ Ma coso yica ndo chi ni noo ñáyivi. Soco cuñi ndo chi tahan ndo, vatyí tatu cuñi ndo chi tahan ndo sacuví ndo tandihi cha catyí ley Nyoo cha tyaa ra Moisés vatyí sacuví yo. ⁹ Catyí ley Nyoo tyehe caa: “Ma coo inga ñusihi o rayi chuun tatu ñima ñasihun o yun cuví. Ma cahñun chi ñáyivi. Ma suhun. Ma cahun cuendu siqui ni noo ñáyivi. Ma quichi cuví iñun cha chii ñáyivi.” Tatu ndicha cha cuñun chi tahun, tari cha cuñun chi maun, sacuví tucun tandihi ihya ta tandihi ca inga ca ley. ¹⁰ Tatu cuñun chi tahun, ñahri cha ña vaha cua sacuvun chi ñu. Chihin cha cuñi yo chi tahan yo, sacuví yo tandihi cha catyí ley Nyoo cha tyaa ra Moisés.

¹¹ Chihin tahun ihya saha yo cuenda quivi iyó yo. Vatyí cha chaá chi kuhva cha ndoyo yo ta ma cundihñi yo. Vatyí quivi nachino iñi yo chi ra Cristo, naha xaan ca nyaá quichi quivi cucacu ndihi ñima yo, soco vityin cha cuyatyin. ¹² Cha cua yaha cha cha cua. Ta cha cua cundichin. Yucuan chaha cuñi chi sandihi yo cha sacuví yo cha sacuví ñu iyó nu ñaa iñi. Ta tahán chi sacuví yo kuhva sacuví ñáyivi iyó nu ndichin. ¹³ Cachi cuñi chi coo yo. Vatyí nu ndichin Nyoo iyó yo. Ta ma coho yo ndixi, ta ma coo yo vico nu chihí xaan ñu ndixi. Ta ni ma coo yo chihin savaha ri ñusihi o rayi. Ni ma coo viciu chi yo. Ta ma cutasi cuñi yo nyehe yo chi tahan yo. Ta ma nyiyo iñi yo nyehe yo chi ñu. ¹⁴ Soco coo yo chihin tunyee iñi Sutú Mañi yo Jesucristo, tari noo sahma cuví tunyee iñi ra tyi ndihvi noo yo. Ta ma quihí iñi ndo cha sacuví ndo kuhva cuñi coño ñuhu ndo.

14

Ma cahan nyaun chi tahun

¹ Tatu noo ñáyivi yihí cuenda Nyoo ta chiin ri chinó iñi ñu chi ra, ña vaha cha ma tñin cuenda ndo chi ñu. Vaha ñatñin cuenda ndo chi ñu soco ma cuví yuhu ndo chihin ñu siqui tahun cha chicá uvi iñi ñu. ² Vatyí yihí ñáyivi cuñi maa ñu vatyí cuví cachi ñu tandihi. Ta yihí tucu ñu cha ña chinó vaha iñi ñu, ta maa maa ri yucu chachí ñu. ³ Soco ñu chachí tandihi cuan, tahán chi cha tñin cuenda ñu chi ñu cha chachí yucu ri. Ta ñu chachí yucu ri, ma cahan nyaun ñu chi inga ñu cuan. Vatyí Nyoo tñin cuenda ra chi ñu cuan. ⁴ Vatyí ¿yóó ñu cuví yoho vatyí cahan nyaun chi ñu cha sacuví tyiño nuu inga ra? Vatyí tatu vaha o ña vaha sacuví ñu soco nyehe maa ra cuví nuu chi ñu chihin ñu. Ta vaha cuquita ñu vatyí Sutú Mañi yo iyó tunyee iñi chi ra ta cutyinyee ra chi ñu tacuhva quita vaha ñu.

⁵ Inga tucu kuhva: Yihí ñu cha sacahnú ca ñu chi noo quivi ta ñima ca inga quivi. Ta yihí tucu ñu cha cuñi maa ñu vatyí inuu ri tandihi quivi. Tahan tahan yo cuñi chi coto vaha yo yoso kuhva chicá xiñi yo. ⁶ Ñu cha naquehén vaha noo quivi, naquehén vaha ñu cha cuenda cha sacahnú ñu chi Sutú Mañi yo. Ta ñu cha ña naquehén vaha cuan, suri cha cuenda cha sacahnú ñu chi Nyoo cuví. Ta ñu cha chachí tandihi cuan, suri chachí tucu ñu cha cuenda cha sacahnú ñu chi Sutú Mañi yo, ta nacuhva ñu tyahvi nyoo chi Nyoo tyi chaha ra cha cachi ñu. Ta ñu cha ña chachí tandihi, ña chachí ñu cha cuenda cha sacahnú ñu chi Sutú Mañi yo ta suri nacuhva tucu ñu cuan tyahvi nyoo chi ra.

⁷ Vatyí ni noo yo ña iyó yo chihin fuerza maa yo. Ni ñima maa yo catyí ama cúvi yo. ⁸ Vatyí tatu iyó yo, iyó yo tacuhva sacuví yo tyiño nuu Nyoo, ta tatu chihí yo, chihí yo tyi Sutú Mañi yo naquehen cuenda ra ñima yo. Yucuan chaha tatu iyó yo, o chihí

yo soco chi Sutu Mañi yo cuví chi yo.
⁹ Vatyí ra Cristo chihí ra ta nandoto tucu ra vatyí tacuhva cunyaca ñaha ra chi ñu nyitó ta chi ñu chihí.

¹⁰ Soco yoho, ¿ñáá tuhun cha nyehé nyaun chi yañun? ¿O ñáá tuhun cha ña natín cuendon chi ra? Vatyí tandihí yo cutahan chi cucuhva cuenda yo chi yo nuu Nyoo vatyí cutuñi chi yo nuu ra. ¹¹ Vatyí nu tutu Nyoo catyí chi tyehe caa:

Cha ndicha ndicha cuii vatyí yuhu nyité, catyí Sutu Mañi yo.

Ta tandihí cuii ñáyivi cunacuiñi chiti ñu nui.

Ta tandihí ñu cunacoto nuu ñu chii cha cuví Nyoo.

Ta cusacahnu ñu chii chihin nuu tandihí ñáyivi, catyí Nyoo.

¹² Yucuan chaha noo noo maa yo ta cunacuhva yo cuenda cha sacuvi yo chi Nyoo.

Ma sanacavon nu cuatyí chi yañun

¹³ Yucuan chaha, ña tahán ca chi cahan nyaa yo chi tahan yo. Soco nducu yo cuhva cha ma sanacava yo chi ñu nu cuatyí coto sandihí ñu tuhun cha chino iñi ñu. ¹⁴ Yuhu chité vatyí ñahri cha ma cuvi cachi, vatyí chinó vaha iñi chi Sutu Mañi yo Jesucristo, ta maa ra sañahá chii. Soco tatu yihí ñu chicá xiñi ñu tyi yihí cha ña vaha cachi ñu, cha cuenda maa ñu, ña vaha.

¹⁵ Soco tatu cha cuenda cha chachún ta quiñi cuñi yañun, ña ndicha cha cuñún chi ra, ñima ca cuhva cuñi Nyoo sacuvún. Ma cuhvon cha tiví noo ñu chihin cha chachún vatyí ra Cristo chihí ra cha cuenda ñu. ¹⁶ Ma cuhva ndo cha cahan ña vaha ñu siqui noo cha chaha Nyoo ityi chuun tyi cachun. ¹⁷ Vatyí cha nyacá ñaha Nyoo chi yo cuví chi noo cha cachi coo yo nuu ra. Cusí cuñi yo ta taxi ri cuñi añima yo cha cuenda Tatyí li Nyoo cha nyaá añima yo. Ta ña niñi tuhun cha chachi yo o cha chihi yo. ¹⁸ Ñu sacuví tyiño nuu ra Cristo tyehe caa, si cuñi Nyoo nyehé ra chi ñu, ta catyí tucu ñáyivi tyi vaha ñáyivi cuví ñu.

¹⁹ Yucuan chaha cuñi chi cha sañihi ca yo cha coo taxi ri yo chihin ñáyivi. Ta tyicuan caa ta cuví tyinyee yo chi noo noo tahan yo na cuahnu yo chihin tuhun Nyoo. ²⁰ Ma sativun tyiño sahá Nyoo añima inga ñáyivi cha cuenda noo cha chachí run. Ndicha vatyí tandihí cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chi inga ñu. ²¹ Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chi ñu nu cuatyí. Ma casi yo chihin noo cha sacuvi yo nu chinó iñi ñu chi Nyoo. ²² Tatu chinó iñun vatyí cuví cachun tandihí, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Si xaan cuñi yo tatu ña chicá uvi iñi yo noo cha chaha Nyoo ityi chi yo cha sacuví yo. ²³ Soco ñu cha chachí ñáá cha chachí ñu, ta chicá uvi iñi ñu, chicoo cuatyí ñu, vatyí ña chinó vaha iñi ñu tyi cuví cachi ñu. Ta tandihí cha sacuví yo chihin cha ña chiño iñi yo tyi chaha Nyoo ityi chi yo tyi sacuvi yo, cuatyí cuví.

15

Na sacuvi yo cha tahán iñi tahan yo, ta ñima cha tahán iñi ri maa yo

¹ Yoó cha ñihi nyaá yo chihin Nyoo, cuñi chi cha tyinyee yo chi ñu cha ña ñihi nyaá chihin Nyoo. Ta ma nducu yo cha tahán iñi ri maa yo. ² Tahan tahan yo cuñi chi cha sacuvi yo cuhva tahán iñi inga ñu cha cuenda cha vaha chi ñu, tacuhva cuví cuahnu ca ñu chihin tuhun Nyoo. ³ Vatyí ni ri ra Cristo ña sacuvi ra cuhva tahán iñi maa ra, soco cuví chi ra tari catyí nu tutu Nyoo tyehe caa: “Tandihí cha cahán ñáyivi chi Nyoo, chi ra Cristo cahán ñu”, catyí chi. ⁴ Vatyí tandihí cha chicunyaá nu tutu Nyoo ta ityi chata ca, chicunyaá chi cha cuenda cha cutuhva yo, tacuhva cuví cuatu yo cha cuñihi yo chihin cha cama iñi yo. Ta vaha cuñi añima yo cha cuenda cha sacuahá yo nu tutu Nyoo. ⁵ Ta

Nyoo ican ra chahá cha cama iñi yo, ta chahá ra cha vaha cuñi ñima yo. Na tyinyee ca ra chi yo cha coo yo chihin cha ñin ri cuví yo chihin tahan yo tari cuhva iyó ra Cristo Jesús. ⁶ Vatyí tacuhva tandihí yo ñin ri noo cuhva sacahnu yo chi Nyoo Sutu ra Jesucristo ra nyacá ñaha chi yo.

Ñáyivi ñima ñu Israel cuví, cucuiñi ñu tuhun Nyoo

⁷ Yucuan chaha tñin cuenda vaha yo chi tahan yo tacuhva vatyí sacahnu yo chi Nyoo tari tñin cuenda vaha ra Cristo chi maa yo cha cuenda vatyí sacahnú ra chi Nyoo. ⁸ Vatyí catyí yuhu chi ndo vatyí ra Cristo quichi tyinyee ra chi yo cha cuví yo ñu Israel, tacuhva sacuvi ra cha catyí Nyoo chi sutu chahnu yo tyi cusacuvi ra. Ta tyicuan caa ta sañaha ra Cristo vatyí Nyoo sacuví ra cha catyí ra tyi sacuvi ra. ⁹ Ta quichi tucu ra Cristo tacuhva vatyí ñu cha ñima ñu Israel cuví sacahnu tucu ñu cuan chi Nyoo, vatyí Nyoo ndahvi cuñi ra nyehe ra chi ñu, tari catyí nu tutu Nyoo tyehe caa:

Yucuan chaha cusacahni chuun chihin nuu ñu cha ñima ñu Israel cuví, tandihí ityi ñu iyó siqui ñuhu ñáyivi.

Ta cucate yaa cha cuenda cha sacahni chuun nuu ñu, catyí chi.

¹⁰ Ta inga tucu nu catyí chi nu tutu Nyoo tyehe caa:

Cusi cuñi nyoho ñu cha ñima ñu Israel cuví.

Cusi cuñi ndo chihin ñu Israel cha cuví ñu ñáyivi cuenda Nyoo.

¹¹ Ta inga tucu nu catyí chi nu tutu Nyoo tyehe caa:

Sacahnu ndo chi Sutu Mañi yo, nyoho ñu cha ñima ñu Israel cuví.

Tandihí ñáyivi sacahnú ñu chi ra cha cuenda cha cahnu xaan cuví maa ra.

¹² Tyaa tucu ra Isaías nu tutu Nyoo tyehe caa:

Cucacu minoo ra vachi tata ra Isái. Cuquichi ra vatyí cunyaca ñaha ra chi ñu cha ñima ñu Israel cuví.

Ta maa ñu cuquihí iñi ñu chi ra vatyí cusacacu ra chi ñu.

¹³ Nyoo ican ra chahá tunyee iñi chi yo ta chitó yo tyi cuhva ra cha cuhva ra chi yo. ¡Na sacutu ra chi ndo chihin tusi iñi! Ta coo cha taxi ri cuñi ñima ndo cha cuenda cha chinó iñi ndo chi ra, tacuhva vatyí chihin tunyee iñi Tatyí Ii ra ta quihí vaha iñi ndo cha cucuhva ra chi ndo.

¹⁴ Yañi luhli, chitó vahi vatyí nyoho vaha xaan ñáyivi cuví ndo ta chitó ndo tandihí, ta chitó vaha ndo cuhva ndo tuhun chi tahan ndo. ¹⁵ Soco nu carta ihya ñihi xaan cahín siqui tandihí tuhun cha tyaj, tacuhva cha ma naa iñi ndo. Tyehe caa sacuvi cha cuenda tyi Nyoo chaha ra tumañi iñi chii ¹⁶ cha sacuvi tyiño nuu ra Jesucristo nu nyicu ñu cha ñima ñu Israel cuví. Ta tyiño cha sacuví, ican cuví cha cahín tuhun Nyoo yoso caa sacacu ra ñima ñáyivi. Tyehe caa sacuví tacuhva vatyí ñu cha ñima ñu Israel cuví, cuví nacuhva cuende chi ñu chi Nyoo tari noo ofrenda cha tahan iñi ra, vatyí cha ndundí ñu nuu ra cha cuenda Tatyí Ii ra.

¹⁷ Cha cuenda cha nacuhva cuende chii chi ra Cristo Jesús, yucuan cuenda cuví cusi cuñi ta chité tyi vaha quitá tyiño sacuví nuu Nyoo.

¹⁸ Vatyí ña cañá iñi cahin cha ña nyehí. Soco nacatyí cha sacuvi ra Cristo nu chicá noi cahín tuhun Nyoo tacuhva vatyí ñu cha ñima ñu Israel cuví quichaha ñu chi Nyoo. Ta ihya ndicha cha cahín. ¹⁹ Vatyí chihin seña ta milagru ta chihin tunyee iñi Tatyí Ii ra sacuvi ra. Ta tyicuan caa cahín tuhun cha cacu ñima ñu sahá ra. Quichahí nya Jerusalén ta tandihí ityi ta nyacua nya Ilírico. ²⁰ Ta tyicuan caa saniñi cahín tuhun cha cacu ñima yo maa maa ri nu ta cuiñi ca maa ñáyivi tuhun ra Cristo, tacuhva vatyí ma saha tyiñe nu quichaha saha tyiño inga ra. ²¹ Tari catyí nu tutu Nyoo tyehe caa:

Cucoto ñáyivi cha ta coto ca maa tuhun ra.

Ta cucutuñi iñi ñu cha ta ñaha ca maa cuiñi tuhun ra, catyí chi.

Nu tyaá ra Pablo cuhva cha cuhun ra ñuu Roma

²² Yucuan chaha ña cuví maa tuhun cha cuhin cunyehe nu nyicú ndo, vasi cuaha xaan chaha cuñí cuhin. ²³ Soco vityin cha ndihi tyiño sahi ityi ñuu ihya. Ta cha cuaha xaan cuiya cuñí cuhin cunyehe nu nyicú ndo ta cunyai suhva quívi chihin ndo. ²⁴ Nyehí tatu cuhin cunyehe nu nyicú ndo quívi cuhin España. Ta cha yaha cha cunyehe chi ndo, nyehi tatu cuvi tyinyee ndo chii ta cuchaa ndihi nu cuahin. ²⁵ Soco vityin cuahin ñuu Jerusalén ta nyisé suhva cha cutyinyee chi ñu cuenda Nyoo yucuan. ²⁶ Vatyí ñu vehe ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyí sacuhun ñu chi ñu ndahvi ñu cuenda Nyoo cha iyó Jerusalén. ²⁷ Tyehe caa quichi cuvi iñi ñu sacuví ñu. Ta ndicha vatyí tahán chi sacuví ñu. Vatyí tari maa ñu Israel, ñu chinó iñi chi ra Cristo, chaha ñu tuhun Nyoo chi ñu cha ñima ñu Israel cuví, tyicuan caa tahán chi chi ñu cuan tyinyee tucu ñu chi ñu Israel chihin cha iyó chi ñu. ²⁸ Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chi ñu Jerusalén, tyicuan ta cuhin nya España ta yahi nu nyicú ndo. ²⁹ Chitó vahi vatyí na cuhin nu nyicú ndo, cuchai chihin cha tyitu añime chihin cha vaha Nyoo cha chahá ra Cristo chii.

³⁰ Yañi, chacú ndahvi nuu ndo na cu ñn ri ndo chihin, chihin tindocho cha nyehí, ta çacan tahvi ndo chi Nyoo cha cuende vatyí cuñí ndo chi Sutu Mañi yo Jesucristo, ta vatyí chahá Tatyí Íi Nyoo cha cuñí ndo chii. ³¹ Çacan ndo cha cuende, na sacacu Nyoo chii ndaha ñu ña chinó iñi chi ra Cristo ityi Judea cuan. Ta çacan ndo cha cuenda cha nyisé ihya cha cuenda ñu cuenda Nyoo ñu Jerusalén cuan, na natin cuenda vaha ñu. ³² Vatyí tatu Nyoo ta cuñí ra, chihin cha sñi cuñi quichi nyehi chi ndo ta cuví nyitati ñn ri chihin ndo. ³³ Ta Nyoo ra chahá cha taxi ri coo añima

yo, na cunyaa ra chihin tandihi ndo. Ta nacuvi tyicuan caa.

16

Nu sacuhún ra Pablo nocumi chi ñu amigo ra

¹ Sacoté chi ndo cha cuenda hermana Febe vatyí tyinyée xaan ña chi ñu yihí cuenda Nyoo ñuu Cencrea. ² Tin cuenda vaha ndo chi ña tari tin cuenda Sutu Mañi yo, tari tahán chi sacuvi ñu yihí cuenda Nyoo. Ta tyinyee ndo chi ña chihin tandihi cha chihuhu chi ña, vatyí cuaha xaan ñu tyinyee ña chi, ta chi yuhu ñandihí.

³ Cuhva ndo nocumi chi cu Priscila ta chi ra Aquila ñu cha cutahan chihin ndi nu tyiño cha sacuví ndi cuenda ra Cristo Jesús. ⁴ Chahnya iñi ñu ñayívi ñu quívi cuan cha cuenda cha sacacu ñu chii, yucuan chaha vatyí nacuhvé tyahvi nyoo chi ñu. Ta ñima yuhu ri, soco tandihi tucu ñu cha ñima ñu Israel cuvi, ta yihí tucu ñu cuenda Nyoo. ⁵ Cuhva tucu ndo nocumi chi ñu yihí cuenda Nyoo cha candú ñn ri vehe cu Priscila ta ra Aquila. Vachi tucu nocumi chi ra tahin, ra Epeneto. Ican ra cuví ra cha xihna ca chino iñi chi ra Cristo ityi Acaya. ⁶ Cuhva ndo nocumi chi cu María. Sahá tyiño xaan ña nu nyicú ndo. ⁷ Cuhva ndo nocumi chi ñu ñui, ra Andrónico ta ra Junias, ra tahin cha ñoho chihin vehe caa. Cahnu tyiño casahá ra cuenda Sutu Mañi yo chihin tandihi ca ra sahá tyiño cuenda Nyoo. Ta xihna ca ra cachino iñi chi ra Cristo ican saha yuhu.

⁸ Cuhva ndo nocumi chi ra Amplias ra tahin cuenda Sutu Mañi yo. ⁹ Cuhva ndo nocumi chi ra Urbano, ra tahan yo cuenda tyiño ra Cristo Jesús, ta chi ra Estaquis ra tahin ñandihí. ¹⁰ Cuhva ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñáyívi chi ra Aristóbulo ñandihí. ¹¹ Cuhva ndo nocumi chi ra ñui, ra Herodión, ta chi ñáyívi chi ra Narciso ñu cha chinó iñi chi Sutu Mañi yo. ¹² Vachi nocumi chi cu Trifena ta chi cu Trifosa, ñu

casahá tyiño chihin Sutu Mañi yo. Ta chi hermana yo cu Pérsida, ñaha cha sahá tyiño xaan nu tyiño Sutu Mañi yo. ¹³ Cuhva ndo nocumi chi ra Rufo, noo ra cahnu cuví ra nuu Nyoo vatyí chinó vaha iñi ra chi Sutu Mañi yo. Ta vachi tucu noo cumi chi sihi ra Rufo. Cuví ña tari sihi. ¹⁴ Cuhva ndo nocumi chi ra Asíncrito, chi ra Flegonte ta chi ra Hermas, ta chi ra Patrobas, chi ra Hermes ta chi ra hermano cha canyicú chihin ra. ¹⁵ Cuhva tucu ndo nocumi chi ra Filólogo ta chi cu Julia ta chi ra Nereo chihin cuhva ra, ta chi ra Olimpás ta chi tandihí ñu cuenda Nyoo cha nyicú chihin ñu.

¹⁶ Naçuhva ndo noo cumi chi noo noo tañan ndo cuenda Nyoo. Tandihí ñu yihí cuenda ra Cristo saquichí ñu nocumi chi ndo.

¹⁷ Yañi, chacú ndahvi nuu ndo, na saha ndo cuenda chi ñu cuñi sasiñ chi ndo, ta nducú ñu cuhva cha nduva ndo chihin tuhun Nyoo, vatyí ñima tyicuan caa cutuhva ndo tuhun ra Cristo. Ma cutahan ndo chihin ñu cuan. ¹⁸ Vatyí ñu cuan ñima tyiño nuu Sutu Mañi yo Jesucristo sacuví ñu, soco cuhva cuñi maa ñu sacuví ñu. Ta sandahví ñaha ñu añima ñáyivi ndahvi chihin tuhun vita cahán ñu. ¹⁹ Tandihí ñáyivi chitó yoso caa quichahá vaha ndo chi Nyoo. Yucuan chaha cusí xaan cuñi chihin ndo, ta cuñi vatyí natyihí tuñi vaha iñi ndo sacuvi ndo cha vaha. Ta ñaha cutuhva ndo sacuvi ndo cha ña vaha. ²⁰ Nyoo ra iyó tandihí cha taxi ri añima, numi ri cuhva ra cha saha ganaa ndo chi ra ña vaha, ta cuhva ra cha cuañi ndo siqui ra. Na nasoco Sutu Mañi yo Jesucristo chi ndo.

²¹ Ra Timoteo ra cuví ra tahin nuu tyiño sacuví ndi nuu Nyoo, saquichí ra nocumi chi ndo. Ta tyicuan caa tucu ra Lucio, ta ra Jasón, ta ra Sosípater, tandihí ra ñui cuan casaquichí ra nocumi chi ndo.

²² Yuhu ra Tercio savahi tutu ihya cha cuenda ra Pablo, suri saquichí tiqui nocumi chi ndo tyi ñn ri yihí yo cuenda Sutu Mañi yo.

²³ Saquichí ra Gayo nocumi chi ndo ñandihí. Vehe ra nyaí suri ihya ndú ñn ri ndi tandihí ñu yihí cuenda Nyoo. Ra Erasto ra cuví tesorero ñuu ihya, saquichí ra nocumi chi ndo, ta yañi yo ra Cuarto ñandihí.

²⁴ Na cocumi Sutu Mañi yo Jesucristo chi tandihí ndo. Ta na cuví chi tyicuan caa.

Nu ndihí cahán ra Pablo ta sacahnú ra chi Nyoo

²⁵ Ta vityin na sacahnu yo chi Nyoo, vatyí maa ra cuví ra cucuhva cha cuní iñi ndo, ta ma sandihí ndo cha chinó iñi ndo tuhun ra cha sacacú ra añima yo. Ican cuví tuhun cahán ta tuhun cha sañahí cha cuenda ra Jesucristo. ñn ri cuví chi chihin tuhun cha ñoho xehe ta cha naha nyata ni cumañi chino ñuhu ñáyivi. ²⁶ Soco vityin sañahá Nyoo chi yo cha cuenda tutu cha casandoo ra profeta, ra cachaha cuenda tuhun ra ta cha naha. Catyí Nyoo, ra iyó tyicuan ri maa, tyi vityin tahán chi coto tandihí ñáyivi tacuhva chino iñi ñu chi ra ta quichaha ñu tuhun cahán ra. ²⁷ Nyoo noo tuhun maa ra, ta chiñi tuñi xaan ra. Na sacahnu yo chi ra cha cuenda ra Jesucristo tyicuan ri maa. Ta na cuví chi tyicuan caa.

Carta Cha Xihna Ri Sacuhun Ra Apóstol Pablo Chi Ñáyiví Ñuu Corinto Cha Yihí Cuenda Nyoo

Nu tyaá ra Pablo noo tutu chi ñáyiví ñuu Corinto cha yihí cuenda Nyoo

¹ Yuhu ra Pablo, nacana Nyoo chii vatyí cuñí ra cha cuví noo apóstol ra Jesucristo, o cuñí chi catyí vatyí tachi ra chii nacaque tyiño ra. Yuhu chihin ra Sóstenes yañi yo ² saquichí ndi noo carta ihya chi ndo cha nyicú ndo vehe ñuhu cuenda Nyoo cha nyaá ñuu Corinto. Ñáyiví chi Nyoo cuví ndo vityin, cha cuenda cha ndu ñin ri ndo chihin ra Cristo Jesús. Nyoo nacana ra chi ndo vatyí nanduvi ndo noo ñáyiví vaha cuenda ra, chihin tandihí ñáyiví cha sacahnú chi Sutu Mañi yo Jesucristo tandihí ri ityi. Vatyí cuví ra Nyoo cuenda ñu ta cuenda maa yo ñandihí. ³ Nyoo Sutu yo ta Sutu Mañi yo Jesucristo na nasoco ra chi ndo, ta nacuhva ra cha taxi ri coo añima ndo.

Yoso caa nasocó Nyoo chi ñu yihí cuenda ra

⁴ Tyicuan ri nacuhvé tyahvi nyoo chi Nyoo cha catyí maa ndo, vatyí chahá ra cha vaha chi ndo cuenda ra Cristo Jesús. ⁵ Ta cha ñin ri cuví ndo chihin ra Cristo, Nyoo chahá ra tunyee iñi ra chi ndo tacuhva cuví cahán ndo tuhun ra. Ta chahá ra cha chiñi tuñi vaha chi ndo. ⁶ Ta tandihí cha catyí chi ndo, tuhun ra Cristo, cuahán chino cava ñáyiví ndo vityin. ⁷ Yucuan chaha ñahri cha cumañí chi ndo. Chahá Nyoo tandihí cha vaha chi ndo cha ni ri ca cha nyatú ndo quiví quichi Sutu Mañi yo Jesucristo. ⁸ Nyoo cusaha cuenda ra chi ndo nyacua nya naa ñáyiví tacuhva yori cuví catyí ñáá cha catyí chi ndo quiví quichi Sutu Mañi yo Jesucristo. ⁹ Nyoo tyicuan ri sacuví ra tari cuhva

catyí ra. Ta maa ra cuví ra nacana chi ndo tyi cu ñin ri ndo chihin Sehe ra, ra Jesucristo, Sutu Mañi yo.

Tatu yihí yo cuenda Sutu Mañi yo, ña vaha cha cusin yo

¹⁰ Yañi, chiquén chi ndo chihin sivi Sutu Mañi yo Jesucristo, na ñin ri cuví ndo ta ma cusin ndo. Ta ñin ri cuhva caca xiñi ndo. Ta ñin ri tuhun quihí iñi ndo. ¹¹ Catyí chi ndo tyehe caa, yañi, tyi catyí ñáyiví chi ra Cloé chii, vatyí iyó tisihi nu nyicú ndo. ¹² Vatyí nyoho sin sin cuhva cahán ndo. Noo ndo catyí ndo: “Yuhu, cuenda ra Pablo yihí.” Inga ndo catyí ndo: “Yuhu, cuenda ra Apolos yihí.” Inga ndo catyí ndo: “Yuhu, cuenda ra Pedro yihí.” Inga ndo catyí ndo: “Yuhu, cuenda ra Cristo yihí.” ¹³ ¿Atu tahvi sava ra Cristo? ¿Atu chihí yuhu ra Pablo nu cruzi cha catyí ndo? ¿Atu condutyá ndo chihin sivi yuhu? Ñima. ¹⁴ Tyahvi nyoo chi Nyoo vatyí yuhu ña sacondutyé chi ni noo nyoho. Soco noo ri sacondutyé chi ra Crispo ri chihin ra Gayo ri. ¹⁵ Tyicuan caa ta ni noo ndo ta ma cuví catyí ndo vatyí condutyá ndo chihin sivi. ¹⁶ Aan, ta suri sacondutyá tiqui chi ñáyiví chi ra Estéfanos. Soco ña nichón iñi cha sacondutyé chi inga ndo. ¹⁷ Vatyí ra Cristo ña tachi ra chii tyi sacondutyé. Soco tachi ra tyiño chii vatyí cahin tuhun ra yoso caa sacacú ra chi yo. Soco ña cahín chihin cha chiñi tuñi ñáyiví ihya, coto catyí ñáyiví chii tyi ñahri yahvi nyaá cha chihí ra Cristo cuenda cuatyí yo.

Vaha ca cha chiñi tuñi Nyoo ta ñima ca cha chiñi tuñi ñáyiví ihya

¹⁸ Tuhun cha chihí ra Cristo nu cruzi cha catyí cuatyí yo, ñima ri tuhun cuví cuan cha cuenda chi ñáyiví cha cunaa nu cuví anyaya. Soco cha cuenda chi maa yo cha cuví yo ñáyiví cacú añima, tunyee iñi cha chahá Nyoo chi yo cuví cuan. ¹⁹ Vatyí tyicuan caa tucu catyí maa tuhun Nyoo: Cusanai cha chiñi tuñi ra cuñí maa tyi chitó xaan.

Ta cha chitó xaan ra chiñi tuñi cutave ñin chiyo xiin, catyí Nyoo.

²⁰ Ñahri tuhun cha chitó xaan ra chiñi tuñi, ta ra sacuaħa, ta ra chitó xaan nacahan ñáá ndihí tuhun iyó siqui ñuhu ñayiví ihya. Vatyí cha chiñi tuñi cha iyó siqui ñuhu ñayiví ihya, cha ñima ri tuhun nasaha Nyoo chi cuan. ²¹ Nyoo chihin cha chiñi tuñi ra tyaá ra cuħva vatyí ma cuví cohon nuu ñayiví chi ra chihin cha chiñi tuñi cha iyó siqui ñuhu ñayiví ihya, soco tyaá ra cuħva vatyí sacacú ra chi ñu chinó ñni tuhun cha cahan noo ñayiví nuu ñu. Vasi ñima ri tuhun cuví tuhun cuan cha cuenda ñu cha ña ñohó nuu chi Nyoo.

²² Vatyí ñayiví Israel cuñí ñu nyehe ñu milagru. Ta ñu Grecia maa maa ri maa cha chiñi tuñi ñayiví ihya nanducú ñu. ²³ Soco yoó sacotó yo tuhun ra Cristo, ra chihí nu cruzi. Ta ñayiví Israel cahán nuu ñu chiñí ñu tuhun ihya. Ta ñu cha ñima ñu Israel cuví, cuñí maa ñu tyi tuhun cha ñima ri tuhun cuví ihya. ²⁴ Soco cha cuenda chi ñu nacana Nyoo, an cuví ri ñu ñu Israel, o ñu Grecia, ra Cristo cuví tunyee ñni ta cha chiñi tuñi Nyoo. ²⁵ Vatyí cuñí maa ñayiví vatyí noo cha ñima ri tuhun cuví cha sacuví Nyoo. Soco chiñi tuñi xaan ca Nyoo ta ñima ca ñayiví iyó siqui ñuhu ñayiví ihya. Ta cuñí maa ñayiví tyi ña ñihí fuerza Nyoo. Soco ican cuan cuví fuerza cha ñihí ca cha nuu fuerza tandihí ñayiví. ²⁶ Yañi, cuñí chi coto ndo vatyí Nyoo nacana ra chi ndo vasi maa ri ñayiví soho cuví ndo, ta mañi ndo cuví ndo ñayiví tyayí o ñayiví chitó xaan cha chiñi tuñi ñayiví ihya. ²⁷ Soco Nyoo nacachí vaha ra chi ñayiví soho. Vatyí cuħvá ñu ticahan nuu chi ñu cuñí maa tyi chiñi tuñi xaan. Ta nacachí vaha ra chi ñayiví ñahri fuerza vatyí cuħva ñu ticahan nuu chi ñu cuñí maa tyi iyó xaan fuerza. ²⁸ Nyoo nacachí vaha ra chi ñayiví ndahvi cha cuñí maa ñayiví tyi ña chiñuhú ñu. Nacachí ra chi ñayiví cha ña cuñí nyehe ñayiví chii, vatyí sanocuee ra chi ra cuví

tyiño nahnu. ²⁹ Tyicuan caa sacuví Nyoo tacuhva tyi yori sacahnú chíi nuu ra. ³⁰ Soco maa maa Nyoo sacu ñin ri ra chi yo chihin ra Cristo Jesús. Ta sacuví ra tyi ra Cristo cuħva ra cha chiñi tuñi chi yo, ta sacuvaha ra chi yo ta sandundi ra chi yo nuu Nyoo vatyí tyiyahví ra chihin ñni ra cha catyí cuatyí yo, tacuhva cuví cacu yo. ³¹ Yucuan chaha sacuví yo tari cuħva catyí nu tutu Nyoo tyehe caa: “Tatu yóo cha cuñí cuyaa, vaha na cuyaa maa soco chihin Nyoo.”

2

Tuhun ra Cristo, ra chihí nu cruzi

¹ Soco yañi, quiví chahin chicahin tuhun Nyoo chihin ndo, ña cahin tuhun cha chiñi tuñi ñuhu ñayiví ihya. ² Soco maa ri maa tuhun ra Jesucristo, yoso caa chihí ra nu cruzi cha catyí cuatyí yo tyai xiñi ta nacatyí chi ndo. ³ Ta chaj nu nyicu ndo tari cha ñahri fuerze. Ta nihí chihin cha yuhvi. ⁴ Ta cuħva cha cahin nuu ndo, ña cahin chihin tuhun tyaqui tuhun cha chiñi tuñi tari cahán noo ra chitó xaan. Ñima. Soco chihin fuerza maa Tatyí li Nyoo cahin chihin ndo. ⁵ Tacuhva vatyí nachino ñni ndo chi Nyoo soco cha cuenda fuerza maa Nyoo. Ta ñima cha cuenda cha chiñi tuñi ñayiví ihya.

Nyoo chahá ra cha cohon nuu yo chi ra chihin Tatyí li ra

⁶ Soco suvita ri tyi cahán ndi tuhun cha chiñi tuñi chihin ñu cha ñihí ca nyaá chihin tuhun Nyoo. Soco cha chiñi tuñi Nyoo, ta ñima cha chiñi tuñi ñuhu ñayiví ihya, ni ri cha chiñi tuñi ra nyacá ñaha siqui ñuhu ñayiví. Vatyí maa ra cucunaa ra. ⁷ Soco tuhun xehe cha chiñi tuñi maa Nyoo cahán ndi. Vatyí Nyoo chicumí xehe ra minoo tuhun vaha nya ta ni cumañi chino ñuhu ñayiví ihya. Vatyí tyaa ra cuħva tyi cucacu añima yo ta cunyaa yo noo nu vaha chihin ra tyicuan ri maa. ⁸ Ta tuhun ihya ta cutuñi ca ñni ni noo ra nyacá ñaha ñuhu ñayiví ihya. Vatyí tyehe ta cutuñi ñni ra, ma catyaa ra chi Sutu Mañi yo, ra nyacá ñaha gloria,

nu cruzi. ⁹ Soco tari cuhva catyí maa tuhun Nyoo:

Nyoo sanduvaha ra noo cha vaha xaan tyi cuhva ra chi ñáyiví cha cuñí chi ra.

Ta ni noo ñáyiví ta nyehe ca ñu, ta ta cuiñí ca ñu, ta ta ndichi ca xiñi ñu yoso cuhva cha vaha cha chahá Nyoo chi yo, catyí tuhun Nyoo.

¹⁰ Soco Nyoo chahá ra Tatyí Ii ra vatyí cutuñi iñi yo tuhun ihya. Vatyí Tatyí Ii ra sañahá chi tandihí chi yo nyacua nya tuhun cha xehe ca cha cumí maa Nyoo.

¹¹ Ma cuví coto noo ra cha chicá xiñi inga ra. Soco suri maa ra chitó ra cha chicá xiñi maa ra. Ta tyicuan caa tucu noo ri Tatyí Ii Nyoo chitó cha yihí iñi maa Nyoo. ¹² Yoó ñima cha chiñi tuñi ñuhu ñáyiví naquehen yo, soco maa Nyoo chahá ra Tatyí Ii ra chi yo vatyí sacoto chi chi yo yoso caa cha tyaqui cha chahá Nyoo chi yo. ¹³ Tuhun cha cahán ndi chihin ndo ihya, tuhun cha sañahá maa Tatyí Ii Nyoo chi ndi cuví. Ñima tuhun cha cutuhva ri maa ndi chihin cha chiñi tuñi xiñi ndi. Nacatyí ndi tuhun cha sañahá Tatyí Ii Nyoo chi ndi chi ñu cha yihí Tatyí Ii Nyoo chi.

¹⁴ Soco ñu cha ña yihí Tatyí Ii Nyoo chi, ña cutuñi iñi ñu ta ña cuñí ñu cuiñi ñu cha sañaha Tatyí Ii Nyoo chi ñu, vatyí cuñí maa ñu tyi tuhun cha ñima ri tuhun cuví cuan. Vatyí ñn ri maa ñu cha yihí Tatyí Ii Nyoo cuví cutuñi iñi ñu tuhun cuan. ¹⁵ Soco ñu yihí Tatyí Ii Nyoo cuví cutuñi iñi ñu. Ta chitó ñu tatu vaha o ña vaha ñáá noo tuhun. Soco ma cuví catyí inga ñáyiví tatu vaha o ña vaha cha caá ñima maa ñu. ¹⁶ Vatyí tuhun Nyoo catyí chi: “Yori chitó tuhun cha chicá xiñi Sutu Mañi yo. Yori cuví sañahá chi Nyoo”, catyí tuhun Nyoo. Soco yoó cha yihí yo Tatyí Ii Nyoo, chitó yo cha chicá xiñi ra Cristo.

3

Ña tahán chi cunyicon yo chi noo ra yañi yo, chi Nyoo na cunyicon yo

¹ Soco yañi, quiví cuan ña cuví cahin chihin ndo tari cahín chihin ñu saquehén ityi Tatyí Ii Nyoo chi, soco cahin chihin ndo tari cahín chihin ñu ni nachino iñi chi Nyoo, tari cha vatyí ni nyihi ndo chihin tuhun ra Cristo cuví cuan. ² Cahin chihin ndo chihin tuhun cha ña yihí ri cutuñi iñi ndo. Tari chahá yo sicui coho cha lee cha ta cuví ca cachi nyayu, tyicuan caa sacuví chihin ndo. Vatyí nyoho, quiví cuan ta cuví ca chi ndo. ¡Ta ni vityin ta ta cuví ca chi ndo! ³ Vatyí ni chicá ca xiñi ndo cuhva chicá xiñi ñáyiví iyó siqui ñuhu ñáyiví ihya. Nyiyó iñi ndo. Iyó tisihi nu nyicú ndo. Cacusin ndo. Ni chicá ca xiñi ndo tuhun ñuhu ñáyiví ihya. Ta nyacuví ndo tari nyacuví ñáyiví cha ña ñohó nuu Nyoo. ⁴ Vatyí yihí ndo catyí ndo: “Yuhu cuenda ra Pablo yihí.” Ta inga ndo catyí ndo: “Yuhu cuenda ra Apolos yihí.” Cuñi chi catyí tyi nyacuví ndo tari nyacuví ñáyiví ña ñohó nuu chi Nyoo.

⁵ Vatyí ¿yóó ra cuví yuhu, ra Pablo? Ta ¿yóó ra cuví ra Apolos? vatyí cañi tahan ndo cha catyí ndi. Vatyí noo ra casacotó tuhun Nyoo chi ndo cuví ndi. Ta yucuan chaha nachino iñi ndo chi Sutu Mañi yo. Ta noo noo ndi sacuví ndi tyiño cha catyí maa Nyoo tyi sacuvi ndi. ⁶ Yuhu tachí chiti tuhun Nyoo ñima ndo. Ta ra Apolos chosó ra. Soco Nyoo sacuahnu ra tuhun ra ñima ndo. ⁷ Ta yucuan chaha ni ri ra cha tachí ta ni ri ra cha chosó, ñahri ra cuví ra. Soco Nyoo cuví ra tandihí. Vatyí maa ra sacuahnú ra tuhun ra ñima ndo. ⁸ Ra cha tachí ta ra cha chosó, ñn ri ra cuví ra. Ta cuiñi ra nu vaha sahá Nyoo yoso cuhva tyiño sahá noo noo ra. ⁹ Ta tyicuan caa nyuhu, sahatyiño ndi soco tyiño nuu Nyoo. Ta nyoho cuví ndo tari noo ñuhú nu sahá tyiño Nyoo.

Cuví tucu ndo tari noo vehe cha cuahán savaha Nyoo. ¹⁰ Catyí Nyoo tyi yuhu cuví tari noo ra cuví nuu cha sama vehe. Vatyí chaquin cuhva vehe cuan ta tyihí chaha chi ñuhú. Ta inga ra samá ityi siqui. Soco cuñi

chi sahá ra cuenda yoso cuhva samá ra siqui cuan. ¹¹ Ta yori cuví cacun inga cuhva vatyi cha caá cuhva cuan. Vatyi suri maa ra Jesucristo cuví cuhva cuan. ¹² Ta siqui cuhva cuan cuví sama yo chihin xuhun cuaan, chihin xuhun cuichin, chihin yuu tyaqui, o chihin vitu, o chihin tuñama o chihin ndaha numa. ¹³ Soco quiví cutuñi chi ñáyiví, cunyehe ra Cristo tyiño saha noo noo yo. Vatyi cuquichi ra chihin ñuhu. Ta ñuhu cuan cucahmi chi nya cha ña vaha. ¹⁴ Ta tatu yihí ñu sacuví ñu tyiño vaha, ma cayu chi. Cuñihi ñu cha cuhva Nyoo chi ñu. ¹⁵ Soco tatu tyiño sahá ñu ta ndii cayu, cunaa tandihi tyiño sahá ñu. Cacu maa ñu soco tari noo ra cha cuyatyí ca quita nu ñuhu. Vatyi chiin cuii ri ca ta cayu ra.

¹⁶ ¿Atu ña chitó ndo vatyi vehe ñuhu Nyoo cuví chi ndo, ta Tatyí Ii Nyoo iyó ra aña ndo? ¹⁷ Tatu nya noo ñu sativí vehe ñuhu Nyoo, Nyoo cusanaa ra chi ñu, vatyi vehe ñuhu Nyoo, cha ii cuví. Ta vehe ñuhu cuan ican cuví maa yo.

¹⁸ Ni noo ndo ta ma sandavi ñaha ndo chi ndo. Tatu nya nyoho cuñi maa ndo tyi chitó xaan ndo cha chiñi tuñi ñáyiví ihya, ndahvi saha ndo chi ndo tari noo ra cha ña chitó maa. Tyicuan ta Nyoo cuhva ca ra cha chiñi tuñi vaha chi ndo. ¹⁹ Vatyi cha chiñi tuñi ñáyiví ihya cuví chi noo cha ñima ri tuhun nuu Nyoo. Vatyi tuhun Nyoo catyí chi: “Nyoo sanacavá ra chi ra chitó, suri maa nu trampa cha savaha ra.” ²⁰ Ta catyí tucu chi: “Sutu Mañi yo chitó ra vatyi cha chicá xiñi noo ra chitó, cha ñima ri tuhun cuví.” ²¹ Yucuan chaha ni noo ndo ña tahán chi sacahnú ndo chi ndo tatu nyicón ndo chi noo rayi. Vatyi tandihi cha iyó ta chi maa ndo cuví, tyi maa Nyoo chaha ra chi ndo. ²² Yuhu ra Pablo, ra Apolos, ra Pedro, maa Nyoo chaha ra chi ndi chi ndo tyi nacatyí ndi tuhun ra chi ndo. Ta ñuhu ñáyiví ihya, ñáyiví iyó yo, tuhun chihi, cha cuví vityin, cha cuví nu cuahan ca chi, tandihi ta chi maa ndo cuví. ²³ Ta siin ri, maa

ndo, chi ra Cristo cuví chi ndo, ta ra Cristo, chi Nyoo cuví chi ra.

4

Ma sacahnu yo chi yo ta ni chi noo yañi yo

¹ Cuñi chi vatyi nyehé ndo chi ndi tari noo ra sahá tyiño chihin ra Cristo. Vatyi tyaq Nyoo tyiño chi ndi vatyi sañaha ndi tuhun xehe ra cha ña chitó ñáyiví nu quichi chi. ² Ta cuñi chi vatyi nyuhu cha cuví ndi musu Nyoo nyita ri quichahá ndi tandihi cha catyí ra chi ndi. ³ Soco cha cuenda yuhu, ña quichahí tatu cahán ndo chii. O tatu cutuñi chii nuu noo ra cuví tyiño, ñahri cuende. Ta ni ri mai ta ña catyí tyi vahi. ⁴ Vasi tuví iñi mai tyi ñahri ca cuatyí, soco ña cuñi chi catyí vatyi ñahri cuatyí nuu Nyoo. Vatyi nuu maa Sutu Mañi yo cucutuñi chi yo. ⁵ Ican tuhun, nyoho ma cahan ndo chi ndi. Cuatu ndo quiví quichi ra Cristo. Ta maa ra cutava nu ndichin cha ñohó xehe nu ñaa iñi. Vatyi cusanatuvi ra cha caá aña noo noo yo. Tyicuan ta Nyoo cutiyahvi ra yoso cuhva sacuví noo noo yo.

⁶ Yañi, cahín tuhun ihya chihin ndo cuenda cha vaha chi maa ndo. Vatyi nyehé ndo cuhva iyé, ta cuhva iyó ra Apolos. Vatyi ña cahnu sahá ndi chi ndi. Ta tyicuan caa tucu maa ndo, cutuhva ndo sacuvi ndo tari catyí nu tutu Nyoo: Ma cahnu saha ndo chi ndo. Ta ñima chi noo ri ra cuñi ndo. Soco inuu ri cuhva cuñi ndo chi tandihi ñáyiví. ⁷ Ni noo ndo ta ña cahnu ca ra cuví ndo ican saha inga ndo. Vatyi cha iyó chi ndo maa ri maa cha chahá Nyoo cuví. Yucuan chaha ña tahán chi cha sacahnú ndo chi ndo, vatyi ñima maa ndo ñihí.

⁸ Cha cuhva cha cuñi maa ndo vatyi tandihi tuhun Nyoo chitó ndo, ta ñahri ca cha cumañi chi ndo. Ta cuñi maa ndo tyi Rey cuví ndo. Ta ña chiñuhú ca nyuhu chi ndo, cuñi maa ndo. Vaha tyehe ta tyicuan caa, tacuhva vatyi cuví tucu nyuhu rey chihin ndo. ⁹ Nyuhu cha cuví ndi apóstol, tari maa cha sandoo Nyoo chi ndi nya chata ca, cahvi iñi. Vatyi

nyehé xaan ndi tindoho. Cuví ndi tari noo ra iyó cuatyí, ta tari quiví cha yahá policia chihin ndi ityi cahnu vatyi tacuhva tyi nyehé ñáyiví ta ángel chi ndi. ¹⁰ Sahá ñáyiví tyi ra tondo cuví ndi cha cuenda ra Cristo. Ta nyoho cuñí maa ndo tyi chitó xaan ndo tuhun ra Cristo. Nyuhu cuví ndi tari noo ra cha ñahri fuerza, cha ni ri ca cha nyoho cuñí maa ndo tyi cuaha xaan fuerza ndo iyó. Tasi cuñí nyehé ñáyiví chi ndi, ta chi nyoho sahá ñu ñáyiví. ¹¹ Nya vityin, nyehé ndi tindoho. Chisocó ndi. Ityi ndi ndutya. Cumañí sahma ndi. Ñahri vehe ndi iyó. Ta ñáyiví, tasi ñi ñu chi ndi. ¹² Ta chitatú ndi cha sahá tyiño ndi chihin ndaha ndi. Cahán ñáyiví chi ndi. Soco nacahán ndi chihin cha vaha nu cahan ñu. Chicá nyicon ñu chi ndi soco cunyeé ndi. ¹³ Cahán ña vaha ñu siqui ndi. Soco ña yatyín ñi ndi, vita ri chaha ndi tuhun chi ñu. Sahá ñu tari noo mihin chi ndi. Sahá ñu tari noo cha ña chiñuhú ca chi ñáyiví chi ndi. Tyicuan caa sacuví ñu nyacua nya vityin.

¹⁴ Sacuhín tuhun ihya chi ndo, soco ñima ticahan nuu chahí chi ndo. Soco chahí tuhun chi ndo tari chahí tuhun chi sehi tyi cuñí chi ndo. ¹⁵ Soco vasi uchi mil ra sacuahá sañahá tuhun ra Cristo chi ndo, soco ña cuaha sutu ndo iyó. Yuhu cuví sutu ndo cha cuenda tuhun ra Cristo Jesús. Vatyí sañahí chi ndo yoso caa cacú ñima ndo. ¹⁶ Ta tyicuan caa catyí chi ndo na cunyicon ndo cuhva iyé.

¹⁷ Yucuan chaha tachí chi ra Timoteo, sehi cuenda Sutú Mañi yo, nu nyicu ndo. Ni xaan ñi ra nyicón ra chi Nyoo. Ta cuñí xain chi ra. Maa ra cuasanícohon ra ñi ndo yoso cuhva iyé, vatyi chinó ñi chi ra Cristo. Cusañaha ra chi ndo yoso cuhva sañahí tandihí ri vehe ñuhu. ¹⁸ Yihí nyoho cahnu sahá ndo chi ndo. Cuñí maa ndo vatyi ma cuhun que nu nyicú ndo. ¹⁹ Soco tyaí cuhva tyi cunyehe nu nyicu ndo cha numi ri, tatu Sutú Mañi yo ta cuñí ra. Tyicuan ta cunyehe tatu ndicha cha iyó fuerza Nyoo chi ra cahnu sahá chii chiña,

o tatu cacahán ri maa ra. ²⁰ Vatyí tatu ndicha cha chahá ra cha cunyacá ñaha Nyoo chi ra, ma cahan ri ra. Soco cuatuvi ñi yo vatyi nyaá fuerza Nyoo chihin ra. ²¹ ¿Ñáá cha cuñí nyoho vii? ¿Atu cha quichi tachi tuñi chi ndo, o cha quichi nyehi chi ndo chihin cha vita ñi?

5

Nu cutuñi chi noo ra chiyó chihin sihi queen

¹ Catyí ñu chii vatyi iyó noo nyoho cha iyó ndo chihin sihi queen ndo. Ihya cuví noo cuatyí cha cahnu xaan, vatyi ni ñu ña ñohó nuu chi Nyoo ta ña nyacuví ñu tari nyoho. ² ¿Ta tyicuan caa ta cahnu sahá ndo chi ndo cha nuu cha cucuihyá ñi ndo! Cuñí chi vatyi catyi ndo chi ra cha nyacuví cha quiñi caa cuan vatyi ma cutahan ca ra chihin ndo. ³⁻⁴ Vasi ña nyaí chihin ndo chihin coño ñuhi, soco cohon ñi ndo vatyi ñohó ñi tuhun ndo, tari cha nyaá mai chihin ndo cuví cuan. Ta cha sandaj tyiño ra cha sacuvi cuatyí cuan chihin sivi maa Sutú Mañi yo Jesucristo. Cuñí chi tyi ndu ñi ri ndo. Ta saha ndo tuhun tyi nyaí chihin ndo. Ta cunyaa fuerza maa Sutú Mañi yo Jesús chihin ndo ñandihí. ⁵ Tyicuan ta cuñí chi vatyi nacuhva cuenda ndo chi ra cuan chi cuihna, tacuhva nativi ndihí coño ñuhu ra. Ta cuhva cuví cacu ñima ra quivi quichi Sutú Mañi yo Jesucristo.

⁶ Ña tahán chi sacahnu ndo chi ndo chihin cha sacuví ndo. Vatyí nyehé ndi ndo nyacuví ra cuan cha quiñi caa. ¿Atu ña chitó ndo noo tuhun cha catyí chi vatyi chihin chiin ri yuchan iya ta nandaa naní yuchan pan? ⁷ Tava ñehe ndo yuchan iya chahnu cha cuví cha ña vaha cha sativi chi ndo. Tyicuan ta cuví ndo tari pan cha ñahri yuchan iya yihí chihin, cha tuhva yo chachí cha vico pascua. Ta pan cuan, ican cuví ndo vatyi ra Cristo cuví mbee cha chihi cha catyi cuatyí yo. ⁸ Yucuan chaha tahán chi cachi coo yo cuenda cha chihí maa ra Cristo cha catyi yo. Ta

sandoó yo cha quiñi caa cha sacuvi yo ityi chata cha cuví tari yuchan iya chahnu. Ta cahán yo maa maa ri cha ndicha chihin cha ñi iñi yo. Vatyí cuví chi tari pan cha ñahri yuchan iya yihí.

⁹ Nuu inga carta cha yaha saquichi chi ndo, catyí chi ndo vatyí nyoho ma cohon naha ndo tuhun chihin ñu cha sacuví cha iyó ri maa chihin ñusihí o rayí. ¹⁰ Ta cha catyí chi ndo tyehe caa, ñima cha cuachiyo ndo ingaña ri nu nyicú ñu cha iyó chihin rayí o ñusihí, ta ñima yí ñu o ñasihí ra cuví, o ñu nyiyó iñi, o ñu suhú, o ñu sacahnú xitohyo. Vatyí tatu tyicuan caa, cuñí chi cha quita ndo ingaña ri ñuhu ñayiví. ¹¹ Soco cha cuñí catyí chi ndo vatyí ma cohon naha ndo tuhun chihin noo ñu cha catyí vatyí hermano cuví ñu, ta iyó ri maa ñu chihin rayí o chihin ñusihí ta ñima yí ñu o ñasihí ra cuví, o nyiyó iñi ñu, o sacahnú ñu xitohyo, o cuendu ñu, o chihí ñu ndixi, o suhú ñu. Ñu cha caá tyehe caa, ni cha ma cunyaa ndo cachi ndo chihin ñu. ¹²⁻¹³ Vatyí yoó ña tahán chi sahá yo cuenda chi ra ña ñohó nuu chi Nyoo. Nyoo cuví ra sahá cuenda chi ñu cuan. Soco nyoho cuñí chi sahá ndo cuenda chi ñu yihí cuenda Nyoo. Yucuan chaha tavá ñehe ndo chi ra iyó cuatyí chiña nu nyicu ndo.

6

Ma cacan yo cuatyí chaha noo yañi yo cuenda Nyoo nuu ra cuví tyiño

¹ ¿Yoso caa quichi cuví iñi nyoho chicán ndo cuatyí chaha tahan ndo nuu ra cuví tyiño cha ña yihí cuenda Nyoo chihin ndo, cha nuu cha sacotó ndo chi ra yihí cuenda Nyoo, tacuhva canyehé ra nya ra iyó cuatyí? ² ¿Atu ña chitó ndo vatyí suri maa ndo cusandaa ndo cuatyí ñáyiví iyó síqui ñuhu ñayiví ihya nu cuahan ca chi? Ta tatu maa ndo cusandaa ndo cuatyí cuan, ¿atu ma cuví sandaa ndo noo tyiño cha ñima ri tuhun ihya? ³ ¿Atu ña chitó ndo vatyí nyacua nya ángel ta

cutuñi chi ra nuu yo? ¿Ta nyaca cuví noo tuhun luhlu ñayiví ihya! ⁴ Yucuan chaha tatu iyó tisihi nu nyicú ndo, ¿ñaá tuhun cuahan ndo nuu ra cuví tyiño cha ña chitó tuhun Nyoo?, ta ñahri tyiño cuví ra cuan vehe ñuhu nu nyicú ndo. ⁵ Ihya ndicha tuhun catyí chi ndo, na coo chiin ticahan nuu nuu ndo. ¿Atu yori ndicha cuii noo ra cuví sandaa noo tyiño yañi yo nu canyicú nyoho chiña? ⁶ Vatyí cuahan ndo cua cacan ndo cuatyí chaha yañi yo cuenda Nyoo nuu noo ra cuví tyiño cha ña chiño iñi chi Nyoo.

⁷ Cha iyó tisihi nu nyicú ndo, ña vaha. Vaha taxin ca cunye ri ndo tatu sacuvi ñu cha ña vaha chihin ndo. Saña ndo, na suhu maa ñu cha chii ndo. ⁸ ¿Soco nyoho suri maa ndo sata sí ndihí ca iñi ndo chi ñáyiví, ta nyacua nya cha chii yañi ndo ta suhú ndo!

⁹⁻¹⁰ ¿Atu ña chitó ndo vatyí ñu quiñi iyó ma quihví ñu nu nyacá ñaha Nyoo? Ma sandavi ñaha ndo chi ndo. Ma quihví tandihí ñu iyó ri maa chihin ñusihí o chihin rayí cha tyicuan ri caa. Ta ni ri ñu cha sacahnú xitohyo, ni ri ñáyiví cha iyó ñasihí o yí, ta cavá noo ñu chihin inga ñaha o chihin inga rayí, ni ra iyó chihin tahan yí, ni ra suhú, ni ra nyiyó iñi cha tyayí, ni ra chiñí, ni ri ñu cuendu, ni ri ñu chitó yoso caa sacuví cha quiñi caa, ma ñihí ñu cha vaha nu nyacá ñaha Nyoo. ¹¹ Vatyí tyicuan caa cuví suhva nyoho. Soco Nyoo cha sandundi ra aña ndo chihin Tatyí Ii ra. Cha sacuvahá Sutu Mañi yo Jesucristo chi ndo nuu Nyoo.

Coño ñuhu yo cuví vehe ñuhu Nyoo

¹² Catyí chi tuhun vatyí libre iyó yo cha sacuví yo tandihí cha cuñí yo. Cha ndicha cuví. Soco ña tandihí ta cuví chi cha vaha chi yo. Ndicha libre iyó yo cha sacuví yo tandihí, soco saha yo cuenda tatu cha vaha cuví o cha ña vaha. Ta ma cuhva yo cha cunyaca ñaha chi chi yo. ¹³ Catyí ñáyiví vatyí chahá Nyoo nyayu cha cuenda chichi yo. Ta chaha ra chichi yo cha cuenda cha cachi yo nyayu.

Cha ndicha cuví. Soco n̄nduvi cuan cusanaa Nyoo quiví naa ñayiví. Ta ña ndicha cha coño ñuhu yo cuví cha cuenda cha sacuvi yo cha ña vaha chihin ñusihí o chihin rayí. Vatyí coño ñuhu yo cuenda Sutu Mañi yo cuví. Ta maa Sutu Mañi yo cuví ra cuenda coño ñuhu yo. ¹⁴ Tari sanandoto Nyoo chi ra Cristo Jesús, tyicuan caa cusanandoto ra chi yo chihin tunyee ñi ra.

¹⁵ ¿Atu ña chitó ndo vatyí tandihí yo cha yihí yo cuenda ra Cristo nanduvi yo noo coño ñuhu chihin ra? Ta noo noo yo cuví tari suhva ri coño ñuhu ra. ¿Atu quehen yuhu chiin coño ñuhu ra Cristo ta sativí chihin noo ñaha cata ñi? Ña tahán chi cunyacuvi yuhu tyicuan caa. ¹⁶ ¿Atu ña chitó ndo vatyí tatu noo rayí ndu ñn ri ra chihin noo ñaha cata ñi, noo ri coño ñuhu nanduví ra chihin ña? Vatyí nu tutu Nyoo catyí chi tyehe caa: “Cha n̄nduvi ñu, noo ri nanduvi ñu.” Ta ña tahán chi cu ñn ri ra yihí cuenda Nyoo chihin ñaha cata ñi. ¹⁷ Soco tatu noo ñáyiví nacuhvá cuenda ñu añima ñu chi ra Cristo, yucuan cuví nu quihví Tatyí Ii ra añima ñu ta noo ri nanduví ñu chihin ra.

¹⁸ Sanaa ndo ñi ndo tatu quichi cuvi ñi ndo chi ñusihí o rayí tatu ñima ñasihí ndo o ñima yí ndo cuví. Vatyí tandihí inga nu cuatyí cha nyacuví ñáyiví ña sativí chi coño ñuhu ñu. Soco ñu nyacuví cuatyí chihin cha iyó ñu chihin ñusihí o rayí cha tyicuan ri caa, sativí ñu coño ñuhu ñu. ¹⁹ ¿Atu ña chitó ndo vatyí coño ñuhu yo cuví vehe Tatyí Ii cha chaha Nyoo chi yo, vatyí cunyaa ra chihin yo? Yoó ñima maa yo nyacá ñaha yo chi yo, Nyoo cuví ra nyacá ñaha chi yo. ²⁰ Vatyí Nyoo sata ra chi yo ta yahvi xaan chaha ra chi yo. Yucuan chaha cuñí chi vatyí sacahnú yo chi Nyoo chihin coño ñuhu yo, ta chihin cha chiñi tuñi yo vatyí n̄nduvi cuan, chi maa Nyoo cuví.

7

Chahá ra Pablo tuhun yoso caa coo

ñu tandahá noo ñáyiví vaha

¹ Ta vityin cuacatyí tuhun cha ndaca tuhun ndo chii nu tutu cha sacuhun ndo chii. Ndicha vatyí vaha cha ma tandaha yo. ² Soco vatyí iyó xaan tuhun cha quichí cuvi ñi ñáyiví cha coo ñu chihin ñáyiví cha tyicuan ri caa. Yucuan chaha cuñí chi vatyí tahan tahan rayí coo noo ñasihí ra, ta tahan tahan ñusihí coo noo yí ñu. ³ Na sacuvi rayí cuhva tahán chi chihin ñasihí ra. Ta tyicuan caa tucu maa ñusihí, na sacuvi ñu cuhva tahán chi chihin yí ñu. ⁴ Ñaha sihi cuan ma cuvi cunyaca ñaha ri maa ña coño ñuhu ña. Vatyí chi yí ña cuví coño ñuhu ña. Tyicuan caa tucu maa yí ña, ma cuvi cunyaca ñaha ri maa ra coño ñuhu ra vatyí chi ñasihí ra cuví coño ñuhu ra. ⁵ Coto ñaha ma cuhva ndo chi ndo chi tahan ndo. Tatu cuñí ndo nanducu ndo chi Nyoo chihin oración, ñn ri cuhva caça xiñi n̄nduvi ndo. Ta ma cuhva ndo chi ndo chi tahan ndo suhva quiví. Yaha cuan tyicuan ta cuhva tucu ndo chi ndo chi tahan ndo coto ma cunyee ndo. Ta coto nducu nyehe ra ña vaha chi ndo ta cahun ndo cunducu ndo inga ñusihí o inga rayí. Ta ña vaha cha tyicuan caa.

⁶ Cha catyí chi ndo tyehe caa ñima cha catyí tyi tandaha ndo. Ña saniñí chi ndo cha tandaha ndo. Soco cuví tandaha ndo tatu cuñí ndo. ⁷ Cha cuenda chi yuhu, vaha ca coo maa ri maa ndo tari mai. Soco Nyoo siñ siñ fuerza chahá ra chi noo noo yo. Yihí yo chahá ra fuerza chi yo vatyí cuvi coo maa ri maa yo. Ta yihí yo ña chaha ra fuerza cha coo maa ri maa yo.

⁸ Chi ñu tyivaa ta chi ñu chihí yí, chahí tuhun chi ñu. Vaha ca cha ma coo yí ñu tari mai. ⁹ Soco tatu ma cunye ñu cha ma coo yí ñu, vaha ca cha tandaha ñu ta ñima ca cha quichi ri cuvi ñi ñu tandaha ñu, ta ña tandaha ñu.

¹⁰ Soco ñu cha yaha tandaha, catyí chi ñu vatyí ma sanandoo ñu chi yí ñu. Cha ndicha cuví vatyí mandamiento ihya ñima cha ndichí xiñi ri cuví soco maa Sutu Mañi yo catyí.

11 Soco tatu noo ñaha sihi ta sanandoo ña y# ña, cuñí chi vatyí ndoo ña cunyaa ña cha ma tandaha ca ña. O naquehen ña chi y# ña. Ta suri tyicuan caa, ña tahán chi sanandoo ray# chi ñasíhi ra.

12 Ta cha cuenda chi yuhu catyí chi inga ndo tuhun ihya. Vatyí tatu ñasíhi noo hermano ta ña chinó iñi ña chi Nyoo, soco ndoo ña vaha cha cunyaa ña chihin ra, ñahri ityi iyó chi ra cha sanandoo ra chi ña. 13 O tatu y# noo hermana, ta ña chinó iñi ra chi Nyoo, soco ndoo ra vaha cha cunyaa ra chihin ña, ñahri ityi iyó chi ña cha sanandoo ña chi ra. 14 Vatyí cha yaha nasoco Nyoo chi ray# cha ña chinó iñi cuan cha cuenda cha #n ri cuví ra chihin ñaha cha chinó iñi cuan. Ta cha yaha nasoco tucu Nyoo chi ñaha cha ña chinó iñi chi Nyoo cha cuenda cha #n ri cuví ña chihin ra chinó iñi. Tatu ña nyacuví ndo tyicuan caa, sehe ndo cucuvi ndotyín tari sehe ñu cha ña chinó iñi chi Nyoo. Soco cha cuenda cha sacuví ndo tyicuan caa, nasocó Nyoo chi sehe ndo. 15 O tatu ray# o ñusíhi cha ña chinó iñi chi Nyoo, ta cuñí ñu sanandoo ñu chi tahan ñu cha chinó iñi chi Nyoo, na sanandoo maa ñu. Tyicuan ta ra hermano o ñaha hermana ndoo ñu libre. Vatyí maa Nyoo cuñí ra vatyí coo vaha yo chihin cha ñahri tisihi. 16 Vatyí ña chitó minoo ñaha sihi tatu cacu añima y# ña saha ña. Ta ni ri noo ray# ña chitó ra tatu cacu añima ñasíhi ra saha ra.

17 Ta tyicuan caa catyí chi ndo vatyí coo ndo yoso cuhva catyí Sutu Mañi yo chi ndo. Ta yoso cuhva iyó ndo quiví nacana Nyoo chi ndo. Ta tyicuan caa catyí chi tandíhi ñu yíhi cuenda Nyoo noo noo vehe ñuhu. 18 Tatu Nyoo ta nacana ra chi noo nyoho ta cha yaha sacuví ñu costumbre circuncisión chi ndo, ma caca iñi ndo. Soco tatu nacana ra chi noo ndo cha ña sacuví ñu costumbre cuan chihin ndo, ña tahán ca chi sacuví ndo vityín. 19 Ña niñi xaan cha sacuví yo, o cha ma sacuví yo costumbre circuncisión cuan. Soco cha niñi ca cha quichahá

yo tuhun cahán Nyoo. 20 Tahan tahan ndo cuñí chi ndoo ndo yoso cuhva cha iyó ndo quiví cha nacana Nyoo chi ndo. 21 Vatyí tatu iyó chitoho ndo cha nyacá ñaha chi ndo quiví cha nacana Nyoo chi ndo, ma caca iñi ndo, soco tatu chahá chi cuhva cha ndoo ndo libre, cuñí chi nducu ndo cuhva ta ndoo ndo libre. 22 Vatyí quiví nacana Nyoo chi noo ra cha iyó chitoho, nduví ra tari noo ra cha libre iyó, vatyí sacuví ra tyiño nuu Sutu Mañi yo. Ta suri tyicuan caa tucu ra cha iyó libre quiví cha nacana Nyoo chi ra. Vityín ra Cristo nyacá ñaha chi ra. 23 Sata Nyoo chi nyoho. Ta yahvi xaan chaha ra chi ndo. Yucuan chaha ma cuhva ndo cha cunyaca ñaha ray# chi ndo. Ta ma sacuví ndo tyiño nuu ra. 24 Ta tyicuan caa catyí chi ndo yañi, coo ndo tari cuhva chiyo ndo quiví nacana Nyoo chi ndo.

25 Ta tyicuan tucu ñu cha ta tandaha ca. Ñahri tuhun chaha Sutu Mañi yo chii cha cuenda ndo. Soco catyí chi ndo yoso cuhva ndichí xiñi. Ta cuví naquehen ndo tuhun cahín tyi cha chitó ndo vatyí cha ndahvi cuñí Nyoo nyehe ra chii ta chaha ra tyiño ihya chii. 26 Cha cuenda chi yuhu, vaha taxin ca ma tandaha ndo. Vatyí cuaha xaan tindocho ñayiví cha iyó yo vityín. 27 Soco tatu cha iyó ñasíhi noo hermano, ma nducu ra cuhva cha sanandoo ra chi ña. O tatu ta coo ca ñasíhi ra, ma nducu ra chi ña. 28 Soco tatu tandaha ra, ñima cuatyí cuví. O tatu noo ñaha tyivaa tandaha ña, suri ñima cuatyí cuví. Soco ñu tandaha cuaha xaan tindocho cunyehe ñu ñayiví ihya. Ta yucuan chaha catyí chi ndo vatyí vaha ca cha ma tandaha ndo. Vatyí ña cuñí cha nyehé ndo tindocho ta tisihi cuan.

29 Yañi, cha vityín ta ityi nuu ña cuaha ca quiví nyaá. Cuñí chi vatyí ra cha iyó ñasíhi cuví ra tari noo ra cha yori ñasíhi. Vatyí nyita ri tahán chi caca xiñi ra tuhun Nyoo. 30 Ta tatu nyaá ndo tucuihya iñi, ma quichaha ndo tucuihya iñi cuan, o tatu nyaá ndo tusíhi iñi, soco ma quichaha xaan

ndo tusii ñi cuan. Ta tyicuan caa tucu tatu iyó xuhun ndo, ma quichaha xaan ndo xuhun cuan. Nacuhva ndo tandihi cuan chi Nyoo. ³¹ Ta ra iyó xaan cha chii ñayivi ihya, ma quichaha xaan ra chi cuan, soco cotyiño ra tyiño Nyoo. Vatyí ñayivi cha nyehé yo ihya cha cuahán sandihi xaan chi.

³² Cuñí vatyí nyoho ma caca xaan xiñi ndo tuhun cha iyó ñayivi ihya. ñin ri maa tuhun Nyoo caca xiñi ndo. Noo ra tyivaa cha ta tandaha ca chicá xiñi ra yoso caa sacuvi ra cuhva cuñí maa Sutu Mañi yo. ³³ Soco tatu cha tandaha ra, chicá xiñi ra yoso caa coo vaha ra ñayivi cuhva tahan ñi ñasihi ra. ³⁴ Ta sijn cuhva iyó noo ñusihi cha cha yaha tandaha, ta sijn cuhva iyó tucu noo ñusihi cha cumañi ca tandaha. Ñaha cha cumañi ca tandaha chicá xiñi ña ñin ri maa tuhun Sutu Mañi yo. Ta chicá xiñi ña yoso caa sacahnú ña chi Nyoo chihin coño ñuhu ña ta chihin cha ñi aña ña. Soco ñaha cha cha yaha tandaha chicá xiñi ña yoso caa coo vaha ña ñayivi ihya cuhva tahan ñi yii ña.

³⁵ Catyí tuhun ihya chi ndo cuenda cha vaha chi maa ndo. Ñima cha saniñi chi ndo. Soco vatyí coo vaha ndo noo ñayivi chihin cha ñahri sayangá chi ndo. Ta ñin ri tyiño Nyoo sacuvi ndo.

³⁶ Soco nya nyoho chicá xiñi ndo vatyí vaha cha tandaha ndo vatyí cha cuayaha quivi ndo; vaha, tandaha ndo tatu cuñi ndo. Ñima cuatyí cuví cuan. ³⁷ Soco tatu inga ndo cha nacuañ vaha ñi ndo vatyí cuandoo ndo cha ma tandaha ndo, vaha tucu. ³⁸ Tu tandaha ndo, vaha. Tu ma tandaha ndo, vaha ca.

³⁹ Soco catyí nu ley Nyoo chi yo vatyí tahan chi cunyacá ñaha rayii chi ñasihi ra cha ni ri ca cha iyó ra. Soco tatu chihí ra, iyó ityi chi ña cha tandaha ña yóo chihin cuñi maa ña. Soco tatu ra yihí cuenda Nyoo cuví ra. ⁴⁰ Soco vaha ca coo ña ñayivi tatu ma tandaha ña inga chaha. Ihya cuví cha chicá xiñi yuhu. Ta chahí tuhun

ihya chi ndo chihin Tatyí li maa Nyoo, cahvi ñi.

8

Nu sañahá ra Pablo vatyí ma sacoo yo cuatyí inga ñáyivi

¹ Ta vityin cuanacatyí chi ndo cuenda nyayu cha chahá ñu chi xitohyo. Tandihí yo cha ñohó nuu ca yo chi Nyoo, chitó yo tatu vaha o ña vaha cachi yo nyayu cuan. Ta cha cuenda cha chitó yo, yucuan chaha cahnu xaan sahá yo chi yo ta sativi cuan chi yo. Soco cha cuñi yo chi tahan yo sandunyeé cuan chi yo.

² Tatu yihí ndo cha cuñi maa ndo tyi chitó ndo, cha cuenda vatyí ta coto ca ndo yoso cuhva cuñi chi cuví cuan.

³ Soco Nyoo ñohó nuu ra chi ñu ñi vaha ñi cuñi chi ra.

⁴ Ta vityin cha cuenda cha cachi yo nyayu cha iyó vico xitohyo: cha chitó vaha yo vatyí noo xitohyo ñahri maa vale chi, vatyí noo ri maa Nyoo iyó.

⁵ Vasi cuñi maa ñáyivi vatyí cuaha xaan Nyoo iyó nu ñuhu ñayivi ihya ta andivi, ⁶ soco cha cuenda chi maa yo noo ri Nyoo Sutu yo iyó. Ta maa ra savaha ra tandihí cuii maa cha iyó. Ta yoó iyó yo cha cuenda maa ra. Ta iyó tucu noo ri Sutu Mañi yo Jesucristo. Ta maa ra savaha tandihí maa cha iyó, nyacua nya chi maa yo.

⁷ Soco ña tandihí yo chitó yo tuhun ihya. Vatyí suhva ñu tahan yo cuenda Nyoo, ta ni cumañi ca quihvi ñu cuenda Nyoo, sacahnú ñu xitohyo. Ta cha cañ ñu sacahnu ñu chi cuan ta cuñi maa ñu tyi nyitó xitohyo cuan. Vatyí ña ñi vaha ñi ñu nyicón ñu chi Nyoo. Ta tatu chachí ñu nyayu cha chahá ñáyivi chi xitohyo cuan, cuñi maa ñu vatyí chicoó cuatyí ñu cuenda xitohyo cuan nuu Nyoo. ⁸ Soco Nyoo ñahri cuenda ra tatu chachí yo, o ña chachí yo. Ñima vatyí chachí yo ta ña vaha ca yo nuu Nyoo, ta ñima cha cuenda cha ña chachí yo ta vaha ca yo. ⁹ Soco saha ndo cuenda nya ndo chachi nyayu cuan ta chitó ndo vatyí ñahri cuatyí ndo chicoo. Cuví

sanacava ndo nuu cuatyí chi ñu ni quihví ri cuenda Nyoo, vatyí ñu cuan cuñí maa ñu tyi chicoo cuatyí ñu tatu chachí ñu nyayu cuan. ¹⁰ Vatyí tatu yoho cha chiton tuhun ihya, ta cunyaun ta cachun noo cha iyó vehe xitohyo, ta noo ra yañi yo cha ña ñihi vaha cuahán ra chihin Nyoo nyehé ra chuun yucuan, ra yañi yo cuan cucachi ndihí ra chuhun. ¹¹ Ta ra yañi yo cutívi añima ra vatyí cuñí maa ra tyi chicoo cuatyí ra. Ta ra cuan chihí ra Cristo cha cuenda ra. Ta vityin chicoo cuatyí ra cuñí maa ra. Ta yoho cha chitón, sicun chuhun cuatyí cuan. ¹² Yucuan chaha tatu sanacavá yo chi noo yañi yo cha ña ñihí vaha cuahán chihin Nyoo, chicoo cuatyí yo nuu ra Cristo. ¹³ Yucuan chaha tatu sanacavé chi noo yañi yo nuu cuatyí cha cuenda cha chachí, vaha taxin ca ma cachi ca mai coño, tacuhva cha ma sanacave chi ra nuu cuatyí.

9

Cha tahán chi sacuví ra apóstol Nyoo

¹ Yuhu cuví noo ra apóstol Nyoo. Ta yori ñáyivi nyacá ñaha chii. Vatyí nyehí chi ra Jesús Sutu Mañi yo. Ta suri maa ndo cuví cha ndaa tyi ndicha cuví yuhu noo apóstol Nyoo, vatyí chinó iñi ndo tuhun Nyoo cha sacote chi ndo. ² Vasi ña cuñí ñáyivi chinó iñi ñu cha apóstol Nyoo cuví, soco cha cuenda nyoho ican cuví. Vatyí cha cuenda cha chinó iñi ndo chi Sutu Mañi yo, cuví ndo cha ndaa vatyí ndicha cha apóstol cuví.

³ Ihya cuví tuhun cuacahin cuenda ñu cha cahán nyaa chii. ⁴ Iyó chi ityi chii cha quehín tandihí cha chahá ñu cachi ta cha chahá ñu cohi. ⁵ Ta siin ri cha coo noo ñasihí cha chinó iñi chi Nyoo, tari yañi ra Jesús, ta ra Pedro ta tandihí ca ra apóstol. ⁶ O chicá xiñi ndo vatyí yuhu ri ta ra Bernabé tahán chi saha tyiño ndi chihin ndaha ndi ta sata ndi cha chiñuhú chi ndi. ¿Atu ña tahán chi chi nyuhu sandoo ndi tyiño cuan ta cahan ndi tuhun Nyoo? ⁷ Ra cha cuví sindaro

tyiyahví gobiernu chi ra ta chotyíño ra xuhun cuan. Ta ra cha tachí yoho tichaha ndivi, chachí ra tichaha ndivi cha quita nu iyó tyiño saha ra. Ta ra cha sahá cumi mbee chihí ra sicui ti. ⁸ Ta ma cuñi ndo vatyí tuhun ihya cha ndichi xiñi ri mai cuví. Vatyí nu ley cha tyaa ra Moisés catyí chi tyehe caa: ⁹ “Ma tyihi ndo yoho yuhu quití cha sandundí trigo, vatyí tahán maa chi cachi ti suhva trigu nu sahá tyiño ti.” Ndicha vatyí Nyoo catyí ra tyehe caa soco ñima vatyí cuniñi xaan cuñi ra chihin quití. ¹⁰ Soco na cutuñi ca iñi yo vatyí tari ra tahví ñuhu ta ra cha tachí, tahán chi vatyí cuita iñi ra vatyí cunaquehen ra cha quita nu saha tyiño ra. ¹¹ Ta tyicuan caa, tatu nyuhu quichi cahan ndi tuhun Nyoo chihin ndo, tari quivi cha quichi tachí ndi chiti cuví cuan. Ta tahán chi tyi tyinyeé ndo chi ndi cha cuenda cha sacotó ndi tuhun Nyoo chi ndo. ¹² Tatu tyinyeé ndo chi inga ra cha ña quichí tyihi tuhun Nyoo nu nyicú ndo, tahán ca chi cha tyinyee ndo chi nyuhu, vatyí nyuhu tyihí ndi tuhun Nyoo nu canyicú ndo.

Soco ña cahán ri ndi, ta cunyeé ndi tandihí. Ta ña sayangá ndi chi ndo chihin cha chiñuhú chi ndi. Tacuhva cha ma sandihí ndo tuhun ra Cristo. ¹³ Chitó ndo tyi ra sahá tyiño vehe ñuhu ñáyivi Israel, iyó ra chihin cha iyó vehe ñuhu cuan. Vatyí tahán chi tavá siin ra suhva coño quití vatyí cachi ra. Ta tandihí ca coño cuan cucahmi ra tari cuhva catyí maa Nyoo chi ra. ¹⁴ Ta suri tyicuan caa catyí Sutu Mañi yo, vatyí tahán chi tyinyeé ñu yihí cuenda Nyoo chi ra cahán tuhun Nyoo chihin ñu. ¹⁵ Soco yuhu ni noo chaha ña chiquen cha tahán chi chii. Ta ni ña tyaí tuhun ihya vatyí cuñí cha cuhva ndo cha cuhva ndo chii. Vatyí tatu chiquén cha tahán chi chii, ña si cuñí cahín tuhun Nyoo. Vaha taxin ca cuñí cha cúvi ta ñima ca cha caquen xuhun chi ndo.

¹⁶ Cha cuenda chi yuhu ñima cha cahnu sahá chii cha cahín tuhun Nyoo. Soco vatyí nyaa siqui cha

sacuví. Soco ndahvi cuví yuhu ra ndahvi tatu ma cahin tuhun Nyoo ihya. ¹⁷ Yucuan chaha tatu sacuví chihin cha iyó ñi, cuñihi yahvi. Soco tatu sacuví chihin fuerza, suri cuví chi, vatyí noo tyiño cha tachí maa Nyoo chii tyí sacuví, tahán chi cha sacuví. ¹⁸ Ta tyicuan caa, yahvi cha ñihi, ican cuví cha sii cuñí cahín tuhun ra Cristo. Ta ña chiquén cha tahán chi chii cha cuenda cha cahín tuhun ra.

¹⁹ Vasi ñima musu cuví yuhu. Soco nanduví musu tandihí ñáyivi. Vatyí tyicuan caa saha ganai cuaha ca ñáyivi cuenda ra Cristo. ²⁰ Tatu ñohí nu nyicú ra Israel, nanduví tari maa ra tacuhva vatyí tyasoho ra tuhun cahin. Vatyí cuñi saha ganai chi ra cuenda ra Cristo. Vatyí ra cuan iyó ra cuhva catyí ley ra Moisés. Ta yuhu sacuví tari cuhva catyí ley cuan. Soco ñima ley cuan nyacá ñaha chii. ²¹ Soco tatu cuñí saha ganai chi ñu ña quichahá ley ra Moisés, sacuví tari cuhva sacuví ñu. Vatyí tacuhva saha ganai chi ñu. Soco ley maa Nyoo nyacá ñaha chii vatyí chihin ley ra Cristo chicá noi ta ña cuví cunyacuví cha quiñi caa tari nyacuví maa ñu. ²² Tatu nyaí chihin noo ra cha ta coo vaha ca fuerza Nyoo chii, nanduví tari maa ra, vatyí tacuhva cahan que tuhun Nyoo chihin ra. Ta ndunyeé ca ñi ra chihin tunyee ñi Nyoo. Nanduví yuhu tari cuhva caa noo noo ñáyivi, vatyí tacuhva tyasoho ñu tuhun Nyoo cha cahín ta cacú aña ñu. ²³ Tyicuan caa sacuví tacuhva cuví sacoté tuhun Nyoo chi ñáyivi. Vatyí tacuhva ñihi tumañi ñi cha chahá maa Nyoo chi yo.

²⁴ Chitó ndo vatyí noo sihva cha chinó ñu, tandihí ñu chinó, soco noo ri ñu sahá ganaa. Tyicuan caa tucu maa yo, cuñí chi cha ñihi cunyicon yo chi Nyoo tacuhva sahá ganaa yo nu vaha cha chahá ra chi yo. ²⁵ Tandihí ñu cuahan sihva, sandoo ñu tandihí cha satyoño chi ñu vatyí cuñí ñu sahá ganaa ñu. Ta ñu cuan, cusaha ganaa ñu, soco noo corona numa cha tañi tyehe ri na ityi. Ta yoó nducú yo

cuhva soco cha sahá ganaa yo noo cha ma tiví ca maa. ²⁶ Cha cuenda yuhu ña chinó tondo ri mai, ni ña cañí tahan tondo ri mai. ²⁷ Soco ñihi nyacá ñahi chi coño ñuhi. Ta saniñí quichahí chi Nyoo. Coto suri mai cha yaha sañahí chi inga ra ta ndoí.

10

Nu sañahá ra Pablo vatyí ma tyaa xiin yo Nyoo

¹⁻² Yañi, ña cuñí cha naa ñi ndo cha cuví chi sutu chahnu yo ta cha nahá. Nyoo tyinyee ra chi ñu, ta tachí ra noo vico vatyí cuhun ityi nuu ñu coto cunaa ñu. ñin ri nanduví ñu chihin ra Moisés, ra cuví nuu chi ñu, ta yahá sava ñu tyañuhu. Ta cha tyicuan caa, tari cha condutyá ñu chihin vico cuan ta chihin tyañuhu cuví cuan. ³ Ta tandihí ñu chachí ñu ñin ri nyayu cha chahá maa Nyoo. ⁴ Ta tandihí ñu chihí ñu ñin ri ndutya cha chahá maa Nyoo. Vatyí ndutya cuan tava ra chata noo yuu cha cuahan chihin ñu. Ta yuu cuan ra Cristo cuví. ⁵ Soco vasi nyehe ñu cuaha milagru cha sacuví Nyoo, cuaha ñu ña quichahá ñu tuhun cahan ra chihin ñu. Ta chihí ñu chiqui ndi cuan, ta yucuan ndoo ñu.

⁶ Tandihí tuhun ihya chahá chi noo cuhva chi yo. Vatyí tacuhva ma cuñi yo sacuví yo cha ña vaha tari sacuví ñu cuan. ⁷ Yucuan chaha ma sacahnu nyoho chi xitohyo, tari chinyacuví suhva ñu cuan ta cha naha, tari catyí nu tutu Nyoo tyehe caa: “Ta cachiyo ñu vico, ta cachachí ñu, ta cachihí ñu.” ⁸ Ta ma coo ri maa yo chihin inga ñusihí o chihin inga rayi tatu ñima ñasihí yo cuví, o yí ñu cuví, tari chinyacuví suhva ñu cuan. Ta noo ri quivi chihí oco uñi mil ñu cha cuenda cha chinyacuví ñu cha quiñi caa cuan. ⁹ Ta Sutu Mañi yo cama ñi ra, soco ña tahán chi nducú nyehe yo chi ra. Tari chinyacuví suhva ñu cuan. Ta cachihí ñu cha tyaa coo chi ñu, cha cuenda cha cuñí ñu nducu nyehe ñu chi ra. ¹⁰ Ta ni ma cahan ña vaha ndo siqui Nyoo, tari cahan ña vaha suhva

ñu cuan siqui ra. Ta saquichi ra ángel cuenda ra ta chahñi ra chi ñu.

11 Tandihí ihya cuví chi sutu chahnu yo cha chiyo ta cha naha. Ta chicunyaa chi nu libru Nyoo tari noo cuhva vatyí sacotó ra chi yo cha iyó yo ñayivi ihya vityin, nu cuahán sandihí chi. 12 Ta tyicuan caa tatu tuví iñi maa ndo tyi vaha cuahán ndo chihin Nyoo, ñasaha ndo cuenda coto canacava ndo saha ra ña vaha. 13 Tindoho cha nyehé ndo, cuñi maa ndo tyi noo ri maa ndo nyehé tindoho cuan. Soco inuu ri nyehé tandihí ca ñu. Soco cuví cunyeé iñi ndo chi Nyoo, ta maa ra ma cuhva ra nyehé ndo tindoho cha ma cunyeé ca ndo. Soco tatu chaa tindoho chi ndo, tyicuan ta Nyoo cunducu ra cuhva cha quita ndo chichi tindoho cuan ta cuví cunyeé ndo.

14 Yucuan chaha yañi, ma sacahnu ndo chi xitohyo. 15 Cahín chihin ndo tari cahín chihin noo ra tyihí tuñi iñi. Yucuan chaha saha ndo cuenda cha catyí chi ndo. Ta nyehe ndo tatu ndicha o ña ndicha tuhun cahín chihin ndo. 16 Quivi cha nicohón iñi yo tyi chihí ra Cristo nu cruzi, chihí yo vinu ta chachí yo pan. Ta vinu cuan cuñi chi catyí vatyí ñn ri cuví yo chihin ra Cristo cuenda niñi ra. Ta chachí yo pan ta cuñi chi catyí vatyí ñn ri cuví yo chihin ra cuenda coño ñuhu ra. 17 Vatyí vasi cuaha yo, soco tandihí yo chachí yo noo ri pan. Ta yucuan chaha tandihí yo nduví yo noo ri coño ñuhu ra.

18 ¿Atu nicohón iñi ndo yoso caa iyó ñu Israel? Chachí tucu maa ñu quiiti cha chahá ñu chi Nyoo, ta cha cuenda cha nyacuví ñu cha tyicuan caa, ñn ri cuví ñu chihin cuan. 19 Ñima cha catyí chi ndo tyi vale xitohyo cha sacahnú ñu ña ñohó nuu chi Nyoo. Ña vale, ni ri coño cha chahá ñu chi xitohyo cuan ta ña vale. 20 Soco catyí chi ndo vatyí ñu ña ñohó nuu chi Nyoo chahá ñu cha chahá ñu, soco chi ra ña vaha. Ta ñima chi Nyoo. Ta ña tahán chi cha ndu ñn ri ndo chihin ra ña vaha. 21 Vatyí ma cuví coho yo copa Nyoo ta suri cuhva

cuan ta coho tucu yo copa ra ña vaha. Ta ma cuví cachi yo nu mesa Nyoo. Ta suri cuhva cuan cachi yo nu mesa ra ña vaha. 22 Ma cuhva yo tisihi chi Nyoo vatyí maa ra iyó ca fuerza chi ra ta ñima ca maa yo.

Sacuvi yo ñáá cha sacuvi yo, soco cha cuenda cha vaha chi tahan yo

23 Catyí chi tuhun: “Cuví sacuvi yo ñáá cha cuñi yo. Soco ña tandihí ta cuví chi cha vaha chi yo.” Ta ndicha cuví sacuví yo cha cuñi yo. Soco ña tandihí ta tyinyeé chi chi yo cha cuahnu yo chihin tuhun Nyoo. 24 Ma nanducu yo cha vaha chi maa ri maa yo, soco na nducu tucu yo cha vaha chi inga ñu.

25 Cachi ndo ñáá coño cha xicó ñu nuyahvi. Ta ma ndaca tuhun ndo ta ma ndichi xiñi ndo yóo chi cuenda cuví. 26 Vatyí ñuhu ñayivi ta tandihí cha iyó nuu chi, chi maa Nyoo cuví.

27 O tatu noo ñu ña chinó iñi chi Nyoo, catyí ñu chi ndo cha cucachi ndo vehe ñu, ta tatu cuñi ndo cuhun ndo, cuhun ndo ta cachi ndo tandihí cha chahá ñu cachi ndo. Ta ma ndaca tuhun ndo ñáá cuenda cuví. 28 Soco tatu nya noo ñu catyí ñu chi ndo: “Nyayu ihya nyayu cha chaha cuenda ñu chi xitohyo cuví”, catyí ñu. Ma cachi ca ndo tacuhva cha ma nducuihya cuñi aña ñu cha catyí chi ndo tyicuan caa. 29 Cahín tuhun ihya cuenda inga ñu ta ñima cuenda maa ndo.

Soco yihí ndo catyí ndo: “¿Ñáá tuhun cha sahá xaan ra ihya cuenda chi yuhu cha catyí inga ñayivi?”

30 Tatu nacuhvé tyahvi nyoo chi Nyoo cuhva cha cuacachi, ñáá tuhun catyí inga ra cuan tyi ña vaha cachí”, catyí ndo. 31 Cuacatyí chi ndo tyehe caa, tatu chachí ndo, o chihí ndo, o sacuví ndo ñáá ca cha sacuví ndo, sacuví ndo soco chi maa Nyoo sacahnu ndo chihin cha sacuví ndo. 32 Ta ma cuhva ndo cuhva cha canacavá noo tahan ndo, ni ra Israel, ni ñayivi cha ñima ñu Israel cuví, ni ñu yihí cuenda Nyoo. 33 Tari yuhu, nanduquí cha vaha cuví chi ñayivi. Ña nanduquí

cha vaha chi mai, soco cha vaha chi inga ñáyivi nanduquí. Vatyí tacuhva cacu añima ñu.

11

¹ Cuñí vatyí cunyicon ndo cuhva nyacuví. Tari mai nyiquén cuhva nyacuví ra Cristo.

Yoso caa coo ñusihí nu ndu ñn ri yo

² Yañi, sii xaan cuñí vatyí tyicuan ri nicohón iñi ndo chii. Ta quichahá ndo cha sañahí chi ndo. ³ Soco cuñí tyi coto ndo vatyí ra Cristo cuví xiñi noo noo rayii, ta rayii cuví xiñi ñasihí ra, tari Nyoo cuví ra xiñi ra Cristo.

⁴ Tatu noo rayii, nyasí xiñi ra ta chicán tahvi ra o cahán ra tuhun cha chahá Nyoo chi ra, ticahan nuu chahá ra chi ra cuví xiñi ra. ⁵ Soco tatu noo ñaha síhi ña chasí ña xiñi ña cuhva cha chicán tahvi ña, o cuhva cha cahán ña tuhun cha chahá Nyoo chi ña, tari cha satyá ndii xiñi ña cuví cuan. Ta ticahan nuu chahá ña chi ra cuví xiñi ña. ⁶ Tatu noo ñaha síhi ña chasí ña xiñi ña, vaha taxin ca nacahnya ña tandihí ixi xiñi ña. O tatu cahán nuu ña cha satyá ndii ixi xiñi ña, nacasi ña xiñi ña. ⁷ Ña tahán chi casi rayii xiñi ra. Vatyí cuhva caá Nyoo caa ra, vatyí nyacá ñaha ra chi ñasihí ra, tari nyacá ñaha Nyoo chi ra. Soco noo ñaha síhi chahá ña cha cunyaca ñaha yii ña chi ña. ⁸ Vatyí quiví savaha Nyoo chi rayii, ña savaha ra chi ra chihin yiquí naha ñaha síhi. Soco chihin yiquí naha rayii savaha Nyoo chi ñaha síhi. ⁹ Ta cha catyí rayii, ta chinqo ñaha síhi. ¹⁰ Yucuan chaha ñusihí cuñí chi cunyasí xiñi ñu. Vatyí ican cuan cuví noo seña vatyí nyacá ñaha yii ñu chi ñu. Ta cha cuenda cha vaha chi ángel cuví. ¹¹ Soco tyaa maa Nyoo cuhva vatyí chiñuhú rayii chi ñusihí. Ta chiñuhú ñusihí chi rayii. ¹² Vatyí ndicha ñaha síhi chinqo ña chihin yiquí naha rayii, tari quiví cha sacacu ra chi ña cuví cuan. Soco nya cua nya quiví cuan ta maa ña quichaha sacacu ña chi rayii. Ta nya cua nya vityin ñusihí ta rayii maa Nyoo chaha cha coo ni nduvi tahan ñu.

¹³ Nyehe maa ndo. ¿Atu vaha que-tuví cha ña nyasí xiñi ñusihí ta chicán tahvi ñu chichi vehe ñuhu? ¹⁴ Vatyí cha chitó ndo vatyí ticahan nuu cuví chi rayii tatu nañí xiñi ra. ¹⁵ Soco ñusihí, vaha cha cunañí xiñi ñu vatyí Nyoo chahá ra ixi nañi chi ñu vatyí casi chi xiñi ñu. ¹⁶ Soco tatu yóo cha cuñí cuví yuhu cha catyí tuhun ihya, cuñí chi coto ndo vatyí ni nyuhu ta ni vehe ñuhu Nyoo, ñahri inga costum-bre iyó chi ndi.

Nu sañahá ra Pablo chi ñu vatyí ña vaha cuhva chachí ñu Santa Cena

¹⁷ Yañi, nonga tuhun cuacatyí chi ndo. Vatyí ña sii cuñí chihin ndo, vatyí ndu ñn ri ndo, soco ña chahá chi cha vaha chi ndo. Ta sativí chi chi ndo. ¹⁸ Ta cuaha xaan ñáyivi nacatyí chii vatyí cuhva cha ndu ñn ri ndo cha cuacoo culto, iyó ndo cha tavá sijn ndo chi ndo. Ta suhva ri chinó iñi, ta suhva ña chinó tucu iñi. Soco vasi ndicha. ¹⁹ Vasi cuñí chi coo tisihí nu nyicú ndo tacuhva coto yo nya ndo ndicha cha yihí cuenda Nyoo. ²⁰ Soco tatu tyicuan caa iyó tisihí nu nyicú ndo, ñima Santa Cena chachí ndo cuví cuan. ²¹ Vatyí cuhva cha cuacachi ndo, chachí ri ndo cha nyisó ndo. Ta ña nyatú ndo nya ndu ñn ri tahan ndo. Ta yihí ndo cuaha chachí ndo. Ta chihí ndo chihin vinu. Ta yihí ndo ña ñihí ndihí ndo cha cachi ndo. ²² ¿Atu ñahri vehe ndo cachi ndo ta coho ndo? Vatyí cha nyacuví ndo tyehe caa, ña cuñi nyehé ndo vehe ñuhu Nyoo cuví cuan. Ta chahá ndo ticahán nuu chi ñu ñahri maa iyó chi. ¿Atu tahán chi catyí chi ndo vatyí vaha cuhva nyacuví ndo, cuñi maa ndo? Ña tahán chi tyi ñahri noo cha cachi caa nyacuví ndo.

Ra Pablo chahá ra tuhun chi ñu, ñáá tuhun quehén ñu Santa Cena

(Mt. 26.26-29; Mr. 14.22-25; Lc. 22.14-20)

²³ Vatyí yuhu suri maa Sutu Mañi yo sañaha tuhun ihya chii. Ta suri maa tuhun ihya sañahi chi ndo. Cha cuaa cha ni cumañi ca cuhva cuenda

ra Judas chi Sutu Mañi yo chi ra xaan iñi chi ra, ra Jesús quehen ra noo pan. ²⁴ Ta cha yahá nacuhvá ra tyahvi nyoo chi Nyoo ta tahvi sava ra. Ta catyí ra: “Cachi ndo. Vatyí tari coño ñuhi cuví pan ihya. Ta cha catyí ndo ta cucúvi yuhu. Sacuvi ndo tyehe caa vatyí nicohon iñi ndo chii”, catyí ra Jesús. ²⁵ Ta cha yahá cha cacuxiñi ra ta quehen ra Jesús copa ta catyí ra: “Chihin copa vinu ihya natyihí tahan Nyoo tuhun chaa chihin ndo vityin. Vatyí vinu cha yihí chichi copa ihya, ñiñi cuví. Tahan ri cuacoho ndo, coho ndo cha cuenda cha nicohón iñi ndo chii”, catyí ra Jesús cha cuaa cuan. ²⁶ Ta tahan ri cha ndu ñin ri yo ta chachí yo pan ta chihí yo vinu sacotó yo chi ñáyivi vatyí cha catyí cuatyí yo chihí Sutu Mañi yo. Ta tyicuan caa sacotó yo chi ñáyivi nyacua nya quivi quichi tucu ra.

Ra Pablo chahá ra tuhun chi yo yoso caa sacotó yo Santa Cena

²⁷ Tatu chachí yo pan ta chihí yo vinu noo cuhvá cha ña chitahán iñi Nyoo, chicoó cuatyí yo. Vatyí ña sahá yo ñáyivi coño ñuhu ta ñiñi ra Cristo. ²⁸ Yucuan chaha cuñi chi sahá yo cuenda tatu vaha cuahán yo chihin Nyoo cha ni ri ca cha cumañi cachi yo pan ta coho yo vinu. ²⁹ Vatyí tatu chachí yo ta chihí yo chihin cha ña sahá yo cuenda ñáá tuhun chihí ra Cristo, Nyoo cutachi tuñi ra chi yo. ³⁰ Yucuan chaha cuaha xaan nyoho cuhví ndo, ta ñahri vaha fuerza ndo. Ta yihí ndo cha chihí ndo. ³¹ Soco tatu sahá vaha yo cuenda chi yo, Sutu Mañi yo ma tachi tuñi ra chi yo. ³² Soco tatu Sutu Mañi yo ta tachi tuñi ra chi yo tyicuan caa, vatyí tacuhva ma cunaa yo chihin ñáyivi iyó siqui ñuhu ñáyivi ihya.

³³ Ta tyicuan caa nyoho yañi, tatu cuando ñin ri ndo cha cuacoo Santa Cena, cuatu ndo chi noo noo tahan ndo ta cachi ndo ta coho ndo ñin ri. ³⁴ Soco tatu nya noo nyoho chisocó ndo, cachi ndo nya vehe ndo tacuhva cha ma tachi tuñi Nyoo chi ndo.

Ta inga tuhun cusandaa mai quivi cha quichi nyehi nu nyicu ndo.

12

Cha vaha cha chahá Tatyí Ii Nyoo chiyo

¹ Yañi, cuñi vatyí coto ndo ñáá ndihí cha vaha cha chahá Tatyí Ii Nyoo chi noo noo yo.

² Chitó ndo vatyí quivi cha ña ñoho nuu ndo chi Nyoo, chahá ndo chi ndo cha cunyaca ñaha xitohyo cha ña cuví cahan. ³ Yucuan chaha cuñi tyi coto ndo vatyí tatu noo ra catyí tyi ña vaha ra Jesús, ñima Tatyí Ii Nyoo yihí chi ra. Soco tatu noo ra cha catyí tyi ra Cristo cuví Sutu Mañi yo, Tatyí Ii Nyoo yihí chi ra.

⁴ Siñ siñ cha vaha naquehén noo noo yo, soco maa Tatyí Ii Nyoo ican chahá. ⁵ Siñ siñ cuhva sahá tyiño yo soco tyiño nuu noo ri maa Sutu Mañi yo sacuví yo. ⁶ Siñ siñ tunyee iñi chahá ra chi noo noo yo. Soco noo ri maa Nyoo cuví ra chotyíño chi tandihí yo. ⁷ Chi noo noo yo chahá ra tunyee iñi Tatyí Ii ra, tacuhva tyi tyinyee yo chi tandihí ñu yihí cuenda ra. ⁸ Chi suhva ñu chahá Tatyí Ii Nyoo vatyí cahan ñu chihin cha chiñi tuñi maa ra. Ta chi inga ñu chahá ra cha nacoto ñu ta cahan ñu tuhun cha sacotó Nyoo chi ñu. ⁹ Ta chi inga ñu chahá ra cha chinó vavaha iñi ñu chi ra. Ta suri maa Tatyí Ii ra chahá ra tunyee iñi chi inga ñu vatyí cuví sanduvaha ñu chi ñu cuhví. ¹⁰ Ta chi inga ñu chahá ra tunyee iñi vatyí cuví sacuvi ñu milagru. Ta inga ñu chahá cuenda ñu tuhun cahan Nyoo. Ta chi inga ñu chahá ra vatyí cuví cohon nuu ñu Tatyí Ii Nyoo ta tatyí ña vaha. Ta chi inga ñu chahá ra tunyee iñi ra vatyí cuví cahan ñu inga sahan cha ña chitó ñu. Ta chi inga ñu chahá ra tunyee iñi vatyí cuví nacoto ñu ta nacatyí ñu inga sahan cha cahan tahan ñu. ¹¹ Soco tandihí tuhun ihya, noo ri maa Tatyí Ii Nyoo chahá. Soco siñ siñ cuhva chahá ra chi noo noo yo, yoso cuhva cuñi maa ra.

Chichi cha tandihí yo ta nduví yo noo ri coño ñuhu ra Cristo

¹² Ra Cristo cuví ra tari noo coño ñuhu. Vatyí cuaha cha nyaá chi coño ñuhu. Nyaá xiñi. Nyaá ndaha. Nyaá chaha. Ta chichi cha tandihí cuan nanduví chi noo ri coño ñuhu. ¹³ Ta tyicuan caa tucu tandihí yo, an cuví yo ñu Israel, o ñu Grecia, o ñu iyó chitoho, o ñu yori chitoho, condutya yo vatyí cuví yo noo ri coño ñuhu cuenda ra Cristo. Vatyí noo ri maa Tatyí Ii ra chahá ra tyi quihí chi tandihí yo.

¹⁴ Noo coño ñuhu cuaha xaan cuenda yihí tahan. Ñima minoo ri cuenda. ¹⁵ Tyehe ta cuví cahan chaha yo ta catyí chi: “Yuhu ñima coño ñuhu cuví vatyí ñima ndaha cuví.” Ñima vatyí catyí chi tyicuan caa ta ñima coño ñuhu cuví chi. ¹⁶ O tyehe ta cuví cahan soho yo ta catyí chi: “Yuhu ñima coño ñuhu cuví vatyí ñima chiti nuu cuví.” Ñima tyi catyí chi tyicuan caa ta cusandihí chi cha cuví chi coño ñuhu. ¹⁷ Tyehe ta tandihí coño ñuhu yo cuví chiti nuu yo, yoso caa cuví cuiñi yo. O tyehe ta tandihí coño ñuhu yo cuví soho yo, yoso caa cuví tahni yo. ¹⁸ Soco Nyoo tyaá ra noo noo cuan nu cuñi maa ra. ¹⁹ Tatu ñin cahnu ri caa coño ñuhu yo, ñima coño ñuhu cuví. Ta ña vaha quetuví. ²⁰ Soco vasi cuaha cha nyaá chi yo, vaha quetuví vatyí nyaá tandihí cha cuví coño ñuhu chi yo.

²¹ Tyehe ta cuví cahan chiti nuu yo, ñahri ityi iyó chi chi cha catyí chi chi ndaha yo: “Ña chiñuhú yoho chii.” Ta ni xiñi yo ta ñahri ityi iyó chi chi cha catyí chi chi chaha yo: “Ña chiñuhú yoho chii.” ²² Ña vaha cha catyí chi tyicuan caa. Vatyí vasi luhlu ri noo coño ñuhu yo cha cuñi maa yo tyi ña chiñuhú chi yo, ican cuan cuví cha chiñuhú ca chi yo. ²³ Ta nu cuñi vaha yo, ican cuan sacuihnó vaha ca yo. Ta nu cuñi maa yo tyi ña tyaqui, ican cuan sacuvii ca yo. ²⁴ Ta nu tyaqui ca, ña cuñi chi sacuvii yo. Soco maa Nyoo sandu ñin ri ra coño ñuhu yo, tacuhva vatyí nu cuñi maa yo tyi ña tyaqui, sacahnú ca yo. ²⁵ Tacuhva cha

ma cusin coño ñuhu, tahan tahan chi cuñi chi quihí iñi chi cha catyi inga tahan chi. ²⁶ Tatu suhva coño ñuhu yo nyehé chi tndoho, tandihí ri chi nyehé, ñima noo ri chi. Ta tatu suhva chi cusii cuñi chi, tandihí ri chi ta cusii cuñi chi, ñima noo ri chi.

²⁷ Ta maa yo cuví yo coño ñuhu ra Cristo. Ta suhva suhva coño ñuhu ra cuví noo noo yo. ²⁸ Ta Nyoo cuatyaa ra chi noo noo yo vehe ñuhu tacuhva tyinyeé yo chi tahan yo. Cha xihna ca cuatyaa ra chi ra apóstol. Cha cu uvi, chi ra profeta, o ra cachahá cuenda tuhun cahán Nyoo cuví cuan. Ta cha cu uñi, chi ra casañahá. Ta yaha cuan, ra cha casacuví milagru, ta ra cha casanduvahá chi ñu cuhví, ta ra cha catyinyeé chi ñáyivi, ta ra casa-hacuendá vehe ñuhu, ta ra cha cacahán inga sahan cha ña chitó ra. ²⁹ Ña tandihí yo cuví yo apóstol. Ña tandihí yo cuví yo noo profeta. Ña tandihí yo cuví yo ra sañaha. Ña tandihí yo sacuví yo milagru. ³⁰ Ña tandihí yo chahá Nyoo vatyí sanduvahá yo ñu cuhví. Ña tandihí yo cahán yo inga sahan cha ña chitó yo. Ña tandihí yo cuví nacoto yo ta nacatyí yo ñáa cha cuñi chi catyí noo cha cahán yo chihin inga sahan. ³¹ Ta nducu ndo cuhva naquehen ndo cha vaha ca cha chahá Nyoo. Soco cuasañahi noo ityi cha vaha ca chi ndo.

13

Chahá ra Pablo tuhun chi yo yoso caa tahán chi cha cuñi yo chi ñáyivi

¹ Tatu yuhu ta cuví cahin cuaha ri nuu sahan iyó siqui ñuhu ñáyivi ihya, ta cuví cahan tiqui sahan ángel ñandihí, soco tatu ñahri cha cuñi chi Nyoo ta chi ñáyivi, cuví tari noo tambu cha nañi ri maa o noo caa cha chacú ndaxin ri maa. ² Tatu cuví cuhva cuende tuhun cahan Nyoo, o tatu cutuñi iñi tandihí tuhun xehe ca, ta chité tandihí, ta ña cuñi chi Nyoo ta chi ñáyivi, ñahri maa tuhun. Tatu chinó vavaha iñi chi Nyoo nyacua cuví catyi chi ra na tohon ra noo yucu cuan ta natyaa ra inga ityi, ta sacuví

ra cha chiquén, soco tatu ña cuñí chi Nyoo ta chi ñáyivi, ñahri ra cuví. ³ O tatu cuhve tandihí cha iyó chii chi ñu ndahvi, ta nyacua cuhva cuende ñayivi tyi cayu coño ñuhi, soco tatu ña cuñí chi Nyoo ta chi ñáyivi, ñahri maa tuhun.

⁴ Tatu cuñí yo chi Nyoo ta chi ñáyivi, ña ihñi tisihi yo. Vaha ñáyivi cuví yo. Ña nyiyó iñi yo cha chahá Nyoo chi inga ñu, ña cahnu sahá yo chi yo, ta ña yaá yo. ⁵ Tatu cuñí yo chi Nyoo ta chi ñáyivi, ña quiñi iyó yo. Ña nanducú yo maa ri cha vaha chi maa yo. Ña cuxaán yo. Ña ndoó tisihi añima yo. ⁶ Tatu cuñí yo chi Nyoo ta chi ñáyivi, ña cusii cuñí yo ñáá ndihí cha ña vaha sacuví ñáyivi. Soco cusii cuñi yo cuenda cha vaha ta cha ndicha. ⁷ Tatu cuñí yo chi Nyoo ta chi ñáyivi, cunyeé yo nyehe yo tindoho sahá ñáyivi. Chinó iñi yo tyi cusacuvi ñu cha vaha. Nyatú yo cha nasama ñu cuhva iyó ñu. Chihin cha cama iñi yo ta cunyeé yo tandihí.

⁸ Cha cuñí yo chi Nyoo ta chi ñáyivi ma ndihí maa, soco coo quivi cha ma coo ca tuhun cha sahá yo profetizar. Ta ma cahan ca yo inga sahan cha ña chitó yo, ta tandihí tuhun cha chitó xaan yo cundihí. ⁹ Vityin chiin ri chitó yo ta chiin ri sahá yo profetizar. ¹⁰ Soco quivi quichi ra Cristo, cunduvaha tandihí ta cucoto yo tandihí, ta cundihí tuhun cha chitó yo chiin ri.

¹¹ Quivi cu luhlí cahin ta chica xiñi tari ra cuatyaa. Soco quivi chahni sandoi cha nyacuvi tari ra cuatyaa. ¹² Ta tyicuan caa tucu, cuví yo tari ra cuatyaa vityin. Tari cha nyehé yo nu ino cha ña ndichin vaha. Soco quivi quichi ra Cristo ta cunyehe vaha yo chihin nuu yo chi ra. Chiin ri chitó yo cha vityin. Soco quivi cuan tandihí cuii ta cucoto yo, tari ñohó nuu Nyoo chi yo. ¹³ Iyó uñi tahan cha ma ndihí maa: cha chinó iñi yo chi Nyoo, cha cuatu yo cha ñihí yo cha cuenda ra Cristo, ta cha cuñí yo chi Nyoo ta chi ñáyivi. Soco chichi cha ninduñi tahan

cuan, cha chiñuhú ca chi yo, cha cuñí yo chi Nyoo ta chi ñáyivi.

14

Nu sañahá ra Pablo yoso caa cahán yo inga sahan cha ña chitó yo

¹ Na sañihi yo cuñí yo chi Nyoo ta chi ñáyivi. Ta na nducu yo cuhva naquehen yo tunyee iñi cha chahá Tatyí Ii Nyoo chi yo. Na nducu xihna yo cha cuhva cuenda yo tuhun cahán Nyoo, o sahá yo profetizar cuví cuan. ² Vatyí tatu cahán yo inga sahan cha ña chitó yo, cahán yo soco chihin Nyoo. Ñima chihin ñáyivi. Vatyí ni noo ñu ta ña cutuñí iñi ñu. Vatyí tuhun xehe cuví tuhun cha cahán yo cha cuenda Tatyí Ii Nyoo. ³ Soco tatu sahá yo profetizar, cutuñí iñi ñu. Ta chahnu ca ñu chihin tuhun Nyoo. Ta tyicuan caa sanduní yo ta sandunyeé ca yo iñi ñáyivi. ⁴ Tatu cahán yo inga sahan cha ña chitó yo, maa ri maa yo ndunyeé yo. Soco tatu sahá yo profetizar, ndunyeé cuñi tandihí ñu yihí cuenda Nyoo.

⁵ Yuhu cuñí vatyí tandihí ndo cahán ndo inga sahan cha ña chitó ndo. Soco vaha ca cha saha ndo profetizar. Vatyí tyinyeé ca chi chi ñu nyicú vehe ñuhu ta ñima ca cha cahán yo inga sahan. Soco tatu noo ndo cuví nacoto ndo ñáá tuhun cahán noo tahan ndo chihin inga sahan, ñacatyí ndo. Tyicuan ta cuví tyinyee chi chi tandihí ndo. ⁶ Yucuan chaha yañi, tatu yuhu ta chai nu nyicu ndo, ta cahín inga sahan, ña tyinyeé chi chi ndo. Soco tatu cahín noo cha sanyehé Nyoo chii, o noo cha sacoto ra chii, o noo profesia, o noo cha sañahi chi ndo, tyinyeé chi chi tandihí cuii maa ndo.

⁷ Tatu tiví yo noo cutu, o sacuacu yo noo guitarra ta ña quita vaha ndusu cuan sahá yo, ma coto yo ñáá yaa cuví. ⁸ Ta tatu nu iyó cuatyí ta ña tyacú vaha trompeta, yori coto ñáá cuhva tahan chi cañi tahan ra. ⁹ Ta tyicuan caa yoó, tatu cahán yo inga sahan cha ña cutuñí iñi ñáyivi, ma coto ñu ñáá tuhun cahán yo. Tari cha cuví

yuhu ri maa yo cuví cuan. ¹⁰ Cuaha xaan nuu sahan iyó ñáyiví ihya. Ta noo noo nuu sahan ta iyó iyó ri cha cuñí chi catyí. ¹¹ Soco tatu ña cutuñí iñi sahan cha cahán inga ñáyiví chihin, ma cuví ndatuhin chihin ñu. Ta ñi ri maa ñu ma cuví ndatuhun ñu chihin yuhu. Cuví ñu tari ñu inga ñuu cha cuende. ¹² Yucuan chaha nyoho cha cuñí xaan ndo naquehén ndo tunyee iñi cha chahá Tatyí Ii Nyoo, nducu ndo noo tunyee iñi cha vaha ca cutyinyee chi ñáyiví vehe ñuhu.

¹³ Yucuan chaha nyoho cha cahán ndo inga sahan, çacan ndo chi Nyoo vatyí cuví nacoto ndo ta nacatyí ndo chi tahan ndo. ¹⁴ Vatyí tatu nacuatí chi Nyoo chihin noo sahan cha ña cutuñí iñi, espíritu mai cha yihí chichi coño ñuhi ícan nacuatú soco cha chiñi tuñi xiñi ña cutuñí iñi chi. ¹⁵ Yucuan chaha cuñí chi çacan tahvi chi Nyoo chihin inga sahan. Soco cuñí tucu chi cha çacan tahvi chi ra chihin sahan cha cutuñí iñi. Ta cuñí tucu chi cha cate chihin sahan cha ña cutuñí iñi, Soco cuñí tucu chi cha cate chihin sahan cha cutuñí iñi yo ñandihí. ¹⁶ Vatyí tatu maa maa ri chihin sahan cha chahá Tatyí Ii Nyoo chuun, sacahnún chi ra, ma cutuñí iñi ñáyiví cha ña chitó ñáá cha cuví cuan. Ta ma cuví sacahnu ñu Nyoo chuhun. ¹⁷ Vasí vaha tuhun cahún, cuhva cha nacuhvón tyahvi nyoo chi Nyoo tyicuan caa, soco ña tyinyeeé chi chi inga ñáyiví vatyí ña cutuñí iñi ñu tuhun cahún. ¹⁸ Soco yuhu nacuhvé tyahvi nyoo chi Nyoo vatyí cuaha ca chaha cahin inga sahan ta ñima ca tandihí nyoho. ¹⁹ Soco chichi vehe ñuhu tahan ca iñi cahín vasí ohon tahan tuhun cha cutuñí iñi ndo vatyí sañahi chi inga ndo, ta ñima ca cha cahín uchi mil tuhun cha ña cutuñí iñi ndo.

²⁰ Chahnu cuhva çaca xiñi ndo, yañi. Ta ma lee xaan cuhva caca xiñi ndo. Soco lee cuhva cunyacuví ndo. Vatyí cha lee ña nyacuví chi cha quiñi caa. ²¹ Catyí Nyoo nu libru ley ra tyehe caa: “Cucahin chihin ñáyiví ihya chihin yuhu ñáyiví inga ñuu ta

chihin inga sahan. Cha ña cutuñí iñi ñu. Soco ñi ri tyicuan caa ta ma quichaha ñu chii”, catyí Sutu Mañi yo. ²² Yucuan chaha tuhun cha cahán yo inga sahan cuví chi tari noo seña chi ñu cha ña chino iñi tuhun ra Cristo. Soco tuhun cha sahá yo profetizar, cuví chi cuenda ñu cha chinó iñi chi ra. ²³ Vatyí tatu ndu ñin ri ndo, ta tandihí ndo cahán ndo inga sahan ta quihví noo ñu cha ña yihí cuenda Nyoo, cucatyí ñu tyí ña vaha cuñí xiñi ndo. ²⁴ Soco tatu tandihí ndo sahá ndo profetizar, ta quihví noo ñu cha ña yihí cuenda Nyoo, o noo ñu ña cutuñí vaha iñi tuhun Nyoo, coto ñu tyí iyó cuatyí ñu cha cuenda tyí cutuñí iñi ñu cha cahán ndo. ²⁵ Ta tandihí cha çaa chichi añima ñu cunacoto ñu. Ta nicuiñi chiti ñu ta sacahnu ñu chi Nyoo. Ta catyí ñu vatyí ndicha ndicha cuii cha nyaá Nyoo chihin ndo.

Yoso caa sacóo yo culto minoo cha cachi minoo cha ndaa

²⁶ Yucuan chaha yañi, tatu cuandu ñin ri yo, cuiso noo noo yo yaa cha cata yo, o cha sañaha yo, o ñáá cha sanyehe o sacoto Nyoo chi yo, o cahan yo inga sahan, o cha nacoto yo ta nacatyí yo yoso caa cuahán tuhun inga sahan cuan. Soco tandihí ihya nacuvi chi noo cha chahá tunyee iñi maa Nyoo chi tandihí yo cha yihí yo cuenda ra. ²⁷ Tatu cuacahan yo inga sahan nu ndu ñin ri yo, cuñí chi cahan uvi yo o uñi ri yo, soco noo noo ri yo cahan. Ma cahan yo ñin ri. Ta ñin ri cuñí chi cha nacatyí noo yo tuhun cahán tahan yo. ²⁸ Soco tatu yori cuví nacatyí ñáá tuhun cahán yo, vaha taxin ca ma cahan ca yo chihin inga sahan nu ndu ñin ri yo. Çahan yo inga sahan soco xehe ri chihin Nyoo tacuhva cuiñi ri maa yo. ²⁹ Tyicuan caa tucu tatu sahá yo profetizar, çahan uvi yo, o uñi ri yo. Ta tandihí ca yo saha yo cuenda tatu vaha cha cahán tahan yo. ³⁰ Soco tatu sacoto Nyoo ñáá noo ca tuhun chi inga ñu cha canyicú chiñi tuhun cuan. Tyicuan ta ñu cha xihna ri, cuñí

chi sandihí ñu cha cahán ñu tacuhva cuví cahan inga ñu cuan. ³¹ Ta tyicuan caa tandihí ndo cha naquehén ndo tuhun cha chahá Nyoo chi ndo cuví nacatyí noo noo ndo. Vatyí tacuhva cutuhva tandihí ca ndo ta cuní ca iñi ndo. ³² Ñu cha sahá profetizar cuví cuatu noo ñu nya ndihí cahán inga ñu. Vatyí noo ri Nyoo cuví ra cha nyacá ñaha chi noo noo yo. ³³ Vatyí Nyoo cachi iyó ra ta ña iñi ndaa iñi noo nyacuví ra.

Quehen ndo cuhva vaha nyacuví inga hermano nu ca ndu ñn ri ra. ³⁴ Ñusihí taxi ri na coo ñu. Cuñí chi quichaha ñu chi yí ñu tari catyí ley Nyoo. ³⁵ Tatu ñáá cha cuñí ñu coto ñu, na ndaca tuhun ñu chi yí ñu nya vehe ñu. Vatyí ña vaha quetuví cha cahán ñusihí nu ndu ñn ri yo.

³⁶ Tatu sñn cuhva chicá xiñi ndo, cuñí chi nicohón iñi ndo vatyí ñima chihin ndo quichaha tuhun Nyoo. Ta ñima nyoho ri naquehén tuhun Nyoo. ³⁷ Tatu nya noo ndo cuñí maa ndo vatyí profeta cuví ndo, o tatu cuñí maa ndo tyi Tatyí li saquehén ityi ra chi ndo, cunacoto ndo vatyí cha catyí chi ndo ihya, mandamiento Sutu Mañi yo cuví. ³⁸ Soco tatu ña cuñí ndo naquehén ndo tuhun ihya, ni nyuhu ta ma naquehen ndi tuhun cahán ndo.

³⁹ Ta tyicuan caa yañi, na nducu ndo cuhva saha ndo profetizar. Ta ma casi ndo cha cahán ñu inga sahan. ⁴⁰ Soco sacuvi ndo tandihí chihin cha ndaa ta chihin cha cachi.

15

Yoso caa nandoto ra Cristo

¹ Vityin yañi, cuñí vatyí nicohon iñi ndo tuhun ra Cristo, cha sacacú chi yo, cha cahin nuu ndo quiví cuan. Ta ican naquehen ndo ta ñi iñi ndo chinó iñi ndo. ² Ta suri cha cuenda tuhun ra Cristo cacú añima ndo tatu cuahán ndo tari cuhva sañahí chi ndo. Soco tatu natyihí caxiin ndo cuahan ndo, ñahri maa tuhun cha chinó iñi ndo chi Nyoo.

³ Cha xihna ri sacote tuhun cha cuhve chi ndo. Ta sañahí chi ndo vatyí

ra Cristo chihí ra cha catyí cuatyí yo, tari catyí nu libru Nyoo vatyí cucuvi. ⁴ Tyicuan ta chicuchí ñu chi ra. Soco nu ndu uñi quiví nandoto ra tari catyí tucu nu libru Nyoo. ⁵ Tyicuan ta tuví ra Cristo nuu ra Pedro ta yaha cuan ta nuu ndi uchi uvi tahan ra chicá tyiño ra. ⁶ Yaha cuan ta noo chaha tuví ra nuu yaha ca ohon cientu yañi yo. Ta cuaha ca ñu cuan iyó ca ñu vityin. Soco suhva ñu cha yaha chihí ñu. ⁷ Yaha cuan ta tuví ra nuu ra Jacobo. Yaha cuan ta nuu tandihí ra apóstol.

⁸ Ta nu ndihí tuví tucu ra nuu yuhu, cha cuví tari noo ra cuatyaa cha cacu ta ta chaa ca yoo cacu. (Vatyí ta cutuñi ca iñi tuhun Nyoo cuví cuan.) ⁹ Vatyí cha nuu tandihí ca ra apóstol cuví yuhu noo cha ñima ri tuhun. Ta ni ña nañé cha cuví apóstol vatyí chicá nyicon xain chi ñu ñohó cuenda Nyoo. ¹⁰ Soco Nyoo vaha xaan ñáyiví cuví ra chihin. Ta ñima cha caha ri saha ra tumañi iñi chii cha cuví noo ra chicá tyiño ra. Ta ñihi ca sahá tyiñe ican saha inga ra. Soco ñima mai sahá tyiñe vatyí maa Nyoo nyaá chihin. Ta ican ra sacuví tandihí cuan. ¹¹ Soco ñahri saha, an yuhu, an inga ra cuan. Soco tuhun cahán ndi chihin ndo, ican ihya cuví tuhun cha chinó iñi ndo.

Nu sañahá ra Pablo vatyí cha ndicha cuví vatyí cunandoto ñu ndiyí

¹² Tatu cahán ndi tuhun cha nandoto ra Cristo mahñu ñu ndiyí chihin ndo, ¿ñáá tuhun cha yihí ndo catyí ndo vatyí ma nandoto ñu ndiyí? ¹³ Vatyí tatu ma nandoto ñu ndiyí, ni ri ra Cristo ta ña nandoto ra cuví cuan. ¹⁴ Tyehe ta ña nandoto ra Cristo, tuhun cha cahán ndi chihin ndo ñahri maa vale. Ta ni ri cha chinó iñi ndo, ñahri maa tuhun. ¹⁵ Tatu tyehe ta ña ndicha cha sanandoto Nyoo chi ra Cristo, cuví ndi noo ra cuendu tyi catyí ndi vatyí sanandoto Nyoo chi ra. Ta tatu ña ndicha cha nandoto ñu ndiyí, ña ndicha cha sanandoto Nyoo chi ra Cristo. ¹⁶ Vatyí tyehe ta ma nandoto ñu ndiyí, ni ri ra Cristo ta ña

nandoto ra. ¹⁷ Ta tatu ña nandoto ra Cristo, ñahri maa tuhun cha chinó iñi ndo cha sandachí ra cuatyí ndo. Ta tacuhva iyó ri maa cuatyí ndo. ¹⁸ Ta ñu yihí cuenda ra ta cachihí ñu, cuanaa ri maa ñu cuví cuan. ¹⁹ O tyehe ta ihya ri ñayiví tyinyeé ra Cristo chi yo, ta ma nandoto yo quiví quichi ra, cuví yo noo ñu tondo cha nuu tandihí ca ñáyiví.

²⁰ Soco chitó vaha yo vatyí cha ndicha cuví cha nandoto ra Cristo. Ta ican ra cuví cha nandoto xihna ca mahñu ñu ndiyí. ²¹ Vatyí cha catyí cuatyí ra Adán ta chicoó tuhun chihí. Yucuan chaha tahán chi cúvi yo. Soco cha catyí cha nandoto ra Cristo tahán chi nandoto tucu ñu yihí cuenda ra. ²² Ta tari tandihí ñáyiví chihí cha cuenda ra Adán, tyicuan caa tucu cunandoto tandihí ñu cuenda ra Cristo. ²³ Soco noo noo yo cunandoto yo quiví tahan chi chi yo. Xihna ca ra Cristo nandoto. Yaha cuan ta quiví quichi tucu ra inga chaha cunandoto tucu ñu yihí cuenda ra. ²⁴ Yaha cuan ta cundihí tuhun ñuhu ñayiví ihya ta ma cunyaca ñaha ca ra cuví tyiño nahnu, ta tatyí ña vaha. Vatyí ra Cristo cuatinyaa ra fuerza chi ra cuan. Ta cunacuhva cuenda ra chi Nyoo Sutu ra. ²⁵ Vatyí ra Cristo cunyaca ñaha ra nyacua nya quiví cuhva Nyoo cha cuví chasaha ra chi tandihí ra xaan iñi chi ra. ²⁶ Ta nya nu ndihí, cusanaa ra tuhun chihí. ²⁷ Vatyí cha yaha nacuhva cuenda Nyoo tandihí chi ra Cristo vatyí cunyaca ñaha ra. Soco nu catyí chi vatyí tandihí natyaa Nyoo ndaha ra, cuñí chi catyí vatyí ma cunyaca ñaha ra chi maa Nyoo vatyí ican maa Nyoo natyaa tandihí cuan ndaha ra. ²⁸ Soco quiví saha ganaa ra Cristo tandihí, tyicuan ta maa ra cha cuví ra Sehe Nyoo, cunacuhva cuenda ra tandihí chi Nyoo Sutu ra. Vatyí Nyoo cucuvi ra Nyoo cuenda tandihí maa cha iyó.

²⁹ Tatu tyehe ta ña nandotó ñu chihí, ¿ñáá tuhun yihí ñu condutyá ñu tyiño nuu ñu chihí?

³⁰ Ta tyicuan caa tucu mai, tatu

ma nandote, ¿ñáá tuhun ndoi vaha cha ndi quiví nyatí tuhun chihí?

³¹ Tandihí quiví nyatí tuhun chihí. Soco ñahri caa vatyí síi cuñi chihin ndo. Vatyí chinó iñi ndo chi Sutu Mañi yo Jesucristo. ³² Ñáá ri tuhun nyehí tindocho ñuu Éfeso tatu tyehe ta ma nandoto ca yo. Vaha taxin ca sacuvi yo tari catyí ñáyiví: “Na cachi yo, na coho yo vatyí tyaan isa cúvi yo”, catyí maa ñáyiví cha ña chitó.

³³ Ma cuhva ndo cha sandavi ñaha ñu chi ndo. Vatyí iyó tucu tuhun cha catyí: “Tatu ñu tahan yo quiñi iyó ñu, cuví sativí ñu cuhva vaha cuahan yo.”

³⁴ Saha ndo cuenda cuhva iyó ndo. Ta ma sacuvi ca ndo cha quiñi caa. Vatyí chihin cuhva iyó suhva ndo chité tyi ña ñohó nuu ndo chi Nyoo. Catyí chi ndo tyehe caa vatyí nacao ticahan nuu nuu ndo.

Nu sañahá ra Pablo yoso caa cusanandoto Nyoo chi yo quiví quichi ra Cristo

³⁵ Soco yihí ndo ndacá tuhun ndo: “¿Yoso caa cunandoto ñu chihí? ¿Ñáá coño ñuhu cucuiso ñu?” ³⁶ ¡Tondo xaan xiñi ndo! ¿Atu ña chitó ndo vatyí tatu tachí yo noo chiti yutun, cuñí chi cha tyahyu soo chiti cuan? Tyicuan ta cañá noo yutun. (Chihí chiti cuan tacuhva na coo yutun cuan ñayiví.) ³⁷ Vatyí cha tachí yo ñima maa tun tachí yo. Soco chiti tun, an cuví ri nuñi, o trigo, o ñáá ndihí ca chiti. ³⁸ Ta cha cañá cuan Nyoo sacuví ra yoso cuhva cuñí maa ra chi noo noo cha cañá cuan. Vatyí siin siin cuhva caa noo noo nuu chiti. ³⁹ Ta tyicuan caa tucu tandihí coño ñuhu, ña siin ri caá chi. Siin caa coño ñuhu ñáyiví. Siin caa coño ñuhu cuiñi. Siin caa coño ñuhu saa. Siin caa coño ñuhu tiyaca. ⁴⁰ Ta tyicuan caa tucu cha iyó andiví. Siin caa cha iyó yucuan. Ta siin caa tucu cha iyó ñuhu ñayiví ihya. Ta cha iyó nya andiví tyaqui xaan, ta cha iyó siqui ñuhu ñayiví tyaqui tucu cuan soco siin caa. ⁴¹ Cha ndichin ñanyii, ña inuu ri chihin cha ndichin yoo. Ta ña inuu ri chihin cha ndichin tiño.

Ta tiñoo ña inuu ri chihin inga tucu tiño. ⁴² Ta tyicuan caa tucu tuhun cha nandoto yo. Vatyí chicuchi yo noo coño ñuhu yo cha tuhva tyahyu. Ta cunandoto yo soco chihin noo cha ma cúvi ca maa. ⁴³ Chicuchi yo noo cha numi ri tyahyu. Soco cunandoto noo cha tyaquí. Tyíhi yo noo coño ñuhu pehe chichi ñuhú. Ta cunandoto noo cha nyee. ⁴⁴ Vatyí chicuchí yo coño ñuhu yo cuenda ñayiví ihya chichi ñuhu. Ta cunandoto noo cha ñima ca cuenda ñayiví ihya cuví, soco cuenda Nyoo andívi. Tatu iyó coño ñuhu yo ñayiví ihya. Suri coo tucu noo cha ñima ca cuenda ñuhu ñayiví, soco cuenda andívi.

⁴⁵ Catyí tuhun Nyoo vatyí ra Adán ra cha chiyo cha xihna ri, chahá Nyoo ñayiví coo ra. Soco ra Adán cu uvi, ra cuví Cristo, cuví ra Tatyí li ta chahá ra noo ñayiví cha ma naa ca maa chi yo. ⁴⁶ Yucuan chaha, cha xihna ri tahán chi coo yo chihin coño ñuhu cuatyí yo. Ta yaha cuan ta coo yo cuenda Tatyí li Nyoo. ⁴⁷ Rayíi cha chinqo cha xihna ri, chihin ñuhú chinqo ra. Ra cuenda ñuhu ñayiví cuví ra. Ta rayíi cu uvi cha cuví Sutu Mañi yo, ra cuenda andívi cuví ra. ⁴⁸ Tandíhi yo nyisó yo coño ñuhu cha chinqo chihin ñuhú, tari coño ñuhu ra Adán. Ta cha cucuiso yo andívi cuví chi tari nyisó ra Cristo ra quichí nya andívi. ⁴⁹ Tari ndacú yo chi rayíi, ra cha chinqo chihin ñuhú, tyicuan caa tucu cundacu yo chi ra Cristo ra quichí nya andívi.

⁵⁰ Ta cuñí catyí chi ndo yañi, vatyí coño ñuhu yo ma cuví quíhví chi andívi nu nyacá ñaha Nyoo. Noo cha tañi tyehe ri tiví ma cuví quíhví noo nu ña tiví. ⁵¹ Soco cuñí tyi coto ndo noo tuhun xehe cha yori maa chitó. Vatyí ña tandíhi yo cucúvi yo. Soco tandíhi yo ta cunasama cuhva caa yo. ⁵² Ta ñin yaha cuii ri, tari noo cha ndahvá nuu ri yo, nu ndíhi tiví ángel trompeta. Vatyí cutíví ángel trompeta ta ñu ndívi cunandoto ñu cha ma cúvi ca maa ñu. Ta Nyoo cunasama cuhva caá ñu. ⁵³ Vatyí cuñí chi tyi nasama Nyoo coño ñuhu yo chihin noo cha ma

naa ca maa. ⁵⁴ Ta quívi cuan nasama coño ñuhu yo ta quehen yo cha ma tiví maa. Cua cuví tari catyí nu libru Nyoo tyehe caa:

“Nyoo cuví chasaha ra chi tuhun chíhi.”

⁵⁵ Yoho, Tuhun Chíhi, ¿nya nyaa tunyee íñi chuun vityin vatyí cahñun chi ndi?

¿Nya nyaa cha cua saha ganaun vityin, yoho Tuhun Chíhi?

⁵⁶ Vatyí cuatyí yo ican chahá cha cahñi tuhun chíhi chi yo. Ta ley chahnu, ican cuví cha chahá fuerza chi chi. ⁵⁷ Soco tyahví nyoo chi Nyoo, yañi. Vatyí sahá ganaa yo síqui cuan cha catyí Sutu Mañi yo Jesucristo.

⁵⁸ Yucuan chaha yañi, na cuinanyaa yo chihin Nyoo chihin cha ñi íñi yo. Tyicuan ri na saha tyiño yo nu tyiño Sutu Mañi yo. Vatyí tyiño sahá yo chihin Sutu Mañi yo, ñima cha sahá tyiño caha ri maa yo cuví.

16

Chahá ra Pablo tuhun chi ñu Corinto yoso caa tyinyee ñu chi tahan ñu cuenda Nyoo

¹ Ta tuhun cha tyinyeeé ndo xuhun chi ñu ndahvi, ñu yíhi cuenda Nyoo. Cunyacuvi ndo tari catyí chi ñu nyicú tandíhi vehe ñuhu ityi Galacia. ² Ma cuatu ndo nya quichí ta cuhva ndo xuhun. Soco tahan tahan nu ndíhi vitya ri ta tyíhi sñin ndo cha tahán chí cuhva ndo chi ñu, yoso cuhva cha chahá Nyoo chi ndo. ³ Ta quívi cha quichí, cutachi nya ra cha cuñí maa ndo vatyí cunyaca ra xuhun cuan chihin carta chi tahan yo cha canyicú nya Jerusalén. ⁴ Ta tatu tahan tucu chí cuhin, cuhun coyo ra chihin.

Yíhi íñi ra Pablo nya ndíhi nu cuhan ra tuhun ra Cristo

⁵ Cuhin nu nyicu ndo Corinto chiña, soco cuhun xihne ityi Macedonia. Vatyí ityi cuan cuyahi. ⁶ Ta tatu chahá chí cuhva cundoí chihin ndo nyacua nya yahá yoo vichin. Tyicuan ta cuví tyinyeeé ndo chiin chíi ta cuhin inga ñuu. ⁷ Ña cuñí cha ñin yaha ri yahi nu nyicu ndo. Vatyí

cuñí ndoi suhva quiví chihin ndo tatu Sutú Mañi yo ta cuñí ra. ⁸ Soco cunyai ñuu Éfeso ihya, nyacua nya yaha quiví cha sanducahnú ñu Israel vico Pentecostés. Tyicuan ta quichi nu nyicu ndo. ⁹ Cundoí suhva ihya vatyi vasi cuaha xaan ñáyiví ña cuñí nyehe ñu tuhun Nyoo, soco chahá xaan chi cuhva cahín tuhun Nyoo chihin ñáyiví ñuu ihya.

¹⁰ Tatu chaa ra Timoteo, na cunyaa ra chihin ndo. Ta vaha tyiñuhu ndo chi ra. Vatyi sahá tyiño tucu maa ra cuenda Sutú Mañi yo tari mai. ¹¹ Ta vaha ço iñi ndo nyehé ndo chi ra. Ta tyinyee ndo chiin chi ra tyi quichi ra nu nyaí. Vatyi nyatí chi ra chihin inga yañi yo.

¹² Ta yañi yo, ra Apolos, chacu ndahvi xain nuu ra nacuhun ra chihin inga yañi yo nu nyicu ndo. Soco ña cuñí ra. Soco cuhun maa ra nacuhva chi cuhva chi ra, na.

Chahá ra Pablo nocumi chi tandihí ñu yihí cuenda Nyoo ñuu Corinto

¹³ Sañihi ndo chinó ca iñi ndo chi Nyoo. Ta cuní iñi ndo ta naco vaha fuerza Nyoo chi ndo. ¹⁴ Tandihí cha sacuví ndo, sacuvi ndo cha cuenda cha cuñí ndo chi Nyoo ta chi tahan ndo.

¹⁵ Chitó ndo yañi vatyi ñáyiví chi ra Estéfanos xihna ca ñu chinó iñi tuhun ra Cristo ityi Acaya chiña. Ta vityin sacuví ñu tyiño nuu ra hermano. ¹⁶ Ta catyí chi ndo vatyi saha ndo ñáyiví chi ñu cha iyó tari iyó ñu chiña, ta chi tandihí ñu cha tyinyeé ta sahá tyiño cuenda Nyoo. ¹⁷ Ta cusí xaan cuñi cha quichí coyo ra Estéfanos ta ra Fortunato ta ra Acaico. Vatyi maa ra catyinyeé ra chi ndi. Vatyi tandihí ndo ña cuví quichi ndo vatyi cañi xaan ñuu ndo. ¹⁸ Soco maa ra quichí coyo ra. Ta sandunyeé ca ra iñi chihin tuhun Nyoo. Tari sanduní ra iñi nyoho ñandihí. Ta vaha ço iñi ndo nyehé ndo tyiño casacuví ra. Vatyi maa ra ñu ri chi Nyoo canyicón ra.

¹⁹ Ta vachí nocumi chi ndo sahá tandihí yañi yo ta tahan yo cha ndu ñu ri ityi Asia ihya. Ta vachí tucu nocumi

chi ndo sahá ra Aquila ta cu Priscila, ta ñu yihí cuenda Nyoo cha ndu ñu ri vehe ñuhu nu cuví vehe ñu. ²⁰ Vachi nocumi chi ndo sahá tandihí yañi yo, ta nacuhva maa ndo nocumi chi noo noo ndo nu nyicú ndo chiña.

²¹ Nocumi cha vachí chi ndo ihya, yuhu ra Pablo tyaj chihin ndahi.

²² Tatu nya ñáyiví ña cuñí chi Sutú Mañi yo Jesucristo, nacuhun ñu anyaya. Soco yuhu catyí: ¡Sutú Mañi yuhu, ñaha!

²³ Ta nasoco Sutú Mañi yo Jesucristo chi tandihí ndo. ²⁴ Ta catyí chi ndo vatyi yuhu cuñí chi tandihí ndo cha cuenda ra Cristo Jesús. Ta nacuví chi tyicuan caa.

Carta Cha Cu Uvi Sacuhun Ra Apóstol Pablo Chi Ñáyivi Ñuu Corinto Cha Yihí Cuenda Nyoo

Nu sacuhún ra Pablo noo tutu chi ñu ñuu Corinto cha yihí cuenda Nyoo

¹ Yuhu ra Pablo, cuví noo ra apóstol ra Jesucristo vatyi Nyoo nacachi vaha ra chii. Ta yuhu ta ra Timoteo yañi yo tyaá ndi noo tutu ihya chi ndo cha cuví ndo ñáyivi ñuu Corinto cha yihí cuenda Nyoo, ta chi tandihí ñu yihí cuenda Nyoo nicacahnu ityi Acaya chiña. ² Nyoo Sutu yo ta Sutu Mañi yo Jesucristo na nasoco ra chi ndo ta nacuhva ra cha taxi ri coo añima ndo.

Nu chicá noo ra Pablo sacotó ra tuhun ra Cristo nyehé xaan ra tindoho

³ Na sacahnu yo chi Nyoo Sutu Sutu Mañi yo Jesucristo. Vatyi ican ra cuví Nyoo Sutu yo. Ta cundahvi xaan cuñi ra nyehé ra chi yo. Ta maa ra tyicuan ri naquehén ndahvi ra chi yo. ⁴ Ta cuhva cha nyehé yo tindoho maa ra naquehén ndahvi ra chi yo. Vatyi tyicuan caa ta cuvi naquehen ndahvi tucu maa yo chi ñu nyehé tindoho tari naquehén ndahvi tucu maa ra chi yo. ⁵ Vatyi cha cuenda ra Cristo, nyehé xaan ndi tindoho ta suri cha cuenda ra Cristo naquehén ndahvi xaan Nyoo chi ndi. ⁶ Tatu nyehé ndi tindoho cha cuenda cha sacoto ndi tuhun ra Cristo chi ndo, soco cha cuenda cha vaha chi ndo cuví vatyi tyicuan ta Nyoo naquehen ndahvi tucu ra chi ndo, ta sacacu ra chi ndo. Ta tatu Nyoo ta sandunyeé ra iñi ndi, cuví tucu chi cha cuenda cha sandunyeé tucu ra iñi maa ndo ta cacu ndo, ta sñn ri tacuhva cha cunyeé ndo tindoho cha nyehé ndo. Vatyi ñn ri tindoho nyehé yo. ⁷ Vatyi chitó vaha ndi tatu nyehé ndo tindoho cha cuenda ra Cristo tari cha nyehé nyuhu, maa ra cunaquehen ndahvi

ra chi ndo, tari naquehén ndahvi tucu ra chi nyuhu.

⁸ Yañi, cuñi ndi tyi coto ndo vatyi cuaha xaan tindoho nyehé ndi ta chinyaa ndi ityi Asia. Ñihi xaan chiyo tindoho nyacua cha ñahri ca fuerza ndi cahvi iñi ndi. Ta tyaá ndi cuhva vatyi cha yaha chihí ndi ta quita ndi yucuan. ⁹ Cuñi maa ndi vatyi cha cha cuacúvi ndi. Ta ña cuví sacacu ndi chi ndi. Soco yucuan sañaha chi chi ndi na nachinó ca iñi ndi chi Nyoo ra sanandotó ndiyi. ¹⁰ Nyoo sacacu ra chi ndi ndaha tuhun chihí quivi cuan, ta sacacú ca ra chi ndi nya vityin. Ta chitó ndi vatyi tyicuan ri cusacacu maa ra chi ndi. ¹¹ Tatu tyinyeé ndo chi ndi chihin cha chicán tahvi ndo chaha ndi, ta tatu cuaha ñáyivi chicán tahvi chaha ndi, cunacuhva ñu tyahvi nyoo chi Nyoo cha cuenda tyi ñihí ñu tuhun tyi Nyoo chahá ra cha vaha chi ndi, vatyi chicán tahvi ñu chaha ndi.

Nu nacatyí ra Pablo ñáá tuhun ña chaq ñaha ra ñuu Corinto

¹² Iyó noo tuhun cha cusii xaan cuñi ndi, vatyi yoso ri sandaví ñaha ndi. Vatyi cachi cuhva iyó ndi. Ta ndaa cuhva iyó ndi xihna ca chihin tandihí ri ndo, ta chihin inga ñáyivi ñandihí. Ta ñima chihin cha chiñi tuñi maa ndi iyó ndi tyehe caa, soco cha cuenda tyi tyinyeé xaan maa Nyoo chi ndi. ¹³⁻¹⁴ Ta nu tutu cha sacuhún ndi chi ndo, maa maa ri tuhun cha cuví sacuaha ndo, ta cha cuví cutuñi iñi ndo, tyaá ndi. Vityin cuahán cutuñi iñi ndo suhva. Ta nyatú ndi na cutuñi vaha ca iñi ndo tandihí tuhun cuan. Tacuhva cusii cuñi ndo chihin ndi quivi quichi Sutu Mañi yo. Ta cusii cuñi tucu maa ndi chihin ndo.

¹⁵⁻¹⁶ Ta cha cuenda cha cusii iñi yo tyehe caa, tyaj cuhva quivi cuan cha cuhun xihne nu nyicú ndo. Yihí iñi cha cuhin nu nyicú ndo, quivi cha yahí cha cuahín nya Macedo-
nia ihya. Ta quivi cha nayaha tiqui cha chahin Macedonia, cuhin inga chaha nu nyicú ndo. Tyicuan caa ta cuvi cusii iñi ndo chihin yuhu uvi chaha, tyaj cuhva. Ta tyicuan caa

ta cuvi tyinyee ca ndo chii ta cuhin ityi Judea. ¹⁷ O cuñí maa ndo vatyí ña tyají cuhva cha cuhin nu nyicu ndo. Ta vasi cuñí maa ndo vatyí sacuví tari ñáyiví iyó siqui ñuhu ñayiví ihya. Vatyí catyí ñu tyi cuhun ñu, ta ña sacuví ñu. ¹⁸ Maa Nyoo chitó ra vatyí ndicha cha cahín. Ta ña tuhvé sandavi ñahi. ¹⁹ Vatyí yuhu ta ra Silvano ta ra Timoteo cahán ndi chihin ndo. Vatyí tuhun maa ra Cristo maa maa ri tuhun ndicha cuví. ²⁰ Tyi cha cuenda maa ra ñihí yo tandihí cha vaha cha catyí Nyoo tyi cucuhva ra chi yo. Yucuan chaha cuhva cha sacahnú yo chi Nyoo, o chicán tahvi yo chi ra, catyí yo: “Amén”. Vatyí chitó yo tyi cuacuhva ra cha vaha chi yo cha cuenda ra Cristo. ²¹ Ta Nyoo sanduní ca ra iñi yo nu sandu ñin ri ra chi yo chihin ra Cristo. Ta nacachí ra chi yo. ²² Ta tari cha tyaa ra tuñi ra chi yo cuví cuan. Vatyí chaha ra Tatyi li ra quihí aña yocha cuenda cha cuñihi ca yo ñáa ca cha cucuhva ra chi yo.

²³ Na naquehen Nyoo chii vityin ri tatu ña ndicha tuhun cua catyí chi ndo. Ta cuhun que nu nyicú ndo Corinto chiña vatyí tatu cuhin tyají cuhva cha cahin chiin chi ndo. Yucuan chaha ña cuñí ñahi cuhin vatyí nacuaan iñi nyehí chi ndo. Ta Nyoo chiñí ra vatyí ndicha cha cahín. ²⁴ Ñima cha cuñí ndi cunyaca ñaha ndi chi ndo yoso cuhva chinó iñi ndo chi Nyoo. Vatyí chinó vaha iñi ndo. Soco cha cuñí ndi tyinyee ca ndi chi ndo na coo ca tusí iñi maa Nyoo aña ndo.

2

¹ Yucuan chaha ña cuñí quichi tiqui nu nyicu ndo coto cuhva que tucuihya iñi chi ndo. ² Vatyí tatu yuhu ta sanducuihyé iñi ndo, yori ca cuví sandusí iñi mai. Vatyí ma cuví ca sandusí ndo iñi tatu cha yaha sanducuihyé iñi ndo. ³ Yucuan chaha sacuhin tuhun cuan chi ndo. Vatyí tatu cuhin soco ma sanducuihya ndo iñi chihin cuhva iyó ndo. Vatyí tahán

chi sandusí ndo iñi. Ta tatu sí cuñí yuhu, chité tyi tandihí yo ta cusí iñi yo. ⁴ Quiví cha tyají carta cuan chi ndo, chica xaan xiñi. Ta nducuihya xaan iñi nyacua chaqui. Soco ñima cha sacuhin carta cuan chi ndo vatyí cuñí cha nducuihya iñi ndo. Soco vatyí coto ndo vatyí yaha xaan cuñí chi ndo.

Nu chahá ra Pablo tuhun chi ñu yoso caa saha ñu ticahnu iñi

⁵ Tucuihya iñi cha chaha ra chiña, ñima ñin ri chi yuhu chaha ra. Chaha tucu ra chiin chi tandihí nyoho ñandihí. Catyí tyehe caa tacuhva cha ma yaha xaan cahín. ⁶ Vaha ri, cha iyó vaha. Ma cahan ca ndo chi ra. Ma tachi tuñi ca ndo chi ra. ⁷ Ta vityin tahán chi vatyí saha ndo ticahnu iñi chi ra. Ta naquehén ndahvi ndo chi ra, coto yaha xaan nducuihyá iñi ra. ⁸ Yucuan chaha catyí chi ndo saña ndo cha cuñí ndo chi ra. ⁹ Sacuhin carta cuan chi ndo quiví cuan vatyí cuñí cote tatu sacuví ndo cuhva chahí chi ndo. ¹⁰ Ta vityin tatu sahá ndo ticahnu iñi, sahá tucu yuhu ticahnu iñi yóo cha chahá tisihi chi yo. Tatu ndicha cha chahá ra tisihi chii. Soco sahi ticahnu iñi chi ra cha cuenda cha vaha chi nyoho. Vatyí yucuan cuhva cuñí maa ra Cristo. ¹¹ Vatyí chitó yo vatyí tatu ma saha yo ticahnu iñi chi tahan yo, cuhna cutyihí ra cha quiñi caa aña yocha. Vatyí maña xaan ra. Ta cuví sacañi tahan ra chi yo.

Ña ndoo ra Pablo ñuu Troas vatyí ña nañihí ra chi ra Tito

¹² Quiví chají ñuu Troas cha cuacahin tuhun ra Cristo, chahá chi cuhva cha sahá tyiñe tyiño nuu Sutu Mañi yo yucuan. ¹³ Soco ña sí maa cuñi añime. Vatyí ña nañihí chi yañi yo, ra Tito. Yucuan chaha ña ndoo que ñuu cuan cahin chihin ñu. Ta vachi ityi Macedonia ihya.

Cahán ra Pablo tuhun ra Cristo chihin cha ñi iñi ra

¹⁴ Soco tyahvi nyoo chi Nyoo vatyí tyicuan ri sahá ganaa yo chihin fuerza ra Cristo Jesús. Vatyí sacotó yo tuhun ra chi ñáyiví. Ta tuhun ra

cha cahán yo, cuví chi tari noo xico vixi chahan cha cañá tandihí ri ityi nu cuahán yo. ¹⁵ Ta yoó cuví yo tari noo xico vixi cha chahá cuenda ra Cristo chi Nyoo. Ta cañá xico cuan mahñu ñu cha cucacu añima, ta mahñu ñu cha ma cacu añima ñandihí. ¹⁶ Soco cha cuenda ñu cha ma cacu añima cuan, quiñi chahán, tari noo xico ndiyi cuví tuhun cha sacotó yo chi ñu, cuñí maa ñu. Vatyí sacotó yo yoso caa cucuvi ñu vatyí ña chinó iñi ñu chi ra Cristo. Soco cha cuenda ñu cha cacú añima, vixi xaan chahán, Vatyí sacotó yo yoso caa coo ñu ñayiví cha ma naa ca maa. Soco ¿yoó cha cuví sacuvi tyiño ihya? ¹⁷ Nyuhu ña sacuví ndi tari sacuví cuaha ra cachicá noo. Ra cuan cuñí ra xuhun. Tuhun ra Cristo ñima noo cha xicó yo cuví. Soco cahán ndi chihin cha ñi iñi ndi tuhun ra vatyí ñi ri cuví ndi chihin ra, ta Nyoo ta ra Cristo tachí ra chi ndi.

3

Tuhun chaa cha quichi cacun ra Cristo

¹ Ta cha cahán ndi tuhun ihya, ¿atu cha cuñí ndi sayaa ndi chi ndi, cuñí maa ndo? Ñima tyicuan caa. Ta yoó ¿atu chiñuhú cha cuiso yo tutu cha catyí chi vatyí vaha ñáyiví cuví yo, tari tuhva inga ra canyiso? Ñima. ² Vatyí nyoho cuví ndo carta ndi cha tyaa Nyoo añima ndi. Vatyí cuví nyehe ñáyiví yoso caa nasama Nyoo cuhva iyó ndo. Ta coto ñu tyi maa maa ri cha vaha sañahá ndi chi ndo. ³ Ta cachi nyehé ñu tyi cuví ndo carta cha tyaa ra Cristo vatyí nyehe ñu, ta nyuhu nacuhva cuenda ndi carta cuan chi ñu. Ta ñima chihin tinta tyaa Tatyí li Nyoo nyitó añima ndo. Ta ni ñima nu yuu chicunyaa.

⁴ Cahán ndi tyehe caa vatyí chitó ndi vatyí Nyoo cuacuhva ra cha quita vaha tyiño sahá ndi. Vatyí tyinyeé ra Cristo chi ndi. ⁵ Ma caña iñi ndi caca xiñi ndi tyi iyó tunyee iñi maa ndi cha sacuví ndi ñáa cha sacuví ndi. Soco tandihí cha sacuví ndi maa Nyoo sacuví. ⁶ Maa Nyoo chahá ra tunyee iñi ra chi ndi, ta sacotó

ndi tuhun chaa cha natyihí tahan ra tuhun chihin yo. Vatyí Tatyí li ra chahá ñayiví chaa coo yo. Ta ley chahnu cuan cha chaha Nyoo chi ra Moisés, sacuhún chi chi yo anyaya vatyí ña cuví quichaha yo tandihí ley cuan.

⁷ Ley chahnu cuan, chicunyaa chihin letra chata yuu ta cha naha. Ta cuhva cha chaá ra Moisés chihin cuan, tyaqui xaan xiño nuu ra nyacua nayuhví ñu Israel nanyehe ñu nuu ra. Soco suvita ri tyi cha tyaqui cuan numi ri ndihí. Soco tatu tyaqui cuví cuan, ⁸ tyaqui ca cuví tuhun chaa cha quichí nyaca Tatyí li Nyoo chi yo. Tyaqui xaan ca cuan. ⁹ Tatu ley chahnu cha sacuhún chi yo anyaya, tyaqui xaan cuví, nyaca cuví tuhun cha saváha chi yo nuu Nyoo. Tyaqui xaan ca cuví cuan. ¹⁰ Vatyí ley chahnu tyaqui xaan cuví quivi cuan, cuñí maa ñáyiví. Soco vityin chitó yo tyi ña tyaqui xaan cuví. Vatyí tyaqui xaan ca maa tuhun ra Cristo cha sacacú chi yo nuu Nyoo. ¹¹ Vatyí tatu tyaqui xaan cuví cha ñi yaha ri chiyo, nyaca cuví noo cha ma ndihí ca maa.

¹² Chitó ndi tyi ma naa cuan. Yucuan chaha cahán ndi chihin cha ñi iñi ndi. Na cahán nuu ndi ta ña yuhví ndi. ¹³ Ña sacuví ndi tari sacuvi ra Moisés. Vatyí chasi ra nuu ra chihin noo sahama, tacuhva cha ma nyehe ñu Israel nu cunaa cha xiño cuan. ¹⁴ Soco quivi cuan ña cutuñí iñi ñu. Ta nyacua nya vityin ta ña cutuñí iñi ñu. Vatyí tatu sacuahá ñu ley cuan tari quivi cha nyasí nuu ñu. Vatyí ña cutuñí iñi ñu. Soco noo tuhun ri maa ra Cristo nuñá ra nuu yo. ¹⁵ Ta nyacua nya vityin tatu sacuahá ñu Israel ley ra Moisés, ña cuví cutuñí iñi ñu. Vatyí tari noo cha nyasí nuu ñu. ¹⁶ Soco tatu nacuhvá ñu añima ñu chi Sutu Mañi yo, maa ra cunuña ra nuu ñu. ¹⁷ Vatyí Sutu Mañi yo, Tatyí li cuví ra. Ta tatu nyaá Tatyí li Sutu Mañi yo añima yo, sacotó ra chi yo tyi ña nyacá ñaha ca ley chahnu chi yo. ¹⁸ Yucuan chaha tandihí yo ña nyasí ca nuu yo. Ta

vityin cuví yo tari noo ino, tacuhva cuví nyehe ñáyiví cha vaha Sutú Mañi yo. Ta cuahán nduvaha ca yo yoso cuhva sacuví Tatyí Ii Sutú Mañi yo chi yo.

4

¹ Yucuan chaha ma ndu uvi maa iñi ndi, vatyí Nyoo nyehé ndahvi ra chi ndi. Ta tyaa tyiño ra chi ndi tyi cahan ndi tuhun ra chihin ñáyiví. ² Ña sacuví ndi cha xehe vatyí ticahan nuu cuví cuan. Ña chicá noo ndi sandaví ñaha ndi chi ñáyiví. Maa maa ri tuhun Nyoo sañahá ndi. Ña nasacá noo ndi tuhun Nyoo chihin inga tuhun. Soco chihin nuu Nyoo chacú ndahvi ndi nuu tandihí ñáyiví, na saha vaha ñu cuenda vatyí maa maa ri cha ndicha sañahá ndi. ³ Nyuhu ña tyihí xehe ndi tuhun Nyoo. Soco cha cuenda chi ñu cha cua cunaa ñohó xehe. ⁴ Cuihna, ra nyacá ñaha cha quiñi caa ñuhu ñáyiví ihya, ican ra chasí cha chiñi tuñi xiñi ñu cha ña chinó iñi chi Nyoo. Vatyí coto nyehe ñu cha ndichin Nyoo. Ta coto cutuñi iñi ñu yoso caa sacacú ra Cristo chi yo. Vatyí ra Cristo nyitó ra ta cuví ra xiñahñu Nyoo. ⁵ Cuhva cha cahán ndi chihin ñáyiví, ña cahán ndi tuhun maa ndi. Soco sacotó ndi tyi ra Jesucristo cuví ra Sutú Mañi yo. Ta nyuhu cuví ndi noo musu ndo cha catyí cha cuñí ndi chi ra. ⁶ Vatyí suri maa Nyoo catyí vatyí na ndundichin nu ñaa iñi quiñi chinq ñuhu ñáyiví. Ican ra chaha ra cha ndichin coo aña yó, tacuhva vatyí chihin cha ndichin cha chaha ra Cristo chi yo, cuví cutuñi ca iñi yo tyi cahnu xaan ca cuví maa Nyoo.

Chihin cha chinó ri iñi yo chi Nyoo coo yo noo ñáyiví chaa

⁷ Coño ñuhu yo cuví tari noo quisi ñuhú, vatyí noo cha ñima ri tuhun cuví. Vatyí tyicuan caa ta cuví nyehe ñáyiví tunyee iñi cha cahnu xaan cha iyó chi yo, maa Nyoo chahá, ta ñima tunyee iñi maa yo cuví. ⁸ Yucuan chaha vasi iyó tisihi tandihí ri ityi nu cuahán ndi, soco ña ndu uvi iñi ndi. Vasi ña cutuñi iñi ndi tandihí cha cuví

chi ndi, soco chitó ndi tyi quitá vaha ndi. ⁹ Vasi chicá nyicon ñu chi ndi soco ñima maa ri maa ndi nyicu. Vatyí Nyoo nyaá ra chihin ndi. Vasi cha chacun taxin ñu chi ndi soco ña chihí ndi. ¹⁰ Tandihí ri ityi nu cuahán ndi ta nyatú ndi tuhun chihi cha catyí tuhun ra Jesús. Vatyí yucuan cuhva nyehé ñu tyi iyó ndi ñáyiví chaa cha chahá ra chi yo. ¹¹ Vatyí nyuhu tandihí quiñi, cha yatyin cúvi ndi cha cuenda ra Cristo tacuhva cuví nyehe ñáyiví vatyí yihí ñáyiví ra Cristo aña yó ndi. ¹² Nyatú ndi tuhun chihi cha cuenda cha cahán ndi tuhun Nyoo. Soco cha tyehe caa, nañihí ndo ñáyiví chaa.

¹³ Chinó iñi ndi chi Nyoo tari chinq iñi ra David. Ta tyaa ra nu libru Salmos: “Chinó iñi chi Nyoo, yucuan chaha cahín tuhun ra”, catyí ra David. Ta tyicuan caa tucu nyuhu. Chinó iñi ndi chi Nyoo. Ta yucuan chaha cahán ndi tuhun ra. ¹⁴ Vatyí chitó ndi vatyí Nyoo ra sanandotó chi Sutú Mañi yo Jesucristo, cusandotó tucu ra chi yo. Ta ñin ri chihin nyoho, cunyaca ra chi yo nya gloria nu nyaá ra. ¹⁵ Tandihí ihya cuví cha vaha chi maa ndo ta chi inga ñáyiví. Vatyí cuaha cha vaha Nyoo cuñihi ndo. Ta cuaha ndo nacuhvá ndo tyahvi nyoo chi ra, ta sacahnú ndo chi ra.

¹⁶ Yucuan chaha ña ndu uvi maa iñi ndi. Vasi coño ñuhu ndi cha cuahán sandihí xaan chi. Soco ñáyiví chaa cha iyó ndi cuahán nduchaa chi tahan tahan quiñi. ¹⁷ Tindoho cha nyehé ndi ñáyiví ihya, tindoho ñin yaha ri cuví. Vatyí chahá chi cha cunañihi ndi noo nu vaha ca cha ma ndihí maa nu nyaá Nyoo. ¹⁸ Vatyí ñima cha cuví nyehe yo sahá ndi cuenda. Sahá ndi cuenda soco cha ña nyehé yo. Vatyí cha cuví nyehé yo ñáyiví ihya, ña naha maa chiyo. Soco cha ña cuví nyehé yo, yucuan cuví cha ma ndihí ca maa.

5

¹ Ta chitó ndi vatyí quiñi cúvi yo, coño ñuhu yo cunaa chi. Vatyí cuví chi tari noo vehe cha ña naha maa

chiyo. Soco Nyoo cumí ra noo nu cunyaa añima yo, noo cha ma naa ca maa nya andivi. Ta ñima cha cacu chihin ndaha rayi ñayivi ihya cuví. ² Ndicha, cha ni ri ca cha iyó yo chichi coño ñuhu yo, nducuihyá xaan cuñi yo, vatyí nyatú tuhva yo nicoo yo chichi cha chahá Nyoo chi yo nya andivi. ³ Vatyí cohon añima yo chichi cha chahá Nyoo tacuhva cha ma cuvityiyaá yo. ⁴ Cha ni ri ca cha iyó yo chichi coño ñuhu yo cha cuví tari noo vehe ri, nducuihyá iñi yo vatyí ña cuñi yo quita ri maa añima yo chichi coño ñuhu cuan ta cuvityiyaá chi. Soco cuñi yo cha coo añima yo chichi cha ma naa ca maa nya andivi ta tyicuan ri maa cuacoo yo. ⁵ Ta Nyoo tyaa ra cuhva vatyí tyehe caa cucuvi chi yo. Ta chahá quiyi ri ra Tatyí li ra chi yo. Vatyí tacuhva coto yo tyi cuví naquehen ca yo tandihi ca cha cuacuhva ra chi yo.

⁶ Ta yucuan chaha ma yuhvi yo cha cuví yo. Vatyí chitó yo tyi cha ni ri ca cha iyó yo chichi coño ñuhu ihya ñayivi, ña yatyin nyaá yo chihin Sutu Mañi yo andivi. ⁷ Vityin ña cuví nyehe yo chi ra, soco chihin cha chiño ri iñi yo chi ra, iyó yo ñayivi ihya. ⁸ Soco yihí vaha iñi yo chi ra ta cha cuñi yo quita yo chichi coño ñuhu ihya vatyí cuhun yo cucunyaa yo chihin Sutu Mañi yo. ⁹ Yucuan chaha sañihi ca ndi nducú ndi cuhva yoso caa cha tahan iñi Sutu Mañi yo sacuví ndi. Cuví ri cha iyó ca ndi chihin coño ñuhu ñayivi ihya. O cuví ri cha yori ca ndi, vatyí cha nyaá ndi chihin Sutu Mañi yo nya andivi. ¹⁰ Vatyí tahan tahan yo ta cuhun yo nuu ra Cristo cucuhva yo cuenda nu nyaá cutuñi chi yo nuu ra. Ta cuñihi yo cha tahan chi chi yo, yoso cuhva cha vaha o cha ña vaha cha sacuvi noo noo yo quivi chiyo yo chihin coño ñuhu yo ñayivi ihya.

Nu sacotó ra Pablo yoso caa nicoo vaha yo chihin Nyoo

¹¹ Vatyí chitó ndi vatyí Sutu Mañi yo cutachi tuñi ra chi ndi tatu ma sacuvi ndi tuhun cahán ra. Yucuan

chaha nducú ndi cuhva cahán ndi chihin ñayivi na nacuhva cuenda ñu chi ñu chi Nyoo. Ta Nyoo chitó ra vatyí tyicuan ri sacuví ndi. Ta chitó tucu maa ndo ñandihí. ¹² Ñima cha cuñi ndi cuyaa ndi chihin cha cahán ndi tyehe caa, soco cha cuñi ndi vatyí nicohón iñi ndo vatyí tuhun ndicha sacotó ndi, ta cuví cusii iñi ndo chihin ndi. Ta cuñihí ndo cuhva cahán ndo chihin inga ra cha sacahnú chii. Catyí ra tyi vaha iyó ra, soco ñima cha ndicha caa añima ra. ¹³ Tatu ña vaha cuñi xiñi ndi, cuñi maa ñayivi tyi cahán tuhun tyehe caa, soco cha cuenda maa Nyoo. Soco tatu vaha cuñi xiñi ndi, ta cachi tuhun cahán ndi, soco cha cuenda tyi cuñi ndi tyinyeé ndi chi ndo. ¹⁴ Soco saniñi ndi chi ndi cha sacotó ndi tuhun ra Cristo chi ñayivi. Vatyí chitó ndi tyi cuñi xaan ra chi ñu. Ta chitó ndi tyi chihí ra cha catyí cuatyí tandihi cuii maa ñayivi. Ta yucuan chaha chihi tucu yo cha ma sacuvi ca yo cha ña vaha cha chinyacuvi yo nu quichi chi. ¹⁵ Ra Cristo chihí ra cha catyí tandihi yo vatyí tacuhva cha ma coo ca yo cuhva cuñi maa yo. Coo yo soco cuhva cuñi maa ra. Vatyí chihí ra ta nandoto ra cha cuenda yo. ¹⁶ Cha cuhva cha vityin, tatu nyehé yo chi noo ñayivi, ma caca xiñi yo nyehe yo chi ñu tari chicá xiñi ñayivi cha ña ñohó nuu chi Nyoo. Noo quivi tyicuan caa chicá xiñi vatyí ra Cristo cuví ra noo ra ñuhu ñayivi ri. Vityin ña chicá ca xiñi tyicuan caa. ¹⁷ Vatyí quivi nacuhva cuenda yo chi yo chi ra Cristo, maa ra sanduchaa ra añima yo. Ta tandihi tuhun cha chicá xiñi yo nu quichi chi, ña chicá ca xiñi yo vityin. Vatyí maa ra nacuhva ra nonga cha chiñi tuñi chaa chi yo.

¹⁸ Ta tandihi ihya maa Nyoo sacuvi, vatyí sanicoo vaha ra chi yo chihin ra cha cuenda maa ra Cristo Jesús. Ta catyí ra chi yo vatyí na sacoto yo chi ñayivi vatyí Nyoo cuñi ra cha nicoo vaha ñu chihin ra. ¹⁹ Vatyí chihin cha chihí ra Cristo cha catyí cuatyí yo, ñayivi nicoo vaha ñu chihin Nyoo. Ta Nyoo sahá ra tuhun tyi ñahri ca cuatyí

ñu. Ta chi nyuhu, catyí ra vatyí sacotó ndi tuhun ihya chi ñu. ²⁰ Ta vityin cuví ndi ra chicá tyiño ra Cristo. Ta tari cha maa Nyoo chacú ndahvi nuu ndo, vatyí tyiño maa ra chicá ndi. Ta yucuan chaha chacú ndahvi ndi nuu ndo chihin sívi ra Cristo, na nicoo vaha ndo chihin ra. ²¹ Ra Cristo ña sacuví ra ni minoo cuatyí. Soco Nyoo tachí ra chi ra síqui ñuhu ñayívi ihya, quichí cúvi ra tari noo ra iyó cuatyí cahnu. Tacuhva vatyí cuví sacacu ra chi yo. Ta cha cuenda maa ra Cristo sahá Nyoo tuhun tyi vaha yo nuu ra.

6

¹ Yañi, ñin ri tyiño Nyoo sacuví yo. Yucuan chaha chacú ndahvi xaan ndi nuu ndo vatyí ma coo ndo tari cha ña ñohó nuu ndo Nyoo. Cotyiño ndo tandihí cha vaha cha chahá ra chi noo noo ndo. ² Vatyí catyí Nyoo nu tutu tyehe caa:

Quiví tahan chi tyi sacaqui chuun,
yuhu chiñi nu cahun ta tyinyeyi
chuun, catyí Nyoo.

Saha ndo cuenda tyi vityin cuví quívi tahan chi. Vityin cuví quívi sacacú Nyoo chi yo.

³ Nducú xaan ndi cuhva cha ma nyehe nyaa ñáyívi tyiño Nyoo cha sacuví ndi, coto ma chino iñi ñu chi Nyoo. ⁴ Soco cuñí ndi vatyí nyehé ñu vatyí ndicha cha cuví ndi musu Nyoo vatyí cunyeé ndi ñáá ndihí cha cuví chi ndi, tandihí tindoho, tandihí tisihi. ⁵ Vasi cañi ñáyívi chi ndi, vasi tyihí ñu chi ndi vehe caa, vasi canachaá ityi ñu síqui ndi, soco cunyeé xaan ndi. Ta ñihi xaan sahá tyiño ndi nyacua ña quixí ndi. Ta yahá ndi soco. ⁶ Ta tandihí maa ihya cunyeé ndi vatyí ndicha ndicha cuii cha cuví ndi musu Nyoo. Yucuan chaha cachi iyó ndi. Ta chitó ndi cha ndicha. Ta cunyeé ndi chihin cha ña chihí ndi tisihi tandihí cha cuví chi ndi. Ta vaha ñáyívi cuví ndi. Ta cuñí ndi chi ñáyívi. Ta nyaá maa Tatyí Ii Nyoo chihin ndi. ⁷ Cahán ndi maa ri tuhun ndicha maa Nyoo. Ta nyaá fuerza ra chihin ndi. Ta chotyíño ndi tandihí cha vaha cha chahá maa ra chi ndi, tacuhva cuví

chasaha ndi chi ra ña vaha. ⁸ Iyó quívi cuñi nyehe ñáyívi chi ndi. Ta iyó quívi ña cuñi nyehe ñu chi ndi. Iyó quívi vaha cahán ñu síqui ndi. Ta iyó quívi quiñi cahán ñu síqui ndi. Iyó chaha catyí ñu vatyí ra cuendu cuví ndi. Soco maa maa ri cha ndicha cahán ndi. ⁹ Sahá ñu chi ndi tari noo ra ña ñohó nuu ñu. Soco ñu yihí vaha cuenda Nyoo ñohó nuu vaha ñu chi ndi. Iyó quívi cha yatyin ri cúvi ndi, soco iyó ca ndi. Ta iyó quívi tachí tuñi ñu chi ndi, soco ña chihí ndi. ¹⁰ Vasi iyó quívi cha nducuihyá iñi ndi, soco tyicuan ri sí cuñí ndi. Vatyí tyiño Nyoo sacuví ndi. Vasi ndahvi ndi, soco cuaha ñáyívi ñihi ñu cha vaha chihin tuhun cha chahá Nyoo chi ndi. Vasi ñahri maa iyó chi ndi, soco iyó tandihí cha vaha Nyoo chi ndi.

¹¹ Cahán ndi chihin ndo yañi, cha cuví ndo ñáyívi ñuu Corinto chiña. Catyí cachi ndi chi ndo chihin cha ñi ña ñima ndi vatyí ndicha cha cuñi ndi chi ndo. ¹² Nyuhu, ña quiñi cuñi ndi nyehe ndi chi ndo. Maa ndo cuví ñu ña vaha cuñi nyehe chi ndi. ¹³ Chacú ndahvi ndi nuu ndo tari chacú ndahvi noo rayi nuu sehe ra, nuña ndo ñima ndo, ta ma quiñi cuñi ndo nyehe ndo chi ndi, vatyí maa ndi ña quiñi cuñi ndi nyehé ndi chi ndo.

Cuví yo vehe Nyoo vatyí ñohó ra ñima yo

¹⁴ Ma ndu ñin ri ndo chihin ñu ña chinó iñi chi Nyoo. Vatyí ña nacachí tahan ñima ndo chihin ñu cuan. Vatyí cha vaha ma cuví ndu ñin ri chihin cha ña vaha. Ta cha ndichin ma cuví ndu ñin ri chihin cha ñaa iñi. ¹⁵ Vatyí ra Cristo ña ndu ñin ri ra chihin ra cuví cuhna. Ta tyicuan caa tucu ñu chinó iñi chi ra Cristo, ña nacachí tahan chi tatu ndu ñin ri ñu chihin ñu ña chinó iñi chi ra. ¹⁶ Ña chahá chi cha sacahnú yo Nyoo ta sacahnú tucu yo chi cha cuví xitohyo. Vatyí maa yo cuví yo vehe Nyoo nyitó. Tari catyí maa ra tuhun ihya ta cha naha:

Coi ta caca noi chihin ñu.
Ta yuhu cucuvi Nyoo ñu,

ta maa ñu cucuvi ñu ñáyiví chii, catyí Nyoo.

17 Yucuan chaha catyí tucu ra quívi cuan:

Quitá ndo mahñu ñu ña chinó iñi chii.

Ta ma cutahan ndo chihin ñu.

Ta ma sacuvi ndo cha ña vaha.

Tyicuan ta cunaquehin chi ndo.

18 Ta sutu ndo cucuvi chii.

Ta maa ndo cucuvi ndo sehi, catyí Sutú Mañi yo, ra iyó tandihí tunyee iñi chii.

7

1 Ican ihya cuví cha chahá Nyoo chi yo. Yucuan chaha yañi, cuñí chi nducu yo cuhva cuvaha yo nuu Nyoo. Ma sacuvi yo cha quiñi caa ni ri ma caca xiñi yo cha ña vaha. Na ndu cui coo yo vatyí sahá yo ñáyiví chi Nyoo.

Nu nacatyí ra Pablo yoso caa nasama ñu cuhva iyó ñu

2 Yañi, chacú ndahvi ndi nuu ndo, na cuvaha coo iñi ndo nyehé ndo chi ndi vatyí ñahri cha sacuvi ndi chi ni noo ndo. Ta ni ña sativí ndi chi ndo. Ni noo ndo ta ña sandaví ñaha ndi chi ndo. 3 Cha catyí chi ndo tyehe caa ñima cha cahín chi ndo. Vatyí cha yaha catyí tiqui chi ndo ta ityi chata ca, vatyí ndicha cha cuñí chi ndo. Vatyí ñin ri ñu cuví yo chihin Nyoo. Tatu iyó yo soco ñin ri cuví yo. O tatu cúvi yo soco ñin ri cuví tucu yo. 4 Ñahri maa cha chica iñi chihin nyoho. Sii xaan cuñí nyehi chi ndo. Ta yucuan chaha vasi nyehé ndi tindoho ihya, cuní ca iñi ndi. Ta cusii xaan ca cuñí ndi.

5 Nya quívi chaá ndi Macedonia ihya, ta ta nyitatu ca maa ndi. Vatyí cuaha xaan tisihi ta tindoho nyehe ndi tandihí ri ityi chahan ndi. Ta cañi tahan ñu chihin ndi. Ta yuhví ndi.

6 Soco Nyoo, tyicuan ri sanduní ca ra iñi yo tatu cuihyá cuñi yo. Ta sanduní ra iñi ndi cuhva cha chaá ra Tito. 7 Ta ñima cha cuenda cha chaá ri ra. Soco cha cuenda cha nduní iñi ra saha nyoho. Nacatyí ra chi ndi vatyí cuñí xaan ndo nyehe ndo chi ndi. Ta chacu xaan ndo cha cuihya iñi ndo. Ta cuñí

ca ndo chii, na. Ta cha cuenda cuan ndusi xaan ca cuñí vityin.

8 Soco quívi cuan chica xaan xiñi vatyí चाहि tucuihya iñi chi ndo chihin tutu cha sacuhin chi ndo. Ta ndu uvi iñi cha sacuhin tutu cuan chi ndo. Soco suhva ri quívi, nducuihya iñi ndo. Ta vityin ña chicá ca xiñi cha cuenda tucuihya iñi cha चाहि chi ndo. 9 Ta vityin cusii xaan cuñí, ñima cha cuenda tucuihya iñi cha chiyo ndo, soco cha cuenda vatyí tucuihya iñi cuan sanandichí chi ndo ndaha Nyoo. Nyoho cunyeé ndo tucuihya iñi cuan yoso cuhva tahán iñi Nyoo, yucuan chaha cha vaha sacuvi ndi chihin ndo chihin tucuihya iñi cuan.

10 Iyó tucuihya iñi cha maa Nyoo chahá, tacuhva ndu uvi iñi yo cuatyí yo ta nañihi yo ityi vaha cuhun yo nu nyaa ra. Ta ña tahán chi cha cuxaán yo chi Nyoo cha cuenda cuan. Soco tucuihya iñi cha iyó chi ñu cha ña ñohó nuu chi Nyoo, ñima tucuihya iñi chi Nyoo cuví cuan. Vatyí ña tyinyeé chi chi ñu tacuhva cha ma cuhun ñu anyaya. 11 Nyoho cunyeé ndo tucuihya iñi yoso cuhva tahán iñi Nyoo. Soco vityin nyehé ndo vatyí cuaha xaan cha vaha nañihí ndo cuenda cha cucuihya iñi ndo. Ta sandaa vaha ndo tyiño ra cuan. Cuxaan ndo chi ra. Ta nyacua cuñi ndo tachí tuñi ndo chi ra. Tandihí cuan, ta nayuhví ndo chi Nyoo. Ta nacatyí vaha ndo yoso caa cuahan. Yaha cuan ta nyacua quichí cuvi iñi ndo nyehe ndo chii. Ta cha cuenda cha sacuvi ndo tari cuhva cuñí Nyoo, cuñí chi catyí vatyí ñahri cuatyí ndo cha cuenda cuan. 12 Yucuan chaha quívi sacuhin carta cuan chi ndo ñima cha cuenda cha chicá xaan xiñi cuenda ra cha sacuvi cuatyí cuan. Ta ni ñima cuenda ra cha nyehe tisihi cuan. Soco cha cuenda maa ndo, vatyí cuñí tyi coto ndo yoso cuhva chicá xiñi ndo tuhun ndi nuu Nyoo vatyí cuñí ndo tyinyeé ndo chi ndi. 13 Yucuan chaha nduvaha cuñí añima ndi. Ta sii xaan cuñí ndi vatyí chitó ndi tyi cuñí ndo chi ndi.

Ta sii ca cuñí ndi cha nyehé ndi vatyí chaha xaan ndo tunyee iñi

añima ra Tito. Vatyí vaha xaan tyiñuhu ndo chi ra. ¹⁴ Catyí chi ra Tito cha cumañi ca cuhun ra nu nyicú ndo vatyí vaha cutyasoho ndo tuhun cha sacuhin chihin ra. Ta vityin sii cuñí vatyí chinó cava tuhun cahín chihin ra. Maa maa ri cha ndicha cahín chihin ndo. Ta tyicuan caa ndicha tucu tuhun cha catyí chi ra Tito. ¹⁵ Ta cuñí xaan ra chi ndo vatyí nicohón iñi ra vatyí nyoho sacuví ndo tandihí cuii cha catyí ra chi ndo. Ta cuhva cha chaḥa ra, ndahvi saḥa ndo chi ndo nuu ra. Ta vaha xaan caḥan ndo chihin ra. Ta vaha xaan quichahḥa ndo chi ra. ¹⁶ Ta sii xaan cuñí vatyí chité tyi tyicuan ri sacuví ndo cha vaha.

8

Tahán chi tyinyeé yo chi ñu yihí cuenda Nyoo chihin cha iyó vaha iñi yo

¹ Ta vityin yañi, cuñí ndi nacatyí ndi chi ndo vatyí cuaha xaan tyinyee Nyoo chi ñu yihí cuenda ra, ityi Macedonia ihya. ² Vasi cuaha xaan tindoho nyehé ñu, soco sii xaan ca cuñí ñu chihin Nyoo. Ta vasi ndahvi ñu soco cuaha cha iyó chi ñu chahá ñu, tari maa cha tyayii ñu. ³ Ta yuhu cuví noo cha ndaa vatyí nyehí tyi chihin cha iyó vaha iñi ñu chahḥa ñu yoso cuhva cha iyó chi ñu. Ta nyacua yaha ca chahá ñu. ⁴ Chacú ndahvi xaan ñu nuu ndi tyi nacuhvá ndi cha tyinyeé tucu maa ñu chi ñu tahan yo nya Jerusalén. ⁵ Cuaha ca sacuví ñu cha nuu cha yihí iñi ndi. Vatyí cha xihna ca cha sacuví ñu, nacuhva cuenda ñu chi ñu chi Nyoo chihin cha nii vaha iñi ñu. Ta quichahḥa vaha ñu tuhun Nyoo cha sacote chi ñu, vatyí yucuan cuhva cuñí maa Nyoo. ⁶ Ta cha nyehí tyi tyehe caa chinyacuvi ñu Macedonia ihya, yucuan chaha catyí chi ra Tito vatyí na sandihí ndihí ra tyiño vaha cha quichahḥa ra cha nacaya ra xuhun nu nyicú ndo. ⁷ Nyoho vaha xaan sacuví ndo tandihí ri. Chinó xaan iñi ndo chi Nyoo. Vaha xaan sañahá ndo tuhun ra. Ta vaha cutuñí iñi ndo. Ta nii xaan iñi ndo sacuví ndo tyiño nuu ra. Ta vaha xaan ñáyivi cuví ndo

chihin ndi. Ta tyicuan caa tucu tahán chi cha tyinyeé ndo chi ñu ndahvi ñu yihí cuenda Nyoo noo cuhva vaha xaan.

⁸ Ñima tyi catyí chi ndo tyehe caa ta cuñí ndo tyi cha saniñí chi ndo. Soco cha cuñí vatyí nyehé ndo cha vaha cha nyacuví ñu yihí cuenda Nyoo inga ityi. Ta tyicuan caa tucu maa ndo sañahá ndo chi inga ñáyivi tyi ndicha vaha ñáyivi cuví ndo chihin tahan ndo. ⁹ Vatyí cha chitó maa ndo yoso cha cuñí Sutu Mañi yo Jesucristo chi yo. Vatyí maa ra tyayii xaan ra. Soco sandundahvi ra chi ra cha catyí yo tacuhva vatyí cuví sandutyayii ra chi yo.

¹⁰ Chahí tuhun ihya chi ndo cha cuenda cha vaha chi maa ndo. Na sañihi ndo chihin tuhun cha quichahḥa ndo quiyava. Ñima tacuhva sacuví ri ndo, soco sacuví ndo chihin cha iyó vaha iñi ndo. ¹¹ Ta tari chahḥa ndo chihin cha iyó vaha iñi ndo, tyicuan caa sacuví tucu ndo vityin. Ta cuhva ndo yoso ri cuhva cha iyó chi ndo. ¹² Vatyí tatu noo ñáyivi nii vaha iñi ñu, cuñí ñu cuhva ñu yoso ri cuhva cha iyó chi ñu, Nyoo naquehén ra cha chahá ñu. Vatyí Nyoo ña chicán ra cha ñahri iyó chi yo.

¹³ Ñima cha cuñí vatyí nyehe ndo tindoho cha cuenda cha tyinyeé ndo chi inga ñu tacuhva ma nyehe ca ñu cuan tindoho. ¹⁴ Soco vityin cha iyó chiin chi ndo, tahan chi cha tyinyee ndo chi ñu ndahvi cuan. Ta inga chaha maa ñu cucuhva cha chiñuhú chi maa ndo. Tyehe caa tahán chi tyinyeé chi tahan ri yo tacuhva tyi ninoo yo ta ni inga yo ma nyehe yo tindoho. ¹⁵ Vatyí tyehe caa catyí chi tuhun Nyoo: “Ra cha cuaha xaan cumí, ña ndoó ca chi ra. Ta ra cha chiin ri cumí, ña cumañí chi ra”, catyí tuhun Nyoo.

Ra Tito chihin ra tahan ra tyaá ra cuhva cuhun ra ñuu Corinto

¹⁶ Soco tyahvi nyoo chi Nyoo vatyí chahá ra cha vaha coo añima ra Tito tyi chicá xiñi ra tuhun ndo tari chicá xiñi yuhu. ¹⁷ Ta quehén ra tuhun cha

catyí chi ra cha cuhun ra nu nyicú ndo. Tyi cha yihí xaan iñi tucu maa ra tuhun ndo. Ta yucuan chaha vityin vachí ra nu nyicú ndo chihin cha iyó vaha iñi maa ra.

¹⁸ Ìn ri chihin ra Tito tachí ndi chi noo ra yañi yo. Ta vaha xaan hermano cuví ra, ta tyicuan caa catyí tandihí ñáyivi yihí cuenda Nyoo. ¹⁹ Ta sìn ri nacachi vaha maa ñu yihí cuenda Nyoo chi ra yañi yo ihya vatyí cuhun ra chihin ndi cunyaca ndi xuhun chi ñu ndahvi nya Jerusalén. Ta cuñí ndi sacahnú ndi chi Sutu Mañi yo cha sacuví ndi tyiño ihya. Ta suri sañahá ndi vatyí cuñi xaan ndi tyinyee ndi chi tandihí ñu yihí cuenda Nyoo. ²⁰ Ta cuñí ndi sacuví ndi tyehe caa tacuhva cha ma quihí yuhu ñáyivi tuhun ndi cha cuenda cha nacayá ndi xuhun cha cuacuhva ndi chi ñu ndahvi. ²¹ Ta nducú xaan ndi cuhva sacuví ndi noo cuhva cachi. Tatu ñáa noo cha cuasacuví ndi soco chihin cha cachi iyó ndi chihin nuu Sutu Mañi yo ta chihin nuu ñáyivi ñandihí.

²² Ta chihin ra Tito ta inga yañi yo cuan, vachí inga tucu ra yañi yo, vatyí nyehé ndi vatyí ñi xaan iñi ra. Ta vityin yaha ca cuhva, vatyí vaha cuñí ra nyehé ra chi ndo cha cuenda cha chinó xaan iñi ra tyi cuñí ndo sacuví ndo cha vaha nuu Nyoo. ²³ Tatu yóo cha ndaca tuhun tuhun ra Tito, catyí ndo chi ñu tyi ra tahin cuví chi ra. Ta sahá tyiño ra chihin, ta tyinyeé ra chi ndo chihin tuhun Nyoo. Ta tatu ndaca tuhun ñu tuhun inga uvi ca ra yañi yo ihya, catyí ndo chi ñu vatyí maa ñu yihí cuenda Nyoo saquichí chi ra. Ta vaha xaan sacuvi ra tyiño nuu ra Cristo. ²⁴ Yucuan chaha sañaha ndo chi ra ihya vatyí ndicha ndo cha cuñí ndo chi ra. Tyicuan ta coto tandihí ñu yihí cuenda Nyoo vatyí tahán chi cha cahín tuhun ndo tyicuan caa.

9

Nu chahá ra Pablo tuhun yoso caa cuatyinyee ñu chi ñu ndahvi ñu yihí cuenda Nyoo nya Jerusalén

¹ Ta cuenda xuhun cha nacayá ndo cuenda ñu ndahvi ñu yihí cuenda Nyoo, ña cuñí chi cha sacuhin tuhun chi ndo. ² Vatyí cha chité cha vaha caá aña ndo. Yucuan chaha chihin cha sñi cuñí nacatyí chi ñu ityi Macedonia ihya, vatyí nyoho ñu ityi Acaya, nya ta quiyava quichaha cuñí ndo tyinyeé ndo. Ta cuaha xaan ñu Macedonia cunñi ca iñi ñu cha tyinyeé tucu maa ñu. ³ Soco suvita ri yuhu cutachi chi yañi yo ihya nu nyicú ndo. Vatyí sanumi ndo ta sacaya ndo xuhun, tari cuhva catyí vatyí yihí iñi ndo sacuví ndo. Vatyí tacuhva cha ma catyí ñu Macedonia ihya vatyí ña ndicha cha cahín siqui ndo cha cuenda cuan. ⁴ Vatyí coto cuhun nya noo ra Macedonia chihin, ta nyehe ra vatyí ñahri maa nacayá ndo. Ta cuquehin ticahan nuu cha cuenda cha ñahri cumi ndo. Ta vihi ca maa ndo. Vatyí cha yaha catyí vatyí cuatyinyee ndo. ⁵ Yucuan chaha cuñí mai vatyí vaha cha cuhun xihna ca ra yañi yo ihya nu nyicú ndo tacuhva tyinyeé ra chi ndo cha sacañá tahan ndo xuhun cha yihí iñi ndo tyi cuhva ndo. Tacuhva tyi quivi quichi soco tandihí ta cha iyó vaha. Vatyí cha iyó vaha iñi maa ndo cuví, ta ñima noo cha sanñi ndi chi ndo.

⁶ Ta ñicohon iñi ndo tuhun ihya: Ra cha chiin ri tachí, chiin ri tyiño sahá ra chicoó. Ta ra cuaha tachí, cuaha tyiño sahá ra chicoó. ⁷ Ta tahan tahan yo cuñí chi cuhva yo yoso cuhva quichi cuvi aña yo. Ñima chihin cha ña ñi iñi yo o chihin fuerza. Vatyí Nyoo cuñí ra chi ñu cha chahá chihin cha sñi cuñí. ⁸ Nyoo cuví cuhva ra cuaha, ndihí ndoo ndihí cuiti nuu cha vaha chi ndo. Vatyí tyicuan ta coo tandihí ri cha chiñuhú chi ndo. Ta ndoo ca ta cuví tyinyee ndo chi ñáyivi chihin tandihí ri nuu chiñuhú chi ñu. ⁹ Tuhun Nyoo catyí chi tyehe caa:

Minoo ra vaha, chahá ra cha iyó chi ra chi ñu ndahvi.

Ta tumañi iñi cha sacuví ra cuan, yucuan cuví cha ña chinaá nuu Nyoo, catyí chi.

10 Nyoo chahá ra chiti tachi yo. Ta chahá tucu ra cha cachi yo. Cuhva tucu ra cuaha ca chiti tachi ndo ta cuhva ra cuvaha chi. Ta chihin cha chahá ndo, cusacuvi ra tyi cuaha cha vaha cucunyaa añima ñáyivi. 11 Tyicuan caa ta coo tandihi ri nuu cha tyayii chi ndo, tacuhva cuvi tyinyee ndo chi tahan ndo. Ta maa ñu cuan, cuanacuhva ñu tyahvi nyoo chi Nyoo cha cuenda cha tyinyee yo chi ñu. 12 Vatyí cha tyinyee yo tyehe caa chi ñu yihí cuenda Nyoo, uvi tahan cha vaha sacuví yo. Noo cha chahá yo cha chihuhú chi ñu. Ta inga cha nacuhvá xaan ñu tyahvi nyoo chi Nyoo. 13 Maa ñu cusacahnu ñu chi Nyoo. Vatyí chihin cha tyinyee ndo chi ñu, nyehé ñu vatyí ndicha cha quichahá ndo tuhun ra Cristo. Ta cuhva ñu gloria chi Nyoo cha tyinyee xaan ndo chi ñu ta chi tandihi ñáyivi. 14 Ta cucacan tahvi ñu chaha ndo. Ta cucuñi ca ñu chi ndo cha cuenda cha vaha cha chahá Nyoo chi ñu cha cuenda ndo. 15 Tyahvi nyoo chi Nyoo vatyí chahá ra noo cha vaha xaan chi yo. Nyacua ña ñihí yo cuhva nacatyí yo.

10

Iyó ityi chi ra Pablo tyi saha ra cuenda chi ñu cha sacoto ra tuhun Nyoo chii

1 Yuhu ra Pablo chiquén noo tumañi iñi chi ndo chihin cha vita iñi. Tari cha vita iñi ra Cristo. Vatyí yihí ndo catyí ndo vatyí tatu ñáá tuhun sacoté chi ndo chihin tutu, ñihi xaan cahín chihin ndo. Soco tatu nyaí chihin ndo, vita xaan cahín, catyí ndo. 2 Vaha. Soco quivi cuhin nu nyicú ndo, ma saniñi ndo chii cha cahin chi ndo. Soco chité tyi cuñí chi cha sañahí chi suhva ndo yoso cuhva cha ñihi cahín. Vatyí yihí ndo catyí ndo vatyí sacuví tari sacuví noo ra ña yihí cuenda Nyoo. 3 Ndicha vatyí ñáyivi cuví ndi. Soco ña cañí tahan ndi tari cañí tahan ra ñáyivi ihya. 4 Vatyí cha xaan cha cañí tahan ndi chihin, ñima cha xaan ñáyivi ihya cuví. Soco

maa tunyee iñi Nyoo cuví, vatyí cuví chasaha ndi tandihi maa fuerza nyacua nya fuerza tatyí ña vaha. 5 Ta tyicuan caa cuví chasaha ndi chi tandihi tuhun cha cahán ñáyivi siqui tuhun Nyoo, ta tandihi cha cahnu sahá chii cha chasi nu quichahá yo tuhun Nyoo. Tandihi cuhva chicá xiñi yo siqui ñuhu ñáyivi ihya, chahá yo na cunyaca ñaha ra Cristo vatyí quichahá yo chi maa ra. 6 Ta quivi cuquichaha vaha tandihi ndo chi ra Cristo, tatu nya nonga ndo ña cuñí ndo quichahá ndo, tyaá ndi cuhva cha tachi tuñi ndi chi ndo.

7 Soco nyoho sahá ndo cuenda cuhva caá ri noo ñáyivi. Ta ña sahá ndo cuenda cuhva caá añima ñu. Ta tatu nya noo nyoho chitó vaha ndo vatyí cuenda ra Cristo yihí ndo, coto tucu ndo vatyí yihí tucu nyuhu cuenda ra. 8 Vatyí vasi yaha cuhva cahín, ña tahán chi cha cucahan nui. Vatyí maa Sutu Mañi yo chahá ra ityi chii cha cunyaca ñahi cha cuenda cha vaha chi maa ndo, tacuhva ñihi ca ndo tunyee iñi Nyoo. Ta ñima cha sativí chi ndo. 9 Ña cuñí vatyí catyí ndo vatyí sayuhví chi ndo chihin cha cahín nu tutu cha sacuhín chi ndo. 10 Vatyí yihí ndo catyí ndo vatyí nu tutu cha saquichí chi ndo ñihi xaan cahín chihin ndo. Soco tatu mai chaa nu nyicú ndo cuví noo ra ña ñihí tuhun cahan, catyí ndo. Ta tuhun cha cahín, maa maa ri tuhun cha ña chihuhú cuví, catyí ndo. 11 Soco ñu cha catyí tyehe caa cuñí chi cha coto ñu vatyí tari cuhva cahín nu tutu, tyicuan caa cusacuvi tiqui nachai nu nyicú ndo.

12 Ndicha ña cañá iñi ndi sandu inuu ri ndi chi ndi chihin ra casayaá chi tyi cahán ra tuhun maa ra. Vatyí casacuví ra cha ña tahán chi. Vatyí nyehé ra cuhva chicá xiñi maa ra ta cuhva cuahan inga ra, ta cuñí maa ra tyi vaha cuahan ra. Ta ña cutuñí iñi ra tyi tahán chi nanducú ra cuhva cuñí Nyoo. 13 Nyuhu ma sacahnu ndi chi ndi chihin cha ña tahán chi chi ndi. Nyoo cuví ra sañahá ñáá cuví

tyiño cha tahán chi cha sacuví ndi. Ta maa ra chahá cha quichi ndi nya nu nyicú ndo Corinto chiña. ¹⁴ Tyehe ta ñima xihna ca ndi sacotó tuhun Nyoo chi ndo, ña tahán chi sahá ndi cuenda chi ndo. Soco tahán maa chi vatyi xihna ca maa ndi chaa ndi nu nyicú ndo chihin tuhun ra Cristo. ¹⁵ Soco nyuhu ña sayaá ndi chi ndi chihin tyiño sahá inga ra. Ña catyí ndi tyi tyiño maa ndi cuví. Soco yihí iñi ndi vatyi cunachino vaha ca iñi ndo chi Nyoo. Tyicuan ta cuví sañaha ca ndi tuhun ra Cristo chi ndo, soco yoso cuhva tahán chi chi ndi. ¹⁶ Ta yihí iñi ndi cha cahan ndi tuhun ra Cristo chihin ñáyivi nya ndihi ñuu nu cañi ca cha nuu nu nyicú ndo chiña, nu ta coto ca ñu tuhun ra. Tacuhva cha ma catyi ñáyivi vatyi cuyaa ndi chihin tyiño sahá inga ra.

¹⁷ Soco tatu nya noo yoó cuñí yo cuyaa yo, na cuyaa yo soco chihin Sutu Mañi yo. ¹⁸ Vatyi nuu Nyoo ña quitá vaha ra catyí tyi vaha maa. Soco tatu cahán Nyoo tuhun noo ra ta catyí ra tyi vaha sacuví ra, ican ra cuan cuví ra quitá vaha nuu Nyoo.

11

Nu chahá ra Pablo tuhun chi ñu Corinto na saha ñu cuenda coto sandaví ñaha ra cuendu chi ñu

¹ Vaha tyehe ta cunyeé ndo chiin cha ñima ri tuhun cha cuacatyí chi ndo. (Vasi ña tahán chi cha sacoté tuhun mai, soco cuñí chi cha nacotó ndo yoso caa cuñí ra cuan sandaví ñaha ra chi ndo.) Ta yucuan chaha vasi yoso ca caa soco cunyeé ndo cha cuacatyí chi ndo. ² Vatyi cuiño xain chi ndo. Ta maa Nyoo chahá cha cuiñe chi ndo, vatyi mai ican tyihí chi ndo ityi ra Cristo. Ta cuñí tyi cuñí ndo chi ra tari noo ñaha tyivaa cha cuñí xaan ña chi noo ri maa ra cha cuatandaha ña chihin. ³ Soco chicá xiñi cha cuenda ndo, coto cuví chi ndo tari cuví chi cu Eva. Vatyi sandaví ñaha coo chihin maña ti chi ña. Ta coto casandaví ñaha ra cuan chi ndo. Ta coto ndusin caa cuhva nacacá xiñi ndo tuhun ra Cristo. Ta

sandihí ndo tuhun cha sacahnú ndo chi noo tuhun ri maa ra. ⁴ Ta nyoho tañi tyehe xaan ri tyasohó ndo nu cacahán ra tuhun ra Jesús soco ña ndicha ra. Vatyi ñima tuhun ra Jesús cha sacotó ndi chi ndo cuví. Ta vaha xaan cuñí ndo nacacá xiñi ndo sin ca tuhun cha ña chachí tahan chihin tuhun Tatyí Ii Nyoo cha naquehen ndo quivi xihna ri. Ñima tuhun ra Cristo cha sacacú chi yo cacahán ra cuan. Ta nyoho tañi tyehe xaan ri tyasohó ndo chi ra. ⁵ Soco tuví iñi tyi ra cha cacatyí tyi apóstol Nyoo cacuví ra, ñima ra vaha xaan cuví ra cuan cha nuu yuhu. Soco nyoho, nyicón ndo chi ra. ⁶ Vasi ña ñihí vahi cuhva cahín, cuñí maa ndo. Soco cutuñí vaha iñi tuhun Nyoo. Ta yucuan sañahá ndi chi ndo chihin tandihí cuhva sacuví ndi.

⁷ O cuñí maa ndo vatyi ña vaha cuhva sacuví quivi cha cahin tuhun ra Cristo chihin ndo. Vatyi ña quehin yahvi chi ndo. Ta sandundahvi chii cha cuenda cha cuñí cha cacu ndo. ⁸ Ñáyivi inga vehe ñuhu tyinyee ñu chii. Vatyi maa ñu chahá xuhun chii. Ta yuhu quehin xuhun cuan ta sacuví tyiño nuu ndo. ⁹ Ta quivi cha chinyaj chihin ndo ña chahí tndoho chi ni noo ndo vasi iyó cha chiñuhu chii. Vatyi ra hermano cha quichi coyo nya ityi Macedonia, ican ra chahá tandihí cha chiñuhu chii. Ta saha vavahi cuenda chii vatyi ña cuñi cuhve tndoho chi ndo. Ta tyicuan ri sacuvi que. ¹⁰ Vatyi chitó vahi tyi maa maa ri tuhun ndicha ra Cristo cahín, ta chité tyi ma cuhve cha tinyaa ni noo ndo, cha cuví ndo ñu ityi Acaya chiña, cha vaha cuñí cha ña chiquén cha coo yahvi chi ndo. ¹¹ ¿Ñáá tuhun cha cahín tyehe caa? ¿Atu cha cuenda cha ña cuñí chi ndo? Ñima. Nyoo chitó ra yoso cha cuñí chi ndo.

¹² Ta cuasacuvi que tari cuhva sacuví mai. Vatyi ña cuñí cuhve ityi chi ra cachicá noo yanga vatyi cacatyí ra tyi sacuví ra tari cuhva sacuví ndi soco ña ndicha. ¹³ Vatyi cacatyí ra cuan vatyi apóstol cuví ra. Soco ña ndicha ra. Vatyi cuví ra noo ra

sandaví ñaha ta nasahá ra chi ra tari noo ra apóstol ra Cristo. ¹⁴ Ta ihya ñima cha iyo cuñí yo cuví. Vatyí cuihna cuví nasaha ra chi ra tari noo ángel cha xiño tuví chihin cha ndichin Nyoo. ¹⁵ Yucuan chaha ra cha nyicón chi ra ña vaha, nasahá tucu maa ra chi ra tari noo ra cha sacuví cha vaha. Soco coo quiví cutachi tuñi Nyoo chi ra cha cuenda cha ña vaha cha sacuví ra.

Tindoho cha nyehé ra Pablo nu chicá noo ra tyiño Nyoo

¹⁶ Inga chaha catyí tiqui chi ndo vatyí ni noo ndo ta ma caca xiñi ndo vatyí loque cha cahín tyehe caa. Soco tatu tyicuan caa chicá xiñi ndo, saña ndo chii na cahín chihin ndo tari noo ra loco. Vatyí tyicuan caa ta cuví sacahnu tucu yuhu chiin chii. ¹⁷ Ñima Sutu Mañi yo catyí chii vatyí sacahni chii tyehe caa. Soco cahín tari cahán noo ra loco. ¹⁸ Vatyí cuaha ra cha cacatyí vatyí tyiño Nyoo cachicá ra, ta ñima, vatyí cahnu xaan casahá ra chi ra. Yucuan chaha cusacahnu tucu yuhu chii ñandihí. ¹⁹ Nyoho, chitó xaan ndo, cuñí maa ndo. Ta quiyí ri tyasohó ndo nu cahán ra cuan. Ta tondo xaan cacuví ra. ²⁰ Soco nyoho ñahri cuenda ndo cha saniñí ra chi ndo cha sacuví ndo tyiño nuu ra. Suhú ra chi ndo ta ña tuví iñi ndo, Sandaví ñaha ra chi ndo. Ta ña cuñí nyehe ra chi ndo. Ta nyacua cañi chihin ndaha ra chi ndo. Ta maa ndo cunyeé xaan ndo cha sacuví ra chi ndo. ²¹ Vasi cahán nuu ndi soco cua catyí ndi, nyuhu vita xaan cuñí ndi yucuan chaha ña cañá iñi ndi sacuví ndi chi ndo tyicuan caa.

Soco inga ra cuan cañá ndicha cuii iñi ra sacotó ra tuhun maa ra. Ta yuhu tucu cañá iñi vasi cahín tari noo ra loco. ²² Tatu ñáyiví hebreo cuví ra, suri cuví tucu yuhu. Ta tatu ñáyiví Israel cuví ra, ican cuví tucu yuhu. Ta tatu vachí ra tata ra Abraham, suri vachi tucu yuhu. ²³ Ta tatu ra sacuví tyiño nuu ra Cristo cuví ra, vihi ca yuhu. Vatyí yaha ca cuhva sacuví tyiño nuu ra Cristo. Vasi cahín tari noo ra loco vatyí catyí tyicuan caa.

Soco ndicha. Vatyí ñihi ca sahá tyiñe ican saha ra cuan. Ta cha cuaha ca chaha ndohí chihin ñi ican saha ra cuan. Ta cuaha ca chaha ñohí vehe caa ican saha ra cuan. Ta cuaha chaha cha cha yatyin cúvi, soco ña chihí. ²⁴ Ta ohon tahan chaha cacañí ra Israel chii chihin ñi. Cha noo chaha cañí ra chii, oco chahun cumi tahan chaha sahvi ra ñi chate. ²⁵ Ta uñi chaha cañí ra chii chihin yutun. Ta noo chaha cacañí ra chii chihin yuu. Ta uñi tahan chaha nyee barcu cha yihí. Ta chichi cha uñi tahan chaha cuan, noo chaha ndo nu tyañuhu noo ñuu ta noo quiví. ²⁶ Cha cuaha xaan cha cuví chii nu chica noi. Ta cha cuaha chaha cuñí tyañi chihin yuvi ndutya. Ta cuaha cha cuví chii. Quita ra suhu nu cuahin. Nyacua nya ra ñui, ra Israel, ta satasí iñi ra chii. Ta ra inga ñuu ñandihí. Ta cuaha cha cuví chii ityi chichi ñuu, ityi nu chiqui, ityi nu tyañuhu. Ta cuaha cha cuví chii mahñu ra cha catyí vatyí hermano cuví ta ñima hermano cuví ra. ²⁷ Ta ñihi sahá tyiñe ta chitati. Ta cuaha xaan chaha ña quixí. Yahí soco: soco xita ta soco ndutya. Cuaha chaha sahi ayunar, o ña chachí ta nanduqui chi Nyoo cuví cuan. Cuaha chaha yahí cha vichin. Ta ni sahme ta ñahri.

²⁸ Ta sin ri nyaá siqui vatyí saní que iñi tandihí ndo: nyoho ta ñu inga ñuu cha yihí cuenda Nyoo. ²⁹ Vatyí tatu noo ndo vita cuñí ndo, yuhu tari cha vita cuñí cha cuenda ndo. O tatu sacco ñu cuatyí nya noo ndo, yuhu quehín tisihi ta ticahan nuu. ³⁰ Tatu cuñí chi cha sacote tuhín tacuhva nacoto ndo tyi ndicha cuví yuhu noo musu Nyoo, cusacote soco cha cuví chii. Vatyí sañahá chi tyi ñahri maa fuerza mai iyó chii. ³¹ Nyoo sutu Sutu Mañi yo Jesucristo, tahan chi cha sacahnú yo chi ra tyicuan ri maa. Ta chitó maa ra vatyí ndicha cha cahín, ñima cuendu cahín. ³² Quiví chinyají Damasco (ñuu nu nicachico yihí barda) ra cha cuví gobernador cha sacuví tyiño nuu rey Aretas ñuu Damasco cuan, cuatyaa ra chi sindaro yuvehe cahnu ñuu cuan,

tyi casahá cuenda ra. Vatyí tatu quite yuvehe ñuu cuan catiñ ra chii ta cunyaca ra chii vehe caa. ³³ Soco ñáyivi iyó chaha barda cuan iyó ventana ñu. Ta ityi ventana sanoo ñu chii. Yihí chichi noo tica cahnu. Ta tyicuan caa sacacü Nyoo chii ndaha gobernador cuan.

12

Noo cha chaha Nyoo vatyí nyehe ra Pablo

¹ Ñahri maa ñihí chihin cha cahín tuhun mai, soco cuanacatyí cha sañaha Sutú Mañi yo chii. ² Ñohó nui chi noo ra cha yihí cuenda ra Cristo. Ta cha iyó uchi cumi cuiya quehen Nyoo chi ra ta chahan ra nya nu cu uñi toto andivi. Soco ña chité tatu chahan ra chihin coño ñuhu ra o chihin cha chiñi tuñi xiñi ra. Ña chité. Nya ri ca maa Nyoo chitó ra. ³⁻⁴ Soco chité vatyí ra cuan chinyaca Nyoo chi ra nya nu iyó ñáyivi vaha, ñu cha chihí. Ña chité tatu chahan ra cuan chihin coño ñuhu ra o chihin cha chiñi tuñi xiñi ra. Noo tuhun ri ca maa Nyoo chitó. Ta nu chahan ra cuan chiñi ra tuhun xehe. Ta ñahri ityi iyó chi ñáyivi cha nacatyí ñu tuhun xehe cuan. ⁵ Tahán chi sacahní chii chihin cha sañahá Nyoo chii quivi cuan. Soco ña sacahní chii cha cuenda cuan. Sacahní chii, soco chihin cha ñahri fuerza mai iyó chii. ⁶ Tatu cuñí tiqui cahín tuhun mai, ñima noo tuhun tondo ri cuví. Vatyí maa maa ri cha ndicha cuacatyí. Soco ma catyí vatyí coto cahnu xaan sahá ñáyivi chii. Vaha ca nyehe ñu cuhva vaha iyé ta cuhva vaha sañahí, tyicuan ta coto ñu tatu ra vaha o ra ña vaha cuví.

⁷ Ña cuñí Nyoo cha sacahnú xain chii chihin cha sañahá ra chii. Yucuan chaha chahá ra cha sanyehé xaan cuihna tindocho chii. Tari uhvi nu quiñi noo iñu cahnu, tyicuan caa uhvi chii. Vatyí tyicuan caa ta ma cuví cuyai chihin cha sañahá Nyoo chii. ⁸ Ta cha uñi chaha chiquen chi Sutú Mañi yo na tinyaa ra tindocho cuan siqui. ⁹ Soco maa Sutú Mañi yo catyí ra chii tyehe caa: “Chahí tandihí

cha vaha cha iyó chii chuun. Vatyí yucuan cuví cha chiñuhú chuun. Vatyí tatu ñáyivi ta ñahri maa tunyee iñi maa ñu iyó chi ñu, yucuan ta cuví cunyaa maa maa ri tunyee iñi mai chihin ñu”, catyí ra. Yucuan chaha si xaan cuñí cha ñahri fuerza mai iyó chii. Vatyí tyicuan caa ta cuví cunyaa tunyee iñi ra Cristo chihin. ¹⁰ Yucuan chaha si xaan cuñí cha ñahri tunyee iñi mai iyó chii. Vasi cahán ñáyivi chii, vasi chicá nyicon ñu chii, vasi ñahri cha iyó chii, vasi cuaha cha cuví chii, soco si xaan cuñí cha nyehí tindocho cha cuenda maa ra Cristo. Vatyí tatu ñahri fuerza mai iyo chii, soco ñihí ca cuñí chihin fuerza maa Nyoo.

Chicá xiñi ra Pablo tuhun ñu yihí cuenda Nyoo ñuu Corinto cuan

¹¹ Cahín tari noo ra loco. Soco maa ndo cuñí ta cahín tyicuan caa vatyí ña sahá ca ndo ñáyivi chii. Vatyí maa ndo tahán chi cuyaa ndo chihin. Vasi noo ra cha ñima ri tuhun cuví yuhu, soco nyaca cuví ra cha catyí tyi apóstol cuví ra, ta ña ndicha ra. Cuñí maa ra tyi vaha xaan ca ra cha nuu inga ra chicá tyiño Nyoo. ¹² Nyehe ndo yoso caa tyiño Nyoo cha sacuvi mahñu ndo. Ta chihin cha cama iñi ta cunyej tandihí tindocho cha nyehi. Ta cuaha xaan milagru sañaha Nyoo chi ndo tacuhva coto ndo vatyí ndicha cha cuví yuhu noo ra chicá tyiño maa ra. ¹³ ¿Atu vaha ca cuhva tyiñuhí chi yañi yo inga ñuu cha nuu nyoho? Ñima. Inuu ri cuhva tyiñuhí chi tandihí ndo. Noo ri cha ña sacuví chihin nyoho cha ña cuñí cuhve tindocho chi ndo. Saha ndo ticahnu iñi chii tatu ña vaha cuhva sacuví.

¹⁴ Ta vityin cha iyó vahi cha quichi nyehi nu nyicu ndo. Cha cu uñi chaha vityin. Ta ñahri tindocho tyai siqui ndo. Vatyí ñima cha iyó chi ndo vachí nanduquí. Chi maa ndo cuví cha cuñí yuhu. Vatyí sutu, ican tahan chi cuhva cha chiñuhú chi sehe. Ta ñima sehe nducú cha chiñuhú chi sutu. ¹⁵ Yucuan chaha yuhu nyacua si cuñí cusanaí cha iyó chii cha cuenda cha

vaha chi ndo. Ta nyacua sîi cuñí cuhve ñayivî cha cuenda ndo. Soco ta caa ri vatyî tatu cuñí que chi ndo, maa ndo ña cuñí vaha ndo chii.

¹⁶ Ta vasi chitó cachi ndo vatyî ña chahí tîndoho chi ndo, soco yîhî ndo catyî ndo vatyî sandavî ñahi chi ndo ta ña tuvî îñî ndo. ¹⁷ ¿Atu sandavî ñahi chi ndo chihin nya noo ra cha tachî nu nyicu ndo quivî cuan? ¹⁸ ¿Atu sandavî ñaha ra Tito chi ndo quivî tachî chi ra chihin inga yañî yo cuan nu nyicu ndo? Ña sandavî ñaha ra chi ndo. Vatyî nyuhu ña tuhvá ndi sandavî ñaha. Vatyî ñn ri cuhva iyó ndi. Ta ñn ri cuhva sacuvî ndi.

¹⁹ Vasi chicá xiñî ndo vatyî cuahan ndi tumañî îñî chi ndi cha cuenda tuhun cha cahán ndi ihya, soco ñîma tyicuan caa. Vatyî tandîhi tuhun ihya cahán ndi cha cuenda cha vaha chi maa ndo tacuhva cohon nuu ca ndo chi Nyoo. Vatyî ndicha cha cuñí ndi chi ndo. Ta cahán ndi soco chihin nuu Nyoo ta cha cuenda maa ra Cristo. ²⁰ Chicá xiñî coto îñî ndaa îñî noo nyicú ndo ta chaí. Ta ma cutahan îñî cuhva nyicú ndo. Ta maa ndo ma cutahan îñî ndo cuhva cucahin chi ndo. Yuhví coto coo tîsîhi, coto nya ndo quichí cuvî îñî ndo cha chii noo tahan ndo, coto nya ndo cuxaán ndo chi tahan ndo, coto nducú ndo maa maa ri cha vaha chi maa ndo, coto nya ndo ñîca ndo cuendu, coto cahán cuehe ndo chi tahan ndo, coto nya ndo cahnu sahá ndo chi ndo. Yuhví coto nyehi tyî ña cachi ña ndaa nyicú ndo. ²¹ Ta yuhví coto cha cuhin inga chaha nu nyicú ndo, Nyoi cuhva ra cha cucahan nui cha cuenda nyoho. Ta chicá xiñî coto quita ndutya nui cha cuenda cha nyacuvî ndo. Vatyî yîhî ndo sacuvî ndo cuatyî nu quichî quivî. Ta nya vityin ta ña ndu uvî îñî ndo cha ca iyó ndo chihin ñusîhi ta ñîma ñasîhi ndo cuvî, ta iyó ndo chihin rayî ta ñîma yî ndo cuvî. Ta ña sandîhî ndo tuhun cha sacuvî ndo ñáá ndîhi cha ña vaha.

13

Chahá ra Pablo tuhun chi ñu Cor-

into, na saha vaha ñu cuenda chi ñu tatu vaha cuahán ñu chihin Nyoo

¹ Quivî cha cuquichi inga chaha nu nyicu ndo cuvî chi chaha cu uñî. Yucuan ta cuvî cundaa tyiño ñu cha sacuvî cuatyî. Soco cuñí chi uvi o uñî cha ndaa. ² Vatyî quivî chahin nu nyicú ndo cha cu uvi chaha, catyî chi ra sacuvî cuatyî cuan, na sandîhi ra tuhun. Ta vityin catyî tiqui inga chaha chi ra, ta chi tandîhi ndo. Vatyî tatu cha quichi inga chaha, ta sacuvî ca ndo cuatyî cuan, ma cundahvi cuñî nyehi chi ndo. ³ Tyicuan ta coto ndo cha cuñí xaan ndo coto ndo. Vatyî ndicha ndicha cha chihin fuerza maa ra Cristo cahín. Vatyî ra Cristo ñîma noo ra ñîma ri tuhun cuvî ra. Yucuan chaha sañahá ra tunyee îñî ra chi ndo. ⁴ Ndicha vatyî chihî ra nu cruzi tari noo ra cha ñahri tunyee îñî iyó chii. Soco nandotó ra ta iyó ra chihin tunyee îñî Nyoo. Ta tyicuan caa tucu maa ndi vasi ñahri fuerza maa ndi iyó chi ndi. Soco ñn ri cuvî ndi chihin ra Cristo. Ta iyó ndi chihin tunyee îñî maa Nyoo vatyî tyicuan caa ta cuvî tyinyee tucu nyuhu chi nyoho.

⁵ Saha ndo cuenda chi ndo tatu ñî vaha îñî ndo cuahán ndo chihin Nyoo. Saha ndo cuenda vatyî ra Cristo ñohó ra añîma ndo tatu chinó vaha îñî ndo chi ra. Soco tatu ñîma chihin cha ñî îñî ndo cuahán ndo chata Nyoo, ra Cristo ña nyaá ra chihin ndo. ⁶ Soco chitó vahi tyî coo quivî cunacoto ndo tyî vaha cuhva tyinyee ndi chi ndo tacuhva cuvî cuhun vaha ndo chihin ra Cristo. ⁷ Ta chicán tahvi xaan ndi chi Nyoo chaha ndo, tacuhva vatyî ma sacuvî ndo cha ña vaha. Ñîma cha cuñí ndi tyî catyî ñáyivî tyî vaha ndi. Soco cha cuñí ndi vatyî nyoho sacuvî ndo maa maa ri cha vaha. Ñahri saha vasi catyî ñáyivî, an vaha, an ña vaha cuhva cha sacuvî ndi. ⁸ Vatyî nyaá síqui ndi cha sacuvî ndi cha vaha. Ma cuvî tixehe ndi tuhun ndicha. Noo ri cha cuvî sacuvî ndi, cha sañahá ndi tuhun ndicha. ⁹ Yucuan chaha cusî xaan cuñí ndi cha ñahri fuerza maa ndi iyó chi ndi, ta cuhva tyî nyee

cuñí ndo chihin fuerza maa Nyoo. Ta tyicuan ri chicán tahvi ndi chaha ndo na vaha ca cuhun ndo chihin Nyoo nyacua nya cha ñahri ca cumañi chi ndo. ¹⁰ Sacuhín carta ihya chi ndo cha ni ri ca cha cumañi quichi nu nyicú ndo. Vatyí sanduvaha ndo chi ndo. Tyicuan ta ma cuñi ca chi cha cahín chi ndo quivi chai nu nyicu ndo. Vatyí ndicha cha chahá Nyoo ityi chii cha sahí cuenda chi ndo. Soco chahá ra tyiño ihya chii vatyí sandunyeé que iñi ndo. Ta ñima cha sanducuihyá ndihí que iñi ndo.

¹¹ Ta nu ndihí cahín, yañi, catyí chi ndo, na nducu ndo cuhva nicoo vaha ndo ta sñi cuñi ndo. Nanducu ndo cuhva coo cuiti ndo nuu Nyoo cha ñahri cumañi chi ndo. Na cunñi iñi ndo, na coo vaha ndo chihin tahan ndo. Ta Nyoo ra cuñí xaan chi ndo, ta ra chahá cha taxi coo ñima ndo na cunyaa ra chihin ndo. ¹² Ta nacuhva maa ndo nocumi chi noo noo tahan ndo chihin cha sñi cuñí ndo nyehé ndo chi ñu. ¹³ Ta vachí nocumi chi ndo sahá tandihí ñu yihí cuenda Nyoo ñuu ihya.

¹⁴ Nacuhva Sutu Mañi yo Jesucristo cha vaha coo ñima ndo. Ta nacoto ndo tyi Nyoo cuñí xaan ra chi ndo. Ta na cunyaa Tatyí Ii ra chihin ndo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ityi Galacia Cha Yihí Cuenda Nyoo

Ra Pablo tyaá ra noo carta chi ñu ityi Galacia cha yihí cuenda Nyoo

¹ Yuhu ra Pablo cuví noo apóstol. Soco ñima ñáyivi tachí chii. Ta ñima rayí catyi vatyí ñihí yuhu tyiño ihya. Soco maa ra Jesucristo ta maa Nyoo Sutu yo chaha ra tyiño ihya chii. Vatyí ican Nyoo sanandoto chi ra Cristo mahñu ñu chihí. ² Yuhu ta tandihí yañi yo cha nyicú chihin, tyaá ndi carta ihya chi nyoho ñu yihí cuenda Nyoo tandihí vehe ñuhu Galacia. ³ Nyoo Sutu yo ta Sutu Mañi yo Jesucristo nasoco ra chi ndo ta nacuhva ra cha taxi ri coo aña ndo. ⁴ Vatyí maa ra Jesucristo chaha ra ñayivi ra tyiño nuu yo cha catyi cuatyí yo. Vatyí tacuhva sacacú ra chi yo mahñu ñu quiñi iyo cha iyó siqui ñuhu ñayivi ihya vityin. Vatyí tyicuan caa tyaá maa Nyoo Sutu yo cuhva tyi sacuvi ra Cristo. ⁵ Yucuan chaha na sacahnu yo chi maa Nyoo tyicuan ri maa. Ta na cuví chi tyicuan caa.

Ñahri ca inga cuhva cuví cacu aña mo yo

⁶ Iyo xaan cuñí vatyí nyoho numi xaan cuahan sandoó ndo chi Nyoo, ra nacana chi ndo tyi nicoo vaha ndo chihin ra cha cuenda tumañi iñi cha sahá ra Cristo chi yo. Ta vityin sin caa ityi natyihí ndo cuahan ndo. Ta cuñi maa ndo tyi cucacu ndo chihin cuan. ⁷ Soco ñahri ca inga cuhva cuví cacu aña mo. Soco iyó ra cuñí satondo xiñi ndo. Ta cuñí ra sativi ra tuhun cha sacacu ra Cristo chi yo. ⁸ Ñahri saha, an cuví ri nyuhu, an cuví ri noo ángel cha quichi nya andivi, soco tatu tyehe ta cahán noo ndi tuhun ra Cristo nuu ndo, ta sin caa, ta ñima tari cuhva sañaha ndi chi ndo quiñi cuan, Nyoo cutachi tuñi ra

chi ndi. ⁹ Cha catyi tuhun ihya chi ndo quiñi cuan soco cuacatyí tiqui inga chaha chi ndo vityin. Tatu yóo cha cahán tuhun cha cacú aña mo yo chihin ndo ta sin caa, ta ñima cuhva cha chiñi ndo quiñi xihna ri, Nyoo cutachi tuñi ra chi ra cahán tyicuan caa.

¹⁰ Cha catyi tuhun ihya chi ndo, ñima cha nduquí cuhva savahi chii nuu ñáyivi. Soco nduquí cuhva savahi chii nuu Nyoo. Tyehe ta nduquí cuhva savahi chii nuu ñáyivi, ñima noo ra sacuvi tyiño nuu ra Cristo cuví.

Yoso caa cha nanduví ra Pablo noo ra chicá tyiño Nyoo

¹¹ Soco coto ndo tuhun ihya yañi, vatyí tuhun ra Cristo cha cahán yuhu, ñima tuhun cha ndichí xiñi ñáyivi cuví. ¹² Ñima ñáyivi sañaha chii. Yori sañaha chii. Soco suri maa ra Cristo sacotó chii.

¹³ Vatyí nyoho chiñi ndo yoso caa chinyacuvi quiñi cuan, quiñi ñohi cuenda ñu Israel. Ta chitó ndo yoso caa cha xaan chica nyiquen chi ñu yihí cuenda Nyoo. Ta nduquí cuhva sativi cuhva chinó iñi ñu. ¹⁴ Ta ñohi cuenda ñu Israel, yuhu cuví ra cuahan ityi nuu ca ta ñima ca suhva ca ra tahin cha sin ri cuiya ndi. Vatyí cuñi xaan que sacuvi yoso cuhva chinyacuvi maa sutu chahni ta ityi chata ca. ¹⁵ Soco nya ta ni cumañi caqui ta tyaá Nyoo cuhva tyi cusaha ra tumañi iñi chii. Ta nya cha chaa maa chi quiñi cha tyaá ra cuhva, yucuan ta nacana ra chii. Vatyí cuñi xaan ra chii. ¹⁶ Ta tyicuan caa sacuvi ra vatyí cohon nui chi Sehe ra. Tacuhva vatyí cahin tuhun Sehe ra, ra Cristo, chihin ñáyivi cha ñima ñu Israel cuví, tacuhva cacu aña mo. Ta quiñi cha cuví tyehe caa, ña nduquí cuhva cha catyi ñáyivi chii ñáa cha tahán chi sacuvi. ¹⁷ Ta ni ña chahin nya Jerusalén nu canyicu ra apóstol, vasi cha chicha ca ra chihin tuhun Nyoo, vatyí maa ra cha naha cana Nyoo chi ra ta ñima ca yuhu. Soco chahin nya Arabia. Tyicuan ta

cuanuhu tiqui inga chaha nya Damasco.

¹⁸ Cha yaha uñi cuiya tyicuan ta chahin nya Jerusalén, ta chicohon nui chi ra Pedro. Ta ndoj chihin ra chahun quivi. ¹⁹ Soco ña nyehi chi inga apóstol. Noo ri ra Jacobo yañi Sutu Mañi yo nyehi. ²⁰ Ta chihin nuu Nyoo ta catyí chi ndo vatyi tuhun cha catyí chi ndo nu tutu ihya, cha ndicha cuví.

²¹ Cha yaha cha chahin Jerusalén ta chahin ityi Siria ta ityi Cilicia. ²² Soco ra yañi yo cha canyicu vehe ñuhu ra Cristo cha nyaa nicacahnu Judea, ña ñoho nuu maa ra chii. ²³ Tacuhva cha cachiñi ri ra cahan ñu tuhun, vatyi catyí ñu: “Ra cha chica nyicon chi yo quivi cuan, vityin cahán noo ra nuu ñáyivi na nachino iñi ñu chi ra Cristo. Ta quivi cuan cuñi ra sativi ra tuhun ra Cristo”, catyí ñu. ²⁴ Ta ra canyicu vehe ñuhu ra Cristo casacahnu ra chi Nyoo cha cuenda cha sacuvi Nyoo chihin tyicuan caa.

2

Ra nyisó tyiño vehe ñuhu Jerusalén, ndoó ra vaha cuhva sahá tyiño ra Pablo

¹ Cha yaha cha uchi cumi cuiya, chahin Jerusalén inga chaha chihin ra Bernabé. Ta cahan ra Tito chihin ndi. ² Chahin nyicuan vatyi maa Nyoo sañaha chii vatyi tahán chi cuhin Jerusalén. Ta nacatyí chi ñu yoso caa sañahí tuhun ra Cristo chi ñu cha ñima ñu Israel cuví. Quita sin chihin ra cha canyiso tyiño vehe ñuhu, ta chahi cuenda chi ra yoso caa tuhvé cahin chihin ñu. Coto ma candoo ra vaha ta cacatyí ra vatyi yuhu sahá tyiño caha ri mai. ³ Soco candoo ra vaha. Vatyi ni ri chi ra Tito ta ña saniñi ra cha sacuvi ra costumbre circuncisión. Ta ra Tito ñima ra Israel cuví ra. ⁴ Ndicha vatyi quihvi xehe suhva ra cha catyí vatyi yañi yo cuví chi ra, soco ñima. Vatyi cuñi ra nyehe nyaa ra cuhva iyó yo. Vatyi libre iyó yo cha cuenda ra Cristo Jesús. Soco cuñi ra cuan tyi cunyaca ñaha tuculey chahnu chi yo. ⁵ Soco ni noo cuhva

ta ña chaha ndi cha cunyaca ñaha ra cuan chi ndi. Vatyi cuñi ndi vatyi nyoho ma saña ndo cha ndicha tuhun ra Cristo cha cacu aña yo.

⁶ Soco maa ra canyisó tyiño vehe ñuhu, ñahri tuhun chaa chaha ra chii. Ta vasi cahnu tyiño canyisó ra cuan, soco cha cuenda chi yuhu, ñahri saha. Vatyi Nyoo ña sahá ra cuenda cuhva tyiño nyisó yo. Soco aña yo sahá ra cuenda. ⁷ Cha nuu cha catyí ra canyiso tyiño vehe ñuhu cuan chii ñáá ndihi tuhun, maa ra canacoto ra vatyi maa Nyoo tachi chii vatyi cahin tuhun ra Cristo chihin ñu cha ñima ñu Israel cuví. Tari tachi ra chi ra Pedro vatyi cucahan ra suri tuhun ra Cristo cuan chihin ñu Israel. ⁸ Vatyi suri maa Nyoo tachi chi ra Pedro tyi cuví ra apóstol cuenda ñu Israel. Ta tachi tucu ra chi yuhu tyi cuví apóstol ra Cristo cuenda ñu cha ñima ñu Israel cuví.

⁹ Yucuan chaha ra Jacobo, ra Pedro ta ra Juan ra cacuvi nuu yucuan, nicohón nuu ra vatyi Nyoo chahá ra tunyee iñi chii cha cahin tuhun ra Cristo chihin ñáyivi. Ta chaha ra ndaha ra chii, ta chi ra Bernabé vatyi candoo ra vaha cha sahatyiño ndi mahñu ñu cha ñima ñu Israel cuví. Ta maa ra casahatyíño ra mahñu ñu Israel. ¹⁰ Noo ri vatyi catyí ra chi ndi vatyi na nicohon iñi ndi ta natyinyee ndi chi ñu ndahvi. Ta ican cuví cha nanducú xain cuhva sacuvi tandihi quivi.

Ra Pablo cahán ra chi ra Pedro vatyi ña vaha cha nyacuví ra

¹¹ Soco quivi cahan ra Pedro ñuu Antioquía, cahan vavahi chi ra chihin nuu ra vatyi ña vaha cha nyacuví ra. ¹² Vatyi cha xihna ri vaha sacuvi ra vatyi chachi ra chihin ñu cha ñima ñu Israel cuví, nyacua nya cha cha suhva ñáyivi Israel cha tachi ra Jacobo. Tyicuan ta quichaha ña chachí ca ra chihin ñu. Tyicuan caa sacuvi ra vatyi yuhví ra coto cahan ra itá iñi costumbre circuncisión cha cha coyo cuan chi ra. ¹³ Tyicuan ta inga ra Israel cha yihí cuenda ra Cristo ndu

in ri ra chihin ra Pedro. Ta sacuvi ra cha ña vaha cuan. Vaty ndu uvi yuhu ra tari ndu uvi yuhu ra Pedro. Ta nyacua nya ra Bernabé ta ndutahan ra chihin ra. ¹⁴ Soco nyehi vaty ña vaha cuahán nyacuvi ra. Ñima tari cuhva catyí tuhun ra Cristo. Yucuan chaha catyí chi ra Pedro chihin nuu tandihi ñu canyicu cuan: “Yoho cuvún noo ra Israel. Ta iyón tari iyó ñáyivi cha ñima ñu Israel cuví. ¿Yoso caa cha cuñún saniñun chi ñu tyi sacuvi ñu costumbre cha sacuvi ñu Israel? Ta ni maun ta ña sacuví con”, catyí yuhu chi ra.

¹⁵ Maa yo cha cuví yo ra Israel nya ta cacu yo, ña sacuví yo cuatyí tari sacuví ñu cha ñima ñu Israel cuví. ¹⁶ Soco chitó yo vatyí ma cuví saváha yo chi yo nuu Nyoo chihin cha nanducú yo cuhva sacuvi yo ley chahnu cha tyaa ra Moisés. Soco nduvahá yo nuu Nyoo cha cuenda cha chinó ri ñi yo chi ra Jesucristo. Yucuan chaha chinó tucu ñi maa yo chi ra. Vatyí tyicuan caa ta nicoo vaha yo chihin Nyoo. Ta ñima cha cuenda cha nducú yo cuhva sacuvi yo cha catyí ley. Vatyí ni noo yo ta ña nduvahá yo nuu Nyoo chihin cha nanducú yo cuhva sacuvi yo cuhva catyí ley chahnu.

¹⁷ Soco vityin tatu nducú yo cuhva nduvaha yo nuu Nyoo cha cuenda ra Cristo, cuñí chi catyí vatyí nacoto yo tyi iyó tucu cuatyí yo tari iyó cuatyí ñu cha ñima ñu Israel cuví. Tatu tyicuan caa, ¿atu cuñí chi catyí vatyí ra Cristo sacuví ra tyi iyó cuatyí yo vatyí sandoo yo ley ta nachino ñi yo chi ra? Ñima. ¹⁸ Soco tyehe ta naquehen tucu yo ley cha cha yahá sandoo yo, yucuan ndicha coo cuatyí yo. ¹⁹ Vatyí ley cuan sañahá chi chí vatyí tahan chí cúvi, ta yucuan chaha sandihí tuhun cha nduqui cuhva caqui chihin ley cuan, ta chihí cha cuenda chí cuví cuan, tacuhva cuví coi cha cuenda Nyoo. ²⁰ Yuhu, tari cha chihí nuu cruzi in ri chihin ra Cristo. Ta ñima ca ñáyivi mai iyé soco ra Cristo iyó ra añime. Ta ñáyivi ra cha iyé vityin, iyé soco chihin cha chinó ñi chí

ra cha cuví ra Sehe Nyoo. Ican ra cuñí ra chí, ta chihí ra cha catyí cuatyí yuhu. ²¹ Ña cuñí yuhu sacuachiye cha vaha Nyoo. Vatyí tatu tyehe ta cuví cacu añima yo cha cuenda ley, ñahri tuhun chihí ra Cristo cuví chí cuan.

3

Naquehén yo Tatyí Ii Nyoo cha cuenda cha chinó ñi yo chí ra Cristo

¹ ¡Ñana cha tondo iyó nyoho ñu canyicu Galacia chíña! ¿Yóo cha sativí chí ndo vatyí ña cuñí ca ndo quichaha ndo tuhun cha ndicha? Cachi xaan chahá ndi cuenda tuhun ra Jesucristo chí ndo. Ta cutuñi vaha ñi ndo ñáá cuenda chíhí ra nu cruzi. ² Noo ri cuñí ndaca tuhun chí ndo. ¿Atu naquehen ndo Tatyí Ii Nyoo cha cuenda cha sacuví ndo cha catyí ley ra Moisés, o cha cuenda cha chinó ñi ndo tuhun ra Cristo cha chíhí ndo? ³ ¿Yoso caa cha tondo xaan iyó ndo vityin? Ta quivi xihna ri vaha xaan quichahá ndo chí Nyoo chihin tunyee ñi Tatyí Ii ra. Soco vityin, ¿yoso caa cuñí ndo coo ndo ñáyivi chaa chihin fuerza maa ndo? ⁴ ¿Atu cha caha ri nyehé ndo cha sacuvi Tatyí Ii Nyoo chihin ndo? Ñima cha caha ri cuví, cahví ñi. ⁵ ¿Ñáá tuhun chahá Nyoo Tatyí Ii ra chí ndo, ta sacuví ra milagru mahñu ndo? Ñima cha cuenda vatyí nducu ndo cuhva sacuvi ndo cha catyí ley, soco cha cuenda vatyí chinó ñi ndo tuhun ra Cristo cha chíhí ndo.

⁶ Ra Abraham, chingo ñi ra tuhun cahan Nyoo chihin ra, yucuan chaha cuví ra noo ra vaha nuu Nyoo. ⁷ Yucuan chaha tahan chí coto ndo vatyí ñu cha ndicha cuví ñáyivi chí ra Abraham, ican ñu cuan chinó ñi ñu chí Nyoo. ⁸ Ta cha naha ndoo tuhun Nyoo nu tutu. Ta catyí chí vatyí nu cuahán ca chí quivi, cusacuvi Nyoo tyi nduvaha ñáyivi cha ñima ñu Israel cuví nuu ra cha cuenda cha chinó ñi ñu chí ra. Yucuan chaha catyí Nyoo chí ra Abraham ta cha naha: “Tandihí ri maa ñu cunasoque cha cuenda maun”, catyí Nyoo chí ra. ⁹ Yucuan

chaha ñu cha chinó iñi chi ra Cristo, Nyoo nasocó ra chi ñu ñn ri chihin ra Abraham, vatyí chinó iñi tucu maa ra.

¹⁰ Ñu cha itá iñi ley cha tyaa ra Moisés, cutachi tuñi Nyoo chi ñu. Vatyí tuhun Nyoo catyí. “Tandihí ñu cha ña sacuví tandihí cuii maa tuhun cha nyaá nu libru ley cuan, cutachi tuñi Nyoo chi ñu.” ¹¹ Ta ndicha vatyí yori yo nduvaha yo nuu Nyoo cha cuenda cha itá iñi yo ley cuan. Vatyí tuhun Nyoo catyí chi: “Ra nduvahá nuu Nyoo cha cuenda cha chinó iñi ra, coo ra ñayiví”, catyí tuhun Nyoo. ¹² Ta ley ra Moisés ña cu ñn ri chi chihin cha chinó iñi yo chi ra Cristo. Vatyí catyí ley cuan: “Yóo ñu cha sacuví tandihí cuii ley ihya, coo ñu ñayiví cha cuenda cuan”, catyí chi.

¹³ Ra Cristo natava ra chi yo ndaha ley cha catyí tyi tahán chi cutuñi chi yo cha cuenda cuatyí yo. Vatyí maa ra nanduví ra noo ra iyó cuatyí tyiño nuu yo. Vatyí catyí tuhun Nyoo: “Ñima ra vaha cuví ra cha chihí ta tacaá nu yutun.” ¹⁴ Tyicuan caa cuví tacuhva vatyí cha cuenda ra Cristo Jesús ta nasocó Nyoo chi ñayiví cha ñima ñu Israel cuví, tari catyí ra chi ra Abraham tyi cunasoco ra chi ra. Ta chihin cha chinó iñi yo chi Nyoo, naquehén tandihí yo Tatyí Ii cha catyí Nyoo tyi cuhva ra chi yo.

Ley chahnu sañahá chi chi yo vatyí iyó cuatyí yo, soco ña sacacú chi chi yo

¹⁵ Yañi, cuacuhve noo cuhva chi ndo, cuhva iyó yo siqui ñuhu ñayiví ihya. Tatu noo ra catyí ra vatyí cucuhva ra cha cucuhva ra chi inga ra. Ta tatu cha yahá tyihí ra firma, yori cuví satani. Ta yori cuví natyiso suhva ca siqui. ¹⁶ Ta vityin, Nyoo catyí ra tyi cucuhva ra cha cucuhva ra chi ra Abraham ta chi nonga ra cha vachi tata ra. Ña catyí nu tutu Nyoo vatyí cuhva ra chi cuaha ra vachi tata ra, soco chi nonga ri ra. Ta ican ra cuan cuví ra Cristo. ¹⁷ Cha catyí yuhu, ican cuví ihya: Nyoo natyihí tahan ra tuhun chihin ra Abraham.

Ta ñn ri tuhun cahán ra. Tyicuan ta yaha cumi ciento oco uchi cuiya ta chaá ley cha tyaa ra Moisés. Soco ma cuví casi ley cuan nu natyihí tahan Nyoo tuhun chihin ra Abraham. Ta ma cuví casi chi nu naquehen yo cha catyí Nyoo tyi cuhva ra chi yo. ¹⁸ Tyehe ta naquehén yo cha tahán chi chi yo cha cuenda ley ra Moisés, cha caha ri cuví tuhun natyihí tahan Nyoo chihin yo. Soco vatyí Nyoo catyí ra chi maa ra Abraham vatyí cuhva maa ra chi ra.

¹⁹ Tatu tyicuan caa, ¿ñáá cuenda vaha ley ra Moisés? Chahá Nyoo ley cuan soco cha yahá catyí ra tyi cuhva ra cha cucuhva ra chi yo. Vatyí ley cuan sanatuví chi cuatyí yo. Ta ndoo chi nyacua nya quiví quichí ra Cristo ra cuví tata ra Abraham. Ta chi maa ra Cristo catyí Nyoo tyi cuhva ra cha cucuhva ra. Ta ángel Nyoo chahá cuenda ley cuan chi ra Moisés. Ta ra Moisés chahá ra chi ñáyiví. ²⁰ Soco Nyoo noo tuhun ri maa ra cahán ra chihin ra Abraham quiví cuan. Ta ña chiñuhú cha nducu ra noo ra nacatyí tuhun cuan chi ra Abraham.

²¹ ¿Atu cuñí chi catyí vatyí ley cha tyaa ra Moisés ña chachí tahan chihin cha catyí Nyoo tyi cuhva ra chi yo? Ñima. Soco tyehe ta cuví coo yo ñayiví chaa cha cuenda ley cuan, yucuan ndicha nduvaha yo nuu Nyoo cha cuenda chi. Soco ma cuví. ²² Vatyí catyí nu tutu Nyoo tyi iyó cuatyí tandihí cuii ñáyiví. Vatyí tyicuan caa ta ñu chinó iñi chi ra Jesucristo cuví ñihi ñu ñayiví chaa cha catyí Nyoo tyi cuhva ra chi yo.

²³ Ta ni cumañi ca quichi tuhun cha chinó iñi yo chi ra Cristo, ley cuan chicumí chi chi yo tari cha ñohó yo vehe caa. Vatyí nyatu yo nyacua nya sañaha Nyoo chi yo yoso caa chino iñi yo chi ra. ²⁴ Ta ley cuan cuví tari noo ñu cha sahá cumi chi ra cuatyaa. Vatyí ley sahá cumi chi yo tari ra cuatyaa nyacua nya quiví quichí ra Cristo. Ta cuví chinó iñi yo chi ra ta nduvaha yo nuu Nyoo. ²⁵ Ta vityin cha chaá quiví cha chinó iñi yo chi ra

Cristo, ña sahá cumi ca ley cuan chi yo tari noo ra cuatyaa.

26 Vatyí tandihí yo cuví yo sehe Nyoo vatyí chinó ñni yo chi ra Cristo Jesús. 27 Ta tandihí yo condutya yo ta ndu ñn yo chihin ra Cristo. Vatyí nyaá ra añima yo. 28 Ña ñni xaan ca cha cuví yo, an ñu Israel, an ñu Grecia, an cuví ri yo ñu libre iyó, an cuví yo ñu iyó chitoho. An cuví yo rayí, an cuví yo ñusihi, soco ña chiñuhu ca cuan. Vatyí cha ñn ri cuví yo chihin ra Cristo, noo ri cuví yo chihin ra. 29 Ta tatu cuenda ra Cristo yihí ndo, ndicha cha ñáyivi vachi tata ra Abraham cuví ndo. Ta ñihí ndo cha catyí Nyoo chi ra Abraham tyi cuhva ra chi ra.

4

1 Cuacuhve minoo cuhva chi ndo. Noo ra cuehe tatu chihí sutu cue, ta sandoo sutu cue tandihí cha tyayí ra chi cue, ra cuehe ihya ma cuví cotyíño ñaha cue cha tyayí sutu cue. Nyacua nya quívi cuahnu cue ta cuví cotyíño cue. Ta cha ñi ri ca cha ta cuahnu ca cue, cuví cue tari noo musu ri. Vasi chi maa cue cuví tandihí cha tyayí sutu cue. 2 Iyó ra cumí chi cue nyacua nya chaa cuiya cue cha catyí sutu cue, tyi naquehen cue cha tyayí cuan. 3 Ta tyicuan caa cuví maa yo. Cha ñi ri ca cha ta quichí ca ra Cristo, cuví yo tari noo musu ri chi cha nyacá ñaha siqui ñuhu ñáyivi. 4 Soco quívi tahan chi, Nyoo tachí ra chi Sehe ra, sacacu noo ñaha sihi chi ra. Ta chinyacá ñaha ley chahnu chi ra. 5 Tachí Nyoo chi ra tacuhva sacacú ra chi yo ndaha ley cuan. Vatyí tyicuan caa ta Nyoo naquehén cuenda ra chi yo tari sehe ra.

6 Ta vatyí sehe ra nanduví yo, Nyoo tachí ra Tatyí Ii ra Cristo cunyaa añima yo. Ta cha cuenda Tatyí Ii ra caná chaa yo chi Nyoo ta catyí yo: “Sutu Mañi yuhu.” 7 Yucuan chaha sehe Nyoo cuvun ta ñima ca noo musu ri. Ta cha cuenda cha cuvún sehe Nyoo, chahá ra cha vaha cha tahán chi chuun cha cuenda ra Cristo.

Chicá xiñi ra Pablo cha cuenda ñu yihí cuenda Nyoo

8 Quívi ta cohon nuu ca ndo chi Nyoo, cuví ndo musu noo cha ñima Nyoo cuví. 9 Soco vityin ñohó nuu ndo Nyoo, o maa Nyoo ñohó nuu ra chi ndo. ¿Yoso caa cha cuñí ndo natñn tucu ndo noo tuhun ndahvi cha ñima ri tuhun, ta nanduvi tucu ndo musu inga chaha? 10 Nyoho sanducahnú ndo quívi vico, quívi natyacú yoo, ta vico cuiya. 11 Yuhví xain coto vaha ñahri maa tuhun sahá tyiñe chihin ndo.

12 Yañi, chacú ndahvi nuu ndo na nanduvi ndo tari mai (cha ña nyacá ñaha ca ley chii). Vatyí yuhu cha nanduví tari maa ndo, soco ñima cha sativí ndo chii. 13 Vatyí cha chitó ndo quívi chahan nui ñuu ndo yihí noo cuehe chii. Ta chaha chi cuhva cahin tuhun ra Cristo chihin ndo. 14 Ta cuehe cuan cuví tari noo prueba cha cuenda vatyí ña tyaa xiin ndo chii. Soco vaha naquehen cuenda ndo chii, tari noo ángel Nyoo, ta tari cha vatyí suri maa ra Cristo cuví. 15 ¿Nya nyaa cha sihi xaan cuví chi ndo chihin vityin? Vatyí yuhu cuví cha ndaa vatyí quívi cuan, nyacua caña ñni ndo catava ndo chiti nuu ndo ta cuhva ndo chii, tyehe ta cuví nduvahi chihin cuan. 16 Ta vityin, ¿atu cuñí maa ndo tyi nanduví yuhu noo ra cha xaan cahnu ñni ndo cha cuenda vatyí catyí cha ndicha chi ndo?

17 Ñáyivi cuan, cuñí xaan ñu chi ndo, catyí ñu. Soco ñima chihin cha vaha. Vatyí cha cuñí ñu cuan, cha sacanyaha ñu chi ndo chi ndi. Ta cunyicon ndo chi maa ñu. 18 Soco vaha cha cuñí yo chi ñáyivi, soco chihin cha vaha, ta tyicuan ri maa. Ta ñima ñn yaha ri cuhva cha nyaa ri yuhu chihin ndo. 19 Sehe luhli, inga chaha nyehí tindoho ta cha uhvi cha catyí ndo. Tari noo sihi cha yihí cha uhvi chi ña tatu cuacacu sehe ña. Ta cunyehe que tindoho nyacua nya ndunye vaha ndo chihin fuerza maa ra Cristo. 20 Vaha tyehe ta nyaí chihin ndo vityin vityin. Tacuhva

cuví cahan vii chihin ndo inga cuhva. Vatyí ña chité yoso caa caca xiñi cha cuenda ndo.

Nacoo yo cha cuenda Nyoo ta ñima ca cha cuenda ley chahnu

²¹ Nyoho cha cuñí ndo cha cunyaca ñaha ley ra Moisés chi ndo, catyi ndo chii. ¿Atu ta cuiñi ca ndo cha catyi ley cuan? ²² Catyi chi vatyí ra Abraham chiyo uvi tahan sehe ra. Noo sehe ra chiyo chihin ñaha cha cuví musu ñasihi ra. (Chinañi ña Agar.) Ta nonga sehe ra chiyo chihin cu Sara cha cuví ñasihi vaha ra. ²³ Cacú sehe ñaha cha cuví musu cuan tari cacú tandihi ra cuatyaa. Soco sehe ñasihi vaha ra Abraham cacú cue tacuhva chino cava cha catyi Nyoo chi ra Abraham vatyí cuhva ra noo sehe chi ñasihi ra. ²⁴ Ta chihin ihya iyó noo cha cuñi chi catyi chi chi yo. Ninduvi ñusihi cuan cuví ñu tari uvi tahan tuhun cha natyihí tahan Nyoo chihin yo. Noo tuhun cuan cuenda yucu Sinaí. Ta ñáyivi yihí cuenda ley cuan cuví ñu tari cu Agar, vatyí noo musu ri cuví tucu maa ña chihin sehe ña. ²⁵ Tari cu Agar, ta tari yucu Sinaí cha nyaá Arabia, tyicuan caa tucu ñuu Jerusalén quivi vityin. Vatyí ñáyivi ñuu cuan nyaá ñu ndaha ley chahnu. Tari noo musu ley cuan cuví ñu. ²⁶ Soco nya andivi iyó inga Jerusalén, cha cuví ñuu yo. Ta yori nyacá naha chi chi. Ta cuví chi tari sihi yo. ²⁷ Ta catyi tuhun Nyoo:

Cusiñi iñi yoho, ñaha sihi cha ña cuví coo sehe.

Yoho yori sehun.

Cana chaa chihin cha siñi cuñun, yoho cha ña ñohó nuu cha uhvi cha cacu sehe.

Vatyí ñaha sihi cha sanandoo yhi chi, coo ca sehe ña ta ñima ca ñusihi cha iyó yhi, catyi tuhun Nyoo.

²⁸ Yañi, yoó cuví yo tari ra Isaac, ra cuví sehe cu Sara. Cuví yo sehe ra Abraham cuenda tuhun cha natyihí tahan Nyoo chihin ra. ²⁹ Ta ra cha cuví sehe ñaha cha cuví musu cuan xaan iñi ra chi ra Isaac cha cuví sehe ñasihi vaha ra Abraham. Tyicuan caa

cuví tucu vityin. Ra cha cuñi vatyí sacuví yo cha catyi ley, xaan iñi ra ta chicán nyicon ra chi yo cha cuví yo ñáyivi nacacú chaa chihin Tatyí Ii Nyoo. ³⁰ Soco ¿ñáa cha catyi tuhun Nyoo? Catyi chi: “Tava ñehe chi ñaha cha cuví musu cuan chihin sehe ña. Vatyí sehe ña ma cuví naquehen cue cha tahán chi chi sehe ñasihi vaha ra Abraham”, catyi tuhun Nyoo. ³¹ Yucuan chaha, yañi, ñima tari sehe ñaha cha cuví musu cuan cuví yo. Soco cuví yo tari sehe ñasihi vaha ra Abraham.

5

Ñihi cuinanyaa yo chihin cha ña nyacá ñaha ca ley chi yo

¹ Ra Cristo sacacú ra chi yo ndaha ley chahnu cuan. Yucuan chaha saha ndo cuenda coto nanduvi ndo musu inga chaha cuenda ley.

² Tyasoho ndo, yuhu ra Pablo catyi chi ndo. Tatu cuhva ndo cha saha ñu circuncidar chi ndo, ta cuñi maa ndo tyi cucacu ndo chihin cuan, ma cuví tyinyee ra Cristo chi ndo. ³ Cuñi catyi inga chaha chi ndo vatyí tandihi ra cha cuñi cacú chihin cha saha ñu circuncidar chi ra, cuñi chi vatyí sacuvi ra tandihi cuii cha catyi ley ra Moisés ñandihi. ⁴ Tandihi nyoho cha nducú ndo nduvahá ndo nuu Nyoo cha cuenda ley cuan, cha sañá tahan ndo chihin ra Cristo cuví cuan. Ta sañá ndaha ndo tumañi iñi cha chahá Nyoo chi ndo. ⁵ Soco yoó chihin cha tyinyee Tatyí Ii Nyoo chi yo ta chinó iñi yo chi ra Cristo. Ta itá iñi yo nduvahá yo nuu Nyoo. ⁶ Vatyí tatu ñin ri cuví yo chihin ra Cristo Jesús, ñahri tuhun cha sacuvi yo costumbre circuncisión, o cha ña sacuvi yo. Cha vale ca tatu chinó iñi yo chi ra Cristo. Ta chihin cha chinó iñi yo coo yo, chihin cha cuñi yo chi noo noo tahan yo.

⁷ Nyoho vaha cuahán ndo quivi cuan. ¿Yoo cha sativi chi ndo? Ta ña tyasohó ca ndo cha ndicha. ⁸ Tuhun cha sañahá ñu cuan, ñima tuhun Nyoo ra nacana chi yo cuví. ⁹ Vatyí tari nandaá yuchan pan chihin chiin ri

yuchan iya, tyicuan caa tucu noo ri ñáyivi quiñi caa cuví sativi ñu chi cuaha ñáyivi. ¹⁰ Nyoo cutachi tuñi ra chi ñáyivi cha sativi chi ndo. Ñahri cuenda ra yóo ñu cuví ñu. Soco yuhu chitó vahi tyi Sutu Mañi yo cutyinyee ra chi ndo tacuhva vatyi nyoho ma caca xiñi ndo inga cuhva cha ña sañahi chi ndo.

¹¹ Ta cha cuenda chi yuhu, yañi, tyehe ta catyí vatyi ñu chinó ini chi ra Cristo cuñi chi cha sacuvi ñu costumbre circuncisión, ra Israel ma caca nyicon ra chii. Ta ma cuquiñi ca cuñi ra chihin tuhun ra Cristo cha chihí nu cruzi cha catyi cuatyí yo. ¹² Soco ra sayangá chi ndo chiña, vaha cha quita ra nu nyicu ndo, tacuhva cha ma sayanga ca ra chi ndo.

¹³ Vatyi nyoho, yañi, nacana Nyoo chi ndo vatyi coo ndo libre. Soco ñima cha cuenda cha iyó ndo libre ta cuví sacuvi ndo ñáá ndihí cha cuñi coño ñuhu ndo. Soco sacuvi ndo tyiño nuu tahan ndo chihin cha cuñi ndo chi ñu. ¹⁴ Vatyi iyó noo tuhun Nyoo cha catyí chi: “Cuñi ndo chi tahan ndo tari cuñi ndo chi maa ndo”, catyí chi. Ta tatu ndicha ndicha cha cuñi yo chi tahan yo, ña y# sacuvi yo tandihí cha catyí ley chahnu. ¹⁵ Saha ndo cuenda vatyi tatu cahán ndo ta satasí iñi ndo chi tahan ndo, cutivi nu nyicu ndo.

Cuhva cuñi coño ñuhu yo ta cuhva iyó yo chihin Tatyí Ii Nyoo

¹⁶ Cha cuñi catyi chi ndo ican cuvi ihya: Coo ndo chihin tunyee iñi Tatyí Ii Nyoo. Tyicuan caa ta ma cuvi ca sacuvi ndo cuhva ña vaha cuñi ndo. ¹⁷ Vatyi cha sacuvi yo cha ña vaha cha cuñi yo, ñima cuhva cuñi Tatyí Ii Nyoo cuví. Vatyi Tatyí Ii Nyoo ña cuñi chi cha sacuvi yo cha ña vaha. Ta coño ñuhu yo ña cuñi chi sacuvi chi cuhva cuñi Tatyí Ii Nyoo. Ña nacachí tahan cha cuñi Tatyí Ii Nyoo chihin cha cuñi coño ñuhu yo. Ta yucuan chaha ma cuvi sacuvi yo cha cuñi yo. ¹⁸ Soco tatu sacuvi yo cha catyí Tatyí Ii Nyoo chi yo, ma cuvi ca cunyaca ñaha ley chi yo.

¹⁹ Ña xehe caa ñu sacuvi cuhva ña vaha cha cuñi coño ñuhu. Yihí ra, iyó ñasihí ra ta iyó inga ñu chi ra. Ta yihí ñu iyó y# ñu ta iyó inga ra chi ñu. Ta yihí ñu sacuvi ñu cha ña vaha chihin coño ñuhu ñu ta iyó viciu chi ñu. ²⁰ Yihí ñu sacahnú ñu xitohyo. Yihí ñu satasí ñu. Yihí ñu tasi cuñi nyehe ñu chi tahan ñu. Yihí ñu cañi tahan ñu. Yihí ñu cuiño ñu. Ta yihí ñu yatyin iñi ñu. Yihí ñu chicá xiñi ñu maa maa ri cha vaha chi maa ñu. Ta yihí ñu iyó división nu nyicu ñu. Vatyi cacañi tahan ñu. Ta tyicuan caa ta cusín ñu. ²¹ Ta yihí ñu nyiyó iñi ñu cha tyay#i. Ta yihí ñu cachahñi chi tahan ñu. Ta yihí ñu tuhva ñu chiñi. Ta yihí ñu chachí cuahyi ñu. Ta sacuvi ñu cuaha ca cha sacuvi ñu. Ta catyí chi ndo tari catyi chi ndo quivi cuan. Vatyi tandihí ñu cha sacuvi tyehe caa ma cuvi naquehen cuenda ñu nu nyacá ñaha Nyoo.

²² Soco cha chahá Tatyí Ii Nyoo, ican cuvi ihya: cha cuñi yo chi Nyoo ta chi tahan yo, cha s#i cuñi yo, cha taxi cuñi aña yo, cha cama iyó yo chihin ñáyivi, cha masu iñi yo, cha vaha ñáyivi cuvi yo, cha ña cundihñi yo sacuvi yo cha vaha chihin ñáyivi, cha chinó iñi yo chi ra Cristo. ²³ Ta inga cha chahá Tatyí Ii Nyoo chi yo, ican cuvi ihya: cha ndahvi sahá yo chi yo, cha ña sacuvi yo cuhva cuñi coño ñuhu yo. Tatu sacuvi yo tandihí cha vaha ihya, ni noo ley ta ma cuvi catyi chi tyi iyó cuatyí yo. ²⁴ Ta yoó cha yihí yo cuenda ra Cristo Jesús, cha sandihí yo tuhun cha sacuvi yo cuhva ña vaha cha cuñi coño ñuhu yo. ²⁵ Ta tari cha iyó yo ñáyivi chaa cha cuenda Tatyí Ii Nyoo, tyicuan caa cuñi tucu chi cha quichahá yo cha saquehen ityi ra chi yo.

²⁶ Ma cahnu saha yo chi yo. Ta ma sacañi tahan yo chi tahan yo. Ma quichi cuvi iñi yo cha chii inga tahan yo.

Tahán chi tyinyee yo chi tahan yo

¹ Yañi, tatu nanyehé yo sacuví noo tahan yo cuatyí. Nya yo cha ñihi nyaá yo chihin Tatyí Ii Nyoo tyinyee yo chi ñu na ndunyeé ñu inga chaha. Soco cuñí chi cahán vii yo chihin ñu chihin cha vita iñi yo. Ta cuñí chi sahá yo cuenda chi yo coto nducu nyehe tucu cuihna chi maa yo. ² Na tyinyee yo chi tahan yo ñáá cha cuví chi ñu. Tatu tyicuan caa sacuví yo, quichahá vaha yo chi ra Cristo cuví cuan.

³ Tatu nya noo yo cuñí maa yo vatyi cahnu ñu cuví yo, ta ñahri ñu cuví yo, suri chi maa yo sandaví ñaha yo. ⁴ Ma saha yo tuhun tyi vaha yo tari vaha noo hermano cha vaha chicá chihin Nyoo. Nasaha xihna yo cuenda tatu vaha cha nyacuví yo. Tyicuan ta coto yo tatu vaha sacuví yo ta cusii cuñi yo. ⁵ Vatyi tahán chi cunyeé noo noo yo ñáá ndihi cha tyisó Nyoo siqui yo.

⁶ Ta cuñí chi tyinyeé ndo chihin cha chiñuhú chi ra cha sañahá tuhun Nyoo chi ndo.

⁷ Ta ma sandaví ñaha ndo chi ndo. Nyoo yori cuví cuacu nyaá chi ra. Vatyi tandihí cha tachí ñáyivi, ican cuan cunaquehén ñu. Vatyi tatu sacuví ñu cha vaha, cha vaha naquehén ñu. Soco tatu sacuví ñu cha ña vaha, cha ña vaha cuñihi ñu. ⁸ Tatu noo ñáyivi nyacuví ñu cuhva ña vaha cha cuñí coño ñuhu ñu, suri maa cha sacuví ñu cusatívi chí chí ñu. Soco tatu nyacuví ñu cuhva cuñí Tatyí Ii Nyoo, Tatyí Ii Nyoo cucuhva noo ñáyivi chaa cha ma naa ca maa tyi coo ñu. ⁹ Yucuan chaha ma cutatu yo cha sacuví yo cha vaha. Vatyi tatu ma ndu uvi iñi yo, coo quívi ta naquehen yo cha vaha. ¹⁰ Yucuan chaha tahan ri chaha cha chahá chi cuhva, na sacuvi yo cha vaha chihin tandihí ri ñáyivi. Ta cha xihna cuii ri sacuvi yo cha vaha chihin ñu yihí cuenda Nyoo.

Cusii xaan cuñí ra Pablo vatyi nyehé ra tindoho cha cuenda ra Cristo

¹¹ Nyehe ndo ñana cha nahnu letra tyaí chihin ndahi nu tutu ihya vityin.

¹² Ñu cha cuñí saniñí chi ndo vatyi sacuvi ndo costumbre circuncisión,

saniñí ra chi ndo vatyi cuñí ra cuvaha ra nuu ñáyivi. Ña cuñí ra nyehe ra tindoho cha cuenda ra Cristo, ra chihí nu cruzi. ¹³ Vatyi ni maa ra cha sacuví ra costumbre circuncisión cuan ta ña quichahá ra tandihí cha catyí ley. Soco cuñí ra cha sacuvi nyoho costumbre cuan. Vatyi tyicuan caa ta cuví sacahnu ra chi ra vatyi sacuví ndo cuhva catyí ra. ¹⁴ Soco yuhu ña cuñí sacahni chii cha cuenda ñáá ndihi tuhun. Soco sii xaan cuñí cha chihí Sutu Mañi yo Jesucristo nu cruzi cha cuenda yuhu. Vatyi cha cuenda cha chihí ra nu cruzi, tari quívi cha yaha chihí cha quiñi caa cha iyó ñáyivi ihya. Ta cha yaha chihí tucu mai cha cuenda cuan. ¹⁵ Vatyi tatu nyicón yo chi ra Cristo Jesús, ña niñi xaan cha sacuví yo costumbre circuncisión o cha ña sacuví yo. Noo cha niñi ca, cha nanduví yo noo ñáyivi chaa. ¹⁶ Tandihí ndo cha iyó ndo tyehe caa, naquehen ndo cha taxi ri coo añima ndo. Ta na cundahvi cuñi ra nyehe ra chi tandihí ndo, ñu cha ndicha cuví ndo ñáyivi cuenda ra.

¹⁷ Cha vityin ta nu cuahán chi ityi nuu ca, ni nonga ndo ta ma cuhva ca ndo tisihí chii. Vatyi tandihí pehla cha nyaá coño ñuhi, cuñí chi catyi vatyi ndicha cha cuví yuhu noo ra chicá tyiño Sutu Mañi yo Jesús.

¹⁸ Yañi, Sutu Mañi yo Jesucristo na nasoco chi tandihí ndo. Ta tyicuan caa na cuví chi.

Carta Cha Sacuhun Ra Apóstol Pablo Chi Ñáyivi Ñuu Éfeso Cha Yihí Cuenda Nyoo

Nu sacuhún ra Pablo noo tutu chi ñu ñuu Éfeso cha yihí cuenda Nyoo

¹ Yuhu ra Pablo cuví noo apóstol ra Jesucristo. Vatyí yucuan cuhva cuñí maa Nyoo. Tyaí noo carta ihya chi tandihí ndo cha yihí ndo cuenda Nyoo ñuu Éfeso chiña, ta níi ñi ndo chinó ñi ndo chi ra Cristo Jesús. Ta ñn ri cuví ndo chihin ra. ² Na nasoco Nyoo ta Sutu Mañi yo Jesucristo chi ndo. Ta nacuhva ra cha taxi ri coo añima ndo.

Cha ñn ri cuví yo chihin ra Cristo, Nyoo nasocó xaan ra chi yo

³ Na sacahnu yo chi Nyoo, ra cuví Sutu Sutu Mañi yo Jesucristo. Vatyí nasocó xaan ra chi yo chihin tandihí nuu cha vaha cha iyó andiví cha cuenda cha ñn ri cuví yo chihin ra Cristo. ⁴ Vatyí nyata ni cumañi ca savaha ra ñuhu ñayiví ta nacachí vaha ra chi yo tyi cu ñn ri yo chihin ra Cristo. Vatyí tyicuan caa cundundí yo nuu ra chihin cha ñahri ca cuatyí yo. Cha cuenda cha cuñí ra chi yo, ⁵ ta nyata cha naha ta tyaá ra cuhva chi yo vatyí nanduvi sehe ra chi yo cha cuenda ra Jesucristo. Tyicuan caa sacuví ra vatyí yucuan cuhva cuñí maa ra. ⁶ Yucuan chaha tyicuan ri sacahnú yo chi ra. Vatyí vaha xaan ñáyivi cuví ra. Ta cahnu xaan tumañi ñi chahá ra chi yo. Vatyí sacú ñn ri ra chi yo chihin Sehe ra, ra cha cuñí xaan ra chi. ⁷ Ta cha cuenda cha cuñí xaan Nyoo chi yo, natava ra chi yo ndaha ra ña vaha, tacuhva cha ma cutuñi chi yo. Vatyí chihin cha chatí ñi Sehe ra, sandachí ra cuatyí yo. Ta tyicuan caa sahá Nyoo tìcahnu ñi chi yo. ⁸ Ta vatyí cahnu xaan tumañi ñi sahá ra chi yo, chahá xaan ra cha chiñi tuñi ra chi yo. ⁹ Ta

chahá ra cha cutuñi ñi yo tuhun ra cha ña chito ñáyivi. Vatyí sacotó ra chi yo yoso cuhva tyaá ra cuhva tyi sacuvi ra chihin tandihí cha iyó cha cuenda ra Cristo. ¹⁰ Vatyí coo quiví cuchino cava cha tyaá ra cuhva tyi sacuvi ra. Vatyí cusandu ñn ri ra tandihí cha iyó ihya ñayiví ta cha iyó andiví, ta tandihí cucunyaa ndaha ra Cristo. Vatyí maa ra cucunyaca ñaha ra tandihí.

¹¹ Cha cuenda ra Cristo ñihí tucu maa yo cha tahán chi chi yo. Vatyí Nyoo nyata cha naha nacachí ra chi yo tyi cu ñn ri yo chihin ra Cristo. Tyicuan caa tyaá Nyoo cuhva tyi cusacuvi ra. Ta maa ra sacuví tandihí yoso cuhva nyehé maa ra tyi vaha. ¹² Ta tyehe caa sacuví ra tacuhva vatyí nyuhu cha nachino ñi ndi chi ra Cristo cha xihna ri, coo ndi soco cha sacahnu ndi chi Nyoo cha cuenda cha cahnu cuví maa ra. ¹³ Ta tyicuan caa tucu nyoho. Vatyí quiví chiñi ndo tuhun Nyoo cha ndicha vaha, catyí ñu chi ndo tuhun ra Cristo yoso caa sacacú ra chi yo. Ta chingo ñi ndo chi ra. Ta ndu ñn ri ndo chihin ra. Ta tari cha tyaá Nyoo tuñi ra chi ndo cuví cuan, vatyí chahá ra Tatyí Ii ra cohon añima ndo, tari cuhva catyí ra tyi sacuvi ra. ¹⁴ Ta ican maa Tatyí Ii cuví cha chahá quiyí ri Nyoo chi yo tacuhva cuví naquehen ca yo cha cucuhva ra chi yo. Vatyí tyinyeé Tatyí Ii ra chi yo nyacua nya quiví ndihí sacacu ra chi yo, cha cuví yo ñáyivi chi ra. Ta tandihí ihya sacuví ra chihin yo tacuhva sacahnu yo chi ra. Vatyí maa ra cahnu ca ra cuví ra.

¹⁵⁻¹⁶ Yucuan chaha, cuhva cha chicán tahvi chi Nyoo, ña sandihí tuhun cha nacuhvé tyahvi nyoo chi ra cha cuenda ndo. Vatyí ñihí tuhun tyi chinó vaha ñi ndo chi Sutu Mañi yo Jesucristo. Ta cuñí xaan ndo chi tandihí ñu tahan yo ñu yihí cuenda Nyoo. ¹⁷ Chiquén chi Nyoo Sutu Sutu Mañi yo Jesucristo. Vatyí ican ra cuví ra cahnu ca. Ta chiquén chi ra nacuhva ra cha chiñi tuñi Tatyí Ii ra chi ndo, tacuhva cutuñi ñi ndo cha

sañahá ra chi ndo. Vatyí cohon nuu vaha ca ndo chi ra. ¹⁸ Ta chiquén chi ra, na nuña ra cha chiñi tuñi xiñi ndo, na coto ndo ñáá cha cuñi ra cha naquehen ndo cha cuenda cha cana ra chi ndo. Ta na coto ndo ñana cha tyaqui ta tyayñi cha chahá Nyoo chi yo ñu yihí cuenda ra. ¹⁹ Ta chiquén chi Nyoo tyi cuhva ra cha coto ndo ñana cha cahnu tunyee iñi iyó chi ra, nyacua ña cuví tyicuhva yo. Ta ican cuan tyinyeé chi yo cha chino iñi yo chi ra. Ta suri maa chihin tunyee iñi ihya ²⁰ Nyoo sanandoto ra chi ra Cristo. Ta cuatyaa ra chi ra chiyo vaha ra nya andivi. ²¹ Ta yucuan cuví nu sacahnü xaan ca Nyoo chi ra Cristo cha nuu tandihí ca cha nyacá ñaha síqui ñuhu ñayivi ihya ta andivi ñandihí. Cuví ri tandihí rey, o cuví ri ra cuví tyiño nahnu, o cuví ri ángel andivi. Soco yori yóo ca ra cahnu ñayivi ihya ta ñiri ñayivi cha cua coo. Vatyí noo tuhun ri maa ra Cristo cuví ra cahnu cuví. ²² Ta tandihí cuii maa chahá Nyoo tyi cunyaca ñaha ra Cristo. Ta suri chi maa ra chahá Nyoo vatyí cuví ra xiñi o nuu chi ñu yihí cuenda ra. ²³ Vatyí yoó, cha yihí yo cuenda ra, cuví yo coño ñuhu ra. Ta maa yo ta maa ra cuví chi noo coño ñuhu nanñi ra. Ta maa ra cuví ra sandunaní tandihí.

2

Sacacú Nyoo chi yo cha cuenda cha cuñi ra chi yo

¹ Nyoo chahá ra noo ñayivi chaa chi ndo tyi coo ndo quivi ndu ñin ri ndo chihin ra Cristo, vasi nicaa ni iñi ndo cuatyí quivi cuan. Ta tari maa cha chihí aña ndo tyi ñahri maa ñayivi Nyoo chinyaa aña ndo. ² Ta chinyacuví ndo cuhva nyacuví ñayivi ña ñohó nuu Nyoo. Ta chinyicon ndo chi cuihna ra cuví nuu. Ta ican ra cuví tatyí ña vaha cha tyiyuhú chi ñu ña quichahá nu cahán Nyoo. ³ Ta suri tyicuan caa chiyo tucu yoó quivi cuan. Vatyí chinyacuví yo cha ña vaha cha quichi cuví iñi yo cha cuñi coño ñuhu yo. Ta sacuví yo yoso cuhva chica

xiñi yo. Ta cha cuenda tuhun cha chinyacuví yo tahán chi tachi tuñi Nyoo chi yo inuu ri chihin tandihí ca ñu sacuví cha ña vaha. ⁴ Soco Nyoo cundahví xaan cuñi ra nyehe ra chi yo. Vatyí cuñi xaan ra chi yo. ⁵ Ta vasi cuaha xaan cuatyí yo quivi cuan, tari quivi cha chihí aña yo chihin cuatyí cuan, soco Nyoo chahá ra cha conyito aña yo noo ñayivi chaa, vatyí sacú ñin ri ra chi yo chihin ra Cristo. Ta cha cuenda tumañi iñi cha saha Nyoo chi ndo ta cacú ndo. ⁶ Ta tari quivi cha sanandoto Nyoo aña yo quivi nandoto ra Cristo Jesús. Vatyí iyó yo noo ñayivi chaa cha chahá maa Nyoo tyi coo yo. Ta tari quivi cha cuatyaa ra chi yo andivi. ⁷ Ta sacuví Nyoo tyehe caa tacuhva vatyí nu cuahán ca chi quivi cusañaha ra chi tandihí ñayivi yoso cuhva cha cahnu tumañi iñi chahá ra chi yo cha cuenda ra Cristo Jesús. Vatyí vaha xaan ñayivi cuví ra chihin yo tyi sacú ñin ri ra chi yo chihin ra Cristo. ⁸ Vatyí cha sacacú Nyoo chi yo cuví chi noo cha chahá ra chi yo. Ta naquehén yo tumañi iñi cuan chihin cha chinó iñi yo chi ra. Ta cha sacacú Nyoo chi yo ñima noo cha cuví sacuví maa yo cuví. Vatyí yucuan cuví noo tumañi iñi cha sacuví ra chihin yo. ⁹ Ñima cha cuenda cha sacuví yo cha vaha ta cuita iñi yo cha sacacú cuan chi yo. Tyehe ta cuví chi tyicuan caa, cahnu cusaha yo chi yo. ¹⁰ Nyoo sacuví ra vatyí nduvahá aña yo chihin cha ndu ñin ri yo chihin ra Cristo Jesús. Ta sacuví ra tyehe caa tacuhva vatyí cuví sacuví yo cha vaha. Vatyí maa ra tyaa ra cuhva nu quichi quivi vatyí tyicuan ri sacuví yo cha vaha.

Cuví ri yo ñu Israel, o cuví ri yo ñu inga ñuu, soco cha cuenda ra Cristo ñin ri ñayivi chi Nyoo cuví tandihí yo

¹¹ Yucuan chaha ñicohon iñi ndo cuhva chiyo ndo nu quichi quivi, tyi cuví ndo ñayivi cha ñima ñu Israel cuví. Ta catyí ñayivi Israel tyi ñu cha ñima ri tuhun cuví ndo cha ña sacuví ndo costumbre circuncisión

tari sacuví maa ra. Ta cha cuenda cuan cuñí maa ra Israel tyi vaha ra nuu Nyoo ta nyoho ña vaha ndo. ¹² Nícohon iñi ndo vatyi nu quichi chi, yori ra Cristo chinyaa ñima ndo. Ta ña ñin ri cuví ndo chihin ñu Israel. Ta ña chito ndo tuhun cha tyihí tahan Nyoo chihin ra Abraham: tuhun cha catyí Nyoo tyi cuhva ra cha nícoo vaha yo chihin ra. Chiyo maa ndo ñuhu ñayívi ihya chihin cha yori Nyoo nyaá chihin ndo, ta ña yihí iñi ndo cha cuñihi ndo. ¹³ Ta quívi cuan cañi xaan chinyaa ndo chihin Nyoo. Soco vityin ñin ri cuví ndo chihin ra Cristo Jesús. Maa ra Cristo chihí ra. Ta chati ñiñi ra cha catyi ndo. Ta yucuan chaha cuví cuyatyin ndo nuu Nyoo. ¹⁴ Vatyi ra Cristo sanicoo vaha ra chi yo chihin Nyoo. Ta sandu ñin ri ra chi ninduvi yo. Sandu ñin ri ra chi nyuhu cha cuví ndi ñu Israel chihin nyoho cha cuví ndo ñu inga ñuu. Ta sanduvaha ra cuhva iyó yo. Vatyi tari noo cha sanduva ra noo nama vehe cha nanyaa mahñu, cha chasí nu cu ñin ri yo. ¹⁵ Maa ra Cristo sandihí ra tuhun ley chahnu chihin cha chaha cuenda ra coño ñuhu ra tyi cúvi ra nu cruzi. Vatyi tandihí ley cuan sasiñ chi chi yo. Tyi nyuhu sacuví ndi costumbre cha catyí ley cuan. Ta nyoho ña sacuví ndo. Soco ra Cristo sandu ñin ri ra chi yo quívi chaha ra noo cuhva chaa tyi coo yo. Ta tyicuan caa sanicoo vaha ra chi yo. ¹⁶ Vatyi chihí ra nu cruzi cha catyi cuatyí yo. Ta sacuví ra vatyi nanduvaha coo yo chihin Nyoo. Ta tyicuan caa sanaa ra cha ña cuñi nyehe yo chi tahan yo.

¹⁷ Ra Cristo quichi ra ta cahan ra tuhun vaha Nyoo chihin yo: chihin nyoho cha cañi ca chinyicu ndo chihin Nyoo ta chihin nyuhu ñu Israel, ñu chitó tuhun Nyoo. Catyi ra chi yo vatyi na nícoo vaha yo chihin Nyoo. ¹⁸ Vatyi chaha cha catyi cha chihí ra Cristo cha cuenda yo cuví natuhva ninduvi yo chi Nyoo Sutu yo. Vatyi noo ri Tatyí li ra nyaá ñima yo: an cuví ri yo ñu Israel, an cuví ri yo ñu cha ñima ñu Israel cuví. ¹⁹ Yucuan

chaha nyoho ña cuví ca ndo ñu inga ñuu. Soco nanduví ndo ñáyívi ñuu Nyoo ñin ri chihin tandihí ñu yihí cuenda ra. Nanduví ndo ñáyívi chí ra. ²⁰ Ta cuví tucu ndo tari noo vehe. Ta ra apóstol, ta ra profeta, ra cachahá cuenda tuhun Nyoo cacuví ra tari ra catyihí yuu chaha vehe. Vatyi suri maa ra Cristo cuví yuu cha ñiñi ca cha yihí chaha vehe cuan. ²¹ Ta cha cuenda maa ra Cristo cuahan ndaa vehe cuan ta vehe cuan ican cuví maa yo ñin ri chihin ra. Ta cuahán sandu ñin ri ra chí tandihí yo ta nanduví yo tari noo vehe ii nu nyaá maa Sutu Mañi yo. ²² Ta tyicuan caa tucu nyoho chihin tandihí ñu yihí cuenda Nyoo, nanduví ndo tari noo nu iyó Nyoo. Vatyi nyaá Tatyí li ra ñima tandihí yo.

3

Nyoo tachi ra tyiño chi ra Pablo vatyi cahan ra tuhun ra chihin ñu cha ñima ñu Israel cuví

¹ Yucuan chaha yuhu ra Pablo ñohí vehe caa ihya vatyi sacoté tuhun ra Cristo Jesús chí nyoho cha ñima ñu Israel cuví ndo. ² Tahán chí natyihí tuñi iñi ndo tyi cahnu xaan tumañi iñi chahá ra chíi cha cuenda cha vaha chí ndo, tyi sacoté chí ndo. ³ Vatyi cha yaha catyi suhva chí ndo yoso caa sañaha Nyoo chíi noo tuhun xehe. ⁴ Ta cuhva cha sacuaha ndo tuhun cha yaha catyi chí ndo, cuví coto ndo yoso caa chaha Nyoo tyi cutuñi iñi tuhun ra Cristo cha ña chitó ñáyívi. ⁵ Vatyi nu quichi chí, ña sañaha Nyoo chí ñáyívi, tari sañahá ra chí apóstol ta ra cacuví profeta cha vityin. Vatyi Nyoo chihin Tatyí li ra sañahá ra chí yo cha vityin. ⁶ Ta tuhun xehe cuan, ican cuví ihya: vatyi nyoho cha ña cuví ndo ñu Israel, ñin ri cha cutahan chí chí ndo chihin nyuhu cha cuví ndi ñu Israel. Vatyi noo ri coño ñuhu ra Cristo cuví yo. Ta cuñihi yo cha catyi Nyoo tyi cuhva ra chí yo cha cuenda maa ra Cristo Jesús.

⁷ Saha Nyoo tumañi iñi chí yuhu vatyi chaha ra tunyee iñi ra chíi tyi

sacoté tuhun vaha ihya chi ñáyiví. ⁸ Soco cha cuenda chi yuhu cuví noo ra luhlu, noo ra ndahvi ca cha nuu tandihí ca ñu yihí cuenda Nyoo. Soco sahá Nyoo tumañi iñi ihya chii. Vatyí tacuhva cahin tuhun ra Cristo chihin ñu cha ñima ñu Israel cuví. Ta sacoté chi ñu ñana cha tyayíi cha cuñihi ñu cha cuenda ra Cristo. ⁹ Tyatyíño Nyoo chii tyi sacote chi tandihí ñáyiví yoso caa tyaa ra cuhva nyata ni cumañi ca savaha ra tandihí cha iyó. Ta cha naha ña chaha Nyoo cha coto ñáyiví tuhun ihya. ¹⁰ Tyicuan caa cuví tacuhva vatyí vityin tandihí ra nyacá ñaha andiví cunyehe yoso caa cha vaha cha sacuví Nyoo chihin yo cha cuví yo ñu yihí cuenda ra. Ta cucoto ra tyi chiñi tuñi xaan Nyoo. ¹¹ Tandihí ihya chachí tahan chihin cha tyaa Nyoo cuhva tyi sacuvi ra chihin Sutu Mañi yo Jesucristo cha cuenda cha vaha chi yo. ¹² Ta cha cuenda maa ra Cristo iyó chi ityi chi yo cha chaá yo nuu Nyoo chihin cha ña yuhví yo. Vatyí chinó iñi yo chi ra Cristo. ¹³ Yucuan chaha chacú ndahvi nuu ndo tyi ma ndu uvi iñi ndo chi Nyoo cha nyehi tindoho cha cuenda ndo. Vatyí cuví chi cha cuenda cha vaha chi maa ndo. Ta cusi cuñi ndo cha cuenda ihya.

Chicán tahvi ra Pablo chaha ñu, na cohon nuu ca ñu chi ra Cristo

¹⁴ Yihí iñi yoso cuhva cha vaha cha tyaa Nyoo Sutu yo cuhva tyi cuhva ra chi yo. Ta yucuan chaha chicuñi chiti nuu ra. ¹⁵ Maa ra cuví ra Sutu tandihí ñáyiví cuenda ra: ñu cha cuahan coyo andiví, ta ñu cha iyó ca siqui ñuhu ñáyiví. Tandihí yo cuví yo ñáyiví chi ra. ¹⁶ Ta chiquén chi ra na sandunyeer ra iñi ndo chihin Tatyí Ii ra cha nyaá aña ndo. Vatyí maa ra cahnu xaan ca cha tyayíi ra chahá ra chi yo. ¹⁷ Ta na coo ra Cristo aña ndo vatyí chinó iñi ndo chi ra. Ta coo ndo chihin cha cuñi Nyoo chi ndo. Vatyí tari yihí vaha yoho noo yutun chichi ñuhú, tyicuan caa cunyaa vaha aña ndo chihin Nyoo. ¹⁸ Tyicuan ta cuacoo

tunyeer iñi ra chi ndo tacuhva cuví cutuñi vaha iñi ndo chihin tandihí ñu yihí cuenda ra vatyí cuñi xaan ra Cristo chi yo. Nyacua ña ñihí ca yo cuhva catyi yo yoso cuhva cha cuñi ra chi yo. ¹⁹ Vatyí yaha xaan cahnu cuan. Nyacua ma cuví cohon nuu yo yoso cha cuñi ra chi yo. Soco cuñi cha nacoto ndo yoso cha cuñi ra chi yo. Tyicuan ta ñahri ca cumañi chi ndo. Vatyí Nyoo nyaá maa ra chihin ndo.

²⁰ Ta vityin na sacahnu yo chi Nyoo, ra cha iyó xaan ca tunyeer iñi chii. Vatyí cuaha vavaha ca cha cuví sacuvi ra cha nuu cuhva cha chicán maa yo chi ra o cha nuu cuhva cha chicá xiñi yo. Vatyí suri chihin tunyeer iñi ra cha iyó chi yo, sacuví ra tandihí. ²¹ Yoó ñu chino iñi chi Nyoo, na sacahnu yo chi ra tyicuan ri maa, ta tandihí tyembu cha cuenda cha sacuví ra Cristo Jesús. Ta na cuví chi tyicuan caa.

4

Cha cuenda Tatyí Ii Nyoo ñn ri cuví tandihí yo cha yihí yo cuenda ra Cristo

¹ Yucuan chaha yuhu cha ñohí vehe caa cha cuenda Sutu Mañi yo chacú ndahvi nuu ndo na cachi coo ndo tari cuhva tahan chi coo ñu cha nacana Nyoo chii. Vatyí chi nyoho nacana Nyoo tyi cuví ndo ñáyiví chi ra. ² Ndahvi saha ndo chi ndo. Ta vaha cahan ndo chihin ñáyiví. Cama cuví iñi ndo. Ta cunyeer ndo ñáa cha sahá noo noo tahan ndo chi ndo chihin cha cuñi ndo chi ñu. ³ Nducu ndo cuhva cha tyicuan ri cu ñn ri ndo chihin tahan yo. Vatyí maa Tatyí Ii Nyoo tyinyeé chi yo, na coo vaha yo chihin tahan yo. ⁴ Vatyí iyó noo ri coño ñuhu ra Cristo. Ta ican cuan cuví tandihí yo. Ta tari cha noo ri Tatyí Ii Nyoo iyó, tyicuan caa tucu iyó noo cha chitó cachi yo tyi cunaquehen yo tyi nacana ra chi yo. ⁵ Ta iyó noo ri Sutu Mañi yo nyacá ñaha chi yo. Ta noo ri chi maa ra chinó iñi tandihí yo. Ta noo ri cha cuenda maa ra condutya yo. ⁶ Ta noo ri Nyoo iyó ta maa ra cuví ra Sutu tandihí yo. Ta

maa ra nyacá ñaha chi tandihí yo. Ta chotyíño ra chi tandihí yo yoso cuhva cuñí maa ra. Ta nyaá ra añima tandihí yo.

⁷ Chaha ra Cristo noo cuhva chi noo noo yo, vatyí sacuvi yo tyiño nuu ra yoso cuhva cuñí maa ra cuhva ra. ⁸ Yucuan chaha cahan Nyoo tuhun ra Cristo nu catyí chi:

Cuvi chasaha ra chi ra xaan iñi chi ra, ta nandaá xica ra andivi chihin ñu tava ra ndaha ra ña vaha.

Ta chaha ra cuhva yoso cuhva cusaha tyiño ñu tyiño nuu ra, catyí chi.

⁹ ¿Ta ñáa cha cuñí chi catyí cha nandaá xica ra cuan? Cuñí chi catyí vatyí noo xihna ra nya yuvi ca nu ñuhu ñayivi. ¹⁰ Ra cha noo cuan, nandaá tucu ra nya nu sucun ca andivi. Vatyí tyicuan caa ta cuví sacutu ra tandihí maa ta cunyaa ra chihin yo tandihí ityi. ¹¹ Ta suri maa ra Cristo chaha ra cha vaha chi yo. Chi suhva yo chaha ra tyi cuvi yo apóstol ra. Ta chi inga yo chaha ra cha cuhva cuenda yo tuhun cha chahá ra chi yo, o saha yo profetizar cuví cuan. Ta chi inga yo chaha ra tyi sacoto yo chi ñayivi yoso caa sacacú ra añima yo. Ta chi inga yo chaha ra cha quihí ndaha yo chi ñu yihí cuenda ra, ta chi inga yo chaha ra cha cuví sañaha yo tuhun ra chi ñu. ¹² Tyicuan caa chaha Nyoo tyiño chi yo vatyí cunyaa yo tyiño cha sandunyeé yo iñi tahan yo vatyí cuví yo coño ñuhu ra. ¹³ Nyacua nya cu ñin vaha tandihí yo cha cuenda cha chinó vaha iñi yo chi Sehe Nyoo. Ta cohon nuu vaha yo chi ra. Tyicuan caa ta cutu yo chihin tandihí cha vaha cha chaha ra Cristo chi yo. ¹⁴ Yucuan ta ma cuvi ca yo tari ra cuatyaa. Vatyí totyehe ri chino iñi ndotyín ñáa noo tuhun cha ñima ri tuhun sandaví ñaha ñu chi ndotyín. Ta coto cutondo xiñi yo tyicuan caa chihin tuhun cha ña ndicha cha sañahá ñu sandaví ñaha. ¹⁵ Soco cha nuu cha cuví yo tari ra cuatyaa, cuñí chi cha cahán yo cha ndicha chihin cha cuñí yo chi Nyoo ta chi ñayivi. Ta ndunyeé ca añima yo chihin ndi cha vaha cha iyó chi Nyoo.

Ta cuahnu yo chihin ra Cristo, cha cuví ra nuu chi yo. ¹⁶ Ta cha cuenda ra Cristo tandihí yo cha cuvi yo coño ñuhu ra, ñin ri cuvi yo. Tari yihí tahan noo coño ñuhu, ta sahá tyiño tahan tahan nu yihí tahan chi, yoso cuhva tyiño cha tahán chi chi, ta tyicuan caa tyinyeé chi chi coño ñuhu, na coo vaha chí ta cuahnu chi, ta tyicuan caa yoó, cuñí yo chi tahan yo ta tyinyeé yo chi ñu.

Ñayivi chaa cha tahán chi coo yo cha cuenda ra Cristo

¹⁷ Ican ihya cuví cha chahí cuenda chi ndo, catyí Sutu Mañi yo. Ta cuñí chi cha quichaha ndo. Ma coo ca yo tari iyó ñu ña ñohó nuu chi Nyoo. Vatyí maa ri maa cha chiñi tuñi tondo chicá xiñi ñu. ¹⁸ Ta ña cutuñí iñi ñu, tyi ñima ñayivi Nyoo iyó ñu. Vatyí ña chitó ñu, cha cuenda cha ndava añima ñu. ¹⁹ Ña cahán ca nuu ñu cha sacuví ñu cha ña vaha. Ta nacuhva cuenda ñu chi ñu chi cha quiñi caa. Cuaha xaan cha ña vaha quichi cuvi iñi ñu. ²⁰ Soco ñima tyicuan caa cutuhva yo. Vatyí ñima tyicuan caa cuhva iyó ra Cristo. ²¹ Tatu ndicha tyi chiñi yo cha cahan ra chihin yo, ta cutuhva yo cha ndicha cha sañaha ra chi yo, ²² ma coo ca yo cuhva chiyó yo quivi cuan. Vatyí chiyó yo ñayivi chahnu quiñi caa. Vatyí cha quichi cuvi iñi yo sandavi ñaha chi chí yo. ²³ Nacuhva cuenda yo chi yo chi Nyoo na nasama ra cuhva chicá xiñi yo. ²⁴ Ta nacoo yo noo ñayivi chaa chihin noo añima chaa cha savahá Nyoo. Ta cuvi yo noo ñu vaha cha ndicha ndicha, noo ñu cachi iyó nuu Nyoo tari maa ra.

²⁵ Yucuan chaha ma cahan ca yo cuendu. Cahan yo maa maa ri cha ndicha chihin tahan yo. Vatyí ñin ri ñayivi cuvi yo.

²⁶ Tatu cuxaan yo, saha yo cuenda coto sacuvi yo cha ña vaha. Ta suhva ri cuhva cuxaan yo. Ma cuxaan yo ndiyaca. ²⁷ Ta ma cuhva yo cuhva chi ra ña vaha.

²⁸ Ra cha tuhva suhu quivi cuan, ma suhu ca ra vityin. Soco saha tyiño

vaha ra chihin ndaha ra. Tyicuan caa ta coo cha chii ra, tacuhva cuvi tyinyee ra chi ñu cha chiñuhú chii.

²⁹ Ma cahan yo cha quiñi caa. Cahan yo, soco maa ri cha vaha cha tyinyee ta sacuahnu chi ñu chiñi tuhun cahán yo. ³⁰ Ta ma cuhva yo tucuihya iñi chi Tatyí Ii Nyoo. Vatyí chaha Nyoo Tatyí Ii ra chi yo tari noo tuñi ra tyaa ra añima yo nyacua nya quivi ndihi sacacú ra chi yo.

³¹ Ta ma xaan cuñi yo. Ta ma cuxaan yo. Ta ma quihi tisihi iñi yo. Ma cana chaa yo siqui tahan yo. Ma cahan uhvi yo chi tahan yo. Ta ninoo cha ña vaha ma caca xiñi yo. ³² Soco vaha ñáyivi cuvi yo chihin tahan yo. Ta cundahvi cuñi yo nyehe yo chi ñu. Ta saha yo ticahnu iñi chi ñu, tari Nyoo sahá ra ticahnu iñi chi maa yo cha cuenda ra Cristo.

5

Yoso caa tahán chi coo ñáyivi yihí cuenda Nyoo

¹ Yucuan chaha nanducu yo cuhva coo yo tari cuhva iyó maa Nyoo. Vatyí sehe ra cuví chi yo. Ta cuñi xaan ra chi yo. ² Vita cuvi iñi yo. Cuñi yo chi tahan yo, tari ra Cristo cuñi ra chi yo. Ta tari noo mbee luhlu cha tuhva tata sutu cachaha ra chi Nyoo ta cha naha, tyicuan caa chaha cuenda ra Cristo chi ra cha cuenda yo. Ta si xaan cuñi Nyoo cha cuenda cha chaha cuenda ra chi ra.

³ Soco vityin cha cuví yo ñáyivi yihí cuenda Nyoo, ña tahán chi sacuví yo cha quiñi caa chihin coño ñuhu yo. Ni ña tahán chi cha cahán yo cha quiñi caa. Ta ni ma nyiyo iñi yo. ⁴ Ma cahan yo tuhun cha chahá ticahan nuu. Ni ri ma cahan yo noo tuhun cha ñima ri tuhun. Vatyí ña tahán chi cahan yo cha tyicuan caa. Soco cha nuu cha cahán yo cha ña tahán chi, na nacuhva yo tyahvi nyoo chi Nyoo. ⁵ Vatyí cha chitó yo vatyí tandihi ñu cha sacuví cha quiñi caa, ma quihvi ñu nu nyacá ñaha ra Cristo chihin Nyoo. Ra iyó chihin ñusihí ta ñima ñasihí ra cuví, o ñu iyó chihin rayii

ta ñima yii ñu cuví, ñu nyiyó iñi, ma quihvi ñu nu nyacá ñaha Nyoo. Vatyí cha nyiyó iñi yo tari cha sacahnú yo xitohyo cuví cuan. Vatyí tavá xiin yo chi Nyoo. ⁶ Ma cuhva yo cha sandavi ñaha ñáyivi chi yo chihin tuhun cha ña ndicha, tuhun cha ñima ri tuhun. Vatyí tachí tuñi Nyoo chi ñu cha ña quichahá chi ra. ⁷ Ta ni ma cutahan yo chihin ñu cuan.

⁸ Vatyí chiyo yo nu ñaa iñi quivi cuan. Soco vityin iyó yo nu ndichin chihin Nyoo. Cachi coo yo tari tahán chi coo ñu chitó tuhun Nyoo. ⁹ Vatyí Nyoo sacundichín ra añima yo tacuhva cuvaha añima yo ta sacuvi yo cha vaha ta cha ndicha. ¹⁰ Saniñi yo cutuhva yo cuhva tahán iñi Sutú Mañi yo. ¹¹ Ma sacuvi yo cha nyacuví ñu nyicú nu ñaa iñi. Vatyí ñahri cha vaha ñihí ñu chihin cuan. Soco sacoto yo chi ñáyivi tyi ña vaha cuan. ¹² Vatyí cahán nuu yo cha cahán yo tuhun cha nyacuví ñu cuan cha xehe ri. ¹³ Soco quivi quita cha ñohó xehe nu ndichin, tyicuan ta cucoto yo cha ndicha. Vatyí cha ndichin Nyoo sanatuví tandihi cha ñohó xehe. ¹⁴ Yucuan chaha iyó nu catyí chi:

Yoho cha quixun, ndicuita mahñu nu nyicú ñu chihí chiña.

Ta ra Cristo cusacata ra ñuhu nu cuahún, catyí chi.

¹⁵ Yucuan chaha saha yo cuenda cuhva iyó yo. Ta ma coo yo tari noo ra soho. Coo yo tari noo ra chitó. ¹⁶ Ma sacunaa yo quivi yo. Na cahan yo tuhun Nyoo chihin ñáyivi. Vatyí vityin quiñi xaan caa ñáyivi iyó yo, ta ña naha ca iyó yo. ¹⁷ Yucuan chaha ma tondo xaan cohon iñi yo. Soco nandichi xiñi yo cuhva cuñi maa Sutú Mañi yo tyi sacuvi yo. ¹⁸ Ma coho yo ndixi. Vatyí ican cuan sativí chi yo. Soco cuhva yo na cunyaca ñaha vaha Tatyí Ii Nyoo añima yo. ¹⁹ Cahan yo chihin tahan yo soco chihin cha sacahnú yo chi Nyoo. Cata yo salmo cuenda ra. Cata yo yaa cha chahá Tatyí Ii chi yo. Sacahnu yo chi Sutú Mañi yo chihin cha tandihi añima yo.

²⁰ Tyicuan ri nacuhva yo tyahvi nyoo chi Nyoo Sutu yo cha cuenda tandihi maa, vasi sii cuñí yo, vasi nyehé yo tindoho. Nacuhva yo tyahvi nyoo chi ra chihin sivi Sutu Mañi yo Jesucristo.

Na coo vaha yo chihin tahan yo cuenda ra Cristo, catyí ra Pablo

²¹ Quichaha yo nu cahán inga tahan yo cuenda ra Cristo. Vatyí sahá yo ñáyivi chi ra Cristo.

²² Nyoho ñu iyó yí quichaha ndo cha cahán Sutu Mañi yo. Ta tyicuan caa tucu quichaha ndo nu cahán yí ndo. ²³ Vatyí rayí ican ra cuví nuu chi ñasihí ra, tari cuhva cuví ra Cristo nuu chi ñu yihí cuenda ra. Ta suri maa ra sacacú ra chi yo cha cuví yo coño ñuhu ra. ²⁴ Soco tari tahán chi cha quichahá ñu yihí cuenda ra Cristo chi ra, tyicuan caa cuñí tucu chi cha quichahá ñusihí tandihi cha catyí yí ñu.

²⁵ Ta rayí cuñí chi cha cuñí ra chi ñasihí ra, tari cuñí ra Cristo chi yo cha yihí yo cuenda ra. Ta chaha ra ñayivi ra cha catyí yo. ²⁶ Tacuhva vatyí sandundi ra añima yo. Ndi añima yo vatyí nacatya ra quivi cha nachino iñi yo tuhun cahán ra ta condutya yo. ²⁷ Ndo añima yo tari ndoo noo sahma, ña yacua ca chi, ña tiyi ca chi. Vatyí ra Cristo sandundi ra chi yo cha cuví yo ñu yihí cuenda ra. Tacuhva cuví nacuhva cuenda ra chi yo chi Nyoo, soco vaha yo, ñahri ca cuatyí yo. ²⁸ Ta tyicuan caa tucu cuñí chi cha cuñí rayí chi ñasihí ra, tari cha cuñí ra chi coño ñuhu ra. Vatyí tatu cuñí ra chi ñasihí ra, tari cha cuñí ra chi maa ra cuví cuan. ²⁹ Vatyí yori noo yo cha ña cuñi nyehe yo chi coño ñuhu yo. Soco sacachí yo ta sacuihnó yo chi coño ñuhu yo. Ta ra Cristo suri tyicuan caa sacuví ra chihin ñu yihí cuenda ra. ³⁰ Vatyí coño ñuhu ra cuví yo. Ta noo noo yo cuví yo suhva coño ñuhu ra ta yiqui ra. ³¹ Catyí tuhun Nyoo: “Rayí sandoó ra chi sutu ra ta chi sivi ra. Ta ndu ín ri ra chihin ñasihí ra. Ta noo ri nanduyí ñu.” ³² Ta yuhu catyí vatyí ihya cuví noo tuhun

xehe cha cahnu xaan. Ta cuñí chi catyí tyi ra Cristo ndu ín ri ra chihin ñu yihí cuenda ra. ³³ Ta sijn ri cuñí tucu chi catyí vatyí tahan tahan ndo cuñí ndo chi ñasihí ndo, tari cuñí ndo chi maa ndo. Ta nyoho cha cuví ndo ñusihí, saha ndo ñáyivi chi yí ndo.

6

¹ Nyoho cha cuví ndo sehe, tahán chi cha tyasoho ndo nu cahán sutu ndo ta sivi ndo. Vatyí cuñí ndo chi Nyoo. ²⁻³ Nu tutu Nyoo nyaá cha xihna ri sacuvi yo ta nañihi yo cha cucuhva Nyoo chi yo. Catyí chi: “Saha ndo ñáyivi chi sutu ndo, chi sivi ndo. Tyicuan caa ta sii xaan cuacoo ndo. Ta naha xaan cuacoo ndo ñayivi ihya”, catyí Nyoo.

⁴ Ta nyoho cha iyó sehe ndo, ma nanducu ndo cha cuxaan sehe ndo. Soco sañaha ndo tuhun Nyoo chi ñu, ta yoso caa quichaha ñu chi ndo ta chi Nyoo.

⁵ Ta nyoho cha cuví ndo musu, quichaha ndo chi chitoho ndo siqui ñuhu ñayivi ihya. Saha ndo ñáyivi chi ñu. Quichaha ndo chi chitoho ndo chihin cha ñi iñi ndo. Tatu sacuví ndo tyicuan caa, chi ra Cristo quichahá ndo cuví cuan.

⁶ Ma saha tyiño ndo cuhva cha nyehe ri chitoho ndo tacuhva vatyí catyí ñu tyi vaha ndo. Soco saha tyiño vaha ndo tari cha vatyí sacuví ndo tyiño nuu ra Cristo. Ta tyicuan caa sacuví ndo cuhva cuñí Nyoo chihin cha ñi añima ndo. ⁷ Chihin cha iyó vaha iñi ndo sacuvi ndo. Tari cha sahá tyiño ndo nuu Sutu Mañi yo ta ñima nuu ñáyivi. ⁸ Vatyí cha chitó yo tyi tahan tahan yo, an cuví ri yo musu, an ñima, soco cutiyahvi Sutu Mañi yo chi yo yoso cuhva cha vaha cha chinyacuví yo.

⁹ Ta nyoho cha iyó musu ndo, suri vaha coo ndo chihin musu ndo. Ta ma sayuhvi ndo chi ñu. Vatyí chitó ndo tyi ña cahnu ca maa ndo cha nuu musu ndo. Inuu ri cuví ndo nuu Nyoo ra cuví chitoho yo nya andivi. Vatyí maa ra ña cachi ra chi yo.

Tunyee iñi cha chahá Nyoo chi yo cha yihí yo cuenda ra

¹⁰ Ta vityin sandunyeeyo yo iñi yo chihin cha ñn ri cuví yo chihin Sutu Mañi yo. Vatyí iyó xaan tunyee iñi chi ra. ¹¹ Ta tari noo sindaro sahá cuenda ra chi ra, tyicuan caa tucu yoó, nasaha cuenda vaha yo chi yo chihin tandihí cha cuví tyinyee Nyoo chi yo. Tyicuan caa ta cuví chasaha yo chi cuihna. Vatyí nducú xaan ra cuhva sandavi ñaha ra chi yo. ¹² Tyicuan caa coo yo chihin tunyee iñi Nyoo. Vatyí ñima chihin ñáyivi cañí tahan yo. Soco cañí tahan yo chihin tatyí ña vaha cha ña nyehé yo. Vatyí ican cuan cuví cha nyacá ñaha chi ñáyivi cha nyacuví cha quiñi caa. ¹³ Yucuan chaha saha cuenda vaha yo chi yo chihin tandihí cha cuví tyinyee Nyoo chi yo, tacuhva cuví chasaha yo chi ra ña vaha ñáá quívi nducu tñn ra chi yo. Coto cana cava yo saha ra. ¹⁴ Tari noo sindaro ñihi nanyaá ra chihin noo sincho yihí chichi ra, tyicuan caa ñihi cuñanyaa yo chihin tuhun cha ndicha vaha. Tari cacú noo sindaro vatyí tyaá ra noo caa pecho ra, tyicuan caa Nyoo cusacacu ra chi yo ndaha ra ña vaha, tatu maa ri cha vaha sacuvi yo. ¹⁵ Ta tari natyíhi sindaro bota chaha ra ta nyatú tuhva ra cha cuhun ra cuatyí, tyicuan caa cuatu tuhva yo chihin tuhun Nyoo. Na sacoto yo chi ñáyivi yoso caa nicoo vaha ñu chihin ra. ¹⁶ Ta tari sindaro chasí ra chi ra chihin noo caa tacuhva ma ña ñi nduva chi ra, tyicuan caa cuñí chi nachino vaha iñi yo chi Nyoo tacuhva cha cuví chasaha yo tandihí cha sacuvi ra ña vaha chi yo. ¹⁷ Ta tari sahá cuenda sindaro xiñi ra chihin noo caa, tyicuan caa nacuhva cuenda yo chi yo chi Nyoo, na sacacu ra chi yo. Ta naquehen yo tuhun cha chahá ra chi yo. Vatyí tari noo mityí Tatyí Ii ra cuví tuhun cuan. Vatyí chihin tuhun ra sahá ganaa yo chi cuihna. ¹⁸ Ta nyita ri cahan yo chihin Nyoo. Ta Tatyí Ii ra cuatyinyee chi yo tacuhva cacan tahvi yo chi ra. Ta cuacu ndahvi yo

nuu ra. Ta tyicuan caa cuatu tuhva ri yo. Ta ma ndu uvi iñi yo. Tyicuan ri cacan tahvi yo cha cuenda tandihí ñu yihí cuenda Nyoo. ¹⁹ Ta nacuatu tucu ndo chahi, tacuhva vatyí ñihi que tuhun cahin. Ta ma yuhvi sacote tuhun ra Cristo chi ñáyivi. Vatyí ta cha naha ña chito ñáyivi tuhun ra. ²⁰ Ta cha cuenda cha sacoté tuhun ra Cristo ñohí vehe caa ihya vityin. Soco Nyoo tachí chii vatyí cahin tuhun ra chihin ra nyicú vehe caa ihya. Cacan tahvi ndo cha cuende, tacuhva cuví cahin chihin cha ña yuhví, tari cuhva tahán chi cahin.

Tachí ra Pablo chi ra Tíquico tyi cuhun ra nu nyicu ñu

²¹ Ta ra Tíquico yañi yo, cunacatyí ra tandihí tuhun chi ndo. Maa ra ñi iñi ra sahá tyiño ra cuenda Sutu Mañi yo. Ta cuñi xaan yo chi ra. ²² Tachí chi ra nu nyicú ndo tacuhva sacoto ra chi ndo yoso caa iyó ndi ihya, tacuhva ndunñi ca iñi ndo chino iñi ndo chi Nyoo. ²³ Ta Nyoo Sutu yo ta Sutu Mañi yo Jesucristo nacuhva ra cha taxi ri coo añaima tandihí ra yañi yo. Ta na cuhva Nyoo cha chinó vaha iñi ra chi ra. Ta vityin suri Nyoo nacuhva ra cha cuñi ca ra chi ra ta chi ñáyivi. ²⁴ Ta na nasoco ra chi tandihí yo cha nyita ri cuñi yo chi Sutu Mañi yo Jesucristo chihin cha ñi iñi yo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ñuu Filipos Cha Yihí Cuenda Nyoo

Ñohó ra Pablo vehe caa, ta tyaá ra noo carta chi ñu yihí cuenda Nyoo ñuu Filipos

¹ Yuhu ra Pablo ta ra Timoteo sacuví ndi tyiño nuu ra Jesucristo. Ta tyaá ndi carta ihya chi tandihí ndo cha cuví ndo ñu ñuu Filipos cha yihí cuenda Nyoo. Ta chi ra cayihí ndaha vehe ñuhu, ta chi ra canyehe tyiño vehe ñuhu, ta chi tandihí ndo. ² Na nasoco Nyoo Sutu yo ta Sutu Mañi yo Jesucristo chi ndo. Ta nacuhva ra cha taxi ri coo añima ndo.

Nu chicán tahvi ra Pablo chaha ñu yihí cuenda Nyoo ñuu Filipos

³ Tahan ri cha nichón iñi chi ndo, nacuhvá xain tyahvi nyoo chi Nyoo cha cuenda ndo. ⁴ Ta chicán tahvi chi Nyoo cha cuenda ndo chihin cha sii cuñí añime. ⁵ Vatyí nyata quívi xihna ri cha chiñi ndo tuhun ra Cristo ta nya vityin ta ña sandihí ndo tuhun cha tyinyeé ndo chii. Vatyí ñn ri tuhun ra Jesucristo sacotó yo chi ñáyivi. ⁶ Quívi naquehen cuenda Nyoo añima ndo, maa ra chaha tunyee iñi chi ndo, na sacuví ndo tyiño nuu ra. Ta chité tyi tyicuan ri cuacuhva ra chi ndo nyacua nya quívi quichi ra Cristo inga chaha. ⁷ Tahán chi cha caca xiñi tyehe caa cha cuenda ndo, vatyí cuñí xain chi ndo. Vatyí ñn ri nasocó Nyoo chi yo. Vasi ñohí vehe caa, o vasi nanyaí nuu ra cuví tyiño, soco sacoté tuhun Nyoo chi ra canyicú vehe caa ihya, ta chi ra cuví tyiño, na cacoto ra tyi ndicha tuhun ra Cristo. ⁸ Nyoo chitó ra vatyí cuñí xain chi tandihí nyoho tari cuñí ra Jesucristo chi ndo. ⁹ Ta chicán tahvi xain chi Nyoo na cuvita ca iñi ndo, ta cuñi ca ndo chi ñáyivi. Ta suri coo ca cha chiñi tuñi Nyoo

chi ndo, ¹⁰ tacuhva vatyí tyicuan ri coto ndo nacachi ndo cha vaha ca. Ta tyicuan caa ta cachi coo ndo ta ma coo ca cuatyí ndo quívi quichi ra Cristo. ¹¹ Maa ra cutyinyee ra chi ndo. Ta tyicuan ri cusacuví ndo maa maa ri cha vaha, ta cha ndaa. Tyicuan caa ta cusacahnu ñáyivi chi Nyoo tyi cahnu xaan ca cuví maa ra ta sacuví ra tyicuan caa chihin ndo.

Maa maa ri tyiño Nyoo sacuví ra Pablo vatyí ñohó ra Cristo añima ra

¹² Ta cuñí tyi coto ndo yañi vatyí tandihí cha cuví chii tyinyeé xaan chi chii nu cahín tuhun Nyoo chihin ñáyivi. ¹³ Vatyí chitó tandihí sindaro vehe rey ta tandihí inga ñáyivi ihya vatyí ñohí vehe caa cha cuenda cha nyiquén chi ra Cristo. ¹⁴ Ta cuaha xaan ra yañi yo cuenda Sutu Mañi yo cuní ca iñi ra cha cuenda cha ñohí vehe caa. Ta naá cha yuhvi ra vatyí cachitó ra vatyí tyinyeé Nyoo chi yo. Ta ñihi ca cacahán ra tuhun Nyoo chihin ñáyivi.

¹⁵ Ta ndicha vatyí yihí ra, cahán ra tuhun ra Cristo soco cha cuenda cha tasi cuñí ra nyehé ra chii, o cuñí ra na cunyicon ñáyivi chi ra. Soco yihí ra cahán ra tuhun ra Cristo chihin ñáyivi, soco chihin cha vaha chicá xiñi ra. ¹⁶ Yihí ra cacahán ra tuhun ra Cristo cha cuenda cha cuñí ra chi ra. Vatyí chitó ra vatyí maa Sutu Mañi yo quichi nyaca ra chii ihya. Vatyí cotyíño ra chii, ta sacoté chi ñáyivi tyi ndicha cha sacacú ra añima yo. ¹⁷ Soco inga ra cuan ñima cha ñi iñi ra cahán ra tuhun ra Cristo, soco cuñí ra cuhva ra tisihi chii nu ñohí vehe caa ihya. ¹⁸ Soco cha cuenda chi yuhu ñahri saha, vasi sacuví ra chihin cha vaha chicá xiñi ra o chihin cha ña vaha. Soco tuhun ra Cristo ícan casacotó ra. Ta sii xaan cuñí cha cuenda cuan.

¹⁹ Ta cusii ca iñi vatyí chité vatyí chichi cha tandihí cha cuví chii, Nyoo cuasacacu ra chii. Tyahvi nyoo chi Nyoo vatyí chicán tahvi xaan nyoho cha cuende nuu Nyoo. Ta tyinyeé xaan Tatyí Ii ra Cristo chii. ²⁰ Chitó

vahi vatyi Nyoo cutyinyee ra chii cha ma cucahan nui, ta ma yuhvi cahín chihin cha ní iñi tuhun ra Cristo. Nahri cuende, an coo que ñayiví, an cúvi, soco cuñí vatyi vityin ta ityi nuu ca saha ñáyiví cuenda cuhva iyé ta coto ñu tyi ra Cristo cahnu ca cuví ra. ²¹ Vatyi cha cuenda yuhu tatu iyé, sacuvi tyiño nuu ra Cristo ihya siqui ñuhu ñayiví. Soco tatu cúvi, cuñihi cha tyaqui cha iyó andiví. ²² Soco tatu iyó que, vaha xaan. Vatyi sahá tyiño que cha cuenda cha vaha maa Sutu Mañi yo. Yucuan chaha ña chité nya ityi cuhin, an cuhin ityi andiví, an cuhin cucahan que tuhun Nyoo chihin ñáyiví, ña chité. ²³ Yí xaan cote nya cha cuñí, vatyi iyó quiví cuñí cha coo que. Soco iyó quiví ña cuñí. Vatyi cha cuñí cunuhi cucunyai chihin ra Cristo. Vatyi vaha ca cuan. ²⁴ Soco cha cuenda cha vaha chi nyoho, vaha ca cha ndoi chihin ndo. ²⁵ Yucuan chaha chité vatyi cundoí suhva ca ñáyiví ihya. Vatyi cuñí chi cha tyinyee que chi ndo tacuhva cuvi cahun ca ndo ityi nuu ca ta cu sá cuñí ndo chihin cha chinó iñi ndo chi Nyoo. ²⁶ Ta quiví cunyehe nu nyicu ndo, tyicuan caa ta cuví cusá ca iñi yo cha ñin ri cuví yo chihin ra Cristo.

²⁷ Cuñí chi cha coo yo yoso cuhva tahán chi coo noo ñu yihí cuenda Nyoo. Vasí nyaí chihin ndo, o cañi nyaí, soco cuñí cote tuhun ndo vatyi nyoho vaha cuahan ndo chihin Nyoo. Ta ñin ri sahá tyiño ndo tacuhva nachino iñi ñáyiví tuhun ra Cristo. ²⁸ Ta ma yuhvi ndo ñáa cha sacuví ñu xaan iñi chi ndo cuenda tuhun Nyoo. Vatyi cha tyicuan caa, cachi xaan sañahá chi chi yo vatyi cunaa ñu. Ta sañahá tucu chi chi yo vatyi cha cacú añima yo sahá maa Nyoo. ²⁹ Vatyi tari chahá ra Cristo ityi chi yo cha chinó iñi yo chi ra, tyicuan caa tucu chahá ra cha nyehé yo tindoho cha cuenda ra. ³⁰ ñin ri cuhva nyehé yo tindoho ta sacotó yo tuhun ra Cristo, ta cha chitó ndo yoso caa nyehi tindoho, ta vityin suri chitó ndo vatyi ña sañé cha sahá

tyiñe tuhun Nyoo.

2

Tyayí xaan ra Cristo, soco quichí cúvi ra tari noo ra ndahvi

¹ Ndicha vatyi ra Cristo saní xaan ra iñi yo cha ñin ri cuví yo chihin ra. Ta vaha cuñí yo cha cuenda cha cuñí ra chi yo. Ta ndicha tucu vatyi nyaá Tatyí íi Nyoo chihin yo. Ta ndicha tucu cha ndahvi cuñí yo nyehé yo chi tahan yo. ² Tatu ndicha tandihí ihya, cuhva ndo cha cusá cuñí chihin cha ñin ri cuví ndo. Ta cuñi ndo chi tahan ndo tari cuñí ra Cristo chi ndo. Ta ñin ri cuhva caca xiñi ndo. Ta ñin ri cuhva sacuvi ndo. ³ Ma sacuvi ndo cha vaha chi maa ri maa ndo, soco sacuvi ndo cha vaha chi ñáyiví ñandihí. Ta ma cahnu saha ndo chi ndo. Ndahvi saha yo chi yo. Ta tahan tahan yo saha yo tuhun vatyi vaha ca inga ñáyiví ta ñima ca maa yo. ⁴ Ta tahan tahan yo caca xiñi yo cha cuenda cha vaha chi inga ñáyiví, ta ñima cha vaha chi maa ri maa yo.

⁵ Caca xiñi ndo tari chicá xiñi ra Jesucristo.

⁶ Vasí cuví ra Nyoo, soco ña cahnu saha ra chi ra ta ña quichí cuvi iñi ra cha sacahnú ñáyiví chi ra, tari sacahnú ñu chi Nyoo Sutu ra.

⁷ Soco sandoq ra tandihí tunyee iñi ra ta tandihí cha tyayí ra ñin chiyo xiin.

Ta quichí nanduví ra noo ñáyiví ndahvi quiví cacú ra siqui ñuhu ñayiví.

⁸ Ta ndahvi saha ra chi ra, vatyi nanduví ra noo rayí ri.

Ta chihin cha iyó vaha iñi ra ta quichahá vaha ra chi Nyoo nyacua chahá ra cha cahñi ñáyiví chi ra.

Tari noo ra quiñi iyó saha ñu chi ra, vatyi nu cruzi chihí ra.

⁹ Yucuan chaha Nyoo sacahnú xaan ra chi ra.

Ta chahá Nyoo noo sívi chi ra, noo sívi cha cahnu xaan ca cuví nuu tandihí maa sívi.

10 Vatyí tacuhva tatu cuiñi yo sivi ra Jesucristo, tandihí yo ta cuiñi chiti yo. tandihí cha iyó andivi.

Ta tandihí cha iyó siqui ñuhu ñayivi, ta chichi ñuhú, cucuiñi chiti ta sacahnu chi ra.

11 Vatyí tandihí cha iyó ta nacoto nuu vatyí ra Jesucristo cuví ra nyacá ñaha chi tandihí maa cha iyó.

Tyicuan caa cunyehe chi tyi cahnu xaan ca cuví maa Nyoo Sutu yo.

Ñu yihí cuenda Nyoo cuví ñu tari noo cha ndichin siqui ñuhu ñayivi ihya

12 Yañi, cuñi xain chi ndo. Ta tari cha quichaha ndo chii quivi chinyai chihin ndo, quichaha tucu ndo chii vityin cha cañi nyaí. Nducu xaan ndo cuhva na nyehe ñayivi tyi ndicha cha sacacú Nyoo chi ndo. Ta saha ndo cuenda cuhva coo ndo chihin ra. 13 Vatyí maa Nyoo sacacú cha vaha añima ndo. Ta tyinyeé ra chi ndo tacuhva vatyí quichi cuvi ñi ndo quichaha ndo nu cahán ra, ta sacuvi ndo cuhva cuñi ra.

14 Tatu cuasacuvi ndo ñáá cha cuasacuvi ndo, nducu ndo cuhva cha ma coo tisihi, ta ma cañi tahan ndo. 15 Tyicuan ta ma coo ni noo cuatyí ndo. Cuvi ndo noo ñayivi cachi iyó, cuvi ndo ñayivi ñahri cuatyí, tari tahán chi coo ñayivi cuenda Nyoo mahñu ñayivi quiñi iyó ihya. Cuñi chi cha cuví ndo tari noo ñuhu cha sandichín nu ñaa ñi siqui ñuhu ñayivi ihya. 16 Cahán yo tuhun Nyoo chihin ñayivi vatyí ican cuan chahá ñayivi chaa cha iyó yo. Sacuvi ndo tyicuan caa, tyicuan ta quivi cuquichi ra Cristo, yuhu vaha coo ñi cha cuenda nyoho, vatyí ña sacoto cahi tuhun Nyoo chi ndo. 17 Ta vasi cahñi ñayivi chi yuhu, cha catyí tuhun Nyoo, soco si xaan cuñi ta cuñi cusí cuñi ndo chihin vatyí tyicuan caa sacañá tahn cha cucuhva cuenda yo chi Nyoo, cha cuenda cha chinó ñi ndo chi ra. 18 Ta tahán chi cha cusí ñi tucu nyoho chihin yuhu ñandihí.

Nu tachí ra Pablo chi ra Timoteo ta ra Epafrodito nu nyicu ñu yihí cuenda Nyoo ñuu Filipos cuan

19 Tatu Sutu Mañi yo ta cuñi ra cutachi chi ra Timoteo quichi nyehe ra nu nyicú ndo. Ta quivi ndichi ra nu nyaí cucusi xaan cuñi. Vatyí cunacatyí ra chii yoso caa nyicú ndo.

20 Vatyí noo tuhun ri maa ra chicá xiñi ra cha cuenda cha vaha chi maa ndo tari chicá xiñi yuhu. Ta yori yóo ca ra chicá xiñi tyicuan caa. 21 Vatyí tandihí ca ra, maa maa ri cha cuenda chi maa ra nanducú ra. Ta ña nanducú ra yoso caa cuhva cuñi ra Jesucristo. 22 Chitó ndo vatyí ra Timoteo, vaha cuahan ra chihin Nyoo, ta cha cuenda chi yuhu cuví ra tari noo sehi. Ta tyinyeé xaan ra chii cha cahán ndi tuhun ra Cristo chihin ñayivi. 23 Ta nyaá sacuhin chi ra nu nyicú ndo. Soco nya coto xihne ñáá catyí ra cuví tyiño, tatu ña naha ca ñohí. 24 Vatyí chitó vahi tyi Sutu Mañi yo numi ri cuhva ra cha cuhin cunyehe nu nyicú ndo.

25 Ta vaha cha cunuhu ra Epafrodito yañi yo nu nyicu ndo. Tachí ndo chi ra vatyí quichi tyinyeé ra chii nu tyiño sahi. Ta tñn tahan xaan ndi chihin ra ña vaha cha cuví ndi sindaro ra Cristo. 26 Ta cuñi xaan ra Epafrodito cunuhu ra nu nyicú ndo, vatyí chicá xaan xiñi ra cha chitó ndo tyi cuhvi ra. 27 Vatyí ndicha cuhvi xaan ra ta cha yatyin maa cha cuví ra. Soco Nyoo cundahvi cuñi ra nyehe chi ra, ta chi yuhu ñandihí. Ta ña chahá ra cha cuví ra. Ña cuñi ra cha coo ca tucuihya ñi chii. 28 Yucuan chaha yuhu cuñi xain cha ndichi ra nu nyicú ndo. Vatyí chité tyi nyoho cundusi xaan cuñi ndo cha nanyehe ndo chi ra. Tyicuan ta ma caca ca xiñi tuhun ndo. Vatyí cha nanyehé ndo chi ra tyi iyó vaha ra. 29 Yucuan chaha vaha ñaquehen ndo chi ra chihin cha si cuñi ndo, vatyí yañi yo cha cuenda maa Sutu Mañi yo cuví chi ra. Ta tyicuan ri saha ndo ñayivi chi yañi yo cha iyó tari caa cuhva iyó ra. 30 Vatyí cha yatyin maa cha cuví

ra cha cuenda cha sacuví ra tyiño ra Cristo. Soco ña yuhví ra vasi cúvi ra cha cuenda cha tyinyeé ra chii. Vatyí maa ndo ña cuví quichi tyinyee ndo chii vatyí cañi xaan nyicu ndo.

3

Nu sañahá ra Pablo yoso caa ndu ndi# yo nuu Nyoo

¹ Ta vityin yañi, cusii iñi ndo chihin Sutú Mañi yo. Cha cuenda chi yuhu ñahri sahá cha cha yaha tyají tuhun ihya chi ndo, cutyaa tiqui inga chaha. Vatyí cha vaha chi maa ndo cuví. ² Saha ndo cuenda chi ndo chihin ra cha quiñi iyó chiña. Nyacuví ra cuhva cuñi ra ña vaha. Vatyí catyí ra tyi cuñi chi sacuvi yo costumbre circuncisión ta cacu yo. ³ Soco yoó noo circuncisión cha ndicha savahá Nyoo chi yo. Vatyí maa yo sacahnú yo chi ra chihin Tatyí li ra cha ñohó añima yo. Ta cusii cuñi yo vatyí cuenda maa ra Cristo Jesús yihí yo. Ta ña itá iñi yo tyi cacu yo chihin cha sacuví yo costumbre. ⁴ Tyehe ta cuví cacu yo chihin cha sacuví yo, yuhu vihi ca caquí cha nuu tandihí ñu sacuví tyicuan caa. ⁵ Vatyí uña quivi ta saha ñu circuncidar chii. Vatyí tata ra Israel vachi. Ta tata ra Benjamín sehe ra Israel cuví. Ta tata ñu cahán sahan hebreo cuví. Yucuan chaha yuhu hebreo cuví. Ta sijn ri quichahá xain ley chahnu quivi cuan, vatyí fariseo cuví. ⁶ Ta cha cuenda cha cuñi quichahí ley, ta chican nyicon xain chi ñu yihí cuenda ra Cristo. Ta ña cuñi nyehi chi ñu. Ta quichahí tandihí maa ley chahnu, vatyí nducu xain cuhva quichahí nu cahán ley cuan. ⁷ Soco tandihí cha cuñi mai vatyí vale xaan quivi cuan, vityin ña vale ca cuan. Vatyí maa ra Cristo cuví ra itá iñi. ⁸ Ta sijn ri tandihí cha sacuvi, chitó mai vatyí ña vale cha cuenda cha chicohón nui chi ra Cristo Jesús, Sutú Mañi yuhu. Vatyí yucuan cuví cha tyayii xaan ca. Ta cha cuenda ra Cristo tandihí cha sacuvi ta ityi chata ca cuví chi noo cha ñima ri tuhun vityin. Yucuan chaha sandoi sijn chiyo xiin tandihí cuan. Vatyí

cuñi cohon nuu que chi ra Cristo. ⁹ Ta cha cuñi yuhu nacu sijn ri que chihin ra. Vaha iyé cha cuenda tyi chinó iñi tyi sacacú ra chi yo. Ñima cha cuenda cha quichahí ley Nyoo ta vaha iyé, soco cha cuenda vatyí chinó iñi tuhun cahán ra, vatyí sacacú ra chi yo. Ta cha cuenda cha chinó ri iñi yo, ra Cristo naquehén cuenda ra chi yo. ¹⁰ Cha cohon nuu que chi ra Cristo yucuan cuví cha cuñi. Nyoo sanandoto ra chi ra Cristo chihin tunyee iñi ra. Ta cuñi tyi coo ca tunyee iñi cuan chii. Ta cuñi cunyeí tindoho cha tahán chi nyehí. Ta cuñi cha cúvi tandihí cha ña vaha cha cuñi coño ñuhi, tari chihí ra Cristo cha catyí cuatyí yo. ¹¹ Vatyí nanducú xain cuhva cha cunandote noo ñayivi chaa chihin Nyoo nya andivi.

Cuhun cayo ityi nuu ca chihin Nyoo

¹² Ñima tyi catyí chi ndo tyi ñahri ca cha cumañi chii, ta vaha xain. Soco cuahin ityi nuu ca. Vatyí cuñi naquehin cha chahá ra Cristo chii. Vatyí xihna ca maa ra naxita ra chii ityi ra. ¹³ Yañi, ña catyí chi ndo tyi cha ñihí tandihí cha vaha cuan. Soco sanaí iñi cha quichi ityi chata. Ta sañihí cuhin ityi nuu ca. ¹⁴ Tacuhva tyi chaí nu nyaá cha tahán chi chii. Vatyí caná Nyoo chi yo nya andivi. Vatyí cunaquehen yo cha catyí ra chi yo vatyí cuhva ra cha cuenda cha sijn ri cuví yo chihin ra Cristo Jesús.

¹⁵ Tyehe caa tahán chi caca xiñi tandihí yo cha ñihí nyaá yo chihin Nyoo. Soco tatu ñima tyehe caa chicá xiñi nya noo nyoho, Nyoo cucuhva ra cha cutuñi iñi ndo. ¹⁶ Soco noo ri tyi cuñi chi cha quichahá vaha yo tuhun cha cha yaha sacoto Nyoo chi yo.

¹⁷ Yañi, quehen ndo cuhva iyé ta cuhva cahín. Ta saha ndo cuenda chi ñu iyó tari cuhva sañahá ndi chi ndo. ¹⁸ Vatyí ticuiti chaha catyí chi ndo, saha ndo cuenda chi ra cuendu. Ta vityin catyí tiqui chi ndo inga chaha chihin cha chaquí cha cuihya iñi, vatyí cuaha xaan ra xaan iñi chi ra Cristo. Vatyí catyí ra tyi noo cha

ña ñiñi xaan cuví cha chihí ra Cristo nu cruzi. ¹⁹ Soco quiví quichi tucu ra Cristo, cuhun coyo ra cuan anyaya. Vatyí sacuví ra cuhva cuñí coño ñuhu ra. Ta cahnu sahá ra chi ra chihin cha tahán chi coo ticahan nuu nuu ra. Ta itá iñi ra maa maa ri cha iyó ihya ñayiví ri. ²⁰ Soco yoó nya andiví nyaá ñuu yo. Ta suri ityi cuan nyatú yo chi Sutú Mañi yo Jesucristo, ra sacacú chi yo. ²¹ Ta cuquehen ra coño ñuhu pehe yo. Ta cusananduvi ra chi yo tari coño ñuhu maa ra. Ta chihin tunyee iñi cha iyó chi ra cha nyacá ñaha ra tandihí, cusacuvi ra tyicuan caa.

4

Tyicuan ri na cusí cuñi yo chihin Sutú Mañi yo

¹ Yañi, cuñí chi ndo. Ta cuñí xain nyehi chi ndo. Ta sîi xaan cuñí chihin ndo. Ta chité tyi ña cahán cahi tuhun Nyoo chihin ndo. Vatyí níi xaan iñi ndo nyicón ndo chi ra. Na cuinyaña ca ndo chi Nyoo chihin cha níi iñi ndo.

² Ta vityin chiquén chi cu Evodia, ta chi cu Síntique, nanduvaha coo ñu chihin tahan ñu. Ta na coo ñu tari cha cuhu ñu cuenda Sutú Mañi yo. ³ Yoho, yañi, níi iñun sahá tyiñon chihin, ta chiquén chuun na tyinyeun chi ñu tahan yo ihya. Vatyí tyinyee xaan ñu chii chihin cha sacotó ñu tuhun Nyoo cha cacu añima yo chihin ra Clemente ta suhva ca ñu ñandihí. Ta nyaá sívi ñu nuu tutu Nyoo nya andiví.

⁴ Ta tyicuan ri maa cusí iñi ndo chihin Sutú Mañi yo. Ta catyí tiqui chi ndo inga chaha, na cusí iñi ndo chihin ra. ⁵ Ta tandihí ñáyiví na nyehe ñu chi nyoho vatyí ndicha noo ñáyiví vaha cuví ndo. Ta nicohon iñi ndo vatyí cha nyaña yatyin quiví quichi Sutú Mañi yo.

⁶ Ta ma ndahvi xaan cuñi ndo ñáá ndihí cha cuví chi ndo. Nyita ri nacatyí ndo chi Nyoo ñáá ndihí cha cuví chi ndo. Ta cacan tahvi ndo chi ra ñáá ndihí cha chiñuhú chi ndo. Ta yaha cuan ta nacuhva ndo tyahvi nyoo chi ra. ⁷ Ta cha sacuví ndo tyehe caa, Nyoo cuhva ra cha taxi ri coo

añima ndo. Ta cahnu xaan ca cha vaha cuví cuan. Ta ni noo ñáyiví ta ña cuví cutuñi iñi ñu yoso cuhva cha cahnu cuan. Ta cha taxi maa Nyoo cusaha cumi añima ndo ta cha chiñi tuñi xiñi ndo. Vatyí ñn ri cuví ndo chihin ra Cristo Jesús.

Na caca xiñi yo maa maa ri cha vaha

⁸ Yañi, nu ndihí tuhun caca xiñi ndo maa ri cha ndicha vaha, cha cachi iyó, cha ndoo iyó, cha ndii, cha ñahri cha quiñi caa, cha tyaqui, cha vaha. Caca xiñi ndo maa maa ri maa cha vaha tacuhva cuví sacahnu yo chi Nyoo.

⁹ Sacuvi ndo cha sañahi chi ndo. Tuhun cha chiñi ndo cahin, cha nyehe ndo chinyacuvi, sacuvi ndo. Ta Nyoo ra chahá cha taxi coo añima yo, cucunyaa ra chihin ndo.

Tyinyee ñu Filipos chi ra Pablo chihin cha iyó chi ñu

¹⁰ Sîi xaan cuñí. Ta sacahní chi Sutú Mañi yo cha cuenda cha tyinyee ndo chii inga chaha. Ta chité vatyí tyicuan ri cuñí ndo tyinyee ndo chii. Soco ña chahá chi cuhva chi ndo.

¹¹ Ñima tyi catyí chi ndo tyehe caa ta cuñí ndo tyi iyó cha chiñuhú chii, vatyí yuhu cha cutuhve cha cusí cuñí chihin ñáá ri cha iyó chi. ¹² Vatyí yuhu chité yoso caa coo ndahvi ta chité yoso caa coo tyayí. Vatyí cha cutuhve coi chihin cha iyó o chihin cha ñahri cha cachi, o tatu nyacua ndoo ca, o tatu ñahri tucu, ndoi vaha. ¹³ Tandihí ta cuví chasahí vatyí maa ra Cristo cuví ra tyineé chii. ¹⁴ Soco nyoho yañi vaha xaan cha tyinyee ndo chii chihin tñdoho cha nyehé xain.

¹⁵ Cha chitó nyoho ñu Filipos yoso caa cuví quiví quichaha cahin tuhun Nyoo chihin ndo. Ta quite Macedonia chiña tyi cuasacote tuhun Nyoo inga ñuu. Ta noo tuhun ri nyoho tyinyee ndo chii chihin xuhun, vatyí vaha xaan cuñí ndo cha cahin tuhun Nyoo chihin ndo. ¹⁶ Ta sîin ri cha ní ri ca cha chinyai Tesalónica, cuaha ri chaha tyinyee ndo chii. ¹⁷ Ñima cha

chicá xiñi cha cuenda cha cuhva ca ndo chii, soco cha cuñí vatyí nyoho coo ca cha vaha chi ndo nuu Nyoo.

¹⁸ Ta vityin cuhva, ñahri cha cumañí chii. Nyacua ndoó ca cha sacuhun ndo chii chihin ra Epafrodito. Ta cha chaha ndo cuan cuacuví chi tari noo xico vixi, xico vaha cha chaá nuu Nyoo. Yucuan cuví cha tahán iñi ra. ¹⁹ Ta Nyoo cuhva ra tandihí cha chiñuhú chi ndo. Cha cuenda ra Cristo cucuhva ra tandihí cha vaha cha tyayí cha cumí ra nya andívi. ²⁰ Chi Nyoo Sutu yo na sacahnu yo tyicuan ri maa. Ta na cuvi chi tyicuan caa.

Sacuhún ra Pablo nocumi chi ñu Filipos

²¹ Chahí nocumi chi tandihí ndo cha yihí ndo cuenda ra Cristo chiña. Ta vachi tucu nocumi chi ndo sahá yañi yo cuenda Nyoo cha nyicú chihin ihya. ²² Ta ñáyívi cha nyicú vehe ra nyacá ñaha ñuu Roma ihya, ta tandihí ca ñu yihí cuenda Nyoo ñuu ihya chahá ñu nocumi chi ndo.

²³ Ta na nasoco maa Sutu Mañi yo Jesucristo chi tandihí ndo. Ta na cuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ñuu Colosas Cha Yihí Cuenda Nyoo

Nu sacuhún ra Pablo noo tutu chi ñáyivi ñuu Colosas cha yihí cuenda Nyoo

¹⁻² Yuhu ra Pablo cuví noo apóstol ra Jesucristo. Vatyí tyicuan caa cuhva cuñí maa Nyoo. Yuhu chihin ra Timoteo yañi yo, tyaá ndi noo carta ihya chi ndo ñu ñuu Colosas cha yihí vaha cuenda Nyoo ta cuenda ra Cristo. Nyoo Sutu yo nasoco ra chi ndo ta nacuhva ra cha taxi ri coo aña ndo.

Nu chicán tahvi ra Pablo chaha ñu yihí cuenda Nyoo ñuu Colosas

³ Tyicuan ri cha chicán tahvi ndi chaha ndo. Ta nacuhvá ndi tyahvi nyoo chi Nyoo Sutu Sutu Mañi yo Jesucristo cha cuenda ndo. ⁴ Vatyí ñihí ndi tuhun vatyí chinó xaan iñi ndo chi ra Cristo Jesús. Ta cuñí xaan ndo chi tandihí ñu cha yihí cuenda ra. ⁵ Tyicuan caa sacuví ndo vatyí chitó vaha ndo vatyí cucoo ndo chihin Nyoo nya andivi. Nya quivi chiñi ndo tuhun Nyoo cha ndicha vaha, quihí iñi ndo vatyí sacacú ra Cristo aña ndo. ⁶ Ta suri maa tuhun ra Cristo cha cahan ra Epafras chihin ndo, ican cuan chityá tandihí ri ityi tari chityá tucu nu canyicú ndo. Ta cuaha ñáyivi nacuhvá cuenda ñu chi ñu chi Nyoo, tari nacuhva cuenda nyoho chi ndo ñandihí. Ta cuhva cha chiñi ndo tuhun ra Cristo, ta chito ndo vatyí ndicha vaha cha cuñí Nyoo chi yo. ⁷ Ican ihya sañaha yañi yo ra Epafras chi ndo. Vatyí in ri tuhun Nyoo sahá tyiño ndi chihin ra. Ta ican ra cuví ra sacuví tyiño nuu ra Cristo cha cuenda ndo. ⁸ Maa ra sacoto tuhun ndo chi ndi, vatyí cuñí xaan ndo chi tahan ndo. Vatyí maa Tatyí li Nyoo chahá cha vaha coo aña ndo.

⁹ Yucuan chaha nyacua nya quivi chito ndi tuhun ndo ta ña sandihí ndi tuhun cha nacuatú ndi chaha ndo. Ta chicán ndi chi Nyoo nacuhva ra cha chiñi tuñi ra chi ndo cha cuenda Tatyí li ra. Ta cuacutuñi iñi ndo tacuhva coto vaha ndo ñáá ndihí cha cuñí Nyoo tyi sacuví ndo. ¹⁰ Tyicuan caa ta cuví coo ndo tari cuhva tahán chi coo ñu yihí cuenda Nyoo. Ta na sacuvi ndo tari cuhva cuñí maa ra. Tacuhva sacuvi ndo tandihí nuu cha vaha ta cohon nuu vaha ca ndo chi ra. ¹¹ Ta chicán tucu ndi vatyí na sandunye ca ra chi ndo chihin tunyee iñi cahnu ra vatyí cuví cunyee ndo tandihí cuii chihin cha cama iñi ndo. ¹² Ta chihin cha si cuñí ndo, ta nacuhvá ndo tyahvi nyoo chi Nyoo Sutu yo, vatyí chahá ra cha coo ndo noo ñáyivi chaa. Vatyí natava ra chi ndo nu quiñi caa, ta nanyita ndo nu ndichin nu nyacá ñaha ra chi tandihí ñu yihí cuenda ra. Ta cuhva ra tandihí cha vaha cha tahán chi chi ñu yihí cuenda ra. ¹³ Nyoo tava ra chi yo nu ñaa iñi ta nacuhva cuenda ra chi yo chi ra Cristo vatyí cunyaca ñaha ra chi yo. Vatyí ican ra Cristo cuví Sehe Nyoo. Ta cuñí xaan Nyoo chi ra. ¹⁴ Nasata Nyoo chi yo chihin ñiñi ra Cristo ta saha ra tucahnu iñi cuatyí yo.

Nduvaha iyó yo chihin Nyoo cha cuenda cha chihí ra Cristo cha catyi cuatyí yo

¹⁵ Nyoo, ña nyehé yo chi ra. Soco nanduví ra ñáyivi tacuhva cuví cohon nuu yo chi ra. Ta ican ra cuví Cristo Sehe Nyoo. Nya ta ni cumañi ca chino ñáyivi ta cha iyó maa ra Cristo. ¹⁶ Ta Nyoo chaha ra tyi savaha maa ra Cristo tandihí cha iyo andivi ta siqui ñuhu ñáyivi. Ta savaha ra cha cuví nyehe yo ta cha ña cuví nyehe yo. Savaha ra ángel. Ta savaha ra chi ra ña vaha ta chi tatyí ña vaha ñandihí. Ta tandihí cha nyacá ñaha siqui ñuhu ñáyivi ihya, maa ra savaha. Ta tandihí ihya chino chi tacuhva cotyiño ra yoso cuhva cuñí maa ra. ¹⁷ Ra Cristo cha iyó maa ra nya ta ni cumañi coo

tandihí maa cha iyó. Ta tyicuan ri chahá ra cha conyito tandihí maa cha savaha ra. ¹⁸ Ta maa yo cha yihí yo cuenda ra Cristo, ñn ri cuví yo chihin ra. Cuví yo coño ñuhu ra. Ta maa ra Cristo, cuví xiñi yo, vatyí maa ra cuví nuu chi yo. Ta ican ra cuví cha nandoto cha xihna ca. Yucuan chaha cuví ra nuu chi tandihí cha iyó. ¹⁹ Vatyí maa Nyoo cuñí ra tyi coo tandihí tunyee ñni ra chi ra Cristo. ²⁰ Ta cuñí tucu ra vatyí cha cuenda ra Cristo ta nicoó vaha tandihí cha iyó chihin ra. Yucuan chaha chaha Nyoo cha chihí ra Cristo. Ta chati ñni ra nu cruzi. Vatyí cuñí ra cha nicoó vaha tandihí cha iyó siqui ñuhu ñayivi ta andivi chihin ra.

²¹ Ta nu quichi chi, xaan cuví ñni ndo chi Nyoo cuhva cha chica xiñi ndo cha cuenda cha ña vaha cha chinyacuvi ndo. ²² Soco Nyoo sanicoo vaha ra chi ndo chihin ra vatyí tachi ra chi Sehe ra, ra Cristo vatyí quichi cuví ra nu cruzi. Ta nyehe ra tindoho chihin coño ñuhu ra ta chihí ra, tacuhva vatyí cuhva cuenda ra chi ndo chi Nyoo, soco ñahri ca cuatyí ndo. ²³ Yucuan chaha cuñí chi vatyí sañihí ca ndo chinó ñni ndo. Ta ma sandihí ndo cha yihí ñni ndo tuhun ra Cristo cha chiñi ndo tyi cusacacu ra añima ndo. Ican tuhun ihya, cuví cha cacahán ra nicacahnu ñayivi. Ta sacuvi Nyoo vatyí yuhu ra Pablo tyinyeí cahín tuhun ihya chihin ñayivi.

Nu catyí ra Pablo vatyí nyaá siqui ra cha sañahá ra tuhun ra Cristo tandihí ri vehe ñuhu

²⁴ Vityin cusii cuñí cha cuenda cha nyehí tindoho chihin coño ñuhi cha catyí ndo. Vatyí cha tyicuan caa sacañá tahin tindoho cha nyehe ca ra Cristo cha cuenda yo cha cuví yo coño ñuhu ra. ²⁵ Yuhu cuví noo ra cahán tuhun ra Cristo vatyí tyicuan caa tyinyeí chi tandihí ñu yihí cuenda ra. Vatyí maa Nyoo catyí ra vatyí cahin tandihí tuhun ra cha cuenda cha vaha chi ndo. ²⁶ Sañahí tuhun cha ñoho xehe nya ta tyembu chahnu, nya ta ni cumañi ca chino ñayivi. Nyoo

chicumi xehe ra. Soco vityin cuñí ra cha coto tandihí cuí maa ñu yihí cuenda ra. ²⁷ Ta chi ñu cha ñima ñu Israel cuví tari nyoho, cuñí Nyoo sacotó ra noo tuhun vaha xaan, noo tuhun xehe chi ndo. Ta tuhun xehe cuan ican cuví ihya, vatyí ra Cristo ñohó ra añima ndo cha yihí ndo cuenda ra. Ta cha cuenda maa ra cuñihi ndo gloria nu cunyaa yo chihin Nyoo.

²⁸ Tuhun maa ra Cristo cahán ndi. Ta chahá ndi tuhun chi tandihí ñayivi. Ta sañahá ndi chi ñu tandihí cha chiñi tuñi, tacuhva cuahnu ñu ta nyacua nya cha ñahri ca cumañi chi ñu cha ñn ri cuví ñu chihin ra Cristo. ²⁹ Yucuan chaha tyi ñi ñni sahá tyiñe chihin tunyee ñni ra Cristo ta ñihi xaan chotyíño tunyee ñni cuan chii.

2

¹ Vatyí cuñí cha coto ndo vatyí chica xiñi cha cuenda ndo. Ta chicán tahvi xain cha cuenda tandihí ndo ta cha cuenda ñu Laodicea, ta tandihí inga ñu cha ta nyehe ca chii. ² Chiquén chi Nyoo na cunii ca ñni ndo, ta cu ñn ri ndo chihin cha cuñí ndo chi tahan ndo. Ta cutuñi vaha ca ñni ndo yoso caa cohon nuu ca ndo chi ra Cristo. Vatyí ican ra cuví tuhun cumi xehe Nyoo ta cha naha. Soco vityin sacotó ra chi yo tuhun ihya. ³ Maa ra Cristo chahá ra tandihí cha vaha ta cha chiñi tuñi chi yo. Tatu ñohó nuu yo chi ra Cristo, ñohó nuu yo chi Nyoo. ⁴ Catyí chi ndo tyehe caa tacuhva cha ma sandavi ñaha ñayivi chi ndo chihin tuhun tyaqui. ⁵ Vasi ña nyaí chihin ndo, soco cohon ñni ndo vatyí ñohó ñni tuhun ndo. Ta sii cuñí nyehi chi ndo. Vatyí vaha xaan cuhva cuahán iyó ndo. Ta ñni xaan ñni ndo cuahan ndo chata ra Cristo.

⁶ Yucuan chaha tari chinó ñni ndo chi noo tuhun ri maa ra Cristo quivi nañihi ndo chi ra, tyicuan caa cuñí tucu chi coo ndo ta ñn ri cuví ndo chihin ra. ⁷ Ta cuinyañaa ca ndo chi ra. Ta quhi vaha yoho ndo chihin ra. Ta sanii ca ndo ñni ndo chihin cha chino ñni ndo, tari cuhva sañaha ñu chi ndo. Ta nyita ri nacuhvá ndo tyahvi nyoo chi Nyoo.

Ñayiví chaa cha chahá ra Cristo chi yo

⁸ Saha ndo cuenda vatyi iyó ñáyiví cuñí ñu sandavi ñaha ñu chi ndo chihin tuhun cha ndichí ri maa xiñi ñáyiví, tuhun cha ña ndicha. Vatyi ñima chi ra Cristo chinó iñi ñu cuan. Noo costumbre ri nyicón ñu cuan. Ta nyicón ñu chi cha nyacá ñaha siqui ñuhu ñayiví ihya.

⁹ Soco cha sañahá ñu cuan, ñima cha ndicha cuví. Vatyi Nyoo ta tandihí cha cahnu cuví ra, tandihí cuan ta nyaá chihin ra Cristo. Vatyi maa ra Cristo cuví Nyoo. ¹⁰ Ta cha nyaá ra Cristo chihin ndo, tyitú añima ndo chihin Nyoo. Ta ra Cristo ican ra cuví ra nuu chi tandihí ángel ta tatyí cuihna cha nyacá ñaha. ¹¹ Quiví nañihí ndo chi ra Cristo, quihví ra añima ndo. Ña nduvahá ndo nuu Nyoo chihin costumbre circuncisión cha itá xaan iñi ra Israel. Maa ra Cristo sacuachiyó tandihí cha ña vaha cha tuhva ndo sacuví. Saha ra circuncidar añima ndo cuví cuan soco ñima chihin ndaha ra. ¹² Quiví condutya ndo chichi ndutya, tari quiví chihí ndo chihin ra Cristo cuví cuan. Tyicuan ta quitá ndo chichi ndutya, tari quiví nandoto ndo chihin ra Cristo, vatyi chinó iñi ndo tyi Nyoo chihin tunyee iñi ra sanandoto ra chi ra Jesús. ¹³ Nu quichí chi ña ñohó nuu ndo chi Nyoo. Vatyi sacuví xaan ndo cuatyí. Ta cuví ndo tari noo ñáyiví chihí chihin cuatyí cuan. Ta ña saha ñu circuncidar chi ndo. Soco vityin Nyoo saha ra ticahnu iñi tandihí cuatyí ndo. Ta chaha ra cha coo ndo noo ñayiví chaa chihin cha ñin ri cuví ndo chihin ra Cristo. ¹⁴ Sanatuví ley chahnu cuan cuatyí yo. Ta catyí chi tyi tahán chi chun yo anyaya vatyi ña quichahá yo chi chi. Soco ley cuan Nyoo sacuachiyó ra quiví chihí ra Cristo nu cruzi. ¹⁵ Quiví cha chihí ra nu cruzi cuví chasaha ra chi cuihna ta chi tandihí tatyí ña vaha cha nyacá ñaha. Chihin nuu tandihí maa ángel Nyoo sacotó ra vatyi cahnu ca cuví maa ra ta ñima ca cuihna.

Nu chahá ra Pablo tuhun tyi nanducú yo cha vaha cha chahá Nyoo

¹⁶ Yucuan chaha ña tahán chi quihí yuhu ñáyiví chi yo cha cuenda cha chachí yo o cha chihí yo, o cha cuenda cha ña naquehén vaha yo noo quiví vico. Cuví ri quiví cha natyacu yoo, o cuví ri quiví nyitatu yo. ¹⁷ Tandihí cuan cuví chi tari noo xiñahñu ri cha cuquichi ityi nuu. Ta vityin cha quichí ra Cristo ta ican ra cuví ra cha ndicha vaha sacacu chi yo. ¹⁸ Ma cuhva ndo cha casi ñáyiví nu naquehen ndo noo cha cuacuhva Nyoo chi ndo. Maa ñu ndahvi sahá ñu chi ñu soco ña ndicha ñu, ta sacahnú ñu chi ángel. Ta sahá ñu tyi ñyehe ñu cha sañaha Nyoo chi ñu. Ta cahnu sahá ñu chi ñu chihin cha chicá xiñi ñu tuhun ñayiví ihya. ¹⁹ Ñu cuan ñima chi ra Cristo ra cuví xiñi nyicón ñu. Yucuan chaha nyacuví ñu tandihí cuan. Soco yoó cha nyicón yo chi ra, maa ra cuví nuu chi yo. Ta sandu ñin ri ra chi yo chihin ra. Ta sacahnú ca ra chi yo chihin tunyee iñi ra tari cuhva cuñí maa Nyoo.

²⁰ Tari quiví chihí coño ñuhu cuatyí ndo chihin ra Cristo cuví cuan. Ta ña nyacá ñaha ca tuhun ñuhu ñayiví ihya chi ndo. ¿Ñáá tuhun cha iyó ca ndo tari caa iyó ñáyiví cha ña ñohó nuu Nyoo? Ta quichahá ca ndo cha cahán ñu cha sacuví costumbre cuan. ²¹ Vatyi catyí ñu chi ndo tyehe caa: “Ma tiun ihya chihin ndahun, ma cachun ihya. Coto ma cacun”, catyí ñu. ²² ¿Ñáá tuhun cha quichahá ca ndo tuhun cahán ñu cuan? Vatyi maa maa ri cha ndichí xiñi ñáyiví cuví. Vatyi nyayu noo cha ñin yaha ri cuví. Ma tiví ndo nuu Nyoo cha cuenda cha cachi ndo. ²³ Ndicha vatyi costumbre ihya tari maa cha vaha cuví, cuñí maa ñáyiví. Vatyi sanyehé ñu tindoho coño ñuhu ñu. Ta cuñí ñu tyi vaha sacahnú ñu chi Nyoo tatu sacuví ñu tyicuan caa. Soco ña chaá cuan nuu Nyoo. Vatyi ma cuvi tinyaa cuan cha quiñi caa cha cuñí coño ñuhu ñu.

3

¹ Chahá Nyoo noo ñayiví chaa chi yo vatyi nandoto ra Cristo. Ta vityin nyaá ra chiyo vaha Nyoo andivi. Yucuan chaha na nducu yo cha vaha cha chahá Nyoo chi yo nya andivi. ² Caca xiñi ndo cha vaha cha chahá Nyoo chi yo nya andivi. Ta ma caca xaan xiñi ndo tuhun cha iyó siqui ñuhu ñayiví ihya. ³ Vatyí nyoho cha yaha chihí ndo in caa ri chihin ra Cristo. Ta vityin iyó ndo in ri chihin ra chihin Nyoo. ⁴ Ta quiví quichi tucu ra Cristo, ra chahá ñayiví chaa cha iyó ndo, tyicuan ta cunyehe ñáyiví tyi cahnu xaan ca ra cuví maa ra. Ta cunanyehe tucu ñu chi nyoho in caa ri chihin ra. Ta cutahan tucu maa ndo quichi ndo nu tyaqui cuan chihin ra.

Yoso caa chiyo yo costumbre nu quichi chi ta yoso caa cuñí chi coo yo chihin Nyoo vityin

⁵ Yucuan chaha cuñí chi cha nanducú yo cuhva na cuví tandihí cha quiñi caa cha quichí cuví iñi coño ñuhu yo. Ta ni noo yo ta ma coo ri maa yo chihin ñusihí o chihin rayí. Ta ma sacuvi yo cha ña vaha cha cuñí coño ñuhu yo, o inga cha ña vaha. Ta ma nyiyo iñi yo cha tyayí. Vatyí tari cha sacahnú yo xitohyo, o tavá xiin yo chi Nyoo cuví cuan. ⁶ Cha cuenda tandihí cha ña vaha cuan cuxaán xaan Nyoo chihin ñu cha ña quichahá nu cahán ra. Ta cutachi tuñi ra chi ñu vatyi sacuví ñu cha ña vaha cuan. ⁷ Ta suri tyehe caa chinyacuví tucu maa ndo quiví ña ñoho nuu ndo chi Nyoo. ⁸ Soco vityin ma sacuvi ca yo tandihí cha ña vaha cuan. Ma cuxaan ca yo. Ma cahan uhvi ca yo chi tahan yo. Ta ma cahan cuehe yo chi tahan yo. Ta ma cahan ca yo cha quiñi caa. Ma quita tuhun quiñi caa yuhu yo. ⁹ Ma ñí ca yo cuendu. Vatyí quiví ta ityi chata ca, quiví ña ñoho nuu yo chi Nyoo, tyicuan caa chinyacuví yo. Soco vityin ña nyacá ñaha ca tandihí cuan chi yo. ¹⁰ Vatyí ñayiví cha iyó yo vityin, ñayiví chaa cuví. Noo ñáyiví chaa nanduví yo. Ta nduchaá ca yo tari cuhva caá Nyoo, ra savahá chi yo,

nyacua nya cohon nuu vaha yo chi ra. ¹¹ Ña niñi cha cuví yo ñu Israel, an ñu Grecia, an ñu inga ñuu. Ta ña niñi cha sacuví yo costumbre circuncisión, an cha ma sacuvi yo. Cuví ri yo noo ra chiñi tuñi o cuví ri yo noo ra soho. Cuví ri yo ra iyó chitoho, o cuví ri yo ra yori nyacá ñaha chi yo, ña niñi xaan ca tuhun cuan. Niñi ca cha in ri cuví tandihí yo chihin ra Cristo, vatyi maa ra cuví tandihí.

¹² Nyoo cuñí ra chi yo ta nacachí vaha ra chi yo vatyi cuví yo ñáyiví chí ra. Yucuan chaha na coo yo ñayiví chaa tari tahán chi coo ñu yihí cuenda ra. Na cundahvi cuñi yo nyehé yo chi tahan yo. Na cuví yo ñáyiví vaha. Ndahvi saha yo chi yo. Na cumasu iñi yo. Cunyee yo tandihí tisihí tindoho chihin cha si cuñi yo. ¹³ Na cucama iñi yo chihin noo noo tahan yo. Ta saha yo ticahnu iñi chi tahan yo tatu ñáá cha sacuví ñu chi yo. Tari sahá ra Cristo ticahnu iñi chi yo, tyicuan caa cuñí chi cha sacuví tucu maa yo. ¹⁴ Ta siin ri cuñi yo chi tahan yo. Ta nducu yo cuhva coo vaha yo chihin ñu. Vatyí ican cuan cuví cha sacu in ri chí yo. Ta ican cuan cuví cha niñi ca. ¹⁵ Ta cha taxi maa Nyoo na coo añaima yo. Vatyí ra Cristo nyacá ñaha chi yo. Nyoo nacana ra chi yo vatyi tacuhva in ri cuví yo cuenda ra Cristo. Ta tyicuan ri nacuhva yo tyahvi nyoo chí ra cha cuenda ihya.

¹⁶ Ta tuhun ra Cristo na sacutu añaima yo. Sañaha ca yo tuhun ra chí tahan yo. Ta saní ca yo iñi tahan yo chihin cha chiñi tuñi Nyoo. Sacahnu yo chí Nyoo chihin cha cata yo yaa, o salmo. Ta cata yo yaa cha chahá maa Tatyí Ii Nyoo chí yo chihin cha niñi añaima yo. Ta tyicuan ri nacuhva yo tyahvi nyoo chí Nyoo. ¹⁷ Tatu ñáá tyiño sahá yo, o ñáá tuhun cahán yo, sacuvi yo soco tari cha tyi tyiño maa Sutu Mañi yo Jesús sacuví yo. Ta nacuhva yo tyahvi nyoo chí Nyoo cha cuenda maa ra Cristo.

Chahá ra Pablo tuhun yoso caa nducú yo cuhva coo vaha yo chihin

ñáyiví

¹⁸ Nyoho cha iyó yíi ndo, *cuhva* ndo cha cunyaca ñaha yíi ndo chi ndo. Vatyí yucuan *cuhva* tahán chi coo ndo, vatyí yíhí ndo *cuenda* Sutu Mañi yo. ¹⁹ Ta nyoho rayíi, *cuñi* ndo chi ñasihí ndo. Ta ma nduxaan ndo chi ña. ²⁰ Nyoho cha *cuví* ndo *sehe quichaha* ndo chi *sutu* ndo ta chi *sihi* ndo. Vatyí yucuan *cuhva* *cuñi* maa Sutu Mañi yo. ²¹ Nyoho cha *cuví* ndo *sutu* ta *sihi*, ma *cahan* *xaan* ndo chi *sehe* ndo, vatyí *coto* *nducuihya* *iñi* chi. ²² Ta nyoho cha *cuví* ndo *musu*, *quichaha* ndo chi *chitoho* ndo. Ñima *cuhva* cha *nyehé* ri ra chi ndo *quichaha* ndo chi ra, *tacuhva* vatyí *vaha* *cuñi* ra *nyehé* ra chi ndo. Soco *sacuvi* ndo *chihin* cha *tandihí* *añima* ndo. Vasi ña *nyehé* ra. Vatyí Nyoo *nyehé* ra chi ndo. ²³ *Tandihí* ri *tyiño* *sacuví* yo, *sacuvi* yo *chihin* cha *ñí* *iñi* yo. *Saha* yo *tuhun* *tyi* *tyiño* *nuu* maa Sutu Mañi yo *sacuví* yo. Ta ñima maa ri maa *tyiño* *nuu* *ñáyiví*. ²⁴ Vatyí *chitó* yo vatyí maa Sutu Mañi yo *cuhva* ra *noo* cha *tahán* chi *chi* yo vatyí *sacuví* yo *tyiño* *nuu* ra Cristo. Vatyí *ican* maa ra *cuví* *chitoho* yo cha *ndicha* *vaha*. ²⁵ Soco *tatu* *sacuví* yo cha ña *vaha*, Nyoo *cutachi* *tuñi* ra chi yo cha *cuenda* cha ña *vaha* cha *sacuví* yo. Ta *tandihí* yo *ñin* ri *ñáyiví* *cuví* yo *nuu* ra. Vatyí Nyoo ña *cachi* ra *ñáyiví* *cuñi* ra.

4

¹ Nyoho cha iyó *musu* ndo, *cuñi* chi *tyi* *vaha* *ñáyiví* *cuví* ndo *chihin* *musu* ndo. *Ñicohon* *iñi* ndo vatyí *iyó* *tucu* *noo* *chitoho* maa ndo *nya* *andiví*. Ta maa ra *nyehé* ra chi ndo.

² Ta *tyicuan* ri *çacan* *tahvi* ndo *chihin* cha *ñí* *iñi* ndo. Ta *nacuhva* yo *tyahvi* *nyoo* chi Nyoo cha *cuenda* *tandihí* maa. ³ *Çacan* *tahvi* ndo *chaha* *ndi*, vatyí *nanuña* ca Sutu Mañi yo *xiñi* *ñáyiví* ta *tyasoho* ñu *tuhun* ra Cristo cha *cahán* *ndi* *nuu* ñu. Vatyí *tari* *noo* *tuhun* *xehe* *cuví* *tuhun* ra Cristo chi ñu, vatyí ña *chitó* ñu *tyi* *ican* ra *cuví* ra *sacacú* chi yo. Ta cha *catyi*

tuhun *ihya* ñohí *vehe* *caa*. ⁴ *Çacan* *tahvi* ndo *chahi* *tacuhva* *cuví* *sañahí* chi ñu *yoso* *cuhva* *cuví* *cutuñi* *vaha* *iñi* ñu *tuhun* ra Cristo, *tari* *cuhva* *tahán* chi *tyi* *sacuví*.

⁵ *Cachi* *çoo* ndo *chihin* ñu ña ñohó *nuu* chi Nyoo. Vatyí *tyicuan* *caa* ta *cuví* *cahan* ndo *tuhun* Nyoo *chihin* ñu. ⁶ *Cuñi* chi vatyí *ndatuhún* yo *maa* *maa* ri cha *vaha*, ta cha *cachi*, (ta cha *tahán* *iñi* *ñáyiví*) *tari* *tahán* chi *cunyacuví* yo cha *yíhí* yo *cuenda* ra Cristo. *Tyicuan* ta *cuví* *coto* yo *yoso* *caa* *cunacahan* yo *tatu* *ñáá* *noo* *tuhun* *ndacá* *tuhun* ñu chi yo.

Nu sacuhún ra Pablo nocumi chi ñu ñuu Colosas cha yíhí cuenda Nyoo

⁷ Ra *Tíquico*, *yañi* yo, ra *sahá* *tyiño* *tyiño* Sutu Mañi yo *chihin*, maa ra *cunacatyí* ra chi ndo *yoso* *caa* *cuahán* *nyai*. ⁸ *Yucuan* *chaha* *tachí* chi ra *nu* *nyicu* ndo vatyí *nacatyí* ra chi ndo *yoso* *caa* *nyicú* *ndi*. Ta *sanduní* ca ra *iñi* ndo. ⁹ Ta *chihin* ra *Tíquico* *vachi* *tucu* ra *Onésimo*, *yañi* yo. Ta *ñí* *iñi* ra. Ta *cuñi* yo chi ra. *Cuví* ra *noo* ra ñuu ndo. Maa ra *cunacatyí* ra chi ndo *tandihí* cha *cuví* *nu* *nyai*.

¹⁰ Ra *Aristarco*, ra *tahin* cha ñohó *ndi* *vehe* *caa*, *saquichí* ra *nocumi* chi ndo. Ta *saquichí* *tucu* ra *Marcos*, *yañi* *cunducuatyi* ra *Bernabé*, *nocumi* chi ndo. Ta cha *sacote* chi ndo *tuhun* ra *Marcos*. *Tatu* *chaa* ra *nu* *nyicu* ndo, *vaha* *cahan* ndo *chihin* ra. ¹¹ *Vachi* *tucu* *nocumi* chi ndo *sahá* ra *Jesús*, ra cha *nañi* *tucu* *Justo*. Ta *chichi* cha *tandihí* ñu *Israel* cha *yíhí* *cuenda* Nyoo, *uñi* *tahan* ri ra *ihya* *sahá* *tyiño* ra *tuhun* Nyoo *chihin*. Ta *nduní* *xaan* ca *iñi* *sahá* ra. ¹² *Vachi* *tucu* *nocumi* chi ndo *sahá* ra *Epafras*, ra ñuu ndo. Ta maa ra *sacuví* ra *tyiño* *nuu* ra Cristo. *Tyicuan* ri *chicán* *tahvi* ra *chaha* ndo chi Nyoo *tyi* *nacaca* *vaha* ndo *chihin* Nyoo. *Nacuhva* *cuenda* *vaha* ndo chi ndo chi Nyoo *tacuhva* *cuví* *sacuvi* ndo *cuhva* *cuñi* ra. ¹³ Ta *yuhu* *cuví* cha *ndaa* vatyí ra *Epafras* *chicán* *tahvi* *xaan* ra *cuenda* ndo, ta *cuenda* ñu cha *nyicu* *nya* ñuu *Laodicea* ta ñuu *Hierápolis*. ¹⁴ *Vachi*

tucu nocumi chi ndo sahá ra Lucas, ra cha cuví doctor cha cuñí xaan yo chi. Ta vachi tucu nocumi chi ndo sahá ra Demas ñandihí.

¹⁵ Cuhva ndo nocumi chi yañi yo ta tahan yo cha nyicu ñuu Laodicea. Ta cuhva ndo nocumi chi cu Ninfas ta chi tandihí ñu yihí cuenda Nyoo cha ndu ín ri vehe ña. ¹⁶ Tatu yaha sacuaha ndo carta ihya, ta sacuhun ndo nu canyicu ñu yihí cuenda Nyoo nya Laodicea na sacuaha tucu maa ñu. Ta sacuaha tucu maa ndo carta cha sacuhin chi ñu Laodicea. ¹⁷ Catyi ndo chi ra Arquipo vatyí na sacuvi vaha ra tyiño cha chahá Sutu Mañi yo chi ra tyi sacuví ra.

¹⁸ Yuhu ra Pablo saquichí nocumi ihya chi ndo. Ta ma naa iñi ndo cha ñohí vehe caa. Ta Nyoo na nasoco ra chi ndo. Ta na cuví chi tyicuan caa.

Carta Cha Xihna Ri Sacuhun Ra Apóstol Pablo Chi Ñáyivi Ñuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu yihí cuenda Nyoo

¹ Yuhu ra Pablo chihin ra Silvano ta ra Timoteo, tyaá ndi tutu ihya chi ndo cha cuví ndo ñu yihí cuenda Nyoo ñuu Tesalónica chiña. Vatyí ñin ri cuví ndo chihin Nyoo Sutu yo ta chihin Sutu Mañi yo Jesucristo. Ta Nyoo Sutu yo ta Sutu Mañi yo Jesucristo na nasoco ra chi ndo. Ta na cuhva ra cha coo cha taxi ri añima ndo.

Vaha xaan chinó iñi ñu Tesalónica cuan chi Nyoo

² Tyicuan ri nacuhvá ndi tyahvi nyoo chi Nyoo cha cuenda tandihí ndo. Ta nyita ri chicán tahvi ndi cha cuenda ndo. ³ Tyicuan ri yihí iñi ndi tuhun ndo nuu Nyoo Sutu yo ta nichón iñi ndi vatyí ñi iñi ndo chinó iñi ndo chi Nyoo ta sacuví ndo tyiño nuu ra. Ta ñihi sahá tyiño ndo cha cuenda cha cuñí ndo chi ra. Ta chihin cha ñi iñi ndo yihí iñi ndo cha cuañihi ndo cha cuenda ra Jesucristo. ⁴ Vatyí chitó ndi tyi Nyoo nacachí vaha ra chi nyoho yañi. Ta cuñí xaan ra chi ndo. ⁵ Vatyí quiví cahan ndi tuhun Nyoo yoso caa sacacú ra añima yo chihin ndo, ñima chihin tuhun yuhu ri cahan ndi, soco tyinyee xaan Tatyí li chi ndi, ta cuaha xaan sacuvi ra chihin tunyee iñi ra. Ta cahan ndi chihin cha chitó vaha ndi tyi tuhun ndicha Nyoo cuví. Ta nyehe vaha ndo yoso caa chiyo ndi quiví chinyaa ndi chihin ndo. Tyicuan caa chiyo ndi cha cuenda cha vaha chi maa ndo.

⁶ Ta quichaha iyó ndo cuhva iyó ndi, ta cuhva iyó Sutu Mañi yo. Vatyí natin cuenda ndo tuhun Nyoo, vasi cuaha tindocho nyehe ndo cha cuenda cuan. Soco siñ xaan cuñí ndo vatyí

maa Tatyí li chahá tusi iñi cuan chi ndo. ⁷ Ta cha tyicuan caa, tyinyee xaan ndo chi tandihí ñu yihí cuenda Nyoo nichahnu ityi Macedonia chiña ta nichahnu ityi Acaya ihya ñandihí, vatyí nyehe ñu cuhva iyó ndo chihin Nyoo. ⁸ Ñima ityi Macedonia ta Acaya ri, soco tandihí ri ityi nu chiñi ñu tuhun ndo chitó ñu tuhun Sutu Mañi yo ta chitó ñu vatyí chinó xaan iñi ndo chi Nyoo. Ta yucuan chaha nyacua ña ñiñi ca cha cahan ndi tuhun Nyoo chihin ñu. ⁹ Vatyí suri maa ñu nacatyí ñu chi ndi yoso caa cha vaha xaan tin cuenda ndo chi ndi quiví cuan. Nacatyí ñu yoso caa sandihí ndo tuhun cha sacahnu ndo xitohyo ta quichaha sacuvi ndo tyiño nuu Nyoo nyitó, Nyoo cha ndicha. ¹⁰ Ta nacatyí tucu ñu yoso caa nyatú ndo naquichi tucu ra Jesús Sehe Nyoo inga chaha ityi andivi. Ican ra cuví ra cha sanandoto Nyoo chii. Ta maa ra cuví ra ra sacacú chi yo tacuhva cha ma tachi tuñi Nyoo chi yo quiví sacutuñi ra chi ñáyivi.

2

Tyiño sahá ra Pablo ñuu Tesalónica

¹ Nyoho yañi, chitó ndo vatyí ñima cha caha ri chahan ndi chicahan ndi tuhun Nyoo ñuu ndo. ² Vatyí chitó ndo yoso caa nyehe ndi tindocho saha ñáyivi ñuu Filipino cha ni cumañi ca chaq ndi ñuu ndo. Ta vasi nyehe xaan ndi tindocho ñuu cuan soco quiví chaq ndi ñuu ndo cahan tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduví ñáyivi ñuu ndo, soco tyinyee xaan Nyoo chi ndi ta sacoto ndi chi ndo yoso caa sacacú ra añima yo. ³ Vatyí tuhun cha chaha ndi chi ndo maa maa ri cha ndicha cuví. Ta ñahri cha quiñi caa chicá xiñi ndi. Ta ni ñima cha cuñí ndi sandavi ñaha ndi chi ndo. ⁴ Ñahri cha ña vaha cahan ndi, vatyí Nyoo nyehe ra chi ndi, ta maa ra tyatyíño ra chi ndi vatyí sacoto ndi chi ndo yoso caa sacacú ra añima yo. Ta yucuan cuví cha cahan ndi tari cuhva tyatyíño ra chi ndi. Vatyí ña

cuñí ndi cuvaha ndi nuu ñáyiví, soco nuu Nyoo cuñí ndi cuvaha ndi, vatyí maa ra nyehé ra ñáá cha caa añima yo. ⁵ Ta nyoho chitó ndo vatyí ni noo chaha ña cahan ndi chihin tuhun tyaquí cha cuñí ndi sandavi ñaha ndi chi ndo. Ta ni ñima cha cuñí ndi saha ganaa ndi xuhun ta cahan ndi tuhun ihya chihin ndo. Nyoo cuví ra cha ndaa tyi ndicha cha cahín ihya. ⁶ Ta ni noo chaha ña nanducu ndi cuhva cha sacahnu ñáyiví chi ndi, ni nyoho, ni inga ñu. Ndicha, iyó ityi chi ndi cha cunyacá ñaha ndi chi ndo tyi maa ra Cristo tachí ra chi ndi, soco ña cuñí ndi coso ndi síquí ndo cha tyicuan caa. ⁷ Soco cuñí ndi tyinyee ndi chi ndo. Tari noo sihi sacuahnú ña chi sehe ña, sahá cuenda ña chi cue, tyicuan caa cuñí ndi tyinyee ndi chi ndo. ⁸ Cuñí xaan ndi chi nyoho, ta cahvi iñi ndi vatyí ñima tuhun Nyoo ri cuhva ndi chi ndo, soco nyacua nya ñayiví ndi ñandihí, cha cuenda cha cuñí ndi chi ndo. ⁹ Nyoho yañi, nichón iñi ndo yoso caa saha tyiño ndi quiví chinyicu ndi chihin ndo. Sahá tyiño ndi ñicahñu ta cha cuaa vatyí ña cuñí ndi coso ndi síquí ni noo ndo cha ni ri ca cha cahán ndi tuhun Nyoo chihin ndo.

¹⁰ Ta nyoho cuví ndo cha ndaa, ta Nyoo ñandihí, vatyí maa ri cha vaha ta cha ndaa chinyacuví ndi quiví chinyaa ndi chihin ndo cha cuví ndo ñu chinó iñi chi ra Cristo. Maa maa ri cuhva cuñí Nyoo chinyacuví ndi, ta ña chaha ndi cuhva vatyí cahan ña vaha ndo síquí ndi. ¹¹ Ta chitó tucu ndo yoso caa sanduní ndi iñi noo noo ndo chihin tuhun chaha ndi chi ndo. Sandunyeé ndi iñi ndo tari noo ra chihin sehe ra. ¹² Ta catyi ndi chi ndo nacachi coo ndo tari tahan chi coo ñu yihí cuenda Nyoo. Vatyí maa ra nacana chi ndo vatyí coo ndo nu nyacá ñaha ra, ta nyehe ndo cha tyaquí gloria ra.

¹³ Yucuan chaha tyicuan ri nacuhvá ndi tyahvi nyoo chi Nyoo, vatyí quiví chiñi ndo tuhun ra cha cahan ndi chihin ndo, natiiñ cuenda

ndo vatyí nacoto ndo tyi tuhun Nyoo cuví ta ñima tuhun ñáyiví ri. Ta ndicha cha tuhun Nyoo cuví, vatyí sacuví chi vatyí chino iñi ndo chi Nyoo ta nasama ndo cuhva iyó ndo. ¹⁴ Yahá cuan ta nyehe tucu maa ndo tindoho saha ñáyiví ñuu ndo, tari nyehe tucu ñu yihí cuenda ra Cristo Jesús ñicahnu ityi Judea. Tyicuan caa sanyehe tucu ñu Israel ityi Judea cuan tindoho chi ñáyiví tahan yo cuenda ra Cristo cuan. ¹⁵ Ta ican ñu Israel cuan cachahñi chi Sutu Mañi yo Jesús tari cachahñi tucu ñu chi ra profeta, ra cachaha cuenda tuhun cahán Nyoo ta ityi chata ca. Ñu Israel cuan tava ñehe ñu chi ndi. Ñima cuhva cuñí Nyoo iyó ñu. Ta tasi cuñí ñu nyehe ñu chi tandihí ñáyiví. ¹⁶ Tatu cuñí ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahán ndi, cucuaha ca cuatyí ñu. Ta vityin nu ndihí tuhun cutachi tuñi xaan Nyoo chi ñu.

Nu catyi ra Pablo vatyí cuñi ra cunyehe ra nu nyicú ñu Tesalónica inga chaha

¹⁷ Yañi, cha yahá cha quita ndi ñuu ndo vasi ña naha nyehe ndi chi ndo soco ñohó xaan iñi ndi chi ndo. Ta chihin cha ñi iñi ndi cuñi ndi cunyehe ndi nu nyicú ndo inga chaha. ¹⁸ Ta nducu ndi cuhva cuhun ndi soco ña cuví. Ta yuhu ra Pablo ñandihí, cuaha xaan chaha nduquí cuhva cuhun ndi, soco tahan ri chaha cha cuñi ndi cuhun ndi ta ña chaha ra ña vaha. ¹⁹ Soco ¿yóó chi ita iñi ndi? Ta ¿yóó chi cuenda cusii cuñi ndi, ta vaha cuñi ndi? ¿Atu ñima cha cuenda maa ndo cusii xaan cuñi ndi nuu Sutu Mañi yo Jesucristo quiví quichi ra inga chaha? ²⁰ Vatyí cha cuenda cha vaha cuahan ndo chihin Nyoo ta nyehé yo tyi ña caha ri sahá tyiño ndi. Ta sii xaan cuñi ndi cha cuenda cuan.

3

¹ Ta yucuan chaha ña cunyeé que cha ma cote yoso caa cuahan ndo

chihin Nyoo. Ta natyaj iñi tyi ndoñ űuu Atenas. ² Ta tachĭ chi yañi yo ra Timoteo na cuhun ra cunyehe ra chi ndo. Maa ra sacuvĭ ra tyiño nuu Nyoo vatyi ĩn ri chihin ndi cahán ra tuhun yoso caa cacú ańima yo sahá ra Cristo. Tachĭ ndi chi ra nu nyicú ndo na sandunĭ ca ra iñi ndo ta sandunye ca ra iñi ndo tacuhva vatyi chinó ca iñi ndo chi Nyoo. ³ Tyicuan caa ta ni noo ndo ta ma ndu uvi iñi ndo cha cuenda cha nyehé ndo tındoho. Vatyi nyoho chitó ndo vatyi nyaá yo cha nyehe yo tındoho tyehe caa. ⁴ Vatyi ta ninyaá ca ndi chihin ndo, catyi ndi chi ndo vatyi cha cuńi quichi quĭvi cha nyehé yo tındoho. Ta chitó vaha maa ndo tyi tyicuan caa cuvĭ. ⁵ Yucuan chaha ña cunyeę que cha cuńi cote tuhun ndo. Ta tachĭ tyiño chihin ra Timoteo na nyehe ra yoso caa cuhva cuahan chinó iñi ndo chi Nyoo. Vatyi yuhvi coto sandavi ñaha cuihna chi ndo ta nandĭhvĭ tucu ndo nu quiñi caa inga chaha. Vatyi tu tyicuan caa, cucunaa tandĭhi tyiño saha ndi nu nyicú ndo.

⁶ Soco vityin cha nachaa ra Timoteo cha chahan ra nu nyicú ndo űuu Tesalónica chiña. Ta nacatyĭ ra chi ndi vatyi nĭ iñi ndo chinó iñi ndo chi Nyoo. Ta cuńi xaan ndo chi tahan ndo. Ta catyĭ ra tyi tyicuan ri nicohón iñi ndo chi ndi ta cuńi xaan ndo nyehe ndo chi ndi, tari nyuhu, cuńi tucu maa ndi nyehe ndi chi ndo. ⁷ Yucuan chaha, yañi, vasi cuaha cha cuvĭ chi ndi ta nyehé ndi tındoho, soco vaha xaan cuńi ndi cha chitó ndi vatyi nyoho vaha chinó iñi ndo chi Nyoo ta ña sańa ndo chi ra. ⁸ Tari quĭvi cha nduchaá ñayĭvi ndi, cuńi maa ndi cuhva cha nacoto ndi vatyi nyoho ñihi cuahan ndo chihin Nyoo. ⁹ Nyacua ña ñihĭ ndi cuhva nacuhva ndi tyahvi nyoo chi Nyoo cha cuenda ndo. Vatyi sĭ xaan cuńi ndi nuu Nyoo cha cuenda vatyi vaha cuahan ndo chihin ra. ¹⁰ Chicán tahvi xaan ndi chi Nyoo ñicahñu ta cha cuaa, vatyi cuńi ndi cuhun ndi cunyehe maa ndi chi ndo. Tyicuan ta cuvĭ sandunanĭ ndi cha chinó iñi ndo.

¹¹ Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuvi cuhun ndi nu nyicú ndo. ¹² Ta na tyinyee ca Sutu Mañi yo Jesucristo chi ndo tacuhva cuńi ca ndo chi noo noo tahan ndo ta chi tandĭhi ñáyĭvi tari cuńi nyuhu chi nyoho. ¹³ Tacuhva vatyi cunĭ ca iñi ndo ta cunduvii ndĭhi ańima ndo. Ta ma coo ca cuatyĭ ndo nuu Nyoo Sutu yo quĭvi quichi tucu Sutu Mañi yo Jesucristo chihin tandĭhi ca ñu yĭhĭ cuenda ra.

4

Cuhva cha tahán iñi Nyoo cha coo yo

¹ Vityin yañi, chacú ndahvi ndi nuu ndo ta chahá ndi tuhun chi ndo chihin ndusu yuhu Sutu Mañi yo Jesucristo, na coo ca ndo tari cuhva sańaha ndi chi ndo, cuhva tahán iñi Nyoo. Ta sańihi ca ndo coo ndo tyicuan caa noo noo quĭvi.

² Nyoho cha chitó ndo yoso caa chaha ndi cuhva chi ndo tari chaha tucu maa Sutu Mañi yo Jesús cuhva chi ndi. ³ Cha cuńi Nyoo, ican cuvĭ ihya: Cha nacuhva ndĭhi ndo chi ndo chi ra tacuhva sanduvii ndĭhi ra ańima ndo. Ta ni noo ndo ta ma coo ndo chihin noo ñaha sihi o rayĭ tatu ñima ñasihĭ o yĭ ndo cuvĭ. ⁴ Ta tahan tahan ndo cuńi chi coto ndo yoso caa coo ndo chihin ñasihĭ ndo. Coo vii ndo chihin ña chihin cha cuńi ndo chi ña. ⁵ Ñima chihin cha quichi cuvĭ iñi ndo cha quiñi caa tari nyacuvĭ ñáyĭvi cha ña ñohó nuu chi Nyoo. ⁶ Ta ni noo ndo ta ma sandavi ñaha ndo chi yañi ndo ta coo ndo chihin ñasihĭ ra. Vatyi Sutu Mañi yo, ñihi xaan tachĭ tuñi ra chi ñu sacuvĭ tyicuan caa, tari cuhva catyĭ ndi chi ndo. ⁷ Vatyi Nyoo nacana ra chi yo vatyi tacuhva sacuvi yo cuhva cuńi maa ra, ta ñima noo cuhva quiñi caa. ⁸ Ta yucuan chaha yóo ñu cha ña cuńi tyasoho tuhun ihya, ñima tuhun ñáyĭvi ri ña tyasohó ñu, soco tuhun Nyoo ña tyasohó ñu. Vatyi suri maa Nyoo chaha ra Tatyĭ Ii ra chi ndo. ⁹ Soco tuhun cha cuńi yo chi tahan yo, ña chiñuhú cha tyai nu

tutu ihya tuhun cuan. Vatyí suri maa Nyoo cha sañaha ra chi ndo vatyí cuñi yo chi tahan yo cuenda Nyoo. ¹⁰ Ta tyicuan caa cuñi ndo chi tandihi tahan yo nicahnu Macedonia chiña. Soco chacú ndahvi nuu ndo yañi, vatyí na cuñi ca ndo chi ñu noo noo quivi. ¹¹ Nducu ndo cuhva coo vii ndo. Ta ma tyihi ndo chi ndo nu ña tahan chi, soco ñn ri tyiño maa ndo caca xiñi ndo. Ta saha tyiño ndo chihin ndaha ndo tari cuhva catyí ndi chi ndo quivi cuan. ¹² Tyicuan caa sacuvi ndo tacuhva vatyí ñáyivi ña ñohó nuu Nyoo cuasaha ñu ñáyivi chi ndo. Ta ñahri cuacumañi chi ndo.

Yoso caa cucuvi quivi quichi Sutu Mañi yo Jesús inga chaha

¹³ Yañi, ña cuñi ndi cha ma coto ndo ñáa cha cuví chi ñáyivi chihí, vatyí coto nducuihya iñi ndo tari nducuihyá iñi ñáyivi cha ma tahan chi nyehe chi Nyoo. ¹⁴ Ta tari cha chinó iñi yo vatyí chihí ra Jesús ta nandoto ra, tyicuan caa chinó tucu iñi yo vatyí Nyoo cusanandoto ra chi ñu ndiyi cha chinó iñi chi ra.

¹⁵ Yucuan chaha catyí ndi chi ndo tari sañaha Sutu Mañi yo chi ndi. Vatyí yoó cha nyitó yo nyacua nya quivi quichi ra, ñima xihna ca yo cuhun ican saha ñu cha yaha chihí.

¹⁶ Vatyí suri maa Sutu Mañi yo cunoo xica ra andivi, ta cucana chaa ra vatyí maa ra cuví ra nyacá ñaha. Ta cucana chaa noo ra cuví nuu chi ángel. Ta cunativi trompeta Nyoo. Tyicuan ta ñáyivi cha yihí cuenda ra Cristo ta chihí ñu, xihna ca ñu cunandoto.

¹⁷ Yaha cuan ta yoó cha nyitó ca yo cundaa xica yo ñn ri chihin ñu nu vico, nu cunañihi tahan yo chihin Sutu Mañi yo ityi andivi. Ta yucuan ta cucunyaa yo chihin ra tyicuan ri maa. ¹⁸ Yucuan chaha sanduní ndo iñi tahan ndo chihin tuhun ihya.

5

¹ Soco ama o ñáa quivi cucuvi tuhun ihya, ña niñi cha cahin tuhun cuan chihin ndo yañi. ² Vatyí cha chitó vaha maa ndo vatyí ma tuvi

ri iñi yo ta cuchaa quivi quichi tucu Sutu Mañi yo. Vatyí tari cuhva quihvi noo ra suhu vehe ñáyivi cha cha cuaa, tyicuan caa cucuvi. ³ Vatyí quivi cha catyí ñáyivi vatyí vaha xaan iyó ñu, ta ñahri maa cha yuhvi ñu, tyicuan ta sana iñi ñu ta quichi tindoho cuan siqui ñu. Tari noo ñaha sihi cha cuacacu sehe, sana iñi ña ta quihvi cha uhvi chi ña. Ta tyicuan caa cucuvi chi ñáyivi quivi quichi Sutu Mañi yo, vatyí ma cuví cono ñu. ⁴ Soco nyoho yañi, ñima ca nu ñaa iñi nyicú ndo ta catyí ndo vatyí sana iñi ndo ta cuchaa chi quivi Sutu Mañi yo, tari sana iñi ñáyivi tatu quihvi ra suhu vehe ñu. ⁵ Vatyí tandihi yo chitó yo yoso caa tahan chi coo yo vatyí Nyoo sandundichin ra ñima yo, ta ña iyó ca yo nu ñaa iñi tari ñu ña ñohó nuu Nyoo. ⁶ Yucuan chaha ma cuví yo tari inga ñu cuan. Tari quivi cha quixí ñu vatyí ña quichahá ñu cha ndichi Sutu Mañi yo. Soco yoó cuatu tuhva yo ta cachi coo yo. ⁷ Vatyí ñu quixí, quixí ñu cha cha cuaa, ta ñu chihí xaan ndixi, chiñí ñu cha cha cuaa. ⁸ Soco yoó cha cuví yo ñu cuenda cha ñicahñu, nacachi coo yo. Ta tari noo sindaro sahá ra cuenda chi ra chihin noo cha tyaá ra pechu ra, tyicuan caa saha yo cuenda chi yo chihin cha ñi iñi yo chinó iñi yo chi Nyoo, ta chihin cha cuñi yo chi tandihi ñáyivi. Ta tari sindaro sahá cuenda ra xiñi ra chihin noo caa, tyicuan caa cuñi chi cha sahá yo cuenda chi yo chihin cha yihí iñi yo tyi cacu yo. ⁹ Vatyí Nyoo ña tyaá ra cuhva chi yo vatyí tachi tuñi ra chi yo, soco nacachi ra chi yo vatyí cacu yo cha cuenda Sutu Mañi yo Jesucristo. ¹⁰ Vatyí ra Jesucristo chihí ra cha cuenda yo vatyí tacuhva coo yo ñn ri chihin ra. Ñahri saha vasi cha chihí yo o iyó ca yo, soco tandihi yo coo yo ñn ri chihin ra. ¹¹ Yucuan chaha sanduní ca ndo iñi tahan ndo ta sandunye ca ndo iñi ñu, tari cuhva cuahan nyacuví ndo vityin.

Nu chaha ra Pablo tuhun chi ñu

¹² Soco yañi, chacú ndahvi ndi nuu ndo, na saha ndo ñáyivi chi ra sahá tyiño nu nyicú ndo. Vatyí nyisó ra tyiño cuenda Sutu Mañi yo ta chahá ra tuhun chi ndo. ¹³ Cuñí chi cha saha xaan ndo ñáyivi chi ra chihin cha cuñí ndo chi ra. Vatyí sacuví ra tyiño Sutu Mañi yo. Ta vaha ço ndo chihin tahan ndo cuenda Nyoo.

¹⁴ Ta tyatyíño ndi chi ndo yañi, vatyí cuhva ndo tuhun chi ñu cha ña cuñí saha tyiño. Ta sanduní ndo ñi ñu cha ña ñi ca ñi. Ta tyinyee ndo chi ñu vita cuñí vatyí ta chino vaha ca ñi ñu. Ta cucama ñi ndo chihin tandihí ñáyivi.

¹⁵ Saha ndo cuenda coto sacuvi ndo cha ña vaha chihin ñu nyacuví cha ña vaha chihin ndo. Nducu ndo cuhva sacuvi ndo cha vaha chihin tahan ndo cuenda Nyoo ta chihin tandihí ñáyivi.

¹⁶ Tyicuan ri cusí cuñi ndo. ¹⁷ Ta cacán tahvi ndo tyicuan ri maa. ¹⁸ Nacuhva ndo tyahvi nyoo chi Nyoo cha cuenda tandihí cha cuví. Vatyí ican ihya cuví cha cuñí Nyoo cha sacuvi yo cha cuví yo ñu chinó ñi chi ra Cristo Jesús.

¹⁹ Ma ndahva ndo ñuhu Tatyí Ii cha nyaá ñima ndo. ²⁰ Ma cuacu nyaa ndo tuhun Nyoo cha cahán noo ra cahán tuhun chahá Nyoo. ²¹ Tin cuenda ndo tandihí cha cahán ra. Ta ñaquehen ndo cha vaha. ²² Cuachiyo ndo nuu tandihí cha quiñi caa.

²³ Ta maa Nyoo ra iyó cha taxi ri chii, na sanduvii ca ra ñima ndo tacuhva vatyí ñn ri chi maa ra nacuhva cuenda ndo chi ndo. Ta na cocumi ra ñima ndo ta cha chiñi tuñi ndo ta coño ñuhu ndo tacuhva vatyí ma coo ca cuatyí ndo quiví quichi tucu Sutu Mañi yo Jesucristo. ²⁴ Ra cha nacachí chi ndo, cuví cunye ñi yo chi ra, vatyí maa ra cusacuvi ra tandihí maa ihya.

Nu ndihí cahan ra Pablo ta chaha ra nocumi chi ñu

²⁵ Yañi, cacán tahvi ndo cha cuenda ndi.

²⁶ Ta nacuhva ndo nocumi chi tandihí yañi yo cuenda Nyoo.

²⁷ Tyatyíñé chi ndo chihin ndusu yuhu Sutu Mañi yo vatyí sacuahá ndo carta ihya nuu tandihí tahan yo cuenda Nyoo.

²⁸ Ta na nasoco Sutu Mañi yo Jesucristo chi ndo. Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ñáyivi Ñuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu ñuu Tesalónica cha yihí cuenda Nyoo

¹ Yuhu ra Pablo chihin ra Silvano ta ra Timoteo, tyaá ndi noo tutu ihya tyi sacuhun ndi chi ndo cha cuví ndo ñu yihí cuenda Nyoo ñuu Tesalónica chiña. Vatyí ñn ri cuví ndo chihin Nyoo Sutu yo ta chihin Sutu Mañi yo Jesucristo. ² Ta na nasoco Nyoo Sutu yo ta Sutu Mañi yo Jesucristo chi ndo. Ta na cuhva ra cha taxi ri coo añima ndo.

Nu catyi ra Pablo yoso caa cusacutuñi Nyoo chi ñu iyó cuatyí quívi quichi ra Cristo

³ Nyoho yañi, tyicuan ri cuñí chi cha nacuhva ndi tyahvi nyoo chi Nyoo cha cuenda ndo, vatyí tyicuan caa tahán chi cha sacuví ndi cha cuenda cha ñihi ca cuahan chinó iñi ndo chi Nyoo noo noo quívi, ta ñn ri cuñí xaan ca ndo chi tahan ndo. ⁴ Yucuan chaha ñi cuñí ndi cahán ndi tuhun ndo chihin nuu ñu yihí cuenda Nyoo inga ca vehe ñuhu. Vatyí nyoho cama xaan iñi ndo ta vaha xaan chinó iñi ndo chi Nyoo cha ñi ri ca yahá ndo tandihí tindoho sanyehé ñáyivi chi ndo. ⁵ Ihya sañahá chi yo vatyí vaha cuhva sacutuñi Nyoo chi yo, vatyí nu ndihí tuhun cusaha Nyoo tuhun vatyí naña tucu nyoho quíhvi ndo nu nyacá ñaha ra. Vatyí cha cuenda tuhun ra, nyehe xaan ndo tindoho vityin.

⁶ Ta cha cuenda chi Nyoo, vaha cha cutiyahvi ra chihin tindoho chi ñu sanyehé tindoho chi ndo. ⁷⁻⁸ Ta chi nyoho cha nyehé ndo tindoho sahá ñu, cuhva ra cha nyitatu ndo tari cuhva tucu ra chi nyuhu, quívi

cuquichi tucu Sutu Mañi yo Jesucristo nya andivi chihin ángel cha iyó xaan tunyee iñi ra chi, quichi ra chihin ñuhu cha cayú. Vatyí cutachi tuñi ra chi ñáyivi ña ñohó nuu Nyoo, ñu ña quichahá tuhun ra, tyi cuví ra Sutu Mañi yo Jesucristo, ra quichí sacacu chi yo. ⁹ Ñu cuan, cundoho ñu ta ma ndihí maa cha ndoho ñu, ta cunaa ñu nuu Sutu Mañi yo Jesucristo vatyí ma nyehe ñu chi ra. Ni ma nyehe ñu ñana cha cahnu cuví ra chihin tunyee iñi ra ¹⁰ quívi cuquichi ra. Vatyí quívi cuan ñu yihí cuenda ra cusacahnu ñu chi ra, tandihí ri ñu chinó iñi chi ra. Ta mahñu ñu, ñohó tucu nyoho vatyí chinó iñi ndo cha ndaa cha chahá ndi chi ndo.

¹¹ Yucuan chaha tyicuan ri chicán tahvi ndi chaha ndo, na tyinyee Nyoo yo chi ndo tacuhva na saha ra tuhun vatyí naña ndo cha cuví ndo ñáyivi nacachí ra. Ta chicán tahvi tucu ndi chaha ndo na tyinyee ra chi ndo tacuhva cuví sacuvi ndo cha vaha chihin tunyee iñi ra. Ta tandihí tyiño sahá ndo nuu ra cuacacu vaha, suri cha cuenda tunyee iñi chahá ra chi ndo vatyí chinó iñi ndo chi ra. ¹² Tacuhva sacahnu ñáyivi sívi Sutu Mañi yo Jesucristo, vatyí nyehé ñu cuhva iyó ndo. Ta maa ra cusacahnu ra chi ndo nuu ñáyivi cha cuenda tumañi iñi cha chahá Nyoo chi ndo cha cuenda ra.

2

Ra cha ñahri maa ley Nyoo iyó chi

¹ Ta cha cuenda quívi cuquichi Sutu Mañi yo Jesucristo nu cusandu ñn ri ra chí yo, cuñí cahin vityin, nyoho yañi. Vatyí chacú ndahvi nuu ndo, ² ma vatyí xaan cutondo xiñi ndo. Ni ma nayuhvi ndo vatyí nyacua nya tatyí ñavaha ta cucatyí chi chí ndo vatyí cha chaá quívi Sutu Mañi yo, ta nyacua nya ra cahán tuhun Nyoo ta cucatyí ra vatyí cha chaá quívi cuan, ta cutyaa ra nu carta ta cucatyí ra tyi yuhu sacuhin carta cuan chi ndo. ³ Ni noo cuhva ma cuhva ndo cha sandavi ñaha ñu chí ndo. Vatyí cha

ni cumañi ca chaa quivi cuan cuaha xaan ñu cusandihí ñu cha chino iñi ñu chi Nyoo ta cundicuita rayi cha ñahri ley Nyoo iyó chi, ra cacu vatyí cunaa cuví ra cuan. ⁴ Ican ra cuví ra xaan iñi chi Nyoo. Cundicuita ra siqui tandihí cha nyisó sivi Nyoo. Tandihí cuhva sacahnú ñáyivi chi Nyoo cunducuita ra siqui. Ta nyacua nya chichi vehe ñuhu cahnu Nyoo ta cucunyaa ra ta cunyaca ñaha ra, cusaha ra tyi Nyoo cuví ra.

⁵ ¿Atu ña nichón iñi ndo vatyí ta ni nyaa que chihin ndo cahin tuhun ihya chihin ndo? ⁶ Soco vityin nyoho chitó ndo ñáá tuhun cha ña ndicuita ñaha ra tacuhva vatyí ndicuita ra soco nya quivi tahán maa chi. ⁷ Cha iyó tuhun cha ña quichahá ñáyivi chi Nyoo siqui ñuhu ñáyivi, soco iyó xehe chi, vatyí iyó noo cha chasí, ta ña chahá cuan cha nducuaaha chi. Soco quivi canyaha cuan, cunduñihi cha quiñi caa cuan. ⁸ Tyicuan ta cundicuita ra quiñi caa cuan ta Sutu Mañi yo cucahñi ra chi ra chihin tatyí yuhu ra ta cusanaa ra chi ra chihin cha xiño ra quivi cuquichi ra. ⁹ Ra quiñi caa cuan, cuenda cuihna cuquichi ra. Ta tandihí tunyee iñi cuihna cucoo chi ra, ta cusandavi ñaha ra chi ñáyivi chihin seña ta milagru ta cha iyo. ¹⁰ Tandihí ri nuu cha ña vaha cucotyño ra tacuhva cuvi sandavi ñaha ra chi ñáyivi cha cucunaa. Vatyí ñu cuan ña cuñi ñu quichaha ñu cha ndicha tacuhva cuvi cacu ñu. ¹¹ Ta yucuan chaha cucuhva Nyoo vatyí cusandavi ñaha cha ña vaha cuan chi ñu. Ta cuchino iñi ñu cha ña ndicha. ¹² Tacuhva vatyí cutachi tuñi ra chi tandihí ñu vatyí ña cuñi ñu chino iñi ñu cha ndicha. Ta tahán ca iñi ñu sacuví ñu cha ña vaha.

Nu cahan ra Pablo tuhun ñu cha nacachi Nyoo vatyí cacu ñu

¹³ Soco tyicuan ri cuñi chi cha nacuhva ndi tyahvi nyoo chi Nyoo cha cuenda nyoho yañi. Vatyí cuñi xaan Sutu Mañi yo chi ndo. Vatyí Nyoo nacachi ra chi ndo nyata quivi xihna ri vatyí cuacacu ndo cha cuenda cha sanduvaha Tatyí li ra

añima ndo ta cha cuenda cha chinó iñi ndo cha ndicha. ¹⁴ Yucuan cuenda nacana Nyoo chi ndo quivi cahan ndi tuhun ra chihin ndo tacuhva vatyí cuñihi ndo chiin cha cahnu cuví Sutu Mañi yo Jesucristo.

¹⁵ Yucuan chaha sanñi ndo iñi ndo, nyoho yañi. Ta ma naa iñi ndo tuhun cha sañaha ndi chi ndo ta ni nyaa ca ndi chihin ndo. Ni ma naa iñi ndo tuhun cha tyaa ndi nu tutu cha sacuhun ndi chi ndo. ¹⁶⁻¹⁷ Sutu Mañi yo Jesucristo ta Nyoo Sutu yo cuví ra cha cuñi chi yo. Ta cha cuenda tumañi iñi cha chahá ra chi yo sandunñi ra iñi yo tyicuan ri maa. Ta chahá ra cha cuita iñi yo coo yo chihin ra. Ta na nacuhva maa ra cha si cuñi añima ndo. Ta na sandunani ra iñi ndo, tacuhva cuvi cahan ndo ta sacuvi ndo tandihí nuu cha vaha.

3

Nu chicán ra Pablo na cacan tahvi ñu chaha ra

¹ Nu ndihí tuhun, nyoho yañi, cacan tahvi ndo chaha ndi tacuhva vatyí numi ri chaa tuhun Sutu Mañi yo tandihí ri ityi. Ta na quichaha ñáyivi ta natin cuenda ñu tari natin cuenda nyoho. ² Cacan tahvi tucu ndo tacuhva vatyí na cacu ndi ndaha ñáyivi ña vaha, ñu quiñi iyó. Vatyí ña tandihí ñáyivi chinó iñi ñu chi Sutu Mañi yo. ³ Soco Sutu Mañi yo ndicha ra. Ta maa ra cuasaquehen ityi ra chi ndo, ta cuasaha cuenda ra chi ndo coto tin ra ña vaha chi ndo. ⁴ Ta cunyeé xaan iñi ndi chi Sutu Mañi yo vatyí nyoho sacuví ndo tari cuhva catyí ndi chi ndo, ta cusacuvi ca ndo. ⁵ Ta vityin na tyinyee ca Sutu Mañi yo chi ndo tacuhva cuñi ca ndo chi ñáyivi tari maa ra cuñi ra chi ñu. Na tyinyee ra chi ndo na cucama iñi ndo cuhva nyehe ndo tindoho, tari ra Cristo cunyeé xaan iñi ra nu nyehe ra tindoho.

Tahán chi cha saha tyiño yo

⁶ Ta vityin chihin ndusu yuhu Sutu Mañi yo Jesucristo, catyí ndi chi ndo, nyoho yañi, ma cutahan ndo chihin yañi yo ra ña cuñi saha tyiño, ta ña iyó

ra cuhva sañaha ndi chi ndo. ⁷ Vatyí nyoho chitó ndo yoso caa tahán chi coo ndo tari cuhva sañaha ndi chi ndo. Vatyí nyuhu ña chinyicu ndi chihin ndo cha ña sahá tyiño ndi. ⁸ Ta ni ña chachi ndi cha chii ndo cha ña tyiyahvi ndi. Soco saha tyiño ndi ñicahñu ta cha cuaa vatyí ña cuñí ndi coso ndi siqui ni noo ndo. ⁹ Vasi iyó chi ityi chí ndi cha cacán ndi cha tyinyee ndo chi ndi, soco nyuhu saha tyiño ndi vatyí cuñí ndi sañaha ndi noo cuhva vaha cunyicon ndo. ¹⁰ Vatyí quivi chinyaa ndi chihin ndo, catyí ndi chi ndo vatyí ñu cha ña cuñí saha tyiño, ma cachi ñu. ¹¹ Cahán ndi siqui ihya vatyí ñihí ndi tuhun vatyí yihí ndo chicá noo yanga ri ndo ta ñahri maa tyiño sahá ndo. ¹² Chi nyoho cha iyó ndo tyicuan caa, catyí ndi chi ndo chihin ndusu yuhu maa Sutu Mañi yo Jesucristo, na casaha tyiño vaha ndo, ta yaha ndo noo noo quivi.

¹³ Yañi, ma cutatu ndo sacuvi ndo cha vaha. ¹⁴ Tatu iyó noo ra ña cuñí quichaha tuhun cahán ndi nu tutu ihya, saha ndo cuenda chi ra ta ma cutahan ndo chihin ra tacuhva na cucahan nuu ra. ¹⁵ Soco ma cuxaan iñi ndo chi ra, soco cuhva ndo tuhun chi ra vatyí yañi yo cuví ra.

Nu ndihi cahan ra Pablo

¹⁶ Sutu Mañi yo taxi ri iyó aña ra, ta suri maa ra na cuhva ra cha taxi ri coo aña ndo tandihi ri cuhva tandihi ri quivi. Ta nacuhva ndo cha cunyaa vaha ra chihin tandihi ndo. ¹⁷ Yuhu ra Pablo tyaí nocumi ihya chi ndo chihin ndahi, ta chihin letre. Ta tyehe caa tyihí firme nu tandihi carte. Ta tyehe caa tuhvé tyai. ¹⁸ Ta Sutu Mañi yo Jesucristo na nasoco ra chi tandihi ri ndo. Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi Ra Timoteo

Nu tyaq ra Pablo noo tutu chi ra Timoteo

¹ Yuhu ra Pablo cuví noo apóstol chi ra Jesucristo vatyí tachí ra chii na caque tyiño ra. Maa Nyoo cuví ra sacacú chi yo. Ta ican ra catyí tyi sacuvi tyiño ihya, ta Sutu Mañi yo Jesucristo ñandihí. Vatyí maa ra cuví ra cha yihí iñi yo. ² Tyaí tutu ihya chi yoho Timoteo vatyí sehe vahi cuví chuun cha cuenda cha chinó iñun tuhun ra Cristo cha sacote chuun. Ta cuñí vatyí nasoco Nyoo Sutu yo ta Sutu Mañi yo Jesucristo chuun. Ta na nyehe ndahví ra chuun. Ta na coo ca cha taxi ri añimon saha ra.

Nu sañaha ra Pablo chi yo yoso caa saha yo cuenda tuhun cha ña ndicha

³ Quiví quite ñuu Éfeso chiña cha cuaquichi ityi Macedonia ihya, catyí chuun na ndoun Éfeso chiña ta catyun chi suhva ñu vatyí ma sañaha ñu tuhun cha ña ndicha. Ta vityin catyí tiqui chuun na sacuvi con tari cuhva catyí chuun quiví cuan. ⁴ Catyun chi ñu cuan vatyí ma tyaá ñu xiñi ñu tuhun tyisu, ni tuhun cha cuví chi noo noo sutu chahnu ñu. Vatyí cha nuu cha tyinyeé chi chi yo, satondó chi xiñi yo. Maa maa ri cha ñima ri tuhun cuví yuhu yo. Ña tyinyeé chi chi yo cha chinó iñi yo cha sacuví ca yo cha catyí Nyoo.

⁵ Soco tuhun cha catyí maa yo chi ñáyiví, cha cuñi yo chi tahan yo chihin cha cacú añima yo cha sanduvaha Nyoo. Cuñi yo chi ñu chihin cha vaha chicá xiñi yo ta chihin cha ndicha chinó iñi yo chi Nyoo. ⁶ Soco yihí ñu saña ñu tuhun ihya ta quita caxiin ñu chihin tuhun cha ñima ri tuhun. ⁷ Cuñí ñu cuví ñu ñu sacuahá cuenda ley chahnu Nyoo soco ni maa ñu ta ña cutuñí iñi ñu tuhun cahán ñu.

⁸ Chitó yo tyi ley cuan, vaha chi, soco cotyiño yo tari cuhva tahán chi. ⁹ Cuñí chi coto yo vatyí ni noo ley ña chicunyaá chi cha cuenda ñu vaha. Soco nyaá chi cha cuenda ñu nacahnú nu cahán Nyoo, ñu iyó cuatyí, ñu quiñi iyó, ñu ña saha ñáyiví chi Nyoo. Nyaá tucu chi cha cuenda ñu chahñí chi sutu, chi sihi, ta cha cuenda tandihí ñu chahñí. ¹⁰ Nyaá ley cuan cha cuenda ñu iyó chihin rayí o ñusihi ta ñima yí ña o ñasihi ra cuví. Nyaá chi cha cuenda ra ca iyó chihin tahan yí, ta cha cuenda ñu suhu cha chii ñáyiví, ta ñu cuendu, ta ñu cha catyí: “Chito vaha Nyoo”, ta ña ndicha cha cahán ñu. Ta suri nyaá tucu ley cuan cha cuenda yóo ñu cha ña nyicon cuhva cahan tuhún Nyoo. ¹¹ Ta tuhun tyaqui xaan cha sacoto Nyoo chi yo cha cuenda ra Cristo, ican cuví tuhun cha nacuhva cuenda Nyoo chii vatyí sacote chi ñáyiví. Maa ra cuví ra cha sacahnú yo.

Chahá ra Pablo tyahvi nyoo chi Nyoo vatyí nyehe ndahvi ra chi ra

¹² Nacuhvé tyahvi nyoo chi Sutu Mañi yo Jesucristo cha cuenda tunyee iñi cha chaha ra chii ta nyehe ra chi tari noo ra chinó vaha iñi, ta natyaa tyiño ra chii vatyí sacuví tyiño nuu ra. ¹³ Tyehe caa sacuvi ra chihin vasi ta ityi chata ca yuhu cahan ña vahi siqui ra. Chicá nyiquen chi ra ta cahan cuehi chi ra. Soco Nyoo cundahví cuñi ra nyehe ra chii, vatyí yuhu ta chino ca iñi chi ra, ta ña chite cha chinyacuví. ¹⁴ Ta tyinyeé xaan Sutu Mañi yo chii. Ta chaha ra cha chino xaan iñi yo chi ra, ta cha cuñi xaan yo chi ñáyiví vatyí in ri cuví yo chihin ra.

¹⁵ Ta ndicha, cha ndicha vaha cuví tuhun ihya. Ta tahán chi cha chino iñi yo, vatyí ra Cristo Jesús quichí ra siqui ñuhu ñáyiví ihya vatyí sacacú ra chi ñu iyó cuatyí. Ta yuhu cuví noo ra quiñi caa ca cha nuu tandihí ñu cuan. ¹⁶ Yucuan chaha xihna que tava Nyoo chii nu quiñi caa vatyí tacuhva sañaha ra Jesucristo chi ñáyiví tyi cuñi xaan ra chi ñu.

Tacuhva vatyí nachino iñi ñu ta cucoo ñu noo ñayivi chaa cha ma naa ca maa. ¹⁷ Yucuan chaha na sacahnu yo chi ra cha tyicuan ri nyacá ñaha, ra cha ñahri tuhun chihi iyó chi, ra cha ña cuví nyehe yo chi, ra cha noo ri maa ra cuví Nyoo ta chitó ra tandihí cha chiñi tuñi. Na sacahnu yo chi ra ta na cunyaca ñaha ra tyicuan ri maa. Ta na cuví chi tyicuan caa.

¹⁸ Ihya tuhun chahí chuun, yoho Timoteo sehi, vatyí cañi tahan vahun chihin tatyí ña vaha chihin cha chinó iñun, ta chihin cha vaha cuñi añimon tyi chitón tyi vaha sacuvun noo cha sacuvún vatyí suri tuhun ihya cachaha ra hermano chuun chihin ndusu Nyoo. ¹⁹ Ta ma sandihun cha chinó iñun chi Nyoo ta sacuvun cha vaha na vaha cuñi añimon. Vatyí sava ra sandihí ra tuhun ihya, yucuan chaha caquita xiin ra. ²⁰ Tyicuan caa sacuvi tucu ra Himeneo ta ra Alejandro. Ta yucuan chaha nacuhva cuende chi ra chi cuihna, na cacutuhva ra yoso caa tahán chi sacuvi ra ta ma cahan ña vaha ca ra chi Nyoo.

2

Nu sañaha ra Pablo yoso caa cacan tahvi yo

¹ Catyí chi ndo vatyí cha nuu tandihí ca, tahán chi cha cacan tahvi ndo chi Nyoo cha cuenda tandihí ñayivi. Ta nacuhva ndo tyahvi nyoo chi Nyoo cha cuenda ñu. ² Cacan tahvi ndo cha cuenda ra cacuvi rey ta cha cuenda tandihí ra cacuvi tyiño. Cacan tahvi ndo cha cuenda ra tacuhva cuvi coo vaha yo, coo taxi yo, coo yo noo ñayivi cachi nuu Nyoo ta nuu ñayivi. Ta cusaha ñu ñayivi chi yo. ³ Vatyí ihya cuví cuhva tahán iñi Nyoo ra cha sacacú chi yo. ⁴ Ta maa ra cuñi ra vatyí cacu tandihí ñayivi. Ta cuñi ra cha nacoto ñu cha ndicha. ⁵ Vatyí iyó noo ri Nyoo. Ta iyó noo ri ra cuví chaa nuu Nyoo tyiño nuu yo. Ican ra cuví ra Cristo Jesús. Ta cuví ra ñayivi tari maa yo. ⁶ Ta maa ra Jesucristo chaha ra ñayivi ra tyiño

nuu tandihí ñayivi. Tyiyahvi ra cuatyí yo tacuhva cuvi cacu tandihí yo. Ta chino cava cuan quivi tyaa maa Nyoo cuhva. ⁷ Cha cuenda ihya, tyatyíño Nyoo chii, vatyí cahin tuhun ra, ta cuví apóstol ra, tachi ra chii vatyí sañahi chi ñu cha ñima ñu Israel cuví, yoso caa nachino iñi ñu cha ndicha. Ta nyoho chitó ndo tyi ña tuhvé cahin cuendu vatyí cuenda ra Cristo yihí.

⁸ Yucuan chaha cuñi vatyí cacan tahvi rayi tandihí ri ityi. Ta na coo ra noo ñayivi ndi. Ta na sacahnu ra chi Nyoo chihin cha nacoñehe ra ndaha ra nuu Nyoo. Ta vaha caa xiñi ra. Ta ma coo ra tishi chihin ñayivi. Ta ni ma xaan ra. ⁹ Tyicuan caa tucu ñusihi. Cachi cuhva cuhno ñu, tari cuhva tahán chi cuihno ñu yihí cuenda Nyoo. Ta ma iyo xaan cuihno ñu. Ma iyo xaan sanduvii ñu xiñi ñu. Ñima chihin xuhun cuaan o yuu tyaqui, o chihin sahma yahvi xaan sanduvii ñu chi ñu. ¹⁰ Soco chihin cha cachi coo ñu ta chihin cha sacuvi ñu cha vaha na sanduvii ñu chi ñu, tari tahán chi sacuvi ñu nacuhva cuenda chi chi Nyoo. ¹¹ Ta taxi ri cunyaa ñusihi ta tyasoho ñu tuhun Nyoo. Ta saha ñu ñayivi chi ra chahá tuhun chi ñu. ¹² Vatyí ña chahí cha sañaha ñusihi. Ni ña chahí cha cunyaca ñaha ñu chi rayi. Soco taxi ri na cunyaa ñu. ¹³ Vatyí xihna ca chi ra Adán savaha Nyoo ta yaha cuan ta chi cu Eva. ¹⁴ Ta ñima chi maa ra Adán sandavi ñaha ra ña vaha, soco chi ñasihi ra cuví sandavi ñaha ra ta chicoo cuatyí ña. ¹⁵ Soco ñusihi cucacu añima ñu cha cuenda cha sacacú ñu sehe ñu, ta sacuahnú vaha ñu chi chi. Soco tatu chinó vaha iñi ñu chi Nyoo ta cuñi ñu chi ra ta chi ñayivi, ta cachi coo ñu nuu Nyoo ta nuu ñayivi ñandihí.

3

Yoso caa tahán chi coo ra yihí ndaha chi ñu yihí cuenda ra Cristo

¹ Ndicha tuhun ihya: Tatu minoo ndo cuñi ndo quindaha ndo chi ñayivi yihí cuenda ra Cristo, vaha xaan tyiño quichí cuvi iñi ndo sacuvi ndo. ² Soco

niñi cuñi chi vatyi ra yihí ndaha vehe ñuhu cuvi ra noo ra ñahri cuatyí iyó. Ta cuñi chi cha coo noo ri ñasihí ra. Ta cuñi chi cha cuvi ra noo ra tyihí tuñi vaha iñi yoso caa cunyacuvi, noo ra vaha nuu ñáyivi. Ta cuñi chi vatyi vaha cuví ra chihin ñáyivi chaa vehe ra. Ta coto ra yoso caa sañahá ra. ³ Ma cuvi ra noo ra tuhvá chihí ndixi, ni ma cuvi ra noo ra nanducú tisihi. Ta ma cuvi ra noo ra nducu xuhun noo cuhva ña vaha. Soco cuñi chi cha vaha ñáyivi cuví ra, ta cuvi ra noo ra ña tuhvá cañi tahan. Ta ma cuvi ra noo ra cuñi xaan xuhun. ⁴ Ta cuvi ra noo ra yihí ndaha vaha ñasihí ta sehe: Noo ra nyacá ñaha chi sehe tacuhva vatyi quichaha ñu chi ra, ta saha ñu ñáyivi chi ra. ⁵ Vatyi tatu ña chitó ra cunyaca ñaha ra vehe ra, ¿yoso caa cusaha cumi ra vehe ñuhu Nyoo? ⁶ Ta noo ra nichaa chihin tuhun Nyoo ña tahán chi quindaha ra vehe ñuhu vatyi coto sacahnu ra chi ra ta tachi tuñi Nyoo chi ra, tari tachi tuñi ra chi cuihna vatyi cahnu sahá ra chi ra. ⁷ Ta sñin ri cuñi chi vatyi cuví ra noo ñáyivi vaha nuu ñu ityi chata, coto tahan ra ticahan nuu ta cana cava ra chichi ndaha cuihna.

Yoso caa tahán chi coo noo ra tyinyee chihin tyiño vehe ñuhu

⁸ Ta tyicuan caa tucu ra tyinyee chihin tyiño vehe ñuhu. Na cachi coo ra. Ma cuvi ra noo ra cuendu, ta ma cuvi ra noo ra tuhva chihí ndixi ñandihí. Ta ni ma nyiyo iñi ra saha canaa ra xuhun chihin noo cuhva ña vaha. ⁹ Cuñi chi vatyi cutuñi vaha iñi ra yoso caa tahán chi chino iñi yo chi Nyoo ta coto vaha ra tyi vaha cuahan ra chihin Nyoo. ¹⁰ Ta cuñi tucu chi cha nyehe xihna yo tatu vaha iyó ra chihin Nyoo tyicuan ta cuví sacuvi ra tyiño vehe ñuhu. ¹¹ Ta tyicuan caa tucu ñusihí, cuñi chi vatyi cuví ñu ñáyivi vaha. Ma ñiñi ñu cuendu. Ta cachi coo ñu. Ta niñi cuñi ñu chihin tandihí ri tyiño. ¹² Noo ra tyinyee chihin tyiño vehe ñuhu na coo noo ri ñasihí ra. Ta cuñi chi vatyi coto vaha ra cunyaca ñaha ra chi sehe ra ta ñáyivi nyicú vehe ra. ¹³ Vatyi ra

tyinyee, tatu vaha sacuvi ra tyiño cha tahán chi sacuvi ra, cuahan ca ra ityi nuu chihin Nyoo. Ta cunñi ca iñi ra cahan ra tuhun cha chinó iñi ra chi ra Cristo.

Noo tuhun xehe cuenda cuhva chino iñi yo

¹⁴⁻¹⁵ Yihí iñi cha cuhin cha numi ri cunyehi nu nyaún. Soco tatu cucuei, yucuan chaha tyaí ihya chuun tacuhva coton yoso caa tahán chi coo ñáyivi cuenda Nyoo. Vatyi maa yo cuví yo vehe ñuhu Nyoo nyitó. Ta cuñi chi vatyi sañihí ca yo sañaha yo cha ndicha cha cumí yo chi inga ñáyivi. ¹⁶ Cha ndicha cuví vatyi yaha xaan cuhva cahnu tuhun xehe cha sanatuví Nyoo, vatyi coo yo tari iyó maa ra:

Nyoo nanduví ra rayñi ta chicoo ra chichi noo coño ñuhu tari maa yo.

Ta catyí Tatyí li vatyi vaha ra.

Ta nyehe ángel chi ra.

Nicahnu ñuhu ñáyivi cahán ñu tuhun ra.

Ta chinó iñi ñáyivi chi ra nicacahnu ñuhu ñáyivi.

Ta cuanuhu ra nya gloria.

4

Nu catyí ra Pablo vatyi yihí ñu ma chino ca iñi ñu nu cuahan chi tyembu

¹ Soco cahán cachi Tatyí li ta catyí chi vatyi nu cuandihí tyembu yihí ñu ma chino ca iñi ñu chi ra Cristo vatyi cutyasoho ñu tuhun cahán tatyí ña vaha cha sandavi ñaha chi ñu. Ta cunyicon ñu ndusu ñuhu cuihna.

² Cutyasoho ñu tuhun cahán ñu cuendu. Ta ñu cuendu cuan ña tuví ca iñi ñu cuhva nyacuví ñu vatyi cha ndundava xaan aña ñu. Tari cha cayu aña ñu chihin noo caa ihñi ta ndundava chi cuví cuan. ³ Cucasñi ñu cuan nu tandaha ñáyivi. Ta cucatyí ñu vatyi ña vaha cha cachi yo suhva nuu nyayu. Vasñi chitó yo tyi tandihí nuu cha cachi yo, Nyoo savaha. Ta tandihí yo cha chinó iñi yo chi Nyoo ta chitó yo cha ndicha, cuvi cachi yo ta nacuhva yo tyahvi nyoo chi ra.

⁴ Vatyi tandihí cha savaha Nyoo ta

vaha. Ta ña tahán chi catyi yo tyi ña vaha. Cuví cachi yo tatu nacuhva yo tyahvi nyoo chi Nyoo. ⁵ Vatyí ndundú chi cha cuenda tuhun Nyoo ta cha cuenda cha chicán tahvi yo chi Nyoo.

Yoso caa noo ra vaha sacuví tyiño nuu ra Jesucristo

⁶ Tatu sañahun tuhun ihya chi tandihí yañi yo, cua cuvun noo ra vaha cahán tuhun ra Cristo Jesús. Ta tuhun cha chinó iñi yo ta tandihí tuhun ra Cristo cha nyicón, cua tyinyee chi chuun. ⁷ Soco ma quichahun tuhun cuendu, tuhun tondo cha iyó ñayiví ihya. Vaha ca saniñun chuun sacuvun maa maa ri cuhva cuñí Nyoo. ⁸ Cha saniñi yo ndunyeé coño ñuhu yo tyinyeeé chi suhva chi yo. Soco cha saniñi yo sacuví yo cuhva cuñí Nyoo, tyinyeeé chi chi yo tandihí ri cuhva, vatyí tyinyeeé chi chi yo ñayiví ihya. Ta tyinyeeé tucu chi chi yo cha coo vaha yo nu cuchaa yo andivi. ⁹ Ta ndicha, cha ndicha vaha cuví tuhun ihya ta tandihí yo tahán chi cha chinó iñi yo. ¹⁰ Ta suri cha cuenda ihya sahá tyiño yo ta nyehé yo tindoho vatyí nyatú yo naquehen yo cha vaha cha chaha Nyoo nyito chi yo. Vatyí maa ra cuvi ra sacacú chi tandihí ñayiví, ta xihna ca chi yoó cha chinó iñi yo chi ra.

¹¹ Ihya tuhun cua sañahun chi ñayiví, ta cusaniñun chi ñu na cuthva ñu. ¹² Cachi sañun chuun coto ma saha ñu ñayiví chuun cha cuenda cha cuvún noo ra tyivaa. Soco sañahun noo cuhva vaha chi ñu chihin cuhva iyón, chihin cuhva cahun. Sañahun chi ñu, chihin cuhva cha cuñún chi Nyoo ta chi ñayiví, chihin cuhva chicá xiñun, chihin cuhva chinó iñun, ta chihin cuhva sacuvún maa maa ri cha vaha. ¹³ Chaní ri ca cha cumañi chai nu nyicú ndo, sacuaaha con tuhun Nyoo nuu ñu yihí cuenda Nyoo. Cuhva tuhun chi ñu ta sañahun chi ñu yoso caa caca vaha ñu ityi Nyoo. ¹⁴ Sañun cuenda nyatu cha chaha Nyoo chuun quiví cha tyiso ra yindaha vehe ñuhu ndaha ra sicun

ta cahán ra yoso cuhva chahá Tatyí Ii Nyoo chi ra. ¹⁵ Tyaa vaha xiñun tuhun ihya ta sacuvun. Tacuhva vatyí nyehe ñayiví yoso caa cuahun ityi nuu ca chihin Nyoo. ¹⁶ Saha cuenda chuun chihin cuhva iyón. Ta saha cuenda cuhva sañahun chi ñayiví ta ñaha saña ndahun cha vaha. Tatu tyicuan caa sacuvún cuacacun, ta cucacu ñu chiñí tuhun sañahun ñandihí.

5

Nu chahá ra Pablo tuhun chi ra Timoteo yoso caa cuhva ra tuhun chi ñu yihí cuenda ra Cristo

¹ Ma cahun chi noo ra chahnu, soco cuhva tuhun chi ra tari cha sutun cuví chi ra. Ta chi ra tyivaa cuhva tuhun chi ra tari cha yañun cuví chi ra. ² Ta chi ñu chahnu tari cha sihun cuví chi ñu. Ta chi ñu tyivaa, tari cha cuhvon cuví chi ñu. Ta sacuvun chihin cha vaha chicá xiñun.

³ Tyinyee chi ñu ndahvi ñu chihí yí tatu yori ñayiví chi ñu cha tyinyee chi ñu. ⁴ Soco tatu iyó noo ñaha chihí yí ta iyó sehe ña, o sehe ñañi ña, cuñí chi cha cutuhva xihna maa ñu cha tyinyee ñu chi ña. Na nicohon iñi ñu yoso caa saha cuenda sihi ñu chi ñu ta luhlu ñu. Ta tyicuan caa tahán chi cha saha cuenda tucu ñu chi ña vityin. Vatyí cha tyehe caa vaha xaan, ta cha tahán iñi Nyoo cuví. ⁵ Soco ñu chihí yí cha ndoo noo tuhun ri maa, chi Nyoo tyihí ñu iñi ñu ta tyicuan ri chicán tahvi ñu chi ra ñicahñu ta cha cuaa. ⁶ Soco noo ñaha chihí yí cha nducú tusí iñi cha iyó ñayiví ihya, tari quiví cha chihí ña cha cuenda tuhun Nyoo cuví cuan, vasi iyó ña. ⁷ Sacoto tuhun ihya chi tahan yo tacuhva cha ma ñihi ñayiví cuhva cahán ñu chi ñu. ⁸ Soco tatu yihí yo cha iyó ñayiví chi yo cha chihí yí ta ña chicá xiñi yo cha cuenda ñu, ta cha xihna ri cha cuenda ñu vehe yo, tari quiví cha ña chinó iñi yo chi Nyoo cuví cuan. Ta cahnu ca cuatyí yo ta ñima ca ñu cha ña chinó iñi chi Nyoo.

⁹ Nu tutu cha nyaá sívi ñu chihí yí, na cunyaa sívi ñu, soco ñu cha yaha

ca uñi xico cuiya. Ta cuví cunyaa sivi ñu tatu noo ri yii ñu chiyo. ¹⁰ Ta cuñí chi tatu ñohó nuu vaha ñáyivi chi ñu cha cuenda cha vaha cha sacuví ñu: tatu sacuahnu vaha ñu sehe ñu, tatu chaha ñu cha cachi ñu chaa vehe ñu, tatu sacuvi ñu tyiño nuu yañi yo chihin cha tandihí añima ñu chihin cha ndahvi sahá ñu chi ñu, tatu tyinyee ñu chi ñu nyehé tndoho, tatu tyehe caa sacuví ñu tandihí nuu cha vaha, cuví cunyaa sivi ñu.

¹¹ Soco ma tyihi ndo sivi ñu cha ta chaa ca uñi xico cuiya coto coo quivi ta quichi cuvi iñi ñu tandaha ñu inga chaha ta sandihí ñu tuhun sacuví ñu tyiño nuu ra Cristo. ¹² Ta tyicuan caa cucoo cuatyí ñu vatyí ña sacuví ca ñu cuhva catyí ñu. ¹³ Ta siin ri tatu chicá noo suchan ri maa ñu tahan tahan vehe ñáyivi. Ta ñima yucuan ri soco chicá noo ndihí ñu chihin cuendu ñu. Ta tyihí ñu chi ñu noo nu ñahri cuenda ñu. Ta cahán ñu cha ña tahán chi. ¹⁴ Yucuan chaha vaha taxin ca na tandaha ñu inga chaha. Na coo sehe ñu. Na saha cuenda ñu vehe ñu. Ta ma cuhva ñu ityi chi ñu xaan iñi chi yo vatyí cahan nyaa ñu chi yo. ¹⁵ Tyehe caa catyí chuun vatyí yihí ñu cha saña ñu chi Nyoo ta na nyicon ñu chi ra ña vaha. ¹⁶ Tatu noo ñu yihí cuenda Nyoo ta iyó noo ñáyivi chi ñu cha chihí yii, cuñí chi cha tyinyee ñu chi ñu, tacuhva cha ma cuvi ñu noo carga chi vehe ñuhu. Ta tyicuan caa ta cuví tyinyee ñu vehe ñuhu chi ñu chihí yii cha ndicha ndicha chiñuhú chi.

¹⁷ Ra chahnu ra nyisó tyiño vehe ñuhu, cuñí chi vatyí saha xaan ñu ñáyivi chi ra. Ta cha xihna ca chi ra cahán tuhun Nyoo ta ra sañahá chi ñu. ¹⁸ Vatyí tuhun Nyoo catyí chi: “Ma tyihun yoho yuhu sindiqui nu saha tyiño ti tacuhva vatyí cuvi cachi ti chiin.” Ta catyí tucu chi: “Iyó ityi chi ra cha sahá tyiño cha ñihí ra yahvi ra.”

¹⁹ Tatu tyaá ñu cuatyí siqui noo ra chahnu ra nyisó tyiño vehe ñuhu, ta tatu ña quita uvi o uñi tahan cha ndaa, ma quichahun chi ñu tyaá cuatyí cuan. ²⁰ Soco ñu sañihi ca sacuvi

cuatyí cuñí chi cha catyí ndo chi ñu chihin nuu tandihí ñu nyicú vehe ñuhu tacuhva vatyí tandihí ca ñu na cuyuhvi ñu sacuvi ñu cha ña vaha. ²¹ Tyatyíne chuun chihin nuu Nyoo ta chihin nuu Sutu Mañi yo Jesucristo, ta chihin nuu ángel cha nacachí ra. Ta catyí chuun vatyí quichahun cha catyí ihya ta ma cuhun tumañi iñi chi noo ra ta ni chi inga ra. ²² Ma numi xaan ri tyaa tyiño chi noo ra cha cuvi ra tyiño vehe ñuhu. Coto ndoo cuatyí sacuví ra sicun. Saha vahun cuenda chuun chihin tandihí cha sacuvún ta ma cuhvon ityi chi cha ña vaha.

²³ Ta vatyí iyó noo cuehe chichun, ma cohun maa ri maa ndutya, soco cohun chiin vinu ñandihí.

²⁴ Yihí ñáyivi quetuví ri cuatyí ñu cha cumañi ca cutuñi chi ñu. Ta yihí ñu nya cha yaha cutuñi chi ñu ta cuquetuvi cuatyí ñu. ²⁵ Ta tyicuan caa tucu cha vaha cha sacuví yo, ña xehe caá. Soco vasi ña tuví cha numi ri, ñima tyicuan ri cucohon xehe chi.

6

¹ Ñu cha cuvi musu cuñí chi cha saha vaha ñu ñáyivi chi chitoho ñu. Tyicuan ta ma ñihi ñáyivi cuhva cahan ña vaha ñu siqui Nyoo ni siqui tuhun ra, cha sañahá yo. ² Ta tatu noo musu iyó chitoho ra cha yihí cuenda Nyoo, ña tahán chi cha ma saha ra ñáyivi chi ra vatyí yañi ra cuenda Nyoo cuví chi ra. Soco ñihi ca cuñí chi cha sacuví ra tyiño nuu ra, vatyí chinó tucu iñi maa ra chi ra Cristo, ta Nyoo cuñí ra chi ra. Sañaha tuhun ihya chi ñu hermano ta cuhva tuhun chi ñu na sacuvi ñu.

Cuhva iyó yo ta cusñi cuñi yo

³ Tatu iyó noo ra cha sañahá inga tuhun cha ña chachí tahan chi chihin tuhun vaha cha sañahá Sutu Mañi yo Jesucristo, ta ni ri chihin tuhun vaha cha cuahan sacuaha yo, ⁴ cuví ra noo ra cahnú sahá chi. Ta tahán xaan iñi ra cuvi yuhu ra siqui noo cha ñima ri tuhun. Tari noo cuehe cuví cuan. Ta cha cuenda tuhun ihya cacú tisihi ta tuhun nyiyo iñi, tuhun cha cahán ña

vaha chi tahan, ta tuhun cha ña vaha cuñí nyehe chi tahan. ⁵ Ta tyicuan ri cañí tahan ñu vatyí quiñi chica xiñi ñu, vatyí ña chitó ñu cha ndicha. Nyacua cuñí maa ñu tyi cusaha ganaa ñu xuhun chihin tuhun Nyoo. Ma cutahan ndo chihin ñu cuan. ⁶ Ndicha vatyí cha sacuví yo cuhva catyí Nyoo ta ndoó yo vaha chihin cha cha chaha ra chi yo cuví chi tari noo cha tyayí iyó chi yo. ⁷ Vatyí ñahri nyiso yo vachi yo ihya ñayiví. Ta ñahri cuiso yo cunuhu yo quiví cúvi yo. ⁸ Soco tatu iyó cha cachi yo ta sahma ñihnó yo, na cusí iñi yo, ta na ndoo yo vaha chihin yucuan ri. ⁹ Soco ñu cuñí cutyayí, nducú nyehe ra ña vaha chi ñu. Caná cava ñu chichi xayu ra. Cutondó xiñi ñu chihin cha cuaha xaan cha quichi cuví iñi ñu. Ta sativí chi chi ñu ta nu ndihí tuhun cutiví ndihí ñu ta cunaa ñu. ¹⁰ Vatyí cha cuñí xaan yo xuhun, yucuan cuví nu caña tandihí ca nuu cha ña vaha. Ta yihí ñu cha tyehe caa cuñí xaan ñu xuhun, ta cha cuenda cuan sandihí ñu tuhun cha chinó iñi ñu tuhun Nyoo. Ta yucuan cuví nu suri chi maa ñu sanyehé ñu tindocho.

Lucha cha iyó chi yo cha chino iñi yo chi Nyoo

¹¹ Soco yoho cuvún noo rayí cuenda Nyoo. Caca cono chi tandihí cha quiñi caa cuan. Ta cuhun chata cha cuití. Vaha coun nuu Nyoo. Cuní iñun chihin ra. Cuñun chi ñáyiví. Coo cha cama iñun chihin tandihí cha cuví chuun. Ta masu cuví iñun. ¹² Nihí sacuvun tyiño nuu Nyoo vatyí tyicuan caa tahán chi tyi chinó iñi yo chi ra. Ta ma saña ndahun ñayiví chaa cha ma naa ca maa cha chaha Nyoo chi yo. Vatyí ican cuenda cuan nacana Nyoo chuun, quiví catyí cachun tyi chinó iñun nuu cuaha xaan ra cuví cha ndaa. ¹³ Ta chihin nuu Nyoo, ra cha chaha ñayiví coo tandihí cha iyó, ta chihin nuu ra Cristo Jesús ra cha chaha vaha cuenda nuu ra Poncio Pilato, catyí chuun vityin, ¹⁴ na sacuvun tandihí cha catyí chuun tacuhva ma cuhvon cuhva cha cahan

ñáyiví chuun nyacua nya quiví quichi Sutu Mañi yo Jesucristo. ¹⁵ Na chaa maa quiví, Nyoo cusaquichi ra chi ra Cristo inga chaha. Ican ra cuví ra cha sacahnu yo, ta noo tuhun ri maa ra cuví Nyoo ra iyó xaan tunyee iñi chii. Rey cuví ra cuenda tandihí ca ra cuví rey. Ta nyacá ñaha ra chi tandihí ca ra cha nyacá ñaha. ¹⁶ Noo ri maa ra cuví ra ra ñahri tuhun chihi iyó chii. Ta iyó ra nu ndichin nu yori maa tuhva. Ta ni noo ñáyiví ta nyehe ca ñu chi ra. Ta ni ña cuví nyehe ñu chi ra. Chi maa ra na sacahnu yo. Ta na cunyaca ñaha ra tyicuan ri maa. Ta na cuví chi tyicuan caa.

¹⁷ Ta ñu cha iyó cha tyayí chi ñayiví ihya, catyí chi ñu vatyí ma cahnu xaan saha ñu chi ñu. Ta ma cuita iñi ñu chi cha tyayí cha iyó chi ñu. Vatyí coto coo quiví ta ndihí cha tyayí cuan. Soco na cuita iñi ñu chi Nyoo nyitó, vatyí maa ra cuví ra chahá tandihí. Ta cuaha chaha ra chi yo tacuhva cusí cuñi yo. ¹⁸ Catyun chi ñu tyayí na sacuví ñu cha vaha ta ñi iñi ñu cuhva ñu cha iyó chi ñu chihin cha ma uhvi cuñí ñu. ¹⁹ Tyicuan ta coo cha tyayí ñu andiví ta cutyinyee chi chi ñu nu cuahan ca chi quiví. Ta tyehe caa cuví coo ñu ñayiví cha ma naa ca maa.

Nu ndihí chahá ra Pablo tuhun chi ra Timoteo

²⁰ Yoho Timoteo saha cumi vahun tyiño cha chaha Nyoo chuun. Ma tya-sohun tuhun cha sin caa, tuhun cha ñima ri tuhun. Ma quichahun tuhun cha catyí ñu vatyí cha chiñi tuñi cuví, vatyí ña ndicha. ²¹ Vatyí cha cuenda cuan yihí ñu cha quita caxiin ñu ityi Nyoo. Ta ña chinó vaha ca iñi ñu cha ndicha.

Ta Nyoo na nasoco ra chi ndo.

Ta na cuví chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ra Timoteo

Nu tyaq ra Pablo noo tutu chi ra Timoteo

¹ Yuhu ra Pablo cuví noo apóstol ra Jesucristo vatyí tachí ra chii na caque tyiño ra. Vatyí tyicuan caa cuñí maa Nyoo, tyi cuñí ra cha sacote chi ñáyiví vatyí chahá ra noo ñáyiví chaa chi tandihí ñu cha ndu ñin ri chihin ra Cristo Jesús vatyí nacuhva cuenda ñu chi ñu chi ra. ² Tyaí tutu ihya chi yoho Timoteo. Ta cuñí xain chuun tyi tari cha sehi cuví chuun. Ta cuñí vatyí Nyoo Sutu yo ta Sutu Mañi yo Jesucristo na nasoco ra chuun. Ta na nyehe ndahvi ra chuun. Ta na coo ca cha taxi ri cuñí añimon saha ra.

Nu catyi ra Pablo chi ra Timoteo tyi nacatyí ra chi ñáyiví tyi cuenda ra Cristo yihí ra

³ Tyicuan ri nicohón iñi tuhun yoho cuhva cha chicán tahvi chi Nyoo ñicahñu ta cha cuaa. Ta nacuhvé tyahvi nyoo chi ra cha cuendon. Nu maa ra sacuví yuhu tyiño chihin cha vaha chicá xiñi, tari sacuví tucu ñáyiví chii ta cha naha. ⁴ Tyicuan ri nicohón xaan iñi chuun ta nicohón xaan iñi tuhun yoso caa chacun quiví cuachiye chiña. Ta cuñí xain nyehi chuun inga chaha ta cusii iñi chuhun. ⁵ Vatyí nicohón iñi yoso caa chinó xaan iñi cu Loida chiton chi Nyoo, ta cu Eunice sihun ñandihí. Tyicuan caa tucu yoho chinó xaan iñun vityin.

⁶ Yucuan chaha chahí tuhun chuun vatyí na saniun iñun ta cotyiño nyatu cha cahun tuhun Nyoo cha chahá ra chuun quiví tyisé ndahi sicun. ⁷ Nyoo ña chahá ra cha yuhvi yo. Soco chahá ra noo tunyee iñi cahnu chi yo. Ta chahá ra vatyí cuñí yo chi tahan yo. Ta chahá ra cha cunyaca ñaha vaha yo chi yo. ⁸ Yucuan chaha ma cahan nuun cahun tuhun Sutu Mañi yo. Ta ni ri cha ma cahan nuu cha cuenda

cha ñohí vehe caa cha cuenda ra. Soco chihin tunyee iñi chahá Nyoo chuun ta chihin cha iyó vaha iñun cunyeun tindoho cha vachi siqui yo cha cuenda tuhun Nyoo. ⁹ Vatyí ican ra sacacu chi yo. Ta nacana ra chi yo vatyí coo yo noo ñáyiví ii. Ñima cha cuenda cha vaha cha sacuví yo ta nacana ra chi yo, soco vatyí tyicuan caa tyaq ra cuhva nyata ni cumañi ca chinó ñuhu ñáyiví. Vatyí nya quiví cuan cuñí ra chi yo cha ñin ri cuví yo chihin, ra Cristo Jesús. ¹⁰ Ta vityin cha quichí ra Jesucristo sacacu ra chi yo, nacoto yo vatyí tyicuan caa cuñí ra chi yo. Ta nu quichí ra, satani ra tandihí tunyee iñi cha iyó chi tuhun chihí. Ta chihin tuhun vaha cahan ra, tava ra nu ndichin tuhun cha coo yo noo ñáyiví chaa cha yori cuví sativí.

¹¹ Nyoo tyaq ra tyiño chii vatyí cahin tuhun ihya chihin ñáyiví. Tachí ra chii vatyí cuví noo apóstol chi ra, ta sañahí chi ñu cha ñima ñu Israel cuví. ¹² Yucuan chaha nyehí tandihí tindoho ihya. Soco ña cucahán nui vatyí chitó mai yóo chi chinó iñi. Vatyí nacuhva cuende chii chi ra, ta chitó vahi vatyí cuví saha cuenda ra chii nyacua nya quiví quichi tucu ra.

¹³ Cunyicon tuhun vaha cha chahí chuun. Ta coun chihin cha chinó vaha iñun chi Nyoo. Tyicuan ri cuñun chi ñáyiví tahan yo. Vatyí yucuan cuví cha chahá Nyoo chi yo tyi ñin ri cuví yo chihin ra Cristo Jesús. ¹⁴ Ta maa Tatyí Ii cha iyó añima yo na tyinyee chuun ta saha cumun tuhun vaha cha chahá Nyoo chuun.

¹⁵ Cha chitón vatyí tandihí ra ityi Asia chiña casandoq ra chii, tari ra Fígelo ta ra Hermógenes. ¹⁶ Soco ra Onesíforo na nyehe ndahvi Sutu Mañi yo chi ñáyiví chi ra vatyí cuaha xaan chaha quichí sandunyee ra iñi. Ta ña cucahan nuu ra cha cuenda cha ñohí vehe caa. ¹⁷ Soco quiví chinyaa ra ñuu Roma ihya, ña sandihí ra tuhun cha nanducu ra chii nyacua nya cha nañihí ra chii. ¹⁸ Sutu Mañi yo nacuhva ra cha ñihi ra tumañi iñi quiví cha cutuñi chi yo nuu ra.

Chitó vahun yoso cuhva tyinyee ra Onesíforo chi yo nya ñuu Éfeso chiña.

2

Noo sindaro vaha ra Jesucristo

¹ Ta yoho sehe luhli, sandunyeey iñun chihin tunyee iñi cha chahá ra Cristo Jesús chuun cha cuenda cha ñin ri cuví yo chihin ra. ² Tuhun cha chiñun cha cahin nuu cuaha ñáyivi, nacatyí chi ra cha ñi iñi chinó iñi chi Nyoo, ra cha cacuví sañaha chi inga ñu.

³ Ta cunyeun tindocho tari noo sindaro vaha ra Jesucristo. ⁴ Ni noo ra cuví sindaro ta ma cuvi tyihi ra chi ra chihin inga tyiño. Vatyí cuñí chi sacuví ra maa maa ri cha catyí ra cuví nuu chi ra. ⁵ Ta tyicuan caa tucu ra canyasiquí, ma saha canaa ra cha tahán chi saha canaa ra tatu ma cunyasiquí ra tari cuhva tahán chi. ⁶ Noo ra sahá tyiño chichi cuhu, tahán chi cha saha tyiño xihna ra, yucuan ta cachi ra cha quitá nu iyó tyiño sahá ra. ⁷ Caca xiñun tuhun cha catyí chuun ihya, ta maa Sutu Mañi yo cucuhva ra cha cutuñi iñun tandihí.

⁸ Nícohon iñi tuhun ra Jesucristo, ra cha nandoto cha yahá nyehe ra tindocho ta chihí ra. Cuví ra tata rey David. Ta ícan ihya cuví tuhun Nyoo cha cacu añima yo cha chahá ra vatyí cahin tuhun. ⁹ Ta cha cuenda tuhun ihya cunyeí tandihí tindocho nyacua nuhñí chihin cadena tari noo ra quiñi iyó. Soco tuhun Nyoo ña nuhñí chi. ¹⁰ Yucuan chaha cunyeí tandihí tindocho cha cuenda cha vaha chi tandihí ca ñu nacachí Nyoo chi, tacuhva vatyí cuvi cacu tucu tandihí ñu. Chihin cha ndu ñin ri yo chihin ra Cristo cuacacu yo ta cuñihi yo noo nu tyaquí xaan cha ma ndihí ca maa. ¹¹ Ihya cuví cha ndicha xaan:

Tatu cúvi yo cha cuenda ra, coo tucu yo chihin ra.

¹² Tatu cunyeé yo tindocho, cucunyaca ñaha yo chihin ra.

Tatu catyi yo tyi ña yihí yo cuenda ra, maa ra cucatyí ra tyi ñima ñáyivi cuenda ra cuví chi yo.

¹³ Tatu sandoq yo chi ra, soco maa ra tyicuan ri sacuví ra cuhva catyí ra.

Vatyí maa ra ña tuhvá ra nasama ra tuhun cahán ra.

Tatu sahá tyiño vaha yo, cuaquita vahayo

¹⁴ Sanicohun iñi ñu tuhun ihya, ta catyun chi ñu chihin nuu Sutu Mañi yo na sandihí ñu cha cuví yuhu ñu cha ñima ri tuhun. Vatyí cha cuví yuhu ñu tyehe caa, ñahri maa tuhun. Tyi sativí ñu chi ñu tyasohó tuhun cahán ñu.

¹⁵ Sanñun ta cuhva cuendon chuun nuu Nyoo tari noo ra sahá tyiño vaha. Vatyí ñahri cha cucahan nuun tatu chotyíño vahun tuhun ndicha yoso cuhva tahán chi.

¹⁶ Ñaha tyasohun tuhun cha ñima ri tuhun ñayivi ihya. Vatyí ñahri maa tyinyeé chi chi yo.

Soco sativí ca chi chi yo nuu Nyoo ¹⁷ vatyí tari quihvi xico ndiyi noo nu cahvi, tyicuan caa cuví tuhun cuan vatyí sativí chi chi yo.

Ta cuaha ñu cuativí cha cuenda cuan. Ican cuví cha cuví chi ra Himeneo ta ra Fileto.

¹⁸ Vatyí caquita caxiin ra ityi vaha ta catyí ra vatyí tari quivi cha yahá nandoto yo ta ma nandoto ca coño ñuhu yo. Ta tyicuan caa satondq ra cuhva chinó iñi suhva ñu.

¹⁹ Ta vasi yihí ñu nducaxiin ñu, soco Nyoo chacun ra cha ndicha, ta yucuan cuví cha ma nasama maa. Ta nyisó chi noo seña cha catyí: “Sutu Mañi yo ñohó nuu ra chi ñu cuenda ra.”

Ta catyí tucu chi: “Tandihí ñu nyisó sivi ra Cristo na quita ñu nu quiñi caa.”

²⁰ Chichi noo vehe cahnu, ñima maa maa ri ndaha tyiño chino chihin xuhun cuaan ta xuhun cuichin iyó. Iyó tucu cha chino chihin vitu ta chihin nyahyu.

Yihí cuan chotyíño ñu chi nu vaha, ta yihí cuan cha chotyíño ñu nu ñima ri tuhun.

²¹ Tyicuan caa tucu maa yo tatu ña tñin cuenda yo tuhun cha ñima ri tuhun ñayivi ihya, cuví yo noo

ñáyiví cha chotyíño Nyoo chi, tari noo vaso xuhun cuaan. Ta cuñí chi vatyí cundi vasu cuan, tyicuan ta cuví cotyíño ra chi yo cha cuenda tandihí nuu vaha.

²² Ma caca xiñun tari chicá xiñi ra tyivaa ñáyiví ihya. Vatyí maa maa ri cha quiñi caa chicá xiñi ra. Coo noo ñáyiví cuiti. Chino vaha iñun chi Nyoo. Cuñun chi Nyoo ta chi ñáyiví. Coo taxi run chihin tandihí ñu yihí cuenda Nyoo, ñu cha chihin cha vaha añima chicán tahvi chi Sutu Mañi yo. ²³ Ta ma quichahun tuhun cha ñima ri tuhun cha cuví yuhu ñáyiví. Vatyí chitón tyi chihin cuan cacú tisihi. ²⁴ Ta noo ra sacuví tyiño nuu Sutu Mañi yo, ña tahán chi cañi tahan ra. Soco tahán chi cha vaha ñáyiví cuvi ra chihin tandihí ñáyiví. Ta cuñí chi cha ñihi vaha ra cuhva sañaha ra tuhun Nyoo. Ta cuñí tucu chi cha cama cuvi iñi ra chihin ñáyiví. ²⁵ Ta chihin cha masu iñi ra cuñí chi cha sandundoo ra chi ñáyiví ndava iñi. Ta cuatu ra nasama Nyoo cuhva iyó ñu ta nacoto ñu cha ndicha. ²⁶ Ta tyicuan caa ta cunducachi iñi ñu ta cuaquita ñu chichi ndaha ra cuví cuhna vatyí cha vityin nyacuví maa ra yoso cuhva cuñí ra chihin ñu.

3

Yoso caa cucoo ñáyiví nu cuandihí ca quiví

¹ Ta cuñí tucu chi cōton vatyí nu cuandihí tyembu cuquichi quiví cha yí xaan coo yo. ² Vatyí cucoo ñáyiví ñu cuñí xaan suri chi maa. Ta cucuñi xaan ñu xuhun. Ta yaa xaan cucuvi ñu. Ta cahnu cusaha ñu chi ñu. Cuchan ña vaha ñu siqui Nyoo. Ta ma quichaha ñu nu cahán sutu ñu ta sihi ñu. Ma nacuhva ñu tyahvi nyoo chi Nyoo, ni chi tahan ñu. Ma quichaha ñu chi Nyoo. ³ Ma cuñi ñu chi tahan ñu. Ma coo tichahnu iñi chi ñu chihin ñáyiví. Cuñi ñu cuendu. Ma cuvi cunyaca ñaha ñu coño ñuhu ñu. Xaan xaan cucuvi ñu. Ta ma cuñi nyehe maa ñu cha vaha. ⁴ Cunaxico tuhun ñu chi tahan ñu. Ta ndava xaan cucuvi iñi ñu. Ta cucaña iñi ñu sacuvi ñu ñáa

ndihí cha cuñí ñu. Ta maa maa ri cha quichi cuvi iñi ñu cunanducu ñu, ta ma nanducu ñu chi Nyoo. ⁵ Cunyicon ñu noo cuhva tari cha chinó iñi ñu chi Nyoo, soco ña ndicha ñu. Vatyí chasí ñu cha sañahá Nyoo tunyee iñi ra. Ma cutahun chihin ñu caa tyicuan caa. ⁶ Vatyí mahñu ñu ihya iyó ra cha quihvi ra chichi vehe ta sandavi ñaha ra chi ñusihí cha ñahri cha chiñi tuñi xiñi. Ta nyisó ñusihí cuan cuatyí, vatyí nyicón ñu tandihí cha quichi cuvi iñi ñu. ⁷ Tyicuan ri cuñí ñu coto ñu tandihí tuhun chaa soco ña cuví cutuñi iñi ñu ñáa cha cuvi cha ndicha. ⁸ Ta ñu cucoo cha cahin tuhun ihya, cucuvi ñu tari maa ra Janes ta ra Jambres, ra tasi cha cachiyo ta cha naha. Ta cuñi ra saha canaa ra chi ra Moisés. Ta tyicuan caa tucu ñu cucoo nu cuahan ca chi. Ma tahan iñi ñu sacuvi ñu cha vaha. Quiñi cucaca xiñi ñu. Ta ma chino iñi ñu cha vaha. ⁹ Soco cuhva cunyacuvi ñu ma cuvi cutya chi vatyí ña xehe caa tyi cha ñima ri tuhun cuví cha cusacuvi ñu, tari cha chinyacuví ra Janes ta ra Jambres.

Nu ndihí tyatyíño ra Pablo chi ra Timoteo

¹⁰ Soco yoho chitó vahun tyi yuhu ñima tyicuan caa iyé. Vatyí chitón tuhun cha sañahí, ta cuhva iyé. Ta chitón ñáa cha nanduquí ta yoso cuhva chinó iñi chi Nyoo. Ta chitó tucun yoso caa cunyeé iñi cha cahán ñáyiví chii. Ta chitón yoso cha cuñí chí ñu. ¹¹ Ta chitón yoso caa cunyeé tindhoo nu chicán nyicon ñáyiví chii. Chitón cha cuvi chii, tandihí tindhoo cha nyehí cha catyí tuhun Nyoo ñuu Antioquía, ta ñuu Iconio, ta ñuu Lистра. Soco Sutu Mañi yo sacacu ra chii chichi tandihí cuan. ¹² Cha ndicha cuví vatyí tandihí yo cha cuñí yo coo yo cuhva cuñí ra Cristo Jesús cunyehe yo tindhoo saha ñáyiví. ¹³ Soco ñu quiñi iyó ta ñu sandaví ñaha, quiñi xaan ca cunanduvi ñu. Vatyí cusandaví ñaha ñu chi ñáyiví ta cusandaví ñaha ñáyiví chi ñu.

¹⁴ Soco yoho sañihun coun chihin cha cutuhvon. Vatyí chitón yóo cha

sañahā chuun ta chitó vahun tyi cha ndicha cuví. ¹⁵ Nya ta ni luhlun ta chitón cha nyaá nuu tutu tuhun Nyoo. Ta yucuan cuví cha chahá cha cutuñi ca iñun tacuhva cacun cha cuenda cha chinó iñun chi ra Cristo Jesús. ¹⁶ Tandihí tuhun cha nyaá nuu tutu Nyoo, ta maa Nyoo chahā. Ta tyinyeé xaan chi chi yo nacoto yo yoso caa tahán chi chinó iñi yo. Sañahá chi chi yo cuhva caa yo. Sandundoó chi chi yo. Ta sañahá chi chi yo yoso caa coo yo noo ñayiví vaha nuu Nyoo. ¹⁷ Tyehe caa tyinyeé tuhun Nyoo chi yo tacuhva vatyí cuví yo noo ra cuiñi cuenda Nyoo. Ta cuatu tuhva yo sacuvi yo tandihí cha vaha.

4

¹ Tyatyine chuun nuu Nyoo ta nuu Sutú Mañi yo Jesucristo, vatyí maa ra cusandaa ra cuatyí ñu nyitó ta ñu chihí quiví quichi ra cunyaca ñaha ra chihin tunyee iñi ra. ² Cahan tuhun Nyoo chihin ñáyiví. Tyicuan ri saníñun sacuvun. Cahan tuhun Nyoo nuu ñu tatu chahá chi cuhva o vasi ña chahá chi cuhva. Cuhva tuhun chi ñu, catyí cuhva caa ñu tacuhva cunyi-con vaha ñu chi ra Cristo. Ta cuatun nasama ñu cuhva iyó ñu chihin cha cama iñun. Ta sañahun chi ñu yoso caa tahán chi coo ñu. ³ Vatyí coo quiví ma cunyeé ca iñi ñáyiví tyasoho ñu tuhun vaha. Soco cunducu ñu cuaha xaan ra sacuaha cha sañahá maa maa ri cha tahan iñi maa ñu cuiñi ñu. ⁴ Ta cusacuachiyo xiin ñu cha ndicha. Ta cucuñi ñu cuiñi ñu noo tuhun cha ña ndicha. ⁵ Soco yoho saha cuenda chuun chihin cha vaha chica xiñun. Cunyeun tindoho. Cahan tuhun Nyoo chihin ñáyiví. Sacuvi vahun tyiño chahā Nyoo chuun.

⁶ Yuhu cha cuñí cuii ri nacuhva cuende ñayiví cha cuenda tuhun Nyoo, vatyí cha nyaña yatyin tuhun chihí chii. ⁷ Cha cañi tahin tari cuhva tahán maa chi ta cha sandihí tyiño cha chahā Nyoo chii. Ta ña sandihí tuhun cha chinó iñi chi ra. ⁸ Ta vityin nu cuahan ca chi quiví, nyatú tuhva noo cha tahán chi chii cha cuacuhva

Sutu Mañi yo chii. Ta ñima chi maa ri mai cuhva ra, soco cuhva tucu ra chi tandihí ca ñu cha nyatú chi ra. Vatyí noo ri maa ra cuví ra vaha sacutuñí.

Nonga tyiño tyaa ra Pablo chi ra Timoteo

⁹ Saníñi ta quichun cha numi ri, quichi nyehun nu nyai. ¹⁰ Vatyí ra Demas sandoo ra chii vatyí cuñí ca ra cha iyó ñayiví ihya. Ta cuahan ra nya ñuu Tesalónica. Ta ra Crescente cuahan ra nya ityi Galacia. Ta ra Tito cuahan ra ityi Dalmacia. ¹¹ Noo ri maa ra Lucas nyaá chihin. Nanducu chi ra Marcos ta na quichi ra chuhun quiví quichun. Vatyí chiñuhú xaan ra chii nu tyiño Nyoo. ¹² Tachí chi ra Tíquico ñuu Éfeso. ¹³ Quiví quichun cuiñon sahma cocon cha sandoj ñuu Troas vehe ra Carpo. Tyicuan caa tucu libri, quihí ndahun quichi. Ta cha ñiñi ca tuti.

¹⁴ Ra Alejandro ra cañi mityi cuan, cuaha xaan cha ña vaha chinyacuví ra chihin. Ta maa Sutú Mañi yo cutiyahvi chi ra cha cuenda cha chinyacuví ra chihin. ¹⁵ Saha cuenda chuun chihin ra. Vatyí xaan xaan cuñí ra siqui tuhun Nyoo cha cahán yo.

¹⁶ Cha xihna ri quiví sacaquí chii nuu ra cuví tyiño, yori maa tyinyeé chii. Casandoo noo tuhun maa ra chii. Na saha Nyoo ticahnu iñi chi ra cha cuenda cuan. ¹⁷ Soco Sutú Mañi yo tyinyeé xaan ra chii. Ta chahā ra tunyee iñi chii tacuhva cuví cahan cachi tuhun ra nuu ñu, ta chiñi tandihí ñu cha ñima ñu Israel cuví. Ta sacacu Nyoo chii cha cachi ndicaha chii. ¹⁸ Ta cuasacacu ca ra chii ndaha tandihí cha ña vaha. Ta cuasaha cuenda ra chii nyacua nya nachaa quiví cunyai chihin ra nu nyaca ñaha ra. Chi maa ra na sacahnu yo tyicuan ri maa. Ta na cuvi chi tyicuan caa.

Nu ndihí cahan ra Pablo ta chahā ra nocumi chi ñu

¹⁹ Ihya vachi nocumi chi cu Prisca ta chi ra Aquila ta chi ñáyiví chi ra Onesíforo. ²⁰ Ndoó ra Erasto ñuu Corinto. Ta ndoo ra Trófimo ñuu Mileto

vatyí cuhví ra. ²¹ Saniñun ta quichun
cha ni cumañi ca chaa yoo vichin.

Vachi nocumi chuun sahá ra Eubulo ta ra Pudente ta ra Lino ta cu Claudia ta tandihi ca ñáyivi tahan yo cuenda Nyoo ihya.

²² Na cunyaa Sutu Mañi yo chuhun.
Ta Nyoo na nasoco ra chi tandihi ndo.

Carta Cha Sacuhun Ra Apóstol Pablo Chi Ra Tito

Nu tyaa ra Pablo noo tutu chi ra Tito

¹ Yuhu ra Pablo sacuví tyiño nuu Nyoo. Ta cuví noo apóstol ra Jesucristo, o cuñí chi catyi vatyí tyatyíño maa ra chii vatyí tyinyei chi ñu nacachi maa Nyoo, na nachino iñi ñu chi ra, ta cohon nuu ñu cha ndicha, ta coo ñu cuhva cuñí Nyoo. ² Ta cuatu tuhva ñu coo ñu ñayiví chaa cha ma naa ca maa andiví. Vatyí ta ni cumañi ca chino ñuhu ñayiví ta catyi Nyoo vatyí cucuhva ra noo ñayiví chaa chi yo. Ta maa ra ña cuendu ra. ³ Ta vityin chaa quiví cha tyaa Nyoo cuhva tyi nacoto yo tuhun ra. Maa ra cuví ra sacacú chi yo, ta chaha ra tyiño chi yuhu cha cahin tuhun ra chihin ñayiví. ⁴ Sacuhín tutu ihya chuun, Tito, vatyí tari noo sehe vahi cuví chuun cha cuenda tuhun Nyoo, vatyí ñin ri chinó iñi yo chi ra Jesucristo. Cuñí vatyí Nyoo Sutu yo ta Sutu Mañi yo Jesucristo, ra sacacú chi yo, na nasoco ra chuun, ta na nyehe ndahvi ra chuun, ta na coo ca cha taxi ri añimon sahá ra.

Tyiño chaha ra Pablo chi ra Tito tyi sacuvi ra ñuhu Creta

⁵ Sandoj chuun ñuhu Creta vatyí sandaun tyiño Nyoo cha nyaá cundaa. Ta tyison ra chahnu ra quindaha vehe ñuhu tahan tahan ñuu tari cuhva catyi chuun. ⁶ Vatyí ra nyisó tyiño ihya cuñí chi coo ra noo cuhva cha ma cahan ñayiví chi ra. Noo ri ñasihi ra coo. Ta tandihí sehe ra cuñí chi cha chinó iñi ñu chi Nyoo, ta cachi coo ñu ta ma ndava iñi ñu tacuhva cha ma tyaa ñayiví cuatyí siqui ñu. ⁷ Vatyí ra yindahá chi ñu yihí cuenda Nyoo, Nyoo tyatyíño cuan chi ra. Yucuan chaha niñi cuñí chi vatyí cuví ra noo ra vaha. Ñima noo ra cahnu sahá chii, ni ñima noo ra tyityí iñi, ni ñima noo

ra tuhvá chiñi. Ñima noo ra quixin cuatyí, ni ñima noo ra cuñí xuhun cha ña saha ganaa vaha ra. ⁸ Soco tyicuan ri sii cuví chi ra tatu chaa ñayiví vehe ra. Ta tahan chi cuhva ra nu coo ñu. Cuñí chi cuví ra noo ra cha sacuví cha vaha. Noo ra chitó yoso caa nyaca ñaha ra chi maa ra. Na cuví ra noo ra ndaa iyó, noo ra sacahnú vaha chi Nyoo. Ta chitó vaha ra cuhva tahán chi sacuvi ra ta saníñi ra sacuvi ra. ⁹ Ta cunyicon vaha ra tuhun ndicha cha sañahá yo chi ra. Tyicuan ta coto ra sanduní ra iñi inga ñu chihin tuhun vaha ihya. Ta chi ñu catyí tyi ña ndicha tuhun cahan yo, coto ra yoso caa sañaha ra chi ñu tyi ña vaha cahán ñu siqui tuhun Nyoo. ¹⁰ Vatyí cuaha xaan ra ndava iñi iyó. Cuaha ra cahán cha ñima ri tuhun, cuaha ra sandaví ñaha. Ta cuaha xaan ca ñayiví Israel sacuví tyicuan caa. ¹¹ Cuñí chi cha casi yo yuhu ra cuan, vatyí cuaha xaan ñayiví satondó ra xiñi. Vatyí cha cuenda cha cacuñí ra xuhun ta sañahá ra noo tuhun cha ña tahán chi.

¹² Ta suri maa noo ra Creta, noo ra chiñi tuñi, ra cahán nuu ñu catyí ra tyehe caa: “Ñu Creta, cuendu xaan ñu. Tari quití cuví ñu. Cuahyí ñu ta suchan ñu”, catyí ra cuan. ¹³ Ta cha ndicha catyí ra cuan. Yucuan chaha cuñí chi cha cahan ñihun chihin ñu na saña ñu tuhun cuan, tacuhva vatyí vaha na chino iñi ñu chi ra Cristo. ¹⁴ Tacuhva cha ma tyasoho ca ñu tyisu cha ñima ri tuhun cha canasavahá ri maa ñu Israel. Ta ni ma tyasoho ca ñu tuhun cahán ñayiví cha ña cuñí coto cha ndicha.

¹⁵ Cha cuenda ñayiví cha vaha chicá xiñi, tandihí ta vaha chi ñu. Soco cha cuenda ñu cha ña chinó iñi ta ña vaha chica xiñi, ñahri maa cha vaha chi ñu vatyí nyacua nya cuhva chicá xiñi ñu ta cuhva tuví iñi ñu ta ña vaha ta quiñi caa. ¹⁶ Catyí ñu vatyí ñohó nuu ñu chi Nyoo, soco chihin cha ña vaha nyacuví ñu nyehé yo tyi ña ndicha ñu. Vatyí quiñi yihí iñi ñu ta ndava iñi ñu. Ta ma cuví sacuvi ñu noo cha vaha.

2

Tuhun vaha cha chahq Nyoo tyi sañaha yo

¹ Soco yoho, sañaha tuhun vaha tari cuhva sañahá tuhun Nyoo chi yo. ² Sañahun vatyí ra chahnu, cachi coo ra, tacuhva vatyí na saha ñáyiví ñáyiví chi ra. Ta tyicuan ri cachi caca xiñi ra. Vii cuhun ra chihin cha chino iñi ra. Cuñí chi cha cuñí ra chi Nyoo ta chi ñáyiví. Ta cunyehe iñi ra tandihí. ³ Ta tyicuan caa tucu ñu chahnu. Catyí chi ñu na coo ñu noo cuhva cha tahán iñi Nyoo. Ta ma ñi ñu cuendu. Ma coho ñu ndixi. Ta na sañaha ñu cha vaha iyó ñu, ⁴ na nyehe ñu nicaa tandaha. Tacuhva vatyí cuñí ñu chi yí ñu ta chi sehe ñu. ⁵ Na caca vaha xiñi ñu. Ta saha vaha ñu cuenda cuhva iyó ñu. Na saha cuenda vaha ñu vehe ñu. Ta vaha ñáyiví cuvi ñu. Na cuhva ñu cha cunyaca ñaha yí ñu chi ñu tacuhva vatyí yori cuvi cahan ña vaha siqui tuhun Nyoo.

⁶ Ta tyicuan caa tucu ra tyivaa. Cuhva tuhun chi ra na cacachi coo ra. ⁷ Ta maun cuñí chi cha sañahun maa ri cha vaha chihin cuhva iyón chi ra. Sañahun chi ra chihin cha cachi ta cha ndaa. ⁸ Maa ri tuhun vaha cahun tacuhva vatyí yori cuvi tyaa cuatyí sicun. Tyicuan ta ra xaan iñi chi ndo cucahan nuu ra vatyí ma ñihi ra cuhva cahan ña vaha ra siqui ndo.

⁹ Cuhva tuhun chi ra yañi yo ra iyó chitoho, na caquichaha ra chi chitoho ra. Na sacuví vaha ra tandihí cha catyí ra. Ta ma na cahan ra nu cahan ra. ¹⁰ Ta ma tin ri maa ra cha chii chitoho ra. Soco na saha vaha ra ñáyiví chi ra, tacuhva vatyí cunyehe ñáyiví vatyí vaha xaan tuhun Nyoo ra sacacú chi yo.

¹¹ Vatyí Nyoo sañahá ra vatyí vaha xaan ñáyiví cuví ra. Ta cuñí ra sacacu ra chi tandihí ñáyiví. ¹² Chihin cuan sañahá Nyoo chi yo vatyí na saña yo cha quiñi caa cha nyacuví ñáyiví ña ñohó nuu chi ra ta cha quichi cuvi iñi ñu. Ta cachi coo yo siqui ñuhu ñáyiví ihya, tari cuhva cuñí Nyoo. ¹³ Ta

sañahá tucu ra chi yo yoso caa cuatu tuhva yo cha vaha cha cuñihi yo quiví quichi tucu ra Jesucristo. Vatyí cucusií xaan cuñi yo cuhva cha cunyehe yo cha tyaqui quiví quichi ra cuví Nyoo yo ra cahnu ca, ra cha sacacú chi yo. ¹⁴ Chahq ra ñáyiví ra tyiño nuu yo tacuhva sacacu ra chi yo ndaha tandihí cha quiñi caa. Ta sandundií ra chi yo tacuhva na cuvi yo ñáyiví cuenda ra, ta cha yaha tuhun cuan cuñí ra vatyí sacuvi yo maa maa ri cha vaha. ¹⁵ Ican ihya cuñí chi sañahun chi ñáyiví. Sanduniun iñi ñu. Ta cahun nuu ñu chihin ndusu yuhu Nyoo tatu ña vaha sacuvi ñu. Ta ma sacuvun ni noo cha ña vaha. Tyicuan ta ma cuvi ñihi ñu cuhva cahan nyaa ñu chuun.

3

Cuhva cha tahán chi sacuvi ñu yihí cuenda Nyoo

¹ Sañicohun iñi ñu tahan yo cuenda Nyoo na quichaha ñu chi gobiernu ta chi ra cacuví tyiño. Ta chihin cha ñi iñi ñu na sacuvi ñu ñáá tyiño vaha cha catyí ra cuví tyiño tyi sacuvi ñu. ² Ta ma cahan ña vaha ñu siqui ni noo ñáyiví. Na taxi ri coo ñu. Vaha ñáyiví na cuvi ñu. Na masu cuvi añima ñu chihin tandihí ñáyiví.

³ Vatyí nyacua nya maa yo ta tyicuan caa cuví yo ta ityi chata ca. Tondo xaan chiyo yo. Ta ndava xaan cuví iñi yo. Ñahri noo ityi vaha chica noo yo vatyí ra cuví cuihna sandahví ñaha ra chi yo. Chinyaca ñaha cuhva ña vaha cha cuñí coño ñuhu yo chi yo. Ta chinyacuví yo tandihí maa cuhva cuñí chi. Tandihí cha iyó chi inga ñáyiví ta cuñi yo coo chi yo. Tasi cuñi yo nyehe yo chi tahan yo. Ta ñáyiví ña cuñi nyehe ñu chi yo. ⁴ Soco Nyoo vaha ñáyiví cuví ra ta sacacu ra chi yo. Yucuan cuvi nu sañahq ra vatyí cuñí ra chi tandihí ñáyiví. ⁵ Ñima cha cuenda cha cachi iyó yo ta sacacu ra chi yo, soco cha cuenda cha ndahvi cuñí ra nyehe ra chi yo. Ta chihin niñi ra Jesús nacatya yo cuatyí yo ta

nacacu chaa yo, ta chahá Tatyí Ii ra noo ñayiví chaa coo yo. ⁶ Ta chaha xaan Nyoo cha coo Tatyí Ii ra añima yo cha cuenda maa ra Jesucristo ra sacacú chi yo. ⁷ Chihin tumañi iñi cha chaha ra chi yo ta sacuvaha ra chi yo nuu ra. Ta vityin nyatú yo cunanyehe yo noo cha cha yaha chaha ra chi yo, noo ñayiví cha ma naa ca maa. ⁸ Tandihí tuhun ihya ndicha xaan. Ta cuñí vatyí cahun tuhun ihya nuu ñu chinó iñi chi Nyoo chihin cha ñi iñun, tacuhva na saha cuenda ñu chi ñu, ta sacuvi ñu cha vaha. Vaha xaan tuhun ihya, ta cuatyinyee chi chi tandihí ñayiví tatu quichahá ñu. ⁹ Soco ma tyasohun nu cuví yuhu ñu tuhun cha ñima ri tuhun. Ma tyasohun tuhun cahan ñu vatyí ñu cuan ñañí xaan cuñí ñu coto ñu yoso caa vachi tata yo. Ma quichahun chi ñu cañí tahan cha cuenda ley cha tyaa ra Moisés ta chahá. Ñahri maa tyinyeé cuan. Cha ñima ri tuhun cuví.

¹⁰ Tatu iyó ñu cuñí ñu sacusiñ ñu chi ñu nyicú vehe ñuhu, cana chi ñu noo chaha o uvi chaha ta catyí chi ñu tyí ña vaha sacuví ñu. Ta tatu ña quichahá ñu, casi nu quichi ñu. ¹¹ Vatyí ma chihin yucuan ri chitón vatyí ña vaha añima ñu tatu tyicuan caa nyacuví ñu. Chicoo cuatyí ñu. Ta suri maa ñu sacunaá ñu chi ñu.

Tyiño tyaa ra Pablo chi ra Tito

¹² Cutachi chi ra Artemas, o chi ra Tíquico nu nyaún. Quiví chaa ra, nducu cuhva ta cahun ñuu Nicópolis vatyí cuñihi tahan yo yucuan. Vatyí tyái cuhva cuyahi yoo vichin yucuan. ¹³ Nducu cuhva tyinyeun chi ra Zenas ra chitó xaan ley, ta chi ra Apolos ta cuhva cha chiñuhú chi ra nu cachicá noo ra tuhun Nyoo. ¹⁴ Na cutuhva ñu yihí cuenda Nyoo sacuvi ñu cha vaha ta tyinyee ñu tatu iyó cha cumañi chi inga ñu. Tyicuan ta ña caha ri nyicón ñu chi Nyoo.

Nu ndihí cahan ra Pablo

¹⁵ Tandihí ra nyicu chihin, chahá ra nocumi chuun, Tito. Ta na cuhva nocumi chi tandihí ñu cuñí chi ndi

cha cuenda cha ñin ri cuví yo cuenda Nyoo. Na nasoco Nyoo chi tandihí ndo.

Carta Cha Sacuhun Ra Apóstol Pablo Chi Ra Filemón

Nu tyaq ra Pablo noo tutu chi ra Filemón

¹⁻² Yuhu ra Pablo ta ra Timoteo yañi yo, tyaá ndi tutu ihya chi yoho, Filemón, tyi ra tahan ndi nu tyiño Sutu Mañi yo cuvún. Ñohí vehe caa ihya cha cuenda ra Jesucristo ta sacuhún ndi tutu ihya chuun ta chi ra Arquipo, ra cuvi sindaro ra Jesucristo chihin yo, ta chi cu Apia, ta chi tandihi ñu ndu ñin ri vehun. ³ Na nasoco Nyoo Sutu yo ta Sutu Mañi yo Jesucristo chi ndo. Ta na coo cha taxi ri cuñi añima ndo sahá ra.

Nu catyi ra Pablo vatyí ra Filemón vita xaan ñi ra ta chino vaha ñi ra chi Nyoo

⁴ Tyicuan ri nacuhvé tyahvi nyoo chi Nyoi cha cuendon nu nichón ñi tuhun, nu chicán tahvi chi ra. ⁵ Vatyí ñi tuhun tyi chinó vaha ñun chi Sutu Mañi yo Jesucristo, ta cuñi xaun chi ra ta chi ñu yihí cuenda ra. ⁶ Ñáyivi cha sacotón yoso caa cuhva chinó ñun chi Nyoo, nachino ñi tucu maa ñu chi ra ta vityin chicán tahvi cha cuenda ñu, na coto vaha ñu tandihi cha vaha cha chahá Nyoo chi yo cha cuenda ra Cristo Jesús. ⁷ Si xaan cuñi, ta vaha xaan cuñi añime vatyí cuñi xaun chi ñu tahan yo, ta sandunyeún ñi ñu.

Nu chicán ra Pablo noo tumañi ñi chi ra Filemón cha cuenda ra Onésimo

⁸ Vasi iyó chi ityi chii cha catyi chuun ñáa cha tahán chi sacuvun vatyí apóstol cuví, soco ña cuñi saniñi chuun. ⁹ Vaha ca cha caquen noo tumañi ñi chuun cha cuenda cha cuñi yo chi Nyoo vatyí yuhu ra chahnu cuví ta ñohí vehe caa cha cuenda ra Cristo Jesús. ¹⁰ Chiquén noo tumañi ñi chuun cha cuenda ra Onésimo vatyí nanduvi ra sehi cha cuenda Sutu Mañi yo nu ñohí vehe caa ihya.

¹¹ Quivi cuan musu cuví ra chuun, ta chaha xaan ra tisihi, soco vityin musu vaha cuví ra, tyi vaha sacuví ra tyiño nui ta tyicuan caa tucu cusacuvi vaha ra tyiño nuu maun. ¹² Ta vityin sacunhi chi ra chuun. Ta cuñi vatyí naquehen cuenda vahun chi ra tari cha mai cuví. ¹³ Vasi cuñi cha ndoo ra ihya chihin, ta tyinyee ra chii tyiño nuu maun cha niri ca cha ñohí vehe caa cha cuenda tuhun Nyoo, ¹⁴ soco ña cuñi cha ndoo ra tyiño nuun tatu ña ndoun vaha, vatyí tacuhva sacuvun tumañi ñi chii soco chihin cha iyó vaha ñun ta ñima ca chihin cha saniñi chuun. ¹⁵ Ra Onésimo chaha xaan ra tisihi chuun quivi cuan, soco vaha xaan nanduvi ra vityin, vasi yucuan cuenda canyaha ra chuun ta vityin nachaa ra nu nyaún vatyí cuacunyaa ra chuhun tyicuan ri maa ¹⁶ soco ñima tari noo musu ri, soco tari noo ra vaha ca. Vatyí yañi yo cuví chi ra. Ta cuñi xain chi ra, ta vihi ca yoho, tahán chi cha cuñi con chi ra. Vatyí ñima noo yañun cuenda coño ñuhu ri cuví chi ra. Soco yañun cha cuenda Sutu Mañi yo cuví chi ra ñandihí.

¹⁷ Tatu ndicha cha ra tahun cuví chii, cuñi vatyí naquehun chi ra Onésimo tari cha chi yuhu naquehún. ¹⁸ Tatu iyó cha sacuvi ra chuun, o tatu yosoyicá ra chuun, tyiyahvi mai. ¹⁹ Yuhu ra Pablo tyaí tuhun ihya vatyí cutiyahvi cha yosoyicá ra chuun, cha nuu cha tahán chi catyí chuun vatyí yosoyicón nyacua nya ñayivun chii. ²⁰ Chiquén chuun, yañi, na sandusiun ñi ta naquehun chi ra Onésimo chihin cha vaha. Sanduchaa añime chihin cha ñin ri cuví yo cha cuenda ra Cristo.

²¹ Tyaí tutu ihya chuun vatyí chité tyi cuaquichahun tuhun cahín. Ta chité vatyí ñima yucuan ri, soco cuaha ca cuasacuvun. ²² Ta nonga cha chiquén chuun tatu ma sanduvahun chiin noo nu cuví cunyai chihin ndo. Ta cuñi vatyí cacan tahvun cha cuende, na cuhva Nyoo cha cuhin nu nyaá ndo.

Nu ndihi cahon ra Pablo ta chahá

ra nocumi chi ñu

²³ Vachi nocumi chuun sahá ra Epafra, ra ñoho chihin vehe caa cha cuenda ra Cristo Jesús. ²⁴ Ta vachi tucu nocumi chuun sahá ra Marcos, ta ra Aristarco ta ra Demas, ta ra Lucas, ra catyinyeé chii chihin tyiño Nyoo.

²⁵ Na nasoco Sutu Mañi yo Jesucristo chuun. Ta na cuvi chi tyicuan caa.

Carta Cha Chino Cha Cuenda Ñáyivi Israel, Ñu Cahán Sahan Hebreo

Nyoo cahán ra chihin yo chihin yuhu Sehe ra

¹ Ta tyembu chahnu cahán Nyoo cuaha xaan chaha, ta cuaha xaan cuhva, chihin sutu chahnu yo, ñu chiyo ta cha naha. Cahán ra chihin yuhu ra cacuvi profeta, ra cha cachaha cuenda tuhun cahán ra. ² Ta vityin nu cua ndihi tyembu ihya, cahán ra chihin yo chihin yuhu Sehe ra. Ta tandihi maa ta natyaa ra ndaha Sehe ra. In ri cuví ra chihin Sehe ra ta savaha ra ñuhu ñayivi. ³ Cha cahnú ta cha tyaqui cuví Nyoo iyó chi Sehe ra, vatyí suri ican ra cuví maa maa xiñahñu Nyoo. Ta chihin tunyee ñiñi tuhun cahán ra, nyisó cuenda ra tandihi cha iyó. Ta cha yahá sandachí ra cuatyí yo, ta chicunyaá ra chiyo vaha Nyoo, ra cha cahnú ca cuví. Ta vityin nyacá ñaha ra chihin ra nya andivi.

Cahnú ca cuví Sehe Nyoo ta ñima ca ángel

⁴ Ta tyicuan caa cahnú xaan ca nanduvi Sehe Nyoo ta ñima ca tandihi ángel. Ta cahnú ca sívi chahá Nyoo chi ra ta ñima ca ángel cuenda ra. ⁵ Vatyí Nyoo ña catyí ra ni noo chaha chi ni noo ángel tyehe caa:

Yoho cuvún Sehi.

Ta yuhu चाहि ñayivi coun vityín.

Ta ni ña cahán ra tuhun ni noo ángel tyehe caa:

Yuhu cucuvi Sutu ra.

Ta maa ra cucuvi Sehi.

⁶ Soco quívi saquichí Nyoo chi Sehe nuu ra síqui ñuhu ñayivi, catyí ra:

Na sacahnú tandihi ángel cuende chi ra.

⁷ Ta cahán tucu ra tuhun ángel cuenda ra ta catyí ra:

Sacuví vatyí tatyí cuví ángel cuende,

ta tari yaa ñuhu cuví ra sacuví tyiño nui, catyí Nyoo.

⁸ Soco tuhun Sehe ra catyí ra tyehe caa:

Nyoo cuvún, ta cua cunyaca ñahun tyicuan ri maa chihin cha ndaa ta chihin cha ndicha.

⁹ Vatyí cuñún cha vaha ta cutasi cuñún cha ña vaha.

Yucuan chaha vatyí yuhu, ra cha cuví Nyoo cuendon, cuaha ca tusii ñiñi चाहि chuun, ta ñima ca chi ra tahun.

¹⁰ Ta catyí tucu Nyoo chi Sehe ra tyehe caa:

Yoho, ra nyacá ñaha cuvún. Ta quívi xihna ri savahun ñuhu ñayivi ta chihin ndahun savahun andivi.

¹¹ Maa ñuhu ñayivi ta andivi cundihí chi, soco yoho, cundoun tyicuan ri maa.

Tandihí maa cuan cu cuchahnu tari sahma.

¹² Ta cunicava tahun chi tari noo vestido.

Ta cunasama chi tari nasamá ñayivi sahma ñu.

Soco yoho suri maa ra cuvún tyicuan ri maa.

Ta ma ndihí maa ñayivun, catyí Nyoo chi Sehe ra.

¹³ Nyoo ni noo chaha ña catyí ra chi ni noo ángel tari catyí ra chi Sehe ra tyehe caa:

Cunyaun chiyo vahi nyacua nya cha caquin chi ra xaan ñiñi chuun chahun.

¹⁴ Soco tandihí ángel, tatyí cacuví ra ta tyaa Nyoo tyiño chi ra cha caca ra ta tyinyee ra chi ñu cucacu añima.

2

Cahnú xaan cuví tuhun cha sacacú Nyoo añima chi yo

¹ Yucuan chaha vatyí cuñí chi cha quichahá xaan ca yo tuhun ndicha cha chiñi yo, coto cunuhu yo ityi quiñi caa. ² Ta cha naha catyí Nyoo chi ángel, na cuhva ra ley ra chi ra Moisés. Nyoo catyí ra tyi tahan chi quichaha ñayivi. Ta ñu casacuvi cuatyí ta ña quichaha ñu ley ra, tachí tuñi ra chi ñu tari cuhva catyí

maa ley cuan. ³ Cahnu xaan cuhva sacacú Nyoo añima yo. ¿Yoso caa cucacu añima yo tatu sacunaa yo cuhva cuan? Cha xihna ri suri maa Sutu Mañi yo Jesucristo cahan ra tuhun yoso caa cuví cacu añima yo. Ta yaha cuan ta ñu cha cachiñi tuhun cahan ra, chitó ñu tyi ndicha ta canacatyí tucu ñu chi maa yo. ⁴ Ta siin ri, Nyoo sañaha cachi ra chi yo chihin cuaha milagru ta cha iyo, vatyí ndicha cha sacacú ra chi yo. Ta chaha ra Tatyí li ra chi yo siin siin cuhva, yoso cuhva cha cuñí maa ra. Ta chihin tandihí cuan sañaha ra chi yo vatyí ndicha cha sacacu ra añima yo.

Ra Jesucristo cuví ra cha cua sacacu añima yo

⁵ Nyoo, ña chaha ra cha cunyaca ñaha ángel chi ñuhu ñayivi chaa cha cahan yo tuhun vityin. ⁶ Vatyí iyó noo nuu cahan chi nu tutu Nyoo tyehe caa:

Nyoo Suti ¿yóo ra cuví rayi vatyí nicohon iñun tuhun ra?

¿Yóo ra cuví Sehe ra vatyí tñn cuendon chi ra?

⁷ Vatyí suhva quivi, ndahvi ca sacuvun chi ra, ican saha ángel. Soco yaha cuan sacahnū xaan chi ra. Ta sahá xaan ñayivi chi ra.

Ta chahun cha cunyaca ñaha ra siqui tandihí cha savahun.

⁸ Tandihí cuan natyaun ndaha ra. Tandihí maa, Nyoo chaha cha cunyaca ñaha ra, cuví chi cuan. Soco nyehé yo vatyí cumañi ca quichaha tandihí cuan chi ra. ⁹ Soco nyehé yo chi ra Jesús vatyí suhva ri quivi, sanocuee Nyoo chi ra ican saha chi ángel. Soco cha cuenda cha cuñí xaan Nyoo chi yo, chaha cuenda ra chi ra Jesús cha cuví ra cha cuenda tandihí yo. Ta vityin sahá xaan Nyoo ñayivi chi ra ta sacahnū xaan ra chi ra cha cuenda tindocho cha nyehe ra quivi chihí ra.

¹⁰ Tandihí maa cha iyó, cha cuenda maa Nyoo cuví. Ta maa ra savaha. Ta cuñí ra vatyí tandihí sehe ra ta chi maa ñu cucuvi tandihí cha tyaqui cha iyó gloria. Ta chihin tindocho cha sanyehe ra chi ra Jesucristo Sehe ra,

sacuvaha ra chi ra. Vaha xaan quita ra. ¹¹ Sehe Nyoo cuví chi ra Cristo, ra sacacú añima ñayivi. Ta suri sehe Nyoo nanduví chi ñayivi ñu chinó iñi chi ra. Yucuan chaha vatyí ña cucahan nuu ra Cristo catyí ra yañi ra chi ñu, vatyí in ri sutu ra chihin ñu. ¹² Vatyí catyí ra Cristo nu tutu Nyoo tyehe caa:

Cucahin tuhun maun chihin yañi.

Ta cucate yaa cuendon nu ndú in ri ñu.

¹³ Catyí tucu ra tyehe caa:

Yuhu cuita iñi chi Nyoo.

Ta catyí tucu ra:

Ihya nyaí chihin sehi, cha chaha Nyoo chi, catyí ra.

¹⁴ Ta tandihí yo cha cuví yo sehe ra, coño ñuhu cuví yo ta yihí niñi yo, yucuan chaha ra Jesús ñandihí, suri coño ñuhu ta niñi ñayivi nyiso ra suhva quivi, tacuhva cuví chaa tuhun chihí chi ra, ta tyicuan caa ta satani ra chi cuihna, ra cha chiyo tunyee iñi chi cha cahni chi ñayivi. ¹⁵ Ta tyicuan caa sacacu ra chi ñu cha yuhvi chi tuhun chihí. Chiyo ñu tari noo musu ra ña vaha vatyí yuhvi ñu cha cuví ñu. ¹⁶ Cha ndicha vatyí ña quichí tyinyee ra chi ángel, soco chi ñayivi tata ra Abraham quichí tyinyee ra. ¹⁷ Yucuan chaha cuñi chi cha nduvi ra tari ñayivi, tacuhva cuví ra noo ra ndicha cundahvi cuñi chi yo. Ta tyicuan caa cuví ra tata sutu cahnū cha cuenda yo nuu Nyoo. Ta tyicuan caa ta sacuachiyó ra cuatyí ñayivi cha cuenda tindocho cha nyehe ra. ¹⁸ Vatyí maa maa ra nyehe tindocho quivi nducu nyehe ra ña vaha chi ra, yucuan chaha, vityin cuví tyinyee tucu ra chi maa yo tatu nducú nyehe ra ña vaha chi yo.

3

Cahnu ca cuví ra Jesús ta ñima ca ra Moisés

¹ Yañi, nyoho chaha cuenda ndo chi ndo chi Nyoo. Ta cuví tucu ndo ñu cha nacana Nyoo chii vatyí coo ndo chihin ra andivi. Ta cha cuenda cha nyehe ra Cristo Jesús tindocho tyiño

nuu ndo, yucuan chaha, nyehe vaha ndo cuhva vaha iyó ra. Vatyí ican ra cuví ra cha saquichí Nyoo chi vatyí cuví ra tata sutu cahnu cuenda yo cha chinó iñi yo tuhun Nyoo. ² Ta maa ra quichaha ra tandihí cha catyí Nyoo cha sacuvi ra, tari quichaha tucu ra Moisés ta cha naha, ta sacuvi ra tyiño cha tahan chi sacuvi ra nuu ñáyivi sehe Nyoo. ³ Ta ra Jesucristo cahnu ca ra cuví ra, ta ñima ca ra Moisés. Vatyí noo ra cha savahá vehe, cahnu ca cuví ra ta ñima ca maa vehe cuan. ⁴ Tahan tahan vehe, iyó ra savaha chi chí, soco Nyoo cuví ra cha savaha tandihí maa cha iyó. ⁵ Ra Moisés, quichaha vaha ra chi Nyoo ta sacuvi ra tyiño nuu ra cha cuenda ñáyivi Israel ta cahan ra tuhun cha cusacoto Nyoo nu cuahan ca chi ityi nuu. ⁶ Soco ra Cristo ra cuví Sehe Nyoo, suri quichaha vaha ra chi Nyoo ta ican ra nyacá ñaha vehe Nyoo. Ta vehe cuan ican cuví maa yo, tatu saní ca yo iñi yo cuhun yo ityi nuu chihin Nyoo ta itá iñi yo chi ra nyacua nya nu ndihí, ta tyicuan ri cusí cuñi yo nyatú yo cha cuñihi yo.

Ñu chinó iñi chi Nyoo, nyitatu ñu chihin Nyoo

⁷ Yucuan chaha cuñi chi saha cuenda yo chí yo, tari catyí Tatyí li Nyoo nuu tutu Nyoo tyehe caa:

Tatu chiñi ndo tuhun cahan Nyoo chihin ndo vityin,

⁸ ma sandava ndo aña ndo, tari sacuvi ñu ña quichaha chi Nyoo quivi canducú nyehe ñu chí ra nu chica noo ñu chiqui ndí cuan.

⁹ Tyehe caa catyí Nyoo: Ñáyivi cuan nducú nyehe ñu chii, vasi chichi cha uvi xico cuiya nyehe ñu cha sacuvi.

¹⁰ Yucuan chaha cuxain chi ñu, ta catyí tyehe caa: “Tyicuan ri chicá uvi iñi ñu, ta ña cuñi ñu coto ñu ityi mai.”

¹¹ Yucuan chaha cuxain chi ñu, ta catyí cachi chi ñu, vatyí ma quihvi ñu nyitatu ñu chihin, catyí Nyoo.

¹² Yañi, saha ndo cuenda chi ndo coto cu ña vaha aña ndo ta coto yoso ri caa ta sandoo ndo chi ra cuví Nyoo nyitó cha cuenda cha ña chinó ca iñi ndo chi ra. ¹³ Soco saní ndo iñi tahan ndo tahan tahan quivi, cha ni ri ca cha chahá ca chi cuhva vityin, tacuhva vatyí ni noo ndo ta ma sandavi ñaha cha quini caa chi ndo, ta ndundava aña ndo. ¹⁴ Vatyí tatu saní yo iñi yo chihin Nyoo nyacua nya nu ndihí ñáyivi, yucuan ta in ri cuñihi yo cha vaha chihin ra Cristo.

¹⁵ Catyí chi nu tutu Nyoo vatyí saha yo cuenda chi yo tyehe caa: Vityin tatu nyoho ta chiñi ndo cha catyí Nyoo.

Ma sandava xaan ndo aña ndo, tari sacuvi ñu ña quichaha chii, catyí Nyoo.

¹⁶ ¿Yóo ñu cha cachiñi tuhun cahan Nyoo ta ña tyasohó ñu? Tandihí ñu Israel cha tava ra Moisés Egipto ta cha naha, ican ñu cuan. ¹⁷ Ta ¿yóo chi cuxaan Nyoo chichi cha uvi xico cuiya? Suri chi ñu cuan, ñu cha chicoo cuatyí. Ta cachiñi ñu nu chiqui ndí nu chica noo ñu. ¹⁸ ¿Ta yóo chi catyí cachi Nyoo tyi ma quihvi ñu, cunyitatu ñu chihin ra? Chi ñu cha ña tyasohó nu cahan ra. ¹⁹ Nyehe yo vatyí ña cuví quihvi ñu cuan vatyí ña chingo iñi ñu chí ra.

4

¹ Yucuan chaha, cha ni ri ca cha iyó ca quivi cuví quihvi yo cunyitatu yo chihin Nyoo, cuñi chi saha yo cuenda coto ma cuví quihvi nya noo nyoho nu cunyitatu yo chihin Nyoo.

² Vatyí chiñi tucu yoó tuhun Nyoo cha sacacú ra aña yo, tari chiñi maa ñu Israel cuan. Soco ñahri maa tuhun cha chiñi ñu, vatyí chiñi ndí ri maa ñu, ta ña chingo iñi ñu. ³ Soco yoó cha chinó iñi yo, ican yo cuví ñu quihvi nyitatu chihin Nyoo. Ta cha cuenda ñu ña chinó iñi cuví chi tari catyí Nyoo tyehe caa:

Yucuan chaha cuxain chi ñu ta catyí cachi chi ñu vatyí ma quihvi ñu nyitatu ñu chihin, catyí Nyoo.

Soco cha nyaá nu nyitatu yo chihin Nyoo vaty nyitatu Nyoo cha sandihí ra tyiño sahá ra nyata savahá ra ñuhu ñáyiví. ⁴ Vaty yihí nu catyí chi nu tutu Nyoo cha cuenda quiví cu ucha nu ndihí vitya. Tyehe caa catyí chi:

Nyoo nyitatu ra nu cu ucha quiví, vaty ndihí tyiño sahá ra.

⁵ Ta inga tucu chaha catyí chi nu tutu Nyoo tyehe caa:

Ni noo quiví ma quihví ñu nu cunyatatu ñu chihin, catyí Nyoo.

⁶ Ñu cuan, ñu cha xihna ri cachiñi tuhun cha sacacú Nyoo aña yo, ña quihví ñu cha cuenda vaty nacahnu ñu nu cahán Nyoo. Soco nyaá cha quihví inga ñu. ⁷ Vaty cha yahá nacahnu ñu Israel cuan nu cahan Nyoo, natyaa tucu ra cuhva vaty nya inga quiví cuví quihví yo cunyatatu yo chihin ra, ta ícan cuví quiví vityin. Ta cahán Nyoo tuhun quiví vityin chihin cha catyí ra David. Nyaá chi nu tutu Nyoo tyehe caa:

Vityin tatu nyoho ta chiñí ndo cha catyí,

Ma sandava xaan ndo aña ndo, catyí Nyoo.

⁸ Tyehe ta chinyaca ra Josué chi ñu Israel cuan nu cunyatatu ñu chihin Nyoo, ma cahan ca Nyoo inga chaha tuhun cha cuenda inga quiví.

⁹ Soco nyaá ca nu cuví nyitatu ñu yihí cuenda Nyoo chihin ra. ¹⁰ Vaty ñu quihví nyitatu chihin Nyoo, ña chicá ca iñi ñu soco nyitatu aña ñu tari nyitatu Nyoo quiví ndihí tyiño saha ra. ¹¹ Cuñí chi saniñi yo chinó iñi yo chi Nyoo tacuhva cuví nyitatu yo chihin ra, coto yoso ri caa nya noo nyoho sacuvi ndo tari sacuvi ñu Israel cuan vaty ña cuñí ñu chinó iñi ñu chi ra.

¹² Vaty tuhun Nyoo, nyitó chi, ta iyó tunyee iñi chi chi. Ta xaan ca chi ta ñima ca mityi cha xaan ninduvi chiyo yuhu, ta nyee chi nyacua nya chichi aña yo ta nyacua nya chichi cha chiñi tuñi xiñi yo, nyacua nya chichi tuhun xehe cha caá aña yo. Ta sañahá cachi Nyoo ñáá cha chicá iñi yo ta ñáá cha caá aña yo tatu

vaha o ña vaha. ¹³ Ñahri maa cha savahá Nyoo ta cuví tixehe nuu chi chi ra. Tandihí maa ta nyehé ra. Ta chi ra nyaá nacuhva cuenda yo cha sacuví yo.

Ra Jesús cuví ra tata sutu cahnu cha cahán chaha yo nuu Nyoo

¹⁴ Ra Jesús Sehe Nyoo, cuví ra tata sutu cahnu cha cuenda yo, vaty quihví ra nuu Nyoo ta cahán ra chaha yo. Yucuan chaha cuñí chi cha ma sandihí yo cha chinó iñi yo chi ra.

¹⁵ Vaty ra cuví tata sutu cha cuenda yo cuví naquehen ndahvi ra chi yo tatu cuihya cuñí yo chihin Nyoo, vaty chitó tucu maa ra cha cuví tindoho cha nyehe yo vaty nyehe tucu maa ra tandihí nuu tindoho, sahá ra ña vaha cha nducu nyehe ra chi ra, soco maa ra Jesús, ñahri catyí ra chicoo. ¹⁶ Yucuan chaha cuví tuhva yo nuu nyaá Nyoo ta cahan yo chihin ra chihin cha ña yuhví yo vaty cuñí xaan ra chi yo, ta ndahvi cuñí ra nyehe ra chi yo. Ta cha cuenda cha vaha ñáyiví cuví ra, tyinyeé ra chi yo nu nyehe yo tindoho.

5

¹ Tandihí ra cuví tata sutu cahnu ca cuenda ñu Israel, ñáyiví cuví ra. Ta na cachí Nyoo chi ra vaty cahan ra chaha tandihí ñu nuu Nyoo, ta cuhva cuenda ra cha chahá ñu chi Nyoo, ta cahñi ra quití cha cuenda cuatyí ñu.

² Ta suri vachi quiví ndahvi cuñí ra cacuví sutu cha nducú nyehe ra ña vaha chi ra, yucuan chaha cuví cundahvi cuñi ra nyehé ra chi ñáyiví ña chitó maa, ta tyinyeé ra chi ñu quitá caxiin ityi vaha Nyoo, na ndu uvi iñi ñu cuatyí ñu. ³ Ta cha cuenda cuatyí maa ra ta cha cuenda cuatyí ñáyiví, cachahñí ra quití ta chahá cuenda ra chi Nyoo na cahnya ra cuatyí ñu.

⁴ Yori sacuvi ri maa sutu chi. Maa Nyoo cuví ra cana chi ra, ta chaha ra cha cuví ra tata sutu, tari sacuvi ra chihin ra Aarón ta cha naha. ⁵ Ta tyicuan caa tucu ra Cristo, ñima maa ra sacuvi ra sutu chi ra, soco maa

Nyoo chaha cha cuvi ra, tari catyí maa ra tyehe caa:

Yoho cuví Sehi.

Yuhu chahí ñáyiví coun vityin, catyí Nyoo chí ra Cristo.

⁶ Tari catyí tucu ra chi ra nu inga nu cahán chi tyehe caa:

Yoho cuvún tata sutu tyicuan ri maa. Cuvún tari ra Melquisedec.

⁷ Ta quívi chiyó ra Cristo ihya síqui ñuhu ñáyiví, chicán tahvi ra chi Nyoo, ta chacu chaa ra ta cahán ra chihin Nyoo vatyí ican ra cuví ra iyó tunyee iñi chii cha sacacu chi ra ndaha tuhun chihí. Ta Nyoo chíñi ra tuhun cahán ra vatyí sacuvi ra tandihí cha catyí Nyoo. ⁸ Yucuan chaha vasi Sehe Nyoo cuví chi ra Cristo, soco cutuhva ra cha quichaha ra chi Nyoo chihin cha nyehe ra tindocho. ⁹ Ta cha yaha cha sacuvaha Nyoo chi ra, tyicuan ta cuví ra ra sacacú aña ñáyiví tacuhva coo ñu chihin Nyoo tyicuan ri maa, tandihí ñu cha quichahá tuhun cahán ra. ¹⁰ Vatyí Nyoo tyaá tyiño chi ra cha cuví ra tata sutu cahnu, tari ra Melquisedec.

Yica xaan cha sandihí yo cha chinó iñi yo tuhun Nyoo

¹¹ Cuaha xaan nyaá cahan yo síqui tuhun ihya, soco yíi xaan nacatyí yoso caa cuahan, vatyí nyoho ña cuñí ndo cutuñi iñi ndo. ¹² Cha naha xaan chinó iñi ndo chi Nyoo, cuñí chi cha cuví ndo ra sacuahá ta sañaha ndo chi inga ñu. Soco nyoho ni cuñí chi cha nacatyí tucu ndi inga chaha chi ndo tuhun cha xihna ri chíñi ndo tuhun Nyoo. Tari cha lee cuví ndo chihin tuhun Nyoo, vatyí tari cha chaxin ca ndo cha nuu cha cachi ndo nyayu. ¹³ Ta ñu cuví tari cha lee cha chaxín, ta chaa ca ñu cutuñi iñi ñu yoso caa coo vaha ñu nuu Nyoo. ¹⁴ Soco nyayu vaha cuví chi cha cuenda ñu chahnu chihin tuhun Nyoo: ñu cha cutuñi vaha iñi tuhun ra, nacotó ñu nya cha vaha ta nya cha ña vaha.

6

¹ Yucuan chaha ma ndoo ri yo chihin cha xihna ri cutuhva yo tuhun ra

Cristo, cuhun yo ityi nuu ca tacuhva cuvi yo ñáyiví chahnu chihin tuhun Nyoo. Ma ndoo ri yo chihin tuhun cha yaha cutuhva yo, ta cuñun tuhun cha ma nducu yo cuhva cha cuvaha yo nuu Nyoo chihin cha sacuvi yo cha vaha, ta tuhun nachino iñi yo vatyí sacacú Nyoo chi yo. ² Ma ndoo yo chihin tuhun cha yaha sacuvi yo, tari cha condutya yo, tari cha tyisó yo ndaha yo síqui ñu chíñó iñi chi Nyoo na nasoco ra chi ñu, tari tuhun cha cunandoto tandihí ñáyiví cha yaha chihí, ta tari tuhun cha cucutuñi chí tandihí ñáyiví nuu Nyoo ta yihí ñu cuhun ñu anyaya tyicuan ri maa. Ma ndoo ri yo chihin tandihí cuan. ³ Soco tatu Nyoo ta chaha ra, sacuvi yo ihya: cuhun yo ityi nuu ca.

⁴⁻⁶ Vatyí ñu cha yaha naquehen cuenda cha ndichin Nyoo noo chaha, chitó ñu cha chahá Nyoo, ta nyaá Tatyí Ii Nyoo chihin ñu. Ta cha chitó ñu yoso caa cha vaha tuhun Nyoo, ta cha ñihí ñu tunyee iñi Nyoo. Ta chihin tunyee iñi cuan cunyaca ñaha Nyoo ñuhú ñáyiví chaa. Tatu cha yaha naquehen cuenda ñu tandihí cha vaha cuan noo chaha, ta yaha cuan ta sandihí ñu cha chinó iñi ñu chí Nyoo, ma cuví ca cha ndu uvi iñi ñu inga chaha. Vatyí suri maa ñu tari cha tyaá ñu chi ra Cristo nu cruzi inga chaha, vatyí chahá ñu cha cuacu nyaá ñáyiví chi ra. ⁷ Añima ñáyiví cuví tari noo ñuhú nu sahá tyiño ñu, vatyí noo ñuhú tahan ri chaha cha coon savi, chihí ñuhú cuan ndutya savi cuan. Tatu vaha ñuhú cuan ta vaha cuvaha cha tachí ñu nuu chí, cunasoco Nyoo chí ñuhú cuan. ⁸ Soco tatu cañá iñu ta cañá nyava nuu chí, ñahri maa tuhun. Ta cusoco Nyoo chí ñuhú ña vaha cuan ta cucayu chí. Ta tyicuan caa tucu cucuvi chí ñu cha sandihí cha chinó iñi chí Nyoo.

⁹ Yañi, vasi cahán ndi tyicuan caa, soco chitó vaha ndi vatyí nyoho sacuvi ndo cha vaha, maa maa ri cha sacuvi ñu cha cacú aña sacuvi ndo, ta ña sacuvi ndo tari ñu cuví tari ñuhú ña vaha cuan. ¹⁰ Vatyí Nyoo, ra vaha

cuví ra, ta ma naa iñi ra cha sacuvi ndo. Ta nyehé ra vatyi cuñi xaan ndo chi ñu yihí cuenda Nyoo, vatyi tyinyee ndo chi ñu, ta tyinyeé ca ndo chi ñu nya vityin. ¹¹ Cuñi ndi vatyi na cun# ca iñi ndo nyacua nya quichi Sutu Mañi yo, tyicuan caa ta cuñihi ndo tandihi cha nyatú ndo. ¹² Ña cuñi ndi cha cusuchan ndo, soco saha ndo cuenda chi ñu cha chinó vaha iñi chi Nyoo ta sacuvi ndo tari sacuvi ñu. Vatyi ñu chinó vaha iñi chi Nyoo chihin cha cama iñi ñu, ican ñu ñihí cha catyí Nyoo tyi cuhva ra chi yo.

¹³ Vatyi ta cha naha catyí Nyoo chi ra Abraham, vatyi cuhva ra noo cha cuhva ra chi ra. Ta Nyoo tyaa ra cuhva cha cuhva ra, ta noo ri tuhun cahan ra vatyi maa ra, Nyoo cuví ra. ¹⁴ Ta tyehe caa catyí ra: “Cha ndicha vatyi cunasoco xain chuun ta cuaha xaan sehun cucuhve”, catyí ra chi ra Abraham. ¹⁵ Ta ra Abraham chihin cha cama iñi ra, nyatu ra tuhun cahan Nyoo chihin ra, ta tyicuan caa naquehen cuenda ra cha catyí Nyoo tyi cuhva ra chi ra. ¹⁶ Tatu noo ñáyivi cuacuhva ñu noo cha cuacuhva ñu chi tahan ñu ta tyanaha ñu sivi noo ra cahnu ca. Ma chihin yucuan ri. ¹⁷ Ta yucuan chaha vatyi Nyoo minoo ri tuhun cahan ra, vatyi cuñi ra cha coto ñáyivi vatyi ndicha tuhun cahan ra, ta ña nasamá ra tuhun cahan ra. ¹⁸ Yucuan chaha iyó uvi tahan cha ma cuvi nasama chi. Noo cuví cha catyí Nyoo tyi cuhva ra nyatu chi ra Abraham, ta cha cu uvi, noo ri tuhun cahan ra vatyi maa ra, Nyoo cuví ra. Ta Nyoo ña cahan ra cuendu. Yucuan chaha tandihi yo cha nyañaá yo chi ra, ñi iñi yo cunyeé iñi yo chi ra, ta nyatú yo cha tyaá ra cuhva cha cuhva ra chi yo. ¹⁹ Tari noo barcu cha nuhñi noo caa vee, coto cuhun chi chihin tatyí, ta tyicuan caa quihí iñi yo cha sacacú ra Cristo añima yo. Ta cha quihí iñi yo chi ra, nuhñi yo chihin Nyoo ra nyaá inga chiyo cortina, o nya gloria cuví Cuan. ²⁰ Vatyi ra Jesús cha quihvi ra yucuan ta nuña ra ityi nu cuhun yo nu nyaá Nyoo. Ta ican ra

Jesús cuví ra minoo tata sutu tyicuan ri maa, tari ra Melquisedec.

7

Ra Jesús cuví tata sutu tari ra Melquisedec

¹ Ra Melquisedec cha cahín tuhun, cuví ra rey ñuu Salém, ta cuví ra tata sutu cuenda Nyoo, ra cuví ra cahnu ca. Quivi cha cuandichi ra Abraham cha chahan ra chicaní tahan ra chihin suhva ra cacuvi rey, ta cuví chasaha ra chi ra, tyicuan ta quitá ra Melquisedec ityi nuu ra ta nasocó ra chi ra. ² Ta ra Abraham uchi uchi tinyaa ra siquí cha saha ganaa ra nu chicaní tahan ra, ta chaha ra chi ra Melquisedec. Ta sivi ra Melquisedec cuan cuñi chi catyí: “Rey, ra cuví ra vaha.” Ta rey ñuu Salem cuan cuví ra, yucuan chaha cuví ra: “Rey vaha cha chahá cha taxi coo añima ñáyivi.” ³ Ña catyí tuhun Nyoo yóo cha cuví sutu ra ta sihi ra, ni ña cahan chi tuhun yóo ñáyivi chi ra. Ni ri ña cahan chi tuhun ama cacu ra, ni ama chihí ra. Yucuan chaha cuví ra tari caá Sehe Nyoo, noo tata sutu tyicuan ri maa.

⁴ Soco, vityin nyehé ndo yoso cha cahnu cuví ra Melquisedec, vatyi ra Abraham tinyaa ra uchi uchi siquí cha saha ganaa ra chi ra cacuvi rey cuan nu chicaní tahan ra, ta chaha ra chi ra Melquisedec. ⁵ Tyehe ta tata ra Abraham cuví ra Melquisedec, ta cuví ra sutu, ma catyí yo tyi ra cahnu ca cuví ra. Vatyi nu cuahan ca chi ityi nuu ta suri maa ley Nyoo saniñi chi ñáyivi tata ra Abraham nacuhva ñu uchi uchi cha saha ganaa ñu chi ra cacuví sutu tata ra Leví, vasi tata ra Abraham cacuví chi ra tari maa ñu. ⁶ Ta ra Melquisedec, ñima tata ra Leví cuví chi ra, ta ni ñima tata ra Abraham, soco vita ri tyi quehen ra uchi uchi siquí tandihi cha ñihí ra Abraham. Ta nasocó ra Melquisedec chi ra Abraham, ra cha chaha Nyoo promesa chii. ⁷ Ta chitó cachi yo vatyi cahnu ca cuví ra cha nasocó cuan, ta ñima ca ra cha nasocó ra chi. ⁸ Nyehé yo vatyi cahnu ca ra

cuví ra Melquisedec cha nuu inga ra caquehén cuenda uchi uchi siqui cha iyó chi ñáyivi, vatyí rayi ri cacuví ra cuan, ta tuhva chaa tuhun chihi chi ra. Soco tuhun ra Melquisedec cahán chi nu tutu Nyoo ta catyí chi tyi ñahri tuhun chihi iyó chi ra. ⁹ Ta ra Leví, chihin sehe ra, ra cacuví tata ra Abraham, ican ra cacuví tata sutu cha tahán chi caquehén cha uchi uchi siqui cha iyó chi ñáyivi. Soco tari quivi tyiyahvi tucu ra Leví cuan uchi uchi cha saha ganaa ra chi ra Melquisedec cuví cuan, vatyí ra Abraham tyiyahvi ra. ¹⁰ Vatyí ra Leví, tata ra Abraham cucuvi chi ra, vasi ta cacu ca ra quivi chisatahan ra Melquisedec chi ra Abraham.

¹¹ Ta ra cacuví tata ra Leví suri tata ra Aarón cacuví chi ra, ican ra cacuví sutu cuenda yo ñu Israel, ta cha cuenda ra cuan quichi ley chahnu Nyoo. Ta vityin tyehe ta cuví nduvaha coo yo chihin Nyoo cha cuenda cha sacuví yo cha catyí ley cuan, yucuan ndicha ña ñiñi ca cha quichi ra Cristo ra cuví tata sutu tari ra Melquisedec, ta ñima tari ra Aarón. ¹² Vatyí tatu Nyoo ta nasama ra chi ra cuví sutu, cuñi tucu chi cha nasama ley ñandihi. ¹³ Ta Sutu Mañi yo cha cahán tutu Nyoo tuhun, ñima tata ra Leví ta ra Aarón cuví ra, soco tata inga sehe ra Israel cuví chi ra. Ta ni noo ra vachi tata cuan ta ña tuhvá ra cuví sutu. ¹⁴ Vatyí chitó vaha yo vatyí Sutu Mañi yo tata ra Judá, sehe ra Israel vachi ra, ta ra Moisés ñahri maa tuhun tata ra Judá cahan ra quivi cahan ra tuhun ra cacuví sutu.

¹⁵ Ta yucuan nyehé vaha yo, vatyí Nyoo natyaa ra inga sutu tari ra Melquisedec. ¹⁶ Ñima tari catyí ley quichi ra, vatyí ley catyí chi yóo chi tata cua quichi noo ra cuví sutu, ta ña quichi ra tata cuan, soco quichi ra vatyí iyó cha ndicha ñuhu Nyoo chihin ra ta ñahri tuhun chihí nyisó ra. ¹⁷ Vatyí ican ihya cuví cha cahán Nyoo tuhun ra:

Yoho cuvún tata sutu tyicuan ri maa, Tari ra Melquisedec.

¹⁸ Yucuan chaha sacuachiyó Nyoo ley chahnu cuan vatyí ña cuví maa tyinyee chi chi ñáyivi, ta ña chiñuhú.

¹⁹ Vatyí ley cha chaha Nyoo chi ra Moisés, ña sanduvaha maa chi añima yo. Ta vityin, tyiño nuu ley chahnu cuan, iyó inga tuhun vaha ca cha yihi ñiñi yo. Ta chihin ihya tuhvá yo chi Nyoo vatyí sanduvaha ra Cristo cuhva coo yo chihin Nyoo.

²⁰⁻²¹ Nyoo tyaa ra cuhva ta tyanaha ra vatyí cuhva ra noo sutu cha cahnu ca chi yo. Soco sutu cha iyó vityin ña tyanaha Nyoo quivi tyiso ra chi ra. Vatyí nu tutu Nyoo catyí chi tyehe caa:

Sutu Mañi yo, ñin ri tuhun cahan ra, ta ma nasama ra cuhva catyí ra tyehe caa:

“Yoho cuvún Sutu tyicuan ri maa, tari cuví ra Melquisedec”, catyí Nyoo.

²² Yucuan chaha ra Jesús chaha ra noo tuhun vaha ca chi yo, ta ñima ca tuhun cha xihna ri cuan. ²³ Vatyí cha cuaha xaan ra cacuví sutu, soco chaa chaa ri tuhun chihí chi ra. ²⁴ Soco ra Jesús ñahri tuhun chihi iyó chi ra, ta ña ndihi tuhun cha cuví ra sutu. ²⁵ Yucuan chaha tyicuan ri maa cuví sacacu ra añima ñu natuhvá chi Nyoo cha cuenda ra, vatyí iyó maa ra tyicuan ri maa, vatyí cacan tahvi ra chi Nyoo cha cuenda ñu.

²⁶ Yucuan chaha ra Jesús cuví sutu cha chiñuhú chi yo. Ta maa ra, ii ra, ñahri cha quiñi caa sacuví ra, ta ni ñahri cuatyí ra. Ta ña cutahán ra chihin ñu iyó cuatyí. Ta sucun ca nyaá ra, ican saha andivi. ²⁷ Ñima tari inga ra cacuví tata sutu cuan, vatyí cuñi chi cha cacahñi ra chi quiti ta cuhva cuenda ra chi Nyoo ndi quivi. Ta cha xihna ri, na naa cuatyí maa ra, ta yaha cuan ta naa cuatyí ñáyivi. Soco ra Jesús noo ri chaha, chaha cuenda ra chi ra chi Nyoo na naa cuatyí tandihi yo. ²⁸ Ley Nyoo cha quehen cuenda ra Moisés, tyisó chi chi ra cacuví nuu chi tata sutu, soco ra iyó cuatyí cacuví ra. Soco yaha cuan ta chaha Nyoo noo tuhun chaa, ta ñin ri tuhun cahan ra. Ta tyiso ra chi

Sehe ra cha cuví ra Sutu cahnu ca, ta maa ra cuví ra noo ra vaha tyicuan ri maa.

8

Natyihí tahan Nyoo tuhun chaa chihin yo quiví chihí ra Jesús cha cuendayo

¹ Ta chichi cha tandihí cha cahín nu tutu ihya, ican ihya cuví cha niñi ca tuhun: Ra cuví tata sutu cahnu chi yo cuví ra noo ra vaha tyicuan ri maa, ta chicunyaḗ ra nu tyayu chichi gloria chiyo vaha Nyoo. ² Ta cuví ra Sutu noo nu cuví vehe ñuhu cha ndicha vaha nu nyaá Nyoo. Maa Sutu yo Nyoo savaha vehe cuan, ta ñima rayii. ³ Tandihí ra cacuví tata sutu tyiso Nyoo chi ra, vatyí cuhva cuenda ra ofrenda chi Nyoo ta cahñi ra quití na naa cuatyí ñáyiví chihin niñi ti. Ta yucuan chaha niñi cuñí chi cuhva cuenda tucu ra Jesucristo niñi ra chi Nyoo. ⁴ Tyehe ta siqui ñuhu ñayiví nyaá ra cuví ra sutu, ni ñima sutu cuví ra tatu tyicuan caa. Vatyí siqui ñuhu ñayiví, iyó ca ra cacuví sutu cha cachahá cuenda ofrenda chi Nyoo tari cuhva catyí ley cha tyaḗ ra Moisés. ⁵ Soco ra cacuví sutu siqui ñuhu ñayiví, sacuví ra tyiño nuu Nyoo soco tari cuhva cuví andiví. Cuví chi noo xiñahñu tyiño sahá ra Cristo. Ta chitó yo vatyí tyicuan caa, vatyí quiví cha cua savaha ra Moisés vehe ñuhu cuan ta cha naha, Nyoo catyí ra chi ra tyehe caa: “Saha vaha cuenda, ta savahun tari cuhva caá cha sañahi chuun quiví chinyaun nu yucu cuan”, catyí Nyoo chi ra. ⁶ Soco ra Cristo ra cuví sutu cahnu chi yo, vaha ca cuhva sacuví ra, vatyí cha cuenda maa ra, natyihí tahan Nyoo noo tuhun vaha xaan ca chihin yo, vatyí vaha ca cha cucuhva ra chi yo.

⁷ Vatyí tyehe ta cuví cacu añima yo chihin tuhun xihna ri cha natyihí tahan Nyoo chihin yo, ña chiñuhú ca cha natyihí tahan chaa ra tuhun chihin yo cha cu uvi chaha. ⁸ Soco Nyoo nyehe ra vatyí ña vaha maa sacuví ñáyiví cuan, ta cahán ra tuhun ñu nu tutu ra tyehe caa:

Cuchaa chi quiví vatyí cunatyihí tahin tuhun chaa chihin ñáyiví Israel ta ñu Judá, catyí Sutu Mañi yo.

⁹ Ñima tari natyihí tahin tuhun chihin ñáyiví chahnu ñu, quiví tñin ndaha ñu ta tave chi ñu ñuu Egipto.

Vatyí ña sacuví ñu tuhun cha natyihí tahin chihin ñu, ta yucuan chaha sañe chi ñu, catyí Sutu yo Nyoo.

¹⁰ Tuhun cha cunatyihí tahin chihin ñu ñuu Israel nu cuahan ca chi, tyehe caa cucuvi, catyí Sutu Mañi yo:

Chichi cha chiñi tuñi xiñi ñu, cutyai ley mai, ta chichi añima ñu cutyai.

Tyicuan ta mai cucuvi Nyoo ñu, ta maa ñu cucuvi ñu ñáyiví chii.

¹¹ Tyicuan ta ña niñi ca cha sañahá ñu chi tahan ñu, ni chi yañi ñu, tacuhva vatyí cohon nuu ñu chi yuhu cha cuví Nyoo ñu.

Vatyí tandihí ñu, cucohon nuu ñu chii, nyacua nya ñu luhlu ca ta nyacua nya ñu chahnu ca.

¹² Ta cusahi ticahnu iñi cha quiñi caa cha sacuví ñu.

Ta ma nicohon ca maa iñi cuatyí ñu, catyí Sutu Mañi yo.

¹³ Quiví cha cahán Nyoo tuhun cha natyihí chaa ra tuhun chihin yo, cuñí chi catyí vatyí cha sacuchahnu ra cha xihna ri cuan. Ta numi ri cundihi tuhun cha cuví cha chahnu cuan.

9

Nu sañahá chi yoso caa vehe ñuhu cha iyó siqui ñuhu ñayiví ta vehe ñuhu nu cuví andiví

¹ Quiví natyihí tahan Nyoo tuhun cha xihna ri chihin ñáyiví, chaha ra cuhva chi ñu yoso caa sacahnu ñu chi ra, soco chichi noo vehe ñuhu cha nyaá siqui ñuhu ñayiví ihya. ² Tyehe caa chingo vehe ñuhu cuan: Chata noo cortina nyaá quartu cha xihna ri nu tayucú cañileru, ta nanyaá mesa nu catuví pan ii. Ta chicunañi quartu cuan Nu Ii. ³ Chata cortina cu uvi, yucuan cuví nu chicunañi Nu Ii Xaan

Ca. ⁴ Ta yucuan nanyaá noo arta xuhun cuaan nu chahm̄i ra cutu. Ta nanyaá caja, cha natyih̄i tahan Nyoo tuhun chihin yo, ta iñi xuhun cuaan nicacahnu. Ta chichi cuan ñoh̄o casitu xuhun cuaan cha ñoh̄o maná. Ta ñoh̄o yutun cha natyac̄u cha chindah̄a ra Aarón. Ta ñoh̄o tucu yuu cha nyaá ndi uchi mandamientu. ⁵ Ta siqui caja cuan nyicú cha tari caa ángel, ta cuñi chi catyí vatyí nyaá Nyoo yucuan. Ta chihin ndichin ángel cuan cachasí ra nu cuví nu tuhva Nyoo saha ra ticahnu iñi cuatyí ñáyiv̄i. Cha vityin ña cuví nacatyí ca ndi siqui tuhun ihya.

⁶ Ta tyicuan caa cuví vehe ñuhu cuan. Ta ndiquiv̄i ri caquihv̄i ra cacuví sutu chichi cuarto cha xihna ri nu nañi Nu Ii, tacuhva sacahnu ra chi Nyoo. ⁷ Soco cuarto cu uvi Nu Ii Xaan Ca cuan iyó maa minoo ra cuví nuu chi sutu, ta yucuan ra cuví quihv̄i yucuan, noo chaha cha noo cuiya. Ta cuhva cha quihv̄i ra, cuñi chi cuiso ra ñiñi quit̄i vatyí cuhva cuenda ra chi Nyoo cha cuenda cuatyí maa ra ta cuatyí ñáyiv̄i. ⁸ Ta cha tyicuan caa sañahá Tatyí Ii Nyoo chi yo vatyí, ta cuví ca chaa yo nuu Nyoo vatyí ni nyaá ca cuarto cha xihna ri cuan. ⁹ Tandih̄i maa ihya cuví chi tari noo xiñah̄nu ri cha cuenda tuhun chaa cha chac̄un Nyoo vityin: vatyí noo cha chah̄a cuenda ñu chi Nyoo ña tyiñyeē chi chi ñu na caca vaha iñi ñu. ¹⁰ Vatyí tandih̄i cuhva sacuví ra cacuví sutu cuan cahán chi maa ri cuenda ñáá cha cuví cachi ñáyiv̄i, ta ñáá cha cuví coho ñu, ta yoso caa cundund̄i coño ñuhu ri ñu. Ta catuví cuhva cuan, nyat̄u chi nya quiv̄i cacun Nyoo inga cuhva vaha ca.

¹¹ Soco vityin cha yah̄a quich̄i ra Cristo ta maa ra cuví tata sutu cahnu cha cuenda tuhun vaha ca cha chac̄un Nyoo. Quihv̄i ra chichi vehe ñuhu vaha ca, ta ndi ca, vatyí maa ra cuví sutu. Ta ñima raȳi savah̄a vehe ñuhu cuan o cuñi chi catyí, ñima vehe ñuhu ñuhu ñáyiv̄i ihya cuví. ¹² Ra Cristo quihv̄i ra vehe ñuhu nu cuví

gloria Nu Ii Xaan Ca. Soco ñima ca cha cuhva cuenda ra ñiñi mbee luhlu, o becerro, soco ñiñi maa ra chah̄a cuenda ra. Ta tyicuan caa quihv̄i ra noo ri chaha nu ndih̄i tuhun, ta tyicuan caa ta cuví sacacu ra chi yo tyicuan ri maa. ¹³ Niñi toro, ta ñiñi ndixihyu, ta ñiyaa becerro cha cachahm̄i ra nu arta, tuhva ra catyic̄u ra chata ñu ca iyó cuatyí, ta coño ñuhu ri ñu sandund̄i chi cuan nuu Nyoo. ¹⁴ Ta tatu tyicuan caa, ¡Ñana cha cahnu ca tunyee iñi iyó chi ñiñi ra Cristo! Vatyí tyinyeē Tatyí Ii chi ra ta chah̄a cuenda ra chi ra chi Nyoo chihin cha ñahri cuatyí ra. Ta ñiñi ra sandachí chi cha ña vaha cha caá añaima yo tacuhva ma cuita ca iñi yo ley cha chah̄a tuhun chih̄i chi yo, ta tyicuan caa ta cuví sacuvi yo tyiño nuu ra cuví Nyoo nyitó.

¹⁵ Yucuan chaha ra Jesucristo cuví ra cha cahán chaha yo cha cuenda tuhun chaa cha natyih̄i tahan Nyoo chihin yo. Ta cha cuenda cha chih̄i ra, iyó ticahnu iñi cuatyí cha sacuví yo quiv̄i chinyaca ñaha tuhun cha xihna ri cuan chi yo. Ta yoó, ñu nacana Nyoo chi cuví yo, cuví naquehen cuenda yo noo cha ma ndih̄i ca maa, cha catyí maa ra tyi cuhva ra chi yo. ¹⁶ Vatyí tatu iyó noo tutu cha sandoo noo ra chih̄i, ta catyí tutu cuan ñáá ndih̄i cha cuñi ñáyiv̄i chi ra tatu chih̄i ra; cuñi chi cha coto vaha ra cuví tyiño tatu ndicha cha chih̄i ra cha sandoo tutu cuan; tyicuan ta cuví sacaca ra tyiño cuan ta nasacha ra cha tahán chi chi ñu cuan. ¹⁷ Vatyí cha niri ca cha iyó ra cha sandoo tutu cuan, ma cuví cundaa tyiño cha quehen cuenda ñu cha tahán chi chi ñu, soco nya cúvi ra, tyicuan ta cuví quehen cuenda ñu. ¹⁸ Yucuan chaha chih̄i quit̄i ta chat̄i ñiñi ti quiv̄i natyih̄i tahan Nyoo tuhun cha xihna ri cuan chihin yo. ¹⁹ Quiv̄i cuan, ra Moisés sacoto ra tandih̄i ley Nyoo chi tandih̄i ñáyiv̄i. Yah̄a cuan ta quehen ra noo sahma cuaha cha chino chihin ixi mbee ta chihin noo soco yutun cha nañi hisopo, satyí ra nu ñiñi becerro

ta nu ñiñi ndixihyu luhlu, nasaca ra chihin ndutya, ta tyicu ra chata libru ley Nyoo ta chata tandihí ñáyivi ñandihí. ²⁰ Tyicuan ta quichaha catyí ra chi ñu: “Ican ihya cuví ñiñi cha cuví cha ndaa vatyi natyihí tahan Nyoo tuhun chihin ndo”, catyí ra. ²¹ Ta suri tyicu tucu ra Moisés ñiñi nu cuví vehe ñuhu cuan, ta siqui tandihí cha cachotyíño ra yucuan nu casacahnú ra chi Nyoo. ²² Tyicuan caa sacuvi ra vatyi catyí ley Nyoo tyi tandihí ta chihin ñiñi, cuñí chi ndundi nu Nyoo. Ta catyí tucu chi vatyi ma saha Nyoo tichahnu iñi cuatyí tatu ma cati ñiñi.

Ñiñi ra Cristo, ican cuan tinyaa cuatyí yo

²³ Ta yucuan chaha cuñi chi cha sacuvi tata sutu tyicuan caa, vatyi ndundi tandihí cuan, vatyi cuví chi noo xiñahñu cha iyó ityi andivi. Soco tandihí cha cuenda ityi andivi, cuñi chi noo ñiñi vaha ca cha cuhva cuenda yo, ta ñima ca tari ñiñi quití cuan. Cuñi chi ñiñi ra Cristo. ²⁴ Vatyi ra Cristo ña quihvi ra chichi noo vehe ñuhu cha savaha ñáyivi cha cuví xiñahñu ri. Soco quihvi ra chichi vehe ñuhu cha ndicha vaha cha cuví gloria. Ta vityin cahán ra chaha yo nuu Nyoo. ²⁵ Ra cuví nuu chi sutu cuenda ñu Israel quihvi ra Nu Ii Xaan Ca cuan tahan cuiya vatyi cuhva cuenda ra ñiñi cha ñima ñiñi ra cuví. Soco ra Cristo, ña cuaha chaha cuñi chi cuhva cuenda ra chi ra. ²⁶ Vatyi tyehe ta tyicuan caa, cuaha chaha cuñi chi cha nyehe ra tindoho ta cúvi ra nyata chinq ñuhu ñáyivi ta nya vityin. Soco vityin cha cua cuyatyin cundihi tuhun ñáyivi, noo ri chaha quichí ra Cristo, ta chaha cuenda ra chi maa ra tacuhva vatyi cuví tinyaa ra cuatyí yo. ²⁷ Noo ri chaha, cúvi yo ta yaha cuan ta cucutuñi chi yo. ²⁸ Ta tyicuan caa tucu ra Cristo, noo ri chaha, chaha cuenda ra chi ra tacuhva tinyaa ra cuatyí cuaha xaan ñáyivi. Yaha cuan ta cuquichi ra cha cu uvi chaha, ñima ca cha quichi tinyaa ra cuatyí, soco cha quichi sacacu ra chi ñu cha nyatú chi ra.

10

¹ Vatyi ley Nyoo cha tyaa ra Moisés, cuví chi tari noo xiñahñu ri, cha cuenda cha vaha ca cha cuquichi. Soco ñima maa cha ndicha vaha cuví. Vatyi ley cuan, ma cuví maa sanduvaha chi chi ñu nanducú chi Nyoo. Vatyi tahan cuiya ri chahá cuenda ra cuví nuu chi tata sutu cuenda ley chahnu ñiñi quití. Soco ma cuví cacu aña yo chihin cuan. ² Vatyi tyehe ta cuví sanduvaha ley cuan chi ñu, cundihi tuhun cha chahá cuenda ra ñiñi ndicuiya ri. Vatyi tatu cha ndundi ñu noo chaha cha cuenda tandihí maa, ma caca ca xiñi ñu vatyi iyó cuatyí ñu ta ña chiñuhú ca cha cuhva cuenda ra inga chaha. ³ Soco tahan cuiya ri chahá cuenda ra ñiñi, ta ican cuan sanicohón chi iñi ñu vatyi iyó cuatyí ñu. ⁴ Vatyi ñiñi toro ta ñiñi ndixihyu, ma cuví maa tinyaa chi cuatyí yo.

⁵ Yucuan chaha ra Cristo, quivi cuaquichi ra siqui ñuhu ñáyivi ihya, catyí ra chi Nyoo tyehe caa:

Ña cuñún cha cahñi ñáyivi quití ta cuhva cuenda ñu chuun, yucuan chaha savahun noo coño ñuhu chii.

(Vatyi tyicuan caa ta cuví cuhva cuende chii chuun.)

⁶ Ta vatyi ña tahán iñun cha cahmi ñu quití ta cuhva cuenda ñu chuun cha cuenda cha tinyaa cuatyí ñu.

⁷ Catyí yuhu: “Ma yuhu, vachi ihya vatyi sacuvi cuhva cuñún, Nyoo Suti,

tari cuhva cahán chi tuhun nu libru ley maun”, catyí ra Jesucristo.

⁸ Cha xihna ri, catyí ra Jesucristo vatyi Nyoo, ña cuñi ra cha cuhva cuenda ñu chi quití chi ra. Ni cha cahmi ñu quití cha cuenda cha tinyaa cuatyí ñu, ña cuñi Nyoo, catyí ra. Vasi maa ri tuhun cha catyí ley chahnu vatyi sacuvi yo cuví, soco ña tahán iñi Nyoo, catyí ra. ⁹ Ta yaha cuan ta catyí tucu ra: “Ma yuhu vachi ihya, vatyi sacuvi cuhva cuñún, Nyoo Suti.” O cuñi chi catyí, sacuachiyó

Nyoo cuhva chahnu cuan, ta nacuvi chi inga cuhva chaa ihya. ¹⁰ Nyoo sandund_hi ra chi yo vaty ra Jesucristo sacuvi ra cuhva cuñi Sutu ra, ta chaha cuenda ra coño ñuhu ra. Noo ri chaha chih_i ra ta ndih_i tyiño saha ra.

¹¹ Tandih_i ra cacuví tata sutu ñuu Israel, ndi quivi sacuvi ra tyiño nuu Nyoo, ta tyicuan ri chaha cuenda ra suri maa cha tuhvá maa ra chahá cuenda chi Nyoo, vasi ña cuv_i tinyaa chi cuaty_i yo. ¹² Soco ra Jesucristo, noo ri chaha chaha cuenda ra chi ra chi Nyoo cha cuenda cuaty_i yo. Tyicuan ta chicunya_a ra tyayu gloria chiyo ndaha vaha Nyoo. ¹³ Ta yucuan nyatú ra nyacua nya cacun Nyoo chi ra xaan iñi chi ra chaha ra. ¹⁴ Vaty_i chihin noo ri chaha cha chih_i ra Cristo ta cuv_i sanduvaha ra ñima ñáy_ivi cuenda Nyoo, tyicuan ri maa. ¹⁵ Ta suri tyicuan caa caty_i tucu Taty_i Ii Nyoo chi yo. Vaty_i cha xihna ri caty_i ra chi yo nu tutu tuhun Nyoo tyehe caa:

¹⁶ Tuhun cha cunaty_ihi tahin chihin ñu quivi cuan, tyehe caa cucuvi, caty_i Sutu Mañi yo:

Cutyai ley mai chichi ñima ñu, ta cutyai chichi cha chiñi tuñi xiñi ñu, caty_i Nyoo.

¹⁷ Ta yaha cuan ta caty_i tucu ra: Ma nichon ca maa iñi cuaty_i ñu, niri cha quiñi caa cha chinyacuv_i ñu, caty_i Sutu Mañi yo.

¹⁸ Ta cha yaha saha Nyoo ticahnu iñi cuaty_i, ña cuñi ca chi cha cahñi ñáy_ivi chi quiñi, ta cuhva cuenda ñu chi Nyoo cha cuenda cuaty_i ñu.

Cuñi chi nanducu yo chi Nyoo

¹⁹ Yucuan chaha yañi, cuv_i quihvi maa yo Nu Ii Xaan Ca cuan nu nyaá Nyoo, cha cuenda vaty_i cha chat_i niñi ra Jesucristo ta tinyaa ra cuaty_i yo. ²⁰ Cha nuña ra Cristo noo ityi chaa, ityi cuhun yo nu conyito ñima yo. Vaty_i maa maa cuhva cha chih_i ra ta ndata cortina cha chasi nu chinyaa Nyoo. Cha tahnya cortina, ican cuv_i cha chih_i ra, tacuhva nuña ityi quihvi yo ta chaa yo nu nyaá Nyoo. ²¹ Ra Jesús cuv_i sutu cha nyacá ñaha nu

cuv_i vehe Nyoo and_ivi. ²² Yucuan chaha cuñi chi nanducu yo chi Nyoo chihin noo cha ndicha ta chihin cha ñi iñi yo chinó iñi yo chi ra, vaty_i maa ra sandund_hi ra ñima yo, tacuhva ma quih_i ca iñi yo vaty_i iyó cuaty_i yo, vaty_i tari cha nacatya ra coño ñuhu yo chihin ndutya cuii, na ndu nd_hi yo nu Nyoo. ²³ Na cun_hi ca iñi yo chino iñi yo chi Nyoo ta ma ndu uvi iñi yo vaty_i Nyoo cuhva ra cha caty_i ra vaty_i cuhva ra chi yo. ²⁴ Ta cuñi chi nanducu yo cuhva tyinyee yo chi tahan yo, na cuñi ca ñu chi tahan ñu ta sacuvi ca ñu cha vaha. ²⁵ Ña tahán chi quehen yo cuhva caá ñu cha sandih_i cha quichi nu ndu ñn ri yo, soco cuñi chi cha sandun_hi yo iñi noo noo tahan yo. Ta yaha ca cuhva cuñi chi tyinyee yo chi tahan yo vityin cha nyehé yo vaty_i Sutu Mañi yo cha cuñi chaa quivi quichi ra ta cucutuñi chi tandih_i ñáy_ivi.

²⁶ Vaty_i tatu cha yaha chicohon nuu yo cha ndicha, ta ña quichahá yo ta tyicuan ri sacuvi ca yo cuaty_i, ñahri ca cuhva coo ticahnu iñi cuaty_i yo.

²⁷ Ta cutachi tuñi Nyoo chi yo. Ta cuty_ihi ra chi yo nu cucayu ñáy_ivi cha xaan iñi chi ra, ta cundih_i tuhun ñu.

²⁸ Tatu noo ñáy_ivi Israel ña quichaha ñu cuhva caty_i ley ra Moisés, ta chiyo uvi o uñi testigu, cúvi ñu cuan cha cuenda cuaty_i ñu, ta yori cundahvi cuñi nyehe chi ñu. ²⁹ Ta nyaca cuv_i ñu cha ña quichaha ca chi Sehe Nyoo ta sahá ñu tyi niñi ra cha sanduvaha ñima ñu cha ñima ri tuhun cuv_i. Ta chihin niñi cuan natyih_i tahan Nyoo tuhun chihin yo. Soco cahán ña vaha ñu siqui Taty_i Ii Nyoo cha chahá tumañi iñi chi yo. Yaha ca cuhva cutachi tuñi Nyoo chi ñu cuan. ³⁰ Vaty_i chitó yo vaty_i Sutu Mañi yo, ican ra caty_i ra tyehe caa: “Yuhu tahán chi tachi tuñi chi ñáy_ivi, yuhu caty_i cha cuvi chi ñu.” Ta caty_i tucu ra vaty_i cutuñi chi ñu nuu ra. ³¹ Ndicha cha iyó Nyoo, ta yucuan chaha tahán chi cuyuhvi yo chi ra, coto tachi tuñi ra chi yo cha cuenda cuaty_i yo.

³² Soco ma naa iñi ndo quivi nat_hin

cuenda ndo cha ndichin Nyoo chichi añima ndo, vatyí quiví cuan cunyeé xaan iñi ndo cha nyehe ndo tindoho cha cuenda ra. ³³ Yihí nyoho cahan ñáyiví chi ndo, ta sanyehe ñu tindoho chi ndo nu tuvi. Ta yihí nyoho uhvi xaan cuví chi ndo cha nyehe ndo cha cuví chi tahan ndo cha tyicuan caa, ta cunyeé xaan ndo. ³⁴ Ta cundahví iñi ndo chi ñu ñoho vehe caa, ta chihin cha sii cuñí ndo cunyeé ndo quiví tinyaa ñu cha iyó chi ndo, vatyí chitó ndo vatyí andiví iyó ca cha vaha ca cha cuenda ndo, ta ña ndihí maa cuan. ³⁵ Yucuan chaha ma sandihí ndo cha quihí iñi ndo chi ra Cristo, vatyí nu cuahan ca chi ta cuñihi ndo cha vaha ca vatyí chinó iñi ndo. ³⁶ Cuñí chi cha coo cha cama iñi ndo tacuhva cuví sacuvi ndo cuhva cuñí Nyoo, ta tyicuan caa ta naquehen ndo cha catyí ra tyí cuhva ra. ³⁷ Vatyí nu tutu Nyoo catyí chi tyehe caa: Ña naha ca ta cuquichi ra cha tahán chi quichi, ta ma cucuee ca ra. ³⁸ Ta catyí Sutu Mañi yo tyehe caa: “Ñu cha sanduvahí añima, chihin cha chinó ri iñi ñu chi yuhu, ta conyito añima ñu. Soco tatu cunuhu chata ñu, ma cusii cuñi yuhu chihin ñu”, catyí Nyoo. ³⁹ Soco maa yo ña sacuví yo tari sacuví ñu cuanaá añima, vatyí ñu chinó iñi chi Nyoo cuví yo, ta tyicuan caa cucacu añima yo.

11

Cuhva cuñí chi cha chinó iñi yo chi Nyoo

¹ Cha chinó iñi yo chi Nyoo ican cuví cha chitó vaha yo tyí cuñihi yo cha nyatú yo, ta chitó vaha yo vatyí noo cha ndicha vaha cha ña nyehé yo vityin, cuñihi yo vatyí chinó iñi yo chi Nyoo. ² Ñáyiví chiyo ta cha naha, chingo iñi ñu chi Nyoo, ta yucuan chaha quitá vaha ñu nuu ra.

³ Cha cuenda cha chinó iñi yo chi Nyoo, ta chitó yo vatyí savaha ra ñuhu ñáyiví chihin tuhun cahán ra. Ta chitó

yo vatyí tandihí cha nyehé yo vityin, chingo chi ta cha naha chihin cha ña tuhva yo nyehé.

⁴ Cha cuenda cha chingo iñi ra Abel chi Nyoo, ta chaha cuenda ra noo cha chaha ra chi Nyoo. Ta vaha ca cha chaha ra ta ñima ca cha chaha ra Caín, yañi ra. Ta yucuan chaha natiiñ cuenda Nyoo chi ra tari noo ra vaha, ta natiiñ cuenda ra cha chaha ra. Yucuan chaha vasi cha chihí ra Abel, soco tari quiví cahán ca ra tuhun chihin yo vityin, yoso caa tahán chi chino iñi yo chi Nyoo.

⁵ Cha cuenda cha chingo xaan iñi ra Enoc chi Nyoo, ta cuanuhu ra chihin Nyoo chihin cha ña chihí ra. Ta ña nañihí ca ñu chi ra, vatyí naquehen Nyoo chi ra. Ta nu tutu Nyoo, catyí chi vatyí cha ni cumañi ca naquehen Nyoo chi ra Enoc, sacuví ra maa ri maa cuhva tahán iñi Nyoo, yucuan chaha naquehen ra chi ra. ⁶ Soco ma cuví sacuvi yo cha tahán iñi Nyoo tatu ña chinó iñi yo chi ra. Vatyí tatu cuñí yo nanducu yo chi ra, cuñí chi cha chinó iñi yo tyí iyó ra. Ta cuñí tucu chi chinó iñi yo vatyí cucuhva ra cha vaha chi ñu nanducú chi ra.

⁷ Cha cuenda cha chingo iñi ra Noé chi Nyoo, ta quichaha ra tuhun cahan Nyoo, cha catyí Nyoo chi ra noo cha cucuvi ityi nuu ca. Ta vasi tañaha ca nyehe ra soco cha cuenda cha chinó iñi ra chi Nyoo, ta savaha ra barcu cuan ta sacacú ra chi ñáyiví chi ra. Ta cha cuenda cha chingo iñi ra chi Nyoo, sandoo ra cuatyí ñu siqui ñu cha ña quichahá chi Nyoo, na tachi tuñi ra chi ñu. Ta cha cuenda cha chingo iñi ra Noé chi Nyoo cuvaha ra nuu ra.

⁸ Ta cha cuenda cha chingo iñi ra Abraham chi Nyoo, ta quichaha ra chi ra quiví cana ra chi ra. Yucuan chaha quitá ra ñuu ra ta cuahan ra nu cucuhva Nyoo ñuhú cha cundoo chi ra. Quitá ra ñuu ra chihin cha ña chitó ra nya cuahan ra. ⁹ Cha cuenda cha chinó iñi ra Abraham, yucuan chaha chiyo ra nu ñuhú cha ta cuhva ca Nyoo chi ra. Chiyo ra noo vehe sahmarí, ta suri tyicuan caa tucu ra Isaac,

sehe ra, ta ra Jacob, sehe ñañi ra. Vatyí suri catyí tucu Nyoo chi ninduvi ra cuan tyi cucuhva ra ñuhú cuan chi ra. ¹⁰ Vatyí ra Abraham nyatú maa ra noo ñuu vaha ca cha cucuhva Nyoo chi ra, ta maa Nyoo chacun cuhva ñuu cuan ta maa ra savaha ra, ta chicha cimientu tyihi ra chaha.

¹¹ Ta suri chinqo ñi tucu cu Sara cha catyí Nyoo chí ña cha cucoo sehe ña. Ta vasi cha chahnu xaan ña, soco chaha Nyoo fuerza ra chi ña, ta chicoo sehe ña. Tyicuan caa cuví vatyí chinqo ñi cu Sara cha catyí Nyoo chi ña. ¹² Yucuan chaha vasi cha nyaña quivi cha cúvi ra Abraham, soco chicoo sehe ra. Ta yaha cuan cuaha xaan ñáyivi cacu cha cuví ñu tata ra. Tari cha cuaha tiñoo andivi, ta tari cha cuaha niyiti yuhu tyañuhu, vatyí ña cuví nacahvi yo.

¹³ Tandihí ñu cuan cachihí ñu cha ni cumañi ca naquehen cuenda ñu cha catyí Nyoo tyi cuhva ra chi ñu. Soco vasi ta naquehen cuenda ca ñu ta chihí ñu soco nyehe cachi vaha ñu chihin cha chinó ñi ñu. Ta sñi xaan cuñí ñu. Ta chihin cuan cutuñí ñi ñu ta cahán ñu tuhun vatyí noo ñu yahá ri siqui ñuhu ñáyivi ihya cuví ñu. ¹⁴ Vatyí ñu cacahán tyehe caa, cuñí chi catyí vatyí ni nanducú ñu noo nu coo ñu. ¹⁵ Tyehe ta chicá ca xiñi ñu ñuu nu quita ñu, totyehe cuví cunuhu ñu nyicuan. ¹⁶ Soco vatyí cuñí ñu noo ñuu vaha ca, o cuñí chi catyí nya gloria, yucuan chaha Nyoo ña cucahan nuu ra cha cuví ra Nyoo ñu. Vatyí cumí ra noo ñuu nu cuví coo ñu.

¹⁷ Ta cha cuenda cha chinqo ñi ra Abraham chi Nyoo, yucuan cuenda quichaha ra nu cahan Nyoo ta tyaá ra cuhva cha cahñi ra chi sehe mañi ra ra Isaac, quivi nducu nyehe Nyoo chi ra tu ndicha cha chinó ñi ra, vasi suri maa Nyoo catyí ra ¹⁸ vatyí cuaha xaan ñáyivi cucuvi tata ra chihin ra Isaac cuan. ¹⁹ Soco ña yuhvi ra Abraham cuacuhva cuenda ra sehe ra chi Nyoo, vatyí chitó ra vatyí Nyoo, iyó tunyee ñi chi ra nyacua nya cha sanandotó ra ndiyi. Ta tari quivi sanandotó Nyoo chi sehe ra, vatyí cha nyaá cha cua

cahñi ra chi ra, ta nacuhva Nyoo chi sehe ra chi ra inga chaha.

²⁰ Ta ra Isaac chinqo tucu ñi ra chi Nyoo. Ta yucuan chaha catyí ra vatyí sehe ra, ra Jacob ta ra Esaú, cuñihi ra cha vaha nu cuahan ca chi. ²¹ Ta ra Jacob chinqo ñi ra chi Nyoo, cuhva cha cua cúvi ra. Ta catyí ra vatyí tahan tahan sehe ñañi ra, sehe ra José, cuñihi ra cha vaha. Ta sacahnu ra chi Nyoo nu nanyaá ra chihin yutun cha tuví ra. ²² Ta ra José ñandihí, chinqo ñi ra chi Nyoo, ta catyí ra, cuhva cha cua cúvi ra, vatyí ñu Israel, ñáyivi chi ra, cu quita coyo ñu ñuu Egipto cuan nu cuahan ca chi. Ta sandoo ra tyiño chi ñu, vatyí na naquehen ñu yiqui ra quivi quita ñu ñuu cuan.

²³ Cha cuenda cha chinqo ñi sutu ra Moisés ta sihi ra chi Nyoo, yucuan chaha quivi cacu ra, nyehe ñu tyi noo cha lee tyaqui xaan cuví ra. Ta yihí ñi ñu cha cusacacu Nyoo chi ra ta ma cúvi ra, vasi catyí rey cuan vatyí cúvi ndii ra cuatyaa. Ta ña yuhvi ñu ta tixehe ñu chi cue uñi yoo. ²⁴ Ta ra Moisés tucu, chinqo ñi ra chi Nyoo. Ta quivi cha chahnu ra, ña cuñi ca ra cha cuví sihi ra chi ñaha sehe rey ñuu Egipto cuan. ²⁵ Ta ni ña cuñí ra ndoo ra ñuu Egipto cuan vatyí cusii ñi ra o cunyacuvi ra cha quiñi caa. Vatyí chitó ra tyi tuhun ñn yaha ri cuví cuan. Soco vaha taxin ca cuñí ra nyehe ra tindoho chihin ñáyivi cuenda Nyoo. ²⁶ Ra Moisés, vaha ca cuñí ra cha nyehe ra ticahan nuu cuenda ra Cristo vatyí cahnu ca cha tyayii cuví cuan chi maa ra ta ñima ca tandihí cha tyayii cha iyó ñuu Egipto. Vatyí chitó ra tyi cua cuhva Nyoo cha vaha chi ra. ²⁷ Ta cha cuenda cha chinqo ñi ra Moisés chi Nyoo, ta quita ra ñuu Egipto, ta ña yuhvi ra cha cuxaán rey cuan. Ta sanyee xaan ra ñi ra. Tari cha vatyí nyehe ra chi Nyoo cha ña nyehé yo.

²⁸ Cha cuenda cha chinqo ñi ra Moisés chi Nyoo ta sanducahnu ra vico cha cahñi ñu noo mbee luhlu, ta tachí ra nacahyu ñu niñi ti yuvehe ñu, tacuhva vatyí ma cahñi ángel Nyoo

chi ni noo sehe nuu ñu Israel. ²⁹ Ta cha cuenda cha chingo iñi ñu Israel chi Nyoo ta yaha sava ñu Tyañuhu Cuaha, tari cha yaha ñu noo ñuhú ityi. Ta cuhva cha cacuñi tucu ra Egipto cayaha ra, ña cuví yaha ra vatyí nacasi Nyoo tyañuhu cuan siqui ra ta cachihí ra chichi ndutya cuan.

³⁰ Ta cha cuenda cha chingo iñi ñu Israel chi Nyoo, ta chico ñu ucha tahan chaha chata ñuu Jericó, ta tandihí cuí maa nu sama chata ñuu cuan canacojo. ³¹ Ta cha cuenda cha chingo iñi cu Rahab, ñaha cata iñi cuan, chí Nyoo, ta ña chihí ña ñin ri chihin ñu ñuu ña, ñu ña quichaha chi Nyoo, vatyí maa ña, tyinyee vaha ña chi ra Israel, ra chahan coyo chinyehe tatu cuví chasaha ra tinyaa ra ñuu ña chi ra nyacá ñaha ñuu cuan.

³² ¿Ñáá ca cha cuví catyi vityin? Cuaha xaan cuhva cucuñi chí chii tatu cahín tuhun ra Gedeón, ra Barac, tuhun ra Sansón, ra Jefté, ta tuhun ra David, ta ra Samuel ta tuhun ra cacuví profeta Nyoo ta cha naha.

³³ Cha cuenda cha cachingo iñi ra chí Nyoo, ta yihí ra saha ganaa ra chí inga ñuu nahnu. Ta yihí ra vaha xaan chinyaca ñaha ra ñáyivi cuenda Nyoo. Yihí ra ñihí ra cha catyi Nyoo tyi cuhva ra chí ra. Yihí ra chasi ra yuhu ndícaha. ³⁴ Yihí ra ña cayu ra chihin ñuhú chichi horno nu catyihí ra chí ra. Yihí ra cacu ra cha cahñi ñáyivi chí ra chihin mityi. Yihí ra cha ñahri fuerza chí ra, soco candunyeer ra, ta chiyo xaan fuerza chí ra chichi cuatyí cuan, ta cuví chasaha ra chí sindaro cuenda ñu xaan iñi chí ra. ³⁵ Ta chicoo suhva ñusihí, nandoto ñáyivi chí ñu.

Ta inga ñáyivi chihí ñu chihin cha cuaha xaan tindocho sanyehe ñáyivi chí ñu, soco ña sandoo ñu chí Nyoo vasi chihí ñu cha catyi ra, vatyí chitó ñu, vatyí tatu ma sandihí ñu cha chinó iñi ñu chí Nyoo, cunandoto ñu ta cucoo ñu noo ñáyivi vaha xaan ca. ³⁶ Ta inga ñu nyehe ñu tindocho cha cahán nyaa ñáyivi chí ñu ta cañi ñu chí ñu. Ta inga ñu chinuhñi ñu chihin cadena

ta cuahan ñu vehe caa. ³⁷ Yihí ñu chihin yuu chahñi ñáyivi chí ñu. Yihí ñu chahnya ra chihin cierra chí ñu. Yihí ñu nducu nyehe ñáyivi chí ñu. Yihí ñu chihí ñu cha chahñi ñáyivi chí ñu chihin mityi. Yihí ñu chica noo ñu ta ñahri sahma ñu. Chihin ñi mbee ri ta ñi ndixihyu ñihno ñu. Ndahvi xaan ñu. Ta cuihya xaan cuñi ñu. Ta sanyehe ñáyivi cha ña ñohó nuu Nyoo tindocho chí ñu. ³⁸ Ta ñáyivi ña ñohó nuu Nyoo ña nañá ñu cha cu ñin ri ñu chihin ñáyivi ndahvi cuan vatyí vaha ñu nuu Nyoo. Chica noo ndahvi ñu ityi chiqui ndi, ityi yucu. Chiyo ñu chichi yavi yuu ta yavi ñuhú. ³⁹ Tandihí maa ñu vasi cahan vaha Nyoo siqui ñu cha cuenda cha chinó iñi ñu chí ra, soco ña ñihí ñu cha catyi Nyoo cha cuhva ra chí ñu. ⁴⁰ Vatyí natyaa ra cuhva, cha cuhva ra nonga cha vaha ca chí ñu vatyí natyihí ra cuenda chí yo ta ñin ri cutahan chí chí yo chihin ñu cuan.

12

ñin ri chí ra Jesús tahañ chí cuíta iñi yo

¹ Tandihí ñáyivi cuan quita vaha ñu vatyí chingo iñi ñu chí Nyoo. Ta vityin chihin cuan sanduni ñu iñi yo ta nyatú ñu nyehe ñu tatu quita vaha yo. Yucuan chaha cuñi chí cha sacuachiyo xiin yo tandihí cha sayangá chí yo, tandihí cuatyí cha nyicón chí yo. Ta chihin cha cama iñi yo ta cuhun yo ityi nuu ca chihin Nyoo. ² ñin ri chí ra Jesús quihí nuu yo, vatyí maa ra chaha ra cha chinó xaan iñi yo chí Nyoo, ta chaha ra tandihí cuhva tahañ chí chino iñi yo. Ta cha ni cumañi ca cúvi ra, chitó ra vatyí si xaan cucuvi chí ra cha yaha cúvi ra. Yucuan chaha, chaha ra cha cahñi ñáyivi chí ra. Ña quichaha ra tichan nuu cha cúvi ra tari chihí noo ra iyó cuatyí, ta vityin nyaá ra chiyo vaha Nyoo gloria.

³ Saha ndo cuenda cuhva chiyo ra Jesús, vatyí nyehe xaan ra tindocho saha ñu iyó cuatyí. Yucuan chaha ma

cutatu ndo, ta ma ndu uvi iñi ndo cha nyicón ndo chi ra. ⁴ Vatyí nyoho ta chaa ca ndo nyehe ndo tindocho cha cuenda cha cañí tahan ndo chihin cha quiñi caa, tari nyehe ra Cristo tindocho ta chihí ra. ⁵ ¿Atu cha naa iñi ndo tuhun chaha Nyoo chi ndo tari cha sehe ra chi ndo? Catyí ra tyehe caa nu tutu ra:

Sehe luhli, ma cuxaun tatu saquehen ityi chuun.

Ma nducuihya iñun tatu cahín chuun.

⁶ Vatyí ra saquehén ityi yuhu chi, chaha cha cuñí chi ra, vatyí sehe cuví chi ra, catyí Nyoo.

⁷ Cunyee ndo ta cutuhva ndo tatu saquehen ityi ra chi ndo, vatyí Nyoo, sehe vaha ra saha ra chi ndo. Vatyí tandihí ra iyó sehe, saquehén ityi ra chi sehe ra. ⁸ Vatyí tatu ña saquehén ityi Nyoo chi ndo, ñima sehe vaha ra cuví chi ndo, soco tatu saquehén ityi ra chi ndo, sehe vaha ra cuví chi ndo.

⁹ Ta sñin ri, ta nyihí yo, sutu yo ihya ñayiví saquehen ityi ra chi yo, ta saha yo ñáyiví chi ra. Ta nyaca cuví Nyoo, tahan tucu chi saha yo ñáyiví chi Sutú yo Nyoo, tyicuan ta coo añima yo tyicuan ri maa. ¹⁰ Sutú yo cuenda coño ñuhu yo, saquehen ityi ra chi yo suhva ri quiví, yoso cuhva cha cuñi chi. Soco Nyoo saquehén ityi ra chi yo cha cuenda noo cha vaha ca chi yo, vatyí sa ii ra chi yo tari maa ra, cha ii ra. ¹¹ Ndicha vatyí ña tahan iñi yo cha ndohó yo vatyí uhvi chi yo. Soco chihin cha ndoho yo, cutuhva yo coo yo noo ñayiví vaha.

Yica xaan tatu ma quichaha yo cha catyí Nyoo chi yo

¹² Yucuan chaha sandunyee ndo iñi ndo, ta ma quihí iñi ndo cha ma cuví cunyicon ndo chi ra Cristo. ¹³ Ta nanducu ndo cuhva coo vaha ndo chihin Nyoo, nanducu ndo cuhva caca ndoo ndo chihin ra. Tyicuan ta maa ra cuhva ra fuerza chi ndo ta nduvaha ndo nuu Nyoo ta ma cucuihya ca cuñi ndo.

¹⁴ Saniñi ndo coo vaha ndo chihin tandihí ñáyiví. Ta coo ndo noo ñayiví cachi. Vatyí tatu ña cachi iyó yo,

chihin Sutú Mañi yo Nyoo, ma nyehe yo chi ra. ¹⁵ Saha ndo cuenda chi ndo coto yihí ndo, ma ñihí ndo tumañi iñi cha iyó chi ra. Ta saha ndo cuenda chi ndo, coto cuví ndo tari noo yutun cha chahá chiti uva, ta coto quehen ñáyiví cha caá ndo ta tiví ñu nuu Nyoo. ¹⁶ Ta ni noo ndo ta maa coo ndo chihin ñáyiví tatu ñima ñasihí ndo o yñi ndo cuví. Ni ma cuñi ndo vatyí tuhun Nyoo noo cha ñima ri tuhun cuví, vatyí tyicuan caa sacuví ra Esaú, vatyí chihin noo nyayu ri, xico ra tandihí cha tahan chi chi ra cha cuví ra sehe nuu sutu ra. ¹⁷ Ta chitó ndo vatyí cha yaha cuan ta cuñi ra Esaú cha nasoco sutu ra chi ra, soco ña cuví ca. Ta vasi chacu vavaha ra, soco ña ñihí ca ra cuhva nasama ra cuhva cha chinyacuví ra.

¹⁸ Ta maa ndo chaa ndo nuu nyaá Nyoo soco ñima tari chaa ñu Israel cuan quiví chahan ñu noo yucu nu cuví yucu Sinaí. Ta yucuan nyehe ñu cayu ñuhu, ta nduñaa iñi, ta ñihí xaan tatyí. ¹⁹ Ta chiñi ñu nativí cutu cuihya ta cahan Nyoo chihin ñu. Ta ñu cha chiñi tuhun cahan ra, chacu ndahvi ñu tacuhva ma cahan ca ra chihin ñu, vatyí yuhvi xaan ñu ²⁰ cha cuenda vatyí ña cunyee iñi ñu tuhun cha chaha ra chi ñu. Vatyí catyí ra tyehe caa: “Tatu quihví noo ñáyiví, cahñi ndo chi ñu chihin yuu o chihin lanza, cuví ri ñu ñáyiví o quití”, catyí Nyoo chi ñu. ²¹ Yuhvi xaan ñu cha nyehé ñu yucuan, vatyí nyacua nya ra Moisés ta catyí ra: “Ñihí xain chihin cha yuhví”, catyí ra.

²² Soco yoó ña nyehe yo cha yuhvi cuan vatyí noo yucu cha nañi Sión nu cuví ñuu Nyoo nyitó chaa yo. O cuñi chi catyí ñuu Jerusalén cha nyaá andiví, nu nyicú cuaha mil ángel. ²³ Candú ñin ri yo vatyí sacahnu yo chi Nyoo vatyí ndú ñin ri tandihí ñu cha cuví sehe Nyoo cha nyicú siví nu tutu nya andiví. Ta chaa yo nuu Nyoo cha cuví juee chi tandihí ñáyiví. ñin ri nyicú yo chihin añima ñu vaha cha sanduvaha maa Nyoo. ²⁴ Ta natuhva ndo chi ra Jesús ra cuví ra cahán chaha yo

vityin cha natyihí tahan Nyoo tuhun chaa chihin yo. Ta chati niñi ra. Ta ican chi chahá noo cha vaha ca ta ñima ca cha chahá niñi ra Abel. (Vatyí ra Abel chihí ra ta tachí tuñi Nyoo chi yañi ra. Soco chihí ra Jesús, ta iyó tucahnu iñi cuatyí yo.)

²⁵ Yucuan chaha saha yo cuenda coto ma quichaha yo chi ra cha cahán chihin yo. Vatyí ñu Israel cuan, ña cacu ñu cha ña cuñí quichaha nu cahan Nyoo quivi cahan ra nu cuví yucu Sinaí ihya siqui ñuhu ñayivi. Ta nyaca cuví yoó, ma cuvi maa cacu yo tatu nacuhva yo chata yo chi ra cha cahán chihin yo nya andivi vityin. ²⁶ Quivi cuan ndusu Nyoo sacanda chi ñuhu ñayivi. Soco vityin catyí chi tyehe caa: “Noo ri ca chaha cusacande ta ñima ñuhu ñayivi ri, soco andivi ñandihí.”

²⁷ Ta cha catyí ra vatyí cusacanda ra nonga chaha, cutuñi iñi yo vatyí cucuachiyo tandihí cha nyaá ii ri cha savaha Nyoo. Ta cundoo cha ma cuvi nacanda. ²⁸ Nu chahá Nyoo cunyaa yo chihin ra nu nyacá ñaha ra, ma nacanda cuan. Yucuan chaha na nacuhva yo tyahvi nyoo chi ra, ta sacahnu yo chi ra chihin cha niñi iñi yo, ta chihin cha saha yo ñáyivi chi ra, vatyí tyicuan caa tahan iñi ra. ²⁹ Vatyí Nyoo cuenda yo, cuví ra tari noo ñuhú cha chahmí tandihí, ta tyicuan caa cusanaa ra tandihí cha ña vaha.

13

Na coo yo cuhva tahan iñi Nyoo

¹ Ma sandihí ndo cha cuñí ndo chi tandihí ñu yihí cuenda Nyoo tari cha tahan ndo chi ñu. ² Ta ma naa iñi ndo cha cuvaha ñáyivi cuví ndo chihin ñáyivi cha chaá vehe ndo. Vatyí iyó chaha cha cuenda cha vaha ñáyivi cuví ndo, ta chaha ndo nu coo ñáyivi; chi ángel, chaha ndo nu coo, ta ña tui iñi ndo.

³ Ma naa iñi ndo chi ra ñohó vehe caa tari cha ñohó tucu maa ndo vehe caa chihin ra. Ta tyicuan caa tucu ñu nyehé tindoho sahá ñáyivi. Saha ndo tyi nyehé tucu maa ndo tindoho tari nyehé ñu, tyicuan ta cundahvi cuñi ndo chi ñu ta tyinyee ndo chi ñu. Vatyí

chitó ndo yoso caa uhvi chi ñu cuan tyi ñáyivi cuví ñu tari maa ndo.

⁴ Cha tandaha ndo, noo cha vaha cuví. Ta nyoho cha tandaha ndo tahan chi saha ndo ñáyivi chi yí ndo o chi ñasihí ndo. Vii coo ndo chihin tahan ndo, vatyí Nyoo cutachi tuñi ra chi ñu iyó yí ta iyó inga ra chi ñu, o ra iyó ñasihí ta iyó inga ñusihí chi ra.

⁵ Ma cuñi xaan ndo xuhun. Ndo ndo vaha chihin cha iyó chi ndo, vatyí Nyoo catyí ra: “Ma sañe chuun ta ni ma sandoo ñihne chuun”, catyí ra. ⁶ Yucuan chaha cuví catyí yo chihin cha niñi iñi yo:

Sutu Mañi yo cuví ra tyinyee chí,
Ma yuhvi ñáa cha sacuvi ñáyivi chíi.

⁷ Nicohon iñi ndo chi ra cayihí ndaha vehe ñuhu, ra cacahan tuhun Nyoo chihin ndo. Nacaca xiñi ndo vatyí maa ra cachi iyó ra nuu Nyoo, ta cunyicon ndo cuhva cha vaha xaan chinó iñi maa ra chi Nyoo.

⁸ Ra Jesucristo ña nasamá ra. Ican ra cuví ra ta tyembu chahnu, ta ican ra cuví ra vityin. Ta ican ra cuví ra nuu cuahan ca chi tyicuan ri maa.

⁹ Ma cuhva ndo cha sandavi ñaha ñáyivi chi ndo chihin tuhun sin caa cha sañahá ñu. Vaha ca cha cu niñi iñi ndo chihin cha cuñi Nyoo chi yo, ta ñima ca tuhun cha sañahá ñu cuan: cha yica cha cachi yo. Ña tyinyee maa cuan chi ñu nyacuví tyicuan caa.

¹⁰ Iyó noo arta cha cuenda yo. Nu chati niñi ra Cristo nu cruzi, ican cuan cuví. Ta ñu cuñi cacu chihin cha quichahá ñu ley chahnu cha quichahá ra cacuvi sutu ta cha naha, ma cuvi tyinyee ra Cristo chi ñu.

¹¹ Ra cuví sutu cahnú cuenda ñu Israel chinyaca ra niñi quití Nu Ii Xaan Ca cuan cha cuenda cuatyí ñáyivi, soco coño ti chinyaca ra ityi chata ñuu vatyí cayu chí. ¹² Ta tyicuan caa tucu ra Jesús, tyaa Nyoo tyiño chí ra cha nyehe ra tindoho ta cúvi ra ityi chata ñuu Jerusalén, tacuhva vatyí sandundi ra chí yo chihin niñi ra.

¹³ Ma cahan nuu yo nyehe yo tindoho tican nuu cha cuenda ra Cristo, tari nyehé tucu maa ra cha cuenda yo quivi cahan ra chicúvi ra

ityi chata ñuu Jerusalén. Tari quivi cha cuahan tucu yoó ityi chata ñuu cuví chi cuan tatu ña cahán nuu yo nyehe yo tindoho cha cuenda tuhun ra. ¹⁴ Vatyí ihya síqui ñuhu ñayivi, ñahri noo ñuu cha tyicuan ri maa cu-coo iyó. Soco nanducú yo noo ñuu cha cuquichi, cha yaha ndihí tuhun ñuhu ñayivi ihya. ¹⁵ Yucuan chaha vityin cha ñohó ra Cristo añima yo, tahán chi cha saniñi yo ta sacahnu yo chi Nyoo chihin yaa, ta chihin cha cahan yo tuhun cha cahnu cuví ra. ¹⁶ Ta ma naa iñi ndo cha sacuví ndo cha vaha. Ta tyinyee ndo chi tahan ndo chihin cha iyó chi ndo, vatyí ican ihya cuví cha tahán iñi Nyoo.

¹⁷ Quichaha ndo tuhun cahán ra casaquehén ityi chi ndo, ta cuhva ndo chi ndo cunyaca ñaha ra vatyí nyicú ra tyiño casahá cumi ra añima ndo. Ta coo quivi cutahan chi cunacuhva ra cuenda tyiño casahá ra chi Nyoo. Nducu ndo cuhva sacuvi ndo cha vaha, tacuhva vatyí chihin cha síi cuñi ra cuhva ra cuenda ndo nuu Nyoo, vatyí tatu ña sacuví ndo cha vaha, chihin cha cuihya iñi ra cuhva ra cuenda ndo, ta nyoho, ma quita vaha ndo nuu Nyoo.

¹⁸ Vaha cuñí añima ndi chihin Nyoo, ta cuñí ndi cha cacan tahvi ndo chaha ndi vatyí cuñí ndi sacuví ca ndi cha vaha. ¹⁹ Ta chiquén noo tumañi iñi chi ndo cha cacan tahvi ndo chiin chahi tacuhva vatyí nacuhva Nyoo cuhin cucunyai cha numi ri chihin ndo inga chaha.

Nu ndihí cahan ra ta nacuhva ra nocumi chi ñu

²⁰ Nyoo ican ra iyó cha taxi chi ra, ican ra sanandoto ra chi Sutu Mañi yo Jesucristo, ra cuví ra sahá vaha cuenda chi yo tari cha cuví yo mbee sana ra. Ra Cristo chati niñi ra, ta chihin cuan natyihí tahan Nyoo tuhun chaa cha ma ndihí ca maa chihin yo.

²¹ Na cuhva Nyoo cha vaha chi ndo tacuhva cuvi sacuvi ndo cuhva cuñi ra. Ta na sacuvi maa ra cha cuñi maa ra cha cuenda ra Jesucristo chihin tandihí maa yo. ¡Na sacahnu yo chi

ra Cristo tyicuan ri maa! ¡Na cuvi chi tyicuan caa!

²² Yañi, chacú ndahvi nuu ndo, na cunyeer xaan iñi ndo chihin tuhun cha chahí ihya chi ndo, vatyí ña cuaha xaan tyaj nu tutu ihya chi ndo. ²³ Coto ndo vatyí ra yañi yo, ra Timoteo, cha quita ra vehe caa. Ta tatu nachaa ra cha numi ri, cuhun ra chihin, na cuhin cunyeer nu nyicú ndo.

²⁴ Cuhva ndo nocumi chi tandihí ra sañahá chi ndo, ta chi tandihí ra yañi yo cuenda ra Cristo. Ñu Italia ihya, tachí ñu nocumi chi ndo.

²⁵ Ta Nyoo na nasoco ra chi tandihí maa ndo. Ta na cuvi chi tyicuan caa.

Carta Cha Sacuhun Ra Santiago Chi Ñu Yihí Cuenda Ra Cristo

Nu chahá ra Santiago nocumi chi ñu

¹ Yuhu ra Santiago cuví noo ra sacuví tyiño nuu Nyoo ta nuu Sutu Mañi yo Jesucristo. Sacuhín nocumi chi ndo cha cuví ndo cha uchi uvi ityi ñáyiví Israel ñu yihí cuenda ra Cristo. Ta quití cuatyí ndo siin siin ñuu.

Cha chiñi tuñi cha chahá maa Nyoo

² Yañi, cuñí chi vatyí siñi cuví chi ndo tatu cuaha nuu tindoho nyehé ndo. ³ Vatyí chitó ndo tatu nyehé ndo tindoho tari cha vatyí Nyoo nducu nyehé ra tatu ndicha cha chinó iñi ndo chi ra cuví cuan. Ta tyicuan caa ta cua cutuhva ca ndo cha cucama iñi ndo. ⁴ Saña ndo na quichi maa tindoho siqui ndo, vatyí ican cuví cha sacoo cha cama iñi ndo. Ta tatu cha chicoo cha cama iñi ndo ta cucuvi ndo noo ñáyiví chicha chihin tuhun Nyoo, ta cuacunyeé ndo tandihí cuii maa tindoho cha vachi ca siqui ndo.

⁵ Tatu nya noo nyoho cumañí cha chiñi tuñi chi ndo, caçan ndo chi Nyoo. Ta Nyoo cuhva ra. Ta ñima chiin ri chahá ra chi ñu chicán chi ra. Ta ña tyicuhvá ra cuhva chahá ra. Ta ña natyihí ra nuu yo cha cuenda cha chahá ra chi yo. ⁶ Soco cuñí chi caçan yo chi ra chihin cha chinó vaha iñi yo. Ta ma quihí iñi yo vatyí ma cuhva ra chi yo. Vatyí ñu cha ña chinó vaha iñi, cuví ñu tari ndutya yuhu tyañuhu cha tyandahá tatyí chii siin siin ityi.

⁷⁻⁸ Ta tyicuan caa maa ñu cuan, siin siin cuhva chicá xiñi ñu, vatyí siin cha chicán ñu vityin ta siin cha chicán ñu tyaan, ta ña niñi ñu sacuví ñu noo cha sacuví ñu. Ña tahán chi quihí iñi ñu vatyí cuñihí ñu cha cuacuhva Sutu Mañi yo chi ñu. ⁹ Tatu iyó noo ra yañi yo, ndahvi ra, cuñí chi cusii cuñí ra vatyí Nyoo nacoñehé ra chi ra. ¹⁰ Soco tatu noo ra yañi yo, tyayii

ra, cuñí tucu chi cha cusii cuñí ra tatu ndundahvi ra, vatyí ra tyayii cuví ra tari noo ita cha nyaá nu cuhu, vatyí ña naha maa chiyó chi. ¹¹ Vatyí tatu cañá ñanyii ta ihñi vavaha cuhu cuan, na ityi chi. Ta ita cuan canacavá ri ta ndihí cha tyaqui chi. Ta tyicuan caa tucu ra tyayii, cuquichi tuhun chihi chi ra ta ndoo maa tyiño sahá ra.

Yoso caa cunyeé yo tindoho

¹² Ñana cha siñi cuví chi ndo cha cunyeé ndo chihin cha cama iñi ndo ñáá tindoho cha vachí chi ndo. Vatyí tatu cunyeé ndo, cuñihí ndo tari noo corona. Vatyí Nyoo cucuhva ra chi ñu cuñí chi ra, cha coo ñu ñáyiví chaa chihin ra. ¹³ Tatu nya noo nyoho quichí cuví iñi ndo cha sacuví ndo cha ña vaha, ma cuñi ndo vatyí Nyoo sacuví cha caca xiñi ndo tyicuan caa. Vatyí Nyoo ña quichí cuví iñi ra sacuví ra cha ña vaha. Ta ni ña tyiyuhú ra chi yo cha sacuví yo cha ña vaha. ¹⁴ Soco tatu nya noo ndo quichí cuví iñi ndo sacuví ndo cha ña vaha, suri cha cuenda cha chicá xiñi maa ndo cha ña vaha, yucuan chaha canacava ndo nu cuatyí. ¹⁵ Tatu cuhva xaan yo cuhva cha quihí tuhun ña vaha iñi yo, cuacoo noo quiví ta cuasacuví yo cuhva ña vaha cuan, ta tyicuan caa cacu cuatyí yo nuu Nyoo. Ta Nyoo tachi tuñi ra cuatyí cuan ta cuchaa tuhun chihi chi yo. ¹⁶ Yañi yuhu, cuñí xain chi ndo. Ma sandavi ñaha ndo chi ndo. ¹⁷ Tandihí cha vaha ta cha vii cha ñihí yo, quichi chi nya ityi siqui vatyí maa Nyoo chahá ra. Ta maa ra savaha ra ñuhu cha iyó andiví: tiño, ta yoo, ta ñanyii. Ta Nyoo tyicuan ri cuví ra Nyoo, ta ni chiin ña tuhvá ra nasama ra cuhva cuví ra. ¹⁸ Ta chahá ra ñáyiví chaa cha iyó yo cha cuenda tuhun ndicha cha cahán ra. Vatyí xihna ca yo cuví cha nduchaá cha nuu tandihí ca cha savaha ra. Vatyí tyicuan caa cuñi maa ra.

Noo ityi cha ndicha cha tahán chi cuhun yo

¹⁹ Yucuan chaha yañi, noo noo yo ta cuñí chi cha yatyí çohon iñi yo cha tyasoho yo, soco cuñí chi cha ma

yatyí xaan nacahán yo ta ma yatyí xaan cuxaan yo. ²⁰ Vatyí ñáyiví cha cuxaán, ña nyacuví ñu cha tahán iñi Nyoo. ²¹ Yucuan chaha saña ndo cha ña vaha ta cha quiñi caa cha cuaha xaan iyó siqui ñuhu ñayiví. Ta natin cuenda vaha ndo chihin cha masu iñi ndo tuhun Nyoo cha tachí ra añima ndo. Vatyí tuhun Nyoo cuan iyó tunyee iñi chi chi vatyí sacacú chi añima yo. ²² Soco sacuvi yo yoso cuhva sañahá tuhun Nyoo. Ta ma cuiñi ri maa yo vatyí tatu tacuhva chiñí ri maa yo, suri chi maa yo sandavi ñahá yo. ²³ Vatyí ñu cha chiñí ri maa tuhun Nyoo ta ña sacuví ñu, cuví ñu tari noo ñu cha nyehé chi nu ino. ²⁴ Ta nyehé ñu yoso caa nuu ñu, ta yaha cuan ta cuahan ñu ta naá ri iñi ñu yoso cuhva caá nuu ñu. ²⁵ Soco inga ñu cha nyita ri tyasohó tuhun Nyoo, vatyí sacuví vaha ñu cha chiñí ñu. Ta tyicuan ri sahá vaha ñu cuenda cha catyí ley Nyoo, cha cuví ley vaha ca, ley cha chahá libertad chi yo tyi tava chi chi yo ndaha ra ña vaha. Ta ñu nyacuví tyicuan caa si xaan cucuvi chi ñu. ²⁶ Tatu nya noo ñáyiví cuiñi maa ñu vatyí ityi Nyoo cuahan ñu, soco ña nyatú yuhu ñu cahan ñu, suri chi maa ñu sandahvi ñahá ñu. Ta cha catyí ñu tyi ityi Nyoo cuahan ñu, cha ñima ri tuhun cuví. ²⁷ Vatyí ityi ndicha, ityi vaha nuu Nyoo Sutu yo ican cuví ihya: Cha tyinyeé yo chi ñu nyehe tindoho, ñu yori sutu ta sihi, ta ñu chihí yí. Ta inga, cha sahá vaha yo cuenda chi yo coto sacuvi yo cha quiñi caa cha sacuví ñu ña ñohó nuu Nyoo.

2

Ña tahán chi cuiñi yo chi noo ñáyiví ta chi inga ñu ma cuiñi yo. Inuuri tahan chi cuiñi yo chi ñu

¹ Yañi yuhu, nyoho chinó iñi ndo chi Sutu Mañi yo Jesucristo ra cha cahanu ca cuví, ta ña tahán chi cha vaha ca cahan ndo chihin noo ri ñáyiví, ta chihin inga ñu ma cahan ndo. ² Vatyí tatu quihví noo ra tyayí nu nyicu ndo, yihí xehe xuhun

cuaan ndaha ra, ta finu sahma ra, ta quihví tucu nonga ra cha ñihno sahma chahnu ri. ³ Ta nyoho tatu vaha ca tyiñuhu ndo chi ra cha vaha ñihno cuan, ta catyí ndo chi ra: “Cunyata ihya noo nu vaha.” Ta chi ra ndahvi cuan catyí ndo chi ra: “Yoho cunyanata yucuan o cunyata ihya nu ñuhú”, catyí ndo chi ra. ⁴ Ña vaha tatu sacuví ndo tyicuan caa, vatyí ña inuu ri sahá ndo ñáyiví chi ñu, ta cha tyicuan caa, ña vaha cha chicá xiñi ndo.

⁵ Yañi, tyasoho ndo tuhun ihya. Nyoo nacachí vaha ra chi ñu ndahvi ihya ñayiví, vatyí ta cuhva cuví ñu ñu tyayí chihin cha chinó xaan iñi ñu chi Nyoo, ta cuiñi ñu nu vaha nu nyacá ñaha ra. Vatyí ican ihya cuví cha catyí ra tyi cuhva ra chi ñu cuiñi chi ra. ⁶ Soco nyoho chahá ndo tican nuu chi ñu ndahvi. Ta ¿atu ña chitó ndo vatyí ñu tyayí, ican ñu cuví ñu cha chahñi ndahvi chi ndo? Ta chinyacá ñu chi ndo nuu ra cuví tyiño. ⁷ Ta ¿atu ña chitó ndo vatyí ican ñu cuví ñu cahan ña vaha siqui ra Cristo? Ta cuenda ra Cristo yihí ndo.

⁸ Tatu ndicha cha sacuví ndo tandihí cha catyí ley Nyoo ra cuví rey cuenda yo, vaha nyacuví ndo. Tari catyí tuhun Nyoo: “Cuiñi ndo chi tahan ndo tari cuiñi ndo chi maa ndo.” ⁹ Soco tatu chi noo ri ñu cuiñi ndo. Ta chi inga ñu ña cuiñi ndo, chicoó cuatyí ndo. Ta iyó cuatyí ndo nu ley Nyoo. ¹⁰ Vatyí tatu noo ñáyiví sacuví ñu tandihí cha catyí ley, ta cumañi ñu noo ri cha catyí chi, cuví chi tari cha tandihí ley ña sacuví ñu. ¹¹ Vatyí Nyoo catyí ra vatyí ma coo inga ñusihi o inga rayí chi ñu, tatu iyó yí ñu o iyó ñasihi ra. Ta suri maa ra catyí vatyí ma cahñi yo. Yucuan chaha tatu noo ñu ña sacuví ñu cuatyí cha ña iyó inga rayí o inga ñusihi chi ñu soco chahñi ñu, suri ña quichahá ñu cha catyí ley. ¹² Soco yoó cucutuñi chi yo nu ley ra Cristo cha sacacú chi yo. Yucuan cuenda tahan chi nducu yo cuhva cahan yo ta nducu yo cuhva coo yo. ¹³ Vatyí ñu cha ña cundahvi cuiñi

nyehe chi inga ñu, Nyoo cusacutuñi ra chi ñu, soco ma cundahvi cuñi ra nyehé ra chi ñu. Soco ñu cha ndahvi cuñi nyehé chi inga ñu, cuquita vaha ñu cuhva cha cutuñi chi ñu.

¿Ñáá cha sacacú chi yo, cha chinó iñi yo o cha sacuví yo cha vaha?

¹⁴ Yañi, ñáá ri tuhun tatu catyí ndo vatyi chinó iñi ndo, soco ñahri cha vaha nyacuví ndo. ¿Atu cuví cacu ndo chihin cha chino iñi ri ndo chi Nyoo? ¹⁵ Vatyi tatu noo ñu tahan yo cumañi sahma ñu, cumañi cha cachi ñu, ¹⁶ ta minoo nyoho catyí ndo chi ñu: “Cuñhan ta Nyoo na cocumi ra chuun. Na coo ca sahmon ta cha cachun”, catyi ndo. Soco ña चाहá ndo cha chihuhú chi ñu. ¿Ñáá ri tuhun cuan? ¹⁷ Ñahri yahvi nyaa cha catyí yo vatyi chinó iñi yo chi Nyoo, ta ña tyinyeé yo chi tahan yo.

¹⁸ Vasi yihí ndo cua catyi ndo: “Yoho chihin cha chinó iñun chi Nyoo ta cuñun cacun, ta yuhu caqui soco chihin cha vaha ñáyivi cuví ta chihin cha tyinyeí chi tahan yo.” Vaha. Soco yuhu catyí chuun, ¿atu cuví sañahun chii tyi ndicha chinó iñun chi Nyoo tatu ña vaha ñáyivi cuvún ta ña tyinyeún chi tahan? Ma cuví. Soco yuhu chihin cha tyinyeí chi tahan yo sañahí chuun vatyi chinó vaha iñi chi Nyoo. ¹⁹ Ta yoho chinó vavaha iñun tyi iyó noo ri Nyoo. Vaha cha chinó iñun. Soco cuihna chinó tucu iñi ra cuan tyi iyó noo ri Nyoo. Ta nihí ra chihin cha yuhví ra vatyi ma cacu ra. ²⁰ Ma tondo xaan caça xiñun. Na cutuñi iñun vatyi tatu chinó iñi yo ta ña sacuví yo cha vaha, ñahri yahvi nyaa cha chinó iñi yo. ²¹ Ra Abraham sutu chahnu yo, cuví ra noo ra vaha nuu Nyoo cha cuenda cha sacuví ra cha catyí Nyoo. Vatyi चाहá ra chi sehe ra, ra Isaac chi Nyoo tari cuhva catyí Nyoo chi ra. ²² Nyehún vatyi chinó iñi ra Abraham chi Nyoo ta chaha cha chinó iñi ra ta sacuví ra tuhun cha catyí Nyoo chi ra tyi sacuvi ra. Ta nu sacuví ra cuhva catyí Nyoo chi ra, yucuan cuví nu natuvi vaha cha chinó iñi ra chi Nyoo. ²³ Ta tyicuan

caa chinq cava tari cuhva catyí nu tutu Nyoo tyehe caa: “Ra Abraham chinq iñi ra chi Nyoo ta yucuan chaha Nyoo saha ra tuhun tyi vaha ra nuu ra.” Ta iyó inga nu catyí chi: “Ra Abraham, nanduví ra amigo Nyoo.”

²⁴ Ta tyicuan caa nyehé yo vatyi vaha yo nuu Nyoo cha cuenda cha nyacuvi yo cha vaha, ta ñima cha cuenda cha chinó ri iñi yo chi ra. ²⁵ Ta tyicuan caa tucu cu Rahab ñaha cata iñi cha chiyó ta cha naha. Yahá cha sacuví ña cuatyí, sacuví ña cha vaha quivi चाहá ña nu cacohon xehe ra cha tachí ra Josué. Ta tyinyee ña chi ra cha cuhun ra inga ityi. Ta cha cuenda cuan Nyoo saha ra tuhun tyi vaha ña. ²⁶ Ta tyicuan caa tucu cuví noo coño ñuhu ñáyivi. Tatu ñahri ca cha nyitó ñu yihí chichi coño ñuhu cuan, ñahri ca vale chi. Ta tyicuan caa yoó, tatu ña sacuví yo cha vaha, ña vale cha chinó iñi yo.

3

Yoso caa saha cuenda yo cuhva cahan yo

¹ Nyoho yañi, ma vatyi xaan quichi cuví iñi ndo cuví ndo noo ra sañahá tuhun Nyoo. Vatyi nyuhu cha sañahá ndi tuhun Nyoo, tatu ña vaha sañahá ndi, cahnu ca cuatyí cuví, ta cuaha ca cutachi tuñi Nyoo chi ndi. ² Vatyi ni noo yo ta ña sacuví yo maa maa ri maa cha vaha. Soco tandihí yo cuaha ri cuhva sacuví yo cuatyí. Soco tatu noo yo cuví cunyaca ñaha vaha yo cuhva cahan yo tacuhva ma coo cuatyí yo cha cuenda cha cahan yo, cuñi chi catyi vatyi ñahri cuatyí yo vatyi cuví tucu cunyaca ñaha yo tandihí coño ñuhu yo. ³ Vatyi tatu tyihi yo yoho yuhu caballo cuví cunyaca ñaha yo chi ti, vasi cahnu ti. ⁴ Ta tyicuan caa tucu noo barcu cahnu, vasi cahnu chi soco chihin noo vitu luhlu ri cha nyaá chata chi, cuví sacuhun ra chi chi nya ityi nu cuñi maa ra, vasi ñihi tatyí. ⁵ Ta tyicuan caa tucu yaa yo. Cuví chi noo cha luhlu ri. Soco cahnu xaan cahnu xaan nanduví noo tuhun luhlu ri cahan yaa yo. Tari nahnu

cuvi cayu chihin ñuhu lee cha tyaa yo chichi cuhu ta ndi maa yutun cayu. ⁶ Vatyí tyicuan caa yaa yo tari noo ñuhu luhlu cuví chi. Ta cuví chi tari noo cha quiñi caa cahnu cha ñohó chichi coño ñuhu yo, ta sativí chi chi coño ñuhu yo ta tandihí cuhva iyó yo ñáyiví, vatyí suri maa cuihna, ican tyiyuhú chi chi. ⁷ Ñáyiví cuví samasu ñu tandihí ri nuu quiñi: saa, coo, ta quiñi cha iyó chichi tyañuhu, ta samasú ñu chi ti. ⁸ Soco yori cuví samasu yaa yo. Vatyí cuví chi noo cha ña vaha cha ña chahá chi cha cunyaca ñaha yo chi chi. Tari noo coo, tyaá ti chi ñáyiví, tyihi ti venenu ti ta chihí ñáyiví. Ta tyicuan caa yaa yo. ⁹ Vatyí suri chihin yaa yo sacahnú yo chi Nyoo Sutu yo. Ta suri chihin cuan cahán ña vaha yo chi ñáyiví cha savaha Nyoo tari cuhva caá maa ra. ¹⁰ Suri maa chihin yuhu yo sacahnú yo chi Nyoo. Ta suri chihin cuan cahán yo cha quiñi caa. Soco yañi, ña tahán chi cha sacuví yo tyicuan caa. ¹¹ Vatyí, ¿atu cuví quita ndutya vixi ta ndutya uva noo ndohyo? Ma cuví. ¹² Yañi, ¿atu cuví quita papaya nuu noo tumangu, o cuví cuhva tupapaya noo mangu? Ma cuví. Ta tyicuan caa ma cuví quita ndutya uhva ta ndutya vixi noo ndohyo.

Cha chiñi tuñi cha vaha ca

¹³ Tatu yihí ndo cha chitó ndo ta iyó cha chiñi tuñi chi ndo, sañaha ndo chihin cha cachi iyó ndo. Ta sacuvi ndo cha vaha chihin cha ma cahnu saha ndo chi ndo, vatyí iyó cha chiñi tuñi Nyoo chi ndo. ¹⁴ Soco tatu iyó tuhun nyiyo iñi ña vaha chichi añima ndo, sacuví ndo cha sacuvi ndo soco cha cuenda cha cuñi ndo cuvaha ndo nuu ñáyiví, ta cha tyicuan caa nyacuví ndo, ña tahán chi cuyaa ndo tyi iyó cha chiñi tuñi chi ndo, vatyí cha cuyaa ndo, sandaví ñaha ndo cuví cuan, ta tixehe ndo cha ndicha. ¹⁵ Vatyí tatu chicá xiñi ndo tyicuan caa ñima cha chiñi tuñi Nyoo cuví cuan, soco cuhva chicá xiñi ñu

ña ñohó nuu Nyoo cuví. Cuenda cuihna cuví. ¹⁶ Vatyí tatu nyiyo iñi ndo ta cuñi ndo cuvaha ndo nuu ñáyiví, yucuan cuví nu ican ñima nyicú ndo. Ta iyó tucu tandihí inga nuu cha ña vaha nu nyicú ndo. ¹⁷ Soco tatu iyó cha chiñi tuñi Nyoo chi ndo, ndaa iyó ndo, cachi iyó ndo. Ta nanducú ndo cuhva coo vaha ndo chihin ñáyiví chihin cha vta iñi ndo. Ta vaha ñáyiví cuví ndo. Ta cachi vaha chicá xiñi ndo. Ta cundahví cuñi ndo chi ñáyiví. Ta nducú ndo cha vaha chi tandihí ñáyiví chihin cha ñi iñi ndo. ¹⁸ Tatu nanducú yo cha coo vaha yo chihin ñáyiví, ta sañihi yo coo taxi ri yo chihin ñu, cuacoo yo noo ñáyiví cha cuiñi.

4

Ma sacuvi yo cuhva cuñi coño ñuhu yo

¹ ¿Ñáá tuhun iyó tisihí nu nyicu ndo? ¿Ñáá tuhun iyó cuatyí? Cha cuenda cha ña vaha cha cuñi coño ñuhu ndo. Vatyí tyicuan ri iyó cha cuñi ndo ta yucuan sacañi tahan chi ndo. ² Nyoho cuñi ndo coo ñáá ndihí cha coo chi ndo. Ta ñahri iyó chi ndo. Tyicuan ta satasí iñi ndo ta chahñi ndo tacuhva ñihi ndo. Iyo tahan ndo chihin cha nyiyo iñi ndo ñáá cha nyehé ndo soco ña cuví ñihi ndo. Tyicuan ta cañi tahan ndo. Iyó cuatyí nu nyicú ndo soco ña ñihí ndo cha cuñi ndo. Vatyí ña chicán tahvi ndo chi Nyoo. ³ Ta tatu chicán tahvi ndo chi Nyoo, ni ri ña ñihí ndo cha cuenda vatyí ña vaha chicán ndo. Vatyí cuñi ndo soco cha sanaa ndo cha caca noo ri maa ndo cuhva cuñi ñáyiví. ⁴ Ña ndicha cha chinó iñi ndo chi Nyoo. ¿Atu ña chitó ndo vatyí tatu nyacuví ndo cuhva cuñi ñáyiví, ñu xaan iñi chi Nyoo cuví ndo vatyí ña nyacuví ndo cuhva cuñi Nyoo? Yucuan chaha tatu yihí ndo nyacuví ndo cuhva cuñi ñáyiví, ñu xaan iñi chi Nyoo cuví ndo. ⁵ ¿Atu cha caha ri catyí nu tutu Nyoo vatyí Tatyí li cha chahá Nyoo coo añima yo, cuñi xaan chi chi yo, ta cuiño xaan chi chi yo? Cuñi Nyoo cha

in ri chi maa ra cua cuñi xaan yo. ⁶ Soco tyinyeé ca ra chi yo tacuhva vatyí cuví nacuhva ndihí yo chi yo chi ra. Yucuan chaha catyí tucu tuhun Nyoo vatyí Nyoo ña tahán iñi ra chi ñu cahnu saha chii. Soco tyinyeé ca ra chi ñu nacotó tyi chiñuhu ra chi ñu. ⁷ Ican tuhun nacuhva vaha ndo chi ndo chi Nyoo. Ma quichaha ndo nu cahán cuihna chihin ndo. Ta maa ra cucacacono ra nyehe ra chi ndo. ⁸ Tuhva yatyin ndo chi Nyoo ta maa ra tuhva yatyin ra chi ndo. Nyoho ñu iyó cuatyí, sandundí ndo chi ndo. Ta nyoho cha uvi nyaa xiñi ndo sanduní ndo iñi ndo ta cuhva ndo na sacutu Nyoo añima ndo chihin cha vaha, tyicuan ta cundundí ndo nuu ra. ⁹ Cucuihya cuñi ndo. Cuacu ndo. Na ndichi xiñi ndo vatyí ña vaha cuhva iyó ndo. Cha nuu cha cuacu ndo chihin cha sñi cuñi ndo cuacu ndo chihin cha cuihya iñi ndo. Ta cha sñi cuñi ndo na nanduvi chi tucuihya iñi. ¹⁰ Ndahvi saha ndo chi ndo nuu Sutu Mañi yo, ta maa ra cusanducahnu ca ra chi ndo.

Ma nyehe nyaa yo chi tahan yo

¹¹ Yañi, ma cahan ña vaha ndo siqui noo tahan ndo. Vatyí ñu cha cahán ña vaha siqui noo tahan, o nyehé nyaa ñu chi ñu, siqui ley Nyoo cahán ña vaha ñu ta nyehé nyaa ñu. Vatyí tatu nyehe nyaun, juez nasahún chuun cha nuu cha quichahún nu cahán ley cuan. ¹² Vatyí noo ri ra cuví ra cha chahá ley cuan. Ta suri ra cuví ra juez. Ta suri maa ra cuví ra ra sacacu chi yo, o sacunaa ra chi yo. Soco ¿yóo ñu cuví yoho vatyí nyehe nyaun chi inga ñu, ta sacutuñun chi ñu tari cha juez cuvún?

Ña chitó yo ñáa cha cucuvi chi yo tyaan, ta yucuan chaha ña tahán chi cahnu saha yo chi yo

¹³ Vityin cuiñi ndo tuhun ihya, nyoho cha catyí ndo: “Vityin o tyaan cahun yo ñuu cuan, o inga ñuu cuan. Ta yucuan cunyaa yo noo cuiya vatyí sahatyiño yo ta saha ganaa yo xuhun”, catyí ndo. ¹⁴ Ta ni ña chitó

ndo cha cucuvi tyaan. Vatyí ñayivi cha iyó yo cuví chi tari noo vico nuhu vatyí noo ri cuhva yihí chi, ta tañi ri ta cha naa tucu chi. ¹⁵ Soco tahán chi catyí ndo tyehe caa: “Tatu Sutu Mañi yo ta cuñi ra, coo yo ta sacuvi yo ihya o yucuan.” ¹⁶ Soco nyoho nyee xaan ndo cuñi maa ndo ta cahnu sahá ndo chi ndo. Ta ña vaha tyicuan caa. ¹⁷ Vatyí tandihí yo cha chitó yo sacuvi yo cha vaha ta ña sacuvi yo, chicoó cuatyí yo cha tyicuan caa.

5

Nu catyí ra Santiago ñáa cha cucuvi chi ñu tyayí

¹ ¡Cuiñi ndo tuhun ihya, nyoho ñu tyayí! Cuacu ndo chihin cha cuihya cuñi ndo, canachaa ndo cha cuenda tindoho cha cunyehe ndo. ² Vatyí cha tyayí cha sacayá ndo, cha cuñi tiví. Ta sahma finu ndo, ndí maa cha cuñi cachi tiquixin. ³ Xuhun cuaan ndo ta xuhun cuichin ndo cuxi vavaha chi. Ta yucuan chahá chi noo seña cha chinyacuvi ndo. Ta tari quivi cha cucahmi chi chi ndo tari cayu ñuhu vatyí cucunaa ndo. Tyí sacayá xaan ndo cha tyayí ndo tyí cotyiño ndo tyaan. ⁴ Ta ña tyiyahvi ndo yahvi cha tahán chi chi ñu ndahvi cha sahatyiño nu tyiño sahá ndo. Ta vityin chicán ñu cuatyí chaha ndo nuu Sutu Mañi yo ra nyacá ñaha ángel cha cuví sindaro cuenda ra. Ta maa Sutu Mañi yo chiñi ra tuhun cahán ñu ndahvi cuan. ⁵ Ihya siqui ñuhu ñayivi tyaquí iyó ndo, tyayí iyó ndo. Ta sacuvi ndo yoso cuhva cuñi maa ndo. Tari nduxahan quini cha cucuvi, tyicuan caa nyoho, vatyí cucunaa ndo. ⁶ Ta nyoho tyañ ndo cuatyí chaha ñayivi vaha. Ta chahñi ndo chi ñu. Ta ñu ndahvi cuan ña cuví sacacu ñu chi ñu.

Cuatu yo chi ra Cristo chihin cha cama iñi yo

⁷ Yucuan chaha, yañi, nyatú yo chihin cha cama iñi yo nyacua nya quivi quichi Sutu Mañi yo. Tari noo ra cha sahá tyiño chi cuhu nyatú ra nyacua nya cha coon savi cha xihna ri ta cha

yaha savi nu ndihí, tyicuan ta naquehen ra ñáá cha tachí ra. ⁸ Ican tuhun cuatu ndo chi Nyoo chihin cha cama iñi ndo. Ta cuní ca iñi ndo vatyí cha cuyatyin cha quichi Sutu Mañi yo.

⁹ Yañi, ma tyaa ndo cuatyí chaha tahan ndo, coto tachi tuñi Nyoo chi ndo. Vatyí Nyoo, juez cuví ra. Ta cha cuñi quichi ra. ¹⁰ Yañi, saha ndo cuenda kuhva chiyo ra profeta cha chaha cuenda tuhun Sutu Mañi yo ta cha naha, vatyí kuhva cha canyehé ra tindoho, cacunyeé xaan ra. ¹¹ Chitó yo vatyí si xaan cuñi ra cha cunyeé tandihí nuu tindoho. Tari ra Job. Chiñi ndo tuhun yoso caa cunyeé ra tindoho cha nyehe ra. Ta chitó ndo vatyí nu ndihí tuhun, cuaha xaan cha vaha chaha Sutu Mañi yo chi ra. Vatyí Sutu Mañi yo iyó xaan ticahnu iñi chi ra. Ta cundahvi cuñi ra nyehe ra chi yo. ¹² Soco yañi, ma tyanaha ndo tacuhva chino iñi ñáyivi vatyí ndicha cha sacuví ndo. Ma tyanaha ndo ni tuhun andivi, ni tuhun ñuhu ñáyivi, ni ma catyí ndo: “Chitó vaha maa Nyoo.” Tatu ndicha tuhun cahán ndo, ndicha catyí ndo. Soco tatu chitó ndo tyi ña ndicha, catyí ndo tyi ña ndicha, vatyí coto tachi tuñi Nyoo chi ndo.

¹³ Tatu nya noo nyoho nyehé ndo tindoho, cacán tahvi ndo chi Nyoo. Ta tatu nya noo ndo si cuñi ndo, cata ndo yaa Nyoo. ¹⁴ Tatu nya noo ndo cuhvi ndo, cuñi chi cana ndo chi ra nyisó tyiño vehe ñuhu vatyí cacán tahvi ra chaha ñu cuhvi cuan ta tyihi ra acetye chi ñu chihin sivi ra Cristo. ¹⁵ Ta tatu chinó vavaha iñi ra chi Nyoo kuhva cha chicán tahvi ra, ñu cuhvi cuan cucacu ñu. Ta Sutu Mañi yo cusanducuita ra chi ñu. Ta tatu sacuví ñu cuatyí, Nyoo cusaha ra ticahnu iñi cuatyí ñu. ¹⁶ Yucuan chaha nahma ndo cuatyí ndo nuu tahan ndo. Ta cacán tahvi ndo chaha tahan ndo vatyí na nduvaha ndo. Vatyí nu chicán tahvi noo ra vaha chicá chihin Nyoo iyó xaan tunyee iñi Nyoo. ¹⁷ Tari ra Elías ra profeta Nyoo ta cha naha. Cuví ra noo rayi tari maa yo. Ta chicán tahvi ra chi

Nyoo vatyí ma coon savi. Ta ña coon savi uñi cuiya sisava. ¹⁸ Yaha cuan ta nacacán tahvi tucu ra chi Nyoo inga chaha. Ta nacoon savi inga chaha. Ta cuvaha chiti cha tachí ñáyivi nu ñuhú.

¹⁹ Yañi, tatu noo tahan ndo sandoq ñu tuhun ndicha Sutu Mañi yo, ta cuanuhu ñu ñáyivi inga chaha, ta tatu tyinyeé ndo chi ñu na ndichi ñu ityí Nyoo inga chaha, ²⁰ coto ndo vatyí cha tyinyeé ndo chi ñu sacuví cuatyí cuan na ndihvi ñu ityí Nyoo inga chaha, sacacú ndo añima ñu ndahvi cuan coto kuhun ñu anyaya. Ta sacuví ndo vatyí saha Nyoo ticahnu iñi tandihí cuatyí ñu.

Carta Cha Xihna Ri Cha Sacuhun Ra Apóstol Pedro Chi Ñáyivi Yihí Cuenda Nyoo

Nu tyaa ra Pedro noo carta chi ñáyivi yihí cuenda Nyoo

¹ Yuhu ra Pedro cuví noo apóstol cuenda ra Jesucristo, ta cuñí chi catyí, vatyí maa ra tachí chii vatyí caque tyiño ra. Tyaí noo tutu ihya chi nyoho cha ña iyó ndo ñuu ndo, vatyí iyó ndo noo noo ñuu ityi Ponto, ta Galacia, ta Capadocia, ta Asia ta Bitinia. ² Chi nyoho nacachí vaha maa Nyoo Sutu yo vatyí nyata cha naha chito ra vatyí tyicuan caa cuquichaha ndo chi ra. Maa Tatyí Ii tyinyee chi ndo vatyí cuví nacuhva ndo chi ndo chi Nyoo, ta tyicuan caa cuví quichaha ndo chi ra Jesucristo, ta ndundíí ndo chihin ñíñi ra. Na naquehen ndo cuaha ca cha vaha ta cha taxi ri coo añima ndo sahá maa Nyoo.

Noo cha yihí vaha iñi yo vatyí cuñihi yo

³ Sacahnu yo chi Nyoo Sutu Sutu Mañi yo Jesucristo vatyí ndahvi cuñí ra nyehé ra chi yo ta chahá ra cha nacacu chaa yo inga chaha tacuhva coo yo ñáyivi chaa cha ma naa ca maa. Ta yucuan cuví cha chahá cha cuita iñi yo cha cuñihi yo vatyí cha nandoto ra Jesucristo. ⁴ Ta Nyoo cuacuhva ra tandihí cha tahán chi chi yo cha cumí vaha ra nya andivi. Ta cuví chi noo cha ma naa ta ni ma tiví, ta ni ma ndahva chi tari ndahva ita. ⁵ Ta vatyí chinó iñi yo chi Nyoo maa ra sahá cumi chi yo chihin tunyee iñi ra nyacua nya cacu ndihí añima yo. Ta cusañaha ra chi yo ñáá cha cuñi chi catyi cha cacú yo nu cuandihí tyembu. Vatyí cha nyatú tuhva cuan chi yo.

⁶ Ta yucuan chaha sii xaan cuñí ndo, vasi tahán chi cha nyehé ndo ndihí nuu tindocho suhva quivi. ⁷ Vatyí cha chinó iñi yo chi Nyoo, vaha ca ican saha xuhun cuaan. Vatyí xuhun cuaan cuví chi noo cha cundihí. Soco cuví nyehe yo chihin ñuhu tatu vaha chi, vatyí chihin cha ihñi cundutya chi ta cucayu cha ña vaha yihí chihin chi. Soco ndoó xuhun cuaan vaha cuan. Tyicuan caa tucu nyehé Nyoo chi ndo tatu vaha chinó iñi ndo chi ra. Yucuan chaha nyehé ndo tindocho vityin. Soco tatu ña ndu uví iñi ndo cha chinó iñi ndo chi ra, cutuvi ndo nuu ra ta cusacahnu ñáyivi chi maa ra ta chi maa ndo quivi quichi Sutu Mañi yo Jesucristo inga chaha.

⁸ Nyoho cuñí ndo chi ra Jesucristo vasi ta nyehe ca ndo chi ra. Ta vasi ña nyehé ndo chi ra vityin, soco chinó iñi ndo chi ra, ta sii xaan sii xaan cuñí ndo nyacua ña ñihí ca ndo cuhva catyí ndo yoso cuhva cha sii cuñí ndo. ⁹ Vatyí cucacu ndihí añima ndo ta yucuan cuví cha cuñihi ndo vatyí chinó iñi ndo chi Nyoo.

¹⁰ Siqúi cuan canducú tuhun ra profeta Nyoo ta cha naha. Ta canducú xaan ra cuhva coto ra ñáá cha cuví cuan. Ta catyaa ra nu tutu cuenda tumañi iñi cha cucuhva Nyoo chi yo. ¹¹ Ta Tatyí Ii ra Cristo sacoto chi chi ra ñáá ndihí tindocho cunyehe ra Cristo, ta yaha cuan yoso caa cusanducuhnu Nyoo chi ra. Ta profeta cuan canducú xaan ra cuhva cacoto ra yóó ra cucuvi ra Cristo cha cucuvi chi tyicuan caa, ta ama cucuvi tuhun cha catyi Tatyí Ii chi ra. ¹² Soco sacoto Nyoo chi ra vatyí tyiño cha casacuví ra, ñima cha vaha chi maa ra cuví, soco cha vaha chi maa yo cuví. Ta ican cuví cha sacoto ndi chi ndo vityin. Vatyí chihin tunyee iñi maa Tatyí Ii cha saquichí Nyoo, cahan ndi tuhun ra Cristo nuu ndo yoso caa sacacú ra chi yo. Ta ángel cacuñí xaan ra cacoto ra tuhun ihya.

Nacana Nyoo chi yo vatyí coo yo noo ñáyivi cachi

¹³ Yucuan chaha saha vaha ndo cuenda cha cua sacuvi ndo, ta cachi coo ndo. Quihi vaha iñi ndo cha cuacuhva Nyoo chi yo cha cuenda cha cuñi ra chi yo. Cuaha cuacuhva ra chi yo quivi quichi ra Jesucristo inga chaha. ¹⁴ Ta coo ndo tari noo sehe cha quichaha chi nu cahán sutu chi. Ma coo ndo tari chiyo ndo quivi ta ni cumañi ca cohon nuu ndo chi Nyoo. Vatyí cha ña vaha cha cuñi coño ñuhu ndo chinyaca ñaha chi chi ndo. ¹⁵ Soco coo ndo noo ñayivi ndi, vatyí maa Nyoo, ra cha nacana chi ndo, ndi ra. ¹⁶ Vatyí tyicuan caa catyí Nyoo nu tutu ra. “Cundi ndo vatyí mai ndi”, catyí Nyoo.

¹⁷ Tatu tuhvá ndo chicán tahvi ndo chi Nyoo ta catyí ndo “Sutu Mañi yuhu” chi ra, saha ndo cuenda chi ndo ta saha ndo ñayivi chi ra cha ni ri ca cha iyó ndo siqui ñuhu ñayivi. Vatyí Nyoo ña sahá ra cuenda cuhva cahán yo. Soco sahá ra cuenda cuhva iyó noo noo yo, an cuvi ri yo ñu tyayii, an cuvi ri yo ñu ndahvi. ¹⁸ Nyoo nasama ra cuhva chiyo ndo, vatyí cuhva cuan ña vaha, Cuhva cha sanandoo Sutu chahnu ndo chi ndo cuví. Ta chitó ndo tyi Nyoo tyiyahvi ra tacuhva cuvi cacu añima yo. Soco ñima chihin xuhun cuaan o xuhun cuichin. Noo cha cundihi noo quivi cuvi cuan. ¹⁹ Soco cha tyiyahvi maa Nyoo chihin niñi ra Cristo. Ta yucuan cuvi noo cha vaha xaan ca. Ta ra Cristo cuví ra tari noo mbee luhlu quiti vaha, ñahri nu pehe ti, tyicuan caa ra Cristo, ñahri cuatyí ra soco chihí ra. ²⁰ Ta nyata ni cumañi ca chino ñuhu ñayivi chicun-yaa cuhva cha cucuvi chi ra Cristo tyehe caa. Soco ña cuvi cha numi ri. Nyacua nya vityin nu cuandihi quivi, chingo cava tandihi cuan cha cuenda cha vaha chi maa yo. ²¹ Cha cuenda ra Cristo ta chinó iñi ndo chi Nyoo. Vatyí ican ra sanandoto chi ra Cristo cha yahá chihí ra. Ta sacahnu Nyoo chi ra. Ta yucuan chaha chinó vaha iñi ndo chi Nyoo tyi cunaquehen ra chi ndo.

²² Maa Tatyí Ii Nyoo tyinyeé chi ndo ta cuví quichaha ndo tuhun cha

ndicha. Yucuan ta cuví cuñi ndo chi tahan ndo cuenda Nyoo chihin cha ni iñi ndo. Tyicuan caa cuñi chi cha cuñi ndo chi tahan ndo chihin cha vaha yihí añima ndo ta chihin tandihi fuerza ndo. ²³ Vatyí tari quivi cha nacacu chaa ndo, ñima tari cacu ndo chihin sutu ndo ihya ñuhu ñayivi, vatyí ra cuan numi ri chihi ra, soco nacacu chaa ndo chihin tuhun Nyoo cha ña tuhvá chihí vatyí tuhun Nyoo tyicuan ri maa iyó. ²⁴ Vatyí tyehe caa catyí tuhun Nyoo:

Tandihi ñayivi iyó siqui ñuhu ñayivi ihya cuví ñu tari cuhu.

Ta cha cahnu cha sacuvi ñu cuví chi tari ita.

Vatyí cuhu cuan na ityi, ta coyo ita cuan. (Ta tyicuan caa ñayivi, chihí ri ñu.)

²⁵ Soco tuhun Sutu Mañi yo tyicuan ri maa iyó.

Ican cuví tuhun cha cahán ndi chihin ndo: tuhun vaha cha sacacú Nyoo añima yo.

2

¹ Yucuan chaha na sandoo yo tandihi nuu cha quiñi caa. Ma sandavi ñaha yo chi ñayivi. Ma saha ri maa yo tyi vaha yo ta ña ndicha. Ma nyiyo iñi yo nyehe yo cha iyó chi inga ñayivi. Ñahri cuendu cahan yo. ² Soco tari cha lee cha ni cacu, nanducú vavaha chi cha caxin chi, tyicuan caa nducu ndo tuhun Nyoo tacuhva vatyí chihin cuan cuahnu ndo ta cohon nuu ca ndo chi Nyoo, nyacua nya cacu ndihi añima ndo, ³ tatu ndicha cha nacotó ndo vatyí Sutu Mañi yo, vaha xaan ñayivi cuví ra chihin yo.

Tari yuu nyitó, tyicuan caa cuví ra Cristo

⁴ Sayatyin ca ndo chi ndo chi Sutu Mañi yo. Vatyí cuví ra tari noo yuu nyitó. Ñayivi ña cuñi ñu cotyino ñu yuu cuan. Soco Sutu Mañi yo cuví ra tari noo yuu tyaqui cha nacachi Nyoo. ⁵ Ta nyoho tucu cuví ndo tari yuu nyitó. Ta maa Nyoo tari noo ra savahá vehe cuví ra. Ta yucuan

chaha cuhva ndo na sandu ñn ri ra chi ndo tacuhva cuvi ndo tari noo vehe nu coo ra. Na cu ñn ri ndo ta cuhva ndo cha sandu ii Nyoo chi ndo tacuhva cuvi sacuvi ndo tyiño nuu ra. Ta maa maa ri tyiño cha sacahnú ndo chi Nyoo cucunyaa ndo. Vatyí yucuan cuví cha tahán ñni Nyoo sacuvi yo chihin tunyee ñni maa ra Jesucristo. ⁶ Vatyí catyí tucu nuu tutu Nyoo tyehe caa:

Nyehe xihna, yuhu nacachí noo yuu cha chiñuhú ca ta tyaquí xaan ca, ta chaquí n yuu cuan nu cuasavahi vehi nya Sión.

Ta ñu chinó ñni chi ra cha cuví yuu cuan, ma quehen ñu ticahan nuu. Tyicuan caa catyí Nyoo tuhun ra Cristo nuu tutu ra.

⁷ Yucuan chaha, cha cuenda yoó cha chinó ñni yo chi ra Cristo ra cuví yuu cuan, chiñuhú xaan ra chi yo. Soco cha cuenda ñu cha ña chinó ñni chi ra, cuví ra tari noo yuu cha cahán Nyoo tuhun nu tutu ra ta catyí chi tyehe caa:

Yuu cha ña cacuñi ra casavahá vehe cotyiño ra, ícan cuví yuu cha chiñuhú ca, catyí chi.

⁸ Ta catyí tucu chi:

Ican ra cuví yuu cha cuaha xaan ñu cunañi chaha ta nduva ñu.

Cuví ra noo cava cha sanduvá chi ñu, catyí chi nuu tutu Nyoo.

Tari cha nduvá ñu cuví cuan vatyí chiñi ñu tuhun Nyoo, ta ña quichahá ñu. Vatyí tyicuan caa nyaá vatyí cusacuvi ñu cuan.

Ñáyivi cha yihí cuenda Nyoo

⁹ Soco nyoho cuví ndo ñáyivi nacachí vaha Nyoo. Ta tari tata sutu cuví ndo tyi sacuvi ndo tyiño nuu Nyoo, ra nyacá ñaha. Ta cuví tucu ndo noo ñáyivi ii nuu Nyoo. Vatyí cuví ndo ñáyivi chi maa ra, tacuhva vatyí cahan ndo tuhun cha vaha cha sacuví ra. Vatyí maa ra natava ra chi ndo nu ñaa ñni ta vityin cuahan ndo nu ndichin nu tyaquí. ¹⁰ Ta quívi ca cuan, cuví ndo ñáyivi cha ñima ri tuhun. Soco vityin ñáyivi chi Nyoo cuví ndo. Ta quívi cuan yori cundahvi cuñi nyehe chi ndo, soco

vityin Nyoo cundahvi cuñi ra nyehé ra chi ndo.

Nu catyí ra Pedro vatyí cooyo, soco sacuvi yo tyiño nuu Nyoo

¹¹ Yañi, cuñi xain chi ndo. Chicá noo ndo siquí ñuhu ñáyivi ihya, soco ñima ca ra ñuhu ñáyivi ihya cuví ndo. Soco andívi cuví ñuu ndo. Yucuan chaha catyí chi ndo ma cuhva ndo ityi chi coño ñuhu ndo vatyí sacuvi ndo cha ña vaha cha cuñi chi. Vatyí tari quívi cañi tahan cuan chihin ñima yo cuví cuan. ¹² Saha ndo cuenda cuhva iyó ndo mahñu ñu cha ña ñohó nuu Nyoo. Vatyí vasi cahán ña vaha ñu siquí ndo, ta catyí ñu vatyí ña vaha ndo, soco nyehé ñu cha vaha cha sacuví ndo ta cusacahnu ñu chi Nyoo nachaa chi quívi cha cuquichi nyehe ra cha sacuví yo.

¹³ Ta cha cuenda cha cuñi ndo chi Nyoo, quichaha ndo chi ra cuví tyiño ñuu nu iyó ndo. Quichaha ndo chi ra cuví tyiño, cuví ri ra rey cahnú ca, ¹⁴ o cuví ri noo ra tachi rey chi vatyí tachi tuñi ra chi ra iyó cuatyí o tatu ñahri cuatyí yo ma tachi tuñi ra chi yo, soco cucatyí ra tyi vaha yo. ¹⁵ Vatyí Nyoo cuñi ra vatyí chihin cha vaha nyacuví ndo ta sandihí ñu tondo cha cuví yuhu ñu, ñu cahán cha ña ndicha vatyí ña chitó ñu tuhun cahán ñu.

¹⁶ Coo ndo tari cha yori nyacá ñaha chi ndo, soco ñima cha cuenda cuan ta cusacuvi tucu ndo cha ña vaha. Soco sacuvi ndo tyiño nuu Nyoo. ¹⁷ Saha ndo ñáyivi chi tandihí ñáyivi. Cuñi ndo chi ñu yihí cuenda Nyoo. Saha ndo cuenda vatyí Nyoo nyehé ra tandihí cha sacuví ndo. Saha ndo ñáyivi chi ra nyacá ñaha.

Uvi tahan cuhva nyehé yo tindoho

¹⁸ Nyoho cha cuví ndo musu, cuhva ndo cha cunyaca ñaha chitoho ndo chi ndo, ta quichaha ndo chi ra, vasi xaan ra o vasi vaha ra. ¹⁹ Vatyí tatu cunyeé yo tindoho cha sanyehé ñáyivi chi yo cha cuenda cha sacuví yo cha vaha nuu Nyoo, yucuan cuví cha chaá nuu Nyoo. ²⁰ Soco tatu sacuví ndo noo cha ña vaha ta tachi tuñi ñu chi ndo, ñahri maa tuhun cha

cunyeé ndo t̄ndoho cha nyehé ndo cha cuenda cuan. Soco tatu nyehé ndo t̄ndoho cha cuenda cha sacuvi ndo cha vaha, ta cunyeé ndo chihin cha cama iñi ndo, ican ihya cuví cha vaha nuu Nyoo. ²¹ Vatyí nacana Nyoo chí yo vatyí coo yo tyehe caa. Vatyí tyicuan caa tucu nyehé ra Cristo t̄ndoho cha cuenda maa yo, na cutuhva yo ta quehen yo cha caá ra. ²² Maa ra ni noo cuatyí ña sacuvi ra. Ni noo chaha ña sandavi ñaha ra chí ninoo ñáyivi. ²³ Cuhva cha cahán ñu chí ra, ña nacahán xaan ra. Cuhva cha nyehé ra t̄ndoho, ña tyanahá ra chí ñu. Soco natyaa ra chí ra ndaha Nyoo, vatyí Nyoo tuhvá ra sacutuñi ra chí ñáyivi chihin cha ndaa ta chihin cha ndicha. ²⁴ Vatyí chata maa ra Cristo nicoso ndi maa cuatyí tandihi yo kuhva cha tacaá ra nu cruzi cuan. Tyicuan caa cuví tacuhva vatyí ma sacuvi ca yo cuatyí, ta coo yo noo ñáyivi vaha. Vatyí cha cuenda cha ñicuehe maa ra, yoó nduvaha yo. ²⁵ Vatyí quivi cuan chica noo ndo tari mbee cha cuanaá. Soco vityin nacuhva cuenda ndo chí ndo chí ra Cristo, ra cuví pastor cha sahá cuenda añima yo.

3

Yoso caa tahán chi coo ñu tandaha

¹ Tyicuan caa tucu nyoho, ñu iyó yñi. Quichaha ndo chí yñi ndo. Vatyí tatu ña quichahá ra tuhun Nyoo soco cunachino iñi ra cha cuenda cha nyehé ra kuhva iyó ndo. Ta ña chiñuhú ri cha cuví yuhu xaan ndo chihin ra. ² Vatyí nyehé ra tyi cachi iyó ndo ta sahá ndo ñáyivi chí ra. ³ Ta ma caca iñi ndo tuhun cha sandutyaqui ndo chí ndo kuhva nyehé ndo, cuví ri chihin cha iyo xaan sanduvií ndo xiñi ndo, o cuví ri cha sandutyaqui ndo chí ndo chihin cha tyaa ndo xuhun cuaan chí ndo, o cuví ri cha cuihno ndo sahva vaha xaan. Ma nducu ndo tandihi cuan. ⁴ Soco nducu ndo kuhva ndutyaqui ndo chihin kuhva vaha iyó ndo. Vatyí cha vita iñi yo ta cha taxi ri iyó yo, yucuan cuví cha quitá chichi

añima yo. Ta yucuan ña tuhvá cuan tiví. Vatyí ñahri nonga cha tyaqui ca nuu Nyoo tari cuan. ⁵ Vatyí tyicuan caa kuhva chiyo ñusihi cha yihí iñi chí Nyoo ta cha naha. Tyicuan caa sandutyaqui ñu chí ñu, ta quichaha ñu chí yñi ñu. ⁶ Tari cu Sara, quichaha ña chí ra Abraham yñi ña. Ta catyí ña: “Tata”, chí ra. Ta nyoho tari sehe ña cuví chí ndo tatu sacuvi ndo cha vaha tari maa ña. Ta ñahri cha yuhví ndo.

⁷ Ta tyicuan caa tucu nyoho ra iyó ñasihi. Cutuñi iñi ndo kuhva coo ndo chihin ñasihi ndo. Ta saha ndo ñáyivi chí ña, ñima vatyí yica ca ña cha nuu nyoho. Soco vatyí ñin ri naquehen ndo tumañi iñi cha chahá Nyoo chí ndo. Ta yucuan cuví ñáyivi iyó ndo. Vaha coo ndo tyehe caa, tacuhva vatyí ñin cuenda Nyoo tuhun chicán tahvi ndo chí ra.

Nu catyí ra Pedro yoso caa tahán chi coo yo

⁸ Nu ndihi tuhun, cuñí chí cha ñin ri kuhva caca xiñi tandihi ndo. Ta cundahvi cuñi ndo nyehe ndo chí tahan ndo. Cuñi ndo chí tahan ndo cuenda Nyoo tari cha yañi ndo cuví. Vita cahan ndo chihin ñu. Ta ma cahan saha ndo chí ndo. Vaha ñáyivi cuví ndo. ⁹ Ma sacuvi ndo cha ña vaha chihin ñu sacuvi chí ña vaha chihin ndo. Ni ma cahan ndo chí ñu tatu cahán ñu chí ndo. Soco cha vaha sacuvi ndo chihin ñu. Vatyí Nyoo nacana ra chí ndo vatyí cunaquehen ndo cha vaha cha iyó chí ra. ¹⁰ Vatyí catyí tuhun Nyoo tyehe caa:

Ñu cha cuñí coo noo ñáyivi chihin tusi iñi,

cuñí chí saha ñu cuenda kuhva cahán ñu.

Ta ma cahan ñu cha ña vaha, ta ni ma cahan ñu cuendu.

¹¹ Ta cuñí chí cha sandoo ñu cha ña vaha

ta sacuvi ñu cha vaha.

Nanducu ñu kuhva coo taxi ri ñu.

Ta ma saña ñu.

¹² Vatyí Sutu Mañi yo sahá cuenda ra chí ñu vaha.

Ta tyasohó ra nu chicán tahvi ñu chí ra.

Soco ñu sacuví cha ña vaha, xaan cuñí ra nyehé ra chi ñu.

¹³ ¿Yóo cha cuví sacuvi cha ña vaha chihin ndo tatu nyoho tyicuan ri nducú ndo cuhva sacuvi ndo cha vaha? ¹⁴ Soco vasi nyehé ndo tindoho cha cuenda cha sacuví ndo cha vaha, soco cucusí cuñi ndo. Ta ni ma nayuhvi ndo tatu tyanaha ñáyivi chi ndo. ¹⁵ Soco chichi ańima ndo sacahnu ndo chi ra Cristo ta cuhva ndo na cunyaca ñaha ra chi ndo. Tyicuan ri caça ińi ndo tuhun Nyoo tacuhva vatyí tatu ndaca tuhun noo ñu chi ndo ñáá tuhun chinó ińi ndo chi ra, soco cuví nacuhva ndo cuenda chi ñu chihin cha ña cahnu saha ndo chi ndo ta chihin cha ndicha sahá ndo ñáyivi chi ra. ¹⁶ Cachi coo ndo tacuhva cha ma yuhvi ańima ndo nuu Nyoo, vatyí tatu cahán ña vaha ñáyivi siqui ndo cha cuenda cuhva vaha iyó ndo chihin tuhun ra Cristo, soco suri maa ñu cucahan nuu ñu cha cuenda tuhun cahán ñu siqui ndo. ¹⁷ Tatu maa Nyoo cuñí ra cha nyehe yo tindoho, vaha ca cha nyehé yo cha cuenda cha sacuví yo cha vaha ta ñima ca cha cuenda cha sacuví yo cha ña vaha. ¹⁸ Vatyí suri ra Cristo nyehe ra tindoho ta chihí ra in chaha cuiri cha cuenda cuatyí yo. Ra vaha cuví ra ta chihí ra cha cuenda yo ñu iyó cuatyí. Vatyí tyicuan caa nuńa ra ityi nachaa yo ityi nuu Nyoo. Chihí coño ñuhu ra, soco nandoto tucu ra chihin Tatyí li ra. ¹⁹ Tyicuan ta chihin Tatyí li ra chahan ra chicahan ra chihin ańima cha ñohó vehe caa. ²⁰ Ta ican ñu cuan cuví ñu ña quichaha chi Nyoo quivi chiyo ra Noé ta tyembu chahnu. Ta nyatú Nyoo chi ñu nandu uvi ińi ñu cuatyí ñu cha ni ri ca cha cuahan chino barcu cha savaha ra Noé. Soco ña cuaha ñu cacu quivi sahvi ndutya ñuhu ñáyivi. Uńa tahan ri ñu cacu chihin ndutya vatyí nandaa barcu nu ñohó ñu nu ndutya cuan. ²¹ Ta tyicuan caa tucu maa yo tari quivi cacu yo chihin ndutya nu condutya yo. Cacu yo soco ñima cha cuenda cha nacatya yo coño ñuhu mecu yo. Soco cha cuenda cha chicán tahvi yo chi Nyoo na sanduvii ra ańima yo

ta sacacu ra chi yo cha cuenda cha nandoto ra Cristo. ²² Ta nandaa xica ra andivi, ta nyaá ra chiyo vaha Nyoo. Nyacá ñaha ra chi ángel ta tandihí cha nyacá ñaha chi ñáyivi.

4

Na sacuvi yo tyiño nuu tahan yo yoso cuhva chaha Nyoo chi yo

¹ Yucuan chaha tari nyehe ra Cristo tindoho chihin coño ñuhu ra, sandunye ndo ińi ndo tacuhva cuví cunye ndo nyehé tucu nyoho tindoho. Vatyí ñu nyehé tindoho chihin coño ñuhu, ña sacuví ca ñu cha quińi caa cha cuñí coño ñuhu ñu. ² Tacuhva vatyí cuví coo ñu cuhva cuñí Nyoo. Ta ma sacuvi ca ñu cuhva cuñí coño ñuhu ñu. ³ Vityin cha yaha chinyacuví xaan ndo cha quińi caa nu quichi chi. Sacuví ndo cuhva tahán ińi ñu ña ñohó nuu Nyoo. Ta chiyo ndo yoso cuhva cuñí ndo, cuaha viciu sacuví ndo, cuaha cha quichi cuví ińi coño ñuhu ndo cha quińi caa chinyacuví ndo. Chińi ndo chihin ndixi. Maa maa ri vico chiyo ndo. Ta quińi xaan sacahnu ndo xitohyo cha ña tahán chi sacahnú ndo. ⁴ Ta vityin iyo cuñí ñu ña ñohó nuu Nyoo vatyí ña cutahán ca ndo chihin ñu ta ña sacuví ca ndo cha quińi caa cuan. Ta yucuan chaha cahán ña vaha ñu siqui ndo. ⁵ Soco nyaá nacuhva ñu cuenda chi ra cha nyatú tuhva quivi sacutuńi ra chi ñu nyitó ta chi ñu chihí. ⁶ Yucuan chaha sacoto ra Cristo tuhun vaha chi ñu ndiyi ñandihí. Vatyí tacuhva cuví coo ańima ñu tari iyó Nyoo, vasi cha cutuńi chi ñu tari cutuńi chi tandihí ñáyivi iyó siqui ñuhu ñáyivi quivi chihí coño ñuhu ñu.

⁷ Soco cha cuyatyin cha cundihi tandihí maa. Yucuan chaha cachi coo ndo ta cunyaa vaha ndo tyiño cha chicán tahvi ndo. ⁸ Ta cha xihna ri tahán chi cha cuñi xaan ndo chi tahan ndo. Vatyí tatu cuñí yo chi tahan yo, cuaha xaan chaha cusaha yo ticahnu ińi chi ñu, tyi maa Nyoo cuñí ra chi yo ta cuaha xaan chaha sahá ra ticahnu ińi chi yo. ⁹ Tatu chaá noo ñáyivi vehe

ndo, vaha tyiñuhu ndo chi ñu ta ma cuñi ndo tyi sayangá ñu chi ndo. ¹⁰ Ta tahan tahan yo na sacuvi yo tyiño nuu inga yo, yoso cuhva cha chahá Nyoo chi yo. Vatyí cuñí chi cha cotyiño yo s̄in s̄in cha vaha cha chahá ra chí noo noo yo cha cuenda cha vaha chi inga tahan yo. ¹¹ Tatu chaha Nyoo vatyí ñihi vahun tuhun cahun chihin ñáyiví, cahan soco maa maa ri tuhun cha chahá Nyoo. Tatu chaha ra tyi sacuvun tyiño nuu ñáyiví, na sacuvun chihin fuerza cha chahá ra. Tandihí cha sacuví ndo, sacuvi ndo tacuhva vatyí chihin tandihí cha nyacuví ndo sacahnú ndo chi Nyoo cha cuenda ra Jesucristo. Chi maa Nyoo tahán chi sacahnu yo. Ta na cunyaca ñaha ra chihin tunyee iñi ra tyicuan ri maa. Ta na cuví chi tyicuan caa.

Cuví cus̄i cuñi yo tatu nyehé yo t̄ndoho cha cuenda ra Cristo

¹² Yañi, cuñí xain chi ndo. Ma iyo xaan cuñi ndo tatu vachi t̄ndoho ñihi siqui ndo. Ma cuñi ndo vatyí ña tahán chi nyehe ndo t̄ndoho. ¹³ Soco cus̄i cuñi ndo vatyí cuví nyehe ndo t̄ndoho tari nyehe ra Cristo t̄ndoho. Vatyí tyicuan caa ta cuví cus̄i tucu cuñi ndo na nyehe ndo cha cahnu cuví ra quiví cuquichi ra. ¹⁴ Tatu cahán ña vaha ñu siqui ndo vatyí nyicón ndo chi ra Cristo, cus̄i cuñi ndo, vatyí tyaqui xaan nyaá Tatyí li chihin ndo. Maa ñu cuan cahán ña vaha ñu siqui ra Cristo, soco nyoho sacahnú ndo chi ra. ¹⁵ Soco tatu nyehé ndo t̄ndoho cha tyicuan caa, vaha, ta ñima ca cha nyehé ndo t̄ndoho cha cuenda cha chahñi ndo, o cha suhu ndo, o cha sacuví ndo cha ña vaha, o cha tyihí ndo chi ndo nu ña tahán chi. ¹⁶ Soco tatu nyehé ndo t̄ndoho cha cuenda cha yihí ndo cuenda ra Cristo, ma cucahan nuu ndo. Soco sacahnu ndo chi Nyoo, vatyí chahá chí cuhva nyehe ndo chiin t̄ndoho cha cuenda maa ra Cristo.

¹⁷ Vatyí cha chaá quiví cha quichahá sacutuñi Nyoo chi tandihí ñáyiví. Ta xihna ca chi yoó cha cuví yo ñu yihí cuenda ra. Soco

tatu tyehe caa tachí tuñi Nyoo chiin ri chí maa yo, ¿yoso caa cucuvi chí ñu cha ña quichahá tuhun Nyoo? ¹⁸ Tatu ȳi cacú añima ñu vaha, ¿yoso caa cucuvi chí ñu quiñi iyó, ñu iyó cuatyí? ¹⁹ Yucuan chaha tatu nyehé ndo t̄ndoho cuhva cuñí Nyoo, cuñí chí cha sañihi ca ndo sacuvi ndo cha vaha. Ta tyaa ndo añima ndo ndaha Nyoo. Maa ra savaha chí yo, ta maa ra ndicha tuhun cahán ra ta cusacuví ra tari cuhva catyí ra.

5

Nu chahá ra Pedro tuhun chi yo

¹ Yucuan chaha chahí tuhun chí ra chahnu nu nyicú ndo. Vatyí ra chahnu cuví tucu yuhu. Ta cuví cha ndaa vatyí nyehí tandihí t̄ndoho cha cuví chí ra Cristo. Ta cucutahin chihin tandihí ca ra quiví cunyicu yo chihin ra Cristo na quichi ra inga chaha chihin cha cahnu cuví ra. ² Tari noo ra sahá cumi mbee, tyicuan caa saha cumi ndo chí ñu yihí cuenda Nyoo ñu yihí ndaha ndo. Ta sacuvi ndo chihin cha iyo vaha iñi ndo tari cuhva cuñí Nyoo, ta ñima chihin fuerza. Ta ni ñima cha cuenda cha cuñí ndo xuhun. Soco sacuvi ndo tyiño chihin cha ñi iñi ndo. ³ Ta ñima tari cha maa ndo nyacá ñaha ndo chí ñu sahá cumi ndo. Soco chihin cuhva vaha iyó ndo chihin Nyoo, sañaha ndo chí ñu cuví mbee sana Nyoo yoso caa tahán chí coo ñu. ⁴ Ta quiví quichi ra cuví nuu chí ra sahá cumi mbee, cunaquehen ndo noo cha vaha, noo cha tyaqui cha cucuhva Nyoo chí ndo. Noo cha ma tiví ca maa.

⁵ Tyicuan caa tucu nyoho ñu tyivaa, quichaha ndo chí ñu chahnu. Ta ñima iin ri maa ñu tyivaa soco tandihí ri ndo quichaha ndo chí tahan ndo. Ta ndahví saha ndo añima ndo. Vatyí: Nyoo ña cuñí nyehe ra chí ñu cahnu sahá chí. Soco tyinyeé ra chí ñu ndahví sahá chí.

⁶ Ndahví saha ndo añima ndo nuu Nyoo. Ta cuhva ndo chí ndo na cunyaca ñaha ra chí ndo tacuhva cuví sacahnu ra chí ndo quiví cha tahán

chi. Tyi maa ra iyó xaan fuerza chi ra. ⁷ Cuhva ndo tandihí tindocho cha chicá xiñi ndo chi Nyoo. Vatyí maa ra niñi cuñi ra chihin ndo.

⁸ Cachi cohon iñi ndo ta saha vaha ndo cuenda nya cha vaha ta nya cha ña vaha, vatyí cuihna, ra xaan iñi chi ndo, chicá noo ra tari noo ndicaha xaan nanducú ti yóo chi cachi ti, tyicuan caa chicá noo ra ña vaha, nducú xaan ra cuhva saha ganaa ra chi ndo. ⁹ Soco ñihi cuñanyaa ndo chihin cha niñi iñi ndo chinó iñi ndo chi Nyoo tacuhva cuví chasaha ndo chi ra ña vaha. Ta nacoto ndo vatyí tandihí ñu ñohó cuenda ra Cristo nicahnu ñuhu ñayivi, nyehé tucu ñu cuan tindocho tari maa ndo. ¹⁰ Soco Nyoo tyinyeé ra chi yo, ta cha yaha nyehe ndo tindocho suhva ri quivi, Nyoo cusanducuti ca ra chi ndo, ñihi ca cuncunyaa ndo chihin ra ta cunacuhva ca ra fuerza chi ndo. Ta ican Nyoo cuví ra chahá tandihí cha vaha chi yo ta maa ra cana chi yo tyi cu ñi ri yo chihin ra Cristo tacuhva coo yo nu tyaqui chihin ra tyicuan ri maa. ¹¹ Na sacahnu yo chi ra ta na cunyaca ñaha maa ra tyicuan ri maa. Ta na cuví chi tyicuan caa.

Na coo cha taxi ri cuñi añaima tandihí ri ndo cha ñi ri cuví ndo chihin ra Jesucristo.

Ta na cuví chi tyicuan caa.

Nu ndihí chahá ra Pedro nocumi chi ñu

¹² Sacuhín carta ihya chi ndo chihin ra Silvano, yañi yo. Ta cha cuenda chi yuhu, maa ra cuví noo ra niñi xaan iñi nyicón chi ra Cristo. Tyají suhva nu tutu ihya chi ndo vatyí chahí tuhun chi ndo ta catyí chi ndo vatyí cha vaha cha ñihí ndo cuví cha ndicha vaha cha chahá Nyoo chi yo cha cuenda cha cuñi ra chi yo. Ma saña ndo ihya.

¹³ Vachi nocumi chi ndo sahá ñu yihí cuenda Nyoo nya nu cuví ityi Babilonia. Tari nacachi Nyoo chi maa ndo, tyicuan caa nacachi tucu ra chi ñu cuan. Ta vachi nonga nocumi sahá ra Marcos sehi cha cuenda Sutu Mañi yo.

¹⁴ Cuhva ndo nocumi chi noo noo tahan yo chihin cha cuñi ndo chi ñu.

Carta Cha Cu Uvi Cha Sacuhun Ra Apóstol Pedro Chi Ñáyiví Yihí Cuenda Nyoo

*Nu tyaá ra Pedro noo tutu chi ñu
yihí cuenda Nyoo*

¹ Yuhu ra Simón Pedro sacuví tyiño nuu ra Jesucristo. Ta cuví noo apóstol chí ra. Cuñí chí catyí tyi tachí ra chíi vatyí caque tyiño ra. Tyaí tutu ihya chí nyoho cha chinó ñi ndo chí Nyoo tari cuhva cha tyaquí chinó ñi nyuhu. Vatyí yucuan cuví cha chino ñi yo vatyí vaha ra Jesucristo, ra cuví Nyoo, ra sacacú chí yo. ² Na naquehen ca ndo cha vaha cha chahá Nyoo chí yo. Ta na coo ca cha taxi ri ñima ndo cha cuenda cha ñohó nuu ndo chí Nyoo ta chí Sutu Mañi yo Jesús.

Yoso caa coo ñu yihí cuenda Nyoo

³ Nyoo chihin tunyee ñi ra, chaha ra tandihí cha chiñuhú chí yo tacuhva cuví coo cachi yo nuu ra ta saha yo ñáyiví chí ra. Tandihí ihya ñihí yo cha cuenda cha chicohon nuu yo chí ra cha cana chí yo. Vatyí chicohon nuu yo tyi cahnu cuví ra ta tyaquí xaan cha sacuví ra. ⁴ Ta chihin tandihí ihya, chaha ra cha catyí ra tyi cuhva ra chí yo. Ta cahnu xaan ta yahvi xaan nyaá cuan. Vatyí cha cuenda ihya nanduvi yo tari maa ra. Vatyí sacanyaha ra cha quiñi caa cha quichí cuví ñi yo, ta ma tiví yo tari tiví ñáyiví iyó siquí ñuhu ñáyiví ihya. ⁵ Ta yucuan chaha cuñí chí cha chinó ca ñi yo chí Nyoo ta nducu yo cuhva cha coo cachi yo. Yaha cuan cuñí chí cha nducu yo cuhva ta cutuñi vaha ñi yo cuhva cuñi Nyoo chihin yo. ⁶ Ta yaha cuan cuñí chí cha saniñi yo cha cunyaca ñaha yo coño ñuhu yo ta cuhva chicá xiñi yo. Yaha cuan ta nducu yo cuhva cha cucama ñi yo. Yaha cuan ta nducu yo cuhva cha cuiti ca coo yo nuu Nyoo. ⁷ Yaha cuan ta nducu yo

cuhva cha cuñi yo chí tahan yo. Yaha cuan nducu yo cuhva cha cuvita xaan ñima yo chíhin tandihí ñáyiví.

⁸ Tatu tyehe caa iyó ndo ta tyicuan ri nducú ndo cuhva cha coo tandihí ihya chí ndo, Nyoo cucotyíño xaan ra chí ndo. Ta tatu sacuvi ndo tyehe caa, ña caha xaan ri chicohon nuu ndo chí Sutu Mañi yo Jesucristo. ⁹ Soco ñu cha ñahri ihya iyó chí, cuví ñu tari noo ra cuaa. Ña cutuñi ñi ñu cha tahán chí coto ñu. Ta naa ñi ñu tyi sandachí Nyoo cuatyí ñu ta ityi chata ca. ¹⁰ Yucuan chaha yañi, saniñi ndo coo ndo tyehe caa. Tyicuan ta cundicha vaha tyi cana Nyoo chí ndo ta nacachí ra chí ndo. Vatyí tatu sacuví ndo tyehe caa, ma canacava maa ndo. ¹¹ Tyicuan caa ta totyehe ri cuhva Nyoo cha quihvi ndo nu nyacá ñaha Sutu Mañi yo Jesucristo tyicuan ri maa. Maa ra cuví ra sacacú chí yo.

¹² Yucuan chaha cuasanicohon que ñi ndo tuhun ihya, vasi cha chitó ndo, ta ñi ñi ndo sacuví ndo tuhun ndicha cha cutuhva ndo. ¹³ Ta cuhva cha cuñi mai, vatyí cha ñi ri ca cha iyé, vaha sanicohin ñi ndo coto naa ñi ndo tuhun ihya. ¹⁴ Vatyí chité tyi ña naha ca ta cusandoi ñáyiví ihya. Vatyí tyicuan caa sacoto Sutu Mañi yo Jesucristo chíi. ¹⁵ Soco cuasaniñi tacuhva vatyí tatu yahá chíhi soco nicohón ñi ndo tuhun ihya.

*Nu nacatyí ra Pedro yoso caa
nyehé ra cha cahnu cuví ra Cristo*

¹⁶ Ñima tyisu ri canatava ndi quiví sacoto ndi tuhun ra Jesucristo chí ndo. Vatyí cha nyehé vaha ndi chíhin chíti nuu ndi cuví. Vatyí nyehé ndi cha cahnu xaan cuví Sutu Mañi yo Jesucristo. Ta sacoto ndi chí ndo tyi iyó xaan tunyee ñi chí ra ta cuquichi ra inga chaha. ¹⁷ Vatyí nyehé ndi nu sacahnu xaan Nyoo Sutu yo chí ra. Ta tyaquí xaan tyaquí xaan cuví nu cahan Nyoo ta catyí ra: “Ican ihya Sehi. Ta cuñi xain chí ra. Ta si cuñi chíhin ra”, catyí Nyoo tuhun ra Jesús quiví cuan. ¹⁸ Ta nyuhu chíhi ndi ndusu Nyoo cha quichí ityi andiví

quíví cha nyicú ndi chihin Sutu Mañi yo nu yucu ii cuan.

¹⁹ Ta siin ri cumí yo nonga tuhun cha ndicha vaha cha catyaa ra profeta. Nyaá vaha nu tutu nu cahán chi tuhun ra Cristo. Ta vaha sacuví ndo tatu quichahá vaha ndo tuhun ihya. Vatyí cuví chi tari noo ñuhu ndichin cha cayú nu ñaa iñi nyacua nya cundichin ta caña ra Cristo tari caña tiño cañu cha ñaa ca, vatyí sandichín ra añima yo. ²⁰ Soco coto vaha ndo vatyí cha minoo tuhun ri yo, ma cuví catyí yo ñáá cha cuñí chi catyí noo tuhun cha nyaá nu tutu Nyoo. ²¹ Vatyí ra cacuvi profeta ta cha naha, ña cañan ra cuhva cuñí ri maa ra. Soco cuhva cuñí Nyoo cañan ra. Ta Tatyí li saquehen ityí chi ra.

2

Ra casañahá cha ña ndicha (Judas 4-13)

¹ Soco cachiyó tucu ra profeta cuendu nu nyicu ñu Israel ta cha naha, cacatyí ra tyí cuví ra profeta Nyoo. Ta tyicuan caa cuacoo tucu ra sacuahá ra sañahá cuendu nu nyicu ndo. Xehe ri cuasañaha ra tuhun cha ña ndicha cha cuví satívi chi ndo. Ta cuacatyí ra tyí ña ndicha Sutu Mañi yo ra sacacú chi ra. Yucuan chaha numi ri cucunaa ra cuan. ² Ta cuaha xaan ñu cucunyicon ñu chi ra chihin cha quiñi caa cha sacuví ra. Ta cuaha xaan ñu cacahan ña vaha ñu siqui tuhun cha ndicha vaha ra Cristo. ³ Ta chaha cha iyo cuñi ra xuhun, ta cusandavi ñaha ra chi ndo chihin cha casañahá ra maa ri cha ña ndicha. Soco nyatú Sutu Mañi yo tachi tuñi ra chi ra vatyí cha naha iyó maa tuhun cha cunaa ra.

⁴ Vatyí ni ri chi ángel cha chicoo cuatyí quíví cuan ta ña saha Nyoo ticahnu iñi. Soco tuchi ra chi ra anyaya. Ta sandoo ra chi ra nu ñaa iñi, nuhñi ra chihin cadena nyacua nya quíví cutuñi chi ra nuu Nyoo. ⁵ Ta ni ña saha Nyoo ticahnu iñi chi ñu chiyo ta cha naha. Yucuan chaha tachi ra savi xaan siqui ñáyívi quiñi iyó cuan. Ta sacacú ra chi noo

tuhun ri maa ra Noé, ra cha cahan tuhun vatyí coo yo noo ñáyívi cachi. Ta cacú tucu ucha ca ñáyívi ñandihí.

⁶ Ta tyicuan caa tucu sacunaa Nyoo ñuu Sodoma ta ñuu Gomorra. Vatyí chahmí ra nyacua nya cha ndihí maa nduví ñiyaa. Tacuhva vatyí cunyehe ñáyívi quiñi iyó cha cucoo nu cuahan ca chi. ⁷ Soco sacacú ra chi ra Lot vatyí cuví ra noo ra vaha nuu ra. Ta cuihya cuñí ra Lot nyehé ra cuhva iyó ñu quiñi iyó cuan. ⁸ Ta ndi quíví cuihya cuñí añima ra Lot quíví chiyo ra ñuu cuan, cha cuenda cha nyehe ra ta chiñi ra cha quiñi caa nyacuví ñu cuan. Vatyí maa ra, ra vaha cuví ra. Ta maa ñu maa maa ri cha ña vaha nyacuví ñu. ⁹ Ta tyicuan caa cuví sacacu Nyoo chi yo tatu iyó yo cuhva cuñí ra. Ta ñu quiñi iyó naquehén vaha Nyoo chi ñu vatyí cutachi tuñi ra chi ñu quíví cutuñi chi ñu nuu ra.

¹⁰ Ta yaha ca cutachi tuñi Nyoo chi ñu nyicón cha ña vaha cha cuñi coño ñuhu, ñu ña cuñi cha cunyaca ñaha Sutu Mañi yo chi. Ta cañu sahá ñu chi ñu ta sacuví ñu maa ri cuhva cuñi maa ñu. Ta ñu cuan ña yuhví ñu cahan ña vaha ñu siqui ra nahnu ca ican saha maa ñu cuví ri siqui ángel, cuví ri siqui tatyí ña vaha, cuví ri siqui Nyoo. ¹¹ Soco ángel, cañu ca cuví ra cha nuu ñáyívi, soco ña cacaña iñi ra cahan ña vaha ra siqui ra nahnu ca cuan chihin nuu Sutu Mañi yo.

¹² Soco ra cahán cuendu nu nyicu ndo cuví ra tari quití cha ña cutuñi iñi ta sacuví ti cuhva cuñi maa ti. Vatyí quití, ¿ñáá cuenda iyó ti? Iyó ti vatyí tin rayí chi ti, ta cahñi ra chi ti. Tyicuan caa maa ra cuan. Cacahán ña vaha ra siqui cha ña cutuñi iñi ra. Ta cucúvi ra tari chihí quití.

¹³ Cunyehe ra tindoho tari sanyehé maa ra tindoho chi inga ñáyívi. Ta si xaan cacuñi ra chihin cha quiñi caá nyacuví ra nu tuvi. Ticahan nuu chahá ra, tatu cha cutahan ra chihin ndo nu iyó ndo vico. Nyaá vavaha ra tusi iñi. Soco ña ndicha cuhva sañahá ra.

¹⁴ Ta tandihí ri ñusihi cha nyehe ra

ta quichi cuvi iñi ra. Ña chitatú ra cha casacuvi ra cha quiñi caa. Casandaví ñaha ra chi ñu ña ñihi nyaá chihin Nyoo. Yatyí xaan ra cha nducu ra cuhva maa maa ri cha cuenda maa ra. Nyaá cha cunaa ndihi ra minoo quivi. ¹⁵ Casandoo ra cuan ityi vaha ta naquehen ra ityi nu cucunaa ra. Casacuví ra tari sacuvi ra Balaam sehe ra Beor. Vatyí cuñí ra Balaam saha ganaa ra xuhun chihin cha ña vaha cha nyacuví ra. ¹⁶ Tyicuan ta noo burra nacahan ti chihin ra, tari cahán ñáyivi, ta ña chaha ti cha cahun ca ra Balaam chihin cuhva loco chicá xiñi ra.

¹⁷ Ta tyicuan caa tucu maa ra cha nyicú chihin ndo. Cacuví ra tari noo yavi ityi cha ñahri ndutya ñohó. Ta cuví ra tari noo vico cha tyandaha tatyí ñihi chi. Soco cha nyaá cha cohon ra nu ñaa iñi cahnu tyicuan ri maa cha cuenda cha nyacuví ra tyicuan caa. ¹⁸ Yaa vavaha cahán ra soco tandihi tuhun cahán ra cha ñima ri tuhun cuví. Ta chihin vicio ta chihin cha quichi cuvi iñi coño ñuhu yo casandaví ñaha ra chi ñu cha yaha quita mahñu cha quiñi caa. ¹⁹ Ta tyiyuhú ndihi ra chi ñu na cunyacuvi ca ñu cha quiñi caa vatyí yori nyacá ñaha chi ñu, catyí ra. Soco suri maa ra chahá ra cha cunyaca ñaha cha quiñi caa chi ra. Vatyí tatu chahá yo cha cunyaca ñaha noo cha cunyaca ñaha chi yo, musu cuan cuví chi yo. ²⁰ Vatyí ñu cha chicohon nuu chi Sutu Mañi yo Jesucristo, ra sacacú chi yo, cha yaha sandoo ñu cha quiñi caa ñáyivi ihya. Soco tatu natin tucu ñu tuhun ñáyivi ihya inga chaha, quiñi ca nanduvi ñu ta ñima ca ta cuvi maa. ²¹ Vaha taxin ca tyehe ta ña chicohon nuu ñu ityi vaha cuan, ta ñima ca cha yaha chicohon nuu ñu ta nacuhva ñu chata ñu tuhun cha chaha Nyoo chi ñu. ²² Soco cuví chi ñu tari cuhva catyí noo tuhun cha iyó ñáyivi: “Ina nduchan ti, ta nacachi tucu ti cha nduchan ti. Ta quini chityi ti, ta ndihvi tucu ti nu nyahyu inga chaha.”

3

Quivi cuquichi tucu Sutu Mañi yo

¹ Yañi, cuñí xain chi ndo. Ta ihya cuví carta cha cu uvi sacuhín chi ndo. Ta nu nanduvi tahan carta चाहí tuhun chi ndo tacuhva vatyí caca vaha xiñi ndo. ² Ta nicohon iñi ndo tuhun cha cahán ra cacuví profeta Nyoo, ta cha naha. Ta nicohon tucu iñi ndo tuhun cha sañaha nyuhu chi ndo. Vatyí cuví ndi apóstol cuenda Sutu Mañi yo Jesucristo ra sacacú chi yo.

³ Coto xihna ndo vatyí nu cundihí ca chi quivi cuquichi ñáyivi cucuacu nyaa ñu tuhun Sutu Mañi yo. Cucoo ñu yoso cuhva cha quiñi caa cha cuñí coño ñuhu ñu. ⁴ Ta cucatyí ñu: “Ra Jesucristo catyí ra vatyí cuquichi ra inga chaha. ¿Ta nya nyaá ra vityin? Vatyí nyata cachihí sutu chahnu yo ta nyata chino ñuhu ñáyivi ta nya vityin ta cuhva caa ri maa”, cucatyí ñu chi ndo. ⁵ Vatyí maa ñu ña cuñí ñu coto ñu vatyí ta tyembu chahnu cahán Nyoo ta savaha ra andivi ta ñuhu ñáyivi. Quita ñuhu ñáyivi chichi ndutya ta chihin ndutya chino chi. ⁶ Soco cha yaha savaha Nyoo ñuhu ñáyivi ta suri chihin ndutya cuanaa ñáyivi cuan quivi coon savi xaan. ⁷ Soco andivi ta ñuhu ñáyivi cha iyó vityin sahá cumi vaha Nyoo vatyí suri chihin ñuhu cucayu chi quivi cutuñi chi ñáyivi nuu ra. Tyicuan ta ñuhu cha cayu cuan cusanaa chi chi ñu ña quichahá chi Nyoo.

⁸ Soco yañi, cuñí xain chi ndo. Ta cuñí vatyí ma naa iñi ndo vatyí cha cuenda Sutu Mañi yo noo quivi tari cha noo mil cuiya cuví cuan, ta cha noo mil cuiya tari cha noo quivi cuví cuan chi ra. ⁹ Ñima cha ña cuñí ñaha Sutu Mañi yo quichi ra. Vasi yihí ñu chicá xiñi ñu cha tyicuan caa. Soco Sutu Mañi yo nyatú ra chi yo vatyí ña cuñí ra cha cunaa ni noo yo. Cuñí ra vatyí tandihí yo ndu uvi iñi yo cuatyí yo ta nasama yo cuhva iyó yo.

¹⁰ Soco quivi cuquichi Sutu Mañi yo, tari cuaquichi noo ra suhu cha cha cuaa, tyicuan caa cucuvi. Vatyí

sana iñi yo ta cuquichi ra. Tyicuan ta cucunaa andivi. Iyo xaan cucachan cuhva cuan. Ta cucayu tandihí cha iyó andivi. Cundutya ndi cuii chihin cha ihñi xaan. Ta tyicuan caa cucayu tucu ñuhu ñayivi ta tandihí cha iyó nuu chi.

¹¹ Ta tyicuan caa cutani tandihí. Yucuan chaha cuñi chi vatyí cachi coo yo tari cuhva cuñi Nyoo. ¹² Cuatu tuhva yo na chaa quivi quichi Nyoo. Nducu yo cuhva cha sanumi ra quichi ra. Quivi cuan cunaa andivi chihin ñuhu. Tandihí cha iyó cundutya chihin cha ihñi. ¹³ Soco yoó nyatú yo noo andivi chaa ta noo ñuhu ñayivi chaa cha catyi Nyoo tyi cucuhva ra. Ta maa maa ri cha vaha chi Nyoo cucoo yucuan.

¹⁴ Yucuan chaha yañi, cha ni ri ca cha nyatú ndo na quichi Sutu Mañi yo, sanñi ndo tacuhva vatyí quivi quichi ra, vii iyó ndo chihin ra ta ñahri cha iñi ndo ta ñahri cuatyí ndo. ¹⁵ Ta tñin vaha ndo cuenda, vatyí Sutu Mañi yo nyatú ra chi yo vatyí cuñi ra vatyí cuaha ca ñayivi cacu. Ta tyicuan caa tucu catyi ra Pablo yañi yo nu tutu cha sacuhun ra chi ndo. Vatyí chihin cha chiñi tuñi cha chaha Nyoo chi ra tyaa ra. ¹⁶ Ta tandihí ri nu carta ra ta cahán ra tuhun ihya chihin ndo. Vasi yihí tuhun cha yhi vavaha cutuñi iñi yo. Ta ñu cha ña cutuñi iñi, ñu cha ña ñihi nyaá chihin Nyoo, siin caa cuhva natyihí tuñi iñi ñu tuhun cuan. Ta suri tyicuan caa sacuvi tucu ñu chihin tuhun cha tyaa inga ra nu tutu tuhun Nyoo. Siin caa cuhva natyihí tuñi iñi ñu. Ta cha tyicuan caa, sacunaá ñu suri chi maa ñu.

¹⁷ Yucuan chaha yañi, vityin cha chitó ndo tuhun ihya cha ni cumañi ca cuvi, saha ndo cuenda chi ndo, coto cunyicon ndo cuhva sandavi ñaha ra quiñi caa cuan, ta coto sandoo ndo cuhva vaha cha cuahan ndo. ¹⁸ Soco cohon nuu vaha ca ndo chi Sutu Mañi yo ra Jesucristo ra sacacú chi yo. Ta cuahnu ca ndo chihin tumañi iñi cha chahá ra chi ndo. Na

sacahnu yo chi ra vityin ta tyicuan ri maa. Ta na cuvi chi tyicuan caa.

Carta Cha Xihna Ri Cha Tyaa Ra Apóstol Juan

Ñayivi chaa coo yo

¹ Ihya tyaá ndi tuhun cha cha iyó maa quivi cha quichaha tandihi. Ta cuví chi tuhun cha chiñi ndi ta cha nyehe ndi chihin nuu ndi; vatyí nyehe ndi ta tin ndi chihin ndaha ndi. Ta ican tuhun ihya cuví tuhun cha chahá ñayivi chaa coo yo. ² Ñayivi chaa ihya quetuví quivi quichi ra Cristo. Maa ndi nyehe ndi ta chahá ndi cuenda tuhun chi; ta sacotó ndi tuhun ñayivi chaa cha ma naa ca maa ihya chi ndo. Vatyí ñayivi ihya, nyaá chi chihin Sutu yo Nyoo, ta vityin tuví chi nu nyicú yo. ³ Nacatyí ndi chi ndo cha nyehe ndi ta cha chiñi ndi tacuhva na cu in ri ndo chihin ndi, tari maa ndi, ndicha cuí vatyí in ri cuví ndi chihin Sutu yo Nyoo ta chihin Sehe ra, ra Jesucristo. ⁴ Ta tyaá ndi tuhun ihya chi ndo tacuhva na coo tandihi tusi ñi cha chahá Nyoo chi ndo.

Nyoo, ñuhu ndichin cuví ra

⁵ Ican ihya cuví tuhun cahán ra Cristo chihin ndi. Ta chiñi ndi ta sacotó ndi chi ndo: Nyoo maa ri ñuhu ndichin iyó nu nyaá ra. Ta ñahri cha ñaa ñi, (ñahri cha ña vaha yihí ñi ra cuví cuan). ⁶ Tatu catyí yo vatyí in ri cuví yo chihin ra, soco sacuví yo cha ña vaha, nu ñaa ñi chicá noo yo cuví cuan. Sandaví ñaha yo. Ta ñahri tuhun ndicha cahán yo. ⁷ Soco tatu nu ndichin iyó yo, tari maa Nyoo iyó ra nu ndichin, tyicuan ta in ri cuví yo chihin tahan yo, ta ñi ra Jesucristo Sehe Nyoo, nacatyá chi ndi cuí maa cuatyí yo.

⁸ Tatu catyí yo vatyí ñahri cuatyí yo, suri chi maa yo sandaví ñaha yo, ta ñahri cha ndicha nyaá ñi yo. ⁹ Soco tatu nahmá yo cuatyí yo nuu Nyoo, yihí ñi yo chi ra vatyí vaha ra

ta ña sandaví ñaha ra, soco sacuví ra cuhva catyí ra, ta cusaha ra ticahnu ñi cuatyí yo ta cusandachi ra ndi cuí maa cha quiñi caa yo. ¹⁰ (Nyoo catyí ra tyi iyó cuatyí yo), ta tatu catyí yo vatyí ñahri cuatyí yo, sahá yo tuhun tyi Nyoo, cuendu ra. Ta tuhun cahán ra, ñahri maa nyaá ñi yo.

2

Ra Cristo cuví ra cahán chaha yo

¹ Sehe nyihi, sacoté tuhun ihya chi ndo, tacuhva ma sacuví ndo cuatyí. Soco tatu chicoo cuatyí minoo ndo, ma yuhvi ndo, vatyí iyó ra cahán chaha yo nuu Nyoo. Ta ican ra cuví ra Jesucristo, ra vaha. ² Ta maa ra cuví ra chahnyá cuatyí yo, vatyí chihí ra tyiño nuu yo cha cuenda cuatyí yo. Ta ñi cha cuenda maa ri maa yo, soco cha cuenda tandihi ñayivi.

³ Tatu quichahá yo tuhun cahán Nyoo, ñohó nuu yo chi ra. ⁴ Soco tatu noo ra catyí ra: “Yuhu, ñohó nui chi Nyoo”, soco tatu ña quichahá ra tuhun cahán ra, cuví ra noo ra cuendu. Ta ñahri tuhun ndicha caá ñi ra. ⁵ Soco ñu naquehén vaha tuhun cahán Nyoo, ican ñu cuan cuví ñu cuí chi ra chihin cha ñi ñi. Ta cha tyicuan caa chitó yo tyi in ri cuví yo chihin ra. ⁶ Yoo cha catyí vatyí in ri cuví chihin Nyoo, tahan chi coo ra tari cuhva chiyo maa ra Jesucristo quivi chicá noo ra siqui ñuhu ñayivi.

Tuhun chaa cha cuí yo chi tahan yo

⁷ Yañi yo, ñi noo tuhun chaa sacoté chi ndo, soco cuví chi noo tuhun chahnu cha chitó ndo nyata quivi xihna ri. Ta ican tuhun chahnu ihya cuví tuhun chiñi ndo. ⁸ Soco tari noo tuhun chaa cuví chi. Ta sacuví ra Cristo, ta chaha ra cha sacuví tucu maa ndo ñandhi. Ta cha tyicuan caa, cha ñaa ñi cuahan nocuee chi. Ta cha ndichin Nyoo cha sandundichin chi.

⁹ Ñu cha catyí vatyí nyaá ñu nu ndichin, ta ña cuí nyehe ñu chi tahan ñu, ni nyaá ca ñu nu ñaa ñi. ¹⁰ Ta ñu cuí chi tahan, nu ndichin nyaá ñu. Ta ñahri maa cha cuví

sanacava chi ñu nu cuatyí. ¹¹ Soco ñu cha ña cuñí nyehe chí tahan, nu ñaa iñi nyaá ñu. Ta ña chitó ñu nya ityi cuahan ñu vatyí ña cuví nyehe ñu vatyí tari cha cuaa ñu.

¹² Sacuhín tuhun ihya chi nyoho, ra cuatyaa sehi. Vatyí cha yaha saha Nyoo ticahnu iñi cuatyí ndo cha cuenda cha chihí ra Jesucristo tyiño nuu ndo. ¹³ Ta chi nyoho, cha cuví ndo sutu, sacuhín tuhun ihya chi ndo, vatyí ñohó nuu ndo chi ra iyó nyata cumañi cacu ñuhu ñayiví. Ta chi nyoho, ra tyivaa, sacuhín tuhun ihya vatyí cuví chasaha ndo chi ra ña vaha.

Ta chi nyoho, cha cuví ndo ra cuatyaa sehi, sacuhín tuhun ihya vatyí ñohó nuu ndo chi Sutú yo Nyoo. ¹⁴ Sacuhín tuhun ihya chi nyoho cha cuví ndo sutu, vatyí ñohó nuu ndo chi ra cha iyó nyata cacu ñuhu ñayiví. Ta sacuhín tuhun ihya chi nyoho ra tyivaa vatyí nyaá xaan fuerza chi ndo. Ta tuhun Nyoo caá aña ndo. Ta cuví chasaha ndo chi ra ña vaha.

¹⁵ Ma cuñi ndo cha quiñi caa cha iyó ñayiví ihya. Ni ma cuñi ndo cha iyó siqui ñuhu ñayiví. Vatyí ñu cuñí tandihí ihya, ña cuñí ñu chi Nyoo. ¹⁶ Vatyí tandihí cha iyó ñayiví ihya, cha ña vaha cha quichi cuví iñi coño ñuhu yo, ta cha nyehe yo ta quichi cuví iñi yo coo chi yo, ta cha cuñi yo cuyaa yo chihin cha iyó chi yo, tandihí ihya ñima cuhva chahá Sutú yo Nyoo chi yo cuví, soco maa maa ri cha chahá ñayiví ihya cuví. ¹⁷ Ta ñayiví ihya cuahan sandihí chi, chihin tandihí cha quiñi caa cha quichi cuví iñi ñayiví. Soco ñu cha sacuví cuhva cuñí Nyoo, tyicuan ri maa cuacoo ñu chihin ra.

Ra xaan iñi chi ra Cristo

¹⁸ Sehe nyihi, cha nyaá yo nu cuandihí quiví. Ta nyoho chiñi soho ndo vatyí vachi noo ra cha ña cuñí nyehe chí ra Cristo, ta vityin cha cuaha xaan ra ña cuñí nyehe chí ra Cristo iyó vityin. Yucuan chaha nacoto yo vatyí cha nyaá yo nu cuandihí quiví. ¹⁹ Maa ra nu nyicú yo quita

coyo ra, vatyí ñima ra cuenda yo cuví chí ra. Vatyí tyehe ta ra cuenda yo cacuví chí ra, candoó ra chihin yo. Soco cuahan coyo ra tacuhva quetuvi vatyí ña tandihí ñayiví ta cuenda yo cuví ñu.

²⁰ Soco chi nyoho chaha ra Cristo Tatyí Ii Nyoo cunyaa aña ndo. Ta chitó ndo tandihí. ²¹ Sacuhín tuhun ihya chí ndo ñima cha cuenda vatyí ña chitó ndo cha ndicha, soco vatyí chitó ndo. Ta ni noo cuendu ma quita cahan ñu sacuví cha ndicha.

²² ¿Yóo cha cuví ñu cuendu? Ñu catyí vatyí ra Jesus ñima ra Cristo cuví ra. Ta ñu cha catyí tyehe caa, ñu xaan iñi chí ra Cristo cuví ñu. Vatyí ña chinó iñi ñu chí Sutú yo Nyoo, ta ni ri chí ra Jesucristo Sehe Nyoo. ²³ Tandihí cuii ñu ña chinó iñi chí Sehe Nyoo, yori Sutú yo Nyoo nyaá chihin ñu. Soco ñu catyí vaha chí ñayiví vatyí ra Jesucristo cuví Sehe Nyoo, iin ri cuví ñu chihin Nyoo ñandihí.

²⁴ Yucuan chaha nyoho, tuhun cha chiñi ndo nya quiví xihna ri, naquehen vaha ndo chichi aña ndo. Tatu ndoó chí chichi aña ndo, iin ri cuví ndo chihin Sehe Nyoo ta chihin Sutú yo Nyoo ñandihí. ²⁵ Ta ra Jesucristo catyí ra vatyí cuhva ra noo ñayiví chaa cha ma naa ca maa coo yo.

²⁶ Sacuhín tuhun ihya chí ndo cha cuenda vatyí cuaha xaan ra sandaví ñaha chí ndo iyó. ²⁷ Soco ra Jesucristo chaha ra Tatyí Ii Nyoo cha cunyaa aña ndo, ta ña chiñuhú ca cha sañaha ni noo ñayiví chí ndo. Vatyí suri maa Tatyí Ii Nyoo sañahá chí ndo ndi cuii maa tuhun. Ta cha ndicha cuví, ñima cuendu cuví. Yucuan chaha sañihi ca ndo cu iin ri ndo chihin ra Cristo tari cuhva sañahá Tatyí Ii Nyoo chí ndo.

²⁸ Ta vityin nyoho, ra cuatyaa sehi, cunyaña yo chí ra Cristo tacuhva vatyí nachaa chí quiví quichi ra, ma cutucu cuñi yo chihin ra. Ta tyicuan caa tucu maa ra chihin yo. Ta iin ri tacuhva cha ma tahan yo ticahan nuu nuu ra quiví quichi ra. ²⁹ Cha chitó ndo vatyí ra Cristo vaha ra. Chitó

tucu ndo vatyí tandíhi ñu cha nyacuví cha vaha, sehe Nyoo cuví chi ñu.

3

Ñu cha cuví sehe Nyoo

¹ Nyehe ndo, yoso cha cuñí Sutu yo Nyoo chi yo, vatyí nasaha ra sehe ra chi yo. Ta catyí ra: “Nyoho, sehe cuví chi ndo.” Yucuan chaha ñáyiví, ña cuñí nyehe ñu chi yo vatyí tyicuan caa tucu, ña cuñí nyehe ñu chi maa ra. ² Yañi, vityin cha cuví yo sehe ra. Soco ta coto ca yo yoso caa cucuvi yo. Soco chitó yo vatyí nachaa chí quiví quichi ra Jesucristo, cucuvi yo tari maa ra, vatyí cunyehe vaha yo chi ra tari cuhva caá ra. ³ Ta tandíhi yo cha nyatú yo cha cucuvi tyehe caa, nducú yo cuhva ta sandundí ca yo añima yo, tari ndí maa Sutu Mañi yo Jesucristo.

⁴ Tandíhi ñu sacuví cuatyí, ña quichahá ñu ley Nyoo. Vatyí cha sacuví yo cuatyí, ña quichahá yo ley Nyoo cuví chi cuan. ⁵ Cha chitó ndo vatyí ra Cristo quichí ra ñayiví tacuhva tinyaa ra cuatyí yo, ta maa ra ñahri cuatyí ra. ⁶ Tandíhi yo cha ñi ri cuví yo chihin ra, ña sacuví yo cuatyí. Soco ñáyiví cha sacuví cuatyí, ta quehen cuenda ca ñu chi ra, ni ta cohon ca ra añima ñu. ⁷ Sehe luhli, ñaha sandaví ñaha ñáyiví chí ndo, vatyí ñu cha sacuví cha vaha, vaha ñu, tari maa ra Cristo vaha ra. ⁸ Soco ñu cha sacuví cuatyí, cuenda ra ña vaha yihí ñu. Vatyí ra ña vaha sacuví ra cuatyí nyata quiví xihna ri. Soco yucuan chaha quichí ra Jesucristo, ra cha cuví Sehe Nyoo, tacuhva vatyí sataní ra ndí cuií cha sacuví ra ña vaha.

⁹ Tandíhi yo cha cha yaha nacacu chaa yo, nanduví yo sehe Nyoo, ta ña sacuví ca yo cuatyí, vatyí ñayiví Nyoo iyó yo. Yucuan chaha ña sacuví ca yo cuatyí, vatyí cha yaha nacacu chaa yo ta sehe Nyoo cuví chi yo. ¹⁰ Ta tyehe caa cuví nichon nuu yo chí ñu cha cacuví sehe Nyoo, ta ñu cuví sehe cuihna. Vatyí yóo ñu sacuví cha ña

vaha o ña cuñí nyehe ñu chí tahan ñu, ñima ñáyiví cuenda Nyoo cuví ñu.

Na cuñi yo chi noo noo tahan yo

¹¹ Vatyí ican ihya cuví tuhun cha chíñi ndo quiví xihna ri: Cha cuñi yo chí noo noo tahan yo. ¹² Ña tahan chí sacuvi yo tari cuhva sacuví ra Caín. Cuví ra noo ra cuenda ra ña vaha. Ta chahñi ra chí yañi ra. ¿Ñáa tuhun chahñi ra chí ra? Cha cuenda vatyí vaha cuhva sacuví yañi ra, ta maa ra Caín chinyacuví ra cha ña vaha.

¹³ Yañi yo, ma iyo cuñi ndo tatu ña cuñi nyehe ñáyiví chí ndo. ¹⁴ Yoó chitó yo vatyí tari minoo ra chíhi ta nandoto cuví yo vatyí iyó yo noo ñayiví chaa vatyí cuñi yo chí tahan yo. Ñu cha ña cuñi chí tahan, tari quiví ni cuví ca ñu tari noo ra chíhi, ta ta nandoto ca ñu. ¹⁵ Yoó ñu cha xaan iñi chí tahan, tari noo ñu chahñi ñáyiví cuví ñu. Ta chitó ndo vatyí ni noo ñu chahñi, ma cuhva Nyoo ñayiví chaa cha ma naa ca maa coo añima ñu. ¹⁶ Nichón nuu yo ñáa cha cuví cha cuñi yo chí tahan yo vatyí ra Jesucristo sañaha ra chí yo. Vatyí maa ra cuñi ra chí yo, ta chaha ra ñayiví ra cha catyí yo. Ta tyicuan caa tucu maa yo, cuñi yo chí tahan yo ta cuhva yo ñayiví yo cha cuenda ñu. ¹⁷ Ta tatu yihí yo iyó chíin chí yo síqui ñuhu ñayiví ihya, ta nyehé yo cumañi cha cumañi chí tahan yo, ta sahá ri yo cha ña nyehé yo, ¿atu cuñi yo chí Nyoo cha sacuví yo cha tyicuan caa? Ña cuñi yo chí ra cuví chí cuan. ¹⁸ Ra cuatyaa sehe, ñima chíin tuhun yuhu ri yo, cuñi yo chí tahan yo, soco na cuñi yo chí ñu chíin cha sacuví yo tumañi iñi, ta chíin cha ñi iñi yo.

Yoso caa sacuvi yo ta coo vaha yo chíin Nyoo

¹⁹ Tatu sacuví yo tyicuan caa, chitó yo tyi yihí yo tuhun ndicha. Ta vaha iyó yo chíin Nyoo. ²⁰ Tatu chíin añima yo ta tuví iñi yo tyi iyó cuatyí yo, vihi ca cuví Nyoo, chitó ra cha caá añima yo. ²¹ Yañi, tatu tuví iñi yo tyi ñahri cuatyí yo, ma yuhvi cuñi yo

nyehe yo chi Nyoo. ²² Ta ñáá ri cha cacan tahvi yo cuacuhva ra chi yo, vatyí quichahá yo tuhun cahán ra, ta sacuví yo cuhva tahán iñi ra. ²³ Ta ican ihya cuví tuhun chahá ra chi yo: Cha chíno iñi yo vatyí ra Jesucristo cuví Sehe ra. Ta cha cuñi yo chi noo noo tahan yo vatyí tyicuan caa tuhun cha chahá ra chi yo. ²⁴ Ta ñu cha quichahá tuhun chahá ra chi yo, iyó ñu cha ñi ri cuví ñu chihin ra, ta maa ra iyó ra chichi añima ñu. Ta cha cuenda Tatyí li ra cha chahá ra chi yo, chitó yo vatyí nyaá ra chihin yo.

4

Tatyí li Nyoo ta tatyí ña vaha

¹ Cuñi xain chi ndo, yañi. Ma chino iñi ndo tandihí ñáyivi cha catyí tyi cuenda Nyoo cahán ñu. Nyehe xihna ndo tatu nacachí tahan cha cahán ñu chihin tuhun Nyoo. Vatyí cuaha xaan ra cha catyí vatyí Nyoo sañahá chi ra. Soco ña ndicha. ² Soco tyehe caa cuví nicohon nuu ndo tatu Tatyí li Nyoo sacahán chi ra o ñima. Tandihí ra cha catyí vatyí quichí ra Jesucristo nya gloria ta cacú ra chihin coño ñuhu ñáyivi ihya, ican ra cuan, sacahán Tatyí li Nyoo chi ra. ³ Soco ndi cuí maa ñáyivi cha catyí vatyí ra Cristo ña chicá noo ra chihin coño ñuhu ñáyivi ihya, ñima Nyoo sacahán chi ñu cuan, soco tatyí ña vaha, cha xaan iñi chi ra Cristo, ican sacahán chi ñu. Cha chiñi ndo vatyí nyaá quichi cuan. Ta vityin cha chicá noo chi síqui ñuhu ñáyivi.

⁴ Ra cuatyaa sehi, ñáyivi chi Nyoo cuví ndo. Ta cuví chasaha ndo chi ra xaan iñi chi ra Cristo. Vatyí cahnu ca ra Cristo, ra nyaá añima ndo ta ñima ca ra ña vaha, ra cha chicá noo síqui ñuhu ñáyivi ihya. ⁵ Maa ñu cuan, ñu cuenda ñáyivi ri ihya cuví ñu. Yucuan chaha cahán ñu tuhun ñáyivi ihya. Ta ñu cuenda ñáyivi ihya tyasohó ñu tuhun cahán ñu. ⁶ Soco yoó cuví yo ñu cuenda Nyoo. Ta ñu cuenda Nyoo tyasohó ñu tuhun cahán yo, soco ñu yihí tatyí ña vaha añima, ña cuñi ñu tyasoho ñu. Ta tyicuan caa cuví nicohon

nuu yo chi ñu yihí Tatyí li Nyoo ta ñu yihí tatyí ña vaha.

Nyoo cuñi xaan ra chi tandihí ñáyivi

⁷ Yañi yo, na cuñi yo chi tahan yo, vatyí Nyoo sañahá ra chi yo yoso caa cha tahán chi cuñi yo chi ñu. Tandihí yo cha cuñi yo chi tahan yo sehe Nyoo cuví chi yo, ta ñohó nuu yo chi Nyoo. ⁸ Soco ñu cha ña cuñi chi tahan, ta cohon nuu ca ñu chi Nyoo, vatyí Nyoo cuñi xaan ra chi yo ta chi tandihí ñáyivi. ⁹ Ta sañahá Nyoo vatyí cuñi ra chi yo chihin cha chahá ra noo Sehe mañi ra tyi quichí ra síqui ñuhu ñáyivi ihya, vatyí cuhva ra noo ñáyivi chaa coo yo. ¹⁰ Nyehe xihna, yoso cha cuñi Nyoo chi yo. Ñima vatyí xihna ca yo cuñi yo chi ra, soco xihna ca maa ra cuñi ra chi yo. Ta tachí ra chi Sehe ra vatyí tacuhva cúvi ra tyiño nuu yo ta cahnya ra cuatyí yo.

¹¹ Nyoho yañi, tatu cuñi Nyoo chi yo cha tyicuan caa, tahán tucu chi cuñi maa yo chi tahan yo. ¹² Vasi ni nonga ñáyivi, ta nyehe ca ñu chi Nyoo, soco tatu cuñi yo chi noo noo tahan yo, Nyoo nyaá ra añima yo. Ta tyicuan caa ñi vaha iñi yo cuñi yo chi ra. ¹³ Ta chitó yo vatyí nyaá yo chichi ndaha ra, ta maa ra nyaá añima yo vatyí chahá ra Tatyí li ra cunyaa añima yo. ¹⁴ Ta nyuhu nyehe vaha ndi ta cuví ndi cha ndaa vatyí Sutu yo Nyoo saquichí ra chi Sehe ra tacuhva vatyí sacacu ra chi yo cha cuví yo ñáyivi iyó síqui ñuhu ñáyivi. ¹⁵ Tandihí ñu nachinó iñi chihin cha ñi iñi ñu ta catyí ñu vatyí ra Jesús cuví ra Sehe Nyoo, Nyoo nyaá ra chichi añima ñu. Ta maa ñu nyaá ñu chichi ndaha ra.

¹⁶ Ta yoó cha nacoto yo ta nachino iñi yo tyi Nyoo cuñi ra chi yo, ta chi tandihí ñáyivi. Ta ñu cha cuñi chi tahan, chichi ndaha Nyoo nyaá ñu. Ta Nyoo nyaá ra chichi añima ñu. ¹⁷ Vatyí tatu cuñi yo chi Nyoo chihin cha ñi iñi yo ma yuhvi cuñi yo nyehe yo chi ra, nachaa chi quivi cutuñi chi tandihí ñáyivi nuu ra. Vatyí tari cuhva iyó maa ra Jesucristo, tyicuan caa iyó yo

siqui ñuhu ñayiv̄i ihya. ¹⁸ Nyoo cuñi ra chi yo, ta tatu cuñi yo chi ra, ñahri maa cha yuhvi yo. Tatu ñi iñi yo cuñi yo chi Nyoo ña nuña ca nu quih̄i tuhun yuhvi añaima yo, vatyi Nyoo tava ñehe ra tandih̄i maa cuan. Vatyi tatu yih̄i cha yuhvi cuñi yo, yih̄i cha cuenda vatyi iyó cuatyi yo. Ta yuhvi yo cha cutachi tuñi Nyoo chi yo. Vatyi tatu yuhvi cuñi yo, yuhvi yo vatyi ña cuñi vaha yo chi Nyoo.

¹⁹ Yoó cuñi yo chi Nyoo vatyí xihna ca maa ra cuñi ra chi yo. ²⁰ Tatu yóó cha catyí: “Yuhu cuñi chi Nyoo”, catyí ñu, soco ña cuñi nyehe ñu chi tahan ñu, noo ñu cuendu cuví ñu. Vatyí tatu ña cuñi nyehe ñu chi tahan ñu cha nyehé ñu, ¿atu cuví cuñi ñu chi Nyoo cha ña nyehé ñu? Ma cuví. ²¹ Ta Nyoo chah̄a ra tuhun ihya chi yo: Ñu cha cuñi chi Nyoo, tahán chi cha cuñi tucu ñu chi noo noo tahan ñu ñandih̄i.

5

Cha ñi iñi yo chinó iñi yo chi Nyoo sah̄a ganaa yo chi cha ña vaha

¹ Tandih̄i ñu chinó iñi tyi ra Jesús cuví Cristo cha saquich̄i Nyoo, sehe Nyoo cuví chi ñu; ta tatu cuñi yo chi noo sutu, cuñi tucu yo chi tandih̄i sehe ra. ² Tatu cuñi yo chi Nyoo ta sacuví yo cha catyí ra, chitó yo vatyí cuñi tucu yo chi ñu sehe Nyoo. ³ Vatyí cha cuñi yo chi Nyoo ican cuví cha quichah̄a yo tuhun chah̄a ra chi yo. Ta tandih̄i tuhun cha chah̄a ra chi yo ña ȳi sacuvi yo. ⁴ Vatyí tandih̄i yo cha cuví yo sehe Nyoo, cuví chasaha yo chi cha ña vaha cha iyó ñayiv̄i ihya chihin cha chinó iñi yo chi Nyoo. ⁵ Ñu cha chinó iñi vatyí ra Jesús cuví Sehe Nyoo, ican ñu cuan cuví chasaha chi cha ña vaha cha iyó ñayiv̄i ihya.

Tatyí Ii Nyoo cuví cha ndaa cuenda ra Jesús ra cuví Sehe Nyoo

⁶ Ra Jesucristo quich̄i ra siqui ñuhu ñayiv̄i ihya. Ta chitó yo tyi ndicha cha Sehe Nyoo cuví chi ra nu condutyá ra, ta nu chat̄i niñi ra ñandih̄i. Ñima noo ri nu condutyá ra. Soco nu

chat̄i niñi ra ñandih̄i. Ta Tatyí Ii Nyoo cuví cha ndaa tyi tyicuan caa cuví. Ta maa ri cha ndicha cahán Tatyí Ii Nyoo. ⁷ Iyó uñi tahan testigu cha nyaá andiv̄i: Sutu yo Nyoo ta ra Cristo ra cuví Tuhun Cahán Nyoo, ta Tatyí Ii Nyoo. Ta nduñi tahan ihya cuví noo ri, ta ñin ri cuhva cahán nduñi tahan. ⁸ Ta iyó uñi tahan testigu siqui ñuhu ñayiv̄i ihya: Tatyí Ii Nyoo cha nyaá añaima yo catyí vatyí ican ra Jesús cuví Sehe Nyoo. Yucuan cuví noo. Ta nu condutyá ra Jesús, Nyoo catyí ra vatyí ican ra cuví Sehe ra. Yucuan cuví cha cu uvi. Ta nu chat̄i niñi ra Jesús, yucuan cuví cha cu uñi cha sañah̄a chi vatyí ra Jesucristo cuví ra Sehe Nyoo. Ta tyicuan caa nduñi tahan cuan ñin ri cuhva cahán. ⁹ Yoó tuhvá yo naquehen yo tuhun cahán ra cuví testigu siqui ñuhu ñayiv̄i ihya. Soco Nyoo cahnu ca cuví ra ta ñima ca ra ñuhu ñayiv̄i ihya. Ta ican ra catyí ra vatyí ra Jesús cuví Sehe ra. ¹⁰ Ñu cha chinó iñi tyi Sehe Nyoo cuví chi ra Jesús, chitó ñu chichi añaima ñu tyi ndicha. Ñu cha ña chinó iñi chi ra, tari quiv̄i cha sah̄a ñu tuhun tyi Nyoo ra cuendu cuví ra, vatyí ña cuñi ñu chino iñi ñu cha cahán Nyoo tumañi iñi cuenda Sehe ra, ra Jesús. ¹¹ Ta ican ihya cuví tuhun cahán Nyoo chihin yo: Catyí ra tyi chah̄a ra noo ñayiv̄i chaa coo yo tatu chinó iñi yo vatyí ra Jesucristo cuví Sehe ra. ¹² Ñu cha nyaá Sehe Nyoo añaima, iyó ñu ñayiv̄i chaa ihya. Ta ñu cha yori Sehe Nyoo nyaá añaima, ñahri ñayiv̄i chaa cuan iyó ñu.

Nu ndih̄i cahan ra Juan ta chah̄a ra tuhun chi ñu

¹³ Sacuhín tuhun ihya chi nyoho cha chinó iñi chi ra Jesús Sehe Nyoo, tacuhva coto ndo tyi cha iyó ndo ñayiv̄i chaa cha ma naa ca maa.

¹⁴ Cunyeé xaan iñi yo chi Nyoo vatyí chitó yo vatyí tatu chicán yo cha chicán yo chi ra ta cuhva cuñi ra cuví, maa ra chiñi ra tuhun cahán yo. ¹⁵ Ta tatu chitó yo tyi chiñi ra tuhun cahán

yo, chitó tucu yo tyi cha ñihí yo cha chican yo chi ra.

¹⁶ Tatu nyehé yo noo ñu tahan yo sacuví ñu noo cuatyí, soco noo cuatyí cha ña sacunaá chí chí ñu nuu Nyoo, cuví cacan tahvi yo chí ra cha cuenda ñu. Ta cusaha ra ticahnu iñi cuatyí ñu tacuhva coo ca ñu nuu ra. Soco iyó noo cuatyí cha sativí chí ñáyiví nuu Nyoo. Ña tahan chí cacan tahvi yo cha cuenda ñu cha sacuvi cuatyí cuan. ¹⁷ Tandihí cha ña vaha cha sacuví ñáyiví, cuatyí cuví. Soco iyó cuatyí cha ña sativí ndihí chí chí yo nuu Nyoo.

¹⁸ Chitó yo vatyí ñu cha nacacu chaa saha Nyoo, ña sañihí ñu sacuví ñu cuatyí. Vatyí Sehe Nyoo sahá cuenda chí ñu ta ña chahá ra cha tñn ra ña vaha chí ñu.

¹⁹ Ta yoó chitó yo tyi cuenda Nyoo yihí yo. Tandihí ca ñáyiví, cuenda ra ña vaha yihí ñu, vatyí nyacá ñaha ra chí ñu.

²⁰ Chitó tucu yo vatyí cha quichí Sehe Nyoo. Ta chaha ra cha chiñi tuñi vatyí cohon nuu yo chí Nyoo, ra ndicha vaha. Ta nyaá yo chichi ndaha ra cuví cha ndicha, ra cuví Sehe Nyoo, ra Jesucristo. Ican ra cuví Nyoo cha ndicha, ican ra cuví ñáyiví chaa cha ma naa ca maa. ²¹ Nyoho ra cuatyaa sehi, saha ndo cuenda chí ndo chihin cha sacahnú ñáyiví, ta ni ñima Nyoo cuví.

Ta na cuvi chí tyicuan caa.

Carta Cha Cu Uvi Cha Tyaa Ra Apóstol Juan

Nu catyí ra Juan vatyi cuñi xaan ra chi ñu yihí cuenda Nyoo

¹ Nyoo nacachi ra chuun, yoho Hermana. Ta yuhu cha cuví ra chahnu vehe ñuhu, sacuhín tutu ihya chuun ta chi tandihí sehun. Ta cuñi xain chi ndo chihin cha ñi ñi. Ta ñima yuhu ri cuñi chi ndo soco tandihí ca ñu cha nacotó cha ndicha ñandihí. ² Cuñi chi ndo cha cuenda cha ndicha cha ñohó chichi añima yo. Ta tyicuan ri maa cunyaa cha ndicha cuan chihin yo. ³ Sutu yo Nyoo ta Sutu Mañi yo Jesucristo Sehe Nyoo na nasoco ra chi ndo ta na nyehe ndahvi ra chi ndo. Ta na coo cha taxi ri añima ndo, chihin cha ndicha, vatyi cuñi xaan ra chi ndo.

⁴ Si xaan cuñi cha chité tuhun suhva sehun ta nyehí vatyi iyó ñu tari cuhva catyí cha ndicha, tari cuhva catyí Sutu yo Nyoo tyi sacuvi yo. ⁵ Ta vityin, Hermana, chacú ndahvi nuun, na cuñi yo chi noo noo tahan yo. Ican ihya cuví cha tyaí nu tutu ihya. Ta ñima noo tuhun chaa cha chaha Nyoo chi yo cha vityin ri cuví cha cuñi yo chi noo noo tahan yo. Soco ican ihya cuví tuhun cha catyí Nyoo chi yo nyata quivi xihna ri. ⁶ Ta cha cuñi yo chi ra, ican cuví cha sacuvi yo tandihí cha catyí ra chi yo. Ican ihya cuví cha catyí Nyoo tyi sacuvi yo. Ta nyoho, chiñi ndo tuhun ihya nya quivi xihna ri. Na coo ndo chihin cha cuñi ndo chi Nyoo ta chi ñáyivi.

Nu catyí ra Juan vatyi saha cuenda yo chi yo chihin ñu chicá noo sandavi ñaha

⁷ Catyí chuun tyehe caa vatyi cuaha xaan ra casandaví ñaha cachicá noo ra nicahnu siqui ñuhu ñáyivi. Cacatyí ra vatyi ña ndicha cha quichi cacu ra Jesucristo chihin coño ñuhu ñáyivi ihya. Ra cacatyí tyicuan caa, sandaví ñaha ra chi ñáyivi. Ta cuví ra noo

ra xaan ñi chi ra Cristo. ⁸ Yucuan chaha, saha ndo cuenda chi ndo chihin tuhun cha sañahá ra coto sacunaa ndo cha vaha cha sacuvi ndo, ta coto ma ñihi ca ndo tandihí cha cuacuhva Nyoo chi ndo.

⁹ Yóo ñu cha ña ndoó vaha chihin cha sañahá ra Cristo chi yo ta sañahá ñu inga tuhun, yori Nyoo nyaá chihin ñu cuan. Soco ñu ndoó vaha ta quichahá tuhun cha sañahá ra Cristo, nyaá Sutu yo Nyoo ta ra Jesucristo Sehe ra chihin ñu cuan. ¹⁰ Tatu chaa noo ra vehe ndo, cua nyehe ra nu nyicú ndo ta cuñi ra sañaha ra tuhun cha ña sañaha ra Jesucristo, ma cuhva ndo vehe ndo cunyaa ra, ni ma tyinyee ndo chi ra. ¹¹ Vatyi tari quivi cha ñi ri cha ña vaha sacuvi yo chihin ra tatu naquehén cuenda vaha yo chi ra cuan.

Nu ndihí cahan ra Juan

¹² Cuaha xaan ca tuhun tyaí cuhva sacote chi ndo, soco ña cuñi sacote chi ndo chihin tutu. Soco nyatí cuhin nu nyicú ndo. Tyicuan ta ndatuhun vaha maa yo, tacuhva cusí ca cuñi yo.

¹³ Ihya vachi nocumi chuun sahá sehe cuhun. Nacachi tucu Nyoo chi maa ña ñandihí.

Carta Cha Cu Uñi Tyaa Ra Apóstol Juan

Nu catyí ra Juan vatyí ra Gayo vaha cuahan ra chihin Nyoo

¹ Yuhu cha cuví ra chahnu vehe ñuhu, sacuhín carta ihya chi yoho, Gayo, vatyí yoho cuvún noo ra tahn cha cuñí xain chihin cha ñi ñi.

² Yañi, chicán tahvi chi Nyoo cha cuendon vatyí na coo vahun. Ta tari cuhva cuahan vahun chihin Nyoo, ta tyicuan caa tucu, na nasoco Nyoo chuun tacuhva cha ma tiin cuehe chuun. ³ Vatyí cusii xaan cuñi quivi quichí coyo suhva ra yañi yo. Ta canacatyí ra vatyí cha ndicha vaha iyón cuhva cha sañaha ra Cristo. Ta ican cuví cha ndicha vaha. ⁴ Ñahri ca cha sii cuñí tari cha chité vatyí sehi sacuví vaha ñu cuhva catyí tuhun ndicha.

⁵ Cuñí xain chuun, yañi. Vaha xaan sacuvún, vatyí tyiñuhún chi ra yañi yo, ta cha vaha xaan ca cha sacuvún vatyí tyiñuhún chi ra yañi yo inga ñuu cha chaa vehun. ⁶ Chihin nuu tandihí ñu vehe ñuhu canacatyí ra vatyí cuñí xaun chi ra. Ta saha tumañi ñi, yoho Gayo, tyinyee con chihin cha chiñuhú chi ra yañi yo vatyí sañihi ca ra cuhun coyo ra nu cuahan ra. Vatyí tyicuan caa tahán ñi Nyoo cha sacuví yo. ⁷ Vatyí tyiño nuu Jesucristo cachicá noo ra. Ta ña cacuñí ra cha tyinyee ñáyivi cha ña ñohó nuu Nyoo chi ra. ⁸ Yucuan chaha vatyí maa yo tahán chi nyehe yo ñáá ndihí cha chiñuhú chi ra. Ta tyicuan caa ta cutahan yo chihin ra nu cahán ra tuhun ndicha.

Nu catyí ra Juan vatyí ra Diótrefes, ña vaha sacuví ra

⁹ Yuhu sacuhín noo carta chi ñu nyicú vehe ñuhu, soco ra Diótrefes sacuví ri maa ra nuu chi ra, ta ña tyasohó ra tuhun cahín. ¹⁰ Yucuan chaha tatu cuhin chiña, cusandai tyiño chihin ra cha cuenda tuhun cahán ra, vatyí cahán ña vaha ra siqui yo. Ta siin ri tatu yóo hermano chaa, ña naquehén

cuenda ra chi ra. Ta tatu ñu nyicú vehe ñuhu naquehén cuenda ñu chi ra, chasí ri ra, ta tavá ñehe ra chi ñu vehe ñuhu.

¹¹ Cuñí xain chuun, yoho yañi. Ma sacuvun cuhva ña vaha tari cha sacuví ra, soco sacuvun cha vaha. Vatyí ra sacuví cha vaha, ra cuenda Nyoo cuví ra, soco ra sacuví cha ña vaha, ña ñohó nuu ra chi Nyoo.

Nu catyí ra Juan vatyí vaha xaan cuhva chinó ñi ra Demetrio

¹² Tandihí ñu ta vaha cahán ñu siqui ra Demetrio. Ta vaha xaan quichahá ra tuhun Nyoo, ta suri ican cuan sañahá chi tyi ra vaha cuví ra. Ta siin ri nyuhu tucu cuví ndi cha ndaa cha cuenda ra, ta nyoho chitó ndo vatyí tuhun ndicha cahán ndi.

Nu ndihí cahan ra Juan

¹³ Cuaha xaan tuhun tyaí cuhva sacote chuun, soco ña cuñí sacote chuun chihin tutu. ¹⁴ Soco nyatí cuhin nu nyaún cha numi ri, tyicuan ta ndatuhun vaha ca maa yo. ¹⁵ Na coo cha taxi ri añimon. Ra tahan yo cha iyó ityi tyehe saquichí xaan ra nocumi chuun. Ta sahun tumañi ñi cuhvon nocumi chi noo noo ra tahan yo cha iyó ityi chiña.

Carta Cha Sacuhun Ra Apóstol Judas Chi Ñáyivi Yihí Cuenda Nyoo

Nu tyaq ra Judas noo tutu chi ñu nacana Nyoo chi

¹ Yuhu ra Judas cuví noo ra sacuví tyiño nuu ra Jesucristo. Ta yañi ra Jacobo cuví chii. Tyaí noo carta ihya chi ndo cha cuví ndo ñáyivi cha nacana Nyoo Sutu yo. Ta naquehén vaha ra chi ndo vatyí cuví ndo ñáyivi cuenda ra. Ta vityin cumí vaha ra chi ndo cha cuenda cha ñu ri cuví ndo chihin ra Jesucristo. ² Nyoo na nyehe ndahvi ra chi ndo. Ta na cutuñi ca iñi ndo yoso caa cha cuñí ra chi yo. Ta na coo cuaha ca cha taxi ri cuñi añima ndo, saha ra.

*Nu cahan ra Judas siqui ñáyivi cha sañahá cha ña ndicha
(2 Pedro 2.1-17)*

³ Cha naha xaan yihí iñi tyai noo carta chi nyoho yañi, vatyí cuñí cahin chiin siqui yoso caa sacacu Nyoo añima yo. Soco vityin cuñí chi cha tyaí tutu ihya chi ndo vatyí saniñi chi ndo cunñi iñi ndo chihin tandihí fuerza ndo ta cuhun ndo ityi nuu ca chihin cha chinó iñi ndo tuhun vaha cha chahá Nyoo chi yo. Vatyí noo ri chaha chahá ra ta ñu caña ri chahá ra tandihí cha tahán chi chi yo vatyí chinó iñi yo cha cuví yo ñu yihí cuenda ra. ⁴ Vatyí yihí ra quihví xehe ra nu nyicu ndo. Ta cuñí ra sandavi ñaha ra chi ndo. Catyí ra vatyí cha yaha saha Nyoo ticahnu iñi chi yo ta yucuan chaha cuvi sacuvi yo yoso cuhva quichi cuvi iñi coño ñuhu yo. Soco ra canyacuví tyicuan caa, cuví ra noo ra cucunaa. Vatyí tyicuan caa catyí Nyoo nya tyembu chahnu, vatyí canyacuví ra cha quiñi caa cha ña tahán chi sacuvi ra. Vatyí ña caquichahá ra chi Nyoo ta ña chinó iñi ra cha Nyoo cuví noo ra cahnu

ca, ra nyacá ñaha chi yo. Ta ñi ri ra Jesucristo Sutu Mañi yo, ña cahnu xaan cuví ra, cacatyí ra.

⁵ Vasi cha chitó ndo cha sacuvi Nyoo ta cha naha, soco cuñí sanicohín iñi ndo vatyí Sutu yo Nyoo tava ra chi sutu chahnu yo ñu Israel ñuu Egipto, sacacu ra chi ñu ndaha ñáyivi ñuu Egipto cuan. Soco yaha cuan sanaa ra tandihí maa ñu cha ña chinó iñi chi ra. ⁶ Ta tyicuan caa tucu ángel. Ii ra. Ñahri cuatyí ra. Soco suhva ra caquitá ra nu cuatyaa Nyoo chi ra cha cuenda cha ña quichahá ra chi ra. Yucuan chaha Nyoo cumí ra chi ángel cuan, nuñí ra chihin cadena nu ñaa iñi. Nyatú ra cha sacutuñi Nyoo chi ra na chaa chi quivi cahnu. ⁷ Tyicuan caa tucu ñáyivi ñuu Sodoma ta ñuu Gomorra, ta ñu ñuu cuatyaa cha chiyo nicachico ñuu cuan. Sanaa Nyoo chi ñu cha cuenda cha quiñi caa cha chinyacuví ñu. Ca chiyó ri maa ra chihin ñusihi. Ta ñusihi ca chiyó ri maa ñu chihin noo ra ta chihin inga ra. Ta cuaha ca cha quiñi caa chinyacuví ñu vatyí rayi ca chiyó ra chihin tahan yí ra ñandihí. Soco cha cuenda cuan, nyehe ñu tindoho nu cayu ñu, quivi chahmí Nyoo ñuu ñu. Ta yucuan sañahá chi chi yo vatyí ñu sacuví cha quiñi caa, cucayu ñu chihin ñuhu cha ma ndahva ca maa.

⁸ Ta tyicuan caa tucu ra cacuñí sativí chi ndo. Vasi cha chitó vaha ra cha sacuvi Nyoo ta ityi chata ca, soco maa ra chicá iñi ra vatyí tyaqui xaan cuacoo ra nu cuahan ca chi chihin cha nyacuví ra tyicuan caa. Soco ndahvi ra vatyí tari quivi cha tahán ra noo ñumahna tyaqui cuví cuan. Sativí ra coño ñuhu ra ta ña cuñí ra cha cunyaca ñaha Sutu Mañi yo chi ra. Ta cahán ña vaha ra siqui ra nahnu ca cha nuu maa ra, cuví ri siqui ángel, cuví ri siqui tatyí ña vaha, cuví ri siqui Nyoo. ⁹ Soco ángel Miguel cha cuví ra noo ra cahnu nuu Nyoo, ta ña caña iñi ra sacuvi ra tyicuan caa. Vatyí quivi cañi tahan ra chihin ra ña vaha cha cuenda coño ñuhu ra Moisés, ña caña

iñi ra cahan ña vaha ra siqui ra ña vaha. Noo ri cha catyi ra chi ra: “Maa Sutu Mañi yo na tachi tuñi ra chuun cuenda cha ña vaha cha nyacuvún”, catyi ángel Miguel cuan chi ra. ¹⁰ Soco ra cha sayangá chi ndo cuan, cahan cuehe ra vatyí ña chitó ra. Ta sacuvi ra tari sacuví quití. Vatyí quití ña cutuñí iñi ti. Nyacuví ri maa ti cha cuñí coño ñuhu ti. Ta tyicuan caa tucu ra cuan. Chihin cha quiñi caa nyacuví ra, sativí ra chi ra.

¹¹ ¡Ndahvi ra ndahvi cuan! Vatyí quehen ra cha caa ra Caín. Ta cha cuenda cha cuñí ra saha ganaa ra xuhun, quitá caxiin ra tari quita caxiin ra Balaam. Ta cucunaa ra tari cuanaa ra Coré, vatyí chihí ra cuan cha cuenda cha nacahnü ra nu cahan ra cuví nuu chi ra. ¹² Ra cha sayangá chi ndo chahá ra tichan nuu chi ndo nu ndu ñin ri ndo. Vatyí chachí ra ta chihí ra, chihin cha sñi cuñí ra. Ta ña cahan nuu ra cha ña sahá ra ñáyivi chi Nyoo. Ta noo ri maa ra sacuvahá ra chi ra. Cuví ra tari noo vico cha tyandahá tatyí chi, ta cuñí maa yo tyí cua coon savi, ta ña coón ra. Cuví ra tari noo yutun cha ña chaha chiti. Vatyí noo yutun cha ña chahá chiti cuví tun tari noo yutun chihí vasi nyitó tun. Ta sñin maa cha cucúvi vaha tun vatyí cucahnya ñáyivi chi tun. Tari cha uvi chaha chihí tun cuví cuan. Ta tyicuan caa maa ra, tari cha uvi chaha chihí ra vatyí chitó ra tuhun vaha ta ña cuñí ra sacuvi. ¹³ Tari ndutya yuhu tyañuhu tatu cha nduxaan chi, iyo xaan nicuinanyaa chi. Soco ñin yaha ri tyicuan ta ndoo maa ri maa tiñi ta mihin nu niyiti cuan. Tyicuan caa maa ra, sandoó ra cha quiñi caa ña ña ñáyivi. Ta cuví ra tari tiñoo andivi cha cuanaa. Soco cha nyaá maa cha cundoo ra nu ñaa iñi cahnü tyicuan ri maa.

¹⁴ Tuhun maa ra cuan cahan ra Enoc ta cha naha. Ra Enoc tata cu ucha ra Adán cuví ra. Ta cahan ra tuhun cha chahá maa Nyoo chi ra, ta catyí ra: “Nyehe chi Sutu Mañi yo cha vachí ra chihin cuaha mil ángel cuenda ra ¹⁵ vatyí nyehe ra cha

sacuvi tandihí ñáyivi. Ta tachi tuñi ra chi tandihí ñu quiñi iyó cha cuenda tandihí cha ña vaha cha chinyacuvi ñu, ta cha cuenda tuhun quiñi caa cha cacahán ñu siqui ra”, catyi ra Enoc ta cha naha. ¹⁶ Ra cha sayangá chi ndo, ña ndoó ra vaha chihin cha chahá Nyoo chi ra. Cahan ra chi Nyoo ta chi ñáyivi ta iyó ra tari cuhva quichi cuví iñi coño ñuhu ra. Cahan ra chihin cha cahnü sahá ra chi ra. Tatu cahan vaha ra chihin noo ñáyivi soco cha cuenda cha cuñí ra cuvaha ra nuu ñu.

Nu chahá ra Judas tuhun chi ñu yihí cuenda Nyoo

¹⁷ Soco nyoho yañi, ma quichaha ndo chi ra cuan. Soco nicohon iñi ndo tuhun cha cahan ra apóstol cuenda Sutu Mañi yo Jesucristo. ¹⁸ Cacatyí ra chi ndo vatyí nu cuasandihí ca chi quivi ta cuacoo ra cucuacu nyaa tuhun Nyoo. Ta coo ra yoso cuhva quichi cuví iñi maa ra chihin cha quiñi caa ra. ¹⁹ Ta ican ra ihya cacuví ra cuñí sacusñin chi yo. Vatyí quichahá ra cuhva cuñí coño ñuhu ra ta ñahri Tatyí li Nyoo nyaá chihin ra.

²⁰ Soco nyoho yañi, cunñi ca iñi ndo chihin cha chinó iñi ndo chi ra Cristo. Ta çacan tahvi ndo chi ra chihin tunyee iñi Tatyí li maa ra. ²¹ Ta tyicuan ri ñihi cunñyañaa ndo chi Nyoo, ta coto ndo vatyí cuñí xaan ra chi ndo. Ta cuatu tuhva ndo quivi chaa yo nu coo yo ñáyivi chaa cha ma naa ca maa. Vatyí ican cuví cha cuacuhva Sutu Mañi yo Jesucristo chi yo cha cuenda cha ndahvi cuñí ra nyehé ra chi yo.

²² Ta ndahvi cuñi nyehe ndo chi ñu cha ña ñi vaha iñi. ²³ Ta inga ñu, tyinyee ndo chi ñu tacuhva cacu ñu. Tari quivi cha tava ndo chi ñu nu cayú ñuhu. Ta chi inga ñu cundahvi cuñi ndo nyehe ndo chi ñu, soco saha ndo cuenda chi ndo chihin cha quiñi caa cha sacuví ñu, coto sacuvi ndo tari sacuví ñu. Nyacua nya sahama ñihnó ñu ta ña vaha cha cuenda cha sacuví ñu cha quiñi caa.

Nu ndihí cahan ra Judas ta sacahnü ra chi Nyoo

24-25 Noo ri Nyoo iyó, ta chiñi tuñi xaan ra. Ta ican ra cuví ra cha sacacú chi yo. Ta iyó xaan tunyee iñi chi ra cha sahá cuenda ra chi yo ta sanduvií ra chi yo cha ñahri cuatyi yo coo quivi cunyaca ra chi yo nu nyaá ra chihin cha cahnu cuví ra. Ta sii xaan cucuvi chi yo.

Na coto yo ñana cha cahnu xaan ca cuví ra. Chi maa ra na sacahnu yo vatyi cahnu xaan ca maa ra. Ta iyó xaan ca tunyee iñi chi ra. Noo tuhun ri maa ra nyacá ñaha tandihi. Nyacá ñaha ra ta ityi chata ca, vityin. Ta tyicuan ri maa cunyaca ñaha ra. Ta na cuvi chi tyicuan caa.

Cha Sañaha Ra Jesucristo Chi Ra Apóstol Juan

Cha nyehę ra Juan

¹ Ican ihya cuví noo cha catyí Nyoo chi ra Jesucristo vatyí na sacoto ra chi ra casacuví tyiño nuu ra. Sañaha ra ñáá ndihí cha cucuvi cha numí ri. Noo ángel tachí ra Jesucristo vatyí sañaha ra chi yuhu ra Juan.

² Ta cahín cha ndaa ta cha ndicha cuenda tandihí cha nyehí. Ta cuví cha ndaa cuenda tuhun Nyoo ta cuenda tandihí cha sacoto ra Jesucristo.

³ Sii xaan cuñí ñu sacuaha tuhun cha nyaá nu tutu tuhun Nyoo ihya. Ta sii xaan cuñí ñu chiñí tuhun cha cahán chi ta quichahá ñu, vatyí tandihí tuhun cha nyaá nuu tutu Nyoo, cha nyaña yatyin quiví cha cunyehe yo.

Nu sacuhun ra Juan tutu chi ndi ucha tahan vehe ñuhu

⁴ Yuhu ra Juan sacuhín tutu ihya chi ndi ucha vehe ñuhu ñuu cha nyicú ityi Asia. Nyoo ta ndi ucha tahan Tatyí li ra cha nyicú nuu ra nu nyaá ra nyacá ñaha ra nu tyayu chichi gloria, na nasoco ra chi ndo. Ta na coo cha taxi ri añima ndo sahá ra. Nyoo ícan ra cuví ra iyó vityin, ta iyó maa ra quiví quichaha tandihí, ta ícan ra cuquichi.

⁵ Ta naquehen tucu ndo cha vaha cuan sahá ra Jesucristo ñandihí. Vatyí ícan ra cuví ra cha ndaa vaha ta ra ndicha. Ta cuví tucu ra noo ra cha nandoto cha xihna ri ta tyicuan ri maa cucoo ra. Ta iyó ityi chi ra ta nyacá ñaha ra chi ra cacuví rey cha iyó siqui ñuhu ñayiví ihya. Ican ra cuví ra cha cuñí xaan chi yo. Ta sandachí ra cuatyí yo chihin ñiñi ra. ⁶ Ta sacuví ra rey chi yo. Ta sacuví ra tata sutu chi yo tacuhva vatyí sacuvi yo tyiño nuu Nyoo Sutu ra. ¡Na sacahnu yo chi ra. Ta na cunyaca ñaha ra tyicuan ri maa! Ta tyicuan caa na cuví.

⁷ ¡Nyehe ndo! ¡Cha vachi ra Cristo nu vico andiví! Tandihí ñáyiví cunyehe ñu chi ra. Nyacua nya ñu cha sañicuehe chi ra ta cunyehe ñu chi ra. Ta tandihí ñu cucuacu chaa ñu chihin cha yuhví ñu na nanyehe ñu chi ra inga chaha vatyí suri maa ra cuví. Cha ndicha, tyicuan caa cucuvi.

⁸ Catyí Nyoo:

—Yuhu cuví ra xihna cuiri, ta yuhu cuví ra cundoo nu ndihí tuhun —catyí Sutu yo Nyoo, ra iyó tandihí tunyee iñi chi. Ican ra cuví ra iyó vityin. Ta iyó maa ra nu quichaha tandihí, ta ícan ra cuquichi.

Noo cuhva tyaqui cha sañaha Nyoo chi ra Juan cuenda ra Cristo

⁹ Yuhu ra Juan cuví yañi nyoho. Ta ñin ri nyehé yo tindoho. Ta ñin ri nyacá ñaha Nyoo chi yo. Ta ñin ri cunyee xaan yo ñáá ndihí cha cuví chi yo vatyí tyinyeé ra Jesucristo chi yo. Ñoho yuhu vehe caa noo ñuhú cha nañí Patmos cha nyaá mahñu tyañuhu. Ñohi vehe caa cha cuenda vatyí cahín tuhun Nyoo cha quichí sañaha ra Jesucristo. ¹⁰ Ta cuví chi noo quiví cha sacahnú yo chi Sutu mañí yo. Ta ñihi xaan chinyaa Tatyí li Nyoo chihin. Ta chiñi noo ndusu ñihi xaan ityi chate, tari noo ndusu cha ñihi xaan tari ndusu trompeta. ¹¹ Ta catyí chi chii tyehe caa:

—Yuhu cuví ra xihna cuiri, ta yuhu cundoi nu ndihí tuhun. Tyaá nuu noo libru tuhun cha nyehun, yoho Juan. Ta sacuhun chi ndi ucha vehe ñuhu cha nyicú ityi Asia. Sacuhun chi ñu nyicú vehe ñuhu ñuu Éfeso, chi ñu vehe ñuhu ñuu Esmirna, chi ñu vehe ñuhu ñuu Pérgamo, ta chí ñu vehe ñuhu ñuu Tiatira, ta chí ñu vehe ñuhu ñuu Sardis, ta chí ñu vehe ñuhu ñuu Filadelfia, ta chí ñu vehe ñuhu ñuu Laodicea —catyí ndusu cuan.

¹² Tyicuan ta nanyocave vatyí cuñí nyehí yóo chi ndusu cha cahán chihin cuan. Ta nanyehí ucha tahan cañileru xuhun cuan. ¹³ Ta mahñu ucha tahan cañileru cuan, nyehí chi noo ra cha caá tari caá noo rayi ñuhu ñayiví

ihya. Ñihno ra noo sahma cañi nya nu chaha ra. Ta yihí ra noo sinchu xuhun cuaan, ta nya nu nyaá pechu ra chitahan sinchu cuan. ¹⁴ Ta cuichin ixi xiñi ra, tari ixi mbee cuichin, tari cha cuichin catyi. Ta tari cha cayú ñuhu chiti nuu ra. ¹⁵ Ta xiño chaha ra tari xiño noo caa cha nañi bronca cha tuhva nducuaha nu cayú ñuhu chichi noo horno. Ta ñihi xaan ndusu ra tari ndusu cha cuaha vavaha yuvi nahnu. ¹⁶ Ta yihí ndaha ra ucha tahan tiño andivi chiyo vaha ra. Ta tari caa noo mityi cha xaan ninduvi chiyo yuhu, (tyicuan caa tuhun cahán ra cha quitá yuhu ra). Ta tari caá cha ñihi xaan nyehé ñanyii cha xiño vavaha, tyicuan caá nuu ra.

¹⁷ Cuhva cha nanyehi chi ra, nduve chaha ra tari maa cha chihí. Soco maa ra tyiso ra ndaha chiyo vaha ra siqui, ta catyi ra chii:

—Ma yuhvun. Yuhu cuví ra xihna cuiri, ta yuhu cundoi nu ndihi tuhun. ¹⁸ Iquen cuví ra cha nyitó. Ta vasi chihí soco vityin cuacoí tyicuan ri maa. Ta iyó ityi chii cha catyi ama tahan chi tuhun chihi chi noo noo ñáyivi, ta iyó ityi chii cha catyi tatu kuhun ñu anyaya. ¹⁹ Tyaa nu libru tandihi cha nyehún, cha iyó vityin, ta cha cucoo nu cuahan ca chi. ²⁰ Ican ihya cuví tuhun xehe cuenda ndi ucha tiño andivi cha nyehún yihí ndaha chiyo vahi, ta cha cuenda ndi ucha cañileru xuhun cuaan cuan: Ndi ucha tiño andivi cuan cuñi chi catyi: ra cha cahán tuhin ucha tahan vehe ñuhu cuan. Ta ndi ucha cañileru cuan cuñi chi catyi ndi ucha vehe ñuhu cuan.

2

Tuhun cha sacuhun ra chi ñu nyicú vehe ñuhu ñuu Éfeso

¹ Sacuhun tutu chi ra cahán tuhin chihin ñu nyicú vehe ñuhu cha nyaá ñuu Éfeso. Ta catyun chi ra tyehe caa: “Tyehe caa catyi ra cha yihí ndaha ucha tiño chihin ndaha chiyo vaha ra. Ta chicá noo ra mahñu ndi ucha cañileru xuhun cuaan: ² Yuhu chité

tandihí cha sacuví ndo. Chité vatyi ñihi xaan tyiño sacuví ndo. Ta cunyeé xaan iñi ndo. Ta chité vatyi ña cunyeé iñi ndo nyehé ndo chí ñu quiñi iyó. Ta chité vatyi tuhva ndo nducu nyehé ndo chí ra cha catyi vatyi tyiño Nyoo chica noo ra soco ña ndicha ra. ³ Cunyeé xaan iñi ndo. Ta nyehé xaan ndo tindoho ta cha sahá tyiño xaan ndo cha cuende chihin cha ña ndu uvi iñi ndo. ⁴ Soco iyó noo cha caá ndo nui. Vatyi ña cuñi vaha ca ndo chii tari quivi xihna ri. ⁵ Yucuan chaha nicohon iñi ndo nya maa maa cuví nu ña vaha sacuví ndo. Ta nasama ndo kuhva iyó ndo. Ta sacuvi ndo tari kuhva chiyo ndo quivi natin cuenda ndo notuhun Nyoo. Tatu ma nasama ndo kuhva iyó ndo, numi ri kuhin nu nyaá ndo, ta tinyai cañileru ndo nu nyaá chi. Soco tatu ndu uvi iñi ndo cuatyi ndo, ma tinyai. ⁶ Soco iyó tucu cha vaha nyacuví ndo. Vatyi ña cuñi nyehé ndo cha quiñi caa cha sacuví ñu yihí cuenda ra Nicolás. Tyicuan tucu yuhu ña cuñi nyehí yucuan. ⁷ Ta nyoho cha cutuñi iñi ndo, tyasoho ndo ñáa cha catyi Tatyí Ii Nyoo chi nyoho ñu nyicú vehe ñuhu. Catyi ra tyehe caa: Tatu cuví chasaha ndo chí ra ña vaha, kuhve cha cachi ndo chiti yutun cha chahá cha conyito añima ndo. Ta yutun cuan nanyaá tun nya nu iyó Nyoo andivi, ta cuñihi ndo tandihí cha vaha cha iyó yucuan.”

Tuhun cha sacuhun ra Jesucristo chi ñáyivi nyicú vehe ñuhu ñuu Esmirna

⁸ Sacuhun tucu tutu chi ra cahán tuhin chihin ñu nyicú vehe ñuhu cha nyaá ñuu Esmirna, ta catyun chi ra tyehe caa: “Tyehe caa catyi ra cuví cha xihna cuiri, ra cundoo nu ndihi tuhun, ra cha chihí ta nandoto: ⁹ Yuhu chité tandihí cha sacuví ndo. Ta chité tindoho cha nyehé xaan ndo. Ta chité cha ndahvi ndo. Soco chihin tuhun Nyoo, tyayii ndo. Ta chité yoso caa ñu cha catyi vatyi ñu Israel cuví ñu, ta cahán ña vaha ñu siqui ndo. Ta ni ñima ñu Israel cuví ñu vatyi noo ityi ñu yihí cuenda ra ña vaha, ra nañi Satanás, cuví ñu. ¹⁰ Soco ma yuhvi

ndo cha cunyehe ndo t̄ndoho. Vatyí ra ña vaha cutyíhi ra vehe caa chi suhva nyoho, vatyí cunducu nyehe ra chi ndo tatu cusaña ndo chi Nyoo. Ta uchi quiv̄i cunyehe ndo t̄ndoho. Soco cunyicon vaha ndo chi Nyoo nyacua nya quiv̄i cúvi ndo. Ta yuhu cuhve ñayiv̄i coo ndo chihin Nyoo. ¹¹ Ta nyoho cha cutuñí iñi ndo tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: tatu cuví chasaha ndo chi ra ña vaha, ña tahán chí cuhun ndo anyaya, nu cutachi tuñi Nyoo chi añima ña vaha.”

Tuhun cha sacuhun ra Jesucristo chi ñu nyicú vehe ñuhu ñuu Pérgamo

¹² Sacuhun tucu tutu chi ra cahán tuhin chihin ñu nyicú vehe ñuhu ñuu Pérgamo. Ta catyun chi ra tyehe caa: “Tyehe caa catyí ra cha nyisó mityi cha xaan nd̄induvi chiyo yuhu: ¹³ Yuhu chité tandih̄i cha sacuví ndo. Ta chité vatyí iyó ndo nu nyacá ñaha cuihna, ra nañi Satanás. Soco tyicuan ri chinó iñi ndo chii. Ta vasi nu canyicú ndo chiña chahñi ñu chi ra Antipas, ra cha cuv̄i noo cha ndoo cuenda, vatyí chiña chicá noo ra cha nañi Satanás cuan. Soco ni ri maa chahñi ñu chi ra, nyoho ña sandih̄i maa ndo tuhun cha chinó iñi ndo chii. ¹⁴ Soco catuví suhva cha caá ndo nui: Vatyí nu nyicú ndo nya Pérgamo chiña, yih̄i ra cha ña cacuñí ra saña ra cuhva cha sacuv̄i ra Balaam. Ta maa ra Balaam tyiyuh̄u ra chi ra Balac, na sacachi ra chi ñu Israel nyayu cha chiyo nu sacahnú ñu chi xitohyo. Tyiyuh̄u ra chi ra nacatyí ra chi ñu vatyí ñahri caa cha coo ñu chihin tahan ñu vasi ñima ȳi ñu cuví, o vasi ñima ñasih̄i ra cuví. ¹⁵ Ta suri iyó suhva ñayiv̄i mahñu ndo cha ña cacuñí ñu saña ñu cuhva sañahá ra cuenda ra Nicolás. Ta yuhu ña cuñí nyehi cuhva sañahá ra cuan. ¹⁶ Yucuan chaha numi ri nasama ndo cuhva iyó ndo. Vatyí tatu ma nasama ndo cuhva iyó ndo, cuquichi siqūi ndo cha numi ri ta cucañi tahin chihin ñu cuan chihin cha tari mityi cha quitá yuhi. ¹⁷ Ta nyoho cha cutuñí

iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu: tatu cuví chasaha ndo chi ra ña vaha, cucuhve cha cachi ndo noo pan maná cha ñohó xehe. Ta cucuhve noo yuu cuichin chi ndo. Ta nu yuu cuan cucunyaa noo sivi chaa cha yori chitó. Ta noo tuhun ri ñu cuquehen cuenda cuan cucoto.”

Tuhun cha sacuhun ra Jesucristo chi ñu nyicú vehe ñuhu ñuu Tiatira

¹⁸ Sacuhun tucu tutu chi ra cahán tuhin chihin ñu nyicú vehe ñuhu cha nyaá Tiatira. Ta catyun chi ra tyehe caa: “Tyehe caa catyí Sehe Nyoo, ra cha caá chiti nuu tari noo cha cayú ñuhu. Ta tari caá noo caa finu cha nañi bronce cha xiño xaan, tyicuan caa chaha ra: ¹⁹ Yuhu chité tandih̄i cha sacuví ndo. Ta chité yoso cuhva cha cuñí ndo chi ñayiv̄i. Ta chité cuhva cha chinó xaan iñi ndo chii. Ta tyinyeé ndo chí tahan ndo. Ta cunyeé xaan iñi ndo. Ta chité vatyí cuaha ca cha vaha sacuví ndo vityin ta ñima ca ta nu quichaha. ²⁰ Soco iyó noo cha caá ndo: Vatyí chahá ndo ityi chi ñaha cha nañi Jezabel na sañaha ña chi ndo. Catyí ña vatyí cuenda Nyoo cahán ña. Soco chihin tuhun cha sañahá ña, sandaví ñaha ña chi ñu sacuví tyiño nui. Vatyí sañahá ña cha coo ñu chihin inga raȳi o ñusih̄i ta ñima ȳi ñu o ñasih̄i ra cuví. Ta sañahá ña cha cachi ñu nyayu cha chiyo nu sacahnú ñu chi xitohyo. ²¹ Yuhu cha nyatu xain cha nasama ña cuhva iyó ña, soco ña cuñí ña nasama ña. Vatyí ta sandoo ca ña cha iyó ña chihin raȳi ta ñima ȳi ña cuví. ²² Ta vityin cua quehen noo cuehe chi ña. Ta cua cuhvi ña. Ta ma cuv̄i nducuita ña. Ta ñu sacuví cha quiñi caa chihin ña, tatu ma ndu uvi iñi ñu, cucuhve noo t̄ndoho nyehe ñu. ²³ Ta cucahñi chí sehe ña. Ta tyicuan caa, coto tandih̄i ñu nyicú vehe ñuhu, vatyí yuhu chité tandih̄i cha chicá xiñi ñu, ta tandih̄i cha caá añima ñu. Ta chí tahan tahan nyoho cucuhve cha tahán chí chi ndo yoso cuhva cha sacuv̄i ndo. ²⁴ Soco chí tandih̄i ca nyoho ñuu Tiatira, cha ña quehen ndo cuhva cha sañahá ña,

ni ña sacuví ndo cha catyí maa ñu tuhun nahnu cuenda ra ña vaha, ña tyaí inga tuhun cha yíi síqui ndo. ²⁵ Soco ma saña ndo cuhva cha vaha nyacuví ndo nyacua nya quichi. ²⁶ Ta nyoho tatu cuví chasaha ndo chi ra ña vaha, ta sacuví ndo cuhva cuñí nyacua nya nu ndihí tuhun, cucuhve ityi chí ndo cha cunyaca ñaha ndo chí ñu ñuhu ñayiví. ²⁷ Tari chahá Suti ityi chíi cha cunyaca ñahi, tyicuan caa cucunyaca ñaha ndo. Tari cha chihin noo yutun caa cutachi tuñi ndo chí ñu. Tari tahvi cuatyí minoo quisi ñuhú, tyicuan caa cusacuví ndo chihin ñu. ²⁸ Ta cuhve tiño cahnu andiví cunyaa chihin ndo. Ta ican yuhu cuví cuan. ²⁹ Ta nyoho cha cutuñí iñi ndo tyasoho ndo ñáá cha catyí Tatyí Ii Nyoo chí nyoho, ñu nyicú vehe ñuhu.”

3

Tuhun cha sacuhun ra Jesucristo chí ñu nyicú vehe ñuhu ñuu Sardis

¹ Sacuhun tucu tutu chí ra cahán tuhun chihin ñu nyicú vehe ñuhu ñuu Sardis. Ta catyun chí ra tyehe caa: “Tyehe caa catyí ra cha yihí ndaha ndi ucha Tatyí Ii Nyoo ta ndi ucha tiño andiví: Yuhu chité tandihí cha sacuví ndo. Ta vasi catyí ñáyiví tyi nyitó ndo soco cha cuenda chí yuhu, chihí ndo. ² Saha cumi vaha ndo chiin ri ca cha vaha cha iyó chí ndo. Vatyí cha cuñí ndihí tuhun nu nyicú ndo. Vatyí nyehí vatyí cha sacuví ndo, ña vaha maa nuu Nyoo. ³ Nícohon iñi ndo tuhun vaha cha cutuhva ndo. Cunyicon ndo cuhva cuan, ta nasama ndo cuhva iyó ndo. Vatyí tatu ma naquehen vaha ndo cha vaha, sana iñi ndo ta cuquichi síqui ndo, tari tuhva ra suhu quichi. ⁴ Soco iyó suhva nyoho ñu Sardis chiña cha ña sacuví ndo cha quiñi caá. Na sacanyahyu ndo sahman do cuví cuan. Ta maa ndo cucuihno ndo sahman cuichin chihin. Ta cucaca noo ndo chihin, vatyí tyicuan caa tahán chí chí ndo. ⁵ Ta nyoho tatu cuví chasaha ndo chí ra ña vaha, cucuihno ndo sahman cuichin chihin. Ta ma sanai sívi ndo nu libru ñu cuaconyito chihin Nyoo. Ta cunacoto nui

chí ndo, chihin nuu Suti, ta chihin nuu ángel. ⁶ Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chí nyoho ñu nyicú vehe ñuhu.”

Tuhun cha sacuhun ra Jesucristo chí ñu nyicú vehe ñuhu Filadelfia

⁷ Sacuhun tucu tutu chí ra cahán tuhun chihin ñu nyicú vehe ñuhu ñuu Filadelfia. Ta catyun chí ra tyehe caa: “Tyehe caa catyí ra ii, ra ñahri cuatyí, ra cha ndicha vaha, ra cha ndaha ndaha tícu rey David, ra cha nuña yuvehe ta ni noo ñu ta ma cuví nacasi ñu. Ta tatu nacasi ra, ni noo ñu ta ma cuví nuña ñu. Tyehe caa catyí ra: ⁸ Yuhu chité tandihí cha sacuví ndo. Ta nuu ndo nuñe noo yuvehe. Ta yori cuví nacasi, (vatyi chahí cha cahan ndo tuhun Nyoo chihin ñáyiví, ta yori cuví casi). Ta vasi chiin ri fuerza ndo, soco quichahá ndo tuhun cahín, ta ña catyí ndo vatyí ña ñohó nuu ndo chíi. ⁹ Ta ñu cuenda ra ña vaha, ñu cuendu, ñu catyí vatyí ñu Israel cuví ñu, ta ñima, cusacuiñi chíti chí ñu nuu ndo, tacuhva coto ñu tyi yuhu cuñí chí ndo. ¹⁰ Ta sacuví ndo cha catyí, vatyí cunyeé iñi ndo. Ta yucuan cuenda cusaha cuende chí ndo chihin tindocho cahnu cha cusaquichi síqui tandihí ñáyiví, vatyí cunducu cote chihin tandihí ñu iyó síqui ñuhu ñayiví tatu cuñí ñu chíi. ¹¹ Numi ri cuquichi. Saha vaha ndo cuenda cuhva iyó ndo, coto yóo cha tinyaa premio cha cuñihi ndo. ¹² Nyoho tatu cuví chasaha ndo chí ra ña vaha, cahnu ca tyiño cucuvi ndo nuu Nyoi. Ta ma canyaha ca ndo nu nyaá Nyoo. Ta cutyai sívi Nyoi chí ndo, ta sívi ñuu Nyoi, ñuu Jerusalén chaa cha cusaquichi Nyoi nya andiví, ta suri cutyaa tiqui sívi chai chí ndo ñandihí. ¹³ Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chí nyoho ñu nyicú vehe ñuhu.”

Tuhun cha sacuhun ra Jesucristo chí ñu nyicú vehe ñuhu ñuu Laodicea

¹⁴ Sacuhun tucu tutu chí ra cahán tuhun chihin ñu nyicú vehe ñuhu ñuu

Laodicea. Ta catyun chi ra tyehe caa: “Tyehe caa catyí ra cha ndicha vaha, ra cuví cha ndaa vaha cha cahán cha ndicha, ra cha savahá tandihí cha iyó chihin Nyoo. ¹⁵ Yuhu chité tandihí cha sacuví ndo. Ta chité vatyi ni ña cuñí vaha ndo chii. Ta ni ña cuñí tucu ndo saña ndihí ndo chii. Vaha tyehe ta saña ndihí ndo chii, o sañihí ndo quichaha ndo tuhun cahin, vaha. ¹⁶ Soco vatyi chiin ri cuñí ndo chii, ta ni ña saña ndihí ndo chii, ta ni ña cuñí ndo sacuvi ndo tuhun cahin, yucuan chaha cusanaa ndihí iñi tuhun ndo. ¹⁷ Vatyi nyoho catyí ndo tyehe caa: Yuhu tyayí, vaha iyé, ta ñahri ca maa cha chiñuhú chii, catyí ndo. Ta ña chitó ndo vatyi cuví ndo noo ra ña siñi cuñí, noo ra ñahri iyó chi, noo ra ndahvi, noo ra cuaa, noo ra vityiyaa cuví ndo. ¹⁸ Yucuan chaha चाहí tuhun chi ndo vatyi chi mai sata ndo xuhun cuaan vaha cha yaha nu ñuhu ta ña cayú, tacuhva na cutyayí ndo. Ta chi mai sata ndo sahma cuichin vatyi cuihno ndo, tacuhva cha ma cuahan nuu ndo vatyi vityiyaa ndo. Ta tyihí ndo colirio chiti nuu ndo tacuhva na nanyehe ndo. ¹⁹ Yuhu चाहí tuhun chi ñu cha cuñí xain chi. Ta tachí tuñi chi ñu ñandihí. Yucuan chaha catyí chi ndo, nasama ndo cuhva iyó ndo ta sacuvi ndo cha vaha. ²⁰ Yuhu nanyaí yuvehe añima ñáyivi ta sacachén. Tatu nya noo ñu chiñí ñu ndusi, ta nuña ñu yuvehe, yuhu quihvi ta cuxiñi chihin ñu. Ta maa ñu cuxiñi ñu chihin mai. ²¹ Cucuhve cha cunyaa ndo chihin nu nyacá ñahi tatu cuví chasaha ndo chi ra ña vaha. Tari yuhu cuví chasahi chi ra, ta vityin nyaí chihin Suti nu nyacá ñahara. ²² Ta nyoho cha cuví cutuñi iñi ndo, tyasoho ndo cha catyí Tatyí Ii Nyoo chi nyoho ñu nyicú vehe ñuhu” —catyí ra Jesucristo.

4

Noo cuhva cha sacahnú ñu chi Nyoo nya gloria

¹ Cha yaha tuhun cuan, ta nyehí noo yuvehe tacoho nya andivi. Ta noo ndusu cha tari caa ndusu

trompeta chiñi cha cahán chihin cha xihna ri ta catyí chi chii:

—Ndáa ihya ta cusañahi chuun cha cuacuví nu cuahan ca chi —catyí ndusu cuan chii.

² Ta caa cuhva ri cuan ta tuví iñi vatyi ñihí vavaha nyaá Tatyí Ii Nyoo chihin. Ta nanyehí noo tyayu nanyaá nya andivi. Ta nyaá noo ra nuu tyayu cuan. ³ Ta ra nyaá cuan, xiño nuu ra tari xiño noo yuu vaha cha nañi jaspe ta cornalina. Ta nicachico yuhu tyayu cuan nyaá noo coo yahnyí, ta xiño ti tari yuu cha nañi esmeralda. ⁴ Ta nicachico tyayu cuan nyehí oco cumi ca tahan tyayu. Ta nyicú oco cumi tahan ra cha vaha chahnu, Cañihno ra sahma cuichin. Ta yihí corona xuhun cuaan xiñi ra. ⁵ Ta nu nanyaá tyayu cha nyaá mahñu cuan, yucuan quitá minoo tacha. Ta vaa ri ca maa cuví. Ta ñihí xaan cahán savi. Ityi nuu tyayu cuan cayú ucha tahan ñuhu. Ta ucha tahan Tatyí Ii Nyoo cuví cuan. ⁶ Ta ityi nuu tyayu cuan iyó tucu noo cha tari caa tyañuhu, xiño xaan tari ino.

Nicachico yuhu tyayu cuan ta mahñu tyayu cuan, tayucú cumi tahan cha nyitó cha tari caa quitá ta tari caa ñáyivi caa. Ta cuaha xaan chiti nuu cuan nyicú, tari ityi nuu ta tari ityi chata. ⁷ Cha xihna ri cha nyitó ihya, tari caá noo ndicaha caá. Ta cha cu uvi tari caá noo sindiqui caá. Ta cha cu uñi, tari caá nuu rayí caá nuu. Ta cha cucumi tari caá noo tasu cha cuahan ndava, tyicuan caá. ⁸ Ta ndi cumi tahan cha nyitó ihya, tahan tahan chi ta nyaá iñu tahan ndichin chi. Ta nicahnu maa chi nyaá chiti nuu chi, tari ityi chata chi ta tari ityi chichi ndichin chi. Ta ndiyaca ta ñiyaca ta ña chicuita chi catyí chi tyehe caa:

Ra ii xaan cuvún, ra ndi xaan cuvún, ra ñahri cuatyí cuvún,

Sutu Mañi yuhu, Nyoo, iyó tandihí tunyee iñi chuun.

Ra cha iyó nu quichaha tandihí cuvún, Ta ra iyó vityin. Ta ra cha nyaá cha cuquichi.

⁹ Ta cachahá ndi cumi tahan cha nyitó cuan gloria chi Nyoo. Ta sacahnú chi chi ra, ta canacuhvá chi tyahvi nyoo chi ra nyaá nu tyayu cahnu cuan, ra cha iyó tandihí tyembu. Ta tahan ri chaha cha casacuví chi tyicuan caa, ¹⁰ ta ndi oco cumi ra cha vaha chahnu cuan chicutiñi chiti ra ta casacahnu ra chi ra iyó tandihí tyembu. Ta catyihí ra corona ra nu tyayu cahnu cuan. Ta cacatyí ra tyehe caa:

¹¹ Sutú Mañi nyuhu, Nyoo cuvún chi ndi. Chi yoho tahán chi cha cuhva ndi gloria, ta sacahnú ndi chuun. Ta tahán chi cha cunyaca ñahun. Vatyí maun savaha tandihí cha iyó. Ta cha cuenda cha iyó ñi maun ta chicoo tandihí, cacatyí ra.

5

Nu nyehé ra Juan noo libru ta noo Mbee Luhlu cha cuví ra Jesucristo

¹ Tyicuan ta chiyo vaha ra cha nyaá nu tyayu cahnu cuan, nyehí yihí ndaha ra noo libru tari caá noo tutu cha natuvi yo. Ta nyaá letra ityi nuu ta ityi chata. Ta nyaá chi chihin ucha tahan sellu. ² Ta nyehí noo ángel cha nyee xaan. Ta chaa xaan cahán ra ta ndacá tuhun ra:

—¿Yóo ra tahán chi nuña libru ihya ta sacanyaha ra sellu ihya? —catyí ra.

³ Soco ni ityi andivi ta ni ityi nu ñuhu ñayivi, ta ni ityi chichi ñuhú, ta yori maa cha cuví nuña libru cuan. Ta ni cha nyehe ñu nuu, ta ma cuví.

⁴ Ta yuhu chacu chaa xain, vatyí yori maa quitá cha cuví nuña libru cuan. Yori maa cuví sacuaha, ta yori cuví nyehe nuu chi. ⁵ Tyicuan ta noo ra cha vaha chahnu cuan catyí ra chii:

—Ma cuacu con. Vatyí ra cuví ndicaha o cuñí chi catyí, ra nyacá ñaha, ra vachi tata ra Judá, ra vachi tata rey David, ican ra cuví chasaha ra tacuhva cuví nuña ra nu libru cuan ta cahnya ra ndi ucha sellu cuan —catyí ra.

⁶ Tyicuan ta mahñu tyayu cuan ta mahñu ndi cumi cha nyitó cuan, ta

mahñu ra cha vaha chahnu cuan, nyehí chi noo Mbee Luhlu. Nanyaá ti ta caa ti cha chahñi ñáyivi chi ti. Ucha tahan ndiqui ti ta ucha tahan chiti nuu ti nyaá. Ta chiti nuu cuan ican cuví ndi ucha tahan Tatyí Ii Nyoo cha tachí ra nicacahnu siqui ñuhu ñayivi.

⁷ Ta ra cuví Mbee Luhlu cuan chahan ra ta quehen ra libru cuan cha yihí ndaha chiyo vaha ra nyaá nu tyayu cuan. ⁸ Cuhva cha quehen ra libru cuan, ndi cumi cha nyitó cuan ta ndi oco cumi ra cha vaha chahnu cuan cachicutiñi chiti ra nuu ra cuví Mbee Luhlu cuan. Ta tahan tahan ra cha vaha chahnu cuan nyisó ra arpa, noo cha tari caá guitarra caá. Ta canyisó tucu ra copa xuhun cuaan tyitu yihí cutu. Ta cutu cuan cuví chi tandihí cha chican tahvi ñu cuenda Nyoo.

⁹ Ta cachita ra noo yaa chaa, ta catyí ra tyehe caa:

Yoho cuví ra tahán chi cha quehun libru ihya, ta cahnyon ndi ucha sellu cha nyaá nu chi.

Vatyí chihun saha ñáyivi. Ta chihin niñun saton chi ndi vatyí coo vaha ndi chihin Nyoo.

Ta cuví ndi ñáyivi ñuu nyihi ta ñuu nahnu nicacahnu ñuhu ñayivi, ñáyivi sin sin sahan cahán, ñáyivi sin sin tata.

¹⁰ Chahun ityi chi ndi vatyí cuví ndi rey ta cuví ndi sutu cha cuenda Sutú yo Nyoo.

Ta cucunyaca ñaha ndi chi ñáyivi iyó siqui ñuhu ñayivi, cacatyí ra, chita ra.

¹¹ Yaha cuan ta nanyehí, ta chiñi ndusu cha cahán cuaha xaan ángel, tayucú ra nicachico yuhu tyayu cahnu cuan, ta nu nyicú cumi tahan cha nyitó cuan, ta nu nyicú ra cha vaha chahnu cuan. Ta cuenda millón ángel nyicú cuan, nyehí. ¹² Ta chihin cha ñihi cahan ángel cuan, ta cacatyí ra:

Ra cuví Mbee Luhlu cha chahñi ñáyivi,

tahán chi cha cunyaca ñaha ra, ta naquehen cuenda ra cha tyayii.

Tahán chi naquehen cuenda ra cha chiñi tuñi.

Tahán chi cha naquehen cuenda ra tandihí tunyee ñi.

Tahán tucu chi cha cuhva yo gloria chi ra, ta sacahnu yo chi ra.

Ta cahnu xaan ca ra cuví maa ra, cacatyí ángel cuan.

¹³ Ta chiñi tiqui cha cahán tandihí cha savaha Nyoo, tandihí cha iyó andiví, ta siqui ñuhu ñayiví, tandihí cha iyó chichi ñuhú, ta chichi tyañuhu, tandihí cha savaha Nyoo catyí chi tyehe caa:

Cahnu xaan ca cuví ra cha nyaá nu tyayu.

Cahnu xaan ca cuví ra cuví Mbee Luhlu.

Ta nacuhva yo gloria chi ra.

Ta na cunyaca ñaha ra tandihí maa tyembu, catyí tandihí cha savaha Nyoo.

¹⁴ Ta ndi cumi cha nyitó cuan catyí chi:

—¡Ñaha, ta nyehun! —catyí chi.

Ta ndi oco cumi ra cha vaha chahnu cuan, cachicuiñi chiti ra ta casacahnu ra chi ra iyó tandihí tyembu.

6

Nu chahnya ra Jesucristo ndi ucha tahan sellu

¹ Tyicuan ta nyehi nu chahnya ra cuví Mbee Luhlu cuan sellu cha xihna ri chichi cha ndi ucha tahan cuan. Ta chiñi cahán noo cha nyitó cha cumi tahan cuan, chihin noo ndusu cha tari caá cha cahán savi ta catyí chi:

—¡Ñaha, ta nyehun! —catyí chi chii.

² Tyicuan ta nanyehi ta nyehi noo caballu cuichin, ta ra yosó chi ti cuan ndaha ra noo arco. Ta ñihí ra noo corona quihí xiñi ra vatyí saha ganaa ra, ta cuasaha ganaa ca ra. ³ Ta cuhva cha chahnya ra cuví Mbee Luhlu cuan sellu cu uvi, chiñi cha catyí cha nyitó cu uvi cuan tyehe caa:

—¡Ñaha, ta nyehun! —catyí cuan chii.

⁴ Ta quita inga caballu, tyacu cuaha. Ta ra cha yosó chi ti chicoo ityi chi ra vatyí tinyaa ra cha taxi ri iyó ñayiví, tacuhva cahñi ñu chi tahan ñu. Ta ñihí ra noo mityi cahnu quindaha ra. ⁵ Ta cuhva cha chahnya ra cuví Mbee Luhlu cuan sellu cu uñi, ta chiñi cha catyí cha nyitó cu uñi cuan tyehe caa:

—¡Ñaha, ta nyehun! —catyí cuan chii.

Ta nanyehi, ta nyehi noo caballu toon. Ta ra yosó chi ti, yihí ndaha ra noo ticatya. ⁶ Ta chiñi noo ndusu mahñu cumi tahan cha nyitó cuan, ta catyí cuan:

—Tari cuhva xuhun yahvi ñu cha noo quivi, yucuan cuhva yahvi noo litru nuñi. Tyicuan caa tucu uñi litru cebada. Ta ma sativun acetye ta vinu —catyí ndusu cuan.

⁷ Ta cuhva cha chahnya ra cuví Mbee Luhlu cuan sellu cu cumi, chiñi cha cahán cha nyitó cucumi cuan, ta catyí chi, tyehe caa:

—¡Ñaha, ta nyehun! —catyí chi.

⁸ Ta nanyehi ta nyehi noo caballu cuaan. Ta ra yosó chi ti nañi ra Tuhun Chihí. Ta chata ra vachi inga ra cha nañi Ra Nyacá Ñaha Nu Nyicú Ndiyí. Ta cañihí ra tunyee ñi cha cahñi ra chi cuaha xaan ñayiví iyó siqui ñuhu ñayiví. Vatyí chichi cha sava ñayiví iyó siqui ñuhu ñayiví, cucahñi ra sava ñu. Ta cucahñi ra chi ñu chihin cha sanacanda ra cuatyí, ta chihin tama, ta chihin cuehe, ta chihin quití xaan iyó siqui ñuhu ñayiví.

⁹ Cuhva cha chahnya ra cuví Mbee Luhlu cuan sellu cu ohon, nyehi xiu arta. Yucuan ñohó ñima ñu cha chihí cha cuenda tuhun Nyoo tyi sacoto ñu tuhun ra chi ñayiví. ¹⁰ Ta tyehe caa catyí ñu chihin noo ndusu chaa xaan:

—Sutu Mañi yuhu, ra ii cuvún. Ta sacuvún cha catyún. ¿Ama cutachi tuñun chi ñayiví cha chahñi chi ndi cha catyí tuhun maun? —catyí ñu.

¹¹ Tyicuan ta cañihí noo noo ñu cuan sahna cuichin cuihno ñu. Ta catyí ra chi ñu na canyitatu ñu suhva ca quivi, nyacua nya cha caña tahan

tandihí ca tahan ñu, ñu sacuví tyiño nuu ra Cristo, ñu cha tahan chi cucúvi tari cuhva chihí maa ñu.

¹² Cuhva cha chahnyá ra cuví Mbee Luhlu cuan sellu cu iñu, nanyehí ta quichi noo cha taán cahnu. Ta nduñaá ñayiví, tari sahma ñu nyaá tucuihya iñi, toon xaan nduví. Ta yoo andiví cuan nanduví tari niñi. ¹³ Ta tiño andiví canacoyo ti nya nu ñuhu ñayiví. Tari sanacoyo tu higo chiti yutya tun tatu yahá noo tatyí ñihi. ¹⁴ Tari natuví yo noo tutu tyicuan caa cuanaa ri andiví. Ta tandihí yucu ta tandihí ñuhú cha nyicú mahñu tyañuhu nacanda chi ta nasama chi nu nyaá chi. ¹⁵ Ta tandihí rey cha iyó siqui ñuhu ñayiví in ri chihin ra nahnu, ta ra tyayii, ta ra cacuví nuu chi sindaro, ta ra iyó xaan fuerza chi, ta tandihí ñu cacuví musu, ta ñu cha ña cuví musu, tandihí ri ñu cuan caquihví xehe ñu chichi yavi yuu cha iyó yucu nahnu, ta chichi yavi ñuhú. ¹⁶ Ta catyí ñu chi yucu cuan ta chi yuu cuan tyehe caa:

—Canacoyo ndo siqui ndi, ta tixehe ndo chi ndi nuu ra nyaá nu tyayu andiví, coto tachi tuñi ra cuví Mbee Luhlu cuan chi ndi.

¹⁷ Vatyí cha chaá quiví cahnu cha cutachi tuñi ra chi ndi. ¿Ta yóo cuví cha cuví cunye cuan? —catyí ñu.

7

Nu ñihí ñu Israel sellu cunyaá tyaan ñu

¹ Cha yaha tuhun ihya ta nyehí cumi tahan ángel catayucú ra ndi cumi chiyo nu quichi tatyí siqui ñuhu ñayiví. Ta ña chahá ra yaha tatyí cuan vatyí cava chi siqui ñuhu ñayiví. Ni ña chahá ra cha cava chi nuu tyañuhu, ni siqui yutun catayucú nuu ñuhú. ² Ta nyehe tiqui inga ángel, vachi ra ityi nu caña ñanyii, ta nyisó ra sellu Nyoo nyitó. Ta ángel cuan canachaa ra chihin cha ñihi ndusu ra chi inga cumi ca ángel cuan, ra cha ca iyó ityi chi vatyí casativí ra nuu ñuhu ñayiví ta nuu tyañuhu. Ta catyí ra chi ra:

³ —Ma sativí ñaha ndo nuu ñuhu ñayiví, ni nuu tyañuhu, ta ni nuu yutun cha niri ca cha ta sañaha ca ndi yóo ñu cuví musu Nyoo, vatyí cutyaa ndi noo sellu tyaan ñu —catyí ángel cuan.

⁴ Ta chiñi nacatyí ra yoso tahan ñáyiví tyaa ra sellu cuan: cientu uvi xico cumi mil tahan ñu Israel. ⁵ Uchi uvi mil ñu tata ra Judá chicunyaá sellu, ta uchi uvi mil ñu tata ra Rubén, inga uchi uvi mil ca ñu cuenda tata ra Gad, ⁶ uchi uvi ca mil cuenda tata ra Aser, uchi uvi mil ca cuenda tata ra Neftalí, uchi uvi mil ñu tata cuenda ra Manasés, ⁷ ta uchi uvi mil cuenda tata ra Simeón, uchi uvi mil cuenda tata ra Leví, ta uchi uvi mil cuenda tata ra Isacar, ⁸ uchi uvi mil ñu cuenda tata ra Zabulón, ta uchi uvi ca mil ñu cuenda tata ra José, ta uchi uvi mil ca ñu cuenda tata ra Benjamín. Tandihí ñu cuan ta chicunyaá sellu Nyoo chi ñu.

Nu nyehe ra Juan chi ñu ñihno sahma cuichin

⁹ Cha yaha tuhun cuan ta nanyehí ta nyehí cuaha xaan ñáyiví nyicú. Ta yori cuví nacahvi chi ñu, vatyí nyicú ñáyiví tandihí ri ñuu nyihi ta ñuu nahnu iyó siqui ñuhu ñayiví. Ta nyicú ñáyiví siin siin sahan cahan. Ta nyicú ñáyiví tandihí ri tata. Ta catayucú ñu nuu ra nyaá nu tyayu, ta nuu ra cuví Mbee Luhlu. Ta cañihno ñu sahma cuichin. Ta cayihí ndaha ñu ndaha ñoo. ¹⁰ Ta tandihí ñu chihin cha ñihi ndusu ñu, ta canachaa ñu ta catyí ñu:

—Sutu yo Nyoo, ra nyaá nu tyayu gloria, ta ra cuví Mbee Luhlu, ican ra sacacu chi yo —cacatyí ñu canachaa ñu.

¹¹ Ta tandihí ángel catayucú ra nicachico yuhu tyayu cuan, ta nicachico chata ra cha vaha chahnu cuan, ta nicachico chata ndi cumi tahan cha nyitó cuan. Ta cachicuiñi chiti ra chihin nuu ra nya nu ñuhú nuu ra nyaá tyayu cuan. Ta casacahnú ra chi ra. Vatyí Nyoo cuví ra. ¹² Ta cacatyí ra:

Tahán chi tyehe caa chuun:

Sacahnú ndi chuun ta chahá ndi gloria chuun vatyí chiñi tuñi xaun.

Nacuhvá xaan ndi tyahvi nyoo chuun.

Ta sacuvahá ndi chuun vatyí iyó xaan tunyee iñi chuun, ta cuaha xaan fuerza iyó chuun, Nyoo Sutu ndi cuví chuun. Ta tyicuan ri na cuvi chi tandihí tyembu, catyí ra.

¹³ Tyicuan ta noo ra cuví ra cha vaha chahnu cuan ndacá tuhun ra chii ta catyí ra:

—¿Yóó ñu cañihnó sahma cuichin ihya? ¿Ta nya ityi quichí coyo ñu? —catyí ra.

¹⁴ Ta yuhu catyí chi ra:

—Tata, yoho chitón.

Ta catyí ra chii:

—Ican ñu ihya cuví ñu cayaha nu tindoho cahnu. Ta canacatyá ñu cuatyí ñu, ta nducuichin sahma ñu chihin ñiñi ra cuví Mbee Luhlu. ¹⁵ Yucuan chaha nyicú ñu ityi nuu tyayu nu nyaá Nyoo. Ta sacuví ñu tyiño nuu ra ndiyaca ta ñiyaca chichi vehe ñuhu ra. Ta ican ra cuví ra nyaá nu tyayu gloria ta cusaha cumi ra chi ñu vatyí cua cunyaa ra chihin ñu. ¹⁶ Ta ma nyehe ca ñu tindoho chihin soco, ni chihin cha ityi ñu ndutya. Ta ni ma cahmi ca ñanyii chi ñu. Ni ma sayanga ca cha ihñi chi ñu. ¹⁷ Vatyí ra cuví Mbee Luhlu cha nyaá mahñu tyayu cuan cusaha cumi ra chi ñu, tari sahá cumi yo mbee. Ta cunyaca ra chi ñu nu coho ñu ndutya cha chahá cha cuconyito ñu tandihí tyembu. Ta Nyoo cunacuhva ra tandihí ndutya nuu ñu —catyí ra chii.

8

Nu chahnya ra Jesucristo sellu cu ucha ta quitá noo ángel chihin noo cuu xuhun cuaan

¹ Cuhva cha chahnya ra cuví Mbee Luhlu sellu cu ucha nu libru cuan, ndutaxin ri nya andivi tari noo cha sava hora.

² Yaha cuan ta nyehi chi ndi ucha ángel catayucú ra nuu Nyoo. Ta

caquehen cuenda ra ucha tahan trompeta. ³ Yaha cuan ta quichí inga ángel chihin noo cuu xuhun cuaan cha tuhvá yihí cutu. Ta chicuinanyaá ra ityi nuu arta cuan. Ta quehen cuenda ra cuaha xaan cutu, vatyí cuhva cuenda ra ñin ri chihin cha chicán tahvi ñáyivi chi Nyoo. Nu arta xuhun cuaan cha nyaá ityi nuu tyayu Nyoo, yucuan chahá cuenda ra.

⁴ Ta quitá ñuhma cutu cuan, nandaá chi nu nyaá Nyoo ñin ri chihin cha chicán tahvi ñu cuenda ra. ⁵ Tyicuan ta ángel cuan quehen ra cuu cuan. Tyicuan ta sacutu ra chihin titi ñuhu cha quitá arta cuan. Ta tuchí ra siqui ñuhu ñayivi. Ta quichaha cahan savi, ta iyo cuví. Ta quihvi tacha, ta quichaha taan.

Nu tiví ángel trompeta

⁶ Tyicuan ta ndi ucha ángel cha canyisó ndi ucha trompeta cuan, cha nyatú tuhva ri ra vatyí cativi ra.

⁷ Ángel cha xihna ri cuan quichaha tiví ra trompeta ra. Ta quichaha coon savi yuu ta saca ñiñi chihin chi, ta saca ñuhu cha cayú chihin. Ta cayú cha yatyin cha sava ñuhu ñayivi. Ta cha yatyin cha sava yutun cayú chihin tandihí cuhu cuui.

⁸ Ta ángel cu uvi cuan tiví tucu ra trompeta ra. Ta canacava tari noo yucu cha cayú ñuhu mahñu tyañuhu. Ta cha yatyin sava tyañuhu cuan nduvi chi ñiñi. ⁹ Ta cha yatyin sava quití cha iyó chichi tyañuhu cuan chihí ti. Ta cha yatyin sava barcu cha iyó cuan, catahvi cuatyí.

¹⁰ Ta ángel cu uñi tiví ra trompeta ra. Ta canacava noo tiño cahnu andivi, suri cayú ñuhu chi ti tari ñuhu ñiti. Canacava ti siqui cha yatyin ri sava yuvi nahnu ta siqui cha yatyin ri sava ndohyo. ¹¹ Ta tiño cahnu cuan nañi ti Ajenjo. Ta cha yatyin ri sava ndutya cha iyó, nanduvi chi Ajenjo cha cuví noo veneno cha uva xaan. Ta cuaha xaan ñáyivi chihí cha cuenda ndutya cuan, vatyí ndu uva chi. ¹² Ta ángel cu cumi cuan nativi ra trompeta ra ta cha yatyin sava ñanyii nduñaa, ta

cha yatyin sava yoo, ta cha yatyin cha sava tiñoo andiví cuanaa ti. Ta cha cuenda cha nduña suhva ñanyii cuhva cuan, nduña cumi tahan hora cha noo noo quiví. Ta cha cuenda cha tiví yoo ta tiñoo, yucuan chaha ña cacuví sandichin chí cumi tahan hora cha noo noo ñuu.

¹³ Yahá cuan ta nanyehí ta chiñí vatyí noo ángel ndavá ra mahñu andiví. Ta chihin cha ñihi ndusu ra ta catyí ra tyehe caa:

—¡Ndahví cuví ñu iyó síqui ñuhu ñayiví vatyí nyaá tiví uñi ca tahan ángel trompeta ra! —catyí ángel cuan.

9

¹ Ta ángel cu ohon cuan nativí ra trompeta ra. Ta nyehí chí noo ra cuan, tari tiñoo andiví caá ra. Ta canacava ra síqui ñuhu ñayiví. Ta quehen cuenda ra cuan ndaha ticu cha cuenda yavi cono cha ñahri maa nu chitahan chí. ² Tyicuan ta nuña ra yavi cuan. Ta cuaha ñuhma nandaa tari maa ñuhma cha quitá chichi noo horno cahnu. Ta ñuhma cuan chasí chí nuu ñanyii ta nasaca noo chihin tatyí. Ta nduña ñayiví. ³ Ta mahñu ñuhma cuan caquitá coyo pinchi. Ta candava coyo ti síqui ñuhu ñayiví. Ta chicoo ityí chí ti vatyí tyaa ti chí ñáyiví tari tisuhma cha iyó síqui ñuhu ñayiví. ⁴ Quehen ti tuhun vatyí ma satasí iñi ti, ni chí cuhu cha iyó nu ñuhu ñayiví, ta ni noo cuhu cuii, ta ni noo yutun, soco chí ñáyiví cha ñahri sellu Nyoo nyaá tyaan ñu. Chí ñu cuan cutyaa ti. ⁵ Soco ñahri ityí iyó chí ti cha cahñi ti chí ñáyiví, soco tacuhva tyaa ri ti chí ñu. Ta coo xico uhví chí ñu chichi cha ohon yoo. Ta cha uhví cuan, tari caá xico tisuhma cha tyaa chí ñáyiví tyicuan caá. ⁶ Ta quiví cuan ñáyiví cunanducu ñu tuhun chihi. Soco ma nañihi ca ñu. Ta vasi cuñi ñu cúvi ñu, soco tuhun chihi cucono ri chí chí ñu vatyí ma cúvi ñu.

⁷ Tari caá caballu nahnu cha cachicá cuatyí, tyicuan caá pinchi cuan. Ta xiñi ti yihí tari caá noo corona xuhun cuan. Ta tari caá nuu rayí, caá nuu ti. ⁸ Ta ixi xiñi ti tari

caá ixi xiñi ñusihí caá. Ta tari caá noho ndicaha caá noho ti. ⁹ Ta soo ti tari caa, tyicuan caa. Ta ñihi xaan cachan ndichin ti. Tari cachan cha cuaha xaan carreta caballo cuhva cha cachinó ti nu iyó cuatyí. ¹⁰ Ta tari caá suhma tisuhma caá suhma ti, vatyí yihí iñu. Ta chihin cuan cuví tyaa ti chí ñáyiví chichi cha ohon yoo.

¹¹ Ta pinchi cuan iyó noo ra cuví nuu chí ti. Ta ican cuví noo ángel cha nyacá ñaha yavi cahnu ta cono cha ñahri nu chitahan. Ta cha chihin sahan hebreo nañi ra Abadón. Ta chihin sahan griego nañi ra Apolión, ta cuñi chí catyí: Ra Sanaa.

¹² Yahá noo tindoho cuan, soco cumañi uvi ca.

¹³ Ta ángel cu iñu cuan nativí ra trompeta ra. Ta chiñi noo ndusu cha quitá chichi ndi cumi ndiqui tutun arta xuhun cuan cha nyaá nuu Nyoo. ¹⁴ Ta ndusu cuan catyí chí ángel cu iñu cha nyisó trompeta cuan, tyehe caa:

—Ndachi chí ndi cumi ángel cha canuhñi yatyin yuhu yuvi cahnu Eufraates —catyí ndusu cuan.

¹⁵ Tyicuan ta ndachi ndi cumi ángel cuan, vatyí cha nyatu tuhva xaan ra maa maa cuhva cuan maa maa quiví cuan, maa maa yoo cuan, maa maa cuiya cuan, vatyí cahñi ra chí cha yatyin cha sava ñáyiví iyó síqui ñuhu ñayiví. ¹⁶ Ta chiñi yoso tahan sindaro chihin caballo ra, ta quitá uvi cientu millón tahan ra.

¹⁷ Ta tyicuan caa nyehí caballo cuan chihin visión, cha sanyehé Nyoo chii. Ta pechu ra cayosó chí ti cuan, yihí noo caa tyacu cuaha, tyacu azu ta tyacu cuan. Ta tari caá xiñi ndicaha caá xiñi caballo ra. Ta chichi yuhu ti quitá ñuhu ta ñuhma ta azufre. ¹⁸ Ta cha yatyin sava ñáyiví iyó síqui ñuhu ñayiví cachihí chihin uñi tahan cha caquitá yuhu caballo cuan; ñuhu ta ñuhma ta azufre. ¹⁹ Vatyí tunyee iñi cha iyó chí ti, chichi yuhu ti ta suhma ti nyaá. Vatyí tari caá coo, caá suhma ti. Tari noo xiñi coo tyicuan caa nuu suhma ti. Ta chihin cuan sañicuehé ti chí ñáyiví.

20 Soco tandihí ca ñu cha candoq, cha ña cachihí chihin cuehe cuan, ña sacucuita ñu cha sacuví ñu cha ña vaha. Ta ni ña sacucuita ñu cha sacahnú ñu chi tatyí ña vaha ta chi xitohyo. Vatyí cuví cuan noo xuhun cuaan, xuhun cuichin, bronce, yuu, yutun. Cha ña cuví nyehe, ni ña chiñí ta ni ña cuví caca cuví cuan. 21 Ni ña casandihí ñu cha chahñí ñu, ta cha sataśí ñu. Ta ña sandihí ñu cha iyó ñu chihin rayñí ta chihin ñusihí ta ñima yñí ñu cuví, ta ñima ñasihí ra cuví. Ta ña sandihí ñu cha suhú ñu.

10

Ángel cha nyisó libru luhlu

1 Tyicuan ta nyehí inga ángel cha iyó xaan tunyee iñi chii, cha vachi noó ityi andiví mahñu noo vico. Ta noo coo yahnyi nyaá xiñi ra. Ta xiño xaan nuu ra tari ñanyii. Ta tari cha cayú ñuhú chaha ra, tyicuan caá. 2 Ta yihí ndaha ra noo libru luhlu cha tanuña nuu. Ta chinanyaá ra chaha chiyo vaha ra nu tyañuhu. Ta chaha chiyo satyin ra chinanyaá ra siqui ñuhu ñayiví. 3 Tyicuan ta ñihi xaan cana chaa ra, tari ndusu ndicaha cha nduxaan ti. Ta cuhva cha canachaa ra, chiñí ucha tahan ndusu cha siñ siñ caa tari cha cahán savi, tyicuan caa ndusu ra. 4 Ta cha yahá cha chiñí cha cahán ndi ucha ndusu cuan, tyicuan ta cuatyai nuu tutu. Soco chiñí noo ndusu ityi andiví, ta catyí chi chii tyehe caa:

—Coçumi xehun tuhun cha chiñun cahan ndi ucha ndusu cuan. Ta ma tyaun nuu tutu —catyí ndusu cuan chii.

5 Tyicuan ta ángel cha nyehí cha chañí nu tyañuhu ta siqui ñuhu ñayiví, nacoñehe ra ndaha chiyo vaha ra ityi andiví. 6 Ta ángel cuan tyanaha ra vatyí cahan ra noo cha ndicha cuenda Nyoo, ra nyitó tyicuan ri maa, ra cha savaha andiví ta ñuhu ñayiví ta tyañuhu ta tandihí cha iyó nuu chi. Ta catyí ra:

—Ñahri ca cha cucuee. 7 Vatyí cuhva cha cuquichaha tiví ángel

cu ucha cuan trompeta ra, yucuan cuhva cuchino cava tuhun xehe cha yihí iñi Nyoo tyi sacuvi ra, tari cuhva sacoto ra chi ra casacuví tyiño nuu ra, ra cacuví profeta cuenda ra —catyí ángel cuan.

8 Ta ndusu cha chiñí yuhu, cha quita ityi andiví, cahan tucu chi chihin inga chaha, ta catyí chi chii tyehe caa:

—Cuahan, ta quehun libru luhlu cha tanuña nuu, cha yihí ndaha ángel cha chañí nu tyañuhu ta nu ñuhu ñayiví —catyí chí.

9 Tyicuan ta chahin nu nyaá ángel cuan ta chiquen libru luhlu cuan nacuhva ra chii, ta catyí ra chii:

—Quehen, ta çahun, vixi xaan tari tyañuñu. Soco chichun cundu uva chi —catyí ra chii.

10 Tyicuan ta quehin libru luhlu cha yihí ndaha ángel cuan, ta chachi. Vixi xaan tari tyañuñu. Soco cha yahá cha chachi, uva xaan nduvi chi chichi. 11 Tyicuan ta catyí ra chii:

—Cuñí chi cha cunacatyun inga chaha tuhun cha cahán Nyoo siqui ñayiví cuaha xaan ñuu nyihi ta ñuu nahnu, ta siqui ñayiví siñ siñ sahan cahan, ta siqui ra cacuví rey —catyí ra chii.

11

Uvi tahan ra cacuví cha ndaa

1 Tyicuan ta cachaha ra noo ndoo cha tari caá noo yutun cha tyicuhvá chi. Ta cacatyí ra chii tyehe caa:

—Ndücüita ta tyicuhvon vehe ñuhu Nyoo ta arta ra, ta nacahvun yoso tahan ñu tuhvá sacahnú chi Nyoo yucuan. 2 Soco ma tyicuhvon nuquehe cha nyaá ityi chata vehe ñuhu cuan. Vatyí cha cuenda ñu inga ñuu cuví. Ta ñan ñu cuan cucuaca chaha ñu ñuu ii cuan chichi cha uñi cuiya sisava. 3 Ta yuhu cutachi uvi testigu cucahan ra cha cuende cha ni ri ca cha chichi noo mil uvi cientu uñi xico quiví. Ta cacuihno ra sahna tucuihya iñi.

4 Ta ican ninduvi testigu cuan cuví uvi tahan yutun olivo ta uvi tahan cañileru cha tayucú nuu Sutu Mañi yo,

ra nyacá ñaha siqui ñuhu ñayivi. ⁵ Tatu yóo ñu cuñí sataşi iñi chi ninduvi testigu cuan, cuquita ñuhu yuhu ninduvi ra, ta cahmi chi tandihí ñu xaan iñi chi ra. Ta tyicuan caa cucúvi ñu cuñí sataşi iñi chi ra. ⁶ Testigu cuan iyó ityi chi ra cha cacasi ra nu ma coon savi cha niri ca cha cachahá cuenda ra tuhun cahán Nyoo chi ñáyivi. Ta iyó tucu ityi chi ra cha casananduvi ra niñi chí ndutya. Ta iyó tucu ityi chi ra cha casanyehe ra tindoho chi ñu iyó siqui ñuhu ñayivi chihin tandihí ri nuu cuehe, yoso tahan chaha cha cacuñí maa ra. ⁷ Soco cuhva cha cuandihí cuhva cuenda ra tuhun Nyoo chi ñáyivi, cuquita noo quití xaan yavi cono cuan, ta cucañi tahan ti chihin ninduvi testugu cuan. Ta cucuvi chasaha ti chi ra. Ta cucahñi ti chi ra. ⁸ Ta coño ñuhu ra cundoo maa cava calle ñuu nu chihí Sutu Mañi yo nu cruzi. Ta tari Sodoma ta Egipto nanduvi ñuu cuan, (cha cuenda cha ña vaha cha sacuvi ñáyivi ñuu cuan). ⁹ Ta chichi cha uñi quivi sisava, cunyehe tandihí ñáyivi coño ñuhu ra, ñáyivi tandihí ñuu nyihí, ñáyivi tandihí ri tata, ta ñáyivi siin siin sahan cahán, ta ñáyivi ndihí ri ñuu nahnu, cunyehe ñu coño ñuhu ra. Ta ma cuhva ñu cha quihí coño ñuhu ra chichi ñuhú. ¹⁰ Ta ñu cha iyó siqui ñuhu ñayivi cu cusii xaan cuñí ñu cha cuenda cha cachihí ra cuan. Ta nyacua cutachi ñu regalo chi tahan ñu cha sií cuñí ñu, vatyí cachihí ninduvi rayii cha cachaha cuenda tuhun cahán Nyoo chi ñu. Vatyí chahá xaan ra tindoho chi ñu cha cuhva cha cuñí maa ñu. ¹¹ Soco cha yahá cha uñi quivi sisava, Nyoo sanandoto ra chi ra, ta candicuita tucu ra inga chaha. Ta tandihí ñu nyehe canandoto ra, canayuhvi xaan ñu. ¹² Tyicuan ta ninduvi testigu cuan cachiñi ra noo ndusu ñihi xaan ityi andivi. Ta catyí chi chi ra tyehe caa:

—Ndaa ndo ityi siqui ihya —catyí ndusu cuan chi ra.

Ta candaá ra ityi andivi chichi noo vico. Ta canyehe ñu xaan iñi chi ra nu canandaá ra. ¹³ Ta cuhva cuan quichí noo cha taan cahnu. Ta chichi

ñuu cuan canacoyo cuaha xaan vehe. Ta chichi cha uchi uchi tahan vehe, canacoyo noo noo. Ta cha tandihí chichi ñuu cuan chihí ucha mil ñáyivi cha cuenda cha taan cuan. Ta ñáyivi ña chihí, casacahnu ñu chi Nyoo, ra nyaá andivi, cha cuenda cha yuhvi ñu.

¹⁴ Yahá tindoho cu uvi cuan, soco numi ri cuquichi tindoho cu uñi.

Nu tiví ángel trompeta cu ucha

¹⁵ Ta ángel cu ucha nativi ra trompeta ra. Ta canatyacu ndusu ñihi xaan ityi andivi, ta catyí chi tyehe caa: Tandihí nu nyacá ñaha rey siqui ñuhu ñayivi ihya, cha yahá nanduvi chí Sutu yo Nyoo ta chi ra Cristo.

Ta maa ra cucunyaca ñaha tyicuan ri maa, catyí ndusu cuan.

¹⁶ Tyicuan ta ndi oco cumi ra cha vaha chahnu, ra canyicú nuu tyayu nu nyaá Nyoo, cachicuiñi chiti ra chihin nuu ra nya nu ñuhu. Ta casacahnú ra chi Nyoo. ¹⁷ Ta cacatyí ra: Nacuhvá ndi tyahvi nyoo chuun, Sutu Mañi nyuhu.

Nyoo ra iyó tandihí tunyee iñi chii cuvún.

Yoho iyón vityin, ta iyón nu quichaha tandihí ta nya cha cuquichun. Vatyí cha naquehen cuendon tunyee iñun.

Ta cha quichahun nyaca ñahun vityin. ¹⁸ Ta ñáyivi tandihí ñuu nahnu cuxaan ñu.

Soco cha chaá quivi cha tachi tuñun chi ñu.

Ta cha chaá quivi cha cucutuñi chi ñu ndiyi.

Ta cucuhvon cha vaha cha tahán chi chí ñu sacuvi tyiño nuun, ñu chahá cuenda tuhun cahún, ñu cha nacuhvá cuenda añaima chi maun, ta sacahnú ñu sivun.

Vasi cahnu ñu cuví ñu ta vasi ndahvi ñu.

Ta chaá cuhva cha sanaun chí ñu sativi chí ñáyivi siqui ñuhu ñayivi, cacatyí ra.

¹⁹ Tyicuan ta nuña yuvehe ñuhu Nyoo cha nyaá andivi, ta chichi vehe ñuhu natuvi caja cuenda cha natyihí

tahan ra tuhun chihin yo. Ta quihv_i tacha. Ta vaa ri maa cuv_i, ta cahan savi. Ta chiyo noo cha taan. Ta ñihi xaan coon savi yuu.

12

Nu chican nyicon noo coo cahnu chi noo ñaha sihi

¹ Tyicuan ta tuv_i noo seña cahnu andiv_i. Vaty_i quita noo ñaha sihi ta siqui noo ña ñanyii tari cha ñihnó ña vestido. Ta chañi ña siqui yoo. Ta yih_i noo corona cha uchi uvi tiño andiv_i xiñi ña. ² Ta ñaha sihi ihya ñohó sehe ña. Ta chacú chaa vavaha ña chihin cha uhvi cha cacú sehe ña, vaty_i nyehé xaan ña tindoho cha cua cacu sehe ña. ³ Tyicuan ta quita nonga seña ityi andiv_i. Ta nyeh_i noo coo cuaha cahnu. Ta nyaá ucha xiñi ti, ta uchi ndiqui ti. Ta tahan tahan xiñi ti yih_i noo corona. ⁴ Ta chihin suhma ti sanacoyo ti cha yatyin cha sava tiño andiv_i siqui ñuhu ñayiv_i. Ican coo ihya chicuñi ti nuu ñaha cha cua cacu sehe cuan, vaty_i ta cha cacu ri cue ta cachi ti chi cue. ⁵ Ta ñaha cuan sacacu ña noo rayi. Ta ican ra cuacunyaca ñaha tandihi ñáyiv_i iyó siqui ñuhu ñayiv_i. Ñihi xaan cua cunyaca ñaha ra tari cha chihin noo yutun caa vee. Ta cha yaha cacu ra, naxita Nyoo chi ra nu nyaá ra nu tyayu ra. ⁶ Ta ñaha cuan chino ña cuahan ña noo ñuhú ityi, nu sanduvaha Nyoo noo nu coo ña, vaty_i yucuan cucuhva ra cha cachi ña cha ni ri ca cha noo mil uvi cientu uñi xico quiv_i.

⁷ Yaha cuan ta chiyo noo cuaty_i nya andiv_i, nu cañi tahan ángel cahnu Miguel ta tandihi ángel cuenda ra chihin coo cahnu cuan. Ta coo cuan ta tandihi taty_i ña vaha cuenda ti, cacañi tahan chihin ra Miguel. ⁸ Soco ña saha ganaa ti cha cañi tahan ti. Ta ña ñih_i ca ti nu ndoo ti nya andiv_i chihin taty_i ña vaha cha candihi chihin ti. ⁹ Tyicuan ta tava ñehe Nyoo chi ti, cuv_i ti Coo Chahnu, cha nañi cuihna ra cuv_i nuu, ra cha sandav_i ñaha chi tandihi ñáyiv_i iyó siqui ñuhu ñayiv_i.

Maa ra ta taty_i ña vaha cuenda ra cacanacoyo ra nya nu ñuhu ñayiv_i.

¹⁰ Tyicuan ta chiñi noo ndusu ñihi nya andiv_i. Caty_i chi tyehe caa:

—Cha chaa nu cacu aña yoo vityin. Cha saha ganaa tunyee iñi Nyoo. Cha nyacá ñaha Nyoo yo vityin chihin ra Cristo Sehe ra. Vaty_i cha tava ñehe ra chi ra cha tyaa xaan cuaty_i siqui ra yañi yo ndiyaca ta ñiyaca nuu Nyoo. ¹¹ Ta ra yañi yo cacuv_i chasaha ra chi ra chihin niñi ra cuv_i Mbee Luhlu, ta chihin tuhun Nyoo cha cacahan ra tuhun chihin ñáyiv_i. Vaty_i ña yuhvi ca ra cha cucúvi ra. ¹² Yucuan chaha cus_i cuñi nyoho cha iyó ndo andiv_i. Soco jndahvi nyoho ñu iyó siqui ñuhu ñayiv_i ta nu tyañuhu! Vaty_i cuihna canacava ra nya andiv_i ta nyacua nya siqui ñuhu ñayiv_i nu nyicú ndo. Ta xaan xaan ra vaty_i chitó ra vaty_i suhva ri ca quiv_i ra nyaá.

¹³ Ta cha nyehé coo cahnu cuan vaty_i nacava ti nu ñuhu ñayiv_i, chica nyicon ti chi ñaha cha sacacu sehe cuan. ¹⁴ Soco ñaha cuan ñih_i ña uvi tahan ndichin nahnu tasu, tacuhva cuv_i ndava ña ta cono ña chi coo cuan nyacua nya ñuhu ityi cuan. Ta yucuan cuv_i nu cuñihi ña cha cachi ña chichi cha uñi cuiya sisava. ¹⁵ Ta coo cuan tuch_i ti ndutya chihin yuhu ti, vaty_i cono noo yuvi cahnu, vaty_i satyañi chi ñaha cuan. ¹⁶ Soco ñuhu ñayiv_i tyinyee chi ña, vaty_i ndata chi ta quihv_i yuvi cahnu cha tuch_i coo cahnu cuan chihin yuhu ti. ¹⁷ Ta cha cuenda cha ña cuv_i chasaha ti chi ña, cuahan ti cua cañi tahan ti chihin ñáyiv_i vachi tata ña, ñu cha quichahá tuhun cahán Nyoo, ñu nyicón cha ndicha cha cahán ra Jesucristo chihin cha niñi ñu.

13

Nu nyehé ra Juan uvi quit_i quiñi caa

¹ Chicuinanyaj_i nu ñiti yuhu tyañuhu cuan. Ta nyeh_i quitá noo quit_i quiñi xaan caa nuu tyañuhu. Ta nyaá ucha xiñi ti, ta uchi ndiqui ti. Ta tahan tahan ndiqui ti yih_i noo corona. Ta xiñi ti nyaá noo tuhun

cha cahán ña vaha síqui Nyoo. ² Quiti quiñi caa ihya caá ti tari caá noo cuiñi. Ta tari caá chaha yihí caá chaha ti. Ta yuhu ti tari caá yuhu ndicaha caá. Ta coo cahnu cuan chahá ti ityi chí quiti quiñi caa cha cunyaa ti nu tyayu ti. Ta chahá ti ityi chí ti cha cunyaca ñaha ti chí ñáyivi. ³ Ta noo xiñi quiti quiñi caa cuan tari maa cha nyaá noo nu cahvi cahnu. Soco nu cahvi cuan nduvaha. Ta iyo xaan cuñi tandihí ñáyivi iyó síqui ñuhu ñáyivi. Ta nanyicón ñu chí quiti quiñi caa cuan. ⁴ Ta sacahnú tucu ñu chí coo cahnu cuan, vatyi chahá ti ityi chí quiti quiñi caa cuan. Ta sacahnú tucu ñu chí quiti quiñi caa cuan, ta catyí ñu:

—¿Yóo cha cuví chí tari cuví chí quiti quiñi caa ihya? ¿Ta yóo cha cuví cañi tahan chihin ti? —catyí ñu.

⁵ Ta ñihí tucu quiti quiñi caa cuan ityi vatyi cahan ña vaha ti ta cahan quiñi caa ti síqui Nyoo. Ta cua cunyaca ñaha ti chichi cha uvi xico uvi yoo. ⁶ Ta tyicuan caa sacuvi ti. Cahan ti síqui Nyoo. Ta cahan ña vaha ti síqui nu nyaá Nyoo. Ta cahan ti chí ñu nyicú andivi. ⁷ Ta chicoo tucu ityi chí ti cha sacoo ti cuatyí síqui ñu cuenda Nyoo nyacua nya cuví chasaha ti chí ñu. Ta chicoo ityi chí ti síqui ñáyivi ndihí ri tata, ñáyivi sñn sñn sahan cahan, ñáyivi tandihí ri ñuu nyihí, tandihí ri ñuu nahnu, ⁸ tandihí ñu cha ma ñihí ñáyivi chaa coo chihin ra cuví Mbee Luhlu, ra cha chihí. Ma ñihí ñu vatyi nyata ni cumañi chingo ñuhu ñáyivi ta ñahri sívi ñu nyaá nu libru ra. Tandihí ñu cuan cusacahnu ñu chí quiti quiñi caa cuan. ⁹ Ta ñu cutuñi ñi, na quichaha ñu tuhun ihya: ¹⁰ Ñu cunyaca vehe caa chí inga ñu, suri cahun tucu maa ñu. Ta ñu cha cachahñi chihin cha xaan, suri chihin cuan cucúvi tucu maa ñu. Yucuan chaha cuñi xaan chí cha cunyeé xaan ñi ñu cuenda Nyoo. Ta cuñi chí cha chino ñi ñu chí ra.

¹¹ Yahá cuan ta nyehí inga quiti quiñi caa. Quita ti chichi ñuhú. Quiti ihya nyaá uvi ndiquí ti cha tari caá ndiquí mbee luhlu. Soco tari cahán

noo coo xaan vavaha cahán ti. ¹² Ta nyacá ñaha ti tari nyacá ñaha quiti quiñi caa cha xihna ri cuan. Suri chihin nuu quiti cha xihna ri cuan nyacá ñaha ti. Ta tyiyuhu ti chí ñuhu ñáyivi ta ñu iyó síqui na sacahnu ñu chí quiti quiñi caa cha xihna ri cuan, quiti cha nduvaha nu cahvi cahnu cha chinyaá chí ti. ¹³ Ta cuaha xaan milagru sacuvi ti. Nyacua cuví sanacoyo ti ñuhu cayú ityi andivi chihin nuu ñáyivi. ¹⁴ Ta sandavi ñaha ti chí ñáyivi iyó síqui ñuhu ñáyivi chihin seña cha cuví sacuvi ti chihin nuu quiti quiñi caa cha xihna ri cuan. Ta tachí ti nachino noo xiñahñu quiti quiñi caa cha tahnya cahvi chihin mityi, soco ña chihí ti. ¹⁵ Ta quiti quiñi caa cu uvi cuan chicoo ityi chí ti cha cuhva ti cha conyito xiñahñu quiti quiñi caa cha xihna ri cuan, vatyi xiñahñu cuan cuví cahan. Ta tachí xiñahñu cuan nacúvi tandihí ñáyivi ña cuñi sacahnu chí chí. ¹⁶ Ta sñn ri catyí ti vatyi na cunyaa noo tuñi chí tandihí ñáyivi, tandihí ñu nyihí, ñu chahnu, ñu tyayii, ñu ndahvi, ñu yori chitoho, ta ñu iyó chitoho. Ta cucunyaa tuñi cuan ndaha chiyo vaha ñu o tyaan ñu. ¹⁷ Ta yori maa cuví sata ta xico tatu ñahri tuñi cuan nyaá chí ñu. O tatu ñahri sívi ti, o número sívi ti nyaá chí ñu. ¹⁸ Tuhun ihya cuñi xaan chí cha chiñi tuñi. Ñu cutuñi ñi, na saha ñu cuenda número quiti quiñi caa cuan. Vatyi número noo rayii cuví. Ta número ra cuan ican cuví ñu cientu uñi xico ñu.

14

Nu sacahnú cientu uvi xico cumi mil ñáyivi chí Nyoo chihin cha chitá ñu

¹ Yahá cuan ta nyehí chí ra cuví Mbee Luhlu, nanyaá ra nu yucu Sión. Ta chihin ra tayucú cientu uvi xico cumi mil ñáyivi cha nyaá sívi ra tyaan ta sívi Sutu ra. ² Tyicuan ta chiñi noo cha cayu cha quichi ityi andivi, tari cayu cuaha yuvi nahnu. Ta tari cahán savi cha ñihí xaan, o tari noo ndusu cha cuaha xaan ra casacuacú arpa. ³ Ta cachitá ñu noo yaa chaa nuu tyayu Nyoo, ta nuu ndi cumi cha

nyitó cuan, ta nuu tandihí ra cha vaha chahnu cuan. Ta yori cuví cutuhva yaa cuan, ñn ri maa cientu uvi xico cumi mil ñu cha cacu añima siqui ñuhu ñayivi. ⁴ Ican ñu ihya cuví ñu cha ña chicoo cuatyí ñu chihin inga rayi ta ni ri rayi chihin inga ñusihí, vatyí ii ndoo ñu, ta nyicón ñu chi ra cuví Mbee Luhlu tandihí ri ityi nu cuahan ra. Cacú añima ñu ta cuví ñu ñu xihna ca chahá cuenda ñu chi ñu chi Nyoo ta chi ra cuví Mbee Luhlu. ⁵ Yori cuví catyí vatyí cuendu ñu, vatyí ni noo cuendu ña tuhvá ñu cahan. Yucuan chaha ñahri cuatyí ñu nuu Nyoo.

Tuhun cha sacoto uñi tahan ángel

⁶ Tyicuan ta nyehí inga ángel cuahan ndava ra andivi. Ta nyisó ra tuhun Nyoo cha ma ndihí ca maa, ta ican tuhun ihya cuví cha sacacú ra Cristo añima yo, Vatyí cusacoto ra tuhun ihya chi ñáyivi iyó siqui ñuhu ñayivi, ñáyivi ndihí ri ñuu nahnu, ta ndihí ri ñuu nyihi, ta ñáyivi ndihí ri tata, ta ñáyivi sñn sñn sahan cahan. ⁷ Ta ñihi xaan cahan ra ta catyí ra:

—Na yuhvi ndo chi Nyoo, ta sacahnu ndo chi ra. Vatyí cha chaa cuhva cha cua cutuñi chi ñáyivi. Sacahnu ndo chi ra savahá andivi ta ñuhu ñayivi, ta tyañuhu ta ndohyo ndutya.

⁸ Tyicuan ta cuahan inga ángel cuan chata ra, ta catyí ra:

—Cha canacava ñuu Babilonia cahnú vityin, cha taní chi. Vatyí ñu iyó ñuu cuan sañahá ñu chi inga ñáyivi iyó siqui ñuhu ñayivi cha quiñi caa tari sacuví maa ñu. Tari quivi cha sacuiñi ñu chi ñu chihin vinu ña vaha cuví cuan.

⁹ Ta nacahan ángel cu uñi chihin cha ñihi ndusu ra ta catyí ra:

—Tatu nya noo ñu sacahnú ñu chi quiñi quiñi caa cuan ta chi xiñahñu ti, o chahá ñu chi ñu cha cunyaa tuñi ti tyaan ñu, o ndaha ñu, ¹⁰ cunyehe xaan ñu tindoho vatyí cutyihí Nyoo chi ñu nu ñuhu, ta nu azufre tari cha cusacoho Nyoo noo vinu xaan chi ñu. Ta chihin nuu ángel ta chihin nuu ra cuví Mbee Luhlu cucuvi cuan.

¹¹ Ta ñuhma cha quitá nu nyehé ñu tindoho cuan tyicuan ri maa cuquita chi. Ta ma nyitatu maa ñu ndiyaca ta ñiyaca nu cohon ñu yucuan, vatyí sacahnu ñu chi quiñi quiñi caa cuan ta chi xiñahñu ti, o chahá ñu cha cunyaa tuñi siqui ti chi ñu. ¹² Yucuan chaha ñu yihí cuenda Nyoo, ñu quichahá tuhun cahán ra, ni ñi ñu chinó ñi ñu chi ra Jesús ta cuñí chi cha cunyehe xaan ñi ñu cha nyehé ñu tindoho sacuvi inga ñáyivi.

¹³ Tyicuan ta chiñi noo ndusu cha quichí ityi andivi, ta catyí chi chii tyehe caa:

—Tyaa tuhun ihya: “Vityin ta ityi nuu ca, si xaan cucuvi chi ñu chihí ta chinó ñi ñu chi Sutu Mañi yo.” Ndicha, catyí Tatyí Ii Nyoo vatyí cunyatatu ñu chihin tyiño sahá ñu. Ta ñn ri cuhun cha vaha cha sacuví ñu chihin ñu.

Nu cutachi tuñi Nyoo chi ñáyivi

¹⁴ Tyicuan ta nanyehí ta nyehí noo vico cuichin. Ta siqui vico cuan nyaá noo rayi cha ndicha cuii maa cha quichí nya gloria. Ta yihí noo corona xuhun cuaan xiñi ra. Ta yihí ndaha ra noo mityi cutya ta xaan. ¹⁵ Ta quita nonga ángel chichi vehe ñuhu ta chaa canachaa ra chi ra nyaá siqui vico cuan. Ta catyí ra:

—Vityin saha tyiñon chihin mityun, ta na satacon cosecha cha iyó siqui ñuhu ñayivi. Vatyí cha chaa cuhva, ta cha iyó siqui ñuhu ñayivi cha chityí chi —catyí ra.

¹⁶ Tyicuan ta ra cha nyaá siqui vico cuan sayahá ra mityi ra siqui ñuhu ñayivi, ta nasataca ra cha iyó nuu chi.

¹⁷ Tyicuan ta inga tucu ángel quita chichi vehe ñuhu cha nyaá andivi. Ta nyisó tucu maa ra noo mityi cutya cha xaan vavaha. ¹⁸ Ta nu nyaá arta quita tucu nonga ángel cha iyó ityi chi cha cunyaca ñaha chi ñuhu cha cayú. Ta canachaa ra ta cana ra chi ra cha nyisó mityi cutya cha xaan cuan. Ta catyí ra chi ra:

—Saha tyiñon chihin mityi xaan cha nyisón chiña, ta na satacon vatu

tichaha ndiví cha iyó siquí ñuhu ñáyiví, vatyí cha chityí —catyí ra.

¹⁹ Ta ángel cuan sayaha ra mi-tyi ra siquí ñuhu ñáyiví ta chahnya ra tichaha ndiví cha iyó siquí ñuhu ñáyiví. Ta tyihí ra noo nu tyihí ra vatyí cucuhñi ra ta quita ndutya chi. Ta cha tyehe caa cuñí chi catyí cha cutachi tuñi Nyoo chi ñáyiví. ²⁰ Ityi chata ñuu cachahñi ra tichaha ndiví cuan, ta cuñí chi catyí vatyí cachihí cuaha xaan ñáyiví, ta nu cuví cuan, cama xaan cama xaan niñi ñu chati. Ta chaa chi nya nu sucun nu nyaá frenu yuhu caballu ta tari cuhva noo uñi cientu kilómetro chinó niñi cuan.

15

Nu quita ángel chihin ucha ca tahan tindocho cha cunyehe ñáyiví nu ndihí tuhun

¹ Nyehe nonga seña cahnu andiví, ta yuhví xain cuví, vatyí nyehe ucha tahan ángel chihin ndi ucha tindocho. Chihin ihya cuví nu ndihí tindocho vatyí cundihí cha cuxaan Nyoo chihin ñáyiví cha ña quichahá ñu tuhun cahán ra.

² Ta nyehe tiquí noo cha tari caa tyañuhu, xiño tari caá ino, nasaca chi chihin ñuhu cha cayú. Ta ñu cha yaha cuví chasaha chi quiti quiñi caa cuan ta chi xiñahñu ti, ñu cuví chasaha cha ma cunyaa número sivi ti cuan chi ñu, tandihí ñu tayucú ñu yuhu tyañuhu cha xiño cuan. Ta ndahá ñu arpa, cha chaha Nyoo chi ñu. ³ Ta chitá ñu yaa ra Moisés, ra sacuví tyiño nuu Nyoo, ta yaa ra cuví Mbee Luhlu. Ta tyehe caa catyí ñu:

Cahnu ta iyo xaan caá tandihí maa cha sacuvún.

Nyoo, Sutu ndi, iyó tandihí tunyee iñi chuun.

Ndoo xaan ta ndicha xaan ityun.

Yoho Rey cuvún cuenda tandihí ñáyiví iyó siquí ñuhu ñáyiví.

⁴ ¿Yóo cha ma yuhví chuun, yoho Sutu Mañi nyuhu?

¿Yóo cha ma sacahnu chuun?

Vatyí noo tuhun ri maun cuví ra ii.

Ta cuquichi coyo ñáyiví tandihí ñuu, ta cusacahnu ñu chuun.

Vatyí cha nyehe ñu cha vaha cha sacuvún, catyí ñu chitá cuan.

⁵ Cha yaha tuhun ihya ta nanyehí nuña yuvehe ñuhu nya andiví nu cumi vaha ñu tabla cha nyaá ley.

⁶ Ta chichi vehe ñuhu cuan quita coyo ndi ucha ángel cha canyisó ndi ucha tindocho cuan. Ta cañihno ra sahma finu, cuichin ta xiño. Ta cayihí ra sincho xuhun cuaan ta nya pechu ra chitahan. ⁷ Tyicuan ta noo cha nyitó cuan, chaha cuan noo noo copa xuhun cuaan chi ndi ucha tahan ángel cuan. Ta chichi copa cuan tyitu maa yihí cha xaan Nyoo cha cutachi tuñi ra chi ñáyiví. Ta ícan ra iyó ra tyicuan ri maa. ⁸ Ta chichi vehe ñuhu cuan chitu maa chihin ñuhma cha cuenda cha cahnu xaan cuví Nyoo ta cha cuenda tunyee iñi iyó chi ra. Ta yori maa cuví quihvi chichi vehe ñuhu cuan cha niri ca cha cumañi ndihí ndi ucha tindocho cha nyisó ndi ucha tahan ángel cuan.

16

Copa cha yihí tindocho cha cua saquichi ndi ucha tahan ángel cuan

¹ Tyicuan ta chiñi noo ndusu ñihi cha quita vehe ñuhu nu nyaá Nyoo. Ta catyí chi chi ndi ucha ángel cuan:

—Cuahan ndo cua coyo ndo cha ñohó chichi copa chiña siquí ñáyiví iyó siquí ñuhu ñáyiví, vatyí Nyoo cutachi tuñi ra chi ñu —catyí ndusu cuan.

² Ángel cha xihna ri cuan chahan ra ta coyo ra cha ñohó chichi copa cuan siquí ñáyiví cha nyaá tuñi quiti quiñi caa cuan chi, ñu cha sacahnú xiñahñu ti. Ta quita noo nu cahvi xaan chi ñu, ta uhvi xaan.

³ Ta ángel cu uvi cuan coyo ra cha yihí chichi copa ra nu tyañuhu. Ta ndutya tyañuhu cuan nanduví niñi tari niñi noo ndiyí, ta tandihí cha nyitó chichi tyañuhu cuan cachihí.

⁴ Ta ángel cu uñi cuan coyo ra cha yihí chichi copa ra siquí yuvi nahnu ta siquí ndohyo ndutya ta cananduví chi niñi. ⁵ Tyicuan ta chiñi cha cahán ángel cuenda ndutya tyehe caa:

—Sutu Mañi yuhu, yoho cuvún noo ra vaha vatyí tachi tuñun chi ñáyivi tyehe caa, Sutu Mañi yuhu, Nyoo ii cuvún ta iyón vityin ta nu quichaha tandihi. ⁶ Vatyí maa ñu cachati ñu ñiñi ñáyivi cuendon ta ñiñi ra cacuví profeta cuendon. Ta vityin yoho tari cha cunasacohun ñiñi chi ñu vatyí tyicuan caa tahán chi chi ñu —catyí ángel cuan.

⁷ Ta chiñi tiqui vatyí cahan noo cha cahan ityi nu nyaá arta Nyoo tyehe caa:

—Ndicha, Sutu Mañi yuhu Nyoo, iyó tandihi tunyee ñiñi chuun. Vityin cha yaha tachi tuñun chi ñáyivi chihin cha ndicha ta chihin cha ndaa —catyí cuan.

⁸ Ta ángel cu cumi cuan coyo ra cha yihí chichi copa ra nu ñanyii. Ta chicoo ityi chi ñanyii cuan vatyí cahmi chi chi ñáyivi chihin ñuhu chi.

⁹ Ta tandihi ñu, quiñi xaan चाहमि ñanyii chi ñu. Soco ña canasama ñu cuhva iyó ñu, ni ña casacahnu ñu chi Nyoo. Ta cahan ña vaha ñu siqui Nyoo ra cuví sanyehe tindocho chi ñu tyehe caa.

¹⁰ Ta ángel cu ohon cuan coyo ra cha yihí chichi copa ra siqui tyayu quití quiñi caa cuan. Ta nduñaa ri nu nyacá ñaha ti. Ta ñáyivi cuenda ti, nyacua nacachi yihí ñu yaa ñu cha cuenda cha nyehé xaan ñu cha uhvi. ¹¹ Soco ni tyicuan caa ta ña sandihi ñu cha sacuví ñu cha ña vaha. Ta cahan ña vaha ñu siqui Nyoo ra nyaá andivi cha cuenda cha uhvi chi ñu ta cha cuenda nu cahvi chi ñu.

¹² Ta ángel cu ñu cuan coyo ra cha yihí chichi copa ra siqui yuvi cahnu Eufrates. Ta yuvi cuan na ityi chi tacuhva vatyí nuña noo ityi cha yaha ra cacuví rey cha vachi coyo ityi nu caña ñanyii. ¹³ Tyicuan ta nyehi cha quitá yuhu quití quiñi caa cuan ta yuhu coo cahnu cuan ta yuhu ra cuví profeta cuendu. Vatyí caquitá coyo uñi tahan tatyí ña vaha yuhu ra cuan. Tari caá sahva caá tatyí ña vaha cuan.

¹⁴ Ican ihya cuví tatyí cuihna cha casacuví milagru nahnu. Ta quitá

coyo chi vatyí sandu ñn ri chi tandihi rey cha iyó siqui ñuhu ñáyivi, vatyí cacañi tahan ra quivi cusañaha Nyoo tyi iyó tandihi tunyee ñiñi chi ra. ¹⁵ Ta catyí Nyoo:

—Nyehe ndo vatyí yuhu cha vachi tari noo ra suhu. Vatyí sana ri ñiñi ndo ta quihvi ra suhu vehe ndo. Si xaan cucuvi chi ñáyivi nyatú tuhva ri quivi quichi. Ta vii cumí ñu sahma ñu (o cuñi chi catyí añima ñu) tacuhva cha ma cuvityiyaa ñu nu cua quichi, ta ma cucahan nuu ñu, catyí Nyoo.

¹⁶ Ta cundu ñn ri ra cacuví rey nu nañi chi chihin sahan hebreo Armagedón.

¹⁷ Tyicuan ta ángel cu ucha cuan coyo ra cha yihí chichi copa ra nu tatyí, ta nya vehe ñuhu andivi nu nyaá Nyoo nu tyayu ra, quitá noo ndusu chaa xaan ta catyí chi:

—Cha cuví vityin —catyí ra.

¹⁸ Tyicuan ta vaa ri maa cuví ta cahan savi ta quihvi tacha. Ta ñihi xaan taan siqui ñuhu ñáyivi. Ta ndaha chicoo ñáyivi siqui ñuhu ñáyivi, ta ña tuhva taan cha ñihi xaan tyicuan caa. ¹⁹ Ta nu taan cuan ndata ñuu cahnu cuan, uñi nu ndata. Ta tandihi ca ñuu siqui ñuhu ñáyivi cana-coyo. Ta Nyoo nichon ñiñi ra chi ñuu cahnu Babilonia cuan vatyí quiñi xaan sacuví ñu. Ta sanyehe xaan ra tindocho chi ñu vatyí cuxaan xaan ra chi ñu. ²⁰ Tandihi ñuhú cha iyó chichi tyañuhu ta tandihi yucu, ndihi cuanaa. ²¹ Ta nahnu xaan tucu savi yuu coon ityi andivi siqui ñáyivi. Ta vee xaan. Tari noo cha uvi xico kilu vee noo noo savi yuu cuan. Ta ñáyivi cahan ña vaha ñu siqui Nyoo cha cuenda tindocho savi yuu cuan, vatyí cuví chi noo tindocho cahnu xaan cha cuenda ñu.

17

Nu cua tachi tuñi Nyoo chi noo ñaha cata ñiñi

¹ Tyicuan ta chichi cha ucha tahan ángel cha cayihí ndaha ucha copa cuan, quichi noo ra nu nyaí, ta catyí ra chii:

—Ñaha tyi cusañahi chuun yoso caa cucutuñi chi ñaha cata iñi cahnu cha nyaá siqui tyañuhu. ² Vatyí ra cacuví rey siqui ñuhu ñayiví casacuví ra cha quiñi caa chihin ña, ta ñáyiví cha iyó siqui ñuhu ñáyiví, tiví xaan ñu chihin cha quiñi caa cha sacuví ña —catyí ra chii.

³ Tyicuan ta nyehí noo cha sañaha Tatyí li Nyoo chii, ta chinyaca ángel cuan chii chiqui ndi nu yori maa ñáyiví iyó, ta yucuan nyehí chi noo ñaha, yosó ña siqui noo quití cuaha quiñi caa. Ta nyicú siví cha cahán ña vaha siqui Nyoo chi ti. Ta ucha tahan xiñi ti nyaá ta uchi ndiqui ti. ⁴ Ta ñaha cuan ñihnó ña noo sahna tyacu nya ta tyacu cuaha. Ta cuaha xaan xuhun cuaan iñi chi ña, yuu tyaqui ta perla ñandihí. Ta yihí ndaha ña noo copa xuhun cuaan tyitú yihí chihin cha ña vaha ta cha quiñi caa cha sacuví ña. ⁵ Ta tyaan ña nyaá noo siví cha cuví noo tuhun xehe cha ña cutuñi iñi ñáyiví. Vatyí catyí chi: “Ican ñaha sihi ihya cuví ñuu Babilonia cahnu, sihi tandihí ñu cha cata iñi ta tandihí cha ña vaha cha iyó siqui ñuhu ñáyiví.” ⁶ Tyicuan ta tuví iñi vatyí ñaha cuan chiñi ña chihin cha chihí ña niñi ñu cuenda Nyoo, ta ñu cha cachihí cha cuenda cha cahan ñu tuhun ra Jesús. Ta cha nyehí cuan, iyo xaan cuñi. ⁷ Tyicuan ta catyí ángel cuan chii:

—¿Ñáá tuhun cha iyo xaan cuñún? Cua sacote chuun ñáá cha cuñi chi catyí tuhun xehe ñaha sihi ihya ta quití quiñi caa cha yosó ña, quití cha nyicú ucha xiñi ta uchi ndiqui. ⁸ Quití quiñi caa cha nyehun cuan, cuví ti noo quití cha chiyo ta vityin yori ca ti iyó. Soco cuquita ti chichi yavi cono xaan cha ñahri nu chitahan. Yucuan ñohó ti cha ni cumañi ca ndihí tuhun ti. Ta ñáyiví iyó siqui ñuhu ñáyiví iyo xaan cucuñi ñu na nanyehe ñu chi quití quiñi caa cha chiyo tyicuan, soco vityin yori ca ti iyó, soco cuquichi ti inga chaha. Ñu cua nyehe chi ti cuan, cuví ñu ñu cha ñahri siví nyaá nu libru Nyoo nyata quivi chino ñuhu ñáyiví. Ican libru cuan cucatyí

yóo ñáyiví cuconyito tyicuan ri maa. ⁹ Ihya cuví noo cha cuñi chi nacoto ndo: Ndi ucha xiñi ti cuan cuñi chi catyí ucha tahan yucu cha nyaá ñaha cuan siqui. ¹⁰ Ta xiñi ti cuñi tucu chi catyí ucha tahan rey. Ta ohon tahan rey cuan cha yaha chinyaca ñaha ra. Ta rey cu iñu nyacá ñaha ra vityin. Ta ra cu ucha, cumañi ca cucunyaca ñaha ra. Ta quivi quichi ra nu ndihí, ña naha cucunyaca ñaha ra. ¹¹ Ta chichi cha ucha tahan rey cuan, cunanyita noo ra inga chaha, ta ican ra cucuvi ra rey cu uña. Ta ican tucu ra cuví quití quiñi caa cha chiyo quivi cuan, ta vityin yori ca ti soco cunanyita ti inga chaha. Ta cha yaha cunyaca ñaha tucu ti, yucuan cuvi nu cua ndihí tuhun ti.

¹² “Ta ndi uchi tahan ndiqui cha nyehun cuan, cuñi chi catyí ndi uchi tahan rey cha cumañi ca cacunyaca ñaha. Soco cucoo ityi chi ra cha cunyaca ñaha ra noo ora, in ri chihin quití quiñi caa cuan. ¹³ Ndi uchi tahan rey cuan in xaan ri cuhva cucaca xiñi ra. Ta cunacuhva ra tunyee iñi ra chi quití quiñi caa cuan. Ta tandihí ityi cha iyó chi ra cunacuhva ra chi ti. ¹⁴ Ta cucacañi tahan ra chihin ra cuví Mbee Luhlu. Soco ra cuví Mbee Luhlu cuan, cucuvi chasaha ra chi ra. Vatyí ican ra cuví nuu chi tandihí ra nyacá ñaha. Ta cuví tucu ra nuu chi tandihí ra cacuví rey. Ta ñu nyicú chihin ra, Nyoo nacanā chi ñu ta nacachi ra chi ñu. Ta ni xaan iñi ñu nyicón ñu chi ra.

¹⁵ Ta catyí tucu ángel cuan chii ñandihí:

—Tandihí tyañuhu cha nyehun cuan, cha nyaá ñaha cata iñi cuan siqui, ican cuví ñáyiví tandihí ñuu nyihi ta tandihí ñuu nahnu, ñu sin sin sahan cahan. ¹⁶ Ta ndi uchi ndiqui cha nyehun xiñi quití quiñi caa cuan cha cuví uchi tahan rey cuan, ican ra cuan cuasatasí iñi chi ñaha cata iñi cuan. Ta cusandoo ra chi ña cha notuhun ri maa ña. Ta cusanduvityiyaa ra chi ña. Ta cucachi ra coño ñuhu ña. Ta cutyihí ra chi ña nu cayú ñuhu. ¹⁷ Vatyí Nyoo

sana ndaha ra ańima rey cuan vatyi casacuvi ra cuhva cuńi maa ra. Vatyi ĩn ri cuhva cucaca xińi ra, ta cucuhva ra ityi chi quiti quińi caa cuan cha cunyaca ñaha ti tari rey nyacua nya chino cava tuhun cahán maa Nyoo. ¹⁸ Ñaha sihi cha nyehun cuan, ican cuvı ńuu cahnu cha nyacá ñaha chi tandihi ra cuvı rey siqui ńuhu ñayıvi.

18

Nu cua tivı ńuu Babilonia

¹ Cha yaha tuhun ihya ta nyehi inga ángel cha vachi noó ityi andıvi ta iyó xaan ityi chi ra. Ta ńuhu ñayıvi ndichin xaan nduvi chihin cha ndichin ra. ² Ta ñihi xaan ndusu ra ta canachaą ra, ta catyı ra:

—Cha yaha tuhun ńuu Babilonia cahnu cuan. Ta cha nanduvi chi nu iyó ra ña vaha. Vehe tandihi nuu tatyı ña vaha cha nanduvi. Ta taca saa ña vaha nanduvi ñandihi. ³ Vatyi tandihi ñayıvi tivı ńu cha cuenda cuatyı sacuvi ńuu Babilonia cuan. Ta ra cacuvı rey, ra nyacá ñaha siqui ńuhu ñayıvi tari cha cachıyo ra chihin ñaha cuan cha cuvı ńuu Babilonia. Casacuvi ra cuatyı chihin ña. Ta ra cha cuahan cuanaxico ńuu Babilonia cuan candutyayı ra chihin cha xico ra chi ńu ńuu cuan vatyi tandihi cuhva ta sanaa ńu xuhun ńu chihin cha cata ińi ńu.

⁴ Tyicuan ta chińi nonga ndusu ityi andıvi. Ta catyı chi:

—Quıta ndo ńuu chińa, nyoho cha cuvı ndo ñayıvi chii, tacuhva cha ma cutahan ndo sacuvi ndo cuatyı chihin ńu chińa, tacuhva ma cutahan ndo ndoho ndo tari maa ńu. ⁵ Vatyi cha caá ticuıti cuatyı ńu ńuu cuan, nyacua cha chaą chi nu nyaá Nyoo. Ta Nyoo cha nicohon ińi ra cha ña vaha sacuvi ńu. ⁶ Cuhva ndo chi ńu suri maa cha chaha ńu chi inga ñayıvi. Ta uvi ca chaha sananyehe ndo tındoho siqui cha sacuvi ńu. Cuhva ndo noo tındoho cunyehe ńu cha ñihi uvi ca chaha ican saha cha chaha maa ńu chi inga ñayıvi. ⁷ Yucuan chaha cuhva ndo cha iyo xaan tahan ńu chihin ta sanyehe xaan ndo tındoho

chi ńu tari cuhva cha sacahnu xaan ńu chi ńu ta cusı xaan ińi ńu. Vatyi catyı ńuu cuan chichi ańima chi: “Ihya nyaı tari noo reina. Ñima ñaha chihı yıi cuvı, ta ni ma cunyehe tındoho”, chicá ińi chi. ⁸ Yucuan chaha chichi cha noo ri quıvi cuquichi tındoho siqui ńuu cuan, cuquichi tuhun chihı, cuquichi tucuihya ińi ta coo tama ńuu cuan, ta cucayu chi chihin ńuhu. Vatyi iyó xaan tunyee ińi chi Nyoo Sutu yo ta cutachi tuńi ra chi ńu ńuu cuan.

⁹ Ra cacuvı rey siqui ńuhu ñayıvi ihya tari cha cachıyo ra chihin ñaha cha cuvı ńuu cuan, cuacu chaa ra, cunducuihya xaan ińi ra na cananyehe ra ńuhma cha cayú ńuu cuan. ¹⁰ Ta nya sava ri cucuitayucu ra cha cuenda cha cayuhvi ra tındoho cuan. Ta cucatyı ra:

—ıNdahvi yoho, ńuu cahnu Babilonia, ńuu cha chiyo xaan tunyee ińi chii! Vatyi noo tuhun cuhva ta chaą tındoho nyehun —cucatyı ra.

¹¹ Ta ra cha canaxico ñáá ndihi cha canaxico, suri cucuacu chaa ra ta cucanducuihya ińi ra cha cuenda ńuu cuan. Vatyi yori ca sata cha canaxico ra. ¹² Vatyi xico ra xuhun cuaan, xuhun cuichin, yuu tyaqui, perla, sahma lino finu, sahma seda, ta sahma tyacu nyaa, ta tyacu cuaha. Ta nyiso tucu ra tandihi nuu vitu cha vixi chahan ta ñáá ndihi cha chıno chihin noho landa, vitu tyaqui, ta caa cha cuvı bronce, ta caa cha cuvı hierro, ta yuu cha cuvı mármol. ¹³ Ta nyiso tucu ra canela, ñáá ndihi ca cha vixi chahan, tari cutu, mirra, perfume, vinu, acetye, yutyı paan finu, ta trigu. Ta suri nyiso tucu ra quiti cuenda carga, ta mbee, caballo, carru. Ta nyacua nya ańima ndahvi cha cuvı muşu ra ta caxico ra. ¹⁴ Ta catyı ra chi ñayıvi ńuu cuan tyehe caa:

—Ñahri ca cha tyaqui cha chiyo chuun, cha tahan xaan ińun. Ta cha cuachiyo tandihi cha tyayıun. Ta ma cunańihi ca maun tandihi cuan —catyı ra.

¹⁵ Ra cha caxico tandihi ihya, candutyayı ra cha cuenda cha sata ńu

ñuu cuan cha xicó ra. Cañi cu-
cuitayucu ra chihin cha cayuhvi ra
cha cunyehe ñu cuan tindocho. Ta
cucuacu chaa ra ta cunducuihya iñi
ra. ¹⁶ Ta cucatyí ra:

—¡Ndahvi ñuu cahnu cuan! Cuví chi
tari noo ñaha síhi cha ñihnó sahma
lino finu, sahma tyacu nyaa ta tyacu
cuaha. Ta iyo yihí ña xuhun cuan,
ta yuu tyaquí ta perla. ¹⁷ ¡Vatyí noo
tuhun ri cuhva ta ndihí cha tyayí
xaan cuan! —cucatyí ra caxico cuan.

Ta tandihí ra cuví capitán cuenda
barcu, chihin ñu cañoho chichi,
tandihí ñu casahá tyiño nu tyañuhu,
nya sava candoó ñu. ¹⁸ Ta cha
cananyehé ñu ñuhma cha cayú ñuu
cuan, canachaa ñu, ta catyí ñu:

—¿Ñáá nonga ñuu chiyo tari ñuu
cahnu ihya? Ñahri ca —cucatyí ñu.

¹⁹ Ta tyicu ñu niyaca xiñi ñu, ta
chacu chaa ñu. Ta cuihya iñi ñu, ta
canachaa ñu ta catyí ñu:

—¡Ndahvi nduvi yo cha cuanaa ñuu
cuan! Vatyí chihin cha tyayí ñuu
cahnu cuan ndutyayí tandihí yo, ñu
chicá noo nu tyañuhu chihin barcu.
¡Ta vityin noo tuhun cuhva luhlu ri ta
cuanaa chi! —catyí ñu.

²⁰ Soco cusí cuñi nyoho cha cuenda
ñuu cuan, nyoho cha iyó andiví, ny-
oho ñu yihí cuenda Nyoo ta nyoho ra
cachicá tyiño ra Cristo ta nyoho ra
cacuví profeta Nyoo. Cusí cuñi ndo
vatyí cha cuenda ndo ta tachí tuñi
Nyoo chi ñu cuan, ta cha cuenda cha
ña vaha cha sacuví ñu chihin ndo.

²¹ Tyicuan ta noo ángel cha iyó xaan
tunyeé iñi chi, nacoñehé ra noo yuu
molino cahnu xaan ta tuchi ra cua-
han nu tyañuhu, ta catyí ra:

—Suri tyehe caa cundihí tuhun ñuu
Babilonia cahnu, Ta ni inga ca chaha
ta ma nyehe ca ndo chi ñu. ²² Ta
ma cuiñi con yaa ityi chichi ñuu cuan,
vatyí yori ca cusacuacu arpa, ta ni
flauta, ta ni trompeta, ta ma tiví ca
ñu. Ta ni ma coo ca ra casahá tyiño
ñáá ndihí tyiño. Ta ni ma tyacu ca
cha cayu molino. ²³ Ta ni nonga ñuhu
tima, ta ma cayu ca chichi ñuu cuan.
Ta ni nonga chaha ta ma cuiñi yo

ndusu ñu cha iyó ñu vico tandaha.
Vasi ra canaxico cha chiyo ñuu cuan,
ican ra cuví ra cahnu ca cuví nuu
ñáyiví iyó síqui ñuhu ñayiví. Nyoho
ñu Babilonia, sandaví ñaha xaan ndo
chi tandihí ñáyiví iyó síqui ñuhu ñayiví
chihin cha satasi ndo.

²⁴ Vatyí cuaha xaan niñi ra cacuví
profeta Nyoo iñi chichi ñuu cuan
vatyí chahñi ñu chi ra. Ta iñi tucu
niñi ñu cuenda Nyoo, ta niñi tandihí
ñu cha cachahñi ñáyiví nicahnu ñuhu
ñayiví.

19

¹ Cha yaha cuan, ta chiñi noo ndusu
cha cuaha vavaha ñáyiví nya andiví.
Ta catyí ñu:

¡Cahnu xaan cuví Nyoo! Sutu Mañi
yo, Nyoo cuví ra ra sacacu chi
yo. Ta chi maa ra tahán chi
cha sacahnu yo, tyi iyó xaan
tunyeé iñi chi ra.

² Vatyí vaha sacutuñi ra chihin cha
ndaa ta chihin cha ndicha.
Tachí tuñi ra chi ñaha cata iñi cuan.
Vatyí sativí xaan ña chi ñáyiví iyó
síqui ñuhu ñayiví chihin cha
quiñi caa cha sacuví ña chihin
ñu.

Ta yucuan chaha tachí tuñi ra chi ña,
ta cha cuenda cha chahñi ña
chi ñu sacuví tyiño nuu ra.

³ Ta quichaha catyí ñu inga chaha:

—¡Cahnu xaan cuví Nyoo! Ñuhma
cha cayú ña, ma cucuita ca maa cha
ndaa chi ityi síqui —catyí ñu.

⁴ Ta ndi oco cumi ra cha vaha
chahnu ta ndi cumi tahan cha ny-
itó cha nyicú nu nyaá tyayu Nyoo,
cachicuiñi chiti ra nya nu ñuhú. Ta
casacahnú ra chi Nyoo nu nyaá ra nu
tyayu ra. Ta catyí ra:

—¡Na cuví chi tyicuan caa! ¡Cahnu
xaan cuví Nyoo! —cacatyí ra.

⁵ Ta nu nyaá tyayu Nyoo, tyacu noo
ndusu, ta catyí chi:

Sacahnu ndo chi Sutu yo Nyoo
Tandihí nyoho cha sacuví ndo tyiño
nuu ra,
ta quichahá ndo chi ra, vasi nyihi
ndo, o chahnu ndo.

Nu cua tandaha ra cuví Mbee Luhlu chihin ñáyiví chinó iñi chi ra

⁶ Ta chiñi tiqui noo ndusu tari cha cuaha vavaha ñáyiví cahán, tari ndusu nu cuaha xaan yuvi ndutya, ta tari cha ñihi xaan cahán savi. Ta catyí chi:

¡Cahnu xaan cuví Sutu yo Nyoo! Vatyí cha quichaha nyaca ñaha ra ta iyó tandihí tunyee iñi chi ra.

⁷ Na cusii cuñi yo ta na cutu yo chihin tusii iñi. Na sacahnu yo chi ra. Vatyí cha chaá cuhva cha cua coo yo vico tandaha ra cuví Mbee Luhlu.

Ta yoó cuacuvi yo tari noo ñasihí ra, cha nyatú tuhva ri yo quiví tandaha yo chihin ra.

⁸ Ta maa yo cucuihno yo sahma linu finu, ndii ta cuichin.

Vatyí sahma linu finu cuan cuñi chi catyí cha vaha cha sacuví ñáyiví cuenda ra.

⁹ Tyicuan ta quichaha catyí ángel cuan chi:

—Tyaa tuhun ihya nu tutu: “¡Sii xaan cuví chi ñu cha nyaá cuhun vico tandaha ra cuví Mbee Luhlu!”

Ta catyí tucu ra chii tyehe caa:

—Ican ihya cuví tuhun ndicha Nyoo —catyí ra chii.

¹⁰ Tyicuan ta chicuiñi chiti chaha ángel Nyoo cuan vatyí sacahni chi ra, soco catyí ra chii:

—Ma sacahnun chii, vatyí musu Nyoo cuví tucu yuhu tari yoho, ta tari tandihí ra yañi yo cha nyicón tuhun ndicha ra Jesucristo. Chi Nyoo tahan chi sacahnu yo —catyí ra chii.

Vatyí tuhun ndicha ra Jesús, ican cuví cha chahá cuhva chi ra cacuví profeta, ra cha cachahá cuenda tuhun cahán Nyoo chihin yo.

Nu sañahá chi cuenda ra cha yosó caballu cuichin

¹¹ Tyicuan ta nyehi tanuña andiví. Tyicuan ta tuví noo caballu cuichin. Ta ra yosó chi ti nañi ra Ra Ndicha Cha Nii Iñi Sacuvi Tyiño Nu Nyoo. Vatyí chihin cha ndaa sacutuñi ra chi ñáyiví, ta cañi tahan ra chihin cha ña vaha chihin cha ndaa. ¹² Xiño xaan chiti nuu ra tari cha cayú ñuhu. Ta

cuaha xaan corona yihí xiñi ra. Ta nyaá noo sivi chi ra cha noo tuhun ri maa ra chitó ra ñáá sivi nyaá chi ra. ¹³ Ta ñihnó ra noo sahma iñi niñi. Ta maa ra nañi ra Tuhun Cahán Nyoo. ¹⁴ Ta canyicón sindaro andiví chi ra, cañihnó ra sahma linu finu, sahma cuichin ta ndii. Ta cayosó ra caballu cuichin. ¹⁵ Ta chichi yuhu ra nañi Tuhun Cahán Nyoo cuan, quitá noo mityi cha xaan ni nduvi chiyo yuhu, vatyí chihin tuhun cahán ra cusañicuehe ra ñáyiví iyó siqui ñuhu ñayiví. Ta ñihi cunyaca ñaha ra chi ñu tari chihin noo yutun caa. Maa ra cutachi tuñi ra chi ñu tari noo ra cha sacunyihí tichaha ndiví chihin chaha ra. Ta cusacoño ra vinu uva chi ñu, ta ihya cuñi chi catyí tyi cuxaan Nyoo chihin ñu ta cutachi tuñi ra chi ñu vatyí chaha xaan ñu tisihi chi Nyoo ra iyó tandihí tunyee iñi chii. ¹⁶ Ta nu sahma ra ta nu sihin ra cuan nyaá letra cha catyí tyehe caa: “Ihya cuví Ra cuví nuu chi tandihí rey. Ta ican ra cuví nuu chi tandihí ra nyacá ñaha.”

¹⁷ Tyicuan ta nyehi chi nonga ángel nanyaá ra nu ñanyii. Ta chihin tandihí fuerza ra canachaa ra chi tandihí saa cha candavá ityi andiví, ta catyí ra chi ti:

—Ñaha ndo ta candu ñin ri ndo vatyí cuxiñi ndo cha chaha Nyoo cachi ndo. ¹⁸ Vatyí cachi ndo coño ra cacuví rey ta ra cuví nuu chi sindaro ta chi ra ndachan xaan saha chii. Ta cachi ndo coño caballu ta coño ñuhu ra cha cayosó chi ti. Cachi ndo coño tandihí ra, vasi ra yori chitoho o ra iyó chitoho, vasi ra nyihi o ra chahnu —catyí ra chi saa.

¹⁹ Tyicuan ta nyehi chi quití quiñi caa cuan ta chi ra cacuví rey cha iyó siqui ñuhu ñayiví chihin sindaro cuenda ra, vatyí candu ñin ri ra vatyí cacañi tahan ra chihin ra yosó caballu cuichin cuan ta chihin sindaro cuenda ra. ²⁰ Ta tin ra chi quití quiñi caa cuan ñin ri chihin ra cuví profeta cuendu cuan, vatyí chihin nuu quití quiñi caa cuan ta sacuví ra cuendu cuan milagru, ta sandaví ñaha ra chi ñáyiví cha chaha chi cunyaa tuñi quití

quiñi caa cuan, ta chi ñu sacahnú chi xiñahñu ti. Ta nyitó nyitó ra ta tuchi ra yosó caballu cuichin chi ninduvi ra nu ñuhú cha cayú chihin azufre. ²¹ Ta tandihí ca ñu cachihí ñu chihin mityi xaan cha quitá yuhu ra cha yosó caballu cuichin cuan. Ta tandihí maa saa, cachachí xaan ti coño ñu.

20

Nu sañahá chi cuenda noo mil cuiya

¹ Cha yaha tuhun cuan ta nyehí chi noo ángel vachi noó ityi andiví ta yihí ndaha ra ndaha tucu yuvehe yavi cono cuan. Ta yihí tucu ndaha ra noo cadena cahnu. ² Ángel ihya tñin ra chi coo cahnu cuan, quití cha cuví Coo Chahnu cuan, cha cuví cuihna. Ta chahñi ra chi ti chihin cadena noo mil cuiya. ³ Ta tuchi ra chi ti yavi cono cuan. Ta yucuan nacasi ra chi ti. Ta tyaa ra noo sellu yuvehe cuan tacuhva cha ma sandaví ñaha ca ti chi ñáyiví iyó siqui ñuhu ñáyiví, nyacua nya cha yaha noo mil cuiya. Ta cha yaha noo mil cuiya cuan ta cundachi tucu ti suhva ca quiví.

⁴ Yaha cuan ta nanyehí cuaha xaan tyayu tayucú. Ta nuu chi nyicú ñu cha chicoo ityi chi vatyí tachi tuñi ñu chi ñáyiví. Ta nyehé tiqui añima ñu chahnyá ñáyiví xiñi cha cuenda cha cahan ñu tuhun Nyoo cha chaha cuenda ra Jesús chi ñu. Ta maa ñu, ña sacahnú ñu chi quití quiñi caa cuan, ni chi xiñahñu ti, ni ña chaha ñu chi ñu cha cunyaa tuñi ti tyaan ñu, ni ndaha ñu. Nyehí vatyí ican ñu ihya, canandoto ñu ta chicunyaca ñaha ñu chihin ra Cristo noo mil cuiya. ⁵ Ican ñu ihya cuví cha nandoto cha xihna ca. Soco inga ityi ndiyí ña nandoto ñu nyacua nya cha yaha mil cuiya cuan. ⁶ ¡Sii xaan cuñí ñu ii cuenda Nyoo, ñu cha tahán chi nandoto cha xihna ri! Ta ma cuhun ñu tuhun chihi cu uvi nu cuví anyaya nu tachí tuñi Nyoo chi añima ña vaha. Vatyí cucuvi ñu sutu cha cuenda Nyoo ta cuenda ra Cristo. Ta cucunyaca ñaha ñu mil cuiya chihin ra. ⁷ Ta cha yaha mil cuiya cuan, tyicuan ta cundachi cuihna nu ñohó

ra vehe caa. ⁸ Ta cuquita ra, ta cusandaví ñaha ra chi ñáyiví nicahnu siqui ñuhu ñáyiví. Cuquita ra vatyí cusandaví ñaha ra chi ñáyiví Gog ta Magog, ñu xaan iñi chi Nyoo. Ta cusandu iin ri ra chi sindaro ñuu cuan vatyí cuhun ra cuatyí. Cuaha xaan ra, tari maa ñiti yuhu tyañuhu. ⁹ Tyicuan ta cuahan coyo ra nicacahnu siqui ñuhu ñáyiví. Ta cachasi cutya ra nu iyó ñu cuenda Nyoo ñuu Jerusalén nu cuñí xaan Nyoo. Soco Nyoo cusaquichi ra ñuhú ityi andiví ta cucahmi chi chi tandihí sindaro cuan. ¹⁰ Ta cuihna cha sandaví ñaha chi ñu, cutuchi Nyoo chi ra chichi anyaya cahnu nu cayú ñuhú chihin azufre, nu tuchi tucu ra chi quití quiñi caa cuan ta chi ra cha cuví profeta cuendu. Ta yucuan cunyehe ra tindocho tyicuan ri maa ndiyaca ta ñiyaca.

Nu cua cutuñi chi ñáyiví nu tyayu cuichin nu nyaá Nyoo

¹¹ Tyicuan ta nyehí noo tyayu cuichin cahnu. Ta nyehí chi ra nyaá nuu tyayu cuan. Ta chihin nuu ra ta cuanaa ñuhu ñáyiví ta andiví. Ta ñahri ca maa nu cucunyaa chi. ¹² Ta nyehí chi tandihí ñu ndiyí, ñu chahnu ta ñu nyihi, tayucú ñu nuu Nyoo. Tyicuan ta canuñá libru cha nyaá tandihí cha sacuvi ñu quiví chiyó ñu ñáyiví. Ta nuña tucu inga libru cha nyaá sivi ñu cha cuconyito tyicuan ri maa chihin Nyoo. Ñu ndiyí cuan cuacutuñi chi ñu ñáá ndihí cha chinyacuvi ñu cha nyaá nu tandihí libru cuan. ¹³ Ta tyañuhu nacuhva cuenda chi chi ndiyí cha cumí chi. Ta tandihí nu nyicú ñu chihí nu nyacá ñaha Tuhun Chihi, nacuhva cuenda chi ndiyí cha cumí chi. Ta tandihí ñu cuatahan chi chi ñu yoso cuhva cha casacuvi ñu. ¹⁴ Tyicuan ta cundihí Tuhun Chihi cuan ta ñahri ca nu cuacunyicu ñu chihi, vatyí cutuchi Nyoo chi ninduvi tahan cuan chichi anyaya cahnu nu cayú ñuhú. Ta ican ihya cuví Tuhun Chihi Cu Uvi. ¹⁵ Ta yucuan tuchi ra chi ñu cha ñahri sivi nyaá nu libru cha cuenda ñáyiví cha

cua conyito chihin Nyoo tyicuan ri maa.

21

Nu nyehe ra Juan andivi chaa ta ñuhu ñayivi chaa

¹ Yahā cuan ta nyehi noo andivi chaa ta noo ñuhu ñayivi chaa, vaty andivi ta ñuhu ñayivi cha xihna ri cuanaa chi. Ta tyicuan caa tucu tyañuhu, cuanaa tucu cuan. ² Yuhu ra Juan nyehi ñuu ii Jerusalén chaa cha vachi noó ityi andivi nu nyaá Nyoo. Ta tyaqui xaan nduvij chi tari noo ñaha cha cua tandaha chihin noo ra, tyicuan caa nduvij chi. ³ Ta chiñi noo ndusu ñihi cha quita ityi andivi, ta catyí chi:

—¡Nyehe ihya! Nyoo, iyó ra mahñu ñáyivi. Ta cua coo ra chihin ñu. Ta maa ñu cua cuvi ñu ñuu ra. Ta cua cunyaa ra chihin ñu. Ta cua cuvi ra Nyoo cuenda ñu. ⁴ Ta Nyoo cunacuhva ra ndutya nuu ñu. Ta ma cúvi ca ñu. Ta ma cucuihya ca iñi ñu. Ma cuacu ca ñu vaty ma nyehe ca ñu tindoho. Ta ma nyehe ca ñu cha uhvi. Vaty tandihi cha chiyo, cha yahā tuhun —catyí chi.

⁵ Tyicuan ta Nyoo, ra cha nyaá nu tyayu cahnu, catyí ra:

—Nyehe. Sanduchaj tandihi maa cha iyó.

Ta catyí tucu ra:

—Tyaa tuhun ihya, vaty tuhun cahín ihya, ndicha. Ta cuvi cunñi iñun vaty tuhun cahín cuchino cava —catyí Nyoo chii.

⁶ Yahā cuan ta catyí tucu ra chii:

—Cha tandihi chinq cava vityin. Yuhu cuvi ra xihna cuiri, ta yuhu cundo nu ndihi tuhun. Ñáyivi cha ityi ndutya cha cuñi ñu tuhun yuhu, cucuhve ndutya cha chahá ñayivi cha ma naa ca maa coho ñu, ta ñahri cutiyahvi ñu. ⁷ Ñu cha cuvi chasaha chi ra ña vaha, cuñihi ñu tandihi ihya, tari noo cha cundoo chi ñu. Ta yuhu cucuvi Nyoo cuenda ñu ta maa ñu cucuvi ñu sehi. ⁸ Soco ñáyivi cha yuhví xaan, ñu cha ña chinó iñi, ñu cha quiñi iyó, ñu cha chahñi ñáyivi,

ñu iyó chihin rayii, ta ñima yii ñu cuvi, o ra iyó chihin ñusihi ta ñima ñasihi ra cuvi, ñu tasi, ñu casacahnú xitohyo, ta tandihi ñu cuendu, tandihi ñu cuan, tahán chi cuhun ñu chichi anyaya cahnu nu cayú ñuhu chihin azufre, nu cuvi Tuhun Chihi Cu Uvi, nu tachi tuñi Nyoo chi aña vaha.

Nu nyehe ra Juan yoso caa cucuvi ñuu Jerusalén chaa

⁹ Tyicuan ta quichi noo ángel cha ucha tahan cuan, ra cha canyisó ndi ucha copa tyitú chihin ndi ucha tahan tindoho cuan. Ta cahán ra chihin ta catyí ra:

—Ñaha, ta cusañahi chuun yóo ñu cuvi ñu yihí cuenda ra Cristo, ñu cha cuvi tari ñasihi ra, tyi ra cuvi Mbee Luhlu cuvi ra —catyí ra chii.

¹⁰ Ta Tatyi Ii Nyoo chinyaca chii noo yucu cahnu ta sucun. Ta sañaha ra ñuu ii, ñuu Jerusalén cahnu cuan chii. Maa maa cuhva cha vachi noó ñuu cuan ityi andivi nu nyaá Nyoo, sañaha ra chii. ¹¹ Xiño xaan ñuu cuan chihin cha tyaqui Nyoo. Xiño xaan tari caá noo yuu tyaqui, tari caá yuu jaspe, ta xiño tari ino. ¹² Nicachico ñuu cuan sucun xaan sama. Ta iyó uchi uvi tahan yuvehe. Ta noo ángel nanyaá tahan tahan yuvehe. Ta ndi uchi uvi tahan sivi tata ñáyivi Israel nyaá yuvehe cuan. ¹³ Uñi tahan yuvehe cuan nyaá ityi nu caña ñanyii. Ta uñi tahan ityi norte. Ta uñi tahan ityi tyañuhu. Ta uñi tahan ityi nu quee ñanyii. ¹⁴ Uchi uvi tahan yuu yihí nu sama ra nu cacu chaha chi. Ta nuu yuu cuan nyaá sivi ndi uchi uvi apóstol cuenda ra cuvi Mbee Luhlu.

¹⁵ Ta ángel cha cahán chihin cuan, yihí ndaha ra noo yutun xuhun cuan, vaty chihin cuan cutyicuhva ra ñuhú ñuu cuan, ta yuvehe ta nu sama nicachico ñuu cuan. ¹⁶ Cumi tahan tutun ñuu cuan nyaá. Ta inuu ri cuhva cha quehen ta cha cañi. Ta ángel cuan tyicuhva ra ñuu cuan chihin yutun xuhun cuan cuan. Ta tyicuhva ra, ta quita uvi mil uvi cientu kilómetro. Ta inuu ri cha

cañi ta cha sucun ta cha quehen.
 17 Tyicuan ta tyicuhva ra nu sama nicachico ñuu cuan. Ta quita uñi xico cumi metru cha cocon, tari tyicuhvá ñáyivi, tyicuan caa tyicuhva ángel cuan.

18 Chihin yuu jaspe sama yuhu ñuu cuan. Ta maa maa ri xuhun cuaan cuví ñuu cuan. Tari caá noo ino cha ndi vavaha, tyicuan caa. 19 Ta yuu cha cuví cimientu cuan tandi ri maa nuu yuu tyaqui cuví: yuu cha xihna ri cuví jaspe; yuu cha cu uvi cuví yuu zafiro; yuu cha cu uñi cuví yuu ágata; yuu cha cu cumi cuví yuu esmeralda; 20 ta yuu cu ohon cuví yuu ónice; ta cha cu iñu cornalina; ta cha cu ucha crisólito; ta cha cu uña berilo; ta cha cu ñin topacio; ta cha cu uchi crisoprasa; ta cha cu uchi ñin jacinto; ta yuu cu uchi uvi cuví amatista. 21 Ndi uchi uvi yuvehe cuan cuví chi uchi uvi tahan perla. Tahan tahan yuvehe cuan, ta chino chi chihin noo ri perla. Ta nu cuví ityi cahnu ñuu cuan, maa ri maa xuhun cuaan cuví, tari ino cha xiño.

22 Ni noo vehe ñuhu ña nyehí chichi ñuu cuan, vatyí Sutu yo Nyoo, ra iyó tandi tunyee iñi chii, ican cuví vehe ñuhu ñu cuan, ta tyicuan caa tucu ra cuví Mbee Luhlu. 23 Ñuu cuan ña chiñuhú cha sacundichín ñanyii. Ta ni cha ndichin yoo ta ña chiñuhú. Vatyí suri maa cha ndichin Nyoo chihin ra cuví Mbee Luhlu cuví cha sacundichin chichi ñuu cuan. 24 Tandihí ñu cha cacu ña ñima, cucaca noo ñu nu ndichin ñuu cuan. Ta ra cacuví rey siqui ñuhu ñayivi cunyaca ra cha tyayii ra ta cuhva cuenda ra tandihí cha cahnu cacuví ra chi ñuu cuan. 25 Ta ma nacunyasi yuvehe cha ñicahñu, ta yucuan ma coo cha cha cuaa. 26 Ta tandihí cha tyayii, ta cha cahnu, cha iyó siqui ñuhu ñayivi cuchaa chi nya ñuu cuan. 27 Soco ma cuví quihvi cha quiñi caa. Ni noo ñu sacuví cha quiñi caa, ni ñu cuendu ma cuví quihvi ñu. Noo ri maa ñu nyaá sivi nu libru ra cuví Mbee Luhlu cuquihvi ñu, vatyí cuconyito ñu chihin ra tyicuan ri maa.

22

1 Tyicuan ta sañaha ángel cuan noo yuvi cuii vavaha chii. Ndutya cha chahá cha conyito yo cuví. Cuii vavaha tari noo yutyi finu. Ta quita yuvi cuan nuu nyaá tyayu Nyoo ta nu nyaá ra cuví Mbee Luhlu. 2 Mahñu ityi cahnu ñuu cuan ta ninduvi chiyo yuvi cuan, nanyaá yutun cha chahá cha conyito yo. Ta uchi uvi chaha cha noo cuiya chahá tun chiti. Tahan tahan ri yoo chahá tun chiti. Ta ndaha tun, vaha cha cuví tatan chi ñáyivi iyó siqui ñuhu ñayivi. 3 Ñuu cuan, ñahri maa cha ña vaha cucoo vatyí yucuan nyaá Nyoo nu tyayu ra ta cucunyaca ñaha ra chihin ra cuví Mbee Luhlu. Ta cusacahnu ñu cuenda ra chi ra. 4 Ta cunyehe ñu chi ra chihin nuu ñu. Ta cua cunyaa sivi ra tyaan ñu. 5 Ta ma coo ca cha cha cuaa yucuan. Ta ñu coo yucuan ma cuchihñuhu ñuhu lámpara chi ñu, ni ñuhu ñanyii. Vatyí Nyoo Sutu yo cusacundichin ra nu nyicú ñu. Ta maa ñu cucunyaca ñaha ñu chihin ra tyicuan ri maa.

Nu sañahá chi vatyí cha cuyatyin quichi ra Cristo

6 Tyicuan ta catyí ángel cuan chii:

—Ihya tuhun ndicha cuví, ta cuví cunñi iñun vatyí cuchino cava tuhun ihya. Ta suri maa Sutu yo Nyoo ra cahan chihin yuhu ra cacuví profeta cuenda ra ta cha naha, ican ra tachi ra chi ángel ra, vatyí sañaha ra chi ñu sacuví tyiño nuu ra yoso caa cucuvi cha numi ri —catyí ra.

Ta catyí Sutu Mañi yo:

7 —¡Cha cuñi quichi! —catyí ra.

¡Siñi xaan cuñi ñu cha sacuví cuhva cahán tuhun Nyoo cha nyaá nu libru ihya!

8 Yuhu ra Juan, chiñi tuhun ihya. Ta nyehi tandihí ihya. Ta cha yaha nyehi ta chiñi, chicuiñi chiti chaha ángel cha sañaha cuan chii, vatyí sacahni chi ra.

9 Soco maa ra catyí ra chii:

—Ma sacahnun chii, vatyí yuhu, musu Nyoo cuví, tari yoho. Ta yañun

cuví, tari ra yañi yo cha cacuví profeta cuenda Nyoo, ta tari tandihí ñu quichahá tuhun cha nyaá nu libru ihya. Chi Nyoo tahán chi sacahnu yo —catyí ra chii.

¹⁰ Ta catyí tucu ra chii:

—Ma tixehun tuhun Nyoo cha nyaá nu libru ihya, vatyí cha cuyatyin quiví cha cuchino cava chi.

¹¹ Soco saña chi ñu quiñi iyó, na sacuvi ca maa ñu cuhva cuñí maa ñu. Ta ñu sacuví cuatyí na sacuvi ca maa ñu. Soco ñu sacuví cha vaha, na sacuvi ca ñu cha vaha. Ta ñu ii, ñu nacuhva cuenda añima chi Nyoo, na cu ñi ca iñi ñu chihin ra —catyí ra chii.

¹² Ta Sutu Mañi yo catyí ra:

—Nyehe ndo. Cha cuyatyin quiví quichi. Ta cutiyahvi chi tahan tahan ñáyiví yoso cuhva cha sacuví ñu, tatu cha vaha o cha ña vaha. ¹³ Yuhu cuví ra xihna cuiri ta yuhu cundo nu ndihí tuhun, yuhu iyé nu quichaha tandihí ta cucoo que nu cundihí tuhun —catyí Sutu Mañi yo.

¹⁴ Si xaan cucuvi chi ñu sanduvii sahma o añima cuví cuan, vatyí coo ityi chi ñu cachi ñu chiti yutun cha chahá cha conyito añima yo tyicuan ri maa. Ta cuví quihvi ñu yuvehe ñuu cuan. ¹⁵ Soco ñu cha sacuví cha quiñi caa, ñu tasi, ñu cha iyó chihin tahan, ta ñima ñasihí ra o yí ñu cuví, ñu chahñi ñáyiví, ñu sacahnú xitohyo, ta tandihí ñu ñi cuendu ta sandavi ñaha ñu, tandihí ñu cuan, cundoo ñu ityi chata ñuu cuan.

¹⁶ Ta catyí tucu Sutu Mañi yo:

—Yuhu ra Jesús, sacuhin chi ángel cuende vatyí sacoto ra tandihí tuhun

ihya chi ñu nyicú vehe ñuhu. Yuhu cuví ñáyiví chahnu chi rey David. Ta vachi tiqui tata ra ñandihí. Ta cuví tiqui tiño ca hnu cha xiño, cha caña cha ñaa ca —catyí ra.

¹⁷ Tatyí Ii Nyoo ta ñasihí ra cuví Mbee Luhlu cha cuví ñu cuenda ra, catyí ñu tyehe caa:

—Ñaha, Sutu Mañi yuhu —catyí ñu.

Ta ñu chiñi tuhun ihya, ta catyí ñu chi ra:

—Ñaha —catyí ñu.

Ta ñu ityi ndutya cha conyito yo chihin, ta tandihí ñu cuñi quichi, na quichi ñu ta coho ñu ndutya cha chahá cha conyito añima yo, ta ñahri cutiyahvi ñu.

¹⁸ Ta yuhu catyí chi tandihí ndo cha chiñi ndo tuhun Nyoo cha nyaá nu libru ihya, yuhu sacoté chi ndo noo tuhun ihya: Tatu nya noo ñáyiví sanducuaha ca ñu tuhun ihya, Nyoo cunatyiso ca ra tindoho cha nyaá nu libru ihya siqui ñu. ¹⁹ Ta tatu nya noo ñáyiví tinyaa ñu suhva tuhun Nyoo cha nyaá nu libru ihya, Nyoo cu tinyaa ra cha tahán chi chi ñu cha nyaá nu libru cha cahán chi tuhun cha cuconyito ñu tyicuan ri maa ta cucoo ñu ñuu ii cuan. Ta ma tahan ca chi chi ñu cha vaha cha cahán nu libru ihya. ²⁰ Ta Sutu Mañi yo ra cha chahá cuenda ihya catyí ra tyehe caa:

—Cha ndicha vatyí cha cuñi quichi —catyí ra.

Ta yuhu catyí:

—Na cuvi chi tyicuan caa. Ñaha, Sutu Mañi yuhu, Jesús —catyí yuhu.

²¹ Na naquehen tandihí ndo cha vaha chahá Sutu Mañi yo Jesucristo chi yo. Ta na cuvi chi tyicuan caa.